


Yù bilin ni Namarò nga meyanung kâ Apu Kesu

Kiristu: Yù bagu nga tarátu ni Namarò sù ira nga

mangikatalà kâ Apu Kesu Kiristu



New Testament in Atta, Pamplona

**Yù bilin ni Namarò nga meyannung kê Apu Kesu
Kiristu: Yù bagu nga tarátu ni Namarò sù ira nga
mangikatalà kê Apu Kesu Kiristu
New Testament in Atta, Pamplona**

copyright © 1996 Wycliffe Bible Translators, Inc.

Language: Pamplona Atta (Atta, Pamplona)

Translation by: Wycliffe Bible Translators, Inc.

Copyright Information

© 1996, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Atta, Pamplona

© 1996, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 11 Nov 2022 from source files dated 29 Jan 2022
b48ec929-782f-5e43-b9b5-5ce8e5d5989a

Contents

Mattiu	1
Markus	52
Lukas	82
Kuan	134
Kingngúá	172
Roma	219
1 Korinto	244
2 Korinto	268
Galasia	283
Epeso	292
Pilippay	301
Kolosi	307
1 Tessalonika	313
2 Tessalonika	318
1 Timotio	321
2 Timotio	328
Titò	333
Pilemon	337
Kebru	339
Ime	359
1 Eduru	365
2 Eduru	372
1 Kuan	376
2 Kuan	383
3 Kuan	384
Jud	386
Nepalappà	389

Yù Napiá nga Dámak nga Meyannung kâ Apu Kesu Kiristu nga Initúrâ ni Mattiu

Yù Meyannung sù Initúrâ ni Mattiu

Si Mattiu yù Kudio nga mangngágan gapay ta Libi (Mattiu 9:9; Markus 2:14), nga inagálán ni Apu Kesu ta umay makituddu kuna. Á mebiláng si Mattiu sù ira mapulu duá nga kábulun ni Apu Kesu nga sinudduán na ta tallu ragun.

Á ipalappâ ni Mattiu ta si Apu Kesu yù Patul nga iddagán nayù ira Kudio ta áddè ngaw gári. Nelistá saw yù ira naggaká kâ Apu Kesu, nga namegapu kâ Kákay Abrakam ta áddè kâ Kusè nga atáwa ni Maria nga yená ni Apu Kesu. Á yáyù nga mepasingan ta si Apu Kesu yù ginaká ni Patul Dabid, nga makáwayyá nga mammaguray, megapu sù panullâ ni Namarò kuna.

Á mepasingan gapay ta si Apu Kesu yù mesturu. Á ipakánnámmu na yù ipakuá ni Namarò sù ira tatole na, áнна yù aru nga napiá nga initabbâ ni Namarò sù ira nga mangkatalâ kuna. Á aijan gapay yù ituddu na nga “Kapiánán nayù Itaddán ni Namarò” (22:37-38). Á maporián sù libru yù kinagi na nittam nga ábbúnat tam ta “Yù Panullâ ni Apu Kesu nittam, ta Mangipakánnámmu ittam kuna” (28:18-20).

Yù Mayán na yawe Napiá nga Dámak

Yù ira Naggaká kâ Apu Kesu (1:1–2:23)

Yù Pangilayalayâ ni Kuan, nga Minánnigù (3:1-12)

Yù Pakirigù ni Apu Kesu kâ Kuan (3:13-17)

Yù Pamarubá ni Satanas kâ Apu Kesu (4:1-11)

Yù Pangituddu ni Apu Kesu ta Keggá na ta Galilia (4:12–18:35)

Yù Pangilayalayâ ni Apu Kesu ta Keggá na ta Puddul (5:1–7:18)

Yù Áddasal nga Inituddu ni Apu Kesu (6:9-13)

Yù Meyannung sù Pammagure ni Namarò (13:1-52)

Yù Páno ni Apu Kesu ta Galilia nga Umay ta Jerusalem (19:1–20:34)

Yù Pangikeká ra kâ Apu Kesu áнна Pamapáte ra kuna (21:1–27:66)

Yù Pagáddekán na yawe Ággaw áнна yù Dattál nayù Pammagure ni Namarò (24:1–25:46)

Yù Paginnanole ni Apu Kesu, nga Matolay (28:1-20)

Yù ira Naggaká kâ Apu Kesu

Lukas 3:23-38

¹ Yawe yù naketúratán nayù ira naggaká kâ Apu Kesu Kiristu. Neyaná si Apu Kesu sù ira ginaká ni Patul Dabid. Á neyanâ si Patul Dabid sù ira ginaká ni Kákay Abrakam.

² Danniaw yù ira nelistá nga namegapu kâ Kákay Abrakam.

Á si Abrakam yù ammò ni Isak, á yù apù ni Abrakam si Akup, á yù ira ápù na ta siku si Juda áнна yù ira wáwwagi ni Juda.

³ Á yù ira ápù ni Abrakam ta dulung di Peres kâ Sera nga ánâ ni Juda, á si Tamar yù innò da. Á yù apù ni Abrakam ta tumang si Esron.

Á si Esron yù ammò ni Ram. ⁴ Á yù apù ni Esron si Amminadab, á yù apù na ta siku si Nassion, á yù apù na ta dulung si Salmun.

⁵ Á si Salmun yù ammò ni Boas, áнна yù innò ni Boas si Rakab*.

Á si Boas yù ammò ni Obed, áнна yù innò ni Obed si Lus†. Á yù apù ni Boas si Jesse, nga anâ ni Obed. ⁶ Á yù apù ni Boas ta siku si Patul Dabid, nga anâ ni Jesse.

Á si Patul Dabid yù ammò ni Solomon. Á yù innò ni Solomon yù babay nga atáwa na ngaw ni Uraya. ⁷ Á yù apù ni Patul Dabid si Robowam, á yù apù na ta siku si Abiya, á yù apù na ta dulung si Asa. ⁸ Á yù apù ni Patul Dabid ta tumang si Josapat.

Á si Josapat yù ammò ni Joram. Á yù apù ni Josapat si Ussiya. ⁹ Á yù apù ni Josapat ta siku si Jotam, á yù apù na ta dulung si Akas, á yù apù na ta tumang si Esakiya.

¹⁰ Á si Esakiya yù ammò ni Manasse, á yù apù ni Esakiya si Amos, á yù apù na ta siku si Josiya.

* 1:5 Á ari Kudio si Rakab. Aggina yù ngaw babay nga taga Jeriku nga nangabbák sù ira duá nga lálláki nga jinok ni Josiwa, ta tullung ira ta ili na Jeriku nga umay massísim. † 1:5 Ari Kudio gapay si Lus. Aggina yù bálu nga taga Moab, nga nepulù sù katugángán na ta panoli ra ta lugár na Juda.

¹¹ Á si Josiya yù ammò di Jekoniya ána yù ira wáwwagi na. Danniaw yù ira ginaká ni Abrakam nga nelistá ta áddè ta pangappù nayù patul na Babilonia nira ána yù pamaggagakkâ na nira nga iniyángo na ta Babilonia, tapè aripanan na ira.

¹² Á ta keggá nayù ira Kudio ta Babilonia áddè ta keyaná ni Apu Kesu Kiristu, danniaw yù ira nelistá nga naggaká kuna.

Si Jekoniya yù ammò ni Salatiel, á yù apù ni Jekoniya si Sirubbabel. ¹³ Á yù apù ni Jekoniya ta siku si Abiud, yù apù na ta dulung si Eliakim, á yù apù na ta tumang si Asor.

¹⁴ Á si Asor yù ammò ni Sadok, á yù apù ni Asor si Akim. Á yù apù na ta siku si Eliud. ¹⁵ Á yù apù na ta dulung si Eleyasar, á yù apù na ta tumang si Mattan. Á aná ni Mattan si Akup.

¹⁶ Si Akup yù ammò ni Kusè. Á yù atáwa ni Kusè si Maria, nga innò ni Apu Kesu, nga mangngágan ta Kiristu, nga Mangiyígù ána Mammaguray.

¹⁷ Á yáyù nga mapulu appá yù gaká nayù ira naggapu kâ Kákay Abrakam áddè kâ Patul Dabid. Á mapulu appá yù gaká ra gapay nayù ira naggapu kâ Patul Dabid áddè ta pangiyángo na patul sù ira Kudio ta gián na nga Babilonia. Á kunnian gapay, mapulu appá yù ira gaká ra áddè ta pamegapu nayù ira Kudio nga naggián ta Babilonia áddè ta keyaná nayù Mangiyígù.

*Yù Keyaná ni Apu Kesu Kiristu
Lukas 2:1-7*

¹⁸ Á kunnian yù kesimmu nayù keyaná ni Apu Kesu Kiristu. Netarátu si Maria nga meyatáwa kâ Kusè. Ngam lage ra magatáwa, nánnámmuán ni Maria ta mabussikin negapu sù pakapangnuá nayù Mangilin nga Ikararuá ni Namarò. ¹⁹ Á pakánnámmu ni Kusè ta mabussi yù katarátu na, á gapu ta napiá nga laláki si Kusè, nga mangikállá ána arán na ikáyâ ta mepasiránán si Maria, yáyù nga ninonò na ta igúngo na nga awán ta makánnámmu.

²⁰ Á ta pannononò na paga ni Kusè karannian, á nakakaturuk, á nattatagená. Á pattatagená na, aijan nappasingan kuna yù daroban ni Namarò. Á kinagi na kuna, “Kusè, sikaw nga ginaká ni Dabid, ari ka mabbábáng nga mangatáwa kâ Maria, ta mabussi lápay sù pakapangnuá nayù Mangilin nga Ikararuá. ²¹ Á iyaná na sangaw yù laláki, nga ingágan naw ta Kesu, gapu ta aggina yù mangiyígù sù ira tatole na, tapè ari ira mapagikáru sù liwiliwí da,” kun nayù daroban ni Namarò kâ Kusè.

²² Á nesimmu ngámin danniaw tapè matuppál yù bilin ni Namarò nga inipeyubobuk na sù ngaw ábbilinán na, nga kunniaw:

²³ “Ginnán naw yù kagiak ku nikayu. Mabussi sangaw yù magingánay nga narenu, á iyaná na sangaw yù laláki nga ingágan naw ta Imanuel.”†

Á yá kebalinán nayù ngágan na, aijan si Namarò nittam.

²⁴ Á kalukák ni Kusè, kinuruk na yù kinagi nayù daroban ni Namarò, á iná na si Maria ta bale na. ²⁵ Ngam arán na bulubugá siniggek si Maria áddè sù paganá na ta laláki, nga ningágan ni Kusè ta Kesu.

2

Yù Pakimore nayù ira Álliuk nga taga Lalassangán

¹ Á sù pammagure ni Patul Erodo ta Judiya, neyaná si Apu Kesu sù ili na Betlekem, sù purubinsia na Judiya. Á ari kuruk nga nabayák nga nappasá yù keyaná na, á minay ta ili na Jerusalem yù ira láláki nga naggapu ta arayu nga lugár ta lalassangán. Nasirik ira nga naggigiámmu sù ira bituan. ² Á iniyabbú da sù ira tatolay nga taga Jerusalem, á kinagi ra, “Sisaw gián nayù abbing nga neyaná gangù, nga mabbalin ta Patul nga mammaguray sù ira Kudio? Ta nasingam mi yù bituan na nga aijan gangù ta lalassangán, á yáyù nga umay kami makimoray kuna,” kud da. ³ Á pakarámak ni Patul Erodo karannian, kuruk nga nabbagal, á nepatalugáring sù ira ngámin nga tatolay ta Jerusalem gapay, marakè talián nayù abbing si Patul Erodo nga mammaguray ta Judiya.

⁴ Á gapu ta naburung si Patul Erodo, inipágál na yù ira ngámin nga kátannangán nga pári ána yù ira mangituddu sù tunung da, á iniyabbú na nira, nga kun na, “Sogián nayù nakeyanatán nayù mammaguray nga mangngágan ta Kiristu?” ⁵ Á simibbák yù ira kátannangán, á kinagi ra kâ Patul, “Á tán nga ili na Betlekem sù purubinsia na Judiya, ta yáyù yù inipetúrá ni Namarò sù ngaw ira ábbilinán na, nga kunniaw:

⁶ “Sikayu nga tatolay nga taga Betlekem, sù purubinsia na Judiya,

† 1:23 Isaya 7:14

mássiki nu baddi yù ili naw,
meparámak sù ira ngámin nga mammaguray sù purubinsia na Judiya,
gapu ta duttál sangaw nga maggapu sù ili na Betlekem

yù mammaguray nga manaron sù ira tatolè nga Israel.’ ”*

⁷ Á pakaginná ni Erodo karannian, inagálán na laguk yù ira álliuk nga naggapu ta lalassangán. Á inilímak na yù pakiubobuk na nira, á iniyabbû na nira nu káni yù lattuák nayù bituan. Á kinagi ra kuna. ⁸ Á jinok na ira ta ili na Betlekem, á kinagi na nira, “En naw aleran ta napiá yù gián nayù abbing. Á sangaw nu málerán naw, iránuk naw níkan, tapè ek ku gapay makimoray kuna,” kun ni Erodo nira.

⁹ Á pakaginná nayù ira álliuk sù kinagi nayù patul, nánaw ira. Á pakalalakakák da ta dалан, nasingad da má yù bituan nga limittuák ta lalassangán. Á napolu yù bituan nira, á sinututtul da áddè ta pagginná na sù aruk na gián nayù abbing. ¹⁰ Á nerallá yù pagayáyá da megapu sù bituan, nga nangituddu sù gián nayù abbing. ¹¹ Á simillung ira sù balay, á nasingad da yù abbing ká Maria nga yená na. Á namalittúkak ira nga nakimoray sù abbing. Á binukatád da laguk yù kárgá ra, tapè ilawád da yù nangingá nga kukuá ra. Á iniyawá da kuna yù buláwán ánna duá kaláse nga bábbanguk, nga insensu ánna mirrá. ¹² Á sù páno ra nga nanoli ta lugár da, tanakuán yù nallakarád da, gapu ta pinagimuguk ni Namarò ira megapu sù ipatategená na nira, ta ari ira manoli ká Patul Erodo.

Yù Pangitammang ni Kusè kári Maria ánna yù Aná na

¹³ Á páno nayù ira álliuk nga taga lalassangán, á nattatagená mángin si Kusè. Á nappasin-gan kuna yù daroban ni Namarò, á kinagi na kuna, “Arà! Gumikkáng ka, ta em mu itálaw yù ira masíná, ta iyángem ira ta lugár na Egipto. Á maggián kayu túrin áddè ta kagiak ku nikayu ta mánaw kayu tán. Ta ipálek na sangaw ni Patul Erodo yù abbing, ta igagéngé na nga ipapátay,” kun na ká Kusè. ¹⁴ Á dagarágá nga giminikkáng si Kusè ta yian nga gabi, á nánaw ira, ta en na iniyángé ni Kusè yù masíná ta lugár na Egipto. ¹⁵ Á naggián ira ta Egipto áddè ta pate ni Patul Erodo. Á yáyù nga natuppál yù ubobuk ni Namarò nga inipeyubobuk na ngaw sù ira ábbilinán na, ta kinagi na, “Agálák ku yù Aná ku nga maggapu ta lugár na Egipto,” kun na.

Yù Pangipapáte ni Patul Erodo sù ira Baddi nga Ábbing

¹⁶ Á pakánnámmu ni Patul Erodo ta sinestemán nayù ira masírik nga lálláki, nga ari manoli nga mangiránuk kuna, á nepallá yù pore na. Á jinok na yù ira umay mamapátay sù ira ngámin nga ábbing nga lálláki sù ili na Betlekem ánna yù ira bárriu na. Á pinapáte ra ngámin yù ira kapángngiyáná ánna áddè ta duá yù dagud da, gapu ta pabbisítá ni Erodo sù ira masírik nga lálláki, nánnámmuán na ta duá ragunin yù nappasá áddè sù olu nga pakasingad da sù bituan. ¹⁷ Á yáyù nga natuppálin laguk yù inipeyubobuk na ngaw ni Namarò ká Jeremia nga ábbilinán na, sù keggá na ngaw ta dabbuno. Ta kinagi na,

¹⁸ “Maginná nayù ira tatolay yù ira gikulukuletán,
nga nepallá yù daddam da,
túrin sù lugár na Rama.

Maraddam yù ira ginaká ni Raket,
megapu sù pámmatay nayù ira áná da.
Awán bulubugá ta ággayáyá da,
ta natayin yù ira ábbing.”†

Yù Panoli di Kusè ta Nasaret

¹⁹ Á pappasá nayù pate ni Patul Erodo, á kapamidduá na nga nappasingan yù daroban ni Namarò ká Kusè túrin ta lugár na Egipto sù pattatagená na. ²⁰ Á kinagi nayù daroban ká Kusè, “Gumikkáng ka, á ilabbè min yù ira masíná sù lugár na Israel, ta natayin yù ira mangigagángay nga mamapátay sù abbing,” kun na. ²¹ Á giminikkáng laguk si Kusè, á inipáno na yù ira masíná, ta nanoli ira sù lugár na Israel.

²² Á labbè da ta lugár na Israel, narámak ni Kusè ta nammaguray ta lugár na Judiya si Arkelò, nga táli ni Patul Erodo nga yáma na. Á naganássing si Kusè nga manoli ta lugár na Judiya. Á pattatagená na mángin ni Kusè, inipakánnámmu ni Namarò kuna ta umay ira sù purubinsia na Galilia. ²³ Á minay ira laguk ta Galilia, nga nakipaggián ta ili na Nasaret. Á

* 2:6 Mika 5:2 † 2:18 Jeremia 31:15

yáyù nga natuppálin yù inipeyubobuk na ngaw ni Namarò sù ira ábbilinán na, nga kinagi ra, “Meparámak sangaw nga taga Nasaret.”

3

Yù Pangilayalayâ ni Kuan nga Minánngì

Markus 1:1-8; Lukas 3:1-18; Kuan 1:19-28

¹ Á pappasá na aru nga dagun, jimittál si Kuan nga Minánngì, nga mangilayalayâ sù kalállammatán sù purubinsia na Judiya. Á aru yù ira tatolay nga minay ta kalállammatán, tapè ginniginánda da yù kagian na. ² Á kinagi ni Kuan nira, “Maraddam kayu sù liwá naw, á mabbabáwi kayu laguk sù narákè nga akka-akkuán naw, tapè dán nga napanán kayin, ta duttálin yù pammagure ni Namarò sù ira tatolay ta dabbuno,” kun na. ³ Á si Kuan, aggina yù kinagi na ngaw ni Isaya, nga ábbilinán ni Namarò, nga kun na, “Ajjan yù makkatakotol ta kalállammatán.

Yaw ikatakátol na: ‘Umayin si Apu! Paránan naw yù dалан na.

Tunungan naw yù pallakarán na.’ ”*

⁴ Á nabbarawási si Kuan ta gámi nga napadday ta duddù na kamel,† nga kun na barawási na pobare. Á nabbaraká ta tabbi na ayám. Á yá ipakkatole na yù durun ána issi. ⁵ Á aru yù ira minay ká Kuan tapè maginná ra yù ituddu na. Naggagapu ira ta ili na Jerusalem ána ngámin nga purubinsia na Judiya ána ngámin nga babálay nga aranni sù danum na Jordan. ⁶ Á nabbarabáwi ira ta liwiliwá da tapè pakomán ni Namarò ira. Á pakkagi ra ta pabbabáwi ra, jinigù na ira ni Kuan ta danum na Jordan.

⁷ Á gapu ta aru yù ira nga minay ká Kuan tapè makirigù ira kuna, á aru gapay yù ira Parisio ána yù ira Sadusio nga minay kuna. Aggira yù naggigiámmu ta rilisiod da. Á pakasingan ni Kuan nira, kinagi na nira,

“Sikayu nga ginaká na iráw, ngattá ta kagian naw ta melilli kayu sù pamagikáru ni Namarò megapu sù karigù naw? Ari! ⁸ Likuránán naw laguk yù liwiliwá naw, á akka-akkuán naw yù napiá, tapè mepasingan ta kukurugán nga nabbarabáwi kayu. ⁹ Á arán naw gapay kagian ta makalilli kayu sù pamagikáru ni Namarò gapu ta ginaká na kayu ni Kákay Abrakam. Ta ikállà na galá ni Namarò yù ira nga manguruk kuna, nga ginaká ni Kákay Abrakam. Á awayyá ni Namarò gemma nga pabbalanan ta gaká ni Kákay Abrakam yawe ira batu ta dabbun, tapè tuppálan na yù ngaw initabbá na ká Abrakam. ¹⁰ Á yaw keyarigán nayù pamagikáru ni Namarò yù wátay nga megangngá ta gamù na káyu. Á kunay ta dán nga napanán yù wátay nga áttukák ta káyu, dán nga napanán gapay yù pamagikáru ni Namarò. Á ngámin ira nga kun na káyu nga ari napiá yù ábbungá ra, matukák ira nga matuggi.”

¹¹ Á inupù ni Kuan yù magubobuk, á kinagi na, “Nu makirigù kayu níkan, nga pakasinganán ta pabbabáwi naw ta liwá naw, á danum lá yù irigù ku níkayu. Ngam aijan sangaw yù umay, nga dakal yù pakáwayyá na ánnè níkan. Á aringá mepángngá nga maggawing ta sapátu na. Á dumá yù ánnigù na, ta isipà na yù ira manguruk kuna sù Mangilin nga Ikararuá na, nga kun na irigù na nira. Á kun na api yù irigù na sù ira áppè pípiá, ta ari ira melilli sù pangukum na. ¹² Á sangaw nu lubbè, isinná na yù ira manguruk kuna sù ira ari manguruk, nga kun na tolay nga massá ta aggì. Unnuran na yù aggì, nga pakappián na sangaw sù ággubbuán na. Ngam tuggian na sangaw yù áttá sù api nga ari bulubugá máddà.” Yáyù inilayalayâ ni Kuan, nga Minánngì.

Yù Karigù ni Apu Kesu

Markus 1:9-11; Lukas 3:21-22

¹³ Á minay si Apu Kesu ká Kuan ta dappá na Jordan, nga naggapu ta purubinsia na Galilia, tapè makirigù kuna. ¹⁴ Á gapu ta mappasirán si Kuan, á kinagi na ká Apu Kesu, “Apu, síkán nakuan yù máwák nga makirigù níkaw, ngam ngattá, ta umay ka makirigù níkan?” kun ni Kuan. ¹⁵ Á kinagi ni Apu Kesu, “Paguráyám mu, ta napiá nu palurotat ta ngámin yù ipakuá ni Namarò nitta,” kun na. Á yáyù nga inanugù ni Kuan, á jinigù na.

¹⁶ Á kabalín ni Apu Kesu nga nakirigù kuna, á giminon nga naggapu sù danum. Á dagarágá nabbuká yù lángl, á nasingan na yù Ikararuá ni Namarò, nga kun na lummun nga minay naddappá kuna. ¹⁷ Á nappáginá yù ngáral ni Namarò nga naggapu ta lángl, á kinagi na, “Yawe yù Aná ku nga iddukak ku, á ayatánà megapu kuna.”

* 3:3 Isaya 40:3 † 3:4 Yù kamel yù masikan nga ayám nga kun na nuáng onu kabáyu. Á sínáppukul yù bará na kamel. Á maggáin ira ta namagá nga lugár.

4

*Yù Pamarubá ni Satanas kâ Apu Kesu**Markus 1:12-13; Lukas 4:1-13*

¹ Á gon ni Apu Kesu nga naggapu ta danum, iniyánge nayù Ikararuá ni Namarò ta kalállammatán, tapè parubán ni Satanas nga liwatan. ² Á ari nakkákán si Apu Kesu ta appátapulu nga ággaw, á nepallá yù bisin na. ³ Á jimikkì kuna si Satanas, á kinagi na kuna, “Nu kuruk ta sikaw yù Aná ni Namarò, arakè! Pabbalinam mè laguk ta kanan yawe ira batu,” kun na. ⁴ Á simibbák si Apu Kesu, á kinagi na, “Ajjan yù inipetúrâ ni Namarò nga kinagi na,

‘Ari lá kanan yù ákkatolayán na tolay, nu ari gapay yù ngámin nga ubobuk ni Namarò,’ ”*
kun na.

⁵ Á tabbák ni Apu Kesu kâ Satanas, iniyánge na laguk ni Satanas sù ili na Jerusalem, á inipotun na sù kátannangán nayù bubbungán nayù karakalán nga kapillíá, nga mangilin nga bale ni Namarò. ⁶ Á kinagi ni Satanas kâ Apu Kesu, “Nu kuruk nga Aná naka ni Namarò, makkassù ka ngè laguk, ta ajjan yù netúrâ nga kunniaw:

‘Ipataron naka ni Namarò sù ira daroban na,

á tangnalád da ka, tapè ari ka mabigarán, mássiki yù takkim,’ ”†

kun ni Satanas. ⁷ Á simibbák si Apu Kesu, á kinagi na kâ Satanas, “Wan á, ngam ajjan gapay yù netúrâ,

‘Arám mu paraparubán si Namarò nga Yápum.’ ”‡

⁸ Á inipángè na laguk má ni Satanas si Apu Kesu sù kátannangán nga puddul, á inipasingan na yù ira ngámin nga páppatulán, áнна ngámin nga nakástá nga kukuá nayù ira mammaguray nira. ⁹ Á kinagi na, “Iyawâ ku sangaw nikaw ngámin danniw, nu mamalittúkak ka nga makimoray níkan,” kun ni Satanas. ¹⁰ Á simibbák si Apu Kesu, á kinagi na, “Mánaw ken, Satanas! Ta ajjan yù inipetúrâ ni Namarò nga kunniaw,

‘Pakimorayám mu lá si Namarò nga Yápum.

Aggina lá yù passerbiám mu!’ ”§

¹¹ Á gapu ta pinapáno ni Apu Kesu, á nánaw laguk si Satanas. Á limittuák laguk yù ira daroban ni Namarò, nga minay kâ Apu Kesu tapè ábbágád da.

*Yù Pamegapu ni Apu Kesu nga Mangituddu**Markus 1:14-15; Lukas 4:14-15*

¹² Á pakarámak ni Apu Kesu ta nebáluk si Kuan nga Minánnigù, nanoli ta Galilia. ¹³ Á ari nga naggián ta ili na Nasaret, nga jinakalán na, ngam minay naggián ta ili na Kapernium nga aranni ta bebay na Galilia, ta dabbun na Sabulon áнна Neptali. ¹⁴ Á yáyù nga natuppál yù inítúrâ na ngaw ni Isaya, nga ábbilinán ni Namarò, nga kunniaw:

¹⁵ “Túrin sù dabbun na Sabulon áнна yù dabbun na Neptali,

á túrin ta aruk na bebay áнна ta dammáng na danum na Jordan,

ajjan yù purubinsia na Galilia, nga lugár nayù ira tatolay nga ari Kudio.

¹⁶ Á yù ira tatolay nga maggián tán, kun na nakallá yù nonò da, ta arád da ammu si Apu.

Ngam manawagán yù nonò da sangaw nu unay yù mamannawák nira, ta ipakánnámmu na nira yù bilin ni Namarò.

Nesinná ira ngaw kâ Namarò nga kun na natay.

Ngam sangaw nu maginná ra yù bilin ni Namarò, pannawagan ni Namarò yù nonò da.”*

¹⁷ Á natuppál yane ubobuk ni Namarò, ta yáyù pamegapu ni Apu Kesu nga mangilayalayá sù ubobuk ni Namarò. Á kinagi na, “Mabbabáwi kayu sù liwá naw, á likuránan nawin yù ággangnuá naw. Ta duttálin yù pammagure ni Namarò ta dabbuno.”

*Yù Pagágál ni Apu Kesu sù ira Olu nga Tudduán na**Markus 1:16-20; Lukas 5:1-11*

¹⁸ Á pallakalakák ni Apu Kesu ta aggik na bebay na Galilia, nasingan na yù ira duá nga mawwagi, di Simon, nga mangngágan gapay ta Eduru, áнна si Andares, nga mattabatabukul, ta yáyù ángngalluád da. ¹⁹ Á kinagi ni Apu Kesu nira, “Tuttulan nawá. Á ábbágát takayu, tapè kunnay ta aru nga sirá yù malá naw kunangan, aru sangaw gapay yù ira tatolay nga ipálá ku nikayu, nga patuttulan naw níkan, tapè mesipá ira sù pammagure ni Namarò,” kun na nira. ²⁰ Á dagarágâ nga nánawád da yù ira tabukul da, á siminuttul ira kuna.

* 4:4 Deuteronomio 8:3 † 4:6 Salmo 91:11-12 ‡ 4:7 Deuteronomio 6:16 § 4:10 Deuteronomio 6:13 * 4:16

²¹ Á pallakalakák di Apu Kesu paga ta aggik na bebay, nasingan na má yù duá paga nga mawwagi, di Ime kâ Kuan, nga anâ ni Sebedo. Ajjan ira nga mepulupulú kâ yáma ra, nga nagitubang ta barange ra nga mappoli ta tabukul da. Á pakasingan ni Apu Kesu nira, inagálán na ira gapay. ²² Á dagarágâ nga nánawád da si Sebedo nga ammò da sù barange ra, á siminuttul ira kâ Apu Kesu gapay.

Yù Pangituddu ni Apu Kesu ána yù Pamammapiá na sù ira Máttaki
Lukas 6:17-19

²³ Á kabalín na nagágál ni Apu Kesu sù ira appâ nga kábulun na, pinassiár da yù tangapáddabbunán na Galilia, tapè maddagâ si Apu Kesu nga mangituddu sù ira tatolay ta ngámin nga kapilliá ra. Á inilayalayâ na yù napiá nga dámak nga meyanung sù pammagure ni Namarò ána pinammapiá na yù ngámin nga máttaki ána yù ira tatolay nga makkakerumá yù tulágad da. ²⁴ Á yáyù nga neparámak si Apu Kesu sù tangapáddabbunán na Siria, á iniyánge nayù ira tatolay ngámin nga máttaki, ána yù ira nga makkakerumá yù tulágad da, ána yù ira maganánutú baggi ra, á yù ira gapay nga nagunagán na anitu, yù ira mináballiák, ána yù ira ari makaguyú baggi ra. Á pinammapiá na ira ngámin. ²⁵ Á yáyù nga nagaru yù ira tatolay nga siminuttul kuna nga naggapu ta lugár na Galilia ána yù ira dakal nga ili na Dikapulis ána Jerusalem, ána yù purubinsia na Judiya, áddè ta dammáng na Jordan.

5

Yù Pangituddu ni Apu Kesu sù Keggá na ta Puddul
Lukas 6:20-23

¹ Á pakasingan ni Apu Kesu sù ira magariu nga tatolay, giminon ta puddul, á nagitubang. Á jimikkí kuna yù ira tudduán na. ² Á inittuddu na nira, á kinagi na:

³ “Mapagayáyâ yù ira manukkalak, nga ammu ra ta nakaliwâ ira nga ari makatuppál sù ngámin nga ipakuá ni Namarò nira, ta ikatalá da si Namarò ta mangabbák nira.

Mammapiá yù ággiád da sangaw, ta aggira yù mesipá sù pammagurayán ni Namarò ta lángi.

⁴ Mapagayáyâ yù ira maraddam.

Mammapiá yù ággiád da sangaw, ta bannabannáyán na ira ni Namarò.

⁵ Mapagayáyâ yù ira tumulú.

Mammapiá sangaw yù ággiád da, gapu ta iyawâ na sangaw ni Namarò nira yù ngámin nga napiá nga initabbá na.

⁶ Mapagayáyâ yù ira makkaragá nga manuppál sù ipakuá ni Namarò nira, nga kunnay ta mabisinin nga maláppa nga magalek ta kanan na.

Mammapiá sangaw yù ággiád da gapu ta pakáppagan na sangaw ni Namarò ira.

⁷ Mapagayáyâ yù ira mangikállá sù ira kábulud da.

Mammapiá sangaw yù ággiád da gapu ta ikállá na sangaw ni Namarò ira.

⁸ Mapagayáyâ yù ira nga pareku nga matunung yù nonò da.

Mammapiá sangaw yù ággiád da, ta aggira sangaw yù makasingan kâ Namarò.

⁹ Mapagayáyâ yù ira mamakkakápiá sù ira maddamá.

Mammapiá yù ággiád da, ta aggira ibiláng ni Namarò ta ánâ na.

¹⁰ Mapagayáyâ yù ira nga marigirigá gapu ta panguruk da kâ Namarò.

Mammapiá sangaw yù ággiád da, ta aggira yù mesipá sù pammagurayán ni Namarò ta lángi.

¹¹ “Á sikayu, mapagayáyâ kayu nu uyu-uyawad da kayu nayù ira tatolay ána jigirigátad da kayu ána paraparáketad da kayu gapu ta pangikatalá naw nikán, ta mammapiá sangaw yù ággián naw. ¹² Ta kunnian gapay yù panigirigá nayù ira ngaw tatolay sù ira ngaw ábbilínán ni Namarò. Magayáyâ kayu laguk, mássiki nu marigirigá kayu, ta aru yù napiá nga bálâ naw nga pinakappián ni Namarò ta lángi, nga malá naw sangaw nu lubbè kayu tán.”

Yù Keyarigán nayù ira nga Manguruk kâ Apu Kesu
Markus 9:50; Lukas 14:34-35

¹³ Á inittuddu na paga ni Apu Kesu, á kinagi na, “Sikayu nga manguruk nikán, yá keyarigán naw yù asin. Ta napiá ána nasingngâ yù kanat tam nu ajjan yù asin kuna. Á sikayu nga manguruk nikán, nekiruk kayu sù ira tatolay nga ari manguruk, tapè ittuddu naw nira yù napiá, á máwayá ra laguk nga mabbáli nakuan ta napiá gapay. Ngam nu mallállágin yù asin, awánin ta paggák na. Á kengá lâ, ta awán ta serbi na, nu ari lâ nga metabbá nga meguppuguppè sangaw.

¹⁴ “Á yù ili nga napatáddak ta puddul, ari gemma metuttù. Kunnian gapay yù keyarigán naw. Ta sikayu nga manguruk nikán yù kun na nawák, á manawagán yù nonò nayù ira

tatolay megapu sù ituddu naw nira. ¹⁵ Á awán ta tolay nga mamagatang ta isingan, nu ikáyá na sangaw ituttù sù unak na palanggána. Ngam paggatangan na yù isingan nga ipotun na gemma sù ággianán na, tapè manawagán yù ira ngámin nga tatolay nga aijan ta balay. ¹⁶ Á kunnian gapay yù keyarigán naw. Arán naw ilímak yù ángnguruk naw ká Namarò. Á tuppálan naw yù ipakuá na nikayu, tapè masingan nayù ira tatolay yù napiá nga akka-akkuán naw ána dayáwad da si Namarò nga Yáma naw ta lángi.”

Yù Pangituddu ni Apu Kesu nga Meyannung sù Tunung ni Moyses

¹⁷ Á kinagi ni Apu Kesu, “Arán naw kagian ta umayá manguli sù tunung ni Moyses ána yù ituddu nayù ira ngaw ábbilinán. Arák ku patalián yù kinagi ra nu arák ku galá tuppálan yù ngámin nga kinagi ra. ¹⁸ Á kuruk yù kagiak ku nikayu, nga ari mapatalián yù tunung ni Moyses áddè ta pagádekán nayù lángi ána dabbuno. Ta ari bulubugá mapangarián yù tunung, mássiki lâ nu baddi, áddè ta matuppál ngámin. ¹⁹ Á yáyù gapu na nga yù tolay nga malliwá ta baddi sù tunung, ána ituddu na sù ira kábulun na tapè malliwá ira gapay, aggina yù kagukábán sù pammagurayán ni Namarò ta lángi. Ngam yù tolay nga manuppál sù tunung ni Namarò, ána ituddu na sù ira kábulun na tapè tuppálad da gapay, aggina yù meparáyaw sù pammagurayán ni Namarò ta lángi. ²⁰ Á yáyù laguk nga kagiak ku nikayu, nu ari napiá yù ánnuppál naw sù ipakuá ni Namarò ánnè sù ánnuppál nayù ira Parisio ána yù ira mangituddu sù tunung, ari kayu gemma mesipá sù pammagurayán ni Namarò ta lángi.”

Yù Pangituddu ni Apu Kesu nga Meyannung sù Mapporay

²¹ Á kinagi ni Apu Kesu, “Ammu naw gemma yù netuddu gári sù ira ngaw tatolay, nga ‘Ari kayu mamapátay, ta gaputad da sangaw yù tolay nga mamapátay, á ikeká ra.’ ²² Ngam sikán, yawe yù kagiak ku nikayu. Pasikkálan naw yù akka-akkuán naw. Ta yù tolay nga mapporay sù kabbulun na, ipagápù da sangaw sù ira pulis. Á yù tolay nga manguyaw sù kabbulun na, ikeká ra sangaw sù arubáng nayù ira kues. Á yù tolay nga pakkakagián na yù kabbulun na, mapagikáru sangaw ta impiernu. ²³ Á yáyù nga tabarangat takayu, ta nu umay kayu sù mangilin nga bale ni Namarò, nga makimoray kuna, ána manonó naw ta aijan yù kabbulun naw nga nataki yù nonó na nikayu, ²⁴ á mapolu kayu bì nga umay makipakomá sù kabbulun naw. Á kabalín naw makkakápakomá, manoli kayu laguk nga makimoray ká Namarò sù bale na.

Makipakomá ittam sù ira Mapporay nittam

Lukas 12:58-59

²⁵ “Á ta ángngarigán nu aijan yù mangikeká nikayu, á mapolu kayu bì nga makipakomá kuna, maraké ipagápù na kayu nga ipeyángay ta kues, á ipaparesu na kayu sù ira pulis. ²⁶ Ta kuruk yù kagiak ku nikayu, nga maggián kayu ta ábbalurán ta áddè ta arán naw mekáru yù ngámin.

Yù Netuddu nga Meyannung sù ira Mangarallaw

²⁷ “Á ammu naw gemma yawe nakagi, nga ‘Ari kayu mangarallaw.’ ²⁸ Ngam sikán, yawe yù kagiak ku nikayu, ta nu inni-innan na tolay yù babay ána nononopan na yù pakkaragá na nga makiruruk kuna, nakaliwákin ká Namarò megapu sù nonó na.

Yù Meyannung sù Kelilli na Tolay sù Pakaliwatán na

Markus 9:47

²⁹ “Á nu mapaliwá kayu sangaw megapu sù jiwánan nga matá naw, baddulan naw laguk nga itabbá naw. Ta napiá yù kesipá naw sangaw ká Namarò ta lángi, mássiki nu nakúrang yù baggi naw ta tádday nga matá na, ánnè sù ketabbá nayù ngámin nga baggi naw sù impiernu. ³⁰ Á nu mapaliwá kayu sangaw megapu sù jiwánan nga limá naw, gappulan naw laguk nga itabbá naw, gapu ta napiá yù kesipá naw sangaw ká Namarò ta lángi, mássiki nu nakúrang yù baggi naw ta tádday nga limá na, ánnè sù dattál nayù ngámin nga baggi naw sù impiernu.

Yù Netuddu nga Meyannung sù ira Maggúngay

Mattiu 19:9; Markus 10:4, 11-12; Lukas 16:18

³¹ “Á nakagi ngaw gapay ta nu aijan yù laláki nga mangigúngay sù atáwa na, á iyawá na laguk yù túrá na nga pakasinganán ta paggúnge ra. ³² Ngam sikán, yawe yù kagiak ku nikayu, ta makaliwá yù laláki nu igúnge na yù atáwa na nga ari nakilaláki, gapu ta nu makiatáwa yù babay ta tanakuán, yáyù pakikarallo na megapu sù olu nga atáwa na. Á mangarallaw gapay yù laláki nga mangatáwa sù babay nga negúngay.

Yù Netuddu nga Meyannung sù Mappagásingán

³³ “Á naginná naw gapay yù kinagi ra gári sù ira ngaw olu nga tatolay, nga ‘Arán naw pallikuránán yù inittabbá naw. Ngam tuppálan naw yù inipagássingán naw nga inittabbá kâ Namarò.’ ³⁴ Ngam sikán, kagiak ku nikayu ta ari kayu bulubugá mappagássingán. Á arán naw ikaná yù gián ni Namarò ta lángi onu yù ággitubangán na, ³⁵ onu yù dabbuno, nga kun na pabbatayán na takki na, ána yù ili na Jerusalem, nga ili nayù kotunán nga Patul. ³⁶ Á arán naw ipappagássingán yù ulu naw, ta arán naw mapappuraw onu mapangngisi yù mássiki lá tangalábák nga duddù naw. ³⁷ Napiá lá nu kagian naw ‘Wan,’ nu uwan, onu ‘Ari,’ nu ari, ta naggapu kâ Satanas yù ilanná naw.

Yù Netuddu nga Meyannung sù Mabbála ta Narákè
Lukas 6:29-30

³⁸ “Á naginná naw gapay yù nakagi gári, nga kud da, ‘Nu aijan yù mamuling sù kabbulun na, á bulingan naw gapay. Onu aijan yù manultù sù ngipan na kabbulun na, á tappulán naw gapay.’ ³⁹ Ngam sikán, yawe yù kagiak ku nikayu. Arán naw bálatan yù ira mangnguá nikayu. Á ta ángngarigán nu aijan yù mallappák sù jiwánán naw, ipalappák naw paga yù jimigi naw. Arán naw bálatan, mássiki nu palapalingngian na kayu ta lappák. ⁴⁰ Á nu aijan yù mangikeká nikayu, tapè apan na yù barawási naw, á paguráyán naw nu apan na gapay yù latuk na barawási naw. ⁴¹ Á nu aijan yù mamuersá nga mappakáttu nikayu sù kárgá na ta tangakilometro, á pulutan naw nga mangáttu sù mekaruá nga kilometro gapay. ⁴² Á nu aijan yù makkiddaw nikayu, á iyawá naw laguk yù kiddawan na.

Yù Meyannung sù Pangiddù tam sù ira Malussaw nittam
Lukas 6:27-28, 32-36

⁴³ “Á naginná naw gemma yù nakagi, nga ‘Iddukan naw yù ira kákkopun naw, ána ikalusso naw yù ira malussaw nikayu.’ ⁴⁴ Ngam sikán, kagiak ku nikayu ta iddukan naw yù ira malussaw nikayu ána ipakimállá naw kâ Namarò yù ira nga manigirigá nikayu. ⁴⁵ Tanu kunnian yù akkuán naw, ipasingan naw ta kuruk nga áná na kayu ni Namarò, nga Yáma naw ta lángi. Ta palassangan ni Namarò yù bilák megapu sù ngámin nga tatolay, mássiki yù ira nga narákè yù akkuád da ána yù ira nga napiá yù akkuád da. Á iyawá na gapay ni Namarò yù urán sù ira nga napiá yù akkuád da ána yù ira nga mangnguá ta narákè. ⁴⁶ Á arán naw laguk kagian ta iddán na kayu ni Namarò sù bálá naw nu iddukan naw lá yù ira mangiddù nikayu. Ta kunnian gapay yù akkuán nayù ira mináttuki ta buwi, nga massuítì. ⁴⁷ Á napiá kayu panò ánnè sù ira tatolay nga ari manguruk kâ Namarò, nu paddulotan naw ta bale naw yù ira kábulun naw? Mássiki yù ira tatolay nga ari manguruk kâ Namarò, paddulotad da gapay yù ira kábulud da. ⁴⁸ Párigán naw laguk si Namarò nga Yáma naw ta lángi, tapè pareku lá nga napiá yù akkuán naw, nga kunnay kuna.”

6

Yù Netuddu nga Meyannung sù ira Mangikállá

¹ Á pangituddu na paga ni Apu Kesu, kinagi na, “Magimuguk kayu, ta ari lá yù paddáyo na tatolay yù gapu na nga tuppálan naw yù napiá. Ta nu tuppálan naw yù napiá nga akkuán naw ta arubáng nayù ira tatolay tapè dayáwad da kayu, awán laguk bulubugá ta bálá naw nga naggapu kâ Namarò nga Yáma naw ta lángi. ² Á yáyù nu mallimù kayu sù ira pobare, arán naw párigán yù ira áppè pípiá, nga umay mallimù ta arubáng nayù ira tatolay sù paggagammungán ána yù dálan, tapè mepasingan yù napiá nga akkuád da ána meparáyaw ira sù ira tatolay. Ta kuruk yawe nga kagiak ku nikayu. Yù paddáyo nayù ira tatolay nira, yáyù laguk yù bálá da. ³ Ngam sikayu, nu mallimù kayu, ilímak naw yù pallimù naw. Arán naw ipakánámmu, mássiki nu kopun naw onu yù wagi naw. ⁴ Á si Namarò nga Yáma naw, nga makasingan sù ngámin nga akka-akkuán naw, mássiki yù ilímak naw, aggina yù mabbalabála nikayu.

Yù Ituddu ni Apu Kesu nga Meyannung sù Ákkimállá tam
Lukas 11:2-4

⁵ “Á nu makimállá kayu kâ Namarò, arán naw párigán yù ira áppè pípiá. Ta ikáyá da umay makimállá, nga manáddak sù tangngá na kapillíá onu tangngá na dálan, tapè mepasingan ira sù ira tatolay. Á kuruk yù kagiak ku nikayu, nga nálá den yù bálá da, nga paddáyo nayù ira tatolay nira. ⁶ Ngam sikayu, nu makimállá kayu kâ Namarò, tullung kayu sù bale naw ána ilitù naw yù puertá, tapè awán ta tolay nga makasingan nikayu. Á makimállá kayu laguk kâ Namarò nga Yáma naw nga ari masingan, nga aijan ta lángi. Ta masingan ni Namarò ngámin yù akkuán naw, mássiki nu ilímak naw, á aggina yù mabbalabála nikayu.

7 “Á sù pakimállà naw, arán naw patturutan yù ubobuk naw, nga kunnay sù ira nga ari manguruk kâ Namarò. Ta kagiad da ta ginnán na yù ipakimállà da megapu sù aru nga ubobuk da. 8 Arán naw ira párigán, ta ammu ni Namarò nga Yáma naw yù máwák naw lage naw makkiddaw kuna. 9 Á yáyù nga kunniaw laguk yù ákkimállà naw:

‘Ammò mi nga aijan ta lángi, parè là ta meparáyaw yù ngágam mu sù ira ngámin nga tatolay.

10 Á parè là ta mabi nga duttál yù pammagurem sawe dabbuno,

tapè mapatuppál yù urem saw dabbuno nga kunnay sù katuppál na ta lángi.

11 Á iyawâ mu nikami yù kanam mi ta ággawo.

12 Á pakomák kami sù ira liwiliwâ mi,

nga kunnay sù pamakomá mi sù ira nakaliwâ nikami.

13 Á arák kami pángayan sù ira mangituddu ta narákè,

á ililli kami kâ Satanas nga maddok nira.’

14 “Ta nu pakomán naw yù ira nakaliwâ nikayu, á pakomán na kayu gapay sangaw nayù Yáma naw ta lángi. 15 Ngam nu arán naw pakomán yù ira nakaliwâ nikayu, á arán na gapay sangaw pakomán nayù Yáma naw yù liwiliwâ naw.

Yù Meyannung sù Mangilin nga Ággaw nga Arán na Tolay Pakkákán

16 “Á nu ngilinan naw yù ággaw nga arán naw pakkákán, arán naw párigán yù ira appè pípiá, gapu ta appè daddaddam ira lá, nga ari magámmuâ ámma ari mattagetay, tapè masingan na tatolay ta ngilnad da yù ággaw. Á kuruk yù kagiak ku nikayu, nga nálâ den yù bálâ da, nga paddáyo nayù ira tatolay nira. 17 Ngam sikayu, nu ngilinan naw yù arán naw pakkákán, magámmuâ kayu laguk ámma mattagetay kayu, 18 tapè awán ta makasingan sù pangilin naw sù ággaw, nu ari lá si Namarò nga Yáma naw ta lángi. Á yù Yáma naw nga makasingan sù inilímak naw, aggina yù mabbalabálâ nikayu.”

Sisaw Gián nayù Kukuá naw?

Lukas 12:33-34

19 Á kinagi na paga ni Apu Kesu, “Arán naw unnu-unnuran yù masserbi nikayu saw dabbuno, ta malogon gemma nga mararál megapu sù ulak ámma ulolak onu masináyan, onu apan na sangaw nayù makkokò. 20 Akkuán naw laguk yù napiá nga ipakuá ni Namarò nikayu, tapè pakappián na ta lángi yù aru nga ipagayáyâ naw nga iyawâ na sangaw nikayu nu lubbè kayu ta gián na. Ta awán bulubugá ta makatallung nga manarál onu makkokò sù kukuá naw ta lángi. 21 Á nu yù gián ni Namarò ta lángi yù kárikúan naw, si Namarò gapay yù nononopan naw. Á nu yawe dabbuno yù paggianán nayù kukuá naw, arán naw si Namarò bulubugá manonò.”

Meyárik ta Isingan yù Matá tam

Lukas 11:34-36

22 Á kinagi na má ni Apu Kesu, “Á yù matá na tolay, meyárik ta isingan na baggi na. Á nu napiá yù matá naw, napiá gapay yù akkuán naw, gapu ta manawák gapay yù nonò naw. 23 Ngam nu jikkù yù matá naw, nakallà yù nonò naw, á awán ta napiá nga akkuán naw. Tanu kagian naw ta manawagán kayin, ngam narákè yù nonò naw, á kuruk nga nepallà laguk yù kallà na nonò naw.”

Si Namarò yù Mangiyawâ ta Máwák tam

Lukas 16:13; 12:22-31

24 Á nagubobuk má si Apu Kesu, á kinagi na, “Á awán ta tolay nga makapasserbi sù duá nga yápu na, gapu ta ari naggittá yù ayâ na nira, ta ikalusso na ámma iluddè na yù tádday, á iddukan na ámma pakimorayan na yù tádday. Á kunnay gapay nikayu, ta ari kayu makapaluro kâ Namarò nu yá lá ikáyâ naw yù kuártu ámma yù kegatángan na sawe dabbuno.

25 “Á yáyù nga kagiak ku nikayu ta arán naw ipakkaburung yù áttole naw saw dabbuno, nga kanan naw ámma inuman naw, onu yù gámi nga ipabbarawási naw. Ta nu iniyawâ ni Namarò nikayu yù baggi naw nga sinole na, arán na panò iyawâ gapay yù ngámin nga máwák naw nga kanan ámma gámi? 26 Á ta ángngarigán, nonopan naw yù ira mammánù. Ari ira mammulá, á ari ira maggaták ta pakappiád da sù ággubbuán. Ngam si Namarò nga Yáma naw nga aijan ta lángi, pakapakanan na yù ira mammánù. Á arán na kayu panò iddukan ni Namarò ánnè sù ira mammánù? Wan gemma! 27 Á aijan panò nikayu yù mamakápaddu sù inángà na ta mássiki lá tangoras megapu sù pannononò na? Awán gemma ta awayyá na.

28 “Á ngattá laguk, ta ipakkaburung naw yù gámi nga ipabbarawási naw? Á ta ángngarigán, nonopan naw yù ira lappaw sù kakáddapán, nu kunnasi yù áddakal da. Ari ira mattarabáku. Arád da ammu mappadday ta gámi. 29 Ngam yawe yù kagiak ku

nikayu. Binarawasián ni Namarò ira ta nakástá ánnè sù kakástán nga ipabbarawási ni Patul Solomon, nga yù ngaw maríku nga mammaguray. ³⁰ Á gapu ta barawasián ni Namarò ta nakástá yù ira lappáw nga ajjan ta kakáddapán ta ággawo, ngam meruppáng ira sangaw nu ummá, á arán na kayu panò barawasián gapay? Wan, nepatalugáring nikayu. Ngattá panò ta arán naw ikatalá si Namarò?

³¹ “Á yáyù nga ari kayu laguk mabburuburung nu sisaw pangápán naw ta kanan naw ána inuman naw onu gagámi naw. ³² Ta si Namarò, nga Yáma naw ta lángi, ammu na gemma ta máwák naw ngámin danniw. Á yù ira nga ari manguruk kuna, danniw lâ nga magannagannuk yù ala-alerad da. ³³ Ngam sikayu, tángngagan naw laguk ta olu yù meyannung sù pammagure ni Namarò, ána palurotan naw yù napiá nga ipakuá na nikayu, á aggina sangaw yù manángngák sù ngámin nga máwák naw. ³⁴ Á yáyù nga arán naw laguk ipakkaburung yù jigâ nga duttál sangaw nu ummá. Ngattá, ta lannapán naw yù ipakkaburung naw ta ággawo? Ta ajjanin gemma yù jigâ naw ta ággawo. Á sangaw nu ummá lâ yù pakanonò naw sù jigâ nga duttálin nikayu sangaw nu ummá.”

7

Arát tam Panunnután yù ira Kábulut tam

Lukas 6:37-38, 41-42

¹ Á kinagi ni Apu Kesu, “Arán naw panunnután yù ira kábulun naw, tapè arán na kayu sangaw panunnután ni Namarò. ² Á ta kunnay ta pamanunnù naw sù ira kábulun naw, kunnian gapay yù ámmannunnù na sangaw ni Namarò nikayu. Á nu bilángan naw yù liwá nayù ira kábulun naw, á kunnian gapay sangaw yù ábbiláng ni Namarò sù liwá naw. ³ Á sikayu nga mappakagi sù kabbulun naw, á ngattá laguk ta ibúyá naw yù liwá nayù wagi naw, nga baddi nga kunnay ta apuling nga ajjan sù matá na, ngam arán naw matagená yù liwá naw nga kunnay ta malakay nga apuling nga ajjan ta matá naw? ⁴ Á kunnasi yù pakári naw ta kun na apuling nga ajjan sù matá nayù wagi naw, nu ajjan gemma yù liwá naw nga kun na apuling ta matá naw nga pinaguráyán naw? ⁵ Áppè pípiá kayu! Irián naw bí nga olu yù liwá nga kun na apuling nga ajjan ta matá naw, tapè manawák yù ámmingán naw, á máwayá naw nga ábbágán yù wagi naw, tapè mári yù liwá na, nga kun na apuling nga ajjan sù matá na.

⁶ “Á arán naw ituddu yù napiá nga meyannung ká Namarò sù ira manaki magginná, marakè akkuád da kayu, nga kunnay ta itu nga maggabbuá nga mangagá. Arán naw ilayalayá yù ubobuk ni Namarò sù ira mangipuerá sù ubobuk na, ta mangilin yù ubobuk ni Namarò. Á kunnay nakuan ta iwári naw yù nakástá nga dusáriu nga perlás ta arubáng nayù ira bábi, á iguppuppè da lâ.”

Yù ira Magáwák nga Makkiddaw, ána Magalek, ána Mattottò ta Puertá

Lukas 11:9-13

⁷ Á kinagi ni Apu Kesu, “Nu ajjan yù máwák naw, makkiddaw kayu ká Namarò, á iddán na kayu sangaw. Á magalek kayu, gapu ta ituddu na sangaw yù pakálerán naw. Á nu mattottò kayu ta puertá, mabukatán sangaw, tapè makatallung kayu. ⁸ Ta meddán yù ira ngámin nga mangupù nga makkiddaw. Á makálek yù tolay nga magala-alek. Á mabukatán sangaw yù puertá megapu sù tolay nga mattottottò.

⁹ “Á ta ángngarigán, egga panò nikayu yù yáma nga mangiyawá ta batu sù aná nga makkiddaw ta kanan na? ¹⁰ Á iddán na panò ta asisípi nu kiddawan na yù ikán na? Ari gemma. ¹¹ Á sikayu, mássiki nu narákè kayu, ammu naw mangiyawá sù napiá sù ira áná naw. Á nepatalugáring sù Yáma naw nga ajjan ta lángi, ta iyawá na gemma yù napiá sù ira ngámin nga makkiddaw kuna. ¹² Á sikayu, akkuán naw laguk yù ngámin nga napiá nga ángngabbák naw sù ira ikáttole naw nga kunnay sù ikáyá naw nga akkuád da nakuan nikayu, ta yáyù gemma yù kebalinán nayù tunung ni Moyses ána yù inituddu nayù ira ngaw ábbilinán ni Namarò.”

Yù Nasiri nga Áttallungán ána yù Aláwa nga Áttallungán

Lukas 13:24

¹³ Á kinagi ni Apu Kesu, “Á taddánát takayu ta tullung kayu sù nasiri nga áttallungán. Ta aláwa garè yù áttallungán ána yù dálán nga makáddè sù impiernu nga ari máddà yù api na, á aru garè yù ira mappángè tán. ¹⁴ Á marigá yù ira mappángè sù pakkatolayán ni Namarò, gapu ta nasiri yù áttallungán sù dálán nga makáddè sù gián na, á baddi yù ira makálek kuna.”

Yù Meyárik ta Káyu nga Mabbungá
Lukas 6:43-44

¹⁵ Á kinagi ni Apu Kesu, “Magimuguk kayu, tapè ari kayu melogò sù ira áppè ábbilinán. Ta umay ira níkayu mappásingan nga kunnay ta masippà nga karneru, ngam magigúbà ira ta kun na itu nga mabisin. ¹⁶ Á tákkilalán naw ira megapu sù akka-akkuád da, nga kunnay ta panákkilalán naw ta káyu megapu sù bungá na. Egga panò sí nga mabbungá ta malobák? Egga panò kaddá nga mabbungá ta kapáya? ¹⁷ Á nu napiá yù káyu, á napiá gapay yù bungá na. Á yù káyu nga ari napiá, nu mabbungá, á jikkù gapay yù bungá na. ¹⁸ Á nu napiá yù káyu, ari mabbungá ta jikkù. Á nu jikkù yù káyu, ari mabbungá ta napiá. ¹⁹ Á yù ira ngámin nga káyu nga ari napiá yù bungá ra, matukák ira nga meruppáng. ²⁰ Á ta kunnian matákkilalán naw yù ira ábbilinán nga áppè pípiá megapu sù akka-akkuád da.

Yù ira Ari Mesipà kâ Namarò ta Lángi
Lukas 13:25-27

²¹ “Á yù ira nga makkagi ta ‘Apu, Apu,’ kud da níkán, ari ira ngámin mesipà sù pamagurayán ni Namarò ta lángi, ngam yù ira galá nga mangupù nga manuppál sù ipakuá na nira nayù Yámá nga aijan ta lángi. ²² Á sangaw nu duttál yù ággaw nga pamanunnù ku, aru yù ira nga makkagi níkán ta ‘Apu, ari panò sikami yù ira pannakabaggim nga nangilayalayá? Á iniyusá mi yù ngágam mu ta pamapáno mi sù ira nattaliponak nga anitu ána namagaddátu kami ta aru megapu sù ngágam mu,’ kud da níkán sangaw. ²³ Ngam sikán, kagiak ku laguk sangaw nira nga ‘Arát takayu bulubugá amma-ammu! Panawán nawá, sikayu nga mangnuá ta narákè!’ kuk ku sangaw nira.

Yù ira Duá nga Nappatáddak
Lukas 6:47-49

²⁴ “Á yáyù laguk nga kagiak ku níkayu ta yù ira tatolay nga magginná karannian nga ubobuk ku ána uputad da nga tuppálan yù kinagi, yá keyarigád da yù tolay nga ammu na yù napiá, nga nappatáddak ta kallang nga inikokkok na sù utun na dakal nga batu. ²⁵ Á aijan yù nasikan nga urán, á nalítu yù dabbun. Á nabbaggiu ána nassikan yù paddák. Á ari natombá yù balay, gapu ta nepatáddak sù batu. ²⁶ Á yù ira tatolay nga makaginná karannian nga ubobuk ku, ngam arád da tuppálan yù kinagi, meyárik ira sù tolay nga ulapá, nga nappatáddak sù karagátán. ²⁷ Á aijan yù nasikan nga urán, á nalítu yù dabbun. Á nabbaggiu ána nassikan yù paddák. Á natombá yù bale na, nga mekákkássing yù keruppu na.”

²⁸ Á kabalin na nagubobuk ni Apu Kesu karannian, napállá yù ira tatolay. Á nepallá yù kapállá da, ²⁹ gapu ta makáwayyá yù ángngituddu na nga kunnay sù ángngituddu na mammaguray, nga ari kunnay sù ángngituddu nayù ira mesturu sù tunung.

8

Yù Maggoggong
Markus 1:40-45; Lukas 5:12-16

¹ Á kabalin ni Apu Kesu nga nangituddu, minutù sù puddul. Á jimináddán kuna yù magaru nga tatolay. ² Á aijan yù tolay nga naggoggong nga jimikki kuna. Á namalittúkak ta arubáng na, á kinagi na, “Apu, ammù ta makáwayyá ka nga mamammapiá níkán nu ikáyá mu,” kun na. ³ Á sinonná ni Apu Kesu yù limá na, á sinámmi na yù tolay. Á kinagi na kuna, “Wan, ikáyá ku. Mammapiá ka laguk,” kun na. Á dagarágá nga nammapiá.

⁴ Á gapu ta nammapiángin yù tolay, á kinagi ni Apu Kesu kuna, “Magimuguk ka, ta arám mu lábbi kagian yù pamammapiá níkaw. Ngam e ka bi mappsingan nga dagarágá sù pári, tapè bisítán naka. Á iyawá mu laguk sù pári yù iyátáng na megapu níkaw, nga kunnay sù kinagi ni Moyses, tapè ipakánnámmum sù ira tatolay ta kuruk nga nammapiá ken,” kun na.

Yù Pangikatalá nayù Kapitán na Suddálu kâ Apu Kesu
Lukas 7:1-10

⁵ Á minay si Apu Kesu ta ili na Kapernium. Kalalabbè na tán, aijan yù kapitán na suddálu nga taga Roma nga minay jiminápun kuna, tapè makkiddaw ta pangabbák na kuna. ⁶ “Apu,” kun nayù kapitán kâ Apu Kesu, “mataki yù abbing ku nga nagiddá túrin ta balè, nga kun na natay yù baggi na, á kuruk nga najjigá yù abbing,” kun nayù kapitán. ⁷ “Á et ten, ta ek ku pammapián,” kun ni Apu Kesu kuna. ⁸ Á initabbák nayù kapitán, á kinagi na, “Apu, aringin máwák nga umay ka, ta mappasiránà nga mamaddulò níkaw sù balè. Á ammù gemma ta mássiki nu ari ka umay, ngam kagiam mu lâ ta mammapiá yù aripak ku, á mammapiángin.

⁹ Á mássiki síkán, aijan yù maddok níkán, á aijan gapay yù ira suddálu nga dobak ku. Á nu kagiak ku sù tádday, ‘E ka túrin,’ onu ‘E ka saw,’ á umay. Á nu kagiak ku sù aripak ku yù ikáyá ku nga akkuán na, á dagarágá nga akkuán na,” kun nayù kapitán.

¹⁰ Á pakaginná ni Apu Kesu sù initabbák nayù kapitán, napállá sù ángngikatalá na kuna, á kinagi na sù ira dumaddáddán kuna, “Kuruk yù kagiak ku nikayu, nga awán ta nálek ku nga mangikatalá níkán, mássiki sù ira ngámin nga taga Israel, nga kunnay sù ángngikatalá na yawe kapitán nga taga Roma. ¹¹ Á kagiak ku nikayu ta aru sangaw yù ira ari Kudío, nga maggapu ta makkakerumá nga lugár ta lalassangán áнна lalammarán nga mesipá sù pappabbúyá ra áнна pakkákád da ta pammagurayán ni Namarò ta lángi, kári Abrakam, ká Isak, ká Akup. ¹² Ngam yù ira nga kagittá nga ginaká ni Israel, nga mesipá nakuan sù pammagurayán ni Namarò ta lángi, ari ira sangaw mesipá. Ngam metabbá ira sangaw ta lawán sù gián nga nakallá, á gikulukuletán yù ira tatolay tán áнна mangngarangngaringngi ira,” kun ni Apu Kesu. ¹³ Á nallipay si Apu Kesu sù kapitán, á kinagi na kuna, “Mánaw ken nga lubbè laguk, ta mapalurokin yù inipakimállá mu, nga kunnay sù panguruk mu,” kun na. Á negiddán yù pammapiá nayù aripan na kapitán sù pagubobuk ni Apu Kesu.

Aru yù Pinammapiá ni Apu Kesu

Markus 1:29-34; Lukas 4:38-41

¹⁴ Á minay si Apu Kesu sù bale ni Eduru. Á ta labbè na, nasingan na yù babay nga katugángán ni Eduru, nga nagiddá nga makkulikuk. ¹⁵ Á sinangngalán ni Apu yù limá nayù babay nga mataki, á dagarágá nammapiá. Á gimikkáng laguk, tapè passerbián na ira.

¹⁶ Á ta pajjibbà, iniyánge nayù ira tatolay ká Apu Kesu yù ira aru nga nagunagán na anitu. Á pinapáno ni Apu yù ira anitu megapu sù pagubobuk na, á pinammapiá na yù ira ngámin nga máttaki. ¹⁷ Yáyù kingnguá na tapè matuppál yù kinagi na ngaw ni Isaya, nga yù ngaw ábbilinán ni Namarò, nga kunnaw: “Aggina lápay yù mamammapiá sù ngámin makkakerumá nga taki tam áнна yù mangari ta ngámin nga makkakerumá nga tulágat tam.”*

Yù ira Manukkalak nga Tumuttul ká Apu Kesu

Lukas 9:57-62

¹⁸ Á pannarek na bilák ta tádday nga ággaw, aijan di Apu Kesu ta aggik na bebay. Á pakasingan ni Apu sù magaru nga tatolay nga nallepuán kuna, á kinagi na sù ira sinudduán na, “Dumáki ittam,” kun na. ¹⁹ Á lage ra nánaw, jimikki kuna yù tádday nga minángngituddu ta tunung, á kinagi na kuna, “Apu, naparáná nga tumuttul níkaw ta ngámin nga angayám mu,” kun na. ²⁰ Á simibbák si Apu Kesu, á kinagi na, “Napiá yù ággián na basikaw ánnè níkán, ta aijan yù ábbú na. Á yù ira mammánù, aijan gapay yù umú da. Ngam awáná ta pagibannagán, síkán nga Kaká na ngámin na tatolay,” kun na. ²¹ Á yù tádday nga siminuttul kuna, ta pakaginná na karannian nga kinagi na, minay kuna, á kinagi na, “Apu, anugutam mu bì ta ek ku mapolu nga itanam yù ammò ku pángè ku tumuttul níkaw,” kun na. ²² Á kinagi ni Apu Kesu kuna, “Paguráyám mu. Ta yù ira nga ari manguruk níkán, meyárik ira ta natay. Á yáyù aggira yù mangitanam sù kagittá ra. Á sikaw, tuttulam mà,” kun na.

Pamagimammá ni Apu Kesu ta Paddák áнна Danum

Markus 4:35-41; Lukas 8:22-25

²³ Á kabalin na yaw, nánaw si Apu Kesu sù ira magaru, á minay nappittá sù barangay. Á nepulù kuna yù ira sinudduán na. ²⁴ Á paddáki da, nagiddá si Apu Kesu nga nakakaturuk. Á ikáddagá lá nga nassikan yù paddák, á sínábbuetán na palung yù unak na barangay. ²⁵ Á naganássing yù ira sinudduán na, á ed da linukák, nga kud da, “Apu, iyígú mu ittam bì, ta awán itamin!” kud da. ²⁶ “Á ngattá ta maganássing kayu?” kun ni Apu Kesu. “Ánni ngillá yù kakapi na ángngikatalá naw níkán!” kun na. Á gimikkáng laguk, á gimmá na yù paddák áнна yù palung. Á dagarágá nga nagimammá. ²⁷ Á nepallá yù assing nayù ira sinudduán na, á napállá ira. Á kinagi ra, “Asinni yaw, nga anni panò yù katatole na! Ta mássiki nu paddák áнна palung, á kurugad da yù kagian na nira!” kud da.

Napammapiá yù ira Duá nga Tatolay nga Nagunagán na Anitu

Markus 5:1-20; Lukas 8:26-39

²⁸ Á jiminung di Apu Kesu laguk ta dammáng na bebay, ta dabbun na Gadara. Á aijan yù duá nga tolay nga nagunagán na anitu, nga naggián ta kuebá sù katanamán. Á makánnanássing ira megapu ta pore ra áнна uyung da. Á yáyù nga awán ta makeyangngá

* 8:17 Isaya 53:4

nga mallakák ta dалан nga mattalebák tán. Á pakasingan nayù ira duá nga nagunagán ká Apu Kesu, minay ira jiminápun kuna. ²⁹ Á dagarágá nga nakkalli ira, nga kud da, “Ye, sikaw nga Aná ni Namarò, anni yù akkuám mu nikami? Arák kami bi jigirigátan lage na ággaw nga natullà nga pamanunnù mu nikami!” kud da. ³⁰ Á gapu ta aijan yù aru nga bábi nga madduki ta kakáddapán nga aranni nira, ³¹ á nakimállà yù ira anitu, á kud da ká Apu Kesu, “Á nu papanáwak kami, anugutam mu laguk ta umay kami tullung táne ira bábi,” kud da. ³² Á “Umay kayin!” kun ni Apu Kesu nira. Á dagarágá nánaw ira laguk sù ira duá nga lálláki, á minay ira simillung sù ira aru nga bábi. Á nakkarerá ngámin yù ira bábi nga minutù nga nappángè ta danum, á nalaggabán ira, á natay ira ngámin.

³³ Á gapu ta kunnian yù nesimmu sù ira bábi, á nattálaw yù ira nga minánaron ta bábi. Á nakkakarera ira nga nanoli ta ili, á iniparámak da yù ngámin nga nesimmu sù ira bábi ána yù kapammapiá nayù ira duá nga lálláki nga nagunagán nayù ira anitu. ³⁴ Á yáyù nga minay yù ira ngámin nga magili nga jiminápun ká Apu Kesu ta aggik na bebay, á nakimállà ira kuna ta panawán na lábbi yù giád da.

*Yù Pamammapiá ni Apu Kesu sù Tolay nga Natay yù Baggi na
Markus 2:1-12; Lukas 5:17-26*

9

¹ Á gapu ta manaki yù ira tatolay ká Apu Kesu, nappittà di Apu Kesu ta barangay, á nánaw ira nga nanoli ta dammáng, sù ili na. ² Á labbè da tán, minay ká Apu Kesu yù ira tatolay, nga nangáttu sù kabbulud da nga nagiddá nga kun na natay yù baggi na. Á pakasingan ni Apu Kesu nira, nánámmuán na ta aijan yù pangikatalà da kuna. Á yáyù nga kinagi na sù tolalay nga nagiddá, “Aná ku, pálappawam mu yù nonò mu, ta napakomángin yù ira liwiliwá mu,” kun na.

³ Á aijan tán yù ira mangituddu ta tunung. Á pakaginná ra sù kinagi ni Apu sù tolalay nga natay yù baggi na, kagiad da ta nonò da, “Narákè yian! Ngattá ta magubobuk yane tolalay nga kun na aggina si Namarò!” kud da. ⁴ Á ammu ni Apu Kesu yù ninononò da, á kinagi na nira, “Ngattá, ta nononopon naw yù narákè níkán? ⁵ Anni panò yù ikáyá naw nga kagiak ku nakuan sù tolalay nga kun na natay yù baggi na? Ta mabbábáng kayu megapu sù kinagi kuna nga, ‘Napakomángin yù ira liwiliwá mu.’ Á nu kuk ku lá, ‘Gumikkáng ka, apam mu yù dapam mu, á mallakák ka,’ manguruk kayu panò? ⁶ Á yaw laguk yù akkuák kin, tapè kánnámmuán naw ta sikán nga Kaká na ngámin na tatolay yù makáwayyá saw dabbuno nga mamakomá ta liwiliwá na tatolay,” kun na. Á nallipay laguk si Apu Kesu, á kinagi na sù tolalay nga kun na natay yù baggi na, “Gumikkáng ka laguk, á akkatam mu yù ággiddám mu, á mánaw ken nga manoli ta balem,” kun ni Apu Kesu kuna. ⁷ Á kinuruk nayù tolalay yù kinagi na, á giminiikkáng, á nanoli ta bale na. ⁸ Á pakasingan nayù ira magaru nga tatolay ta nammapiángin yù kabbulud da, napállà ira, á nepallà yù assing da. Á nakimoray ira ká Namarò gapu ta iniyawá na ta tolalay yù kunnian nga pakáwayyá na.

*Yù Pagágál ni Apu Kesu ká Mattiu
Markus 2:13-17; Lukas 5:27-32*

⁹ Á nánaw si Apu Kesu laguk tán nga lugár. Á pakalalakakák na, nasingan na si Mattiu, nga mináttuki ta buwí, nga nagitubang sù áttarabakuán na. Á kinagi ni Apu kuna, “Tuttulam má,” kun na. Á kinuruk ni Mattiu, á gimikkáng, á siminuttul kuna.

¹⁰ Á minay laguk di Apu Kesu ta bale ni Mattiu, tapè mepakkákán ira. Á aru yù ira káruán nga mináttuki ta buwí ána yù ira káruán nga minálliwá sù tunung da nga minay gapay nga mepakkákán kári Apu Kesu ána yù ira sinudduán na. ¹¹ Á aijan gapay tán yù ira Parisio. Pakasingad da ta mepakkákán di Apu Kesu sù ira kábulud di Mattiu, kinagi ra sù ira sinudduán ni Apu, “Ngattá, ta mepakkákán yù mesturu naw sù ira mináttuki ta buwí ána yù ira káruán nga minálliwá ta tunung tam?” kud da. ¹² Á pakaginná ni Apu Kesu sù iniyabbú da, simibák nga nagángngarigán, á kinagi na nira, “Ari yù ira nga napiá yù gawagawayád da yù magáwák ta minángnguru, nu ari galá yù ira máttaki. ¹³ Á yáyù nga minayá saw dabbuno. Ta arák ku agálán yù ira nga makkagi ta napiá ira, nu ari galá yù ira nga ammu ra ta aijan yù liwá da. Á sikayu, umay kayu laguk ána gigiámmuan naw yù kebalinán na yaw nga napiá nga bilin ni Namarò nga neturá nga kunniaw: ‘Yaw karagatak ku, ari yù pangiyátang na tolalay níkán, nu ari galá yù pangikállà da sù ira kábulud da.’* Á mássiki nu tuppálan naw yù tunung, awán ta serbi na nu awán ta pangikállà naw sù ira kábulud naw,” kun ni Apu Kesu.

* 9:13 Oseya 6:6

Yù Pangiyabbù da kâ Apu ta Meyannung sù Ággaw nga Arád da Pakkákán

Markus 2:18-22; Lukas 5:33-39

¹⁴ Á kabalín na nakiubobuk ni Apu Kesu sù ira Parisio, minay kuna yù ira makituddu kâ Kuan nga Minánnigù. Á kinagi ra, “Ngilinam mi yù ággaw nga arám mi pakkákán, nga kunnay gapay sù ira Parisio. Ngam yù ira tudduám mu, anni má ta arád da ngilinan yù kustombare mi nga ari kumán?” kud da. ¹⁵ Á nagángngarigán si Apu Kesu, á iniyárik na yù ira tudduán na sù ira makibodá. Á kinagi na, “Maraddam panò yù ira makibodá nu aijan nira yù nobiu? Ari gemma! Ngam sangaw nu mepánaw yù nobiu nira, á yáyù sangaw yù pangilid da sù ággaw nga arád da pakkákán,” kun na.

¹⁶ Á nagángngarigán má si Apu Kesu nira, tapè ipakánnámmu na ta ari metádday yù bagu nga ituddu na sù dán nga kustombare ra. Á kinagi na, “Awán gemma ta tolay nga magappíl ta bagu sù dán nga gámi, gapu ta nu mabábalán sangaw, á kuddan yù bagu, á mappanà yù pisil nayù gámi. ¹⁷ Á ta kunnian gapay, nu mappadday ira ta binaráyáng, awán ta tolay nga mangipay ta bagu nga tabbuk na úbas sù dán nga ággianán na nga tabbi. Ta nu dán nga tabbi yù payyád da, á nataggá garè nga mabi lá mabattá sangaw, á metabbá yù binaráyáng ána kengá lággapay yù naggianán na nga tabbi. Á yáyù nga ipe tam laguk yù bagu nga binaráyáng sù bagu nga ággianán na, tapè lumánná sangaw yù tabbi ána ari mabattá, á mapakppián yù binaráyáng gapay.”

Yù Abbing nga Babay nga Natay ána yù Babay nga Nataki

Markus 5:21-43; Lukas 8:40-56

¹⁸ Á sù arán na paga kabalín ni Apu Kesu nga nagubobuk, jimikki kuna yù Kudio nga makáwayyá nga mammaguray, nga namalittúkak sù arubáng na. Á kinagi na, “Ikállà mà bikay, ta kapáppate na lá nayù aná ku nga magingánay! Em mu bì támmitan, tapè matolay,” kun na. ¹⁹ Á pakaginá ni Apu Kesu, limikká nga nepulù sù mammaguray. Á nepulù nira gapay yù ira sinudduán na.

²⁰ Á aijan gapay tán yù babay nga mapulu duá nga dagun yù papparaparága na. Á jimikki ta likuk ni Apu Kesu, á siniggek na yù kiddanán nayù barawási na, ²¹ gapu ta kinagi na ta nonò na, “Mássiki nu yù barawási na lá yù masiggek ku, mammapiángakin,” kun na. ²² Á pakánnámmu ni Apu Kesu ta aijan yù naniggek kuna, nallipay, á nasingan na yù babay. Á kinagi na, “Patagatam mu yù nonò mu, Aná ku, ta nammapiá ken megapu sù pangikatalà mu níkan,” kun ni Apu. Á dagarágá nammapiángin yù babay.

²³ Á pakáddè di Apu Kesu sù bale nayù mammaguray, nasingan ni Apu yù ira mináppalawatá ána yù ira aru nga mepaddaddam nga matarabiángál. ²⁴ Á kinagi na nira, “Mánaw kayin ngámin, ta ari natay yù abbing, nu ari lá nakkaturuk,” kun na. Á yáyù nga inipappagalá da si Apu Kesu. ²⁵ Á pamalawán ni Apu Kesu nira, simillung sù gián nayù magingánay, á singngalán na yù limá na. Á panangngal ni Apu Kesu sù limá na, gimikkáng nga nammapiángin. ²⁶ Á neparámak dannian sù ngámin nga ili ta lugár da.

Yù Pamamapiá ni Apu Kesu sù ira Buling

²⁷ Á kabalín ni Apu Kesu nga namamapiá sù magingánay, nánaw sù giád da. Á pakalalakalakák na ta dалан, siminuttul yù duá nga lálláki nga buling, á inikatakatal da, “Ikállà kami, sikaw nga Ginaká ni Patul Dabid,” kud da. ²⁸ Á manganánnuán, nakáddè di Apu Kesu sù pakipaggianád da. Á tallung ni Apu sù unak na balay, simillung gapay yù ira duá nga buling nga jimikki kuna. Á iniyabbù ni Apu Kesu nira, “Kurugan naw panò nga makáwayyángá nga manuppál sù ipakimállà naw?” kun na. “Wan, Apu,” kud da kuna. ²⁹ Á yáyù nga sinámmi ni Apu yù matá nayù ira buling, á kinagi na nira, “Mapalurò laguk nga kunnay sù pangikatalà naw níkan,” kun na. ³⁰ Á pagubobuk ni Apu, dagarágá nga nakasingan iren. Á sinaddánán ni Apu ira, nga kinagi na, “Arán naw bulubugá kagian yaw nga nesimmu nikayu,” kun na. ³¹ Ngam nánaw ira, á ed da iniparámak yù ngámin nga meyanung kâ Apu Kesu sù ira ngámin nga tatolay ta lugár da.

Yù Pamamapiá ni Apu Kesu sù Umal

³² Á kapapáno nayù ira duá nga lálláki nga napamapiá, iniyánge nayù ira tatolay kâ Apu Kesu yù laláki nga umal megapu sù nattaliponak nga anitu. ³³ Á pinapáno ni Apu yù anitu kuna, á nagubobugin yù tolay. Á napállá yù ira tatolay nga aijan tán, á nakkaká-ubobuk ira, á kinagi ra, “Awán bulubugá ta nakasingan paga ta kunnaw sù giát tam nga Israel!” kud da. ³⁴ Ngam yù ira Parisio, kinagi ra, “Si Satanas nga yápu nayù ira anitu yù paggapuán nayù pakáwayyá na nga mamapanaw sù ira anitu,” kud da.

Yù Pangikállà ni Apu Kesu sù ira Tatolay

³⁵ Á minay si Apu Kesu sù ngámin nga ili ána ngámin nga babálay, nga mangituddu sù ira tatolay ta iskuelá ra, ána nangilayalayá sù napiá nga dámak nga meyanung sù pammagure ni Namarò. Á pinammapiá na yù ira tatolay sù ngámin nga takitad da ána ngámin nga tulágad da. ³⁶ Á pakasingan na sù ira magaru nga tatolay, nerallá yù allá na sù ira ngámin, gapu ta nakállállá ira, negapu sù karigirigá da, á kunnay ira ta karneru nga awán ta manaron nira. ³⁷ Á kinagi na laguk sù ira sinudduán na, “Aru yù ira tatolay nga ari manguruk, nga meyárik sù magaták. Ngam nakúrang yù ira umay maggaták. ³⁸ Makimállá kayu laguk nga makkiddaw sù makákkuá sù ákkomanán, ta doban na bì yù ira umay maggaták sù ákkomanán na,” kun na. Á yù ira maggaták yù keyarigán nayù ira mangituddu sù bilin ni Namarò, tapè mesipá kuna yù ira tatolay nga magginná.

10

Yù Paddok ni Apu Kesu sù ira Mapulu duá nga Sinudduán na

Markus 3:13-19; 6:7-13; Lukas 6:12-16; 9:1-6

¹ Á kabalin na, inagálán na laguk ni Apu Kesu yù ira mapulu duá nga sinudduán na, á iniyawá na nira yù pakáwayyá ra nga mamapánaw ta anitu ána yù pakáwayyá ra gapay nga mamammapiá ta tatolay sù ngámin nga takitad da ána ngámin nga tulágad da. ² Á danniw yù ngámin nayù ira mapulu duá nga tudduán na. Napolu di Simon nga mangngágan gapay ta Eduru ána si Andares nga wagi na. Á di Ime ká Kuan, nga mawwagi nga ána ni Sebedo. ³ Á di Pilippi ká Bartolome, di Tomá ká Mattiu nga mináttuki ta buwì, á si Ime nga aná ni Alpío, ána si Tajjio. ⁴ Á si Simon nga netáddy sù ira Mengal, ána si Kudás nga Iskariote, nga nangituddu ká Apu Kesu sù ira minay naggápù kuna.

⁵ Á danniw nga mapulu duá yù jinok ni Apu Kesu, ta umay ira mangipakánnámmu sù meyanung kuna. ⁶ Á lage ra nánaw, kinagi ni Apu Kesu nira, “Ari kayu umay sù gián nayù ira tatolay nga ari Kudío, á ari kayu tullung sù ira ili na Samaria. ⁷ Umay kayu galá sù gián nayù ira kagittá tam nga ginaká ni Israel, ta kunnay ira ta nágawán nga karneru. ⁸ Á ta ngámin nga labbetán naw, yá llayalayá naw, ‘Duttálin nikayu yù pammagure ni Namarò,’ kun naw. ⁹ Á iyawá ku nikayu yù pakáwayyá naw, tapè pammapián naw yù ira máttaki, á paginnanolayan naw yù ira nga natay, ána pammapián naw yù ira naggoggong ána nabbuni. Á papanáwan naw yù ira anitu. Á gapu ta arán naw gemma pinagán yù pakáwayyá naw nga iniyawá ku nikayu, yáyù nga arán naw laguk ipapagá sù ira tatolay nga abbágán naw.

¹⁰ Á nu mánaw kayu, arán naw ipulù yù kuártu. Mássiki nu sinsilliu, arán naw ibolsá. ¹¹ Á ari kayu gapay bulubugá mangárgá ta magamaguray, mássiki nu barawási onu sapátù onu tagukuk, ta mepángngá nga iyawá da nikayu nayù ira abbágán naw yù ngámin nga máwák naw. ¹² Á nu lubbè kayu ta ili onu babálay, aleran naw yù napiá nga tolay nga magayáyá nga mamaddulò nikayu, á makipaggián kayu kuna áddè ta páno naw tán nga lugár. ¹³ Á tallung naw sù bale na, bindisionán naw yù ira nga maggián tán. Kagian naw nira, ‘Mepagimammá kayu ká Namarò,’ kun naw. ¹⁴ Á nu magayáyá ira nga mamaddulò nikayu, á kuruk nga abbágán na ira ni Namarò megapu sù pamindision naw nira. Ngam nu manaki ira nga mangálluik nikayu, arán na ira abbágán ni Namarò, nu ari sikayu galá yù abbágán na. ¹⁵ Á maguray lá nga ili onu balay nga angayán naw, nu awán ta tolay nga mangálluik nikayu sangaw onu manaki ira nga magginná sù ituddu naw, panáwan naw ira laguk. Á pápparán naw yù káppù ta takki naw, nga panákkilalán ta panaki da. ¹⁶ Á kuruk yawe nga kagiak ku nikayu. Sinuggi na ngaw ni Namarò yù ngaw ira ili na Sodoma ána Gomorra gapu ta karákè nayù ira tatolay nga naggián nira. Á sangaw nu duttál yù ággaw nga pangukum ni Namarò, aláppaw yù ámmagikáru na sù ira tatolay nga taga Sodoma ána taga Gomorra ánnè sù ámmagikáru na sù ira tatolay nga manaki nga magginná sù ituddu naw,” kun ni Apu Kesu.

Yù Meyanung sù Jigá nga Duttál Sangaw

Markus 13:9-13; Lukas 21:12-17

¹⁶ Á inupù ni Apu Kesu nga kinagi nira, “Tángngagan naw yaw nga kagiak ku nikayu. Dobat takayu, nga kun na nasippá nga karneru, nga umay sù ira tatolay nga kun na simaron nga itu, nga mapporay ána makánnanássing. Magimuguk kayu laguk nga kun na iráw, ána massippá kayu gapay nga kun na kalapáti. ¹⁷ Mappalán kayu, ta ajjan yù ira maggápù nikayu sangaw, á iyarubáng da kayu sù ira mamanunnú. Á palapaligatad da kayu ta arubáng nayù ira tatolay ta paggagammung da sù kapillíá ra. ¹⁸ Á gapu ta

panuttul naw nikán, iyáŋge ra kayu nayù ira malussaw ta arubáng nayù ira mammaguray, nga gubinador áŋna patul. Á yáyù awayyá naw nga mangipakánnámmu sù napiá nga dámak nga meyanung nikán sù ira mammaguray áŋna yù ira gapay nga ari Kudio. ¹⁹ Á sangaw nu bisitád dakayu, arán naw laguk ikaburung nu anni yù kagian naw nira áŋna kunnasi yù ággubobuk naw, ta mepakánnámmu ta nonò naw yù kagian naw nira. ²⁰ Ta ari sikayu nu ari galá yù Ikararuá nayù Yáma naw ta lángi yù mamagubobuk nikayu,” kun ni Apu Kesu.

²¹ Á pagubobuk ni Apu Kesu, kinagi na gapay, “Á sangaw nu duttál yù ággaw nga jigá, ipagápù nayù ira tatolay yù ira wáwwagi ra, nga ipapátay. Á kunnian gapay sangaw yù akkuán nayù ira yáma sù ira áná da. Á potuán nayù ira ábbing yù ira yáma ra áŋna ipagápù da yù yáma ra sù ira mamapátay nira. ²² Á sikayu nga manguruk nikán, ikalusso nakayu nayù ira tatolay gapu ta pangikatalà naw nikán. Ngam meyígù sangaw yù ira ngámin nga mangiyattam sù jigá áŋna mapasigaggá yù ángngikatalà da nikán ta áddè ta pagáddekán. ²³ Á nu jigirigátad da kayu sù tádday nga ili, mattálaw kayu laguk nga umay makiyígù ta tanakuán nga ili. Á kukurugán nga kuruk yù kagiak ku nikayu. Arán naw sangaw paga mabalin nga umay sù ira ngámin nga ili na Israel nga mangilayalayá sù bilik ku pángè ku má lubbè ta dabbuno, sikán nga Kaká na ngámin na tatolay,” kun ni Apu Kesu.

²⁴ Á kinagi ni Apu Kesu gapay nira, “Ari motun yù makituddu sù mesturu na. Á kunnay gapay sù aripan, ari motun sù yápu na. ²⁵ Á yáyù nga makáppak nakuan yù makituddu, nu mepaggittá sù mesturu na. Á kunnian gapay sù aripan, nu mepaggittá sù yápu na. Á nu pakkakagiád dangá, áŋna ingágad dangá ta Belsebul nga patul na anitu, á kunnasi panò yù pakkakagi ra nikayu nga mesipá nikán!”

Asinni yù Paganássingát tam?

Lukas 12:2-7

²⁶ Á kinagi ni Apu Kesu, “Ari kayu laguk maganássing sù ira tatolay, ta awán ta ituttù da nga ari sangaw mepalappá, á awán gapay ta ilímak da nga ari gapay sangaw mepakánnámmu. ²⁷ Á yù nelímak nga ipakánnámmu nikayu sangaw nu gabingin, yáyù ubobugan naw sù ira tatolay sangaw nu manawák. Á kunnian gapay sù meyanasá ta talingá naw tapè awán ta tanakuán nga makaginná, yáyù ilayalayá naw nga kun na aijan kayu ta utun na balay nga makkatakatal, tapè maginná nayù ira ngámin nga tatolay. ²⁸ Á ari kayu maganássing sù ira nga mamapátay ta baggi naw lá, gapu ta arád da makuá yù ikararuá naw nga mannanáyun. Si Namarò galá yù ikássing naw, ta aggina yù makáwayyá nga mangnuá ta baggi na tolay áŋna ikararuá na gapay sù mannanáyun nga apí ta impiernu,” kun na.

²⁹ Á ta meyanung sù ángngiddù ni Namarò, kinagi ni Apu Kesu, “Ari panò tádday lá nga pirá yù pagá na duá nga balli? Á mássiki nu kunnian, awán bulubugá ta mapanná ta dabbun nga natay, mássiki lá tádday nira, nu arán na anugutan nayù Yáma naw ta lángi. ³⁰ Á nu kunnian yù ángngiddù na nira, nepatalugáring nikayu, ta ammu na ngámin nga meyanung nikayu, mássiki yù biláng na duddù sù ulu naw nga katággitádday. ³¹ Á yáyù nga ari kayu maganássing, ta kuruk nga dakal yù ángngiddù ni Namarò nikayu ánnè sù ángngiddù na ta aru nga balli,” kun na.

Yù ira Makatákkilála ká Apu áŋna yù ira Mappasirán

³² Á namappalán si Apu Kesu, á kinagi na, “Á yù ira nga makkagi ta pakiyápu ra nikán ta arubáng na tatolay, aggira gapay yù kagiak ku ká Ammò ku ta lángi. ³³ Ngam yù ira mappasirán ta arubáng na tatolay megapu nikán, arák ku ira gapay tákkilalán ta arubáng ni Ammò ku ta lángi,” kun na.

Ari Mepagimammá yù ira Ari Manguruk sù ira Manguruk

Lukas 12:51-53; 14:26-27

³⁴ Á kinagi ni Apu Kesu, “Arán naw laguk kagian ta yá iniyáŋgè sawe dabbuno yù pamagimammá ku sù ira maddaráma. Ari kunnian yù iniyáŋgè saw nu ari galá yù ipaddaráma ra, ta aijan garè yù ira nga ari manguruk nikán. ³⁵ Á gapu ta ari ira metádday nikán, yáyù nga makikontará yù abbing nga laláki sù yáma na, áŋna yù abbing nga babay sù yená na, áŋna yù manugáng nga babay sù katugángán na nga babay. ³⁶ Á yù ira kakananáyun na tolay yù malussaw kuna. ³⁷ Á yù tolay nga nepallá yù ángngayá na sù yáma na onu yená na ánnè sù ángngayá na nikán, ari mepáŋngá nga mepulù nikán. Á yù tolay nga nepallá yù ángngayá na sù aná na ánnè sù ángngayá na nikán, ari nga mepáŋngá nga

* 10:36 Mika 7:6

mepulù nikán. ³⁸ Á ari gapay mepángngà nga mepulù nikán yù tolay nga ari magiyangngà sù panigirigà da kuna nayù ira ari nanguruk, mássiki áddè ta pate na megapu sù panguruk na nikán. Á yaw keyarigán na yù tolay nga ari mangáttu ta kurù na, nga ari tumuttul nikán. ³⁹ Á yù tolay nga mangiddù sù áttole na sawe dabbuno, lonán na yù pangisipà ku kuna ta áddè ta áddè. Ngam yù tolay nga lonán na yù áttole na sawe dabbuno gapu ta panguruk na nikán, málawá na sangaw yù mannanáyun nga áttole na gapu ta mesipà nikán ta áddè ta áddè,” kun ni Apu Kesu.

*Yù Pabbalabála ni Namarò sù ira Masserbi kuna
Markus 9:41*

⁴⁰ Á kinagi na gapay ni Apu Kesu, “Á yù ira nga mamaddulò nikayu nga manguruk nikán, á kunnay ta sikán gapay yù paddulotad da. Á yù ira nga mamaddulò nikán, á kunnay ta paddulotad da gapay yù Yámà nga naddok nikán. ⁴¹ Á yù ira nga mamaddulò ta ábbilinák ku gapu ta sikán yù nangibilin kuna, á málawá da gapay sangaw yù bálà da nga kunnay sù pabbalabála ni Namarò gapay sangaw sù ábbilinán na. Á kunnian gapay sù ira nga mamaddulò sù napiá nga tolay gapu ta tákkilalád da ta matunung megapu sù panguruk na nikán, málawá da gapay sangaw yù bálà da nga kunnay sù pabbalabála ni Namarò gapay sangaw sù matunung nga tolay nga manguruk nikán. ⁴² Á yù tolay nga mangiyawá ta mássiki lá tangabásu nga danum sù tádday nga abbing nga makiaripan nikán, gapu ta mánnámmuán na ta aggina yù manguruk nikán, á bálatan na sangaw ni Namarò gapay ta napiá,” kun ni Apu Kesu.

11

*Yù Initabbák ni Apu Kesu sù Iniyabbù ni Kuan
Lukas 7:18-23*

¹ Á kabalín ni Apu Kesu nabbilin sù ira mapulu duá nga sinullà na, nánaw nga minay sù ira káruán nga ili nga aranni, tapè mangituddu áнна mangilayalayá sù ira tatolay tán.

² Á aijan si Kuan nga Minánnigù nga napukù sù ábbaluran. Á pakarámak ni Kuan sù kingngikingnguá ni Apu Kesu, jinok na yù ira sinudduán na nga umay sù gián ni Apu Kesu.

³ Á yáyù nga ed da iyabbù ká Apu Kesu, nga kud da, “Apu, sikaw panò yù iddagám mi nga duttál nga naggapu ká Namarò, nga kunnay sù inilayalayá ni Kuan? Onu iddagám mi nakuan yù tanakuan?” kud da ká Apu Kesu. ⁴ Á simíbbák si Apu Kesu nira, á kinagi na, “Manoli kayu, ta en naw kagian ká Kuan yù ngámin nga naginná naw áнна yù nasingan naw saw giák ku. ⁵ Kagian naw ká Kuan ta makasinganin yù ira buling. Makalakárin yù ira pilay. Nammapiángin yù ira naggoggong áнна yù ira nabbuni. Makaginnángin yù ira kitul. Á maginnanolay yù ira natay, áнна melayalayá yù napiá nga dámak sù ira pobare. ⁶ Á mapagayáyá yù tolay nga ari mabbábang ta meyannung nikán, ta mammapiá yù ággián na sangaw,” kun ni Apu Kesu.

*Yù Kinagi ni Apu nga Meyannung ká Kuan nga Minánnigù
Lukas 7:24-35*

⁷ Á sù páno nayù ira sinudduán ni Kuan, nakiubobuk si Apu Kesu sù ira magari nga tatolay ta meyannung ká Kuan. Á iniyabbù na nira, “Anni yù inikáyá naw nga iningan sù ánge naw ngaw túrin ta kalállammatán? En naw panò iningan yù tolay nga aijan yù nonò na nga kun na kaddà nga paggyuyuguyan na paddák? Ari gemma! ⁸ Á anni laguk yù en naw iningan? En naw panò iningan yù tolay nga nabbísti ta nakástá? Ari gemma, ta maggián ta dakal nga bale na patul yù tolay nga nabbísti ta kunnian. ⁹ Á anni laguk yù en naw iningan, nu ari galá yù ábbilinán ni Namarò! Wan! Á kuruk yù kagiak ku nikayu, ta si Kuan yù kátannangán nga ábbilinán nga awán bulubugá ta meyárik kuna. ¹⁰ Ta aggina yù ubobugan ni Namarò sù dán nga netúra nga kunniaw:

“Yawe yù ábbilinák ku nga dobak ku ta mapolu ánnè nikaw, tapè paránan na yù dалан nga pallakarám mu sangaw.”*

¹¹ “Á kuruk yawe nga kagiak ku nikayu; awán ta tolay nga neyaná sawe dabbuno nga makáwayyá ánnè ká Kuan nga Minánnigù. Ngam yù kagukábán nga tolay nga mesipà sù pammagure ni Namarò, aggina yù makáwayyá ánnè kuna. ¹² Á áddè ngaw ta pamegapu na nga nangilayalayá ni Kuan nga Minánnigù, ta áddè kunangan, makkaragá yù ira magari nga tatolay nga mesipà sù pammagure ni Namarò. Á yù ira nasikan nga mapattù, puersád da nakuan yù kesipà da sù pammagure ni Namarò. ¹³ Á áddè ngaw ta áddè kunangan

* 11:10 Malakia 3:1

nepakánnammu yù meyanung sù pammagure ni Namarò nga duttál ta dabbuno megapu ta yù pangilayalayâ da ngaw nayù ira ngámin nga ábbilán ni Namarò ána yù tunung ni Moyses, ána yù pangilayalayâ na gapay ni Kuan nga Minánnigù. ¹⁴ Á nu ikáyâ naw manguruk sù kinagi ra, si Kuan yù ngaw Elias nga kinagi ra nga duttál mángin. ¹⁵ Sikayu nga makaginná, tángngagan naw laguk yù naginná naw,” kun ni Apu Kesu.

¹⁶ Á kinagi na gapay ni Apu Kesu, “Kunnasi panò yù pangiyarigák ku nikayu nga ginaká ni Israel ta ággawo? Ari kayu bulubugá makáppak, á yaw lá ammu naw yù mamaliwá. Kunnay kayu ta ábbing nga makkukkul ta dápun, nga áppè mabbodá ána áppè magitanam. Á makkatakotol ira sù ira kábulud da, á kagiad da nira, ¹⁷ ‘Ngattá, ta naggássá kami, ngam manaki kayu mattála? Á nakkansion kami ta makaraddaddam, ngam manaki kayu gapay nga mepattatádday nikami nga matarabiángal?’ ¹⁸ Á sikayu, kunnay kayu sù ira ábbing, ta ari kayu makáppak. Ta minay si Kuan ngam baddi lá yù akkákán na ána ari bulubugá namissán. Ngam kagian naw ta nagunagán na anitu. ¹⁹ Á síkán nga Kaká na ngámin na tatolay, minayá nepakkákán ána nepaginum sù ira tatolay. Á kagian naw laguk, ‘Ye, masingan naw yù tolay nga nabukátù ána minámissán, nga makikopun sù ira massuítì nga mináttuki ta buwì ána yù ira káruán nga minálliwá!’ Á awán ta awayyá mi kâ Kuan nga mamagayáyâ nikayu. Ngam mepasingan ta kuruk nga masírik nga naggapu kâ Namarò yù ituddu mi, megapu sù akka-akkuám mi ána yù ira manguruk nikami,” kun ni Apu Kesu.

*Yù Pamappalán ni Apu Kesu sù ira Ari Manguruk
Lukas 10:13-15*

²⁰ Á kabalin ni Apu Kesu nakkagi karannian, pinegapuanán na nga pinappalán yù ira tatolay nga naggián sù tallu nga ili nga pangipasinganán na ngaw ta aru nga pinagaddátu na nga makapállâ. Ta mássiki nu nakasingan yù ira tatolay sù ira makapállâ nga pinagaddátu na sù ili ra, arád da inibabáwi yù liwiliwá da. ²¹ Á kinagi na nira, “Kábbi kayu lá. Makállállâ kayu sangaw, sikayu nga taga Korasin! Ána sikayu nga taga Betseda, makállállâ kayu gapay! Ta nu inipasingak ku nakuan yù pagaddatuak ku nga makapállâ sù ira ngaw nakaliwá nga taga Tiro ána taga Sidon, nga kunnay sù pinagaddátù nga inipasingak ku nikayu, nabhabáwi nakuan yù ngaw ira ngámin nga tatolay ta nabayágin, á inipasingad da nakuan yù pabbabáwi ra megapu sù pabbarawási ra ta bayon ána pagitubang da ta abu, nga kunnay sù kustombare ra. ²² Á kagian naw ta sangaw nu ukuman ni Namarò ira, narámmâ yù pamagikáru na nira gapu ta kitarákè yù kingngikingnguá ra. Ngam yawe yù kagiak ku nikayu, ta sangaw nu duttál yù pangukum ni Namarò ta tatolay, mappaná yù ággián naw ánnè sù ággiád da nga taga Tiro ána taga Sidon sangaw nu duttál yù pangukum ni Namarò.

²³ “Á sikayu gapay nga taga Kapernium, ikáyâ naw panò ta meparáyaw kayu ta lángi? Ngam ari mesimmu, gapu ta yá labbetán naw sangaw garè yù api ta impiernu nga mannanáyun. Ta nu mepasingan nakuan sù ngaw ili na Sodoma yù makapállâ nga kunnay sù pinagaddátù ta gián naw, maggián lá paga nakuan yù ili na Sodoma. ²⁴ Á kuruk yù kagiak ku nikayu, ta sangaw nu duttál yù pangukum ni Namarò ta tatolay, mappaná yù ággián naw ánnè sù ággiád da nga taga Sodoma, nga neparámak megapu sù karákè da,” kun ni Apu Kesu.

*Yù Ággibannák nga Iyawâ ni Apu Kesu
Lukas 10:21-22*

²⁵ Á ta kabalin ni Apu Kesu namappalán sù ira tatolay, nakimállâ laguk sù Yáma na. Á kinagi na, “Ammò, dayáwat taka, nga Yápu na ngámin nga ajjan ta lángi ána ngámin nga ajjan ta dabbuno. Á dayáwat taka gapu ta inipakánnámmum yù kuruk nga bilim mu sù ira nga kun na ábbing nga tumulù, ngam inilímak mu sù ira nga kagiad da ta nasírik ira ána naggiámmu. ²⁶ Wan gemma, Ammò, ta yáyù gemma yù ikáyâ mu,” kun na.

²⁷ Á kabalin na nakimállâ ni Apu Kesu kâ Yáma na, kinagi na sù ira tatolay, “Inikárgu nayù Yámâ níkán yù ngámin nga ajjan ta lángi ána dabbuno. Á awán ta makánnámmu níkán nga Aná na nu ari galá si Namarò nga Yámâ. Á kunnian gapay nga awán ta makánnámmu sù Yámâ, nu ari galá síkán nga Aná na ána yù ira gapay nga ikáyâ ku nga pangipakánnámmuán kuna. ²⁸ Á sikayu ngámin nga nabannák ána marigirigá, e kayu níkán, ta pagibannagat takayu. ²⁹ Á tuppálan naw yù ipakuá nikayu ána gigiámmuan naw yù ituddù nikayu. Ta síkán yù masippà nga minángngabbák nikayu. Á mepagimammâ kayu sangaw níkán. ³⁰ Ta malogon nga matuppál yù ipakuá nikayu, ána pakálpawak ku yù jigá naw,” kun ni Apu Kesu.

12

*Yù Meyannung sù Ággaw nga Pagibannák da
Markus 2:23-28; Lukas 6:1-5*

¹ Á ta ággaw na Sabadu, nga pagibannák da, nallakalakák di Apu Kesu, nga nattalebák sù komán nga namulán ta tarígu. Á nabisin yù ira kábulun ni Apu Kesu nga makituddu kuna. Á yáyù nga iná da yù natagatán nga dáwa na tarígu, nga binussilád da ta kanad da. ² Á aijan gapay tán yù ira Parisio, nga sigidá massisim. Á pakasingad da sù kingnguá nayù ira kábulun ni Apu, kinagi ra kâ Apu Kesu, “Masingam mu yù akka-akkuán nayù ira tudduám mu, ta potuád da yù tunung tam sù pamussil da ta tarígu ta ággawo nga pagibannák tam,” kud da. ³ Á kinagi ni Apu Kesu nira, “Arán naw panò binibbik yù dán nga netúrâ nga meyanung sù kingnguá na ngaw ni Patul Dabid ta kabisid da áнна yù ira kábulun na? ⁴ Simillung si Dabid sù bale ni Namarò, á iná na yù pán nga neyátáng kâ Namarò. Á yáyù kinád di Dabid áнна yù ira kábulun na, nga mekontará sù tunung tam, ta kagian nayù tunung ta awán ta makáwayyá nga kumán sù neyátáng kâ Namarò nu ari là yù ira pári.*
⁵ “Á arán naw panò binibbik yù tunung nga iníturâ ni Moyses nga meyanung ta pakimore nayù ira pári kâ Namarò sù mangilin nga bale ni Namarò? Kinagi na ta kunnay ta makaliwatád da yù ággaw nga ággibannák da ta káda Sabadu, megapu sù passerbi ra kâ Namarò ta unak nayù mangilin nga bale na, ngam ari mebiláng ta liwá da. ⁶ Ginnán naw yawe nga kagiak ku nikayu. Aijan saw yù kapiánán nga passerbián naw nakuan ánnè sù mangilin nga bale ni Namarò. ⁷ Binibbik naw gemma yaw, ‘Yawe karagatak ku, nga ari yù pangiyátáng naw nikán nu ari galá yù pangikállá naw sù ira kábulun naw.’ Á nu nánámnuán naw nakuan yù kebalinán na, arán naw nakuan paliwatan yù ira awán ta liwá da. ⁸ Ta sikán lá nga Kaká na ngámin na tatolay yù makáwayyá nga makkagi sù mepángngá nga akkuán naw ta Sabadu, nga ággibannák,” kun ni Apu Kesu.

*Yù Tolay nga Nassesseng yù Táddy Limá na
Markus 3:1-6; Lukas 6:6-11*

⁹ Á kabalin ni Apu Kesu nakiubobuk sù ira Parisio, nánaw nga minay sù iskuelá, nga ággagammungád da. ¹⁰ Á aijan tán yù tolay nga nassesseng yù táddy nga limá na. Á aijan gapay yù ira káruán nga malussaw kâ Apu Kesu, á sinissimmurád da gapu ta alerad da yù awayyá ra nga mangikekák kuna. Á yáyù nga iniyabbû da kuna, “Ari panò makaliwá yù tolay sù tunung nu pammapián na yù mataki ta ággaw na Sabadu?” kud da. ¹¹ Á kinagi ni Apu Kesu nira, “Á ta ángngarigán, nu aijan yù karneru naw nga napannâ ta ábbû ta ággaw na Sabadu, arán naw panò umay igon? ¹² Á nepatalugáring sù tolay, ta napanapiá gemma yù tolay ánnè sù ayám! Á yáyù nga iyanugù nayù tunung yù napiá nga akkuán na tolay ta ággaw na ággibannák.”

¹³ Á kabalin ni Apu Kesu nanabbák karanniaw, nallipay laguk sù tolay nga nassesseng yù limá na, á kinagi na kuna, “Sonnatam mu yù limám,” kun na. Á sinonnâ nayù tolay yù limá na, á nammapiangin nga kunnay sù táddy nga limá na. ¹⁴ Ngam yù ira Parisio, pakasingad da ta nammapia yù limá na, nánaw ira, á ed da nakkaká-ubobugan nu kunnasi yù ámmapáte ra kâ Apu Kesu.

Si Apu Kesu yù Simullá ni Namarò nga Masserbi kuna

¹⁵ Á gapu ta ammu ni Apu Kesu yù pangigagánge nayù ira Parisio kuna, nánaw sù lugár. Á aru yù ira tatolay nga dumaddáddán kuna, á pinammapiá na yù ira ngámin nga máttaki. ¹⁶ Á kinagi na nira ta arád da bulubugá ipakánámmu sù ira ta tolay, ¹⁷ tapè matuppál yù kinagi ni Namarò nga inipeyubobuk na ngaw kâ Isaya, nga ábbilinán na, nga kunniaw: ¹⁸ “Yawe yù pinili nga masserbi nikán. Aggina yù iddi-iddukak ku áнна ayatáná kuna. Á ipè kuna yù Ikararuá.

Á yáyù nga aggina yù mangilayalayá ta meyanung sù taddák ku áнна yù pamanunnù ku sù ira ngámin nga tatolay, mássiki yù ira nga ari Kudio.

¹⁹ Ari makiramá onu makkalli.

Ari makalittang yù ággubobuk na ta kalsáda.

²⁰ Masippá, á kábbian na yù ira marigirigá áнна yù ira máttaki,

áнна ábbágán na yù ira nga magiddi-iddak kuna,

áddè ta arán na pamaluro sù pamanunnù na nga matunung,

²¹ áнна umay kuna yù ira ngámin makkakerumá nga tatolay,

* 12:4 1 Samuel 21:1-6; Libitiko 24:9

gapu ta matákkilalád da ta aggina yù iddamád da.”†

Si Apu Kesu ána si Belsebul

Markus 3:20-30; Lukas 11:14-23

²² Á kabalín na yaw, aijan yù ira tatolay nga minay sù gián ni Apu Kesu, á iniyánga ra kuna yù lálaki nga buling ána umal gapay gapu ta nagunagán na anitu. Á pinammapiá ni Apu Kesu, tapè makobobuk ána makasingan. ²³ Á napállâ ngámin yù ira tatolay, á kinagi ra, “Yaw panò yù Ginaká ni Patul Dabid, nga kinagi nayù ira ábbilínán ni Namarò ta iddagát tam?” kud da.

²⁴ Ngam yù ira Parisio, ta pakaginná ra sù kinagi nayù ira tatolay, á kinagi ra, “Si Belsebul nga yápu nayù ira anitu yù mangabbák kuna, tapè papanáwan na ira,” kud da. ²⁵ Á ammu ni Apu Kesu yù nonopan nayù ira Parisio, á kinagi na nira, “Nu maddaráma yù ira tatolay nga maggián sù páppatulán, mapatalián sangaw yù patul da ána massisinná yù ira tatole na. Á yù ira tangelián onu yù ira máttatáma ána mássisíná, nu ari nakástá yù áttatáde ra, mewarawará ira. ²⁶ Á nu papanáwan ni Satanas yù ira pinatuttul na nga anitu, kontarán na yù páppatulán na lápay. Á kunnasi panò laguk yù ámmaládddá na sù pammagure na nira? Awánin gemma! ²⁷ Á nu kuruk nakuan yù kagian naw nga palawanak ku yù ira anitu megapu sù pakáwayyá ni Belsebul, á yù ira kábulun naw laguk, asinni panò yù paggapuán na pakáwayyá ra nga mamalawán ta anitu? Ari gemma naggapu ká Belsebul. Á gapu ta naggittá yù paggapuán na pakáwayyá mi ána yù ira kábulun naw, á yù ira kábulun naw sangaw yù mamanunnù nikayu. ²⁸ Á gapu ta yù Ikararuá ni Namarò yù paggapuán nayù pakáwayyá, mánnámmuán naw gapay laguk ta jimittálin nikayu yù pammagure ni Namarò,” kun ni Apu Kesu sù ira Parisio.

²⁹ Á kun ni Apu Kesu paga, “Á ta ángngarigán, awán ta tullung nga magá sù bale nayù masikan, nu arán na paga bináluk. Á kabalín na mamáluk, awayyá na apan yù ikáyá na nga kukuá na. ³⁰ Á yù tolay nga ari makipulù níkán, ikalusso nangá. Á kunnian gapay, yù tolay nga ari mangabbák níkán nga mangunnuk, mamawwarawará lállaguk sù ira tatolay nga unnurak ku nakuan. ³¹ Á yáyù nga kagiak ku nikayu ta mapakomá ngámin yù makaliwá ána magubobuk ta naráké, ngam ari mapakomá yù mamaráké sù Mangilin nga Ikararuá. ³² Mapakomá yù magubobuk ta naráké níkán nga Kaká na ngámin na tatolay, ngam ari mapakomá yù magubobuk ta naráké sù Mangilin nga Ikararuá, mássiki kunangane nga ággaw, mássiki ta ádde noka nga ággaw nga duttál,” kun ni Apu Kesu nira.

Yù Keyarigán nayù Káyu ána yù Bungá na

Lukas 6:43-45

³³ Á kinagi na paga ni Apu Kesu, “Á ta ángngarigán, nu aijan yù napiá nga káyu, napiá gapay yù bungá na. Á kunnian gapay, nu jikkù yù káyu, jikkù gapay yù bungá na, á ammu tam gemma mappili ta káyu megapu sù bungá na. ³⁴ Sikayu yù kun na áná na iráw, ta kitaráké ngámin yù ubobugan naw! Á yá lá ubobugan na tolay yù aijan ta nonò na. ³⁵ Yù napiá nga tolay, tuppálan na yù napiá nga naggapu sù napiá nga nonò na. Á yù naráké nga tolay, kitaráké yù ággangnuá na ána ággubobuk na megapu sù naráké nga nonò na. ³⁶ Á yawe yù kagiak ku nikayu, ta sangaw nu duttál yù ággaw nga pangukum ni Namarò, á tabbagan nayù ira tatolay nga katággitádday yù inubobuk na nga awán ta serbi na. ³⁷ Ta mapakomá kayu onu mapagikáru kayu megapu sù inubobuk naw,” kun ni Apu Kesu.

Yù Pagiddak nayù ira Tatolay ta Pamagaddátu ni Apu Kesu

Markus 8:11-12; Lukas 11:29-32

³⁸ Á aijan tán yù ira káruán nga Parisio ána yù ira mangituddu ta tunung. Á kinagi ra ká Apu Kesu, “Mesturu,” kud da, “ipasingam mu ngè nikami yù pagaddatuam mu, tapè matákkilalám mi nu kuruk nga sikaw yù iddagám mi nga naggapu ká Namarò,” kud da. ³⁹ Á, “Anni ngillá danniw nga tatolay ta karanniw nga ággaw, nga naráké, nga awán ta panguruk da ká Namarò!” kun ni Apu Kesu. “Kiddaw kayu lá kiddaw ta panákkilalán naw! Ngam awán ta mepasingan nikayu, nu ari lá yù panákkilalán nga nepasingan ngaw megapu ká Jona, nga ábbilínán ni Namarò. ⁴⁰ Ta naggián ngaw si Jona sù bitúká na dakal nga sirá ta tallu nga ággaw. Á kunnay ká Jona ngaw, kunnian gapay sangaw níkán nga Kaká na ngámin na tatolay, ta maggiáná sangaw ta tallu nga ággaw sù unak na dabbun. ⁴¹ Á sangaw nu duttál yù ággaw nga pangukum ni Namarò, manáddak yù ira ngaw tatolay nga taga Ninaba, nga mamaliwá nikayu, gapu ta nabbabáwi ira ngaw ta liwiliwá da megapu sù pangilayalayá ni Jona, á aijanin yù minay saw nikayu nga makáwayyá ánné ká Jona. ⁴² Á yù ngaw rena nga

† 12:21 Isaya 42:1-4

nammaguray túrin ta Abagátán, aggina gapay yù umay sangaw nu duttálin yù ággaw nga pangukum, nga mangikeká nikayu, gapu ta minay ngaw nga naggapu ta arayyu nga lugár, tapè en na ginnán yù sírik nga inittuddu na ngaw ni Patul Solomon, á ajjanin yù minay saw nikayu nga makáwayyá ánnè ká Solomon,” kun ni Apu Kesu.

Yù Tolay nga Sinolián na Anitu

Lukas 11:24-26

⁴³ Á kinagi ni Apu Kesu paga nira, “Á ta ángngarigán, nu ajjan yù anitu nga mallawán sù tolay nga nagunagán na, umay mappassapassiár ta namagá nga lugár, nga magalek ta pagibannagán na. Á sangaw nu awán ta málerán nayù anitu, ⁴⁴ á kun na lâ ta nonò na, ‘Toliak ku lápáy yù nánawák ku,’ kun na. Á labbè nayù anitu sù tolay, málek na nga kun na balay nga napakarenuánin, ta awán ta maggián tán. ⁴⁵ Á yáyù nga en na apatan yù pitu nga kábulun na nga anitu, nga narákè ánnè kuna, á tullung yù ira walu nga maggián ta tolay. Á nappaná laguk yù ággián nayù tolay nga nagunagán na ngaw nayù tádday lâ. Á kunnian sangaw gapay yù mesimmu sù ira narákè nga tatolay kunangane nga ággaw,” kun ni Apu Kesu.

Yù ira Wáwwagi ni Apu Kesu ána yù Yená na

Markus 3:31-35; Lukas 8:19-21

⁴⁶ Á ta pakiubobuk ni Apu Kesu sù ira tatolay, limibbè yù yená na ána yù ira wáwwagi na. Á ajjan ira ta lawán nga magiddak, ta ikáyá da makiubobuk kuna. ⁴⁷ Á yáyù nga ajjan yù minay nakkagi ká Apu Kesu, á kinagi na, “Ajjan ta lawán di Yenám ána yù ira wáwwagim, á ikáyá daka nga kobobuk,” kun na. ⁴⁸ Á simibbák si Apu Kesu, á kinagi na kuna, “Asinni yù yená? Á asinni gapay yù ira wáwwagi?” kun na. ⁴⁹ Á sinonná na yù limá na ána inittuddu na yù ira sinudduán na nga ajjan tán, á kinagi na, “Masingam mu yawe ira, nga kunnay sù yená ána yù ira wáwwagi. ⁵⁰ Ta yù ira ngámin nga manguruk ká Yámá nga ajjan ta lángi ána manuppál sù ipakuá na nira, aggira yù kun na wáwwagi nga lálláki ána bábbay ána kun na yená,” kun na.

13

Yù Ángngarigán nga Meyannung sù Minámmulá ta Bini

Markus 4:1-9; Lukas 8:4-8

¹ Á tán galá nga ággaw, nánaw si Apu Kesu sù balay, á minay nagitubang ta aggik na bebay. ² Á kitáru yù ira tatolay nga nagarimummung kuna ta karagátán. Á yáyù nagali nga minay nagitubang si Apu Kesu sù barangay, á naggián yù ira tatolay, nga gitatáddagán ta aggik. ³ Á pangituddu ni Apu Kesu nira, nagángngarigán sù aru nga inittuddu na. Á kinagi na nira, “Ajjan yù minákkomán nga minay nangiwarí ta bini sù ákkomanán na. ⁴ Á pangiwarí na sù bini, negassi ta aggik na dálan yù baddi, á kinán na mammánú. ⁵ Á ajjan gapay yù bini nga negassi ta kabatuán, nga nabi lâ nga nattubbu gapu ta baddi garè yù dabbun na. ⁶ Á yáyù nga nabi lâ nalelay yù kapássungngi, á pattangngá na ággaw, dagarágá nga nakatáng, gapu ta ari nakapapponak yù gamù na. ⁷ Á ajjan yù bini nga negassi gapay ta kasisítán. Á gapu ta alistu yù áddakal nayù sí, ari nakarakal yù bini. ⁸ Á yù káruán nga bini, nepay sù napiá nga dabbun. Á yáyù nga jiminakal ána nabbungá. Ajjan nga kustu yù bungá na, ána ajjan nga aru yù bungá na, ána yù káruán nga kitáru yù bungá na. ⁹ Á sikayu nga makaginná, tángngagan naw laguk yù kagiak ku nikayu,” kun ni Apu Kesu.

Yù Gapu nayù Pagángngarigán ni Apu Kesu sù Pangituddu na

Markus 4:10-12; Lukas 8:9-10

¹⁰ Á minay laguk yù ira sinudduán ni Apu Kesu, á iniyabbú da, “Anni má ta magángngarigán ka nu tudduám mu yù ira tatolay?” kud da kuna. ¹¹ Á simibbák si Apu Kesu, á kinagi na nira, “Ari lâ aggira yù neddán, nu ari galá sikayu yù neddán ta pakáwayyá naw nga makánámmu sù ngaw nelímak nga meyanung sù pammagure ni Namarò ta lángi. ¹² Á yù tolay nga magginná ána makánámmu, malannapán sangaw yù nánámmuán na. Ngam yù tolay nga ari magginná ta napiá, mári kuna sangaw mássiki yù baddi nga kagian na nga kánámmuán na. ¹³ Á yáyù nga iyarigák ku yù ittuddú sù ira tatolay, gapu ta maggigimmúlák ira, ngam arád da matákkilalán yù kuruk, ána maggiginná ira, ngam arád da maginná ána arád da mánnámmuán. ¹⁴ Á yáyù nga megapu nira, matuppál yù kinagi na ngaw ni Isaya, nga ábbilinán ni Namarò. Kunniaw yù inipetúrá na ngaw ni Namarò kuna: ‘Ginná kayu lâ ginná, ngam arán naw mánnámmuán, ána singan kayu lâ singan, ngam arán naw matákkilalán.’

¹⁵ Danniaw ira nga tatolay, lalang ira, ta arád da ikáyâ mannononò sù kuruk, á yáyù nga mabbáli mataggá yù nonò da. Kitakitul ira ána inikimmà da yù matá ra, marakè masingad da, ána maginná ra, ána mánnámmuád da yù bilin nga meyanung nikán, á nu mabbabáwi ira nakuan sù liwá da, pakomák ku ira nakuan.*

¹⁶ “Ngam sikayu, napiá yù ággián naw, gapu ta matákkilalán naw yù masingan naw ána mánnámmuán naw yù maginná naw. ¹⁷ Á kuruk yù kagiak ku nikayu. Aru yù ira ngaw ábbilinán ni Namarò ána yù ira ngaw napiá nga tatolay nga matunung, nga máyâ nga maningan karanniaw nga masingan naw kunangan, ngam arád da nasingan, ána inikáyâ da nga maginná yù ngámin nga maginná naw kunangan, ngam arád da naginná,” kun ni Apu Kesu sù ira sinudduán na.

*Yù Keyarigán nayù Minámmulá ta Bini
Markus 4:13-20; Lukas 8:11-15*

¹⁸ Á kinagi na paga nira ni Apu Kesu, “Ginnán naw laguk yù kebalinán nayù ángngarigák ku nga meyanung sù minángngiwári ta bini. ¹⁹ Yaw yù kebalinán na bini nga natágá ta aggik na dálan, yù tolay nga makaginná sù bilin nga meyanung sù pammagure ni Namarò, ngam arán na kánnámmuán. Á umay laguk si Satanas, á irián na yù bilin nga naginná nayù tolay. ²⁰ Á yù bini nga negassi ta kabatuán yù keyarigán nayù tolay nga dagarágá nga magayáyâ nga mangalawá sù bilin nga maginná na. ²¹ Ngam kunay ta bini nga ari makapaggamù ta kabatuán, ari mepatattam ta napiá yù bilin ni Namarò ta nonò nayù tolay, gapu ta inilillíngá na, á yáyù nga ari napasigaggá yù panguruk na. Á sangaw nu marigrigá yù tolay megapu sù panguruk na ká Namarò, mabi lá mallurá, ána likuránán na yù panguruk na. ²² Á yù bini nga natágá sù kasisítán yù keyarigán nayù tolay nga makaginná sù ubobuk ni Namarò, ngam gapu ta burung na ta jigá nga umay nakuan kuna ána yù pakkaragá na nga mangunnuk sù aru nga magannagannuk nga kukuá na, arán na tángngagan yù napiá nga ipakuá ni Namarò kuna. Á ta kunay ta bini ta kasisítán nga ari makarakal ána ari makapabbungá, kunnian gapay sù bilin ni Namarò, ta ari mepatattam ta nonò nayù tolay. ²³ Á yù kebalinán nayù bini nga newári sù napiá nga ákkomanán, yáyù yù tolay nga magginná sù bilin ni Namarò ána kánnámmuán na. Á tángngagan na ta napiá, ána kurugan na. Á tuppálan na yù napiá nga ipakuá ni Namarò kuna, nga kunay ta aijan nga kustu yù bungá, ána aijan nga aru yù bungá na, ána yù káruán nga kitáru yù bungá na.”

Yù Ángngarigán nga Meyanung ta Kaddà nga Nepattubbu ta Bini

²⁴ Á aijan paga yù tádday nga ángngarigán nga inistoriá ni Apu Kesu sù ira tatolay. “Á meyárik yù pammagure ni Namarò sù tolay nga nangiwarí sù napiá nga bini sù ákkomanán na. ²⁵ Á ta pakkaturuk da ngámin, minay yù kalusso na, á inimulá na yù kaddà sù komán nga nemulán na tarígu. Á kabalin na nangiwarí sù komán, nánaw. ²⁶ Á nattubbu yù bini nga tarígu, á naddáwa. Á paddáwa nayù tarígu, nattubbu gapay yù kaddà. ²⁷ Á yù ira aripan nayù makákkuá sù ákkomanán, ed da kinagi sù yápu ra, ‘Apu, ari panò napiá yù bini nga nipemulám sù ákkomanám mu? Á anni má ta mattubbu gapay yù kaddà? Isaw panò paggapuán na?’ kud da. ²⁸ ‘Á yaw inimulá nayù malussaw nikán,’ kun nayù yápu ra. Á kinagi ra kuna, ‘Apu, baddulam mi panò yù kaddà laguk?’ ²⁹ ‘Ari lábbi,’ kun na nira, ‘marakè mekanakaná mabaddul gapay yù tarígu,’ kun na. ³⁰ ‘Paguráyán naw lá tapè mepaggigittá nga tulluá yù tarígu sù kaddà, áddè ta kagaták na. Á sangaw nu magaták, kagiak ku sù ira maggaták ta papoluad da nga baddulan yù kaddà, pángè da babbaran, tapè tuggiad da sangaw. Á kabalid da mamabbak sù kaddà, gatabad da laguk yù tarígu, tapè pakapiád da sù ággubbuák ku,’ kun na.”

*Yù Keyarigán nayù Kabadditán nga Bukal ána yù Áppalappák ta Pán
Markus 4:30-34; Lukas 13:18-21*

³¹ Aijan paga yù ángngarigán nga kinagi ni Apu Kesu nira. “Kunniaw yù keyarigán nayù pammagurayán ni Namarò ána yù ira tatolay nga mesipá sù pammagure na. Kunay sù kabadditán nga bukal, nga inimulá na tolay sù ákkomanán na. ³² Á mássiki nu kabadditán sù ngámin makkakerumá nga bukal, dumakal sangaw, nga mabbáli ta káyu, nga karakalán nayù ira ngámin nga mulá, á umay nga magumù yù ira mammánù sù ira pangá na.”

* 13:15 Isaya 6:9-10

³³ Á nagáangngarigán si Apu Kesu paga, á kinagi na nira, “Meyárik gapay yù pammagure ni Namarò sù áppalappák ta pán nga iná na babay nga inikiruk na sù arená ádde ta nekiruk ta napiá. Á limippák yù ngámin nga pán,” kun na.

³⁴ Á ta pangituddu ni Apu Kesu sù ira magaru nga tatolay, nagáangngarigán sù ngámin nga inituddu na. Awán bulubugá ta inubobuk na nira, nu arán na galá iniyáangngarigán. ³⁵ Á yáyù nga natuppál yù nakagi nayù ngaw ábbilinán ni Namarò, nga kunniaw: “Magáangngarigáná lâ sangaw nu tudduák ku yù ira tatolay.

Á kagiak ku nira yù nellimak nga ari paga nánnammuán ádde ngaw sù kaparò na dabbuno ta ádde kunangan.”†

Ibukalán ni Apu Kesu yù Kebalinán nayù Kaddà

³⁶ Á kabalín na yaw, nánaw laguk si Apu Kesu nga minay simillung ta balay. Á jimikki kuna yù ira sinudduán na, á kinagi ra kuna, “Ibukalám mungè nikami yù ángngarigán nga meyanung sù kaddà ta ákkomanán,” kud da. ³⁷ Á kinagi ni Apu Kesu nira, “Wan, á. Yù tolay nga nammulá sù napiá nga bukal, aggina yù keyarigák ku, nga Kaká na ngámin na tatolay.

³⁸ Á meyárik ta ákkomanán yù dabbuno. Á yù napiá nga bukal nga nemulá sù ákkomanán, yáyù keyarigán nayù ira tatolay nga mesipá sù pammagure ni Namarò. Á yù kaddà yù keyarigán nayù ira makiyáma ká Satanas, nga maddok sù ira narákè. ³⁹ Á yù malussaw, nga nangiwári ta kaddà, aggina gemma si Satanas. Á yù ággo na kagaták nayù nemulá, yáyù keyarigán nayù pagáddekán na ággaw. Á yù ira maggaták yù keyarigán nayù ira daroban ni Namarò.

⁴⁰ “Á kunnay ta mabaddul ána matuggi yù kaddà, kunnian gapay yù mesimmu sangaw nu pagáddekán na ággaw. ⁴¹ Ta sangaw nu duttál yane ággaw, á sikán nga Kaká na ngámin na tatolay, dobak ku yù ira daroban nga umay mangukum sù ira ngámin nga tatolay nga mamalliaw sù ira kábulud da, ána yù ira ngámin nga mangnuá ta narákè.

⁴² Á itabbá da ira ngámin ta gumaggággáng nga api sù impiernu, á gikuletán ira ána mangngarangngaringngi ira ta jigá da. ⁴³ Ngam yù ira tatole ni Namarò, mepaggián ira ká Yáma ra sù pammagurayán na, á maddalingáráng ira nga kunnay ta bilák. Á sikayu nga makaginná, tángngagan naw laguk yù kagiak ku nikayu,” kun ni Apu Kesu.

Yù Tallu nga Ángngarigán nga Meyanung sù Pammagure ni Namarò

⁴⁴ Á nagáangngarigán paga si Apu Kesu, á kinagi na, “Yù pammagure ni Namarò sù ira nga mesipá kuna, kunnay gapay sù aru nga pirá nga nekokok ta ákkomanán. Á nakesimmu yù tolay ta pirá. Á pakálek na, nepallá yù pagayáyá na. Á yáyù nga tábbunán na, á en na laguk iláku ngámin yù kukuá na, tapè manolí nga en na gatángan yù ákkomanán,” kun ni Apu.

⁴⁵ Á kinagi ni Apu Kesu paga, “Á kunniaw gapay yù keyarigán nayù pammagure ni Namarò. Ta aijan yù tolay nga minálláku, á en na aleran yù paddayan na ta dusáriu, nga nanginá yù katággitádday. ⁴⁶ Á pakálek na sù tádday nga kakástán, en na iniláku ngámin yù kukuá na tapè gatángan na yù kakástán,” kun na.

⁴⁷ Á kinagi na paga ni Apu Kesu, “Yawe gapay yù keyarigán nayù pammagure ni Namarò sù ira tatole na. Kunnay sù tabukul nga nipe ra ta bebay, tapè málá da yù makkakerumá nga sirá. ⁴⁸ Á sangaw nu mapannu yù tabukul, igod da, á magitubang ira nga mamassisinná ta sirá ta meyanung sù kaláse ra, tapè ipe ra sù lappi ra yù napiá ána itabbá da yù jikkú.

⁴⁹ Á kunnian gapay sangaw nu pagáddekán na ággaw. Ta umay yù ira daroban tapè isinná ra yù ira narákè nga tatolay sù ira napiá nga tatole ni Namarò. ⁵⁰ Á itabbá da yù ira narákè sù gumaggággáng nga api ta impiernu. Á gikulukuletán ira ána mangngarangngaringngi ira gapu ta jigá da.”

⁵¹ Á kabalín na nagáangngarigán ni Apu Kesu, iniyabbú na sù ira sinudduán na, “Nánnammuán naw panò yù kebalínán na ngámin danniw nga pagáangngarigák ku?” kun na nira. “Ammán,” kud da kuna. ⁵² Á kinagi ni Apu Kesu nira, “Á yù ira ngámin nga maggiáimmu sù tunung ni Namarò, nga manguruk sù netuddu, ána mesipá ira sù pammagure ni Namarò, meyárik ira ta maríku, nga ammu na mangiyusá sù ngámin nga aruátan na, nga dán nga pinakappián na ta bale na, ána yù bagu nga aruátan na gapay,” kun ni Apu Kesu.

Yù Pangipuerá ra ká Apu Kesu nayù ira Katangelián na Markus 6:1-6; Lukas 4:16-30

† 13:35 Salmo 78:1-3

⁵³ Á ta kabalín ni Apu Kesu nagángngarigán, nánaw laguk. ⁵⁴ Á nanoli ta ili na. Á minay sù iskuelá nga ággagammungád da, á inituddu na yù ira katangelián na. Á pangituddu na nira, napállà ira sù ituddu na. Á kinagi ra, “Sisaw panò nangápán na sù kasírik na ána yù pakáwayyá na nga mamagaddátu?” kud da. ⁵⁵ “Ari pánò nga aggina yù aná nayù kalapinteru? Á si Maria gemma yù yená na, ána yù ira wáwwagi na di Ime, kári Kusè, si Simon, ána si Kudas. ⁵⁶ Á ari panò mepaggián saw nittam gapay ngámin yù ira wáwwagi na nga bábbay? Sisaw panò nagiskuelán na nga naggigiámuán na ta ngámin karanniaw?” kud da. ⁵⁷ Á napporay ira kâ Apu Kesu. Á yáyù nga kinagi ni Apu Kesu nira, “Pakimorayád da yù ábbilínán ni Namarò ta ngámin nga lugár. Ngam yù ira katangelián na ána kanakanáyun na, awán ta ákkimore ra kuna,” kun na. ⁵⁸ Á yáyù nga baddi lá yù pinagaddátu na sù ili na, gapu ta awán ta ángnguruk da kuna.

14

Yù Kaputul ni Kuan nga Minánnigù

Markus 6:14-29; Lukas 9:7-9

¹ Á tán nga ággaw, si Patul Erodo yù mammaguray ta Galilia. Á narámak nayù patul yù akka-akkuán ni Apu Kesu. ² Á yáyù nga kinagi na sù ira gádde na, “Yane meparámak, aggina si Kuan nga Minánnigù, nga naginnanolayin. Yáyù gapu na nga makáwayyá nga mamagaddátul” kun nayù patul. ³ Yáyù kagian ni Patul Erodo gapu ta inipagápù na ngaw si Kuan, nga inipegálu na ána inipapukù na, megapu kâ Erodia nga atáwa na. Ta inatáwa ni Patul Erodo si Erodia, nga atáwa ni Pilippi, nga urián nayù patul. ⁴ Á nalussaw si Erodia kâ Kuan ngaw, megapu sù kinagi na sù patul nga atáwa na, nga “Mekontará ta tunung yù pangatáwam kâ Erodia, nga atáwa nayù uriám mu!” kun ni Kuan ngaw kâ Patul Erodo. ⁵ Á yáyù nga inikáyâ na papatáyan ni Patul Erodo si Kuan, ngam naganássing sù ira Kudio gapu ta inibiláng da ta ábbilínán ni Namarò.

⁶ Á jimittál yù panaddamád da ta keyaná nayù patul. Á pappabbúyá ra, nattála yù magingánay, nga aná ni Erodia, nga yù siúmán nayù patul, ta arubáng di patul ána yù ira álliuk na. Á nepallà yù ayá nayù patul nga naggíraw ta pattála nayù abbing. ⁷ Á yáyù nga nappagássingán nga nangitabbá yù patul ta iyawá na kuna yù maguray lá nga kiddawan na. ⁸ Á en na laguk nayù abbing nga iniyabbú kâ innò na nu anni yù kiddawan na. Á kinagi ni Erodia sù aná na yù kagian na sù patul. Á kinagi nayù abbing sù patul, “Iyawá mu níkan sawe yù ulu ni Kuan nga Minánnigù nga nepay ta ámmagonán,” kun na.

⁹ Á pangikomá nayù magingánay sù ulu ni Kuan, nakalò yù daddam nayù patul. Ngam gapu sù pangipagássingán na sù arubáng nayù ira álliuk na, inibilin na ta matuppál da kinagi nayù abbing. ¹⁰ Á dagarágâ nga pinutulád da si Kuan sù ábbaluran. ¹¹ Á inituluk yù yù ulu na nga nepay ta ámmagonán, nga iniyawá da sù magingánay. Á iniyawá na laguk kâ innò na. ¹² Á yù ira sinudduán ni Kuan, pakaginná ra ta kunniaw, ed da iná yù baggi na, ta initanam da. Á ed da laguk iniparámak kâ Apu Kesu.

Yù Pamakán ni Apu Kesu sù ira Límáribu nga Tatolay

Markus 6:30-44; Lukas 9:10-17; Kuan 6:1-14

¹³ Á ta pakarámak ni Apu Kesu sù nesimmu kâ Kuan, nattakay ta barangay nga nánaw, nga minay ta kalállammatán. Á pakarámak nayù ira tatolay sù páno ni Apu Kesu, nánawád da ngámin yù ira ili ra, á nappatalay ira nga jimínáddán kuna. ¹⁴ Á pakáddè ni Apu Kesu ta aggik, minutták ta barangay, á giminton ta kannak, á nasingan na yù magari nga tatolay. Á nepallà yù allà na nira, á pinammapiá na ngámin yù ira máttaki nira.

¹⁵ Á ta púgágin, minay kâ Apu Kesu yù ira sinudduán na. Á kinagi ra kuna, “Kalállammatán yawe giát tam, á mággè gabingin,” kud da. “Papanáwam mu bi yù ira tatolay, tapè unay ira gumatáng ta kanad da tukewà babálay,” kud da. ¹⁶ Á kinagi ni Apu Kesu nira, “Ari máwák nga mánaw ira. Sikayu yù mamakán nira,” kun na. ¹⁷ Á kinagi ra kuna, “Ajjan saw lillímá bullung nga pán ána dudduruá lá nga sirá,” kud da kuna. ¹⁸ “Iyánge naw saw níkan,” kun ni Apu Kesu nira. ¹⁹ Á pinagitubang na laguk yù ira tatolay, ta nakástá nga kakáddapán yù giád da. Á pakálâ ni Apu Kesu sù límá bullung nga pán ána duá nga sirá, nattánguk ta lángi, á nabbalabálâ kâ Namarò sù kanan. Á giddigidduá na yù pán, á iniyawá na sù ira sinudduán na, tapè isinek da sù ira tatolay. ²⁰ Á kimínán ira ngámin, á nabattuk ira. Á yù ira sinudduán na, ed da inunnuk yù buná ra, á mapulu duá nga lappi yù nagunnurád da. ²¹ Á límá ribu nga lálákí yù kimínán, ána yù ira bábbay ána ábbing gapay.

Mallakák si Apu Kesu ta Utun na Danum

Markus 6:45-52; Kuan 6:15-21

²² Á gapu ta mággè gabingin, lage na pamalabbè ni Apu Kesu sù ira tatolay ta bale ra, pinatake na ta barangay yù ira sinudduán na, ta pinapolu na ira nga dumàki ta dammáng.

²³ Á pamapáno na sù ira tatolay, giminon nga maguroray ta puddul, tapè makimállà sù Yáma na. Á pajjibbakin, aijan paga si Apu Kesu nga maguroray tán.

²⁴ Á keggá na paga ni Apu Kesu ta puddul nga makimállà ká Namarò, nakárayyungin yù barangay nga nattakayán nayù ira sinudduán na, nga nakáddè ta tangngá na bebay, nga mepappáttu ta palung, gapu ta arubangad da yù paddák. ²⁵ Á ta maddaggunin mannawák, nallakalakák si Apu Kesu sù utun na danum, nga jimikki sù barangay nga nattakayád da.

²⁶ Á pakasingan nayù ira sinudduán na kuna nga mallakalakák ta utun na danum, nakkalli ira ta nepallá yù assing da, á “Ye! Annáni! Annáni!” kud da. ²⁷ Ngam dagarágá nga kinagi ni Apu Kesu nira, “Sikán yaw! Ari kayu maganássing,” kun na.

²⁸ Á pakkagi ni Apu karannian, “Apu,” kun ni Eduru, “nu kuruk nga sikaw, agálám makè laguk ta mallakágá sawe utun na danum nga umay nikaw tán,” kun na. ²⁹ Á kinagi ni Apu Kesu kuna, “Wan, umay ka saw,” kun na. Á kinuruk na laguk ni Eduru, á gimitták ta barangay, á nallakák ta utun na danum nga minay ká Apu Kesu. ³⁰ Ngam pakasingan na ta dakal yù palung megapu sù paddák nga nasikan, naganássing. Á limimmak, á nakkalli nga kinagi na, “Apu, iyígù mà bil!” kun na. ³¹ Á dagarágá nga singngalán ni Apu Kesu yù limá na, á ginápù na. “Anni ngillá ta kabaddi na ángngikatalá mu nikán! Ngattá, ta mabbábáng ka?” kun ni Apu Kesu kuna. ³² Á nappittá ira ta barangay, á dagarágá nga nattukká yù paddák. ³³ Á yù ira nga aijan sù barangay, jináyo ra si Apu Kesu, á kinagi ra, “Apu, kuruk nga sikaw yù Aná ni Namarò!” kud da.

Yù Pamampapiá ni Apu Kesu sù ira Máttaki ta Purubinsia na Gennesaret

Markus 6:53-56

³⁴ Á pakáddè di Apu Kesu ta dammáng, naddung ira ta Gennesaret. ³⁵ Á yù ira tatolay nga taga Gennesaret, natákkilalád da si Apu Kesu. Á yáyù nga ed da iniparámak yù labbè na tán ta ngámin nga tatolay ta lugár da. Á iniyángo ra kuna yù ira ngámin nga máttaki. ³⁶ Á nakimiimállà ira kuna ta anugutan na nga siggeran nayù ira máttaki yù kiddanán nayù barawási na. Á nampapiá ngámin yù ira nga naniggek kuna.

15

Yù Ituddu nayù ngaw ira Naggaká sù ira Kudio

Markus 7:1-13

¹ Á aijan yù ira Parisio áнна yù ira mesturu nga mangituddu ta tunung na Kudio, nga naggapu ta Jerusalem, á minay ira ká Apu Kesu. Á iniyabbù da kuna, ² “Ngattá, ta arád da tuppálan nayù ira sinudduám mu yù kustombare nayù ira ngaw naggaká nittam? Nu kumán ira, arád da baggawán yù limá ra, nga nekontará gemma sù kustombare tam ngámin,” kud da. ³ Á simibbák si Apu Kesu, á kinagi na nira, “Á sikayu, ngattá, ta giddang naw yù bilin ni Namarò, tapè tuppálan naw yù kustombare naw? ⁴ Ta kinagi ni Namarò, ‘Makimoray kayu sù ira darakal naw áнна iddi-iddukan naw ira.’ Á kinagi na gapay, ‘Mapapátay laguk yù tolay nga mangiparaparákè sù yáma na áнна yená na.’” ⁵ Ngam sikayu, kagian naw ta ángngarigán nu aijan yù tolay nga makkagi kári ammò na ká innò na ta awán ta awayyá na nga mangabbák nira gapu ta neyátáng lá ká Namarò yù kukuá na nga ángngabbák na nira nakuan, ⁶ á arán nen máwák nga abbágán yù ira darakal na. Á gapu ta kunnian yù ángngituddu naw, inuli naw yù ubobuk ni Namarò tapè tuttulan naw yù ággangnuá naw! ⁷ Sikayu nga áppè pipiá! Kuruk nga nekanná nikayu yù inipetúrà na ngaw ni Namarò ká Isaya, nga kunniaiw:

⁸ ‘Danniaiw nga tatolay,’ kun ni Namarò, ‘dayáwad dangá megapu sù simù da, ngam arayyu yù nonò da nikán.

⁹ Awán ta serbi nayù pakimore ra nikán, gapu ta ibiláng da ta bilin ni Namarò yù ituddu ra lápay, nga naggapu galá ta nonò na tolay,’ kun ni Namarò.”†

Yù Mamaddaping ta Tolay

Markus 7:14-23

* 15:4 Esodo 20:12; 21:17 † 15:9 Isaya 29:13

¹⁰ Á kabalín ni Apu Kesu nga nakkagi karannian, inagálán na yù ira tatolay, á kinagi na nira, “Ginnán naw yawe nga kagiaku ku nikayu, tapè kuruk nga kánnámmuán naw,” kun na. ¹¹ “Ari yù kanan nga itallung na tolay ta simù na yù mamaddaping ta tolay, nu ari galá yù iniyubobuk na nga mallawán ta simù na yù paggapuán nayù karaping na. Yù pagubobuk na ta narákè nga naggapu ta nonò na, yawe yù mangari sù awayyá na nga makimoray kâ Namarò,” kun ni Apu Kesu.

¹² Á yáyù nga minay laguk kâ Apu Kesu yù ira sinudduán na, á kinagi ra kuna, “Apu, arám mu panò ammu ta natakítán yù nonò nayù ira Parisio ta pakaginná ra sù kinagim?” ¹³ “Wan ay,” kun ni Apu Kesu. “Á mabaddul sangaw gemma ngámin nga katággítádday nga mulá nga arán na inimulá nayù Yámà nga aijan ta lángì. ¹⁴ Paguráyán naw lâ yù ira buling nga mangering sù ira kagittá ra nga buling nga umay mappetuluk nira. Á nu ituddu na buling sù kabbulun na nga buling yù pallakarád da, mapanná ira duá sangaw ta abbù,” kun na.

¹⁵ Á kinagi na laguk ni Eduru kuna, “Ibukalám mungè nikami yù kebalinán nayù ángngarigán nga kinagim nira,” kun na. ¹⁶ Á kinagi ni Apu Kesu, “Arán naw panò lâ paga kánnámmuán? ¹⁷ Arán naw panò ammu ta maguray lâ nga kanan yù itallung na tolay ta simù na, umay galá ta bitúkà na, á mallawán sangaw? ¹⁸ Ngam ta pagubobuk na, yù mallawán ta simù na, yaw naggapu ta nonò na tolay, á yáyù yù mamaddaping ta tolay, ána mangari sù awayyá na nga makimoray kâ Namarò. ¹⁹ Ta yù nonò na tolay yù paggapuán nayù narákè nga ággangguá na nga mamapátay, mangarallaw ána makikarallaw, makkokò, á malladduk nga massistígu, ána mallilibá. ²⁰ Danniaw yù mamaddaping ta tolay ána mangari ta awayyá na nga makimoray kâ Namarò. Ngam nu kumán nga ari mabaggawán yù limá na, ari yian yù mamaddaping ta tolay,” kun ni Apu Kesu.

Yù Pangikatalà nayù Babay nga Ari Kudio
Markus 7:24-30

²¹ Á nánaw laguk si Apu Kesu tán nga lugár, nga minay ta lugár nayù ira ili na Tiro ána Sidon. ²² Á aijan tán yù babay nga taga Kenan, nga minay kâ Apu Kesu. Á inikatol na nga kinagi kâ Apu Kesu, “Ikállà makè, Apu, sikaw nga Ginaká ni Patul Dabid, ta narigirigá yù aná ku nga babay, nga nagunagán na anitul!” kun nayù babay. ²³ Ngam ari bulubugá simibbák si Apu Kesu. Á nakkallakalli yù babay nga jimináddán nira. Á yáyù nga jimikki kâ Apu Kesu yù ira sinudduán na nga makikomá kuna, á kinagi ra, “Apu, papanáwam mu bi yù babay,” kud da kuna.

²⁴ Á gapu ta ari Kudio yù babay nga makkiddaw kâ Apu Kesu, kinagi ni Apu Kesu, “Jinok nangà nayù Yámà, tapè ek ku tudduán yù ira ginaká ni Israel, nga meyárik ta nagawáwán nga karneru.” ²⁵ Á pakkagi ni Apu Kesu karanniaw, namalittúkak yù babay sù arubáng na, á kinagi na, “Apu, abbágám mà bi,” kun na. ²⁶ Á simibbák si Apu Kesu, á kinagi na kuna, “Ari mepángngá nga mepamakán sù itu yù mepamakán nakuan sù abbing.” Yáyù kinagi ni Apu, gapu ta ari Kudio yù babay nga makikomá kuna, á meyárik yù ira ari Kudio ta itu, nga ari mesipá sù ira Kudio, nga tatole ni Namarò. ²⁷ Á simibbák yù babay, á kinagi na, “Wan, Apu. Ngam yù ira itu, kanad da yù buttá nga naggapu ta lamesá nayù yápu ra,” kun nayù babay kuna. ²⁸ Á kinagi na laguk ni Apu Kesu sù babay, “Tiyá, mapalurò laguk yù ikáyá mu megapu sù napasigaggá nga ángngikatalà mu níkan.” Á dagarágá nga nammapiá yù aná nayù babay.

Yù Pammapiá ni Apu Kesu sù Aru nga Tatolay

²⁹ Á nánaw si Apu Kesu tán, nga nappatalay. Á nattalebák ta aggik na bebay na Galilia, á giminon sù puddul, á nagitubang tán. ³⁰ Á jimináddán kuna yù kitáru nga tatolay nga mangiyángay sù ira pilay, pukul ána nagappul, buling, umal, ána aru paga nga máttaki, nga inipe ra ta arubáng na. Á pinammapiá na ira ngámin. ³¹ Á napállá yù ira tatolay ta pakasingad da ta nammapiángin ngámin yù ira máttaki nga mepulù nira, ta naginná ra nga makobobugin yù ira umal, á nasingad da yù ira pukul ána nagappul nga egga ngin yù limá ra ána takki ra, ána makalakák yù ira pilay, ána makasinganin yù ira buling. Á jinaráyo ra si Namarò, nga pakimorayán nayù ira ginaká ni Israel.

Yù Pammakán ni Apu Kesu ta Appátaribu nga Lálláki
Markus 8:1-10

³² Á gapu ta nabayák ira ta kakáddapán nga aranni ta bebay na Galilia, inagálán ni Apu Kesu yù ira sinudduán na nga umay kuna. Á kinagi na nira, “Nakalò yù allá ku sawe ira tatolay, ta tallu nga ággaw iren saw giák ku, á awánin ta kanad da. Á arák ku ikáyá

nga palabbetan ira, nga gibisibisinán, marakè makkakápi ira ána magaliwawang nga matombá ta pallakák da ta dалан,” kun na. ³³ Á kinagi nayù ira sinudduán na kuna, “Sisaw yù pangápát tam ta ipamakát tam sawe ira kitáru nga tatolay saw kalállammatán?” kud da. ³⁴ Á kinagi ni Apu Kesu nira, “Pígiá bullung nga pán yù aijan nikayu?” kun na. “Pitu bullung nga pán, ána aijan baddi nga sirá gapay,” kud da kuna.

³⁵ Á yáyù nga pinagítubang na laguk ni Apu Kesu yù ira tatolay ta dabbun. ³⁶ Á iná na yù pitu bullung nga pán ána yù ira sirá. Á kabalín na nabbalabálá ká Namarò, giddigiddúá na ira, á iniyawá na sù ira sinudduán na. Á inisinek da sù ira tatolay. ³⁷ Á kiminán ira ngámin áddè ta kabattuk da. Á pitu nga darakal nga lappi yù napannu sù buná ra, nga inunnuk nayù ira sinudduán na. ³⁸ Á appátaribu nga lálláki yù kiminán, ána yù ira bábbay ána ábbing paga.

³⁹ Á ta kabalid da kiminán nayù ira magari, pinalabbè ni Apu Kesu ira ta giád da. Á nánaw gapay di Apu Kesu nga nattakay ta barangay, á minay ira ta lugár na Magadan.

16

*Kiddawan nayù ira Parisio yù Panákkilalád da
Markus 8:11-13; Lukas 12:54-56*

¹ Á minay ká Apu Kesu yù ira Parisio ána yù ira Sadusio gapay, ta nattatáday ira nga magalek sù awayyá ra nga manukuk kuna. Á yáyù nga kinagi ra kuna ta ipasingan na nira yù pamagaddátu na, nga panákkilalád da ta kuruk nga aijan kuna yù pakáwayyá na nga naggapu ká Namarò ta lángi. ² Á simibbák si Apu Kesu nira nga kun na, “Á ta lammak na bilák, nu masingan naw ta ujojjin yù lángi, ammu naw ta mapiá támma yù tiempu sangaw nu ummá. ³ Á ta alippánnawák nu masingan naw ta ujojjin ána maribbá yù lángi, ammu naw ta magurán onu mabbaggiu sangaw támma. Ammu naw manákkilála ta tiempu megapu sù lángi, ngam arán naw mánnámmuán yù kebalínán nayù panákkilalán ni Namarò nga mesimmu ta kággággaw! ⁴ Anni ngillá kinarákè nayù ira tatolay karanniwaw nga ággaw, nga awán ta ángnguruk da ká Namarò! Alek kayu lá alek ta panákkilalán nga makapállá, ngam awán ta mepasingan nikayu, nu ari galá yù kunnay sù napagaddátu nga nesimmu ngaw ká Jona,”* kun ni Apu Kesu nira. Á nánawán na ira.

*Pagimuguran ni Apu Kesu yù ira Sinudduán na
Markus 8:14-21*

⁵ Á pakaráki di Apu Kesu ta dammáng na bebay, nanonò nayù ira sinudduán na ta náttamád da yù nabbálan ta pán. ⁶ Á kinagi ni Apu Kesu nira, “Magimuguk kayu ána mappalán sù ápalappák ta pán nayù ira Parisio ána Sadusio,” kun na nira. ⁷ Á arád da kánnámmuán yù kinagi na nira. Á yáyù nga nakkaká-ubobuk ira sù kinagi na nira, “Yawe kinagi na nittam támma gapu ta awán ittam ta pán,” kud da. ⁸ Á ammu ni Apu Kesu ta arád da nánnámmuán yù kebalínán nayù kinagi na, á yáyù nga kinagi na, “Aro, baddi garè yù ángngikatalá naw! Anni má ta ubu-ubobugan naw yù káwán na bálun naw nga pán? ⁹ Arán naw paga kánnámmuán? Arán naw panò manonò yù límá bullung nga pán nga nepakán sù ira límáribu nga lálláki, ána pígiá nga lappi yù nonnuk naw nga buná ra? ¹⁰ Onu yù pitu nga bullung nga pán nga nepakán sù ira appátaribu nga lálláki, ána pígiá lappi nga buná ra yù nonnuk naw gapay tán? ¹¹ Ngattá, ta arán naw paga kánnámmuán ta ari meyanung ta pán yù ubobugak ku nikayu? Mappalán kayu sù ápalappák ta pán nayù ira Parisio ána Sadusio!” kun na. ¹² Á yáyù nga nánnámmuád da laguk ta ari gemma meyanung ta pán yù kinagi na nga palánad da, nu ari galá yù ituddu nayù ira Parisio ána Sadusio.

*Matákkilalán ni Eduru yù Mangiyígù nga Mammaguray
Markus 8:27-30; Lukas 9:18-21*

¹³ Á minay laguk di Apu Kesu ána yù ira sinudduán na ta lugár nga aranni sù ili na Sesaria Pilippi. Á keggá ra tán, nakiubobuk si Apu Kesu sù ira sinudduán na, á iniyabbú na nira, “Anni, kanu, yù kagian na tatolay nga meyanung níkan? Sikán nga Kaká na ngámin nga tatolay, asinningá, kanu?” kun na. ¹⁴ Á inittabbák da kuna, “Aijan yù ira makkagi ta sikaw kanu si Kuan nga Minánnigù,” kud da. “Á yù ira káruán kanu, kagiad da ta sikaw si Elias, nga yù ngaw ábbilínán ni Namarò. Á aijan paga yù ira nga makkagi ta sikaw kanu si Jeremia onu táday sù ira ngaw ábbilínán ni Namarò,” kud da kuna. ¹⁵ Á kinagi ni Apu Kesu nira, “Á sikayu. Asinningá ta ánninganán naw?” kun na. ¹⁶ Á simibbák si Simon Eduru, á kinagi na, “Sikaw si Kiristu, nga Aná nayù sigga-inángá nga Namarò, nga sinullá na nga

* 16:4 Mattiu 12:40

umay mammaguray ta dabbuno,” kun na. ¹⁷ Á kinagi na laguk ni Apu Kesu kuna, “Napiá yù ággiám mu, Simon, nga aná ni Jona! Ta ari tolay yù nangipakánnámmu nikaw sawe nga kinagim, nu ari galá yù Yámà nga aijan ta lángi. ¹⁸ Á yáyù nga kagiak ku nikaw, ta ingágat taka laguk ta Eduru, nga batu yù kebalinán na, gapu ta kun na batu nga maláddá yù kinagim nga meyanung níkán, nga pangikatalakán nayù ira ngámin nga metádday níkán. Á aggira nga metádday níkán, meyárik ira ta kapilliá nga patáddagak ku. Á gapu ta pangikatalá da níkán, awán bulubugá ta makáppù nira, mássiki nu si Satanas ána yù ira girakaráketán nga tumuttul kuna. ¹⁹ Á ikatalá ku nikaw yù pakáwayyám nga mangilayalayá ta meyanung sù pammagure ni Namarò, nga kun na ánnúsi nga mangibuká sù pammagurayán na ta lángi. Á yù ngámin nga ipugik mu nga mangnguá sawe dabbuno, yáyù gapay mepugik ta lángi. Á ta kunnian gapay, ngámin yù anugutam mu nga mangnguá sawe dabbuno, yáyù gapay meyanugú ta lángi,” kun ni Apu.

²⁰ Á kabalin na nakkagi ká Eduru karanniaw, pinappalán na laguk yù ira sinudduán na ta arád da iparámak ta aggina si Kiristu nga Mammaguray nga sinullá ni Namarò.

Ipalappá ni Apu Kesu yù Duttál sangaw nga Jigá na ána Pate na
Markus 8:31-33; Lukas 9:22

²¹ Á áddè tán nga ággaw, pinegapuanán ni Apu Kesu nga ipakánnámmu sù ira sinudduán na yù mesimmuán na sangaw. Á kinagi na nira, “Máwák nga umayá ta Jerusalem, tapè atamák ku yù panigirigá da níkán nayù ira giriámán ána yù ira kátannangan nga pári ána yù ira mesturu nga mangituddu sù tunung. Á ipapáte rangá sangaw, ngam paginnanolan nangá ni Namarò sangaw nu mekatallu nga ággaw,” kun na. ²² Á pakaginná ni Eduru sù kinagi ni Apu Kesu, inililli na, á kinagi na kuna, “Apu, paré bi ta ililli naka ni Namarò, tapè ari bulubugá mesimmu nikaw danniw nga kinagim!” kun na. ²³ Ngam inarubáng ni Apu Kesu si Eduru ána kinagi na kuna, “Arayyuám mà, ta iniyubobuk mu níkán yù ubobuk ni Satanas. Arám mà igaggak, ta tuppálak ku yù ipakuá ni Namarò níkán. Á ari naggapu ká Namarò yù ánonò mu, nu ari galá negagángay nga ánononò na tolay,” kun na.

Taddánán ni Apu Kesu yù ira Tumuttuttul kuna
Markus 8:34–9:1; Lukas 9:23-27

²⁴ Á kabalin na nakiubobuk ká Eduru, kinagi ni Apu Kesu sù ira ngámin nga sinudduán na, “Yù tolay nga máyá nga metádday níkán, máwák na nga tumulú níkán. Á yaw lá tuppálan na yù ipakuá kuna galá, nga ari yù ikáyá na, mássiki nu máwák nga attamán na lá yù jigá onu yù pate na megapu sù panguruk na níkán. Á ta kunnian iyabága na yù kurú na ána tuttulan nangá. ²⁵ Ta yù tolay nga mangengá sù ággián na, matay sangaw, á kengá lá yù inángá na, gapu ta mesinná yù tolay ká Namarò ta áddè ta áddè. Ngam yù tolay nga ari mangengá sù ággián na, mássiki nu matay megapu sù panguruk na níkán, aijan kuna yù mannanáyun nga inángá, gapu ta mesipá ká Namarò ta áddè ta áddè. ²⁶ Á napiá panò yù ággián na tolay, nu málá na ngámin yù egga ta dabbuno, ngam awán ta ákkiyápu na ká Namarò? Ari gemma napiá, tanu awán ta ákkiyáma na ká Namarò, mesinná kuna. Aijan panò yù awayyá na nga mappagá sù mannanáyun nga inángá? Awán gemma. ²⁷ Á duttál sangaw yù ággaw na panoli ta dabbuno, síkán, nga Kaká na ngámin na tatolay, nga maddalingárang ta karáyo nayù Yámà ána áddalingárang na. Á mepulú níkán yù ira darobak ku. Á bálatak ku yù ngámin ira nga tatolay nga katággítádday ta meyanung galá sù kingngikingnguá na. ²⁸ Á kukurugán nga kuruk yù kagiak ku nikayu. Aijan ira saw nikayu nga ari sangaw paga matay áddè ta arád dangá masingan nga umay mammaguray sù ira tatolè, síkán nga Kaká na ngámin na tatolay,” kun ni Apu Kesu.

17

Nanguli yù Baggi ni Apu Kesu
Markus 9:2-13; Lukas 9:28-36

¹ Á pappasá na annam nga ággaw, á inipulù ni Apu Kesu di Eduru ána yù ira duá nga mawwagi, di Ime ká Kuan. Á aggira lá yù giminon sù puddul. ² Á labbè da ta utun na puddul, nanguli yù baggi ni Apu Kesu sù pakkaká-arubáng da, nga naddalingárang nga kunnay ta bilák. Á nerallá yù kapuro na barawási na, nga makatulang nga kunnay ta pattangngá na ággaw. ³ Á ikáddagá lá limittuák nira di Moyses ká Elias, nga yù ira ngaw ábbilinán ni Namarò, nga makiubobuk ká Apu Kesu. ⁴ Á yáyù nga kinagi ni Eduru ká Apu Kesu, “Apu, napiá ta aijan ittam saw. Á nu ikáyá mu, ipappadde takayu laguk ta tallu nga amíngán, nga ággítádde naw, sikayu kári Moyses ká Elias,” kun na.

⁵ Á ta pagubobuk na lâ paga ni Eduru, nalepuanán ira ta kunam nga makatulang. Á naginná ra yù ngárál nga naggapu sù kunam, á kinagi na, “Yawe yù Aná ku nga iddukak ku. Á kuruk nga ayatáná kuna. Magginná kayu laguk sù kagian na,” kun nayù ngárál.

⁶ Á pakaginná nayù ira sinudduán ni Apu Kesu sù ngárál, napállá ira. Á nallakak ira ta dabbun, gapu ta nerallà yù assing da. ⁷ Á mináranni si Apu Kesu nira, á siniggek na ira, á kinagi na, “Gumikkáng kayu. Ari kayu maganássing,” kun na nira. ⁸ Á panánguk da kuna, awát ta tanakuán nga nasingad da nu ari lâ si Apu Kesu.

⁹ Á minutù di Apu Kesu ta puddul. Á utù da, sinaddánan na ira ni Apu Kesu ta napiá, “Arán naw ubobugan yù nasingan naw ta puddul áddè ta aringá maginnanolay, sikán nga Kaká na ngámin na tatolay,” kun na. ¹⁰ Á iniyabbù da kuna, “Á ngattá laguk, ta kagian nayù ira mangituddu sù tunung ta máwák nga mapolu bì nga duttál si Elias lage nayù Kiristu nga mammaguray?”* kud da. ¹¹ Á inittabbák ni Apu Kesu, “Wan, kuruk yian, ta mapolu nga umay si Elias, tapè paránan na ngámin. ¹² Á kuruk yawe nga kagiak ku nikayu. Minay ngin si Elias, ngam arád da garè natákkilalán. Á kingnguá ra lâ kuna yù inikákáyá da. Á kunnian gapay sangaw yù akkuád da nikán, nga Kaká na ngámin na tatolay,” kun ni Apu Kesu nira. ¹³ Á yáyù nga nánámmuán nayù ira sinudduán na ta si Kuan nga Minánnigù yù ubobugan na nira.

Yù Pamapáno ni Apu Kesu ta Anitu sù Abbing nga Mináballiák

¹⁴ Á utù di Apu Kesu, aijan yù magari nga tatolay nga jiminápun nira. Á jimikki ká Apu Kesu yù tádday, nga namalittúkak ta arubáng na. Á nakimállà kuna, á kinagi na, ¹⁵ “Apu, ikállà mu bì yù aná ku nga laláki, ta mináballiák, á nepallà yù jigá na, ta sigídá mapanná ta api onu danum. ¹⁶ Á iniyángè sù ira sinudduám nu, ngam arád da mapampapiá,” kun na. ¹⁷ Á simibbák si Apu Kesu, á kinagi na, “Aro! Anni yù katatole naw nga kitáttaggá nonò naw! Ngattá, ta awán paga ta ángngikatalà naw ká Namarò? Pígiá nga ággaw paga yù paggiák ku nikayu? Kunnasi panò yù ággiyattam ku nikayu áddè ta arán nawá ikatalà? Iyánge naw bì saw nikán yù abbing,” kun na. ¹⁸ Á iniyánge ra yù abbing sù gián na. Á gimmá ni Apu Kesu yù nattaliponak, á nallawán sù abbing. Á dagarágá nga nammapiá yù abbing.

¹⁹ Á kabalin na yaw, nu awánin yù ira káruán nga tatolay, minay lâ ká Apu Kesu yù ira sinudduán na, á iniyabbù da kuna, “Á anni má ta arám mi mapalawán yù anitu?” kud da kuna. ²⁰ Á kinagi na nira, “Baddi lâ garè yù ángngikatalà naw ká Namarò. Á kuruk yawe nga kagiak ku nikayu. Nu aijan nakuan yù ángngikatalà naw nga kun na karakal na kabaddítan nga bukal, makáwayyá kayu nga makkagi ta magali yawe puddul, á magali. Ta awán bulubugá ta arán naw makuá nu mangikatalà kayu ká Namarò,” kun ni Apu Kesu. ²¹ Ngam yù anitu nga kunnian, nu ikáyá naw mapalawán, máwák nga ari kayu bì kumán, tapè tángngagan naw lâ yù pakimi-imállà naw ká Namarò.

Pidduá ni Apu Kesu nga Kagian yù Pate na

Markus 9:30-32; Lukas 9:43b-45

²² Á ta keggá di Apu Kesu áнна yù ira sinudduán na ta Galilia, kinagi na nira, “Sangaw nu manganámmuán, gaputad dangà, á iyawâ dangà sù ira tatolay nga malussaw nikán. ²³ Á patatáyad dangà. Á nu mappasá yù tallu nga ággaw, maginnanolayá,” kun na. Á ta pakaginná nayù ira sinudduán na ta patatáyad da, nakalò yù daddam da.

Mabbuwì di Apu Kesu sù ira Mattuki ta Bale ni Namarò

²⁴ Á labbè di Apu Kesu áнна yù ira sinudduán na ta ili na Kapernium, jimikki ká Eduru yù ira mináttuki ta buwì sù bale ni Namarò. Á iniyabbù da kuna, “Mappagá panò yù mesturu naw sù buwì nayù mangilin nga kapilliá?” kud da. ²⁵ “Wanay,” kun ni Eduru nira. Á simillung laguk si Eduru sù balay nga pagginán ni Apu Kesu. Á tallung ni Eduru ta balay, lage na nagubobuk, kinagi ni Apu Kesu kuna, “Anni yù kagiam mu, Simon? Asinni yù ira mappagá ta buwì onu seddulá sù ira patul nga mammaguray ta dabbuno? Mabbuwì panò yù ira pamiliá ra? Onu yù ira káruán nga tatolay?” kun na ká Eduru. ²⁶ Á kinagi ni Eduru, “Yù ira káruán nga tatolay,” kun na. “Wan,” kun ni Apu. “Á yáyù nga sittam nga pamiliá ni Namarò, arát tam máwák yù mappagá ta buwì sù bale na. ²⁷ Ngam arát tam akkuán yù ipappore ra. E ka laguk ta bebay nga mamannuì. Á yù olu nga sirá nga málá mu, á unngátam mu yù simù na, á masingam mu yù kuártu. Apam mu, ta makatò ta pabbuwì na duá. Á em mu laguk ipappagá ta buwì ta,” kun ni Apu ká Eduru.

* 17:10 Malakia 4:5

18

Yù Ituddu ni Apu Kesu nga Meyannung sù Ággián nayù Makáwayyá

Markus 9:33-37; Lukas 9:46-48

¹ Á sangaw nu manganánuán, minay kâ Apu Kesu yù ira sinudduán na, á iniyabbù da kuna, “Apu, asinni nikami yù kátannangán sù pammagurayán ni Namarò ta lángi?” kud da kuna. ² Á inagálán na laguk ni Apu Kesu yù baddi nga abbing, nga inipe na ta tanggá ra. ³ Á kinagi na nira, “Innan naw yawe abbing. Kuruk yù kagiak ku nikayu, ari kayu bulubugá mesipà sù pammagurayán ni Namarò ta lángi nu arán naw ulian yù nonò naw ta kunnay ta nonò na yawe abbing nga tumulù. ⁴ Ta yù tolay nga tumulù ta kunnay sawe abbing, aggina yù kátannangán sù pammagurayán ni Namarò ta lángi. ⁵ Á yù tolay nga manguruk nikán, nu iddukan na yù kunniaw nga abbing megapu sù panguruk na nikán, sikán gapay yù iddukan na,” kun ni Apu.

Yù Mesimmu sù Toley nga Mangirudduák ta Malliwá yù Kabbulun na

Markus 9:42-48; Lukas 17:1-2

⁶ Á nagubobuk paga si Apu Kesu, á kinagi na, “Yù tolay nga manudduák nga mamalliwá sù tádday nga kunniaw nga abbing nga mangikatalà nikán, napiá nakuan nu gakkakád da ta batu nga ággilingán, á ed da itabbà ta bebay, tapè malaggabán nga ari maketuddu ta narákè sù ira ábbing. ⁷ Á nakállállà yù ira tatolay ta dabbuno, ta aru yù ira mangituddu ta narákè, tapè makaliwá yù ira kábulud da. Á negagángay gemma nga aijan yù ira manudduák sù ira kábulud da ta malliwá ira. Ngam kábbi yù tolay nga mamalliwá sù ira kábulun na, gapu ta narámmà sangaw yù pamagikáru ni Namarò kuna. ⁸ Á ta ángngarigán nu yù limá naw onu takki naw yù paggapuán nayù pakaliwatán naw, á más napiá nu gappulan naw nakuan ána itabbà naw, tapè arán naw mapidduán yù malliwá. Ta mássiki nu nagappul yù limá naw onu takki naw, á napiá lâ nu mesipà kayu kâ Namarò sù pagginán na ta lángi, ánnè sù keggá na duá nga limá naw onu duá nga takki naw, ngam metabbà kayu sangaw ta impiernu gapu ta arán naw likuránán yù liwá naw. ⁹ Á ta ángngarigán nu yù matá naw yù paggapuán nayù pakaliwatán naw, mabbabáwi kayu laguk, ána arán naw pidduán yù malliwá. Ta mássiki nu baddulan naw nakuan yù matá naw ána itabbà naw, napiá lâ nu táttádday lâ yù matá naw, ána mesipà kayu kâ Namarò ta lángi, ánnè sù keggá na duá nga matá naw, nga ketabbatán naw sangaw ta impiernu.

Yù Ángngarigán nga Meyannung sù Karneru nga Náwáwán

Lukas 15:3-7

¹⁰ “Magimuguk kayu laguk, tapè arán naw uyawan yù ira ábbing. Ta aijan yù ira daroban ni Namarò nga maggián ta lángi ta arubáng nayù Yámà, nga manaron sù ira ábbing nga katággítádday. ¹¹ Á yáyù nga minayà sawe dabbuno, sikán nga Kaká na ngámin na tatolay, tapè iyígù ku yù ira tatolay nga náwáwán. ¹² Á anni laguk ta ure naw? Ta ángngarigán anni akkuán nayù tolay nga aijan magatù nga karneru na, nu náwáwán yù tádday nira? Arán na panò panawán yù ira siámapulu ta siám, nga magariak sù garek na puddul, tapè en na aleran yù tádday nga náwáwán? Wan, gemma. ¹³ Á kuruk yù kagiak ku nikayu, ta sangaw nu náleránin, magayáyâ yù tolay megapu sù tádday, ánnè sù ira siámapulu ta siám nga ari náwáwán. ¹⁴ Á nu arán na ikáyâ na tolay ta máwáwán yù ayám na, mássiki nu tádday lâ, á nepatalugáring kâ Yáma naw ta lángi. Ta arán na ikáyâ ta mesinná kuna yù mássiki lâ tádday sù ira ábbing.

Nu Aijan yù Kábulum mu nga Makaliwá nikaw

¹⁵ “Á sikayu nga katággítádday, nu ángngarigán ta makaliwá nikaw yù kabbulum mu nga manguruk nikán, umay ka sù gián na, á sangaw nu dudduruá kayu lâ, kagiam mu kuna yù liwá na. Á nu ginnán na yù kagiam mu, mapiángin yù áwwagi naw. ¹⁶ Ngam nu arán na ka ginnán, á ipulù mu yù tádday onu duá nga kábulum mu, á pidduám mu umay makiubobuk kuna, tapè matuppál yù tunung nga neturá, nga máwák na yù duá onu tallu nga massistígu ta kuruk ngámin yù kagian naw. ¹⁷ Á nu arán na ira ginnán gapay, kagiam mu sù ira ngámin nga kábulum mu nga manguruk nga nepattatádday ta paggagammungán naw. Á nu panakitán na yù kagian nayù ira ngámin nga kábulum mu nga manguruk, ibiláng naw yian ta kunnay sù ira ari manguruk kâ Namarò ána yù ira kagittá na mináttuki ta buwi, nga mangilogó.

Yù Pakáwayyá naw nga Makkagi ta Mepugik ána Meyanugù

¹⁸ “Á kuruk yaw nga kagiak ku nikayu, ta magamaguray lâ yù kagian naw nga mepugik nga akkuán na tolay ta dabbuno, yáyù gapay mepugik ta lángi. Á magamaguray lâ yù

anugutan naw nga akkuán na tolay ta dabbuno, yáyù gapay meyanugù ta lángi. ¹⁹ Á aijan paga yù kagiak ku nikayu, ta nu aijan duá nikayu nga metádday ta nonò da nga meyanung sù ipakimállà da kâ Namarò, yáyù palurotan na sangaw nayù Yámà ta lángi megapu nira. ²⁰ Ta nu aijan mássiki dudduruá là onu tallu nga maggagammung megapu sù pakiyápu ra nikán, aijanà gapay ta tangngá ra.”

Yù Mesimmu sù Tolay nga Manakì Mamakomá sù Kabbulun na

²¹ Á minay laguk si Eduru kâ Apu Kesu, á iniyabbù na, “Apu, ta ángngarigán, nu aijan yù kabbuluk ku nga makaliwá nikán, mamepigiá panò yù pamakomá kuna? Mameppitu panò?” kun ni Eduru. ²² Á simibbák si Apu Kesu, á kinagi na, “Ari là mameppitu yù pamakomám kuna, ngam mássiki mamepigiá yù pakaliwá na nikaw, kunnian gapay yù pamakomám kuna,” kun ni Apu Kesu.

²³ Á yáyù nga nagángngarigán si Apu Kesu, á kinagi na, “Á kunnian laguk yù keyarigán nayù pammagure ni Namarò ta lángi. Aijan yù patul nga ikáyà na pasikkálan yù nelistá nga gatù nayù ira tatole na. ²⁴ Á pamegapu na nga mattuki sù pagatù na, iniyánge ra ta arubáng na yù tádday nga jinibu yù gatù na. ²⁵ Á gapu ta awán bulubugá ta awayyá na nga mappagá, ipeláku nayù patul laguk ána yù atáwa na konsu yù ira ánà na, ána yù ngámin nga kukuá ra, tapè mapagán yù gatù na. ²⁶ Á dagarágà nga namalittúkak yù tolay ta arubáng nayù yápu na nga patul, nga nakimi-imállà kuna, ‘Apu, ikállà mà, á pagák ku sangaw ngámin yù gatù ku nikaw,’ kun na. ²⁷ Á nakalò yù allà nayù patul sù tole na, á pinakomá na ngámin yù gatù na, á pinalubbáng na yù tolay. Á pinapáno na, tapè lubbekin ta bale na.

²⁸ “Á ta páno nayù tolay sù bale nayù patul, nerapunán na yù kabbulun na nga nakagatù kuna ta baddi là. Nakúràng ta magatù yù gatù na kuna. Á ginápù na ána piddal na. ‘Pagám mu yù gatù mu nikán!’ kun na kuna. ²⁹ Á dagarágà nga namalittúkak yù kabbulun na ta arubáng na nga nakikomá kuna, ‘Ikállà mà, ta pagák ku sangaw ngámin yù gatù ku nikaw,’ kun na kuna. ³⁰ Ngam nanakì, á en na laguk inipepukù áddè ta pakapagá na sù gatù na.

³¹ “Á pakasingan nayù ira kábulun na sù kingnguá nayù tolay nga napakomá nen nayù patul ta gatù na, nerallà yù daddam da. Á ed da iniránuk sù yápu ra. ³² Á inipágál nayù patul yù tolay, á kinagi na kuna, ‘Anni yù narámak ku nga kingnguám! Anni ngillá kinarákè mu! Pinakomá taka sù ngámin nga gatù mu nikán gapu ta nakimállà ka nikán. ³³ Ari panò napiá nu ikállà mu gapay nakuan yù kabbulum mu, nga kunnay sù pangikállà ku nikaw?’ kun nayù patul sù tolay. ³⁴ Á kitaporay yù patul, á inipebáluk na, tapè jigirigátad da áddè ta mapagán na ngámin yù gatù na.

³⁵ “Á kunnian gapay sangaw yù akkuán ni Ammò ku ta lángi sù katággítádday nikayu nga ari mamakomá sù kabbulun na nga nakaliwá kuna,” kun na.

19

Yù Pangituddu ni Apu Kesu nga Meyannung sù Paggúnge nayù ira Magatáwa

Markus 10:1-12; Lukas 16:18

¹ Á kabalín na nagubobuk ni Apu Kesu karanniw, nánaw ta purubinsia na Galilia, nga minay sù lugár na Judiya ta dammáng na danum na Jordan. ² Á jimináddán kuna yù ira magari nga tatolay. Á pinammapiá ni Apu Kesu ngámin yù ira máttaki tán nga lugár.

³ Á jiminikkì kâ Apu Kesu yù ira Parisio nga makiubobuk kuna, ta ikáyà da nakuan nga tukubán nu kunnasi yù itabbák na sù iyabbù da. “Máyà panò sù tunung na rilisiot tam nu igúne na laláki yù atáwa na, magari yù láláki yù kegapuánan na?” kud da kuna. ⁴ Á simibbák si Apu Kesu, á kinagi na, “Arán naw panò binibbik yù neturá sù dán nga libru, ta pinarò ni Namarò yù tolay nga laláki ána babay sù ngaw o-olu nga ággaw? ⁵ Á kinagi ni Namarò, ‘Yáyù gapu na nga panawán na laláki yù ira darakal na, tapè metádday sù atáwa na. Á mabbáli yù ira magatáwa nga kunnay ta táttádday là yù baggi ra.’” ⁶ Á gapu ta ari iren duá, nu ari là nga táttádday, yáyù nga ari mánugù nga passinnán na tolay yù ira nga pinattádde ni Namarò,” kun ni Apu Kesu.

⁷ Á pakaginná nayù ira Parisio sù kinagi na, iniyabbù da laguk, “Á ngattá, ta initúrà ni Kákay Moyses yù tunung nga makkagi ta aijan yù awayyá na laláki nga igúngay yù atáwa na nu iyawá na yù permá na nga pakasinganán ta paggúnge ra, lage na papanáwan yù atáwa na?” kud da. ⁸ Á kinagi ni Apu Kesu nira, “Nataggá garè yù ulu naw, á yáyù nga inanugù ni Moyses ta igúnge naw yù atáwa naw. Ngam ari nga kunnian áddè ngaw sù ngaw o-olu nga ággaw. ⁹ Á yawe laguk yù kagiak ku nikayu. Yù tolay nga mangigúngay ta atáwa na, mássiki

* 19:5 Genesis 1:27; 2:24

nu ari nga nakikarallaw yù babay, á nu mangatáwa yù láláki sangaw ta tanakuán nga babay, makaliwá, ta mebiláng ta mangarallaw,” kun ni Apu.

¹⁰ Á pakaginná nayù ira sinudduán ni Apu Kesu sawe nga kinagi na sù ira Parisio, kinagi ra kuna, “Á nu kunnian yù ággján nayù magatáwa, napiángin lállaguk nu awán ta mangatáwa,” kud da. ¹¹ Á simibbák si Apu Kesu, á kinagi na, “Arán na ngámin ira mágalán ni Namarò nga manuppál sawe netuddu, nu ari galá yù ira pinassikan ni Namarò. ¹² Ta nakkakerumá yù gapu na nga ari mangatáwa yù ira lálláki. Ajjan yù ira nga nakeyanatád da yù ari mangatáwa. Á ajjan yù ari mangatáwa gapu ta nakapun. Á ajjan gapay yù mabbaluntáriu nga ari mangatáwa tapè tángngagan na yù pangipakánnámmu na ta meyanung sù pammagure ni Namarò. Á yù makatuppál sawe ituddù, tuttulan na laguk,” kun ni Apu.

Yù Pagayáyá ni Apu Kesu sù ira Ábbing
Markus 10:13-16; Lukas 18:15-17

¹³ Á ajjan yù ira tatolay nga nangiyángay sù ira ábbing ká Apu Kesu, tapè támmitan na ira ána ipakimállá na ira ká Namarò. Ngam gimmá ra ira nayù ira sinudduán ni Apu. ¹⁴ Á kinagi ni Apu Kesu, “Anugutan naw ta umay níkán yù ira ábbing. Arán naw ira gammán. Ta yù ira tatolay nga tumulù, nga mangikatalá níkán ta kunnay sawe ira ábbing, aggira yù mesipá sù pammagure ni Namarò,” kun na. ¹⁵ Á inipotun na laguk yù limá na nira. Á kabalín na nananggal nira, á nánawin.

Yù Tolay nga Maríku

¹⁶ Á ajjan yù tolay nga minay ká Apu Kesu, á kinagi na ká Apu, “Mesturu, anni laguk yù napiá nga akkuák ku nakuan, tapè mepattolayá nga mesipá ká Namarò ta áddè ta áddè?” kun na. ¹⁷ Á simibbák si Apu Kesu, á kinagi na, “Ngattá, ta iyabbù mu níkán yù meyanung sù napiá? Si Namarò yù napiá, nga táttádday lá. Á nu ikáyá mu nga mepattolay nga mesipá ká Namarò ta áddè ta áddè, kurugam mu yù ngámin nga tunung ni Namarò,” kun na. ¹⁸ “Á anni nga tunung?” kun nayù tolay ká Apu. Initabbák ni Apu Kesu, “Ari ka mamapátay. Ari ka mangarallaw. Ari ka makkokò. Ari ka malladduk nga massistígu. ¹⁹ Makimoray ka sù ira darakal mu, á iddukam mu yù ira kábulum mu ta kunnay ta pangiddù mu sù baggin,”† kun ni Apu. ²⁰ Á kinagi nayù tolay kuna, “Kurugak ku ngámin dannian. Á anni paga yù máwák ku nga akkuán?” kun na. ²¹ Á kinagi na laguk ni Apu Kesu, “Nu ikáyá mu nga palurotan yù kukurugán nga napiá, em mu iláku ngámin yù kukuám, á isinek mu yù pallakuám mu sù ira pobare nga marigirigá, tapè ajjan yù tagikuám mu ána yù napiá nga paggianám mu ta lángi. Á umay ka laguk mepulù níkán,” kun na. ²² Á pakaginná nayù tolay sù kinagi ni Apu Kesu, nánaw nga nepallá yù daddam na, gapu ta aru yù kukuá na.

²³ Á pakasingan ni Apu Kesu sù páno nayù maríku, kinagi na sù ira sinudduán na, “Kuruk yù kagiak ku nikayu, ta marigá garè nga tumulù yù maríku ká Namarò tapè mesipá nakuan sù pammagurayán ni Namarò. ²⁴ Á ta ángngarigán, yù kamel. Más malogon yù állabbù na kamel sù abbù na dágum, ánnè ta tumulù yù tolay nga maríku ká Namarò, tapè mesipá sù pammagure na,” kun na. ²⁵ Á pakaginná nayù ira sinudduán na karannian, nepallá yù kapállá da. Á kinagi ra, “Asinni laguk meygù nga mesipá ká Namarò?” ²⁶ Á iningan na ira ni Apu Kesu, á kinagi na, “Awán ta tolay nga makakuá karannianaw. Si Namarò lá yù makáwayyá ta ngámin, ta awán gemma ta áddè na pakáwayyá na,” kun na.

²⁷ Á yáyù nga nagubobuk si Eduru, á kinagi na, “Ye, sikami, nilikuranám mingin ngámin ána siminuttul kami nikaw. Á anni laguk sangaw yù balabálá mi?” ²⁸ Á kinagi ni Apu Kesu nira, “Kukurugán nga kuruk yù kagiak ku nikayu. Manguli si Namarò sawe dabbuno sangaw, á síkán, nga Kaká na ngámin na tatolay yù meparáyaw nga magitubang sù maddalingáráng nga pagitubangán nayù patul nga mammaguray. Á sikayu nga mapulu duá nga siminuttul níkán, magitubang kayu gapay ta mapulu duá nga pagitubangán naw, nga mammaguray ána mamanunnù sù ira ngámin nga Kúdio, nga ginaká nayù ira mapulu duá nga áná ni Israel. ²⁹ Á ngámin yù ira tatolay nga panawád da yù bale ra, onu yù wáwwagi ra, darakal da, áná da, onu yù ákkomanád da megapu sù pangayá da ána panguruk da níkán, á aru yù bálá da nga alawatad da sangaw, á mepattolay ira nga mesipá ká Namarò ta áddè ta áddè. ³⁰ Ngam aru sù ira kátannangán kunangan, nga mapagukák sangaw. Á aru yù ira nagukák kunangan, nga kátannangán sangaw.”

† 19:19 Exodo 20:12-16

20

Yù Meyannung sù Pabbalabàla ni Namarò sù ira Tatole na

¹ Á pagángngarigán ni Apu Kesu paga, kinagi na, “Á kunniawe yù keyarigán nayù pammagurayán ni Namarò ta lánghi. Ajjan yù tolay nga makákkua ta namulán ta úbas. Á naggammia yù tolay nga minay magágál sù ira mangallu nga umay mattarabáku ta kobasán na. ² Á pagágál na nira, initarátu na ta táddanán na ira nga katággítádday sù negagángay ta tangággaw, á minay ira laguk nga mattarabáku sù kamulán na.

³ “Á sangaw nu ággawin, minay yù tolay ta dápun, á nasingan na yù ira káruán nga lálláki nga awán ta pattarabakuád da. ⁴ Á kinagi na nira, ‘E kayin mattarabáku gapay sù kobasák ku, ta iyawá ku nikayu sangaw yù mepángngà nga táddán naw,’ kun na. ⁵ Á minay ira laguk.

“Á manganánuán, pattangngá na ággaw, minay galá yù tolay ta dápun, á inagálán na yù ira nga ajjan tán. Á pannarek na bilák, kunnian galá má kingnguá na, ta en na jinok yù ira nálek na ta umay ira mattarabáku. ⁶ Á ta púgágin, minay má galá yù tolay, á nasingan na yù ira nga lálláki paga tán, á iniyabbù na nira, ‘Ngattá, ta tangatangággaw kayu nga makiubobuk saw?’ kun na. ⁷ Á initabbák da, ‘Awán garè ta pattarabakuám mi.’ Á kinagi na nira, ‘E kayu gapay laguk mattarabáku sù kobasák ku,’ kun na.

⁸ “Á pajjibbà, minay yù makákkua ta kobasán, á kinagi na sù pangikárguán na, ‘Agálám mu yù ira mangallu, á táddanám mu ira. Papoluam mu nga táddanán yù ira tatolay nga naporían, á paporianam mu nga táddanán yù ira napolu,’ kun na. ⁹ Á ánge nayù ira mangallu nga naporían, sináddanán na ira laguk nga katággítádday sù negagángay ta tangággaw. ¹⁰ Á ánge ra gapay nayù ira napolu, kagiad da ta malannapán támma yù táddád da. Ngam negittá galá yù táddád da sù neyawá sù ira naporían. ¹¹ Á pakálawá da sù táddád da, naddagaragim ira. ¹² Á kinagi ra sù makákkua ta dabbun, ‘Ngattá, ta inigittám yù táddád da sù táddám mi? Ta danniaw ira, táttádday lâ nga oras yù pattarabáku ra. Ngam sikami, tangatangággaw kami nga nagiyangngá ta pátu na bilák!’ kud da. ¹³ ‘Ey, kopun,’ kun nayù makákkua sù kobasán sù tádday nira, ‘arát taka nilogò, á awán ta liwá ku nikaw. Arát ta panò nattarátuán nga táddanát taka sù mepángngá ta tangággaw?’ ¹⁴ Apam mu laguk yawe táddám mu, á lubbè kangin ta balem. Ari panò napiá nu ikáyá ku nga igittá yù itáddák ku sù naporían áнна yù itáddák ku nikaw? ¹⁵ Awán panò ta awayyá nga maggástu sù kukuá? Mamassil ka támma garè, gapu sù ángngikállà ku!’ kun na.”

¹⁶ Á inibalin na laguk nga kinagi ni Apu Kesu, “Á kunnian yù ággián nayù ira tatolay ta pammagurayán ni Namarò ta lánghi. Ta mapolu nga mabálatán sangaw yù ira maporián nga mágalán kunangan. Á maporián nga mabálatán sangaw yù ira mapolu nga mágalán kunangan,” kun na.

Yù Pamillu ni Apu Kesu nga Makkagi ta Pate na Sangaw

Markus 10:32-34; Lukas 18:31-34

¹⁷ Á god di Apu Kesu ta ili na Jerusalem, inililli na yù ira mapulu duá nga sinudduán na sù ira káruán nga tatolay. Á ta pallakalakák da ta dalán, nakiubobuk nira, á kinagi na, ¹⁸ “Ginnán naw yawe kagiak ku. Gumon ittam ta Jerusalem. Á labbè tam sangaw, gaputad dangà, sikán nga Kaká na ngámin na tatolay. Á ikeká rangá ta arubáng nayù ira kátannangán nga pári áнна yù ira mesturu nga mangituddu sù tunung. Á pagikaruad dangà sangaw ta patay. ¹⁹ Á iyawá dangà sangaw sù ira ari Kudio. Á uyoyungád dangà, á palapaligatad dangà. Á ipatá dangà laguk sangaw ta kurù. Á sangaw sù mekatallu nga ággaw, maginnanolayá,” kun ni Apu Kesu.

Yù Kiniddo nayù Yená di Ime kâ Kuan

Markus 10:35-45

²⁰ Á manganánuán, jimikki kâ Apu Kesu yù atáwa ni Sebedo, nga nepappupúlù sù ira ána na, di Ime kâ Kuan. Á namalittúkak yù babay ta arubáng ni Apu Kesu, ta ajjan yù ipakimállà na. ²¹ Á iniyabbù ni Apu Kesu kuna, “Anni yù ikáyá mu?” Á simibbák yù babay, “Apu, parè bì lâ nakuan tanu magitubang ka sangaw nga mammaguray sù páppatulám mu, á mepagitubang bì nakuan gapay nikaw yawe ira duá nga ána ku, á passidduá nga bangád daka, nga tádday ta jiwánám mu áнна tádday ta jimigim,” kun na. ²² Á kinobobuk ni Apu yù ira sinudduán na, di Ime kâ Kuan, á kinagi na nira, “Arán naw garè ammu yù kiddawan naw. Tumulù kayu panò nga mepagiyattam sù panigirigá nayù ira tatolay, ta kunnay sù attamák ku sangaw?” kun na. Á kinagi ra, “Wan, meyattam mi,” kud da. ²³ Á kinagi ni Apu Kesu nira, “Kuruk nga attamán naw noka yù jigá nga kunnay ta ággiyattam ku sangaw.

Ngam awán ta awayyâ nga mappíli sù ira mepagitubang ta jiwánák ku áнна jimigi. Dannian nga pagitubangán yù napanán megapu sù ira nga piníli ni Ammò ku,” kun na nira.

²⁴ Á pakaginná nayù ira mapulu nga sinudduán ni Apu sù kiniddo nayù ira duá nga kábulud da kuna, nakujjá yù mammang da laguk sù ira duá nga mawwagi. ²⁵ Á yáyù nga inagálán ni Apu Kesu yù ira sinudduán na, á kinagi na, “Ammu naw gemma yù kustombare nayù ira patul nga mammaguray, ta kitarok ira sù ira tatole ra. Á yù ira makáwayyá nga gádde ra, aripanad da yù ira tatolay. ²⁶ Ngam sikayu, arán naw ira párigán! Ari nga kunnian yù akkuán naw. Ta yù tolay nga máyâ nga mebiláng ta kotunán naw, tumulú laguk nga mabbaluntáriu nga masserbi nikayu. ²⁷ Á yù tolay nga máyâ nga mebiláng ta kátannangán naw, máwák na laguk nga mangabbák nikayu nga kun na aripan naw. ²⁸ Á yáyù yù kunnay gapay nikán, nga Kaká na ngámin na tatolay. Aringá minay nga passerbián na tatolay, ngam umayakin masserbi nira áнна metapilá nga magikáru sù liwá na aru nga tatolay, tapé makipakomá ira ká Namarò áнна meyigù ira sù liwá da,” kun ni Apu Kesu.

Yù Pamammapiá ni Apu Kesu sù ira Duá nga Buling
Markus 10:46-52; Lukas 18:35-43

²⁹ Á ta páno di Apu Kesu áнна yù ira sinudduán na ta ili na Jeriku, jimináddán kuna yù ira magaru. ³⁰ Á aijan yù duá nga buling nga nagitubang ta aggik na dálan. Á pakaginná ra ta nattalebák si Apu Kesu, pine ra nakkatol, “Apu, ikállá kami bì, sikaw nga ginaká ni Patul Dabid,” kud da. ³¹ Á naporayád da ira nayù ira tatolay. Á kinagi ra nira ta ari ira mattannuk. Ngam pine ra lâ nakkatakotol nga iniyássikad da, “Apu, ikállá kami bì, sikaw nga ginaká ni Patul Dabid!” kud da. ³² Á pakaginná ni Apu Kesu, nagginná ta dálan, á inagálán na ira. Á iniyabbú na nira, “Anni yù ikáyâ naw nga akkuák ku megapu nikayu?” kun na. ³³ Á kinagi ra, “Apu, ikáyâ mi ta makasingan kamingin,” kud da. ³⁴ Á nakalò yù allá ni Apu Kesu nira áнна siniggek na yù matá ra. Á dagarágâ nakasingan iren, á nepappupulú ira kuna.

21

Yù Ánge ni Apu Kesu ta Jerusalem
Markus 11:1-11; Lukas 19:28-40; Kuan 12:12-19

¹ Á ánge ra paga di Apu Kesu ta ili na Jerusalem, nakáranni ira ta babálay na Bepagi, ta garek na puddul na Olibo. Á pinapolu ni Apu Kesu yù duá nga sinudduán na. ² Á kinagi na nira, “Mapolu kayu lâ nga umay ta babálay,” kun na. “Á labbè naw tán, dagarágâ masingan naw yù dongki* nga negálù áнна yù kigo na. Ubbarán naw ira laguk ta iyánge naw saw nikán. ³ Á nu aijan yù mangiyabbú nikayu, kagian naw lâ kuna, ‘Máwák na ira ni Apu,’ kun naw, á iyanugù na nga dagarágâ nga apan naw ira,” kun ni Apu Kesu nira. ⁴ Á nesimmu danniaw tapé matuppál yù inipeyubobuk na ngaw ni Namarò nga nabayák, sù ngaw ábbilinán na, nga kunniaw:

⁵ “Kagiam mu sù ira tatolay ta Jerusalem, ‘Innan nawè. Umayin yù patul naw, nga tumulú, nga mattakay ta kígaw na dongki.

Ammán! Yù kígaw na dongki yù pattakayán na.’ ”†

⁶ Á yáyù nga minay laguk yù ira duá nga sinudduán ni Apu Kesu, á sinuppál da yù kinagi na. ⁷ Iniyánge ra yù ayám áнна yù kigo na. Á iniyullák da yù gámi da sù barâ nayù ayám, á nattakay si Apu Kesu kuna. ⁸ Á aru yù ira tatolay nga nepappupulú kuna, nga iniyullák da yù ira gagámi da sù dálan nga pallakarán na. Á yù ira káruán nga magaru, sippisippáng da yù pangapangá na káyu, nga iniyullák da gapay sù dálan. ⁹ Á nagayáyâ nga nagaragiák ngámin yù ira magaru nga napolu ká Apu áнна yù ira naporían kuna gapay. Á inikatakotol da nga kinagi, “Dayáwat tam yù Patul tam, nga ginaká ni Patul Dabid! Mepagayáyâ ká Namarò yù Patul nga jinok na ta umay mammaguray! Meparáyaw si Apu Namarò ta lángli!”‡ kud da.

¹⁰ Á labbè ni Apu Kesu ta Jerusalem, napállá yù ira ngámin nga tatolay sù ili. “Asinni yaw?” kud da ngámin. ¹¹ Á simibbák yù ira magaru nga nepulupulú ká Apu Kesu, á kinagi ra, “Si Apu Kesu yaw, nga ábbilinán ni Namarò nga taga Nasaret sù purubinsia na Galilia,” kud da.

Yù Ánge ni Apu Kesu sù Dakal nga Bale ni Namarò ta Jerusalem
Markus 11:15-19; Lukas 19:45-48; Kuan 2:13-22

* 21:2 Yù dongki yù baddi nga kabáyu nga apaddu talingá na. † 21:5 Sakariá 9:9 ‡ 21:9 Salmo 118:26

¹² Á pakatunù ni Apu Kesu ta Jerusalem, simillung sù karakalán nga kapillía, nga mangilin nga bale ni Namarò, á pinaturiák na ngámin yù ira nga minálláku ta lágum nayù balay ána yù ira nga gumugumátáng. Á binalabalittak na yù ira lamesá nayù ira minánnáli ta kuárta ána yù ira ággitubangán nayù ira minálláku ta lummun. ¹³ Á kinagi ni Apu Kesu nira, “Ajjan yù kinagi ni Namarò, nga netúrâ sù dán nga libru, nga kunniaw, ‘Mangngágan yù balè ta Balay nga Ákkimállatan na ngámin na tatolay.’ Ngam sikayu, pabbalinan naw ta patuttukán nayù ira minákkokò!”^S kun na.

¹⁴ Á minay laguk kâ Apu Kesu sù bale ni Namarò yù ira tatolay nga buling ána pilay, á pinammapiá na ira ngámin. ¹⁵ Ngam yù ira kátannangán nga pári ána yù ira mesturu nga mangituddu sù tunung na rilisiod da, napporay ira nu nasingad da yù pinagaddátu ni Apu Kesu nga makapállâ. Á nepallâ yù pore ra ta pakaginnâ ra sù paddáyo nayù ira ábbing tán, nga nakkatakato, nga kud da, “Dayawat tam yù ginakâ ni Patul Dabid.” ¹⁶ Á iniyabbù da laguk nayù ira pári kâ Apu Kesu, “Arám mu panò maginnâ yù kagian nayù ira ábbing?” kud da kuna. “Á wan,” kun ni Apu Kesu. “Maginnákay. Á arán naw panò binibbik yaw nga netúrâ nga Ubobuk ni Namarò? Ajjan netúrâ nga kunniaw, ‘Yù ira ábbing, mássiki yù ira babaddi, netuddu nira yù makkagi sù mepángngâ nga áddáyo ra kâ Apu.’ ”*

¹⁷ Á kabalín na nakkagi ni Apu Kesu karanniaw, nánawán na ira laguk, á nánaw ta ili nga minay nagammâ sù babálay na Bitania.

Yù Káyu nga Ari Mabbungá
Markus 11:12-14, 20-24

¹⁸ Á ta pannawák, pattoli di Apu Kesu ta ili, á nabisinán. ¹⁹ Á nasingan na yù káyu nga igò ta aggik na dálan, á jimikki kuna, ta innan na nu ajjan bungá na. Ngam awán bulubugá ta nasingan na nga bungá na, nu ari lâ dipúru don. Á kinagi na laguk sù káyu, “Ari ken bulubugá mabbungá!” á dagarágâ nallelay ána nakkatáng yù káyu. ²⁰ Á yù ira sinudduán na, napállâ ira ta pakasingad da karanniaw. “Á ngattâ, ta dagarágâ nga nakatáng yawe káyu?” kud da. ²¹ Á simibbák si Apu Kesu, á kinagi na nira, “Kuruk yù kagiak ku nikayu. Nu kuruk nga mangikatalâ kayu kâ Namarò, ána ari kayu bulubugá mabbábáng, makuá naw gapay sangaw yù kunnay sù kingnguâ sawe káyu. Á ari lâ kunnian yù awayyá naw, ta nu kagian naw táne puddul, ‘Magali ka tán nga umay ta bebay,’ á makuá laguk. ²² Á nu mangikatalâ kayu kâ Namarò, maguray lâ yù kiddawan naw nga pakimállâ naw kuna, á mapaluré sangaw,” kun ni Apu Kesu.

Yù Meyannung sù Paggapuán nayù Pakáwayyá ni Apu Kesu
Markus 11:27-33; Lukas 20:1-8

²³ Á nanoli laguk si Apu Kesu sù dakal nga bale ni Namarò, tapè mangituddu sù ira tatolay. Á pangituddu na nira, minay kuna yù ira kátannangán nga pári ána yù ira karakalán nga Kudio, á iniyabbù da kuna, “Anni yù pakáwayyám nga mangnguá ta ngámin karanniaw nga akka-akkuám mu? Asinni yù nangiyawâ nikaw sù pakáwayyám?” kud da kuna. ²⁴ Á simibbák si Apu Kesu nira, á kinagi na, “Ajjan gapay bi yù iyabbù ku nikayu. Nu matabbák nawâ, á kagiak ku gapay nikayu yù paggapuán nayù pakáwayyâ. ²⁵ Á yawe yù iyabbù ku. Isaw panò yù paggapuán nayù pakáwayyâ ni Kuan nga Minánnigù? Naggapu kâ Namarò, onu naggapu ta tolay?” kun na. Á nakkakâ-abbâ-abbù ira, “Anni yù itabbák tam? Nu kagiát tam ta naggapu kâ Namarò, á kun na sangaw nittam, ‘Á ngattâ, ta ari kayu nanguruk kuna?’ ²⁶ Á nu kagiát tam ta naggapu ta tolay, maganássing ittam sù ira tatolay, marakè akkuád da ittam. Ta aggira ngámin, ibiláng da ta kuruk nga ábbilinán ni Namarò si Kuan,” kud da. ²⁷ Á yáyu nga initabbák da kâ Apu Kesu, “Arám mi garè ammu,” kud da. Á kinagi ni Apu Kesu nira, “Á arák ku gapay laguk kagian nikayu yù paggapuán nayù pakáwayyâ nga mangnguá sù akka-akkuák ku,” kun na.

Yù Ángngarigán nga Meyannung sù ira Duá nga Mawwagi

²⁸ Á nagángngarigán si Apu Kesu laguk, á kinagi na, “Anni yù kagian naw ta ure naw nga meyanung karanniaw. Ajjan yù tolay nga yáma na duá nga ánâ na nga lálláki. Á minay sù kakâ, á kinagi na kuna, ‘Anâ ku, e ka bi mattarabáku sù komán,’ kun na. ²⁹ ‘Molang ku,’ kun na anâ na kuna. Ngam sangaw, nabbabáwi sù initabbák na kâ ammò na, á minay galâ. ³⁰ Á minay yù yáma ra sù mekaruá nga anâ na, á kinagi na gapay kuna ta kunnay sù kinagi

na sù kaká na. ‘Wan, Ammò. Umayà,’ kun nayù urián. Ngam ari minay. ³¹ Asinni nira yù nanuppál sù kinagi nayù yáma ra?” kun ni Apu Kesu. Á kinagi ra, “Yù kaká ngay!” Á kinagi ni Apu Kesu nira, “Wan, á kuruk yawe nga kagiak ku nikayu nga karakalán, ta yù ira minálliwá nga kunnay sù ira minángxilogò nga mináttuki ta buwí ána yù ira bábbay nga minákkarallaw, mapolu ira nga mesipá sù pammagurayán ni Namarò ánnè nikayu. ³² Ta si Kuan nga Minángxigù, minay nga mangituddu nikayu sù napiá ána matunung nga tuttulan naw nakuan, tapè mabbalin ta napiá yù ággangngua naw, ngam arán naw kinuruk. Ngam nanguruk kuna yù ira mináttuki ta buwí ána yù ira bábbay nga minákkarallaw. Á mássiki nu nasingan naw yù pabbabáwi ra, ari kayu paga nabbabáwi tapè kurugan naw yù inittuddu na,” kun ni Apu Kesu.

Yù Ángngarigán nga Meyannung sù ira Karakalán nga Kudio
Markus 12:1-12; Lukas 20:9-19

³³ Á kinagi na laguk ni Apu Kesu nira, “Ginnán naw paga yù tádday nga ángngarigák ku. Ajjan yù tolay nga nammulá ta úbas sù ákkomanán na. Á inalitukán na yù kobasán, á pidde na gapay yù áppapatán ta úbas, tapè apan na yù tabbuk na. Á pidde na gapay yù atannángx nga balay, nga ájjipatán nayù magguárdiá sù kobasán. Á ta kabalin na nappadday, inikárgu na sù ira minánnaron, á nánaw nga minay ta arayyu nga lugár.

³⁴ Á gapu ta jiminakal nga nabbungá yù úbas, á jiminittál yù pappusik da. Á jinok na laguk nayù makákkua ta kobasán yù ira aripan na sù ira manaron ta kobasán na, tapè málá da yù balle na. ³⁵ Ngam ta labbè da ta kobasán, ginápù da ira nayù ira minánnaron. Á tádday yù pinalapalú da, á pinapáte ra yù mekaruá, ána pinayáng da ta batu yù mekatallu. ³⁶ Á yáyù nga jinok na mángxin nayù makákkua yù aru nga aripan na ánnè sù ira olu nga minay. Ngam kingnguá ra má gapay ira nayù ira minánnaron ta kobasán.

³⁷ Á yáyù nga ninonò nayù makákkua ta kobasán ta doban na laguk yù aná na nga umay sù ira minánnaron, ta kagian na ta nonò na, ‘Yawe nga aná ku yù kukurugán nga pakimorayád da,’ kun na. ³⁸ Ngam ta pakasingan nayù ira minánnaron sù aná na, inigagéngé ra, ta kagiad da, ‘Ye! Aggina yù makákkua ta kobasán sangaw nu matay yù yáma na. Ará! Et tamin, ta papatáyat tam tapè kukuá tam sangawin yù kobasán,’ kud da. ³⁹ Á ginápù da laguk, á inilawád da sù nálitukán nga kobasán, á pinapáte ra.

⁴⁰ “Á anni laguk yù akkuán nayù makákkua ta kobasán sù ira minánnaron sangaw nu umay sù kobasán na?” kun ni Apu Kesu nira. ⁴¹ Á simibbák ira kuna, á kinagi ra, “Ari bulubugá mabbábángx nga mamapátay sù ira narákè nga minánnaron, tapè ikárgu na yù kobasán na sangaw sù ira tanakuán nga minánnaron nga mangiyawá kuna sù balle na sangaw nu mapusik,” kud da. ⁴² Á kinagi ni Apu Kesu nira, “Uwan á! Á arán naw paga panò nabibbik yù dán nga netúrâ nga Ubobuk ni Namarò? Ajjan yù netúrâ nga kunniaiw, ‘Yù tádday nga batu nga panakitán nayù ira mappadday ta balay, aggina galá yù nabbáli ta ánnáddagán na balay.

Yaw yù kingnguá ni Apu Namarò, á nerallá yù kapállâ tam megapu kuna.’†

⁴³ Á yáyù nga kagiak ku nikayu,” kun ni Apu Kesu nira, “mássiki nu sikayu nga Kudio yù piníli ni Namarò áddè ngaw, patalián na kayu sangaw. Ta gapu ta panakitán naw yù sinullá na nga mamaguray, ari kayu mesipá sù pammagure ni Namarò nu ari galá yù ira tatolay nga magayáyâ nga manuppál sù ipakuá na nira. ⁴⁴ Á ngámin ira nga kun na mesiddúkal sù batu, kunnay ira ta mapakkapakká. Á ngámin yù ira mapannátán nayù batu sangaw, marappi ira nga maburuburá,” kun ni Apu Kesu.

⁴⁵ Á pakaginná nayù ira kátannangán nga pári ána yù ira Parisio sù ira ángngarigán ni Apu Kesu, nánámmuád da ta aggira yù ubu-ubobugan na, nga meyarík sù ira nanaki sù makákkua ta kobasán ána meyarík ira gapay sù ira nanaki sù batu nga nabbáli ta ánnáddagán na balay. Á yáyù nga mappaná yù pore ra. ⁴⁶ Á pinarubád da nakuan gaputan, ngam naganássing ira sù ira magaru nga tatolay, gapu ta kinuruk nayù ira tatolay ta ábbilinán ni Namarò si Apu Kesu.

22

Yù Ángngarigán nga Meyannung sù Bodá
Lukas 14:15-24

¹ Á nagángxarigán paga si Apu Kesu. Á kinagi na, ² “Á kunniaiw yù keyarigán nayù ángngisipá ni Namarò ta tatolay sù pammagure na. Ajjan yù patul nga namarán ta bodá

† 21:42 Salmo 118:22-23

nayù anà na nga laláki. ³ Á kabalid da namarán, jinok nayù patul yù ira aripan na nga umay magágál sù ira tatolay nga inapà na. Ngam nanakì yù ira inapà na nga umay makibodá. ⁴ Á yáyù nga jinok na laguk nayù patul yù ira tanakuán nga aripan na. Á kinagi na nira, ‘Kagian naw bì sù ira inapà ku ta umay lá ira nga umay, ta dán nga naparán yù ipabbodá mi. Napáringin yù ira báka ána yù ira matabá nga kígaw, á naparánin ngámin yù máwák tam,’ kun na. ⁵ Ngam pinaguráyád da yù pangágál nayù patul nira, á inupú da yù akka-akkuád da. Ajjan yù ira nga minay ta ákkomanád da ána yù ira minay nalláku. ⁶ Á yù ira káruán, ginápù da yù ira káruán nga aripan nayù patul, á inipasapasiránád da ira, ána pinapáte ra yù ira káruán.

⁷ “Á pakarámak nayù patul karannian, nepallà yù pore na, á jinok na yù ira suddálu na, ta ed da papatáyán yù ira namapátay. Á sinuggi ra yù ili ra. ⁸ Á kinagi na laguk nayù patul sù ira aripan na, ‘Dán nga naparánin ngámin yù ipabbodá, ngam ari mepángngà yù ira olu nga inagálák ku. ⁹ E kayu ta dápun, á apatan naw nga umay makibodá yù ira ngámin nga masingan naw,’ kun na. ¹⁰ Á minay laguk yù ira aripan nayù patul, á inagálád da ngámin yù ira narángnganád da ta dálan, nga tatolay nga napiá onu naráké. Á yáyù nga napannu yù bale nayù patul sù ira makibodá.

¹¹ “Á minay laguk yù patul nga nakiubobuk sù ira álliuk na, á nasingan na yù tádday nga ari nappabbisti ta ákkibodá. ¹² Á iniyabbù nayù patul kuna, ‘Kopuk ku, ngattá, ta simillung ka saw nga ari nappabbisti ta ákkibodá?’ kun nayù patul. Á ari nakatabbák yù tolay. ¹³ Á kinagi na laguk nayù patul sù ira masserbi kuna, ‘Gaputan naw ta baluran naw, á ilappák naw ta lawán sù kakallatán, nga gián nayù ira gikulukuletán, nga mangngarangngaringngi megapu sù jigá da.’” ¹⁴ Á kinagi na laguk ni Apu Kesu, “Aru yù ira nga agálán ni Namarò nga tumuttul kuna, ngam baddi lá yù ira naplí na nga mesipá kuna.”

Yù Pangiyabbù da ta Meyannung sù Pappagá ra ta Buwi sù Patul
Markus 12:13-17; Lukas 20:20-26

¹⁵ Á ta kabalín na yaw, nánaw laguk yù ira Parisio tán, á minay ira nakkaká-ubu-ubobuk nu kunnasi yù ánnukuk da ká Apu Kesu ta meyannung sù ubobuk na. ¹⁶ Á yáyù nga jinok da laguk ká Apu Kesu yù ira kábulud da nga Parisio, nga nepappupúlú sù ira kábulun ni Patul Erodo. Á labbè da sù gián ni Apu Kesu, kinagi ra kuna, “Apu, ammu mi nga awán ta ángngilogò mu ána kuruk yù ituddum nga bilin ni Namarò nga ipakuá na ta tatolay. Á awán ta irumurumám nga tatolay, gapu ta awán ta ikaburung mu nu anni yù kagiad da, mássiki nu makáwayyá ira. ¹⁷ Kagiám mu bì laguk yù nonò mu nga meyannung karanniw. Arán na panò ipugik nayù tunung tam yù pappagá tam ta buwi ká Sisar, nga patul nga mammaguray ta Roma?” kud da. ¹⁸ Ngam natagená ni Apu Kesu yù naráké nga nonò da. Á yáyù nga kinagi na nira, “Sikayu, nga agippípiá! Ngattá, ta paraparubán nawà nga tukubán? ¹⁹ Ipasingan naw bì níkan yù kuártu nga ipappagá naw ta buwi,” kun na. Á iniyawá da kuna yù pirá. ²⁰ Á iniyabbù ni Apu Kesu nira, “Asinni yù maká-alinu ána makángngágan nga nemárák sawe pirá?” kun na. ²¹ “Si Patul Sisar,” kud da. Á kun na laguk ni Apu Kesu, “Á kukuá ni Patul Sisar laguk yù pirá nga namárák na kágappá nayù mammang na ána yù ngágan na. Á yáyù nga pagán naw yù buwi nga meyannung sù pakáwayyá na. Á tuppálan naw gapay yù ipakuá ni Namarò níkayu, nga meyannung sù pakáwayyá na gapay,” kun ni Apu Kesu. ²² Á pakaginná nayù ira kábulun ni Patul Erodo ána yù ira Parisio sù kinagi ni Apu Kesu, nepallà yù kapállá da sù kasírik nayù itabbák na. Á nánawád da.

Yù Meyannung sù Paginnanole nayù ira Námmatay
Markus 12:18-27; Lukas 20:27-40

²³ Á tán nga ággaw galá, minay gapay yù ira káruán nga Sadusio. Aggira yù makkagi ta ari maginnanolay yù ira námmatay. Á jiminikki ira nga nagiyabbù ká Apu Kesu. ²⁴ Á kinagi ra, “Mesturu, ajjan yù netúrâ nga inítuddu na ngaw ni Moyses. ‘Nu matay yù laláki nga natayán na yù atáwa na nga awán ta aná da, máwák nayù wagi nayù natay nga atawán na yù bálu, tapè maganá ira, á mebiláng yù aná da ta aná nayù wagi na nga natay.’” ²⁵ Á gári, ajjan sawe giám mi yù ira pitu nga mawwawági nga lálláki. Á nangatáwa yù kaká, á natay nga awán ta aná na. Á yáyù nga inatáwa nayù urían na yù bálu, nga asípák na. ²⁶ Á natay laguk yù mekaruá nga laláki gapay nga awán ta aná na. Á kunnian gapay yù nesimmu sù mekatallu nga laláki ána yù ira dumaddáddán nga wáwwagi na áddè sù mekapitu. Aggira ngámin, nattutubbátád da nga inatáwa yù babay nga bálu nayù kaká ra, á natay ngámin yù ira mawwawági nga awán ta aná da. ²⁷ Á naporían nga natay gapay yù babay. ²⁸ Á yawe bì yù iyabbù mi níkaw. Noka nu duttál yù ággaw na paginnanolay nayù ira námmatay,

asinni laguk sù ira ngaw pitu nga lálláki yù atáwa nayù babay? Nepatalugáring ta inatáwa ra ngámin nga pitu,” kud da.

²⁹ Á simibbák si Apu Kesu nira, á kinagi na, “Nakaliwá kayu ta pannononò naw, gapu ta arán naw garè mánnámmuán yù dán nga netúrâ nga Ubobuk ni Namarò, ána arán naw gapay mánnámmuán yù pakáwayyá ni Namarò. ³⁰ Sangaw nu maginnanolay yù ira námmatay, mapataliánin yù ággián na tatolay, á kunnay ira sù ira daroban ni Namarò ta lángi, nga ari makiatáwa ána mangatáwa. ³¹ Á ta meyanung sù paginnanolay nayù ira námmatay, arán naw paga panò nabibbik yù kinagi ni Namarò nikayu? Netúrâ yaw nga kinagi na, ³² ‘Sikán si Namarò, nga pakimorayád di Abrakam kári Isak kâ Akup,’ kun ni Namarò. Á si Namarò, ari gemma yù pakimorayán nayù ira námmatay, nu ari galá yù pakimorayán nayù ira matolay,”* kun ni Apu Kesu nira. ³³ Á ta pakaginná nayù ira magari nga tatolay karannian nga kinagi ni Apu Kesu, napállá ira sù pangituddu na. Ta nánámmuád da ta mepattolay lá paga yù ira ngaw naggaká nira, di Abrakam kári Isak kâ Akup, mássiki nu natay yù baggi ra ngaw nga nabayágin lage na nakkagi ni Namarò ta aggina yù pakimorayád da.

Yù Kapoluán nayù ira Taddán ni Namarò nga Máwák na Tolay nga Tuppálan
Markus 12:28-34; Lukas 10:25-28

³⁴ Á pakaginná nayù ira Parisio ta ari nakatabbák yù ira Sadusio kâ Apu Kesu, naggagamung ira, á jiminikkì ira kuna. ³⁵ Á ajjan nira yù abugádu nga makáwayyá ta meyanung sù tunung nayù rilisiod da. Nagiyabbù kâ Apu Kesu, ta parubán na tukubán, á kinagi na, ³⁶ “Mesturu, anni yù kapoluán nayù ira ngámin nga taddán ni Namarò nga máwák na tolalay nga tuppálan?” kun na. ³⁷ Á kinagi ni Apu Kesu kuna, “ ‘Iddi-iddukam mu yù Yápu nga namarò nikaw megapu sù ngámin nga ayá nayù putum, megapu sù ngámin nga urem, ána megapu sù ngámin nga nonò mu.’† ³⁸ Yane yù napolu nga tunung nga máwák na tolalay nga tuppálan. ³⁹ Á negittá sù kapoluán yù mekaruá nga tunung ni Namarò, nga kunnaw: ‘Iddi-iddukam mu yù ira ikáttolem gapay nga kunnay sù pangiddù mu sù baggim.’‡ ⁴⁰ Á yawe ira duá nga tunung ni Namarò yù nabbatayán nayù ira ngámin nga tunung nga inikatalá ni Namarò kâ Moyses ána yù ngámin nga inittuddu nayù ira ábbilinán ni Namarò áddè ngaw.”

Yù Angngiyabbù nayù Tolay nga Meyannung sù Mangiyígù nga Mangngágan ta Kiristu
Markus 12:35-37; Lukas 20:41-44

⁴¹ Á gapu ta ajjanin yù ira Parisio nga naggagamung, á lage ra nánaw, nagiyabbù si Apu Kesu nira, nga kun na, ⁴² “Anni laguk yù kagian naw nga meyanung sù Mangiyígù nga mangngágan ta Kiristu, nga umay mammaguray? Asinni yù naggaká kuna?” kun na. Á simibbák ira, á kinagi ra, “Aggina yù ginaká nayù ngaw Patul Dabid,” kud da. ⁴³ Á iniyabbù na laguk ni Apu Kesu nira, “Á nu kuruk nga ginaká nayù ngaw Patul Dabid, ngattá laguk ta kinagi ni Patul Dabid ta aggina yù Yápu na? Ta yáyù inipeyubobuk na ngaw nayù Ikararuá ni Namarò kâ Dabid, nga kunnaw:

⁴⁴ ‘Si Apu Namarò, kinagi na sù Yápu: E ka bì magitubang ta jiwánák ku,

sù ággitubangan nayù meparáyaw, áddè ta arák ku appútan yù ira malussaw nikaw.’§

⁴⁵ Á gapu ta pakkagi ni Dabid ta aggina yù Yápu na, ngattá laguk ta kagian naw ta ginaká na galá ni Dabid?” kun ni Apu Kesu nira. ⁴⁶ Á awán bulubugá ta makatabbák kâ Apu Kesu. Á yáyù nga namegapu tán nga ággaw, awán bulubugá ta makeyangngá nga magiyabbù kuna.

23

Yù Pamappálan ni Apu Kesu nga Meyannung sù ira Parisio ána yù ira Mesturu nga Mangituddu ta Rilision

Markus 12:38-39; Lukas 11:43, 46; 20:45-46

¹ Á pagubu-ubobuk ni Apu Kesu sù ira magari nga tatolay ána yù ira sinudduán na, kinagi na laguk, ² “Yù ira mesturu nga mangituddu ta rilision ána yù ira Parisio, ajjan yù pakáwayyá ra nga ibukalán yù tunung ni Namarò nga inipetúrâ na kâ Moyses. ³ Á yáyù nga kurugan naw ána tuppálan naw laguk ngámin yù kagiad da nikayu. Ngam arán naw párigán yù akka-akkuád da, ta arád da tuppálan yù ubu-ubobugad da. ⁴ Á aru yù ilanná da sù tunung nga ipakuá ra nikayu, nga narigá nga mapalurò, nga kunnay ta narámmá nga ipakáttu ra nikayu, ngam arád da kayu bulubugá ábbágán nga mangáttu. ⁵ Á ngámin yù akka-akkuád da, akkuád da ta arubáng na tatolay, tapè masingan nayù ira

* 22:32 Exodo 3:6 † 22:37 Deuteronomio 6:5 ‡ 22:39 Libitiko 19:18 § 22:44 Salmo 110:1

tatolay áanna dayáwad da ira. Yáyù nga parakalad da yù ággianán nayù papel nga netúratán nayù Ubobuk ni Namarò, nga ibabbak da ta muká da áanna labunagád da. Á pakápuddad da yù uge na barawási ra, nga ipappeddaráyo ra gapay. ⁶ Á nu umay ira makilálláng, onu maggagammung ira sù paggagammungád da, ikáyá da magitubang sù kapiánán nga ággitubangán nayù tolay nga meparáyaw. ⁷ Á pappassiár da ta dápun, káyatád da yù pakimore nayù ira tatolay nira áanna mangabbún nira ta Mesturu.

⁸ “Ngam sikayu, arán naw iyanugù nga abbúnad da kayu ta Mesturu nayù ira kábulun naw. Ta mawwawági kayu, á awán gemma ta mesturu naw nu ari sikán galá nga táttádday. ⁹ Á arán naw abbúnan ta Ammò yù ira kábulun naw sawe dabbuno, gapu ta táttádday lá yù Ammò naw nga si Namarò nga aijan ta lángi. ¹⁰ Á arán naw iyanugù nga abbúnad da kayu ta Apu, gapu ta táttádday lá yù pakiyápuán naw, nga sikán nga si Kiristu nga naggapu ká Namarò. ¹¹ Á yù makáwayyá nga tolay nga kátannangán naw, máwák nga aggina yù masserbi nga mangabbák nikayu, nga kun na aripan naw. ¹² Ta yù tolay nga mappeddaráyaw, aggina yù mepagukák sangaw nga mepasiránán. Á yù tolay nga tumulú nga gumukák, aggina yù mepotun sangaw nga meparáyaw.”

Ipalappá ni Apu Kesu yù Nonò nayù ira Áppè Pípiá, nga Mangituddu ta Rilision áanna yù ira Parisio

Markus 12:40; Lukas 11:39-42, 44, 52; 20:47

¹³ Á kinagi na paga ni Apu Kesu, “Magimuguk kayu, sikayu nga mesturu nga mangituddu ta rilision naw áanna sikayu nga Parisio, nga áppa-áppè nga tumuttuttl ká Namarò. Agippípiá kayu! Anni ngillá yù ámmagikáru ni Namarò sangaw nikayu! Nakaliwá kayu ta pangituddu naw, megapu sù kotun na nonò naw. Ari kayu bulubugá nga mesipá sù pammagure ni Namarò megapu sù narákè nga ággangnuá naw. Ari lá yù panaki naw nga mesipá, nu ari gapay ta ilogó naw yù ira tatolay nga makkaragá nga mesipá sù pammagure ni Namarò. Manaki kayu nga tumuttuttl ká Namarò, á arán naw ira anugutan nga tumuttuttl kuna.

¹⁴ “Magimuguk kayu, sikayu nga mesturu nga mangituddu ta rilision áanna sikayu nga Parisio. Napiá yù lawán naw, ngam narákè yù unak naw. Agippípiá kayu! Ngattá, ta lannapán naw yù ikáru naw ká Namarò? Ngattá, ta darogatan naw yù ira bábbay nga bálu, tapè gubatan naw yù kukuá ra áanna bale ra. Á kabayagan naw yù ákkimállá naw, tapè mepasingan sù ira tatolay ta napiá kayu, ngam áppè pípiá kayu lá. Yáyù nga mappaná sangaw yù ámmagikáru ni Namarò nikayu.

¹⁵ “Magimuguk kayu, sikayu nga mesturu nga mangituddu ta rilision áanna sikayu nga Parisio. Agippípiá kayu! Ngattá, ta dumáki kayu ta dammáng na bebay nga umay ta arayyu nga lugár, tapè aleran naw mássiki táttádday nga patuttulan naw. Á nu aijan sangaw yù mapatuttl naw, yá lá mepángngá nga labbetán na yù api ta impiernu nga ari máddá ta áddè ta áddè, nepatalugáring ta narákè yù akka-akkuán na ánnè sù kingnuá naw.

¹⁶ “Magimuguk kayu, sikayu nga kun na buling nga mangituddu ta dálan sù ira kábulun na nga buling. Ta pangituddu naw, á ngattá, ta kagian naw, ‘Nu ipappagássingán na tolay yù mangilin nga bale ni Namarò sù pangitabbá na, arán na máwák nga tuppálan yù inittabbá na. Awán ta liwá na nu arán na tuppálan yù inittabbá na. Ngam nu yù buláwán nga aijan ta lágum nayù mangilin nga bale ni Namarò yù ipappagássingán na, máwák nga tuppálan na yù inittabbá na,’ kun naw. ¹⁷ Kunnay ta buling kayu áanna ulapá! Anni panò yù kangilinán? Mangilin panò nakuan yù buláwán nga aijan ta bale ni Namarò nu ari lá megapu sù kangilin nayù bale ni Namarò?

¹⁸ “Á ngattá ta kagian naw, ‘Nu ipappagássingán na tolay yù ángngiyátangán, arán na máwák nga tuppálan yù inittabbá na, ta awán ta liwá na nu arán na tuppálan. Ngam nu ipappagássingán na yù iyátáng na ká Namarò nga ipotun na sù ángngiyátangán, á máwák nga tuppálan na yù inittabbá na,’ kun naw. ¹⁹ Ari panò kuruk nga kunnay kayu ta buling! Anni panò yù kangilinán? Mangilin panò yù iyátáng na tolay ká Namarò, nu ari galá megapu ta nepotun sù mangilin nga ángngiyátangán? ²⁰ Á yáyù nu aijan yù itabbá na tolay ká Namarò, á nu ipappagássingán na yù ángngiyátangán nga mangilin, mesipá gemma gapay yù ngámin nga meyátáng tán. ²¹ Á kunnian gapay, nu ipappagássingán na tolay yù mangilin nga bale ni Namarò, mesipá gemma gapay sù pappagássingán na si Namarò nga maggián ta bale na. ²² Á nu ipappagássingán na tolay yù lángi, nga pammagurayán ni Namarò, mesipá gemma gapay si Namarò nga mammaguray tán.

²³ “Magimuguk kayu, sikayu nga mesturu nga mangituddu ta rilision áanna sikayu nga Parisio, ta pagikaruan na kayu sangaw ni Namarò. Agippípiá kayu! Ngattá, ta iyawá naw ká Namarò yù mekamapulu nga makkakerumá nga kiruk na atang nga inimulá naw, ngam

arán naw tuppálan yù tunung nga kuruk nga máwák naw nga tuppálan. Ari matunung yù akka-akkuán naw. Awán ta ángngikállá naw sù ira kábulun naw. Á ari kayu mekatalá. Napiá yù pangiyawá naw sù mekamapulu ká Namarò, ngam máwák naw gapay nakuan nga ari lonán yù napiá nga akka-akkuán naw nga matunung ána yù ángngikállá naw sù ira kábulun naw ána yù panuppál naw sù pakáwayyá naw nga mekatalá nikayu. ²⁴ Meyárik kayu ta buling nga mangituddu ta dálan sù ira kábulun na nga buling. Tángngagan naw ta napiá yù káruán nga ituddu nayù tunung, ngam pinaguráyán naw yù kapiánán nga ituddu na nga máwák naw tuppálan. Meyárik kayu gapay ta mangalissí sù inuman na, tapè irián na yù ilá, ngam golpian na tallanan sangaw yù kamel!

²⁵ “Magimuguk kayu laguk, sikayu nga mesturu nga mangituddu sù rilision ána sikayu nga Parisio, ta pagikaruán na kayu sangaw ni Namarò. Agippípiá kayu! Ngattá, ta magugá kayu ta passuelu ána tariaw, tapè narenu yù lawán na. Ngam ari narenu yù aijan ta unak naw, ta arán naw napakarenuán yù nonò naw. Mangilogò kayu ána mukkuk kayu nga ari makáppak! ²⁶ Sikayu nga Parisio, kunnay kayu ta buling! Papoluan naw nga pakarenuán bi yù naráké nga nonò naw, nga ari masingan, tapè mepasingan sangaw ta napiá gapay yù akka-akkuán naw.

²⁷ “Magimuguk kayu, sikayu nga mesturu nga mangituddu ta rilision naw ána sikayu nga Parisio, ta pagikaruán na kayu sangaw ni Namarò. Agippípiá kayu! Ta kunnay kayu ta tanam nga napappuraw ta pítá, nga nakástá yù lawán na, ngam ta unak aijan yù tulutuláng na natay ána narúnú nga nabuyú. ²⁸ Á kuruk nga karannian yù keyarigán naw, ta kunnay ta napiá ána matunung kayu ta ánninganán na tatolay, ngam naráké yù unak naw, ta áppè pípiá kayu nga minállíwá.”

*Yù Pangipakánnámmu ni Apu Kesu sù Pamagikáru ni Namarò
Lukas 11:47-51*

²⁹ Á kinagi na paga ni Apu Kesu, “Magimuguk kayu, ta pagikaruán na sangaw ni Namarò nikayu, sikayu nga mesturu nga mangituddu ta rilision ána sikayu nga Parisio. Agippípiá kayu, ta pakástán naw yù katanamán nayù ira ngaw ábbilinán ni Namarò ána yù pantiong nayù ira ngaw napiá nga tatolay. ³⁰ Á kagian naw, ‘Nu aijan kami lâ nakuan sù ngaw ággaw nayù ira naggaká nikami, ari kami nepattádday sù ira minámmápátay sù ira kábulud da nga ábbilinán ni Namarò,’ kun naw. ³¹ Á megapu sù kagian naw, palappátan naw ta kuruk nga sikayu yù ginaká nayù ira ngaw namapátay sù ira ngaw ábbilinán ni Namarò. ³² Ará! Balinan naw laguk yù naráké nga pinegapuanán nayù ngaw ira naggaká nikayu. ³³ Kunnay kayu ta ána na iráw, ta naggigittá kayu sù ira ngaw naggaká nikayu, nga naráké yù nonò da ána minángngilogò ira. Egga panò yù awayyá naw nga mattálaw, tapè ari kayu mekanakaná sù pamagikáru ni Namarò ta impiernu? Ari kayu gemma makalilli kuna! ³⁴ Á yáyù nga dobak ku sangaw nikayu yù ira ábbilinán ni Namarò, yù ira masírik, ána yù ira mesturu, ta ed da kayu nakuan tudduán. Á papatáyan naw sangaw yù ira káruán nira, á ipátá naw ta kurú yù ira káruán, á aijan yù ira nga paligatan naw sangaw sù ira ággagammungán naw. Á ta pattálo ra, sissimmátan naw ira lá, á jigirigátan naw ira ta ngámin nga ili nga angayád da. ³⁵ Á yáyù nga mekanakaná kayu galá sangaw sù pamagikáru ni Namarò sù ira namapátay sù ira ngámin nga napiá nga tatolay, nga namegapu ta áddè ngaw ká Abel nga aná ni Lákay Adan, ta áddè ká Sakariá, nga aná ni Barakiá, nga pinapáte naw sù lállátan nayù bale ni Namarò ána yù ánnuggián ta meyatáng. ³⁶ Á kuruk yù kagiak ku nikayu, sikayu nga gakagaká ngawe, mekanakaná kayu sù pamagikáru ni Namarò, megapu sù pamapáte nayù ira ngaw naggaká nikayu sù ngámin ira nga ábbilinán na.”

*Yù Pangiddú ni Apu Kesu sù ira taga Jerusalem
Lukas 13:34-35*

³⁷ Á kinagi na laguk ni Apu Kesu, “Sikayu nga taga Jerusalem! Nepallá yù daddam ku, ta arán nawá ginnán! Papatáyan naw yù ira ábbilinán ni Namarò ána payangan naw ta batu yù ira nga jinok na nga manuddu nikayu! Á namepígiá yù inamma-ammung ku nakuan nikayu nga kunnay sù ángngammung na úpá sù píyá na, ngam manaki kayu! ³⁸ Á yáyù nga sikayu lállaguk maguray, ta nánawán na kayín, nga pinaguráyán ni Namarò. ³⁹ Á yaw kagiak ku nikayu. Arán nawá sangawín masingan ta áddè ta dattál na ággaw nga panolí, á tákkilalán nawá ána kagian naw, ‘Dayáwat tam yù Umay nga pannakabaggi ni Apu Namarò nga mammaguray!’ ”*

* 23:39 Salmo 118:26

24

Yù Pangipakánnámmu ni Apu Kesu sù Karabbâ na noka nayù Dakal nga Bale ni Namarò ta Jerusalem

Markus 13:1-2; Lukas 21:5-6

¹ Á páno ni Apu Kesu sù mangilin nga kapilliá, nga bale ni Namarò, minay kuna yù ira sinudduán na, ta ituddu ra kuna yù ira makkakerumá nga balay sù dakal nga kapilliá. ² Á simíbbák si Apu Kesu nira, a kinagi na, “Innan nawè ngámin yawe ira nakástá nga balay kunangan, ta kukurugán nga kuruk yù kagiak ku nikayu, nga awán bulubugá ta dakal nga batu nga mabattáng sangaw sù gián na, mássiki lá tádday, nga ari sangaw mewarawará, gapu ta marabbâ ngámin sangaw,” kun na.

Yù Jigâ nga Duttál sangaw

Markus 13:3-13; Lukas 21:7-19

³ Á ta páno ni Apu Kesu ta Jerusalem, minay sù puddul na Olibo, á nagitubang tán. Á jimikki kâ Apu yù ira sinudduán na, aggira lá, á kinagi ra kuna, “Apu, kagiam mungè bi nikami, nu káni yù kesimmu nayù ngámin nga kinagim gangù nikami? Á anni yù panákkilalám mi ta duttálin yù panolim ána yù pagáddekán na ággaw?” kud da kuna. ⁴ Á kun ni Apu Kesu nira, “Magimuguk kayu tapè awán ta mangilogò nikayu, marakè mepakkáttau kayu laguk sù panguruk naw nikán. ⁵ Ta aru yù ira mattutubbâ nga umay, nga makkagi ta aggira yù MakKiristu. Á aru yù ira nga ilogò da sangaw, nga mepakkáttau sù panuttul da nikán. ⁶ Á marámak naw sangaw yù ira makigerrá nga aranni nikayu ána yù ira makigerrá gapay sangaw ta arayyu nga lugár. Ari kayu mabburung nu mamegapu danniaiw, ta máwák nga mesimmu danniaiw, ngam ari paga yaw yù pagáddekán na dabbuno. ⁷ Ta makigerrá sangaw yù makkakerumá nga tatolay sù ngámin nga lugár da ána páppatulád da. Á duttál sangaw yù bisin ta makkakerumá nga lugár, ána lunik sù makkakerumá nga gián. ⁸ Á ngámin danniaiw yù pamegapu na jigâ nga kunnay sù pappasikál nayù maganá.

⁹ “Á sangaw nu mamegapu yù jigâ, ikalusso ra kayu nayù ira tatolay megapu sù panguruk naw nikán. Á gaputad da kayu ána ikeká ra kayu ta arubáng nayù ira makáwayyá, tapè jigirigátad da kayu ána papatáyad da yù ira káruán nikayu. ¹⁰ Á aru yù ira nga pallikuránád da yù ángguruk da nikán. Á makkakálussaw ira ána makkakáránuk ira. ¹¹ Á aru yù ira mattá-ábbilinán nga arán na jinok ni Namarò, á aru yù ira tatolay nga ilogò da, nga mekáttau sù panuttul da nikán. ¹² Á gapu ta yù pagaru na kinarákè nga akka-akkuán na tatolay, mallummin sangaw yù ayá nayù ira aru nga tatolay. ¹³ Ngam yù ira nga makeyattam sù jigâ, nga napasigaggá yù panguruk da nikán ta áddè ta pagáddekán, meyiǵù ira nga mepattolay kâ Namarò ta áddè ta áddè. ¹⁴ Á lage na pagáddekán na ággaw, melayalayá ta ngámin nga tatolay ta dabbuno yù napiá nga dámak nga meyanung sù pammagure ni Namarò. Á ta kabalin na yaw, duttálin laguk yù pagáddekán na ággaw na dabbuno.”

Yù Meyannung sù Makálla-állirák nga Makánnanássing

Markus 13:14-23; Lukas 21:20-24

¹⁵ Á kinagi na paga ni Apu Kesu, “Masingan naw sangaw yù makálla-állirák nga makánnanássing, nga mappassippil nga manáddak sù mangilin nga gián nga arán na pakáwayyá nga panáddagán, nga kunnay sù kinagi na ngaw gári ni Daniel, nga yù ngaw ábbilinán ni Namarò.* Á yù ira mabbibbik karanniaiw, parè bi ta kánnámmuád da laguk yù kebalinán na. ¹⁶ Á nu masingan naw yaw sangaw, á sikayu nga maggián ta Judiya, máwák naw mattálaw sù gián naw nga umay ta puddul. ¹⁷ Á yù tolay nga aijan ta námmuák na bale na, aringin laguk tullung sù unak na bale na nga mangá ta kukuá na. ¹⁸ Á yù tolay nga aijan ta ákkomanán, aringin laguk lubbè nga umay mangá ta gámi na. ¹⁹ Bay! Kábbi, ta makállállá yù ira mabussi ána yù ira mappasusu sangaw nu duttál dannian nga ággaw. ²⁰ Á yáyù nga ipakimállá naw laguk kâ Namarò ta ari mekanná yù pattálo naw ta ammián onu ta ággaw na ággibannák. ²¹ Ta yáyù nga duttálin yù nepallá nga jigâ paga ánnè sù nesimmu ta áddè ngaw kaparò na dabbuno ta áddè kunangan, á mássiki ta áddè noka awán bulubugá ta kagitá na. ²² Á nu arán na pangarián ni Namarò yù ággaw na jigâ, awán nakuan ta tolay nga matolay ta dabbuno. Á yáyù nga pangarián na sangaw laguk ni Namarò danniaiw nga ággaw megapu sù ira pinili na nga tatole na.”

²³ Á kinagi na paga ni Apu Kesu, “Á yáyù gapu na nga nu aijan yù makkagi nikayu, ‘Innan nawè, aijanin saw yù Kiristu!’ onu ‘Aijanin tukul!’ nu kud da, arán naw kurugan. ²⁴ Ta duttál sangaw yù ira nga áppè Kiristu ána yù ira áppè ábbilinán ni Namarò, á ipasingad da

* 24:15 Daniel 11:31

sangaw yù pamagaddátu ra nga makapállá, tapè ilogò da nakuan mássiki yù ira piníli ni Namarò, tapè mekátuay ira nakuan sù panuttuttul da ká Namarò. ²⁵ Ginnán naw laguk ta napiá, ta kinagikin nikayu danniaw lage na mesimmu, tapè dán nga ammu naw ána ari kayu melogò. ²⁶ Á yáyù nga nu kagiad da nikayu, ‘Ye, ajanin si Kiristu tukewà sù puddul!’ ari kayu gumon. Á nu kagiad da, ‘Ajjan nga nattuttù sù lágum na balay!’ arán naw kurugan. ²⁷ Ta sangaw nu manolingà, sikán nga Kaká na ngámin na tatolay, mepasingan yù panoli nga kunnay sù kilá nga mamannawák ta lángi áddè ta lalassangán ta áddè ta lalammarán. ²⁸ Á ammu naw yù bunnakè nga, ‘Mássiki nu sisaw nga gián nayù natay, yáyù paggagammungán nayù ira gayáng,’ kun na.

Yù Panoli na sangaw ni Apu Kesu

Markus 13:24-27; Lukas 21:25-28

²⁹ Á kinagi na paga ni Apu Kesu, “Á sangaw nu mappasá danniaw nga jigirigà, á dagarágá nga makkallá yù bilák ána ari mannawák yù bulán. Á mappanná yù ira bituan, á mewarawarà ngámin yù aijan ta lángi. ³⁰ Á mappasingan laguk ta lángi yù panákkialán sù panoli, sikán nga Kaká na ngámin na tatolay. Á ngámin makkakerumá nga tatolay ta dabbuno, makalò yù daddam da ána nerallà yù pábbo ra. Á masingad dangà nga umay nga naggapu ta utun nga mepulù ta kunam, sikán nga Kaká na ngámin na tatolay, nga makáwayyá ta ngámin ána maddalingárang megapu sù karáyò nga naggapu ká Apu Namarò. ³¹ Á aijan sangaw yù magamariung nga masikan. Á ta pagamariung na, dobak ku laguk yù ira darobak ku nga umay mangammung sù ira tatolay nga piníli ni Apu Namarò, aggira ngámin nga naggapu sù giád da ta ngámin nga lugár nga aranni ána arayyu, ta aruk na ammiánán, abagátán, lalassangán, ána lalammarán.

Yù Keyarigán nayù Káyu nga Igò

Markus 13:28-31; Lukas 21:29-33

³² “Innan nawè yù káyu nga igò,” kun ni Apu Kesu. “Nu masingan naw ta mallugu yù pangá na, ammu nawin ta nappasángin yù ammián ána mangulingin yù tiempu. ³³ Á kunnian gapay, nu masingan naw sangaw ta mesimmu danniaw nga kunnay sù kinagi nikayu, ammu naw ta kuruk nga mabikin, á manolingà. ³⁴ Á kuruk yù kagiak ku nikayu, nga mesimmu ngámin danniaw nga kinagi lage na matay ngámin yù ira tatolay nga matolay kunungan. ³⁵ Á mássiki nu mapasá sangaw yù dabbuno ána ngámin yù aijan ta lángi, ngam maggián lâ ta áddè ta áddè yù ngámin nga ubobuk ku, nga ari bulubugá moli.

Awán ta Tolay nga Makánámmu sù Ággaw ána Oras nga Panoli ni Apu Kesu Kiristu

Markus 13:32-37; Lukas 17:26-36

³⁶ “Á ta meyannung ta dattál na ággaw onu oras nga panoli, awán bulubugá ta makánámmu, nu ari galá si Ammò. Ta mássiki yù ira daroban ni Apu Namarò nga maggián ta lángi, arád da ammu. Á sikán gapay nga Anâ na, arák ku ammu, gapu ta si Ammò lâ yù makánámmu.

³⁷ “Á ta kunnay sù kingngikingnguá nayù ira tatolay sù ngaw keggá ni Noe, kunnian gapay yù akka-akkuán nayù ira tatolay sangaw nu ággaw nga panoli. ³⁸ Ta yù ira ngaw tatolay ta keggá na ngaw ni Noe, awán ta assing da lage na nalitù yù ngámin nga dabbuno, á sinuttul da lâ yù negagángay nira nga nakkakákán ána ámma-ámmun ána naggagáttáwa áddè ta tallung ni Noe sù dakal nga barangay. ³⁹ Á arád da ninonò yù mesimmu nira áddè ta jiminakal yù danum ána nalitù yù dabbun, á neburuk ira ngámin nga nalaggabán. Á kunnian gapay yù mesimmu sangaw nu manolingà.

⁴⁰ “Á yáyù nga sangaw nu manolingà, ta ángngarigán nu aijan duá nga lálláki nga mattarabáku sù ákkomanád da, á málâ sangaw yù tádday, ána mabattáng yù kabbulun na. ⁴¹ Á nu aijan duá nga bábbay nga mabbáyu, á málâ yù tádday, ána mabattáng yù kabbulun na. ⁴² Á yáyù nga magimuguk kayu laguk, ta arán naw gemma ammu yù ággaw nga labbè ku, sikán nga Yápu naw. ⁴³ Á ta ángngarigán, nu aijan yù makábbalay, á nu ammu na nakuan yù oras na ánge nayù minákkokò, á ari nakuan makkaturuk nu ari lâ magguárdiá, tapè ari makatallung yù minákkokò sù unak na. ⁴⁴ Yáyù nga kunnian gapay nikayu, magimuguk kayu laguk, tapè dán nga naporán kayu, ta sikán nga Kaká na ngámin na tatolay, umayá sangaw nu arán nawá iddanamán,” kun ni Apu Kesu.

Yù ira Aripán nga Mekatalà ána yù ira Aripán nga Ari Mekatalà

Lukas 12:41-48

⁴⁵ Á kinagi ni Apu Kesu, “Á ta ángngarigán, nu aijan yù aripán nga mekatalà ána masirik, aggina yù tullatan nayù yápu na nga manaron sù ira kábulun na nga aripán, tapè aggina yù

mangiyawâ nira ta kanad da sù negagángay nga pakkákád da. ⁴⁶ Á napiá yù ággián na yane aripan nu maratang nayù yápu na nga kunnian yù akka-akkuán na. ⁴⁷ Kuruk yù kagiak ku nikayu, nga yane aripan yù ikatalá na sangaw nga makkárgu ta ngámin nga kukuá na. ⁴⁸ Á ta ángngarigán nu narákè yù aripan, á kagian na ta nonò na ta megaggak támma nga mabayák paga yù labbè na yápu na. ⁴⁹ Á yáyù nga palapalutan na laguk yù ira kábulun na nga aripan. Á yá lâ tángngagan na yù makipakán ámma makipappissán sù ira minággillellaw. ⁵⁰ Á ikáddagâ lâ sangaw nga lubbè yù yápu na sù ággaw nga arán na iddanamán, á makaddák yù aripan sù labbè na. ⁵¹ Á pakarámak na yápu na sù narákè nga kingnguá na, talamánan na laguk, á ipe na sù gián nayù ira agippipiá, tapè mekanakanâ sù ira gikulukuletán nga mangngarangngaringngi megapu sù jigá da.”

25

Yù Ángngarigán nga Meyannung sù ira Mapulu nga Mámmagingánay

¹ Á kinagi na paga ni Apu Kesu, “Á sangaw nu pagáddékán na ággaw, nu duttál yù pammagure ni Namarò ta dabbuno, kunniaiw yù ággián nayù ira tatolay ta dabbuno. Meyárik ira ta mapulu nga mámmagingánay nga inipulù da yù tulu ra, tapè ed da dapunan yù nobiu nga umay ta bodá. ² Á loku yù límá ira nga mámmagingánay. Á límá gapay yù ira nasírik.

³ “Á yù ira límá nga magingánay nga loku, inipulù da gapay yù tulu ra, ngam arád da garè binálun yù mayán na tulu ra. ⁴ Ngam yù ira límá nga nasírik, inipulù da yù tulu ra, ámma binálud da gapay yù mayán na tulu ra, tapè ari ira sangaw mapunuán. ⁵ Á gapu ta nabayák nga ari limibbè yù nobiu, nakatummâ nga nakakaturuk laguk yù ira ngámin nga mámmagingánay.

⁶ “Á tangngá na gabi, ajjan yù nakkatol, á kinagi na, ‘Ajjanin yù nobiu! Umay ngin! Arà! En nawin dapunan!’ kun na. ⁷ Á giminikkáng laguk yù ira mapulu nga mámmagingánay, á pinarád da yù ággisinganád da. ⁸ Á kinagi nayù ira loku nga mámmagingánay sù ira nasírik, ‘Iddán naw kami ngè sù bálun nayù tulu naw, ta máddakánin garè yù ira isingam mi!’ kud da. ⁹ ‘Ari!’ kun nayù ira nasírik nira. ‘Marakè ari makatò nittam ngámin. E kayu ngillá gumátáng ta máwák naw,’ kud da. ¹⁰ Á nánaw laguk yù ira loku nga mámmagingánay, tapè umay ira gumátáng. Á sù kapállikuk da, nattállabbè yù nobiu. Á yù ira mámmagingánay nga dán nga naparán ámma magiddi-iddak, nepulù ira sù nobiu nga simillung sù ábbodán, á naserrán yù puertá.

¹¹ “Á manganánmuán, limibbè yù ira loku nga mámmagingánay. Á naggián ira ta puertá nga nakkatol, nga kud da, ‘Apu, Apu, patallungan kami bi,’ kud da. ¹² Á simibbák yù nobiu nira, á kinagi na nira, ‘Molangá, ta arát takayu amma-ammu,’ kun na. ¹³ Á yáyù nga kagiak ku nikayu nga mapparán kayu laguk, ta arán naw ammu yù ággaw ámma oras nga panoli!” kun ni Apu Kesu.

Yù Ángngarigán nga Meyannung sù Ángngiyusá na Tatolay ta Kukuá ra *Lukas 19:11-27*

¹⁴ Á nagángngarigán si Apu Kesu paga, á kinagi na, “Á sangaw nu manolingá, kunniaiw yù keyarigán nayù pammagure ni Namarò. Ajjan yù maríku nga toláy nga maggagannuá nga umay ta arayyu nga lugár. Á kabalin na naggagannuá, inagálán na yù ira aripan na, á inikárgu na nira yù kukuá na. ¹⁵ Iniyawâ na yù límá ribu sù tádday nga aripan na. Á duá ribu yù iniyawâ na sù mekaruá. Á maribu yù iniyawâ na sù mekatallu, ta iniyawâ na sù ira katággítádday yù meyannung sù pakáwayyá na. Á kabalin na nangiyawâ nira, nánaw laguk.

¹⁶ “Á páno nayù yápu ra, á yù aripan na nga nangalawá ta límá ribu, dagarágá nga pinakkumersiu na ngámin yù iniyawâ nayù yápu na, á nakaganánsiá ta límá ribu. ¹⁷ Á kunnian gapay sù aripan na nga nangalawá ta duá ribu, nakaganánsiá ta duá ribu. ¹⁸ Ngam yù aripan na nga nangalawá ta maribu, en na inikokkok yù kuártu nayù yápu na, tapè awán ta makálele kuna.

¹⁹ “Á pappasá na aru nga ággaw, nanoli yù yápu nayù ira aripan, á inagálán na ira, tapè umay ira makikuentá kuna. ²⁰ Á minay kuna yù neddán ta límá ribu, á kinagi na kuna, ‘Apu, límá ribu yù iniyawâ mu níkan. Á ajjanin yawe mapulu ribu, gapu ta nakaganánsiángá ta lanná na nga límá ribu,’ kun na. ²¹ Á kinagi nayù yápu na kuna, ‘Napiá yù kingnguám. Kuruk nga napiá ka nga masserbi níkan, ta pangikatalakán ka! Á gapu ta mekatálá ka sù baddi nga inikárgu níkaw, aru sangaw yù ikatalá ku níkaw. E ka saw laguk, ta mesipá ka nga mepagayáyá níkan nga yápum!’ kun na.

²² “Á kabalín na yaw, siminubbâ nga minay laguk sù yápu na yù mekaruá nga aripan na nga neddán na ta duá ribu. Á kinagi na, ‘Apu, aijan yù iniyawâ mu nikán nga duá ribu ána yù lannâ na gapay nga duá ribu nga naganánsiâ,’ kun na. ²³ Á kinagi nayù yápu na gapay kuna, ‘Napiá yù kingnguám. Kuruk nga napiá ka nga masserbi nikán, ta pangikatalakán ka. Á gapu ta mekatalà ka sù baddi nga inikárgù nikaw, aru sangaw yù ikatalà ku nikaw. Arâ! E ka saw laguk, ta mesipà ka nga mepagayáyâ nikán nga yápu!’ kun na.

²⁴ “Á kabalín na yaw, minay laguk yù mekatallu nga aripan na nga neddán ta maribu, á kinagi na sù yápu na, ‘Apu, ammù gemma ta mapporay ka nga awán ta allà mu, ta apam mu yù bungá nayù arám mu inimulá ána maggaták ka sù arám mu kinomán. ²⁵ Á yáyù nga naganássingâ, á inikokkok ku yù kuártum nga iniyawâ mu nikán. Itoli yawe ngin nga kukuám,’ kun na. ²⁶ Á kinagi nayù yápu na kuna, ‘Kítarâké ka nga aripan nga kitatalaká! Ngattá, ta kagiam mu ta mappusigâ sù arák ku inimulá ána maggatágâ sù arák ku kinomán?’ ²⁷ Á nu kuruk nga ammum, ngattá, ta arám mu pinakappián ta bángku yù iniyawâ ku, tapè sangaw nu manolingâ, á itolim laguk nakuan yù kuártù ána yù anâ na?’ ²⁸ Á kinagi na laguk sù ira káruán nga aripan na, ‘Apan naw yù kuártu nga aijan kuna, á iyawâ naw sù tádday nga aijan yù mapulu ribu kuna. ²⁹ Ta yù tolay nga mekatalâ, malannapán sangaw yù neyawâ kuna, tapè aru sangaw yù aijan kuna. Ngam yù tolay nga ari mekatalâ, mári sangaw mássiki yù baddi nga neyawâ kuna. ³⁰ Á yawe tolay nga awán ta serbi na, itabbâ naw laguk ta lawán sù kakallatán. Yane yù gián nayù ira gikulukuletán nga mangngarangngaringngi megapu sù jigâ da.’ ”

Yù Pamanunnù ni Apu Kesu ta Tatolay sù Pagáddékán na Ággaw

³¹ Á kinagi na paga ni Apu Kesu, “Sangaw nu manolingâ nga mammaguray, síkán nga Kaká na ngámin na tatolay, aijan nga mepulù nikán yù ira ngámin nga daroban ni Namarò. Á magitubangâ nga meparáyaw sù ággitubangán nayù Mamanunnù. ³² Á meyarubáng nikán sangaw ngámin yù ira tatolay nga makkakerumâ, nga naggapu ta ngámin nga lugár ta dabbuno. Á passinnák ku ira laguk ta duá nga sinnâ nga kunnay sù pamassinnâ nayù minánnaron sù ayám na nga karneru ána kajjing. ³³ Á yù ira tatolay nga napiá yù nonò da, aggira yù ipè ta jiwánák ku. Á ta jimigi yù pangipayák ku sù ira narâké yù nonò da.

³⁴ “Á kabalik ku sangaw mamassinnâ nira, síkán nga Patul nga mammaguray, kagiak ku sù ira aijan ta jiwánák ku, ‘Sikayu yù inikállâ nayù Yámâ. Umay kayu laguk mesipâ sù pammagurayán na, nga dán nga iniparán na nikayu ádde ngaw ta kaparò na dabbuno. ³⁵ Ta ammu naw mangikállâ, á nu nabisinâ ngaw ána napangálâ, pinakán nawâ ána pinenum nawâ. Á nu minayâ ngaw nikayu nga naggapu ta arayyu nga lugár, napiá yù ángngálluik naw nikán, ta inilágum nawâ. ³⁶ Á sù ngaw awánâ ta barawási, á binarawasián nawâ. Á nu natakikâ ngaw, sinaronán nawâ. Á sù kebáluk ku ngaw, en nawâ sinullúnán,’ kuk ku sangaw nira. ³⁷ Á iyabbù da laguk nikán nayù ira matunung nga aijan ta jiwánák ku, á kagiad da, ‘Apu, káni yù pakasingam mi ngaw nikaw nga mabisin ána mapangálâ, á sikami yù namakán ána namenum nikaw?’ ³⁸ Á káni yù pappassiár mu ngaw ta giám mi nga kun na álluik nga naggapu ta arayyu nga lugár, á sikami yù nangálluik nikaw? Á káni yù pakasingam mi ngaw nikaw nga nagilongán, á sikami yù namarawási nikaw? ³⁹ Á káni yù pakasingam mi ngaw nikaw, nga natakí ka ána nebalúk, á sikami yù nanúllun nikaw?’ kud da sangaw. ⁴⁰ Á síkán, nga Patul nga mammaguray, kagiak ku sangaw nira, ‘Kuruk yawe nga kagiak ku nikayu, ta mássiki nu táttádday lâ yù inikállâ naw nga inabbágán, nga kagukábán nga tolay nga makituddu nikán, á nebiláng ta pangikállâ naw nikán,’ kuk ku nira sangaw.

⁴¹ “Á kagiak ku sangaw laguk sù ira tatolay nga aijan ta jimigi, ‘Mánaw kayu nikán, sikayu nga pagikaruán ni Apu Namarò. Metabbâ kayu sangaw sù api nga ari bulubugá máddâ, nga dán nga neparán kári Satanas ána yù ira daroban na. ⁴² Ta sù ngaw kabisik ku ána kapangál ku, awán bulubugá ta iniyawâ naw nikán. ⁴³ Á ta pakiálluik ku ngaw nikayu, arán nawâ pinaddulò. Á ta pagilongák ku ngaw, arán nawâ iniddán ta barawási. Á ta kataki ku ána kebáluk ku ngaw, arán nawâ garè sinullúnán,’ kuk ku sangaw nira. ⁴⁴ Á iyabbù da sangaw gapay nikán, á kagiad da, ‘Apu, káni panò yù pakasingam mi ngaw nikaw nga nabisin ána napangálâ, nga nakiálluik onu nagilongán, nga natakí ána nebalúk, ngam arám mi ka inikállâ nga inabbágán?’ kud da nikán sangaw. ⁴⁵ Á kagiak ku nira sangaw laguk, ‘Kuruk yù kagiak ku nikayu, ta gapu ta panakitán naw nga abbágán yù tádday nga kagukábán nga tolay nga manguruk nikán, á nebiláng ta síkán yù nanakitán naw nga inikállâ,’ kuk ku sangaw nira. ⁴⁶ Á yáyù nga danniw yù umay sangaw ta impiernu, nga

api nga ari bulubugá máddà, á marigirigá ira ta áddè ta áddè. Ngam yù ira matunung, mepattolay ira nga mesipà kâ Namarò ta áddè ta áddè.”

26

Yù Pangigagángo ra kâ Apu Kesu

Markus 14:1-2; Lukas 22:1-2; Kuan 11:45-53

¹ Á kabalín ni Apu Kesu nga nagubobuk ta ngámin karanniw, kinagi na sù ira sinudduán na, ² “Ammu naw gemma nga duá nga ággaw lákin pángè nayù piestá nga panaddamát tam ta pattalebák nayù daroban. Yúrin sangaw nga ággaw yù kepagápù ku, sikán nga Kaká na ngámin na tatolay, tapè mepátaká ta kurù,” kun na nira.

³ Á tán nga ággaw, aijan yù ira kátannangán nga pári ána yù ira karakalán, nga nagagammung ta dakal nga bale nayù kotunán nga pári nga mangngágan ta Kayapas. ⁴ Á inigagángo ra nu kunnasi yù paggápù da ána pamapáte ra kâ Apu Kesu nga awán bulubugá ta makánámmu. ⁵ Á naggigittá yù nonò da nga nakagi, “Arát tam igiddán sù piestá, marakè akkuád da ittam nayù ira tatolay nga makipiestá,” kud da.

Jinenuán nayù Babay yù Ulu ni Apu Kesu

Markus 14:3-9; Kuan 12:1-8

⁶ Á ta keggá di Apu Kesu ta Bitania, aijan ira sù bale ni Simon nga yù ngaw naggoggong nga pinammapiá na. ⁷ Á ta pakkákád da, aijan nga jimikki kâ Apu Kesu yù babay nga nanangngal ta nakástá nga boteliá nga napadday ta puraw nga batu nga alabaster. Á napannu ta nanginá nga denu nga bábbanguk. Á inibubbù nayù babay ngámin yù bábbanguk ta ulu ni Apu Kesu. ⁸ Á pakasingan nayù ira sinudduán na sù kingnguá nayù babay, naporay ira. Á nakkaká-ubobuk ira, á kinagi ra, “Ye! Kengá lâ yù bábbanguk!” kud da. ⁹ “Aru nakuan yù kelakuán na, nga meyawá nakuan sù ira pobare,” kud da. ¹⁰ Ngam ammu ni Apu Kesu yù ubobugad da, á kinagi na nira, “Ngattá, ta buruburionán naw yawe babay? Kuruk nga napiá yù kingnguá na níkan. ¹¹ Á yù ira pobare, mepaggián ira nikayu ta áddè ta áddè. Ngam sikán, aringá nikayu mepaggián ta áddè ta áddè. ¹² Á pangibubbù nayù babay sù bábbanguk ta ulù, pinarán na yù baggi ta ketanam ku sangaw. ¹³ Á kuruk yù kagiak ku nikayu, nga mássiki sisaw nga gián sù ngámin nga dabbuno yù pangilayalayátan na tolay sù napiá nga dámak, mepakánámmu gapay yù kingnguá na yawe babay níkan, nga panaddamán na tatolay kuna.”

Yù Pangitarátu ni Kudas sù ira Maggápù kâ Apu Kesu

Markus 14:10-11; Lukas 22:3-6

¹⁴ Á kabalín na yaw, nánaw yù mekamapulu duá nga sinudduán ni Apu Kesu, nga manggágan ta Kudas Iskariote, á minay sù gián nayù ira kátannangán nga pári. ¹⁵ Á iniyabbù na nira nga kun na, “Pígiá yù itáddán naw níkan, nu ituddù nikayu si Kesu?” Á pinagád da ta tallupulu nga pirá nga pinaláta. ¹⁶ Á yáyù nga pinegapuán ni Kudas nga nagala-alek ta awayyá na nga mangituddu kâ Apu Kesu, tapè magápù da.

Yù Panggiliid di Apu Kesu sù Piestá nga Panaddamád da ta Pattalebák nayù Daroban

Markus 14:12-21; Lukas 22:7-14, 21-23; Kuan 13:21-30

¹⁷ Á jimittál laguk yù olu nga ággaw nayù Piestá, nga pakkákán nayù ira Kudío sù pán nga awán ta állapparán na.* Á minay kâ Apu Kesu yù ira sinudduán na, á iniyabbù da kuna, “Sisaw yù ikáyá mu nga pangiparánám mi ta pamúgák tam sù piestá?” kud da. ¹⁸ Á kinagi na, “E kayu sù tádday nga tolay nga aijan tán nga ili na Jerusalem, á kagian naw kuna ta ipakagi nayù mesturu naw ta ‘Duttál ngin yù ággò, á matayá sangaw. Umay kamingin laguk ta balem, sikán ána yù ira sinudduák ku gapay, tapè kumán kami sù panaddamán sù pattalebák,’ kun naw kuna.” ¹⁹ Á yáyù nga sinuppál nayù ira sinudduán na yù inibilin na nira, á iniparád da yù pamúgák da ta piestá na panaddamán ta pattalebák nayù daroban.

²⁰ Á ta pajjibbà, nakkakálálláng di Apu Kesu ána yù ira mapulu duá nga sinudduán na. ²¹ Á ta pakkákád da, kinagi na nira, “Kuruk yù kagiak ku nikayu, nga aijan nikayu yù tádday nga mangituddu níkan sangaw,” kun na. ²² Á pakaginná ra karanniw, nepallá yù daddam da, á kinagi ra nga katággitádday kuna, “Apu, ari sikán yù kagiam mu, unè?” kud da. ²³ Á

* **26:17** Yane Piestá yù Panaddamán nayù ira Kudío sù pattalebák nayù daroban ni Namarò sù bale ra sù pakipaggiád da ta Egipto. Á pártiad da gapay yù kígaw nga karneru, nga kunnay sù kingnguá nayù ira ngaw naggaká nira, lage ra pinay yù dága na ta utun ána taging na puertá na bale ra, tapè mattalebák lâ yù daroban ni Namarò, ána ari ira mekanakaná sù ira Egipto, sù pamapáte na ngaw nayù daroban sù ira kaká nga áná da.

initabbák ni Apu Kesu, á kinagi na, “Aggina yù kagiddák ku nga nangisosaw ta pán sù nangisosawák ku. ²⁴ Á síkán nga Kaká na ngámin na tatolay, matayá sangaw gemma, nga kunnay sù inipalappá na ngaw ni Namarò sù dán nga neturá. Ngam kakábbi lá yù tolay nga mangiránuk níkán. Napiá ngillá nakuan nu ari neyaná!” kun ni Apu Kesu. ²⁵ Á si Kudas Iskariote, nga mangituddu sangaw kuna sù ira maggápù kuna, kinagi na, “Mesturu, síkán panò yù kagiam mu?” Á kinagi ni Apu Kesu kuna, “Asinni paga laguk dumá?” kun na.

Yù Kaporianán nga Pamúgák di Apu Kesu

Markus 14:22-26; Lukas 22:14-20; 1 Korinto 11:23-25

²⁶ Á pakkákád da paga, iná ni Apu Kesu yù pán, á nabbalabálà ká Namarò. Á kabalín na nabbalabálà, giddigiddúa na yù pán nga inisinek na sù ira sinudduán na ána kinagi na nira, “Mangá kayu ta kanan naw, ta baggi yaw,” kun na.

²⁷ Á kabalín na yian, iná na laguk ni Apu Kesu yù inumad da, á nabbalabálà ká Namarò. Á kabalín na nabbalabálà, iniyawá na nira ána kinagi na nira, “Sikayu ngámin, mattutubbá kayu nga áminum sawe. ²⁸ Ta yawe yù dágà nga mamalláddá sù bagu ngá tarátu ni Namarò, yù dágà nga meububbù sangaw megapu ta aru nga tatolay, tapè mapakomá ira ta liwiliwá da. ²⁹ Á kagiak ku nikayu, aringakin áminum sù naggapu sù tabbuk na úbas ta áddè noka nu mepattatáday ittam nga áminum sù bagu, sangaw nu ajjan ittam sù pammagurayán ni Ammò ku.”

³⁰ Á kabalín na yaw, nattetáday ira nga nakkansion sù áddáyo ra ká Namarò. Á nánaw ira laguk nga minay ta puddul na Olibo.

Yù Pangipalappá ni Apu Kesu ta Panáji na sangaw ni Eduru kuna

Markus 14:27-31; Lukas 22:31-34; Kuan 13:36-38

³¹ Á gapu ta pallakák di Apu Kesu nga umay ta puddul, kinagi na sù ira sinudduán na, “Sikayu ngámin, kunangane galá nga gabi, táttájjíán nawá, ta yáyú sangaw yù kapalurò nayú dán nga neturá nga Ubokub ni Namarò, nga kunníaw: ‘Papatáyak ku yù mináppárak, á mewarawará sangaw yù ira karneru na, gapu ta awán ta manaron nira.’[†] ³² Ngam sangaw nu maginnanolayá, oluát takayu túrin ta purubinsia na Galilia, á iddagát takayu tán.”

³³ Á sù pakkagi ni Apu Kesu nira ta táttájjíád da sangaw, kinagi ni Eduru kuna, “Ari síkán. Mássiki nu aggira ngámin nga kábuluk ku yù manáji níkaw, ngam síkán, arát taka bulubugá nga tájjíán,” kun na. ³⁴ Ngam kinagi na laguk ni Apu Kesu kuna, “Kuruk yù kagiak ku níkaw, ta sangaw nu gabi, lage na magittarákkò yù manù, á kapamillum sangawin nga nakkagi ta arám mà ammu.” ³⁵ Ngam kinagi na paga ni Eduru kuna, “Mássiki nu matayá sangaw nga mekaná níkaw, arák ku bulubugá ilímak ta ammu taka!” kun na. Á kunnian gapay yù kinagi nayú ira ngámin nga sinudduán na.

Yù Pakimállà ni Apu Kesu ká Namarò ta Gián na Getsemani

Markus 14:32-42; Lukas 22:39-46

³⁶ Á kabalid da kiminán, nánaw laguk di Apu Kesu ána yù ira sinudduán na, á minay ira ta gián nga mangngágan ta Getsemani. Á kinagi ni Apu Kesu nira, “Magitubang kayu saw, ta ek ku bì tuke nga makimi-imállà,” kun na. ³⁷ Á inipulù na di Eduru ána yù ira duá nga áná ni Sebedo. Á nakalò laguk yù daddam na ána narámmá yù gáko na. ³⁸ Á kinagi na nira, “Mággekakin matay ta nepallá nga daddam ku! Maggián kayu bì saw nga mepatturá níkán,” kun na.

³⁹ Á kabalín ni Apu Kesu nakkagi nira, minárayyu nira ta baddi laguk, á namalittúkak nga nallakak ta dabbun, nga nakimállà, nga kinagi na, “Ammò ku, nu awayyá na, ililli mà sù jigá nga patayák ku. Ngam ari yù urè yù mapalurò, nu ari galá yù urem,” kun na. ⁴⁰ Á kabalín na nakimállà, nanoli sù gián nayú ira tallu nga nepulù kuna, á naratang na ira nga nakkaturuk. Á kinagi na ká Eduru, “Ngattá panò, ta arán naw awayyá nga mepatturá níkán ta mássiki lá tangoras? ⁴¹ Matturá kayu laguk nga makimállà, tapè ari kayu mekátuay sù ángguruk naw. Ta mássiki nu dán nga napanán yù nonò na tolay nga manguruk, ngam makapi garè yù baggi na, nga ari mamalurò,” kun na.

⁴² Á kabalín na nga nilukák ira, minárayyu si Apu Kesu má ta baddi nira, á pinidduán na nakimállà, á kinagi na, “Ammò ku, nu kuruk nga máwák ku, á parubák ku yawe jigá, tapè mapalurò laguk ngámin yù ipakuám níkán,” kun na. ⁴³ Á nanoli má sù ira tallu, á naratang na ira nga gikakaturugán ira lá paga, ta arád da megimmúlák. ⁴⁴ Á nánawán na ira má, á namillu nga minay nakimállà nga kunnian galá sù inipakimállà na.

† 26:31 Sakariá 13:7

⁴⁵ Á ta kabalin na nakimállà ni Apu Kesu, nanoli laguk sù ira kábulun na. Á iniyabbù na nira, “Ngattá, ta makkaturuk ána magibannák kayu lâ paga? Jimittálin yù oras nga keyalawá ku sù ira minálliwá, síkán nga Kaká na ngámin na tatolay. ⁴⁶ Gumikkáng kayu laguk. Et tamin! Innan nawè. Ajjanin yù umay mangituddu níkán,” kun na.

Yù Paggápù da kâ Apu Kesu

Markus 14:43-50; Lukas 22:47-53; Kuan 18:3-12

⁴⁷ Á pagubobuk na paga ni Apu Kesu, limibbè si Kudas, nga mekamapulu duá sù ira sinudduán ni Apu Kesu. Á nepulupulú kâ Kudas yù magaru nga tatolay nga aru ármas da nga badáng ána palú, nga jinok nayù ira kátannangán nga pári ána yù ira karakalán na Kudío. ⁴⁸ Á lage ra umay, kinagi ni Kudas nira yù panákkilalád da kâ Apu Kesu. Ta kinagi na, “Yù tolay nga ummaták ku sangaw, aggina yù aleran naw. Á gaputan naw laguk,” kun na nira. ⁴⁹ Á yáyù nga dagarágá nga jimikkì si Kudas kâ Apu Kesu. “Apu!” kun na kâ Apu Kesu, á inummatán na. ⁵⁰ Á kinagi ni Apu Kesu kuna, “Arà! Tuppálam mu yù sinalákkuruk mu,” kun na. Á jimikkì laguk kâ Apu Kesu yù ira nagármas, á ginápù da.

⁵¹ Á gapu ta paggápù da kâ Apu Kesu, ajjan yù tádday nga kabbulun na nga inásu na yù badáng na, á kittak na yù aripan nayù kotunán nga pári, á napingarán yù talingá na. ⁵² Ngam kinagi ni Apu Kesu kuna, “Iyalák mu yù badáng mu, ta yù tolay nga mangiyúsá ta badáng nga mangnuá ta tolay, aggina gapay yù matay ta badáng. ⁵³ Arám mu panò ammu ta ajjan yù awayyá nga makimállà ta abbágán nangá nayù Yámá, á dagarágá nga doban na yù jinibiribu nga daroban na nga umay mangiyígù níkán? ⁵⁴ Ngam nu kiddawak ku nakuan yù kunnian nga ángngabbák na níkán, ari garè mapatuppál yù dán nga inipetúrá na ngaw.”

⁵⁵ Á kinagi na laguk ni Apu Kesu sù ira magaru nga ajjan tán, “Tulisáná panò, ta nattagibadáng ána nattagipalú kayu nga umay maggápù níkán? Arán nawá ginápù sù ngaw pagitubang ku ta kágággaw sù mangilin nga bale ni Namarò nga nangituddu níkayu. ⁵⁶ Ngam mesimmu ngámin anniaw tapè matuppál yù inipetúrá na ngaw ni Namarò sù ira ngaw ábbilinán na,” kun ni Apu Kesu. Á yù ira ngámin nga sinudduán na, dagarágá nga nattaláwád da laguk si Apu Kesu.

Yù Pangikeká ra ána Pangiyabbù da kâ Apu Kesu

Markus 14:53-65; Lukas 22:54-55, 63-71; Kuan 18:13-14, 19-24

⁵⁷ Á paggápù nayù ira nagármas kâ Apu Kesu, inipáno ra ta ed da ituluk sù bale ni Kayapas nga kotunán nayù ira pári. Á nepaggagammung tán yù ira mesturu nga mangituddu sù tunung ána yù ira karakalán na Kudío. ⁵⁸ Á jimináddán si Eduru, ngam arayyu lâ nira. Á pakáddè da ta námmuák na bale nayù kotunán nayù ira pári, minay si Eduru gapay ta námmuák ána nepagitubang sù ira magguárdiá, tapè mánnámmuán na yù kabalin na. ⁵⁹ Á yù ira kátannangán nga pári ána yù ira giriámán nga Kudío, nagala-alek ira ta massistígu nga massirisiri ta ipappaliwá da kâ Apu Kesu, tapè mapapáte ra. ⁶⁰ Á mássiki nu aru yù ira massirisiri ta pangikeká ra kuna, awán ta nálerád da nga ipamapáte ra kuna. Á ta manganámmuán, ajjan yù duá nga tolay nga minay, ⁶¹ nga nakkagi, “Yane tolay, kinagi na ta ajjan yù awayyá na nga dabbátan yù mangilin nga bale ni Namarò, á patáddagan na galá, á balinan na ta mekatallu nga ággaw,” kud da.

⁶² Á pakaginná nayù kotunán na pári sù kinagi ra, limikká laguk, á iniyabbù na kâ Apu Kesu, “Anni yù itabbák mu karanniaw nga ipappaliwá da níkaw?” kun na. ⁶³ Ngam ari bulubugá nakkitik si Apu Kesu. Á kinagi nayù kotunán nga pári, “Mappagássingán ka sù ngágan nayù siggatotolay nga Namarò, á kagiam mu níkami nu síkaw yù Kiristu nga Aná ni Namarò,” kun na. ⁶⁴ Á kinagi ni Apu Kesu kuna, “Wan, kuruk yù nakagim. Á kagiak ku níkawu ngámin, ta pappasá na yaw sangaw, nga ari mabayák, masingan nawá, nga Kaká na ngámin na tatolay, nga magitubang sù ággitubangán nayù maráyaw ta jiwánan ni Namarò nga Makáwayyá. Á masingan nawá nga duttál ta kunam nga maggapu ta lángì.”

⁶⁵ Á pakaginná nayù kotunán nga pári sù kinagi ni Apu Kesu, pinisil na yù barawási na lápay, nga kunnay ta maguyung. Á kinagi na sù ira kábulun na nga pári, “Narákè yù inubobuk na, ta ipoton na yù baggi na tapè mepaggittá kâ Namarò. Arát tam máwák yù ira massistígu sù ipappaliwá da kuna. Ye! Naginná naw yù kinagi na nga aggina yù Aná ni Namarò! ⁶⁶ Anni laguk yù ure naw?” kun na. Á kinagi ra, “Kuruk nga nalliawá nga mepángngá nga matay,” kud da. ⁶⁷ Á nallulutábád da laguk yù mammang ni Apu Kesu, ána sinusultá da. Á líppilippák da gapay nayù ira káruán. ⁶⁸ Á kinagi ra kuna, “Síkaw nga Kiristu, kanu, labbúnám mè nu asinni yù mallappák níkaw!” kud da.

*Yù Pangilímak ni Eduru ta Pakánámmu na kâ Apu Kesu**Markus 14:66-72; Lukas 22:56-62; Kuan 18:15-18, 25-27*

⁶⁹ Á aijan lâ paga si Eduru nga nepagitubang ta námmuák nayù balay. Á jimikki kâ Eduru yù babay nga aripan nayù kotunán nga pári, á kinagi na, “Ari panò sikaw gapay yù nepulupulù kâ Kesu nga taga Galilia?” kun na. ⁷⁰ Á nilímak ni Eduru ta arubáng da ngámin. Kinagi na, “Arák ku amma-ammu yù kagiam mu,” kun na.

⁷¹ Á minárayyu si Eduru ta baddi laguk nga nappángè ta puertá ta jijjing na alitù. Á aijan tán yù tádday nga aripan nga babay. Á pakasingan na kâ Eduru, kinagi na sù ira tatolay tán, “Yawe laláki yù kabbulun ni Kesu nga taga Nasaret,” kun na. ⁷² Á pidduá na nilímak ni Eduru. Á nappagássingán, á kinagi, “Arák ku amma-ammu yane tolay!” kun na.

⁷³ Á manganánmuán, mináranni kâ Eduru yù ira tatolay nga nattatáddak tán, á kinagi ra kuna, “Kuruk nga sikaw gapay yù kabbulud da! Awán ta awayyám nga mangilímak, ta mepaggittá yù ággubobuk mu sù ággubobuk nayù ira taga Galilia,” kud da. ⁷⁴ Á nappagássingán má si Eduru, á kinagi na, “Mássiki pagikaruán nangà ni Apu Namarò nu ari kukurugán yù kagiak ku! Arák ku bulubugá amma-ammu yian nga tolay!” kun na. Á dagarágá nagittarákkò yù manù.

⁷⁵ Pakaginná ni Eduru ta pagittarákkò na manù, nanonò na yù kinagi ni Apu Kesu kuna, “Lage na pagittarákkò na manù sangaw nu gabi, namillungin yù pakkagim ta arám má ammu.” Á nánaw si Eduru, ta nepallà yù daddam na, á inigabbuá na nakkulukulè.

27*Yù Keyánge ni Apu Kesu kâ Gubinador Pilatto**Markus 15:1; Lukas 23:1-2; Kuan 18:28-32*

¹ Á ta pannawák, naggagammung yù ira kátannangán nga pári ána yù ira karakalán, nga nakkaká-ubobuk, tapè igagánge ra yù ámmapáte ra kâ Apu Kesu. ² Á kabalid da nakkaká-ubobuk, bináluk da si Apu Kesu, á iniyánge ra laguk kâ Gubinador Pilatto nga taga Roma, tapè ikeká ra ta arubáng na.

*Yù Pate ni Kudas Iskariote, nga Nappagápù kâ Apu Kesu**Kingnguá 1:18-19*

³ Á si Kudas nga nangiránuk kâ Apu Kesu, narámak na ta pagikaruad da ta pate na si Apu Kesu nga awán ta liwá na. Á pakánámmu ni Kudas sù akkuád da, nakalò yù daddam na, á nabbabáwi laguk sù kingnguá na. Á en na initolì yù tallupulu nga pirá nga pinaláta sù ira kátannangán nga pári ána yù ira karakalán. ⁴ Á pangitolì na sù pirá, kinagi na nira, “Apan naw, ta nakaliwáká gapu ta inipagápù ku yù tolay nga awán ta liwá na,” kun na. Á simibbák ira nga kinagi kuna, “Á arám mi ammu yian! Sikaw lápay yù makaliwá tán!” kud da kâ Kudas. ⁵ Á iniwári ni Kudas yù tallupulu nga pirá sù áttallungán nayù mangilin nga kapillíá ni Namarò, á nánaw laguk nga minay nga binesin na yù baggi na, á natay.

⁶ Á ta páno ni Kudas, jimmà da laguk nayù ira kátannangán nga pári yù pirá. Á kinagi ra, “Yawe pirá yù nepappagá sù inángà na tolay. Mekontará sù tunung tam nu ilanná tam nakuan yawe pirá sù ággianán nayù kuártu nga nelimù nga napakappián ta mangilin nga kapillíá,” kud da. ⁷ Á kabalid da nakkaká-ubobuk, ed da laguk inigátáng yù pirá ta dabbun nayù mináddamili, nga pabbalinad da ta pangitanamad da sù ira ari Kudío. ⁸ Á yáyù nga mangngágan yane katanamán ta Naragán ta áddè kunangan, gapu ta ginátáng da sù kuártu nga pagá nayù inángà nayù pinapáte ra. ⁹ Á kunnian natuppál yù kinagi na ngaw ni Jeremia, nga yù ngaw ábbilinán ni Namarò, nga dán nga netúrâ nga kunniaiw:

“Iná da yù tallupulu nga pirá nga pinaláta, nga pagá na inángà na tolay nga kinagi nayù ira taga Israel ta pattarátu ra,

¹⁰ á inigátáng da ta dabbun nayù mináddamili, gapu ta yáyù kinagi ni Namarò níkan.”*

*Yù Pamestigá ni Gubinador Pilatto kâ Apu Kesu**Markus 15:2-5; Lukas 23:3-5; Kuan 18:33-38*

¹¹ Á pakáddè nayù ira karakalán na Kudío ta gián ni Gubinador Pilatto, iniyarubáng da si Apu Kesu sù Gubinador, tapè bestigarán na. Á iniyabbú ni Pilatto kuna, “Sikaw panò yù patul nayù ira Kudío?” Á simibbák si Apu Kesu, nga kun na, “Kuruk yù nakagim,” kun na. ¹² Ngam sù pamaliwá da kuna nayù ira kátannangán nga pári ána yù ira karakalán, awán bulubugá ta itabbák na. ¹³ Á yáyù nga kinagi nayù Gubinador kuna, “Arám mu panò

* 27:10 Innan naw yù netúrâ sù libru ni Sakariá 11:12-13

maginná yù ipappaliwá da nikaw?" kun na. ¹⁴ Ngam ari bulubugá simibbák si Apu Kesu. Awán bulubugá ta inittabbák na sù ipappaliwá da kuna. Á yáyù nga nakalò yù kapállá nayù Gubinador sù pagimammá na.

Pinagikáru ra si Apu Kesu ta Matay nga Awán ta Liwá na
Markus 15:6-15; Lukas 23:13-25; Kuan 18:39-19:16

¹⁵ Á kádaragun sù piestá na panaddamad da sù pattalebák nayù daroban, aijan yù kustombare nayù Gubinador nga mamalubbáng sù tádday nga nebáluk nga pilian nayù ira tatolay. ¹⁶ Á tán nga ággaw, aijan yù nebáluk nga mangngágan ta Kesu Barabas, nga neparámak sù ira ngámin nga tatolay megapu sù narákè nga kingngikingnuá na. ¹⁷ Á paggagammung nayù ira magaru nga tatolay, yáyù nga iniyabbù na laguk ni Gubinador Pilatto nira, "Asinni yù ikáyá naw nga palubbángak ku? Si Kesu Barabas? Onu si Kesu nga mangngágan ta Kiristu?" kun na. ¹⁸ Ta ammu ni Pilatto ta mangabubu yù ira karakalán nga Kudio ká Apu Kesu, á yáyù lá yù ipangikeká ra kuna.

¹⁹ Á pagitubang na paga ni Gubinador Pilatto sù ámmanunnután, inipakagi nayù atáwa na kuna, "Arám mu akkuán bulubugá yane tolay nga awán ta liwá na. Ta narigáká ta pattatagená ku sù gabi, á nepallá yù burung ku megapu kuna!"

²⁰ Ngam yù ira kátannangan nga pári ána yù ira karakalán, pinappatapátu ra yù ira magaru nga tatolay ta kiddawad da ká Pilatto ta palubbangan na si Barabas ána ipapáte na si Apu Kesu. ²¹ Á pidduán na laguk nayù Gubinador nga nangiyabbù nira, "Asinni sawe ira duá yù ikáyá naw nga palubbángak ku?" kun na. Á kinagi ra, "Si Barabas!" kud da. ²² Á iniyabbù ni Pilatto nira, "Anni laguk yù akkuák ku ká Kesu nga mangngágan ta Kiristu?" kun na. "Ipepátà mu ta kurù!" kud da ngámin. ²³ Á iniyabbù na má ni Pilatto, "Anni má? Anni panò yù liwá na?" kun na. Á nappaná ira nga nangikatakamol, nga kud da, "Ará! Ipepátà mu ta kurù!" kud da.

²⁴ Á pakánámmu ni Pilatto ta awánin ta awayyá na sù ira magaru, ána natagená na ta aijan sangaw yù akkuád da nga jikkù gapu ta nappaná yù pagaragiák da, á nangá yù Gubinador ta danum tapè baggawán na yù limá na ta arubáng nayù ira tatolay. Á pabbaggo na, kinagi na nira, "Akkuák ku yaw nga ipakánámmu nikayu ta awán ta liwá ku megapu sù pamapáte naw sawe tolay! Sikayu lággapay noka yù manabbák kuna!" kun na nira. ²⁵ Á inikatol nayù ira ngámin nga tatolay nga kinagi ra, "Paguráyám mu lâ, ta sikami ána yù ira gakagaká mi noka yù manabbák sù kapapáte na!" kud da. ²⁶ Á yáyù nga pinalubbáng na laguk ni Pilatto si Barabas nira. Á kabalín na nangipapaligá ká Apu Kesu, iniyawá na sù ira suddálu, tapè ipátà da ta kurù.

Yù Panguyoyung nayù ira Suddálu ká Apu Kesu
Markus 15:16-20; Kuan 19:2-3

²⁷ Á initalung da laguk nayù ira suddálu ni Pilatto si Apu Kesu sù bale nayù Gubinador. Á inagálád da ngámin yù ira káruán nga kábulud da nga suddálu, á nagarimummungád da si Apu Kesu. ²⁸ Á niluppù da yù barawási na, á binarawasiád da ta apaddu nga ujjojjin, nga kun na barawási na patul. ²⁹ Á nilubik da yù sí nga pidde ra ta kun na kuroná, nga inibarungù da kuna. Á inipatanggal da yù tagisi ta jiwánan nga limá na nga kun na baston na patul. Á namalittúkak ira ta arubáng na, nga áppè maddayaráyaw ta panguyo ra kuna. Á kinagi ra, "Aijan ka pá nga maráyaw nga Patul nayù ira Kudio!" kud da. ³⁰ Á nallulutábád da, á iná da yù tagisi nga sinangngalán na, á inipalapału da ta ulu na. ³¹ Á kabalid da nanguyoyung kuna, iniriád da yù apaddu nga inibarawási ra kuna, á inibarawási ra lággapay kuna yù barawási na lápay. Á inilawád da, tapè ed da ipátà ta kurù.

Yù Pangipátà da ká Apu Kesu ta Kurù
Markus 15:21-32; Lukas 23:26-43; Kuan 19:17-27

³² Á páno nayù ira suddálu ta ili, nga mammártiá ta dálan, nerapunád da yù tolay nga taga Sirine nga mangngágan ta Simon. Á inipakátu ra kuna yù kurù ni Apu Kesu. ³³ Á nakáddè ira ta gián nga mangngágan ta Golgota, nga Gián na Balakábá yù kebalinán nayù ngágan na. ³⁴ Á iniyawá da nakuan ká Apu Kesu yù binaráyáng nga nakirugán ta uru nga napè, nga ámmannay ta anutù. Ngam ta pakakákká na kuna, arán na ininum. ³⁵ Á inipátà da ta kurù.

Kabalid da nangipátà ká Apu Kesu ta kurù, nabbùnù ira tapè pabballáyád da yù gámi na. ³⁶ Á nagitubang ira laguk nga magguárdiá kuna. ³⁷ Á sù kurù ta aruk na ulu na aijan yù nipe ra nga netúratán nga inipappaliwá da kuna nga kunniaw: "Yaw si Kesu nga Patul nayù ira Kudio." ³⁸ Á aijan gapay duá ira nga tulisán nga inipátà da ta kurù da. Á pamatáddak da sù

ira kurù da, nattangngán nayù ira tulisán si Apu Kesu, ta pinatáddak da yù tádday sù jiwánán na ána yù tádday sù jimigi na.

³⁹ Á yù ira tatolay nga nattalebák tán, gilingilingián ira nga makkakagi kâ Apu Kesu. ⁴⁰ Kinagi ra kuna, “Sikaw yù nakkagi ta dabbátam mu yù bale ni Namarò, á patáddagam mu galâ nga balinan ta tallu nga ággaw! Ye! Arà! Iyigù mu ngè laguk yù baggim, nu Anâ naka ni Namarò! Ámmutták ka ngè laguk saw!” kud da. ⁴¹ Á yù ira kátannangán nga pári, yù ira mesturu nga mangituddu ta tunung ána yù ira karakalán, kunnian gapay yù ángnguyo ra kuna. ⁴² Kinagi ra, “Ajjan kanu yù ira iniyigù na, ngam arán na meiyigù yù baggi na, mássiki nu aggina kanu yù Patul nayù ira taga Israel! Ámmutták laguk nakuan kunangan, á manguruk ittam kuna! ⁴³ Ikatalà na kanu si Apu Namarò! Á kinagi na ta aggina yù kuruk nga Anâ ni Namarò. Si Namarò nakuan laguk yù mangiyigù kuna, nu kuruk nga ikáyâ na,” kud da. ⁴⁴ Á kunnian gapay yù pamarabárù da kuna nayù ira tulisán nga kagiddán na nga nepátà ta kurù da.

Yù Pate ni Apu Kesu

Markus 15:33-41; Lukas 23:44-49; Kuan 19:28-30

⁴⁵ Á ta tangngá na ággaw, nakkallà yù tangapáddabbunán áddè ta alas tares, nga pannarek na bilák ta púgák. ⁴⁶ Á ta alas tares ta púgák, inikáddagá na lâ nakkatol ni Apu Kesu ta nasikan, á kinagi na, “Eli, Eli, lema sabák tani?” kun na. Á yaw kebalinán nayù kinagi na, “Ammò ku nga Apu Namarò, ngattá, ta sinájjíam mà?” kun na.

⁴⁷ Pakkatol ni Apu Kesu, á yù ira tatolay nga aranni kuna, naginná ra, á kinagi ra, “Katolán na támma yù ngaw Elias nga ábbilinán,” kud da. ⁴⁸ Á dagarágá nga nakkarerá yù tádday nira nga en na inâ yù kun na sine na áttabbatabbúrù nga nakatáng. Á inipasassà na sù nássam nga inumad da, á inipe na ta áttukil, tapè ipasussù na kâ Apu Kesu. ⁴⁹ Ngam yù ira káruán nga tatolay, kinagi ra, “Magiddak ittam lábbi, tapè masingat tam nu umay si Elias nga mangiyigù kuna,” kud da. ⁵⁰ Á nakkalli mángin laguk ta nasikan si Apu Kesu, á inibbatán na yù ikararuá na, á nagattá yù inángà na.

⁵¹ Á pakagattá na inángà ni Apu Kesu, negiddán nga napsil nga naggadduá yù nakannak nga kortiná nga nerijjing sù kangilinán nga lágum, nga paggianán ni Namarò sù mangilin nga kapillia. Á namegapu yù pisil na kortiná ta utun na ta áddè ta gukák, ána nallunik, á napakkapakká yù ira darakal nga batu. ⁵² Á nabbuká yù ira kuebá nga katanaman, á aru yù ira nanguruk kâ Namarò nga naginnanolay laguk nga naggapu sù ira námmatay. ⁵³ Á gilawalawanán ira sù tanam da. Á ta kabalin ni Apu Kesu nga naginnanolay, minay dannian laguk sù mangilin nga ili na Jerusalem, á aru yù ira tatolay nga nakasingan nira.

⁵⁴ Á yù kapitán ána yù ira suddálu na nga magguárdiá kâ Apu Kesu, pakasingad da ta nallunik ána yù ngámin nga nesimmu, á nepallà yù assing da. Á kinagi ra, “Kuruk nga Anâ ni Namarò yaw lagugam!” kud da. ⁵⁵ Á aru gapay yù ira bábbay nga naggián ta arayyu ta baddi, nga mangiripá. Aggira yù nepulupulú kâ Apu Kesu ána nangabbák kuna áddè sù páno na ta Galilia. ⁵⁶ Á aijan sù ira bábbay di Maria Maddalena, kári Maria nga yená di Ime kâ Kusè, ána yù yená nayù ira ánâ ni Sebedo.

Yù Ketanam ni Apu Kesu

Markus 15:42-47; Lukas 23:50-56; Kuan 19:38-42

⁵⁷ Á ta púgágin limibbé yù tádday nga maríku, nga mangngágan ta Kusè nga taga Arimatia. Aggina gapay yù siminuttul kâ Apu Kesu. ⁵⁸ Á minay laguk kâ Pilatto, á kiniddo na kuna yù baggi ni Apu Kesu. Á binilin ni Pilatto ira ta iyawâ da kuna. ⁵⁹ Á en na laguk inâ ni Kusè yù baggi ni Apu Kesu, á binungubungun na sù bagu nga sinnun nga kun na kustombare ra. ⁶⁰ Á pineddá na sù unak na kuebá, nga kapákkokkok na lâ paga ta batu tapè dán nga napanán ta baggi na lápay nu matay nakuan. Á iniserrá na sù áttallungán na tanam yù dakal nga batu nga kinarebu na sù puertá na, á nánaw. ⁶¹ Á aijan paga tán di Maria Maddalena ána yù tádday nga Maria, nga nabattáng nga nagitubang ta arubáng nayù tanam.

Yù ira Magguárdiá sù Tanam ni Apu Kesu

⁶² Á ta pannawák na Sabadu, nga ággibannák nayù ira Kudio, minay yù ira kátannangán nga pári ána yù ira Parisio ta gián ni Gubinador Pilatto. ⁶³ Á kinagi ra kuna, “Apu, manonò mi yù kinagi nayù minángngilogò ta keggá na paga nga matolay. Kinagi na ta maginnanolay sangaw nu mappasá yù tallu nga ággaw. ⁶⁴ Á yáyù nga ikomá mi nikaw ta dobam mu yù ira magguárdiá sù tanam na áddè ta mappasá yù mekatallu nga ággaw, marakè ed da kokotan nayù ira sinudduán na yù baggi na, nepatalugáring ta istoriá ra sangaw ta naginnanolayin.

Á nu kunnian yù ángngilogò da sangaw, mappanà laguk sangaw yù pangiloku ra nikami,” kud da. ⁶⁵ “Wan á,” kun ni Pilatto. “Mangá kayu laguk sù ira magguárdiá, áнна ipataron naw nira ta napiá yù netanamán na,” kun na. ⁶⁶ Á minay ira laguk sù kuebá nga netanamán na, á nasingad da ta naserrán yù tanam ta napiá, á minárkád da yù batu nga tákkak na kuebá, tapè ammu ra nu aijan yù mabbukâ sù tanam. Á bittáng da laguk tán yù ira suddálu nga magguárdiá.

28

Yù Paginnanole ni Apu Kesu

Markus 16:1-10; Lukas 24:1-12; Kuan 20:1-10

¹ Á pappasá na Sabadu, nga ággibannák, á ta alippánnawák na Liggu, minay di Maria Maddalena áнна yù tádday nga Maria, sù netanamán ni Apu Kesu, ta ed da sinullúnán. ² Á inikáddagâ lâ nallunik ta masikan. Ta aijan yù daroban ni Namarò nga nappagukák nga naggapu ta lángi, á en na laguk kinarebu yù batu nga nepanerrá sù áttallungán na tanam, á yáyù nagitubangán na. ³ Á makatulang yù mammang na nga kun na kilá, áнна kitapuraw yù gámi na. ⁴ Á yù ira suddálu nga magguárdiá, pakasingad da kuna, namippippik ira ta assing da, á napeddá ira nga kun na natay.

⁵ Á nagubobuk yù daroban sù ira bábbay. Kinagi na nira, “Ari kayu maganássing. Ammù gemma ta ala-aleran naw si Apu Kesu nga nepátà ta kurù. ⁶ Awánin saw, ta naginnanolayin nga kun na kinagi na ngaw. Tullung kayu laguk, ta en naw innan yù nagiddán na. ⁷ Á mabbíbi kayu lâ, ta mânaw kayu nga umay mangipakánnámmu sù ira sinudduán na ta naginnanolayin, á mapolungin ánnè nikayu nga umay ta Galilia. Maporián kayu laguk, ta masingan naw lâ sangaw túrin. Arà! Mánaw kayin, ta yaw lâ kagiak ku nikayu,” kun nayù daroban nira.

⁸ Á pakkagi nayù daroban, inapurá ra laguk nayù ira bábbay nga nánaw sù tanam. Á mássiki nu maganássing ira, ngam nepallá yù pagayáyá da gapay. Á nakkarerá ira, ta umay ira mangiparámak sù ira sinudduán ni Apu Kesu. ⁹ Á páno ra nga nakkarerá, inikáddagâ lâ jiminápun nira si Apu Kesu, á kinagi na nira, “Aijan kayu pá!” Á pakasingad da kuna, namalittúkak ira ta arubáng na, á sinangngalád da yù takki na áнна nakimoray ira kuna. ¹⁰ Á kinagi ni Apu Kesu nira, “Ari kayu maganássing. En naw laguk kagian sù ira wáwwagi ta umay ira ta Galilia. Á túrin sangaw yù pakkakásinganát tam,” kun ni Apu Kesu nira.

Yù Iniránuk nayù ira Suddálu nga Nagguárdiá

¹¹ Á páno nayù ira bábbay, nánaw gapay yù ira káruán nga suddálu nga nagguárdiá, á minay ira ta ili na Jerusalem tapè iránuk da sù ira kátannangán nga pári yù ngámin nga nesimmu. ¹² Á yáyù nga nepaggagammung yù ira kátannangán nga pári sù ira karakalán, tapè ubobugad da nu anni laguk yù akkuád da. Á kabalid da nakkaká-ubobuk, aru yù kuártu nga iniyawá da sù ira suddálu. ¹³ Á kinagi ra nira, “Kagian naw lâ sù ira tatolay ta minay yù ira sinudduán ni Kesu ta tangngá na gabi sù pakkaturuk naw, á kinokò da yù baggi na. ¹⁴ Á nu marámak na sangaw nayù Gubinador ta nakkaturuk kayu ta pagguárdiá naw, ari kayu maburung, ta sikami yù makiubobuk kuna, tapè arán nakayu pagikaruan,” kud da nira. ¹⁵ Á iná da laguk nayù ira suddálu yù kuártu, á kinuruk da yù kinagi ra nga akkuád da. Á yáyù lâ paga yù dámak nga massamá sù ira Kudio áddè ta ággawo.

Yù Pappasingan ni Apu Kesu sù ira Sinudduán na

Markus 16:14-18; Lukas 24:36-49; Kuan 20:19-23; Kingnguá 1:6-8

¹⁶ Á minay laguk yù ira mapulu tádday nga sinudduán ni Apu Kesu túrin ta Galilia, sù puidul nga kinagi ni Apu nga angayád da. ¹⁷ Á pakasingad da kâ Apu, nakimoray ira kuna, mássiki nu nabbábáng paga yù ira káruán. ¹⁸ Á jimikki si Apu Kesu nira, á kinagi na nira, “Neddánà sù ngámin pakáwayyá nayù mammaguray ta lángi áнна dabbuno. ¹⁹ Umay kayu laguk ta ngámin nga tatolay ta ngámin nga lugár, á ituddu naw nira yù inituddù nikayu, tapè manguruk ira gapay níkan. Á jigutan naw ira laguk, megapu sù pakáwayyá ni Ammò ku áнна yù pakáwayyá nga Aná na, áнна yù pakáwayyá nayù Mangilin nga Ikararuá. ²⁰ Á ituddu naw nira ta napiá, tapè tuppálad da ngámin yù bilik ku nikayu. Á nonopan naw yaw, nga aijanà nga mannanáyun nga mepulupulù nikayu ta áddè ta pagáddekán na ággaw.”

Yù Napiá nga Dámak nga Meyannung kâ Apu Kesu Kiristu nga Initúrâ ni Markus

Yù Meyannung sù Initúrâ ni Markus

Si Markus yù tádday sù ira appâ nga nangitúrâ sù napiá nga dámak nga meyannung kâ Apu Kiristu, á inistoriá na yù aru nga makapállâ nga kingngi-kingnguá ni Apu, yù pamagaddátu na, yù pammapiá na sù ira máttaki, yù pamapáno na sù ira anitu, yù pangiyangngá na sù pate na megapu nittam, ána yù paginnanole na.

Ta pagubobuk ni Apu Kesu, abbúnan na yù baggi na ta “Kaká na ngámin na tatolay,” (2:10). Á sù ira káruán nga ággubobuk, netúrâ ta “Anâ na tolay.” Á yá kebalínán na, ta mássiki nu tolay si Apu Kesu, aggina yù sigga-inángá nga makáwayyá. Á ta pamegapu nayù libru ni Markus, kinagi na, “Netúrâ sawe yù napiá nga dámak nga meyannung kâ Apu Kesu Kiristu nga Anâ ni Namarò.”

Yù Mayán na yawe Napiá nga Dámak

Yù Bilin nga Inilayalayá ni Kuan nga Minánnigù (1:1-8)

Yù Pakirigù ni Apu Kesu kâ Kuan ána Pamarubá ni Satanas kuna (1:9-13)

Yù Keggá ni Apu Kesu sù Purubinsia na Galilia (1:14-9:50)

Yù Ange ni Apu Kesu ta Jerusalem (10:1-52)

Keggá ni Apu Kesu ta Jerusalem sù Maporián nga Ligguán na (11:1-15:47)

Yù Paginnanole ni Apu Kesu (16:1-8)

Mappasingan si Apu Kesu ána Manoli ta Lángi (16:9-20)

Yù Bilin nga Inilayalayá ni Kuan nga Minánnigù

Mattiu 3:1-12; Lukas 3:1-18; Kuan 1:19-28

¹ Netúrâ sawe yù napiá nga dámak nga meyannung kâ Apu Kesu Kiristu nga Anâ ni Namarò. ² Kunniaw yù pamegapu nayù napiá nga bilin ni Namarò. Ajjan yù inipetúrâ ni Namarò kâ Isaya, nga yù ngaw nabbilínán na. Á initúrâ ni Isaya yù kinagi na ngaw ni Namarò sù Anâ na, nga kun na,

“Yawe yù ábbilínák ku nga dobak ku ta mapolu ánnè nikaw,

tapè paránan na yù dálan nga pallakarám mu.*

³ Aggina yù makkatakátol ta kalállammatán. Yaw ikatakátol na:

‘Umayin si Apu! Paránan naw yù dálan na.

Tunungan naw yù pallakarán na.’”†

⁴ Á napaluré yawe nga initúrâ ni Lákay Isaya, ta jimittál ta kalállammatán si Kuan nga Manigù. Á aru yù ira tatolay nga minay ta kalállammatán, tapè ginniginnád da yù kagian na. Á kinagi na nira, “Mabbabáwi kayu sù liwiliwâ naw, ána makirigù kayu, nga pangipasinganán naw sù pabbabáwi naw, á pakomán na kayu ni Namarò,” kun na. ⁵ Á naddagaráddán yù ira tatolay nga minay kâ Kuan ta kalállammatán, nga naggapu ta tanga purubinsia na Judiya ána yù ira ngámin nga taga Jerusalem. Á inipalalappâ da yù liwiliwâ da, á jinigù ni Kuan ira sù danum na Jordan.

⁶ Nabbarawási si Kuan ta gámi nga napadday ta duddù na kamel, nga ayám nga sináppukul bará na. Á nabbaraká ta tabbi na ayám. Á yá lá kanan na yù durun ána issi na asúkán. ⁷ Á yawe yù bilin nga inilayalayá ni Kuan: “Ajjan yù umayin nga maporián nga tumubbá níkan, nga makáwayyá ánnè níkan. Á aringá mepángngá nga mangubbák ta kaddang na sapátu na.

⁸ Á jigutat takayu, á danum lá yù ipanigù ku nikayu. Ngam aggina, ta panigù na nikayu, tanakuán yù ánnigù na. Ta ari danum yù ipanigù na nu ari galá yù Mangilin nga Ikararuá, nga ipapulú na nikayu,” kun ni Kuan sù ira tatolay.

Yù Pakirigù ni Apu Kesu kâ Kuan

Mattiu 3:13-17; Lukas 3:21-22

⁹ Á pangilayalayá ni Kuan ta kalállammatán, minay kuna si Apu Kesu, nga naggapu ta ili na Nasaret ta purubinsia na Galilia. Á jinigù na laguk ni Kuan sù danum na Jordan. ¹⁰ Gon ni Apu Kesu nga naggapu ta danum, dagarágá nga nasingan na yù lángi nga nabukatán ána yù Ikararuá ni Namarò nga mappagukák nga umay maddappá kuna ta kun na palomá. ¹¹ Á ajjan yù ngarál nga naggapu ta lángi, á kinagi na, “Sikaw yù Anâ ku nga iddukak ku, á ayatáná nikaw!”

* 1:2 Netúrâ yù káruán nayù kinagi na gapay sù libru ni Malakia 3:1 † 1:3 Isaya 40:3

Yù Pamarubá ni Satanas kâ Apu Kesu

Mattiu 4:1-11; Lukas 4:1-13

¹² Á kabalin ni Namarò nga nagubobuk, dagarágâ nga inipángè nayù Mangilin nga Ikararuá si Apu Kesu ta kalállammatán. ¹³ Á naggián si Apu Kesu ta kalállammatán ta appátapulu nga ággaw, áнна pinarubán ni Satanas nga liwatan na. Á awán ta kabbulun na, nu ari lá yù ira simaron nga ayám. Ngam minay yù ira daroban ni Namarò nga mangabbák kuna.

Yù Pagágál ni Apu Kesu sù ira Olu nga Makituddu kuna

Mattiu 4:12-22; Lukas 4:14-15; 5:1-11

¹⁴ Á nipagápù nayù mammaguray ta Judiya si Kuan, nga pinukù na ta ábbalurán. Á ta keggá ni Kuan ta ábbalurán, nánaw si Apu Kesu nga nanoli ta Galilia, nga mangilayalayá sù napiá nga dámak nga bilin ni Namarò. ¹⁵ Yá inilayalayá na, “Natuppálin yù ággaw nga sinullá ni Namarò. Á duttálin nikayu yù pammagure ni Namarò. Likurán naw laguk yù liwiliwá naw, á kurugan naw yù napiá nga dámak,” kun na.

¹⁶ Á ta pattalebák ni Apu Kesu ta aggik na bebay na Galilia, nasingan na yù ira duá nga mawwagi, di Simon kâ Andares, nga mattabukul, gapu ta yáyù ángngalluád da. ¹⁷ Pakasingan ni Apu Kesu nira, inagálán na ira, “E kayu saw ta tumuttul kayu nikán,” kun na. “Á ta kun na sirá nga apan naw kunungan, á kunnian gapay yù káru na tatolay nga patuttulan naw nikán noka,” kun na. ¹⁸ Pakaginná ra sù kinagi na, dagarágâ nga nánawád da yù ira tabukul da. Á minay ira nepulupulù nga makituddu kuna.

¹⁹ Á nallakák di Apu Kesu ta baddi paga ta aggik na bebay. Á pakáddè da ta baddi, nasingan na yù ira duá nga ánnâ ni Sebedo, di Ime kâ Kuan, nga ipoli da yù ikà da sù barange ra. ²⁰ Pakasingan ni Apu Kesu nira, dagarágâ nga inagálán na ira gapay. Á nánawád da di Sebedo nga ammò da sù barangay, áнна yù ira kábulud da nga minággissirá. Á minay ira nepulupulù nga makituddu kâ Apu Kesu gapay.

Yù Pamapáno ni Apu Kesu ta Anitu sù Tolay

Lukas 4:31-37

²¹ Manganánnuán, limibbè di Apu Kesu ta ili na Kapernium. Á kunnay ta kustombare na Kudio ta ággaw na Sabadu nga ággibannák da, dagarágâ nga simillung si Apu Kesu ta kapilliá, á nangituddu sù ira tatolay. ²² Á pakaginná ra kuna, napállâ ira sù pangituddu na, gapu ta makáwayyá yù ángngituddu na ánnè sù ángngituddu nayù ira mesturu na rilisiod da.

²³ Á simillung laguk sù kapilliá yù tolay nga naggusapel ta mamopoyung nga anitu. ²⁴ Á iniyássa-ássikan na yù ubobugan na, á kinagi na, “Anni yù akkuám mu nikami nga anitu, Kesu nga taga Nasaret? Em mu kami talamánan? Ammu taka gemma, sikaw yù Mangilin nga naggapu kâ Namarò,” kun na. ²⁵ Ngam gimmá ni Apu Kesu, “Arám mà ubu-ubobugan. Panawám mu yawe tolay.” ²⁶ Á pinabballiák nayù anitu yù tolay. Á pakcalli nayù anitu, nánawán na. ²⁷ Á yù ira tatolay nga naggagammung, pakasingad da karanniw, napállâ ira. Á nakkaká-ubobuk ira, á kinagi ra, “Anni panò danniw? Kuruk nga bagu yù ituddu na gemma! Sigga-pakáwayyá nga maggammá, mássiki sù ira mamopoyung nga anitu, á kurugad da yù kagian na!” kud da. ²⁸ Á dagarágâ nga iniparámak da yù meyanung kuna sù tanga purubinsia na Galilia.

Yù Pamammapiá ni Apu Kesu sù ira Máttaki

Mattiu 8:14-17; Lukas 4:38-41

²⁹ Á kabalin ni Apu Kesu namapánaw sù anitu, dagarágâ nga nánaw sù kapilliá, nga nepulù kári Ime kâ Kuan, á minay ira ta bale ri Simon kâ Andares. ³⁰ Á labbè da ta bale ra, naratang da yù bakabákâ nga katugángán ni Simon, nga nagiddá gapu ta makkulikuk. Á dagarágâ da nga kinagi kâ Apu Kesu. ³¹ Pakaginná ni Apu Kesu, jimikki kuna. Á sinanggalán na yù limá na, á pinagikkáng na. Á gikkáng nayù bakabákâ, nammapiá ngin. Á en na ira pinakán.

³² Á manganánnuán, ta pajjibbà, minay kâ Apu Kesu yù ira tatolay nga nangituluk sù ira máttaki áнна yù ira tarepoyungán na anitu. ³³ Á naggagammung ira ngámin nga tangelián nga naddarassil sù lawán na puertá na balay. ³⁴ Á aru yù ira pinammapiá ni Apu Kesu, nga nataká ta makkakerumá nga takitan. Á aru yù ira anitu nga pinapáno na, á arán na ira anugutan nga magubobuk, ta ammu ra ta aggina yù Aná ni Namarò.

Yù Pangilayalayá ni Apu Kesu sù Purubinsia na Galilia

Lukas 4:42-44

³⁵ Á ta alippánnawák, pagittarákkò na manù, nallákuá nga nánaw si Apu Kesu nga minay ta gián nga awán ta tatolay, tapè makimállà ká Namarò. ³⁶ Á pakánnámmu ra ta awán si Apu Kesu, minay di Simon áнна yù ira kábulun na nga magalek kuna. ³⁷ Pakálek da kuna, kinagi ra, “Ngámin nga tatolay, alerad daka,” kud da. ³⁸ “Mánaw ittam laguk,” kun ni Apu Kesu nira. “Et tamin sù ira káruán nga babálay, tapè ilayalayá ku nira gapay yù napiá nga dámak, ta yáyù sinalákkuruk ku nga minay saw,” kun na. ³⁹ Á minay laguk nga mangilayalayá sù ngámin nga kapilliá na Kudio sù tanga purubinsia na Galilia, á pinapáno na yù ira anitu sù ira tatolay nga barániuán.

*Yù Pamampapiá ni Apu Kesu sù Naggoggong
Mattiu 8:1-4; Lukas 5:12-16*

⁴⁰ Á minay jimikkì ká Apu Kesu yù naggoggong, á namalittúkak ta arubáng na nga makimállà kuna, á kinagi na, “Apu, nu ikáyá mu, makáwayyá ka nga mamampapiá níkán,” kun nayù naggoggong ká Apu Kesu. ⁴¹ Á pakasingan ni Apu Kesu kuna, nakalò yù allà na. Á sinonná na yù limá na, á sinámmi na yù naggoggong. Á kinagi na kuna, “Yáyù gemma ikáyá ku akkuan! Mampapiá ken laguk,” kun na. ⁴² Á ta pagubobuk ni Apu Kesu, dagarágá nga nampapiá yù naggoggong, áнна napakarenuánin yù baggi na. ⁴³ Á lage na pinapáno ni Apu Kesu yù tolay, sinaddánán na. ⁴⁴ Á kinagi na, “Arám mu bulubugá kagian ta tolay. Daretiu ka nga umay mappasingan sù pári na Kudio. Á ipeyátáng mu sù pári yù iyawá mu ká Namarò nga kunnay sù kinagi ni Moyses, tapè manguruk yù ira tatolay ta napakarenuán ken,” kun ni Apu Kesu kuna. ⁴⁵ Ngam ta páno na tolay, en na garè iniparámak sù ili áнна babálay. Á yáyù nga ari makángay si Apu Kesu ta ili, marakè maggugúru yù ira tatolay kuna. Á naggian lá ta agayyuán. Á naddagaráddán yù ira tatolay nga minay kuna nga naggapu ta ngámin nga lugár.

2

*Pampapián ni Apu Kesu yù Tolay nga Ari Makaguyu
Mattiu 9:1-8; Lukas 5:17-26*

¹ Á pappasá nayù ira ággaw nga pangituddu ni Apu Kesu ta agayyuán, nanoli ta ili na Kapernium. Á narámak nayù ira tatolay yù labbè na. ² Á minay ira naggagammung sù gián na, áddè ta awán ta paggianád da mássiki sù lawán na puertá. Á inilayalayá na nira yù bilin ni Namarò.

³ Á pangilayalayá ni Apu Kesu, limibbè yù appá nga tolay, á kináttu ra yù tolay nga matakì, nga kun na natay baggi na. ⁴ Á gapu ta ari ira makarakkì ká Apu Kesu megapu ta magaru nga tatolay, minunè ira ta sináttatapán nga atà na balay. Á binobbotád da yù atà sù aruk ni Apu Kesu, nga pangilabbutád da sù matakì, nga nagiddá sù dapan na. Á inayáud da sù arubáng ni Apu Kesu. ⁵ Á pakasingan ni Apu Kesu ta inipanapaná da lá nga inituluk kuna, natagená na yù ángngikatalá da kuna, á kinagi na sù tolay nga kun na natay yù baggi na, “Kopun, napakomá ngin yù ira liwiliwá mu,” kun na.

⁶ Á nagitubang gapay tán yù ira mesturu nga mangituddu sù tunung. Á pakaginná ra sù kinagi ni Apu Kesu sù matakì, kagiad da ta nonò da, ⁷ “Ngattá, ta kunniaw yù ubobuk na yawe tolay? Potuán na pá si Namarò! Asinni panò makapakomá ta liwá nu ari lá si Namarò!” kud da ta nonò da. ⁸ Á dagarágá nga natagená ni Apu Kesu yù nonò da. Á kinagi na nira, “Ngattá, ta kagian naw ta nonò naw ta awáná ta awayyá nga makkagi sù kinagi sù matakì?” ⁹ Anni panò yù ikáyá naw nga kagiak ku nakuan sù tolay nga kun na natay yù baggi na? Á ta ángngarigán, nu kagiak ku kuna nakuan, ‘Napakomá ngin yù ira liwiliwá mu,’ onu kuk ku lá, ‘Gumikkáng ka, apam mu yù dapam mu, á mallakák ka,’ kuk ku nakuan? ¹⁰ Ngam yawe yù akkuák ku, tapè kánnámmuán naw ta síkán nga Kaká na ngámin na tatolay yù makáwayyá sawe dabbuno nga mamakomá ta liwá,” kun ni Apu Kesu nira. Á kinagi na sù matakì nga natay yù baggi na, ¹¹ “Yawe yù kagiak ku níkaw. Gumikkáng ka laguk, á apam mu yù dapam mu, á lubbè ka lá ta balem,” kun na. ¹² Á gimikkáng yù matakì, á dagarágá inakká na yù dapan na. Á ta arubáng da ngámin, nappabattáng nira nga nánaw. Á napállá ira, á jináyo ra si Namarò. Á kinagi ra, “Awán paga ta nasingam mi nga kunniaw, nu ari lá paga kunangan,” kud da.

*Yù Pagágál ni Apu Kesu ká Libi
Mattiu 9:9-13; Lukas 5:27-32*

¹³ Á nánaw si Apu Kesu nga nanoli ta aggik na bebay. Á nallalabbè kuna yù magaru nga tatolay. Á sinudduán na ira. ¹⁴ Á manganánnuán, nallakák paga, á nasingan na si Libi nga

anâ ni Alpio nga mináttuki ta buwì nga nagitubang sù upisína na. Á kinagi ni Apu Kesu kâ Libi, “Tuttulam mà.” Á gimikkáng si Libi, á siminuttul kâ Apu Kesu. ¹⁵ Á minay laguk di Apu Kesu ána yù ira makituddu kuna nga nepakkákán sù bale ni Libi. Á nepagitubang tán gapay yù ira kábulun ni Libi nga minángngalawâ ta buwì ána yù ira káruán nga minálliwâ, gapu ta aru yù ira danniw nga siminuttul kâ Apu Kesu.

¹⁶ Á yù ira mesturu nga Parisio, nasingad da si Apu Kesu nga nepakkákán sù ira minálliwâ ána yù ira mináttuki ta buwì, nga maddarogâ ána mangilogò. Pakasingad da ta nepakkákán si Apu Kesu sù ira ilulluddè da, kinagi ra sù ira tudduán ni Apu Kesu, “Ngattá ta mepakkákán sù ira mináttuki ta buwì ána yù ira káruán nga minálliwâ?” kud da. ¹⁷ Á pakaginnâ ni Apu Kesu sù iniyabbû da, kinagi na nira, “Á yù ira nga napiá yù gawagawáyád da, ari ira magáwák ta minángnguru, nu ari galá yù ira máttaki. Á síkán, aringâ umay nga magágál sù ira nga kagiad da ta awán ta liwâ da, nu ari galá ta umayâ nga magágál sù ira nga ammu ra yù liwâ da.”

*Yù Ituddu ni Apu Kesu nga Meyannung sù Ággaw nga Arád da Pakkákán
Mattiu 9:14-17; Lukas 5:33-37*

¹⁸ Á yù ira makituddu kâ Kuan ána yù ira makikultu ta Parisio, ginilnad da yù tádday nga ággaw nga ari ira kumán, tapè makimállá ira kâ Apu Namarò. Á minay yù ira káruán nga tatolay nga nangiyabbû kâ Apu Kesu, á kinagi ra, “Mesturu, ari kumán yù ira makituddu kâ Kuan ána yù ira Parisio. Ngam yù ira tudduám mu, anni má ta kumán ira?” kud da. ¹⁹ Á kinagi ni Apu Kesu nira, “Á ta ángngarigán, nu aijan yù bodá, manaki panò kumán yù ira makibodá nu aijan yù nobiu nira? Arán na awayyá nga ari ira kumán nu aijan paga yù nobiu nira. ²⁰ Á duttál sangaw yù ággaw nga páno nayù nobiu nira, á maraddam ira, á ari ira laguk kumán,” kun ni Apu Kesu nira.

²¹ Á nagángngarigán si Apu Kesu, ta ipakánammu na nira ta ari metádday yù ngaw netuddu nira ána yù ituddu na nira. Á kinagi na, “Awán ta magappíl ta bagu ta dán nga sinnun, ta nu meypappíl kuna, kubbâ yù bagu sangaw nu mebábbál ána mapisil yù dán, á mappaná laguk yù pisol na sangaw,” kun na. ²² “Á kunnian gapay sù ira nga mappadday ta binaráyáng. Awán ta mangipay ta issi sù dán nga tabbí, gapu ta nataggâ yù tabbí. Ta nu dán nga tabbí yù pangipayyán na, mabattâ sangaw ta pagassam nayù issi, á mebuttu laguk, á kengá lâ yù binaráyáng ána yù ággianán na gapay. Máwák yù tabbí nga bagu nga malapâ, nga pangipayyád da, tapè ari mabattâ,” kun na.

*Yù Meyannung sù Ággaw nga Ággibannák
Mattiu 12:1-8; Lukas 6:1-5*

²³ Á sù tádday nga Sabadu, nga ággaw nga ággibannák da, nallakák di Apu Kesu sù dálan nga natangngán na ákkomanán. Pattalebák da, nangâ yù ira tudduán ni Apu Kesu sù natagatán nga dáwa. ²⁴ Á yù ira Parisio, nasingad da ira. “Innam mè!” kud da kâ Apu Kesu. “Ngattá ta akkuád da yù ipugik nayù tunung tam sù ággaw na ággibannák?” kud da kuna. ²⁵ “Wan ay,” kun ni Apu Kesu nira. “Á arán naw panò binibbik yù meyannung sù kingnguá na ngaw ni Patul Dabid nga ipugik nayù tunung tam gapay? Nabisinán di Dabid ána yù ira kábulun na. ²⁶ Á dagarágâ simillung si Dabid sù bale ni Namarò sù keggá ni Abiatar nga kátannangán nga pári. Á inâ na yù pán nga neyátáng nayù pári kâ Namarò, á kinán na ána iniyawâ na gapay sù ira kábulun na, nga mepugik nga kanan na tolay. Yù lâ pári yù mepángngâ nga kumán kuna. Ngam arán na paliwatan ni Namarò si Dabid sù kingnguá na. ²⁷ Ta pinarò ni Namarò yù tolay, nga ari megapu sù ággaw nga ággibannák, ngam sinullá na yù ággaw nga ággibannák megapu sù máwák na tolay nga magibannák. ²⁸ Ngam egga gapay yù máwák na tolay nga kanan. Á síkán nga Kaká na ngámin na tatolay, makáwayyángâ nga makkagi sù mepángngâ nga akkuán na tolay ána mepugik nga akkuád da ta ággaw nga ággibannák,” kun ni Apu Kesu nira.

3

*Yù Tolay nga Nassesseng Limá na
Mattiu 12:9-14; Lukas 6:6-11*

¹ Á minay má ngin simillung si Apu Kesu ta kapilliá na Kudio sù ággaw nga ággibannák. Á aijan sù kapilliá yù tolay nga nassesseng limá na. ² Á aijan gapay tán yù ira Parisio, á sisimád da si Apu Kesu tapè masingad da nu pammapián na yù nassesseng sù ággaw nga ággibannák, tapè ikeká ra.

³ Pakasingan ni Apu Kesu sù nassesseng, kinagi na kuna, “E ka bì saw.” ⁴ A kinagi na laguk sù ira massísim kuna, “Anni yù kagian nayù tunung tam nga meyanung sù akkuát tam sù ággaw na ággibannák? Máyâ yù mangabbák onu yù mangngúa ta tolay? Iyígù tam nakuan yù ikáttole tam onu papatáyat tam ira?” kun na nira. Ngam ari ira bulubugá nakkítuk. ⁵ Á nallipilipay si Apu Kesu nira, á naporray ána nakalò yù daddam na gapu ta nataggá yù nonò da, ta arád da ikállà yù tolay. Á kinagi na laguk ni Apu Kesu sù tolay nga nassesseng limá na, “Sonnatam mu yù limám.” Á sinonná na, á nammapiá ngin yù limá na.

⁶ Á pakasingan nayù ira Parisio sù kingngúa ni Apu Kesu, dagarágá nallawán ira ta kapillía, á makiubobuk ira sù ira tatole ni Patul Erodo, nu kunnasi yù ámmapáte ra kâ Apu Kesu.

Neparámak yù Ngágan ni Apu Kesu

⁷ Á nallilli laguk di Apu Kesu ána yù ira tudduán na ta ili, nga minay ta bebay. Á jimináddán nira yù ira magari nga tatolay nga naggapu sù ira purubinsia na Galilia ána Judiya. ⁸ Á aru ira gapay nga naggapu ta ili na Jerusalem, ána yù lugár na Iddumia, yù dammáng na Jordan, á yù ira ili na Tiro ána Sidon ána yù lugár ta lepuád da. Minay yù ira ngámin nga tatolay kâ Apu Kesu, gapu ta narámak da yù akka-akkuán na nga makapállà.

⁹ Á gapu sù ira magari nga minay kâ Apu Kesu, inipaparán na sù ira makituddu kuna yù barangay nga pagitubangán na, tapè ari marappi sù ira tatolay nga naddarassil ta aggik na bebay. ¹⁰ Á gapu ta aru yù ira máttaki nga pinammapiá na, naggugúru yù ira ngámin nga máttaki nga maniggek kuna. ¹¹ Á yù ira nagunagán na anitu, pakasingad da kuna, namalittúkak ira ta arubáng na, á inikalli ra, “Sikaw yù Aná ni Namarò,” kud da. ¹² Ngam gimmá na ira ta arád da ipakánnámmu.

*Pilian ni Apu Kesu yù ira Mapulu duá nga Makituddu kuna
Mattiu 10:1-4; Lukas 6:12-16*

¹³ Á giminin si Apu Kesu ta puddul. Á inagálán na yù ira tatolay nga inikáyâ na, á minay ira kuna. ¹⁴ Á sinullà na yù ira mapulu duá, tapè mepulù ira kuna, ána dohan na ira ta umay mangilayalayâ. ¹⁵ Á inipe na nira yù pakapangngúa na nga mamapánaw ta anitu. ¹⁶ Á danniaw yù ira mapulu duá nga sinullà na: si Simon nga iningágan na ta Eduro, ¹⁷ á yù ira duá nga ánâ ni Sebedo, di Ime kâ Kuan, nga iningágan na ta Buanages. Á yù kebalinán na, ánâ na alittúgaw. ¹⁸ Á si Andares gapay kâ Pilippi, si Bartolome, si Mattiu, si Tomá, si Ime nga anâ ni Alpiu, si Tajjio, si Simon nga Mengal, ¹⁹ á si Kudas Iskariote nga nabbalin ta mappagápù kâ Apu Kesu.

*Yù Siri nga Kinagi nayù ira Mesturu na Kudio
Mattiu 12:22-32; Lukas 11:14-23; 12:10*

²⁰ Á gapu ta kabalin na nanullà sù ira tudduán na, limibbè si Apu Kesu ta paggianán na. Á naggagamung mángin yù ira magari sù gián na. Á yáyù nga arád di Apu Kesu natángngák nga kumán. ²¹ Á pakarámak nayù ira kanakanáyun ni Apu Kesu, ed da nakuan gaputan, ta kagiad da ta magisassay maguyung.

²² Á aijan gapay yù ira mesturu na Kudio, nga naggapu ta ili na Jerusalem. Á kinagi ra sù ira tatolay, “Aggina, nagunagán ni Satanas, nga patul nayù ira anitu, á iyawâ ni Satanas kuna yù pakapangngúa na nga mamapánaw ta anitu,” kud da. ²³ Á inagálán na ira laguk ni Apu Kesu. Á iniyángngarigán na yù itabbák na nira, á kinagi na, “Ikáyâ ni Satanas panò papanáwan yù ira anitu sù ira tatolay?” ²⁴ Á nu ángngarigán ta aijan yù páppatulán, nga maddaráma yù ira tatole na, mabi lá yù pagáddekán nayù páppatulád da. ²⁵ Á kunnian gapay sù ira makkakábbalay, nu maddaráma ira, ari ira gemma makapaggián sù bale ra. ²⁶ Á nu maddaráma di Satanas ána yù ira anitu nga masserbi kuna, ari mabayák yù pammagure na, ta duttálin yù áddè na.

²⁷ “Á ta ángngarigán, awán ta makatallung sù bale nayù masikan, nu arán na olu nga igálù, tapè apan na yù maguray lá nga ikáyâ na. ²⁸ Ginnán naw laguk, ta kuruk yù kagiak ku nikayu, mapakomá yù ira tatolay sù ngámin nga liwiliwâ da, mássiki yù ira nga magubobuk ta narákè kâ Namarò. ²⁹ Ngam yù makkakagi ta narákè sù Mangilin nga Ikararuá, ari bulubugá mapakomá yù liwâ na ta áddè ta áddè.” ³⁰ Yáyù initabbák ni Apu Kesu nira, gapu ta kinagi ra ta aggina yù nagunagán na anitu.

*Di Yená ni Apu Kesu ána yù ira Wáwwagi na
Mattiu 12:46-50; Lukas 8:19-21*

³¹ Á limibbè yù yená ni Apu Kesu áнна yù ira wáwwagi na, á naggián ira ta námmuák na balay. Á inipágál da si Apu Kesu ta umay nira ta lawán. ³² Á aru yù ira tatolay nga nagarimummung ká Apu Kesu sù unak na balay. Á kinagi ra kuna, “Ajjan ta lawán si innò mu áнна yù ira wáwwagim, á ipágál daka,” kud da. ³³ Á simibbák si Apu Kesu, á kinagi na, “Asinni yù kuruk nga yená? Asinni yù ira kuruk nga wáwwagi?” kun na. ³⁴ Nilipilipe na yù ira nagarimummung kuna, á kinagi na, “Danniw ira yù pannakayená áнна pannakawáwwagi! ³⁵ Ta ngámin ira nga mamalurò sù ipakuá ni Namarò nira, aggira yù meyarik ta wáwwagi nga lálláki áнна wáwwagi nga bábbay áнна yená,” kun na.

4

*Yù Ángngarigán nga Meyannung sù Mangiwári ta Bini
Mattiu 13:1-9; Lukas 8:4-8*

¹ Uli otturu nga pangituddu ni Apu Kesu ta aggik na bebay, kitáru yù ira tatolay nga minay kuna. Á yáyù nga nappittá ta barangay nga nappatangngá ta baddi, á naggián yù ira tatolay ta aggik. Á nagitubang si Apu Kesu nga nangarubáng nira. ² Á ta pangituddu na, nagángngarigán, á aru yù inittuddu na nira. Kinagi na, ³ “Ginnán naw laguk. Ajjan yù tolay nga minámmulá, á en na iwári yù bini sù ákkomanán na. ⁴ Pangiwári na ta bini, natágá yù baddi ta aggik na dálán, á dagarágá nga kinán nayù mammánù ira. ⁵ Á natágá yù baddi ta gián na batu, nga baddi lá yù dabbun na, á mabi mattubbu. ⁶ Á sangaw nu mabilagán, malelay gapu ta ari naggamù ta napiá.

⁷ “Á natágá yù baddi nga bini paga ta kasisítán. Á gapu ta alistu yù paddakal nayù sí, nabalabáluk yù bini, á ari makapabbungá. ⁸ Á yù bini nga iniwári na tolay sù ákkomanán na, jiminakal, á nabbungá ngámin. Ajjan yù bini nga kustu yù ábbungá na, áнна ajjan nga kitapiá yù ábbungá na, áнна ajjan gapay nga kapiánán yù ábbungá na. ⁹ Á sikayu nga makaginná, ginnán naw ta napiá yù kagiak ku,” kun ni Apu Kesu nira.

*Yù Gapu na nga Nagángngarigán si Apu Kesu
Mattiu 13:10-17; Lukas 8:9-10*

¹⁰ Manganánuán, páno nayù ira magari, ajjan lâ paga ká Apu Kesu yù ira nga makituddu kuna áнна yù ira mapulu duá nga sinullá na. Á iniyabbù da kuna yù meyannung sù kebalinán nayù ira ángngarigán na. ¹¹ Á simibbák, á kinagi na nira, “Sikayu yù iniddán ni Namarò ta pakánnámmu naw sù nelímak ngaw nga meyannung sù ira mesipá ta pammagure ni Namarò. Ngam iyángngarigák ku lá sù ira káruán nga tatolay, ¹² tapé mapalurò yù dán nga netúrâ ni Isaya, nga yù ngaw ábbilinán ni Namarò. Kinagi na: ‘Mássiki nu inni-innad da, ngam arád da tákkilalán, á mássiki nu ginniginnád da, ngam arád da kánnámmuán. Ta nu kánnámmuád da, likurád da nakuan yù liwiliwá da, áнна mattoli ira ká Namarò, tapé pakomán na ira.’”*

*Ibukalán ni Apu Kesu yù Kebalinán nayù Mangiwári ta Bini
Mattiu 13:18-23; Lukas 8:11-15*

¹³ Á kinagi ni Apu Kesu nira, “Ngattá, ta arán naw kánnámmuán yù kinagi? Á nu arán naw kánnámmuán yaw, kunnasi laguk pakánnámmu naw sù ira káruán nga pagángngarigák ku? ¹⁴ Yù minángngiwári ta bini, yáyù keyarigán nayù tolay nga mangituddu ta bilin ni Namarò sù ira tatolay. ¹⁵ Á kunnay ta aggik na dálán nga natágatán ta bini, kunnian gapay sù ira káruán nga tatolay nga magginná sù ubobuk ni Namarò. Pakaginná ra, dagarágá nga umay si Satanas, á irián na ta nonò da yù ubobuk ni Namarò. ¹⁶ Á kunnay ta gián na batu nga natágatán ta bini, kunnian gapay sù ira káruán nga tatolay, gapu ta pakaginná ra sù ubobuk ni Namarò, magayáyá ira nga mangalawá kuna, ¹⁷ ngam ari mapattam ta nonò da, á mabi lá ira manguruk. Á sangaw nu umay yù jigá da, onu ajjan yù manigirigá nira megapu sù ángnguruk da, dagarágá nga likurád da yù ángnguruk da.

¹⁸ “Á yù ira káruán nga tatolay nga magginná sù ubobuk ni Namarò, kunnay ta mesimmu ta bini nga newári ta kasisítán, kunnian gapay nira, ¹⁹ gapu ta tángngagad da lá yù pagalerád da áнна yù pangayá da sù kukuá ra, áнна yù pakkaragá da ta aru nga makkakerumá. Á yáyù nga kunnay ta bini nga ari tulluá ta kasisítán, kunnian gapay sù ubobuk ni Namarò ta nonò da, gapu ta arád da tángngagan. ²⁰ Á yù ira tatolay nga magginná áнна manguruk sù ubobuk ni Namarò, kunnay ira ta napiá nga komán nga newarítán na bini nga mabbungá ta napiá.

* 4:12 Isaya 6:9-10

Ta mepatattam ta nonò da yù ubobuk ni Namarò, á napsigaggà yù ángnguruk da, ána aru yù napiá nga palurotad da.”

Yù Ángngarigán nga Meyannung ta Isingan
Lukas 8:16-18

²¹ Á kinagi ni Apu Kesu nira, “Á ta ángngarigán, nu paggatangat tam yù isingan, kallabát tam panò, onu ipe tam panò ta silárunng na katri? Ari gemma! Ngam ipotut tam ta lamesá. ²² Á kunnian gapay sù pangituddù ta meyannung sù pammagure ni Namarò, ta awán gemma ta metuttù nga ari galá sangaw mepakámmámmu. Á awán ta melímak nga ari galá sangaw mepalappá. ²³ Nu egga yù talingá naw nga makaginná, magginná kayu laguk.”

²⁴ Á kinagi na paga nira, “Tángngagan naw ta napiá yù maginná naw. Ta ángngarigán, yù saluk nga egga níkayu, yáyù mepattappang níkayu, á malannapán sangaw gapay. Kunnian sù ira tatolay nga manángngák sù metuddu nira. Nu manguruk ira, á aru paga sangaw yù kánnámmuád da. ²⁵ Á nu patattamad da ta nonò da yù ubobuk ni Namarò, aru paga sangaw ipakánnámmu ni Namarò nira. Á yù ira tatolay nga ari manguruk sù metuddu nira, máttamad da paddaw yù baddi nga kagiad da ta kánnámmuád da.”

Kunnasi yù Paddakal nayù Pammagurayán ni Namarò?

²⁶ Pangituddu na má ni Apu Kesu, kinagi na, “Kunniaw yù keyarigán nayù paddakal nayù pammagurayán ni Namarò. Ta ángngarigán, aijan yù tolay nga mangiwári ta bini sù ákkomanán na. ²⁷ Á kabalin na nangiwári sù komán na, magiddá nga makaturuk káda gabi ána gumikkáng kággággaw. Á mattubbu yù bini, nga dumakal lâ dumakal, ngam arán na ammu nayù tolay nu kunnasi yù áddakal na. ²⁸ Á palattuáran na dabbun ta olu yù don na pángé nayù dáwa na nga dumakal áddè ta pattaggá na. ²⁹ Kalutu nayù dáwa na, doban nayù tolay yù ira umay maggaták kuna, gapu ta náddekánin yù kagaták na.”

Anni yù Pabbalinán nayù Kabadditán na Bukal?

Mattiu 13:31-32, 34; Lukas 13:18-19

³⁰ Á kinagi na má ni Apu Kesu sù ira tatolay, “Anni panò yù pangigitták ku sù pammagure ni Namarò? Onu anni yù pangiyarigák ku kuna? ³¹ Kunnay sù kabadditán nga bukal nga nemulá ta dabbun. ³² Nu nemulá ngin, mattubbu nga dumakal ta áddè ta mabbáli ta karakalán na mulá nga darakal yù pangá na. Á umay magumù yù ira mammánù sù pangá na.” ³³ Á ta pangituddu na nira, aru nga kunnian yù iniyángngarigán na nira, ta yáyù lá maginná ra ta áddè ta arád da kánnámmuán. ³⁴ Á awán bulubugá ta kinagi na sù ira tatolay nu ari lâ megapu sù pagángngarigán na. Ngam ta kepulù da lâ kuna nayù ira makituddu kuna, inibukalán na ngámin nira.

Pagimamatan ni Apu Kesu yù Baggiu

Mattiu 8:23-27; Lukas 8:22-25

³⁵ Á ta pajjibbà, kinagi ni Apu Kesu sù ira makituddu kuna, “Et tamin, ta dumáki ittam ta dammáng na bebay,” kun na. ³⁶ Á nánawád da yù ira magaru, á nappittá ira sù barangay nga gián ni Apu Kesu, á inipulù da nga iráki ta dammáng. Á aijan yù ira káruán nga barangay nga namulun nira. ³⁷ Á níkáddagá lâ nappaddák ta nasikan, á lappágan nayù palung yù barangay, á massabbuetán ta áddè ta maddaggun mapannu. ³⁸ Ngam nakkaturuk si Apu Kesu nga nappungán sù gián na ulin na barangay. Á ed da nilukák. “Mesturu!” kud da. “Arám mu kemámmatán yù kalaggak tam?” kud da. ³⁹ Á kalukák na, gimmá na yù paddák ána palung, á kinagi na, “Magimammá ken.” Á nagimammá yù paddák, á nalínák yù danum. ⁴⁰ Á kinagi na sù ira makituddu kuna, “Ngattá, ta maganásing kayu? Arán nawá paga ikatalà?” kun na. ⁴¹ Á nappaná yù assing da ána nakalò yù kapállá da. Á nakkaká-ubobuk ira nga kinagi, “Asinni laguk yaw? Ta mássiki yù paddák ána danum, tuppálad da yù kagian na!” kud da.

5

Pammapián ni Apu Kesu Yù Naggusapel

Mattiu 8:28-34; Lukas 8:26-39

¹ Á nakáddè di Apu Kesu ta dammáng na bebay sù gián nga mangngágan ta Gerasa. ² Gatták ni Apu Kesu ta barangay, minay jiminápun kuna yù tolay nga naggapu ta katanamán, nga nagunagán na anitu. ³ Á kuebá ta katanamán yù paggianán na, gapu ta awán ta tolay nga makegálù kuna, mássiki nu káwák yù gálù na. ⁴ Ta name-arua nga nagalután ta káwák nga balayáng yù takki na ána yù limá na, ngam gattakan na lâ, á awán

ta tolay nga masikan nga makegaggak kuna. ⁵ Á kággággaw ána káda gabi magagga-aggay sù katanamán ána puddupuddul ira, á bigibigarán na yù baggi na ta batu nga nataram.

⁶ Pakerípá nayù naggusapel ká Apu Kesu ta arayyu paga, nakkarerá nga minay namalittúkak sù arubáng na. ⁷ Á nikalli na nga kinagi kuna, “Anni akkuám mu nikán, sikaw Apu Kesu nga Aná ni Namarò nga Kotunán? Á ta arubáng ni Namarò, kiddawak ku nikaw ta arám mà jigirigátan,” kun nayù maguyung ká Apu Kesu. ⁸ Yáyù kiniddo na, gapu ta makiubobugin si Apu Kesu, á kinagi na sù anitu nga nagunak, “Mallawán ka nga má naw sù tolay, sikaw, anitu!” ⁹ Á iniyabbù na laguk ni Apu Kesu kuna, “Anni yù ngágam mu?” “Jibu yù ngágak ku gapu ta apípiá kami,” kun nayù naggusapel. ¹⁰ Á inikukkuttù na nga nakimállà kuna ta arán na ira papanáwan sù lugár da.

¹¹ Á naggián tán apípiá nga bábi ira nga nadduki sù garek na puddul. ¹² Á nakimállà yù ira anitu ká Apu Kesu, á kinagi ra, “Dobam mu kami bì sù ira bábi, tapè tullung kami nira,” kud da. ¹³ Á iniyangugù na nira, á nallowán ira nga simillung sù ira bábi. Á ngámin yù ira bábi nga maddaggun duá ribu, nakkarerá ira nga minutù nga minay sù danum na bebay. Á nalaggabán ira ngámin nga natay ta bebay.

¹⁴ Pakasingan nayù ira minánnaron ta bábi sù nesimmu, nattálaw ira, á ed da iniparámak sù ili ána ngámin nga bárrui. Á pakarámak nayù ira tatolay, ed da pinasikkál nu anni yù nesimmu. ¹⁵ Pakáddè da ká Apu Kesu, nasingad da yù tolay nga naggusapel ngaw, nga nagitubang nga nabbarawási ngin. Nanoli ngin yù napiá nga nonò na. Pakasingad da kuna, nakalò yù assing da, á nepallà yù kapállà da megapu sù pakáwayyá ni Apu Kesu. ¹⁶ Á yù ira tatolay nga nakasingan, inistoriá ra sù ira káruán yù ngámin nga nesimmu sù tolay nga naggusapel ána yù ira aya-ayám da. ¹⁷ Á dagarágá makikomá ira ngámin ká Apu Kesu ta panawán na bì yù lugár da.

¹⁸ Á gapu ta panaki da kuna, minay si Apu Kesu nga nappittá ta barangay. Á yù tolay nga nagunagán na ngaw na anitu, minay laguk nakimállà ká Apu Kesu, ta gustu na mepulù kuna. ¹⁹ Ngam arán na inanugù ni Apu Kesu, á kinagi ni Apu Kesu, “Manoli ka lâ ta balem, á kagiam mu sù ira kanakanáyum mu yù ngámin nga kingngua ni Apu nikaw ána yù ángngikállà na nikaw,” kun ni Apu Kesu kuna. ²⁰ Á nánaw laguk yù tolay, á dagarágá nanoli ta lugár na nga mangngágan ta Mapulu Ili, ta en na inilayalayá yù kingngua ni Apu Kesu kuna. Á pakagingná nayù ira tatolay, napállà ira ngámin.

Paginnanolayan ni Apu Kesu yù Aná ni Jeru ána Pammapián na yù Babay nga Naniggek kuna

Mattiu 9:18-26; Lukas 8:40-56

²¹ Á nabbarangay laguk si Apu Kesu nga nanoli ta dammáng na bebay. Pakatunù na tán, nagarimummungád da nayù ira magaru nga tatolay ta aggik na bebay. ²² Á minay gapay yù tádday nga tolay, nga mangngágan ta Jeru, nga kapatás ta kapilliá na Kudio. Á pakasingan ni Jeru ká Apu Kesu, namalittúkak laguk ta arubáng na. ²³ Á inikomá na kuna, nga kun na, “Magisassay matay yù aná ku nga babay. Em mu bì támmitan, tapè mammapiá ána matolay,” kun ni Jeru ká Apu Kesu. ²⁴ Á binulun na laguk ni Apu Kesu, ta umay ira sù bale na. Á nepulù nira yù magaru nga tatolay. Á masirisiri ira sù dалан.

²⁵ Á ta kasirisiri nayù ira tatolay, ajjan yù babay nga mapparága ta mapulu duá nga dagun. ²⁶ Á aru yù jigá nga inattamán na megapu ta panguru ra kuna nayù ira aru nga miná ngguru. Á napúnu ngin yù kuártu na, á ari paga nammapiá, nu ari galá nga mappaná lâ mappaná yù takì na. ²⁷ Á narámak na yù meyanung ká Apu Kesu, á minay laguk nga jimikki sù likuk na. Á siniggek na yù barawási na. ²⁸ Ta nanonò na, “Nu ek ku siggeran mássiki yù gámi na, á mammapiángá,” kun na ta nonò na. ²⁹ Á paniggek na kuna, dagarágá nattukká yù papparága na! Á natagenà na ta nammapiá ngin yù baggi na.

³⁰ Á ta pammapiá nayù babay, dagarágá natagenà ni Apu Kesu ta nammapiá yù tolay megapu sù ámmagaddátu na, á naggiinnà laguk ta dалан, nga nallipay sù ira tatolay, á iniyabbù na nira, “Asinni naniggek ta gámi ku?” kun na. ³¹ Á kinagi nayù ira makituddu kuna, “Arám mu panò masingan yù ira tatolay nga manirisiri nikaw? Ngattá, ta iyabbù mu lâ paga ta asinni naniggek nikaw?” kud da kuna. ³² Á nilipilipe na ira ngámin tapè masingan na yù naniggek kuna. ³³ Á yù babay, natákál na ta nammapiá ngin, á minay namalittúkak ta arubáng ni Apu Kesu, nga mamippippik nga maganásing, á kinagi na yù kurugán. ³⁴ Á kinagi ni Apu Kesu kuna, “Tiyá, nammapiá ken megapu sù ángngikatalá mu nikán. Lubbè ken, á ari ka maburung, ta kuruk nga nammapiá ken nga ari mapatolián,” kun na.

³⁵ Á pakiubobuk na paga ni Apu Kesu sù babay, jimittál yù ira tatolay nga naggapu ta bale nayù kapatás, á kinagi ra sù kapatás, “Natayin yù aná mu. Ngattá, ta bannagam mu paga yù mesturu?” kud da. ³⁶ Ngam arán na sinángngák ni Apu Kesu yù kinagi ra, á kinagi na sù kapatás, “Ari ka maganássing. Ipasigaggà mu lá yù ángngikatalá mu níkan,” kun ni Apu Kesu kuna. ³⁷ Á arán na inanugù nga mepulù yù ira tatolay kuna. Tallu ira lá yù mepulù kuna, di Eduru ána yù duá nga mawwagi, di Ime kâ Kuan.

³⁸ Á labbè da ta bale nayù kapatás, nasingan ni Apu Kesu yù ira matannuk nga gikulukuletán. ³⁹ Á tallung ni Apu Kesu sù balay, kinagi na nira, “Ngattá, ta matannuk kayu ána makkulè? Yù abbing, ari natay, ngam makkaturuk lá,” kun na. ⁴⁰ Á inipappagalà da. Ngam pinapáno ni Apu Kesu ira sù balay. Á yù yená nayù abbing ána yù yáma na, á si Apu Kesu ána yù ira tallu nga kábulun na, aggira lá yù simillung sù gián nayù abbing. ⁴¹ Tallung da ta lágum, jimikkì si Apu Kesu sù abbing, á singngalán na yù limá na. Á kinagi na kuna sù ággubobuk na, “Talita kumi.” Á yù kebalinán na, “Abè, gumikkáng ka.” ⁴² Á dagarágá giminiikkáng yù abbing, á nallakák, ta dakalin, ta mapulu duá yù dagun na. Á pakasingan nayù ira darakal na, nakalò yù kapállá da. ⁴³ Á sinabarangán na ira ni Apu Kesu ta arád da bulubugá ipakánnámmu. Á kinagi na nira ta pakanad da yù abbing.

6

*Arád da Dayáwan si Apu Kesu nayù ira Katangelián na
Mattiu 13:53-58; Lukas 4:16-30*

¹ Á nánaw laguk si Apu Kesu nga nanoli sù lugár na ta ili na Nasaret. Á nepulupulù kuna yù ira makituddu kuna. ² Á sù ággaw nga ággibannák da, minay nangituddu ta kapillíá na Kudío. Á aru yù ira tatolay nga napállá ta pakaginná ra sù ituddu na. Á kinagi ra, “Isaw panò pangápán na daniaw nga kagian na nittam? Anni panò yù sírik nga nepay kuna? Á kunnasi panò yù pamagaddátu na ta makapállá nga akka-akkuán na? ³ Ari panò aggina yù kalapinteru, nga aná ni Maria, ána yù kaká ri Ime, kári Kusè, si Kudas, si Simon? Á aijan gapay saw yù ira wáwwagi na nga bábbay,” kud da. Á nataki yù nonò da kuna.

⁴ Á kinagi na laguk ni Apu Kesu nira, “Ngámin nga tatolay, makimoray ira sù ábbilinán ni Namarò. Awán ta manaki kuna, nu ari lá yù ira katangelián na ána yù ira kanakanáyun na ána yù kábbale na,” kun na nira. ⁵ Á ari makapagaddátu tán, gapu ta awán ta manguruk kuna, ngam yù ira lá nga káruán nga máttaki, sinámmi na ira ána pinammapiá na ira. ⁶ Á napállá, gapu ta awán ta ángnguruk da. Á minay laguk mangituddu ta tatolay sù ira barrabárriu.

Doban ni Apu Kesu yù Mapulu Duá nga Sinullà na ta Umay ira Mangilayalayá sù Napiá nga Dámak

Mattiu 10:5-15; Lukas 9:1-6

⁷ Á inagálán ni Apu Kesu yù mapulu duá nga sinullà na, tapè doban na ira nga taggiruá, ta umay ira mangilayalayá sù bilin ni Namarò. Á ipe na nira yù pakáwayyá na nga maggammá sù ira anitu. ⁸ Á sinabarangán na ira ta awán bulubugá ta ipulù da, ngam yù lá tagukuk da sù lakarad da. Yáyù lá, ta arán na nira inipálá yù bálud da nga kanan onu gámi onu kuártu sù arikáwá da. ⁹ Kinagi na nira ta massapátù ira, ngam arád da ipulù yù pappataliád da. ¹⁰ Á kinagi na nira, “Á yù labbetán naw nga balay, yáyù lá ággammátán naw áddè ta páno naw ta lugár da. ¹¹ Á nu lubbè kayu ta gián nga awán ta mangalawá nikayu, ána manaki ira magginná sù bilin naw, mánaw kayu laguk. Á ta páno naw, pápparán naw yù káppù sù takki naw, nga pangipanonò naw nira ta liwá da lápay nu manaki ira magginná sù bilin naw,” kun na nira.

¹² Á nánaw laguk yù ira mapulu duá nga sinullà na, á minay ira mangilayalayá ta máwák nga mabbabáwi yù ira tatolay ána likuránád da yù narákè nga ággangguá ra. ¹³ Á aru yù ira anitu nga pinapáno ra ta tatolay, á aru yù ira máttaki nga jinenuú da, á nammapiá ira.

Yù Ipate ni Kuan nga Minánnigù

Mattiu 14:1-12; Lukas 9:7-9

¹⁴ Á gapu ta neparámak yù kingngikingnguá ni Apu Kesu, naginná na gapay ni Patul Erodo. Á yù ira káruán nga tatolay, kinagi ra, “Naginnanolayin si Kuan, nga yù ngaw Minánnigù. Á yáyù gapu na nga egga ngin kuna yù ámmagaddátu na,” kud da. ¹⁵ Á yù ira

káruán nga tatolay, kagiad da, “Aggina si Elias* nga yù ngaw ábbilinán,” kud da. Á yù ira káruán, kagiad da, “Aggina yù ábbilinán ni Namarò nga kagittá nayù ira ngaw ábbilinán,” kud da. ¹⁶ Ngam si Patul Erodo, pakaginná na sù kagiad da, kinagi na, “Asinni panò, nu ari si Kuan nga inipaputul ku ngaw, nga naginnanolayin!” kun na. ¹⁷ Yáyù kinagi ni Patul Erodo, gapu ta manononò na lâ yù kingnguá na ngaw kê Kuan, sù ngaw pangipukù na kuna.

Á yawe yù istoriá ra nga meyannung sù kingnguá na ngaw ni Patul Erodo kê Kuan. Egga yù urián ni Patul Erodo, nga laláki, nga si Pilippi yù ngágan na. Á nagatáwa di Pilippi kê Erodia. Ngam iná ni Patul Erodo si Erodia, nga asípák na, ta atawán na. ¹⁸ Á pakánnámmu ni Kuan sù kingnguá ni Patul Erodo, kinagi na kuna, “Arám mu inuru-uray yù katunungán, ta iná mu yù atáwa ni Pilippi nga uriám mu,” kun na.

¹⁹ Á pakánnámmu ni Erodia sù kinagi ni Kuan sù patul, kitaporay si Erodia kê Kuan, á gustu na papatáyán, ngam awán ta awayyá na. ²⁰ Ta makimoray si Patul Erodo kê Kuan, gapu ta ammu na ta katunungán nga tolay, nga ábbilinán ni Namarò. Á yáyù nga jinok na ngaw ni Patul Erodo yù umay maggápù kê Kuan, á inipapukù na, tapè melilli kê Erodia nga mamapátay kuna nakuan. Á sinángngák nayù patul nga gininná yù ituddu ni Kuan, ta ikáyá na nga ginnán, mássiki nu nabbábáng sù bilin na.

²¹ Á manganánnuán, jimittál yù awayyá ni Erodia nga mangipapátay kê Kuan, ta ággaw nga pabbúyá ra ta keyaná ni Patul Erodo. Ta inapá ni Erodo yù ira mammaguray nga gádday kuna ána yù ira kapitán na suddálu, á yù ira girikuán ta purubinsia na gapay, tapè umay ira mepallálláng ána mabbúyá ta keyaná na. ²² Á aijan yù aná ni Erodia nga magingánay. Á minay mattála megapu sù ira álliuk. Á ayatán di Erodo ána yù ira álliuk na sù pattála na. Á kinagi ni Patul Erodo kuna, “Á Parinsesa, kiddawam mu níkan yù gustum, á iyawá ku níkaw,” kun na. ²³ Á inipagássingán ni Erodo kuna, á kinagi na, “Maguray lá yù kiddawam mu níkan, kuruk nga iyawá ku níkaw, mássiki nu gadduá na kukuá,” kun na.

²⁴ Á nánaw nira yù magingánay sù ira álliuk, nga minay kê innò na. Á kinagi na kê innò na, “Anni yù kiddawak ku?” kun na. “Á yù ulu ni Kuan nga Minánnigù,” kun ni innò na kuna. ²⁵ Á dagarágá nanoli yù magingánay sù patul, á kinagi na, “Gustù daretu nga iyawá mu níkan kunangane yù ulu ni Kuan nga Minánnigù nga nepay ta palanggána,” kun na.

²⁶ Á nakalò yù daddam nayù patul, ngam arán na gustu nga ari mamalurò sù kinagi na, megapu sù nepagássingán na ána sù ira álliuk nga nakaginná sù kinagi na. ²⁷ Á dagarágá jinok na patul yù suddálu nga magguárdiá, tapè en na apan yù ulu ni Kuan. En na pinutulán si Kuan sù áppukután. ²⁸ Inipe na yù ulu na sù palanggána nga inituluk na sù magingánay, á iniyawá na kuna. Á iniyawá nayù magingánay kê innò na.

²⁹ Á yù ira sinudduán ni Kuan, pakaginná ra karanniaw, ed da iná yù baggi na, á initanam da.

*Mappagaddátu si Apu Kesu tapè Mapakán na yù Magaru nga Tatolay
Mattiu 14:13-21; Lukas 9:10-17; Kuan 6:1-14*

³⁰ Á kabalid da nangilayalayá nayù ira makituddu kê Apu Kesu, naggagamung ira sù gián ni Apu Kesu. Á inistoriá ra yù kingngikingnguá ra ána inituddu ra sù ira tatolay. ³¹ Á kinagi ni Apu Kesu nira, “Et tamin ta ággimammatán, sittam lâ, tapè magibannák kayu bì,” kun na. Ta aru yù ira tatolay nga naddagaráddán nga umay sù giád da, á mássiki nu kumán ira nakuan, arád da natángngák. ³² Á nappittá ira sù barange ra ta mánaw ira nga umay sù ággimammatán.

³³ Á aru yù tatolay nga nakasingan sù páno ra, á natákkilalád da. Á nakkarakarerá ira nga naggapu ta ngámin nga barrabárriu ra, á napolu ira nga nakáddè ta dammáng. ³⁴ Á tappi da ta aggik, gimitták si Apu Kesu sù barangay. Á nasingan na yù magaru nga tatolay, á nakalò yù allá na nira, gapu ta kunnyay ira ta karneru nga awán ta manaron nira. Á namegapu nga mangituddu nira, á aru yù inituddu na nira.

³⁵ Á ta púgágin, minay kê Apu Kesu yù ira tudduán na. Á kinagi ra, “Kalállammatán yawe giát tam, á aijan mággè gabi ngin. ³⁶ Dobam mu bì yù ira tatolay, tapè umay ira gumátang ta kanad da túrin ta babálay,” kud da. ³⁷ “Á sikayu lá yù umay mamakán nira,” kun ni Apu Kesu nira. “Á kunnasi laguk? Awán ta ipangâ mi ta pán. Á nu egga nakuan níkami yù sueldu na tolay ta tangaragun, á makatò mapúgák, tapè makagátang kami ta pán ta ipamakám mi

* 6:15 Netúrâ sù dán nga libru yù meyannung kê Elias, nga ábbilinán ni Namarò nga natay ngaw nga nabayágin, ta matolay si Elias nga manoli ta dabbuno lage na umay si Apu. Innan naw Malakia 4:5.

nira,” kud da. ³⁸ Á kinagi ni Apu Kesu nira, “Á pígiá bullung nga pán egga nikayu? En naw bi innan.” Á kabalid da naningan, ed da kinagi kuna, “Ajjan límá bullung nga pán ána duá nga sirá.”

³⁹ Á kinagi ni Apu Kesu sù ira tatolay ta mattatádday ira nga makkakanáyun, á mesisinná ira nga magitubang sù kakáddapán. ⁴⁰ Á nagitubang ira nga taggimagatù ána taggilímápu. ⁴¹ Á pakálá ni Apu Kesu sù límá bullung nga pán ána duá nga sirá, sinánguk na yù lángi, á nabbalabálá ká Namarò sù kanan. Á giddigiddúá na ána iniyawá na sù ira makituddu kuna, tapè isinek da sù ira tatolay. Á giddigiddúá na gapay yù duá nga sirá nga mesinek sù ira ngámin. ⁴² Á kiminán ira ngámin, á nabattuk ira. ⁴³ Á ed da iná yù buná ra nga pán ána sirá, á mapulu duá yù lappi nga napannu sù buná ra.

⁴⁴ Á límá ribu yù ira tatolay nga lálláki nga kiminán, á ari nebiláng yù ira ábbing ána yù ira bábbay.

Yù Pallakák ni Apu Kesu sù Utun na Danum

Mattiu 14:22-33; Kuan 6:5-21

⁴⁵ Á kabalid da kiminán, dagarágá pinapolu ni Apu Kesu yù ira sinuddúan na ta mappittá ira ta barangay nga umay ta dammáng na bebay, ta ili na Betseda. Á nabattáng lá si Apu Kesu, tapè palabbetan na lábbi yù magaru nga tatolay sù bale ra. ⁴⁶ Á naguroray si Apu Kesu nga giminton ta puddul, tapè makiubobuk ká Namarò.

⁴⁷ Á manganánuán, pajjibbakin, nakáddè yù barangay ta tangngá na bebay. Á naguroray si Apu Kesu ta kannak. ⁴⁸ Á nerípá na yù jigá nayù ira makabarabarangay ta tangngá na danum, nga mallapalápák nga ari makáli gapu ta nasikan yù paddák. Á ta tangngá na gabi, nga lage na magittarákkò na manú, minay si Apu Kesu nga mappángè nira nga mallakák ta utun na danum. Á mattalebák nakuan nira. ⁴⁹ Ngam nasingad da yù nallakák sù utun na danum, á kagiad da ta annáni, á nakaráring ira! ⁵⁰ Ta aggira ngámin nakasingan kuna, á nepallá yù assing da. Ngam dagarágá kinagi ni Apu Kesu nira, “Pataggatan naw yù nonò naw, ta sikán yaw. Ari kayu maganássing,” kun na.

⁵¹ Á nappittá laguk si Apu Kesu sù barange ra. Á nattukká yù paddák. Á nerallà yù kapállá da, ⁵² ta arád ta paga kánnámuán yù kebalinán nayù pagaru na pán nga inipamakán ni Apu Kesu sù ira magaru, ta arád da nonotan.

Yù Pamampiá ni Apu Kesu sù ira Máttaki ta Purubinsia na Gennesaret

Mattiu 14:34-36

⁵³ Á ta pakáddè di Apu Kesu ta dammáng, minay ira jimining sù dappá na Gennesaret. ⁵⁴ Á gatták da ta barangay, dagarágá natákkilalán nayù ira tatolay si Apu Kesu. ⁵⁵ Á gikarakarerán ira ta ngámin nga lepuán, ta ed da apan yù ira máttaki, nga kináttu ra sù dapad da, tapè iyánga ra ira kuna ta maguray nga gián na. ⁵⁶ Á maguray lá yù angayán ni Apu Kesu, nga babálay, ána ili, ána lelepuán, minay gapay ta ngámin nga pakirapunán yù ira tatolay nga mangiyánga sù ira máttaki. Á inikomá ra kuna ta anugutan na yù paniggek da lá ta kiddanán na barawási na. Á ngámin ira nga naniggek, nampapiá iren.

7

Anni yù Napiá nga Tuttulan na Tolay? Yù Kustombare nayù Parisio onu yù Tunung ni Namarò?

Mattiu 15:1-9

¹ Á egga yù ira tatolay nga naggapu ta Jerusalem, nga Parisio ána yù ira káruán nga mangituddu sù tunung nayù ira Kudio, á ed da nagarimummungán si Apu Kesu. ² Á nemámmatád da yù ira káruán nga makituddu ká Apu Kesu, nga kumán nga arád da paga binaggawán yù límá ra ta kunnay sù ituddu nayù tunung. ³ Ta yù ira Parisio ána yù ira ngámin nga Kudio, ari ira gemma kumán, nu ari ira paga nabaggaw ta kunnay sù negagángay nga kustombare nayù ira naggaká nira. ⁴ Á nu maggapu ira ta dápun, ari ira kumán nu ari ira paga nabaggaw. Á aru paga yù tuppálad da nga ituddu nayù rilisiod da, yù ággugá da ta ákkilò, ána garapon, ána kalderu.

⁵ Á yáyù iniyabbú da ká Apu Kesu nayù ira Parisio ána yù ira mangituddu sù tunung, á kinagi ra, “Yù ira sinudduám mu, kumán ira, nga ari nabaggaw. Ngattá, ta arád da tuppálan yù kustombare nayù ira naggaká nittam?” ⁶ Á kinagi ni Apu Kesu nira, “Sikayu nga agippipiá! Kurugán yù Ubobuk ni Namarò nga inipeturá na ká Isaya, nga yù ngaw ábbilinán na. Ta neturá yù kinagi ni Namarò, ‘Danniaw ira nga tatolay, yù lá paddáyo ra nikán yù pagubobuk da,

ngam awán bulubugá ta ángnguruk da níkán ta nonò da.

⁷ Awán ta serbi nayù ákkmóre ra níkán,
ta ituddu ra yù inipapíli da ta nonò da,
nga kagiad da ta tunung nga naggapu níkán,*

kun ni Namarò. ⁸ Á sikayu gemma yù ubobugan na, gapu ta paguráyán naw yù tunung ni Namarò, tapè tuppálan naw lá yù ituddu na tolay,” kun ni Apu Kesu.

⁹ Á kinagi ni Apu Kesu nira, “Kítasírik kayu! Ammu naw yù mamotu sù taddán ni Namarò, tapè tuppálan naw galá yù kustombare nayù ira ngaw naggaká níkayu. ¹⁰ Ta inittuddu na ngaw ni Moyses yù taddán ni Namarò, á kinagi na, ‘Makimoray kayu sù ira darakal naw.’ Á kinagi na má, ‘Yù tolay nga magubobuk ta narákè sù ira darakal na, matay, tapè magikáru ta liwá na.’[†] ¹¹ Ngam sikayu, ngattá, ta kagian naw ta máyá nu kagian na tolay sù ira darakal na, ‘Awán ta awayyá nga mangabbák níkayu, gapu ta Korbánin yù kukuá.’ Á yù kebalinán na Korbánin yù neyawákin ká Namarò. ¹² Á nu kagian nayù tolay ta neyawákin yù kukuá na ká Namarò, á ngattá, ta arán naw laguk anugutan yù ángngabbák na sù ira darakal na. ¹³ Á ta kunnian potuán naw yù ubobuk ni Namarò megapu sù kustombare naw nga ituddu naw sù ira áná naw. Á aru yù akkuán naw nga kunniaw,” kun ni Apu Kesu sù ira Parisio ána sù ira káruán nga mesturu na Kudio.

Anni yù Makararál sù Ákkiyápu na Toley ká Namarò?

Mattiu 15:10-20

¹⁴ Á inagálán ni Apu Kesu yù ira káruán nga tatolay ta umay ira kuna. Á kinagi na nira, “Sikayu ngámin, ginnán naw yù kagiak ku, á kánámamuán naw laguk. ¹⁵ Awán ta itammul na tolay ta simù na nga makararál sù ákkiyápu na ká Namarò, nu ari galá yù ilawán na ta simù na nga ubobuk na nga maggapu ta narákè nga nonò na. ¹⁶ Nu egga yù talingá naw nga makaginná, magginná kayu laguk!” kun na nira.

¹⁷ Kabalin na nagubobuk, nánaw di Apu Kesu sù ira tatolay, á simillung ira sù balay. Á yù ira makituddu kuna, iniyabbù da kuna yù kebalinán nayù gangù nga ángngarigán na. ¹⁸ Á kinagi ni Apu Kesu nira, “Á mássiki sikayu, arán naw panò ammu? Arán naw paga kánámamuán ta ari yù kanan na tolay yù manarál sù ákkiyápu na ká Namarò, ¹⁹ gapu ta ari makatallung yù kanan na tolay ta nonò na, ngam tullung lá ta gutù na, á ikawè na sangaw,” kun na nira. Á ta kunniane, inittuddu na ta awán ta kanan nga kanniawan.

²⁰ Á kinagi na má, “Yù naggapu ta nonò na tolay, yáyù maddaping ta tolay, nga makararál sù ákkiyápu na ká Namarò. ²¹ Ta naggapu ta nonò na tolay yù narákè nga nononotan na, nga kunay sù mamabay ána makilaláki, yù makkokò, yù mamapátay, yù makkarallaw, ²² yù makkuk, yù kitarákè, yù mangilogò, yù mangiyappa-appà, yù mamassil, yù mallilibá, yù mappeddaráyaw, ána yù mallokuloku. ²³ Ngámin danniaw nga narákè yù maggapu ta nonò na tolay, á danniaw ira maddarál sù ákkiyápu ra ká Namarò,” kun ni Apu Kesu nira.

Yù Pabbàlà ni Apu Kesu sù Ángnguruk nayù Babay nga ari Kudio

Mattiu 15:21-28

²⁴ Gapu ta kabalin na nangituddu nira, nánaw si Apu Kesu nga minay sù lugár na Tiro ána Sidon. Á simillung sù balay, ta gustu na nga ari mappasingan sù ira magariu nga tatolay, ngam ari makalilli nira. ²⁵ Á aijan tán yù babay nga egga yù aná na nga babay nga nagunagán na anitu. Pakarámak na babay ta keggá ni Apu Kesu, dagarágá nga minay namalittúkak ta arubáng na. ²⁶ Á ari Kudio yù babay, ta Sirupinisia yù ikáttole na. Á inikomá na ká Apu Kesu ta palawanan na yù anitu sù aná na. ²⁷ Á iniyángngarigán ni Apu Kesu yù itabbák na, á kinagi na kuna, “Iddagám mu lábbi yù kabattuk nayù ira ábbing sù kanad da, ta ari mepángngá nga mepakán yù kanad da sù ira itu,” kun na. ²⁸ Á kánámamuán nayù babay yù kebalinán nayù kinagi ni Apu Kesu kuna, nga ari mepángngá nu abbágán na yù ira ari Kudio lage na mangabbák sù ira Kudio. Á kinagi nayù babay ká Apu Kesu, “Wan, Apu. Ngam dánnaman nayù ira itu yù buttá nayù ira ábbing,” kun na. ²⁹ “Á kurugán yù nakagim! Napiá yù initabbák mu níkán,” kun ni Apu Kesu kuna. “Manoli ka ta balem, ta nánawin yù anitu sù aná mu,” kun na. ³⁰ Á limibbè yù babay ta bale na, á naratang na yù aná na nga nagiddá ta katri na, á awánin ta anitu.

Yù Pamammapiá ni Apu Kesu sù Kitul nga Umal

³¹ Á nánaw laguk si Apu Kesu ta ili na Tiro. Á sinalebarán na yù ili na Sidon ána yù gián na Mapulu Ili, ta umay ta bebay na Galilia. ³² Á yù ira tatolay nga naggián tán, inituluk da ká

* 7:7 Isaya 29:13 † 7:10 Exodo 20:12; 21:17

Apu Kesu yù tolay nga kitul nga umal, á inikomá ra kuna ta támmitan na bì. ³³ Á inililli ni Apu Kesu yù umal sù ira káruán nga tatolay. Á initulá ni Apu Kesu yù amassisiddu na sù talingá na. Á niluluán na, á inisiggek na sù jilá na. ³⁴ Á sinánguk na yù lángi, á nanalasisigá, á kinagi na, “Epata,” á yè kebalinán na, “Mabukatán ken laguk.” ³⁵ Á dagarágâ nga nabukatánin yù ágginná nayù umal, á nakaginná. Á nabbalikâ yù jilá na, á nagubobuk, ána napiá yù ággubobuk na.

³⁶ Á sinabarangán ni Apu Kesu yù ira tatolay, ta arád da bulubugá iparámak yù kingnguá na. Á mássiki nu initolitoli na nga kinagi nira, mappaná ira laguk nga mangiparámak sù ira ngámin nga tatolay. ³⁷ Á pakarámak nayù ira tatolay, napállá ira, á nepallá yù kapállá da. Á kinagi ra, “Napiá yù ngámin nga kingnguá na,” kud da. “Mássiki yù kitul, pakaginnán na, á mássiki yù umal, pakobobugan na,” kud da.

8

Yù Pamakán ni Apu Kesu sù ira Appátaribu nga Tatolay

Mattiu 15:32-39

¹ Á keggá ni Apu Kesu tán nga lugár, uli otturu nga minay yù magari nga tatolay nga naggagammung ta gián na. Á napúnu yù kanad da. Á inagálán ni Apu Kesu yù ira tudduán na, á kinagi na nira, ² “Nakalò yù allá ku sù ira magari nga tatolay, gapu ta naggián ira níkan ta tallu nga ággaw, á awán ta kanad da,” kun na. ³ “Á nu palabbetak ku ira sù babále ra, malupulupuk ira ta dálan megapu ta bisid da, ta kuruk nga arayyu yù naggapuán nayù ira káruán.” ⁴ Á simibbák yù ira tudduán na, á kinagi ra, “Á kunnasi ámmakám mi nira sawe kalállammatán?” ⁵ Á iniyabbû na nira, “Á pígiá nga bullung nga pán yù egga nikayu?” Á kinagi ra, “Pitu bullung.”

⁶ Á kinagi ni Apu Kesu sù ira magari nga tatolay ta magitubang ira sù kakáddapán. Á iná na laguk yù pitu bullung nga pán. Kabalin na nabbalabálâ kâ Namarò, giddigiddú na yù pán, á iniyawâ na sù ira tudduán na, tapè isinek da sù ira tatolay. Á ed da iniyawâ nira. ⁷ Á egga gapay nira yù baddi nga sirá. Kabalin ni Apu Kesu nabbalabálâ kâ Namarò sù sirá, giddigiddú na gapay, á iniyawâ na nira, tapè isinek da gapay sù ira tatolay. ⁸ Á kiminán ira ngámin, á nabattuk ira. Á inunnuk da yù buná ra nga nakkákán, á napannu yù pitu nga lappi. ⁹ Á mággè appátaribu nga tatolay yù kiminán.

Kiddawan nayù ira Parisio kâ Apu Kesu yù Panákkilád da

Mattiu 16:1-4

¹⁰ Á kabalid da kiminán nayù ira magari nga tatolay, pinapáno ni Apu Kesu ira. Á dagarágâ nappittá di Apu Kesu ta barangay ána yù ira tudduán na, á minay ira sù lugár nga Dalmanuta. ¹¹ Á minay nira yù ira Parisio, á pinereperang da ta ubobuk si Apu Kesu, ta parubád da. Á kiniddo ra kuna ta ipasingan na nira yù pagaddatuan na, tapè kurugad da ta naggapu kâ Namarò yù pakáwayyá na. ¹² Á nanalasisigá si Apu Kesu. Á kinagi na, “Anni má ta magiddak danniaw ira nga tatolay ta pagaddatuak ku nga panákkilád da? Kukurugán yù kagiak ku nikayu, nga awán bulubugá ta pagaddatuak ku nga panákkilán naw,” kun na. ¹³ Kabalin na nakkagi sù ira Parisio, nánawán na ira. Á nappittá sù barangay, á nanoli ta dammáng na bebay.

Ituddu ni Apu Kesu sù ira Tudduán na ta Mappalán ira sù Ituddu nayù ira Parisio ána yù Ituddu ni Erodo

Mattiu 16:5-12

¹⁴ Pakabarabarange ri Apu Kesu, náttamán nayù ira tudduán na yù bálud da, á aijan lá nira yù táttádday nga bullung nga pán sù barangay. ¹⁵ Á sinabarangán ni Apu Kesu ira, á iniyángngarigán na yù meyanung sù áppalappák ta pán, ta mássiki nu baddi lá yù áppalappák nga nekiruk ta pán, á palappáran na yù ngámin nga pán. Á ta kunnay gapay sù kustombare nga narákè, nga massamá sù ira tatolay. Á kinagi na nira, “Ginnán naw. Mappalán kayu sù kun na áppalappák ta pán nga aijan kári Patul Erodo ána yù ira Parisio,” kun na nira. ¹⁶ Ngam arád da matákál yù kakágian na, gapu ta nononotad da lá yù náttamád da nga bálud da. Á nakkaká-ubobuk ira nga makkaká-anasá, á kinagi ra, “Kunniaw yù kagian na gapu ta awán ittam ta pán,” kud da.

¹⁷ Á ammu ni Apu Kesu ta arád da kánnámmuán yù kebalinán nayù kinagi na, ngam nononotad da lá yù pán. Á kinagi na nira, “Anni má ta ubobugan naw nga awán kayu ta pán? Ngattá ta arán naw paga matákál yù ituddú nikayu? Arán naw panò

manonokin? ¹⁸ Ajjan yù mepasingan nikayu. Ngattá ta arán naw masingan? Á ajjan yù mepakámmu nikayu. Ngattá ta arán naw maginná? Máttamán naw panò yù kingnguá? ¹⁹ Á paggaddagadduá ta límá bullung nga pán nga nepakán sù ira límá ribu nga tatolay, pígiá nga lappi yù napannu ta buná ra nga nonnuk naw?” kun na nira. Á kinagi ra kuna, “Mapulu duá yù lappi nga napannu,” kud da. ²⁰ “Á sù paggaddagadduá ta pitu bullung nga pán sù ira appataribu nga tatolay, pígiá yù napannu nga lappi nga nangipayyan naw ta buná ra?” kun ni Apu Kesu nira. “Pitu,” kud da. ²¹ “Á arán naw panò paga kámmuán?” kun ni Apu Kesu nira.

Yù Pamakasingan ni Apu Kesu sù Buling

²² Á pappatale ri Apu Kesu, nakáddè ira ta ili na Betseda, á iniyánge nayù ira tatolay yù buling ká Apu Kesu, á inikomá ra kuna ta támmitan na. ²³ Á kinering ni Apu Kesu yù buling, á inipáno na sù babálay. Á niluluán na yù matá nayù buling, á sinámmi na. Á iniyabbù na kuna, “Ajjan yù masingam mu?” kun na. ²⁴ Á maningan yù buling, á kinagi na, “Masingak ku yù ira tatolay, ngam kun na káyu ira nga mallakák,” kun na. ²⁵ Á sinámmi na má ni Apu Kesu yù matá na. Á inni-innan nayù buling ta napiá, á nammapiá yù matá na, á nalitáwin yù ánnigan na. ²⁶ Á pamalabbè ni Apu Kesu kuna ta bale na, kinagi na, “Ari ka manoli sù babálay,” kun na.

Mepalappá ká Eduru nu Asinni si Apu Kesu

Mattiu 16:13-20; Lukas 9:18-21

²⁷ Á nánaw di Apu Kesu áнна yù ira tudduán na, ta umay ira sù ira babálay ta lugár na Sesaria Pilippi. Á sù pakalalakakák da ta dálan, iniyabbù ni Apu Kesu nira, “Asinningá kanu nga kun na tatolay?” ²⁸ Á kinagi ra, “Sikaw kanu si Kuan nga Minánnigù,” kud da. “Á yù ira káruán, kagiad da ta sikaw si Elias nga ábbilinán ni Namarò, onu yù táddy sù ira ngaw ábbilinán ni Namarò,” kud da ká Apu Kesu. ²⁹ Á iniyabbù ni Apu Kesu nira, “Á sikayu, anni yù kagian naw? Asinningá gapay?” Á simibbák si Eduru, á kinagi na, “Sikaw yù MakKiristu nga sinullá ni Namarò nga umay mammaguray.” ³⁰ Á sinaddánán ni Apu Kesu ira, ta arád da lábbi kagian yù meyanung kuna.

Ipakámmu ni Apu Kesu yù Pate na Sangaw

Mattiu 16:21-28; Lukas 9:22-27

³¹ Á inigapu ni Apu Kesu nga inipakámmu nira yù mesimmu kuna sangaw. Kinagi na nira, “Á jigirigátad dangá sangaw, sikán nga Kaká na ngámin na tatolay. Á máwák ku nga magattam, ta ipuerá rangá nayù ira karakalán áнна yù ira kátannangan nga pári áнна yù ira mesturu ta rilision. Á ipapapáte rangá sangaw. Á pappasá na tallu nga ággaw, maginnanolayá.” ³² Á yane nga meyanung ta pate ni Apu Kesu, kinagi na nga daretiu nira. Á si Eduru, inililli na laguk si Apu Kesu ta baddi sù ira kábulud da, á gímmá na. “Ari ka magubobuk ta kunnian,” kun ni Eduru kuna. ³³ Ngam nallipay si Apu Kesu, nga maningan sù ira tudduán na. Á ginammá na laguk si Eduru. Kinagi na kuna, “Mánaw ka saw níkan, ta naggapu ká Satanas yù kinagim! Ta kunnay ta negagángay ta tolay yù nonotam mu, nga ari naggapu ká Namarò.”

Tabarangán ni Apu Kesu yù ira Tumuttul kuna

Mattiu 10:38-39; 16:24-28; Lukas 9:23-27; 17:33; Kuan 12:25

³⁴ Á inagálán ni Apu Kesu yù magari yù maguru áнна yù ira tudduán na, ta umay ira kuna. Á kinagi na nira, “Yù tolay nga ikáyá na tumuttul níkan, arán na laguk tuttulan yù ikáyá na baggi na, ngam tuttulan na lá yù ikáyá ku. Á attamán na gapay yù jigá nga umay kuna, mássiki nu matay megapu sù ángnguruk na níkan. Á ta kunnian, kunnay ta káttuan na yù kurù na, á tuttulan nangá. ³⁵ Ta yù tolay nga nonotan na lá yù ákkatole na ta dabbuno, matay galá sangaw nga mesinná ká Namarò ta áddè ta áddè. Ngam yù tolay nga tumulú níkan, tapè tuppálan na yù ipakuá kuna, á mássiki nu matay megapu sù ángnguruk na níkan áнна megapu sù pangipakámmu na sù napiá nga dámak nga meyanung níkan, aggina yù mepattolay ká Namarò ta áddè ta áddè.

³⁶ “Á ta ángngarigan nu malá na tolay yù ngámin nga kárikúan nga ajjan ta dabbuno ta kukuá na, á egga panò yù serbi na, nu lonán na yù mannanáyun nga áttole na nga iyawá ni Namarò nakuan kuna? ³⁷ Awán bulubugá ta metáli na tolay sù mannanáyun nga áttole na áнна yù kesipá na ká Namarò. ³⁸ Á yù tolay nga mangipasirán níkan ta arubáng nayù ira tatolay nga manakí níkan áнна narákè yù nonò na, á ipasirák ku gapay sangaw nu manolingá saw. Ta sikán nga Kaká na ngámin na tatolay, manolingá sangaw, nga

mangipalappâ sù áddalingárang áнна yù pakáwayyá ni Namarò nga Yámà. Á mepulù nikán yù ira mangilin nga daroban ni Namarò.”

9

*Nanguli yù Baggi ni Apu Kesu megapu sù Dalingárang ni Namarò
Mattiu 17:1-13; Lukas 9:28-36*

¹ Á kinagi na laguk ni Apu Kesu nira, “Kurugán yù kagiak ku nikayu. Ajjan saw nikayu yù ira tatolay nga ari matay lage ra masingan yù dattál nayù pammagure ni Namarò nga makáwayyá.”

² Á papasá na annam nga ággaw, inapà ni Apu Kesu di Eduru áнна yù ira duá nga mawwagi, di Ime kê Kuan. Á aggira lâ yù nepulù kuna, á giminon ira ta atannáng nga puddul. Labbè da ta utun, naddalingárang yù baggi ni Apu Kesu sù ánningad da. ³ Á nerallà yù kapuro nayù gámi na nga nassiling. Á awán bulubugá ta negittá sù kapuro na ta dabbuno. ⁴ Á limittuák di Elias kê Moyses, nga yù ira ngaw ábbilinán ni Namarò. Á makiubu-ubobuk ira kê Apu Kesu. Á di Eduru, nasingad da ira. ⁵ Á kinagi ni Eduru kê Apu Kesu, “Apu, napiá ta ajjan ittam saw. Ipappadde mi kayu nakuan ta ággitádde naw nga amingán. Sikayu kári Moyses kê Elias.” ⁶ Á yáyù lâ nakagi ni Eduru, gapu ta arán na ammu yù kagian na nakuan, ta naganássing ira áнна yù ira duá nga kábulun na, di Ime kê Kuan. Á nerallà yù assing da. ⁷ Á minay yù kunam nga nilirúmán na ira. Á naggapu sù kunam yù ngáral nga nakkagi, á kinagi na, “Yaw yù Aná ku nga iddukak ku. Ginnán naw yù kagian na.” ⁸ Á nallipilipay ira. Á nakkaddák ira, ta táttádday lâ yù nasingad da, nga si Apu Kesu.

⁹ Á minutù ira sù puddul. Utù da, sinaddánán na ira ni Apu Kesu ta arád da kagian sù ira tatolay yù nasingad da ta utun ádde ta kabalín na nga maginnanolay nayù Kaká na ngámin na tatolay. ¹⁰ Á kinuruk da. Pinatattam da ta nonò da yù nasingad da. Ngam aggira lâ, nakkaká-ubu-ubobuk ira nu anni yù kebalínán nayù kinagi na nga paginnanole na.

¹¹ Á iniyabbù da laguk kuna, “Anni má ta kagian nayù ira mesturu na Kudio ta mapolu nga umay yù ngaw ábbilinán, nga si Elias, ánnè sù MakKiristu?” kud da. ¹² “Wan,” kun ni Apu Kesu nira. “Mapolu si Elias nga umay, ta paránan na ngámin, tapè dán nga naparán sù dattál nayù MakKiristu. Á anni laguk yù kebalínán nayù dán nga netúrâ nga meyanung nikán nga Kaká na ngámin na tatolay? Ta ajjan nga netúrâ ta máwák nga attamák ku yù panigirigá da nikán áнна yù pangiluddè da nikán. ¹³ Ngam kagiak ku nikayu, ta minay ngin si Elias, á kingnguá nayù ira tatolay yù ngámin nga gustu ra nga narákè, ta kun nayù netúrâ nga meyanung kuna.” Á uboguan ni Apu Kesu si Kuan nga Minánnigù.

*Palawanan ni Apu Kesu yù Anitu sù Abbing
Mattiu 17:14-21; Lukas 9:37-43a*

¹⁴ Á pakáranni ra sù ira káruán nga tudduán ni Apu Kesu, nasingad da yù magaru nga tatolay nga nagarimummung. Á ajjan gapay yù ira mesturu na Kudio nga mameperang nira ta ubobuk. ¹⁵ Pakasingan nayù magaru nga tatolay kê Apu Kesu, nakaddák ira nga ayatán. Á nakkarakareré ira nga jiminápun kuna. ¹⁶ Á iniyabbù ni Apu Kesu nira, “Anni yù pakkakáperangán naw nga ubobuk?” kun na. ¹⁷ “Mesturu,” kun nayù tádday, “ituluk ku nikaw yù aná ku nga laláki gapu ta nagunagán na anitu nga umal. ¹⁸ Á sù pattaliponak nayù anitu kuna, pannátan na yù abbing, á mabbugubugá yù simù na áнна mangngarangngaringngi áнна mangngattuk. Á inikomá sù ira tudduám mu ta palawanad da bi yù anitu, ngam arád da makuá,” kun nayù tolay kê Apu Kesu. ¹⁹ Á simibbák si Apu Kesu, á kinagi na nira, “Innan nawè yawe ira tatolay nga awán bulubugá ta ángngikatalá da! Kunnasi paga yù kabayák nayù paggiák ku áнна keyattam ku nikayu? Iyánge naw saw yù abbing.”

²⁰ Á iniyánge ra kuna yù abbing. Á pakasingan nayù anitu kê Apu Kesu, dagarágâ nga pinabballiák na yù abbing, á napanná ta dabbun nga nakkarakarebu, á nabbugubugá yù simù na. ²¹ Á iniyabbù ni Apu Kesu sù yáma nayù abbing nu káni yù pamegapu nayù takí na. Á sibbák nayù tolay, á kinagi na, “Namegapu sù kabajji na. ²² Á name-arú ngaw inítupâ nayù anitu ta api áнна danum, tapè papatáyan na. Ngam nu egga yù awayyám nga mangabbák, ikállà kami bì, á abbágám kami.” ²³ Á kinagi ni Apu Kesu kuna, “Nu egga yù awayyám nga mangikatalá! Si Namarò yù makáwayyá nga mamalurò ta ngámin, á awán bulubugá ta arán na makuá megapu sù ira nga mangikatalá kuna.” ²⁴ Á inigarù na nga kinagi nayù yáma nayù abbing, “Apu, ikatalá taka! Abbágám mà, tapè aringá mabbábáng!”

²⁵ Á pakasingan ni Apu Kesu ta makkarakarera yu magaru nga tatolay nga magari-mumung nira, gimmá na yu anitu, á kinagi na kuna, “Sikaw nga umal ána kitul nga anitu, dobat taka ta má naw ka sù abbing, á ari ka bulubugá manoli kuna.” ²⁶ Á nakkalli, á pinabballiak na, nga nepallá yu pamabballiak na sù abbing, á nallawán kuna. Á nagiddá yu abbing ta kun na natay. Á aru yu ira nakkagi, nga kud da, “Ye! Natayin.” ²⁷ Ngam sinangngalan ni Apu Kesu yu limá na, á pinagikkang na, á nanáddak.

²⁸ Á simillung di Apu Kesu lá ána yu ira tudduán na ta balay. Á iniyabbú da kuna, “Anni má ta arám mi gangù napapánaw yu anitu sù abbing?” ²⁹ Á kinagi ni Apu Kesu nira, “Awán ta makapapánaw ta kunnian nga anitu, nu ari galá megapu sù pakimállá na kâ Namarò.”

Kagian na má ni Apu Kesu yu Meyannung ta Pate na

Mattiu 17:22-23; Lukas 9:43b-45

³⁰ Á nánaw di Apu Kesu táne lugár. Á nattalebák ira sù purubinsia na Galilia. Á arán na ikáyá ni Apu Kesu ta ammu nayú ira tatolay yu angayád da. ³¹ Ta ikáyá na matángngák yu pangituddu na sù ira tudduán na. Á kinagi na nira, “Sikán nga Kaká na ngámin na tatolay, mekekangá sangaw sù ira malussaw nikán, á papatáyad dangá. Á nu mapasá yu tallu nga ággaw, maginnanolayá,” kun na. ³² Ngam yu ira tudduán na, arád da kánámmuán yu kinagi na, á awán ta makeyattam nga makeyabbú kuna.

Anni yu Akkuán nayú Kátannangán?

Mattiu 18:1-5; Lukas 9:46-48

³³ Á nakáddé di Apu Kesu ta Kapernium, á simillung ira ta balay. Á keggá ra ta lágum na balay, iniyabbú ni Apu Kesu nira, “Anni yu pakkakáperangán naw ta ubobuk gangù sù pallakák tam ta dálan?” ³⁴ Ngam ari ira nakkituk, gapu ta mappasirán ira, ta nakkakáperang ira nu asinni nira yu kátannangán. ³⁵ Á nagitubang si Apu Kesu, á inagálán na yu ira mapulu duá ta umay ira kuna. Á kinagi na nira, “Yu tolay nga máyá mabbáli ta kátannangán na tatolay, máwák nga mabbáli ta kagukábán ána makiaripan sù ira ngámin nga tatolay.”

³⁶ Á iná na laguk ni Apu Kesu yu baddi nga abbing, á pine na sù tangngá ra. Á sinábbi na, á kinagi na sù ira tudduán na, ³⁷ “Nu iddukan na tolay yu kunnian nga abbing megapu nikán, á nebiláng ta sikán gapay yu iddukan na. Á nu iddukan nangá, ari lá sikán yu iddukan na, nu ari gapay yu naddok nikán.”

Yu Toley nga Ari Makikontará kâ Apu Kesu, Aggina yu Mangabbák kuna

Lukas 9:49-50

³⁸ Á kinagi ni Kuan, “Mesturu, nasingam mi yu tádday nga tolay nga mangabbún sù ngágam nu ta pamapáno na ta anitu sù ira nangunagán nga minay kuna. Á pinatukká mi, gapu ta arát tam kabbulun.” ³⁹ Á kinagi ni Apu Kesu nira, “Arán naw gammán! Nu ajjan yu tolay nga mamagaddátu megapu sù pakáwayá nayú ngágak ku, arán nangá sangaw táttájjian. ⁴⁰ Ta yu tolay nga ari makikontará nittam, aggina yu kopun nga mangabbák nittam. ⁴¹ Á kurugán yu kagiak ku nikayu. Mássiki nu baddi lá yu ángngabbák na tolay nikayu gapu ta sikán nga MakKiristu yu Yápu naw, mássiki nu mamenum nikayu lá, á alawatan na gemma noka alawatan yu balabála na.”

Mappalán yu ira nga Maddok ta Malliwá

Mattiu 18:6-9; Lukas 17:1-2

⁴² Á kinagi ni Apu Kesu nira, “Yu tolay nga mangituddu ta naráké sù ira baddi nga abbing nga mangikatalá nikán, napiá nu magakkátán yu bullo na ta dakal nga batu, á metabbá ta kálaramán na bebay, tapé ari mangituddu ta naráké sù ira nga manguruk nikán. ⁴³ Á nu yu limá naw yu kegapuánán nayú liwá naw, más napiá nu gappulan naw. Ta napiá nu mepattoy kayu ta áddé ta áddé sù gián ni Namarò ta lángi, mássiki nu tádday lá yu limá naw, ánné ta keggá na duá nga limá naw, ána metabbá kayu ta ornu, nga api nga ari bulubugá máddá. ⁴⁴ Á yu labbetán nayú ira minálliaw yu ornu, á pagikaruan ni Namarò ira tán. Awán ta pagibannagád da, á awán ta áddé nayú jigá da.*

⁴⁵ “Á nu yu takki naw yu mangituluk nikayu ta liwá, más napiá galá nu gappulan naw. Ta mássiki nu gappul yu takki naw, napiá nu mepattoy kayu ta áddé ta áddé sù gián ni Namarò ta lángi, ánné ta keggá na duá nga takki naw nga mangituluk nikayu ta liwá, á metabbá kayu sù ornu nga awán ta káddá na. ⁴⁶ Á yu labbetán nayú ira minálliaw yu ornu, á pagikaruan ni Namarò ira tán. Awán ta pagibannagád da kuna, á awán ta áddé nayú jigá da.†

* **9:44** Nagittá yu neturá ta numeru 44, 46, ána 48. Á ari neturá sù ira káruán nga dán nga neturatán. Á neturá lá yu keyarigán na: “Ari bulubugá matay yu tuggi da tán, ána ari bulubugá máddá yu api.” † **9:46** Isaya 66:24

⁴⁷ “Á nu malliwâ kayu megapu sù masingan nayù matá naw, baddulan naw yù matá naw. Ta más mapiá galâ mássiki nu buling kayu sù tádday nga matá naw, á mesipâ kayu sù pammagurayán ni Namarò, ánnè ta keggá na duá nga matá naw nga mangituddu nikayu ta liwâ, á metabbâ kayu sù ornu nga awán ta káddà na. ⁴⁸ Á yù labbetán nayù ira minálliwâ yù ornu, á pagikaruan ni Namarò ira tán. Awán ta pagibannagád da kuna, á awán ta áddè nayù jigâ da.” †

⁴⁹ Á kinagi na má ni Apu Kesu, “Yù ira ngámin nga tatolay, mávák nga kunnay ira ta másínán, megapu sù kun na api nga iyattam da. Á yaw kebalinán na, ta mávák nga mapasigaggá yù ángngikatalá da níkán, mássiki nu anni yù mesimmu nira, tapè mepángngá ira nga mesipâ níkán gapay ta pammagure ni Namarò. ⁵⁰ Masingngá gemma yù asin. Ngam másín panò nu nári yù paggák na? Magimuguk kayu laguk, ta arán naw lonán yù pakkaká-iddù naw áнна pakkaká-abbák naw, tapè napiá lá yù ággián naw.”

10

Yù Inituddu ni Apu Kesu nga Meyannung sù Paggúnge na Magatáwa
Mattiu 19:1-12; Lukas 16:18

¹ Nánaw laguk si Apu Kesu ta Galilia, á minay ta lugár na Judiya ta dammáng na Jordan. Á yù magari nga tatolay, nagarimummungád da má, á sinudduán na ira ta kunnay ta gagángay nga ángngúá na. ² Á minay gapay yù ira Parisio, á jimikki ira nga maki-ubobuk kuna, tapè parubád da nu anni yù kagian na. Iniyabbù da kuna, “Anni yù ituddu nayù tunung tam? Egga panò yù awayyá na tolay nga maggúngay ta atáwa na?” ³ Á simibbák si Apu Kesu, á kinagi na nira, “Anni yù ituddu ni Moyses, nga ábbilinán ni Namarò, nga meyanung ta paggúnge nayù ira magatáwa?” ⁴ Á kinagi ra, “Á inanugù ni Moyses ta igúnge na tolay yù atáwa na nu itúrâ na yù paninganán ta pangigúnge na sù atáwa na,” kud da kuna. ⁵ Á kinagi ni Apu Kesu nira, “Yáyù inituddu ni Moyses gapu ta nataggá yù nonò naw. ⁶ Ngam aijan yù netúrâ nga meyanung sù pamarò ni Namarò ta tolay, nga kunniaw: ‘Pidde ni Namarò yù tolay nga laláki áнна babay.’” ⁷ “Yáyù nga panawán na laláki yù darakal na ta umay metádday sù atáwa na. ⁸ Á yù ira magatáwa, mabbáli ta kun na táttádday nga baggi yù ággiád da.” † Yáyù bibbirat tam sù dán nga netúrâ. Á kuruk nga aringin laguk duá yù ira magatáwa, ngam táttádday lá yù baggi ren. ⁹ Yáyù nga arán na tolay passinnán yù ira magatáwa nga pinattádday ni Namarò.”

¹⁰ Á limibbè di Apu Kesu áнна yù ira tudduán na ta balay. Á iniyabbù da kê Apu Kesu yù meyanung sù ituddu na. ¹¹ Kinagi ni Apu Kesu nira, “Yù laláki nga igúnge na yù atáwa na, á mangatáwa sangaw ta tanakuán, makaliwâ, ta mebiláng ta mangarallaw áнна malliwâ sù olu nga atáwa na. ¹² Á yù babay nga igúnge na yù atáwa na, á makiatáwa sangaw ta tanakuán, makaliwâ gapay, áнна mebiláng ta makikarallaw.”

Ayatan ni Apu Kesu yù ira Ábbing
Mattiu 19:13-15; Lukas 18:15-17

¹³ Á manganánnuán, minay yù ira tatolay, ta inituluk da kê Apu Kesu yù ira ánâ da, tapè támmitan na ira, áнна bindisionán na ira. Ngam yù ira tudduán ni Apu Kesu, gimamá ra yù ira tatolay. ¹⁴ Á pakasingan ni Apu Kesu sù kingngúá nayù ira tudduán na, naporay nira. Á kinagi na nira, “Arán naw ira gammán. Iyanugù naw yù ánge nayù ira ábbing níkán, ta aggira mesipâ sù pammagure ni Namarò, áнна ngámin ira nga tatolay nga kunnay karanniaw nga ábbing nga mangikatalá níkán. ¹⁵ Kurugán yù kagiak ku nikayu, nga ari mesipâ yù tolay sù pammagure ni Namarò nu ari mangikatalá kê Namarò ta kunnay sù pangikatalá nayù ira ábbing.” ¹⁶ Á sinábbi na yù ira ábbing nga taggitádday. Á sinámmi na ira ta ulu ra, á kiniddo na kê Namarò yù kapiánád da. Kinagi na sù ira katággitádday, “Alluárán na ka ni Namarò.”

Yù Tolay nga Maríku
Mattiu 19:16-30; Lukas 18:18-30

¹⁷ Á ta páno di Apu Kesu ta umay ira ta tanakuán nga lugár, nakkarerá nga minay kuna yù tádday nga laláki nga namalittúkak ta arubáng na, á kinagi na, “Mesturu, napiá nga tolay ka. Anni yù kagian mu nga mávák nga akkuák ku, tapè mepattolayá nga mesipâ kê Namarò ta áddè ta áddè?” ¹⁸ Á kinagi ni Apu Kesu kuna, “Ngatá, ta kagian mu ta síkán yù napiá? Awán ta kuruk nga napiá nu ari galâ ni Namarò. ¹⁹ Ammum yù taddán ni Namarò nga netúrâ. ‘Ari ka mamapátay ta tolay. Ari ka mangarallaw. Ari ka makkokò. Ari ka massiri nu massistígu ka. Ari ka maddarogá. Makimoray ka sù ira darakal mu.’” †

²⁰ Á kinagi nayù tolay kâ Apu Kesu, “Mesturu, ngilinak ku ngámin danniaw áddè sù kabajji ku.” ²¹ Á inimámmatán ni Apu Kesu yù tolay, á nakalò yù iddù na kuna. Á kinagi na kuna, “Ajjan paga tádday nga pakkúrangám mu. Em mu bi iláku yù ngámin nga kukuám, á isinek mu yù pallakuám mu sù ira pobare, tapè maríku ka galâ ta lángi kâ Namarò. Á manól ka saw laguk nga tumuttul níkan.” ²² Pakaginná nayù tolay sù kinagi na, nakalò yù daddam na, á siggaraddam nga nánaw, gapu ta egga kuna aru nga kukuá na.

²³ Páno nayù maríku, nilipilipe ni Apu Kesu yù ira tudduán na, á kinagi na nira, “Marigâ nga tumulù yù ira maríku sù pammagure ni Namarò, tapè mesipà ira kuna.” ²⁴ Á napállá yù ira tudduán na sù kinagi na. Á pidduá na nakkagi nira, “Wáwwagi, kuruk nga marigâ nga tumulù yù tolay, tapè mesipà sù pammagure ni Namarò. ²⁵ Más malogon yù állabbù na kamel ta abbù na dágum, ánnè ta tumulù yù maríku nga tolay kâ Namarò, tapè mesipà sù pammagure na.” Á dakal nga ayám ánnè ta kabáyu onu nuáng yù kamel, nga sináppukul yù bará na. ²⁶ Á nerallá yù kapállá da, á kinagi ra kuna, “Asinni laguk yù meyiǵú ána mesipà kâ Namarò ta lángi?” ²⁷ Á inni-innan ni Apu Kesu ira, á kinagi na, “Á awán ta tolay nga makáwayyá. Ngam si Namarò yù mamalurò galá, ta aggina yù makáwayyá ta ngámin.”

²⁸ Á kinagi na laguk ni Eduru kuna, “Á sikami, pinanawám mi ngámin, á tumuttuttul kamingin níkaw.” ²⁹ Á kinagi ni Apu Kesu, “Kurugán yù kagiak ku níkayu. Yù tolay nga panawán na yù bale na onu wáwwagi na, darakal na, áná na, ána dabbun na, nu nánawan na ira megapu sù panguruk na níkan, tapè umay mangipakámmamu sù napiá nga dámak nga meyannung níkan, ³⁰ á kuruk nga bálatan ni Namarò. Ta iddán ni Namarò ta aru nga paggianán na, wáwwagi na, yená na, áná na, ána dabbun na ta keggá na sawe dabbuno. Ngam parubán nayù tolay gapay yù panigirigá da kuna megapu sù panuttul na níkan. Á sangaw nu duttál yù ággaw, meddán gapay ta ináng na nga awán ta áddè na. ³¹ Ngam aru yù ira nga makáwayyá kunangan nga baddi yù pakáwayyá ra sangaw nu duttál yù ággaw. Á yù ira nga awán ta pakáwayyá ra kunangan, makáwayyá ira tán nga ággaw.”

*Pilluán ni Apu Kesu nga Makkagi ta Pate na
Mattiu 20:17-19; Lukas 18:31-34*

³² Á nappatalay di Apu Kesu ána yù ira tudduán na nga mappángè ta Jerusalem. Á pallaká da, mapolu si Apu Kesu ta dалан ánnè nira. Á napállá yù ira tudduán na, á naganássing yù ira tatolay nga tumuttul kuna, gapu ta umay si Apu Kesu ta ili na Jerusalem, nga paggianán nayù ira malussaw kuna. Á inililli na má ngin ni Apu Kesu yù ira tudduán na, tapè kagian na nira yù mesimmu kuna sangaw. ³³ Á kinagi na, “Ginnán naw. Gumon ittam ta ili na Jerusalem. Á labbè ku tán, sikán nga Kaká ngámin na tatolay, gaputad dangá, á ipatangngal dangá sù ira kátannangán nga pári ána yù ira mesturu. Á kagiad da yù pamagikáru ra níkan ta patè. Á ipatangngal dangá sù ira ari Kudio nga mammaguray. ³⁴ Á yù ira ari Kudio, uyoyungád dangá. Pallulutábád dangá, á paligatad dangá, á papatáyad dangá. Ngam sangaw nu mapasá tallu nga ággaw sù patè, á maginnanolaya.”

*Yù Ikomá nayù ira Duá, di Ime kâ Kuan
Mattiu 20:20-28*

³⁵ Á jimikkí laguk kâ Apu Kesu di Ime kâ Kuan, nga duá nga áná ni Sebedo. Á kinagi ra kuna, “Mesturu, ajjan yù ikomá mi nga akkuám mu megapu níkami.” ³⁶ Á kinagi na nira, “Anni yù ikomá naw nga akkuák ku megapu níkayu?” ³⁷ Á kinagi ra kuna, “Nu mammaguray ka sù páppatulám mu, anugutam mu ta pattangngám mi sikaw sù pagitubangám mu, tádday sù jiwánám mu ána tádday sù jimigim, nga mesipà sù keparáyom.” ³⁸ Ngam kinagi na laguk ni Apu Kesu nira, “Arán naw garè kánnámmuán yù kebalinán nayù ikomá naw. Makeyangngá kayu panò ta jigá nga kunnay ta jigá nga attamáku ku sangaw? Attamán naw panò yù pate naw nga kunnay sù patè?” ³⁹ Á kinagi ra kuna, “Makeyattam kami ngay.” Á kinagi ni Apu Kesu nira, “Yáyù gemma noka yù attamán naw. ⁴⁰ Ngam aringá makáwayyá nga mangiyawá níkayu ta pagitubangán naw sù jiwánák ku ána jimigi. Napakappiánin yù ira ággitubangán nga napanán sù ira nga sinullá ni Namarò.”

⁴¹ Á pakaginná nayù ira mapulu nga tudduán na sù pakkiddo nayù ira kábulud da, di Ime kâ Kuan, napporay ira, ta kiniddo ri Ime yù ira ággitubangán nayù ira maráyaw. ⁴² Á inagálán ni Apu Kesu ira ta umay ira ta gián na, á kinagi na nira, “Ammu naw ta kitarok yù ira nga mammaguray sù ira makkakerumá nga tatolay nga ari Kudio. Á yù ira kátannangád da, makáwayyá ira nga mamatuttul sù ure ra. ⁴³ Ngam ari kunnian níkayu. Yù tolay nga máyá nakuan nga mepotun ánnè níkayu, aggina laguk yù tumulù nga masserbi níkayu. ⁴⁴ Á yù tolay nga ikáyá ta aggina yù makáwayyá ánnè níkayu, aggina laguk yù mabbaluntáriu nga

makiaripan ta ngámin. ⁴⁵ Á mássiki síkán nga Kaká ngámin na tatolay, minayà saw, nga ari passerbián nayù ira tatolay, nu ari galá ta síkán yù masserbi sù ira tatolay, áнна itapil ku yù baggi, nga mebuwì ta aru nga tatolay, tapè pakomán na ira ni Namarò ta liwá da.”

*Pammapián ni Apu Kesu yù Buling
Mattiu 20:29-34; Lukas 18:35-43*

⁴⁶ Á nakáddè di Apu Kesu áнна yù ira tudduán na ta ili na Jeriku, nga pattalebarád da lá. Á páno ra ta Jeriku, magari yù ira tatolay nga mepulù nira. Á aijan yù buling nga minákkilimù, nga nagitubang sù aggik na dалан. Si Bartimio yù ngágan na, nga anà ni Timio. ⁴⁷ Á pakaginná ni Bartimio ta mattalebák si Apu Kesu nga taga Nasaret, á nakkatakotol, á kinagi na, “Kaw! Apu Kesu, nga Ginaká ni Patul Dabid, ikállà mà bì!” kun na. ⁴⁸ Á aru yù ira tatolay, á gimmá ra, á kinagi ra kuna, “Ari ka mattannuk,” kud da kuna. Ngam inipappaná na nakkatakotol, “Ginaká ni Patul Dabid, ikállà mà bì!”

⁴⁹ Á pakaginná ni Apu Kesu kuna, nagginná, á kinagi na nira, “Agálán naw ta umay saw.” Á ed da kinagi kuna, “Patagatam mu yù nonò mu. Á gumikkáng ka, ta ipágál na ka.” ⁵⁰ Á inirián na laguk yù ulolá na, á nattábarikuá nga gimikkáng, á minay ká Apu Kesu. ⁵¹ Á kinagi ni Apu Kesu kuna, “Anni yù ikáyá mu nga akkuák ku nikaw?” Á kinagi nayù buling kuna, “Apu, parè bì ta makasinganá.” ⁵² Á kinagi ni Apu Kesu kuna, “Makapánaw ken, ta nammapiá ken megapu sù pangikatalà mu níkán.” Á dagarágá nanoli yù ánnigan nayù buling, á nepulù ká Apu Kesu ta pappatale na ta dалан.

11

*Lubbè di Apu Kesu ta Ili na Jerusalem
Mattiu 21:1-11; Lukas 19:28-40; Kuan 12:12-19*

¹ Pakáddè di Apu Kesu ta puddul nga namulán ta káyu nga olibo, nerípá da yù ira babálay na Bepagi áнна Bitania, nga aranni ta ili na Jerusalem. Á pinapolu ni Apu Kesu yù duá ira nga tudduán na. ² Á kinagi na nira, “E kayu lábbi tukewá babálay, ta masingan naw sangaw tán yù kígaw na dongki nga negálù, nga ari bulubugá paga nga nattakayán. Ubbarán naw laguk, tapè iyánga naw saw. ³ Á nu aijan yù mangiyabbù nikayu ta ‘Ngattá ta apán naw?’ á kagian naw, ‘Wan, ta máwák ni Apu, á ipetoli na galá sangaw,’ kun naw kuna.”

⁴ Á gapu ta paddok ni Apu Kesu nira, nánaw ira, á nálek da yù kígaw sù kalsáda, nga negálù ta puertá na balay, á inubbarád da. ⁵ Á aijan yù ira tatolay nga nanáddak ta kalsáda, á nasingad da yù kingnguá ra. Á iniyabbù da nira, “Ngattá ta ubbarán naw yù kígaw?” ⁶ Á initabbák da yù nipakagi ni Apu Kesu nira, á nipálá da laguk nira.

⁷ Á nánaw ira, á ed da iniyángay yù kígaw ká Apu Kesu. Á ininánná da yù gagámi da sù bará na ayám, á nattakayán na laguk ni Apu Kesu. ⁸ Á aru yù ira tatolay nga aijan tán, á ininánná da yù gagámi da ta dалан. Á yù ira káruán, ininánná da yù pangapangá na káyu nga naddon, nga sippisippáng da ta aggik na dалан. ⁹ Á ngámin yù ira nga mapolu kári Apu Kesu ta dалан áнна yù ira maporián ta likuk da, magayáyá ira nga nagaragiák, á kinagi ra, “Dayáwat tam si Namarò. Dayáwat tam yù Patul nga jinok ni Namarò ta umay mammaguray nittam,” ¹⁰ ta aggina yù táli nayù ngaw mammaguray nga naggaká nittam, si Patul Dabid, á napiá yù pammagure na. Maráyaw si Namarò ta lángi.”

¹¹ Á labbè da ta Jerusalem, simillung si Apu Kesu sù mangilin nga kapillíá, nga bale ni Namarò, ta en na sinullúnán ngámin yù aijan ta lágum na. Á gapu ta púgágin, kabalin na maningan, nánaw, á minay ira ta Bitania, di Apu Kesu áнна yù ira mapulu duá nga tudduán na.

*Makatáng yù Káyu nga Igò
Mattiu 21:18-19*

¹² Á sù tádday nga ággaw, panoli ra ta Jerusalem nga naggapu ta Bitania, nabisin si Apu Kesu. ¹³ Á nerípá na yù káyu nga igò, nga naddon ta napiá. Á en na iningan nu egga bungá na, ta nasingngá gemma yù bungá na igò. Labbè na kuna, nasingan na ta dipúru don na, nga awán bulubugá ta bungá na, gapu ta ari paga yù ággaw na pabbungá na. ¹⁴ Á kinagi ni Apu Kesu, “Aringin bulubugá mabbungá yawe káyu áddè kunangan ta áddè ta áddè.” Á naginná nayù ira tudduán na yù kinagi na.

*Pakarenuán ni Apu Kesu yù Mangilin nga Kapillíá
Mattiu 21:12-17; Lukas 19:45-48; Kuan 2:13-22*

* 11:9 Isaya 56:7; Jeremia 7:11

¹⁵ Á labbè da ta Jerusalem, simillung mángin si Apu Kesu sù mangilin nga kapilliá, nga bale ni Namarò. Á pinaturiák na yù ira malláku ána yù ira nga umay gumátáng. Á sinottombá na yù lamesá ira nayù ira minánnáli ta kuárta ána yù bángku nayù ira malláku ta mammánù. ¹⁶ Á arán na anugutan yù ira mattalebák nga mangáttu sù námmuák nayù mangilin nga kapilliá. ¹⁷ Á inituddu na sù ira tatolay, á kinagi na, “Arán naw panò ammu yù neturá nga Ubobuk ni Namarò, nga kunniaw: ‘Yù balè yù ákkimállatán na ngámin nga tatolay.’† Ngam sikayu, pinatalián naw ta ággianán nayù ira maddarogá.”

¹⁸ Á yù ira kátannangán nga pári ána yù ira mesturu ta tunung, narámak da yù kingnguá ni Apu Kesu, á inigagánga ra nu kunnasi yù ámmapáte ra kuna. Ta maganássing ira kuna, ána passilad da, gapu ta napállá yù ira magaru nga tatolay megapu sù pakáwayyá nayù ángngituddu na. ¹⁹ Á ta pajjibbà, nánaw di Apu Kesu sù ili.

*Yù Ituddu na nga Meyannung ta Pakimállà tam ána Pakkakápakomá tam
Mattiu 21:20-22*

²⁰ Á ta pannawák, panoli ri Apu Kesu ta Jerusalem, nasingad da yù káyu nga igò nga sinalebarád da sù tádday ággaw, nga nakatángin ngámin áddè ta gamù na. ²¹ Á manonò ni Eduru yù kinagi ni Apu Kesu nga meyanung sù káyu, á kinagi na, “Apu, innam mè yù káyu nga inigagek mu. Nakatángin!” ²² Á simibbák si Apu Kesu, á kinagi na nira, “Mangikatalà kayu ká Namarò. ²³ Kurugán yù kagiak ku nikayu. Nu manguruk yù tolay ká Namarò ána ari mabbábáng ta pangikatalà na, aijan yù awayyá na nga maddok ta puddul, nga kagian na, ‘Meyali ka, puddul, nga melappák ta bebay,’ á kurugan na. ²⁴ Yáyù nga kagiak ku nikayu ta maguray lá yù ikomá naw ká Namarò ta pakimállà naw, ikatalà naw ta alawatan nawin, á kuruk nga meyawá nikayu.

²⁵ “Á sù pakimállà naw ká Namarò, nu mataki yù nonò naw sù tolay nga nakaliwá nikayu, máwák nga pakomán naw laguk, tapè pakomán nakayu gapay nayù Yáma naw nga Namarò nga maggián ta lángi. ²⁶ Ta nu ari kayu mamakomá sù ira kábulun naw, arán na kayu gapay pakomán nayù Yáma naw nga Namarò nga maggián ta lángi.”

*Iyabbù da ká Apu Kesu yù Paggapuán na Pakáwayyá na
Mattiu 21:23-27; Lukas 20:1-8*

²⁷ Á limibbè di Apu Kesu má ngin ta Jerusalem. Á nallakalakák si Apu Kesu sù námmuák nayù mangilin nga kapilliá nga najjijjigán. Á jimikki kuna yù ira kátannangán nga pári ána yù ira mesturu ta tunung ána yù ira karakalán. ²⁸ Á iniyabbù da kuna, “Anni yù paggapuán nayù pakáwayyám sù kingnguám? Asinni yù nangiyawá nikaw sù pakáwayyám?” kud da ká Apu Kesu.

²⁹ Simibbák si Apu Kesu, á kinagi na nira, “Aijan gapay yù iyabbù ku nikayu. Á nu tabbagan nawá, kagiak ku laguk nikayu yù naggapuán nayù pakáwayyá. ³⁰ Si Kuan, nga yù ngaw minánnigù sù ira tatolay, asinni naggapuán nayù pakáwayyá na? Naggapu ká Namarò, onu naggapu ta tolay? Kagian naw níkan.” ³¹ Á nakkakápeperang ira ta ubobuk, nga kud da, “Anni yù itabbák tam? Nu itabbák tam ta naggapu ká Namarò yù pakáwayyá na, á iyabbù na sangaw, ‘Ngattá, ta arán naw laguk kinuruk si Kuan?’ ³² Á metabbák tam panò ta naggapu ta tolay?” Yáyù kinagi ra gapu ta maganássing ira sù ira tatolay nga makimoray ká Kuan, gapu ta kinagi nayù ira tatolay ta kuruk nga ábbilinán ni Namarò si Kuan. ³³ Á yáyù nga initabbák da ká Apu Kesu, “Arám mi ammu yù naggapuán nayù pakáwayyá ni Kuan.” Á kinagi ni Apu Kesu nira, “Á yáyù nga arák ku laguk kagian nikayu yù naggapuán nayù pakáwayyá sù akka-akkuák ku.”

12

*Yù Ángngarigán nga Meyannung sù ira Manangngal sù Kamulán ta Úbas
Mattiu 21:33-46; Lukas 20:9-19*

¹ Á nagánggarigán si Apu Kesu ta pangituddu na paga sù mangilin nga kapilliá, á kinagi na nira, “Aijan yù tolay nga namulá ta úbas sù komán na, á inalitukán na. Á kinokkok na yù abbù ta áppaggalán ta bungá na.* Á pidde na yù atannáng nga balay nga paggianán nayù ira minánnaron, tapè meripá da yù ngámin nga áddè na kamulán. Á inikatalà na yù kamulán sù ira minánnangngal kuna, á nánaw nga minay ta arayyu nga lugár.

² “Á ta áppupúsik na bungá na úbas, jinok nayù tolay yù aripan na ta umay sù ira minánnangngal, tapè apan na nira yù balle na. ³ Ngam ginápù da yù aripan, á pinalapaligá

† 11:17 Paddayan nayù ira Kudio ta binaráyáng yù tabbuk nayù bungá na úbas.

* 12:1 Salmò 118:22-23

da, á pinapáno ra nga awán ta iná na. ⁴ Á jinok na má yù mekaruá nga aripan na. Á kingnguá ra yù ulu na ána pinasiránád da. ⁵ Á jinok na má nira yù mekatallu nga aripan na, á pinapáte ra. Á kunniaw gapay kingnguá ra sù ira káruán nga jinok na, biddibiddù da yù ira káruán, á pinapáte ra yù ira káruán.

⁶ “Á ta kabalin na yaw, aijan lâ sù makáddabbun yù táttádday nga awayyá na nga doban, yù aná na nga laláki nga iddukan na. Aggina yù naporían nga jinok na, ta kagian na ta nonò na, ‘Kuruk nga pakimorayád da yù aná ku.’ ⁷ Ngam yù ira minángngallu, pakasingad da sù aná nayù makáddabbun, makkaká-ubobuk ira, á kinagi ra, ‘Ye! Aggina yù aná na nga makákkua noka ngámin. Et tam papatáyan, á sittam galá yù makákkua.’ ⁸ Á ginápù da, á pinapáte ra ána inilappák da sù liák na alitù.”

⁹ Á kinagi ni Apu Kesu nira, “Anni laguk akkuán nayù makáddabbun sù ira minánnaron ta kobasán na? Umay mamapátay nira, á ipataron na yù kamulán na sù ira tanakuán. ¹⁰ Arán naw panò binibbik yaw nga netúrâ, nga Ubobuk ni Namarò:

‘Aijan yù batu nga inipuerá nayù ira nabbalay ta batu,
gapu ta kagiad da ta awán ta serbi na.

Á aggina yù batu nga mabbáli ta ánnáddagán nayù balay.

¹¹ Yaw yù kingnguá ni Apu Namarò, nga makapállá nittam.’”†

¹² Á yù ira karakalán na Kudio, nánámmuád da ta aggira yù ituddu ni Apu Kesu megapu sù pagángngarigán na nga meyanung sù ira naráké nga minánnaron ta kamulán ána megapu sù netúrâ nga meyanung sù ira nabbalay ta batu, nga nangipuerá sù kapiánán. Á gaputad da nakuan, ngam pinaguráyád da, gapu ta maganásing ira sù ira magari nga tatolay nga makimoray kuna. Á nánawád da laguk.

Iyabbù da kâ Apu Kesu nu Mappagá ira nakuan ta Buwi

Mattiu 22:15-22; Lukas 20:20-26

¹³ Á jinok da yù ira káruán nga Parisio ána yù ira káruán nga kákkaparán ni Patul Erodo, tapè parubád da si Apu Kesu megapu sù pangiyabbù da kuna. ¹⁴ Á jimikkì ira kuna, á kinagi ra, “Mesturu, ammu mi ta kurugán ngámin yù ubobuk mu. Á arám mu paddurúmán yù ira tatolay, mássiki nu maríku ira onu pobare. Á ituddum lâ yù kurugán nga bilin ni Namarò nga meyanung sù ipakuá na sù ira tatole na. Kagian mu laguk nikami nu ipugik nayù tunung tam yù mappagá ta buwi kâ Patul Sisar, nga mammaguray ta ili na Roma? Mappagá ittam laguk, onu arí?” ¹⁵ Ngam natákál ni Apu Kesu ta áppè pípiá ira, tapè ilogò da. Á yáyu nga kinagi na nira, “Ngattá, ta parubán nawà? Ipasingan nawè bì nikán yù pirâ.”

¹⁶ Á iniyawá da kuna. Á kinagi na nira, “Asinni yù makámmammang ána makángngágan nga masingat tam sawe kuártu?” Á kinagi ra, “Si Patul Sisar.” ¹⁷ Á kinagi ni Apu Kesu nira, “Iyawá naw laguk kâ Sisar yù kukuá na. Á iyawá naw gapay kâ Namarò yù kukuá ni Namarò.” Á yù kebalinán na, pagán naw yù buwi sù mammaguray, á iddukan naw ána kurugan naw si Namarò. Á napállá ira megapu sù napiá nga itabbák na.

Iyabbù da kâ Apu Kesu ta Meyanung ta Paginnanole na Tolay

Mattiu 22:23-33; Lukas 20:27-40

¹⁸ Kabalin na yaw, minay nga jimikkì kâ Apu Kesu yù ira káruán nga Sadusio. Aggira yù Kudio nga kagiad da ta ari maginnanolay yù baggi na tolalay sù pagáddékan na ággaw. Á iniyabbù da kâ Apu Kesu, á kinagi ra, ¹⁹ “Mesturu, aijan yù tunung nga initúrâ ni Moyses megapu nittam, ta nu patayán na tolalay yù atáwa na ngam awán ta aná da, máwák nga atawán nayù urián na yù bálu na, tapè maganá ira sù pannakabaggi nayù kaká na nga natay. ²⁰ Á gári, naggián saw pitu nga mawwawági nga lálláki. Á nangatáwa yù kaká, ngam natay nga awán ta aná na. ²¹ Á inatáwa nayù mekaruá yù asipák na, ngam natay gapay nga awán ta aná na. Á kunniaw gapay yù nesimmu sù mekatallu ána ngámin nga káruán. ²² Aggira ngámin nga pitu, nattuubbá ira nga nangatáwa sù babay, ngam awán bulubugá ta áná da. Á naporían nga natay gapay yù babay. ²³ Á kagian mu nikami laguk, sù ággaw nga paginnanole nayù ira námmatay, asinni sù ira pitu yù atáwa nayù babay, nepatalugáring ta nakiatáwa sù ira ngámin nga pitu,” kud da kâ Apu Kesu.

²⁴ Á kinagi ni Apu Kesu nira, “Yáyu nga makaliwá kayu, ta arán naw garè ammu yù netúrâ sù mangilin nga ubobuk ni Namarò ána yù pakapangnguá ni Namarò. ²⁵ Á noka nu duttál yù paginnanole nayù ira námmatay, ari ira mangatáwa ána makiatáwa, gapu ta megittá ira sù ira daroban ni Namarò nga maggián ta lángl.

† 12:11 Exodo 3:6

²⁶ “Á ta meyanung sù paginnanole nayù ira námmatay, arán naw panò binibbik yù neturá sù libru ni Moyses nga meyanung sù káyu nga nagatang, nga ari nakassá? Pakasingan ni Moyses sù káyu nga nagatang, jimikki kuna, á naginná na yù ngarál ni Namarò, á kinagi ni Namarò ká Moyses: ‘Sikán si Namarò, nga pakiyápuán nayù ira naggaká nikaw. Sikán yù Yápu di Abrakam kári Isak ká Akup.’[‡] ²⁷ Á yù ira námmatay, ari ira makiyápu ká Namarò, ngam yù ira matolay yù makiyápu kuna. § Ari matunung yù nonotan naw, ta arán naw ammu yù kuruk.”

Yù Purmeru nga Tunung nga Initaddán ni Namarò

Mattiu 22:34-40; Lukas 10:25-28

²⁸ Á ajjan tán yù tádday nga mesturu ta tunung, á naginná na yù pakkakápereperang nayù ira Sadusio ká Apu Kesu. Á gapu ta kemámmatán na ta napiá yù initabbák ni Apu Kesu nira, jimikki kuna ta iniyabbù na gapay kuna, á kinagi na, “Apu, anni yù purmeru nga tunung sù ira ngámin nga initaddán ni Namarò?” ²⁹ Á simibbák si Apu Kesu, á kinagi na, “Yawe yù purmeru nga tunung sù ira initaddán ni Namarò: ‘Sikayu nga ginaká ni Israel, ginnán naw yù kagiak ku nikayu. Si Apu Namarò nga Yápu tam, aggina lâ yù táttádday. ³⁰ Iddukan naw si Namarò nga Yápu naw, á itulù naw kuna yù ayá nayù putu naw, yù ure naw, yù nonò naw, ána yù sikan nayù baggi naw.’” ³¹ Á ajjan gapay nga neturá yù mekaruá nga máwák nga kurugam mu: ‘Iddukan naw yù ikáttole naw ta kunay ta ángngiddù naw ta baggi naw.’[†] Awán ta tanakuán nga máwák nga kurugam mu, nu ari galá danniw nga duá,” kun ni Apu Kesu kuna.

³² Á kinagi na laguk nayù mesturu ta tunung ká Apu Kesu, “Á kustu, Mesturu. Kurugán yù kinagim, nga táttádday lâ si Namarò, á awán ta tanakuán, nu ari lâ aggina. ³³ Á máwák nga iddukat tam si Namarò nga Yápu tam, megapu sù napasigaggá nga ayá nayù putu tam, ána ngámin yù nonò tam, ána yù sikan nayù baggi tam. Á iddukat tam gapay yù ira ikáttole tam ta kunay ta ángngiddù tam ta baggi tam. Napiá yaw. Mús napiá ta tuppálat tam danniw nga tunung nga initaddán ni Namarò ánnè sù mangiyátang ta aya-ayám nga natuggi ána ngámin yù meyátang nga meyawá ká Namarò.”

³⁴ Á pakaginná ni Apu Kesu ta napiá yù initabbák na, kinagi na kuna, “Nu tuppálam mu yù egga ta nonò mu, mesipà ken sù pammagure ni Namarò.” Á kabalin ni Apu Kesu nakkagi karannian, awán laguk ta mangiyabbù kuna, ta napállá ira gapu ta makáwayyá yù pagubobuk na.

Asinni yù MakKiristu?

Mattiu 22:41-46; Lukas 20:41-44

³⁵ Á pangituddu ni Apu Kesu sù mangilin nga kapillía, nga bale ni Namarò, iniyabbù na sù ira tatolay, nga kun na, “Á yù ira mesturu sù tunung, anni má ta kagiad da ta ginaká ni Patul Dabid yù MakKiristu?” ³⁶ Ta si Patul Dabid, kinagi na yù inipalappá nayù Mangilin nga Ikararuá kuna, á kinagi na,

‘Nagubobuk si Apu Namarò, á kinagi na sù Yápu: Magitubang ka sù jiwának ku, nga ággitubangán nayù meparáyaw, áddè ta ipeguppè ku nikaw yù ira malussaw nikaw.’[‡]

³⁷ Á yáyù nga abbúnan ni Patul Dabid ta Yápu na yù MakKiristu. Á nu Yápu na yù MakKiristu, ngattá ta kagiad da ta ginaká na lâ? Ari galá motun yù Yápu na ánnè kuna?”

Á ayatán yù ira magari nga tatolay nga magginná sù inituddu ni Apu Kesu.

Yù Kinagi ni Apu Kesu nga Meyanung sù ira Parisio ána yù ira Mesturu ta Tunung

Mattiu 23:1-36; Lukas 20:45-47

³⁸ Á ta pangituddu ni Apu Kesu, kinagi na, “Mappalán kayu sù ira mesturu ta tunung. Ta ikáyá da mabbarawási ta apaddu nga barawási ra ána mappasingan ta dápun, tapè pakimorayád da ira nayù ira tatolay ta pappassapassiár da. ³⁹ Á piliad da yù kapiánán na ággitubangán ta kapillía ána yù ággitubangán nayù maráyaw ta pakilállang da ta piestá. ⁴⁰ Á ilogò da yù ira bálu nga bábbay, tapè apad da yù kukuá ra, á áppa-áppè ira nga makimállá ta mabayák ká Namarò, tapè ilímak da yù narákè nga akka-akkuád da. Á mepallá yù pamagikáru ni Namarò nira ta pagáddekán na ággaw.”

[‡] **12:26** Á yáyù nga ammu tam ta matolay paga di Abrakam kári Isak ká Akup ta lángi, mássiki nu natay ira ta nabayágin ta keggá ni Moyses, gapu ta pakimorayád da paga si Namarò. § **12:27** Deuteronomio 6:5 * **12:30** Libitiko 19:18

[†] **12:31** Salmo 110:1 † **12:36** Daniel 9:27; 11:31; 12:11

*Yù Inilimù nayù Bálu nga Babay**Lukas 21:1-4*

⁴¹ Á nagitubang si Apu Kesu aranni sù ángngipayán ta kuártu nga aijan sù lágum nayù mangilin nga kapilliá. Á inni-innan ni Apu Kesu yù ira tatolay nga umay mangipay ta limù da. Á aru yù ira maríku nga minay nangipay ta aru nga kuártu. ⁴² Á minay gapay yù bálu nga babay nga pobare, á pine na duá nga baddi nga pirá, nga negittá ta duá nga sintábu. ⁴³ Á inagálán ni Apu Kesu yù ira tudduán na, á kinagi na nira, “Innan nawè yù kingnguá nayù babay. Kurugán yù kagiak ku nikayu, aru yù kuártu nga inipe nayù pobare nga bálu ánnè sù inipe nayù ngámin ira káruán. ⁴⁴ Ta inipe ra yù kuártu nga naggapu ta sobará ra. Ngam yù bálu, inipe na ngámin yù áddè na kapobare na, á awánin bulubugá ta ipakkatole na.”

13*Yù Pangipalappâ ni Apu Kesu ta Merakunù yù Mangilin nga Kapilliá**Mattiu 24:1-2; Lukas 21:5-6*

¹ Á ta páno ri Apu Kesu sù mangilin nga bale ni Namarò, kinagi nayù tádday nga tudduán na, “Mesturu, innam mu yawe ira mallakay nga batu, ána yù ira nakástá nga bale nayù mangilin nga kapilliá!” kun na. ² “Wan,” kun ni Apu Kesu kuna. “Á innan naw yawe ira nakástá nga balay nga kapilliá! Ta duttál yù ággaw nga awán bulubugá ta batu na nga mallalátuk, ta mewarawará ira ngámin.”

*Yù Dattál nayù Jigâ**Mattiu 24:3-14; Lukas 21:7-19*

³ Á labbè da sù puddul nga namulán ta káyu nga olibo, ta ábbák nayù mangilin nga kapilliá, á nagitubang ira. Á jimikkì kâ Apu Kesu yù ira lâ nga appâ nga tudduán na, si Eduru, si Ime, si Kuan, ána si Andares, aggira lâ, ta aijan yù iyabbù da kuna. ⁴ Á kinagi ra kuna, “Kagiam mungè nikami nu anni yù ággaw nga kesimmu na danniaw nga kinagim gangù nga meyannung sù mangilin nga kapilliá. Á anni yù panákkilalán ta duttál yù kapalurò ná?”

⁵ Á simíbbák si Apu Kesu, á kinagi na nira, “Mappalán kayu, tapè ari kayu melogò. ⁶ Ta aru yù ira nga umay noka nga mappassipíl nikán. Á kagiad da ta aggira sikán nga MakKíristu, á aru yù ira tatolay nga ilogò da. ⁷ Á nu marámak naw yù meyannung sù ira maggerrá ána yù ira nga makigerrá ta arayyu nga lugár, ari kayu maburung ta máwák nga mesimmu yaw, ngam ari paga yaw yù pagádekán na dabbuno. ⁸ Á yù ira tatolay nga naggapu ta dumá nga lugár, umay ira makigerrá sù ira nga maggián ta tanakuán nga lugár, á umay yù ira nga naggapu ta tádday nga páppatulán nga makigerrá sù ira nga maggián ta tanakuán nga páppatulán. Á mallunik ta aru nga lugár, ána mabbisin yù ira tatolay ta aru nga lugár. Danniaw ira nga mesimmu yù pamegapu na lâ nayù jigâ, nga kunnay sù jigâ na babay nga maganá yù keyarigán na.

⁹ “Ngam sikayu, magimuguk kayu, ta gaputad da kayu nga ikeká sù ira Kudio nga mamanunnù, á mabaddù kayu sù ira kapilliá ra. Á gapu ta panguruk naw nikán, ikeká ra kayu ta arubáng nayù ira gubinator ána yù ira patul. Á keyarubáng naw nira, yáyù yù awayyá naw nga mangipakánnámmu nira sù napiá nga dámak nga meyannung nikán. ¹⁰ Ta máwák nga melayalayá yù napiá nga dámak ta ngámin nga makkakerumá nga tatolay pángè na duttál yù áddè nayù dabbuno.

¹¹ “Á ta pangikeká ra nikayu, ari kayu maburung nu anni yù itabbák naw nira. Á ta pangiyabbù da nikayu, mepakánnámmu nikayu yù kagian naw nira. Ta ari naggapu ta nonò naw yù kagian naw nira, nu ari galá nga naggapu sù Mangilin nga Ikararuá ni Namarò. ¹² Á yù ira nga mawwagi nga lálláki, ikeká nayù tádday yù wagi na, á ipapapáte na. Á ikeká nayù yáma yù aná na, á ipapapáte na. Á yù ira ábbing, mapporay ira sù ira darakal da, á ikeká ra yù ira darakal da, á ipapapáte ra ira.

¹³ “Á sikayu nga makituddu nikán, ikalusso ra kayu na ngámin na tatolay gapu ta panguruk naw nikán. Ngam yù tolay nga mapasigaggá yù pangikatalà na nikán áddè ta pagádekán, aggina yù meyiǵù nga mesipá kâ Namarò sù pammagurayán na ta áddè ta áddè,” kun ni Apu Kesu.

*Yù Mangala-állirák nga Makánnanássing**Mattiu 24:15-28; Lukas 21:20-24*

14 Á kinagi ni Apu Kesu paga nira, “Masingan naw sangaw yù mangala-állirák nga makánnanássing nga mamassippíl, nga manáddak sù gián nga arán na nakuan panáddagán.* Á sikayu nga mabbibbik, nonotan naw yù kebalinán na! Á yù ira tatolay nga maggián sù purubinsia na Judiya ta ággo na dattál nayù makánnanássing, máwák nga mattálaw ira nga umay ta puddul. 15 Á yù tolay nga aijan ta lawán na bale na, onu magibannák ta utun nayù sináttatapán nga bale na, ari tullung ta bale na, nga umay mangá ta ipulù na. 16 Á yù tolay nga mattarabáku sù ákkomanán na, máwák nga ari manoli ta bale na, nga umay mangá ta ulolà na. 17 Á kábbi yù ira nga mabussi ána yù ira nga konsu tagibi tán nga ággaw, ta ari ira makakarérá. 18 Makimállá kayu ká Namarò ta ari mekanná ta ammián yù ággo nayù jigá naw. 19 Ta umay sangaw yù jigá nga mappanà ánnè ta ngámin nga jigá ta áddè ngaw pamarò ni Namarò ta dabbuno ta áddè kunangan, á awámin bulubugá ta jigá nga kagittá na ta áddè ta áddè. 20 Á nu arán na nakuan pangarián ni Namarò yù ággo na jigá, awán bulubugá ta matolay. Ngam pangarián na megapu sù ira nga pinlí na ta tatole na.

21 “Á nu aijan yù tolay nga makkagi nikayu ta ‘Innan nawè, aijanin saw yù MakKiristu,’ onu kagian na, ‘Innan nawè, aijanin tukewá yù MakKiristu,’ arán naw kurugan yù kagian na. 22 Ta duttál yù ira nga mattákiristu ána yù ira nga mattá-ábbilinán, á aru yù ipasingad da nga panákkilalán nga makapállá, tapè ilogò da nakuan mássiki yù ira pinlí ni Namarò ta tatole na. 23 Ngam sikayu, magimuguk kayu, ta dán nga kinagi nikayu pángè na mesimmu dannian.”

Yù Tappi nayù Kaká na Ngámin na Tatolay

Mattiu 24:29-31; Lukas 21:25-28

24 Á kinagi ni Apu Kesu paga,

“Á ta kabalin nayù jigá, makkallà yù bilák.

Á ari manawák yù bulán gapay.

25 Á gipannátán yù ira bituan, nga maggapu ta lángi.

Á yù ira nga maggián ta lángi, meyalí ira sù giád da.†

26 Á masingad dangá laguk nayù ira tatolay, sikán nga Kaká ngámin na tatolay, nga umay nga mepulù sù kunam, nga maddalingárang ána makáwayyá. 27 Á dobak ku yù ira daroban nga maggián ká Namarò, tapè ed da ammunan yù ira pinlí ni Namarò nga siminuttul nikán ta dabbuno, aggira ngámin nga naggapu ta ngámin nga lugár da sù utun na dabbuno,” kun ni Apu Kesu nira.

Yù Panákkilalán ta Panoli na saw ni Apu Kesu

Mattiu 24:32-35; Lukas 21:29-33

28 Á kinagi ni Apu Kesu nira, “Ginnán naw yù ángngarigán nga meyanung ta igò ána yù ira káruán nga káyu. Nu masingan naw ta mapatalián yù don na káyu, ammu naw ta mapatalián sangaw yù ággián na ággaw. 29 Á ta kunnian gapay, nu masingan naw yù kesimmu nayù ngámin nga jigá nga kinagi nga umay, mánnámmuán naw ta aranni ngin yù panoli saw, sikán nga Kaká na ngámin na tatolay. 30 Kurugán yù kagiak ku nikayu, mesimmu ngámin danniaw nga kinagi nikayu lage na pate nayù ira tatolay nga matolay kunangan. 31 Duttál yù ággaw nga awámin yù dabbuno ána yù lángi ána ngámin nga aijan nira. Ngam ari bulubugá mapatalián yù ubobuk ku,” kun ni Apu Kesu.

Awán Bulubugá ta Makánnámmu sù Oras nayù Panoli ni Apu

Mattiu 24:36-44

32 Á kinagi na laguk, “Á ta meyanung sù ággaw ána oras nga kesimmu na ngámin danniaw, awán ta makánnámmu. Mássiki yù ira daroban ni Namarò nga maggián ta lángi, arád da ammu. Á sikán, nga Aná ni Namarò, arák ku ammu. Ngam si Ammò ku nga Namarò, aggina lá makánnámmu. 33 Á mappalán kayu laguk. Napiá nu kunnay kayu ta matturá, ta arán naw ammu nu anni nga oras yù dattál na. 34 Á kunniaw yù keyarigán na. Aijan yù tolay nga maggagannuá ta umay ta arayyu nga lugár. Á inipataron na ngámin yù kukuá na sù ira aripan na, á kagian na sù ira katággitádday yù tarabáku na. Á kagian na sù ira magguárdiá ta matturá ira nga manaron ta ngámin. 35 Yáyù nga magiddi-iddak kayu laguk, ta arán naw ammu nu káni yù labbè nayù makábbalay, nu labbè sangaw nu pajjibbà

* **13:14** Isaya 13:10; 34:4; Inipalappá 6:12-13 † **13:25** Yáyù piestá nga panaddamad da sù ngaw pattalebák nayù daroban ni Namarò. Ta keggá nayù ira ngaw Kudio ta gián nayù ira Egipto nga nangaripan nira, jinok na ngaw ni Namarò yù daroban na nga umay mamapátay sù ira kaká nga ána nayù ira Egipto. Á ari simillung ta bale nayù ira Kudio, ngam sinalebarán na yù bale ra, ta aijan yù dága na karneru nga pine ra ta utun ána taging na puertá na bale ra, nga kunnay ta kinagi ni Namarò ká Moyses ta ipakuá na nira.

onu tangngá na gabi, onu pagittarákkò na manù, onu alippánnawák. ³⁶ Magimuguk kayu laguk nga magiddak, tapè arán na kayu maratang nga ari paga maparán nga kunny ta makkaturuk, nu ikáddagá na lâ manoli. ³⁷ Á yaw nga kagiak ku nikayu, kagiak ku sù ira ngámin nga tatolay, magimuguk kayu nga magiddak, tapè dán nga naparán kayu,” kun ni Apu Kesu.

14

Pangigagánge ra ta Ámmapáte ra kê Apu Kesu
Mattiu 26:1-5; Lukas 22:1-2; Kuan 11:45-53

¹ Á aijan duá nga ággaw paga lage na piestá na pattalebarán nayù daroban, nga pakkákád da ta pán nga awán ta állapparán na. Á yù ira kátannangán nga pári na Kudío ána yù ira mesturu ta tunung, alerad da yù paggápù da kê Apu Kesu nga awán ta makánnámmu, tapè papatáyad da. ² Yáyù gapu na nga makkakátabarang ira, á kinagi ra, “Arát tam lábbi gubatan sù keggá ra nga makipiestá, maraké akkuád da ittam nayù ira tatolay.”

Denuán na Babay si Apu Kesu
Mattiu 26:6-13; Kuan 12:1-8

³ Á minay di Apu Kesu ta ili na Bitania, ta bale ni Simon nga naggoggong ngaw. Á pakkákád da, minay yù babay sù gián ni Apu Kesu, nga nanangngal ta boteliá nga napadday ta puraw nga batu, nga napannu ta denu nga bábbanguk nga naggapu ta gamù na nardu, nga kitanginá. Á pikká nayù babay yù bullo na boteliá, á inibubbù na yù denu ta ulu ni Apu Kesu. ⁴ Ngam yù ira káruán nga makasingan, napporay ira. Á nakkaká-ubobuk ira, á kinagi ra, “Kengá lâ yù bábbanguk. Ngattá, ta initabbà na? ⁵ Mapiá nakuan nu meláku ta maturù nga tallu gatù nga pesù ta meyawá nakuan sù ira pobare,” kud da. ⁶ Á gimma ra yù babay.

⁶ Ngam simibbák si Apu Kesu nira, á kinagi na, “Arán naw akkuán. Ngattá, ta pasiránán naw? Napiá yù kingnguá na nikán. ⁷ Maggián gemma ta áddè sù gián naw yù ira pobare, á awayyá naw ira abbágán, nu anni nga ággaw nga gustu naw nga mangabbák nira. Ngam sikán, aringá maggián nikayu ta áddè. ⁸ Á kingnguá nayù babay yù lâ awayyá na nga akkuan. Arán na iniddagán yù patè, ta jinenuán na yù baggi, nga paránan na ta ketanam ku. ⁹ Á kurugán yù kagiak ku nikayu, maguray lá ta dabbuno yù pangilayalayatan sù napiá nga dámak, mepakánnámmu gapay yù kingnguá nayù babay nikán, ta panaddamán nayù ira tatolay kuna.”

Pangigagánge ni Kudas ta Pappagápù na kê Apu Kesu
Mattiu 26:14-16; Lukas 22:3-6

¹⁰ Á si Kudas Iskariote, nga mebiláng sù ira mapulu duá nga sinullà ni Apu Kesu, minay laguk sù gián nayù ira kátannangán nga pári na Kudío, tapè makitarátu nira ta ipagápù na si Apu Kesu. ¹¹ Á pakaginná ra sù kinagi na, nagayáyá ira, á initabbá ra ta iddád da ta kuártu. Á inalek na laguk ni Kudas yù awayyá na nga mappagápù kê Apu Kesu nira.

Yù Pallalálláng di Apu Kesu sù Panaddamád da sù Pattalebák nayù Daroban
Mattiu 26:17-25; Lukas 22:7-14, 21-23; Kuan 13:21-30

¹² Á jimittál yù olu nga ággo nayù piestá, nga pakkákád da ta pán nga awán ta állapparán na, ána nappárti ra ta karneru.* Á iniyabbù da kê Apu Kesu nayù ira tudduán na, “Sisaw ikáyá mu nga papparánám mi ta pakkákanát tam?” ¹³ Á jinok ni Apu Kesu yù duá nga tudduán na, á kinagi na nira, “E kayu bì tuke ili, á maratang naw yù laláki nga mangáttu ta ammutu. Á tumuttul kayu kuna. ¹⁴ Á sù balay nga tallungán na, kagian naw yaw sù makábbalay, ‘Yabbù nayù Mesturu nikaw nu sisaw gián nayù paggianán na álliuk, tapè umay sangaw kumán ta panaddamán ta pattalebák nayù daroban, aggina ána yù ira tudduán na?’ kun naw sangaw kuna. ¹⁵ Á ipasingan na nikayu sangaw yù aláwa nga lágum ta utun. Á dán nga naparán sù lágum yù ngámin nga awágan naw. Paránan naw tán yù kanat tam,” kun ni Apu Kesu sù ira duá. ¹⁶ Á nánaw yù ira duá, á minay ira ta ili. Á naratang da ngámin nga kunny sù kinagi na, á pinarád da yù kanad da nga panaddamán ta pattalebák nayù daroban.

¹⁷ Á ta pajjibbá, limibbè di Apu Kesu ána yù ira mapulu duá nga tudduán na. ¹⁸ Á pallalálláng da paga, kinagi ni Apu Kesu nira, “Kurugán yù kagiak ku nikayu, aijan nikayu yù mappagápù nikán, nga mepallálláng nikán kunangane.” ¹⁹ Á pakaginná ra karanniaw, inikáddagá da lâ naraddam. Á nattutubbá ira nga nangiyabbù kuna, á kinagi ra, “Ari nga sikán, unè?” ²⁰ “Wan, tádday nikayu, nga mepasuddá ta pán sù tangalosá nga jigü. ²¹ Matayá

* 14:12 Sakariá 13:7

gemma, sikán nga Kaká na ngámin na tatolay, ta yáyù inipetúrâ ni Namarò sù dán nga netúrâ, ngam kábbi yù tolay nga mappagápù níkan. Mapiá nakuan nu ari neyaná.”

Yù Pamúgák di Apu Kesu, nga Panaddamát tam ta Pate na Mattiu 26:26-30; Lukas 22:14-20; 1 Korinto 11:23-25

²² Á sù pakkákád da paga, inâ ni Apu Kesu yù pán. Á kabalín na nabbalabálà kâ Namarò, giddigidduá na yù pán nga iniyawâ na nira. Á kinagi na, “Mangâ kayu sawe, ta kanan naw. Yawe yù baggi.” ²³ Á inâ na yù tangapassuelu nga binaráyang nga naggapu ta tabbuk na úbas. Á pabbalabálà na kâ Namarò, iniyawâ na nira, á aggira ngámin mininum kuna. ²⁴ Á kinagi na nira, “Yawe yù dágâ nga meubbù ta ketapil ku megapu ta aru nga tatolay, tapè pakomán ni Namarò ira ta liwiliwâ da. Yù dágâ yù panákkilalán ta napasigaggâ áнна mekatalà yù bagu nga tarátu ni Namarò sù ira tatole na. ²⁵ Kurugán yù kagiak ku nikayu, arák kin ulian nga inuman áddè ta inumak ku noka yù bagu sù pammagurayán ni Namarò.” ²⁶ Á nakkansion ira ta áddáyo ra kâ Namarò. Kabalid da nakkansion, nánaw ira nga minay sù puddul nga namulán ta káyu nga olibo.

Nipalappâ ni Apu Kesu yù Panáji ni Eduru kuna Mattiu 26:31-35; Lukas 22:31-34; Kuan 13:36-38

²⁷ Á pallakalakák da, kinagi ni Apu Kesu sù ira tudduán na, “Sikayu ngámin yù manáji níkan sangaw nu mappanà yù ággiák ku. Ta aijan yù netúrâ nga kinagi ni Namarò nga kunniaw:

‘Papatáyak ku yù mináppárak,

á mewarawará yù ira karneru, gapu ta awán ta manaron nira.’[†]

²⁸ Ngam maginnanolayá, á ta paginnanolè, mapolungá ánnè nikayu nga umay túrin ta purubinsia na Galilia.”

²⁹ Á pakkagi ni Apu Kesu ta tátájiád da, kinagi ni Eduru kuna, “Mássiki nu aggira ngámin yù mánaw nikaw, ngam sikán lápay, arát taka tájián.” ³⁰ Á kinagi ni Apu Kesu kuna, “Kurugán yù kagiak ku nikaw, lage na mamidduá magittarákkò yù manù sangaw nu gabi, mamillu ka nga makkagi ta arám mà ammu.” ³¹ Ngam initaggâ ni Eduru nga kinagi, “Mássiki nu sitta duá yù matay, arák ku ilímak ta ammu taka.” Á kunnian yù kinagi ra ngámin nga katággítádday.

Makimállà si Apu Kesu sù Kamulán ta Getsemani Mattiu 26:36-46; Lukas 22:39-46

³² Á labbè di Apu Kesu ta kamulán nga mangngágan ta Getsemani, kinagi ni Apu Kesu sù ira tudduán na, “Magiddak kayu saw, ta ek ku bì tán nga makimállà kâ Namarò.” ³³ Ngam inipulu na yù ira tallu lâ, si Eduru, áнна si Ime kâ Kuan. Á inikáddagá na lâ ni Apu Kesu napábbaw áнна naburung. ³⁴ Á kinagi na nira, “Mággekâ mappassi sù kepallà nga daddam ku. Maggián kayu saw nga matturá.” ³⁵ Á nallillì si Apu Kesu ta baddi paga nira, á namalittúkak, á nakimállà kâ Namarò tanu awayyá na, ari nakuan mesimmu kuna yù jigâ nga umay kuna. ³⁶ Á kinagi na, “Ammò ku, Ammò ku, sikaw ngámin yù makáwayyá. Ililli mà sù jigâ nga umay níkan. Ngam arám mu anugutan yù urè nu ari galá yù urem,” kun na kâ Namarò.

³⁷ Á ta kabalín na nga nakimállà, nattoli si Apu Kesu sù ira tallu nga kábulun na, á naratang na ira nga makkaturuk. Á kinagi na kâ Eduru, “Simon, makkaturuk ka? Ari ka panò makapatturá ta mássiki lâ tangoras? ³⁸ Matturá kayu nga makimállà, tapè arán na kayu appútan na liwâ. Ta mássiki nu molang kayu malliwâ, ngam makapi yù baggi naw.”

³⁹ Kabalín na nga nilukák ira, nallillì si Apu Kesu má, á inuli na má yù ákkimállà na kâ Namarò. ⁴⁰ Á nanoli má nira, á naratang na ira má nga makkaturuk, ta arád da magimmúlak yù matá ra. Á arád da ammu nu anni yù itabbák da nakuan kuna.

⁴¹ Á namillu nga nanoli si Apu Kesu nira, á iniyabbù na nira, “Makkaturuk kayu paga nga magibannák? Kustu ngin. Jimittál ngin yù oras nga kagápù ku, á iyawâ dangá sù ira minálliwâ, sikán nga Kaká na ngámin na tatolay. ⁴² Gumikkáng kayu, ta et tamin. Innan nawè. Ajanin yù mappagápù níkan.”

Gaputad da si Apu Kesu

Mattiu 26:47-56; Lukas 22:47-53; Kuan 18:3-12

⁴³ Á sù arán na paga kabalín nga nagubobuk ni Apu Kesu nira, dagarágâ nga limibbè si Kudas, nga mebiláng sù ira mapulu duá nga tudduán na. Á nepulù kâ Kudas yù ira kitáru nga nagármas ta badáng áнна palù. Aggira ngámin yù jinok nayù ira kátannangan nga pári

[†] 14:27 Daniel 7:13-14

na Kudio ána yù ira mesturu ta tunung ána yù ira karakalán. ⁴⁴ Á pattatarátu ra gangù, kinagi ni Kudas nira yù panákkilád da ká Apu Kesu. “Yù tolay nga ummaták ku, aggina yù gaputan naw sangaw. Á ipáno naw, á taronán naw ta napía.”

⁴⁵ Á pakáddè da ta kamulán, dagarágá nga jimikí si Kudas ká Apu Kesu. Á kinagi na, “Apu,” á inummatán na. ⁴⁶ Á ginápù da si Apu Kesu, á inigaggak da ta napía. ⁴⁷ Ngam aijan yù táddy nga kabbulun na, á inilayá na yù badáng na, á kittak na yù aripan nayù pári nga kátannangán, á nalasápán yù talingá na.

⁴⁸ Á kinagi ni Apu Kesu sù ira naggápù kuna, “Kagian naw panò ta tulisánà, ta umay kayu maggápù níkan nga nagármas ta badáng ána palù? ⁴⁹ Á kággággaw, naggiánà nikayu nga mangituddu sù mangilin nga bale ni Namarò, á arán nawá ginápù. Ngam mesimmu yaw, tapè matuppál yù inipetúrá ni Namarò sù dán nga netúratán.”

⁵⁰ Á ngámin yù ira nga sinudduán ni Apu Kesu, nattálaw ira, á nánawád da. ⁵¹ Á aijan tán gapay yù bagitolay nga nagulólá. Á yù ira mangikeká, ginápù da. ⁵² Ngam bittáng na nira lá yù ulá na, á nagilongán nga nattálaw.

Yù Pangiyabbú nayù ira Kudio ká Apu Kesu

Mattiù 26:57-68; Lukas 22:54-55, 63-71; Kuan 18:13-14, 19-24

⁵³ Á inituluk da laguk si Apu Kesu ta bale nayù kátannangán nga pári. Á ngámin ira nga káruán nga kátannangán nga pári ána yù ira karakalán, á yù ira mesturu ta tunung, naggagammung ira tán. ⁵⁴ Á jimináddán si Eduru ta arayyu ta likuk da. Á labbè da ta bale nayù kátannangán nga pári, simillung si Eduru sù nálitukán nga námmuák, á minay nepagitubang nga nepaggirínu sù ira magguárdiá. ⁵⁵ Á yù ira kátannangán nga pári ána ngámin ira nga mammaguray, alerad da yù ipangikeká ra ká Apu Kesu, tapè aijan yù awayyá ra nga mapapátay kuna, ngam awán ta nálek da. ⁵⁶ Ta aru yù ira nga nassirisiri nga nangikeká kuna, ngam ari naggigittá yù kinagi ra.

⁵⁷ Á manganánuán, aijan yù ira káruán nga minay nga mangikeká kuna, á nassirisiri ira gapay, á kinagi ra, ⁵⁸ “Naginná mi yù kinagi na. Kinagi na ta iwará na yù mangilin nga bale ni Namarò nga pidde na tolay, á nu mapasá tallu nga ággaw, patáddagan na yù tanakuán nga arán na pidde na tolay.” ⁵⁹ Á mássiki nu kunnian yù pangikeká ra, ari negittá yù kinagi ra.

⁶⁰ Á limikká yù kátannangán nga pári ta tangngá ra, á iniyabbú na ká Apu Kesu, “Awán panò ta itabbák mu sù ira mamaliwá nikaw?” ⁶¹ Ngam ari bulubugá nakkituk si Apu Kesu. Awán bulubugá ta itabbák na nira. Á iniyabbután na má nayù kátannangán nga pári, “Sikaw panò yù MakKiristu, nga Aná ni Namarò?” ⁶² Á kinagi ni Apu Kesu,

“Wan, síkán. Á masingan nawá nga Kaká na ngámin na tatolay, nga magitubang sù ággitubangán nayù maráyaw, ta jiwánán ni Namarò nga Makáwayyá ta ngámin.

Á masingan nawá nga umay nga mepulú ta maddalingárang nga kunam ta lángi.”[†]

⁶³ Á pakaginná nayù kátannangán nga pári sù kinagi ni Apu Kesu, pinisil nayù pári yù bisti na nga apaddu, gapu ta napátu yù nonò na. Á kinagi na, “Awánin ta máwák tam nga magalek paga ta tolay nga makkagi ta liwá na. ⁶⁴ Naginná naw yù kinagi na, nga aggina yù Aná ni Namarò. Anni yù ure naw nga meyanung kuna?” kun nayù pári nira. Á aggira ngámin, kinagi ra ta ikáru na yù liwá na ta pate na.

⁶⁵ Á pakaginná nayù ira káruán ta mapapátay si Apu Kesu, nilutábád da. Á kinallabád da yù mammang na, á sinultù da, ána kinagi ra kuna, “Labbúnam mu yù manultù nikaw.” Á ed da laguk iná nayù ira magguárdiá, ána lippilippák da.

Ilimak ni Eduru yù Pakánámmu na ká Apu Kesu

Mattiù 26:69-75; Lukas 22:56-62; Kuan 18:15-18, 25-27

⁶⁶ Á paggián ni Eduru paga ta námmuák, minay yù babay nga aripan nayù kátannangán nga pári. ⁶⁷ Á pakasingan nayù babay ká Eduru nga mepaggirínu, inimámmatán na, á kinagi na kuna, “Sikaw gapay yù kabbulun nayù tolay nga taga Nasaret.” ⁶⁸ Ngam inilimak ni Eduru, á kinagi na, “Arák ku ammu. Arák ku kánámmuán yù kagiam mu níkan.” Á nallilli si Eduru nga minay ta puertá nayù alitù. Á dagarágá nagittarákkò yù manù.

⁶⁹ Á manganánuán, nasingan na má nayù babay, á kinagi na sù ira tatolay nga nanáddak tán, “Aggina gemma yù kabbulud da.” ⁷⁰ Ngam inilimak na má ni Eduru. Á manganánuán, á yù ira káruán nga aijan tán, kinagi ra gapay ká Eduru, “Sikaw yù kabbulun na, ta taga Galilia ka gemma gapay.” ⁷¹ Ngam inigagek ni Eduru yù baggi na, á nappagássingán ká Namarò ta

[†] 14:62 Salmo 22:18

kurugán yù kagian na. Á kinagi na nira, “Arák ku ammu yawe nga laláki nga kagian naw.”⁷² Á inikáddagá pidduá nayù manù nagittarákkò. Á dagarágâ, nanonò ni Eduru laguk yù kinagi ni Apu Kesu kuna, nga “Sangaw nu gabi, lage na mamidduá magittarákkò yù manù, mamillu kâ nga makkagi ta arám mà ammu.” Pakanonò ni Eduru karannian, inigabbuá na nga nakkulé.

15

Pangikeká ra kâ Apu Kesu ta Arubáng ni Pilatto
Mattiu 27:1-2, 11-14; Lukas 23:1-5; Kuan 18:28-38

¹ Á ta pannawák, naggagammung yù ira ngámin nga kátannangán nga pári, yù ira karakalán, yù ira mesturu ta tunung, áнна yù ira káruán nga makáwayyá. Á nakkaká-ubobuk ira ta meyannung sù akkuád da kâ Apu Kesu. Á bináluk da laguk, nga iniyánga ra kâ Gubinador Pilatto, ta ikeká ra kuna. ² Á iniyabbù ni Gubinador Pilatto kâ Apu Kesu, “Sikaw yù Patul nayù ira Kudio?” Á simibbák si Apu Kesu, á kinagi na, “Kurugán yù kinagim.”

³ Á yù ira kátannangán nga pári, aru yù kinagi ra kâ Gubinador Pilatto nga ipamaliwá da kâ Apu Kesu. ⁴ Á pakaginná ni Gubinador Pilatto ta aru nga kinagi ra, iniyabbù na má kâ Apu Kesu, “Awán panò ta itabbák mu? Arám mu panò naginná yù aru nga ipamaliwá da nikaw?” ⁵ Ngam ari má simibbák si Apu Kesu, á napállá si Pilatto ta pagimammá na.

Pakkagi ra ta Magikáru si Apu Kesu
Mattiu 27:15-26; Lukas 23:13-25; Kuan 18:39–19:16

⁶ Á sù piestá nga panaddamad da ta pattalebák nayù daroban, ajjan yù kustombare ni Gubinador Pilatto nga palubbánga na yù tádday nga nebáluk nga pilian nayù ira tatolay. ⁷ Á ajjan yù tolay nga nebáluk nga mangngágan ta Barabas, nga netádday ngaw sù ira nakikontará ta gubermente. Á aggina namapátay ta paggerrá ra, á yáyù nga inibáluk da. ⁸ Á minay kâ Gubinador Pilatto yù magari nga tatolay, nga makkiddaw ta akkuán na yù kustombare na nira. ⁹ Á iniyabbù ni Pilatto nira, “Ikáyâ naw nu palubbángak ku yù Patul na Kudio?” ¹⁰ Yáyù iniyabbù ni Pilatto nira, ta ammu na ta inikeká nayù ira kátannangán nga pári gapu ta mapassil ira kuna. ¹¹ Ngam pinappatapátu nayù ira kátannangán nga pári yù ira magari nga tatolay, ta kiddawad da galá ta si Barabas yù palubbánga na. ¹² Á iniyabbù na má ni Pilatto nira, “Anni akkuák ku laguk sù tolay nga abbúnan naw ta Patul na Kudio?” ¹³ Á nagagga-aggay ira má nga mapporay, á kinagi ra, “Papatáyam mu! Ipepátá mu ta kurù!” kud da ngámin. ¹⁴ Á kinagi ni Pilatto nira, “Ngattá? Anni yù liwá na?” Ngam nappaná ira nga nagagga-aggay, á kinagi ra, “Papatáyam mu! Ipepátá mu ta kurù!” ¹⁵ Á gapu ta ikáyâ ni Pilatto nga pakáppagan na yù ira tatolay, pinalubbánga na laguk si Barabas. Á kabalín na nangipaligá kâ Apu Kesu, iniyawâ na sù ira suddálu, tapè ipátá da ta kurù.

Yù Panguyoyung nayù ira Suddálu kâ Apu Kesu
Mattiu 27:27-31; Kuan 19:2-3

¹⁶ Á yù ira suddálu, iniyánga ra si Apu Kesu ta námmuák na palásiu nayù Gubinador. Á inagálád da yù ira káruán nga suddálu gapay, á naggagammung ira ngámin. ¹⁷ Á áppè ira naddáyaw kâ Apu Kesu. Á inibarawási ra kuna yù apaddu nga ujjojjin, nga kun na barawási na patul. Á inipe ra sù ulu na yù kuroná nga sí nga nalubik. ¹⁸ Á áppè ira naddáyaw nga nagagga-aggay, á kinagi ra, “Káy! Ajjan yù Patul na Kudio!” ¹⁹ Á pinalapalù da yù ulu na, á nallulutábád da, á namalittúkak ira nga áppè maddáyaw ta arubáng na. ²⁰ Á kabalid da nga nanguyoyung, iniriád da kuna yù barawási nga ujjojjin, á pine ra kuna yù barawási na lápay. Á iniyánga ra ta lawán, tapè papatáyad da ta kurù.

Yù Kepátá ni Apu Kesu ta Kurù
Mattiu 27:32-44; Lukas 23:26-43; Kuan 19:17-27

²¹ Á pangiyánga nayù ira suddálu kâ Apu Kesu, nerapunád da ta dалан si Simon nga taga Sirine, nga yáma ri Alekanduru kâ Rupo, nga naggapu ta ákkomanán na. Á inipakátu ra kuna yù kurù ni Apu Kesu. ²² Á iniyánga ra ta gián nga mangngágan ta Golgota, á yù kebalínán na sù ággubobuk da yù gián na balakábâ. ²³ Á iniyalawâ da kuna yù binaráyáng nga nakkiruk ta uru nga mirrá nga ámmatukkâ ta takí, ngam arán na inalawâ. ²⁴ Á inipátá da sù kurù. Á nabbubúnù ira, tapè natunung yù ábballe ra ta gagámi na.*

* 15:24 Isaya 53:12

²⁵ Á yá pangipátá da kuna yù pannarek na bilák ta ummá. ²⁶ Á netúrâ sù utun na kurù na yù ipangikeká ra kuna nga kunniaw, “Yù Patul na Kudío.” ²⁷ Á nipátá da gapay yù duá nga tulisán ta kurù da, nga nattanggád da si Apu Kesu, tádday sù jìwanán na, á tádday sù jìmigi na. ²⁸ Yáyù nga napalurò yù dán nga netúrâ nga bilin ni Namarò: “Aggina inibiláng da sù ira minálliwâ.”†

²⁹ Á yù ira tatolay nga nattalebák sù kurù, inuyo ra nga binilibilawád da si Apu Kesu. Á kinagi ra kuna, “Asakay! Sikaw yù makkagi ta iwarawarâ mu nakuan yù batu nayù mangilin nga kapilliá, á paddayam mu má ta tallu nga ággaw!‡ ³⁰ Iyigù mu laguk yù baggim! Ámmuluk ka laguk sù kurù,” kud da. ³¹ Á yù ira kátannangán nga pári ána yù ira mesturu ta tunung, inuyoyungád da si Apu Kesu, á makkaká-ubobuk ira, á kinagi ra, “Iniyigù na yù ira káruán nga tatolay, ngam arán na meygù yù baggi na. ³² Nu aggina yù Kiristu nga Pinili ni Namarò, nga Patul na Israel, ámmuluk laguk nakuan sù kurù, tapè masingat tam. Á nu masingat tam, manguruk ittam,” kud da. Á yù ira kábulun na nga nepátá, aggira pay manguyaw kuna.

Yù Pate ni Apu Kesu

Mattiu 27:45-56; Lukas 23:44-49; Kuan 19:28-30

³³ Á ta tangngá na ággaw, nakkallá sù tangapáddabbunán ta tallu oras, áddè ta pannarek na bilák ta púgák. ³⁴ Á ta alas tares ta púgák, nakkatakotol si Apu Kesu, á kinagi na, “Eloy, Eloy, lama sabák tani?” Á yù kebalinán na, “Apu Namarò, Apu Namarò, anni má ta sinájjiam mà?”§ kun na. ³⁵ Á yù ira tatolay nga nanáddak tán, naginná ra. Á kinagi ra, “Ginnán nawè! Agálán na támma si Elias,” kud da, ta arád da ammu yù ággubobuk na.

³⁶ Á nakkarerá yù tádday nga en na iná yù sine na áttabatabbúrù nga nakatáng, á inipasassá na yù nássam nga binaráyáng. Sinubbà na ta káyu, á iniyalawá na kuna, tapè sussutan na. Á kinagi na sù ira naggíraw tán, “Iddagát tam lábbi, tapè masingat tam nu umay si Elias nga mangiyuluk kuna.” ³⁷ Á nakkalli si Apu Kesu ta masikan, á dagarágá nagattá yù inángá na.

³⁸ Á napisil yù nakannak nga kortíná nga nelippak sù lágum nga kangilinán, sù mangilin nga kapilliá ta ili na Jerusalem. Namegapu nga naggadduá yù kortíná ta utun na áddè ta gukák na. Á negiddán sù pate ni Apu Kesu yù paggadduá na. ³⁹ Á aijan yù kapitán na suddálu nga mepagarubáng kâ Apu Kesu. Á pakasingan na ta kagattá nayù inángá na, kinagi na, “Aggina yù kukurugán nga Aná ni Namarò!”

⁴⁰ Á aijan gapay tán yù ira bábbay nga mangirípá kâ Apu Kesu. Á nepulù nira di Maria nga taga Maddala, kári Saloma, kâ Maria nga yená nayù ira duá nga lálláki, di Kusé kâ Ime nga urián na. ⁴¹ Danniaw ira yù siminuttul kâ Apu Kesu nga nangabbák kuna sù keggá na ta Galilia. Á aijan tán gapay aru ira paga nga nepulù kuna sù ánge na ta Jerusalem.

Yù Ketanam ni Apu Kesu

Mattiu 27:57-61; Lukas 23:50-56; Kuan 19:38-42

⁴² Á Biernes yù papparán nayù ira Kudío ta ággibannák da nga Sabadu. ⁴³ Á ta pajjibbà, limibbè ta Jerusalem si Kusé nga taga Arimatia. Aggina yù tádday nga mammaguray nga ipakimore ra. Á iniddagán na gapay yù dattál nayù pammagure ni Namarò ta dabbuno. Á pinataggá ni Kusé yù nonò na, á en na kiniddaw kâ Pilatto yù baggi ni Apu Kesu. ⁴⁴ Á napállá si Pilatto ta pakarámak na ta natayin. Á gapu ta nabbábáng, inipágál na yù kapitán, ta iyabbù na nu natayin. ⁴⁵ Á pakaginná na sù kagian nayù kapitán ta kurugán nga natayin, inipálá na kâ Kusé yù baggi ni Apu Kesu.

⁴⁶ Á giminátáng si Kusé ta puraw nga gámi. Á iniyutták na yù baggi ni Apu Kesu, á binungun na sù gámi nga kapággátáng na. Á pineddá na ta abbù, sù batu nga nakokkobán, á kinarebu na yù dakal nga batu sù tanam. ⁴⁷ Á di Maria nga taga Maddala kâ Maria nga yená ri Kusé, nasingad da yù nangitanamán na kuna.

16

Maginnanolay si Apu Kesu

Mattiu 28:1-8; Lukas 24:1-12; Kuan 20:1-10

¹ Á ta pappasá na Sabadu nga ággibannák da, minay di Maria nga taga Maddala, kári Saloma, kâ Maria nga yená ri Ime, á giminátáng ira ta bábbanguk nga nakkakerumá, tapè ed da denuán yù baggi ni Apu Kesu. ² Á alippánnawák na Liggú, ta apállassáng na bilák, minay

† 15:28 Salmo 22:7 ‡ 15:29 Salmo 22:1 § 15:34 Salmo 22:1

ira sù tanam. ³ Pakalakalakák da paga sù dалан, nakkaká-abbù ira nga kud da, “Asinni yù mangikarebu ta batu nga aijan ta abbù na tanam?” Ta mallakay yù batu. ⁴ Á pakerípá da sù tanam, nasingad da ta nakarebu ngin yù batu, á aringin naserrán yù tanam. ⁵ Á pakáddè da ta tanam, simillung ira, á nasingad da ta jiwánán na lágum na tanam yù bagitolay nga magitubang, nga nabbarawási ta gámì nga puraw nga apaddu. Á pakasingad da kuna, nakaráring ira. ⁶ Á kinagi na nira, “Ari kayu maganássing. Ammù ta aleran naw si Apu Kesu nga taga Nasaret, nga nepátá ta kurù. Ngam awánin saw, ta naginnanolayin. Innan nawè yù nameddád da kuna. ⁷ Á lubbè kayu laguk, ta en naw bì kagian kári Eduru ána yù ira káruán nga tudduán na ta mapolu si Apu Kesu ánnè nira nga umay túrin ta purubinsia na Galilia. Yáyù pakasinganád da kuna, nga kunnay sù kinagi na ngaw nira,” kun nayù bagitolay sù ira bábbay. ⁸ Á nánaw ira ta tanam, á nattálaw ira, ta ikáddagá lâ yù pamippipik da ána nerallà yù kapállá da. Á awán bulubugá ta kinagi ra sù ira nerapunád da gapu ta ikássing da.

Mappasingan si Apu Kesu kâ Maria nga taga Maddala
Mattiu 28:9-10; Kuan 20:11-18

⁹ Á ta pannawák na Liggu, nga mapolu nga ággaw ta tangaligguán, kabalín ni Apu Kesu naginnanolay, nappasingan ta olu kâ Maria nga taga Maddala. Si Maria yù babay nga namalawanán na ta pitu nga anitu. ¹⁰ Á minay si Maria ta gián nayù ira kábulun ni Apu Kesu. Á gikulukuletán ira ta daddam da. Á kinagi na nira ta nasingan na si Apu. ¹¹ Ngam pakaginná ra ta matolay má ngin si Apu Kesu, ána nasingan ni Maria, arád da kinuruk.

Mappasingan si Apu Kesu sù ira Duá nga Sinudduán na
Lukas 24:13-35

¹² Á manganánnuán, nappasingan si Apu Kesu sù duá nga sinudduán na ta pallakák da ta dалан nga umay ta agayyuán, ngam dumá yù paninganád da kuna. ¹³ Á nanoli yù ira duá ta Jerusalem, ta ed da kagian sù ira kábulud da yù ngámin nga nesimmu. Ngam arád da ira gapay kinuruk.

Mappasingan si Apu Kesu sù ira Mapulu Tádday
Mattiu 28:16-20; Lukas 24:36-49; Kuan 20:19-23; Kingnguá 1:6-8

¹⁴ Á kabalín na yaw, limittuák si Apu Kesu nga mappasingan sù ira mapulu tádday nga sinudduán na ta pallalállang da. Á gimmá na ira gapu ta pabbábáng da ána kataggá nayù nonò da, ta arád da garè kinuruk yù kinagi nayù ira nakasingan kuna ta kabalín na naginnanolay. ¹⁵ Á kinagi na laguk ni Apu Kesu nira, “E kayu mangilayalayâ sù napiá nga dámak sù ira ngámin nga tatolay ta ngámin nga lugár. ¹⁶ Á meyígù yù ira nga manguruk ána marigù megapu sù ángnguruk da níkan, á mepattolay ira kâ Namarò ta áddè ta áddè. Ngam yù ira nga ari manguruk, mekanakanâ ira sù pamagikáru ni Namarò.

¹⁷ “Á yù ira manguruk níkan, meyawá nira yù pakáwayyá ra nga mamagaddátu ta makapállá. Á mamalawán ira ta anitu megapu sù pakapangnguá nayù ngágak ku. Á magubobuk ira ta tanakuán nga ággubobuk nga arád da ammu. ¹⁸ Á nu mesimmuád da yù iráw nga maritá onu aijan yù akáppatay sù inumad da, ari ira manganni. Á nu támmitad da yù ira máttakì, mammapiá ira.”

Yù Kálâ ni Apu Kesu ta Lángì
Lukas 24:50-53; Kingnguá 1:9-11

¹⁹ Á kabalín ni Apu Kesu nakiubobuk nira, nálâ ni Namarò ta lángì, á nagitubang ta jiwánán ni Namarò, nga ággitubangán nayù maráyaw. ²⁰ Á nánaw laguk yù ira sinudduán ni Apu Kesu, á minay ira nga mangilayalayâ sù napiá nga dámak ta ngámin nga lugár. Á nangabbák si Apu Namarò nira, ta iniyawâ na nira yù pakáwayyá ra nga mamagaddátu ta makapállá, tapè mepakánámmu sù ira tatolay ta kurugán yù bilid da.

Yù Napiá nga Dámak nga Initúrâ ni Lukas

Yù Meyannung sawe Napiá nga Dámak

Yù ngaw doktor nga mangngágan ta Lukas yù nattúrâ sawe libro. Á yawe yù olu nga libro nga initúrâ na, nga napiá nga dámak nga meyanung kâ Apu Kesu Kiristu nga Mangiyigù, nga netapil megapu nittam ngámin nga tatolay. Isteriá na ta napiá ni Lukas yù keyaná ni Apu Kesu, á ilistá na yù ngágan nayù ira naggaká kâ Apu Kesu, nga namegapu kâ Maria nga yená na ta áddè ngaw kâ Kákay Adan, nga olu nga tolay nga pinarò ni Apu Namarò.

Aru yù istoriá ni Lukas nga awán sù libro nga initúrâ ni Mattiu, onu libro ni Markus, onu libro ni Kuan. Kagian ni Lukas yù pakimállà ni Apu Kesu lage na pinalurò yù ngámin nga inipakuá na kuna ni Namarò nga Yáma na. Á ipakánnámmu na yù panángngák ni Apu Kesu sù ira pobare, ána yù pangikállà na nira. Á ta maporián, kagian na yù ipakuá ni Apu Kesu nittam.

Yù Mayán nayù Libro

Yù Gapu na nga Initúrâ ni Lukas kâ Don Topilu (1:1-4)

Yù Pakkagi nayù Daroban ni Namarò sù Keyaná ni Kuan (1:5-25)

Pakkagi nayù Daroban ni Namarò sù Keyaná ni Apu Kesu (1:26-45)

Yù Paddáyaw ni Maria kâ Apu Namarò (1:46-56)

Yù Keyaná ni Kuan nga Minánnigù (1:57-66)

Yù Nipalappá ni Namarò kâ Sakariá nga Duttál Noka (1:67-80)

Yù Keyaná ni Apu Kesu (2:1-52)

Yù Pangilayalayá ni Kuan nga Minánnigù (3:1-20)

Yù Karigù ni Apu Kesu ána Pamarubá ni Satanas kuna (3:21-4:13)

Yù Pangilayalayá ni Apu Kesu ta Galilia (4:14-9:50)

Yù Ánge ni Apu Kesu ta Jerusalem (9:51-19:27)

Yù Pamaddulò da kâ Apu Kesu ta Jerusalem (19:28-44)

Yù Pangituddu ni Apu Kesu ta Jerusalem (19:45-21:38)

Yù Naporian nga Pakkákád di Apu Kesu ána yù ira Sinudduán na (22:1-38)

Yù Paggápù da kâ Apu Kesu (22:39-23:25)

Yù Pangipátà da kâ Apu Kesu ta Kurù (23:26-56)

Yù Paginnanole ni Apu Kesu (24:1-53)

Yù Gapu na nga Initúrâ ni Lukas kâ Don Topilu

¹ Mattúrákà nikaw nga kopuk ku, Don Topilu. Á aru yù ira tatolay nga nattúrâ ta meyanung sù ngámin nga pinalurò ni Namarò sù giám mi. ² Á yù ira olu nga nakasingan sù nesimmu áddè ngaw pamegapu na, aggira yù mangipakánnámmu sù nasingad da, á mangilayalayá ira sù bilin ni Namarò. ³ Á yáyù nga ginigiámmu ta napiá yù meyanung ta ngámin nga nesimmu, ta napiá ta urè nu itúrâ ku gapay nikaw, Don Topilu. Á pattutuppangak ku ta napiá yù ngámin nga itúrâ ku, ⁴ tapè kánnámmuám mu nu kukurugán yù neparámak nikaw.

Yù Pakkagi nayù Daroban ni Namarò sù Keyaná ni Kuan

⁵ Ta keggá na ngaw ni Patul Erodo nga mammaguray ta Judiya, ajjan yù pári nga Kudio nga mangngágan ta Sakariá, nga nepulú sù ira kábulun na nga pári nga mangngágan ta Kábulun ni Abiya megapu sù ngaw Abiya. Á yù atáwa ni Sakariá si Elisabet, nga ginaká nayù ngaw Aron, nga olu nga pári. ⁶ Á napiá di Elisabet kâ Sakariá ta ánningan ni Namarò. Á matunung yù panuppál da sù ngámin nga taddán ni Namarò ána yù tunung na, á awán ta kapaliwatád da. ⁷ Ngam awán ira ta aná, gapu ta nabbalá si Elisabet, á bakabáká ána lalakáy iren.

⁸ Á jimitál yù passerbi di Sakariá ána yù ira kábulun na nga pári ta arubáng ni Namarò sù mangilin nga kapilliá. ⁹ Á nabbubúnù ira ta kun na kustombare ra, tapè ammu ra nu asinni yù manuggi ta bábbanguk. Á natullá si Sakariá. Á simillung laguk sù mangilin nga kapilliá nga umay manuggi ta bábbanguk. ¹⁰ Á keggá ni Sakariá ta unak na kapilliá, naggián ta lawán yù ira magaru nga tatolay nga makimállà.

¹¹ Á panuggi ni Sakariá ta bábbanguk sù mangilin nga kapilliá, nappasingan kuna yù daroban ni Namarò nga nanáddak sù jiwánan nayù ánnuggián. ¹² Pakasingan ni Sakariá sù daroban, nakaráring. Á nerallá yù assing na. ¹³ Á kinagi nayù daroban kuna:

“Sakariâ, ari ka maganássing, ta naginnâ ni Namarò yù ipakimállà mu. Á sangaw nu manganánnuán, mangáguk yù atáwam, á maganá ta laláki. Ingágam mu ta Kuan. ¹⁴ Á ayatán ka sangaw sù anâ mu. Á aru yù ira tatolay nga mepagayáyâ sù keyaná na.

¹⁵ “Á makáwayyá yù anâ mu ta ánningan ni Namarò. Ari bulubugá mamissán, á mássiki lage na meyaná, mepaggián kuna yù Ikararuá ni Namarò. ¹⁶ Á yáyù nga aru yù ira kábulun na nga ginaká ni Israel nga pabbabawian na ta liwâ da, megapu sù ángngituddu na, tapè manguruk ira kâ Namarò nga Yápu ra. ¹⁷ Á aggina yù mapolu nga umay, tapè ipakánnámmu na sù ira tatolay yù labbè nayù Mangiyígù. Á makáwayyá nga kunnay kâ Elias nga yù ngaw ábbilinán ni Namarò nga mamagaddátu. Á megapu sù pangituddu ni Kuan, mammapiá yù ángngiddù nayù ira giriámán sù ira ánâ da. Á yù ira ari manguruk kâ Namarò, ipakánnámmu na nira yù napiá, tapè manguruk ira gapay ána mepaggittá yù nonò da ta nonò nayù ira manguruk. Yáyù akkuán na, tapè paránan na yù ira tatolay, tapè dán nga naparán ira sù labbè ni Apu.” Yáyù kinagi nayù daroban kâ Sakariâ.

¹⁸ Á kinagi ni Sakariâ sù daroban, “Kunnasi laguk pakánnámmù nu kuruk nga mesimmu yù kagiam mu? Ammum ta lakalákayakin, ána bakabáká gapay yù atáwâ.” ¹⁹ Á simibbák yù daroban, á kinagi na kuna, “Sikán si Gabriel nga daroban ni Namarò. Maggiánâ ta arubáng ni Namarò. Á jinok nangà nga umay nikaw, tapè kagiak ku nikaw yawe napiá nga dámak. ²⁰ Á gapu ta ari ka manguruk sù kinagi nikaw, yáyù nga magumal ka laguk. Á ari ka makobobuk áddè ta kapalurò nayù inittabbâ nikaw. Á kuruk nga mesimmu yù ngámin nga kinagi sangaw nu duttál yù ággo na,” kun nayù daroban.

²¹ Á yù ira tatolay nga naggián sù lawán nayù mangilin nga kapillíá, nabayák ira nga magiddak sù pallawán ni Sakariâ. Á ninononò da nu anni yù inikabayák na. ²² Á manganánnuán, nallowán si Sakariâ sù kapillíá, á ari makobobuk. Á natákál yù ira tatolay ta aijan yù nappasingan kuna ta keggá na sù unak nayù mangilin nga kapillíá. Á nassennias lá nira, ána nagumal lá.

²³ Á ta pappasá nayù ira ággaw nga passerbi ni Sakariâ sù mangilin nga kapillíá, nánaw nga nanoli sù gián na. ²⁴ Á ari kuruk nga nabayák, á nangáguk si Elisabet nga atáwa na. Á yáyù nga naggián lá ta bale ra ta límá nga bulán. ²⁵ Ta kinagi na, “Nepallâ yù allâ ni Apu nikán, ta inabbágán nangà, tapè aringá mappasírán sù ira kábuluk ku,”* kun na.

Pakkagi nayù Daroban ni Namarò sù Keyaná ni Apu Kesu

²⁶ Á sù mekánnam nga bulán nayù kabussi ni Elisabet, jinok ni Namarò si Gabriel nga daroban na ta umay ta ili na Nasaret sù purubinsia na Gallia. ²⁷ Ta inibilin ni Namarò kuna yù kagian na sù magingánay nga naggián tán, nga mangngágan ta Maria. Nakitarátu si Maria sù laláki nga mangngágan ta Kusé. Á si Kusé yù ginaká nayù ngaw Patul Dabid. ²⁸ Á limibbè yù daroban sù gián ni Maria, á kinagi nayù daroban kuna, “Ye, Maria, nga meddù ni Apu! Mapagayáyâ ka, ta mepulù nikaw si Apu,” kun na.

²⁹ Á pakaginnâ ni Maria sù kinagi na, nerallâ yù bagal na. Á ninononò na nu anni yù kebalinán na. ³⁰ Á kinagi nayù daroban kuna, “Ari ka maganássing, Maria, ta nepallâ yù pangikállâ ni Namarò nikaw. ³¹ Á yáyù nga mangáguk ka sangaw, á maganá ka ta laláki nga ingágam mu ta Kesu. ³² Ággina yù Kotunán, á ingágad da ta Anâ ni Namarò. Á pabbalanan ni Apu Namarò ta patul, nga táli nayù ngaw Patul Dabid nga naggaká kuna. ³³ Á mammaguray ta áddè ta áddè sù ira ginaká ni Akup. Á awán ta áddè nayù pammagure na.” Yáyù kinagi nayù daroban kâ Maria.

³⁴ Á kinagi ni Maria sù daroban, “Kunnasi yù kesimmu na yaw, ta awánâ ta atáwa?” ³⁵ Á kinagi nayù daroban kuna, “Umay nikaw yù Mangilin nga Ikararuá, ána malirúmán naka nayù pakáwayyá ni Namarò nga mamagaddátu. Á yáyù nga mangilin yù assítay nga meyaná, á ingágad da ta Mangilin nga Anâ ni Namarò. ³⁶ Á mabussi gapay si Elisabet nga kakanáyum mu, mássiki nu bakabákakin, nga kagiad da ta mabbalá. Á annam nga bulánin yù bussi na. Á maganá sangaw ta laláki. ³⁷ Ta awán ta arán na makuá ni Namarò,” kun nayù daroban. ³⁸ Á kinagi ni Maria, “Sikán yù masserbi kâ Apu. Parè bi ta mesimmu nikán ngámin danniaw nga kinagim,” kun na. Á nánaw yù daroban.

Yù Ánge ni Maria Pattúllun kâ Elisabet

* **1:25** Yù ira ngaw Kudio, kagiad da nu aijan yù babay nga nakiatáwa nga ari naganâ, á yáyù pamággáng ni Namarò kuna. Á iniluddè nayù ira kábulun na nga bábbay.

³⁹ Á ari nabayák, á naggagannuá si Maria, á nánaw ta inapurán na nga umay ta ili sù puddul sù purubinsia na Judiya. ⁴⁰ Á minay sù bale ri Sakariá. Á kinagi ni Maria kâ Elisabet, “Et taka tullúnán, Elisabet. Kunnasi ka?”

⁴¹ Pakaginná ni Elisabet sù ubobuk ni Maria, inikáddagâ na lâ nagguyu ta nasikan yù assitay sù sán na. Á dagarágâ nga minay yù Ikararuá ni Namarò kâ Elisabet. ⁴² Á yáyù nga iniyásikan ni Elisabet yù ngárál na, á kinagi na kâ Maria:

“Mapagayáyâ ka ánnè sù ira ngámin nga bábbay, gapu ta piníli naka ni Namarò. Á mapagayáyâ gapay yù abbing nga iyanâ mu sangaw! ⁴³ Á magayáyákâ megapu sù ángngiparáyom níkán, ta em mà sinullúnán, sikaw nga yená nayù yápù! ⁴⁴ Á ta pakaginnâ sù ubobuk mu, matagenâ ku yù pagayáyâ nayù anâ ku, ta nasikan yù pagguyu na sù sák ku. ⁴⁵ Á pagayáyatan na ka ni Namarò gapay, gapu ta panguruk mu ta palurotan ni Namarò yù ngámin nga kinagi na níkaw.” Yáyù kinagi ni Elisabet.

Yù Paddáyaw ni Maria kâ Apu Namarò

⁴⁶ Á kinagi ni Maria,

“Dayâwak ku si Apu Namarò,
á nepallâ yù paddáyò kuna.

⁴⁷ Á ayatánâ kâ Namarò,
ta aggina yù mangiyígù níkán.

⁴⁸ Á kemámmatán nangâ,
nga tumulù nga masserbi kuna.

Á ta áddè kunangan ta áddè noka,
iparámak nayù ira ngámin nga tatolay
ta sikán yù piníli ni Namarò nga pagayáyatan na.

⁴⁹ Si Namarò yù makáwayyâ ta ngámin,
á makapállâ yù kingnguá na megapu níkán.

Aggina yù kotunán nga mangilin.

⁵⁰ Á ikállâ na yù ira ngámin nga tatolay nga makimoray kuna,
yù ira ngaw olu nga tatolay ánnâ yù ira ginaká ra ta áddè noka.

⁵¹ Ipingan ni Namarò yù pakáwayyâ na nga mamagaddátu,
á pawwarawaratan na yù ira tatolay nga mappeddaráyaw, nga notun yù nonò da.

⁵² Irián na yù ira motun nga patul sù pammagure ra,
á ipotun na yù ira kagukábán nga tumulù, tapè meparáyaw ira.

⁵³ Pakáppagan na ta magannagannuk nga napiá yù ira magáwák.
Ngam yù ira maríku, papanáwan na ira nga awán bulubugâ ta ipáno ra.

⁵⁴ Abbágán na yù ira masserbi kuna,
nga ginaká nayù ngaw Kákay Israel,
ta arán na káttamán yù initabbá na,
nga allâ na nittam nga tatole na ta áddè ta áddè.

⁵⁵ Tuppálan na yù initabbá na ngaw kâ Kákay Abrakam ánnâ yù ira ngaw naggaká nittam,
ta ikákkállâ na ittam nga ginaká ni Kákay Abrakam ta áddè ta áddè.”

Yáyù kinagi ni Maria sù paddáyò na kâ Apu Namarò.

⁵⁶ Á naggián si Maria ta bale ni Elisabet ta tallu bulán. Á pappasâ na tallu bulán, nánaw nga nanoli ta gián na.

Yù Keyaná ni Kuan nga Minánnigù

⁵⁷ Á jimittál yù paganâ ni Elisabet. Á laláki yù iyanâ na. ⁵⁸ Á pakaginná nayù ira karúbá ra ánnâ kanakanáyud da ta meyanung sù makapállâ nga pinalurò ni Apu Namarò megapu kâ Elisabet, mepagayáyâ ira gapay nira.

⁵⁹ Á sù mekawalu nga ággaw nayù abbing, naggagammung yù ira kábulud da ta bale ra, ta tuppálad da yù kustombare ra nga mangugi sù abbing. Á ingágad da nakuan ta Sakariá, nga ngágan nayù yáma na. ⁶⁰ Ngam kinagi nayù yená na, “Ari! Ari mangngágan ta Sakariá, ngam si Kuan yù ngágan na.” ⁶¹ Á kinagi ra kuna, “Ngattá, ta awán gemma ta kanakanáyun naw nga mangngágan ta Kuan!” kud da.

⁶² Á sinenniasád da laguk yù yáma nayù abbing, ta iyabbù da nu anni yù ikáyâ na nga ingágan sù abbing. ⁶³ Á kiniddo ni Sakariá yù pattúratán na, á initúra na, “Kuan yù ngágan na.” Á napállâ ira ngámin. ⁶⁴ Á kabalín ni Sakariá nangitúrâ, dagarágâ nakobobuk, á naddáyaw kâ Namarò. ⁶⁵ Á yù ira ngámin nga karúbá ra, maganássing ira ánnâ nepallâ yù kapállâ da. Á pinassamá da yù dámak ta ngámin nga ili ta puddul na Judiya. ⁶⁶ Á yù ira ngámin nga nakarámak, inipatatam da lâ ta nonò da yù narámak da ta meyanung sù

abbing. Á kinagi ra, “Anni panò laguk yù pabbalinán nayù abbing?” kud da. Ta natákál da ta nepulù kuna yù pakáwayá ni Namarò.

Yù Nipalappâ ni Namarò kâ Sakariâ nga Duttál Noka

⁶⁷ Á minay laguk yù Ikararuá ni Namarò kâ Sakariâ, nga yáma nayù abbing. Á nagubobuk si Sakariâ sù ipakagi nayù Mangilin nga Ikararuá kuna, á kinagi na:

⁶⁸ “Dayáwat tam si Apu Namarò nga pakimorayát tam, sittam nga ginaká nayù ngaw Kákay Israel,

ta en na ittam sinullúnán ni Namarò, ta palubbángan na ittam tapè arán na ittam pagikaruhan.

⁶⁹ Á sinullà ni Namarò yù makáwayyá nga umay nittam mangiyígù.

Aggina yù ginaká nayù ngaw Patul Dabid nga aripan ni Namarò.

⁷⁰ Yáyù inipakánnámmu ni Namarò gári, megapu sù ubobuk na nga inipakagi na ngaw sù ira mangilin nga ábbilinán na.

⁷¹ Initabbá ni Namarò ta iyígù na ittam, tapè arád da ittam aripanan nayù ira malussaw nittam.

⁷² Á palurotan ni Namarò yù initabbá na sù ira ngaw naggaká nittam.

Arán na káttamán yù mangilin nga tarátu na nira nga meyanung sù allà na nittam.

⁷³ Initabbá ni Namarò kâ Kákay Abrakam, nga yù ngaw naggaká nittam,

⁷⁴ ta iyígù na ittam, á ililli na ittam sù panangngal nayù ira malussaw nittam, tapè makapasserbi ittam kuna nga awán ta assing tam.

⁷⁵ Á yawe yù ásserbi tam kâ Namarò, nu napiá yù ángnguruk tam kuna, ána pareku nga matunung yù akkuát tam sù ira kábulut tam ta kággággaw nga keggá tam ta utun na dabbuno.”

⁷⁶ Á kinagi na laguk ni Sakariâ sù aná na,

“Á sikaw, aná ku, sangaw nu dumakal ka, sikaw yù ábbilinán ni Namarò, si Namarò nga Kotunán.

Á mapolu ka nga umay, ta em mu iparámak yù ánge ni Apu, tapè dán nga naparán yù ira tatolay sù labbé na.

⁷⁷ Ipakánnámmu sù ira tatolay ta meyígù ira, megapu sù pamakomá ni Namarò ta liwá da, tapè mesipá ira kuna.

⁷⁸ Á nepallà nga allà ni Namarò nittam.

Á doban na yù mangiyígù nga umay nittam nga naggapu ta lángi,

nga mamannawák ta nonò na tolay nga kunnay ta lassáng na bilák,

⁷⁹ tapè pannawagan na ittam ngámin nga kunnay nga naggián sù kallà, nga ikássing tam yù pate tam.

Á ituddu na nittam yù napiá nga tuttulat tam, tapè mepagimammà ittam kâ Namarò.”

Yáyù áddè nayù kinagi ni Sakariâ, nga inipakagi nayù Mangilin nga Ikararuá kuna.

⁸⁰ Á similluá si Kuan nga aná ni Sakariâ, á napasigaggá yù ángnguruk na kâ Namarò. Á naggián ta kalállammátan ta áddè ta pappasingan na nga mangilayalayá sù ira ginaká ni Israel.

2

Yù Keyaná ni Apu Kesu

Mattiu 1:18-25

¹ Á ta kássite ni Kuan, si Sisar Agosto yù kotunán nga mammaguray ta Roma. Á inibilin na sù ira ngámin nga tatolay ta ngámin nga lugár ta umay ira mappalistá ta ngágad da sù ili nayù ngaw ira naggaká nira. ² Yaw yù olu nga pappalistá nayù ira tatolay, ta keggá ni Kirinu nga gubinator ta Siria. ³ Á minay laguk nappalistá yù ira ngámin nga tatolay sù ili nayù ngaw ira naggaká nira.

⁴ A nánaw laguk di Kusè sù paggianád da ta Nasaret sù purubinsia na Galilia, á minay ira ta Betlekem sù purubinsia na Judiya, nga nakeyanatán na ngaw ni Patul Dabid, gapu ta di Kusè yù ginaká ni Patul Dabid. ⁵ Á minay ira nappalistá ta ngágad da tán, ta nepulù kâ Kusè si Maria nga nakitarátu kuna. Á nabussi si Maria.

⁶ Á keggá ra ta Betlekem, jimittál yù paganá ni Maria. ⁷ Á gapu ta awán ta paggianád da sù áddagátan na álliuk megapu sù káru na tatolay, minay ira sù ággianán na ayám, á naganá si Maria sù kaká nga aná na nga lálaki. Á inappítan na, á pineddá na ta lutung, nga ángngipayyád da ta ipamakád da ta ayám.

Yù ira Daroban nga Mappasingan sù ira Minánnaron ta Karneru

⁸ Á tán nga gabi aijan yù ira mináppárak nga naggián ta kakáddapán nga aranni sù ili na Betlekem, nga matturá nga manaron sù ira karneru ra. ⁹ Á inikáddagá na lâ nappasingan nira yù daroban ni Namarò. Á nanawagán ira sù dalingárang ni Namarò. Á nerallá yù assing da.

¹⁰ Á kinagi nayù daroban sù ira mináppárak, “Ari kayu maganássing, ta minayá tapè ipakánnámmu níkayu yù napiá nga dámak. Á magayáyâ ngámin yù ira tatolay megapu kuna. ¹¹ Ta aijan tán nga ili nayù ngaw Patul Dabid yù assítay nga kapángngiyánâ na kunangane, nga umay mangiyígù níkayu. Aggina yù sinullá ni Apu Namarò nga mammaguray. Aggina si Apu Kiristu nga Yápu tam! ¹² Á yawe yù ánnákkilán naw kuna. Masingan naw sangaw yù assítay nga náppítan nga nepeddá sù lutung,” kun nayù daroban.

¹³ Á kabalin na nakkagi nayù daroban karanniawe, dagarágâ nappasingan yù ira kábulun na nga naggapu ta lángi. Aru ira, á nakkansion ira nga naddáyaw kâ Apu Namarò. Á kinagi ra,

¹⁴ “Meparáyaw si Apu Namarò ta lángi.

Á yù ira tatolay ta dabbuno nga mamagayáyâ kuna, á mapagimammâ ira, tapè napiá yù ággiádá da!”

¹⁵ Á páno nayù ira daroban nga nanoli ta lángi, nakkaká-ubobuk yù ira mináppárak, á kinagi ra, “Et tamin tuke ta Betlekem, ta et tam innan yù assítay nga inipakánnámmu ni Apu Namarò nittam,” kud da. ¹⁶ Á inapurád da laguk nga nánaw, ta ed da aleran yù abbing. Á naratang da di Maria kâ Kusè, á nasingad da yù assítay nga nagiddá sù lutung.

¹⁷ Á pakasingan nayù ira mináppárak sù assítay, inistoriá ra sù ira darakal na yù kinagi nayù daroban ni Namarò nira nga meyanung sù abbing. ¹⁸ Á napállá yù ira ngámin nga nakaginná sù kinagi nayù ira mináppárak. ¹⁹ Á si Maria, pinatattam na ta nonò na yù ngámin nga naginná na, á yáyù ninononò na. ²⁰ Á nánaw yù ira mináppárak, á nanoli ira sù gián nayù ira ayám da, nga maddáyaw kâ Namarò megapu sù ngámin nga nasingad da áanna naginná ra, ta napaluro yù ngámin nga kinagi nayù daroban nira.

²¹ Á sù mekawalu nga ággo nayù assítay, jimittál yù pangugi da kuna, á iningágad da ta Kesu, ta yáyù kinagi nayù daroban ni Namarò kâ Maria lage na kabussi na.

Paddáyo ni Lákay Simion kâ Apu Namarò

²² Á pappasá na appátapulu nga ággaw áddè sù paganâ ni Maria, jimittál yù ággaw nga panuppál da sù tunung ni Moyses nga meyanung sù pamakarenu ta babay nga naganâ. Á minay ira ta Jerusalem, ta umay ira sù mangilin nga kapilliá. Á iniyángo ra yù abbing, ta iyawá da kâ Apu Namarò, tapè dumakal, áanna masserbi kuna. ²³ Ta aijan yù netúrâ nga tunung ni Namarò sù ira ginaká ni Israel, nga kun na, “Ngámin yù ira mapolu nga meyanâ nga lálákí, meyawá ira kâ Apu, tapè mangilin ira nga masserbi kuna.” ²⁴ Á aijan gapay nga netúrâ sù tunung ta iyángo nayù ira darakal na abbing gapay yù ipeyátang da nga duá nga lummun onu duá nga ibbung na kalapáti. Á yáyù sinuppál di Maria kâ Kusè.

²⁵ Á aijan yù lakalákay nga taga Jerusalem nga mangngágan ta Simion. Napiá nga tolay si Simion, nga matunung yù panguruk na kâ Namarò, á mepulupulù kuna yù Mangilin nga Ikararuá. Á ta nabayák nagiddi-iddak ta pamaluro ni Apu sù inittabbá na ngaw sù ira ginaká ni Israel, nga pangiyígù na nira. ²⁶ Á inipakánnámmu nayù Mangilin nga Ikararuá kâ Simion ta ari matay ta áddè ta arán na pakasingan sù MakKiristu nga sinullá ni Apu Namarò ta mangiyígù nira. ²⁷ Á iniyángo nayù Mangilin nga Ikararuá si Simion sù mangilin nga kapilliá. Á yáyù nga aijan tán si Simion sù paddulò di Maria nga pangiyángo ra sù abbing, tapè tuppálad da yù tunung ni Namarò nga meyanung kuna. ²⁸ Á pakasingan ni Simion sù abbing, sinubbâ na kâ Maria nga binállo na. Á jináyo na si Namarò, á kinagi na, ²⁹ “Apu Namarò, ikállá mà, nga aripam mu, á anugutam mu ta matayakin, ta nakáppagakin, gapu ta pinaluro mu ngin yù inittabbám níkán.

³⁰ Ta nasingak ku ngin yù Mangiyígù nga naggapu níkaw,

³¹ nga sinullá mu ngaw ta umay, á aggina yù mepakánnámmu sù ira ngámin makkakerumá nga tatolay.

³² Á kunnay sù nawák, aggina yù mamannawák ta nonò nayù ira ari Kudio, ta ipakánnámmu na nira yù ángngiyígù ni Namarò.

Á yù ira tatolem nga ginaká ni Israel, meparáyaw ira megapu kuna.”

Yáyù kinagi ni Simion, nga inipakánnámmu nayù Mangilin nga Ikararuá kuna.

³³ Á yù ira darakal nayù abbing, napállá ira sù kinagi ni Lákay Simion nga meyanung sù abbing. ³⁴ Á nakimállá si Lákay Simion ta iddukan na ira ni Namarò. Á kinagi na gapay ká Maria, “Yawe aná mu yù sinullà ni Namarò. Á aru yù ira ginaká ni Israel nga meyawáwán megapu kuna, á aru gapay yù ira meyígù megapu kuna. Ta aggina yù pangurugán, ngam aru yù ira mangipuerá kuna. ³⁵ Á yáyù nga mepalappá yù nelímak nga nonò nayù ira tatolay. Á sikaw, mepallá yù daddam mu nga kunnay sù áddujuk na nataram nga píká sù baggim,” kun ni Lákay Simion ká Maria.

Paddáyo ni Bákò Ana ká Apu Namarò

³⁶ Á aijan yù bakabáká, nga ábbilinán ni Namarò nga mangngágan ta Ana, nga aná ni Panuel, á yù ngaw Lákay Aser yù naggaká kuna. Á áddè sù kamagingáne na, pitu ragun yù pattádde na sù atáwa na lage na nabálu. ³⁷ Á nabálu paga, nga walupulu ta appá yù dagun na. Á ta kágággaw minay sù mangilin nga kapillíá, tapè makimoray ká Namarò ána makimállá kuna ta ággaw ána gabi. Á nu káruán, linonán na yù pakákán na. ³⁸ Á pakasingan ni Bákò Ana kári Maria, jimikki nira. Á naddáyaw si Bákò Ana ká Namarò, á kinagi na yù meyanung sù abbing, nga iddamán nayù ira ngámin nga taga Jerusalem ta mamalubbáng sù ira ngámin nga ginaká ni Israel.

Yù Panoli di Kusè ta Nasaret

³⁹ Á kabalid da nattuppál di Maria sù ngámin nga netúrú nga tunung ni Namarò nga meyanung sù naganá ána yù mapolu nga aná na, á nanoli ira ta Nasaret, nga ili ra, sù purubinsia na Galilia. ⁴⁰ Á similluá yù abbing, nga massikan ána malannapán yù ammu na, á iniddù ni Namarò.

Nabattáng si Apu Kesu sù Mangilin nga Kapillíá

⁴¹ Á aijan yù kustombare nayù ira darakal ni Apu Kesu nga manoli ta Jerusalem kádaragun, tapè makipiestá ira sù panaddamán nayù ira ginaká ni Israel sù pattalebák nayù daroban ni Namarò sù ira naggaká nira ta pamapáte na sù ira Egipto. ⁴² Á sù mapulu duá nga dagun ni Apu Kesu, nepulú sù ira darakal na sù ánge ra ta piestá ta kun na kustombare ra.

⁴³ Á ta kabalin na piestá, nánaw di Maria ta manoli ira ta giád da. Ngam nabattáng yù abbing ta Jerusalem, á arád da nánámmuán nayù ira darakal na. ⁴⁴ Kagiad da ta aijan sù ira káruán nga nakipiestá nga mepattoli nira. Á nallakalakák ira ta tangatangággaw. Á sù pagammá da, inala-alek da sù ira kakanáyud da ána kákkopud da nga nepulupulú nira. ⁴⁵ Ngam arád da nálek.

Á sù tádday ággaw, nanoli yù ira darakal ni Apu Kesu ta Jerusalem, ta ed da aleran yù abbing tán. ⁴⁶ Á sù mekatallu nga ággaw, naratang da sù mangilin nga kapillíá nga nepagitubang sù ira lállakalakák nga mamesturu, nga magginná sù kagiad da ána magiyabbú nira. ⁴⁷ Á yù ira ngámin nga nakaginná kuna, napállá ira sù pakánámmu na ána yù napiá nga ákkitabbák na sù ira mamesturu.

⁴⁸ Á pakasingan nayù ira darakal na kuna nga mepagitubang sù ira mamesturu, napállá ira gapay. Á kinagi ni innò na kuna, “Aná ku! Ngattá ta kunniaw kingnguám? Nepallá yù burung mi ká amám nga magala-alek nikaw!” kun na. ⁴⁹ Á kinagi na nira, “Ngattá ta alalalanawá? Arán naw panò ammu ta máwák nga maggiáná sawe bale ni Ammò ku?” kun na. ⁵⁰ Ngam arád da nánámmuán yù kebalinán nayù kinagi na.

⁵¹ Á nepanoli si Apu Kesu sù ira darakal na sù giád da ta Nasaret, á napiá yù ángguruk na nira. Á si innò na, pinatattam na ta nonò na yù ngámin nga kingnguá ni Kesu, nga ninononò na. ⁵² Á jiminakal yù abbing ána nassikan yù baggi na ána nalannapán ta napiá yù ammu na. Á si Apu Namarò ána yù ira ngámin nga tatolay, ayatán ira kuna.

3

Yù Pangilayalayá ni Kuan nga Minánnigù

Mattiu 3:1-12; Markus 1:1-8; Kuan 1:19-28

¹ Á sù mekamapulu límá nga dagun nayù pammagure ni Sisar* Tiberio ta Roma ána ngámin nga dabbun, aijan si Pontius Pilatto nga gubinador ta Judiya. Á si Erodo yù mammaguray sù purubinsia na Galilia. Á si Pilippi nga wagi ni Erodo yù mammaguray sù ira lugár na Ituria ána Taronita. Á si Lisanio yù mammaguray ta Abilena. ² Á di Annas

* 3:1 Yù kebalinán na “Sisar” yù kámanngán nga mammaguray.

kâ Kayapas yù ira kátannangán na pári. Á páppári ra, binilin ni Namarò si Kuan nga aná ni Sakariá ta paggián na ta kalállammatán.

³ Á pakálâ ni Kuan sù bilin ni Namarò, minay laguk ta ngámin nga lugár nga aranni sù danum na Jordan, nga mangilayalayá sù ira ngámin nga tatolay ta mabbabáwi ira áнна likuránád da yù narákè nga akka-akkuád da, áнна makirigù ira laguk tapè mepasingan ta pakomán ni Namarò ira sù liwá da. ⁴ Ta pinalurò ni Kuan yù inipetúrâ ni Namarò ngaw kâ Isaya, nga kinagi na,

“Ajjan yù makkatakotol ta kalállammatán.

Yaw ikatakátol na: ‘Umayin si Apu! Paránan naw yù dалан na.

Tunungan naw yù pallakarán na.

⁵ Á munitán naw yù ngámin nga likkong,

Limpián naw yù ngámin nga puddul, tapè pareku yù pallakarán na.

Tunungan naw yù dалан nga nakkillikillu,

Á linísan naw yù ari nalínis,

⁶ tapè ngámin nga tatolay ta dabbuno,

masingad da laguk yù doban ni Namarò ta mangiyigù nira.’ ”

Yáyù initúrâ ni Isaya ngaw.

⁷ Á pangilayalayá ni Kuan, kitáru yù ira tatolay nga minay makirigù kuna, mássiki arád da inibabáwi yù liwá da. Á yáyù nga kinagi ni Kuan nira, “Kunnay kayu ta ánâ na iráw! Asinni panò nakkagi nikayu ta marigù kayu, tapè ari kayu nakuan mekanakanâ sù pangukum ni Namarò? ⁸ Nu kuruk nga nabbabáwi kayu, likuránán naw laguk yù narákè nga ággangguá naw. Á arán naw kagian ta ari kayu mekanâ sù pamagikáru ni Namarò gapu ta si Lá kay Abrakam yù naggaká nikayu. Ari yù kesipâ naw sù ginaká ni Abrakam yù gapu na nga mesipâ kayu nakuan kâ Namarò. Ta nu ikáyâ ni Namarò, ajjan yù awayyâ na nga pabbalanan yawe ira batu ta ginaká ni Abrakam, nu makúráng ira nakuan. ⁹ Á naporánin yù ángngukum ni Namarò, nga kunnay ta wátay nga ipattukák ta káyú. Á ngámin nga káyú nga jikkù yù bungá ra, tukáran na ira áнна tuggian na ira,” kun ni Kuan.

¹⁰ Á pakaginná nayù ira tatolay ta meyanung sù pangukum ni Namarò, iniyabbù da kâ Kuan, “Anni laguk akkuám mi?” ¹¹ Á kinagi na nira, “Yù tolay nga ajjan yù duá nga barawási na, iyawâ na laguk yù tádday sù awán ta barawási na. Á yù tolay nga egga kanan na, isipâ na gapay yù awán ta kanan na,” kun na. ¹² Á ajjan yù ira mináttuki ta buwì, nga minay gapay tapè makirigù ira kâ Kuan. Á iniyabbù da kuna, “Mesturu, anni laguk yù akkuám mi?” kud da. ¹³ “Nu alawatan naw yù buwì, arán naw passobarán yù apan naw ánnè sù mepánggâ,” kun na nira. ¹⁴ Á ajjan gapay tán yù ira suddálu. Á iniyabbù da kâ Kuan, “Á sikami nga suddálu, anni akkuám mi laguk?” kud da gapay. Á kinagi na nira, “Arán naw akkuán yù ira tatolay áнна arán naw ira iddá nga ikeká tapè apan naw yù kuártu ra. Á magayáyâ kayu lâ sù sueldu naw,” kun na.

¹⁵ Á pakaginná nayù ira tatolay sù kinagi ni Kuan, ninononò da yù initabbá ni Namarò nga meyanung sù MakKirisu nga umay mammaguray. Á nakkaká-abbù ira, á kinagi ra, “Ari panò yawe tolay yù MakKirisu nga iddagát tam?” kud da. ¹⁶ Á yáyù nga kinagi ni Kuan nira ngámin, “Á síkán, jigutat takayu lâ ta danum. Ngam ajjanin sangaw yù umay nga makáwayyâ ánnè níkán, á aringâ mepánggâ nga mangubbák ta kaddang na sapátu na. Á dumá yù ájigù na nikayu, ta iyawâ na nikayu yù Ikararuá ni Namarò, nga kunnay ta ipanigù na nikayu. Ngam sikayu nga tumuttul ta liwá, kunnay ta api yù ipanigù na nikayu, ta mekanakanâ kayu sù pangukum na. ¹⁷ Á labbè na, kunnay sù tolay nga mangisâ ta aggì, tapè pakappián na yù aggì sù ággianán na. Á kunnian yù keyarigán nayù ira tatolay, ta passisinnán ni Apu yù ira manguruk áнна yù ira ari manguruk. Á yù ira manguruk, meiyigù ira. Ngam yù ira ari manguruk, nga kunnay ta attâ nga nesinná sù aggì, metabbá ira sù api nga ari máddâ ta áddè ta áddè.”

¹⁸ Á aru paga yù initabarang ni Kuan sù ira tatolay sù pangilayalayá na sù napiá nga dâmak. Á jinudduák na ira ta pataliád da yù narákè nga ággangguá ra. ¹⁹ Á kinagi ni Kuan gapay kâ Gubinator Erodo ta aru yù liwá na, nepatalugáring ta ginubâ na sù wagi na si Erodo, nga asipák na. ²⁰ Ngam nappaná nga nalliwá si Erodo, ta linnapán na yù ngámin nga liwá na, ta pinukù na si Kuan sù ábbaluran.

²¹ Á ta panigù ni Kuan sù ira tatolay, lage na napukù sù ábbalurán, jinigù na gapay si Apu Kesu. Á pakimállà ni Apu Kesu, nabbuká yù lángì. ²² Á minay kuna yù Ikararuá ni Namarò, nga kun na lummun yù baggi na. Á nappáginná yù ngárál ni Namarò, á kinagi na, “Sikaw yù Aná ku nga iddukak ku, á ayatánà nikaw,” kun na.

*Yù ira Nelistá nga Naggaká kâ Apu Kesu
Mattiu 1:1-17*

²³ Á sù pamegapu ni Apu Kesu sù pangituddu na, tallupulungin yù dagun na. Á yù ira tatolay, kagiad da ta aná ni Kusè.

Á yù káke ni Apu Kesu si Keli.

²⁴ Á yù ammò ni Keli si Matat, yù káke ni Keli si Libi, yù káke na ta siku si Melki, yù káke na ta dulung si Jannay, á yù káke na ta tumang si Kusè.

²⁵ Á yù ammò ni Kusè si Matatias, yù káke ni Kusè si Amos, yù káke na ta siku si Nakum, yù káke na ta dulung si Esli, á yù káke na ta tumang si Naggay.

²⁶ Á yù ammò ni Naggay si Mat, yù káke ni Naggay si Matatias, yù káke na ta siku si Semí, yù káke na ta dulung si Josek, á yù káke na ta tumang si Joda.

²⁷ Á yù ammò ni Joda si Jowanay, yù káke ni Joda si Resa, yù káke na ta siku si Sirubbabel, yù káke na ta dulung si Salatiel, á yù káke na ta tumang si Neri.

²⁸ Á yù ammò ni Neri si Melki, yù káke ni Neri si Addi, yù káke na ta siku si Kosam, yù káke na ta dulung si Elmadam, á yù káke na ta tumang si Er.

²⁹ Á yù ammò ni Er si Josiuwa, yù káke ni Er si Elieser, yù káke na ta siku si Jorim, yù káke na ta dulung si Matat, á yù káke na ta tumang si Libi.

³⁰ Á yù ammò ni Libi si Simion, yù káke ni Libi si Juda, yù káke na ta siku si Kusè, yù káke na ta dulung si Jonam, á yù káke na ta tumang si Eliakim.

³¹ Á yù ammò ni Eliakim si Meleya, yù káke ni Eliakim si Minna, yù káke na ta siku si Mattata, yù káke na ta dulung si Natan, á yù káke na ta tumang si Patul Dabid.

³² Á si Patul Dabid, yù ammò na si Jesse, á yù káke ni Patul Dabid si Obed, yù káke na ta siku si Boas, yù káke na ta dulung si Salmon, á yù káke na ta tumang si Nassion.

³³ Á yù ammò ni Nassion si Amminadab, yù káke ni Nassion si Admin, yù káke na ta siku si Arni, yù káke na ta dulung si Esron, á yù káke na ta tumang si Peres, nga aná ni Juda.

³⁴ Á yù ammò ni Juda si Akup, yù káke na si Isak, yù káke na ta siku si Abrakam, yù káke na ta dulung si Tera, á yù káke na ta tumang si Nakor.

³⁵ Á yù ammò ni Nakor si Seruk, yù káke ni Nakor si Ragaw, yù káke na ta siku si Peleg, yù káke na ta dulung si Eber, á yù káke na ta tumang si Selak.

³⁶ Á yù ammò ni Selak si Kaynan, yù káke ni Selak si Arpaksad, yù káke na ta siku si Sem, yù káke na ta dulung si Noe, á yù káke na ta tumang si Lamek.

³⁷ Á yù ammò ni Lamek si Lákay Matusala, yù káke ni Lamek si Enok, yù káke na ta siku si Jared, yù káke na ta dulung si Makalaliel, á yù káke na ta tumang si Kenan.

³⁸ Á yù ammò ni Kenan si Enos, yù káke ni Kenan si Set, yù káke na ta siku si Kákay Adan.

Á si Kákay Adan yù aná ni Apu Namarò.

4

*Yù Pamarubá ni Satanas kâ Apu Kesu
Mattiu 4:1-11; Markus 1:12-13*

¹ Á kabalin na nakirigù ni Apu Kesu kâ Kuan nga Minánnigù, nánaw sù danum na Jordan. Á nepulù kuna yù Ikararuá ni Namarò, á iniyánge na si Apu Kesu ta kalállammatán. ² Á paggián na ta kalállammatán ta appátapulu nga ággaw, pinarubán ni Satanas nga liwatan. Á ari bulubugá kiminán ta paggián na tán. Á kabalin nayù appátapulu nga ággaw, nepallá yù bisin na. ³ Á kinagi ni Satanas kuna, “Nu kuruk nga aná naka ni Namarò, pabbalinam mu yawe batu ta kanam.” ⁴ Á simibbák si Apu Kesu, á kinagi na, “Ajjan yù inipetúrâ ni Namarò nga kinagi na, ‘Ari lá yù kanan yù ipakkatole na tolay,’” kun na.

⁵ Á iniyánge ni Satanas si Apu Kesu sù kátannangán nga puddul, á inipasingan na yù ira ngámin páppatulán ta dabbuno. ⁶ Á kinagi ni Satanas kuna, “Masingam mu dannawe ngámin nga nakástá nga páppatulán ta dabbuno. Á iyawâ ku nikaw yù pakáwayyám sù ira ngámin nga masingam mu. Ta yáyù gemma ngin yù neyawâ níkan, á makáwayyángá nga mangiyawâ sù gustù nga pangiyawatán. ⁷ Á sikaw laguk yù pangiyawaták ku nu

mamalittúkak ka nga makimoray ta arubáng ku,” kun ni Satanas kâ Apu. ⁸ Á simibbák si Apu Kesu, á kinagi na, “Ajjan yù inipetúrâ ni Namarò nga kun na, ‘Si Apu Namarò lâ yù pakimorayám mu, á aggina lâ yù pangurugám mu!’ ” kun na.

⁹ Á iniyánge ni Satanas si Apu Kesu ta Jerusalem. Á inipun na sù bubbungán nayù mangilin nga kapilliá. Á kinagi na kuna, “Nu kuruk nga anâ naka ni Namarò, makkassú ka laguk ta gowang. ¹⁰ Ta ajjan yù inipetúrâ ni Namarò nga kun na, ‘Ipataron naka ni Namarò sù ira daroban na.’

¹¹ Á ajjan gapay yù netúrâ nga kun na, ‘Tanggalád daka, tapè ari ka bulubugá manganni, á mássiki nu takkim, ari ira mabigarán.’”

¹² Ngam simibbák si Apu Kesu, á kinagi na, “Wan á, ngam ajjan gapay yù netúrâ ta ‘Arám mu parubán si Apu nga Namarò nikaw,’ ” kun na. ¹³ Á kabalín ni Satanas namarubá kâ Apu Kesu ta ngámin nga makkakerumá nga mamalliawá, á nánawán na lábbi.

*Yù Pamegapu ni Apu Kesu nga Mangilayalayâ ta Galilia
Mattiu 4:12-17; Markus 1:14-15*

¹⁴ Á nanoli laguk si Apu Kesu ta Galilia. Á ajjan kuna yù pakáwayyá nayù Mangilin nga Ikararuá ni Namarò. Á nassamá yù dámak nga meyanung kuna sù ira ngámin nga páppatulán. ¹⁵ Á minay nangituddu sù ira kapilliá ra. Á ngámin ira nga tatolay, naddáyaw ira kuna.

*Yù Panaki nayù ira taga Nasaret kâ Apu Kesu
Mattiu 13:53-58; Markus 6:1-6*

¹⁶ Á nakáddè si Apu Kesu ta Nasaret nga naddakalán na. Á ta Sabadu nga ággibannák nayù ira Israel, minay má sù kapilliá ra, ta yáyù kustombare na. Á minay nanáddak ta arubáng da, ta inikáyâ da nga mabbibbik sù netúrâ nga ubobuk ni Namarò. ¹⁷ Á iniyawá da kuna yù nalukú nga nangitúratán ni Isaya, nga yù ngaw ábbilinán ni Namarò. Á binullarán na, á nálek na yù gián nayù ikáyâ na bibbiran nira. Á yawe yù binibbik na:

¹⁸ “Yù Ikararuá ni Apu Namarò yù kapulupulú ku. Ta sinullá nangá ta ek ku ilayalayâ yù napiá nga dámak sù ira pobare.

Á jinok nangá ta ek ku ilayalayâ sù ira nabáluk yù pamalubbáng ni Namarò nira.

Á pagimmulagak ku yù ira buling ámma ábbágák ku yù ira marigirigá.

¹⁹ Á ek ku gapay ilayalayâ ta jimittálin yù pangikállá ni Apu sù ira tatolay.”

²⁰ Á kabalín na nabibbik ni Apu Kesu, nilukú na yù netúratán na bilin, á initali na sù nangiyawá kuna. Á nagitubang laguk, tapè ituddu na nira. Á yù ira ngámin nga tatolay tán, jinúlangád da. ²¹ Á kinagi na nira, “Ta pakaginná naw, napalurokin yù ubobuk ni Namarò nga binibbik ku.” ²² Á yù ira ngámin nga nakaginná, napállá ira megapu sù napiá nga ubobuk na, á kinagi ra, “Kuruk nga napiá yù kagian na. Á ari panò aggina yù anâ ni Kusè?” kud da.

²³ Á kinagi ni Apu Kesu nira, “Ikáyâ naw támma kagian nikán yù dán nga nakagi nayù ira lállakalákay, nga kun na, ‘Doktor, pammapiám mu yù baggim lápay.’ Yáyù kagian naw, ta arán naw garè kurugan. Á ikáyâ naw nu akkuák ku sawe giát tam yù kunnyay sù narámak naw nga kingngikingnguá ta Kapernium. ²⁴ Ngam yawe yù kagiak ku nikayu, ta awán bulubugá ta ábbilinán ni Namarò nga pakimorayád da sù gián nga naddakalán na. ²⁵ Á ta ángngarigán á, ammu naw yù ngaw nesimmu sù keggá na ngaw ni Elias nu ari nagurán ta tallu ragun ta gadduá, á nassamá yù bisin ta ngámin nga dabbun. Á kuruk ta aru yù ira bálu nga kelían na. ²⁶ Ngam arán na jinok ni Namarò sù ira kagittá na nga naggián ta Israel, ta jinok na lá ta en na ábbágán yù tádday nga bálu nga ari Kudío, nga naggián sù ili na Serepta ta lugár na Sidon.

²⁷ “Otturu, sù keggá na ngaw gapay ni Elisio nga ábbilinán ni Namarò, aru yù ira Kudío nga taga Israel nga naggogong, á awán bulubugá ta pinammapiá ni Elisio nira, ngam si Naaman lá nga taga Siria nga ari Kudío,” kun ni Apu Kesu.

²⁸ Á yù ira ngámin nga tatolay sù kapilliá, pakaginná ra sù kinagi ni Apu Kesu, napporay ira kuna. Á nerallá yù pore ra. ²⁹ Á ikáddagá da gimikkáng, á ginuggud da. Á pinalawád da ta ili, á iniyánge ra sù tappáng, tapè itabbá da nakuan. ³⁰ Ngam nattalebák sù tangngá nayù ira magariu nga tatolay, á nánawán na ira.

*Yù Pamammapiá ni Apu Kesu sù Nagunagán
Markus 1:21-28*

³¹ Á nánaw laguk si Apu Kesu ta Nasaret, nga gimitták nga nanoli ta Kapernium sù purubinsia na Galilia gapay. Á ta Sabadu nga ággibannák da, minay sù kapilliá ra, tapè tudduán na ira. ³² Á napállá ira ngámin sù ángngituddu na, á ta makáwayyá gemma yù ággubobuk na.

³³ Á aijan sù kapilliá yù nagunagán na anitu, á nakkalli, á kinagi na ká Apu Kesu, ³⁴ “Ye! Kesu nga taga Nasaret, anni iniyángem saw? Arám mu kami akkuán! Ammu taka. Sikaw yù mangilin nga naggapu ká Namarò!” kun nayù anitu. ³⁵ Ngam gimmá ni Apu Kesu yù anitu, á kinagi ni Apu kuna, “Magimammà ka, á pánawám mu yù tolay!” Á inilappák na laguk nayù anitu yù nagunagán na ta arubáng nayù ira tatolay, á nallawán kuna. Á mássiki natombá yù tolay, ngam ari nanganni. ³⁶ Á napállá yù ira nga naggagammung tán, á nakkaká-ubobuk ira, á kinagi ra, “Anni ngillá yù pakáwayyá nayù ubobuk na! Gammán na yù ira anitu, á kurugad da áнна mallawán ira sù nagunagád da!” kud da. ³⁷ Á nassamá yù dámak nayù kingnguá na sù ngámin nga lugár nga aranni ta Kapernium.

Kitáru yù Pinammapiá ni Apu Kesu

Mattiu 8:14-17; Markus 1:29-34

³⁸ Á kabalín ni Apu Kesu nangituddu nira, nánaw ta kapilliá nga minay sù bale ri Simon Eduru. Á nakkulikuk yù katugángán ni Simon, á inikomá ra bi ká Apu Kesu megapu kuna, ta nerallá yù kulikuk na. ³⁹ Á jimikkì si Apu Kesu sù babay nga nagiddá nga nataki, á gimmá na yù kulikuk na. Á dagarágá nakkáppù yù babay, á gimikkáng laguk nga minay namagon, tapè mepakkákán ira. ⁴⁰ Á lammak na bilák, iniyánge ra ká Apu Kesu nayù ira tatolay yù ira nga máttaki ta makkakerumá nga tulágan. Á simmì na ira ngámin nga taggitádday, á pinammapiá na ira. ⁴¹ Á aru gapay yù ira anitu nga pinalawán na sù ira nagunagán. Á pallawád da, nakkalli ira, á kinagi ra, “Sikaw yù Aná ni Namarò.” Ngam gimmá na ira ta arán na inanugù yù pakkagi ra, gapu ta ammu ra ta aggina yù MakKíristu nga sinullá ni Namarò ta mammaguray.

Pappasiár ni Apu Kesu nga Mangilayalayá sù Bilin ni Namarò

Markus 1:35-39

⁴² Á ta alippánnawák, nánaw si Apu Kesu nga minay ta nalappang nga lugár. Á ed da ala-aleran nayù ira tatolay. Pakálek da kuna, igaggak da nakuan ta arán na ira pánawán. ⁴³ Ngam kinagi na nira, “Pánawát takayu, ta máwák nga ek ku ilayalayá sù ira káruán na ili gapay yù napiá nga dámak nga meyanung sù pammagure ni Namarò, ta yáyù gemma yù gapu na jinok nangá ni Namarò,” kun na. ⁴⁴ Á minay laguk nangilayalayá sù ira kapilliá nayù ira Kudío sù ira káruán nga ili ra.

5

Yù Pagágál ni Apu Kesu sù ira Napolu nga Sinudduán na

Mattiu 4:18-22; Markus 1:16-20

¹ Á sù tádday ággaw, minay si Apu Kesu sù karek na Bebay na Gennesaret. Á kitáru yù ira tatolay nga jimináddán kuna. Á maddarassil ira, tapè ginnád da yù bilin ni Namarò nga ilayalayá na. ² Á nasingan na yù duá nga barangay nga nereddè sù karagátán, nga nánawán nayù ira minággissirá, ta ed da baggawán yù ira tabukul da. ³ Á nappittá si Apu Kesu sù barange ni Simon, á kinagi na ta ipatangngá na yù barangay ta baddì. Á nagitubang si Apu Kesu nga nangituddu sù ira magaru nga tatolay nga naggián ta karagátán.

⁴ Á kabalín ni Apu Kesu nangituddu nira, kinagi na ká Simon, “Patangngám mu bi tuke alaram, á itán naw yù ira sansoru tán, tapè makálá kayu ta aru,” kun na. ⁵ Á simibbák si Simon, á kinagi na, “Mesturu, tangatangabi kami sù gabi nga nassansoru, á awán bulubugá ta nálá mi. Ngam nu dobak kami, á itám mi laguk,” kun na. ⁶ Á kabalid da nanuppál sù kinagi na, kitáru yù nálá da, á maddaggun mapisil yù sansoru ra. ⁷ Á pinayápayád da yù ira kábulud da sù tádday nga barangay, ta ed da ira abbágán. Á minay ira gapay, á pinnu ra yù ira duá nga barangay ta sirá, áddè ta maddaggun ira lummak sù kárammá nayù kárgá ra.

⁸ Á pakasingan ni Simon Eduru sù nesimmu, namalittúkak ta arubáng ni Apu Kesu, á kinagi na kuna, “Pánawám mà, Apu, ta mappasiráná nikaw, ta minálliwáká garè!” kun na. ⁹ Ta napállá di Eduru áнна yù ira kábulud na sù káru nayù sirá nga nálá da. ¹⁰ Á napállá gapay di Ime ká Kuan, nga ánná ni Sebedo nga mepattarabáku ká Simon sù tádday nga barangay. Á kinagi ni Apu Kesu ká Simon, “Ari ka lâ maganássing. Aringin sirá yù tarabakuan naw,

ta dobat takayu ta umay kayu mangapá ta tatolay nga umay metádday níkán,” kun na. ¹¹ Á pakaginná ra sù kinagi na, inireddé da yù ira barange ra sù karagátán, á nánawád da ngámin tapé tuttulad da si Apu Kesu.

*Yù Pamampapiá ni Apu Kesu sù Naggoggong
Mattiu 8:1-4; Markus 1:40-45*

¹² Á sù tádday ággaw, limibbè si Apu Kesu sù tádday nga ili. Á aijan tán yù tolay nga naggoggong. Á pakasingan na ká Apu, minay namalittúkak nga nallakak ta arubáng na, á inikomá na kuna, “Apu, nu ikállà mà, á pampapiám mà bìl” kun na. ¹³ Á sinonná ni Apu Kesu yù limá na, á sinámmi na yù naggoggong, á kinagi na, “Wan gemma. Mampapiá ken!” kun na. Á dagarágá nampapiá yù tolay sù tulágan na. ¹⁴ Á sinaddánán ni Apu Kesu, á kinagi na kuna, “Arám mu iparámak yawe kingnguá níkaw. Em mu lâ ipasingan yù baggim sù pári, tapé mánnámmuán na ta nári ngin yù tulágam mu. Á ipeyátáng mu kuna yù kinagi ni Moyses, nga netúrá sù tunung na, tapé manguruk gapay yù ira tatolay ta kuruk nga nampapiá ken,” kun ni Apu Kesu kuna.

¹⁵ Á mássiki nu kinagi ni Apu Kesu sù tolay ta arán na iparámak yù nesimmu kuna, ngam nassamá paga yù dámak nga meyanung sù kingnguá ni Apu Kesu, á kitáru yù ira jimibbuáng kuna, tapé maginná ra yù ituddu na áнна pampapián na ira gapay sù ira tulágad da. ¹⁶ Á nallilli sù ira tatolay, á minay nga kunnay sù kustombare na ta nalappang nga lugár nga makimállà ká Namarò.

*Yù Pamampapiá ni Apu Kesu sù Tolay nga Nabbannak yù Baggi na
Mattiu 9:1-8; Markus 2:1-12*

¹⁷ Á sù tádday ággaw nga pangituddu ni Apu Kesu, aru yù ira tatolay nga magginná kuna. Á aijan gapay yù ira Parisio áнна yù ira mangituddu sù tunung ni Moyses, nga naggapu ta ngámin nga ili sù ira purubinsia na Galilia áнна Judiya áнна yù ili na Jerusalem gapay. Á aijan ká Apu Kesu yù ámmagaddátu ni Namarò nga mamampapiá sù ira máttaki. ¹⁸ Á limibbè laguk yù ira mangisu sù tolay nga nabbannak yù baggi na. Á itallung da nakuan sù balay, tapé ipeddá ra ta arubáng ni Apu Kesu. ¹⁹ Ngam arád da máwayyá gapu sù káru na tatolay. Á yáyù nga iniyuné da ta atá na balay, á binobbotád da yù atá. Á inilabbú da yù matakì nga inayáyud da nga pineddá sù arubáng ni Apu Kesu. ²⁰ Á pakasingan ni Apu Kesu sù kingnguá ra, natákál na yù ángngikatalà da kuna. Á kinagi na laguk sù matakì, “Kopun, napakomá ken sù ira liwiliwá mu,” kun na.

²¹ Á pakaginná ra sù kinagi ni Apu Kesu, nakkaká-anasá yù ira mangituddu sù tunung ni Moyses áнна yù ira Parisio nga aijan tán, á kinagi ra, “Tolay lâ yaw, á ngattá, ta igittá na yù baggi na ká Namarò, ta asinni panò yù mamakomá ta liwá nu ari lâ si Namarò? Ngattá, ta kunniaw yù ággubobuk na!” kud da. ²² Ngam ammu ni Apu Kesu yù nononopad da, á simibbák nira, á kinagi na, “Ngattá, ta kunnian yù nononopan naw! ²³ Anni panò yù ikáyá naw nakuan nga kagiak ku sù tolay nga kun na natay yù baggi na? Ta mabbábáng kayu megapu sù kinagi kuna nga, ‘Napakomá ngin yù ira liwiliwá mu.’ Á nu kuk ku lâ, ‘Gumikkáng ka, á mallakák ka,’ á manguruk kayu panò? ²⁴ Ngam nu masingan naw ta nampapiá yawe tolay megapu sù ubobuk ku, á kánnámmuán naw laguk ta makáwayyángá gapay sawe dabbuno nga mamakomá ta liwá, sikán nga Kaká na ngámin na tatolay,” kun ni Apu Kesu nira.

Á kinagi na laguk ni Apu Kesu sù matakì, “Yáyù nga kagiak ku níkaw. Gumikkáng ka. Apam mu yù nagiddám mu, á lubbè ka ta balem,” kun na. ²⁵ Á dagarágá gimikkáng yù matakì ta arubáng da ngámin. Á iná na yù nagiddán na, á nánaw ta lubbè ta bale na, nga maddáyaw ká Namarò. ²⁶ Á ngámin yù ira nakasingan, nerallá yù kapállá da, á naddáyaw ira gapay ká Namarò. Á kinagi ra, “Nasingat tam yù kuruk nga makapállá ta ággawol!” kud da ngámin.

*Pagágál ni Apu Kesu ká Libi
Mattiu 9:9-13; Markus 2:13-17*

²⁷ Á kabalin ni Apu Kesu namampapiá sù tolay nga nabbannak yù baggi na, nánaw laguk. Á pallakák na, nasingan na yù tolay nga mangngágan ta Libi, nga mináttuki ta buwí, nga nagitubang sù upisína na. Á kinagi ni Apu Kesu kuna, “Tuttulam mà,” kun na. ²⁸ Á dagarágá gimikkáng si Libi, á nánawán na ngámin yù kukuá na tán, á siminuttul kuna.

²⁹ Á inapá na laguk ni Libi yù ira kákkopun na áнна di Apu Kesu sù bale na, tapé mepallálláng ira kuna nga mangiparáyaw ká Apu Kesu. Á aru yù ira kákkopun ni Libi nga minay, nepatalugáring sù ira kábulun na nga mináttuki ta buwí.

³⁰ Á pakasingan nayù ira Parisio ána yù ira kábulud da nga mangituddu sù tunung ni Moyses ta mepallálláng di Apu Kesu ta gián ni Libi, naddagaragim ira sù ira sinuudduán ni Apu Kesu. Á kinagi ra nira, “Ngattá, ta mepallálláng kayu sù ira minálliwá, nepatalugáring sù ira mináttuki ta buwì!” kud da nira. ³¹ Á si Apu Kesu yù simibbák nira, á kinagi na, “Ari yù ira napiá yù gawagawáyád da yù magáwák ta minángnguru, nu ari galá yù ira máttaki. ³² Á yáyù iniyángè saw, ta ek ku pabbabawian yù ira minálliwá. Aringà umay nga magágál sù ira nga kagiad da ta awán ta liwá da, nu ari galá ta umayà nga magágál sù ira nga ammu ra yù liwá da, tapè mabbabáwi ira,” kun na.

*Yù Meyannung sù Kustombare ra nga ari Kumán ta Pakimállà da kâ Namarò
Mattiu 9:14-15; Markus 2:18-20*

³³ Á aijan yù ira nga minay nagiyabbù kâ Apu Kesu, á kinagi ra, “Yù ira makituddu kâ Kuan nga Minánnigù, sigidá ra ngilinan yù ággaw nga ari ira kumán tapè makimállà ira kâ Apu Namarò. Á kunnian gapay yù kustombare nayù ira makikultu sù ira Parisio. Ngam yù ira makituddu nikaw, sigidá ira kumán ána ámminum. Ngattá ta arád da tuttulan yù kustombare nga ari kumán?” kud da. ³⁴ Á simibbák si Apu Kesu, á kinagi na, “Á ta ángngarigán, nu aijan yù bodá, á yù ira álliuk nga makibodá, arád da gemma lonán yù pakkákád da, ta mepallalálláng ira ngámin sù nobiu. Á aijanakin lâ paga nga kunnay sù nobiu sù ira makituddu nikan. Á yáyù nga kumán ira. ³⁵ Ngam duttál yù ággaw nga kepáno nira, á yáyù nga lonád da laguk yù pakkákád da megapu sù daddam da nikan,” kun na.

*Yù Keyarigán nayù Dán nga Kustombare ána Bagu
Mattiu 9:16-17; Markus 2:21-22*

³⁶ Á kinagi na paga ni Apu Kesu yù tádday nga ángngarigán na, tapè ipakámmamu na nira ta ari máyá nu tuttulad da yù dán nga kustombare ra nu ikáyá da nga tumuttul sù bagu nga ituddu na. Á kinagi na, “Awán ta magappíl ta bagu sù dán. Á nu kunnian yù akkuán na nakuan, mapittang yù dán, á mapisil, ta ari negittá gapay yù bagu sù dán. ³⁷ Á ta kunnian gapay sù ira mappadday ta binaráyáng. Awán ta mangipay ta tabbuk na úbas sù dán nga ággianán na nga tabbi, marakè mabattá sangaw yù tabbi. Á metabbà laguk yù tabbuk, á kengá lâ yù binaráyáng ána yù ággianán na gapay. ³⁸ Ngam yawe yù máwák nga akkuád da. Ipe ra yù bagu nga tabbuk ta bagu nga ággianán na nga tabbi,” kun na. ³⁹ Á kinagi na gapay yù meyanung sù tolay nga molang na patalián yù dán nga ággangngua na, nga kun na, “Á ta ángngarigán, nu aijan yù tolay nga mamissán, á nu napenám sù dán, arán na ikáyá yù bagu, gapu ta kagian na ta napiá yù dán ánnè sù bagu.”

6

*Yù Meyannung ta Sabadu, nga Ággibannák da
Mattiu 12:1-8; Markus 2:23-28*

¹ Á tádday nga Sabadu, nga ággibannák nayù ira Kudio, nallakák di Apu Kesu nga mattalebák ta ákkomanán. Á yù ira makituddu kuna, inurù da yù bungá na ammay, á binussilád da ta jinum da. ² Á pakasingan nayù ira Parisio sù kingnguá ra, inibúyá ra ira, nga kud da, “Ngattá, ta magiurù kayu ta ammay sù ággaw nga ággibannák? Ta kunnay ta maggaták kayin, á arán na anugutan nayù tunung tam yù maggaták sù ággaw nga ággibannák,” kud da.

³ Á simibbák si Apu Kesu nira, á kinagi na, “Á arán naw panò paga binibbik yù kingnguá ra ngaw di Patul Dabid ána yù ira kábulun na ta kabisid da? ⁴ Simillung si Dabid sù bale ni Namarò, á iná na yù pán nga mangilin nga meyatáng kâ Apu, á iniyawá na gapay sù ira kábulun na. Á kagian nayù tunung tam ta awán ta makáwayyá nga makkákán nu ari galá yù ira pári. Ngam arán na liwá ni Dabid, mássiki nu kinán na ána inipamakán na sù ira kábulun na.” ⁵ Á kinagi ni Apu Kesu paga, “Sikán, nga Kaká na ngámin na tatolay, sikán yù makáwayyá nga makkagi sù mepángngà ána mepugik nga akkuán na tolay sù ággaw nga ággibannák,” kun na.

*Pamammapiá ni Apu Kesu sù Tolay nga Nassesseng yù Limá na
Mattiu 12:9-14; Markus 3:1-6*

⁶ Á sù tádday nga Sabadu, nga ággibannák, minay si Apu Kesu sù kapilliá na Kudio, tapè mangituddu. Á aijan tán yù tolay nga nassesseng yù limá na nga jiwánan, nga arán na masonná. ⁷ Á yù ira Parisio ána yù ira mangituddu sù tunung ni Moyses, sinissimmurád da si Apu Kesu, tapè masingad da nu mamammapiá sù ággaw nga ággibannák, ta ikáyá da nga ikeká. ⁸ Ngam ammu ni Apu Kesu yù nonopad da. Á kinagi na sù tolay nga nassesseng

limá na, “Kopun, e ka bi manáddak sawe arubáng mi,” kun na. Á gimikkáng yù laláki nga minay nanáddak sù gián ni Apu Kesu.

⁹ Á keggá nayù tolay nga nassesseng limá na ta arubáng da, kinagi na laguk ni Apu Kesu sù ira tatolay, “Ajjan bi iyabbù ku nikayu. Anni yù anugutan nayù tunung nga akkuát tam sù ággaw nga ággibannák? Abbágát tam yù ira kábulut tam, onu akkuát tam ira? Anni yù kustu nga akkuát tam? Yù panole tam ta tolay onu pamapáte tam?” kun na. ¹⁰ Á iningan na yù ira ngámin nga ari makkituk. Á kinagi na laguk sù tolay nga nassesseng yù limá na, “Sonnatám mu yù limám,” kun na. Á sinonná na. Á ta panonná na kuna, dagarágá nammapiá ngin. ¹¹ Ngam yù ira Parisio ána yù ira mangituddu sù tunung, nepallá yù pore ra ká Apu Kesu, á nakkaká-ubobuk ira nu anni yù akkuád da kuna.

*Panullá ni Apu Kesu sù ira Mapulu duá nga Minánngilayalayá
Mattiu 10:1-4; Markus 3:13-19; Kingnguá 1:12-13, 26*

¹² Pappasá na yaw, gimimon si Apu Kesu ta puddul, tapè umay makimállà ká Namarò. Á tangatangabi nga nakimállà tán. ¹³ Á ta alippánawák, inagálán na yù ira makituddu kuna, á sinullá na nira yù ira mapulu duá, nga iningágan na ta minánngilayalayá. ¹⁴ Aggira di Simon nga iningágan na ta Eduru, ána yù wagí na nga si Andares, á di Ime ká Kuan, di Pilippi ká Bartolome, ¹⁵ di Mattiu, ká Tomá, á si Ime nga tádday, nga aná ni Alpío, ána si Simon nga tádday nga abbúnad da ta Mengal sù ággubobuk da, ¹⁶ á si Kudas, nga aná ni Ime, ána si Kudas Iskariote, nga nabbalin nga mappagápù ká Apu Kesu sù ira Kudío nga nalussaw kuna.

*Yù Pangituddu ni Apu Kesu ána Pamammapiá na sù ira Máttaki
Mattiu 4:23-25*

¹⁷ Kabalin ni Apu Kesu nanullá nira, minutù ira ngámin sù puddul nga minay ta aláwa nga lugár. Á ajjan nga naggagammung tán yù ira káruán nga makituddu kuna ána yù ira magari gapay nga naggapu ta Jerusalem ána káruán nga ili gapay sù purubinsia na Judiya, ána yù ira nga naggapu sù duá nga ili ta aggik na bebay, nga Tiro ána Sidon, tapè maginná ra yù ituddu na ána iddagá da yù pamammapiá na sù tulágad da. ¹⁸ Á minay gapay yù ira buruburionán nayù ira anitù, á pinammapiá na ira gapay. ¹⁹ Á yù ira ngámin nga magari, pinarubád da siniggek si Apu Kesu. Á ngámin yù ira naniggek kuna, nammapiá ira megapu sù ámmagaddátu na.

*Yù ira Pagayáyatan ni Namarò ána yù ira Pagikaruan na
Mattiu 5:1-12*

²⁰ Á nallipay si Apu Kesu sù ira makituddu kuna, á kinagi na nira, “Napiá yù ággián naw, sikayu nga tumulù nga magáwák!

Ta mapagayáyâ kayu sangaw, gapu ta mesipâ kayu sù pammagure ni Namarò.

²¹ “Napiá yù ággián naw, sikayu nga makkaragá nga makituddu níkan ána manuppál sù ipakuá ni Namarò nikayu!

Mapagayáyâ kayu sangaw, gapu ta pakáppagan na kayu sangaw ni Namarò, nga kunnay sù mabisin, nga mappálâ ta kanan na.

Á napiá yù ággián naw, sikayu nga maraddam nga makkulè!

Ta pagayáyatan na kayu sangaw ni Namarò, á maggagálâ kayu.

²² “Napiá yù ággián naw, nu malussaw yù ira tatolay nikayu, ána manaki ira nikayu ána iluddè da kayu, ána paraparâketad da kayu megapu sù pangikatalâ naw ána panuttul naw níkan nga Kaká na ngámin na tatolay, ta mapagayáyâ kayu sangaw. ²³ Naggittá yù ira manigirigâ nikayu sù ira ngaw naggaká nira, ta yáyù gapay yù kingnguá ra ngaw sù ira ngaw ábbilinán ni Namarò. Á nu kunnian yù akkuád da nikayu, paguráyán naw. Magayáyâ kayu laguk sù dattál nayù ággaw nga panigirigâ da nikayu. Ayatán kayu lâ nga kunnay ta mattatála megapu sù ayâ na, ta aru yù napiá nga bálâ naw nga pinakappián ni Namarò ta lángi, nga málâ naw sangaw nu lubbè kayu tán,” kun ni Apu Kesu.

²⁴ Á kinagi na paga,

“Ngam sikayu nga maríku. Bay e! Makállállâ kayu,

ta ikatalâ naw lá yù karíku naw, nga ari gemma mannanáyun.

Nálâ nawin yù napiá nga ikáyâ naw ána yù napiá nga ággián naw sawe dabbuno, á yáyù áddè na.

²⁵ “Bay e! Makállállâ kayu, sikayu nga sigidá makákkáppagin,

ta kagian naw ta napiá kayu ána awán ta máwák naw.

Ta kunnay kayu sangaw ta mabisin, gapu ta yáyù pagáddekán nayù pagayáyâ naw.

Bay e! Makállállâ kayu, sikayu nga sigidá maggagálâ kunangan,

ta kagian naw ta napiá kayu nga awán bulubugá ta ikaburung naw.

Maburung kayu sangaw ta liwâ naw, á mepallâ sangaw yù daddam naw ána pakkulukulé naw,

gapu ta linonán naw yù awayyá naw nga mabbabáwi.

²⁶ “Bay e! Makállállâ kayu lâ nu dayáwad da kayu nayù ira ngámin nga tatolay, gapu ta kunnian gapay yù paddáyo nayù ira ngaw naggaká nikayu sù ira ngaw mattá-ábbilinán nga nakkagi ta naggapu kâ Namarò yù bilid da, ngam ari kuruk, ta nassirisiri ira.”

“Iddukan naw yù ira Makiramá nikayu.”

Mattiu 5:38-48; 7:12a

²⁷ Á kinagi ni Apu Kesu paga, “Ngam sikayu nga magginná sù kagiak ku, iddukan naw yù ira makiramá nikayu. Á ikállâ naw yù ira malussaw nikayu. ²⁸ Kiddawan naw kâ Namarò yù allâ na sù ira mangigagek nikayu, tapè pakomán ni Apu ira. Á makimállâ kayu megapu sù ira manigirigâ nikayu. ²⁹ Á nu aijan yù tolai nga mallappák nikayu, ari kayu mabbála, mássiki nu palapalingngian na kayu. Á nu aijan yù maggubâ ta gámi naw, paguráyán naw lâ. Iyawâ naw paga yù barawási naw kuna gapay nu apan na paga. ³⁰ Iddán naw yù ira ngámin nga makkiddaw nikayu. Á nu aijan yù mangâ ta kukuá naw, paguráyán naw nu arán na itoli. ³¹ Á yù napiá nga ikáyâ naw nga akkuán nayù ira kábulun naw nikayu, yáyù lâ akkuán naw nira.

³² “Á nu yù ira lâ nga mangiddù nikayu yù iddukan naw, bálatan na kayu panò ni Namarò? Ari gemma, ta mássiki yù ira nga mangnuá ta narákè, iddukad da gapay yù ira mangiddù nira. ³³ Á kunnian gapay, nu yù ira lâ nga mangabbák nikayu yù abbágán naw, bálatan na kayu panò ni Namarò? Ari gemma, ta mássiki yù ira minálliwâ, kunnian gapay yù akkuád da. ³⁴ Á nu yù ira lâ nga ammu ra nga mappagá yù pagatukán naw, dayáwan na kayu panò ni Namarò? Ari gemma, ta mássiki yù ira minálliwâ, makkakápagatù ira gapay sù ira nga ammu ra mappagá.

³⁵ “Ngam sikayu, máwák naw iddukan yù ira ngámin nga kábulun naw, mássiki yù ira malussaw nikayu, ána ikállâ naw ira. Á mappagatù kayu sù ira ngámin nga makkiddaw, mássiki yù ira nga arád da máwayyá nga itoli nikayu. Á nu kunnian yù akkuán naw, dakal yù bálâ naw ta lángi. Á mabbáli kayu ta ánâ ni Apu Namarò nga Kotunán, gapu ta kunnian gapay yù akkuán na. Ta ikákkállâ na yù ira narákè gapay ána yù ira ari mabbabalála kuna. ³⁶ Párigán naw laguk si Namarò nga Yáma naw, á mangikállâ kayu ta kunnay kuna, ta nepallâ yù allâ na,” kun ni Apu Kesu.

Arát tam laguk Ibúyá yù ira Kábulut tam

Mattiu 7:1-5

³⁷ Á kinagi ni Apu Kesu, “Arán naw panunnután yù ira kábulun naw, ána arán naw ira pagikaruan. Á si Namarò, arán na kayu panunnután, ána arán na kayu pagikaruan. Pakomán naw yù ira kábulun naw, á pakomán na kayu laguk ni Namarò. ³⁸ Á iyawâ naw sù ira kábulun naw yù ángngabbák naw nira. Á si Namarò, iyawâ na gapay nikayu yù napiá nga tappangan na, nga inittá na, nga pinnu na, nga pinallábi na nga arán na kinari. Ta igittá ni Namarò yù tappang na sù tappang naw, á kunnay sù tappangan naw ta iyawâ naw sù ira kábulun naw, kunnian gapay yù tappangan ni Namarò nga iyawâ na nikayu.”

³⁹ Á nagángngarigán si Apu Kesu, á kinagi na nira, “Nu aijan yù buling, máwayyá na panò nga aggina yù mamulù sù kabbulun na nga buling? Ari gemma, ta mesawwá ira duá ta abbù, gapu ta arád da masingan yù angayád da. ⁴⁰ Á kunnian gapay sù makituddu, nga ari makáwayyá ánnè sù mesturu na. Ngam sangaw nu ammu na ngámin yù netuddu kuna, á megittá sù mangituddu kuna.”

⁴¹ Á nagángngarigán si Apu Kesu ta meyanung sù ira nga makkakagi sù ira kábulud da, á kinagi na, “Ngattá, ta ibúyá naw yù baddi nga apuling sù matá nayù kabbulun naw, ngam arán naw matagená yù karakal nayù apuling nga aijan ta matá naw! ⁴² Máwayyá naw panò nga kagian sù kabbulun naw, ‘Kopun, ápulingát taka,’ ngam aijan ga yù dakal nga apuling ta matá naw? Áppè pípiá kayu! Napiá nu mapolu bi irián naw yù dakal nga apuling ta matá naw, tapè masingan naw ta napiá, á mári naw gapay yù baddi nga apuling sù matá nayù kabbulun naw.”

Yù Kebalinán nayù Káyu ána yù Bungá na

Mattiu 7:16-20; 12:33-35

⁴³ Á kinagi na paga ni Apu Kesu, “Yù napiá nga káyu, ari mabbungá ta jikkù. Á yù jikkù nga káyu, ari mabbungá ta napiá. ⁴⁴ Ta tákkilalát tam yù káyu megapu sù bungá na. Á arát tam gemma málá yù lubbán sù guráwing. Á arát tam gemma málá yù bayábâ sù baribbi.

⁴⁵ Á kunnian gapay, napiá lâ yù akkuán nayù napiá nga tolay, nga naggapu ta napiá nga nonò na. Á narákè yù akkuán nayù narákè nga tolay nga naggapu ta narákè nga nonò na. Ta akkuán na tolay yù nononopan na, á yáyù gapay yù ubobugan na.”

*Yù Keyarigán nayù Manguruk ána yù ari Manguruk
Mattiu 7:24-27*

⁴⁶ Á kinagi na paga ni Apu Kesu, “Ngattá, ta kagian naw ta sikán yù yápu naw, ta ‘Apu,’ kun naw lâ níkán, ngam arán naw kurugan yù kagiak ku nikayu! ⁴⁷ Á yù ira tatolay nga umay níkán, nga magginná sù kagiak ku ána kurugad da, á kagiak ku nikayu yù keyarigád da. ⁴⁸ Kunnay ira ta nabbalay, nga alaram yù kinokkobán na. Á pakatunù na sù batu ta unak, yáyù pamatáddagán na sù kallang na. Á nu maddakal yù danum, malítù yù balay ána masikan yù agì na danum. Ngam ari meburuk yù balay, gapu ta maláddá yù kapadde na. ⁴⁹ Ngam yù tolay nga makaginná sù kagiak ku nga arán na kurugan, kunnay sù nabbalay, nga ababbaw yù inikokkok na sù kallang na, nga pinatáddak na lâ sù dabbun. Á paddakal nayù danum, nalítù yù dabbun, á nagagi yù danum sù gián nayù bale na. Á dagarágá nakutukutáng yù balay nga neburuk, á kengá lâ.”

7

*Yù Pamammapiá ni Apu Kesu sù Aripan nayù Kapitán nga taga Roma
Mattiu 8:5-13*

¹ Kabalin na nattuddu ni Apu Kesu sù ira tatolay nga nagginná, nánaw nga minay ta ili na Kapernium. ² Á naggián tán yù ari Kudio, nga kapitán na suddálu nga taga Roma. Á aijan kuna yù aripan na nga iddukan na ta napiá, nga magisassay matay.

³ Á pakarámak nayù kapitán ta aijan tán si Apu Kesu, jinok na kuna yù ira karakalán na Kudio ta ed da agálán bì ta umay nga mamammapiá sù aripan na nga mataki. ⁴ Á dakki da ká Apu Kesu, inikomá ra kuna ta abbágán na yù kapitán. Á kinagi ra, “Apu, mássiki nu ari Kudio yù kapitán, kuruk nga napiá nga tolay, ⁵ ta nepallá yù allá na nittam nga Kudio, ta aggina yù nappapadday sù kapillíá tam,” kud da. ⁶ Á nepulù laguk si Apu Kesu nira.

Á pakáranni di Apu Kesu sù bale nayù kapitán, jinok nayù kapitán yù ira kopun na ta ed da ira dapunan. Á kinagi ra ká Apu Kesu, “Apu, paguráyám mu lâ kanu, ta mappsirán yù kapitán níkaw, nu umay ka ta bale na. ⁷ Á yáyù gapay yù gapu na nga arán na ángay panápun níkaw, ta ammu na nu magubobuk ka lá, á mamampiá yù aripan na. ⁸ Ta aggina gapay yù tolay nga manuppál sù kagian nayù maddok kuna. Á aijan gapay yù ira suddálu na, nga manuppál sù kagian na. Nu kagian na sù tádday, ‘Mánaw ka,’ á dagarágá mánaw. Á nu kagian na sù tanakuán, ‘E ka saw,’ á dagarágá umay. Á nu aijan yù kagian na sù aripan na, dagarágá kurugan na. Á yáyù nga ammu na ta matuppál gemma yù kagiam mu,” kud da.

⁹ Á pakaginná ni Apu Kesu sù kinagi ra nga bilin nayù kapitán, napállá sù ángngikatalà na kuna. Á nallipay sù ira aru nga tatolay nga mepulupulù kuna, á kinagi na nira, “Awán ta naratang ku nga mangikatalà níkán, mássiki sù ira ngámin kábulut tam nga ginaká ni Israel, nga kunnay sù kapitán yù ángngikatalà na níkán!” kun na. ¹⁰ Á panoli nayù ira jinok nayù kapitán ta bale na, nasingad da ta nammapiá ngin yù aripan na.

Yù Pamaginnanole ni Apu Kesu sù Bagitolay nga Aná nayù Bálu

¹¹ Á manganánuán, minay si Apu Kesu ta ili na Nen. Á nepulupulù kuna yù ira makituddu kuna ána yù ira magari nga tatolay. ¹² Á pakáranni ra sù áttallungán nayù ili, nerapunád da yù magari nga tatolay nga naggapu ta ili nga umay mananam. Á yù natay yù laláki nga táttádday nga aná na babay nga nabálu. Á nepulù nira gapay yù babay.

¹³ Á pakasingan ni Apu Kesu sù babay nga yená nayù natay, nepallá yù allá na kuna. Á kinagi na kuna, “Ari ka bì makkulé,” kun na. ¹⁴ Á minay si Apu Kesu sù ira nangáttu sù natay, á sinámmi na yù lungun na, tapé magginná ira. Á pagginná da, nagubobuk si Apu Kesu sù bagitolay nga natay, á kinagi na kuna, “Ilú, gumikkáng ka.” ¹⁵ Á dagarágá nga gimikkáng yù bagitolay, nga magubobuk nira. Á initali na laguk ni Apu Kesu sù yená na. ¹⁶ Á maganássing yù ira ngámin nga tatolay tán, á nerallá yù kapállá da. Á naddáyaw ira ká Apu Namarò, á kinagi ra, “Aijan yù jimittál nittam nga makáwayyá nga ábbilinán ni Namarò,” kud da. Á kinagi ra gapay, “Napiá ta arán na ittam náttamán ni Namarò nga tatole na, ta en na ittam sinullúnán,” kud da.

*Yù Bilin ni Apu Kesu kâ Kuan nga Minánnigù
Mattiu 11:1-6*

¹⁷ Á paginnanole nayù bagitolay, nassamâ yù dâmak nga meyanung sù kingnguá ni Apu Kesu ta ngámin nga ili sù purubinsia na Judiya ána yù ira ngámin nga babálay. ¹⁸ Á narâmak gapay ni Kuan nga Minánnigù, gapu ta minay yù ira sinudduán na sù gián na ta ábbaluran nga makkagi kuna. ¹⁹ Á yáyù nga inipágál ni Kuan yù duá nga sinudduán na. Á jinok na ira ta ed da iyabbù kâ Apu Kesu nu aggina yù patul nga inittabbá ni Namarò nga umay mammaguray, onu aijan lâ paga tanakuán nga iddagá da.

²⁰ Á labbè nayù ira nabilin ni Kuan ta gián ni Apu Kesu, kinagi ra kuna, “Si Kuan nga Minánnigù yù naddok nikami, ta em mi iyabbù nikaw nu sikaw yù umay mammaguray, onu iddagám mi lâ paga yù tanakuán?” kud da. ²¹ Á negiddán ta keggá ra yù pangnguá ni Apu Kesu sù aru nga makapállâ, ta aru yù ira máttaki nga pinammapiá na ta tulágad da nga makkakerumá, á pinalawán na yù ira nattaliponak sù ira tatolay. Á aru gapay yù ira buling nga pinakasingan na.

²² Á simibbák si Apu Kesu laguk sù ira jinok ni Kuan, á kinagi na, “Manoli kayu kâ Kuan, ta en naw kagian kuna yù nasingan naw ána naginná naw saw, ta makasinganin yù ira ngaw buling, á makalakák yù ira ngaw pilay. Nammapiá yù ira ngaw naggoggong, á makaginná ngin yù ira ngaw kitul. Naginnanolayin yù ira natay. Á nelayalayâ sù ira makállállâ yù napiá nga dâmak. ²³ Á kagian naw gapay kuna ta magayáyâ yù tolay nga ari mabbábang nga mangikatalâ níkan,” kun ni Apu Kesu.

*Yù Kinagi ni Apu Kesu nga Meyanung kâ Kuan
Mattiu 11:7-15*

²⁴ Á ta páno nayù ira binilin ni Kuan, kinagi ni Apu Kesu sù ira magari nga tatolay yù meyanung kâ Kuan, nga kun na, “Anni panò yù en naw iningan ta kalállammatán? Ikáyâ naw panò masingan yù mimi nga mepayapayák ta paddák? ²⁵ Á nu ari, anni laguk? En naw panò iningan yù tolay nga nabbísti ta nakástá? Ngam ari! Ta yù ira nabbísti ta nakástá, maggián ira ta palásiu na patul, nga awán bulubugá ta awágad da.

²⁶ “Á anni laguk yù kuruk nga en naw iningan? En naw panò iningan yù ábbilinán ni Namarò? Wan, á kuruk gemma! Ta si Kuan yù kotunán ánnè sù ira ngámin nga káruán nga ábbilinán. ²⁷ Aggina yù ubobugan ni Namarò sù inipetúrá na ngaw nga kunniaw: ‘Yawe yù ábbilinák ku nga dobak ku ta mapolu ánnè nikaw, tapè ituddu na sù ira tatolay yù akkuád da nakuan, tapè dán nga naporán ira sù labbè mu.’

²⁸ Á kuruk yawe nga kagiak ku nikayu, nga awán ta tolay nga neyaná sawe dabbuno nga napiá ánnè kâ Kuan. Ngam yù kagukábán nga tolay nga mesipá sù pammagure ni Namarò, aggina yù napiá ánnè kâ Kuan, megapu sù allá ni Namarò.”

²⁹ Á yù magari nga tatolay, mássiki yù ira minálliwâ, nepatalugáring sù ira magá ta buwi nga mangilogò, nagayáyâ ira ngámin ta pakaginná ra sù pangituddu ni Kuan sù bilin ni Namarò. Á kinuruk da yù ubobuk ni Namarò nga kinagi ni Kuan, á yáyù nakirigù ira kuna. ³⁰ Ngam yù ira Parisio ána yù ira mangituddu sù tunung ni Moyses, inipuerá ra yù ure ni Namarò nira, á nanaki ira nakirigù kâ Kuan.

*Yù ira Manaki sù ira Ábbilinán ni Namarò
Mattiu 11:16-19*

³¹ Á kinagi na paga ni Apu Kesu, “Á sikayu, anni laguk yù pangiyarigák ku nikayu? Anni yù keyarigán naw? ³² Kunay kayu sù ira ábbing nga makkukkul ta dâpun. Á kagian nayù ira káruán sù ira kábulud da, ‘Naggássá kami, tapè mattála kayu nakuan, ngam manaki kayu. Á kinagi mi ta makkulé kami nga áppa-áppè mananam, ngam manaki kayu gapay!’ kud da. ³³ Á sikayu yù kagittá ra, ta jimittál si Kuan, á manaki kayu kuna, á lilibatan naw, ta kagian naw ta nagunagán, gapu ta dumá yù kanan na sù kanan naw, ána ari bulubugá mamissán. ³⁴ Á minayá laguk, sikán nga Kaká na ngámin na tatolay, nga naporían kâ Kuan, nga mepállállang nga mepámminum nikayu. Á manaki kayu gapay níkan. Á paliwatan nawâ, ta kagian naw ta kitadullágá ána magilellaw. Á paliwatan nawâ gapay megapu ta pakikopuk ku sù ira minálliwâ, nepatalugáring sù ira mináttuki ta buwi.

³⁵ “Ngam yù ira nga manguruk níkan, ipakámmu ra ta napiá ána masírik yù bilin ni Namarò,* nga ituddu ána ituddu ni Kuan, megapu sù napiá nga akka-akkuád da,” kun ni Apu Kesu.

* 7:35 Innam mu yù Túrâ ni Ime 1:5 ána 3:17.

Keggá ni Apu Kesu ta Bale ni Simon nga Parisio

³⁶ Á tádday ággaw, ajjan yù Parisio nga mangngágan ta Simon, á inapà na si Apu Kesu ta umay kumán ta bale ra. Á nepulù si Apu Kesu kuna nga minay kiminán ta bale ra.

³⁷ Á ajjan gapay táne ili yù babay nga minákkikarallaw. Á pakarámak na ta ajjan si Apu Kesu nga mepallálláng sù bale nayù Parisio, á minay gapay sù bale nayù Parisio, tapè makimoray kâ Apu Kesu. Á inipulù na yù boteliá na nga nasiling nga napannu ta bábbanguk nga nanginá. ³⁸ Á tallung na sù bale nayù Parisio, minay namalittúkak nga nakkulè sù gián ni Apu Kesu. Á napannátán sù kalulluá na yù takki ni Apu, á nabasá ira. Á inipappuná na yù duddù na sù takki na. Á inummatán na yù takki na, megapu sù pakimore na kuna. Á binukatán na yù nasiling nga boteliá na, á jinenuán na yù takki na sù bábbanguk.

³⁹ Á yù Parisio nga mangáliik kâ Apu Kesu, pakasingan na sù kingnguá nayù babay, nakujjá yù mammang na, á nonotan na nga kun na, “Yawe tolay, nu kuruk nga ábbilinán ni Namarò, ammu na nakuan yù nonò na yawe babay nga maniggek kuna, á gimmá na nakuan,” kun na ta nonò na. ⁴⁰ Ngam si Apu Kesu, ammu na yù ninonò nayù Parisio, á yáyù kinagi na laguk kuna, “Simon, ajjan yù kagiak ku nikaw,” kun na. “Wan, Mesturu,” kun ni Simon kuna. ⁴¹ Á kinagi ni Apu Kesu kuna, “Ajjan yù duá nga naggagatù. Á límágatù yù gatù nayù tádday. Á yù mekaruá, singkuentá lá yù gatù na. ⁴² Á gapu ta arád da máwayyá nga pagán yù gatù da, pinakomá nayù tolay ira. Á yawe iyabbù ku bi nikaw, Simon. Asinni sù ira duá yù egga nga nepallà nga ayá na sù mappagatù?” kun ni Apu Kesu. ⁴³ Á simibbák si Simon, á kinagi na, “Á yù tolay támma nga aru yù gatù na nga pinakomá na,” kun na. “Wan, kuruk!” kun ni Apu Kesu kuna.

⁴⁴ Á nallipay si Apu Kesu sù babay, á kinagi na paga kâ Simon, “Á kunnay gapay sawe babay, nga masingam mu. Ta inapà mà, á minayá. Ngam tallung ku sù balem, arám mà iniddán ta danum, tapè baggawák ku nakuan yù takki ta kunnay ta kustombare tam. Ngam yawe babay, binaggawán na yù takki sù kalulluá na, á pinunatán na sù duddù na. ⁴⁵ Á sikaw, arám mà pakimorayán sù tallung ku ta balem. Ngam yawe babay, ummu-ummatán na yù takki áddè ta tallung ku, ta áddè kunangan. ⁴⁶ Á sikaw, arám mu jinenuán yù ulù ta kunnay sù kustombare tam. Ngam yawe babay, jinenuán na yù takki sù nanginá nga bábbanguk. ⁴⁷ Á yawe laguk yù kagiak ku nikaw, ta napakomángin yù ngámin nga liwá na, á yáyù nga ipasingan na yù nepallà nga ayá na nikán. Ngam yù tolay nga baddi lá yù napakomá kuna, baddi lággapay yù ayá na,” kun ni Apu Kesu.

⁴⁸ Á kinagi ni Apu Kesu sù babay, “Kuruk nga napakomá ngin yù liwá mu,” kun na. ⁴⁹ Á yù káruán nga tatolay nga mepallálláng nira, nakkaká-anasá ira nga kud da, “Asinni panò yaw, nga kagian na ta pakomán na yù tolay ta liwá na?” kud da. ⁵⁰ Á kinagi na paga ni Apu Kesu sù babay, “Neyígù ken megapu sù ángngikatalá mu nikán. Lubbè ka ta balem nga mabannáyámin yù nonò mu,” kun na sù babay.

8

Yù ira Bábbay nga Nepulù kâ Apu Kesu

¹ Á ari nabayák, á nánaw si Apu Kesu nga minay sù ira ili ána babálay, nga nangilayalayá sù napiá nga dámak nga meyanung sù pammagure ni Namarò. Á nepulupulù kuna yù ira mapulu duá nga tudduán na. ² Á ajjan gapay nga nepulù kâ Apu Kesu yù ira bábbay nga pinammapiá na sù taki da ána yù ira nga pinapáno na yù ira anitu nira. Ajjan si Maria, nga taga Maddala, nga nánawán na pitu nga anitu. ³ Á ajjan gapay si Juana nga atáwa ni Kosa. Si Kosa yù minánnaron sù ngámin nga kukuá ni Patul Erodo. Á ajjan si Susana ána aru ira paga nga bábbay, nga mangisipá kári Apu Kesu.

*Yù Ángngarigán nga Meyannung ta Bini nga Iniwári nayù Minákkomán
Mattiu 13:1-9; Markus 4:1-9*

⁴ Á kítáru yù ira tatolay nga jimináddán kâ Apu Kesu, nga naggapu sù ira ngámin nga ili ána babálay. Á paggagamung da, nagángngarigán si Apu Kesu, á kinagi na, ⁵ “Ajjan yù tolay, nga en na iniwári yù bini sù komán na. Á pangiwári na ta bini, natágá yù baddi sù dалан, nga neguppuguppè, á kinán na mammánù. ⁶ Á ajjan gapay yù baddi nga natágá ta kabatuán. Á pattubbu na, nalelay gapu ta namagá yù gián na. ⁷ Á ajjan paga yù baddi nga natágá ta kasisítán. Á nattubbu gapay, ngam nepattubbu gapay kuna yù sí nga jiminakal, á narubbù yù gián na. ⁸ Á yù káruán na bini, natágá sù napiá nga dabbun, á jiminakal áddè ta paddáwa na. Á napiá yù áddáwa na, nga kítáru yù bungá na.”

Á kabalin ni Apu Kesu nagángngarigán, nikatol na nga kinagi, “Sikayu nga makaginná, magginná kayu ta napiá sù ubobuk ku!” kun na.

*Yù Gapu na nga Nagángngarigán si Apu Kesu
Mattiu 13:10-17; Markus 4:10-12*

⁹ Á yù ira makituddu kâ Apu Kesu, iniyabbù da kuna, “Anni yù kebalinán nayù ángngarigám mu?” kud da. ¹⁰ Á simibbák si Apu Kesu nira, á kinagi na, “Sikayu lâ yù pangipakánnámmuák ku ta meyannung sù pammagure ni Namarò, nga nelímak áddé kunangan. Ngam iyángngarigák ku lâ sù ira káruán, gapu ta inni-innad da yù akkuák ku, ngam ari ira manguruk ta si Namarò yù naddok níkán. Á ginniginnád da yù bilin ni Namarò, ngam arád da manonò yù kebalinán na,” kun na.

*Yù Pangibukalán ni Apu Kesu sù Keyarigán nayù Bini
Mattiu 13:18-23; Markus 4:13-20*

¹¹ Á kinagi na laguk ni Apu Kesu, “Á yawe yù kebalinán nayù ángngarigán nga kinagi. Yù bini yù keyarigán nayù bilin ni Namarò. ¹² Á ta kunnay sù bini nga natágá sù dálan, aijan yù ira tatolay nga nakaginná sù bilin ni Namarò, ngam umay si Satanas mepassassábará ta nonò da, maraké manguruk ira, tanu manguruk ira nakuan, á meyiágu ira.

¹³ “Á yù bini nga natágá ta kabatuán yù kunnay sù ira tatolay nga magayáyá nga manguruk sù bilin ni Namarò ta pakaginná ra kuna. Ngam ta kunnay sù bini nga ari makapaggamù ta kabatuán, awán bulubugá ta ipatattam da ta nonò da. Á yáyù nga mabi lâ yù panguruk da. Á sangaw nu umay yù jigá da, pallikuránád da yù ángnguruk da.

¹⁴ “Á yù bini nga natágá ta kasisítán yù kunnay sù ira tatolay nga magginná sù bilin ni Namarò, ngam ari makatalluá yù ángnguruk da. Á kunnay ira sù bini nga nakkurítal gapu ta narubbù yù gián na, ta megaggak yù ángnguruk da megapu sù ikaburung da nga ággiád da ta dabbuno ána yù ukkuk da ta kukuá ra, ána yù ngámin nga ala-alerad da nga ipagayáyá da.

¹⁵ “Á yù bini nga natágá ta napiá nga dabbun, nga nabbungá ta napiá, yù kunnay sù ira tatolay nga magginná sù bilin ni Namarò, nga ipatattam da ta napiá sù nonò da. Á yáyù nga mássiki nu umay nira yù jigá, napasigaggá yù ángnguruk da. Á kunnay sù bini nga napiá yù ábbungá na, napiá gapay yù akka-akkuád da megapu sù bilin ni Namarò nga inipattam da ta nonò da.”

*Yù Isingan yù Keyarigán nayù Bilin ni Namarò
Markus 4:21-25*

¹⁶ Á nagángngarigán paga si Apu Kesu, á kinagi na, “Egga panò yù tolay nga paggatangan na yù isingan, nga kallabán na ta palanggána onu ipe na ta silárunng na katri? Awán gemma, ta ipotun na gemma sù ággjanán na, tapé manawagán yù ira tatolay nga tullung ta balay. ¹⁷ Á kunnian gapay sù pangituddù ta meyannung sù pammagure ni Namarò, ta mepasingan sangaw yù ari ngaw netuddu, á mepakánnámmu sangaw yù ari ngaw nánnámmuán, tapé manawagán yù nonò naw. ¹⁸ Tángngagan naw laguk yù ágginná naw sù bilin ni Namarò. Ta yù tolay nga manguruk sù bilin ni Namarò, malannapán sangaw yù ammu na. Ngam yù tolay nga ari manguruk sù bilin na, máttamán na sangaw yù kagian na nga kánnámmuán na,” kun ni Apu Kesu.

*Yù ira Ibiláng ni Apu Kesu ta Yená na ána Wáwwagi na
Mattiu 12:46-50; Markus 3:31-35*

¹⁹ Á kabalin ni Apu Kesu nagubobuk, simippi di innò na ána yù ira wáwwagi na, ngam arád da marakkítán gapu ta káru na tatolay. ²⁰ Á yù tádday nga tolay, kinagi na kâ Apu Kesu, “Aijan ta lawán di innò mu ána yù ira wáwwagim, á ipágál da ka.” ²¹ Á kinagi ni Apu Kesu sù ira ngámin nga tatolay, “Ngámin yù ira nga magginná ána manuppál sù bilin ni Namarò, aggira yù yená ána yù ira wáwwagi.”

*Yù Pamagimammà ni Apu Kesu sù Baggii
Mattiu 8:23-27; Markus 4:35-41*

²² Á tádday ággaw, aijan di Apu Kesu ta aggik na bebay. Á kinagi na sù ira makituddu kuna, “Et tamin, ta dumáki ittam ta dammáng,” kun na. Á nappittá ira ta barangay, á nánaw ira ta umay ira ta dammáng na bebay. ²³ Á paddáki da, nakkaturuk si Apu Kesu. Á ikáddagá lâ nappaddák ta nasikan. Á nasibi ira ta barangay, á naganássing yù ira sinudduán na, maraké lummak yù barangay nu mapannu ta danum. ²⁴ Á ed da nilukák si Apu Kesu, á kinagi ra kuna, “Mesturu, awán ittamin!” kud da. Á dagarágá gimikkáng, á gimmá na yù paddák ána palung, á nagimammà yù paddák ána palung. ²⁵ Á kitalínák yù bebay. ²⁵ Á kinagi na

sù ira makituddu kuna, “Anni má ta mabbábáng kayu sù ángngikatalà naw níkán?” kun na. Á naganássing ira, á nerallà yù kapállà da. Á nakkaká-ubobuk ira, á kinagi ra, “Asinni yaw maggammá ta paddák ána palung, nga tuppálan nayù paddák ána yù palung yù kagian na!” kud da.

*Yù Pamammapiá ni Apu Kesu sù Nagunagán
Mattiu 8:28-34; Markus 5:1-20*

²⁶ Á manganánnuán, nakáddè di Apu Kesu ána yù ira sinudduán na ta lugár na Gerasa, ta dammáng na Galilia. ²⁷ Á gatták di Apu Kesu sù barangay, jiminápun nira yù tolay nga taga ili, nga nagunagán na aru ira nga anitu. Á nabayágin nga nagili-ilongán, nga ari naggián ta bale ra, ngam maggián lâ ta kuebá sù katanaman.

²⁸ Á pakasingan nayù nagunagán kâ Apu Kesu, naganássing nga nakkalli nga napalakak ta arubáng na. Á kinagi na, “Sikaw, Kesu, nga Anâ ni Namarò nga Kotunán, anni yù akkuám mu níkán? Ikállà mà bi, ta arám mà jigirígatan!” kun na. ²⁹ Á yáyù kinagi nayù anitu kâ Apu, gapu ta sinaddánan nen ni Apu Kesu yù anitu ta mânaw sù tolay. Ta sigidá nga umay yù anitu kuna. Á yù ira kábulun nayù tolay, mássiki nu balurad da ta káwák yù limá na ána yù takki na, ngam gattagattakan na lâ, á pakarerán nayù anitu nga umay ta kalállammátan.

³⁰ Á iniyabbù na laguk ni Apu Kesu sù anitu, “Anni yù ngágam mu?” kun na. “Sikán si Jinibu,” kun na, ta aru yù ira anitu nga nattaliponak kuna. ³¹ Á inikomá ra kâ Apu Kesu ta arán na ira doban nga umay nga magikáru sù abbù nga awán ta áddè nayù kálaram na. ³² Á gapu ta aijan tán aru nga bábi nga magárag sù garek na puddul, inikomá nayù anitu kâ Apu Kesu ta doban na ira ta umay ira tullung sù ira bábi. Á iniyangu na nira. ³³ Á dagarágâ nánawád da yù tolay, á simillung ira sù ira bábi, á gikarerán yù ira bábi nga minay nga nelappák ta bebay. Á nalaggabán ira ngámin.

³⁴ Á pakasingan nayù ira mináppárak sù nesimmu sù ira bábi ra, nattálaw ira, á ed da iniparámak sù ira ili ána babálay. ³⁵ Á yù ira nakarámak, ed da pinasikkál. Á labbè da ta gián ni Apu Kesu, naratang da yù tolay nga nánawán nayù ira anitu, nga nagitubang ta taging ni Apu Kesu. Á nabbarawási ngin, nga nammapiá ngin yù nonò na. Á naganássing laguk yù ira tatolay megapu sù pakáwayyá ni Apu Kesu. ³⁶ Á yù ira nakasingan sù nesimmu, inistoriá ra sù ira tatolay yù pamammapiá ni Apu Kesu sù tolay. ³⁷ Á yù ira ngámin nga tatolay nga taga Gerasa, inikomá ra kâ Apu Kesu ta mânaw nira, ta nerallà yù assing da kuna.

Á gapu ta pamapáno ra kâ Apu Kesu, nappittá laguk ta barangay, ta mânaw nira. ³⁸ Á yù tolay nga nammapiá nga nánawán nayù ira anitu, inikomá na kâ Apu Kesu ta mepulú kuna. Ngam pinapáno ni Apu Kesu, á kinagi na kuna, ³⁹ “Lubbè ka lâ ta balem, tapé kagiam mu sù ira kábulun mu yù pangikállà ni Namarò níkaw,” kun na. Á kinuruk nayù tolay, á en na inistoriá sù ira ngámin nga kelián na yù kingnguá ni Apu Kesu megapu kuna. Á nattoli di Apu Kesu ta dammáng na bebay nga naggapuád da.

Yù Pammapiá nayù Babay nga Naniggek kâ Apu Kesu ána yù Pamaginnanole ni Apu Kesu sù Anâ ni Jeru

Mattiu 9:18-26; Markus 5:21-43

⁴⁰ Á labbè di Apu Kesu ta dammáng, nagayáyâ yù ira tatolay nga magiddi-iddak kuna. ⁴¹ Á minay yù tolay nga mangngágan ta Jeru. Aggina yù lakalákay nga kapatás ta kapilliá na Kudio. Á labbè na ta gián ni Apu Kesu, namalittúkak ta arubáng na, á inikomá na kuna ta umay lábbi ta bale ra, ⁴² ta magisassay matay yù táttádday nga anâ na, nga babay nga mapulu duá yù dagun na. Á nepulú si Apu Kesu kuna.

Á pallakák da ta dалан, aru yù ira tatolay nga nepulupulú nira, á narassarasil ira sù ira tatolay. ⁴³ Á aijan yù babay nga mapparága ta mapulu duá nga dagun, nga pinunu na ngámin nga kukuá na ta ipappagá na sù ira manguru, ngam awán ta nakoru kuna. ⁴⁴ Á jimikki yù babay ta likuk ni Apu Kesu, á siniggek na yù kiddanan na barawási na, á dagarágâ nattukkâ yù papparága na. ⁴⁵ Á kinagi ni Apu Kesu, “Asinni naniggek níkán?” kun na. Á yù ira tatolay, simibbák ira, nga kud da nga katággitádday, “Ari sikán,” kud da. Á kinagi ni Eduru kâ Apu, “Mesturu, marassarasil ittam gemma, á iyabbù mu paga?” kun na. ⁴⁶ Ngam kinagi ni Apu Kesu, “Wan á, ngam ammu ta aijan yù naniggek níkán, ta natákál ku ta aijan yù nammapiá megapu sù pakáwayyâ,” kun na.

⁴⁷ Á pakánnámmu nayù babay ta ari nelimak yù kingnguá na, minay nga mamippippik ta assing na, nga namalittúkak ta arubáng ni Apu Kesu. Á sù pakaginná nayù ira ngámin nga tatolay, kinagi nayù babay yù ipaniggek na kuna ána yù pammapiá na nga naddagarágâ.

⁴⁸ Á kinagi ni Apu Kesu kuna, “Anâ ku, nammapiá ken megapu sù ángngikatalà mu nikán. Lubbè ka ta balem nga mabannáyánin,” kun na.

⁴⁹ Á sù arán na paga kabalin nga nagubobuk ni Apu Kesu sù kagian na, minay yù tolay nga naggapu sù bale ni Jeru, á kinagi na kê Jeru, “Arám mu pattalátanan yù Mesturu, ta natayin yù anâ mu,” kun na. ⁵⁰ Á pakaginná ni Apu Kesu ta natayin, kinagi na sù yáma na, “Ari ka lâ maburung sù kinagi na. Ikatalà mà lâ, á mammapiá sangaw,” kun na.

⁵¹ Á labbè di Apu Kesu sù balay, arán na pinatallung yù ira tatolay, ngam di Eduru lâ, kári Kuan, kê Ime, kári Jeru nga magatáwa, nga darakal nayù abbing. ⁵² Á gikulukuletán yù ira ngámin nga naggián ta lawán megapu sù abbing. Ngam kinagi ni Apu Kesu nira, “Mattukkâ kayu nga makkulè, ta ari natay yù abbing! Nakkaturuk lâ!” kun na. ⁵³ Á inuyoyungád da, gapu ta ammu ra ta natayin yù abbing. ⁵⁴ Ngam sinangngalán ni Apu Kesu yù limá nayù abbing, á kinagi na kuna, “Abè, malukák ka!” kun na. ⁵⁵ Á nattoli sù abbing yù inángà na, á dagarágâ gimikkáng. Á kinagi na laguk ni Apu Kesu sù ira darakal na ta pakanad da. ⁵⁶ Á napállá yù ira darakal na. Ngam sinaddánán ni Apu Kesu ira ta arád da bulubugá kakágian.

9

Yù Paddok ni Apu Kesu sù ira Mapulu Duá nga Sinudduán na

Mattiu 10:5-15; Markus 6:7-13

¹ Á ta tádday ággaw, inagálán ni Apu Kesu yù ira mapulu duá nga sinudduán na, á iniddán na ira ta pakáwayyá ra nga mamapánaw sù ira nattaliponak ána mamammapiá sù ira makkakerumá nga tulágan. ² Á jinok na ira ta umay ira mangilayalayâ ta meyannung sù pammagure ni Namarò ána mamammapiá ira sù ira máttaki. ³ Á kinagi na nira, “Á ta ánge naw, awán bulubugá ta ipulù naw, nga tagukuk naw, onu bungun naw, bálun naw, kuártu naw, onu pappatalián naw. ⁴ Á maguray lâ yù labbetán naw nga babálay, nu aijan yù mamaddulò nikayu ta bale na, maggián kayu lâ tán áddè ta páno naw sù giád da. ⁵ Á nu arád da kayu paddulotan, panawán naw yù giád da, á pápparán naw yù káppù sù takki naw, nga sinniál ta mappalán kayu nira ta aggira lâ maguray nu manaki ira mesipá sù pammagure ni Namarò,” kun ni Apu Kesu nira.

⁶ Kabalin na nanabarang nira, nánaw ira nga nakkakátuay, á minay ira sù ira ngámin nga babálay nga mangilayalayâ sù napiá nga dámak ána mamammapiá sù ira máttaki.

Yù Kakusukusu nayù Nonò ni Gubinador Erodo

Mattiu 14:1-12; Markus 6:14-29

⁷ Á si Gubinador Erodo yù mammaguray ta Galilia. Á narámak ni Erodo yù ngámin nga kingngikingnguá ri Apu Kesu. Á nakusukusu yù nonò na, ta maburuburung, ta aijan yù ira nakkagi ta si Apu Kesu si Kuan nga Minánnigù, nga naginnanolayin kanu. ⁸ Á yù ira káruán, kagiád na ta naginnanolayin si Elias, nga yù ngaw ábbilinán ni Namarò. Á aijan gapay yù ira nakkagi ta naginnanolayin yù ngaw ábbilinán ni Namarò nga tanakuán, nga ari si Elias. ⁹ Ngam kinagi ni Erodo, “Si Kuan yù inipaputul ku ngaw! Ngam asinni yane tolay nga narámak ku yù aru nga akka-akkuán na?” kun na. Á yáyù mapattù nga makasingan kê Apu Kesu.

Pamakán ni Apu Kesu sù Límáribu nga Lálláki ána yù ira Kábulud da

Mattiu 14:13-21; Markus 6:30-44; Kuan 6:1-14

¹⁰ Á kabalid da nangilayalayâ nayù ira mapulu duá nga sinudduán ni Apu Kesu, nanoli ira kuna, á inistoriá ra kuna yù ngámin nga kingngikingnguá ra. Á nánaw laguk si Apu Kesu nga nepulù lâ sù ira sinudduán na, á aggira lâ nallilli nga minay ta kalállammatán nga nappangè ta ili na Betseda. ¹¹ Ngam pakarámak nayù ira magaru sù páno ra, jimínáddán ira. Á inikállá na ira ni Apu Kesu, á inubobuk na nira yù meyannung sù pammagure ni Namarò, á pinammapiá na yù ira máttaki.

¹² Á ta púgágin, minay kê Apu Kesu yù ira mapulu duá nga sinudduán na. Á kinagi ra kuna, “Papanáwam mu yù ira tatolay, tapè umay ira tán nga babálay nga magalek ta kanad da ána pagammátád da, ta nalappang nga lugár yaw,” kud da. ¹³ Á kinagi ni Apu Kesu nira, “Sikayu yù mamakán nira.” Á kinagi ra kuna, “Aijan lillimá bullung lâ nga pán ána dudduruá lâ nga sirá nikami. Nu dobak kami, umay kami gumátang ta ipamakám mi nira,” kud da.

¹⁴ Á aijan tán mággè Límáribu nga lálláki ána yù ira bábbay ána yù ira ábbing paga. Á kinagi ni Apu Kesu sù ira sinudduán na, “Pagitubangan naw ira ta ággilimápulu,” kun na. ¹⁵ Á sinuppál da, á nagitubang ira ngámin. ¹⁶ Á inâ ni Apu Kesu yù limá bullung nga pán ána

duá nga sirá, á nattánguk ta lángi, nga makimállà kâ Namarò ta pamindision na ta kanan. Á paggaddagadduá na sù pán ána sirá, iniyawá na sù ira sinudduán na, ta isinisinek da sù ira tatolay. ¹⁷ Á kiminán ira ngámin, á nabattuk ira. Á yù ira sinudduán na, ed da inammung yù buná nayù ira nga kiminán, á pinnu ra yù mapulu duá nga lappi.

*Yù Kinagi ni Eduru nga Meyannung kâ Apu Kesu
Mattiu 16:13-19; Markus 8:27-29*

¹⁸ Á tádday nga ággaw, naguroray si Apu Kesu nga nakimállà. Á minay kuna yù ira sinudduán na. Á iniyabbù ni Apu Kesu nira, “Anni yù kagian nayù ira tatolay? Asinningà kanu nga kud da?” ¹⁹ Á simibbák ira, á kinagi ra, “Kagiad da ta sikaw si Kuan nga Minánnigù nga naginnanolayin, kanu. Á yù ira káruán, kagiad da ta sikaw yù tádday sù ira ngaw ábbilinán ni Namarò nga naginnanolayin, nepatalugáring kanu ta sikaw yù ngaw Elias,” kud da kuna.

²⁰ Á kinagi na laguk nira, “Á sikayu? Anni yù kagian naw? Asinningà laguk?” kun na nira. Á simibbák si Eduru, á kinagi na, “Sikaw yù MakKiristu nga sinullà na ngaw ni Namarò ta mammaguray,” kun na. ²¹ Ngam pinappalán ni Apu Kesu ira ána sinaddánán na ira ta arád da kakágian sù ira tatolay. ²² Á kinagi na nira, “Sikán nga Kaká na ngámin na tatolay, máwák nga attamá ku sangaw yù aru nga mesimmu nikán. Á yù ira giriámán, yù ira kátannangán nga pári, ána yù ira mesturu ta tunung, manaki ira nikán. Á ipapapáte rangá sangaw. Ngam paginnanolayan nangá ni Namarò sù mekatallu nga ággaw,” kun na.

*Yù Pamalappá ni Apu Kesu sù Karigirigá na ána yù Pate na
Mattiu 16:21-28; Markus 8:30-9:1*

²³ Á kinagi na laguk ni Apu Kesu sù ira ngámin nga tatolay, “Nu aijan yù tolay nga ikáyá na tumuttul nikán, arán na laguk tuppálan yù ikáyá na baggi na, ngam tuppálan na galá ta kággággaw yù ipakuá kuna. Á mássiki nu umay kuna yù jigá onu pate na, attamán na lâ megapu sù panguruk na nikán. Á tumuttul nikán laguk. Á ta kunnian meparík nikán, gapu ta kunnian yù pangiyabága na ta kurú na ta kággággaw, á tuttulan nangá. ²⁴ Á yù tolay nga iddukan na yù áttole na sawe dabbuno, lonán na yù awayyá na nga mesipá kâ Namarò. Ngam yù tolay nga paguráyán na yù ággián na ta dabbuno tapè tumuttul nikán, mássiki nu matay megapu sù ángnguruk na nikán, paginnanolayan ni Namarò, á mesipá kâ Namarò sù pammagurayán na ta áddé ta áddé.

²⁵ “Á egga panò yù pammakipián na tolay, nu ukkugan na yù ngámin nga napiá ta utun na dabbun, á matay nga mesinná kâ Namarò? Kengá lâ, ta awán ta serbi. ²⁶ Á yù tolay nga mangipasirán nikán ána manaki sù bilik ku, ipasirák ku gapay sangaw, sikán nga Kaká na ngámin na tatolay, nu manolingá nga meparáyaw nga maddalingárang nga mepulú sù áddalingárang nayù Yámá ána yù áddalingárang nayù ira mangilin nga daroban na. ²⁷ Á kagiak ku nikayu ta aijan ira saw nikayu nga ari matay lage ra masingan yù pamegapu nayù pammagure ni Namarò,” kun ni Apu Kesu.

*Yù Pakasingad di Eduru sù Dalingárang ni Apu Kesu
Mattiu 17:1-8; Markus 9:2-8*

²⁸ Á pappasá na tangaliguán sù pagubobuk ni Apu Kesu karannian, inipulù ni Apu Kesu di Eduru kári Kuan kâ Ime sù ánge na ta puddul tapè makimállà tán. ²⁹ Á pakimállà na, dagarágá nabáli makatulang yù mammang na, á nappuraw nga naddalingárang yù barawási na. ³⁰ Á ikáddagá lâ nappingan di Moyses kâ Elias nga mepagubobuk kuna. ³¹ Á naddalingárang ira gapay, á inubobuk da yù meyannung sù pate na sangaw ta Jerusalem, nga ipakuá ni Namarò kuna. ³² Á di Eduru, nakatummá ira. Á ikáddagá da lâ nalukák, á nasingad da di Apu Kesu nga maddalingárang ána yù ira duá nga láláki nga mepanáddak kuna.

³³ Á paddaggud da mánaw di Moyses kâ Elias, á iddá na lâ ni Eduru nagubobuk, á kinagi na kâ Apu Kesu, “Apu, napiá ta aijan ittam saw! Á ipappadde mi sikayu laguk ta ággítádde naw nga amingán kári Moyses kâ Elias,” kun na. ³⁴ Á pagubobuk ni Eduru karannian, ikáddagá nga natábbunán ira ta kunam, á naganássing ira. ³⁵ Á dagarágá aijan yù ngarál nga naggapu sù kunam, á kinagi na, “Yawe yù Aná ku nga sinullà ku ta mammaguray ta ngámin nga dabbuno. Ginnán naw ta napiá yù kagian na!” kun na. ³⁶ Á kabalin na nagubobuk, limimmá yù kunam, á nasingad da si Apu Kesu lâ nga nabattáng. Á nabayák nga arád da kakágian yù nasingad da sù ira tatolay.

Yù Pamapáno ni Apu Kesu sù Nattaliponak sù Abbing nga Nabbaliák

Mattiu 17:14-18; Markus 9:14-27

³⁷ Á sù tádday ággaw, minutù di Apu Kesu nga naggapu ta puddul, á aru yù ira tatolay nga jiminápun nira. ³⁸ Á ikáddagâ nakkatol yù tádday nga tolay, á kinagi na kâ Apu Kesu, “Mesturu, ikállá kami bì, ta innam mu yawe aná ku nga táttádday. ³⁹ Ta aijan yù mattaliponak kuna. Á pattaliponak na kuna, pabballiárán na. Á makkalli nga mabugubugá yù simù na. Á mabayák nga maggián yù anitu, nga mággè ari mânaw kuna ta áddè ta sinalamán na. ⁴⁰ Á nakimállaká sù ira sinudduám mu ta papanáwad da, ngam arád da nakuá,” kun na.

⁴¹ Á kinagi na laguk ni Apu Kesu sù ira tatolay, “Innan nawè yawe ira tatolay nga awán bulubugá ta ángngikatalá da níkán! Anni yù ikataggá nayù ulu naw! Nabayágakin nga naggián nikayu nga mangituddu. Kunnasi panò yù ággiyattam ku nikayu áddè ta arán nawá ikatalá?” kun na. Á kinagi na sù laláki, “Iyángem bi saw yù aná mu,” kun na. ⁴² Á pangituluk da kuna, inítupâ nayù nattaliponak yù abbing, á pinabballiák na. Ngam gimmá ni Apu Kesu yù nattaliponak, á pinapáno na. Á nammapiá yù abbing, á inipála ni Apu Kesu sù yáma na. ⁴³ Á yù ira ngámin nga nakasingan, napállá ira sù pakáwayyá ni Namarò.

Yù Pagubobuk ni Apu Kesu má ta Meyannung sù Pate na

Mattiu 17:22-23; Markus 9:30-32

Á kapállá nayù ira ngámin nga tatolay sù pakasingad da ta kingngikingnguá ni Apu Kesu, á kinagi ni Apu Kesu sù ira sinudduán na, ⁴⁴ “Ginnán naw ta napiá yaw nga kagiak ku nikayu, á patattaman naw ta nonò naw. Sangaw nu mabi lá, gaputad dangá, sikán nga Kaká na ngámin na tatolay, á iyawá dangá sù ira malussaw,” kun na. ⁴⁵ Ngam arád da nánnámmuán nayù ira sinudduán na yù kinagi na, gapu ta nelimák nira tapè arád da matákál yù kebalinán na, á nappasirán ira nga mangiyabbù ta meyanngung sù kinagi na.

Asinni yù Tolay nga Ibiláng ni Apu ta Kátannangán?

Mattiu 18:1-5; Markus 9:33-37

⁴⁶ Á sangaw, namegapu nga nakkakápereperang ta ubobuk yù ira sinudduán ni Apu Kesu, ta meyanngung ta asinni nira yù kátannangán. ⁴⁷ Á natákál ni Apu Kesu yù egga ta nonò da, á yáyù nga iná na laguk yù baddi nga abbing nga pinatáddak na sù taging na. ⁴⁸ Á kinagi na sù ira sinudduán na, “Nu iddukan naw yù tolay nga kunniaw nga abbing, megapu sù panguruk naw níkán, yáyù nga ángngipasingan naw gapay sù ángngiddù naw níkán ámma yù ángngiddù naw sù naddok níkán. Á yù tolay nga tumulù níkán nga kunnay sù abbing, aggina yù mebiláng ta kátannangán,” kun na.

Yù ira Kákkopun ni Apu Kesu yù ira nga Ari Makikontará kuna

Markus 9:38-40

⁴⁹ Á kinagi na laguk ni Kuan kâ Apu Kesu, “Apu, nasingam mi yù tolay nga mamapánaw sù ira nattaliponak, á abbúnan na yù ngágam mu, á kinagi na ta sikaw kanu yù paggapuán nayù pakáwayyá na. Á gimmá mi gapu ta arán na ittam kapulupulù,” kun na. ⁵⁰ Ngam kinagi ni Apu Kesu nira, “Arán naw gammán. Ta yù tolay nga ari makikontará nittam, aggina yù koput tam nga mangabbák nittam.”

Yù Panaki nayù ira taga Samaria kári Apu Kesu

⁵¹ Á nu maddaggun makatunù yù ággo nayù kálá ni Apu Kesu ta lángì, á pinataggá na yù nonò na ta umay ta Jerusalem. ⁵² Á pinapolu na yù ira binilin na ta umay ira ta babálay sù purubinsia na Samaria, tapè iparád da yù pagammátád da, ta yáyù pallakarád da nga umay ta Jerusalem. ⁵³ Ngam nabì lá ira nattoli, ta manaki yù ira tatolay nga taga Samaria nga mamaddulò nira, gapu ta ammu ra ta umay ira ta Jerusalem, á arád da kurugan ta Jerusalem yù mepángngá nga ákkimorayán kâ Apu Namarò. ⁵⁴ Á di Ime kâ Kuan, nga sinudduán na, pakánnámmu ra sù nesimmu, kinagi ra kuna, “Apu, dobak kami ta kiddawam mi kâ Namarò yù api nga naggapu ta lángì nga umay manuggi nira,” kud da. ⁵⁵ Ngam nilipe ni Apu Kesu ira nga gimmá. ⁵⁶ Á nattalebák ira nga minay sù tanakuán nga babálay.

Yù Pabbábáng nayù ira nga Tumuttul Nakuan kâ Apu Kesu

Mattiu 8:19-22

⁵⁷ Á pallakák da ta dálan, aijan yù tolay nga nakkagi kâ Apu Kesu, “Apu, tumuttulá nikaw, mássiki nu sisaw angayám mu,” kun na. ⁵⁸ Á kinagi ni Apu Kesu kuna, “Wan á, ngam nonotam mu yawe, ta yù ira simaron nga ayám, aijan yù ájjimonád da. Á yù ira mammánù,

ajjan yù ággapunád da. Ngam sikán nga Kaká na ngámin na tatolay, awán bulubugá ta labbeták ku,” kun na.

⁵⁹ Á ajjan yù tádday nga tolay, á kinagi ni Apu Kesu kuna, “Tumuttul ka nikán.” Ngam kinagi nayù tolay kuna, “Wan, Apu, ngam ari lábbi, ta mapolu bì nga itanam ku yù yámà pángè ku tumuttul nikaw,” kun na. ⁶⁰ Á kinagi ni Apu Kesu kuna, “Yù ira ari tumuttul nikán, kunnay ira sù natayin. Aggira yù mangitanam sù ira kábulud da nga natay. Ngam sikaw, umay ka mangilayalayá ta meyanngun sù pammagure ni Namarò,” kun na.

⁶¹ Á yù tádday nga tolay, kinagi na, “Apu, tumuttulá nikaw, ngam anugutam mu ta lubbekà bì ta bale mi, ta ek ku bì kagian nira,” kun na. ⁶² Á kinagi ni Apu Kesu kuna, “Yù tolay nga mamegapu nga mattarabáku sù ipakuá ni Namarò kuna, arán na nakuan nonotan yù tanakuán, marakè melingun na yù ipakuá ni Namarò kuna. Ta yù tolay nga mangilingun, ari makapasserbi sù pammagure ni Namarò,” kun ni Apu Kesu.

10

Yù Pabbilin ni Apu Kesu sù ira Pitupulu duá nga Tatolay

¹ Á pappasá na yaw, piníli ni Apu Kesu yù pitupulu duá nga tatolay. Á jinok na ira nga ággirúa, ta mapolu ira nga umay mangituddu ta ngámin nga ili nga angayán na sangaw. ² Á kinagi na nira, “Aru yù ira tatolay nga tumuttul nikán nakuan nu ajjan yù umay mangapà nira. Á kunnay ira ta nalutu nga ammay nga magiddak ta kagaták na. Ngam nakúráng garè yù ira umay maggaták. Á yáyù makimállà kayu laguk ká Apu Namarò nga makákkua ta ammay, ta doban na yù ira nga umay maggaták. ³ E kayin laguk. Ngam mappalán kayu, ta dobat takayu nga kunnay ta kígaw na karneru nga nasippà nga umay sù ira tatolay nga kunnay ta simaron nga ayám nga naluluk.

⁴ “Á ari kayu mangipulú ta bungun naw, onu kuártu, onu pappatalián naw nga sapátu. Umay kayu daretu nga ari mataláltán nga makiubobuk sù ira tatolay ta dалан. ⁵ Á maguray yù balay nga paddulotán naw, yawe yù mapolu nga kagian naw nira. ‘Parè bì ta iyawá ni Namarò yù kuruk nga ággimammà na nikayu saw balay,’ kun naw nira.

⁶ “Á nu ajjan yù ira nga mangalawá sù kagian naw, nabbalin ta napiá yù ággiád da. Ngam nu manaki ira, paguráyán naw lâ, ta awán ta serbi nayù kagian naw nira. ⁷ Á nu ikáyá da kayu alliugan, maggíán kayu ta bale ra. Ari kayu magala-ali. Á kanan naw ána inuman naw yù iyawá da nikayu. Ta kuruk nga mepángngà nu alawatan na tolay yù táddán na ta pattarabáku na. ⁸ Á kunnian laguk yù akkuán naw ta ngámin nga ili nga labbetán naw. Nu ilágum da kayu, á kanan naw laguk yù iyawá da nikayu.

⁹ “Á pammapián naw yù ira máttaki. Á kagian naw nira, ‘Ipakánámmu mi nikayu yù dattál nayù pammagure ni Namarò, tapè mesipà kayu kuna,’ kun naw nira.

¹⁰ “Ngam nu makalabbè kayu sù ili nga ajjan yù ira tatolay nga manaki mamaddulò nikayu, paguráyán naw lâ. Mallakalakák kayu lâ sù ira kalsáda, á kagian naw sù ira tatolay, ¹¹ ‘Pápparám mi yù káppù ta takki mi, nga sinniál ta minay kamingin nga mangipakánámmu sù dattál nayù pammagure ni Namarò, ta apatam mi kayu nakuan nga umay mesipà sù pammagure na, ngam manaki kayu,’ kun naw nira. ¹² Á kagiak ku nikayu ta sangaw nu dattál yù pangukum ni Namarò sù ira tatolay ta dabbuno, nerallà yù ámmagikáru na sù ira tatolay nga manaki nikayu táne lugár ánnè sù ámmagikáru na sù ira taga Sodomá, nga natay ngaw sù katuggi nayù ili ra megapu sù liwá da!” kun ni Apu Kesu nira.

Yù Meyanngun sù ira Ari Manguruk ká Apu Kesu Mattiu 11:20-24

¹³ Á kinagi ni Apu Kesu paga yù daddam na sù ira Kudio nga nánawán na megapu sù panakí da kuna. “Bay e! Sikayu nga taga Korasin ána taga Betseda, kábbi kayu gapu ta narámmà yù pamagikáru ni Namarò nikayu. Ta mássiki aru yù makapállà nga kingnguá sù lugár naw, ngam ari kayu manguruk. Makállállà kayu ánnè sù ira ngaw taga Tiro ána taga Sidon nga ari Kudio. Tanu kingnguá nakuan yù makapállà sù ira ili na Tiro ána Sidon, inalistuád da ngaw nakuan nga pinatalián yù barawási ra ta bayon, á nagitubang ira nakuan nga payyád da ta abu yù baggi ra, tapè ipasingad da yù daddam da ána pabbabáwi ra ta liwá da. ¹⁴ Á sangaw nu dattál yù pangukum ni Namarò sù ngámin ira nga tatolay, aláppaw yù pamagikáru na sù ira taga Tiro ána taga Sidon ánnè sù pamagikáru na sù ira taga Korasin ána taga Betseda.

¹⁵ “Á sikayu gapay nga taga Kapernium nga mappeddaráyaw! Kagian naw ta mepotun kayu ta lángi nga meparáyaw. Ngam ari gemma! Ta gapu ta ari kayu mabbabáwi ta liwá naw, mepettung kayu laguk sù impiernu,” kun na.

¹⁶ Á nagubobuk si Apu Kesu sù ira makituddu kuna, nga piníli na ta umay ira mangi-layalayá, á kinagi na nira, “Yù ira tatolay nga magginná sù kagian naw, sikán gapay yù kurugad da, gapu ta sikán yù nabbilin nikayu. Ngam yù ira nga manaki nikayu, á panakitád dangá gapay. Á nu manaki ira níkan, panakitád da gapay si Namarò nga naddok níkan,” kun na.

Yù Panoli nayù ira Pitupulu duá nga Sinullà ni Apu

¹⁷ Á ta kabalid da nangilayalayá nayù ira pitupulu duá nga jinok ni Apu Kesu sù ira ngámin nga ili ána babálay, ayatán ira nga nanoli ká Apu. Á kinagi ra kuna, “Apu, nasikan yù pakáwayyá mi nga iniyawá mu nikami, ta mássiki yù ira nattaliponak, kinuruk da yù kinagi mi nira ta mamapáno mi nira megapu sù pannakabaggim,” kud da. ¹⁸ Á kinagi ni Apu Kesu nira, “Wan á, ta náppù si Satanas, á nasingak ku yù kepanná na nga naggapu ta lángi nga kunnay sù kilá. ¹⁹ Á iniyawá ku nikayu yù pakáwayyá naw, tapé awán ta mesimmu nikayu, mássiki nu iguppè naw yù iráw onu asisípì. Á appútan naw yù pakáwayyá ni Satanas nga malussaw nikayu, á awán bulubugá ta manganni nikayu. ²⁰ Ngam arán naw laguk ipagayáyá yù pakawayyá naw nga mamapánaw sù ira nattaliponak. Ngam ipagayáyá naw galá yù kelistá nayù ira ngágan naw ká Namarò ta lángi, gapu ta mepattolay kayu ká Namarò ta áddè ta áddè.”

Yù Pagayáyá ni Apu Kesu

Mattiu 11:25-27; 13:16-17

²¹ Á kabalín na nagubobuk ni Apu Kesu nira, á pinagayáyá na si Apu Kesu nayù Mangilin nga Ikararuá. Á nakimállá ká Namarò, á kinagi na, “Ammò ku, sikaw yù Yápu ta lángi ána dabbuno. Á dayáwat taka, ta inipakánnámmu yù bilim mu nga meyanung sù pammagurem sù ira matulù nga mangikatalá nikaw nga kunnay sù ira ábbing. Ngam inílimak mu sù ira masirik ána yù ira naggiámmu. Wan, Ammò, ta yáyù ikáyá mu nga akkuán,” kun na.

²² Á kinagi ni Apu Kesu sù ira tatolay, “Inikatalá na níkan nayù Yámà yù pakáwayyá sù ngámin nga egga. Á awán ta makánnámmu nu asinningá, nu ari lá si Ammò Namarò. Á awán gapay ta makánnámmu nu asinni yù Yámà, nu ari lá sikán nga Aná na ána aggira ngámin nga pangipakánnámmuák ku,” kun ni Apu Kesu.

²³ Kabalín ni Apu Kesu nagubobuk sù ira tatolay, nallilli di Apu ána yù ira sinudduán na, á kinagi na lá nira, “Nepallá yù pangikállá ni Namarò nikayu, ta masingan naw yù akka-akkuák ku ána maginná naw yù kagiak ku. ²⁴ Á kagiak ku nikayu ta aru yù ira ngaw ábbilíná ni Namarò ána yù ira ngaw papatul, nga kinaragatád da nga masingan yù masingan naw kunangane, ngam arád da masingan. Á iniddanamád da nga maginná yù maginná naw kunangane, ngam arád da naginná,” kun ni Apu Kesu.

Yù Napiá nga Kingnguá nayù Tolay nga Taga Samaria

²⁵ Á ajjan yù tolay nga mesturu sù tunung ni Moyses, á en na pinarubán nga ilogò si Apu Kesu. Á iniyabbù na ká Apu, “Mesturu, anni yù máwák ku nga akkuán, tapé málá ku yù inángá nga awán ta áddè na?” kun na. ²⁶ Á kinagi ni Apu Kesu kuna, “Anni yù netúrâ sù tunung ni Moyses? Anni yù kánnámmuám mu ta pabbibbik mu kuna?” ²⁷ Á simibbák yù tolay, á kinagi na, “Máwák nga napasigaggá yù ángngiddù tam ká Apu Namarò, tapé metádday yù nonò tam ta nonò na. Á akkuát tam yù napiá nga ipakuá na nittam. Á iddukat tam gapay yù ira kábulut tam ta kunnay sù ángngiddù tam ta baggi tam,” kun na. ²⁸ Á kinagi ni Apu Kesu kuna, “Wan, kustu yù kinagim. Nu kurugam mu yian, mepattolay ka ká Namarò ta áddè ta áddè,” kun na.

²⁹ Á pakaginná nayù tolay sù kinagi ni Apu Kesu, ikáyá na nga ipasingan ta matunung yù akka-akkuán na, tapé ari mepasiránán. Á yáyù nga iniyabbù na ká Apu Kesu, “Asinni yù ira kábuluk ku nga iddukak ku nakuan?” kun na. ³⁰ Á simibbák si Apu Kesu nga nagángngarigán, á kinagi na, “Ajjan yù tolay nga kagittá tam nga Kudío nga taga Jerusalem, nga minutù ta umay ta ili na Jeriku. Á pallakák na ta dálan, sinanabán nayù ira minákkokò. Á iná da ngámin yù barawási na ána kukuá na, á sinalamád da. Á nánawád da nga magisassay matayin. ³¹ Á manganánnuán, ajjan gapay yù pári nga nallakák tán nga dálan. Á pakasingan na sù tolay, nallilli, á sinalebarán na. ³² Á pappasá na yaw, ajjan má yù tádday nga tolay, nga minay tán. Aggina yù ginaká ni Libi, nga nasserbi sù mangilin nga kapilliá ta Jerusalem. Á pakasingan

na sù tolay nga kingnguá ra, nattalebák gapay ta kunnay sù pári. ³³ Á minay gapay yù tolay nga taga Samaria, nga ikalusso nayù ira Kudio nga taga Jerusalem. Á pakasingan na sù tolay, neralla yù allà na kuna. ³⁴ Á jimikki kuna, á inuru na ta denu ána binaráyáng yù bigibigák na, á binabbak na. Á pinakkabáyu na sù ayám na, á inituluk na sù ággammátán na tolay nga mattalebák, á sinaronán na ta gabi. ³⁵ Á ta ággawin, iniyawâ nayù taga Samaria sù makákkuá ta ággammátán yù kuártu, á kinagi na kuna, “Taronám mu, á nu makúráng yù kuártu nga iniyawâ ku, pagák ku sangaw nu manolingá,” kun na.”

³⁶ Á ta kabalín ni Apu Kesu nagángngarigán, kinagi na sù tolay, “Á asinni ta urem sù tallu ira yù kuruk nga kabbulun nayù tolay nga sinalamád da?” kun na. ³⁷ “Á yù tolay nga nangikállà kuna,” kun nayù tolay nga masírik. Á kinagi ni Apu Kesu kuna, “Wan, á napiá nu kunniú gapay yù akkuám mu,” kun na.

Yù Pakiálluik ni Apu Kesu kári Marta kâ Maria

³⁸ Á nánaw di Apu Kesu ána yù ira sinudduán na. Á nakáddè ira sù tádday nga babálay. Á aijan tán yù babay nga mangngágan ta Marta, á pinaddulò na ira ta bale na. ³⁹ Á aijan gapay yù urián na nga mangngágan ta Maria. Á nepaggitubang si Maria kâ Apu Kesu, tapè ginnán na yù ituddu na. ⁴⁰ Ngam si Marta, arán na matángngák yù ituddu ni Apu Kesu gapu ta aru yù paránan na. Á mabagal sù ikalángan na, á en na kinagi kâ Apu, “Apu, ikállà mà bì, ta innam mu yù wagi, ta pinaguráyán nangà. Á aijanà lâ nga masserbi. Kagiam mu bì kuna ta abbágán nangà bì!” kun na. ⁴¹ Á kinagi ni Apu Kesu kuna, “Ey, Marta! Anni má ta mabagabagal ka? Anni yù ikaburung mu?” ⁴² Ta piníli ni Maria yù kapiánán, nga ari mepugik kuna,” kun ni Apu.

11

*Yù Meyannung sù Ákkimállà tam
Mattiu 6:9-13; 7:7-11*

¹ Á tádday ággaw nakimállà si Apu Kesu mángin. Kabalín na nakimállà, jimikki kuna yù tádday nga sinudduán na, á kinagi na kuna, “Apu, ituddum bì nikami gapay yù ákkimállà mi ta kunnay ta pangituddu ni Kuan sù ira makituddu kuna.” ² Á kinagi ni Apu Kesu nira, “Nu makimállà kayu, kunniaw yù kagian naw:

‘Ammò, parè lâ ta sikaw yù meparáyaw sù ira ngámin nga tatolay.

Á parè lâ ta mabi nga duttál yù pammagurem ta dabbuno.

³ Á iyawâ mu nikami yù kanam mi ta kággággaw.

⁴ Á pakomák kami ta liwá mi,

ta pakomá mi gapay yù liwá da nikami nayù ira ngámin nga ikáttole mi.

Á ililli kami lâ sù mamalliawâ nikami.’”

⁵ Á kinagi ni Apu Kesu gapay nira, “Á ta ángngarigán nu aijan yù tádday nikayu nga umay ta bale nayù kopun na ta tangngá na gabi, á kagian na kuna, ‘Kopun, iddám mà bì ta ipamakák ku ta álluik ku. ⁶ Ta aijan yù kopuk ku nga kalalabbè na lâ ta balè, á awán bulubugá ta ipamakák ku kuna!’ ⁷ Á ta ángngarigán nu itabbák nayù kopun na, nga kun na, ‘Arák kami bì sikkágan, ta nelitukin yù puertá, á nakkaturugin yù ira ánâ ku, á molangá gumikkáng nga mangiyawâ nikaw,’ kun na nakuan. ⁸ Á kagiak ku nikayu ta mássiki nu napiá yù ákkopud da, manaki nga gumikkáng nga mangiyawâ. Ngam mapuersá sangaw nga gumikkáng nga mangiyawâ sù ngámin nga awágan na, gapu ta ari mattukká nga makkiddaw kuna.

⁹ “Á kunnian gapay nakuan nikayu sù pakimállà naw kâ Apu. Ari kayu mappasirán nga makimi-imállà kâ Namarò. Taddánát takayu ta kiddawan naw lâ kiddawan kuna yù awágan naw, tapè iyawâ na nikayu. Á magala-alek kayu, tapè málek naw, ána makkatakotol kayu, tapè patallungan na kayu. ¹⁰ Ta yù ira ngámin nga makimállà kâ Apu, iddán na ira. Á yù ira ngámin nga magalek, málek da. Á patallungan ni Apu yù ira ngámin nga makkatol kuna.

¹¹ “Á sikayu nga egga anâ na, ta ángngarigán nu makkiddaw yù abbing ta sirá, iddán naw panò ta iráw? Ari gemma! ¹² Á nu makkiddaw ta illuk, iddán naw panò ta asisipi? Ari gemma! ¹³ Á sikayu, mássiki nu narákè kayu, ammu naw mangiyawâ ta napiá sù ira ánâ naw. Á nepatalugáring kâ Yáma tam ta lángì, ta awán ta kárik piá nayù ángngiddù na nittam, á iyawâ na yù Mangilin nga Ikararuá na sù ira ngámin nga makkiddaw kuna.”

*Yù Meyannung kâ Apu Kesu ána yù Meyannung kâ Satanas
Mattiu 12:22-30; Markus 3:20-27*

¹⁴ Á aijan yù tolay nga umal megapu sù nattaliponak. Á pinapáno ni Apu Kesu yù anitu nga nagumal sù tolay. Á páno nayù anitu, nagubobuk yù ngaw nagumal, á nepallá yù kapállá nayù ira tatolay. ¹⁵ Ngam yù ira káruán nga tatolay, kinagi ra, “Papanáwan na yù ira nattaliponak megapu sù pakáwayyá ni Satanas, nga abbúnat tam ta Belsebul, nga kátannangán nayù ira anitu,” kud da.

¹⁶ Á yù ira káruán nga tatolay, ari ira nanguruk sù pakáwayyá ni Apu Kesu, á yáyù nga inikomá ra kuna ta akkuán na paga yù makapállá, tapè masingad da. ¹⁷ Ngam ammu ni Apu Kesu yù egga ta nonò da. Á kinagi na nira, “Á ta ángngarigán nu aijan yù tangapápatulán, nga maddaráma yù ira tatolay, á makkakátalamán ira sangaw. Onu aijan yù tangapamiliá, nga maddaráma yù ira mawwawági ána yù ira darakal da, á ari iren mattatádday, ta makkakátalamán ira gapay. ¹⁸ Á yáyù nga ammu tam ta ari máyâ nu papanáwan ni Satanas yù ira anitu nga masserbi kuna, ta nu kunnian yù akkuán na nakuan, makkakákontará ira, á makkakátalamán ira gapay sangaw. Ngam kagian naw ta papanáwak ku yù ira nattaliponak megapu sù pakáwayyá ni Satanas. Kuruk panò? Ari gemma kuruk.

¹⁹ “Á ta ángngarigán nu si Satanas nakuan yù mangiyawá níkán sù pakáwayyá sù ira anitu, á asinni laguk panò yù mangiyawá sù ira kábulun naw ta pakáwayyá ra nga mamapánaw sù ira nattaliponak? Ari panò si Namarò galá yù mangiyawá nira? Wan, kuruk nga si Namarò yù paggapuán nayù pakáwayyá ra, á yáyù nga aggira yù mamanunnù níkayu, nga mangipakánnámmu ta ari kustu yù kagian naw nga meyanngun níkán. ²⁰ Ta kuruk nga si Namarò gapay yù paggapuán nayù pakáwayyá nga mamapánaw sù ira nattaliponak. Á yáyù panákkilalán naw ta aijanin níkayu yù pammagure ni Namarò.”

²¹ Á nagángngarigán si Apu Kesu, tapè ipakánnámmu na ta masikan yù pakáwayyá ni Namarò ánnè ká Satanas. Kinagi na nira, “Masikan si Satanas nga kunnay ta tolay nga napanán yù ira ármas na, nga magguárdiá sù bale na, tapè awán ta makatallung nga maggubá ta kukuá na. ²² Ngam nu aijan yù masikan ánnè kuna nga umay mangnúá kuna, appútan na ána gubatan na yù ármas na nga ikatalá na ta ángngiyígú na ta baggi na. Á gubatan na gapay yù ngámin nga kukuá na, nga balláyan na sù ira kábulun na.”

²³ Á kinagi ni Apu Kesu paga, “Ngámin yù ira tatolay nga ari metádday níkán, aggira yù makikontará níkán. Á yù ira tatolay nga ari mangabbák níkán ta pagágál ku sù ira umay metádday níkán, aggira yù mamawarawará sù ira umay nakuan níkán.”

*Yù Panoli nayù Anitu sù ngaw Nagunagán
Mattiu 12:43-45*

²⁴ Á nagubobuk paga si Apu Kesu nga kinagi na nira, “Á yù anitu, ta páno na sù nagunagán na, umay ta namagá nga lugár nga magalek ta pagibannagán na. Á gapu ta arán na málek yù paggianán na tán, nonotan na ta mattoli sù nánawán na. ²⁵ Á mattoli laguk, á masingan na yù tolay nga nammapiá ngin ta kun na balay nga napakarenuánin, nga awán ta maggián kuna. ²⁶ Á umay laguk yù anitu nga magágál ta pitu nga kábulun na nga anitu nga narákè ánnè kuna, tapè mepaggián ira kuna. Á mattoli ira nga maggián sù tolay, á mappaná laguk yù ággián nayù tolay.”

Yù Kuruk nga Ággayá tam

²⁷ Á ta pagubobuk ni Apu Kesu sù ira magaru nga tatolay, aijan yù babay nga iniyássikan na yù ággubobuk na, á kinagi na, “Magayá yù babay nga nangiyaná níkaw, nga namasusu níkaw!” kun na. ²⁸ Ngam simibbák si Apu Kesu, á kinagi na, “Más magayá yù tolay nga magginná sù bilin ni Namarò ána manguruk sù taddán na!”

*Gustu ra Masingan yù Pamagaddátu ni Apu Kesu
Mattiu 12:38-42; Markus 8:12*

²⁹ Á nalannapán yù ira magaru nga tatolay nga nagarimummung ká Apu Kesu. Á kinagi na nira laguk, “Narákè yù ira tatolay ta ággawo, ta yá lá gustu ra innan yù makapállá nga panákkilalád da, ta lage ra manguruk ta si Namarò yù maddok níkán. Ngam awán ta ipasingak ku níkayu nga panákkilalán naw, nu ari lá yù kunnay sù makapállá nga inipasingan na ngaw ni Jona, nga yù ngaw ábbilínán ni Namarò túrin ta Ninaba. ³⁰ Ta yù nesimmu ngaw ká Jona, yáyù yù panákkilalán nayù ira taga Ninaba ta si Namarò yù naddok kuna. Á kunníu gapay níkán, síkán nga Kaká na ngámin na tatolay. Ta aijan sangaw yù mesimmu níkán, nga panákkilalán nayù ira tatolay ta ággawo.

³¹ “Á nu duttál yù ággaw nga pamanunnù ni Namarò sù ira ngámin nga tatolay, gumikkáng yù ngaw rena nga nammaguray ta Seba, á massístigu ta kuruk nga liwá naw. Ta minay yù rena nga naggapu ta arayyu nga páppatulán tapè ginnán na yù aru nga napiá nga inituddu

nayù ngaw Patul Solomon. Á yáyù nga awayyá nayù ngaw rena nga mangikeká ní kayu, ta manaki kayu magginná, mássiki nu aijan ta arubáng naw kunangane yù makáwayyá ánnè ká Patul Solomon.

³² “Á yù ira ngaw taga Ninaba gapay, gumikkáng ira sù ággaw nga pamanunnù ni Namarò ta tolay, á massistigu ira ta kuruk nga liwâ naw. Ta nababáwi ira ngaw ta liwâ da ta pakaginná ra sù bilin ni Namarò nga inilayalayá na ngaw nira ni Jona. Á yáyù awayyá ra nga mangikeká ní kayu, ta mássiki nu aijanin ní kayu kunangane yù makáwayyá ánnè ká Jona, ngam manaki kayu manguruk kuna.”

Yù Meyárik ta Isingan

Mattiu 5:15; 6:22-23

³³ Á kinagi ni Apu Kesu paga, “Á ta ángngarigán, nu paggatangan na tolay yù isingan, arán na gemma ituttù onu kallabán ta palanggána. Ngam ipe na sù ággianán na ta utun, tapè manawagán yù ira ngámin nga tullung ta balay. ³⁴ Á yù keyarigán nayù matá na tolay yù isingan, nga paggapuán na nawák, tapè makasingan. Á ta ángngarigán nu napiá yù matá na, napiá gapay yù ánningan na. Ngam nu jikkù yù matá na, á buling nga maggián ta kallá. Á ta kunnian gapay sù ángnguruk na ká Namarò. Nu napiá yù ángnguruk na, manawagán yù nonò na megapu sù bilin ni Namarò, á kánnámmuán na yù napiá, á napiá gapay yù akka-akkuán na.

³⁵ “Mappalán kayu laguk, marakè kun na kallá yù nonò naw! ³⁶ Nu napiá yù ángnguruk naw ká Namarò, kuruk nga manawagán kayu nga awán bulubugá ta kallá ta nonò naw. Á kunnay ta manawagán na kayin nayù isingan.”

Yù Pamappalán ni Apu Kesu sù ira Parisio ána yù ira Mangituddu sù Tunung ni Moyses

Mattiu 23:1-36; Markus 12:38-40; Lukas 20:45-47

³⁷ Á kabalin na nagubobuk ni Apu Kesu, aijan yù tádday nga Parisio nga nangapà kuna ta umay kumán ta bale ra. Á minay laguk nepallálláng nira. ³⁸ Ngam nakaddák yù Parisio ána napállá, ta arán na sinuppál ni Apu Kesu yù kustombare na Kudio nga mabaggaw lage ra kumán. ³⁹ Á kinagi ni Apu Kesu kuna, “Sikayu nga Parisio, mabaggaw kayu ta passuelu ána tariaw, tapè malínis yù masingan. Ngam arán naw pakarenuán yù egga ta nonò naw nga ari masingan, ta mangilogò kayu ána narakè yù akka-akkuán naw. ⁴⁰ Maguyung kayu! Awán ta awayyá naw nga ilimak ká Namarò yù egga ta nonò naw. Ta aggina lá yù namarò sù masingan ána ari masingan. Pidde na kayu ána yù nonò naw, á ammu na gemma yù pinattattam naw ta nonò naw.

⁴¹ “Pakarenuán naw laguk yù nonò naw nga ari masingan, tapè ammu naw mangikállá sù ira kábulun naw. Ta nu napiá yù egga ta nonò naw nga ari mepasingan, á napiá gemma gapay yù mepasingan nga akka-akkuán naw sù ira kábulun naw.

⁴² “Magimuguk kayu, sikayu nga Parisio, ta mapanunnután kayu! Ta mássiki nu matunung kayu sù ángngiballe naw ká Namarò sù mekamapulu sù ngámin nga makkakerumá nga kiruk nga atang, ngam mangilogò kayu sù ira kábulun naw ána arán naw iddukan si Namarò. Máwák nakuan nga tángngagan naw yù iddu naw ká Namarò ána iddukan naw gapay yù ira kábulun naw. Á uputan naw gapay nga iballay ká Namarò yù mekamapulu.

⁴³ “Magimuguk kayu, sikayu nga Parisio! Ta paggagammung naw sù kapillíá, karagátan naw yù magitubang sù kapiánán nga ággitubangán nayù maráyaw ána yù pakialimánu nayù ira tatolay ta pappassiár naw ta dápun.

⁴⁴ “Magimuguk kayu, sikayu nga Parisio! Sikayu yù kunnay ta tanam nga ari namárkán, nga iguppuguppè nayù ira tatolay gapu ta arád da ammu ta aijan.” Yáyù kinagi ni Apu Kesu sù ira Kudio nga Parisio, ta nu iguppè da yù tanam, mebiláng ira ta marapingán, nga ari mepaggagammung sù ira kábulud da nga maddáyaw ká Namarò. Á yáyù keyarigád da gapu ta agippípiá ira. Á mekanakaná nira yù ira káruán nga tatolay gapu ta arád da ammu ta narakè yù nonò da.

⁴⁵ Á simibbák yù tádday nga mangituddu sù tunung ni Moyses, á kinagi na ká Apu Kesu, “Mesturu, mekanakaná kami nga mepasiránán sù kinagim sù ira Parisio!” kun na. ⁴⁶ Á kinagi ni Apu Kesu kuna, “Sikayu nga mesturu sù tunung ni Moyses, magimuguk kayu gapay, ta mapanunnután kayu sangaw gapay. Sikayu yù kun na maddok sù ira mangáttu ta narámmá, nga arán na ira bulubugá abbágán. Jigirigátan naw yù ira tatolay, ta ipatuppál naw nira yù tunung nga lannapán naw, á arád da matuppál.

⁴⁷ “Magimuguk kayu! Ta pakástán naw yù ira tanam nayù ngaw ira ábbilinán ni Namarò, nga pinapáte nayù ira ngaw naggaká ní kayu. ⁴⁸ Á sikayu, negittá yù nonò naw ta nonò nayù ira ngaw naggaká ní kayu ána anugutan naw yù kingnguá ra sù ira ngaw ábbilinán. Ta ari kayu manguruk sù bilin ni Namarò nga initúrá nayù ira ngaw ábbilinán. Áppè pípiá kayu

nga maddáyaw sù ira námmatay megapu ta pamakkástá naw sù tanam da. Á nu doban na má ni Namarò yù ira káruán na ábbilinán na, á sikayu nga kunnay sù ira ngaw naggaká nikayu, sikayu yù mamapátay nira.

⁴⁹ “Á yáyù nga nappasingan ta kuruk yù kinagi ni Namarò ngaw nga nabayágin. Kinagi na, ‘Dobak ku ta umay nira yù ira ábbilinák ku, á papatáyad da yù ira káruán, á jigirigátad da yù ira káruán,’ kun na. ⁵⁰ Á sikayu laguk yù pabbabálatán ni Namarò sù pamapáte ra ngaw sù ira ngámin nga ábbilinán na ta áddè ngaw o-olu nga napapátay ta áddè kunangan. ⁵¹ Si Abel nga anâ ni Adan yù ngaw o-olu nga natay megapu sù panguruk na kâ Apu Namarò, á aggira ngámin nga ábbilinán nga siminubbâ kuna ta áddè kâ Sakariâ nga naporíán, nga pinapáte ra ta námmuák nayù mangilin nga kapilliá ta taging nayù pangiyátangán. Wan, á kagiak ku nikayu ta sikayu nga matolay kunangan yù pabbabálatán ni Namarò megapu ta pate nayù ngaw ira ngámin nga ábbilinán na.

⁵² “Magimuguk kayu, sikayu nga mangituddu sù tunung ni Moyses! Kunnay ta inittùtù naw yù ánnúsi nga mabbukâ ta pakánnámmu na tolay sù kuruk nga bilin ni Namarò nga meyanung ta ángngiyígù na ta tolay. Mapanunnután kayu, gapu ta manakí kayu manguruk, á ipugik naw gapay yù panguruk nayù ira tatolay nga umay nakuan kâ Namarò,” kun na. ⁵³ Á ta páno di Apu Kesu tán nga balay, nakujá yù mammang nayù ira Parisio ána yù ira mesturu sù tunung ni Moyses, megapu sù kinagi ni Apu Kesu nira. Á ninonò da yù aru nga makkakerumá nga iyabbù da kuna, ⁵⁴ tapè makagi na nakuan yù ipamaliwá da kuna.

12

Mappalán kayu sù Ituddu nayù ira Parisio

Mattiu 10:26-27

¹ Á yù ira jinibu nga tatolay nga maddarassil ána makkakáguppè, nagarimumungád da di Apu Kesu. Á nagubobuk si Apu Kesu sù ira sinudduán na, á kinagi na nira, “Mappalán kayu sù ituddu nayù ira Parisio nga ari kuruk, tapè arád da kayu ilogò. Ta agippípiá ira, á kunnay ta áppalappák ta pán yù narákè nga ituddu ra nga malogon massamá. ² Á kagiad da ta awán ta makánnámmu sù akka-akkuád da. Ngam mepakánnámmu sangaw, ta duttál sangaw yù ággo na nga mepalappá yù ngámin nga nelímak kunangan. ³ Á yù ubobugan naw ta gabi sù lágum na balay, mepalappá sangaw ta lawán ta tangngá na ággaw. Á yù iyanasá naw ta unak na balay nga nelitù, yáyù melayalayá ta ággaw sù tangngá na ili.

Yù Kuruk nga Ikássing tam

Mattiu 10:28-31

⁴ “Á yawe yù kagiak ku nikayu nga kákkopuk ku, arán naw ikássing yù ira tatolay nga mamapátay ta baggi naw, á ta kabalin na, awán ta awayyá ren nga manganni nikayu. ⁵ Ngam kagiak ku yù ikássing naw! Maganássing kayu laguk kâ Namarò, ta ari lá nga makáwayyá nga mamapátay ta baggi na tolay, nu ari gapay makáwayyá nga mangipettung ta impiernu. Á yáyù nga pappalánat takayu ta si Namarò laguk yù ikássing naw!

⁶ “Ngam si Namarò gapay yù mangiddù, á nepallá yù allá ni Namarò nikayu. Á mássiki yù ira límá nga balli, nga iláku ra ta dápun ta duá sintábu, arán na ira máttamán ni Namarò, nga taggitádday. ⁷ Á ammu na ngámin yù meyanung nikayu, mássiki yù biláng na duddù naw. Á yáyù nga ari kayu laguk maganássing, ta nepallá yù ángngiddù ni Namarò nikayu nga katággitádday ánnè sù kitáru nga balli.

Kengá lá yù Ákkiyápu tam kâ Apu Kesu nu Mappasirán ittam nga Makkagi ta Ketádde tam kuna

Mattiu 10:32-33; 12:32; 10:19-20

⁸ “Á kagiak ku nikayu, nu ari kayu mappasirán nga makkagi sù ira kábulun naw ta sikán yù Yápu naw, mássiki nu uoyungád da kayu megapu sù panguruk naw níkan nga Kaká na ngámin na tatolay, á sikayu gapay yù tákkilalák ku ta arubáng nayù ira daroban ni Namarò ta lánngi. ⁹ Ngam nu makkagi kayu ta arubáng nayù ira kábulun naw ta arán nawá tuttulan, á panakitát takayu gapay ta arubáng nayù ira daroban ni Namarò ta lánngi.

¹⁰ “Á yù tolay nga makkakagi níkan, á nu mabbabáwi ána makipakomá, á pakomán ni Namarò. Ngam yù tolay nga makkakagi sù Mangilin nga Ikararuá ni Namarò, ari bulubugá mapakomá ta áddè ta áddè. ¹¹ Á nu aijan yù mangiyángay nikayu sù ira kátannangán naw ta kapilliá onu sù ira makáwayyá, tapè ikeká ra kayu ta arubáng da megapu ta panguruk naw níkan, ari kayu mabburung nu kunnasi yù itabbák naw nira. ¹² Ta pamestigá ra nikayu, á yù Mangilin nga Ikararuá yù mangipakánnámmu nikayu sù itabbák naw nira.”

Yù Meyannung sù Maríku

¹³ Á ta pangituddu ni Apu Kesu sù ira kitáru nga tatolay, aijan yù tádday nga nagubobuk kuna, á kinagi na, “Mesturu, kagiam mu bi sù wagi ta iballáyán nangà sù kukuá nayù yáma mi nga bittáng na nikami,” kun na. ¹⁴ Á kinagi ni Apu Kesu kuna, “Kopun, sikayu lággapay, ta aringà minay saw nga umay mamanunnù ámma mamabbalay.” ¹⁵ Á kinagi na laguk sù ira ngámin nga naggagammung tán, “Magimuguk kayu, marakè passilan naw yù egga ta dabbuno. Ta yù kuruk nga napiá nga áttole na tolay ari megapu sù aru nga kukuá na.”

¹⁶ Á nagángngarigán si Apu Kesu, á kinagi na, “Aijan ngaw yù tolay nga maríku, nga aru yù ákkomanán na ámma aru yù ginaták na. ¹⁷ Á yáyù nga ninonò na, ‘Massiri yù ira balay nga ángngipayyák ku ta ammè. Anni yù akkuák ku?’ ¹⁸ Á kinagi na, ‘Á yawe laguk yù akkuák ku. Táttakak ku lá yù ira balay nga ángngipayyák ku, á mappaddayá sù ira darakal nga ángngipayyák ku, tapè pakappiák ku nira yù ammè ámma ngámin nga kukuá!’ kun na. ¹⁹ Á ninonò na paga, ‘Maríkungakin, ta aijan yù kanak ku ta mabayák nga dagun, mássiki aringákin mattarabáku. Magibannága lá nga kumán, ámminum, ámma makipabbuyá!’ kun na nga mannononò. ²⁰ Ngam kinagi ni Namarò laguk kuna, ‘Maguyung ka! Matay ka sangaw nu gabingo. Á asinni panò sangaw yù mangá sù ngámin nga pinakappiám mu nga kagiam mu ta kukuám?’ ²¹ Á kunnian gapay yù ággián nayù ira ngámin nga tatolay nga morkuk, ta lonád da yù ákkyápu ra ká Namarò,” kun ni Apu Kesu.

Yù Meyannung sù ira Mangikatalà ká Namarò

Mattiu 6:25-34

²² Á nagubobuk si Apu Kesu sù ira sinudduán na, á kinagi na nira, “Yáyù nga kagiak ku nikayu ta arán naw laguk ikaburung yù máwák naw ta áttole naw sawe dabbuno, nga kanan naw ámma gámi naw. ²³ Ta máwák nga tángngagan naw yù áttole naw ká Namarò ánnè sù kanan naw, ámma iddukan naw yù baggi naw ánnè sù gámi naw.

²⁴ “Á ta ángngarigán, nonopan naw yù ira mammánù. Ari ira mammulá, á ari ira makigaták, á awán ta ággubbuád da. Ngam pakanan ni Namarò ira. Á nepallá yù ángngiddù na nikayu ánnè sù ira mammánù. ²⁵ Á awán ta napiá nga pabbalinán nayù burung naw, ta arán naw awayyá nga lannapán yù ággaw nga áttole naw, mássiki lá tádday, megapu sù burung naw. ²⁶ Á nu arán naw makúa yù kuniú nga baddi, anni laguk yù serbi nayù burung naw sù aru nga makkakerumá!

²⁷ “Á nonopan naw yù ira lappáw. Ari ira mattarabáku. Ari ira mangabal. Ngam nakástá ira ánnè sù ipabbarawási ni Patul Solomon, nga yù ngaw maríku nga patul. ²⁸ Á nu kunnian yù ámmarawási ni Namarò sù ira lappáw, nga aijan ta kakáddapán nga nakástá kunangan, nga tuggiád da sangaw nu ummá, á arán na panò iyawá nikayu gapay yù ipabbarawási naw nga mepángngá? Iyawá na nikayu gemma! Á sikayu, ngattá ta arán naw ikatalá si Namarò?

²⁹ “Ari kayu laguk maburung nga mannononò nu anni sangaw yù kanan naw onu anni sangaw yù ipabbarawási naw. ³⁰ Ta yáyù lá ikaburung nayù ira tatolay ta dabbuno nga ari mangikatalà ká Namarò. Ngam sikayu, arán naw ira párigán, ta ammu ni Namarò nga Yáma naw ta lángi yù máwák naw. ³¹ Á yáyù nga tángngagan naw lálalaguk yù meyanung sù pammagure ni Namarò ámma yù ákkyápu naw kuna, á iyawá na laguk nikayu yù máwák naw.”

Yù Pamakáppi ni Namarò ta Lángi sù Iyawá na sù ira Tatole na

Mattiu 6:19-21

³² Á kinagi ni Apu Kesu paga, “Sikayu nga makituddu níkan, ari kayu maganássing, mássiki baddi kayu lá, ta magayáyá yù Yáma naw ta lángi nga mangisipá nikayu sù pammagure na. ³³ Ílaku naw laguk yù kukuá naw, á ilimù naw yù pallakuán naw sù ira ikáttole naw nga magáwák. Á nu kunnian yù akkuán naw, pakappián ni Namarò ta lángi yù iyawá na nikayu sangaw nu umay kayu tán. Á kunnay ta aijan yù kuártu naw nga ari bulubugá napangarián, nga nepay ta pitáka nga ari mabbáli ta dán ámma ari marúnù, nga napakappián sù gián nga awán ta makkokò ámma awán ta ulolak nga manarál. ³⁴ Ta yù paggianán nayù kukuá naw, yáyù gapay tángngagan naw nga nonopan. Arán nawin laguk nononopan yù ággián naw ta dabbuno, ngam nononopan nawin galá yù ákkyápu naw ká Yáma naw ta lángi.”

Yù ira Aripán nga Dán nga Naparán ámma Magiddak

³⁵ Á kinagi ni Apu Kesu paga nira, “Dán nga naparán kayu laguk nga magiddak sù labbè ku, mássiki nu gabi, ta kunnay sù tolay nga egga yù isingan na nga makegagátang. ³⁶ Yáyù nga keyarigán naw yù kunnay sù ira aripán nga matturá nga magiddi-iddak sù labbè nayù

yápu ra nga manoli nga maggapu ta bodá. Á nu mattottò sangaw ta puertá, dagarágâ nga bukatád da. ³⁷ Á magayáyâ yù ira aripan nu maratang na ira nayù yápu ra nga magiddi-iddak sù labbè na. Kagiak ku nikayu ta pagitubangan na ira laguk nayù yápu ra, tapè mallalálláng ira, á aggina yù masserbi nira. ³⁸ Á yáyù nga magayáyâ ira nu dán nga naparán iren, mássiki nu labbè nakuan ta tangngá na gabi onu alippánawák.

³⁹ “Á kánnámmuán naw laguk! Ta ángngarigán, nu ammu nayù tolay yù dattál nayù makkokò sù bale na, á matturrá nga magiddak, tapè ari makatallung yù makkokò ta bale na. ⁴⁰ Á kunnian gapay nikayu, máwák nga dán nga naparán kayu gapay, ta awán ta makánnámmu sù oras na labbè ku, ta ikáddagâ ku lâ labbè, síkán nga Kaká na ngámin na tatolay.”

*Yù Meyannung sù Aripan nga Mekatalà áнна yù Aripan nga Ari Mekatalà
Mattiu 24:45-51*

⁴¹ Á kabalin na nagubobuk ni Apu Kesu, kinagi ni Eduru kuna, “Apu, sikami lâ yù pakkagiám mu sù ángngarigám mu? Onu kagiám mu gapay sù ira tatolay?” kun na. ⁴² Á simibbák si Apu Kesu megapu sù tádday nga ángngarigán, á kinagi na, “Nu aijan yù napiá nga aripan nga kunnay nikayu nga manuppál sù ipakuá nikayu, aggina yù ikatalá nayù yápu na ta manaron sù ira kábulun na nga aripan. Á aggina laguk yù mangiyawâ nira sù kanad da ta pakkákád da. ⁴³ Á magayáyâ yù aripan ta labbè nayù yápu na, nu maratang nayù yápu na nga matuppál yù ngámin nga inikatalá na kuna! ⁴⁴ Á gapu ta napiá yù ámmaron na sù ira kábulun na nga aripan, napiá yù ábbalabálâ nayù yápu na kuna, ta aggina yù mekatalá nayù yápu na sù ngámin nga kukuá na.”

⁴⁵ “Ngam ta ángngarigán nu nonopan nayù aripan ta mabayák paga támma labbè yù yápu na, á yáyù nga maguray lâ yù akkuán na, á jigirigátan na yù ira kábulun na nga aripan, áнна kumán lâ áнна mappissán áнна magilellaw. ⁴⁶ Á ikáddagâ lâ labbè yù yápu na, á marángnganán na nga mangngamangnuá ta narákè. Á pagikaruan na laguk yù aripan, á metádday nga mekanakaná sù ira ari manguruk. ⁴⁷ Á yù aripan nga makánnámmu sù ipakuá nayù yápu na kuna, ngam arán na tuppálan áнна ari naparán sù labbè na, nepallá yù pamagikáru nayù yápu na kuna. ⁴⁸ Ngam yù aripan nga ari makánnámmu sù ipakuá nayù yápu na kuna áнна malliwá, á aláppaw lâ yù pamagikáru na kuna. Ngam yù tolay nga ikatalá nayù yápu na ta pakáwayyá na, iddagán na gapay yù panuppál na sù ipakuá na. Á yù tolay nga ikatalá nayù yápu na ta aru nga pakáwayyá na, aru gapay yù iddagán nayù yápu na nga palurotan na.”

*Massinná yù ira Tatolay Megapu kâ Apu Kesu
Mattiu 10:34-36*

⁴⁹ Á kinagi ni Apu Kesu gapay, “Yaw iniyángè sawe dabbuno yù bilin ni Namarò nga kun na api nga maggatang, tapè manawagán yù nonò nayù ira makaginná, ngam mabáli ta kun na api nga manarál sù nonò nayù ira malussaw níkán, á parè bì ta maggatangin nga mabi mabalin. ⁵⁰ Ngam máwák nga attamák ku yù jigá áнна paté, á ari magimammá yù nonò ku áddè ta arán na kabalin. ⁵¹ Á kagian naw mápugák ta minayá tapè pagimammatak ku yù ira tatolay ta dabbuno. Ngam ari, ta mepakkakáttuay ira ta nonò, ta aijan yù ira tumuttul níkán, áнна aijan yù ira manakì. ⁵² Á yáyù nga mamegapu kunangane nga makkakáttuay yù nonò nayù ira mawwawági. Á ta ángngarigán nu aijan yù límá nga tolay sù tádday nga balay, á yù ira tallu, makikontará ira sù ira duá. Á yù ira duá gapay, makikontará ira sù ira tallu. ⁵³ Á yù ira matáma, makkákontará ira. Á kunnian gapay sù ira masíná, makkákontará ira. Á yù katugángán, kontarán na yù manugáng na, á yù manugáng, kontarán na yù katugángán na.”

*Yù Panákkilát tam ta Mesimmu Sangaw
Mattiu 16:2-3; 5:24-26*

⁵⁴ Á kinagi ni Apu Kesu sù ira magari nga tatolay, “Á sikayu, ammu naw ta magurán támma sangaw, nu masingan naw yù naribbâ ta lalammarán. Á kuruk nga magurán sangaw. ⁵⁵ Á nu mappaddák nga naggapu ta abagátán, ammu naw ta mapátu yù ággaw sangaw, á kuruk nga mapátu. ⁵⁶ Agippipiá kayu! Ngattá, ta matákkilalán naw yù masingan naw ta lángi áнна dabbun, ngam arán naw tákkilalán yù mesimmu kunangan! ⁵⁷ Ngattá, ta arán naw nonopan yù mepángngâ nga akkuán naw nakuan! ⁵⁸ Á ta ángngarigán, nu aijan yù tolay nga nakaliwatán naw, lage naw makáddè ta kues, makká-ubobuk kayu, tapè mammapiá yù ággián naw. Ta nu iddagán naw yù pangikeká na nikayu ta kues, á yù kues,

ipaparesu na kayu sù ira pulis. ⁵⁹ Á kagiak ku nikayu, ta maggián kayu laguk ta karsel áddè ta arán naw pakekárú.”

13

Yù Meyannung ta Pabbabáwi na Tolay áнна yù Kapanunnù na

¹ Á pangituddu ni Apu Kesu, aijan yù ira tatolay nga minay nangiparámak kuna sù pamapáte ni Gubinador Pilato sù ira taga Galilia, ta pangiyátáng da ta ayám kâ Namarò. ² Á pakarámak ni Apu Kesu, kinagi na nira, “Á gapu ta natay ira, kagian naw mápugák ta nepallà yù liwâ da ánnè sù ira kábulud da nga taga Galilia. ³ Ngam ari gemma kuruk. Á kagiak ku nikayu, nu arán naw ibabáwi yù liwâ naw, matay kayu gapay nga kunnay nira, á mesinná kayu laguk kâ Namarò ta áddè ta áddè.

⁴ “Á anni ta ure naw sù ira mapulu ta walu nga tatolay nga narámak tam nga natay ta karabbâ nayù atannáng nga balay tuke ta Silowam sù ili na Jerusalem? Kagian naw mápugák ta nepallà yù liwâ da ánnè sù ira ngámin nga keliád da nga maggián ta Jerusalem. ⁵ Ngam ari kuruk gemma, á kagiak ku nikayu, nu arán naw ibabáwi yù liwâ naw, á ikáddagâ lá nga matay kayu gapay ta kunnay nira, á mesinná kayu laguk kâ Namarò ta áddè ta áddè.”

Yù Meyannung sù Káyu nga Igò nga Ari Mabbungá

⁶ Á nagángngarigán si Apu Kesu, á kinagi na nira, “Aijan yù tolai nga egga yù káyu nga igò* nga nemulá sù kamulán na ta úbas. Á en na sinullúnán nu egga bungá na. Ngam awán bulubugá ta bungá na. ⁷ Á kinagi na sù tolai nga minánnaron ta mulá na, ‘Innam mu yawe káyu! Tallu ragunakin nga umay mangá ta bungá na nakuan, á awán bulubugá ta málá ku! Tukáram mu laguk, ta awán gemma ta serbi na, tapè memulá yù dumá,’ kun na.

⁸ “Ngam yù minánnaron sù kamulán, kinagi na sù yápu na, ‘Paguráyám mu lábbi, Apu, ta tanga ragun, ta kokkobák ku yù pun na áнна payyák ku ta atay na ayám. ⁹ Á nu mabbungá sangaw nu tádday ragun, á napiá laguk! Á nu ari, ipattukák mu sangawin laguk.’ ”

Yù Pamammapiá ni Apu Kesu sù Nakkabbuk ta Ággaw nga Ággibannák

¹⁰ Á ta ággaw na Sabadu, nga ággibannák da, minay si Apu Kesu nangituddu sù kapillíá nayù ira Kudío. ¹¹ Á aijan tán yù babay nga nataki ta mapulu ta walu nga dagunin, nga nagunagán na anitu, á nakkabbuk nga ari makatáddak. ¹² Á pakasingan ni Apu Kesu kuna, inagálán na, á kinagi na kuna, “Tiyá, napammapiá ken sù taki mu!” kun na. ¹³ Á singngalán na, á dagarágá nammapiá nga nanáddak, á jináyo na si Namarò.

¹⁴ Á gapu ta pinammapiá ni Apu Kesu yù mataki ta Sabadu nga ággibannák da, napporay kuna yù kapatás ta kapillíá. Á yáyù nga kinagi na sù ira tatolay, “Ngattá, ta umay kayu mapporu sù ággaw na Sabadu, nga mangilin nga ággaw? Aijan gemma annam nga ággaw nga awayyá tam nga mattarabáku, nga umay kayu nakuan mapporu,” kun na. ¹⁵ Á simibbák si Apu Kesu, á kinagi na, “Agippípiá kayu! Egga panò nikayu yù tádday nga arán na ikállà yù ayám na áнна arán na ubbarán, nga en na penuman, mássiki nu Sabadu? ¹⁶ Á ngattá, ta kagian naw ta ari máyá ta Sabadu yù pamalubbáng ku sawe babay nga ginaká ni Lákay Abrakam, nga jinigirigá ni Satanas ta mapulu ta walu nga dagunin!” kun na. ¹⁷ Á tabbák ni Apu Kesu, nepasiránán yù ira malussaw kuna. Ngam yù ira ngámin nga káruán nga tatolay, magayáyá ira sù ngámin nga makapállà nga kingnguá ni Apu Kesu.

Yù ira Keyarigán nayù Pammagure ni Namarò

Mattiu 13:31-33; Markus 4:30-32

¹⁸ Á nangituddu si Apu Kesu mángin, á kinagi na, “Nonopan naw nu kunnasi yù pammagure ni Namarò ta tolai. Anni yù pangiyarigák ku sù pammagure na? ¹⁹ Kunnay sù babaddi nga bukal nga inimulá na tolai sù ákkomanán na. Á nattubbu, á dumakal lá dumakal, áddè ta umay magumù yù ira mammánù kuna.”

²⁰ Á kinagi na má nira, “Anni paga yù meyárik sù pammagure ni Namarò? ²¹ Massamá yù pammagure na sù ira tatolay nga kunnay sù passamá na áppalappák ta pán nga iná nayù babay, nga inikiruk na sù tallu súpá nga arená, tapè luppák yù pán.”

Meyannung sù ira Mesipá sù Pammagure ni Namarò

Mattiu 7:13-14, 21-23

²² Á nánaw di Apu Kesu ta umay ira ta Jerusalem. Á naddagâ nga nangituddu sù ira ngámin nga babálay nga talebarád da. ²³ Á aijan yù tádday nga minay nangiyabbù kuna, “Apu, baddi panò lá yù ira meyígù, tapè ari ira magikáru ta impiernu?” kun na. Á simibbák

* 13:6 Igò yù káyu nga masingngà bungá na.

si Apu Kesu nga nagangngarigán, á kinagi na, ²⁴“Meyárik yù pammagure ni Namarò sù balay nga nasirì yù puertá na. Italákkuruk naw nga tullung kunangane! Ta aru sangaw yù ira mamarubá, ngam ari ira makatallung.

²⁵“Á ta ángngarigán, nu inilitù nen nayù makákkua ta balay, arán na kayin patallungan. Á sangaw nu umay kayu mattottò ta puertá, á katolán naw, ‘Apu, bukatám mu bi!’ Ngam kagian na nikayu, ‘Arák ku nikayu bukatán, ta arát takayu ammu ána arák ku ammu yù naggapuán naw!’ kun na. ²⁶Á kagian naw kuna, ‘Apu, nepallállang kami nikaw, á sikaw yù nangituddu ta babále mi.’ ²⁷Ngam kagian na má, ‘Arát takayu ammu, á arát ta kayu kábulun. Mánaw kayu, sikayu nga minálliwá!’

²⁸“Á yáyù nga gikuletán kayu nga mangngarangngaringngi ta pakerípá naw sù ira naggaká nikayu, di Abrakam kári Isak ká Akup ána yù ira ngámin nga ábbilinán ni Namarò, nga mesipá sù pammagurayán ni Namarò. Ngam sikayu, mapaturiak kayu, á maggián kayu ta lawán. ²⁹Á umay yù ira makkakerumá nga tatolay nga naggapu ta ngámin nga makkakerumá nga lugár, tapè mepallalállang ira sù pammagurayán ni Namarò. ³⁰Á aijan yù ira maporián kunangane, nga mapolu sangaw. Á aijan yù ira mapolu kunangane, nga maporián sangaw.”

Yù Daddam ni Apu Kesu sù ira Tatolay ta Jerusalem

Mattiu 23:37-39

³¹Á aijan yù ira Parisio nga minay ká Apu Kesu, á kinagi ra kuna, “Mánaw ka saw, á umay ka ta tanakuán nga lugár, tapè melilli ka ká Patul Erodo, ta gustu na ka ipapapátay,” kud da.

³²Á kinagi na nira, “En naw kagian táne minángngilogò ta tángngagak ku bi yù tarabákù nga mamapánaw sù ira nattaliponak ána pammapiák ku yù ira máttaki ta ággawo ána sangaw nu ummá, áddè ta arák ku mabalin sù mekatallu nga ággaw. ³³Á yawe lâ kagiak ku nikayu, ta uputak ku yù akkuák ku ta ággawo ána sangaw nu ummá, ána tádday nga ággaw, ta áddè ta arák ku labbè ta Jerusalem. Á umayá ta Jerusalem gapu ta yáyù namapatayád da sù ira ábbilinán ni Namarò, á ari máyá nu matay yù ábbilinán ni Namarò ta tanakuán nga lugár.

³⁴“Sikayu nga taga Jerusalem, maraddamà megapu nikayu, á nepallá yù daddam ku, ta narákè yù ágganguá naw. Pinapáte naw yù ira ábbilinán ni Namarò, á pinayáng naw ta batu yù ira nabilin nga umay nikayu mangituddu! Á namepigiá nga inapá takayu nga umay nikán, nga kunnay sù ángngiddù na manù sù píyá na, ngam manaki kayu lâ! ³⁵Á yáyù nga manakikin laguk si Namarò sù ira tatolay ta Jerusalem, á nánawan na yù gián naw. Á kagiak ku laguk ta arán nawá má sangaw masingan áddè ta matunù yù panolì saw nikayu, á tákkilalan nawá, ána kagian naw sù ira kábulun naw, ‘Dayáwat tam yù Yápu tam nga jinok ni Namarò nga umay mampaguray!’ ”

14

Pammapiá ni Apu Kesu sù Tolay nga Mataki nga Nallábbák

¹ Á ta Sabadu nga ággibannák da, minay nakilállang si Apu Kesu ta bale nayù tádday nga kátannangan nayù ira Parisio. Á yù ira tatolay, iningad da si Apu Kesu, nu anni yù akkuán na, ²gapu ta jimikki kuna yù tolay nga nallábbák. ³Á nakiubuk si Apu Kesu sù ira mangituddu sù tunung ni Moyses ána yù ira Parisio, á kinagi na, “Anni yù mepugik nayù tunung tam nga meyanung ta pangilit tam sù ággaw nga ággibannák? Malliwá ittam panò sù ággaw nu pammapiát tam yù ira máttaki?” ⁴Ngam arád da sibbák si Apu Kesu. Á singgalán na yù tolay nga mataki, á pinammapiá na, á pinapáno na ta lubbè ta bale na. ⁵Á kinagi na laguk nira, “Sikayu nga katággitádday, ta ángngarigán nu aijan yù ayám na nga napanná ta abbù, arán na panò dagarágá nga igon, mássiki ta ággaw na Sabadu?” ⁶Á awán bulubugá ta matabbák da sù kinagi na.

Yù Meyannung sù Álliuk ána yù Mangapà kuna

⁷ Á nasingan ni Apu Kesu ta aijan yù ira napolu ta bale nayù Parisio, á minay ira nagitubang sù kapiánan nga ággitubangan nayù ira kotunán. Á yáyù nga kinagi ni Apu Kesu nira, ⁸“Á ta ángngarigán, nu aijan yù mangapá nikayu ta bodá, napiá nu ari kayu nakuan magitubang sù ággitubangan nayù ira kotunán. Ta aijan mápugák yù inapá na nga maráyaw ánnè nikayu. ⁹Á nu magitubang kayu sù ággitubangan nayù maráyaw, á umay yù nangapá nikayu, á kagian na, ‘Magali ka bi, ta tanakuán yù magitubang saw,’ kun na. Á yáyù nga mappasirán kayu, ta mapuersá kayu nga magitubang sù ággitubangan nayù kagukábán.

¹⁰“Ngam napiá galá nu mapolu kayu nga magitubang sù ággitubangan nayù kagukábán. Á sangaw nu umay yù mangáliiuk, á kagian na nikayu, ‘Kopun, umay ka magitubang táne

napiá nga ággitubangan nayù maráyaw,' kun na. Á ta kunnian meparáyaw kayu gapay ta arubáng nayù ira káruán nga tatolay. ¹¹ Ta yù ira ngámin nga mappeddaráyaw, mepagukák ira nga mepasiránán. Á yù ira tumulù nga gumukák, mepotun ira nga meparáyaw."

¹² Á kinagi ni Apu Kesu sù mangálluik kuna, "Nu mamakán ka, ari ka mangapà sù ira lá nga makápà gapay nikaw, nga kopum mu, wagim, kakanáyum mu ána yù ira maríku nga karúbám, maraké apatað da ka gapay sangaw sù pappabbúyá ra, á yáyù nga mabalabála ka. ¹³ Ngam sikaw á, kunniaiw yù akkuám mu nakuan. Nu mamakán ka, mangapà ka galá sù ira nga ari makápà nikaw, yù ira pobare, pilay, gappung, ána buling. ¹⁴ Nu kunnian yù ángngikállà mu nira, mapagayáyá ka, gapu ta ari ira makabalabála nikaw, á si Namarò yù mabbalabála nikaw sangaw nu matunù yù ággo na pamaginnanole na sù ira ngámin nga napiá nga tatolay."

*Yù Ángngarigán nga Meyannung sù ira Mallalálláng
Mattiu 22:1-10*

¹⁵ Á aijan yù tádday nga mepakkákán kári Apu Kesu, á pakaginná na sù kinagi ni Apu Kesu, kinagi na kuna, "Magayáyá gemma yù ira tatolay nga alliúgan na sangaw ni Namarò nga mallalálláng sù pammagurayán na!" kun na. ¹⁶ Ngam kinagi ni Apu Kesu kuna, "Á ta ángngarigán, aijan yù tolay nga mapparán ta aru nga kanan, tapè mangapà sangaw ta aru nga tatolay ta umay ira makilálláng. ¹⁷ Á ta kabalin na napparán, jinok na yù aripan na ta en na agálán yù ira apatan na. Á kinagi nayù aripan nira, 'Umay kayu bi, ta napanin,' kun na.

¹⁸ "Á ta pagágál nayù aripan sù ira tatolay, aijan yù angayád da ngámin nga katággitádday. Yù napolu nga inapà na, kinagi na sù aripan, 'Kagiam mu bi ká yápum ta pakomán nangà bi ta aringà makángay, ta aijan ginátang ku nga ákkomanák ku, á máwák ta ek ku tullúnán,' kun na. ¹⁹ Á yù tádday nga inapà na, kinagi na, 'Kagiam mu bi ká yápum ta pakomán nangà lábbi ta aringà makángay, ta ek ku tullúnán yù mapulu nga báka nga ginátang ku,' kun na. ²⁰ Á yù mekatallu nga inapà na, kinagi na, 'Aringà garè makángay ta apángngatáwanga garè,' kun na.

²¹ "Á nanoli yù aripan, á kinagi na sù yápu na yù ngámin nga kinagi ra. Á pakaginná na karannian, napporay gapu ta ari minay yù ira inapà na. Á kinagi na sù aripan na, 'Apurám mu nga umay sù ira dálan ána kalsáda, á iyángem saw yù ira marángnganam mu sangaw nga pobare, pilay, buling, ána gappung,' kun na. ²² Á sinuppál nayù aripan. Á kinagi na sù yápu na, 'Apu, natuppálin yù kinagim, á aijanin yù ira inapà ku, ngam aru lá paga yù paggianán,' kun na. ²³ Á kinagi na má sù aripan na, 'E ka laguk ta arayyu nga lungár, á apatam mu yù ira maratang mu ta umay ira makilálláng ta balé, tapè mapannu yù balé. ²⁴ Ta awán bulubugá sù ira napolu nga inapà ku nga pakákkapak ku sù kanan nga pinarák ku!' "

*Yù Meyannung sù ira Makituddu ká Apu Kesu
Mattiu 10:37-38*

²⁵ Á ta pallakák di Apu Kesu nga pappángè ta Jerusalem, aru yù ira tatolay nga siminuttul kuna. Á nallipay si Apu Kesu nira, á kinagi na nira, ²⁶ "Yù tolay nga umay nikán gapu ta gustu na tumuttul níkán, máwák nga sikán yù iddukan na ánnè sù ángngiddù na sù ira darakal na, atáwa na, ánâ na, wáwwagi na, ána baggi na gapay. ²⁷ Á yù tolay nga ari makeyangngà sù jigá ána pate na megapu sù panuttul na níkán, á ari makatuttul níkán.

²⁸ "Á ta ángngarigán nu aijan nikayu yù tolay nga mappadday ta balay, á mapolu bi biláangan na nu egga kuna yù makatò áddè ta kabalin na. ²⁹ Ta nu patáddagan na yù kallang, ána awán ta makatò, awán ta awayyá na nga mamalin. Á pakasingan nayù ira tatolay ta arán na mabalin, uyoyungád da. ³⁰ Á kagiad da, 'Mamegapu yù tolay nga mabbalay, ngam arán na balinan!' kud da.

³¹ "Á kunnian gapay nu aijan yù patul nga egga lá yù mapulu ribu nga suddálu na, á lage na umay makigerrá sù tádday nga patul nga egga yù duápulu ribu nga suddálu na, á nonopan na nu egga yù awayyá na nga mangappù nira. ³² Á nu nonopan na ta awán ta awayyá ra nga mangappù, doban na yù gádde na ta en na dapunan yù patul ána yù ira suddálu na lage ra umaranni kuna, tapè makikomá kuna ta magimammá ira. ³³ Á kunnian gapay nikayu nga katággitádday, nu aijan nikayu yù ikáyá na makituddu níkán, máwák nga mapolu nga nonopan na nu awayyá na nga ikatalà ngámin níkán yù ayatan na ána ure na, ána lonán na ngámin yù kukuá na, tapè makituddu níkán.

*Yù Meyárik ta Asin nga Náringin yù Paggák na
Mattiu 5:13; Markus 9:50*

³⁴ “Á nu aijan yù tumututtul nikán, ngam arán na ngámin ikatalà nikán, kunnay sù asin nga nári yù paggák na. Ta napiá yù asin, ngam nu awánin yù paggák na, á nalállák, á kunnasi panò nga manguli? Awán. ³⁵ Á kengá lâ yù asin, ta awán ta serbi na. Mássiki ikiruk da ta dabbun, ari máyâ ta abúno, á itabbà da lâ. Á sikayu nga makaginná, ginnán naw ta napiá yù kinagi!”

15

Yù Karneru nga Nagawáwán

Mattiu 18:12-14

¹ Á yù ira mináttuki ta buwí ána yù ira káruán nga minálliwá, minay ira kâ Apu Kesu, tapè ginnád da yù inittuddu na. ² Á naddagaragim yù ira Parisio ána yù ira mangituddu sù tunung ni Moyses, á kinagi ra, “Yawe tolay, alawatan na yù ira minálliwá nga metádday kuna, á mepallalálláng nira gapay!” kud da.

³ Á yáyù nga nagángngarigán si Apu Kesu, á kinagi na nira, ⁴ “Á ta ángngarigán, aijan yù tolay nga nagayám ta magatù nga karneru. Á anni panò yù akkuán na, nu magawáwán sangaw yù tádday? Arán na panò ibattáng yù ira siámapulu ta siám ta ággarabád da, tapè en na aleran yù tádday nga nagawáwán áddè ta arán na pakálele kuna? ⁵ Á nu málek na, ayatán, á butungan na nga ilabbè na ta bale na. ⁶ Á labbè na ta bale na, agálán na yù ira kákkopun na ána yù ira karúbá na, á kagian na nira, ‘Mepagayáyâ kayu nikán, á mappabbúyá ittam, ta nálek ku yù karnerù nga nagawáwán!’ kun na.

⁷ “Á kagiak ku nikayu, ta kunnay sù pagayáyâ nayù mináppárak ta pakálele na sù tádday nga karneru na nga nagawáwán, á kunnian gapay yù kepagayáyâ di Namarò ána yù ira nga maggián kuna ta lángi megapu sù tádday nga tolay nga mabbabáwi ta liwá na, ánnè sù ira siámapulu ta siám nga tatolay nga makkagi ta matunung ira nga awán ta liwá nga máwák da ibabáwi.”

Yù Pirâ nga Neyawáwán

⁸ Á kinagi ni Apu Kesu, “Á ta ángngarigán, aijan yù babay nga egga pirâ na nga mapulu. Á nu metabbà sangaw yù tádday, anni panò yù akkuán na? Paggatangan na yù isingan, á aleran na. Kuregán na yù ngámin nga unak na bale na áddè ta arán na pakálele kuna! ⁹ Á pakálele nayù babay sù pirâ na, agálán na yù ira kákkopun na ána yù ira karúbá na, tapè makipabbúyá ira kuna. Á kagian na nira, ‘Mepagayáyâ kayu nikán, ta nálek ku yù pirâ ku nga netabbà,’ kun na.

¹⁰ “Á kuruk yù kagiak ku, ta kunnay sù pagayáyâ da, kunnian gapay yù pagayáyâ nayù ira daroban ni Namarò megapu sù táttádday nga tolay nga mabbabáwi ána likuránán na yù liwá na.”

Yù Bagitolay nga Nagawáwán

¹¹ Á nagángngarigán paga si Apu Kesu, á kinagi na, “Aijan yù tolay nga maríku, nga egga duá nga ána na nga lálláki. ¹² Á yù aná na nga urián, en na kinagi kâ yáma na, ‘Ammò, iyawá mu nikán yù ballè sù kukuám,’ kun na. Á bille na laguk nayù yáma ra yù kukuá na sù ira duá nga ána na.

¹³ “Á ari nabayák, á en na iniláku nayù urián yù ngámin nga balle na nga iniyawá nayù yáma na, á inâ na yù kuártu, á nánaw, nga minay naggián ta arayyu nga lugár. Á ginástu na ngámin yù kuártu na sù narákè nga akkuán na.

¹⁴ “Á ta kapunu na kuártu na, jimittál yù bisin tán nga lugár. Á yáyù nga nabbisin gapay yù bagitolay, gapu ta awánin bulubugá ta ipangá na ta kanan na. ¹⁵ Á minay laguk nakiaripan sù tolay nga maggián táne lugár, á inipataron na kuna yù ira bábi na. ¹⁶ Á nepallá yù bisin nayù bagitolay, á ikáyâ na nakuan kumán sù ipamakán na sù ira bábi, ta awán bulubugá ta tolay nga mangiyawá ta kanan na.

¹⁷ “Á gapu ta nepallá yù bisin na, á ninonò na yù kaloku na, á nakemmunaw. Á kinagi na ta nonò na, ‘Aru yù ira mangallu kâ yámà, á massobará ira ngámin ta kanan. Ngam aijanà saw nga magisassay matay ta bisin! ¹⁸ Mattolingá laguk kâ Ammò, á kagiak ku sangaw kuna ta nakaliwákà kuna, á nepatalugáring kâ Namarò. ¹⁹ Á kagiak ku gapay kuna ta nilónák ku yù pakáwayyâ nga mebiláng ta aná na, tapè apan nangá ta makiaripan kuna,’ kun na. ²⁰ Á pakanonò na karannian, gimikkáng nga nánaw táne lugár ta lubbè kâ yáma na.

“Á pallakák nayù bagitolay paga ta dалан, á neripá nayù yáma na nga arayyu paga sù bale na. Á nakkarerá nga en na jinápun yù aná na, gapu ta nerallá yù allá na kuna.

Á ináppungulán na, á inummatán na. ²¹ Á kinagi nayù bagitolay sù yáma na, ‘Ammò, nakaliwáká níkaw, á nepatalugáring ká Namarò, á aringá mepángngá nga mebiláng ta aná mu,’ kun na. ²² Ngam yù yáma na, inagálán na yù ira aripan na, á kinagi na nira, ‘Alistuán naw nga umay mangá ta barawási nga kapiánán, ta barawasián naw. Á passapátukan naw ána passákkalangan naw gapay. ²³ Á kabalin naw mamarawási, apan naw yù kígaw nga báka nga matabá, ta pártian naw. Ta kumán ittam nga mappabbúyá, ²⁴ gapu ta yawe aná ku yù kunnay ta natay, ngam kun na naginnanolayin. Á kunnay ta nagawáwán, ngam náleránin,’ kun na. Á yáyù nga nappakán ira ána nappabbúyá.

²⁵ “Á pappabbúyá ra, limibbè yù kaká nga aná na nga naggapu ta ákkomanán nayù yáma na. Á pakáranni na sù bale ra, nakaddák sù pakaginná na ta paggássá ra ána pattatála ra. ²⁶ Á inagálán na yù tádday nga aripad da, á iniyabbù na kuna nu anni yù akkuád da. ²⁷ Á kinagi nayù aripan kuna, ‘Limibbè yù uriám mu, á inipapárti nayù yámam yù kígaw nga natabá, gapu ta napalabbè na nga napiá gawagawáyán na.’

²⁸ “Á pakaginná nayù kaká karannian, nappattunnuk, á ari simillung sù balay gapu ta pore na. Á pakasingan nayù yáma na nga aijan ta lawán yù aná na nga kaká, á en na laguk patallungan. ²⁹ Ngam simibbák sù yáma na, á kinagi na, ‘Pígiá nga dagunin yù pattarabákù níkaw ána arát taka bulubugá pinotuán! Ngam arám mà bulubugá paga iniddán ta mássiki kajjing nga ipappabbúyá mi sù ira kákkopuk ku. ³⁰ Ngam yawe aná mu, ginástu na yù ngámin nga kukuám sù ira minákkikarallaw. Á aggina yù inipártiam mu sù kígaw!’ kun na.

³¹ “Á kinagi nayù yáma na kuna, ‘Aná ku, sigídá ka nga maggián níkan, á kukuám ngámin yù kukuá. ³² Ngam napiá nu mappabbúyá ittam nga magayáyá, gapu ta nakalabbè galá yù wagim nga kunnay ta natay, ngam matolay. Á kunnay gapay ta nagawáwán, ngam nálegin.’”

16

Yù Maríku ána yù Pattarabakuan na nga Masírik

¹ Á nagángngarigán paga si Apu Kesu, á kinagi na sù ira makituddu kuna, “Aijan yù tolay nga maríku nga aijan kuna yù maggián nga manaron ta ngámin nga kukuá na. Á aijan yù ira minay nangiránuk sù maríku ta ginástu nayù minákkárgu yù nekárgu kuna. ² Á pakaginná nayù maríku, inipágál na, á kinagi na kuna, ‘Anni yawe naginná nga kingnguám sù inikárgù níkaw? Ará! Itúrâ mu laguk yù ngámin nga kingnguám sù kukuá, ta mapatalián ka sangaw,’ kun na.

³ “Á pakánámmu nayù minákkárgu ta mári sù tarabáku na, ninonò na, nga kun na, ‘Á kunnasi laguk yù áttolè, ta irián nangá sangaw nayù yápu sù tarabákù? Á anni yù akkuák ku, ta nakapi yù baggi nga makkomán, á mappasiráná makilimù!’ kun na. ⁴ Á pakanonò na, kinagi na, ‘E, aijan yù akkuák ku, tapè aijan yù ira kákkopuk ku nga mangilágum níkan sangaw nu máringá sù tarabákù,’ kun na.

⁵ “Á kunnaw yù kingguá na laguk, ta inipágál na yù ira ággitádday nga naggagatù sù yápu na. Á labbè nayù mapolu, kinagi na kuna, ‘Pígiá yù gatù mu sù yápu?’ ⁶ Á kinagi na, ‘Magatù nga láta nga denu,’ kun na. Á kinagi nayù minákkárgu kuna, ‘Aijan saw yù risíbum. Apam mu, ta alistuám nga ulian, ta itúrâ mu yù límapulu lá nga láta,’ kun na. ⁷ Á manganánuan, minay yù tádday, á kinagi na gapay kuna, ‘Pígiá yù gatù mu sù yápu?’ Á kinagi na, ‘Magatù nga kaban nga baggá.’ Á kinagi na kuna, ‘Á apam mu laguk yawe risíbum ta uliam mu, ta itúrâ mu yù walupulu lá.’

⁸ “Á pakánámmu nayù yápu na sù kingguá nayù narákè nga aripan na, á kinagi na, ‘Ye, masírik yù tolay, ta ammu na nga paránan yù pakkatolayán na!’”

Á kinagi ni Apu Kesu nira, “Napiá yù ánononò nayù minákkárgu nga nangilogò, nga kunnay sù ira ari manguruk ká Namarò, ta masírik ira ánnè sù ira manguruk ká Namarò, gapu ta ammu ra iyusá yù kukuá ra, tapè napiá yù ággiád da. ⁹ Á yawe laguk yù itabarang ku níkayu ta napiá nu iyusá naw yù kukuá naw sawe dabbuno ta ángngabbák naw sù ira kábulun naw, tapè sangaw nu mapúnu, á mapaddulò kayu sù mannanáyun nga paggianán naw ta lángi.”

¹⁰ Á kinagi na paga ni Apu Kesu, “Á yù tolay nga ammu na manaron sù baddi nga mekatalà kuna, ammu na gapay manaron sangaw nu aru yù mekatalà kuna. Ngam yù tolay nga arán na ammu manaron ta baddi, kunnian gapay yù akkuán na, nu aru nakuan yù mekatalà kuna. ¹¹ Á sikayu gapay, nu ari napiá yù ánnaron naw sù mekatalà níkayu sawe dabbuno, egga panò yù mangikatalà níkayu sù kukurugán nga karíku naw nga mannanáyun ta lángi? Awán! ¹² Á nu ari kayu mekatalà nga manaron sù kukuá na tanakuán

nga mepataron nikayu, egga panò yù mangiyawâ nikayu, tapè aijan yù kukuá naw lápay? Awán!

¹³ “Á awán ta tolay nga makapasserbi sù duá nga yápu na, gapu ta ayatan na yù tádday ána ikalusso na yù tádday. Á nu pakimorayán na yù tádday, iluddè na yù tádday. Á kunnay gapay nikayu, ari kayu makapasserbi kâ Namarò nu yá lá ikâyâ naw yù kuártu ána yù kegatángan na sawe dabbuno.”

Dumá yù Ánningan ni Namarò sù Ánningan na Tolay ta Dabbuno

Mattiu 11:12-13; 5:31-32; Markus 10:11-12

¹⁴ Á yù ira Parisio, nakaginná ra sù kinagi ni Apu Kesu, á inuyoyungád da, gapu ta kitokkuk ira ta kuártu, á yáyù lá ikâyâ da. ¹⁵ Á kinagi ni Apu Kesu nira, “Sikayu, agippípiá kayu, ta ipasingan naw sù ira tatolay yù piá naw, ngam ammu ni Namarò yù nonò naw! Á yù mappeddaráyaw ána yù agippípiá, nga mepotun sawe dabbuno, aggira yù ikálarák ni Namarò.”

¹⁶ Á kinagi na gapay ni Apu Kesu, “Yù tunung nga inittuddu ni Moyses ána yù inittuddu nayù ira ngaw ábbilinán ni Namarò, yáyù sinuttul nayù ira tatolay áddè ngaw, ta áddè ta dattál ni Kuan nga Minánnigü. Ngam dattál ni Kuan, pinegapuanán na mangilayalayá sù napiá nga dámak nga meyanung sù pammagure ni Namarò, á aru laguk yù ira nga mapattù nga mesipá kuna. ¹⁷ Ngam yù tunung nga inittuddu ni Moyses, ari mapangarián, mássiki nu baddi lá. Á lummà yù lángi ána dabbuno lage na pangarián nayù tunung ni Moyses. ¹⁸ Á ginnán naw yù tunung. Nu igúnge na lálaki yù atáwa na pángè na mangatáwa ta tanakuán, á mangarallow. Á nu mangatáwa yù lálaki ta babay nga negúngay ta atáwa na, á mangarallow gapay.”

Yù Nesimmu sù Maríku ána si Lasaru nga Pobare

¹⁹ Á kinagi na paga ni Apu Kesu, “Aijan yù tolay nga maríku nga nabbísti ta kunnay ta patul, nga mappabbúyá nga mappakán ta kággággaw. ²⁰ Á aijan gapay yù pobare nga mangngágan ta Lasaru, nga nallutulutu yù baggi na, á ta kággággaw iyánge ra nga peddád da lá ta aranni sù áttallungán na bale nayù maríku, ²¹ ta iddanamán na ta iyawá da yù buttà ra kuna. Á minay yù ira ítu nga najjijil sù lutu na.

²² “Á manganánuán, natay yù pobare. Á yù ira daroban ni Namarò, iná da yù ikararuá nayù pobare ta makipabbúyá sù giád di Kákay Abrakam. Á manganánuán, natay gapay yù maríku, á initanam da. ²³ Á yá labbetán nayù ikararuá nayù maríku yù impiernu.

“Á karigirigá nayù maríku ta impiernu, nattánguk ta arayyu, á nasingan na di Kákay Abrakam kâ Lasaru nga namerik kuna. ²⁴ Á kinatolán nayù maríku laguk si Kákay Abrakam, á kinagi na, ‘Kákay Abrakam, ikállà mà ta dobam bì si Lasaru, ta en na pasinatán yù jilá ta danum, tapè malannáwán, ta marigirigáká sawe api,’ kun na. ²⁵ Ngam kinagi ni Abrakam kuna, ‘Ílû, nonotam mu ta aru yù napiá nga nálá mu ngaw sù katolem ta dabbun. Ngam si Lasaru, narigirigá ngaw. Á kunangane, nabannáyánin saw nga magayáyá si Lasaru, á sikaw, maparigirigá ka. ²⁶ Á nepatalugáring ta awán ta awayyá mi nga mangabbák nikaw, ta aijan yù aláwa nga abbù nga namassinná nittam, á awán ta makángay tán nga maggapu saw, á awán gapay ta makángay saw nga maggapu tán.’

²⁷ “Á kinagi na laguk nayù ngaw maríku, ‘Á Kákay, ikállà mà bì, á dobam bì si Lasaru ta bale nayù yámà, ²⁸ ta en na kagian sù ira límá nga wáwwagi ta pataliád da yù narákè nga ágganguá ra, tapè ari ira gapay lubbè sawe giák ku, nga gián na jigá,’ kun na. ²⁹ Ngam kinagi ni Abrakam kuna, ‘Aijan nira yù inipetúrá na ngaw ni Namarò kári Moyses ána yù ira ábbilinán. Aijan laguk yù awayyá ren nayù ira wáwwagim nga manguruk.’

³⁰ “Á kinagi na, ‘Wan, Kákay, ngam arád da ira tángngagan. Á nu aijan yù naginnanolay nga umay nira, ta ipakánnámmu na nira yù kuruk, á likuránád da támma yù liwá da, á manguruk ira mápugák.’ ³¹ Ngam kinagi ni Abrakam kuna, ‘Nu arád da ginnán yù inittuddu ni Moyses ána yù ira káruán nga ábbilinán ni Namarò, arád da gapay kurugan nu umay nakuan yù naginnanolay nga makkagi nira.’ ”

17

Yù Mesimmu sù Tolay nga Mamalliwá

Mattiu 18:6-7, 21-22; Markus 9:42

¹ Á kinagi ni Apu Kesu sù ira makittuddu kuna, “Negagángay yù awayyá na tolay nga malliwá. Ngam makállállà ira nga mamápáyá ána mangirudduák ta malliwá yù ira kábulud da. Bay e! Kábbi ira! ² Ta más napiá nakuan nu igakká da yù ággilingán ta mangi sù bullo nayù tolay, á itabbá da ta bebay tapè matay, tapè awán ta mangittuddu ta narákè sù ira

kapángxguruk kâ Namarò. ³ Magimuguk kayu laguk, ta arán naw tudduán ta naràkè yù ira ikáttole naw. Á nu malliwâ yù kabbulun naw, gammán naw. Á nu mabbabáwi ta liwâ na, pakomán naw. ⁴ Á nu aijan yù tolay nga mameppitu nga malliwâ nikayu ta tangággaw, á mameppitu nga mattotoli nikayu nga makipakomá, máwák naw pakomán.”

Yù Meyannung sù Ángngikatalà tam kâ Namarò

⁵ Á yù ira sinudduán ni Apu Kesu, kinagi ra kuna, “Apu, pasikanam mu bì yù ángngikatalà mi kâ Namarò.” ⁶ Á kinagi ni Apu, “Mássiki nu makapi paga yù ángngikatalà naw, nga kunnay ta kabajjitán nga bini, á aijan nakuan yù awayyá naw nga makkagi sawe káyu, ‘Mabaddul ka nga meyalí nga memulá ta bebay!’ á mapaluro!”

Yù Meyannung sù Tarabáku tam nga Masserbi kâ Namarò

⁷ Á kinagi ni Apu Kesu, “Á ta ángngarigán nu aijan yù tolay nga egga yù aripan na, á mattarabáku yù aripan na sù ákkomanán nayù yápu na onu manaron sù ayám na. Á sangaw nu púgák, lubbè ta balay nga maggapu sù ákkomanán. Á anni panò yù kagian nayù yápu na kuna? Kagian na panò ta umay kumán? ⁸ Ari gemma, ngam kagian na galá, ‘E ka bì mabbaggaw, á pataliám mu yù barawásim, á magapi ka tapè kumánà, ta sikán yù mapolu nga kumán, á ta kabalik ku kumán, á kumán ka gapay,’ kun na.

⁹ “Á ta ángngarigán nu tuppálan nayù aripan yù ipakuá nayù yápu na kuna, dayáwan na panò nayù yápu na? Ari gemma, ta yáyù gemma yù tarabáku nayù aripan. ¹⁰ Á sikayu gapay, ta kabalín naw manuppál sù ngámin nga ipakuá ni Namarò nikayu, á kagian naw lá, ‘Ara-ariapan kami lá, á sinuppál mi lá yù inipakuá na níkami nayù yápu mi megapu sù allá na níkami.’ ”

Pammapiá ni Apu Kesu sù ira Mapulu nga Naggoggong

¹¹ Á sù ánge ri Apu Kesu ta Jerusalem, nallakák ira sù lállátán na purubinsia na Samaria ána Galilia. ¹² Á pakáraní ra ta tádday nga babálay, nerapunád da yù mapulu nga tatolay nga naggoggong, ngam arayyu lá yù nanáddagád da. ¹³ Á kinatolád da si Apu Kesu, á kinagi ra kuna, “Mesturu, ikállà kami bì!” kud da.

¹⁴ Á pakasingan ni Apu Kesu sù ira naggoggong, kinagi na nira, “E kayu sù ira pári, tapè innad da yù baggi naw,” kun na. Á sù pappangè da nga umay sù pári, ikáddagá lá nammapiá iren. ¹⁵ Á yù tádday nira, pakasingan na ta nammapiá ngin, dagarágá nanoli, nga makkatakátol sù áddáyo na kâ Namarò. ¹⁶ Á pakáddè na kâ Apu Kesu, namalittúkak ta arubáng na nga nabbalabála.

Á yane tolay nga nanoli nga nabbalabála kâ Apu Kesu, aggina yù taga Samaria nga ari Kudío, nga ikalusso nayù ira Kudío. ¹⁷ Á kinagi ni Apu Kesu sù ira mepulupulù kuna, “Ari panò mapulu yù ira nammapiá? Á aijan saw yù tádday. Isaw giád da panò nayù ira siám? ¹⁸ Á ngattá, ta yawe lá nga ari Kudío yù nattoli nga maddáyaw kâ Namarò!” ¹⁹ Á kinagi na gapay sù tolay, “Gumikkáng ka, ta má naw ken, ta nammapiá ken megapu sù ángngikatalà mu níkan,” kun na.

Yù Meyannung sù Dattál nayù Pammagure ni Namarò

Mattiu 24:23-28, 37-41

²⁰ Á aijan yù ira Parisio nga minay nangiyabbú kâ Apu Kesu nu káni yù dattál nayù pammagure ni Namarò. Á simibbák si Apu Kesu, á kinagi na, “Awán bulubugá ta pakasinganán naw sù dattál nayù pammagure ni Namarò. ²¹ Á ari makagi na tolay ta aijan saw onu aijan tán, gapu ta aijanín galá sù nonò nayù ira manguruk.”

²² Á kinagi ni Apu Kesu sù ira makituddu kuna, “Mapattú kayu sangaw nga maningan sù mássiki lá tádday nga ággo nayù pammagurè saw dabbuno, sikán nga Kaká na ngámin na tatolay, ngam arán naw masingan. ²³ Á sangaw aijan yù ira umay makkagi ta ‘Ye, aijan tán!’ Onu kagiád da, ‘Aijan saw!’ Ari kayu mepulú nira! Arán naw pasikkálan! ²⁴ Ta kunnay ta kilá nga mamannawák ta lángi, kunnian sangaw yù pattoli ta dabbuno, sikán nga Kaká na ngámin na tatolay. ²⁵ Ngam máwák ta olu nga attamáku ku yù aru nga panigirigá da níkan ána panakí da níkan nayù ira tatolay nga matolay ta ággawo.

²⁶ “Á noka nu maddagguná mattoli, sikán nga Kaká na ngámin na tatolay, á naggittá yù kustombare nayù ira tatolay sù kustombare ra ngaw ta keggá ra ngaw di Noe. ²⁷ Ta yá lá sinángxgák da ngaw yù pakkákád da, pamissád da ána pangatáwa ra, áddè ta ággaw nga pamatallung ni Namarò kári Noe sù dakal nga barangay. Á jimittál yù paddakal na danum, á nalítu yù dabbun, á neburuk yù ira tatolay nga ari simillung sù barangay, á nalaggabán ira.

28 “Á kunnay gapay sù kingnguá ra ngaw ta keggá ri Lot, ta sinángngák da lággapay yù pakkákád da, pamissád da, paggatagátáng da, pallakaláku ra, pammulá ra, ána pabbalabale ra. 29 Á kapállilik di Lot nga nánaw ta ili na Sodoma, ikáddagá lâ aijan yù api ána asupri nga naggapu ta lángi, nga nappanná sù ili na Sodoma, á natuggi yù ira ngámin nga tatolay tán. 30 Á kunnay sù kustombare ra ngaw nayù ira tatolay ta keggá ri Lot, kunnian gapay sangaw yù ággaw nga pattoli, sikán nga Kaká na ngámin na tatolay.

31 “Á yáyù nga pappalánat takayu, ta sangaw nu duttál yù ággaw, á yù ira tatolay nga aijan ta lawán na bale ra, ari iren nakuan tullung nga umay mangá sù kukuá ra. Á yù ira nga aijan ta ákkomanád da, ari ira nakuan lubbè. 32 Á nonotan naw yù ngaw atáwa ni Lot, tapè arán naw párigán! Ta pattálo ra ta ili na Sodoma, ninonò na lâ nayù babay yù kukuá na, á arán na kinuruk yù kinagi ni Namarò. Á nabbáli ta asin nga nanáddak ta kun na kallang. 33 Á yù tolay nga mangiddù ta baggi na ta dabbuno, á matay gemma galá. Ngam yù tolay nga mangitapil sù baggi na megapu sù ángnguruk na ká Namarò, napiá yù ággián na, ta mesipá ká Namarò ta áddè ta áddè.

34 “Á kagiak ku nikayu, ta ángngarigán nu gabi yù tappi ku, á nu aijan duá nga tolay nga madduruk nga makkaturuk, á malá yù tádday, á mabattáng yù tádday. 35 Á kunnay gapay sù ira duá nga bábbay nga mabbáyu, ta malá yù tádday á mabattáng yù tádday. 36 Á mássiki yù ira duá gapay nga mattarabáku sù ákkomanán, malá yù tádday á mabattáng yù tádday.” 37 Á yù ira makituddu ká Apu Kesu, pakaginná ra karannian, kinagi ra kuna, “Apu, isaw gián na?” Á kinagi na, “Yù gián nayù natay, yáyù pagunnurán nayù ira bukkaw.”*

18

Yù Babay nga Bálu ána yù Kues

1 Á nagángngarigán si Apu Kesu sù ira makituddu kuna, ta ituddu na nira ta máwák da nga ari malurá nga makimállá ká Namarò, á ari ira mabbábáng sù ángngikalalá da kuna. 2 Á kinagi ni Apu Kesu, “Aijan sù tádday nga ili yù kues nga ari bulubugá maganássing ká Namarò, á arán na gapay pakimorayan yù ira kábulun na nga tatolay.

3 “Á táne ili, aijan yù babay nga bálu nga sigidá nga umay sù kues, á kagian na kuna, ‘Abbágám mà bì, ta aijan yù tolay nga iddá nangá lâ ikeká, nga awáná gemma ta liwá,’ kun na. 4 Á ta olu, arán na sinángngák nayù kues. Ngam manganánnuán, ninonò na, nga kun na, ‘Mássiki arák ku ikássing si Namarò ána awán ta pasirák ku sù ira ikáttolè, 5 ngam panunnták ku yù mangikeká sù babay, marakè makkara-ángay yù babay níkan, áddè ta arák ku kalurá!’ ”

6 Á kabalín na nagángngarigán ni Apu Kesu, á kinagi na, “Naginná naw yù kingnguá nayù kues, ta mássiki nu arán na inabbágán yù babay ta olu nga ánge na kuna, ngam inabbágán na galá. 7 Á nepatalugáring ká Namarò, ta ari panò dán nga naparán nga mangabbák sù ira tatole na, nga sigidá makimállá kuna ta ággaw ána gabi? Abbágán na ira gemma, á arán na ira ikikítulán. 8 Ta kuruk yù kagiak ku nikayu, ta dagarágá nga abbágán ni Namarò yù ira tatole na. Ngam sangaw nu mattolingá ta dabbuno, sikán nga Kaká na ngámin na tatolay, aijan panò sangaw yù ira marángnganák ku nga manguruk níkan? Baddi ira lâ, ta aru yù ira manaki níkan.”

Yù Duá ira nga Minay Nakimállá sù Mangilin nga Kapilliá ta Jerusalem

9 Á nagángngarigán si Apu Kesu, ta ammu na ta aijan yù ira makkagi ta aggira yù kapiánán, á iluddè da yù ira kábulud da. 10 Á kinagi ni Apu Kesu nira, “Aijan yù duá nga lálláki nga minay sù mangilin nga kapilliá ta Jerusalem, tapè makimállá ira. Á Parisio yù tádday, á yù tádday yù mináttuki ta buwí. 11 Á minárayyu yù Parisio ta baddi sù mináttuki ta buwí, á nanáddak nga nakimállá, á kinagi na, ‘Apu Namarò, mabbalabálaká níkaw ta aringá negittá sù ira káruán, ta aringá mukkuk, aringá massiri, aringá minángngarallow, á aringá gapay negittá táne tolay nga mináttuki ta buwí. 12 Á sikán, mamidduángá nga ari kumán ta tangaliguán tapè makimállaká. Á iyawá ku níkaw yù mekamapulu sù ngámin nga malá ku,’ kun na. Yáyù yù ákkimállá nayù Parisio.

13 “Ngam yù tolay nga mináttuki ta buwí, minay nanáddak ta arayyu, á nakkummak ána kidduk na yù gáko na, gapu ta maraddam sù liwá na. Á kinagi na, ‘Apu Namarò, ikállá mà bì, ta minálliwáká!’ kun na.

* 17:37 Á yù kebalínán nayù kinagi na támma, ta alistu yù keparámak nayù nesimmu. Á yù tádday nga kebalínán na yù aru nga tatolay nga maggiraw sangaw nu pakarámak da. Otturu, yù bukkaw yù panákkilalán nayù ira ngaw suddáiu nayù ira mammaguray ta ili na Roma.

¹⁴ “Á kuruk yawe nga kagiak ku nikayu, ta pinakomá ni Namarò galá yù mináttuki ta buwi ánnè sù Parisio. Á yù ira nga mappeddaráyaw, aggira yù mepasiránán ta arubáng ni Namarò. Ngam yù tolay nga tumulù, nga makipakomá kâ Namarò sù liwá na, aggina yù meparáyaw.”

*Yù Pangikállà ni Apu Kesu sù ira Ábbing
Mattiu 19:13-15; Markus 10:13-16*

¹⁵ Á tádday ággaw sù arád da paga pakáddè di Apu Kesu ta Jerusalem, á minay yù ira tatolay nga iniyángo ra yù ira ánnà da kâ Apu Kesu, tapè ipotun na yù limá na sù ira ábbing ta kunnay ta kustombare ra, á kagian na yù pangiddù ni Namarò nira. Á yù ira makituddu kâ Apu Kesu, nasingad da yù pangiyángo ra sù ira ábbing, á gimmá ra ira. ¹⁶ Ngam inagálán ni Apu Kesu yù ira ábbing, á kinagi na sù ira makituddu kuna, “Arán naw gammán yù ángo nayù ira ábbing níkán, ta yù ira tatolay nga kunnay nira, aggira yù mesipá sù pammagure ni Namarò. ¹⁷ Á kuruk yawe nga kagiak ku nikayu, nu ari kayu tumulù nga mangikatalá kâ Namarò ta kunnay sù ángngikatalá na abbing, ari kayu bulubugá mesipá sù pammagure na.”

*Yù Ángo nayù Maríku kâ Apu Kesu
Mattiu 19:16-30; Markus 10:17-31*

¹⁸ Á minay kâ Apu Kesu yù tádday nga Kudío nga makáwayyá, á kinagi na, “Mesturu, sikaw yù kapiánán nga mangituddu. Á anni laguk yù akkuák ku, tapè mesipaká kâ Namarò ta áddè ta áddè?” kun na. ¹⁹ Á kinagi ni Apu Kesu kuna, “Ngattá, ta kagiam mu ta sikán yù kapiánán? Awán bulubugá ta kapiánán, nu ari lá si Namarò! ²⁰ Á ammu gemma yù tuttulam mu nakuan nga tunung ni Namarò: Ari ka mangarallow, ari ka mamapátay, ari ka makkokò, ari ka massirisiri, á pakimorayám mu yù ira darakal mu,” kun na. ²¹ Á kinagi nayù tolay, “Wan, á sinuppál ku ngámin dannian áddè sù kabaddi ku,” kun na. ²² Á kinagi ni Apu Kesu kuna, “Ajjan lá paga yù akkuám mu nakuan, ta em mu iláku yù ngámin nga kukuám, á isinek mu yù pallakuám mu sù ira magáwák, tapè ajjan yù táli nayù kukuám nga pakapián ni Namarò ta lángi. Á kabalim mu manuppál karannian, umay ka laguk tumuttul níkán,” kun na. ²³ Ngam ta pakaginná nayù tolay sù kinagi na, nerallá yù daddam na, gapu ta aru yù kukuá na.

²⁴ Á pakasingan ni Apu Kesu ta maraddam yù maríku, kinagi na sù ira makituddu kuna, “Marigá garè nga tumulù yù maríku kâ Namarò, tapè mesipá nakuan sù pammagure na. ²⁵ Á ta ángngarigán, kunnay ta karigá na labbú na dakal nga ayám nga kamel sù abbù na dágum, á kunnian gapay, marigá yù kesipá nayù maríku sù pammagure ni Namarò.”

²⁶ Á napállá yù ira nakaginná sù kinagi na. Á kinagi ra, “Á nu arán na awayyá na maríku nga mesipá sù pammagure ni Namarò, á asinni laguk yù mesipá?” ²⁷ Á kinagi ni Apu Kesu nira, “Mássiki nu arán na awayyá na tolay nga palurotan, awayyá ni Namarò nga palurotan. Á yáyù nga meyiǵù yù ira ngámin nga manguruk kuna, mássiki nu maríku onu pobare,” kun na.

²⁸ Á kinagi ni Eduru, “Apu, nonopam mu kami, ta nánawám mi ngámin, tapè tumuttul kami níkaw.” kun na. ²⁹ Á kinagi ni Apu Kesu nira, “Kuruk yawe nga kagiak ku nikayu, ta nu pánawán na tolay yù bale na, atáwa na, wáwwagi na, darakal na, onu ánnà na tapè mesipá sù pammagure ni Namarò, ³⁰ á aru yù bálá na nga napiá nga meyawá kuna ta paggián na paga ta dabbuno ánnè sù nánawán na, á mepattolay noka kâ Namarò ta áddè ta áddè.”

*Pilluan ni Apu Kesu Magubobuk sù Meyannung ta Pate na
Mattiu 20:17-19; Markus 10:32-34*

³¹ Á si Apu Kesu, inililli na yù ira mapulu duá nga sinudduán na, á kinagi na nira, “Ginnán naw bi yù kagiak ku, ta umay ittam ta Jerusalem. Á tappi tam tán, mapalurò yù ngámin nga inipeturá na ngaw ni Namarò sù ira ábbilinán na, nga mesimmu níkán nga Kaká na ngámin na tatolay. ³² Ta gaputad dangá sangaw, á iyawá dangá sù ira ari Kudío. Á uyu-uyawad dangá, pakkakagiád dangá, áнна pallulutábád dangá. ³³ Á palapaligatad dangá, á papatáyad dangá. Ngam maginannolayá ta mekatallu nga ággaw,” kun ni Apu Kesu. ³⁴ Ngam arád da bulubugá nánnammuán nayù ira sinudduán na yù kinagi na, gapu ta kunnay ta monak nga nelímak nira, á arád da nánnammuán yù kebalinán na.

*Yù Pamammapiá ni Apu Kesu sù Buling
Mattiu 20:29-34; Markus 10:46-52*

³⁵ Á paddaggud di Apu Kesu tumunù sù ili na Jeriku, ajjan yù tolay nga buling nga nagitubang nga makilimù ta aggik na dалан. ³⁶ Á ta pakaginná nayù buling ta aru yù ira tatolay nga mattalebák, á kinagi na, “Anni yù nesimmu? Ngattá, ta aru yù mattalebák?”

kun na. ³⁷ Á kinagi ra kuna, “Mattalebák si Apu Kesu nga taga Nasaret,” kud da. ³⁸ Á nakkatol, á kinagi na, “Apu Kesu, nga ginaká ni Patul Dabid, ikállà mà bì!” kun na. ³⁹ Á yù ira tatolay nga napolu, gimmá ra, á kinagi ra, “Magimammà ka!” kud da. Ngam iniyássikan na nakkatol, nga kun na, “Sikaw nga ginaká ni Patul Dabid, ikállà mà bì!”

⁴⁰ Á pakaginná ni Apu Kesu sù pakkatol nayù buling, á nagginnà, á kinagi na nira ta iyángo ra yù buling kuna. Á pakerakki da kuna, nagiyabbù si Apu Kesu sù buling, ⁴¹ “Anni yù ikáyâ mu nga akkuák ku megapu nikaw?” Á kinagi na, “Apu, gustù ta makasinganakin,” kun na. ⁴² Á kinagi ni Apu Kesu kuna, “Wan. Makasingan ken laguk, ta napammapiá ken megapu sù ángngikatalà mu nikán.” ⁴³ Á dagarágâ nakasingan, á nepattututtul nira nga maddáyaw kâ Namarò. Á yù ira tatolay, naddáyaw ira gapay kâ Namarò gapu ta nasingad da yù nesimmu.

19

Pakkaragâ ni Sakio nga Makasingan kâ Apu Kesu

¹ Á nattalebák di Apu Kesu ta ili na Jeriku. ² Á aijan tán yù tolay nga maríku nga mangngágan ta Sakio. Aggina yù tádday nga kátannangán nayù ira mináttuki ta buwi. ³ Á gustu na nga innan si Apu Kesu, ngam awán ta awayyá na, gapu sù káru nayù ira tatolay ána alinnâ garè si Sakio. ⁴ Á yáyù nga nakkarerá nga napolu nga nakkalay ta káyu, tapè masingan na sangaw nu mattalebák tán.

⁵ Á pakáddè ni Apu Kesu ta káyu nga gián ni Sakio, á nattánguk, á kinagi na kâ Sakio, “Á apurám mu ámmutták, ta ek ku ta balem magammá!” kun na. ⁶ Á dagarágâ gimitták si Sakio, á ayatán nga mamaddulò kuna.

⁷ Á pakasingan nayù ira tatolay ta minay si Apu Kesu sù bale ni Sakio, naddagaragim ira, á kinagi ra, “Ngattá, ta makiálluik yawe tolay sù bale nayù minálliwâl!” kud da. ⁸ Ngam si Sakio, nanáddak ta arubáng nayù ira tatolay, á kinagi na kâ Apu Kesu, “Apu, iyawâ ku yù gadduá nayù ngámin nga kukuâ sù ira pobare. Á yù sinuítu ku, taliák ku ta taggiappâ yù taggítádday,” kun na.

⁹ Á pakaginná ni Apu Kesu sù kinagi ni Sakio, nga italákkuruk na, á kinagi ni Apu Kesu kuna, “Sakio, kunangane ta ággawo meyígù kayin ána yù ira kábbalem! Á ari kayu mekanakanâ sù pamagikáru ni Namarò ta tolay, gapu ta negittá yù ángngikatalà mu kâ Namarò sù ángngikatalà ni Abrakam. Yáyù nga mepasingan ta kuruk nga ginaká na ka ni Abrakam. ¹⁰ Á yáyù nga minayá saw, sikán nga Kaká na ngámin na tatolay, ta ek ku agálán ána iyígù yù ira tatolay nga nagawáwán megapu sù liwâ da, tapè umay ira makiyápu kâ Namarò ána mesipâ ira kuna.”

Yù Pamalabála ni Apu sù ira Mekatalà

Mattiu 25:14-30

¹¹ Á pallakák di Apu Kesu ta dалан, maddaggun ira nga makáddè ta Jerusalem. Á yù ira tatolay, gininná ra ta napiá yù kinagi ni Apu Kesu, ta kagiad da ta sangaw nu makalabbè ira ta Jerusalem, yáyù pamegapu nayù pammagure ni Namarò ta dabbuno. Á yáyù nga nagángngarigán si Apu Kesu nira. ¹² Á kinagi ni Apu Kesu nira, “Aijan yù tolay nga ginaká na patul nga nágalán ta umay ta arayyu nga páppatulán, tapè málá na yù pakáwayyá na nga mappatul, á tapè manoli nga mammaguray sù gián na. ¹³ Á lage na mánaw sù gián na, inagálán na yù ira mapulu nga aripan na, á iniyawâ na nira nga katággítádday yù pirâ nga buláwán, á kinagi na nira, ‘Sù káwák ku, pagaruan naw yawe kuártu,’ kun na. Á nánaw.

¹⁴ “Á yù ira káruán nga tatolay nga maggián sù lugár na, malussaw ira kuna. Á yáyù nga jinok da yù ira tumuttul kuna nga makkagi ta panakitád da nga mappatul nira. ¹⁵ Á mássiki nu manaki ira kuna, ngam nálá na yù pakáwayyá na nga mappatul, á nanoli sù gián na. Á inipágál na yù ira aripan na nga iniddán ta pirâ, tapè ammu na nu pígiá yù naganánsiá ra. ¹⁶ Á minay yù tádday nga aripan, á kinagi na, ‘Apu Patul, nabbalin ta mapulu yù tádday nga pirâ nga iniyawâ mu nikán,’ kun na. ¹⁷ ‘Á napiá yù kingnguám,’ kun nayù patul kuna. ‘Á sikaw yù napiá nga aripan. Á gapu ta pangikatalakán ka ta baddi nga inikatalà ku nikaw, á iyawâ ku nikaw yù pakáwayyám sù mapulu nga ili,’ kun nayù patul kuna.

¹⁸ “Á manganánuán, minay yù mekaruá nga aripan, á kinagi na, ‘Apu Patul, pinabbalik ku ta límá yù tádday nga iniyawâ mu nikán,’ kun na. ¹⁹ ‘Á sikaw gapay, mammaguray ka laguk ta límá nga ili,’ kun nayù patul kuna.

²⁰ “Á minay yù tádday nga aripan ta arubáng nayù patul, á kinagi na, ‘Apu Patul, aijan saw yù pirá mu nga nabungun, nga pinakappiák ku, ²¹ gapu ta maganássingá nikaw. Ta ammu ta mapporay ka nga maríku megapu sù bannák nayù ira káruán nga tatolay, ta apam mu ta kukuám yù arám mu pabbannagán,’ kun na. ²² Á kinagi nayù patul kuna, ‘Mapanunnután ka megapu sù kinagim, sikaw nga naráké nga aripan! Ta kinagim ta ammu ta sikán yù mapporay nga mangá sù arák ku pabbannagán. ²³ Á nu ammu yian, ngattá ta arám mu inibángku yù kuártu, tapé málá ku yù baddi nga ganánsiá na sù panolil’

²⁴ “Á kinagi na laguk nayù patul sù ira nanáddak tán, ‘Apan naw yù kuártu na, á iyawá naw sù tolay nga egga kuna yù mapulu,’ kun na. ²⁵ Ngam kinagi ra, ‘Á wan, Apu, ngam aijanin gemma yù mapulu kuna!’ kud da. ²⁶ Á kinagi nayù patul nira, ‘Wan, á kuruk yawe nga kagiak ku nikayu. Yù tolay nga mekatalà, nga napiá yù ángngiyusá na sù egga kuna, malannapán yù egga kuna. Ngam yù tolay nga ari napiá yù ángngiyusá na sù nekatalà kuna, mári kuna mássiki yù baddi nga nekatalà kuna. ²⁷ Á yù ira nga malussaw níkan, nga nanaki ta sikán yù mammaguray nira, iyánge naw ira saw, tapé papatáyan naw ira ta arubáng ku.’”

Yù Tallung di Apu Kesu ta Jerusalem

Mattiu 21:1-11; Markus 11:1-11; Kuan 12:12-19

²⁸ Kabalin na nagángngarigán ni Apu Kesu nira, á minay napolu nga mappángè ta Jerusalem. ²⁹ Á pakarakki da sù ira ili na Bepagi ána Bitania, naginná ira sù puddul nga mangngágan ta Olibo. Á inagálán ni Apu Kesu yù duá nga makituddu kuna, á kinagi na nira, ³⁰ “Mapolu kayu sù ili, á sù tallung naw, marángnganán naw yù kígaw nga kabáyu nga ari paga nattakayán. Ubbarán naw, á iyánge naw saw. ³¹ Á nu aijan yù mangiyabbú ta anni má ta ubbarán naw, á kagian naw lá kuna, ‘Máwák ni Apu,’ kun naw kuna.”

³² Á minay yù ira jinok ni Apu Kesu, á nálek da ngámin yù kunnay sù kinagi na. ³³ Á pagubbák da sù kaddang nayù kígaw, iniyabbú na nira nayù makákkuá, “Anni má ta ubbarán naw?” ³⁴ Á kinagi ra, “Máwák ni Apu.” ³⁵ Á iniyánge ra yù kígaw ká Apu Kesu. Á inináná da yù gámi da sù bará na, á pinakkabáyu ra si Apu Kesu kuna. ³⁶ Á pakkabáyu na nga mappángè ta Jerusalem, inináná nayù ira káruán nga tatolay yù gámi da ta dалан.

³⁷ Á maddaggun nga makáddè di Apu Kesu ta ili na Jerusalem. Á kitáru yù ira nga mepulú kuna. Á útú da sù puddul na Olibo, namegapu ira ngámin nga ikatakotol da yù áddáyo ra ká Namarò, gapu ta pagayáda da sù ngámin nga pinagaddátu na nga nasingad da. ³⁸ Á kinagi ra,

“Dayáwat tam yù Patul nga jinok ni Namarò, nga umay mammaguray nittam!

Meparáyaw ta lángi si Namarò nga Kotunán, ána napiá ána magimammá yù gián na!”

³⁹ Á yù ira káruán nga Parisio nga nepulú nira, gapu ta kagiad da ta tolay lá si Apu Kesu, kinagi ra kuna, “Mesturu, gammám mu yù paddáyo nayù ira tatolay, ta malliwá ira!” kud da. ⁴⁰ Á simibbák si Apu Kesu, á kinagi na nira, “Kuruk yù kagiak ku nikayu, ta nu magimammá ira nakuan, á yù ira batu ta dалан yù makkatol nga maddáyaw ká Namarò.”

Yù Pakkulè ni Apu Kesu sù ira taga Jerusalem

⁴¹ Á pakáranni ra ta ili na Jerusalem, nasingan ni Apu Kesu yù ili, á nakalò yù pangikállá na sù ira tatolay nga taga Jesusalem, á nakkulé si Apu Kesu megapu nira. ⁴² Á kinagi na, “Sikayu nga taga Jerusalem, parè bì nakuan ta kánnámmuán naw yù paggapuán nayù ággimammá naw. Parè bì ta kánnámmuán naw yù máwák naw nga makipakomá ká Namarò kunangane ta ággawo, tapé mapiá nakuan yù ággián naw kuna! Ngam awánin ta awayyá naw nga mánnámmuán, ta nelímak nikayu. ⁴³ Á kábbi kayu, ta duttlá yù ággaw nga umay yù ira malussaw nga makigerrá nikayu. Á alikúbungad da kayu, tapé ari kayu makalawán. ⁴⁴ Á papatáyad da kayu ána yù ira áná naw. Á bugayad da yù ngámin nga babále naw, á iwarawará da yù batu nga napadday ta balay, gapu ta panakí naw sù ánge ni Namarò nga mangiyígú nikayu!”

Yù Ánge ni Apu Kesu sù Mangilin nga Kapilliá ta Jerusalem

Mattiu 21:12-17; Markus 11:15-19; Kuan 2:13-22

⁴⁵ Á pakatunú di Apu Kesu ta Jerusalem, dagarágá nga minay sù mangilin nga bale ni Namarò, á pinaturiák na yù ira nga malláku tán. ⁴⁶ Á pamaturiák na nira, kinagi na nira, “Aijan yù netúrâ nga kinagi ni Namarò, ‘Yù mangilin nga balè yù ákkimállátan nayù ira tatolay.’ Ngam sikayu, pabbalinan naw ta pallakuán nayù ira minángngilogò!”

⁴⁷ Á ta kággággaw minay si Apu Kesu nga mangituddu sù mangilin nga bale ni Namarò. Á yù ira kátannangán nga pári ána yù ira mangituddu sù tunung ni Moyses ána yù ira tatolay

nga makáwayyá, inigagánge ra ipapátay. ⁴⁸ Ngam arád da bulubugá paga makuá, gapu ta makkaragá yù ira tatolay nga magginná sù ngámin nga kagian na.

20

Iyabbú da yù Naggapuán nayù Pakáwayyá ni Apu Kesu

Mattiu 21:23-27; Markus 11:27-33

¹ Á tádday ággaw nga pangituddu ni Apu Kesu sù ira tatolay sù mangilin nga kapilliá, inilayalayá na yù napiá nga dámak nga meyanung sù ángngiyígù ni Namarò. Á minay sù gián na yù ira kátannangán nga pári áнна yù ira mangituddu sù tunung ni Moyses áнна yù ira giriámán na Kudio. ² Á kinagi ra kuna, “Asinni yù nangiyawá nikaw sù pakáwayyám nga akkuám mu nga kunnaw? Asinni naddok nikaw?” kud da. ³ Á kinagi ni Apu Kesu nira, “Ajjan bì mapolu iyabbú ku nikayu nga tabbagan naw. ⁴ Isaw naggapuán nayù pakáwayyá ni Kuan nga Minámigú? Jinok ni Namarò, onu tolay yù naddok kuna?” kun na.

⁵ Á nallilli ira laguk nga nakkaká-ubobuk nu anni yù itabbák da. Á kinagi ra, “Nu kagiat tam nakuan ta si Namarò yù naddok ká Kuan, á iyabbú na sangaw nu anni má ta arát tam kurugan yù kinagi ni Kuan nga meyanung ká Namarò? ⁶ Ngam máyá panò nu kagiat tam ta tolay yù paggapuán nayù pakáwayyá na, maraké payangan nayù tatolay ittam? Ta kurugan nayù ira tatolay ta ábbilinán ni Namarò si Kuan,” kud da. ⁷ Á kabalid da nakkaká-ubobuk, kinagi ra galá ká Apu Kesu, “Arám mi garè ammu nu asinni yù naddok ká Kuan.” ⁸ Á kinagi ni Apu Kesu nira, “Arák ku gapay kagian nikayu yù naggapuán nayù pakáwayyá.”

Yù Pagángngarigán ni Apu Kesu nga Meyanung sù ira Manaki kuna

Mattiu 21:33-46; Markus 12:1-12

⁹ Á nagángngarigán si Apu Kesu mángin sù ira tatolay, á kinagi na, “Ajjan yù tolay nga nammulá ta úbas. Á inipataron na yù kamulán na sù ira makirabbun, gapu ta ajjan yù angáyán na ta arayyu nga lugár, á ammu na ta mabayák tán.

¹⁰ “Á dattál na kapusik nayù bungá na úbas, jinok nayù makáddabbun yù tádday nga aripan na ta umay mangá ta balle na. Á labbè na sù ira makirabbun, pinalapalù da, á pinapáno ra nga awán bulubugá ta iniyawá da kuna. ¹¹ Á jinok na yù mekaruá nga aripan na, ngam kunnay sù napolu, pinalapalù da má nga inipasiránád da, á pinapáno ra gapay nga awán bulubugá ta iná na. ¹² Á jinok na má yù mekatallu gapay. Á binigarád da áнна pinapáno ra má.

¹³ “Á ninonò na laguk nayù makákkuá ta dabbun nu anni yù akkuán na. Á kinagi na, ‘Yawe yù akkuák ku. Dobak ku yù aná ku nga iddukak ku, abernu pakimorayád da.’ ¹⁴ Ngam ta pakasingan nayù ira makirabbun sù aná na, nakkaká-ubobuk ira, á kinagi ra, ‘Yawe yù pangiyawatán na sangaw nayù makákkuá sawe dabbun. Papatáyat tam laguk tapè kukuá tam yù dabbun na.’ ¹⁵ Á ginápù da, á inilawád da sù kamulán, á pinapáte ra.

“Á gapu ta kunnian kingnguá ra, á anni panò yù akkuán nayù makákkuá ta kamulán sù ira makirabbun? ¹⁶ Á aggina laguk yù umay, á papatáyan na ira. Á ipataron na sangaw yù kamulán na sù ira tanakuán,” kun ni Apu Kesu. Á pakaginná nayù ira tatolay sù kinagi na, napállá ira, á kinagi ra, “Ari lâ nakuan mesimmul!” kud da. ¹⁷ Ngam inni-innan ni Apu Kesu ira, á kinagi na nira, “Nu ari nakuan kunnian yù mesimmu, á anni panò yù kebalinán nayù dán nga inipetúrá ni Namarò?

‘Yù batu nga inipuerá nayù ira mabbalay, aggina yù sinullá ni Namarò nga panáddagán nayù balay.’

¹⁸ Á yù ira tatolay nga mangipuerá sù sinullá ni Namarò nga meyárik ta batu, á kunnay ira ta napanná nga makattakattu ta batu. Á yù ira nga kunnay ta napannátán nayù batu, kunnay ira ta marappi nga maburá.” Á yá kebalinán na, si Apu Kesu yù awayyá ra nga pakiyigután. Á nu lonád da yù awayyá ra, ari ira makipakomá ká Namarò, á maggián ira lâ nga ari napakomá yù liwá da, á mekanakaná ira sù pore ni Namarò.

Pangiyabbú da ta Meyanung ta Pappagá ra ta Buwi

Mattiu 22:15-22; Markus 12:13-17

¹⁹ Á yù ira mangituddu sù tunung ni Moyses áнна yù ira kátannangán nga pári, ammu ra ta aggira yù inubobuk ni Apu Kesu sù ángngarigán na, á nappaná yù lusso ra kuna. Á gaputad da nakuan, ngam arád da pinalurò gapu ta maganássing ira sù ira tatolay. ²⁰ Á yáyù nga sinissimmurád da. Á inagálád da yù ira nga jinok da ta umay ira manukuk kuna. Á áppè pípiá ira nga magiyabbú kuna, tapè málek da yù awayyá ra nga mangikeká kuna ta arubáng nayù gubinador.

²¹ Á jimikkì ira laguk kâ Apu Kesu, á kinagi ra kuna, “Mesturu, ammu mi ta matunung yù ngámin nga ituddum ána ngámin nga kagiam mu, á arám mu irumá yù ira tatolay, ta ituddum yù napiá nga ure ni Namarò nga ipatuppál na nittam. ²² Á yáyù nga iyabbù mi nikaw, ari panò mekontará sù tunung ni Moyses nu mappagá ittam ta buwi kâ Patul Sisar ta Roma?” kud da.

²³ Á natákál ni Apu Kesu yù ángngilogò nayù ira nagiyabbù, á yáyù nga kinagi na nira, ²⁴ “Ipasingan naw bi nikán yù pirá nga ipappagá naw nakuan ta buwi.” Á pakasingan ni Apu Kesu sù pirá, iniyabbù na nira, “Asinni yù makámmammang ána makángngágan nga nemárká sawe pirá?” kun na. “Si Patul Sisar,” kud da. ²⁵ Á kinagi ni Apu Kesu nira, “Wan gemma! Á yáyù nga mappagá kayu ta buwi sù patul, ta kukuá na gemma. Á kunnian gapay sù kukuá ni Namarò, ta iyawâ naw gapay kuna yù kukuá na,” kun na. ²⁶ Á awán ta málek da nga liwá na sù kinagi na ta arubáng nayù ira tatolay. Á nerallà yù kapállá da sù napiá nga inítabbák na nira, á ari ira nakkituk.

*Yù Meyannung ta Paginnanolay nayù ira Námmatay
Mattiu 22:23-33; Markus 12:18-27*

²⁷ Á aijan gapay tán yù ira Sadusio. Aggira yù makkagi ta ari maginnanolay yù ira námmatay. Á minay ira gapay kâ Apu Kesu, á kinagi ra kuna, ²⁸ “Mesturu, aijan yù iníturá na ngaw ni Moyses nga kagian na, ‘Nu matay yù laláki nga natayán na yù atáwa na nga awán ta aná da, atawán nayù wagi na yù atáwa na, tapè nu maganá ira, á aijan yù mebláng ta aná nayù natay.’ ²⁹ Á aijan ngaw yù pitu nga lálláki nga mawwawági, á nangatáwa yù kaká, á natayán na yù atáwa na nga awán ta aná da. ³⁰ Á yù mekaruá nga wagi na, inatáwa na yù atáwa nayù kaká na, á natayán na má, nga awán ta aná da. ³¹ Á kunnian má gapay sù mekatallu nga wagi na, áddè sù mekapitu. Natay ira ngámin nga awán ta aná da. ³² Á naporíán nga natay gapay yù babay. ³³ Á nu kuruk ta maginnanolay yù ira námmatay noka, asinni laguk yù kukurugán nga atáwa na, ta inatáwa ra ngámin nga pitu?” kud da.

³⁴ Á kinagi ni Apu Kesu nira, “Mangatáwa yù ira tatolay ta dabbuno. ³⁵ Ngam sangaw nu duttál yù paginnanole nayù ira nga ibiláng ni Namarò ta mepángngá nga mepaginnanolay nga mesipá kuna ta lánqi, ari ira maggagátáwa tán nga ággaw. ³⁶ Á ari ira matamatay, ngam kunnay ira sù ira daroban ni Namarò, ta aná na ira ni Namarò nga paginnanolayan na.

³⁷ “Á mássiki si Kákay Moyses, inittuddu na ngaw yù paginnanole nayù ira námmatay. Ta nabibbik tam yù pangistoría na sù dakki na sù maggatagatang nga káyú, sù pakiubobuk ni Namarò kuna. Á kinagi ni Moyses ta si Namarò yù pakimorayád di Abrakam kári Isak kâ Akup. ³⁸ Á yáyù nga ammu tam ta matolay paga di Abrakam, gapu ta yù ira lâ nga matolay yù makapaddáyaw kâ Namarò, ngam ari gemma yù ira námmatay. Á ta ánninganán ni Namarò, matolay paga yù ira ngámin, mássiki yù ira nga natayin yù baggi ra.”

³⁹ Á yù ira káruán nga mangituddu sù tunung ni Moyses, kinagi ra lâ kâ Apu Kesu, “Mesturu, napiá yù inítabbák mu!” kud da. ⁴⁰ Á napállá ira ngámin, á yáyù nga awán bulubugá ta tolay nga magiyabbù kuna.

Asinni yù Sinullá ni Namarò ta Mammaguray?

Mattiu 22:41-46; Markus 12:35-37

⁴¹ Á kinagi na laguk ni Apu Kesu nira, “Aijan bi yù iyabbù ku nikayu. Ngattá ta ituddu ra ta ginaká ni Patul Dabid yù MakKirstu nga patul nga sinullá ni Namarò ta umay mammaguray? ⁴² Ta aijan yù iníturá na ngaw ni Dabid sù libru nga Salmo *, nga kunniaw: ‘Si Apu Namarò, kinagi na sù Yápu,

“E ka bi magitubang ta jiwánák ku,

sù ággitubangán nayù Kotunán nga Patul,

⁴³ áddè ta arák ku appútan yù ira malussaw nikaw.” ’

Yáyù yù ubobuk ni Namarò nga iníturá ni Dabid. ⁴⁴ Á gapu ta kinagi ni Dabid ta Yápu na yù Patul nga sinullá ni Namarò, á kunnasi laguk ta kagiad da ta ginaká na galá ni Dabid?”

Yù Liwá nayù ira Mangituddu sù Tunung ni Moyses

Mattiu 23:1-36; Markus 12:38-40

⁴⁵ Á ta pakaginná nayù ira ngámin nga tatolay, sinabarangán ni Apu Kesu yù ira makituddu kuna. Á kinagi na nira, ⁴⁶ “Mappalán kayu, tapè arán naw párigán yù ira mangituddu sù tunung ni Moyses. Ta gustu ra lâ mabbarawási ta apaddu nga nakástá, nga

* **20:42** Yù kebalínán na Salmo yù libru nga netúratán ta aru nga Kansion nga pidde nayù ira ngaw tatole ni Namarò, nga pakimállá da ána paddáyo ra kuna.

mappassapassiár, tapè makialimánu yù ira tatolay nira. Á ánge ra ta kapilliá, magitubang ira sù kapiánán nga ággitubangán. Á nu umay ira mepallállang, gustu ra magitubang sù ággitubangán nayù meparáyaw. ⁴⁷ Á ilogò da yù ira bábbay nga nabálu, ána gubatad da yù ngámin nga kukuá ra. Á ta pakimállà da, umay ira mappasingan nga makimállà ta mabayák, nga kunnay ta napiá. Ngam agippipiá ira, á aru yù ikáru ra sangaw nu pagikaruan ni Namarò ira.”

21

Yù Inilimù nayù Bálu

Markus 12:41-44

¹ Á ta keggá ra paga ta mangilin nga kapilliá, nallipay si Apu Kesu, á nasingan na yù ira maríku nga mangipay ta kuártu sù ággipayán ta melimù. ² Á nasingan na gapay yù babay nga nabálu nga pobare nga minay nangipay ta duá lâ nga sintábu. ³ Á kinagi ni Apu Kesu sù ira makituddu kuna, “Kuruk yawe nga kagiak ku nikayu, ta masingan naw yane babay nga bálu, á ta ánnigan ni Namarò, aru yù inilimù na ánnè sù ira ngámin. ⁴ Á yù ira maríku, inilimù da yù baddi lâ nga naggapu sù sobará ra nga arád da igátang. Ngam yù babay nga nabálu, inilimù na yù ngámin nga kuártu na, nga ipangá na nakuan ta máwák na,” kun na.

Kagian ni Apu Kesu yù Kabuge na noka nayù Mangilin nga Kapilliá ta Jerusalem

Mattiu 24:1-2; Markus 13:1-2

⁵ Á aijan yù ira makkaká-ubobuk ta meyanung sù kapiá nayù mangilin nga kapilliá, gapu ta nakástá yù jijjing na nga batu ána yù aru nga makkakerumá nga aruátan na nga neyawá kâ Namarò. Á pakaginná ni Apu Kesu sù kinagi ra, á kinagi na nira, ⁶ “Á danniw ira nga masingan naw, duttál sangaw yù ággaw nga kabugubuge na, á awán ta batu nga ari mabugay,” kun na.

Yù Karigirigá na Tolay ta Dattál nayù Pagádekán na Ággaw

Mattiu 24:3-14; Markus 13:3-13

⁷ Á iniyabbù da kuna, “Mesturu, sangaw nu anni yù kesimmu nayù kinagim? Á anni yù panákkilalám mi ta dattál na?” ⁸ Á kinagi na nira, “Mappalán kayu, tapè ari kayu melogò, ta aru yù umay nga makkagi ta aggira si Apu Kesu Kiristu. Á kagiad da gapay ta duttálin yù pagádekán na ággaw. Mappalán kayu laguk, á arán naw ira tuttulan. ⁹ Á mássiki nu marámak naw sangaw ta aijan yù ira makigerrá ána yù ira makiramá sù ira mammaguray nira, ngam ari kayu mabbagal, gapu ta kunniúrin yù mapolu nga mesimmu, ngam ari paga yù pagádekán na ággaw,” kun na.

¹⁰ Á kinagi na laguk ni Apu Kesu nira, “Á yù tádday nga ili, makigerrá ira sù ira tanakuán nga ili. Á yù ira makkakerumá nga páppatulán ta dabbuno, makigerrá ira. ¹¹ Á aru yù lunik nga masikan. Á duttál yù bisin ána makkakerumá nga tulágan ta káruán nga lugár. Á aru yù mesimmu ta lángi nga makapállá ána makánnanássing.

¹² “Ngam lage na kesimmu na, mapolu nga gaputad da kayu nayù ira malussaw nikayu, á jigirigátad da kayu. Á ikeká ra kayu sù ira makáwayyá ta kapilliá na Kudio, tapè ikarsel da kayu. Á iyánga ra kayu gapay ta arubáng nayù ira patul ána yù ira gubinador megapu sù ángnguruk naw nikán. ¹³ Á yáyù sangaw yù awayyá naw nga ipakánnámmu nira yù napiá nga dámak nga meyanung nikán.

¹⁴ “Á lage na kesimmu na, ipe naw yù urá naw laguk ta arán naw ikaburung yù itabbák naw nira. ¹⁵ Ta nu bestigarád da kayu, sikán yù mangipakánnámmu nikayu sù kagian naw nira. Á arád da matabbák yù kagian naw, gapu ta ipakánnámmu nikayu yù napiá nga itabbák naw sù ira malussaw nikayu. Á ari ira makatubáng nikayu. ¹⁶ Á mássiki yù ira kanakanáyun naw, yù ira darakal naw ána wáwwagi naw, á yù ira kákkopun naw gapay, aggira yù mangikeká nikayu, á papatáyad da yù ira káruán nikayu. ¹⁷ Á yù ira ngámin nga tatolay, malussaw ira nikayu megapu sù ángnguruk naw nikán.

¹⁸ “Ngam si Namarò, arán na kayu bulubugá tájjián. Ari kayu mabburung! ¹⁹ Magattam kayu laguk. Ta mepattolay kayu kâ Namarò ta áddè ta áddè megapu sù napasigaggá nga ángngikatalà naw nikán.”

Yù Katalamán nayù Ili na Jerusalem

Mattiu 24:15-21; Markus 13:14-19

²⁰ Á kinagi na gapay ni Apu Kesu nira, “Á nu masingan naw yù aru nga suddálu nga lepuanád da yù ili na Jerusalem, yáyù nga kánnámmuán naw ta maddaggunin yù katalamán na. ²¹ Á yù ira tatolay nga maggián ta purubinsia na Judiya, mattálaw ira nga umay ta

puddul. Á nepatalugáring sù ira nga maggíán ta ili na Jerusalem, mabbakkuí ira. Á yù ira nga aijan ta ákkomanád da ta lawán na ili, ari iren mattoli sù ili. ²² Ta yáyù pamagikáru ni Namarò sù ira tatolay nga nangipuerá kuna, tapè mapaluro yù ngámin nga inipetúrá na sù ira ngaw ábbilinán na. ²³ Á kábbi yù ira mabussi ána yù ira mappasusu, ta mepallà yù karigirigá nayù ira ngámin nga tatolay megapu sù ámmagikáru ni Namarò nira. ²⁴ Á mapapátay ta bayunetá yù ira káruán. Á yù káruán nga ari matay, gaputad da ira nayù ira ari Kudío, á iyánge ra ira nga mebaluk ta arayyu ta makkakerumá nga páppatulán. Á ta ili na Jerusalem, mammaguray yù ira ari Kudío, á maguray lá yù akkuád da áddè ta pamatukká ni Namarò nira.”

Yù Mesimmu Lage nayù Pattoli nayù Kaká na Ngámin na Tatolay

Mattiu 24:29-31; Markus 13:24-27

²⁵ Á kinagi na gapay ni Apu Kesu, “Á ta lage na pagádekán na ággaw, aijan gapay yù mesimmu sù bilák, bulán ána bituan. Á kunnay gapay sù bebay, nga makánnanássing yù gurù na ána palung na. Á yù ira tatolay ta ngámin nga lugár, merallà yù assing da, á mabagabagal ira megapu sù mesimmu. ²⁶ Á maganássing yù ira tatolay ána malupulupuk ira nga magiddak sù mesimmu ta ngámin nga dabbuno, nepatalugáring nu masingad da yù panguli nayù ággián nayù bilák, bulán, ána bituan ta lángi, ta mapagali yù ngámin nga aijan ta lángi. ²⁷ Á umayá laguk nga mappasingan sù kunam ta lángi, nga mattoli sawe dabbuno, sikán nga Kaká na ngámin na tatolay, nga makáwayyá ána maddalingárang. ²⁸ Á nu mamegapu dannian nga ikássing, patattaman naw yù nonò naw ána magiddi-iddak kayu, ta duttálin yù kapalubbáng naw sù jigá naw.”

Yù Keyarigán nayù Pattoli ni Apu Kesu ta Dabbuno

Mattiu 24:32-35; Markus 13:28-31

²⁹ Á nagángngarigán si Apu Kesu ta meyanung sù panoli na ta dabbuno, á kinagi na nira, “Inni-innan naw yù káyu nga igò ána yù ira ngámin nga káruán nga káyu gapay. ³⁰ Nu masingan naw ta massungngi yù don na, á ammu naw ta maddaggunin yù dagun. ³¹ Á ta kunnian gapay, nu masingan naw dannian nga mamegapu nga mesimmu ta kunnay sù kinagi, yáyù pakánnámmuán naw ta duttálin yù pammagure ni Namarò ta dabbuno. ³² Á kuruk yù kagiak ku nikayu, aijan yù ira tatolay nga ari paga natay lage na kesimmu na ngámin. ³³ Á mássiki nu mappasá noka yù ngámin nga aijan ta lángi ána yawe dabbuno, ngam ari bulubugá mapatalián yù kinagi nikayu, gapu ta mapaluro ngámin.”

Maparán kayu tapè Dán nga Naparán kayin

³⁴ Á kinagi na nira paga ni Apu Kesu, “Magimuguk kayu, marakè melingúnán naw sangaw yù kinagi nikayu, nu yá lâ tángngagan naw yù pabbúyá naw, pappissán naw, ána pajjigirigá naw sawe dabbuno. Ta nu máttamán naw, makaráring kayu sangaw nga kunnay ta masikuatán, nu duttál yù pagádekán na ággaw. ³⁵ Ta ikáddagá lâ duttál yù ággaw nga pamanunnù ni Namarò sù ira ngámin nga tatolay ta ngámin nga dabbuno, á makaráring ira. ³⁶ Á yáyù nga napiá nu mapparán kayu, á makimállà kayu ká Namarò ta ábbágán na kayu, tapè mapasigaggá yù ángnguruk naw kuna. Ta nu dán nga naparán kayu, á aijan yù awayyá naw nga magattam ta jigá nga kinagi nikayu nga mesimmu sangaw, ána mappelò kayu nu umay kayu ta arubáng ku, sikán nga Kaká na ngámin na tatolay,” kun ni Apu Kesu.

³⁷ Á naggián si Apu Kesu sù mangilin nga kapilliá ta kággággaw, nga mangituddu sù ira tatolay. Á ta kádagabi minay nagammá sù puddul na Olibo. ³⁸ Á yáyù nga minay yù ira ngámin nga tatolay ta káda alippánawák sù mangilin nga kapilliá nga magginná sù ituddu na.

22

Yù Pangigagánge ra nga Mamapátay ká Apu Kesu

Mattiu 26:1-5, 14-16; Markus 14:1-2, 10-11; Kuan 11:45-53

¹ Á maddaggunin yù piestá nga pakkákán nayù ira Kudío ta pán nga awán ta áppalappák na, nga mangngágan ta Panaddamadá da sù Pattalebák nayù Daroban ni Namarò sù ira ngaw ginaká ni Israel túrin ta Egipto. ² Á yù ira kátannangán nga pári ána yù ira mangituddu sù tunung ni Moyses, inigagánge ra nga ipapátay si Apu Kesu, ngam inilímak da yù akkuád da, gapu ta assing da sù ira tatolay nga tumututtul ká Apu Kesu.

³ Á si Satanas, nagunagán na si Kudas Iskariote, nga tádday sù ira mapulu duá nga sinudduán ni Apu Kesu. ⁴ Á minay laguk si Kudas nakiubobuk sù ira kátannangán nga pári ána yù ira kapitán nayù ira magguárdiá sù mangilin nga kapilliá, nu kunnasi sangaw

yù pangipagápù na kâ Apu Kesu. ⁵ Á nagayâyâ ira, á kinagi ra kuna ta táddaná da. ⁶ Á pattarátu ra, namegapu si Kudas nga massísím kâ Apu Kesu, tapè málek na yù awayyá na nga mangipagápù kuna sangaw nu awán ta tolay nga magari nga mepulù kuna.

*Papparád da ta Kanad da sù Piestá nga Panaddamád da
Mattiu 26:17-25; Markus 14:12-21; Kuan 13:21-30*

⁷ Á ta piestá, jimitál yù ággaw nga pakkákád da ta pán nga awán ta áppalappák na, nga pangiyátang da gapay sù kígaw na karneru kâ Namarò, nga kanad da ta panaddamád da. ⁸ Á jinok ni Apu Kesu di Eduru kâ Kuan, á kinagi na nira, “Umay kayu mapparán ta kanat tam ta panaddamát tam sù pattalebák nayù daroban ni Namarò sù ira ngaw naggaká nittam,” kun na. ⁹ Á kinagi ra kuna, “Á isaw em mi papparánán?” kud da. ¹⁰ Á kinagi na nira, “Umay kayu ta ili. Á labbè naw sangaw, marápun naw yù tolay nga namuttung ta ammutu. Tuttulan naw, ta yù balay nga tallungán na, yáyù gapay tallungán naw. ¹¹ Á kagian naw sù makábbalay, ‘Yù Mesturu, ipeyabbù na nikami nu isaw gián nayù pakkákanám mi ta panaddamám mi sù pattalebák nayù daroban, aggina ána sikami nga makituddu kuna,’ kun naw. ¹² Á ituluk na kayu ta utun, sù dakal nga lágum nga aijan kuna yù ngámin nga máwák tam. Yáyù papparánán naw,” kun na. ¹³ Á minay di Eduru, á nálek da yù ngámin nga kunnay sù kinagi na, á pinarád da yù kanad da.

*Yù Naporíán nga Pakkákád di Apu Kesu ána yù ira Sinudduán na
Mattiu 26:26-30; Markus 14:22-26; 1 Korinto 11:23-25*

¹⁴ Á ta pamúgák da, nallalálláng di Apu Kesu ána yù ira mapulu duá nga sinudduán na. ¹⁵ Á kinagi na nira, “Napiá ta aijan ittam saw, ta karagatak ku nga kuruk nga mepallálláng nikayu kunganang sù panaddamát tam sù pattalebák nayù daroban ni Namarò, pángè ku marigirigá. ¹⁶ Ta kagiak ku nikayu ta yawe lâ yù pakkákák ku sù panaddamát tam, ta áddè ta kapaluro nayù ngámin nga kebalinán nayù piestá, sangaw nu aijan ittam ta pammagurayán ni Namarò.” kun na. ¹⁷ Á iná na yù passuelu nga aijan kuna yù inumad da, á nabbalabálá kâ Namarò, á iniyawá na nira. Á kinagi na nira, “Pattutubbátán naw nga inuman ta ággibaddi. ¹⁸ Á aringakin makenum ta tabbuk na úbas, áddè ta dattál nayù pammagure ni Namarò ta dabbuno, á yáyù pakenum ku má,” kun na.

¹⁹ Á iná na laguk ni Apu Kesu yù pán, á nabbalabálá kâ Namarò. Á giddigidduá na, á inisinek na nira. Á kinagi na nira, “Alawatan naw yù baggi nga metapil megapu nikayu. Mapiá nu kunnaw yù akkuán naw ta panaddamán naw níkán,” kun na.

²⁰ Á kabalid da nga namúgák, iná na má ni Apu Kesu yù inumad da nga tabbuk na úbas, á iniyawá na nira, á kinagi na nira, “Yawe yù panákkilalán naw sù bagu nga tarátu ni Namarò níkayu, nga mapaluro megapu sù dágá sangaw nu matayá nga metapil megapu nikayu.

²¹ “Á aijan saw nga nepallálláng nittam yù mappagápù níkán. ²² Á síkán, nga Kaká na ngámin na tatolay, matayá sangaw gapu ta yáyù netúrâ nga sinalákkuruk na ngaw ni Namarò. Ngam kábbi yù tolay nga mappagápù níkán,” kun na. ²³ Á pakaginná ra karannian, naburuburung ira, á nakkaká-abbù ira nga kinagi, “Asinni panò nittam yù mangguá ta kunnian?” kud da.

Yù Pakkakápereperang da ta Ubobuk nu Asinni yù Kotunán

²⁴ Á yù ira sinudduán ni Apu Kesu, nakkakápereperang ira ta ubobuk nu asinni yù kotunán nira. ²⁵ Á yáyù nga kinagi ni Apu Kesu nira, “Yù ira mammaguray sawe dabbuno, darobad da yù ira tatolay, ngam iparámak da ta aggira yù mangabbák nira. ²⁶ Ngam sikayu, ari kunnian yù ággián naw. Ta napiá nu yù kotunán nikayu yù kunnay sù urián nga tumulù nga masserbi. Á yù mangituddu nikayu, napiá nu aggina yù masserbi nikayu nga kunnay sù makiaripan. ²⁷ Á asinni panò yù ibiláng na tolay ta kotunán? Á ta ángngarigán, yù tolay nga magitubang nga kumán? Onu yù doban na nga masserbi kuna? Á ibiláng da gemma ta kotunán yù magitubang nga kumán. Ngam síkán, aijanà nikayu nga kunnay ta masserbi.

²⁸ “Á sikayu yù ira nga maggián níkán nga mangabbák níkán ta jigá ku. ²⁹ Á yáyù nga sikayu yù sinullá ku ta mepammaguray níkán, ta kunnay ta panullá nayù Yámá níkán ta mammaguray. ³⁰ Á mepallálláng kayu níkán ána mesipá kayu sù pammagurè, á magitubang kayu nga mammaguray ána mamanunnù sù ira ginaká nayù mapulu duá nga áná ni Akup, nga mangngágan ta Israel.”

*Pakkagi ni Apu Kesu sù Panáji ni Eduru kuna
Mattiu 26:31-35; Markus 14:27-31; Kuan 13:36-38*

³¹ Á kinagi ni Apu Kesu kâ Eduru, “Simon, nga kopuk ku, tángngagam mu yù kagiak ku níkaw. Inanugù ni Namarò si Satanas nga mamarubá nikayu nga katággitáday, nga

kunnay ta mangisâ ta aggi, tapè mári yù kupi. ³² Á nepatalugáring nikaw, Simon. Ngam inipakimállà taka, tapè ari mári yù ángnguruk mu níkán. Á sangaw nu mabbabáwi ka ta liwá mu, ána mattoli ka níkán, tabarangám mulaguk yù ira kábulum mu, tapè mapasigaggá yù ángngikatalà da níkán,” kun na. ³³ Ngam kinagi ni Eduru kuna, “Apu, napanákin nga mepulù nikaw, mássiki nu mekársel itta, mássiki nu matay itta!” kun na. ³⁴ Á kinagi ni Apu Kesu, “Kuruk yù kagiak ku nikaw, Eduru, ta pilluam mu nga kagian ta arám mà ammu, lage na pagittarákkò na manù sangaw nu gabi.”

Kagian ni Apu Kesu yù Dattál nayù Nepallà nga Jigá

³⁵ Á iniyabbù ni Apu Kesu sù ira sinudduán na, nga kun na, “Á ta paddok ku ngaw nikayu, nga ari nangipulù ta kuártu, bungun, onu sapátu naw, á nakúráng panò yù awágan naw?” kun na. “Ari, Apu!” kud da.

³⁶ Á kinagi na nira, “Ngam dumá yù ággián naw kunangane, ta nu egga yù kuártu naw onu bungun, napiá nu ipulù naw yù egga. Á nu aijan yù tolay nga awán ta badáng na, á iláku na yù barawási na, tapè aijan yù ipangá na ta badáng na. ³⁷ Ta máwák nga mapatuppál yawe dán nga inipetúrâ ni Namarò nga kinagi na sù ngaw ábbilinán na nga meyanung níkán: ‘Yù sinullà ku ta mammaguray,

ibiláng nayù ira tatolay ta tulisán, á pagikaruad da.’

Á duttálin yù kapalurò nayù ngámin nga netúrâ nga meyanung níkán,” kun na.

³⁸ Á kinagi nayù ira sinudduán na kuna, “Apu, innam mè. Aijan duá nga badáng saw,” kud da. Á kinagi na, “Kustu nen!”

*Yù Pakimállà ni Apu Kesu ta Keggá na sù Puddul na Olibo
Mattiu 26:36-46; Markus 14:32-42*

³⁹ Á nánaw si Apu Kesu sù balay, á minay sù puddul na Olibo, ta yáyu kustombare na. Á nepulù kuna yù ira sinudduán na. ⁴⁰ Á labbè da tán, kinagi ni Apu Kesu nira, “Makimállà kayu kâ Namarò ta melilli kayu sù narákè nga mamarubá nikayu,” kun na.

⁴¹ Á bittáng na ira ni Apu Kesu, á minarayyu nira ta baddi, nga namalittúkak nga nakimállà kâ Namarò. Á kinagi na, ⁴² “Ammò, nu urem nakuan ta melilliká sù jigá nga umay níkán, á ililli mà. Ngam ari yù urè yù matuppál, nu ari galá yù urem,” kun na. ⁴³ Á nappasingan kuna yù daroban ni Namarò nga naggapu ta lángi, á en na pinassikan yù baggi na ána nonò na. ⁴⁴ Á gapu ta nepallà yù karigirigá na ána yù daddam na, pine na má nakimállà, nga naguggáng, á kun na dága yù uggáng na nga massísínâ ta dabbun.

⁴⁵ Á kabalín na nakimállà, gimikkáng nga nattoli sù gián nayù ira sinudduán na, á narángnganán na ira nga nakkaturuk gapu ta nappunaw ira sù nerallà nga daddam da. ⁴⁶ Á kinagi na nira, “Anni má ta nakkaturuk kayu? Gumikkáng kayu nga makimállà, tapè melilli kayu sù narákè nga mamarubá nikayu,” kun na.

*Yù Paggápù da kâ Apu Kesu
Mattiu 26:47-56; Markus 14:43-50; Kuan 18:3-11*

⁴⁷ Á ta arán na paga kabalín ni Apu Kesu nga nagubobuk, limibbè yù ira tatolay nga magari, nga nepulù kâ Kudas nga tádday sù ira mapulu duá nga sinudduán na. Á jimikki si Kudas, á inummatán na yù paringil ni Apu Kesu ta kunnay ta kustombare ra. ⁴⁸ Ngam kinagi ni Apu Kesu kuna, “Kudas, napiá panò yù akkuám mu? Ta iyummá mu yù panájim níkán, síkán nga Kaká na ngámin na tatolay!” kun na. ⁴⁹ Á ta pakasingan nayù ira sinudduán na ta aijan yù akkuán nayù ira tatolay kuna, kinagi ra, “Apu, magibadáng kami nira?” kud da. ⁵⁰ Á yù tádday nga kabbulun ni Apu Kesu, á dagarágá na kittak yù aripan nayù kátannangan nga pári, á napingarán yù jiwánan nga talingá na. ⁵¹ Ngam kinagi ni Apu Kesu, “Kustu nen!” Á sinámmi ni Apu Kesu yù talingá nayù tolay, á nammapiá ngin.

⁵² Á yù ira nga minay naggápù kâ Apu Kesu yù ira kátannangan nga pári, yù ira suddálu nga magguárdiá sù mangilin nga kapillíá, ána yù ira giriámán. Á kinagi ni Apu Kesu nira, “Kunnayá panò ta tulisán? Ta nattagibadáng ána nattagipalù kayu nga umay maggápù níkán! ⁵³ Á mássiki nu nepulupulúkà nikayu ta kágággaw sù mangilin nga kapillíá, á arán nawá ginápù! Ngam jimittálin yù awayyá naw nga mangguá níkán, ána yù pakapangnguá ni Satanas, nga meyárik ta kallá.”

*Yù Panáji ni Eduru kâ Apu Kesu
Mattiu 26:57-58, 69-75; Markus 14:53-54, 66-72; Kuan 19:12-18, 25-27*

⁵⁴ Á gapu ta paggápù da kê Apu Kesu, inituluk da sù bale nayù kátannangán nga pári. Á sinuttul na ira ni Eduru, ngam arayyu lâ nira. ⁵⁵ Á nappagaddul ira ta námмуá k na balay. Á nepaggirínu si Eduru nira.

⁵⁶ Á aijan tán yù babay nga masserbi ta balay. Á nasingan na si Eduru nga nanawagán ta dalingárang na api, á inni-innan na ta napiá, á kinagi na, “Yane paga yù kabbulun ni Kesu,” kun na. ⁵⁷ Ngam nallimak si Eduru, á kinagi na, “Amma-ammù panò yù tolay?” kun na.

⁵⁸ Á manganánuán, aijan gapay yù tádday nga tolay nga nakasingan kê Eduru, á kinagi na kuna, “Sikaw pá gemma yù sigidá nga kabbulud da!” Ngam kinagi ni Eduru, “Ari gemma sikán!” kun na. ⁵⁹ Á pappasá na tangoras, á kinagi nayù tádday nga tolay, “Kuruk gemma ta mepulupulù yawe tolay kuna, ta taga Galilia gemma gapay!” kun na. ⁶⁰ Ngam kinagi ni Eduru, “Arák ku ammu yù kakágiam mul!” kun na. Á pagubobuk ni Eduru karannian, dagarágá nagittarákkò yù manù. ⁶¹ Á nilipe ni Apu Kesu si Eduru, á nanonò ni Eduru yù kinagi ni Apu Kesu kuna, nga “Pilluam mu nga kagian nga arám mà ammu, lage na pagittarákkò na manù sangaw nu gabi.” ⁶² Á nánaw si Eduru, nga makkulè, nga nepallà yù kulè na ta pakanonò na sù kingnguá na.

Yù Panguyoyung da áнна Pamalapalù da kê Apu Kesu
Mattiu 26:67-68; Markus 14:65

⁶³ Á yù ira tatolay nga nagguárdiá kê Apu Kesu, inuyoyungád da áнна pinalapalù da. ⁶⁴ Á binabbarád da yù matá na, á lippilippák da, á kinagi ra kuna, “Asinni yù nallappák nikaw? Abbúnam mu yù ngágad da nu ammum!” kud da. ⁶⁵ Á aru gapay yù pamasapásirád da kuna.

Yù Keyarubáng ni Apu Kesu sù ira Minámmannùnù
Mattiu 26:59-66; Markus 14:55-64; Kuan 18:19-24

⁶⁶ Á ta pannawák, naggagammung mángin yù ira giriámán, yù ira kátannangán nga pári, áнна yù ira mesturu sù tunung ni Moyses. Á inipágál da si Apu Kesu ta mepagarubáng nira. ⁶⁷ Á kinagi ra kuna, “Nu kuruk ta sikaw yù MakKirstu nga sinullá ni Namarò ta mammaguray, á kagian mu laguk!” kud da. Á simibbák, á kinagi na nira, “Á nu kagiak ku nakuan, arán nawá gemma kurugan. ⁶⁸ Á kunnian gapay nu aijan yù iyabbù ku nikayu, arán nawá tabbagan.

⁶⁹ “Ngam kagiak ku galá nikayu, ta sangaw nu mappasá yaw, á sikán nga Kaká na ngámin na tatolay, mepagitubangá sù jiwánán ni Namarò nga Kotunán nga makáwayá ta lángl,” kun na. ⁷⁰ Á naggigiddán ira nga nagubobuk, á kinagi ra, “Sikaw yù Aná na laguk ni Namarò?” kud da. Á kinagi na nira, “Wan, kuruk yù kagian naw. Sikán,” kun ni Apu Kesu nira. ⁷¹ Á kinagi ra, “Ye, arát tam máwák yù tanakuán nga massistigu, ta aggina yù nakkagi, á naginná tam yù kinagi na,” kud da.

23

Yù Keyarubáng ni Apu Kesu kê Gubinador Pilatto
Mattiu 27:1-2, 11-14; Markus 15:1-5; Kuan 18:28-38

¹ Á yù ira ngámin nga minámmannùnù, ed da laguk inituluk si Apu Kesu kê Gubinador Pilatto. ² Á nassirisiri ira nga nangikeká kuna, á kinagi ra kê Gubinador, “Ginápù mi yawe laláki, ta buruburionan na yù ira tatolay, ta ipakontará na nira si Patul Sisar ta Roma, á ipugik na yù pappagá ra ta buwí kê Patul Sisar. Á kagian na gapay ta aggina yù patul nga sinullá ni Namarò ta mammaguray,” kud da.

³ Á iniyabbù na laguk ni Pilatto kê Apu Kesu, “Á kuruk nga sikaw yù patul nayù ira Kudio?” kun na. Á kinagi ni Apu Kesu, “Ammán, kuruk yù kagian mu,” kun na. ⁴ Á kinagi ni Pilatto sù ira kátannangán nga pári áнна yù ira tatolay, “Awán ta ammù nga liwá na yawe tolay,” kun na. ⁵ Á inipappaná da nga kinagi kê Pilatto, “Á buruburionan na yù ira ngámin nga tatolay ta Judiya megapu sù ituddu na, ta pinegapuanán nen nga binuruburion ira túrin ta Galilia, ádde saw,” kud da.

Keyarubáng ni Apu Kesu kê Gubinador Erodo

⁶ Á pakaginná ni Gubinador Pilatto ta yù purubinsia na Galilia yù namegapuanán na, iniyabbù na nira, “Taga Galilia lagugam?” kun na. ⁷ “Wan,” kud da. Á pakánnámmu ni Pilatto ta taga Galilia si Apu Kesu, inipeyánga na kê Gubinador Erodo, nga mammaguray ta Galilia, ta aijanin ta Jerusalem sù kesimmu na yaw.

⁸ Á nagayáyá si Erodo ta pakasingan na kê Apu Kesu, gapu ta nabayágin nga narámak na, áнна yù kingngi-kingnguá na, á gustu na masingan yù pamagaddátu na. ⁹ Á yáyù nga aru yù

iniyabbù na kâ Apu Kesu. Ngam ari bulubugá simibbák si Apu Kesu. ¹⁰ Á aru yù ipamaliwá da kuna nayù ira kátannangán nga pári ána yù ira mangituddu sù tunung ni Moyses.

¹¹ Á di Erodo gapay ána yù ira suddálu na, iniluddè da ána inuyu-uyo ra, á binarawasiád da ta barawási na patul lage ra initoli kâ Pilatto. ¹² Á yáyù namegapuanád da nga makkákopun di Erodo kâ Pilatto, mássiki nu dán nga makkálussaw ira.

Yù Pamagikáru ni Pilatto kâ Apu Kesu

Mattiu 27:15-26; Markus 15:6-15; Kuan 18:39-19:16

¹³ Á pangitoli ra kâ Apu Kesu kâ Pilatto, inipágál ni Pilatto yù ira kátannangán nga pári, yù ira giriámán, ána yù ira káruán nga tatolay. ¹⁴ Á kinagi na nira, “Iniyánge naw yawe tolay ta arubáng ku nga kagian naw ta aggina yù minámmuruburion sù ira tatolay, á binestigá kin ta arubáng naw, á ammu naw ta awán ta nánnámmuák ku nga liwá na nga kunnay sù kinagi naw nga akkuán na. ¹⁵ Á si Erodo gapay, awán ta nánnámmuán na nga liwá na, ta initoli na gemma nittam. Á ammu nawin laguk ta awán bulubugá ta kingnguá na nga ipamapáte tam kuna. ¹⁶ Á yáyù nga ipabaddù ku lâ, á palubbángak ku sangaw,” kun ni Pilatto. ¹⁷ Á yáyù kinagi na gapu ta aijan yù kustombare na nga mamalubbáng ta tádday nga nabáluk nu mappiestá yù ira Kudío ta kádaragun.

¹⁸ Ngam nagaragiák yù ira tatolay nga nakkagi, “Papatáyam mu, ta si Barabas yù palubbángam mu,” kud da. ¹⁹ Á nabáluk si Barabas negapu sù pakikontará na ta gubermemente ána yù pamapáte na.

²⁰ Á gapu ta gustu ni Pilatto nga palubbángan si Apu Kesu, pinidduá na nga kinagi nira. ²¹ Ngam nagaragiák ira lállaguk nga nakkagi, “Ipepátà mu ta kurù tapè matay!” kud da.

²² Á gapu ta manaki yù ira tatolay nga matabarangán, pinillu na laguk ni Pilatto nga kinagi nira, “Anni má? Anni yù liwá na? Awán gemma ta ammù nga liwá na nga ipamapáte kuna. Ipabaddù ku lâ, á palubbángak ku!” kun na. ²³ Ngam nerallá yù káragiák da. Á inikalli ra, “Ipepátà mu ta kurù tapè matay,” kud da. Á napuersá si Pilatto sù ikáyá da. ²⁴ Á kinagi na yù anugù na sù gustu ra, nga matay si Apu Kesu. ²⁵ Á pinalubbáng na laguk yù pinili ra nga tolay nga nabáluk negapu sù pakikontará na ta gubermemente ána pamapáte na. Ngam si Apu Kesu, initulù na nira tapè matuppál yù ure ra kuna.

Yù Pangipátà da kâ Apu Kesu ta Kurù

Mattiu 27:32-44; Markus 15:21-32; Kuan 19:17-27

²⁶ Á ta pangipáno ra kâ Apu Kesu, nerapunád da si Simon nga taga Sirine nga lubbè ta ili, á pinuersá ra nga inipakáttu kuna yù kurù nga ituttul na kâ Apu Kesu. ²⁷ Á aru yù ira tatolay gapay nga siminuttul kuna. Á aijan gapay yù ira bábbay nga gikuletán megapu kuna. ²⁸ Ngam nilipe ni Apu Kesu ira, á kinagi na nira, “Sikayu nga bábbay nga taga Jerusalem, arán nawà kuletán, ngam kuletán naw lâ nakuan yù baggi naw ána yù ira áná naw!” ²⁹ Ta nu duttál sangaw yù ággaw na jigâ, á kagian nayù ira tatolay, nga kud da, ‘Magayâyá yù ira bábbay nga awán ta aná da, nga ari nakaparubá nga maganá, nga ari nappasusu,’ kud da. ³⁰ Á pegapuanád da gapay nga kagian, ‘Maddaggay ngillá nakuan yù puddul, tapè matábbunán kami,’ kud da. ³¹ Á gapu ta kunniaw yù akkuád da níkan nga awán gemma ta liwá ku, á pappanganá lâ sangaw nikayu nga minálliawá!” kun na.

³² Á aijan gapay yù duá nga tulisán nga iniyánge ra, tapè megiddán ira nga matay kâ Apu Kesu. ³³ Á pakáddè da sù gián nga mangngágan ta Balakábá, inipátà da si Apu Kesu ta kurù tán. Á inipátà da yù ira duá nga tulisán, yù tádday sù jiwánan na, á yù tádday sù jimigi na. ³⁴ Á nakimállá si Apu Kesu, á kinagi na, “Ammò, pakomám mu ira, ta arád da garè ammu yù akkuád da,” kun na.

Á kabalid da nga nangipátà nira nayù ira suddálu, á nabbubúnù ira, tapè pabbaballáyád da yù barawási ni Apu Kesu. ³⁵ Á aru yù ira tatolay nga naggiraw. Á yù ira kamotungán nga Kudío, inuyoyungád da, á kinagi ra, “Ye! Niyigù na yù ira tatolay! Ngam yù baggi na, arán na meyigù! Á nu aggina yù kuruk nga Mangiyigù nga sinullá ni Namarò, iyigù na gapay nakuan yù baggi na!” kud da. ³⁶ Á yù ira suddálu, inuyoyungád da gapay. Á jimikkí ira kuna ta iyalawá da kuna yù silam. ³⁷ Á kinagi ra kuna, “Nu kuruk nga sikaw yù patul nayù ira Kudío, iyigù mu laguk yù baggim!” kud da. ³⁸ Á aijan gapay yù netúrâ nga inipátà da ta utun na kurù, nga kunniaw, “Yawe yù Patul nayù ira Kudío.”

³⁹ Á yù tádday nga tulisán nga nepátà tán, inuyo na gapay si Apu Kesu, á kinagi na, “Sikaw panò yù kuruk nga Mangiyigù nga sinullá ni Namarò? Ará! Iyigù mu ittam laguk!” kun na. ⁴⁰ Á gimmá nayù kabbulun na nga tulisán, á kinagi na, “Ngattá, ta ari ka maganássing kâ

Namarò, nepatalugáring ta naggigittá ittam nga matay? ⁴¹ Á sitta, magikáru itta ta liwâ ta. Á yawe tolay, awán ta liwâ na!" kun na. ⁴² Á kinagi na laguk kâ Apu Kesu, "Apu, nonopam mà lággapay nu dúttál yù ággaw nga pattolim nga umay mammaguray!" kun na. ⁴³ Á kinagi ni Apu Kesu kuna, "Kuruk yù kagiak ku nikaw, ta mepulù ka níkan ta ággawo ta lángi," kun na.

Yù Pate ni Apu Kesu

Mattiu 27:45-56; Markus 15:33-41; Kuan 19:28-30

⁴⁴ Á ta tangngá na ággaw, iddá na lâ nakkallà yù ngámin nga dabbun áddè ta alas tares ta púgák. ⁴⁵ Á pakkallà na bilák, iddá na lâ naggadduá yù nakannak nga kortíná nga nelippak sù kangilinán nga lágum sù mangilin nga kapilliá ta Jerusalem. ⁴⁶ Á nakkatol si Apu Kesu ta nasikan, á kinagi na, "Ammò, ikatalà ku yù ikararuá nikaw!" kun na. Á kabalin na nakkagi ta kunnian, á nagattâ yù inángà na.

⁴⁷ Á ta pakasingan nayù kapitán nayù ira suddálu sù nesimmu, jináyo na si Namarò, á kinagi na, "Kuruk nga napiá lâ yawe tolay nga awán ta liwâ na!" kun na.

⁴⁸ Á yù ira tatolay nga naggiraw tán, pakasingad da sù nesimmu, á limibbè ira ta bale ra, nga nepallà yù daddam da. ⁴⁹ Á yù ira ngámin nga kákkopun na ána yù ira bábbay nga nepulupulù kuna sù paggapu ra ta Galilia, naggián ira ta arayyu ta baddi nga maningan sù ngámin nga nesimmu kuna.

Yù Ketanam ni Apu Kesu

Mattiu 27:57-61; Markus 15:42-47; Kuan 19:38-42

⁵⁰ Á aijan si Kusè nga taga Arimatia, nga tádday nga ili sù purubinsia na Judiya. Á napiá nga tolay si Kusè, nga matunung yù ngámin nga akkuán na. ⁵¹ Á aggina gapay yù tádday sù ira kamotungán nga Kudío, ngam ari netádday yù nonò na ta nonò da, ta arán na inikáyâ yù kingnguá ra kâ Apu Kesu, á iddanamán na gapay yù dattál nayù pammagure ni Namarò.

⁵² Á minay si Kusè kâ Gubinator Pilatto, ta en na kiddawan yù baggi ni Apu Kesu, tapè en na itanam. ⁵³ Á inianugù ni Pilatto kuna. Á minay si Kusè sù gián nayù baggi ni Apu Kesu. Á iniyutták na, á binungun na ta puraw nga gámì. Á initanam na sù nakokkobán nga batu nga awán paga ta netanam kuna. ⁵⁴ Á púgák na Biernes yù pate ni Apu Kesu, á inikukkuttù ni Kusè nga initanam, gapu ta lammak na bilák yù pamegapu nayù ággaw na ággibannák.

⁵⁵ Á yù ira bábbay nga nepulupulù kâ Apu Kesu sù paggapu na ta Galilia, sinuttul da si Kusè, á nasingad da yù pangintanamán na ta baggi ni Apu Kesu ána kunnasi yù ángngitanam na kuna. ⁵⁶ Á limibbè ira laguk, tapè paránad da yù makkakerumá nga bábbanguk nga ipe ra sù baggi nayù natay. Á sù tádday ággaw, nga ággaw na Sabadu, naggián ira ta bale ra nga magibannák, ta kunnay sù ituddu nayù tunung ni Moyses.

24

Yù Paginnanole ni Apu Kesu

Mattiu 28:1-10; Markus 16:1-8; Kuan 20:1-10

¹ Á ta alipánawák na Ligu, minay yù ira bábbay ta tanam, ta ed da iyángay yù makkakerumá nga bábbanguk nga pinarad da. ² Á labbè da ta tanam, narángnganád da nga nabukatán, nga nakarebu yù batu nga nelippak kuna. ³ Á simillung ira laguk ta anak. Ngam tallung da, á nasingad da ta awánin yù baggi ni Apu Kesu tán.

⁴ Á pakasingan nayù ira bábbay ta awán, nanáddak ira tán nga namáyyang. Á inikáddagá da lâ nga limittuák yù duá nga láláki nga nepanáddak nira, nga naddalingárang yù barawási ra. ⁵ Á naganássing yù ira bábbay, á nalipay ira nga nakkummak. Á kinagi nayù ira láláki nira, "Anni má ta aleran naw yù matolay sù gián nayù ira námmatay?" ⁶ Awánin saw, ta naginnanolayin! Nonopan naw yù kinagi na ngaw nikayu sù arán na paga pánaw ta Galilia. ⁷ Ta kinagi na ta metulù yù Kaká na ngámin na tatolay sù ira minálliwâ, á mepátâ ta kurù tapè matay, á maginnanolay sù mekatallu nga ággaw," kud da.

⁸ Á pakaginná nayù ira bábbay sù kinagi ra, á nanonò da. ⁹ Á nánawád da yù tanam, ta ed da kagian sù ira mapulu tádday ána yù ira káruán nga kábulud da. ¹⁰ Á yù ira bábbay nga nakkagi sù ira mapulu tádday nga minángngilayalayâ, aggira di Maria Maddala, si Juana, si Maria nga yená ni Ime, ána yù ira káruán nga bábbay gapay nga nepulù nira. ¹¹ Ngam yù ira láláki, arad da kinuruk yù kinagi nayù ira bábbay, ta kagiad da ta gaggátung da lâ yù kagiad da.

¹² Ngam sí Eduru lâ, pine na nakkarerá nga minay sù gián na tanam, ta en na pasikkálan nu kuruk. Á sinígik na yù unak na tanam, á yá lâ nasingan na yù nakabungunán na. Á limibbè nga napállá sù nesimmu.

Nappasingan si Apu Kesu sù ira Duá nga Umay ta Emmos

Markus 16:12-13

¹³ Á aijan yù duá ira nga nakituddu kâ Apu Kesu, nga yane yù ággaw nga páno ra nga umay ta babálay nga mangngágan ta Emmos. Á mapulu tádday nga kilometro yù kárayyu na ta Jerusalem. ¹⁴ Á pallakalakák da, nakká-ubobugad da yù ngámin nga nesimmu.

¹⁵ Á pakká-ubu-ubobuk da, á narángnganán ni Apu Kesu ira, á nepappapulukin laguk nira. ¹⁶ Ngam arád da natákkilalán.

¹⁷ Á kinagi ni Apu Kesu nira, “Anni yù pakká-ubobugan naw?” kun na. Á nagginnà ira, nga melásin yù daddam da. ¹⁸ Á yù tádday nga mangngágan ta Kalopas, gapu ta arán na paga matákkilalán si Apu Kesu, á kinagi na kuna, “Á makiállik ka támma ta Jerusalem, á sikaw lâ yù táttádday nga arán na ammu yù ngámin nga nesimmu tán nga ili gangù!” kun na.

¹⁹ Á iniyabbù ni Apu Kesu kuna, á kinagi na, “Á anni panò laguk yù nesimmu?” kun na. Á kinagi ra kuna, “Yù kingngikingnguá ra kâ Apu Kesu nga taga Nasaret. Aggina yù kukurugán nga ábbilinán ni Namarò. Ta inipasingan na yù pakáwayyá na nga makapállá megapu sù aru nga pinagaddátu na ta arubáng na ngámin nga tatolay, áнна makáwayyá yù ággubobuk na gapay. ²⁰ Ngam yù ira kátannangán nga pári áнна yù ira káruán nga karakálám mi nga Kudío, narákè yù nonò da kuna, á ginápù da, á nassirisiri ira nga nangikeká kâ Gubinador Pilatto, tapè aggina yù mamagikáru kuna. Á inipepátà na ta kurù tapè matay, ta yáyù ámmagikáru na kuna. ²¹ Á sikami, á kinagi mi ta aggina yù iddanamám mi nga maddagunin nga mangiyígù nikami nga ginaká ni Israel. Á mekatallungin ta ággawo ádde sù pate na.

²² “Á napállá kami gapay sù kinagi nayù ira bábbay nga kábulum mi. Ta minay ira ta alippánawák ta katanamán, ²³ ngam awán yù baggi na. Á labbè da, kinagi ra nikami ta nasingad da yù ira daroban ni Namarò nga nakkagi nira ta naginnanolayin.

²⁴ “Á pakarámak mi, á minay yù ira káruán nga kábulum mi, ta ed da innan nu kuruk yù kinagi nayù ira bábbay. Á naratang da nga kunnay sù kinagi ra, ngam arád da gapay nasingan si Apu Kesu.”

²⁵ Á kinagi na laguk ni Apu Kesu nira, “Ngattá, ta nakúrang paga yù ángnguruk naw sù ngámin nga kinagi nayù ira ngaw ábbilinán ni Namarò! ²⁶ Arán naw panò ammu ta aijan yù netúrâ, nga marigirigâ yù MakKiristu nga sinullâ ni Namarò, lage na mepotun nga meparáyaw?” kun na. ²⁷ Á inibukalán na laguk ni Apu Kesu nira yù ngámin nga meyanung sù baggi na nga netúrâ sù libru ni Namarò, nga namegapu sù initúrâ ni Moyses áнна yù ira ngámin nga initúrâ nayù ira káruán nga ábbilinán ni Namarò.

²⁸ Á manganánnuán ta pakáramni ra ta ili nga angayán nayù ira duá, á nekátuay si Apu Kesu nira nga kunnay ta arayyu paga yù angayán na. ²⁹ Ngam inigaggak da, á kinagi ra kuna, “Ári ka lákin mánaw, ta púgágin. Mepagammâ ka nikami,” kud da. Á nepulù nira laguk nga nepaddulò.

³⁰ Á nepallalálláng si Apu Kesu laguk nira nga nakkákán. Á inâ ni Apu Kesu yù pán, á nabbalabálá kâ Namarò. Á gidduá na yù pán, á iniyawâ na nira. ³¹ Á ikáddagâ da lâ natákkilalán si Apu Kesu. Á dagarágâ limimmâ. ³² Á nakkaká-ubobuk ira, á kinagi ra, “Á yáyù ga nga nalunnáyán yù nonò ta, sù pappatale tam ta dálan, sù pangibukalán na sù kebalinán nayù initúrâ ni Moyses áнна yù ira ngaw ábbilinán ni Namarò,” kud da.

³³ Á dagarágâ nga nánaw yù ira duá nga nattoli ta Jerusalem. Á labbè da, narángnganád da nga naggagammung yù ira mapulu tádday áнна yù ira káruán nga kábulud da. ³⁴ Á kinagi nayù ira naggagammung, “Kuruk nga naginnanolay si Apu, ta nappasingan kâ Simon Eduru!” kud da. ³⁵ Á inistoriá ra laguk nayù ira duá yù pakesimmu ni Apu Kesu nira ta dálan áнна yù pakatákkilála ra kuna sù paggadduá na ta pán.

Yù Pappasingan ni Apu Kesu sù ira Makituddu kuna

Mattiu 28:16-20; Markus 16:14-18; Kuan 20:19-23; Kingnguá 1:6-8

³⁶ Á pakkaká-ubobuk da, ikáddagâ lâ limittuák si Apu Kesu nga nepanáddak nira. Á kinagi na nira, “Á napiá ta aijan kayu ngámin saw,” kun na. ³⁷ Á nakaddák ira áнна nepallá yù assing da, ta kagiad da ta annáni.

³⁸ Á kinagi na nira, “Anni má ta maganássing kayu? Anni má ta arán naw kurugan ta sikán yaw? ³⁹ Innan naw yù limá ána takki, tapè ammu naw ta sikán yaw. Tangngalán nawà, tapè kurugan naw nga aringá annáni. Ta yù annáni, awán ta pattak na ána tuláng na. Ngam sikán, masingan naw ta aijan yù tuláng ku ána pattak ku,” kun na.

⁴⁰ Á pakkagi ni Apu Kesu karannian, inipasingan na nira yù limá na ána takki na. ⁴¹ Ngam napállá ira nga nabbábáng paga, gapu ta nerallà yù ayá da. Á yáyù nga kinagi na nira, “Egga panò kanan saw nikayu?” kun na. ⁴² “Aijan!” kud da. Á iniyawá da yù sirá nga nesuppá. ⁴³ Á kinán na ta arubáng da ngámin.

Yù Naporián nga Panabarang ni Apu Kesu sù ira Makituddu kuna

⁴⁴ Á kinagi na gapay ni Apu Kesu sù ira mapulu tádday ána yù ira káruán nga kábulud da, “Á yù ngámin nga nesimmu nikán, nakagi ngaw nikayu ta keggá lá paga nikayu. Ta kinagi ta máwák nga mapatuppál yù ngámin nga meyanung nikán nga netúrâ sù libru nga tunung ni Moyses ána yù libru nayù ira káruán nga ábbilinán ni Namarò, ána yù netúrâ sù libru nga Salmo, nga kansion nga áddáyo ra kâ Namarò,” kun na.

⁴⁵ Á pagubobuk ni Apu Kesu karannian, pinannawák na yù nonò da, tapè mánnámmuád da yù inipetúrâ na ngaw ni Namarò sù ira ábbilinán na. ⁴⁶ Á kinagi na nira, “Aijan yù dán nga netúrâ, nga maparigá nga matay yù Mammaguray nga sinullà ni Namarò, á maginnanolay sù mekatallu nga ággaw.

⁴⁷ “Á aijan gapay yù dán nga netúrâ, nga máwák nga melayalayâ yù bilin ni Namarò ta ngámin nga lugár, ta mabbábáwi yù ira ngámin makkakerumá nga tatolay sù liwiliwá da, ána mangikatalà ira nikán, tapè pakomán ni Namarò ira. Á sawe Jerusalem yù pangigapuád da nga mangilayalayâ. ⁴⁸ Á sikayu yù umay mangipakámmu nikán, gapu ta nasingan naw yù ngámin nga nesimmu nikán. ⁴⁹ Ngam ari kayu lábbi mánaw sawe ili, ta dobak ku sangaw nga umay nikayu yù Mangilin nga Ikararuá nga inittabbá na ngaw nayù Yámà. Á iddagán naw yù tappi na, nga maggapu ta lángi, ta iyawá na nikayu yù pakáwayyá naw.”

Pattoli ni Apu Kesu ta Lángi

Markus 16:19-20; Kingguá 1:9-11

⁵⁰ Á sù dattál nayù oras nga páno ni Apu Kesu nga umay ta lángi, á iniyángo na yù ira siminuttul kuna ta lawán na Jerusalem áddè ta babálay na Bitania. Á labbè da tán, á sinonná ni Apu Kesu yù limá na, á kinagi na yù pangikállà ni Namarò nira, nga pamindision na nira. ⁵¹ Á pakkagi na karannian, nánawán na ira, á neyángay ta lángi. ⁵² Á yù ira ngámin nga siminuttul kuna, jináyo ra si Apu. Á nanoli ira laguk ta Jerusalem nga nerallà yù ayá da. ⁵³ Á yáyù nga kággággaw manotoli ira sù mangilin nga kapilliá, nga maddáyaw kâ Namarò.

Yù Napiá nga Dámak nga Meyannung kâ Apu Kesu Kiristu nga Initúrâ ni Kuan

Yù Meyannung sù Initúrâ ni Kuan

Si Kuan nga nattúrâ sawe libru yù tadday sù ira mapulu duá nga sinudduán ni Apu Kesu. Á netúrâ ta meyannung kâ Kuan sù libru ni Mattiu (4:21), ta aggina yù anâ ni Sebedo. Á pattúrâ ni Kuan, initúrâ na ta kunnay ta tanakuán yù mattúrâ, á ta meyannung ta baggi na, kun na lâ, “yù tudduán ni Apu Kesu nga iddukan na.” Á netúrâ gapay sawe libru ni Kuan (19:25-27) yù kinagi ni Apu Kesu ta keggá na ta kurù lage na natay, ta sinullâ na si Kuan ta manaron sù innò na.

Á ipakánnámmu ni Kuan ta si Apu Kesu yù mannanáyun nga Anâ ni Namarò, nga kapulupulú ni Namarò. Á si Apu Kesu yù mangngágan ta Ubobuk ni Namarò, nga pannakasimù ni Namarò. Á megapu sù pagubobuk na, pinarò na yù ngámin nga aijan, á awán bulubugá ta arán na pinarò.

Á nabbáli si Apu Kesu ta tolay nga nakipaggián ta tolay megapu sù keyaná na. Á kinagi ni Kuan (20:31) yù ipangitúrâ na sawe libru, “tapè kurugan naw ta si Apu Kesu yù MakKiristu nga Anâ ni Namarò nga Makáwayyá nga Mangiyígù. Ta nu kurugan naw ána ikatalá naw, mepattolay kayu kuna ta áddè ta áddè.”

Á ta meyannung sù baggi na, kinagi ni Apu Kesu, “Sikán yù Egga, nga áttotole na tolay. Sikán yù manotolay” (6:48). Á meyárik ta nawák, gapu ta “mamannawák ta nonò na tolay” (12:35-36). Á sittam nga mangikatalá kuna yù meyárik ta karneru na. Á kinagi na, “Sikán yù napiá nga minánnaron, á ammu yù ira ngámin nga kukuá. Á yù ira kukuá, ammu rangá gapay” (10:14).

Yù Mayán na yawe Napiá nga Dámak

Paddáyo ni Kuan sù Ubobuk ni Namarò (1:1-18)
Pangilayalayâ ni Kuan nga Minánnigù (1:19-34)
Pagágál ni Apu Kesu sù ira Tudduán na (1:35-51)
Pamagaddátu ni Apu Kesu ána Pangituddu na (2:1-9:41)
Meyárik si Apu Kesu sù Mináppárak ta Karneru (10:1-42)
Pate ni Lasaru ána Pamaginnanole ni Apu kuna (11:1-12:11)
Pamaddulò da kâ Apu Kesu ta Jerusalem (12:12-50)
Pangituddu ni Apu ta Keggá na ta Jerusalem (13:1-16:33)
Yù Pakimállâ ni Apu Kesu megapu nittam (17:1-26)
Paggápù da ána Pamapáte ra kâ Apu Kesu (18:1-19:27)
Yù Pangipátâ da kâ Apu Kesu ta Kurù (19:17-27)
Pate ni Apu Kesu ána Pangitanam da kuna (19:28-42)
Matolay si Apu Kesu, nga Mappasingan! (20:1-21:25)

Yù Paddáyo ni Kuan sù Manotolay nga Mangngágan ta Ubobuk ni Namarò

- ¹ Gári, sù ngaw lage na kaparò na dabbuno, egga yù mangngágan ta Ubobuk ni Namarò.
Á yù mangngágan ta Ubobuk ni Namarò yù kapulupulú ni Namarò, nga magubobuk sù ubobuk ni Namarò.
Á aggina si Namarò.
- ² Á ta áddè ngaw kapámmegapu na ngámin,
dán nga maggián kâ Namarò.
- ³ Á megapu sù mangngágan ta Ubobuk ni Namarò, pinarò ni Namarò yù ngámin nga aijan,
á awán bulubugá ta pinarò na nga ari megapu sù pagubobuk na.
- ⁴ Á sigga-inángâ yù Ubobuk ni Namarò, nga manotolay,
nga paggapuán nayù inángâ na ngámin nga matolay.
Á aggina yù meyárik ta nawák, nga mamannawák ta nonò na tolay,
gapu ta ipakánnámmu na si Namarò.
- ⁵ Á ta kunnay ta pannawagan na nawák yù kallâ,
á pannawagan nayù meyárik ta nawák yù nonò na tolay.
Ta arád da ammu si Namarò, á kunnay ta maggián ira ta kallâ.
Á arán na bulubugá máppù na kallâ yù nawák.

⁶ Á sinullà ni Namarò yù tolay nga mangngágan ta Kuan.*

⁷ Á jinok ni Namarò si Kuan ta umay mangipakánnámmu ta meyanung sù tádday nga umay, nga meyárik ta nawák, tapè aijan yù awayyá nayù ira ngámin nga tatolay nga mangikatalà ána manguruk kuna, megapu sù pangituddu ni Kuan.

⁸ Ari si Kuan yù meyárik ta nawák, ngam minay galá, tapè ipakánnámmu na yù tádday nga meyárik ta nawák.

⁹ Yù MagUbobuk yù kukurugán nga meyárik ta nawák, nga duttálin ta dabbuno, nga mamannawák ta nonò na ngámin nga tatolay.

¹⁰ Jimittál yù MagUbobuk ta dabbuno.

Á mássiki nu pinarò ni Namarò yù ira ngámin nga tatolay ta dabbuno megapu sù pagubobuk nayù MagUbobuk, ngam arád da natákkilalán.

¹¹ Á yá labbetán na ta dabbuno yù lugár nayù ira ikáttole na, ngam arád da inalawá.

¹² Ngam aijan yù ira nga mangalawá ána mangikatalà kuna, á iniyawá na nira yù pakáwayyá ra nga mabbáli ta ána ni Namarò.

¹³ Á yù pabbáli ra ta ána ni Namarò, ari megapu sù pangatáwa nayù ira darakal da.

Á ari megapu sù pakkaragá na tolay, onu yù ure ra.

Ngam si Namarò galá yù mamabbalin nira ta ána na.

¹⁴ Á dattál nayù MagUbobuk ta dabbuno, nabbáli ta tolay, nga neyaná ta tolay ána nakipaggián ta tolay.

Aggina yù siggapiá ána sigga-allà nga minángngikállà ta tolay, á kuruk ngámin yù kinagi na.

Á sikami, nasingan mi yù dalingáráng na nga naggapu sù Yáma na, nga dalingáráng nga iniyawá nayù Yáma na sù táttádday nga Aná na.

¹⁵ Á yù MagUbobuk, aggina yù inipakánnámmu na ngaw ni Kuan. Inikatakotol na ngaw ni Kuan, á kinagi na, “Aggina yù kinagi nikayu nga maporián nga tumubbâ níkan, nga makáwayyá ánnè níkan, ta mannanáyun nga egga sù ngaw aringá paga neyaná,” kun na.

¹⁶ Á gapu ta sigga-allà yù MagUbobuk, mesipà ittam sù pangikállà na nittam. Á ta kágággaw lannapán na yù iyawá na nittam megapu sù ángngikállà na, ta uputan na yù pangikállà na nittam nga awán ta áddè na. ¹⁷ Si Lákay Moyses, nga yù ngaw ábbilinán ni Namarò, aggina yù nangituddu sù tunung ni Namarò. Ngam si Apu Kesu Kiristu yù mangipakánnámmu sù allà ni Namarò nittam, ána ipakánnámmu na gapay nittam yù ngámin nga kuruk nga meyanung kê Namarò. ¹⁸ Á kuruk gemma nga awán bulubugá ta tolay nga nakasingan kê Namarò. Ngam yù táttádday nga Aná ni Namarò nga aijan kuna ána iddukan na, aggina yù mangipakánnámmu sù Yáma na.

*Yù Pangilayalayá ni Kuan nga Minánnigù
Mattiu 3:1-12; Markus 1:1-8; Lukas 3:1-18*

¹⁹ Á yù ira karakalán na Kudio nga naggián ta Jerusalem, jinok da yù ira pári ána yù ira kábulud da nga ginaká ni Lákay Libi, ta ed da iyabbú kê Kuan yù meyanung ta baggi na. “Asinni ka?” kud da kê Kuan. ²⁰ Á arán na inilímak nira ni Kuan yù kuruk. Kinagi ni Kuan nira, “Ari sikán yù mangiyígù nga mangngágan ta Kiristu nga iddagát tam ta umay nga mammaguray ta dabbuno,” kun na. ²¹ “Á asinni ka laguk? Sikaw panò si Lákay Elias nga yù ngaw ábbilinán ni Namarò nga kagiad da ta manoli?” kud da kê Kuan. Á “Ari,” kun ni Kuan. Á namidduá ira nga nangiyabbú, á kinagi ra, “Ari panò sikaw yù ábbilinán ni Namarò nga iddagám mi?” kud da. “Ari,” kun ni Kuan.

²² Á kinagi ra laguk kuna, “Kagiam mu ngè nu asinni ka, tapè ammu mi yù kagiam mi sù ira naddok níkami. Anni kagiam mu nga meyanung ta baggim?” kud da. ²³ Á initabbák ni Kuan yù kunnay sù dán nga netúrâ nga ubobuk ni Lákay Isaya, nga yù ngaw ábbilinán ni Namarò. Kinagi ni Kuan nira, “Sikán yù makkatakotol ta kalállammatán. Yá ikatakotol ku, ‘Umayin si Apu. Tunungan naw yù pallakarán na.’ ”

²⁴ Á aijan gapay yù ira nga jinok nayù ira karakalán na Kudio, nga Parisio.† ²⁵ Á iniyabbú da laguk kê Kuan, “Nu ari sikaw yù MakKiristu nga mammaguray, onu si Lákay Elias, onu yù ábbilinán ni Namarò nga iddagám mi, á ngattá, ta manigù ka?” kud da.

* 1:6 Yawe si Kuan nga minánnigù, nga ari yù sinudduán ni Apu Kesu nga nattúrâ sawe. † 1:24 Parisio yù ira Kudio nga naggiám mu sù tunung ni Moyses ána yù ira tunung da nga inilánnà da.

²⁶ Á kinagi ni Kuan nira, “Á síkán, danum lâ yù ipanigù ku. Ngam ajjanin nikayu yù tádday nga arán naw ammu. ²⁷ Aggina yù maporián nga tumubbâ níkán, nga makáwayyá ánnè níkán, á aringâ mepángngâ nga mangubbák ta kaddang na sapatù na.” ²⁸ Á nesimmu ngámin danniaw túrin ta Bitania ta dammáng na danum na Jordan, ta keggá na ngaw ni Kuan nga nanigù sù ira tatolay.

Yù Meyárik ta Karneru nga Meyátáng

²⁹ Á ta tádday ággaw, nasingan ni Kuan si Apu Kesu nga mappángè kuna. Á kinagi ni Kuan sù ira tatolay, “Aggina yù meyárik ta karneru, ta aggina yù iyawâ ni Namarò nga meyátáng, tapè mári yù ngámin nga liwâ na tolay. ³⁰ Aggina yù kinagi nikayu nga maporián nga tumubbâ níkán, nga makáwayyá ánnè níkán, ta egga nga mannanáyun sù ngaw aringâ paga neyanâ. ³¹ Á mássiki síkán, sù ngaw, arák ku ammu nu asinni. Ngam yáyù nga minayâ ta danum na Jordan nga manigù sù ira tatolay, tapè aggina yù mepakánnámmu sù ira ginaká ni Kákay Israel,”[†] kun ni Kuan.

³² Á kinagi na laguk ni Kuan, “Nasingak ku yù Ikararuá ni Namarò ta pappagukák na nga kun na kalapáti nga maggapu ta lángi, á minay naddappá nga naggián sù tádday nga tolay. ³³ Á arák ku paga natákkilálán. Ngam si Namarò nga naddok níkán ta umayâ manigù, kinagi na níkán, ‘Masingan mu sangaw yù Mangilin nga Ikararuá nga mappagukák, á maddappá nga maggián sù tádday nga tolay. Aggina yù sinullâ ku ta manigù ta tolay, nga tanakuán yù ánnigù na. Ta ari danum yù ipanigù na, nu ari galâ yù Mangilin nga Ikararuá, nga ipepulù na sù ira tatolay,’ kun ni Namarò níkán. ³⁴ Á gapu ta nasingak ku yù pappagukák nayù Mangilin nga Ikararuá ni Namarò nga naggapu ta lángi ta kun na kalapáti, nga naddappá nga naggián táne tolay, á yáyù nga ipakánnámmù nikayu ta aggina yù Anâ ni Namarò,” kun ni Kuan.

Yù Pagágál ni Apu Kesu sù ira Olu nga Tuđuán na

³⁵ Á ta tádday nga ággaw, ajjan di Kuan ána duá ira nga tuđuán na. ³⁶ Á nasingan ni Kuan si Apu Kesu nga mattalebák nira. Á kinagi ni Kuan sù ira kábulun na, “Yane yù meyárik ta karneru, gapu ta iyawâ ni Namarò, tapè mári yù liwâ na tolay!”

³⁷ Á pakaginnâ nayù ira duá nga kábulun ni Kuan sù kinagi na, sinuttul da si Apu Kesu. ³⁸ Á nallipay si Apu Kesu, á nasingan na yù ira tumuttul kuna. Á kinagi na nira, “Anni yù ikáyâ naw?” Á iniyabbù da, “Rabbi, sisaw paggianám mu?” kud da. Á “Mesturu” yù kebalínán na Rabbi. ³⁹ Á kinagi ni Apu Kesu nira, “Et tamin ta en naw innan,” kun na. Á binulud da laguk tapè masingad da yù paggianán na. Á nepagammâ ira kuna, gapu ta púgágin yù labbè da.

⁴⁰ Á si Andares nga wagi ni Simon Eduru yù tádday sù ira duá nga siminuttul kâ Apu Kesu ta pakaginnâ ra sù kinagi ni Kuan. ⁴¹ Á dagarágâ en na laguk inalek ni Andares si Simon nga wagi na. Pakálek na kuna, kinagi na, “Nesimmuám mi ngin yù Messiyal!” kun ni Andares. Á yù kebalínán na “Messiya” yù “MakKíristu, nga kamotungán nga patul nga initabbá na ngaw ni Namarò nga umay mammaguray ta ngámin nga dabbuno.” ⁴² Á inituluk ni Andares si Simon nga wagi na kâ Apu Kesu. Á inni-innan ni Apu Kesu si Simon, á iniyabbù na kuna, “Á sikaw laguk si Simon, nga anâ ni Kuan? Ingágat taka ta Eduru,” kun ni Apu Kesu kuna. Á “Batu” yù kebalínán na “Eduru.”

Yù Pagágál ni Apu Kesu kári Pilippi kâ Nataniel

⁴³ Á ta tádday ággaw, ninonò ni Apu Kesu ta umay ta Galilia. Á nesimmuán na si Pilippi. Á kinagi na kuna, “Tuttulam mà,” kun na kâ Pilippi. ⁴⁴ Taga Betseda gapay si Pilippi, nga keliád di Andares kâ Eduru.

⁴⁵ Á nálerán na laguk ni Pilippi si Nataniel, á kinagi na kuna, “Nálerám mi ngin yù tolay nga kakágíad da ngaw di Lákay Moyses ána yù ira ngaw ábbilínán ni Namarò, nga netúrâ sù tunung ána yù dán nga netúrâ. Ajjan tuke. Aggina si Apu Kesu nga taga Nasaret, nga anâ ni Lákay Kusè,” kun ni Pilippi kâ Nataniel. ⁴⁶ “Egga panò yù napiá nga taga Nasaret?” kun ni Nataniel kuna. “Á et ta ngè innan,” kun ni Pilippi kuna.

⁴⁷ Á pakáranni ra ta gián ni Apu Kesu, nasingan na laguk ni Apu Kesu si Nataniel nga mappángè kuna. Á kinagi ni Apu Kesu sù ira kábulun na, “Aggina yù tolay nga kuruk nga ginaká ni Israel, nga ajjan kuna yù napiá nga nonò nga awán ta jibak,” kun ni Apu Kesu. ⁴⁸ Á iniyabbù ni Nataniel kuna, “Kunnasi nga ammum yù nonò ku?” kun na. “Nasingat taka ta kapállirum mu paga ta káyù nga igò, sù arán na ka paga jinagâ ni Pilippi,” kun ni

[†] 1:31 Yù ira Kudío yù ginaká ni Lakay Israel ána yù ikáttole ni Apu Kesu.

Apu Kesu kuna. ⁴⁹ Á kinagi ni Nataniel kuna, “Mesturu, sikaw yù Aná ni Namarò! Sikaw yù Patul nga mammaguray nikami nga ginaká ni Kákay Israel!” kun na.

⁵⁰ Á kinagi ni Apu Kesu ká Nataniel, “Yaw panò ipanguruk mu nikán yù pakkagi ta nasingat taka sù silárung na igò? Ngam masingam mu paga noka yù akka-akkuák ku nga makapállá ánnè sawe. ⁵¹ Á kukurugán nga kuruk yù ngámin nga kagiak ku nikayu. Masingan naw noka yù pabbuká na lángi ána yù ira daroban ni Namarò nga mánaw nga umay ta utun ána mappagakák nga umay nikán, sikán nga Kaká ngámin na tatolay,” kun ni Apu Kesu.

2

Yù Pamagaddátu ni Apu Kesu sù Keggá na ta Bodá ta Kana

¹ Á pappasá na duá nga ággaw áddè sù pakiubobuk ni Apu Kesu ká Nataniel, aijan yù bodá ta ili na Kana sù purubinsia na Galilia. Á aijan tán yù yená ni Apu Kesu. ² Á inapà da gapay di Apu Kesu ána yù ira tudduán na. ³ Á yù ira tatolay nga nakibodá, napúnu ra yù binaráyáng.* Kapúnu na binaráyáng, en na kinagi nayù yená ni Apu Kesu kuna, “Napúnungin yù binaráyáng,” kun na. ⁴ Á kinagi ni Apu Kesu sù yená na, “Paguráyám mu, Innò, ta ammù gemma. Ari paga jimittál yù oras nga sinullá ni Namarò nga kepalappá ku,” kun ni Apu Kesu. ⁵ Á kinagi na laguk nayù yená na sù ira aripan, “Mássiki nu anni yù ipakuá na sangaw nikayu, á kurugan naw,” kun na nira.

⁶ Á aijan tán annam nga angáng nga darakal, nga pangipayyád da ta danum nga ájjigután nayù ira Kudio ta meyannung sù kustombare ra nga mappakarenu megapu sù rilisiod da. Á makárgá támma ta límá láta yù taggitádday nga angáng. ⁷ Á kinagi ni Apu Kesu sù ira aripan, “Pannuan naw yù ira angáng ta danum,” kun na. Á pinnu ra ira. ⁸ Á kinagi na nira, “Sirutan naw, ta en naw ituluk sù minángngálluik,” kun na. Á kinuruk da.

⁹ Á yù minángngálluik, kinákkapán na lâ ta baddi yù danum nga nabbáli ta binaráyáng, ngam arán na gemma ammu nu sisaw nangápád da. Ngam yù ira nanágak, aggira lâ makánnámmu sù naggapuán na. Á pangákká nayù minángngálluik, inagálán na yù nobiu. ¹⁰ Á kinagi na kuna, “Gagángay nittam ta papoluat tam yù kasingngatán, á sangaw nu nakapissán ira ta napiá, á paporianat tam yù jikkú. Ngam sikaw, pinakappiám mu yù kasingngatán, á kapangilatuuák mu lâ kunangane,” kun na.

¹¹ Á yù makapállá nga kingnuá ni Apu Kesu ta keggá na ta bodá sù ili na Kana ta purubinsia na Galilia, yáyù olu nga pinagaddátu na, nga pangipasingan na ta pakáwayyá na. Á pakasingan nayù ira makituddu sù kingnuá na, nangikatalà ira kuna. ¹² Á ta kabalin na yaw, nappupúlú di Apu Kesu nga nánaw nga minay ta Kapernium, aggira ána yù ira wáwwagi na ána si innò da ána yù ira tudduán na, á nakipaggián ira lábbi tán.

Yù Pamakarenu ni Apu Kesu sù Mangilin nga Kapilliá

Mattiu 21:12-13; Markus 11:15-17; Lukas 19:45-46

¹³ Á maddaggunin yù Piestá ta Jerusalem, nga panaddamán nayù ira Kudio sù ngaw pattalebák nayù mangilin nga daroban sù ira ngaw naggaká nira ta keggá ra ta lugár na Egipto. Á minay laguk di Apu Kesu ta Jerusalem.

¹⁴ Labbè da ta Jerusalem, simillung si Apu Kesu sù mangilin nga kapilliá, á naratang na yù ira minálláku ta báka, karneru, mammánù ána yù ira minánnáli ta kuártu. ¹⁵ Á iná ni Apu Kesu yù lubik, nga pidde na ta paligà, á pinaturiák na ira ngámin ána yù ira ayám da sù mangilin nga kapilliá. Á sinottombá na yù ira lamesá nayù ira minánnáli ta kuártu ána iniwári na yù kuártu ra. ¹⁶ Á kinagi na sù ira malláku ta mammánù, “Ipáno naw danniaw. Ngattá, ta pabbalinán naw ta dápun yawe mangilin nga bale nayù Yámál!” kun ni Apu Kesu. ¹⁷ Á pakasingan nayù ira tudduán na sù kingnuá na, ninonò da laguk yù inipetúrá ni Namarò sù dán nga netúrâ, nga kunniaw: “Apu Namarò, nakalò yù ángngiddú ku sù balem, nga kun na api ta unak ku.

Á nepallá yù daddam ku, gapu ta arád da pakimorayán yù balem.”†

¹⁸ Á gapu ta pinaturiák ni Apu Kesu yù ira minálláku, minay yù ira karakalán na Kudio, á kinagi ra kuna, “Anni yù ipasingan mu nikami nga makapállá, nga panákkilálám mi ta aijan yù pakáwayyám sù kingnuám?” kud da kuna. ¹⁹ Simibbák si Apu Kesu nira, á kinagi na, “Táttakan naw yawe mangilin nga bale ni Namarò, á ta tallu ággaw patáddagak ku,” kun na. ²⁰ Á kinagi nayù ira Kudio kuna, “Appátapulu ta annam ta dagunin yù pappadde ra sù

* 2:3 Tabbuk nayù bungá na úbas yù pidde nayù ira Kudio ta binaráyáng. † 2:17 Salmo 69:9

mangilin nga kapillíá nga bale ni Namarò! Á patáddagam mu panò ta tallu nga ággaw?" kud da. ²¹ Ngam yù mangilin nga bale ni Namarò nga kinagi ni Apu Kesu yù baggi na. ²² Á ta pappasá na pate ni Apu Kesu ána yù paginnanole na, yáyù lâ pakanonò nayù ira tudduán na sù kinagi na, á yáyù panguruk da sù ngámin nga inipetúrâ ni Namarò sù dán nga netúrâ ána yù ngámin gapay nga kinagi ni Apu Kesu.

²³ Á ta keggá ni Apu Kesu ta Jerusalem nga nakipiestá, aru yù ira nanguruk kuna ta pakasingad da sù aru nga pinagaddátu na nga makapállá. ²⁴ Ngam arán na ira inikatalà, ta ammu na ta negagángay ta nonò na tolay yù mattá-iki-ikáyá. Ta ammu na yù nonò na ngámin nga tatolay. ²⁵ Á arán na máwák yù umay maddaránuk kuna ta meyanung sù kakágian nayù ira tatolay ta nonò da, ta ammu na lâpay ngámin yù aijan ta nonò da.

3

Yù Pakiubobuk ni Nikudemu kâ Apu Kesu

¹ Aijan yù tádday sù ira karakalán na Kudío nga Parisio, nga mangngágan ta Nikudemu. ² Á ta tádday nga gabi, minay si Nikudemu nakiubobuk kâ Apu Kesu. "Mesturu," kun ni Nikudemu kuna, "ammu mi ta sikaw yù mangituddu nga jinok ni Namarò, ta awán gemma ta makapagaddátu ta kun na kingnguám, nu ari mepulú si Namarò kuna," kun ni Nikudemu kâ Apu Kesu. ³ Á simibbák si Apu Kesu, á kinagi na, "Kukurugán nga kuruk yù kagiak ku nikaw, nga ari bulubugá mesipá yù tolay sù pammagure ni Namarò nu ari moli nga meyaná," kun na. ⁴ Á kinagi ni Nikudemu, "Á kunnasi? Egga panò yù awayyá na tolay nga meyaná nu lakalákayin? Makatallung panò paga ta sán ni innò na, tapè mamidduá nga meyaná?" kun ni Nikudemu.

⁵ Á simibbák si Apu Kesu, á kinagi na, "Kukurugán nga kuruk yù kagiak ku nikaw, nu ari moli meyaná yù tolay megapu sù danum ána yù Ikararúá ni Namarò, ari mesipá sù pammagure ni Namarò. ⁶ Ta yá lâ meyaná ta tolay yù tolay lâ gemma, nga egga kuna yù nonò na tolay. Ngam yù tolay nga moli meyaná megapu sù Ikararúá ni Namarò, á pabbalanan ni Namarò ta aná na, nga moli gapay yù nonò na. ⁷ Ari ka laguk mapállá sù kagiak ku nikaw, nga máwák naw ngámin moli nga meyaná. ⁸ Ta mássiki nu arán naw ammu nu kunnasi yù kesimmu na, á mesimmu gemma. Á yù paddák yù keyarigán na, ta arán naw ammu yù paggapuán na ána pappángetán na, ngam ginnán naw yù sarò na. Á kunnian gapay sù keyaná na tolay kâ Namarò megapu sù Ikararúá na," kun ni Apu Kesu. ⁹ Á kinagi ni Nikudemu kâ Apu Kesu, "Á kunnasi yian?" kun na.

¹⁰ Á simibbák si Apu Kesu, á kinagi na kuna, "Sikaw yù maráyaw nga mangituddu sù ira ikáttole tam nga ginaká ni Israel, ngam arám mu ammu yù kinagi nikaw? ¹¹ Kukurugán nga kuruk yù kagiak ku nikaw. Á kagiak ku yù ammú ána yù nasingak ku. Ngam sikayu nga Parisio, arán naw kurugan yù kagiak ku. ¹² Á nu arán naw kurugan yù kinagi nikayu nga meyanung ta dabbuno, manguruk kayu panò nu kagiak ku nikayu yù meyanung ta lángi? ¹³ Awán bulubugá ta minay ta lángi nu ari lâ sikán nga naggapu ta lángi, sikán nga Kaká na ngámin na tatolay.

¹⁴ "Á gári, ta keggá ri Moyses ána yù ira ginaká ni Israel ta kalállammatán, pidde ni Moyses yù baronsi ta siná-iráw, nga initaráng na ta káyu nga inisiddá na ta dabbun, tapè mammapiá yù ira kinagá na iráw ta pattánguk da kuna.* Á kunníúrin gapay yù keyarigák ku. Ta sikán nga Kaká na ngámin na tatolay, ipotud dangá sangaw nga mepatá ta kurú nga patáddagad da. ¹⁵ Á yù ira ngámin nga mangikatalá níkan, mepattolay ira kâ Namarò, á mesipá ira sù pammagurayán ni Namarò ta áddè ta áddè.

¹⁶ "Á gapu ta napasigaggá yù ángngiddú ni Namarò sù ira tatolay ta dabbuno, yáyù nga iniyawá na yù Aná na nga táttádday ta metapil megapu nira, tapè aggira ngámin nga mangikatalá kuna, ari ira mesinná kâ Namarò, nu ari galá nga mesipá ira nga mepattolay kuna ta áddè ta áddè. ¹⁷ Ta yáyù gapu na nga jinok ni Namarò yù Aná na ta dabbuno, nga ari nga mamagikáru ta tolay, nu ari galá ta aggina yù magikáru ta liwiliwá nayù ira ngámin nga tatolay, tapè meiyíg ira megapu kuna. ¹⁸ Á yù ira nga mangikatalá sù Aná ni Namarò, ari ira mekaná sù pamagikáru ni Namarò. Ngam yù ira nga ari mangikatalá kuna, nekaná iren sù pamagikáru ni Namarò, gapu ta arád da ikatalá yù táttádday nga Aná ni Namarò.

¹⁹ "Á yáyù nga pagikaruan ni Namarò ira, gapu ta minayin ta dabbuno yù Aná na, nga mamannawák ta nonò na tolay, ngam manaki yù ira tatolay kuna. Á yá ipanaki da, ta arád da ikáyá yù nawák, nu ari galá yù kallá yù ikáyá da, gapu ta narákè yù akka-akkuád da. ²⁰ Á ngámin nga tatolay nga narákè yù akka-akkuád da, malussaw ira sù mamannawák, á

* 3:14 Numero 21:4-9

molang ira umay kuna, marakè mepasingan yù narákè nga akka-akkuád da. ²¹ Ngam yù ira tatolay nga napiá yù akka-akkuád da, umay ira sù mamannawák, tapè mepasingan ta akkuád da lá yù ngámin nga napiá nga ipakuá ni Namarò nira megapu sù ángngabbák na nira.”

Si Apu Kesu ána si Kuan nga Minánnigù

²² Á ta kabalin na yaw, minay di Apu Kesu ána yù ira tudduán na ta purubinsia na Judiya, á naggián ira nga nanigù ta tatolay tán. ²³ Á nanigù gapay si Kuan ta gián na Enon nga aranni ta ili na Salim, gapu ta napiá yù danum tán. Á minay yù ira tatolay, tapè makirigù ira ká Kuan, á jinigù na ira. ²⁴ Ta ari paga nebáluk si Kuan.

²⁵ Á aijan yù tádday nga Kudio nga minay nakipereperang ta ubobuk sù ira makituddu ká Kuan ta meyannung sù kustombare na rilisiod da nga mappakarenu. ²⁶ Á minay ira laguk ká Kuan. “Mesturu,” kud da kuna, “manonò mu yù nga kabbulum mu nga inipakánnámmum nikami ta paggiát tam ngaw ta dammáng na Jordan? Ajjanin nga manigù, á umay yù ira ngámin nga tatolay makirigù kuna!” kud da ká Kuan.

²⁷ Á simibbák si Kuan, á kinagi na nira, “Á napiá laguk, ta si Namarò yù mangiyawá kuna ta pakáwayyá na sù akkuán na, ta awán ta pakáwayyá na tolay nga arán na iniyawá ni Namarò kuna. ²⁸ Á sikayu, naginná naw yù kinagì ngaw nikayu, nga aringà MakKiristu nga umay mammaguray. Sikán galá yù pinapolu ni Namarò nga umay mangipakánnámmu kuna, tapè manguruk kayu kuna.

²⁹ “Á nu ángngarigán ta aijan yù bodá, yù nobiu yù mangalawá ta babay nga atáwa na. Á yù kopun nayù nobiu, nepallà yù pagayáyá na sù labbè nayù nobiu. Á kunnay gapay nikán, ta nepallà yù pagayáyá ku megapu sù ira tatolay nga umay ká Apu. ³⁰ Kuruk nga aggina yù mepotun nga meparáyaw. Ngam sikán, máwák ta gukágá lá gukák,” kun ni Kuan nga Minánnigù.

Makáwayyá ta Ngámin yù Naggapu ta Lángi

³¹ “Á yù Aná ni Namarò yù naggapu ta lángi, á aggina yù kotunán ta ngámin. Á yù ira tatolay nga yawe dabbuno yù paggapuád da, á maggián ira lá ta dabbuno, á ammu ra lá yù meyannung ta dabbuno, ána yáyù lá ubobugad da. Ngam yù naggapu ta lángi, aggina yù kotunán nga makáwayyá ta ngámin. ³² Á ubobugan na yù nasingan na ána naginná na ta lángi, ngam awán garè ta manguruk sù kagian na. ³³ Ngam yù ira tatolay nga manguruk sù bilin na, ipakánnámmu ra ta kuruk yù ngámin nga ubobuk ni Namarò, megapu sù panguruk da.

³⁴ “Á si Apu Kesu Kiristu yù jinok ni Namarò, á ipakánnámmu na yù ubobuk ni Namarò, ta awán ta pakáddekán nayù pakapangnguá na ána pakáwayyá na megapu sù Ikararuá ni Namarò nga iniyawá na kuna. ³⁵ Ta iddukan ni Namarò yù Aná na, ána inikatalà na kuna yù pakáwayyá na ta ngámin nga egga ta lángi ána dabbuno.

³⁶ “Á yù tolay nga mangikatalà sù Aná ni Namarò, mesipà ká Namarò nga mepattolay kuna ta áddè ta áddè. Ngam yù tolay nga ari manguruk sù Aná ni Namarò, ari bulubugá mepattolay ká Namarò, nu ari galá ta ukuman na ira ni Namarò, ána pagikaruan na ira ta áddè ta áddè.”

4

Yù Pakiubobuk ni Apu Kesu sù Babay nga taga Samaria

¹ Á yù ira karakalán na Kudio nga Parisio, narámak da ta napakáru yù ira tatolay nga umay makituddu ána makirigù ká Apu Kesu ánnè sù ira nga makituddu ána makirigù ká Kuan. ² Ngam ari gemma si Apu Kesu yù manigù, nu ari galá yù ira tudduán na. ³ Á pakaginná ni Apu Kesu ta narámak nayù ira Parisio yù pakirigù nayù ira tatolay sù gián na, nánaw laguk ta Judiya nga nepulù sù ira tudduán na, ta umay ira ta purubinsia na Galilia.

⁴ Á pallakák di Apu Kesu nga umay ta Galilia, mattalebák ira sù purubinsia na Samaria. ⁵ Á nakáddè ira ta ili na Sikar sù purubinsia na Samaria nga aranni ta dabbun nga bittáng na ngaw ni Akup sù ngaw aná na, nga si Kusè. ⁶ Á aijan tán yù bubun ni Akup. Á gapu ta nabannák si Apu Kesu ta pallakalakák na, nagitubang ta aggik na bubun. Á tangngá na ággaw yù labbè da tán.

⁷ Pagitubang ni Apu Kesu ta aggik na bubun, minay nanágak yù babay nga taga Samaria. Á kinagi ni Apu Kesu kuna, “Penumam mà bì,” kun na sù babay. ⁸ Ta nánawin garè yù ira makituddu ká Apu Kesu, nga minay ta ili, ta ed da gatángan yù kanad da.

⁹ Á yù babay nga kobobuk ni Apu Kesu, nakaddák ta pakiubobuk na kuna, gapu ta iluddè nayù ira Kudio yù ira taga Samaria. Á yáyù nga simibbák yù babay, á kinagi na ká Apu Kesu,

“Kunnasi laguk ámmenum ku nikaw, ta sikaw, Kudio ka. Ngam sikán, taga Samariangà,” kun nayù babay kuna.

¹⁰ Á simibbák si Apu Kesu, á kinagi na kuna, “Nu ammun nakuan yù iyawâ ni Namarò ta tolay, á nu ammun gapay nakuan nu asinningà nga makkiddaw nikaw, á sikaw nakuan laguk yù makkiddaw nikán ta inumam mu, á iyawâ ku nikaw yù tanakuán nga danum nga manotolay ta áddè ta áddè,” kun na.

¹¹ “Apu,” kun nayù babay kuna, “awán ka gemma ta itágak, á alaram yawe bubun! Sisaw pangápám mu sù danum nga manotolay ta áddè ta áddè? ¹² Ta gári, si Kákay Akup nga yù ngaw naggaká nittam, aggina yù nakkokkok sawe bubun nga bittáng na nikami. Á aggira ngaw ána yù ira ngámin nga áná na ána ayám da, ininum da yù sinágak da sawe bubun. Makáwayyá ka panò ánnè kâ Kákay Akup?” kun nayù babay.

¹³ Á simibbák si Apu Kesu kuna, á kinagi na, “Yù ira ngámin nga ámminum ta danum na yawe bubun, mapangál ira paga sangaw. ¹⁴ Ngam yù tolay nga ámminum sù tanakuán nga danum nga iyawâ ku, ari ngin bulubugá mapangál. Ta nu inuman na yù iyawâ ku, mabbáli ta kun na wek ta unak na, nga mallatuá nga manotolay kuna ta áddè ta áddè,” kun ni Apu Kesu kuna. ¹⁵ Á kinagi nayù babay kuna, “Apu, iyawâ mu bì nikán, tapè aringà mabannák nga manoli sawe bubun nga umay manágak,” kun na.

¹⁶ Á pakkiddo nayù babay, kinagi na laguk ni Apu Kesu kuna, “Em mu bì agálán yù atáwam, ta umay kayu saw,” kun na. ¹⁷ “Awánà ta atáwa,” kun nayù babay. Á kinagi ni Apu Kesu kuna, “Wan ay, kuruk yù kinagim, nga awán ka ta atáwa. ¹⁸ Ngam límá gemma ngin yù nangatáwa nikaw. Á yù laláki nga kabbulum mu kunangane, ari nga kukurugán nga atáwam. Kuruk yù kinagim nga awán ka ta atáwa,” kun na.

¹⁹ Á kinagi nayù babay, “Apu, sikaw yù ábbilinán ni Namarò lagugam! ²⁰ Á aijan bì yù iyabbù ku nikaw. Yù ira naggaká nikami nga taga Samaria, yawe puddul yù naggagammungád da ta pakimore ra kâ Namarò. Ngam sikayu nga Kudio, kagian naw ta Jerusalem nakuan yù paggagammungán nayù ira tatolay nga umay makimoray kâ Namarò. Sisaw gián na laguk nayù kuruk nga paggagammungát tam nga makimoray kâ Namarò?” kun nayù babay.

²¹ Á kinagi ni Apu Kesu kuna, “Kurugam mu yù kagiak ku nikaw. Duttál sangaw yù ággo na nga ari sawe puddul ána ari tuke Jerusalem yù paggagammungán nayù ira tatolay nga makimoray kâ Namarò. ²² Á sikayu nga taga Samaria, makimoray kayu, ngam arán naw garè ammu nu asinni yù pakimorayán naw. Ngam sikami nga Kudio, ammu mi yù pakimorayám mi, ta Kudio gemma yù naggaká sù mangiyígù ta tolay. ²³ Á umayin yù ággo na, mássiki kunangane, nga aijan yù ira nga kuruk nga makimoray kâ Namarò nga Yáma tam ta lángi, nga ari nga áppa-áppè yù pakimore ra, ngam kukurugán nga makimoray ira megapu sù nonò da ána megapu sù panguruk da, gapu ta kunniaw nga tatolay yù agálán ni Namarò nga Yáma tam nga umay makimoray kuna. ²⁴ Si Namarò yù sigga-inángà nga ari masingan, nga manotolay ta tolay. Á yù ira tatolay nga makimoray nakuan kuna, máwák da makimoray kuna megapu sù nonò da ána yù panguruk da kuna,” kun ni Apu Kesu.

²⁵ Á kinagi nayù babay kuna, “Á sikán, ammu gemma ta umay ta dabbuno yù Mangiyígù nga mammaguray nittam. Aggina yù mangngágan ta Kiristu. Á sangaw nu lubbè, aggina yù mangipakánnámmu nittam ta ngámin nga kuruk,” kun na. ²⁶ Á kinagi ni Apu Kesu kuna, “Sikán yaw nga makiubobuk nikaw,” kun na.

²⁷ Á ta pagubobuk na paga ni Apu Kesu sù babay, limibbè yù ira tudduán na nga naggapu ta ili, á narángganád da ira. Á nakaddák ira ta pakiubobuk ni Apu Kesu sù babay, ngam awán ta nangiyabbù kuna nu anni yù ikáyâ nayù babay, onu anni yù gapu na nga pakiubobuk ni Apu Kesu.

²⁸ Á yù babay, pakaginná na sù kinagi ni Apu Kesu kuna, dagarágâ nga nánaw laguk nga bittáng na yù ammutu na, á nanoli ta ili. Á en na kinagi sù ira katangelián na, ²⁹ “Et tamin, ta en naw innan yù tolay nga nakkagi nikán ta ngámin nga kingnguá. Ari panò aggina yù Mangiyígù nga mangngágan ta Kiristu, nga iddagát tam?” kun na. ³⁰ Á nánaw ira laguk ta ili, ta ed da innan si Apu Kesu.

³¹ Á ta kapapáno nayù babay kári Apu Kesu ta bubun, á yù ira tudduán ni Apu Kesu, kinagi ra kuna, “Mesturu, kumán ka bì,” kud da. ³² Ngam simibbák si Apu Kesu, á kinagi na nira, “Aijan yù tanakuán nga kanak ku nga arán naw ammu,” kun na. ³³ Á yáyù nga nakkaká-abbù yù ira tudduán na, á kinagi ra, “Egga panò yù minay nangiyawâ kuna?” kud da.

³⁴ Á kinagi ni Apu Kesu nira, “Yaw galá ipakkatolé yù pamaluré ku sù ure ni Namarò nga naddok nikán ána yù panuppál ku sù ipakuá na nikán. ³⁵ Ari panò nakagi nikayu ta

ajjan paga appátubulán áddè ta ággagaták? Ngam kagiak ku nikayu ta namegapungin yù paggatagáták. Iripâ nawè yù ira tatolay nga umayin nikán. Meyárik ira ta ammay nga nalutu, nga máyâ magatágin kunangane, ta napanán iren nga umay manguruk nikán. ³⁶ Á yù ira nga mamatuttul nira, málâ da yù napiá nga bálâ da. Á yù ira nga patuttulad da nikán, málâ da yù kepáttole ra kê Namarò ta áddè ta áddè. Á yáyù nga mepagayáyâ ira, nga kunnay sù ira mammulá ána yù ira maggaták. ³⁷ Ta kuruk yù dán nga nakagi, nga 'Ajjan yù mammulá, á tanakuán yù umay maggaták.' ³⁸ Á dobat takayu, ta en naw patuttulan yù ira tatolay nga arán naw sinudduán. Á ajjan yù ira nangituddu nira nga napolu ánnè nikayu, tapè mesipá kayu sù pabbalinán na bannák na baggi ra."

³⁹ Á aru yù ira nga taga Sikar nga nangikatalà kê Apu Kesu megapu sù kinagi nayù babay nira, nga kun na, "Kinagi na nikán yù ngámin nga kingnguá," kun na. ⁴⁰ Á yáyù nga minay ira kê Apu Kesu. Á pakáddè da sù gián ni Apu Kesu, inigaggak da ta maggián bi nira. Á naggián si Apu Kesu nira ta duá nga ággaw. ⁴¹ Á kitáru yù ira nga nanguruk megapu sù ubobuk ni Apu Kesu. ⁴² Á kinagi ra sù babay, "Ari lâ yù kinagim yù ipanguruk mi kuna, ta gininná mi ngin gapay yù ubobuk na, á yáyù nga ammu mi ta kukurugán nga aggina yù iddanamát tam nga Mangiyígù ta tolay ta dabbuno," kud da.

Yù Pamammapiá ni Apu Kesu sù Aná nayù Tolay nga Kátannangán

⁴³ Á pappasá na duá nga ággaw, nánaw di Apu Kesu ta Sikar nga minay ta Galilia, nga naddakalán ni Apu Kesu. ⁴⁴ Á kinagi na ngaw ni Apu Kesu, "Pakimorayád da yù ábbilinán ni Namarò ta ngámin nga lugár. Ngam yù ira katangelián na, arád da pakimorayán," kun na. ⁴⁵ Ngam ta labbè ni Apu Kesu ta Galilia, magayáyâ yù ira tatolay nga mamaddulò kuna, gapu ta nasingad da yù pinagaddátu na ta pakipiestá ra ngaw ta Jerusalem.

⁴⁶ Á keggá ni Apu Kesu ta Galilia, nanoli ta ili na Kana ta purubinsia na Galilia, nga gián na ngaw sù pamabbáli na sù danum ta binaráyáng. Á egga tán yù tolay nga kátannangán, nga matakí yù aná na nga laláki ta bale ra ta ili na Kapernium. ⁴⁷ Pakaginná nayù tolay ta limibbè si Apu Kesu ta Kana, nga naggapu ta purubinsia na Judiya, minay laguk nga nakikomá kuna ta umay ta Kapernium, tapè pammapián na yù aná na nga magisassay matay. ⁴⁸ Á kinagi ni Apu Kesu kuna, "Nu arán naw masingan yù pagaddatuak ku nga makapállâ, egga panò yù ángnguruk naw nikán?" kun na. ⁴⁹ "Apu," kun nayù tolay, "et ten, ta kúragat ta yù arán na paga patay!" kun na. ⁵⁰ Á kinagi ni Apu Kesu kuna, "Lubbè ken, ta nammapiá ngin yù aná mu," kun na. Á kinuruk nayù tolay yù kinagi ni Apu Kesu kuna, á nánaw, ta manoli sù gián na.

⁵¹ Á sù tádday ággaw, pallakák nayù tolay paga nga lubbè sù gián na ta Kapernium, nerapunán na ta dálán yù ira aripan na. Á kinagi ra ta nammapiá ngin yù aná na. ⁵² Á iniyabbù na nira nu káni yù pammapiá na. Á kinagi ra kuna, "Kagabi ta pannarek na bilák ta púgák yù kári na kulikuk na," kud da kuna. ⁵³ Á nanonò nayù tolay ta yáyù gapay yù oras nga pakkagi ni Apu Kesu kuna ta nammapiá ngin yù aná na. Á aggira ngámin nga makkakábbalay, nanguruk ira kê Apu Kesu.

⁵⁴ Á ta keggá ni Apu Kesu paga ta Galilia nga naggapu ta Judiya, yawe yù mekaruá nga pinagaddátu na nga makapállâ.

5

Yù Pamammapiá ni Apu Kesu sù Tolay nga Natay yù Gadduá na Baggi na

¹ Á kabalid da nappassiár ta ili na Kana, jimittál yù piestá nayù ira Kudio, á giminon di Apu Kesu ta ili na Jerusalem, tapè nakipiestá ira.

² Á ajjan ta Jerusalem yù danum nga ájjigután nga mangngágan ta Betseda sù ággubobuk nga Kebru,* nga aranni ta puertá na ili nga ángngitallungád da ta karneru. Á nalepuanán yù danum ta límá nga állirumán nga nattutuppang. ³ Á kitáru yù ira tatolay nga gipeddán nga máttakí nga naggián tán, nga buling, pilay, ána yù ira natay yù gadduá na baggi ra, ta iddi-iddagád da lâ yù pappalung na danum. ⁴ Ta ajjan kanu yù daroban ni Namarò nga en na ikáddagâ palapalungan yù danum. Á pappalung na danum, mammapiá yù mapolu nga tolay nga mabbassung kuna.

⁵ Á ajjan tán yù tolay nga nataki ta tallupulu ta walu nga dagunin. ⁶ Á nasingan ni Apu Kesu, á ammu na ta nagiddá ta nabayágin. Á iniyabbù na laguk ni Apu Kesu kuna, "Ikáyá

* 5:2 Á Kebru yù ággubobuk nayù ira ngaw Kudio, ta keggá ri Akup, ána yù ira ngaw ábbilinán ni Namarò.

mu ta mammapiá ka?” kun na. ⁷ Á simibbák yù matakì, á kinagi na ká Apu Kesu, “Wan, Apu, ngam awán ta mangipay nikán sù danum ta pappalung na. Á pakáddè ku ta danum, aijanin yù mapolu ánnè nikán,” kun na. ⁸ Á kinagi ni Apu Kesu kuna, “Arà, manáddak ka laguk. Apam mu yù dapam mu, á mallakák ka,” kun na. ⁹ Á dagarágá nammapiá yù tolay, á iná na yù dapan na, á nallakák nga nánaw. Á Sabadu yù pammapiá nayù tolay, nga ággibannák na Kudio.

¹⁰ Á gapu ta Sabadu yù pammapiá nayù tolay, kinagi nayù ira karakalán nga Kudio kuna, “Sabadu ággawo, nga mangilin nga ággaw. Á mekontará gemma sù tunung tam yù mangáttu ta ággaw nga ággibannák tam. Ngattá, ta káttuam mu yù dapam mu?” kud da. ¹¹ Á simibbák yù tolay, á kinagi na nira, “Yù tolay nga namammapiá nikán, aggina yù nakkagi nikán ta apak ku yù dapak ku ánnà mallakára,” kun na. ¹² Á iniyabbù da kuna, “Asinni yù tolay nga naddok nikaw ta apam mu yù dapam mu ta mallakák ka?” ¹³ Ngam arán na garè ammu nayù tolay nu asinni yù namammapiá kuna, ta napakáru yù ira tatolay tán, á dagarágá nga nánaw si Apu Kesu.

¹⁴ Á manganánnuán, narángnganán ni Apu Kesu yù tolay sù mangilin nga kapilliá, á kinagi na kuna, “Innam mè! Nammapiá ken! Ari ka laguk mamidduá nga malliwá, marakè mappanà yù mesimmu sangaw nikaw ánnè sù ngaw jigá mu,” kun na. ¹⁵ Á pakasingan nayù tolay ká Apu Kesu, á nánaw laguk, á en na kinagi sù ira karakalán nga Kudio ta si Apu Kesu yù namammapiá kuna. ¹⁶ Á yáyù nga napporay yù ira karakalán nga Kudio ká Apu Kesu, á jinigirigá da, gapu ta ággaw nga ággibannák da yù pamammapiá na sù matakì.

¹⁷ Ngam simibbák si Apu Kesu, á kinagi na nira, “Si Namarò nga Ammò ku, uputan na paga yù pattarabáku na, maguray lâ nga ággaw. Á kunnian gapay nikán, mattarabákungà, ta upatak ku nga tuppálan yù ngámin nga ipakuá nayù Yámà nikán, maguray lâ nga ággaw,” kun na. ¹⁸ Á yáyù nga nappanà yù lusso nayù ira karakalán nga Kudio ká Apu Kesu, á inigagéra ra papatáyan, nga ari lâ megapu sù arán na kinuruk nga kustombare ra ta meyanung sù ággaw nga ággibannák da, ngam megapu paga ta pangigittá na sù baggi na ká Namarò, ta kinagi na ta si Namarò yù yáma na.

Yù Pakáwayyá nayù Anà ni Namarò

¹⁹ Á gapu ta pamaliwá nayù ira karakalán nga Kudio ká Apu Kesu, kinagi na laguk nira, “Kukurugán nga kuruk yù kagiak ku nikayu. Arák ku mororay yù akkuák ku. Ngam yá lâ akkuák ku yù masingak ku nga akkuán ni Namarò nga Yámà. Á ngámin yù akkuán nayù Yámà, yáyù gapay akkuák ku, sikán nga Anà na. ²⁰ Ta ayatan nangà nayù Yámà, á yáyù nga ipasingan na nikán yù ngámin nga akkuán na. Á ipakuá na paga sangaw nikán yù akka-akkuák ku nga makapállá ánnè karannian nga kingnguá, tapè mapállá kayu sangaw.

²¹ “Á kunnayá ká Yámà, ta paginnanolayan na yù ira námmatay, ánnà iddán na ira ta inángà tapè matolay ira. Á kunnian gapay yù akkuák ku, sikán nga Anà na, ta paginnanolayak ku ánnà tolayak ku yù ira nga ikáyá ku tolayan. ²² Á ari yù Yámà yù mamanunnù ta tolay, nu ari lâ sikán nga Anà na, ta inikatalà na nikán nga Anà na yù mamanunnù ta ngámin, ²³ tapè dayáwad dangà nayù ira ngámin nga tatolay ta kunnay sù áddáyo ra ká Namarò nga Yámà. Á yù tolay nga ari maddáyaw nikán nga Anà na, arán na gapay dayáwan yù Yámà nga naddok nikán.

²⁴ “Kukurugán nga kuruk yawe nga kagiak ku nikayu. Yù tolay nga magginná ta ubobuk ku ánnà manguruk ká Namarò nga naddok nikán, mepattolay nga mepaggián ká Namarò ta áddè ta áddè. Á aringin mokum, ta napakomá ngin yù liwiliwá na, á ásigurán nen ni Namarò, á apan na sangaw nga mesipà kuna ta áddè ta áddè. ²⁵ Á kuruk yù kagiak ku nikayu. Ngámin nga tatolay nga ari paga manguruk nikán, kunnay ta natay iren gapu ta nesinná ira ká Namarò. Ngam aijanin yù awayyá ra kunangane nga makaginná ta pagágál ku, á yù ira nga magginná ánnà manguruk nikán nga Anà ni Namarò, mepattolay ira nga mesipà ká Namarò ta áddè ta áddè. ²⁶ Ta sigga-inángà si Ammò ku, nga manotolay. Á sikán gapay, sigga-inángakà, ta iniyawá ni Ammò ku nikán nga Anà na yù awayyá nga manotolay. ²⁷ Á iniyawá na gapay nikán yù pakáwayyá nga mamanunnù ta ngámin, gapu ta sikán yù Kaká na ngámin na tatolay.

²⁸ “Ari kayu mapállá sù kinagi, ta duttál sangaw yù pakáddèkán nga ággaw, á ngámin yù ira námmatay, maginná ra yù ngáral ku. ²⁹ Á pakaginná ra, mallawán ira sù tanam da. Á yù ira nga napiá yù kingngikingnguá ra ta keggá ra ta dabbuno, maginnanolay ira nga mepattolay ká Namarò ta áddè ta áddè. Á yù ira nga narakè yù kingngikingnguá ra ta keggá

ra ta dabbuno, mallawán ira gapay ta tanam da nga mekaná sù pangukum ni Namarò, ta pagikaruno na ira,” kun ni Apu Kesu.

Yù ira Mangipakánnámmu kâ Apu Kesu

³⁰ Á kinagi na laguk ni Apu Kesu, “Arák ku mororay yù akkuák ku, ta si Namarò nga Yámà yù naddok nikán, á ta kun na kagian nayù Yámà nikán, kunnian galá yù pamanunnù ku. Á yáyù nga matunung yù ámmannunnù ku, ta ari yù urè yù tuttulak ku, nu ari galá yù ure nayù Yámà.

³¹ “Á nu sikán lápay nakuan yù makkagi ta meyanung ta baggi, arán naw gemma kurugan yù kagiak ku. ³² Ngam aijan yù tanakuán nga mangipakánnámmu ta meyanung nikán, nga yù Ammò ku, á ammu ta kuruk ngámin yù kagian na.

³³ “Á sikayu, jinok naw yù ira mangiyabbù kâ Kuan ta meyanung nikán, á kuruk gapay yù kinagi ni Kuan. ³⁴ Á arák ku gemma awágan yù tolay nga makkagi ta meyanung nikán, ngam ipanonò ku nikayu yù kinagi ni Kuan, tapè meygù kayu. ³⁵ Á meyarik si Kuan ta isingan nga maggatang, ta pannawagan na yù nonò na tolay. Á pakaginná naw ngaw sù pangilayalayá ni Kuan, nagayáyá kayu ta mabi. ³⁶ Ngam aijan yù makáwayyá nga mangipakánnámmu ta kuruk yù ubobuk ku, nga yù ira makapállá nga pinagaddátù, nga inipakuá nayù Yámà nikán. Á danniw nga inipakuá ni Ammò nikán yù makáwayyá ánnè sù pangilayalayá ni Kuan. Danniw yù ipanguruk naw ta si Namarò yù Yámà nga naddok nikán.

³⁷ “Á yù Yámà nga naddok nikán, aggina gapay yù mangipakánnámmu sù meyanung nikán. Ngam sikayu, arán naw bulubugá gininná yù ngáral na, á arán naw nasingan. ³⁸ Á arán naw inalawá yù bilin na, ta arán nawá kurugan, nga jinok na. ³⁹ Á gígíámmuan naw yù dán nga netúrâ nga ubobuk ni Namarò, gapu ta kagian naw ta yáyù pakálerán naw sù mannanáyun nga ipakktale naw. Á mássiki uputan naw nga bibbiran dannian nga netúrâ, arán naw tákkilalán ta sikán gemma yù kakágiad da. ⁴⁰ Ngattá, ta manaki kayu manguruk nikán, á sikán yù makáwayyá nga manotolay nikayu ta áddè ta áddè?” kun ni Apu Kesu sù ira Kudio.

⁴¹ Á kinagi na paga ni Apu Kesu sù ira karakalán nga Kudio, “Arák ku aleran yù paddáyo na tolay nikán. ⁴² Ngam ammu gemma yù nonò naw, á ammu ta awán ta ánggiddù naw kâ Namarò. ⁴³ Á minayá nikayu ta pannakabaggi ni Namarò nga Yámà, ngam arán nawá alawatan. Á sangaw nu aijan yù tanakuán nga umay megapu sù ure na lápay, aggina laguk yù alawatan naw. ⁴⁴ Egga panò laguk yù awayyá naw nga manguruk nikán, gapu ta yá galá aleran naw yù paddáyo nayù ira ikáttole naw, ngam manaki kayu mapaluro sù ipakuá ni Namarò nikayu tapè málâ naw yù paddáyo nayù táttádday nga si Namarò?

⁴⁵ “Á arán naw laguk kagian ta sikán yù mangikeká nikayu kâ Namarò nga Yámà. Ari sikán yù mangikeká, nu ari galá si Moyses, nga nangiyawá sù netúratán nga tunung nga iddanamán naw. Si Moyses yù mangikeká nikayu, ta arán naw kurugan yù iníturá na. ⁴⁶ Á nu kinuruk naw nakuan yù iníturá na ngaw ni Moyses, á kurugan nawá gapay nakuan, gapu ta sikán yù kakágian na sù iníturá na. ⁴⁷ Ngam nu arán naw kurugan yù iníturá na, á kunnasi laguk ta manguruk kayu sù kagiak ku nikayu?” kun na.

6

Yù Pamakán ni Apu Kesu ta Límáribu nga Tatolay

Mattiu 14:13-21; Markus 6:30-44; Lukas 9:10-17

¹ Pappasá na danniw, aijan di Apu Kesu ámma yù ira tudduán na nga nanoli ta purubinsia na Galilia. Á ta tádday ággaw, minay ira ta dammáng na Bebay na Galilia, nga manggágan gapay ta Tiberio. ² Á aijan yù ira magaru nga tatolay nga jimínáddán kâ Apu Kesu gapu ta nasingad da yù makapállá nga pinagaddátu na ta pamammapiá na sù ira máttaki.

³ Á pakáddè di Apu Kesu ámma yù ira tudduán na ta dammáng, giminon ira ta puddul, á nagitubang ira tán. ⁴ Á maddagunin yù piestá na Kudio nga panaddamád da ta pattalebák nayù daroban ni Namarò.

⁵ Á pagitubang da, neripá ni Apu Kesu yù ira magaru nga tatolay nga mappángè nira. Á iniyabbù na laguk kâ Pilippi, “Sisaw yù pangápát tam ta ipamakát tam sawe ira magaru nga tatolay?” kun na. ⁶ Á dán nga ammu ni Apu Kesu yù akkuán na sangaw, ngam yáyù iniyabbù na kâ Pilippi, tapè mepasingan nakuan yù pangikatalá ni Pilippi kuna. ⁷ Á kinagi ni Pilippi kuna, “Á kunnasi laguk, Apu, ta napakáru ira. Á mássiki nu pígiá yù kuártu nga igátáng tam nakuan, á makúrang paga yù ipamakát tam sù ira tatolay, mássiki nu isinek tam ta ággibaddi nira,” kun na.

⁸ Á si Andares yù tádday sù ira makituddu kâ Apu Kesu, nga wagi ni Simon Eduru. Á simibbák si Andares, á kinagi na kâ Apu Kesu, ⁹ “Ajjan saw yù abbing nga egga kuna yù bálun na nga límá bullung nga pán ána duá nga baddi nga sirá. Ngam pigiá lâ kapúnu na yian sù ira magari nga tatolay?” kun na.

¹⁰ Á kinagi na laguk ni Apu Kesu nira, “Pagitubangan naw ira bi,” kun na. Á nagitubang ira laguk, gapu ta aláwa yù kakáddapán. Á límáribu támma yù biláng da nga lálláki, nu ari nebiláng yù ira bábbay ána ábbing ira. ¹¹ Á iná na laguk ni Apu Kesu yù bálun nayù abbing. Á nakimállà kâ Namarò megapu sù iniyawâ na nga pán ána sirá, á inipesinek na yù pán. Á nallabbuk yù pán ta pangisinek da sù ira tatolay. Á ta kunnay gapay sù sirá, ta iniddád da ira ta gustu ra nga kanan. ¹² Á kiminán ira ta áddè ta kabattuk da. Á kabalid da kiminán, kinagi ni Apu Kesu sù ira tudduán na, “Unnuran naw yù buná ra, tapè ari metabbà,” kun na. ¹³ Á inunnuk da laguk yù buná ra, á mapulu duá yù lappi nga napannu sù buná ra.

¹⁴ Á pakasingan yù ira tatolay sawe pinagaddátu ni Apu Kesu, napállá ira, á kinagi ra, “Aggina gemma yù ábbilinán ni Namarò nga initabbá na ngaw nga umay ta dabbuno!” kud da. ¹⁵ Á natagená ni Apu Kesu yù nonò da, ta gaputad da nakuan nga puersán nga mappatul nira. Á yáyù nga nánaw nga naguroray nga giminon ta puddul.

Yù Pallakák ni Apu Kesu ta Utun na Danum
Mattiu 14:22-33; Markus 6:45-52

¹⁶ Á ta pajjibbá, minutù yù ira tudduán ni Apu Kesu ta aggik na bebay. ¹⁷ Á gapu ta gabingin ána awán paga si Apu Kesu nira, nappittá ira ta barangay, ta dumáki ira ta dammáng, nga manoli ta ili na Kapernium. ¹⁸ Á pattake ra ta barangay, jimittál yù masikan nga paddák, á nappalalalung yù danum. ¹⁹ Á pangilápák da sù barangay, annam nga kilometro támma yù kárayu ra ta aggik. Á nasingad da si Apu Kesu nga mallakalakák sù utun na danum nga umay sù barange ra. Á nepallá yù assing da. ²⁰ Ngam kinagi ni Apu Kesu nira, “Sikán yaw. Ari kayu maganássing,” kun na. ²¹ Á ayatán ira nga namattakay kuna ta barangay, á dagarágá ira nga nakáddè ta aggik.

Si Apu Kesu yù Manotolay nga Meyárik ta Kanan na Tolay

²² Á sù tádday ággaw, naggián lâ paga yù ira magari nga tatolay nga nabattáng ta dammáng, nga magiddak kâ Apu Kesu. Ta nasingad da yù páno nayù ira tudduán ni Apu Kesu sù táttádday nga barangay nga ajjan tán, ána ari nepattakay si Apu Kesu nira. Á yáyù nga iniddagád da lâ paga. ²³ Á ta pannawák, aru yù ira barangay nga jimínung nga naggapu ta Tiberio. Aranni yù áddungád da sù nakkákanán nayù ira tatolay ta pán ta kabalín ni Apu Kesu nabbalabála kâ Namarò. ²⁴ Á pakánnámmu nayù ira tatolay ta awán lâ awán si Apu Kesu ána yù ira tudduán na, á nakipattakay ira laguk sù ira barangay nga naddagá tán, ta ed da aleran si Apu Kesu ta Kapernium.

²⁵ Á pakáddè nayù ira tatolay ta dammáng na bebay, nálek da si Apu Kesu. Á pakálek da kuna, kinagi ra, “Mesturu, káni yù ángem saw?” kud da. ²⁶ Á simibbák si Apu Kesu, á kinagi na nira, “Kukurugán nga kuruk yù kagiak ku nikayu. Ari yá ipagalek naw níkan, gapu ta nasingan naw ána kánnámmuán naw yù kebalínán nayù makapállá nga pinagaddátù ta arubáng naw. Ngam yá lâ ipagalek naw níkan yù kabattuk naw ta pán. ²⁷ Ari kayu nakuan mabbannabannák nga magala-alek sù kanan nga mabi malabbak. Aleran naw galá yù tanakuán nga ákkatole naw nga mannanáyun, tapè mepattolay kayu kâ Namarò ta áddè ta áddè. Á sikán nga Kaká na ngámin na tatolay yù mangiyawâ sù ákkatole naw nga mannanáyun, ta sikán yù neddán ni Namarò nga Yámà sù pakáwayyâ,” kun ni Apu Kesu nira.

²⁸ Á yáyù nga iniyabbú da laguk kâ Apu Kesu, “Anni nakuan yù akkuám mi, tapè tuppálam mi yù ipakuá ni Namarò níkami?” kud da. ²⁹ Á simibbák si Apu Kesu, á kinagi na nira, “Yawe lâ yù ipakuá ni Namarò níkayu, ta ikatalá nawâ, ta sikán yù jinok na saw,” kun na. ³⁰ Á pakaginná ra karannian, kinagi ra kuna, “Á anni laguk yù makapállá nga ipasingam mu níkami, tapè manguruk kami níkaw? Anni laguk yù akkuám mu?” ³¹ Yù ira ngaw naggaká nittam, gári ta keggá ra ta kalállammatán, kinád da yù inipamakán na nira ni Láky Moses nga mangngágan ta manna, ta ajjan yù netúrâ nga, ‘Iniyawâ na nira yù kanad da nga naggapu ta lángi,’ ”* kud da kâ Apu Kesu.

³² Á kinagi ni Apu Kesu nira, “Kurugán nga kuruk yù kagiak ku níkayu. Tanakuán yù manna nga iniyawâ ni Moyses, nga ari yù kanan nga ubobugak ku. Yù Yámà yù mangiyawâ

* 6:31 Exodo 16:4; Salmo 78:24

nikayu sù kuruk nga kanan nga ubobugak ku, nga maggapu ta lángi. ³³ Á yù kuruk nga kanan nga iyawâ ni Namarò nga maggapu ta lángi yù umay saw dabbuno nga manotolay ta tolay,” kun ni Apu Kesu. ³⁴ Á kinagi ra kuna, “Apu, ta keggá mi nga matolay ta utun na dabbun, sigidá iddák kami ngè sawe kanan,” kud da.

³⁵ Á kinagi ni Apu Kesu nira, “Sikán yù ubobugak ku nga kanan nga maggapu ta lángi. Sikán yù manotolay. Á yù ira nga umay makituddu ána mangikatalà níkan, ari iren kun na mabisin ána mapangál, á ari iren bulubugá magala-alek. ³⁶ Ngam sikayu, máwák nga kagiak ku lá má yù kinagi nikayu, ta mássiki nu masingan nawà, awán galá ta ángnguruk naw níkan.

³⁷ “Ngam yù ira ngámin nga iyawâ nayù Yámà níkan, aggira yù umay mesipà níkan. Á alawatak ku yù ngámin ira nga umay makituddu níkan, nga arák ku bulubugá papanáwan. ³⁸ Á yá iniyangè saw nga maggapu ta lángi, ta arák ku tuppálan yù urè, nu ari galá yù ngámin nga ure nayù Yámà nga naddok níkan. ³⁹ Á yawe yù ure nayù naddok níkan, ta ásigurák ku yù ira ngámin nga tatolay nga iniyawâ na níkan, tapè awán bulubugá ta meyawáwan, ngam paginnanolayak ku ira galá ta panguriánán nga ággaw, tapè mepattolay ira kâ Namarò. ⁴⁰ Ta yáyù ure nayù Yámà, ta aggira ngámin nga makituddu ána mangikatalà níkan nga Anâ na, aggira mannanáyun nga mepattolay kuna ta áddè ta áddè. Á sikán yù mamaginnanolay nira ta panguriánán nga ággaw.”

⁴¹ Á ta pakaginná nayù ira Kudio sù kinagi ni Apu Kesu, nga aggina yù kanan nga naggapu ta lángi, naddagaragim ira. ⁴² Á kinagi ra, “Ari panò aggina si Kesu nga anâ di Kusè, ta ammu tam gemma di ammò na kâ innò na!” kud da. “Á ngattá laguk, ta kagian na ta naggapu ta lángi?” kud da.

⁴³ Á simibbák si Apu Kesu, á kinagi na nira, “Mattukkâ kayin nga maddagaragim. ⁴⁴ Awán ta umay makituddu níkan nu arán na agálán nayù Yámà nga naddok níkan, á paginnanolayak ku ta panguriánán nga ággaw. ⁴⁵ Ajjan yù neturá nga inipeturá ni Namarò sù ira ngaw ábbilinán na, nga kunniaw:

‘Aggira ngámin nga tatolay yù tudduán ni Namarò.’†

Á ngámin ira nga magginná ána manguruk sù ituddu nayù Yámà, aggira yù umay mangikatalà níkan.

⁴⁶ “Á arák ku kagian ta nasingan na tolay si Namarò nga Yámà. Awán gemma ta nakasingan kâ Namarò nga Yámà, nu ari galá sikán nga Anâ na nga naggapu ta gián na. ⁴⁷ Á kukurugán nga kuruk yù kagiak ku nikayu, ta mannanáyun nga mepattolay kâ Namarò yù ira nga mangikatalà níkan.

⁴⁸ “Sikán yù áttotole na tolay. Sikán yù manotolay, á yá keyarigák ku yù kanan na tolay. ⁴⁹ Á yù ngaw ira naggaká nikayu, mássiki nu kinád da yù ngaw kanan nga manna, ta pallakalakák da túrin ta kalállammátán, ngam natay ira galá. ⁵⁰ Ngam yù kanan nga ubobugak ku, yáyù yù maggapu ta lángi nga umay saw, tapè ajjan yù awayyá na tolay nga kumán kuna, ána ari matay. ⁵¹ Sikán yawe kanan nga maggapu ta lángi. Nu kumán yù tolay sawe kanan nga ubobugak ku, mannanáyun nga mepattolay kâ Namarò ta áddè ta áddè. Á yù kanan nga iyawâ ku, yáyù yù baggi, nga metapil tapè matolay yù ira tatolay,” kun ni Apu Kesu.

⁵² Á pakaginná nayù ira Kudio sù ubobuk ni Apu Kesu, makkakápereperang ira ta ubobuk, á kinagi ra, “Kunnasi panò yù ángngipakán na ta baggi na nittam, nga ari gemma makán?” kud da. ⁵³ Á yáyù nga kumán ni Apu Kesu nira, “Kukurugán nga kuruk yù kagiak ku nikayu. Sikán nga Kaká na ngámin na tatolay, á ta ángngarigán, nu arán naw kanan yù baggi ána arán naw inuman yù dágà, awán bulubugá ta áttole naw. ⁵⁴ Ngam yù ira ngámin nga kumán ta baggi ána ámminum ta dágà, mannanáyun nga mepattolay ira kâ Namarò ta áddè ta áddè, á paginnanolayak ku ira ta panguriánán nga ággaw. ⁵⁵ Ta kuruk nga kanan yù baggi, ána kuruk nga inuman yù dágà.

⁵⁶ “Á yù tolay nga kumán ta baggi ána ámminum ta dágà, aggina yù mepaggián níkan, á sikán gapay yù mepaggián kuna. ⁵⁷ Á yù Yámà nga naddok níkan, aggina yù sigga-inàngá nga manotolay, nga paggapuán nayù áttolè. Á yáyù nga matolayá megapu kuna. Á kunnian gapay sù ira ngámin nga kumán ta baggi, matolay ira megapu níkan. ⁵⁸ Ta sikán yù kanan nga naggapu ta lángi, nga dumá sù ngaw kinán nayù ira naggaká nittam, ta mássiki nu kinád da, ngam natay ira galá. Ngam yù ira ngámin nga kumán sawe kanan nga ubobugak ku, mannanáyun ira nga mepattolay kâ Namarò ta áddè ta áddè.”

† 6:45 Isaya 54:13

⁵⁹ Yáyù kinagi ni Apu Kesu sù pangituddu na ta ággagammungán na Kudio ta ili na Kapernium.

Yù Meyannung sù Áttolay nga Awán ta Áddè na

⁶⁰ Á ta pakaginná nayù ira siminuttul ká Apu Kesu sù kinagi na, aru yù ira nga manakì sù kinagi na. Á naddagaragim ira, á kinagi ra, “Jikkù yù kagian na. Egga panò yù manguruk sù kagian na?” kud da. ⁶¹ Á mássiki nu awán ta nakkagi ká Apu Kesu, ngam ammu na lápáy ta maddagaragim ira. Á yáyù nga kinagi na nira, “Ngattá, ta manakì kayu sù kagiak ku?” ⁶² Á anni laguk yù kagian naw sangaw nu masingan nawà nga umay ta lángi, nga manoli ta gián nga naggapuák ku? ⁶³ Yù Ikararuá ni Namarò yù manotolay ta tolay. Á yù sikan na baggi na tolay ána yù pakáwayyá na, awán ta serbi ra. Yù bilin ni Namarò nga kinagi nikayu, yáyù yù manotolay nikayu ta áddè ta áddè megapu sù Ikararuá ni Namarò. ⁶⁴ Ngam aijan nikayu yù ira nga ari manguruk,” kun na. Yáyù kinagi ni Apu Kesu nira, gapu ta áddè ngaw, dán nga ammu ni Apu Kesu yù ira nga ari manguruk kuna ána yù tádday nga mappagápù kuna. ⁶⁵ Á kinagi na laguk ni Apu Kesu nira, “Yáyù gapu na nga kinagi nikayu ta awán ta umay manguruk nikán nu arán na iyawá nayù Yámà nira yù ángnguruk da,” kun na.

⁶⁶ Á gapu ta panakì da sù ubobuk ni Apu Kesu, aru yù ira nalurá nga siminuttul kuna, á nánaw ira nga aringin nepulupulù kuna. ⁶⁷ Á kinagi ni Apu Kesu sù ira mapulu duá nga sinudduán na, “Á sikayu, ikáyá naw nga mánaw gapay?” kun na. ⁶⁸ Á simibbák si Simon Eduru, á kinagi na, “Apu, asinni paga panò dumá nga pakiyápuám mi nakuan? Ta sikaw lá yù makáwayyá nga mangipakánnámmu sù ubobuk ni Namarò nga manotolay ta tolay ta áddè ta áddè. ⁶⁹ Á kuruk nga manguruk kami nikaw, ána ammu mingin ta kuruk nga sikaw yù Mangilin nga jinok ni Namarò,” kun ni Eduru.

⁷⁰ Á pakkagi ni Eduru karannian, simibbák si Apu Kesu nira, á kinagi na, “Ari panò sikayu yù mapulu duá nga piníli? Sikayu gemma, ngam aijan nikayu yù tádday nga nagunagi ni Satanas.” ⁷¹ Yáyù kinagi ni Apu Kesu ta meyannung ká Kudas, nga aná ni Simon Iskariote, ta nebiláng sù ira mapulu duá nga sinudduán na, ngam aggina yù mangipagápù kuna.

7

Yù ira Wáwwagi ni Apu Kesu nga ari Manguruk kuna

¹ Á ta kabalín na yaw, naddagá si Apu Kesu nga nangituddu sù ira ili ána babálay sù purubinsia na Galilia, ta molang na umay ta Judiya, gapu ta inigagánge ra papatáyan nayù ira karakalán nga Kudio tán. ² Á maddaggun yù piestá na Kudio nga mangngágan ta Piestá na Amíngán. ³ Á yù ira wáwwagi ni Apu Kesu, kinagi ra kuna, “Ngattá, ta maggián ka saw? Napiá nu mánaw ka nga umay ta Judiya, tapè masingan nayù makituddu nikaw yù akka-akkuám mu. ⁴ Ta yù tolay nga ikáyá na nga meparámak, arán na gemma ilímak yù akkuán na. Umay ka laguk ta dakal nga ili, tapè mepasingan sù ira ngámin nga tatolay yù makapállá nga akka-akkuám mu.” Yáyù kinagi nayù ira wáwwagi ni Apu Kesu. ⁵ Ta mássiki yù ira wáwwagi na, ari ira paga manguruk kuna.

⁶ Á kinagi ni Apu Kesu nira, “Ari paga jimittál yù oras nga pappásingak ku ta ili na Jerusalem. Ngam sikayu, maguray lá nga ággaw yù pappasingan naw. ⁷ Ta ari sikayu yù ikalusso nayù ira tatolay nga ari manguruk ká Namarò. Ngam sikán, ikalusso rangá, gapu ta sikán yù makkagi nira ta narákè yù akka-akkuád da. ⁸ Umay kayu lápáy, ta aringá lábbi umay, gapu ta ari paga oras nga pappásingak ku,” kun na. ⁹ Á ta pakkagi na karannian, nabbattáng lábbi ta Galilia.

Yù Pakipiestá ni Apu Kesu ta Ili na Jerusalem

¹⁰ Á ta páno nayù ira wáwwagi ni Apu Kesu nga minay nakipiestá ta Jerusalem, minay gapay nakipiestá si Apu Kesu, nga naguroray nga awán ta kepulután na, tapè ari mappasingan. ¹¹ Á yù ira karakalán na Kudio, ala-alerad da si Apu Kesu ta áppiéstán. Á iniyabbù da sù ira kábulud da, “Sisaw gián na?” kud da. ¹² Á magaru yù ira tatolay nga makipiestá, á nakkaká-anasá ira ta meyannung ká Apu Kesu. “Aggína yù napiá nga tolay,” kun nayù ira káruán. Á “Ari,” kud da gapay nayù ira káruán, “ta ilogò na yù ira tatolay,” kud da. ¹³ Ngam arád da lá ipágginná yù ubobuk da nga meyannung kuna, gapu ta ikássing da sù ira karakalán na Kudio.

¹⁴ Á pattangngá nayù piestá, minay si Apu Kesu sù mangilin nga kapillíá, nga nangituddu sù ira tatolay nga aijan tán. ¹⁵ Á napállá yù ira karakalán na Kudio sù pangituddu na, á kinagi ra, “Ari bulubugá naggigiámmu yane tolay! Á kunnasi laguk ta napakáru yù kánnámmuán na?” kud da.

¹⁶ Á yáyù nga simibbák si Apu Kesu, á kinagi na nira, “Yawe nga ituddù, ari nga maggapu sù nonò ku, ngam maggapu galá sù nonò nayù naddok níkán. ¹⁷ Á nu italákkuruk nayù tolay nga manuppál sù ipakuá ni Namarò kuna, kánnámmuán na nu si Namarò yù paggapuán nayù ituddù, onu maggapu galá ta nonò ku. ¹⁸ Á nu ubobugan na tolay yù uru-ure na lápay, yá lá ikáyá na yù keparáyò na. Ngam yù tolay nga ikáyá na ta meparáyaw yù naddok kuna, á kuruk ngámin yù kagian na, nga awán bulubugá ta siri na,” kun ni Apu Kesu.

¹⁹ Á kinagi na paga sù ira karakalán na Kudío, “Á ari panò sikayu yù iniddán na ngaw ni Moyses sù tunung ni Namarò? Ngam awán nikayu ta mamalurò sù tunung. Ngattá, ta igagánge nawà papatáyán?” kun ni Apu Kesu nira. ²⁰ Á simibbák yù ira magari, á kinagi ra kuna, “Maguyung ka! Asinni panò mangigagángay nga mamapátay níkaw?” kud da. ²¹ Á simibbák si Apu Kesu, á kinagi na nira, “Táddy lá yù pinagaddátu sù ággaw nga ággibannák, ta pinammapiá yù tolay nga nataki, á mapállá kayu. ²² Ngam sikayu, palurotan naw yù pakkugi naw sù ira áná naw ta mekawala nga ággo ra, mássiki nu Sabadu nga ággibannák, gapu ta yáyù inittuddu na ngaw ni Moyses nikayu. Ngam ari gemma si Moyses yù naggapuán nayù kustombare, nu ari galá yù ira ngaw naggaká nittam. ²³ Á nu ángngarigán ta mabigarán yù baggi na tolay sù ággaw nga ággibannák tapè mapaluro sù tunung ni Moyses nga meyanung ta pakkugi na, ngattá laguk, ta mapporay kayu níkán nu pammapiák ku yù mataki sù ággaw nga ággibannák? ²⁴ Nu mamanunnù kayu, arán naw nakuan panunnután ta meyanung ta ánninganán naw, nu arán naw bi iyabbù ta olu yù meyanung ta kuruk, tapè kánnámmuán naw, áanna matunung yù ámmannunnù naw,” kun ni Apu Kesu nira.

Ari panò si Apu Kesu yù MakKiristu?

²⁵ Á yù ira tatolay ta Jerusalem, nakkaká-ubobuk ira laguk, á kinagi nayù ira káruán, “Ari panò aggina yù ala-alerad da, nga ikáyá da papatáyán? ²⁶ Á innan nawè! Ajjanin nga magubobuk ta arubáng na ngámin na tatolay, ngam awán ta mamattukká kuna! Ammu ra panò ta kuruk nga aggina yù MakKiristu nga umay mammaguray nittam nga Israel? ²⁷ Ngam ari támma, ta ammu tam gemma yù naggapuán na, á nu duttál yù kuruk nga MakKiristu, awán ta makánámmu sù paggapuán na,” kud da.

²⁸ Á ta pangittuddu ni Apu Kesu paga sù mangilin nga kapilliá, inikáddagá na laguk iniyássikan yù ubobuk na, á kinagi na sù ira tatolay, “Ammu nawà panò? Á ammu naw panò yù naggapuák ku? Ngam ari nga sikán yù maká-uray ta ángè saw, nu ari galá si Namarò yù naddok níkán. Aggina yù kuruk nga napiá, á kuruk ngámin yù kagian na. Á aggina gapay arán naw ammu. ²⁹ Ngam sikán, ammu gemma, ta aggina yù naggapuák ku, á aggina yù naddok níkán,” kun ni Apu Kesu.

³⁰ Á ta pakaginná nayù ira karakalán na Kudío sù kinagi ni Apu Kesu, ikáyá da gaputan. Ngam awán ta maggápù kuna, gapu ta ari paga yaw yù oras nga sinullá ni Namarò nga paggápù da kuna. ³¹ Ngam aru yù ira tatolay nga nanguruk kuna. Á kinagi ra, “Egga panò yù tanakuán nga MakKiristu nga iddagát tam? Á nu ángngarigán ta duttál nakuan yù tanakuán nga MakKiristu, makapagaddátu panò ta makapállá ánnè karanniaewa nga pinagaddátu na? Awán!” kud da.

Jinok da yù ira Magguárdiá ta Maggápù kâ Apu Kesu

³² Á pakaginná nayù ira Parisio sù kagakagian nayù ira tatolay ta meyanung kâ Apu Kesu, dagarágá nga nattatáddy ira sù ira kátannangán nga pári, á jinok da yù ira magguárdiá sù mangilin nga kapilliá, ta ed da gaputan si Apu Kesu. ³³ Á kinagi na laguk ni Apu Kesu sù ira tatolay, “Makipaggiáná lábbi paga ta baddi nikayu, ta maddaggunakin mánaw nga manoli sù naddok níkán. ³⁴ Á sangaw nu awánakin saw, ala-aleran nawá, ngam arán nawá málek, ta ari kayu makángay sù giák ku,” kun ni Apu Kesu nira.

³⁵ Á pakaginná nayù ira karakalán na Kudío sù kinagi na, nakkaká-ubobuk ira, á kinagi ra, “Sisaw panò angayán na nga arát tam pakángayán? Umay panò sù ira ikáttote tam nga makipaggián ta arayyu nga lugár sù ira nga ari Kudío, tapè tudduán na gapay yù ira nga ari Kudío?” kud da. ³⁶ “Anni panò yaw nga kagian na, nga alerát tam, ngam arát tam málek áanna ari ittam makángay sù angayán na? Anni panò yù kebalinán na?” kud da.

Yù Kebalinán nayù Danum nga Manotolay

³⁷ Á ta kaporianán nga ággo nayù piestá, nga nagingá nga ággaw, nanáddak si Apu Kesu ta arubáng nayù ira tatolay, á iniyássikan na yù ubobuk na, á kinagi na, “Nu egga yù tolay nga mapangál, umay laguk níkán, tapè penumak ku. ³⁸ Ta aijan yù neturá sù bilin ni Namarò nga kunniaw: Yù tolay nga mangikatalá níkán, aijan yù kun na wek nga mallatuá nga

maggapu ta nonò na, nga manotolay ta áddè ta áddè,'**^{*} kun ni Apu Kesu. ³⁹ Á yawe nga wek nga inubobuk ni Apu Kesu, yá kebalinán na yù Ikararuá ni Namarò nga alawatad da sangaw nayù ira nga mangikatalá kuna. Ta ari paga neyawâ yù Ikararuá ni Namarò, gapu ta ari paga jimittál yù pangiparâyo ni Namarò kâ Apu Kesu ta panoli na ta lángi.

Naddurú má yù Nonò nayù ira Tatolay ta Meyannung kâ Apu Kesu

⁴⁰ Á ta pakaginná nayù ira tatolay sawe nga kinagi ni Apu Kesu, kinagi nayù ira káruán, “Yawe tolay yù kuruk nga ábbilinán ni Namarò nga iddi-iddagát tam,” kud da. ⁴¹ Á yù ira káruán, kinagi ra, “Aggina gemma yù MakKiristu nga jinok ni Namarò ta mammaguray nittam,” kud da. “Ari,” kun nayù ira káruán, “ta taga Galilia gemma, á Galilia panò yù paggapuán nayù MakKiristu?” ⁴² Ari panò netúrâ sù dán nga bilin ni Namarò ta yù MakKiristu yù ginaká nayù ngaw Patul Dabid, ána Betlekem yù keyanatán na, nga ili ni Patul Dabid?” kud da. ⁴³ Á yáyù nga ari tangapareku yù nonò nayù ira tatolay ta meyanung kâ Apu Kesu. ⁴⁴ Á yù ira káruán, ikáyâ da nakuan gaputan, ngam awán paga bulubugá ta maggápù kuna.

Ari Manguruk yù ira Karakalán na Kudio

⁴⁵ Á nanoli laguk yù ira magguárdiá sù ira naddok nira nga Parisio ána yù ira kátannangán nga pári. Á kinagi nayù ira Parisio nira, “Ngattá, ta arán naw ginápù, nga iyánge naw nakuan saw?” kud da. ⁴⁶ Á simibbák yù ira magguárdiá, á kinagi ra nira, “Awán ta tolay nga magubobuk ta kunnay sù ággubobuk na! Awán bulubugá ta kagittá na nga mangituddu!” kud da.

⁴⁷ Á kinagi nayù ira Parisio nira, “Nelogò kayu gapay ngam! ⁴⁸ Egga panò nikami nga karakalán ána yù ira Parisio yù manguruk kuna, mássiki nu táddy? Awán. ⁴⁹ Danniaw ira nga magaru nga tumuttul kuna, ari ira naggigiámmu, á arád da ammu yù tunung ni Moyses, á yáyù nga mokum ira laguk,” kud da.

⁵⁰ Á aijan gapay nira si Nikudemu, nga Parisio gapay, nga minay ngaw kâ Apu Kesu ta tangngá na gabi. Á pakaginná ni Nikudemu sù kinagi nayù ira kábulun na nga Parisio, simibbák, á kinagi na nira, ⁵¹ “Nu kurugat tam yù tunung ni Moyses, arát tam nakuan panunntán ána pagikaruan yù tolay, nu arát tam bì olu nga ginnán yù kagian na, tapè ammu tam yù akka-akkuán na,” kun na.

⁵² Á simibbák yù ira kábulun ni Nikudemu, á kinagi ra kuna, “Taga Galilia ka panò gapay?” kud da. “Bibbiram mu laguk ta napiá yù dán nga netúrâ nga ubobuk ni Namarò, tapè kánámmuám mu gapay ta awán bulubugá ta ábbilinán ni Namarò nga duttál nga maggapu ta Galilia,” kud da. ⁵³ Á kabalid da nagubobuk, nallalabbè ira nga katágitáddy ta bale na.

8

Yù Babay nga Makikarallaw

¹ Ta páno nayù ira Parisio ána yù ira karakalán na Kudio sù mangilin nga kapilliá, nánaw gapay si Apu Kesu nga minay ta puddul na Olibo. ² Á ta alippánawák, nanoli si Apu Kesu sù mangilin nga kapilliá. Á minay nga naggagammung yù magaru nga tatolay, á nagarimumungád da si Apu Kesu. Á nagitubang si Apu Kesu nga nangituddu nira.

³ Á ta pangituddu ni Apu Kesu nira, minay yù ira mesturu ta tunung na Kudio ána yù ira nga Parisio, á iniyánge ra kuna yù babay nga ginápù da gapu ta narángnganád da nga nakiruruk sù arán na atáwa. Á iniyarubáng da yù babay sù ira tatolay. ⁴ “Mesturu,” kud da kâ Apu Kesu, “narángnganam mi yawe babay nga nakiruruk sù arán na atáwa. ⁵ Á aijan netúrâ sù tunung tam yù kinagi ni Moyses nga meyanung sù pamagikáru tam sù kunnaiw nga babay, ta payapayangat tam nakuan ta batu, tapè matay. Á sikaw, anni laguk yù urem kuna?” kud da. ⁶ Yáyù kinagi ra kâ Apu Kesu, gapu ta parubád da, ta ikáyâ da nu aijan nakuan yù ipamaliwá da kuna nga meyanung sù itabbák na nira. Ta nu kagian na nakuan ta arád da papatáyan, kontarán na yù tunung ni Moyses. Ngam nu kagian na nakuan ta palurotad da yù tunung ni Moyses, á mekontará laguk sù tunung nayù patul nga taga Roma. Á yáyù nga maguray lâ yù itabbák na, yáyù ipangikeká ra kuna. Á nakkummak lâ si Apu Kesu, á nattúrâ ta amassisiddu na ta dabbun.

⁷ Á gapu ta mangupù ira nga mangiyabbù kuna, á gimikkáng si Apu Kesu, á kinagi na nira, “Yù tolay nikayu nga awán bulubugá ta liwá na, aggina yù olu nga mamayang sù babay,” kun na. ⁸ Á nagitubang nga nakkummak má, nga nangupù nga nattúrâ ta amassisiddu na ta dabbun. ⁹ Á ta pakaginná ra sù kinagi na, nappasirán ira ngámin, á nassisínù ira nga

* 7:38 Isaya 58:11

nánaw. Napopolu yù kalakalákayád da, á jimináddán ira ngámin. Á nabattáng lâ si Apu Kesu ána yù babay. ¹⁰ Á sinánguk na laguk ni Apu Kesu yù babay, á kinagi na kuna, “Sisaw ine ra? Awán panò ta mamayang níkaw ta batu?” ¹¹ “Awánin, Apu. Nánaw iren,” kun nayù babay. Á kinagi ni Apu Kesu kuna, “Á síkán gapay, arát taka pagikaruan. Mánaw ken laguk, ngam arám mu ngin pidduán yù malliwá,” kun ni Apu Kesu kuna.

Si Apu Kesu yù Mamannawák ta Nonò na Tolay

¹² Á manganánuán, ta pangituddu na mángin ni Apu Kesu sù ira magari nga tatolay, kinagi na nira, “Síkán yù meyárik ta nawák, ta síkán yù mamannawák ta nonò na tolal. Á yù tolal nga umay makituddu níkán, ari bulubugá magawáwán nga kunnay sù mallakák ta gabi nga awán ta tulu na, nga makkarakarará sù kallá. Ta síkán yù mepulù kuna, síkán nga mamannawák ána manotolay ta áddè ta áddè,” kun ni Apu Kesu.

¹³ Á ta pakaginná nayù ira Parisio sù kinagi ni Apu Kesu nga meyanung ta baggi na, kinagi ra kuna, “Awán gemma ta manguruk níkaw, ta táttádday ka lápay nga makkagi ta meyanung ta baggin. Á yáyù nga ari kuruk yù kagiam mu,” kud da kuna. ¹⁴ Á simibbák si Apu Kesu, á kinagi na nira, “Mássi ki nu síkán lápay yù makkagi, á kuruk yù kagiak ku gapu ta ammu yù naggapuák ku ána yù angayák ku. Ngam sikayu, arán naw gemma ammu yù naggapuák ku ána yù angayák ku. ¹⁵ Á sikayu, nu mamanunnù kayu, á kunnay ta ánnanganán na tolal yù ámmanunnù naw. Ngam síkán, awán ta panunnuták ku. ¹⁶ Á ta ángngarigán nu síkán yù mamanunnù, matunung yù ámmanunnù ku, ta aringá maguroray nga mamanunnù, nu ari galá sikami nga duá ká Yámà nga naddok níkán. ¹⁷ Á ajjan yù netúrâ sù tunung naw, ta nu egga duá nga naggittá yù kagiad da, á kuruk laguk yù kagiad da. ¹⁸ Á kunnian gemma níkami, ta duá kami nga makkagi ta meyanung níkán, ta síkán yù tádday, á yù mekaruá yù Yámà nga naddok níkán,” kun ni Apu Kesu nira.

¹⁹ Á yáyù nga kinagi nayù ira Parisio ká Apu Kesu, “Sisaw gián nayù yámam?” kud da. Á simibbák si Apu Kesu, á kinagi na nira, “Arán naw kami ammu, sikami ána yù Yámà. Nu ammu nawá, ammu nawin gapay nakuan yù Yámà,” kun na. ²⁰ Yáyù kinagi ni Apu Kesu ta pangituddu na sù mangilin nga kapillíá, sù lágum nga ággianán nayù kakon nga pangipayyád da ta kuártu nga inilimù nayù ira tatolay. Ngam awán ta minay naggápù kuna, gapu ta arán na paga oras nga kagápù na nga sinullá ni Namaró.

Awán ta Makángay sù Angayán ni Apu Kesu

²¹ Á manganánuán, pidduán na nakkagi ni Apu Kesu sù kinagi na nira, “Mánawakin sangaw, á ala-aleran nawá, ngam arán nawá málek, ta matay kayu nga ari paga napakomá yù liwá naw. Á yáyù nga ari kayu makángay sù angayák ku,” kun na. ²² Á yáyù nga nakkaká-ubobuk yù ira karakalán na Kudío, á kinagi ra, “Anni panò yù kagian na nga ari ittam makángay sù angayán na? Papatáyan na panò sangaw yù baggi na?” kud da. ²³ Á kinagi ni Apu Kesu nira, “Sikayu, taga dabbuno kayu, á nonopan naw lâ yù egga ta dabbuno. Ngam síkán, túrin ta lángi yù naggapuák ku, á yáyù nga nonopak ku ána ubobugak ku yù meyanung ta lángi. ²⁴ Á yáyù nga kinagi níkayu ta matay kayu nga ari paga napakomá yù liwá naw, ta nu arán naw kurugan yù kinagi nga síkán gemma, á sangaw nu matay kayu, maggián níkayu yù ikáru naw nga liwá, á mesinná kayu ká Namaró ta áddè ta áddè,” kun ni Apu Kesu nira.

²⁵ Á yáyù nga iniyabbù nayù ira karakalán nga Kudío ká Apu Kesu, “Á sikaw, asinni ka laguk?” kud da. Á kinagi ni Apu Kesu nira, “Síkán pá gemma aggina nga kinagi níkayu áddè ngaw pamegapu na pangituddù. ²⁶ Á aru paga yù kagiak ku nakuan níkayu nga meyanung sù akka-akkuán naw nga narákè, ána aru yù ágganguá naw nga panunnuták ku nakuan. Ngam yá lâ kagiak ku sù ira tatolay sawe dabbuno yù naginná nga kinagi nayù naddok níkán, á kuruk gemma yù ngámin nga kagian na,” kun ni Apu Kesu nira. ²⁷ Ngam arád da nánnámuán ta si Namaró yù ubobugan na, nga Yáma na.

²⁸ Á yáyù nga kinagi ni Apu Kesu nira, “Sangaw nu ipotun nawá ta kurù, nga Kaká na ngámin na tatolay, á yáyù pakánnámuán naw ta síkán gemma. Á kánnámuán naw gapay ta awán ta akkuák ku megapu sù urè, ngam ubobugak ku galá yù inituddu nayù Yámà níkán. ²⁹ Á mannanáyun nga mepulù níkán yù Yámà nga naddok níkán. Arán nangá bulubugá pagurorayan, ta akkuák ku lâ yù ipakuá na níkán,” kun ni Apu Kesu nira. ³⁰ Á pagubobuk na karanniaw, aru yù ira tatolay nga nanguruk kuna.

Yù Kuruk nga Bilin ni Namaró yù Mamalubbáng sù ira Makiaripan ta Liwá

³¹ Á kinagi na laguk ni Apu Kesu sù ira Kudío nga nanguruk kuna, “Nu uputan naw yù panguruk naw sù ituddù níkayu, á sikayu yù kuruk nga makituddu níkán. ³² Á

ipakánnámmù nikayu yù kuruk nga maggapu kâ Namarò, tapè mapalubbáng kayu sù mangaripan nikayu,” kun ni Apu Kesu nira.

³³ Á simibbák ira, á kinagi ra kuna, “Sikami yù ginaká ni Kákay Abrakam! Awán bulubugá ta mangaripan nikami áddè ngaw ta áddè kunangane! Ngattá, ta kagiam mu nikami ta mapalubbáng kami sù mangaripan nikami?” kud da. ³⁴ Á simibbák si Apu Kesu nira, á kinagi na, “Kukurugán nga kuruk yù kagiak ku nikayu. Ngámin yù ira malliwá, aripanan na ira na liwá. ³⁵ Á ari mannanáyun nga maggián yù aripan ta bale nayù yápu na. Ngam yù kuruk nga aná na tolay, mannanáyun nga maggián kuna. ³⁶ Á yáyù nga kagiak ku nikayu laguk, nu yù Aná ni Namarò yù mamalubbáng nikayu, á kukurugán nga napalubbáng kayin!

³⁷ “Ammù gemma ta ginaká na kayu ni Abrakam. Ngam igagánga nawà papatáyan, gapu ta arán naw alawatan yù ituddù nikayu. ³⁸ Á ituddù lá yù ipasingan nayù Yámá níkán. Ngam sikayu, akkuán naw yù kagian nayù yáma naw nikayu,” kun ni Apu Kesu nira. ³⁹ Á simibbák yù ira Kudio, á kinagi ra, “Si Kákay Abrakam yù yáma mi,” kud da. Á kinagi ni Apu Kesu nira, “Nu kuruk nga ginaká nakayu ni Abrakam, párigán naw nakuan yù napiá nga kingnguá na ngaw ni Abrakam. ⁴⁰ Ngam ari gemma kunnay sù akkuán naw yù kingnguá na ngaw ni Abrakam. Ta sikayu, aleran naw yù awayyá naw nga mamapátay níkán, mássiki nu síkán yù makkagi nikayu ta kuruk nga kinagi ni Namarò níkán.

⁴¹ “Á naggittá galá yù akka-akkuán naw sù ággangnguá nayù yáma naw,” kun ni Apu Kesu nira. Á kinagi ra kuna, “Ari kami labbuák. Ajjan táttádday nga yáma mi nga si Namarò,” kud da. ⁴² Á kinagi ni Apu Kesu nira, “Nu kukurugán nga yáma naw si Namarò, iddukan nawà nakuan laguk, ta si Namarò gemma yù naggapuák ku, á yáyù gapu na nga minayá saw. Ta arák ku uray yù ángè saw, ngam si Namarò galá yù naddok níkán.

⁴³ “Ngattá, ta arán naw kánnámmuán yù kagiak ku nikayu? Wan, yáyù gapu na nga arán naw kánnámmuán, gapu ta kun na kitul kayu, nga manakí nga magginná sù kagiak ku. ⁴⁴ Ánà na kayu ni Satanas nga yáma naw, á yá lá ikáyá naw nga akkuán yù ipakuá na nikayu. Á minámmapátay si Satanas ta áddè ngaw nga pamegapu na ngámin, á arán na ammu yù kuruk, ta awán bulubugá ta kuruk sù nonò na. Sirisiri galá yù kagian na, ta negagángay ta nonò na yù passirisiri na. Aggina yù minássirisiri ána yù paggapuán na ngámin na sirí. ⁴⁵ Ngam síkán, kuruk lá yù kagiak ku, á yáyù nga arán nawà kurugan.

⁴⁶ “Asinni nikayu yù makkagi ta ajjan liwá ku? Awán! Á nu kagiak ku yù kuruk, ngattá, ta arán nawà kurugan! ⁴⁷ Yù ira ánà ni Namarò, ginniginnád da yù bilin ni Namarò. Ngam sikayu, arán naw ginnán yù ubobuk ni Namarò. Á yáyù nga arán na kayu aná,” kun ni Apu Kesu nira.

Yù Meyannung kâ Apu Kesu ána si Abrakam

⁴⁸ Á pakkagi ni Apu Kesu ta arán na ira ánà ni Namarò, simibbák yù ira Kudio, á kinagi ra kuna, “Kuruk yù kagiam mi, nga taga Samaria ka, ta makikontará ka nikami nga taga Israel! Á nagunagán naka na anitu!” kud da. ⁴⁹ Á simibbák si Apu Kesu, á kinagi na nira, “Aringá nagunagán na anitu. Ngam iparáyò galá yù Yámà megapu sù akkuák ku. Á sikayu, pakkakagián nawà. ⁵⁰ Á arák ku aleran yù keparáyò. Ngam ajjan yù tádday nga magalek sù ira maddáyaw níkán. Á aggina yù mamanunnù. ⁵¹ Á kukurugán nga kuruk yù kagiak ku nikayu. Yù tolay nga manguruk sù kagiak ku, ari bulubugá matay, mássiki ta áddè ta áddè,” kun ni Apu Kesu.

⁵² Á kinagi nayù ira Kudio kuna, “Á ammu mi ngin ta maguyung ka, nga nagunagán na anitu! Ta natay si Kákay Abrakam ána natay gapay yù ngaw ira ngámin nga ábbilinán ni Namarò. Ngattá, ta kagiam mu ta ari bulubugá matay yù ira nga manguruk sù kagiam mu? ⁵³ Makáwayyá ka panò ánnè sù ngaw Kákay Abrakam nga naggaká nikami? Ta natay gemma, á natay gapay yù ngaw ira ngámin nga ábbilinán ni Namarò. Asinni ka panò laguk?” kud da.

⁵⁴ Á simibbák si Apu Kesu, á kinagi na nira, “Ta ángngarigán nu dayáwak ku yù baggi nakuan, awán ta serbi na. Ngam yù Yámà yù mangiparáyaw níkán. Aggina si Namarò, nga kagian naw nga Yápu naw. ⁵⁵ Arán naw bulubugá ammu si Namarò. Ngam síkán, ammu. Á nu ángngarigán ta kagiak ku nakuan ta arák ku ammu si Namarò, mepárigá nakuan nikayu nga massiri. Ngam kuruk nga ammu gemma, á palurotak ku yù ngámin nga ubobuk na. ⁵⁶ Á si Abrakam, nga káke naw, nagayáyá sù ngaw pagiddanáma na ta masingan na sangaw yù ángè sawe dabbuno. Á nasingan nen yù dattál ku saw, á nepallá yù pagayáyá na,” kun ni Apu Kesu nira.

⁵⁷ Á gapu ta natay ta nabayágin si Abrakam, kinagi nayù ira Kudio kâ Apu Kesu, “Awán ka paga ta límápu lu nga dagun. Nasingam mu panò si Kákay Abrakam?” kud da. ⁵⁸ Á kinagi ni Apu Kesu nira, “Kukurugán nga kuruk yù kagiak ku nikayu. Gári, lage na neyaná paga ni Abrakam, dán nga aijanakin,” kun ni Apu Kesu. ⁵⁹ Á pakaginná ra sù kinagi na, minay ira nangá ta batu, ta payangad da nakuan. Ngam nattuttù si Apu Kesu, á nallammang nga nánaw laguk sù mangilin nga kapilliá.

9

Yù Pamakasingan ni Apu Kesu sù Tolay nga Buling yù Nakeyanakán na

¹ Á pallakalakák di Apu Kesu, nasingad da yù tolai nga buling nakeyanakán na. ² Á yù ira makituddu kâ Apu Kesu, iniyabbù da kuna, “Mesturu, asinni yù nakaliwá, nga gapu na nga buling nakeyanakán na? Megapu panò ta liwá na lápay, onu megapu galá ta liwá nayù ira darakal na?” kud da. ³ Á simibbák si Apu Kesu, á kinagi na nira, “Ari megapu sù liwá na ána ari megapu sù liwá nayù ira darakal na, ngam buling galá tapè mepasingan yù pakáwayyá ni Namarò megapu kuna. ⁴ Á kunangane yù ágo na pattarabáku tam ta keggá tam paga ta utun na dabbun, tapè palurotat tam yù ipakuá nayù naddok níkan. Awán ta makatarabáku sangaw nu gabingin. Á kunniú gapay nittam, ta nu natay ittamin, awánin ta awayyá tam nga mattarabáku. ⁵ Á keggá paga ta dabbuno, síkan yù mamannawák, á pannawagak ku yù nonò nayù ira tatolay.”

⁶ Á kabalín ni Apu Kesu nakkagi karannian, nilutábán na yù dabbun. Á inikiruk na yù luták na ta dabbun, ta paddayan na ta lupè. Á yáyù iná na nga inileruk na ta matá nayù buling. ⁷ Á kinagi na sù buling, “Arà! E ka magámmuá ta danum nga ájjigután nga mangngágan ta Silowam.” Á “Narok” yù kebalínán na “Silowam.” Á minay laguk nagámmuá yù buling ta Silowam. Á pagámmuá na, nakasinganin, á limibbè ta balay.

⁸ Á labbè nayù tolai, nasingan nayù ira karúbá na ána yù ira nga nakasingan kuna ngaw nga nakilimù, á kinagi ra, “Ari panò aggina yù tolai nga magitubang nga makilimù?” kud da. ⁹ “Wan, aggina,” kun nayù ira káruán. Á yù ira káruán, kinagi ra, “Ari, ngam kagittá na lá,” kud da. Ngam yù tolai, kinagi na, “Síkan yù tolai nga buling ngaw,” kun na. ¹⁰ Á kinagi ra kuna, “Anni má ta makasingan ken?” kud da. ¹¹ Á simibbák yù tolai, á kinagi na nira, “Yù tolai nga mangngágan ta Kesu, iná na yù dabbun nga binasá na ta luták na, á inileruk na ta matá. Á kinagi na níkan ta ek ku magámmuá ta Silowam. Á yáyù kinuruk ku. Á ta pagámmuá ku, makasinganakin,” kun na. ¹² Á kinagi ra kuna, “Sogían nen?” kud da. “Arák ku ammu. Arák ku ammu yù ine na,” kun na nira.

Yù Pamestigá nayù ira Parisio sù Tolai nga Buling Ngaw

¹³ Á yù ira karúbá na, inituluk da laguk sù ira Parisio yù tolai nga buling ngaw. ¹⁴ Á Sabadu yù pappadde ni Apu Kesu ta lupè ána pamammapiá na sù buling, nga ágo na ággibannák. ¹⁵ Á yáyù nga iniyabbù da má nayù ira Parisio sù ngaw buling nu anni yù inipammapiá na. Á kinagi na nira gapay, “Inileruk na sù matá yù dabbun nga binasá na ta luták na, á nagámmuáká, á makasinganakin,” kun na.

¹⁶ Á yáyù nga kinagi nayù ira káruán nga Parisio, “Ari naggapu kâ Namarò, ta arán na ngilinan yù ággibannák tam nga Sabadu,” kud da. Ngam yù ira káruán, kinagi ra, “Nu makaliwá nakuan, ari makapagaddátu ta kunniawe nga makapállá,” kud da. Á naddurúmá yù nonò da ta meyannung kâ Apu Kesu. ¹⁷ Á yáyù nga iniyabbù da má nayù ira Parisio sù tolai nga buling ngaw, “Á gapu ta kagiam mu ta aggina yù namakasingan níkaw, á anni laguk yù kagiam mu nga meyannung kuna?” kud da. Á kinagi na nira, “Aggina yù ábbilínán ni Namarò,” kun na.

¹⁸ Á danniw ira nga karakalán na Kudio, arád da kinuruk ta buling ngaw yù tolai nga makasinganin. Á yáyù nga inipágál da yù ira darakal na. ¹⁹ Á iniyabbù da nira, “Kuruk panò nga aggina yù aná naw nga kagian naw ta nakeyanakán na yù buling na? Á ngattá laguk, ta makasinganin?” kud da.

²⁰ Á simibbák yù ira darakal na, á kinagi ra, “Wan, kuruk nga aggina yù aná mi, á kuruk nga neyaná nga buling. ²¹ Ngam arám mi ammu nu kunnasi pakasingan nen. Á arám mi gapay ammu nu asinni yù namakasingan ta matá na. Iyabbù naw galá sù aná mi, ta dakalin gemma, á awayyá nen nga kagian níkayu,” kud da. ²² Yáyù kinagi nayù ira darakal na, ta maganássing ira sù ira karakalán na Kudio. Ta nattatádday yù ira karakalán ta nonò da ta papanáwad da ta kapilliá ána arád da bulubugá patallungan yù tolai nga makkagi ta si

Kesu yù MakKiristu. ²³ Á yáyù nga kinagi nayù ira darakal na ta aggina lâ yù pangiyabbutá da, “ta dakalin gemma, á awayyá nen nga kagian nikayu,” kud da.

²⁴ Á pakaginná nayù ira Parisio sù kinagi nayù ira darakal na, pinidduá ra nga inipágál yù tolay nga buling ngaw. Á kinagi ra kuna, “Kagiam mu yù kuruk ta arubáng ni Namarò, ta ammu mi ta nakaliwá yù tolay nga namammapiá nikaw,” kud da. ²⁵ Á simibbák yù tolay, á kinagi na nira, “Arák ku ammu nu nakaliwá, onu ari. Yá lâ ammù, ta bulingà ngaw gemma, á makasinganakin,” kun na. ²⁶ Á iniyabbù da kuna, “Anni yù kingnúá na nikaw? Kunnasi yù pamakasingan na sù matám?” kud da. ²⁷ Á simibbák, á kinagi na nira, “Yáyù gemma kinagi nikayu gangù nga arán naw gininná. Ngattá garè, ta itotoli naw nga iyabbù? Ikáyá naw panò nga makituddu gapay kuna?” kun na.

²⁸ Á pakaginná ra sù initabbák nayù tolay nga buling ngaw, napporay ira. Á nakkakagiád da, á kinagi ra kuna, “Sikaw yù tumuttul kuna! Ngam sikami, si Moyses yù tuttulam mi! ²⁹ Ta ammu mi ta nakiubobuk si Namarò kâ Moyses. Ngam yane tolay, arám mi ammu yù naggapuán na,” kud da.

³⁰ Á simibbák yù tolay nga buling ngaw, á kinagi na, “Yawe yù kuruk nga makapállá lagugam! Ta pinammapiá na yù matá, ngam arán naw paga ammu yù naggapuán na! ³¹ Ammu tam gemma ta arán na ginnán ni Namarò yù kagian nayù ira malliwá. Ngam ginnán na yù tolay nga makimoray kuna á nna manuppál ta ure na. ³² Á áddè ngaw sù kaparò na dabbuno ta áddè kunangan, awán bulubugá ta narámak nga namakasingan ta tolay nga nakeyanakán na yù buling na! ³³ Á nu ari naggapu kâ Namarò, awán bulubugá ta makuá na nga kunniaw,” kun na nira. ³⁴ Á napporay yù ira karakalán na Kudio, á simibbák ira, á kinagi ra kuna, “Minálliwá ka gemma áddè ngaw lage na keyaná mu, á tudduám mu kami panò?” kud da. Á pinapáno ra ta kapilliá, nga arád den bulubugá patallungan.

³⁵ Á nakarámak si Apu Kesu ta napapánaw yù ngaw buling sù kapilliá, á en na laguk inalek. Pakálek na, iniyabbù na kuna, “Kurugán nga manguruk ka panò sù Kaká na ngámin na tatolay?” kun ni Apu Kesu kuna. ³⁶ Á simibbák yù tolay nga buling ngaw, á kinagi na kuna, “Asinni, Apu, tapè mangurugá kuna?” kun na. ³⁷ Á kinagi ni Apu Kesu kuna, “Masingam mu ngin, ta aggina yù makiubobuk nikaw,” kun na. ³⁸ Á kinagi nayù tolay, “Apu, mangurugá,” kun na. Á dagarágá nga namalittúkak nga makimoray kâ Apu Kesu. ³⁹ Á kinagi ni Apu Kesu laguk, “Minayá sawe dabbuno, tapè mesinná yù ira tatolay nga manguruk kâ Namarò sù ira nga ari manguruk kuna. Á yù ira nga kun na buling gapu ta arád da kánnámmuán yù kuruk, á pannawagak ku yù nonò da, tapè manguruk ira. Ngam yù ira nga kagiad da ta makasingan ira, ngam manakì ira nga mangikatalá nikán, mabbáli ira ta kun na buling,” kun na.

⁴⁰ Á yù ira káruán nga Parisio tán, naginná ra yù kinagi ni Apu Kesu. Á iniyabbù da kuna, “Anni yane nga kagiam mu? Kagiam mu panò ta kun na buling kami gapay?” kud da. ⁴¹ Á kinagi ni Apu Kesu nira, “Ta ángngarigán nu kuruk nga buling kayu nakuan, nga arán naw paga ammu yù bilin ni Namarò, á awán laguk ta pakaliwatán naw. Ngam gapu ta kagian naw ta makasingan kayu, maggián lâ paga nikayu yù ikáru naw megapu sù pakaliwatán naw.”

10

Meyárik si Apu Kesu sù Mináppárak ta Karneru

¹ Á nagángngarigán laguk si Apu Kesu, á kinagi na, “Kukurugán nga kuruk yù kagiak ku nikayu. Nu ángngarigán ta umay yù tolay ta ággianán na karneru, á ari tullung ta puertá na, ngam magalek ta tanakuán nga pattallungán na, aggina yù minákkokó á nna tulisán. ² Ngam yù tullung ta puertá, aggina yù mináppárak sù ira karneru. ³ Á yù magguárdiá ta puertá, bukatán na, tapè tullung yù mináppárak. Á yù ira karneru na, tákkilalá da yù ngáral nayù yápu ra. Á agálán na ira, á ingagánán na ira nga kukuá na nga katággitádday, tapè ilawán na ira. ⁴ Á ta kabalin na nangilawán sù ira ngámin nga kukuá na, mallakák nga mapolu nira, á tuttulad da, gapu ta ammu ra yù ngáral na. ⁵ Á nu ángngarigán ta umay yù tanakuán nga tolay nga magágál nira, ikarerád da, gapu ta arád da ammu yù ngáral na,” kun ni Apu Kesu. ⁶ Yáyù inistoriá ni Apu Kesu sù ira tatolay, ngam arád da nánnámmuán yù kebalinán na. Arád da kánnámmuán ta yù ira nga manguruk kâ Apu Kesu yù meyárik ta karneru na, á aggina yù meyárik ta mináppárak nga manaron nira.

Yù Meyannung sù Áttallungán nga Mappángè kâ Namarò

⁷ Á gapu ta arád da kánnámmuán yù pagángngarigán na, yáyù nga kinagi ni Apu Kesu nira, “Kukurugán nga kuruk yù kagiak ku nikayu. Sikán yù meyarík ta puertá nga áttallungán nayù ira karneru ta ággianád da. ⁸ Á yù ira ngámin nga minay nga napolu ánnè níkán, kunnay ta minákkokó ira áнна tulisán, gapu ta kagiad da ta tanakuán yù meyarík ta áttallungán. Ngam yù ira tatolay nga manguruk níkán, arád da ira gininná. ⁹ Sikán yù meyarík ta áttallungán. Á yù ira nga tullung megapu níkán, meyiğù ira. Á napiá yù ánnarok ku nira, nga kunnay ta karnerù nga makatallung áнна makalawán nga umay magáarak. ¹⁰ Á yù tulisán, yá lá iyánge na yù makkokó áнна mamapátay áнна manarál. Ngam sikán, minayá manotolay ta tolay, tapè mepattolay ira ká Namarò ta áddè ta áddè, áнна nepallá yù piá nayù áttolè ra,” kun ni Apu Kesu.

Si Apu Kesu yù Napiá nga Minánnaron

¹¹ Á kinagi ni Apu Kesu, “Sikán yù napiá nga minánnaron, nga meyarík sù napiá nga mináppárak ta karneru, nga itapil na yù baggi na megapu sù ira karneru na, tapè meyiğù ira. ¹² Á yù minángngallu, ari kuruk nga mináppárak, gapu ta arán na kukuá yù ira karneru. Á ta ángngarigán yù masingan na yù simaron nga ayám nga umay mangnguá sù ira karneru, ikarerán na áнна panawán na ira. Á umay yù simaron nga ayám, á akkuán na yù ira karneru, á mawwarawará ira. ¹³ Á yá ipattálo nayù minángngallu, gapu ta awán ta ákkengá na sù ira karneru, ta arán na ira kukuá. ¹⁴ Sikán yù napiá nga minánnaron, á ammu yù ira ngámin nga kukuá. Á yù ira kukuá, ammu rangá gapay. ¹⁵ Á kuniú gapay níkami ká Yámá, ta ammu nangá, á ammu yù Yámá. Á itapil ku yù baggi megapu sù ira nga meyarík ta karnerù, tapè meyiğù ira.

¹⁶ “Á ajjan paga yù ira káruán nga kukuá, nga meyarík ta karnerù nga ari paga námmung. Aggira gapay itallung ku paga, á ginnád da yù ngáral ku, tapè mepattatádday yù ira ngámin nga kukuá, nga kun na tangapangan, á táttádday lá yù minánnaron nira. ¹⁷ Á yáyù nga iddukan nangá nayù Yámá, gapu ta itapil ku yù baggi megapu sù ira kukuá, tapè maginnanolayá sangaw. ¹⁸ Awán ta makapapátay níkán nu arák ku uray, ngam mabbaluntáriungá nga mangitapil ta baggi. Ta sikán galá yù makáwayyá nga mangitapil ta baggi, á sikán lággapay yù makáwayyá nga mamaginnanolay ta baggi, ta yáyù ipakuá na níkán nayù Yámá,” kun ni Apu Kesu.

¹⁹ Á pakaginná nayù ira Kudio karannian nga kinagi ni Apu Kesu, naddurú má yù nonò da ta meyannung kuna. ²⁰ Aru nira yù ira nga nakkagi, nga kud da, “Nagunagán áнна maguyung! Ngattá, ta ginniginnán naw yù kagian na?” kud da. ²¹ Á yù ira káruán, kinagi ra, “Nu nagunagán, ari kuniaw nakuan yù ággubobuk na. Á makapammapiá panò yù anitu ta matá na buling?” kud da.

Yù Panaki nayù ira Kudio ká Apu Kesu

²² Á ta kalummin na tiempo, jimittálin yù piestá nga panaddamán nayù ira Kudio sù ngaw pamoli da sù mangilin nga kapilliá ta Jerusalem. ²³ Á ajjan si Apu Kesu sù mangilin nga kapilliá, nga nallakalakák sù balkon nga ingágad da ta Balkon nayù ngaw Patul Solomon. ²⁴ Á yù ira karakalán na Kudio, nagarimummungád da si Apu Kesu, á kinagi ra kuna, “Anni ikabayák mu nga ipeddak níkami? Nu kuruk nga sikaw yù MakKiristu nga sinullá ni Namarò ta mammaguray níkami, á kagiam mu laguk níkami nga daretíu,” kud da.

²⁵ Á simibbák si Apu Kesu, á kinagi na nira, “Yáyù kinagikin nikayu, ngam arán naw kurugan. Á yù makapállá nga akka-akkuák ku megapu sù pakáwayyá nayù Yámá, danniawe nakuan yù ipanguruk naw níkán. ²⁶ Ngam sikayu, ari kayu mebiláng sù ira nga kun na karnerù, ta ari kayu manguruk. ²⁷ Yù ira tatolè, meyarík ira ta karnerù, á ginnád da yù kagiak ku nira. Á ammu ira nga taggitádday, á tuttulad dangá. ²⁸ Á totalayak ku ira tapè mepattolay ira ká Namarò ta áddè ta áddè. Ari ira bulubugá mesinná ká Namarò, á awán ta makagubá nira, gapu ta tangngalák ku ira. ²⁹ Á yù Yámá yù nangiyawá nira níkán. Aggina yù kotunán, nga makáwayyá ta ngámin. Á awán ta makagubá sù ira tatolè gapu ta yù Yámá yù manangngal nira. ³⁰ Sikami ká Yámá, tádday kami lá,” kun ni Apu Kesu.

³¹ Á pakaginná nayù ira karakalán na Kudio karannian nga kinagi ni Apu Kesu, minay ira nangá ta batu, tapè payapayangad da. ³² Ngam kinagi ni Apu Kesu nira, “Aru yù napiá nga kingngikingnguá nga inipakuá nayù Yámá níkán megapu sù pakáwayyá na. Anni yù ipamayáng naw níkán?” kun na nira. ³³ Á simibbák yù ira Kudio, á kinagi ra kuna, “Ari yù napiá nga kingnguám yù ipamayáng mi níkaw, nu ari galá yù pamotum ká Namarò. Ta tolay ka lá gemma, á pattáddiosam mu yù baggim!” kud da. ³⁴ Á simibbák si Apu Kesu, á kinagi na nira, “Arán naw panò binibbik yù netúrá sù tunung naw nga kinagi na ngaw ni

Namarò sù ngaw ira gillakalakayán naw, nga kunniaw: ‘Kinagi nikayu ta kunnay ta dios kayu gapay.’* 35 Á ammu tam ta ari gemma mapatalián yù netúrâ nga ubobuk ni Namarò. Á nu kinagi ni Namarò ta kunnay ta dios yù ira ngaw karakalán naw nga nangiyawatán na sù ubobuk na, 36 á nepatalugáring nikán nga sinullà nayù Yámà ána jinok na ta umay ta dabbuno!

“Ngattá laguk ta kagian naw ta potuák ku si Namarò gapu ta kinagi ta sikán yù Anâ na? 37 Á ta ángngarigán nu arák ku nakuan akkuán yù ipakuá nayù Yámà nikán, á arán nawá laguk kurugan. 38 Ngam nu akkuák ku yù ipakuá nayù Yámà nikán, mássiki nu arán naw kurugan yù kinagi, kemámmatán naw laguk yù kingngikingnguá, tapè ammu naw ána kánnámmuán naw ta aijan yù Yámà nikán ána aijaná gapay kâ Yámà,” kun ni Apu Kesu.

39 Á yù ira Kudio, pakaginná ra sù kinagi ni Apu Kesu, gaputad da nakuan, ngam arád da nagápù gapu ta nallilli nira nga nánaw.

40 Á páno ni Apu Kesu ta Jerusalem, minay nanoli ta dammáng na danum na Jordan, nga nanigután na ngaw ni Kuan, á naggián lâ tán. 41 Á aru yù tatolay nga minay kuna. Á nakkaká-ubobuk ira, á kinagi ra, “Awán bulubugá ta pinagaddátu na ngaw ni Kuan, ngam kuruk yù ngámin nga kinagi na nga meyanung sawe tolay,” kud da. 42 Á aru yù ira tatolay tán nga lugár nga nanguruk kâ Apu Kesu.

11

Yù Pate ni Lasaru

1 Á naggián ta ili na Bitania yù ira tallu nga mawwawági, di Lasaru ána yù ira bábbay, di Maria kâ Marta. Á nataki si Lasaru. 2 Á si Maria, aggina yù nangipay ta bábbanguk sù takki ni Apu Kesu, á pinunatán na sù duddù na. Á si Lasaru nga wagi na yù nataki. 3 Á di Maria kâ Marta, nabbilin ira ta umay kâ Apu Kesu, á kinagi na, “Apu, mataki yù kopum mu nga ayatam mu.”

4 Á pakarámak ni Apu Kesu, kinagi na, “Arán na ipate ni Lasaru yawe takì na. Ngam mesimmu galá tapè maddáyaw yù ira tatolay kâ Namarò. Á sikán gapay, nga Anâ ni Namarò, meparáyawá gapay megapu sù taki ni Lasaru,” kun na. 5 Á kurugán nga iniddù ni Apu Kesu yù ira mawwawági, di Marta kâri Maria kâ Lasaru. 6 Á mássiki nu ammu ni Apu Kesu ta mataki si Lasaru, inipappáná na lâ ta duá nga ággaw yù páno na sù gián na.

7 Á pappasá na duá nga ággaw, kinagi ni Apu Kesu sù ira tudduán na, “Mánaw ittam laguk, ta manoli ittam ta Judiya,” kun na. 8 Á kinagi ra kuna, “Mesturu, gangù lâ mággè pinayáng daka nayù ira karakalán na Kudio tán! Á manoli ka panò paga tán?” kud da kuna. 9 Á simibbák si Apu Kesu nga nagángngarigán, á kinagi na nira, “Ari kayu maburung. Ari panò mapulu duá nga oras nga manawák ta tangággaw? Á aijan yù awayyá tam paga nga palurotan yù ipakuá ni Namarò nittam, nga kunnay ta tolay nga mallakák ta kanawák, nga ari mesiddúkal, gapu ta masingan na yù pallakarán na. 10 Ngam yù tolay nga mallakák ta gabi, mesiddúkal gapu ta kallá garè,” kun na.

11 Á kabalín ni Apu Kesu nakkagi karannian, kinagi na laguk sù ira tudduán na, “Si Lasaru nga koput tam, makkaturugin. Et tamin, ta lukagak ku,” kun na. 12 Á kinagi ra kuna, “Apu, nu makkaturugin si Lasaru, mammapiá ngin sangaw,” kud da. 13 Yáyù kinagi ra gapu ta kagiad da ta makkaturuk lâ si Lasaru nga magibannák. Ngam inubobuk ni Apu Kesu yù pate na nga kunnay ta pakkaturuk na.

14 Á gapu ta arád da nánámmuán yù kinagi na, yáyù nga kinagi na nira nga daretíu, “Natayin si Lasaru. 15 Á magayáyáká, gapu ta awánà ta gián na sù pate na, tapè aijan yù awayyá naw sangaw nga manguruk. Et tamin laguk sù gián na,” kun ni Apu Kesu nira. 16 Á si Tomâ nga iningágad da ta Jiping, nakiubobuk sù ira kábulun na nga makituddu kâ Apu Kesu, á kinagi na nira, “Á et tamin laguk, ta nu papatáyad da si Mesturu tam, á sittam ngámin yù mekanakaná kuna nga matay gapay,” kun na.

Si Apu Kesu yù Manotolay nga Mamaginnanolay sù ira Námmatay

17 Á ta labbè di Apu Kesu ta Bitania, nánámmuád da ta appá ta ággawin nga aijan si Lasaru ta tanam. 18 Á aranni ta Jerusalem yù bárrii na Bitania. Tallu kilometro lâ yù kárayyu na. 19 Á aru yù ira Kudio nga taga Jerusalem nga minay manganna-annay kâri Marta kâ Maria, tapè mabannáyán ira sù pate nayù wagi ra. 20 Á si Marta, pakarámak na ta umayin si Apu Kesu, en na jinápun. Ngam si Maria, naggián lâ nga nagitubang sù bale ra.

* 10:34 Salmo 82:6

²¹ Á pakáddè ni Marta kâ Apu Kesu, kinagi na kuna, “Apu, nu egga ka nakuan saw, ari nakuan natay yù wagi. ²² Á mássiki nu natayin, ammukin ta iyawá ni Namarò nikaw yù maguray lá nga kiddawam mu,” kun ni Marta. ²³ Á kinagi ni Apu Kesu kuna, “Maginnanolay yù wagim,” kun na. ²⁴ Á kinagi ni Marta kuna, “Wan, Apu, ammù ta mepaginnanolay sù ira námmatay ta panguriánan nga ággaw,” kun na.

²⁵ Á simibbák si Apu Kesu, á kinagi na kuna, “Sikán yù sigga-inànga nga mamaginnanolay sù ira námmatay. Sikán yù manotolay nira. Á yù tolay nga mangikatalà níkán, mássiki nu matay, á matolay. ²⁶ Á ngámin yù ira nga matolay nga mangikatalà níkán, ari ira bulubugá mesinná kâ Namarò ta áddè ta áddè.” Á iniyabbù na laguk kâ Marta, “Kurugam mu panò yaw?” kun na. ²⁷ Á kinagi ni Marta kuna, “Wan, Apu. Mangurugá ta sikaw yù MakKiristu, nga Aná ni Namarò nga iddagám mi nga umay mammaguray ta dabbuno,” kun na.

Yù Karaddam ni Apu Kesu sù Pate ni Lasaru

²⁸ Kabalin ni Marta nga nakkagi karanniw, limibbè ta bale na. Á en na iniyanasá nga kinagi kâ Maria, “Ajjanin yù Mesturu, á ipágál na ka,” kun na. ²⁹ Pakaginná ni Maria ta limibbè si Apu Kesu, dagarágá nga limikká nga nánaw, ta umay sù gián na. ³⁰ Ta ari paga nakáddè si Apu Kesu ta babále ra, ngam ngagián lá paga ta nanapunán ni Marta kuna. ³¹ Á yù ira Kudio nga ajjan ta bale ra, nga manganna-annay kâ Maria, pakasingad da ta ikáddagá lá yù páno ni Maria, siminuttul ira kuna, ta kagiad da ta umay makkulé sù tanam nayù wagi na.

³² Á pakáddè ni Maria sù gián ni Apu Kesu, namalittúkak ta arubáng na, á kinagi na kuna, “Apu, nu ajjan ka lá nakuan saw, ari nakuan natay yù wagi mi,” kun na. ³³ Á pakasingan ni Apu Kesu sù ira Kudio nga nepakkulé kári Maria, nakalò yù daddam na áнна nepallá yù allá na nira. ³⁴ Á iniyabbù na nira, “Sisaw nangitanamán naw kuna?” kun na. Á kinagi ra kuna, “Apu, et tam ta em mu innan,” kud da. ³⁵ Á nepakkulé gapay nira si Apu Kesu. ³⁶ Á yáyù nga nakkaká-ubobuk yù ira Kudio, á kinagi ra, “Innan naw! Nepallá yù ayá na kuna,” kud da. ³⁷ Ngam yù ira káruán, kinagi ra, “Aggina yù mamammapiá ta matá na buling. Á ngattá garè, ta arán na pinammapiá si Lasaru, tapè ari nakuan natay?” kud da.

Yù Pamaginnanole ni Apu Kesu kâ Lasaru

³⁸ Á jimikkì ta tanam si Apu Kesu, nga nakalò má laguk yù daddam na. Á kuebá yù nangitanamad da, nga naserrán ta mallakay nga batu. ³⁹ Á kinagi ni Apu Kesu nira, “Irián naw yù batu,” kun na. Á si Marta nga wagi nayù natay, kinagi na, “Apu, nabuyukin garè, ta appá tangággawin nga netanam,” kun na. ⁴⁰ Á kinagi ni Apu Kesu kuna, “Arák ku panò kinagi nikaw gangù tanu mangikatalá ka, masingam mu sangaw yù pakáwayyá ni Namarò nga makapállá?” kun na.

⁴¹ Á yáyù nga iniriád da yù batu. Á sinánguk ni Apu Kesu yù lángi, á kinagi na, “Ammò, magayáyáká ta gininnám yù kinagi nikaw. ⁴² Á ammù gemma ta tángngagam mu ngámin yù kagiak ku nikaw, ngam yaw lá yù kagiak ku megapu sawe ira tatolay, tapè manguruk ira ta sikaw yù naddok níkán,” kun na. ⁴³ Á kabalin na nakkagi sawe, nakkátol, á kinagi na, “Lasaru, mallawán ka saw,” kun na. ⁴⁴ Á dagarágá nga nallawán, nga naputápután ta sinnun áddè ta takki na áddè ta limá na áнна mammang na gapay. Á kinagi ni Apu Kesu nira, “Bullarán naw, tapè lubbekin,” kun na.

*Yù Pangigagánge ra nga Mamapátay kâ Apu Kesu
Mattiu 26:1-5; Markus 14:1-2; Lukas 22:1-2*

⁴⁵ Á aru yù ira Kudio nga mamulun kári Maria, á nasingad da yawe nga kingnguá ni Apu Kesu, á yáyù nga aru nira yù manguruk kuna. ⁴⁶ Ngam yù ira káruán, nanoli ira ta Jerusalem, ta ed da iránuk yù kingnguá ni Apu Kesu sù ira Parisio nga malussaw kuna.

⁴⁷ Á yáyù nga naggagammung yù ira Parisio áнна yù ira kátannangán nga pári sù ira karakalán na Kudio. Á kinagi ra, “Anni yù akkuát tam sù tolay? Ta aru garè yù makapállá nga pagaddatuan na. ⁴⁸ Á nu paguráyát tam tapè uputan na yù kunniaw nga akkuán na, á manguruk sangaw yù ira ngámin nga tatolay kuna. Á mappaná yù ággiát tam sangaw, gapu ta marámak da sangaw nayù ira kátannangán nga taga Roma, á umay ira laguk saw giát tam, á darálad da yù mangilin nga kapillia áнна sittam ngámin áнна yù ira ili tam,” kud da.

⁴⁹ Ngam yù tádday nira si Kayapas, nga kamotungán na pári tán nga dagun, á simibbák, á kinagi na nira, “Sikayu, awán ta ammu naw, ⁵⁰ ta arán naw kánnammuán yawe, nga más mapiá nu metapil yù tádday nga tolay megapu nittam, tapè ari ittam ngámin mámmatay, nga tangapáddabbunán nga Kudio,” kun na. ⁵¹ Á yù kinagi ni Kayapas, ari naggapu ta nonò

na. Ngam gapu ta aggina yù kamotungán na pári tán nga dagun, á yáyù nga inipakkagi ni Namarò kuna yawe nga meyannung sù ketapil na sangaw ni Apu Kesu megapu sù ira tangapáddabbunán nga Kudio. ⁵² Á yù ketapil ni Apu Kesu, ari lá megapu sù ira Kudio, nu ari galá megapu sù ira ngámin nga mangikatalà kuna, tapè pattatáddayan ni Namarò yù ira ngámin nga makkakerumá nga áná na nga nesinisinek ta ngámin nga tatolay ta dabbuno.

⁵³ Á áddè sù paggagammung nayù ira kátannangán na Kudio, yáyù pamegapu ra nga mangigagángay sù ámmapáte ra ká Apu Kesu. ⁵⁴ Á yáyù gapu na nga ari mappasapasingan si Apu Kesu sù ira tatolay sù purubinsia na Judiya. Nánaw laguk di Apu Kesu ána yù ira tudduán na, á minay ira ta babálay na Epraim nga aranni ta kalállammátan. Á nakipaggián ira tán.

⁵⁵ Á naddaggunin nga duttál yù Piestá na Kudio, nga panaddamád da sù pattalebák nayù daroban ni Namarò. Á aru yù ira Kudio nga naggapu ta arayyu nga minay ta Jerusalem, ta ed da tuppálan yù kustombare ra nga mappakarenu ta baggi ra lage na piestá, tapè dán nga napanán ira sù pamegapu na. ⁵⁶ Á ala-alerad da si Apu Kesu. Á ta paggagammung da ta mangilin nga kapillíá, nakkaká-ubobuk ira, á kinagi ra, “Anni kagian naw? Ari támma umay makipiestá?” kud da. ⁵⁷ Á yù ira kátannangán nga pári ána yù ira Parisio, kinagi ra sù ira tatolay tanu aijan yù makánámmu sù gián ni Apu Kesu, á ipakánámmu na bì nira, tapè gaputad da.

12

Yù Pangibubbù ni Maria ta Denu nga Nabanguk sù Takki ni Apu Kesu
Mattiu 26:6-13; Markus 14:3-9

¹ Á annam paga yù ággaw pángè na pamegapu na piestá. Á minay di Apu Kesu ta Bitania, ta gián ni Lasaru nga pinaginnanole ni Apu Kesu. ² Á pinarád di Lasaru yù pamúgák di Apu Kesu. Á si Marta yù nasserbi nira, á si Lasaru yù tádday nga nepallállang ká Apu Kesu. ³ Á iná ni Maria yù tangaboteliá nga bábbanguk nga nanginá, nga denu na nardu, á inibubbù na sù takki ni Apu Kesu, á pinunatán na yù takki na sù duddù na. Á limingngák yù aguk nayù bábbanguk sù balay.

⁴ Á aijan si Kudas Iskariote, nga tádday sù ira mapulu duá nga makituddu ká Apu Kesu, á mataki yù nonò na ta pakasingan na sù kingngúa ni Maria. Yawe Kudas yù mappagápù sangaw ká Apu Kesu. Á kinagi ni Kudas, ⁵ “Ngattá, ta ari neláku yawe bábbanguk ta tallu gatù, tapè ilimù tam yù pagá na sù ira magáwák?” kun ni Kudas. ⁶ Á ari kuruk nga mangikállà si Kudas sù ira magáwák, ngam áppè lá yù kinagi na, gapu ta aggina yù minákkokò, á aggina yù manangngal ta kuártu ra nga kokokotan na lá. ⁷ Á kinagi ni Apu Kesu kuna, “Paguráyám mu si Maria. Iyanugù mu kuna, tapè paránan na yù baggi ta ketanam ku. ⁸ Ta aijan nga mannanáyun nikayu yù ira magáwák. Ngam sikán, mabiká lâ maggián nikayu,” kun na.

Yù Pangigagánge ra ta Ámmapáte ra ká Lasaru

⁹ Á pakarámak nayù ira magariu nga Kudio ta aijan si Apu Kesu ta Bitania, minay ira sù gián na, ta ed da innan. Á ari lá si Apu Kesu yù ikáyâ da nga innan, ngam si Lasaru gapay nga pinaginnanole na. ¹⁰ Á yáyù nga inigagánge ra nga papatáyán nayù ira kátannangán nga pári si Lasaru gapay, ¹¹ ta aggina yù gapu na nga aru yù ira Kudio nga manguruk ká Apu Kesu, nga likuránád da yù ira kátannangád da.

Yù Paddáyo nayù ira Magaru ká Apu Kesu sù Pakáddè na ta Ili na Jerusalem
Mattiu 21:1-11; Markus 11:1-11; Lukas 19:28-40

¹² Á sù tádday nga ággaw, aijan yù ira magariu nga tatolay nga minay nakipiestá, á narámak da ta umayin si Apu Kesu ta Jerusalem. ¹³ Á nangá ira ta palákkay, ta ed da jinápun, tapè dayáwad da. Á nagaragiák ira, á kinagi ra, “Dayáwat tam si Namarò.

Dayáwat tam yawe nga jinok ni Namarò ta umay mammaguray nittam.

Dayáwat tam yù Patul na Israel!”* kud da.

¹⁴ Á inikò ni Apu Kesu yù kígo na kabáyu nga dongki, nga natakayán na. Á yáyù nga napalurò yù inipalappá ni Namarò nga inipetúrá na sù dán nga libru nga kunniaw:

¹⁵ “Sikayu nga taga Jerusalem, ari kayu maganássing.

Ajjanin yù patul naw nga umay nikayu,
nga mattakay ta kígo na dongki.”†

* 12:13 Salmo 118:25-26 † 12:15 Sakariá 9:9

¹⁶ Á yù ira sinudduán ni Apu Kesu, arád da nánámmuán yù kebalinán nayù netúrâ. Ngam ta kabalin na naginnanolay nga limibbè ta lángi, ninonò da laguk ta yáyù kapalurò nayù dán nga netúrâ nga meyanung sù pattake na ta dongki nga minay ta Jerusalem.

¹⁷ Á yù ira magariu nga tatolay nga nakasingan kâ Apu Kesu sù pagágál na kâ Lasaru ta tanam na ta pamaginnanole na kuna, kinagi ra yù nasingad da sù ira tatolay ta Jerusalem. ¹⁸ Á yáyù nga minay yù ira magariu nga tatolay nga jiminápun kâ Apu Kesu, ta narámak da yù makapállá nga pinagaddátu na. ¹⁹ Á nakkaká-ubobuk laguk yù ira Parisio, á kinagi ra laguk, “Ye, innan nawè! Awán garè ta awayyá tam, ta siminuttul ngámin nga tangapáddabbunán kuna!” kud da.

Yù Ánge nayù ira ari Kudio kâ Apu Kesu

²⁰ Á aijan gapay yù ira nga ari Kudio nga taga Garesia nga minay makipiestá ta Jerusalem, tapè makimoray ira gapay kâ Namarò. ²¹ Á minay ira laguk kâ Pilippi, nga taga Betseda sù purubinsia na Galilia, ta ed da kagian kuna, “Apu, ikáyâ mi makiammu kâ Apu Kesu,” kud da. ²² Á en na kinagi ni Pilippi kâ Andares, á nappulù ira, ta ed da kagian kâ Apu Kesu.

Yù Pagubobuk ni Apu Kesu ta Meyanung sù Pate na

²³ Á pakkagi di Andares ta aijan yù ira umay nga taga Garesia, simibbák si Apu Kesu, á kinagi na nira, “Duttálin yù ággo na keparáyò, nga kepotuk ku sangaw ta lángi, sikán nga Kaká na ngámin na tatolay. ²⁴ Kukurugán nga kuruk yù kagiak ku nikayu. Mávák nga matayá sangaw ána metanamá, tapè aru yù ira meyiù. Á yaw keyarigán na, yù tangabullung nga bini. Nu ari memulá ta dabbun, táttádday lâ nga ari umaru. Ngam nu memulá ta dabbun nga kunnay ta natay, á mattubbu, á mabbáli ta aru. ²⁵ Á kunnian gapay yù keyarigán nayù tolay nga tánggagan na lâ yù ákkatole na ta baggi na sawe dabbuno, ta lonán na ngámin ta pate na sangaw ána mesinná kâ Namarò ta áddè ta áddè. Ngam yù tolay nga máyâ nga mamalurò sù ipakuá kuna, mássiki nu lonán na ngámin yù ikáyâ na sawe dabbuno, ngam meyiù, á málá na yù áttole na kâ Namarò nga awán ta áddè na. ²⁶ Á yù tolay nga máyâ nga makiaripan níkan, mávák na tumuttutl níkan, tapè magariu lâ yù giák ku, aijan lâ níkan yù aripak ku. Á iparáyo nayù Yámá ngámin yù ira nga makiaripan níkan,” kun na.

²⁷ Á inupù ni Apu Kesu nga kinagi, “Á duttálin yù jigá ku, á maburungá nga mapábbaw. Anni laguk ipakimállá ku kâ Yámá? Makimállaká nakuan panò kuna ta ililli nangá sù jigá nga duttál níkan sangaw? Ngam ari gemma, ta yáyù iniyángè saw, tapè attamá ku yù jigá,” kun na. ²⁸ Á kinagi na laguk ni Apu Kesu kâ Namarò, “Ammò ku, meparáyaw yù ngágam mu ta arubáng nayù ira tatolay megapu níkan,” kun na. Á dagarágá aijan yù ngárál nga naggapu ta lángi, á kun na, “Neparáyawin yù ngágak ku nga kamotungán, á meparáyaw paga sangaw,” kun na.

²⁹ Á yù ira magariu nga tatolay nga nanáddak ta aranni kuna, naginná ra yù ngárál, á kagiad da ta nagalittúgaw. Á yù ira káruán, “Ari,” kud da, “ngam nagubobuk yù daroban ni Namarò kuna,” kud da.

³⁰ Á kinagi ni Apu Kesu nira, “Yane ngárál nga naginná naw, ari nagubobuk megapu níkan, nu ari galá megapu nikayu, tapè manguruk kayu. ³¹ Á duttálin yù pamegapu nayù pamanunnú ni Namarò sù ira tatolay sawe dabbuno, ána duttálin yù káppù ni Satanas, ána yù ketabbá na. ³² Á sikán, sangaw nu mepotuná, agálák ku yù ira tatolay ta ngámin nga lugár, á abbágák ku ira, tapè umay ira mangikatalá níkan,” kun na. ³³ Á yáyù kinagi ni Apu Kesu, tapè ipakánámmu na nira yù ipate na nga mepátá ta kurú nga mapatáddak.

³⁴ Á yáyù nga simibbák yù ira magariu nga tatolay, á kinagi ra kuna, “Naginná mi yù binibbik da nga netúrâ sù tunung tam, nga matolay yù MakKirisu ta áddè ta áddè nga mammaguray nittam. Ngattá laguk, ta kagiam mu ta mepotun nga mepátá ta kurú yù Kaká na ngámin na tatolay? Ari panò aggina yù mammaguray nga mangngágan ta Kiristu? Asinni laguk yù Kaká na ngámin na tatolay nga kum mu?” kud da.

³⁵ Á yáyù nga kinagi na laguk ni Apu Kesu nira, “Maggiáná paga nikayu ta mabi. Á keggá lâ paga nga mamannawák ta nonò naw, tuttulan nawá, tapè ari kayu sangaw mepárik sù tolay nga magabiyán. Ta yù tolay nga mallakák ta kallá, magawáwán gapu ta arán na ammu yù angayán na. ³⁶ Á ta keggá paga ta dabbuno nga mamannawák ta nonò na tolay, ikatalá nawá, tapè manawagán yù nonò naw nga mepagittá ta nonò ku,” kun ni Apu Kesu nira.

Yù Panakì nayù ira Kudio nga Manguruk

Á kabalin ni Apu Kesu nagubobuk sù ira magariu nga tatolay, nánawán na ira, á nattuttù nira. ³⁷ Ta mássiki nu aru yù pinagaddátu na nga makapállá ta arubáng da, nanakì ira nga

manguruk kuna. ³⁸ Á yáyù nga napatuppál yù iníturâ na ngaw ni Lákay Isaya, nga ábbilinán ni Namarò, nga kunniaw:

“Apu, awán ta manguruk sù kinagi mi nira nga meyanung nikaw.

Á awán gapay ta makánnámmu sù inipalappâ mu nga ámmagaddátum!”[†]

³⁹ Á gapu ta ari ira manguruk, kinagi na paga nayù ngaw Lákay Isaya yù meyanung sù ipanaki da, ta kinagi na,

⁴⁰ “Pinabbalin na ira ni Namarò ta kun na buling, ána pinataggâ na yù nonò da.

Yáyù nga arád da kemámmatán yù mepasingan nira

ána arád da kánnámmuán yù mepalappâ nira.

Ta kinagi ni Namarò,

“Nu mabbabáwi ira nakuan ána umay ira nikán,

á pakomák ku ira, kun na.”[§]

⁴¹ Yáyù kinagi na ngaw ni Lákay Isaya sù ngaw gári, gapu ta nasingan na yù dalingárang nayù MakKiristu, á kinagi na yù meyanung kuna. ⁴² Á mássiki nu ari nanguruk yù ira káruán nga Kudio, aru yù ira nga makáwayyá nga Kudio nga manguruk ká Apu Kesu. Ngam inilímak da yù ángnguruk da gapu ta maganássing ira sù ira Parisio, maraké palawanad da ira sù ággagammungád da. ⁴³ Ta ikáyâ da yù paddáyo nayù ira ikáttole ra ánnè sù paddáyo ni Namarò nira.

Si Apu Kesu yù Mangiyígù sù ira Mangikatalà kuna

⁴⁴ Á uliotturu nga pangituddu ni Apu Kesu, iniyássikan na yù ubobuk na, á kinagi na, “Yù tolay nga manguruk nikán, ari lá sikán yù kurugan na, nu ari gapay si Namarò nga naddok nikán. ⁴⁵ Á yù tolay nga maningan nikán, imámmatán na gapay yù naddok nikán. ⁴⁶ Sikán yù meyárik ta nawák, á minayâ ta dabbuno nga mamannawák ta nonò na tolay, tapè ari maggián ta kallá yù ira nga mangikatalà nikán. ⁴⁷ Á nu aijan yù tolay nga makaginná sù kagiak ku, ngam ari manguruk, á ari sikán yù mamanunnù kuna. Ta aringâ minay nga mamanunnù ta tolay, ngam minayâ ta dabbuno tapè sikán yù mangiyígù nira.

⁴⁸ “Ngam aijan yù mamanunnù sù ira tatolay nga manaki nikán ána ari manguruk sù kinagi, ta mokum ira sù pagáddékán na ággaw. Á yá ikokum da yù ubobuk ku nga arád da kinuruk. ⁴⁹ Ta aringâ magubobuk megapu sù pakáwayyâ, nu ari galá megapu sù pakáwayyâ nayù Yámà nga naddok nikán. Ta inibilin na nikán ngámin yù kagiak ku ána ituddù. ⁵⁰ Á ammu gemma ta manotolay yù taddán nayù Yámà ta tolay ta áddè ta áddè. Á yáyù nga kagiak ku yù ngámin nga inibilin nayù Yámà nikán.”

13

Yù Pangituddu ni Apu Kesu ta Keggá na ta Jerusalem

¹ Á maddaggunin yù Piestá na panaddamád da ta pattalebák nayù daroban ni Namarò, á ammu ni Apu Kesu ta duttálin yù ággaw nga páno na ta dabbuno, nga manoli sù Yáma na ta lángi. Á aijan yù ángngiddù ni Apu Kesu sù ira tatole na ta utun na dabbuno ta áddè ngaw pamegapu na ngámin. Á yáyù nga inipasingan na yù ángngiddù na nira nga napasigaggâ ta áddè ta áddè.

² Á ta púgágin, nakkakálállang nga namúgák di Apu Kesu ána yù ira tudduán na. Á kinuríru nen ni Satanas yù nonò ni Kudas nga anâ ni Simon Iskariote, ta ipagápù na si Apu Kesu sù ira malussaw kuna. ³ Á ammu ni Apu Kesu ta inikatalà nayù Yáma na kuna yù pakáwayyâ na ta ngámin, ána ammu na gapay ta si Namarò yù naggapuán na ána labbetán na sangaw.

⁴ Á kabalid da kiminán, gimikkáng laguk si Apu Kesu, á inirián na yù latuk na barawási na, á inibarakà na yù tuállíá. ⁵ Á inâ na yù palanggána nga piniyyán na ta danum, á pinegapuanán na nga binaggawán yù takki nayù ira tudduán na ána pinunatán na ira sù tuállíá nga inibarakà na.

⁶ Á pabbaggo ni Apu Kesu paga ta takki ra, jimikki ká Simon Eduru, tapè baggawán na yù takki na. Ngam nanaki si Eduru, á kinagi na kuna, “Apu, sikaw panò yù mamaggaw ta takki?” kun na. ⁷ Á kinagi ni Apu Kesu kuna, “Arám mu kánnámmuán yawe nga akkuák ku kunangan, ngam kánnámmuám mu sangaw,” kun na. ⁸ Á kinagi ni Eduru kuna, “Apu, ari nakuan sikaw yù mamaggaw ta takki. Arák ku bulubugá ipabbaggaw nikaw yù takki,” kun na. Á kinagi ni Apu Kesu kuna, “Nu arát taka baggawán, ari ka mesipà nikán,” kun

na. ⁹ “Apu,” kun ni Simon Eduru kuna, “nu kunniû laguk, ari lâ yù takki yù baggawám mu, nu ari gapay yawe limâ ira ána ulù,” kun na. ¹⁰ Á kinagi ni Apu Kesu kuna, “Yù tolay nga najjigukin, ari má majjigù, ngam yù lâ takki na yù mabaggawán, tapè pareku nga marenu yù baggi na. Á sikayu, napakarenuán kayin, ngam ari sikayu ngámin,” kun na. ¹¹ Ta ammu ni Apu Kesu yù tolay nga mappagápù kuna, á yáyù gapu na nga kinagi na ta ari ira ngámin yù napakarenuán.

¹² Á kabalín ni Apu Kesu namaggaw ta takki ra, inâ na yù barawási na, á nanoli sù nagitubangán na. Á kinagi na nira, “Kánnámmuán naw panò yù kebalínán nayù kingnguâ nikayu? ¹³ Makimesturu kayu ána makiyápu kayu nikán, á yáyù kustu, ta sikán gemma yù kukurugán nga yápu naw. ¹⁴ Á nu sikán, nga yápu naw ána mesturu naw, yù mamaggaw ta takki naw, á sikayu gapay nakuan laguk yù makkakábaggaw ta takki naw. ¹⁵ Á inipasingak ku yawe nga kingnguâ nikayu, tapè kánnámmuán naw ta tumulù nakuan yù nonò naw, ána párigán naw gapay yù akkuák ku. ¹⁶ Ta kukurugán nga kuruk yù kagiak ku nikayu. Ari makáwayyá yù aripan ánnè sù yápu na. Á kunniû gapay, ari makáwayyá yù ábbilínán ánnè sù maddok kuna. ¹⁷ Á nu kánnámmuán naw yawe nga ituddù nikayu, magayáyâ kayu laguk nu kurugan naw.”

Yù Pamalappâ ni Apu Kesu sù Mappagápù kuna
Mattiu 26:20-25; Markus 14:17-21; Lukas 22:21-23

¹⁸ Á kinagi ni Apu Kesu paga, “Yawe nga kinagi nikayu, ari nga sikayu ngámin yù keyannungán na, ta ammù yù ira nga piníli. Ngam egga yù mappagápù nikán, tapè mapalurò yù dán nga netúrâ nga kunniaw:

“Yù kapulupulù ku nga nepakkákán nikán, aggina yù mappagápù nikán.*”
¹⁹ Yáyù nga kagiak ku nikayu kunangane pángè na kesimmu na, tapè sangaw nu mesimmu, manguruk kayu nikán, ta sikán yù Mangiyígù. ²⁰ Á kukurugán nga kuruk yù kagiak ku nikayu. Yù tolay nga mangalawâ sù ira nga dobak ku, kunnay ta sikán gapay yù alawatan na. Á yù tolay nga mangalawâ nikán, kunnay ta alawatan na gapay yù naddok nikán.”

²¹ Á kabalín ni Apu Kesu nakkagi, mapábbaw yù nonò na, á kinagi na, “Kuruk yù kagiak ku nikayu. Ajjan nikayu yù mappagápù nikán,” kun na. ²² Á yù ira tudduán na, nakkakálipilipay ira, ta arád da ammu nu asinni yù kagian na. ²³ Á ajjan yù tádday nira nga nagitubang ta taging ni Apu Kesu. Aggina yù kuruk nga iddukan na. ²⁴ Á inisenias ni Simon Eduru ta iyabbù na kâ Apu Kesu nu asinni yù kagian na. ²⁵ Á yù tolay nga iddukan ni Apu Kesu, nga namerik kuna, iniyabbù na kuna. “Apu, asinni yù kagam mu nga mappagápù nikaw?” kun na. ²⁶ Á kinagi ni Apu Kesu kuna, “Yù iddák ku ta pán nga itunnâ ku ta jígù,” kun na. Á pangitunnâ na sù pán, iniyawâ na kâ Kudas nga anâ ni Simon Iskariote.

²⁷ Á pangalawâ ni Kudas sù pán, dagarágâ nga simillung si Satanas kuna. Á kinagi na laguk ni Apu Kesu kâ Kudas, “Mabi ka lâ sù akkuám mu,” kun na. ²⁸ Á awán bulubugâ sù ira nepakkákán ta makánnámmu nu anni yù ipangapurâ ni Apu Kesu kâ Kudas. ²⁹ Á gapu ta ammu nayù ira tudduán ni Apu Kesu ta si Kudas yù minánnangal ta pitáka, kagian nayù ira káruán ta nonò da ta kinagi ni Apu Kesu kuna ta umay bì gumátáng ta kanan nga awágad da ta piestá, onu jinok na támma ta umay mangilimù sù ira magáwák. ³⁰ Á pakálâ ni Kudas sù pán, nallowán nga nánaw. Á gabi ngin yù páno na.

Yù Bagu nga Tunung ni Apu Kesu

³¹ Á kapállikuk ni Kudas nga nánaw, kinagi ni Apu Kesu, “Mepalappákin yù keparáyò, sikán nga Kaká na ngámin na tatolay. Á meparáyaw gapay si Namarò megapu nikán. ³² Á ta pangipalappâ ku sù keparáyò ni Namarò, ipalappâ na gapay yù keparáyò. Á dagarágâ yù pangipalappâ na sù keparáyò,” kun ni Apu Kesu.

³³ “Sikayu nga makituddu nikán, sikayu yù ánâ ku,” kun na gapay ni Apu Kesu. “Á mabíkâ lâ paga maggián nikayu. Á aleran nawâ sangaw. Ngam kagiak ku gapay nikayu yù kun na kinagi gangù sù ira karakalán na Kudío, ta ari kayu makángay sù angayák ku. ³⁴ Á yáyù nga kagiak ku nikayu yù bagu nga tunung ku, ta makkaká-iddù kayu. Á kunnay sù ángngiddù ku nikayu, kunnian gapay yù ángngiddù naw sù ira kábulun naw. ³⁵ Ta yáyù pakánnámmuán nayù ira ngámin na tatolay ta sikayu yù kuruk nga makituddu nikán, nu masingad da yù pakkaká-iddù naw.”

Yù Pamalappâ ni Apu Kesu sù Panáji ni Eduru kuna
Mattiu 26:31-35; Markus 14:27-31; Lukas 22:31-34

* 13:18 Salmo 41:9

³⁶ Á iniyabbû na laguk ni Simon Eduru kâ Apu Kesu, “Apu, sisaw angayám mu?” kun na. Á simibbák si Apu Kesu, á kinagi na, “Ari ka lábbi makatuttul níkán sù angayák ku kunangane, ngam tumuttul ka galâ noka níkán,” kun na. ³⁷ Á kinagi ni Eduru kuna, “Apu, anni má, ta aringá mepulû níkaw kunangane? Ta napanákin, mássiki nu metapil yù baggi megapu níkaw,” kun ni Eduru. ³⁸ Á simibbák si Apu Kesu, á kinagi na, “Napanán ken panò nga metapil megapu níkán? Ngam kuruk galâ yawe nga kagiak ku níkaw. Sangaw nu ari paga nagittarákkò yù manù, millu ken nga nakkagi ta arám mà ammu,” kun ni Apu Kesu kâ Eduru.

14

Si Apu Kesu yù Mangiyángay nittam kâ Namarò

¹ Gapu ta kunnian, kinagi ni Apu Kesu paga, “Ari kayu mabbagal ta nonò naw megapu sù kinagi. Ikatalà naw si Namarò, á ikatalà nawà gapay. ² Ta aijan yù kitáru nga paggianán na tatolay sù gián ni Ammò ku. Nu ari kuruk yian, arák ku gemma nakan kagian níkayu. Á ek ku paranán yù paggianán naw. ³ Á kabalik ku mamarán sangaw sù paggianán naw, manolingá saw ta et takayu apan, tapè ilabbè takayu ta balè, á mepaggián kayu níkán. ⁴ Á ammu naw yù angayák ku ána yù dалан nga makáddè tán,” kun ni Apu Kesu.

⁵ Á si Tomâ, kinagi na kuna, “Apu, arám mi gemma ammu yù angayám mu. Á kunnasi laguk pakánnámmu mi ta dалан?” kun na. ⁶ Á kinagi ni Apu Kesu, “Sikán yù meyarík ta dалан nga mappángè kâ Namarò, ta sikán yù mangipakánnámmu ta kuruk, ána sikán yù manotolay. Awán bulubugá ta makángay kâ Ammò Namarò nu ari nga mangikatalà níkán. ⁷ Nu kuruk nga ammu nawà, ammu naw gapay yù Yámà. Á kunangane, ammu nawin yù Yámà ána nasingan nawin,” kun ni Apu Kesu.

⁸ Á pakaginná ni Pilippi karannian, kinagi na, “Apu, ipasingam mu níkami yù Yámam, tapè makáppak kami laguk,” kun na. ⁹ Á kinagi ni Apu Kesu kuna, “Nabayágá nga nepulupulú níkayu, Pilippi, á arán nawà paga ammu? Yù tolay nga nakasingan níkán, nemámmatán na gapay yù Yámà. Ngattá ta kagian mu níkán ta ipasingak ku bì níkayu yù Yámà? ¹⁰ Arám mu paga kurugan ta aijanà sù Yámà, á aijan gapay yù Yámà níkán? Á ari nga naggapu ta urè yù ngámin nga ubobugak ku, nu ari galá naggapu ta ure nayù Yámà. Ta maggián yù Yámà níkán, á aggina yù mangipakuá ta ngámin nga akkuák ku. ¹¹ Manguruk kayu laguk megapu sù kinagi níkayu nga aijanà sù Yámà ána aijan gapay yù Yámà níkán. Á mássiki nu arán naw kurugan yù kinagi níkayu, ngam kurugan naw galá megapu sù pinagaddátù nga makapállà nga nasingan naw,” kun ni Apu Kesu.

¹² Á kinagi ni Apu Kesu paga, “Á kukurugán nga kuruk yù kagiak ku níkayu. Yù tolay nga manguruk níkán, akkuán na gapay yù kunnay sù kingnguá. Á napakáru paga yù makapállà nga akkuán na ánnè sù kingnguá, gapu ta manolingá sù Yámà. ¹³ Á maguray lá yù ipakimállà naw sù Yámà megapu ta panguruk naw níkán, á yáyù akkuák ku tapè meparáyaw yù Yámà megapu níkán. ¹⁴ Nu aijan yù ipakimállà naw megapu sù pangikatalà naw níkán, yáyù akkuák ku,” kun ni Apu Kesu.

Yù Mangilin nga Ikararuá nga Mepaggián nga Mangabbák sù ira Manguruk

¹⁵ Á kinagi ni Apu Kesu, “Nu kuruk nga iddukan nawà, á tuppálan naw yù taddák ku níkayu. ¹⁶ Á makimállaká sù Yámà, ta iyawâ na níkayu yù tanakuán nga mangabbák níkayu, nga mepulupulú níkayu ta áddè ta áddè. ¹⁷ Aggina yù Ikararuá ni Namarò, á ipakánnámmu na níkayu yù kuruk nga meyanung kâ Namarò. Á yù ira tatolay nga ari manguruk, arád da málawá gapu ta arád da ammu ána arád da kánnámmuán. Ngam sikayu, ammu naw, ta sigídá mepulupulú níkayu ána maggián ta nonò naw.

¹⁸ “Á mássiki nu panawát takayu, arát takayu táttájjian nga kun na ulilá, ta manolingá sangaw níkayu. ¹⁹ Á sangaw nu manganánuán, arád dangá masingan nayù ira nga ari manguruk. Ngam sikayu nga manguruk, masingan nawà. Á gapu ta sikán yù sigga-inángá nga manotolay, mepattolay kayu gapay níkán ta áddè ta áddè. ²⁰ Á sangaw nu duttál yù Ikararuá ni Namarò níkayu, yáyù nga pakánnámmuán naw ta aijanà kâ Yámà. Á kánnámmuán naw gapay ta netádday kayu níkán, nga kunnay ta aijanà gapay nga netádday níkayu. ²¹ Á yù tolay nga magginná sù bilik ku ána tángngagan na yù ipakuá kuna, aggina yù mangiddù níkán. Á yù tolay nga mangiddù níkán, iddukan nayù Yámà. Á sikán gapay yù mangiddù kuna, á ipakánnámmu kuna yù ngámin nga meyanung níkán,” kun ni Apu Kesu.

²² Á si Kudas nga tanakuán, nga ari MagIskariote, iniyabbù na laguk kâ Apu Kesu, “Apu, ngattá, ta sikami yù pangipalappátám mu sù nonò mu, ngam ari sù ira ngámin nga tatolay?” kun na. ²³ Á simibbák si Apu Kesu, á kinagi na, “Yù tolay nga mangiddù níkán, tuppálan na yù bilik ku. Á aggina yù iddukan nayù Yámà. Á sikami kâ Yámà yù umay makipaggián kuna. ²⁴ Ngam yù tolay nga ari mangiddù níkán, arán na tuppálan yù bilik ku. Á yù bilik ku nga ginnán naw, ari nga sikán yù paggapuán na nu ari galá nga naggapu sù Yámà nga naddok níkán.

²⁵ “Á kagiak ku nikayu ngámin danniaw ta keggá paga nikayu. ²⁶ Ngam doban na sangaw nayù Yámà yù Mangilin nga Ikararuá nga umay nikayu nga pannakabaggi nga mangabbák nikayu. Á aggina yù mangituddu nikayu sù ngámin nga napiá ána ipanonò na gapay nikayu yù ngámin nga kinagi nikayu.

²⁷ “Á gapu ta panawát takayu sangaw, ibattáng ku nikayu yù ággimammà ku nga maggapu sù nonò ku. Á yù ággimammà ku nga iyawá ku nikayu, awán ta kárik piá na sawe dabbuno. Ari kayu laguk mabburung, ána ari kayu maganásing. ²⁸ Naginná nawin yù kinagi gangù nikayu, nga mánawakin, á manolingà sangaw nikayu. Nu kuruk nga iddukan nawà, magayáyá kayu laguk, gapu ta umayá sù Yámà, á makáwayyá yù Yámà ánnè níkán. ²⁹ Á kinagikin yù pánò nikayu lage na kesimmu na, tapè sangaw nu mesimmu ngin, manguruk kayu laguk. ³⁰ Á aringakin mabbayák nga makiubobuk nikayu, ta umay sangaw yù mammaguray sù ira narákè ta dabbuno. Awán gemma ta awayyá na nga mammaguray níkán. ³¹ Ngam meyanugù yù akkuán na, tapè ipasingak ku ta ngámin nga tolay ta iddukak ku yù Yámà, ána tuppálak ku ngámin yù ipakuá na níkán,” kun ni Apu Kesu nira. Á kabalín na nakkagi karannian, kinagi na nira, “Arà! Gumikkáng kayu laguk, ta mánaw itamin,” kun na.

15

Yù Keyarigán ni Apu Kesu yù Nemulá nga Úbas

¹ Á nagángngarigán si Apu Kesu, á kinagi na sù ira tudduán na, “Sikán yù meyarík sù napiá nga nemulá nga úbas,* á meyarík yù Yámà ta manaron sù nemulá. ² Á tappángan na yù ira pangapangá na nga ari mabbungá, ána pakarenuán na yù ira pangapangá na nga mabbungá, tapè mapakáru yù bungá ra. ³ Á kunnay gapay nikayu, ta napakarenuán kayin megapu sù kuruk nga bilín nga inipakánnámmù nikayu. ⁴ Maggián kayu laguk nga mepattatádday níkán, á maggiánà gapay nga mepattatádday nikayu. Á ta ángngarigán, nu ari maggián yù pangá nayù nemulá sù pun na, ari gemma makapabbungá. Á kunnay gapay nikayu, tanu arán nawà ikatalá nga mangabbák nikayu, arán naw makuá yù napiá nga ipakuá nikayu.

⁵ “Sikán yù kun na pun na úbas nga nemulá, á sikayu yù kun na pangapangá na. Á nu napasigaggá yù ángngikatalá naw níkán, maggiánà nikayu nga mangabbák, á aru yù napiá nga akkuán naw. Ngam nu mesinná kayu níkán, awán bulubugá ta makuá naw nga napiá. ⁶ Á yù tolay nga ari maggián níkán, meyarík ta pangá nga natappáng. Á yù ira pangapangá nga natappáng, monnuk ira nga metabbà ta api nga matuggi.

⁷ “Ngam sikayu, nu napasigaggá yù ángngikatalá naw níkán ána nepittá ta nonò naw yù bilik ku, á maguray lá yù ipakimállá naw kâ Yámà, yáyù mapalurò megapu nikayu.

⁸ Á ta kunnian, meparáyaw yù Yámà megapu sù aru nga napiá nga akka-akkuán naw, ána mepasingan ta kuruk nga sikayu yù makituddu níkán. ⁹ Iddukat takayu. Á kunnay sù ángngiddù nayù Yámà níkán, kunníu gapay yù ángngiddù ku nikayu. Arán nawà laguk ikalurá. Maggián kayu galá níkán, nga mesipá sù ángngiddù ku nikayu. ¹⁰ Nu kurukurugan naw yù itaddák ku nikayu, mesipá kayu sù ángngiddù ku nikayu. Á kunnian gapay níkán, ta kurukurugak ku yù kagian nayù Yámà níkán, ána mesipaká sù ángngiddù na níkán. ¹¹ Á kagiak ku danniawe nikayu, tapè mepagayáyá kayu níkán ána mepallá yù ággayáyá naw nga awán kárik piá na. ¹² Á yawe yù itaddák ku nikayu, ta makkaká-iddù kayu ta kunnay sù ángngiddù ku nikayu.

¹³ “Nu mabbaluntáriu yù tolay nga mangitapil sù baggi na megapu sù ira kopun na, awán ta nepallá nga ángngiddù ánnè sawe. ¹⁴ Á sikayu yù kopuk ku nu tuppálan naw yù itaddák ku nikayu. ¹⁵ Arát takayin laguk ingágan ta aripak ku, gapu ta arán na gemma ammu nayù aripan yù akkuán nayù yápu na. Ingágat takayin ta kopuk ku, gapu ta inipakánnámmù nikayu yù ngámin nga kinagi nayù Yámà níkán. ¹⁶ Á ari sikayu yù nappíli níkán, nu ari galá

* 15:1 Yù ira ginaká ni Israel yù meyarík ta úbas nga inimulá ni Namarò. Innam mu Salmo 80:8-18; Isaya 5:1-2, 7

ta sikán yù nappíli nikayu. Sinullà takayu tapè umay kayu mamalurò sù aru nga napiá nga ipakuá nikayu, ána mannanáyun yù napiá nga akka-akkuán naw. Á yáyù nga maguray lá yù kiddawan naw sù Yámà ta pannakabaggi, yáyù iyawâ na nikayu. ¹⁷ Á yaw itaddák ku nikayu, ta makkaká-iddù kayu.”

Malussaw yù ira ari Manguruk sù ira Manguruk kâ Apu Kesu

¹⁸ Á kinagi ni Apu Kesu, “Ari kayu mapállà nu malussaw nikayu yù ira tatolay nga ari manguruk nikán, ta ammu naw gemma ta sikán yù kegapuánán nayù kalusso ra nikayu. ¹⁹ Á ta ángngarigán nu naggigittá yù nonò naw ta nonò da, ayatad da kayu nakuan. Ngam ari ngin negittá yù nonò naw ta nonò da, gapu ta piníli takayu ta manguruk nikán, á yáyù nga ikalusso ra kayu. ²⁰ Manonò naw yù kinagi nikayu, nga ari notun yù aripan ánnè sù yápu na. Nu jinigirigá dangà, nga Yápu naw, jigirigátad da kayu gapay sangaw. Nu sinángngák da yù kinagi nira, tángngagad da gapay yù kagian naw. ²¹ Á ikalusso ra kayu ána jigirigátad da kayu, gapu ta pangikatalà naw nikán, ta arád da garè ammu yù naddok nikán.

²² “Á nu aringà nakuan minay saw nga umay mangituddu nira, awán ira nakuan ta liwâ. Ngam minayá gemma nangituddu nira, á ari ira manguruk. Á yáyù nga ari ira makalilli sù ikáru ra nga liwâ. ²³ Á yù tolay nga malussaw nikán, ikalusso na gapay yù Yámà. ²⁴ Nu arák ku nakuan pinagaddátu ta arubáng da yù makapállà nga arán na makuá na tanakuán nga tolay, awán ira nakuan ta liwâ. Ngam nasingad da yù akka-akkuák ku, á ikalusso ra kami kâ Yámà. ²⁵ Á nesimmu yaw, tapè mapalurò yù dán nga netúrâ nga ubobuk ni Namarò nga kunniawe:

‘Ikalusso rangà, nga awán ta gapu na.’† ”

²⁶ “Á dobak ku sangaw ta umay saw nikayu yù Mangabbák nga maggapu kâ Yámà. Aggina yù Mangilin nga Ikararuá, nga mangipakánnámmu ta ngámin nga kuruk nga meyanung kâ Namarò, á ipakánnámmu na yù meyanung nikán. ²⁷ Á sikayu gapay yù makkagi ta kuruk nga meyanung nikán, gapu ta sikayu yù mepulupulú nikán áddè ngaw pamegapu na pangituddù,” kun ni Apu Kesu.

16

¹ Á kinagi na paga ni Apu Kesu sù ira tudduán na, “Kinagi nikayu ngámin danniw nga panigirigá da nikayu nayù ira nga ari manguruk, tapè arán naw likuránán yù ángngikatalà naw nikán, mássiki nu anni yù mesimmu sangaw nikayu. ² Ta yù ira kábulun naw nga Kudio nga manangngal sù tunung, papanáwad da kayu sangaw ta kapillíá ra, á arád da kayu patallungan. Á nu aijan yù mamapátay nikayu, kagian na ta arán na liwâ, nu ari galá ta passerbi na kâ Namarò. ³ Á kunnian yù akkuád da nikayu, gapu ta arád da ammu yù Yámà. Á sikán, arád dangà ammu gapay. ⁴ Á kagiak ku danniw nikayu kunungan, tapè sangaw nu duttál yù panigirigá da nikayu, manonò naw laguk yù kinagi nga meyanung sù akkuád da.

Yù Tarabáku nayù Mangilin nga Ikararuá

“Arák ku ngaw kinagi nikayu, gapu ta aijanà paga nikayu. ⁵ Ngam mánawakin sangaw, á manolingà sù Yámà nga naddok nikán. Á awán nikayu ta mangiyabbù nu sisaw angayák ku. ⁶ Ta nakalò yù daddam naw gapu ta kinagi nikayu yù pánò. ⁷ Á kuruk yù kagiak ku nikayu, ta mammapiá yù ággian naw nu panawát takayu. Ta nu arát takayu nakuan panawán, ari nakuan umay yù Ikararuá ni Namarò nga mangabbák nikayu. Ngam nu mánawà sangaw nikayu, dobak ku laguk yù Mangilin nga Ikararuá ta umay maggián nga mangabbák nikayu.

⁸ “Á tappi nayù Mangilin nga Ikararuá saw nikayu, ipakánnámmu na sù ira tatolay ta dabbuno yù meyanung ta liwâ da. Á ipakánnámmu na yù meyanung sù kuruk nga matunung, ána yù meyanung ta pangukum ni Namarò sù ira nga ari manguruk. ⁹ Á gapu ta pangituddu nayù Ikararuá ta meyanung ta liwâ da, á yáyù nga kánnámmuád da ta yá pakaliwâ da kâ Namarò yù panaki da nikán, ta arád dangà ikatalà. ¹⁰ Á ta meyanung ta katunungán, ipakánnámmu nayù Ikararuá gapay ta sikán yù matunung, gapu ta pinalurò ku ngámin yù inipakuá nayù Yámà nikán, á mánawakin nga umay sù Yámà, á arán nawà masingan. ¹¹ Á ipakánnámmu na gapay yù meyanung ta pangukum ni Namarò sù ira nga ari manguruk nikán, gapu ta dán nga napanán yù ángngukum ni Namarò kâ Satanas, nga mammaguray sù ira nga ari manguruk nikán ta dabbuno.

† 15:25 Salmo 35:19; 69:4

¹² “Á aijan paga aru nga arák ku makagi, gapu ta arán naw paga kánnámmuán. ¹³ Ngam sangaw nu umay saw yù Ikararuá ni Namarò, ituddu na nikayu yù ngámin nga kuruk. Á ari yù ure na lápay yù paggapuán nayù ipakánnámmu na, ta ipakánnámmu na lâ yù kuruk nga maginná na kâ Namarò. Á ipalappâ na gapay nikayu yù duttál noka. ¹⁴ Á aggina yù mangiparáyaw níkan, gapu ta ipakánnámmu na nikayu yù kuruk nga maggapu níkan. ¹⁵ Ta kukuá ngámin yù kukuá nayù Yámà. Á yáyù nga kinagi nikayu ta ipakánnámmu na nikayu yù kuruk nga maggapu níkan,” kun ni Apu Kesu.

Yù ira Maraddam nga Mabbáli ta Magayáyâ Sangaw

¹⁶ Á kinagi ni Apu Kesu nira, “Sangaw, á arán nawà masingan. Á ari mabayák, á masingan nawà má,” kun na. ¹⁷ Á nakkaká-ubobuk yù ira káruán nga tudduán na, á kinagi ra, “Anni yawe nga kagian na nittam, nga arát tam sangaw masingan, á ari mabayák, á masingat tam má? Á yù kinagi na paga, nga ‘Manolingà sù Yámà’? ¹⁸ Anni panò yù kebalinán nayù kinagi na nittam, nga ‘sangaw’ ána ‘ari mabayák’? Arát tam kánnámmuán yù kagian na,” kud da.

¹⁹ Á ammu ni Apu Kesu yù ikáyâ da nga iyabbù nakuan kuna, á yáyù nga kinagi na nira, “Yawe panò yù ikáyâ naw nga iyabbù níkan, nu anni yù kebalinán nayù kinagi gangù, nga ‘Sangaw, á arán nawà masingan, á ari mabayák, á masingan nawà má sangaw’? ²⁰ Kukurugán nga kuruk yù kagiak ku nikayu. Sangaw nu arán nawà masingan, makkulukulé kayu, ta nerallâ yù daddam naw. Ngam yù ira nga ari manguruk níkan, magayáyâ ira. Á mepallâ yù daddam naw. Ngam mapatalián yù daddam naw ta pagayáyâ naw, sangaw nu masingan nawà má. ²¹ Á yá keyarigán naw yù babay nga maganá, nga mabagal sù jigâ na ta paganâ na. Ngam ta pallawán nayù abbing, arán nen manonò yù jigâ na gapu ta ayâ na sù anâ na. ²² Á kunnay gapay nikayu, ta nakalò yù daddam naw sangaw. Ngam masingat takayu má sangaw, á mepallâ yù pagayáyâ naw, á awán ta makári ta pagayáyâ naw.

²³ “Á sangaw nu duttál yù ággaw nga pakkakásingat tam má, aringin síkan yù pakkid-dawán naw, nu ari galâ yù Yámà. Á kukurugán nga kuruk yù kagiak ku nikayu, makkiddaw kayu ta pannakabaggi, á maguray lâ yù kiddawan naw sù Yámà, yáyù iyawâ na nikayu megapu sù pangikatalâ naw níkan. ²⁴ Á ta áddè kunangan, ari kayu paga minay nga pannakabaggi nga makkiddaw sù Yámà. Makkiddaw kayu laguk megapu sù pangikatalâ naw níkan, tapè málawâ naw, ána mepallâ yù pagayáyâ naw,” kun ni Apu Kesu.

Yù Pangappù ni Apu Kesu kâ Satanas

²⁵ Á kinagi ni Apu Kesu paga nira, “Pangituddù nikayu, yá ángngituddù nikayu yù pagángngarigán. Ngam sangaw arák ku iyángngarigán yù kagiak ku, ngam ibukalák ku nikayu nga daretíu yù meyannung sù Yámà. ²⁶ Á dattál nayù ággaw, ari ngin síkan yù makimállâ sù Yámà megapu nikayu, nu ari galâ sikayu nga pannakabaggi yù makkiddaw sù Yámà. ²⁷ Ta ayatan na kayu lággapay nayù Yámà, gapu ta ayatan nawâ ána kurugan naw ta síkan yù naggapu kuna. ²⁸ Á si Namarò nga Yámà yù naggapuák ku, á minayâ sawe dabbuno. Á mánawakin sangaw ta dabbuno nga manoli sù Yámà.”

²⁹ Á pakaginnâ ra sù kinagi ni Apu Kesu, nga umayin sù Yámà na, kinagi nayù ira tudduán na, “Á kánnámmuám mi ngin yù kagiam mu, ta malitáwin, gapu ta arám min iniyángngarigán. ³⁰ Á ammu mi ngin ta sikaw yù makánnámmu ta ngámin. Á mássiki nu awán ta mangiyabbù níkaw, ammu yù aijan ta nonò mi. Á yáyù nga manguruk kami ngin ta sikaw yù naggapu kâ Namarò,” kud da kuna.

³¹ Á simibbák si Apu Kesu, á kinagi na nira, “Kuruk panò nga manguruk kayin? ³² Duttál sangaw yù oras, á makkátuay kayu nga mallalabbè ta bale naw, á síkan lâ mabattáng. Ngam aringâ maguroray, ta aijan lâ níkan yù Yámà. ³³ Á kinagi yaw nikayu, tapè magimammâ yù nonò naw megapu sù ketádde naw níkan. Ta keggâ naw ta dabbuno, marigirigâ kayu. Pataggatan naw lâ yù nonò naw, ta ippù kin si Satanas, nga pakiyápuán nayù ira nga ari manguruk níkan.”

17

Yù Pakimállâ ni Apu Kesu megapu sù ira nga Manguruk kuna

¹ Á ta kabalin ni Apu Kesu nagubobuk karannian, nattánguk ta lángi, á nakimállâ kâ Namarò, á kinagi na, “Ammò, jimittálin yù ággò. Iparáyom laguk yù Anâ mu, tapè iparáyo taka gapay. ² Ta iniyawâ mu níkan yù pakáwayyâ sù tolay, tapè iyawâ ku sù ira ngámin nga tatolè yù áttolè ra nga awán ta áddè na. ³ Á yawe yù áttolè ra nga awán ta áddè na, ta pakánnámmuád da ta kuruk nga sikaw si Namarò nga táttáday, ána síkan yù MakKiristu,

nga jinok mu ta dabbuno. ⁴Á meparáyaw ka sawe dabbuno megapu nikán, ta sinuppál kin ngámin yù inipakuám nikán. ⁵Ammò, ipotum mà bi laguk ta arubáng mu, tapè metoli nikán yù dalingárang nayù keparáyò, nga aijan ngaw nikán sù keggá paga nikaw lage na kaparò na dabbuno.

⁶“Sikaw yù inipakánnámmù sù ira tatolay ta dabbuno nga iniyawâ mu nikán. Tatolem ira gemma, á iniyawâ mu ira nikán, á kinuruk da yù bilim mu. ⁷Á nánnámmuád da ta sikaw yù paggapuán nayù ngámin nga kingnguâ. ⁸Ta inituddù nira yù ngámin nga bilim mu nikán, á kinuruk da. Á ammu ra ta kuruk nga sikaw yù naggapuák ku ána sikaw yù naddok nikán.

⁹“Á Ammò ku, aggira yù ipakimállà ku. Arák ku ipakimállà yù ira ngámin ta dabbuno, nu ari galá yù ira nga iniyawâ mu nga mangikatalà nikán, ta tatolem ira gemma. ¹⁰Ngámin yù ira tatolè, tatolem ira gemma, ána ngámin nga kukuám, kukuâ ira gapay. Á meparáyawâ megapu nira.

¹¹“Á mánawâ sangaw ta dabbuno, nga umay nikaw. Ngam mabattáng paga ta dabbuno yù ira tatolay nga iniyawâ mu nikán, gapu ta lubbekakin nikaw. Ammò nga Mangilin, ásigurám mu yù ira tatolè nga iniyawâ mu nikán, megapu sù pakáwayám ta ngámin, tapè maggigittá yù nonò da nga kunnay ta nonò ta. ¹²Á ta keggá paga nira, sikán yù pannakabaggim nga manaron nira. Inásigurák ku yù ira ngámin nga iniyawâ mu nikán, tapè awán ta magawáwán nira, ngam yù tádday lá, tapè mattuppál yù dán nga netúrá nga bilim mu.

¹³“Á lubbekakin nikaw, Ammò. Ngam kagiak ku yawe ta keggá paga nira, tapè maginná ra ána mesipà ira sù pagayáyá ku. ¹⁴Inikatalà ku nira yù bilim mu, á manguruk iren. Á yáyù nga aggira yù ikalusso nayù ira nga ari manguruk, gapu ta kunnay nikán, ari ira mepulù sù ira nga ari manguruk.

¹⁵“Á yawe lá ipakimállà ku nikaw, ta arám mu ira ipánaw ta dabbuno, ngam taronám mu ira, tapè arán na ira melogò ni Satanas. ¹⁶Ta aggira yù kunnay nikán nga ari gemma mepulù sù ira nga ari manguruk, ta ari negittá yù nonò da. ¹⁷Pakarenuám mu laguk yù nonò da megapu sù bilim mu, tapè mabbáli ira ta tatolem nga mangilin. Ta kuruk gemma yù bilim mu. ¹⁸Á kunnay ta paddok mu nikán ta umay sù ira tatolay ta dabbuno, dobak ku ira ta umay ira ta ngámin nga lugár, tapè ipakánnámmu ra yù bilim mu sù ira nga ari paga nakaginná. ¹⁹Á gapu ta ángngiddù ku nira, itulù ku yù baggi nikaw, nga metapil megapu nira, tapè mabbáli ira ta tatolem megapu sù bilim mu,” kun ni Apu Kesu sù Yáma na.

²⁰“Á ari lá yawe ira yù ipakimállà ku, Ammò, nu ari gapay yù ira ngámin nga manguruk nikán noka megapu sù pangituddu ra. ²¹Á yá ipakimállà ku, Ammò, ta naggigittá ngámin yù nonò da, nga kunnay nitta nga naggigittá yù nonò ta, tapè mesipà ira nitta. Á yáyù ipakimállà ku, tapè kurugan nayù ira tatolay ta dabbuno ta sikaw yù naddok nikán. ²²Á iniparáyò ira gapay nga kunnay sù pangiparáyom nikán, tapè mepaggittá yù nonò da nga kunnay ta naggigittá nga nonò ta. ²³Á aijanà nira, nga kunnay ta aijan ka nikán, tapè kuruk nga napiá yù áttatádde na nonò da. Á ta kunnian, kánnámmuán nayù ira nga ari manguruk ta sikaw yù naddok nikán, ána ammu ra ta iddukam mu yù ira nga mangikatalà nikán ta kunnay ta ángngiddù mu nikán,” kun na.

²⁴“Ammò, iniyawâ mu nikán ta tatolè yù ira nga manguruk nikán. Á ikâyâ ku ta mesipà ira gapay noka nikán ta paggianák ku ta lángi, tapè masingad da yù keparáyò ána yù dalingárang ku nga iniyawâ mu nikán sù arán na paga kaparò na dabbuno megapu sù ángngiddù mu nikán. ²⁵Ammò, napiá yù nonò mu nga awán kárik piá na. Á yù ira tatolay nga ari manguruk, arád da ka ammu. Ngam sikán, ammu taka. Á yù ira tatolè nga iniyawâ mu nikán, ammu ra ta sikaw yù naddok nikán. ²⁶Á sikaw yù inipakánnámmù nira, á aringá mattukká nga mangipakánnámmu nikaw, tapè maggiánà nira ána makkaká-iddù ira. Á kunnay sù ángngiddù mu nikán, kunnian gapay yù ángngiddù da sù ira kábulud da.”

18

Yù Paggápù da kâ Apu Kesu

Mattiu 26:47-56; Markus 14:43-50; Lukas 22:47-53

¹Á kabalín ni Apu Kesu nakimállà sù Yáma na, nánaw di Apu Kesu ána yù ira tudduán na ta Jerusalem. Á minay ira sù kamulán ta dammáng na danum na Kidron. ²Á si Kudas, nga nabbalin ta mappagápù kâ Apu Kesu, ammu na gapay yawe lugár nga angayád da, ta yáyù ággangayád da kári Apu Kesu. ³Á inipulù ni Kudas yù ira tangapangan nga suddálu ána yù ira magguárdiá nga jinok nayù ira kátannangán nga pári ána yù ira Parisio. Á minay ira nga konsu ármás ána tulu sù giád di Apu Kesu.

⁴ Á pakáranni nayù ira nagármas sù giád di Apu Kesu ta kamulán, á mássiki nu ammu ni Apu Kesu yù mesimmu kuna sangaw, en na ira jinápun. “Asinni aleran naw?” kun na nira. ⁵ Á simibbák ira, á kinagi ra, “Si Kesu nga taga Nasaret,” kud da. “Sikán yaw,” kun ni Apu Kesu nira. Á aijan nga nepulù nira si Kudas, nga mangituddu kâ Apu Kesu nira.

⁶ Á pakkagi ni Apu Kesu nira, “Sikán yaw,” á nassanuk ira, á natombá ira. ⁷ Á pidduá ni Apu Kesu nangiyabbù nira, á kinagi na, “Asinni aleran naw?” kun na. “Si Kesu nga taga Nasaret,” kud da má. ⁸ Simibbák si Apu Kesu, á kinagi na, “Sikán, kuk ku pá gangù. Á nu sikán lá aleran naw, paguráyán naw yawe ira kábuluk ku, tapè mánaw ira,” kun na. ⁹ Yáyù kinagi na tapè mapaluro yù ngaw kinagi na sù Yáma na, nga kun na, “Yù ira tatolay nga iniyawá mu níkan, awánà bulubugá ta máwáwán nira.”

¹⁰ Á aijan kâ Simon Eduru yù badáng na nga konsu alák. Á inásu na, á kittak na yù talingá nayù aripan nayù kotunán na pári, á nalasápán yù jiwánán nga talingá na. Á si Malkus yù ngágan nayù aripan. ¹¹ Á kinagi na laguk ni Apu Kesu kâ Eduru, “Iyalák mu yù badáng mu. Kagiam mu panò ta arák ku meyangngá yù jigâ ku nga sinullà nayù Yámà níkan?” kun na.

Iyarubáng da si Apu Kesu kâ Annas

¹² Á yù ira suddálu ána yù kapatás da, ána yù ira magguárdiá, ginápù da laguk si Apu Kesu, á bináluk da. ¹³ Á napolu iniyánga ra kâ Annas, nga katugángán ni Kayapas nga kotunán na pári tán nga dagun. ¹⁴ Si Kayapas yù nanabarang sù ira Kudío ta más napiá nu metapil yù tádday nga tolay megapu sù ira ngámin nga tatolay.*

Yù Panáji ni Eduru kâ Apu Kesu

Mattiu 26:69-70; Markus 14:66-68; Lukas 22:55-57

¹⁵ Á paggápù da kâ Apu Kesu, aijan yù ira duá nga sinudduán ni Apu Kesu, di Simon Eduru ána yù tádday paga nga siminuttul nira ta pangituluk da kuna sù kotunán na pári. Á yù kabbulun ni Eduru, ammu na yù kotunán na pári, á yáyù nga nepulù kâ Apu Kesu nga simillung sù nálitukán nga námmuák na bale na pári. ¹⁶ Ngam naggián lá si Eduru ta puertá nayù alitù. Á minay laguk yù kabbulun na nga nakkagi sù babay nga manaron ta puertá, ta patallungan na gapay si Eduru ta námmuák nayù balay.

¹⁷ Tallung ni Eduru, iniyabbù nayù babay kuna, “Ari gapay sikaw yù tádday nga makituddu sù tolay nga ginápù da?” kun na. “Ari sikán,” kun ni Eduru. ¹⁸ Á gapu ta malummin yù gabi, nappagaddul yù ira aripan ána yù ira magguárdiá ta bága, á nanáddak ira nga naggirínu. Á nepaggirínu gapay si Eduru nira.

Yù Pamestigá nayù Kotunán na Pári kâ Apu Kesu

Mattiu 26:59-66; Markus 14:55-64; Lukas 22:66-71

¹⁹ Á paggirínu ni Eduru ta námmuák, aijan ta balay yù kotunán na pári, á binestigá na si Apu Kesu ta meyanung sù ira sinudduán na ána yù meyanung sù ituddu na. ²⁰ Á simibbák si Apu Kesu, á kinagi na kuna, “Sinudduák ku yù ira tatolay ta arubáng na tangapáddabbunán, sù ira kapillíá ra ána sù mangilin nga kapillíá, nga paggagammungán na ngámin na Kudío, á awán bulubugá ta inilímak ku. ²¹ Ngattá, ta sikán yù pangiyabbutám mu? Iyabbù mu lá sù ira tatolay nga nakaginná sù inituddù, ta ammu ra gemma yù kinagi nira,” kun na.

²² Pakkagi na karannian, á lippák nayù tádday nga magguárdiá si Apu Kesu. Á kinagi nayù magguárdiá kuna, “Ngattá, ta kunnian ákkitabbák mu sù kotunán na pári?” kun na. ²³ Á simibbák si Apu Kesu sù magguárdiá, á kinagi na, “Nu nakaliwaták ku nakuan yù ákkitabbák ku kuna, kagiam mu yù liwá ku. Ngam nu kuruk yù kinagi, ngattá, ta lippák má?” kun na. ²⁴ Á yáyù nga nipabáluk ni Annas si Apu Kesu, á inipeyánga na laguk kâ Kayapas, nga kamotungán na pári.

Yù Pillu nga Panáji ni Eduru kâ Apu Kesu

Mattiu 26:71-75; Markus 14:69-72; Lukas 22:58-62

²⁵ Á nepattáddak lá paga si Simon Eduru nga mepaggirínu nira. Á kinagi ra kuna, “Ari sikaw gapay yù tádday nga tudduán na?” kud da. “Ari sikán,” kun ni Eduru. ²⁶ Á aijan yù tádday nga aripan nayù pári, nga kanakanáyun nayù tolay nga kittak ni Eduru, á iniyabbù na kâ Eduru, “Ari sikaw yù nasingak ku gangù nga kabbulun na túrin ta kamulán?” kun na. ²⁷ Á nilímak na má ni Eduru. “Ari,” kun na. Á dagarágá nagittarákkò yù manù.

Yù Pamestigá ni Gubinador Pilatto kâ Apu Kesu

Mattiu 27:1-2, 11-14; Markus 15:1-5; Lukas 23:1-5

* 18:14 Kuan 11:49-50

²⁸ Á ta alippánawák, lage na lussáng yù bilák, inipáno ra si Apu Kesu ta palásiu ni Kayapas, á ed da iniyángay sù palásiu nayù gubinador nga taga Roma. Ngam yù ira Kudio nga nangiyángay kuna, ari ira simillung sù palásiu, ta nu tullung ira nakuan sù bale na ari Kudio, á ari ira meyanugù nga kumán sù Piestá na panaddamád da ta pattalebák nayù daroban ni Namarò, gapu ta mebiláng ira ta marapingán. ²⁹ Á yáyù nga nallawán si Gubinador Pilatto nira, á iniyabbù na sù ira Kudio, “Anni ipangikeká naw sawe tolay?” kun na. ³⁰ Á simibbák ira, á kinagi ra kuna, “Nu awán ta liwá na, arám mi nakuan ikeká nikaw,” kud da.

³¹ Á kinagi ni Gubinador Pilatto nira, “Apan naw laguk, ta sikayu mabbestigá kuna ta meyanung sù tunung na Kudio,” kun na. Á kinagi nayù ira Kudio kuna, “Awán ta awayyá mi nga mamagikáru kuna ta patay, ta sikayu lá nga taga Roma yù makáwayyá nga mamagikáru ta tolay ta pate na ta kurù,” kud da. ³² Á nesimmu yaw, tapè mattuppál yù kinagi ni Apu Kesu nga meyanung sù ámmapáte ra kuna.

³³ Á simillung si Pilatto laguk sù palásiu na, á inipágál na si Apu Kesu, á iniyabbù na kuna, “Sikaw panò yù patul nayù ira Kudio?” kun na. ³⁴ Á simibbák si Apu Kesu, á kinagi na, “Asinni nakaginnám mu? Naggapu panò ta nonò mu, onu egga panò yù nakkagi nikaw?” kun na. ³⁵ Á simibbák si Pilatto, á kinagi na, “Kudiongá panò? Yù ira ikáttolem nga Kudio ána yù ira kátannangán nga pári yù mangikeká nikaw. Anni panò kingnguám nga ipangikeká ra nikaw?” kun na. ³⁶ Simibbák si Apu Kesu, á kinagi na, “Tanakuán yù pammagurayák ku, nga ari saw dabbuno. Nu saw dabbuno nakuan yù pammagurayák ku, makigerrá nakuan yù ira tatolè, tapè arád dangá magápù nayù ira Kudio. Ngam ari saw dabbuno yù pammagurayák ku,” kun na.

³⁷ Á kinagi ni Pilatto kuna, “Á kuruk nga patul ka lagugam?” kun na. Á simibbák si Apu Kesu, á kinagi na, “Sikaw yù nakkagi ta patulá. Á yawe inikeyaná ku ta dabbuno, tapè ituddù yù meyanung sù kuruk. Á yù ira tatolay nga makánámmu sù kuruk, magginná ira sù kagiak ku,” kun na. ³⁸ Á kinagi ni Pilatto kuna, “Anni panò yù kuruk?” kun na.

Kabalin na nagubobuk karanniaw, minay si Pilatto sù gián nayù ira Kudio ta lawán, á kinagi na nira, “Awán bulubugá ta ammù nga liwá na,” kun na. ³⁹ “Ngam aijan yù kustombare naw nga palubbángak ku yù tádday nga nebáluk megapu sù piestá na panaddamán naw ta pattalebák nayù daroban. Gustu naw ta palubbángak ku yawe Patul na Kudio?” kun ni Pilatto nira. ⁴⁰ Ngam nagagga-aggay ira, á kinagi ra, “Ari yawe tolay, ngam si Barabas yù palubbángam mu,” kud da. Á tulisán si Barabas.

19

*Karagátan ni Pilatto nga Mamalubbáng ká Apu Kesu
Mattiu 27:15-31; Markus 15:6-20; Lukas 23:13-25*

¹ Á gapu ta piníli nayù ira Kudio si Barabas ta mapalubbáng, yáyù inipapaligá na laguk ni Gubinador Pilatto si Apu Kesu. ² Á yù ira suddálu, nilubik da yù sí nga pidde ra ta kun na kuroná, nga pine ra sù ulu na. Á binarawasiád da ta ujjojjin nga kun na barawási na patul. ³ Á jimikkí ira kuna, á inuyoyungád da. Kinagi ra kuna, “Maráyaw ka, sikaw nga patul na Kudio!” kud da. Á lippilipák da.

⁴ Á minay laguk si Pilatto ta lawán sù ira Kudio, ta en na má kinagi nira, “Iyarubáng ku nikayu, tapè kánámmuán naw ta awán ta ammù nga liwá na,” kun na. ⁵ Á yáyù nga nallawán si Apu Kesu nga neyarubáng nira, nga nakuronán paga ta sí ána nabbarawási ta ujjojjin nga kun na patul. Á kinagi ni Pilatto nira, “Ye! Innan nawè yawe tolay!” kun na.

⁶ Á yù ira kátannangán nga pári na Kudio ána yù ira magguárdiá sù mangilin nga kapillíá, pakasingad da ká Apu Kesu, nga napaligá ána nakuronán ta sí, nagagga-aggay ira, á kinagi ra, “Papatáyam mu! Ipepátá mu ta kurù!” kud da. Á kinagi ni Pilatto nira, “Apan naw laguk, ta sikayu lággapay mangipátá kuna, ta awán ta ammù nga liwá na,” kun na. ⁷ Á simibbák yù ira Kudio, á kinagi ra ká Pilatto, “Aijan yù tunung na Kudio nga makkagi ta mepánggá nu mapagikáru ta patay yawe tolay, gapu ta pabbalanan na ta dios yù baggi na, ta kinagi na ta aggina yù Aná ni Namarò,” kud da.

⁸ Pakaginná ni Pilatto sù kinagi ra nga meyanung ká Apu Kesu, nga aggina yù Aná ni Namarò, nakalò yù assing ni Pilatto. ⁹ Á simillung sù palásiu na, á iniyabbù na ká Apu Kesu, “Naggapuám mu?” kun na. Ngam arán na bulubugá ni Apu Kesu sinabbák. ¹⁰ Á kinagi ni Pilatto kuna, “Ngattá, ta arám mà tabbagan?” kun na. “Arám mu panò ammu ta egga yù pakáwayyá nga mamalubbáng nikaw? Á egga gapay yù pakáwayyá nga mangipepátá nikaw ta kurù,” kun ni Pilatto. ¹¹ Á simibbák si Apu Kesu, á kinagi na kuna, “Awán nakuan

ta pakawayyám nikán nu arán na iniyawâ ni Namarò nikaw. Á yáyù nga narámmâ yù liwâ nayù mangikeká nikán ta arubáng mu ánnè sù liwâ mu,” kun ni Apu Kesu.

¹² Pakaginná ni Pilatto sù kinagi ni Apu Kesu, á nappaná yù pakkaragá na nga mamalubbáng kuna. Ngam yù ira Kudio, pine ra má nagagga-aggay, á kinagi ra, “Nu palubbángam mu yawe tolay, arán na ka kopun ni Patul Sisar.* Ta kinagi nayù tolay ta aggina yù patul, á yáyù nga kontarán na si Patul Sisar nga patul tam,” kud da. ¹³ Pakaginná ni Pilatto karannian, pinalawán na má si Apu Kesu. Á minay si Pilatto nagitubang sù ággitubangán na kues. Naratagán ta batu nga nalínis yù gián nayù ággitubangán na, nga Gabbata yù ngágan na ta ággubobuk nga Kebru.

¹⁴ Á pagitubang ni Pilatto nga mamestigá kâ Apu Kesu, mággè tangngá na ággawin, nga ággaw nayù papparán nayù ira Kudio ta piestá ra. Á kinagi ni Pilatto nira, “Innan nawè yawe patul naw!” kun na. ¹⁵ Á nagagga-aggay yù ira Kudio, á kinagi ra, “Ipepánom! Ipepátém! Ipepátá mu ta kurù!” kud da. Á kinagi ni Pilatto nira, “Yawe yù patul naw! Ngattá, ta ipepátá ku nakuan ta kurù yù patul naw?” kun na. Á simibbák yù ira kotunán nga pári, á kinagi ra, “Awán ta patul mi nu ari lá si Patul Sisar túrin ta Roma!” kud da. ¹⁶ Á yáyù nga iniyawâ na laguk ni Pilatto nira, ta ipepátá da ta kurù.

Yù Pangipátà da kâ Apu Kesu ta Kurù

Mattiu 27:32-44; Markus 15:21-32; Lukas 23:26-43

¹⁷ Á yáyù nga inâ nayù ira suddálu si Apu Kesu, á inipakáttu ra kuna yù kurù nga pangipátakád da sangaw kuna. Á iniyángo ra ta puddng nga mangngágan ta Golgota sù ággubobuk nga Kebru, á yù kebalinán na yù Gián na Balakábá.

¹⁸ Á pakáddè da ta gián na Golgota, inipátá nayù ira suddálu si Apu Kesu ta kurù. Á inipátá da gapay yù duá nga tolay ta kurù, nga pinatáddak da. Á pine ra si Apu Kesu ta tangngá ra. ¹⁹ Á inipetúrâ ni Pilatto yù panákkilálán nga pine ra ta utun na kurù, nga kunniaw yù kinagi na, “Yawe si Kesu nga taga Nasaret, yù Patul na Kudio,” kun nayù inipetúrâ na. ²⁰ Yáyù inipetúrâ na ta tallu nga makkakerumá nga ággubobuk, yù ággubobuk na Kudio, ánnay yù Latin nga ággubobuk na taga Roma, ánnay yù ággubobuk na Gareko gapay. Á aru yù ira Kudio nga nabbibbik sù netúrâ, ta aranni ta ili yù nangipátakád da kuna.

²¹ Á yù ira kátannangán nga pári na Kudio, kinagi ra kâ Pilatto, “Arám mu nakuan itúrâ, ‘Yù Patul na Kudio.’ Kunniawe lá nakuan itúrâ mu, ‘Yawe tolay, kinagi na ta aggina yù Patul na Kudio,’” kud da. ²² Á simibbák si Pilatto, á kinagi na nira, “Yù initúrâ ku, netúrâkin. Aringin mapatalián,” kun na.

²³ Á kabalid da nangipátá nayù ira suddálu kâ Apu Kesu, inâ da yù gagámi na ta baggi na, á pinakkáppá da sù pabballe ra. Ngam yù apaddu nga barawási na, arád da pinakkáppá, ta inabal nga ari naragè. ²⁴ Á yáyù nga nakkaká-ubobuk ira, á kinagi ra, “Arát tam pisalan yawe, ngam mabbibinnúnú ittam bi, tapè ammu tam yù makálâ kuna,” kud da. Yáyù nesimmu tapè mapatuppál yù dán nga netúrâ sù libru nga ubobuk ni Namarò, nga kunniaw: “Nabbaballáyád da yù gagámi ku, á nabbibinnunutád da yù barawási.”† Á yáyù kingnuá nayù ira suddálu.

²⁵ Á aijan tán di yená ni Apu Kesu nga nanáddak ta aranni ta kurù, aggira ánnay yù wagi na yená ni Apu Kesu nga babay, á si Maria nga atáwa ni Kalopas, ánnay si Maria Maddala. ²⁶ Á pakasingan ni Apu Kesu kári innò na ánnay yù sinudduán na nga iddukan na, kinagi ni Apu Kesu sù innò na, “Innò, aná mu yù tolay nga kataging mu,” kun na. ²⁷ Á kinagi na laguk sù sinudduán na, “Yená min yane,” kun na. Á yáyù nga inâ na yù yená ni Apu Kesu ta makipaggián kuna ta bale na tán nga ággaw.

Yù Pate ni Apu Kesu

Mattiu 27:45-56; Markus 15:33-41; Lukas 23:44-49

²⁸ Á ta kabalín na yaw, ammu ni Apu Kesu ta nabalinín ngámin. Á kinagi na laguk, “Makenumá,” kun na. Yáyù kinagi na tapè mapaluré yù dán nga netúrâ nga ubobuk ni Namarò. ²⁹ Á aijan tán yù angáng nga napannu ta binaráyáng, nga náppa nga inuman nayù ira suddálu. Á nisoso ra yù áttabbatabbúru kuna, á pine ra ta tuppák na káyu. Á inigawá da ta simù na. ³⁰ Á pakakákkâ ni Apu Kesu kuna, kinagi na, “Netuppálin ngámin!” kun na. Á nakkummagin, á nagattá yù inángá na.

* **19:12** Si Patul Sisar yù kotunán nga mammaguray ta Roma. Á aru yù purubinsia sù pammagurayán na. Á sinullá na si Gubinador Pilatto ta mammaguray ta purubinsia na Judiya. † **19:24** Salmo 22:18

Yù Pamíká nayù Suddálu ta Bikà ni Apu Kesu

³¹ Á gapu ta ággo nayù papparád da ta piestá, minay yù ira Kudío, á kinagi ra kâ Pilatto ta ipakattu na yù tuláng na takki nayù ira nepátá, tapè mabi ira matay áнна mári ira sù kurú, ta ari mepángngà nu naggián yù pate ra ta kurú ta pappiestá ra, gapu ta mangilin nga ággaw na Sabadu. ³² Á yáyù nga minay yù ira suddálu, á kittu ra yù tuláng na takki nayù ira duá nga kábulun ni Apu Kesu nga nepátá. ³³ Ngam pakáddè da kâ Apu Kesu, nasingad da ta natayin, á arád da kittu yù takki na. ³⁴ Ngam yù tádday nga suddálu, piniká na yù bikà ni Apu Kesu, á dagarágâ nallawán yù dága áнна danum.

³⁵ Á yù tolay nga nakasingan sù kesimmu na ngámin karanniw, aggina yù nangitúrá sawe, á kuruk ngámin yù inistoriá na, ta ammu na gemma yù nesimmu. Á kuruk ngámin yù kinagi na, tapè manguruk kayu gapay. ³⁶ Nesimmu danniw tapè mapalurò yù dán nga netúrá nga ubobuk ni Namarò nga kunniaw:

“Awán bulubugá ta makattu nga tuláng na.”†

³⁷ Á ajjan gapay yù netúrá nga kunniaw:

“Inni-innad da yù piniká ra.”§

Yù Pangitanam da kâ Apu Kesu

Mattiu 27:57-61; Markus 15:42-47; Lukas 23:50-56

³⁸ Á ajjan yù tádday nga makituddu kâ Apu Kesu, si Kusè nga taga Arimatia. Ngam inilímak ni Kusè yù ángguruk na gapu ta assing na sù ira karakálán na Kudío. Á pakarámak ni Kusè ta natayin si Apu Kesu, minay kâ Pilatto, ta en na kiddawan yù baggi ni Apu Kesu, tapè itanam na. Á inanugù ni Pilatto, á en na iná yù baggi ni Apu Kesu, nga inipáno na.

³⁹ Á nepulú kâ Kusè si Nikudemu. Si Nikudemu yù nallammang ngaw sù ánge na kâ Apu Kesu ta gabi. Á inipulú na yù bábbanguk nga mirrá áнна álo nga nekiruk, nga límápu lu nga kílo yù kárammá na. ⁴⁰ Á pangá da sù baggi ni Apu Kesu, pinatáputád da ta puraw nga sinnun nga napayán sù bábbanguk ta kun na kustombare na Kudío. ⁴¹ Á ajjan tán yù kamulán nga aranni sù nangipátakád da kâ Apu Kesu. Egga sù kamulán yù kuebá nga kapákkokok lá paga nga pangitanamád da nakuan, ngam awán paga bulubugá ta netanam tán. ⁴² Á gapu ta maddaggunin yù nanginá nga ággaw na Sabadu, nga ággibannák na Kudío, áнна aranni yù kuebá sù nangipátakád da ta kurú, á yáyù nga inikúrák da nga initanam tán yù baggi ni Apu Kesu.

20

Matolay si Apu Kesu!

Mattiu 28:1-8; Markus 16:1-8; Lukas 24:1-12

¹ Pappasá na ággibannák da, á ta alippánnawák na Liggu, minay di Maria Maddala sù tanam ni Apu Kesu. Labbè da ta kuebá, nasingad da ta náringin yù dakal nga batu nga iniserrá ra ta puertá na kuebá nga nangitanamád da kuna. ² Á nakkarerá si Maria nga minay kári Simon Eduru áнна yù tádday nga sinudduán ni Apu Kesu nga iddukan na. Á kinagi ni Maria nira, “Iniriád da si Apu sù tanam, á arám mi ammu yù nangikuád da kuna,” kun na.

³ Á pakaginná ra sù kinagi ri Maria, dagarágâ nga minay di Eduru áнна yù tádday nga sinudduán ni Apu Kesu nga iddukan na, nga nappángè sù tanam. ⁴ Nakkarerá ira, á napolu nga nakáddè sù kuebá yù tádday, nga kabbulun ni Eduru. ⁵ Á nakkummak, á nilákkawán na yù unak na tanam. Á nasingan na ta awánin si Apu Kesu. Nasingan na lâ yù sinnun nga neputápu nga kimibbá, ta awánin ta mayán na. Ngam ari simillung.

⁶ Á pakáddè na gapay ni Simon Eduru ta puertá na kuebá, dagarágâ nga inoluán na yù kabbulun na nga simillung sù unak na tanam, á nasingan na gapay yù sinnun nga nabattáng, ⁷ áнна yù gámi nga inibubud da ngaw ta mammang na, nga náringin nga nakappil áнна nesinná ta baddi sù káruán na sinnun. ⁸ Á yù tádday nga sinudduán ni Apu Kesu nga napolu sù tanam na, simillung gapay ta en na iningan. Pakasingan na ta awánin, nangurugin ta naginnanolayin. ⁹ Ta mássiki nu nepalappá sù dán nga netúrá nga ubobuk ni Namarò yù meyanung sù máwák ni Apu Kesu nga matay áнна maginnanolay, arád da paga nánámmuán yù dán nga netúrá. ¹⁰ Á pakasingad da ta awán ta baggi ni Apu Kesu tán, nánaw ira laguk nga limibbè ta bale ra.

Yù Pappasingan ni Apu Kesu kâ Maria Maddala

Mattiu 28:9-10; Markus 16:9-11

† 19:36 Salmo 34:20 § 19:37 Sakariá 12:10

¹¹ Ngam si Maria Maddala, naggián lâ nga nakkulè ta lawán na tanam. Pakkulè na, nakkummak nga iningan na yù unak na kuebá. ¹² Á palláko na ta unak, nasingan na yù duá nga daroban ni Namarò nga nabbarawási ta puraw, nga nagitubang sù naggianán na gangù na baggi ni Apu Kesu. Naggián yù tádday nga daroban sù uluán na, á naggián yù mekaruá sù kiddanán na. ¹³ Á pakasingan nayù ira daroban kê Maria, kinagi ra kuna, “Anni ipakkulè mu?” kud da kuna. Á kinagi na nira, “Inâ da garè si Yápù, á inipáno ra, á arák ku ammu yù nangipeddád da kuna,” kun na.

¹⁴ Á kabalín ni Maria nakiubobuk sù ira daroban, nallipay, á nasingan na si Apu Kesu nga nanáddak tán, nga arán na tákkilalán. ¹⁵ Á kinagi ni Apu Kesu kuna, “Abè, anni ipakkulè mu?” kun na. “Asinni aleram mu?” kun na. Á kagian ni Maria ta yù minámmulá yù makiubobuk kuna, á yáyù kinagi na kuna, “Tíyu, nu sikaw yù nangâ kuna, kagiam mu bì yù nangipeddám mu kuna, ta ek ku apan,” kun na. ¹⁶ Á kinagi ni Apu Kesu kuna, “Maria,” kun na. Nallipay si Maria, á kinagi na kuna sù ággubobuk nga Kebru, “Rabboni!” kun na. Á yù kebalínán na, “Mesturul!”

¹⁷ Á kinagi na laguk ni Apu Kesu kuna, “Arám mà igaggak, ta aringà paga minay ta lángi sù Yámâ. Ngam em mu bì kagian sù ira wáwwagi ta umayakin ta lángi sù gián nayù Yámâ, nga Yáma naw gapay. Aggina yù Yápù nga pakimorayák ku ána yù Yápu naw gapay nga pakimorayán naw,” kun na. ¹⁸ Á nánaw laguk si Maria Maddala, á en na kinagi sù ira sinudduán ni Apu Kesu, “Nasingak ku si Apu!” kun na. Á kinagi na nira yù ngámin nga kinagi ni Apu Kesu kuna.

*Yù Pappasingan ni Apu Kesu sù ira Sinudduán na
Mattiu 28:16-20; Markus 16:14-18; Lukas 24:36-49*

¹⁹ Á ta gabi na Liggu, naggagammung yù ira sinudduán ni Apu Kesu ta lágum na balay. Nelitù yù puertá na, ta maganássing ira sù ira karakalán na Kudío. Á limittuák laguk si Apu Kesu sù giád da. Á kinagi na nira, “Ajjawâ saw. Mapagimammâ yù nonò naw,” kun na nira. ²⁰ Á inipasingan na laguk nira yù limá na ána yù bikâ na. Á ayatán ira ta pakasingad da sù Yápu ra. ²¹ Á pidduán na laguk ni Apu Kesu yù kinagi na nira, “Mabannáyán kayin ána mapagimammâ yù nonò naw. Dobat takayin ta kunnay sù paddok nayù Yámâ níkán, ta umay kayu mangipakánámmu níkán,” kun na. ²² Á pakkagi na karannian, inisù na ira, á kinagi na nira, “Alawatan nawin yù Mangilin nga Ikararuá. ²³ Á nu pakomán naw yù liwá nayù ira tatolay, pakomán ni Namarò ira gapay. Ngam nu arán naw pakomán yù liwá da, arán na ira gapay pakomán ni Namarò,” kun na.

Yù Pappasingan ni Apu Kesu kê Tomâ

²⁴ Á pappasingan ni Apu Kesu sù ira sinudduán na, awán lâ si Tomâ, nga tádday sù ira mapulu duá nga iningágad da ta Jiping. ²⁵ Á yáyù nga kinagi nayù ira káruán nga sinudduán ni Apu Kesu, “Nasingam mi si Apu,” kud da. Ngam kinagi ni Tomâ nira, “Nu arák ku masingan yù pilâ nga napátakán ta limá na, ána nu arák ku karápan gapay yù pilâ ta limá na ána yù bikâ na nga piniká ra, á arák ku kurugan,” kun na.

²⁶ Á pappasá na walú nga ággaw, sù tádday Liggu, naggagammung yù ira sinudduán ni Apu Kesu mángin sù balay. Á aijanin gapay nira si Tomâ. Nelitù yù puertá. Á limittuák si Apu Kesu nira, á kinagi na, “Mabannáyán kayin, ána mapagimammâ yù nonò naw,” kun na. ²⁷ Á kinagi na laguk kê Tomâ, “Innam mu yù pilâ na limá. Á em mu ira karápan ána yù bikâ ku nga piniká ra, tapè ari ka mabbábáng nga manguruk,” kun na. ²⁸ Á simibbák si Tomâ, á kinagi na kuna, “Sikaw yù Yápù! Sikaw yù Pakimorayák ku,” kun na. ²⁹ Á kinagi ni Apu Kesu, “Tomâ, napiá ta manguruk ka gapu ta pakasingam mu níkán. Á mepallá yù pagayáyá nayù ira nga manguruk, mássiki arád dangâ masingan,” kun na.

Netúrâ Yawe Líbru tapè Manguruk kayu

³⁰ Á aru paga yù makapállá nga pinagaddátu ni Apu Kesu ta arubáng nayù ira sinudduán na, nga ari netúrâ sawe líbru. ³¹ Á netúrâ danniawe, tapè kurugan naw ta si Apu Kesu yù MakKíristu nga Aná ni Namarò nga Makáwayyá nga Mangiyígù. Ta nu kurugan naw ána ikatalá naw, mepattolay kayu kuna ta ádde ta ádde.

21

Yù Pappasingan ni Apu Kesu sù ira Pitu ta Aggik na Bebay

¹ Ta kabalín na yaw, nappasingan má si Apu Kesu sù ira sinudduán na ta keggá ra ta aggik na bebay na Tiberio. Nesimmu ta kunniawe. ² Nappupúliú di Simon Eduru, ána si Tomâ

nga iningágad da ta Jiping, si Nataniel nga taga Kana sù purubinsia na Galilia, yù ira duá nga ánâ ni Sebedo, áнна duá ira paga nga sinudduán ni Apu Kesu. ³ Á kinagi ni Simon Eduru nira, “Ek ku magissirá.” Á kinagi ra kuna, “Á em mi sikaw bulunan,” kud da kâ Eduro. Á minay ira nappittâ ta barangay. Á tangatangagabi ira nga nanígay, ngam awán bulubugá ta nálâ da.

⁴ Á ta alippánawák, aijan si Apu Kesu nga nanáddak ta aggik na bebay, ngam arád da natákkilalan nayù ira sinudduán na. ⁵ Á kinatolán ni Apu Kesu ira, á iniyabbû na, “Kopun, egga panò yù nálâ naw?” kun na. “Awán,” kud da kuna. ⁶ Á kinagi na nira, “Itán naw lâ ta jiwánan na barangay, ta yá pakálapán naw,” kun na. Á yáyù inítad da, á arád den mákká gapu sù napakáru nga inâ na.

⁷ Á yáyù nga kinagi na laguk kâ Simon Eduru nayù tádday nga sinudduán ni Apu Kesu nga iddukan na, “Ye, si Apu!” kun na. Á pakaginná ni Eduru ta kuruk nga si Apu, inisillong na yù barawási na, ta nagilongán nga mattarabáku, á nakkassù sù danum ta umay ta aggik. ⁸ Á yù ira káruán nga nabattáng sù barangay, naporían ira nga umay ta aggik, á ginuggud da yù sígay nga napannu ta sirá. Aranni ira lâ ta aggik, ta magatù nga metro lâ támma yù kárayyu ra.

⁹ Á pakáddè da ta aggik, gimitták ira, á nasingad da yù bága na api áнна yù dán nga nesuppá nga sirá áнна pán gapay. ¹⁰ Á kinagi ni Apu Kesu nira, “Mangâ kayu bì sù sirá nga inâ naw, á iyánge naw saw,” kun na.

¹¹ Á yáyù nga minay si Simon Eduru ta barangay, á inigon na yù sígay ta kannak, nga napannu ta darakal nga sirá. Magatù ta límápu tallu yù biláng na sirá. Á mássiki nu aru yù nálâ na, ngam ari napsil. ¹² Á kinagi na laguk ni Apu Kesu nira, “Umay kayu bì kumán,” kun na. Á awán nira ta nakeyabbû kuna nu asinni, ta ammu ra ta si Apu. ¹³ Á en na laguk inâ ni Apu Kesu yù pán, á bille na nira. Á kunnay gapay sù sirá, bille na nira. ¹⁴ Á yane yù mekatallu nga pappasingan ni Apu Kesu sù ira sinudduán na áddè sù paginnanole na.

Yù Kinagi ni Apu Kesu kâ Simon Eduru

¹⁵ Á kabalid di Apu Kesu kiminán, iniyabbû na laguk ni Apu Kesu kâ Simon Eduru, “Simon, nga anâ ni Kuan, nepallâ panò yù ángngiddù mu níkán ánnè karannian?” kun na. Á kinagi ni Eduru kuna, “Wan, Apu, ammum ta ayatat taka,” kun na. Á kinagi ni Apu Kesu kuna, “Taronám mu laguk yù ira mangikatalâ níkán, ta meyárik ira ta kígò,” kun na. ¹⁶ Á pidduán ni Apu Kesu nga iyabbû kâ Eduru, nga kun na, “Simon, nga anâ ni Kuan, egga panò yù ángngiddù mu níkán?” kun na. Á kinagi na má ni Eduru kuna, “Wan, Apu. Ammum ta ayatat taka,” kun na. Á kinagi ni Apu Kesu kuna, “Taronám mu laguk yù ira tatolè nga meyárik ta karnerù,” kun na.

¹⁷ Á pillu ni Apu Kesu nga iyabbû kâ Eduru, “Simon, nga anâ ni Kuan, egga panò yù ayâ mu níkán?” kun na. Á maraddam si Eduru gapu ta namillu si Apu Kesu nga nangiyabbû kuna. Á kinagi ni Eduru kuna, “Apu, ammum ngámin. Ammum ta ayatat taka,” kun na. Á kinagi na laguk ni Apu Kesu kuna, “Taronám mu yù ira tatolè nga meyárik ta karnerù. ¹⁸ Kukurugán nga kuruk yù kagiak ku níkaw. Áddè sù ngaw kabagitolem, sikaw lággapay yù mamarawási ta baggim áнна sikaw lággapay yù maguray ta angayám mu. Ngam nu mallakalákay ka noka, á tanakuán yù mabbáluk ta baggim. Á sonnatam mu yù límám, á iyánge naka ta arám mu ikáyâ nga angayán,” kun na. ¹⁹ Yáyù kinagi ni Apu Kesu ta ipakánámmu na yù áppate ni Eduru noka tapè meparáyaw si Namarò. Á kabalín na nakkagi ni Apu Kesu karannian, kinagi na laguk kâ Eduru, “Tuttulam mà,” kun na.

Yù Kinagi ni Apu Kesu nga Meyannung sù Sinudduán na nga Iddukan na

²⁰ Á nallipay si Eduru laguk, á nasingan na ta likuk da yù tádday nga tumuttuttl nira. Aggina yù sinudduán ni Apu Kesu nga iddukan na, nga kataging na ngaw sù pakkákád da lage na pate na. Á aggina yù nangiyabbû kâ Apu nu asinni yù mappagápù kuna. ²¹ Á pakasingan ni Eduru sù kabbulun na ta likuk da, kinagi na kâ Apu Kesu, “Apu, anni panò yù mesimmu sangaw sawe tolay?” kun na. ²² Á kinagi ni Apu Kesu kuna, “Á ta ángngarigán nu ikáyâ ku ta matolay yane tolay ta dabbuno ta áddè ta panoli saw, síkán lâ yù makánámmu. Paguráyám mu lápay. Tumuttul ka níkán!” kun na. ²³ Á yáyù nga neparámak sù ira kábulud da nga makituddu kâ Apu ta ari matay yane sinudduán na. Ngam arán ni Apu Kesu kinagi ta ari matay. Yá lâ kinagi na, “Ta ángngarigán nu ikáyâ ku ta matolay yane tolay ta dabbuno ta áddè ta panoli saw, síkán lâ yù makánámmu,” kun na kâ Eduru. ²⁴ Á yane sinudduán

ni Apu Kesu nga ubobugan na, aggina yù mangipakánnámmu karanniaw nga nesimmu. Á aggina yù nangitúrâ, á ammu mi ta kuruk yù ngámin nga kinagi na.

²⁵ Á aru paga yù kingngikingingúá ni Apu Kesu. Á nu metúrâ nakuan ngámin, ari mopù. Á ta urè, ari támma mekárgá yù paketúratán na ta tangapáddabbunán.

Yù Kingngikingnguá nayù ira Olu nga Minángngilayalayâ

Yù Meyannung sù Túrâ

Yawe yù mekaruá nga libru nga iníturâ ni Lukas, nga doktor nga nepulupulú ngaw sù ira káruán nga minángngilayalayâ. Á yù olu nga libru nga iníturâ ni Lukas **Yù Napiá nga Dámak**. Á tán nga libru, kinagi na yù ngámin nga kingnguá na ngaw ni Apu Kesu áddè ngaw ta pamegapu na mangituddu, ta áddè ta kálâ na ta lángi (Kingnguá 1:1-2).

Á sawe libru, uputan ni Lukas nga istorián yù nesimmu sù ira mangikatalâ kâ Apu Kesu ta pamaluruò da sù kinagi ni Apu nira. Ta kinagi ni Apu, “Ilayalayâ naw yù ngámin nga meyannung níkan sawe ili na Jerusalem, ána ngámin táne lugár na Judiya, ána tuke lugár na Samaria, ta áddè túrin ta pagáddekan na dabbuno” (Kingnguá 1:8). Á nassamá yù napiá nga dámak nga meyannung kâ Apu Kesu Kiristu ta ngámin nga lugár ta tangapáddabbuno. Á yáyù nga nepakánnámmu sù ira ngámin nga tatolay nga Kudio ána yù ira makkakerumá nga ari Kudio gapay yù awayyá ra nga mabbabáwi ta liwiliwá da ána makiyápu ira kâ Apu Kesu, tapè meyigù ira.

Á yù ira ngaw Kudio nga nangikatalâ kâ Apu Kesu, narigá yù ággiád da, gapu ta nanaki yù ira kátannangán nga pári na Kudio nga manguruk kâ Apu Kesu, ána jinigirigá da yù ira mangikatalâ kâ Apu Kesu Kiristu (4:1-31; 7:1-59). Á nappaná yù ággián nayù ira Kudio nga mangikatalâ kâ Apu, gapu ta arád da kánnámmuán ta mesipá gapay yù ira makkakerumá nga ari Kudio sù awayyá ra nga makiyigù kâ Apu Kesu Kiristu. Ngam nánnámmuán nayù ira káruán nga Kudio ta mesipá yù ira ngámin nga tatolay, á minay si Pilippi nga mangilayalayâ sù gián nayù ira ari Kudio nga taga Samaria (8:7-25).

Á minay laguk si Eduru nga mangilayalayâ sù ira ari Kudio ta bale ni Kornelio, nga kapitán nayù ira suddálu nga taga Roma (10:1-48). Á nanoli si Eduru ta ili na Jerusalem, ta en na kagian sù ira kábulun na yù nesimmu megapu sù pangilayalayâ na (11:1-18). Á naggagammung ira nga nakiubobuk, á nattatádday yù nonò da laguk ta napiá nu umay ira gapay nga mangilayalayâ sù ira tatolay nga ari Kudio.

Á si Saulo yù kátannangán nga Parisio nga nanigirigá sù ira olu nga Kudio nga manguruk kâ Apu Kesu. Á nappasingan kâ Saulo si Apu Kesu nga naginnanolayin. Á nanguruk gapay si Saulo, nga mangngágan gapay ta Pablo (13:9). Á pinaluruò ni Pablo yù ngámin nga inipakuá ni Apu kuna, ta minay nangilayalayâ ta ngámin nga lugár áddè ta ili na Roma, tapè mesipá gapay yù ira ari Kudio sù pammagure ni Namarò (28:30-31).

Yù Mayán nayù Libru

Melayalayâ yù Napiá nga Dámak ta ili na Jerusalem (1:1–8:3)

Massamá yù Napiá nga Dámak ta Lugár na Judiya ána Samaria (8:4–12:25)

Yù Olu nga Ánge ni Pablo nga Mangilayalayâ sù Napiá nga Dámak (13:1–14:28)

Yù Pakkaká-ubobuk nayù ira Manguruk ta Paggagammung da ta Jerusalem (15:1-35)

Yù Mekaruá nga Ánge ni Pablo nga Mangilayalayâ sù Napiá nga Dámak (15:36–18:22)

Yù Mekatallu nga Ánge ni Pablo nga Mangilayalayâ sù Napiá nga Dámak (18:23–21:16)

Yù Paggápù nayù ira Suddálu kâ Pablo ta Ili na Jerusalem (21:17–23:22)

Yù Pangituluk nayù ira Suddálu kâ Pablo ta Ili na Sesaria (23:23–26:32)

Yù Pangituluk nayù ira Suddálu kâ Pablo ta Ili na Roma (27:1–28:31)

¹ Mattúrákà nikaw, Don Topilu. Á sù ngaw olu nga iníturâ ku, kinagi nikaw yù ngámin nga kingnguá na ngaw ni Apu Kesu áddè ngaw ta pamegapu na mangituddu, ² ta áddè ta kálâ na ta lángi. Á lage na nánaw, sinaddánán ni Apu Kesu yù ira sinudduán na nga sinullâ na megapu sù pakáwayyá nayù Mangilin nga Ikararuá ni Namarò, ta umay ira mangilayalayâ sù bilin ni Namarò.

³ Á pappasá na pate ni Apu Kesu ta kurù, sù paginnanole na, á naggián ta dabbuno ta appátapulu nga ággaw ána nappasingan sù ira sinullâ na. Name-aru nga nappasingan nira, á aru yù kingngikingnguá na ta arubáng da, tapè ammu ra ta kuruk nga matolayin. Á kinagi na nira yù meyannung sù pammagure ni Namarò ta dabbuno. ⁴ Á paggián ni Apu Kesu paga nira, kinagi na nira, “Ari kayu lábbi mánaw ta Jerusalem. Iddagán naw yù iyawá ni Namarò nikayu nga Mangilin nga Ikararuá, ta aggina yù kinagi ngaw nikayu nga inítabbá na ngaw ni Ammò Namarò. ⁵ Á si Kuan ngaw, jinigù na kayu ta panákkilálán ta panguruk naw kâ Apu Namarò. Á danum yù inipanigù na nikayu. Ngam dumá yù ipanigù ni Namarò nikayu, ta umay sangaw nikayu yù Mangilin nga Ikararuá,” kun ni Apu Kesu nira.

Yù Kálâ ni Apu Kesu ta Lángi

⁶ Á paggagammung nayù ira sinudduán na, iniyabbù da kâ Apu Kesu, “Apu, sangaw nu anni yù pamatolim nikami nga ginaká ni Israel sù pammagurayám mi, nga ginubâ nayù ira kalusso mi?” ⁷ Á kinagi ni Apu Kesu nira, “Arán naw awayyá nga kánnámmuán yù ággaw nga kesimmu na. Si Ammò ku nga Namarò, aggina lâ yù makáwayyá nga manullâ ta ággaw nga kapalurò na ngámin. ⁸ Á sangaw nu umay nikayu yù Mangilin nga Ikararuá, iyawá na nikayu yù pakáwayyá naw nga mangilayalayâ sù napiá nga dámak. Á ilayalayâ naw yù ngámin nga meyannung nikán sawe ili na Jerusalem ána ngámin táne lugár na Judiya ána tuke lugár na Samaria ta áddè túrin ta pagáddekán na dabbuno.”

⁹ Á kabalin ni Apu Kesu nakkagi, á ta paningan nayù ira sinudduán na, nálâ nga nagayáyun nga minay ta lángi, á nalipparán nga nattukiá ta kunam, á arád den masingan. ¹⁰ Á sinánguk da lâ paga ta lángi.

Á pattánguk da, inikáddagá lâ limittuák yù duá nga daroban ni Namarò, nga lálláki nga nabbarwási ta puraw nga gámi nga makatulang. ¹¹ Á kinagi ra, “Sikayu nga taga Galilia, anni yù kabayák naw nga mattatáddak nga mattánguk ta lángi? Si Apu Kesu, nga nasingan naw nga minay ta lángi, aggina yù manoli saw noka, á kunnay ta páno na nga nasingan naw, kunnian gapay noka yù panoli na,” kud da nira. ¹² Pakaginná ra sù kinagi nayù ira daroban, nánaw ira laguk ta puddul nga mangngágan ta Olibo, á nanoli ira ta Jerusalem. Tangakilometro lâ yù kárayyu nayù puddul ta ili na Jerusalem.

¹³ Á labbè da ta Jerusalem, naddulò ira ta balay nga paggianád da, á minunè ira ta lágum ta utun, aggira ngámin kári Eduru, á si Kuan, si Ime, si Andares, si Pilippi, si Tomá, si Bartolome, si Mattiu, si Ime nga anâ ni Alpjo, si Simon nga Maláppa, á si Kudas nga anâ ni Ime. ¹⁴ Á naggagamung ira ta kággággaw, ta nattatádday yù nonò da nga nakimállâ kâ Apu Namarò, aggira ngámin ána yù ira bábbay kári Maria nga yená ni Apu Kesu ána yù ira lálláki nga wáwwagi ni Apu Kesu.

Yù Pappili ra ta Táli ni Kudas

¹⁵ Á paggagamung da sù tádday nga ággaw, mággè magatù ta duápulu ira nga naggagamung tán. Á nanáddak ni Eduru, á kinagi na nira, ¹⁶ “Wáwwagi, napalurokin yù inipalappâ nayù Mangilin nga Ikararuá nga inipetúrâ na ngaw kâ Patul Dabid sù ngaw pammagure na ta Israel. Yáyù initúrâ ni Patul Dabid nga meyannung kâ Kudas nga nappagápù kâ Apu Kesu. Á napalurokin, ta inipagápù ni Kudas si Apu Kesu sù ira nangnguá kuna. ¹⁷ Á nebiláng si Kudas nikami nga mapulu duá nga sinullâ ni Apu, nga mesipâ ta pattarabáku mi.

¹⁸ Á gapu ta pangabbák ni Kudas sù ira nga maggápù kâ Apu Kesu, inâ na yù kuártu nga táddán na megapu sù narákè nga kingnguá na, á yáyù inigátang na ta dabbun nga natayán na. Ta napannâ si Kudas nga nallakak, á nabattâ yù sán na, á nallowán yù sine na. ¹⁹ Yaw yù narámak da ngámin ta Jerusalem. Yáyù gapu na nga iningágad da yù dabbun ta Akaldama sù ággubobuk da, á yá kebalinán na yù Naragán nga Dabbun.* ²⁰ Á aijan yù netúrâ nga kinagi na ngaw ni Patul Dabid sù kansion na, nga netúrâ ta libru nga Salmo, nga meyannung kâ Kudas, nga kunniaw:

‘Nánawán yù paggianán na, á awán bulubugá ta maggián kuna.’†

Á aijan gapay nga netúrâ,

‘Meyawá laguk sù tanakuán nga tolay yù pakáwayyá na nga mattarabáku.’‡

²¹ “Á yáyù nga piliat tam laguk yù tádday sù ira nga nepappapulù ngaw nikami ta ngámin nga dagun nga keggá ni Apu Kesu nikami, ²² ta áddè ngaw sù panigù ni Kuan ta áddè sù kálâ ni Apu ta lángi. Á yù tolay nga piliat tam, aggina yù mepattatádday nikami, tapè ipakánnámmu na gapay yù paginnanole ni Apu.” Yáyù áddè nayù kinagi ni Eduru.

²³ Á kabalin ni Eduru nanabarang nira, pinaddepuák da laguk yù duá nga lálláki, si Kusè nga iningágad da ta Barsabas, nga Justo yù apulidu na, ána si Matias. ²⁴ Á nakimállâ ira kâ Apu ta meyannung sù duá nga lálláki. Á kinagi ra, “Apu, ammun yù nonò na ngámin nga tatolay ána danniw nga duá. Ituddum nikami bì nu asinni yù piliam mu, ²⁵ tapè aggina yù málâ sù pakáwayyá na nga mangilayalayâ ta bilim mu ána masserbi nikaw, ta nilonán ni Kudas yù pattarabáku na, tapè umay sù gián nga mepángngâ kuna,” kud da kâ Apu. ²⁶ Á kabalid da nakimállâ, nabbúnù ira megapu sù duá, á napíli si Matias, nga nelannâ sù ira mapulu tádday nga minánggilayalayâ.

* 1:19 Innam mu Mattiu 27:6-8 † 1:20 Salmo 69:25 ‡ 1:20 Salmo 109:8

2

Yù Dattál nayù Mangilin nga Ikararuá

¹ Á jimittál yù piestá nga mangngágan ta Pentekosto, * á nattatádday yù ira ngámin nga manguruk sù tádday nga balay. ² Á inikáddagá lá yù gurù nga naggapu ta lángi, nga kun na gurù na paddák nga masikan. Á kitagurù sù lágum na balay nga paggagammungád da. ³ Á limittuák nga nappasingan nira yù kun na api nga nesinisinek nga naddappá nira nga katággítádday. ⁴ Á napayyán ira ngámin sù Mangilin nga Ikararuá ni Namarò. Á dagarágá nagubobuk ira ta makkakerumá nga ággubobuk, megapu sù Mangilin nga Ikararuá nga mangiyawâ nira ta pakáwayyá ra.

⁵ Á aru yù ira nga naggián ta Jerusalem, nga Kudio nga nakimoray ká Namarò nga naggapu ta ngámin nga áppatulán ta dabbuno. ⁶ Á pakaginná ra ta gurù nga kun na masikan nga paddák, gikarakarerán ira nga minay nakipagammung. Á naginná ra yù pagubobuk nayù ira tatolay nga manguruk ká Apu Kesu. Á nakalalang ira, ta mássiki nu makkakerumá yù katatole ra, naginná ra nga katággítádday yù ággubobuk na nga nakeyanatán na.

⁷ Á nepallá yù kapállá da, á kinagi ra, “Asinni ngámin danniaw ira nga giyubu-ubobugán ta makkakerumá? Ari panò aggira yù taga Galilia? ⁸ Á kunnasi laguk ta maginná tam yù ággubobuk tam nga nakeyanatát tam nga katággítádday? Ta arád da gemma ammu nayù ira taga Galilia yù ira makkakerumá nga ággubobuk tam! ⁹ Á sittam, naggapu ittam ta aru nga áppatulán. Ajjan yù ira taga Partia áнна taga Media, taga Elam, á taga Mesopotamia gapay áнна taga Judiya, taga Kappadosia, taga Pontu, áнна taga Asia. ¹⁰ Á ajjan gapay yù ira taga Parigía áнна taga Pampilia, taga Egipto, áнна yù ira nga naggapu ta lugár na Libia nga aranni ta Sirene. Á ajjan gapay yù ira álliuk nga taga Roma, nga Kudio áнна yù ira nattudduán ta kustombare na Kudio, nga nakKudiongin. ¹¹ Á ajjan gapay yù ira taga Kareta áнна taga Arabia. Á sittam ngámin, kánnámmuát tam yù kagian nayù ira taga Galilia, gapu ta magubu-ubobuk ira sù makkakerumá nga ággubobuk tam nga katággítádday. Á mangilayalayâ ira ta meyannung sù ngámin nga makapállá nga kingngikingnguá ni Namarò. ¹² Anni panò yù kebalinán na?” Yáyù inubobuk nayù ira tatolay, gapu ta napállá ira, áнна nakalalang ira.

¹³ Ngam ajjan gapay tán yù ira nga nanguyaw sù ira sinudduán ni Apu Kesu, á kinagi ra, “Námmellaw lá danniaw ira!” kud da.

Yù Pangilayalayâ ni Eduru sù Bilin ni Namarò

¹⁴ Á gapu ta panguyo nayù ira káruán nga tatolay, nanáddak laguk tán di Eduru áнна yù ira mapulu tádday nga sinudduán ni Apu Kesu nga mepulù kuna. Á si Eduru, iniyássikan na yù ngárál na, á kinagi na sù ira ngámin nga tatolay tán, “Sikayu nga kagittá nga Kudio, áнна sikayu ngámin nga maggián ta Jerusalem, tángngagan naw yù kagiak ku nikayu, tapè mepakánnámmu nikayu yù kukurugán. ¹⁵ Sikayu, kagian naw ta mellaw danniaw ira nga magubobuk, ngam ari kuruk, ta ari ira gemma namissán, ta awán ta mamissán ta pannawák. ¹⁶ Ngam yawe nga pagubobuk da nga maginná naw kunangan, kunnian yù kinagi na ngaw ni Joel, nga yù ngaw ábbilinán ni Namarò. Ta ajjan yù netúrâ nga inipakkagi ni Namarò ká Joel, nga kun na:

¹⁷ ‘Nu duttál yù ira panguriánán nga ággaw, iyawâ ku sù ira ngámin nga tatolay yù Ikararuá.

Á yù ira áná naw, mangilayalayâ ira sù bilik ku.

Á yù ira bábbagitole naw, masingad da yù ipalappá ku nira.

Á yù ira lállakaláke naw, mattatagenâ ira, gapu ta pattatagenatak ku ira.

¹⁸ Á karanniúrin nga ággaw nga maporián, iddák ku ta Ikararuá yù ira masserbi níkán, nga lálláki áнна bábbay,

á llayalayâ da yù bilik ku, megapu sù pakáwayyá nayù Ikararuá.

¹⁹ Á pagaddatuak ku yù makapállá nga panákkilalán ta lángi áнна dabbuno. Ipasingak ku yù dága, áнна api, áнна atù.

²⁰ Makkallá yù bilák, á magujjin yù bulán ta kun na dága, lage nayù pangukum ku, ta pagáddekán na ággaw, nga ággaw nga mangilin, nga awán bulubugá ta kagittá na.

²¹ Á aggira ngámin nga makimállá níkán nga Yápu ra, meyiǵu ira, á arák ku ira ukuman,† kun ni Namarò.

Yáyù initúrâ na ngaw ni Joel, nga yù ngaw ábbilinán,” kun ni Eduru.

* 2:1 Pappasá na límápu lu nga ággaw áddé ta kabalin nayù panaddamád da ta pattalebák nayù daroban, duttál yù Pentekosto nga panaddamád da ta pangalawâ ni Moyses sù tunung ni Namarò. † 2:21 Joel 2:28-32

²² Á kabalín ni Eduru nga nangiyubobuk sù iníturá ni Joel, kinagi na, “Sikayu nga kábuluk ku nga ginaká ni Israel, ginnán naw yù kagiak ku nikayu nga meyanung ká Apu Kesu nga taga Nasaret. Inipakánnámmu ni Namarò ní kayu ta aggina yù sinullà na, megapu sù aru nga pinagaddátu na nga makapállá, nga inipakuá ni Namarò kuna. Á ammu naw gemma ngámin danníaw, ta nesimmu saw giát tam. ²³ Á lage na namarò, dán nga ammu ni Namarò ngámin, ána sinalákkuruk na nga ipetulù ní kayu nga Kudío si Apu Kesu nga taga Nasaret. Á aggina yù ginápù naw ána inipapapáte naw sù ira ari Kudío, á inipàtà da ta kurú. ²⁴ Ngam si Namarò, pinaginnanole na. Á nallawán sù tanam, nga matolay, ta ari megaggak megapu sù pate na. ²⁵ Á iníturá na ngaw ni Patul Dabid yù kuruk nga ubobuk ni Apu Kesu. Kinagi na:

‘Matákál ku si Apu Namarò nga sigidá mepulupulù níkan.

Aringà bulubugá maburung, gapu ta maggián níkan nga mangabbák.

²⁶ Yáyù gapu na nga ayatán yù putù. Á ubobugak ku yù pagayáyá ku, ta mássiki nu matay yù baggi, aijan yù iddanamá ku, megapu níkaw, Apu.

²⁷ Ta arám mà tájjián sù gián nayù ira námmatay.

Arám mu iyanugù ta malabbak yù baggi ta tanam, ta sikán yù Aná mu nga iddukam mu, nga masserbi níkaw.

²⁸ Á inipakánnámmum níkan yù napiá, nga meyarik ta dалан nga mappàngè ta mannanáyun nga katolè,

ta maginnanolay nga mepattolay níkaw ta áddè ta áddè. Á magayáyáká nga mepapapulù níkaw.[†]

Yáyù iníturá na ngaw ni Patul Dabid,” kun ni Eduru.

²⁹ Á kinagi ni Eduru paga, “Wáwwagi, ammu tam gemma ta natay ngaw nga nabayágin yù ngaw Patul Dabid nga naggaká nittam, á netanam, á aijan lá paga nittam yù tanam na. Ari gemma yù baggi ni Patul Dabid yù inubobuk na sù iníturá na.

³⁰ “Ngam ta keggá na ngaw ni Patul Dabid, aggina yù ábbilinán ni Namarò, á ammu na ta kuruk nga mapalurò yù initabbá ni Namarò kuna. Á kinagi ni Namarò ta duttál noka yù ginaká ni Patul Dabid, nga táli na nga mammaguray sù áppatulán na. ³¹ Ta inipalappá ni Namarò kuna yù mesimmu noka pángè na kesimmu na, á yáyù nga kinagi na ngaw ni Patul Dabid yù meyanung sù duttál nga MakKíristu, nga maginnanolay, nga ari matájjián sù gián nayù ira námmatay, ána ari malabbak yù baggi na ta tanam. ³² Aggina si Apu Kesu, nga pinaginnanole ni Namarò. Á sikami ngámin yù massistígu ta kukurugán nga naginnanolay, gapu ta nasingham mi.

³³ Á kunangan aijanin si Apu Kesu ta lángi, nga nagitubang ta jiwánan ni Namarò nga Yáma na, nga paggianán na maráyaw. Á iniyawá nayù Yáma na kuna yù Mangilin nga Ikararuá nga initabbá na ngaw kuna. Á jinok ni Apu Kesu yù Mangilin nga Ikararuá ta umay níkami nga sinudduán na. Á yáyù nga masingan naw ána maginná naw kunangan yawe nga akkuám mi, megapu sù pakáwayyá nayù Mangilin nga Ikararuá.

³⁴ “Wáwwagi, ari gemma si Patul Dabid yù minay ta lángi, nu ari galá si Apu Kesu Kíristu. Ngam kinagi ni Patul Dabid,

‘Si Apu Namarò, kinagi na sù Yápu, “E ka bi magitubang ta jiwának ku, nga pagitubangan nayù maráyaw,

³⁵ áddè ta arák ku pangappù sù ira nga malussaw níkaw,” kun ni Patul Dabid.[§]

³⁶ Á sikayu ngámin nga wáwwagi mi nga ginaká ni Israel, mánnámmuán naw laguk ta si Apu Kesu nga inipepátá naw ta kurú, aggina yù sinullà ni Namarò ta Yápu tam nga MakKíristu nga mammaguray.”

³⁷ Á ta pakaginná nayù ira tatolay karannian, napábbaw ira. Á kinagi ra kári Eduru ána yù ira kábulun na, “Wáwwagi, anni laguk yù akkuám mi?” ³⁸ Á kinagi ni Eduru nira, “Mabbabáwi kayu nga katággitádday ta liwiliwá na. Á mapparigù kayu megapu sù pakáwayyá nayù ngágan ni Apu Kesu Kíristu, tapè ipakánnámmu naw yù pangikatalá naw ána pakiyápu naw ká Apu Kesu Kíristu.* Á pakomán na kayu sù liwiliwá naw, ána iyawá na gapay ní kayu yù Mangilin nga Ikararuá. ³⁹ Ta kinagi na ngaw ta aggira ngámin nga agálán na yù pangiyawatán na sù initabbá na. Mesipá kayu gapay ána yù ira áná naw ána ngámin yù ira tatolay ta dabbuno nga magginná ta pagágál ni Apu Namarò ta manguruk kuna,” kun ni Eduru nira.

† 2:28 Salmo 16:8-11 § 2:35 Salmo 110:1 * 2:38 Kingguá 10:47-48

⁴⁰ Á aru paga yù kinagi ni Eduru nira. Á sinabarangan na ira, á kinagi na, “Ari kayu mepatádday sù ira narákè, tapè ari kayu mekanakaná sù liwiliwá da nga ipamanunnù ni Apu nira,” kun na. ⁴¹ Á aru sù ira nga nakaginná yù nanguruk sù kinagi ni Eduru. Á nakirigù ira, á talluribu yù ira tatolay nga nelannà sù ira manguruk. ⁴² Á naggagammung ira ta kággággaw nga maggigiámmu sù ituddu nayù ira sinudduán ni Apu, ána makkaká-ubobuk ira ta meyanung sù napiá nga bilin ni Namarò. Á nakkakálállang ira nga kun na tangapamiliá. Á giddigidduá ra yù pán nga kinád da ta panaddamad da ta pate ni Apu Kesu, ta pakimore ra ká Apu Namarò, ána nakimállà ira kuna.

Yù Kustombare nayù ira Manguruk ká Apu Kesu

⁴³ Á aru yù ira makapállà nga pinagaddátu nayù ira sinudduán ni Apu Kesu. Á yá yù nga napállà yù ira ngámin nga tatolay. ⁴⁴ Á ngámin ira nga manguruk, nattatádday ira ta nonò da, á nakkakásipà ira sù ngámin nga kukuá ra. ⁴⁵ Á iniláku ra yù dabbud da ána kukuá ra, á inisinek da yù nallakuád da sù ira ngámin nga manguruk ta meyanung sù awágad da. ⁴⁶ Á ta kággággaw naggagammung ira nga nakimállà ká Namarò sù mangilin nga kapilliá. Á minay ira kiminán sù bale ra ána nakkakásipà ira ta kanad da, á nagayáyá ira. ⁴⁷ Á naddáyaw ira ká Apu Namarò. Á ngámin yù ira katangeliád da, mássiki yù ira nga ari manguruk, nakimorayád da yù ira nga manguruk. Á kággággaw linnapán na ira ni Namarò sù ira bagu nga mangikatalà kuna.

3

Yù Pamampapiá di Eduru sù Pilay

¹ Á ta pannarek na bilák ta púgák, nga negagángay nga oras nga pakimállà nayù ira Kudio, nappulù di Eduru ká Kuan nga minay sù mangilin nga kapilliá, tapè makimállà ira. ² Pakáranni ra ta puertá nayù kapilliá nga mangngágan ta Kakástán nga Puertá, naratang da yù laláki nga pilay yù nakeyanatán na. Á ta kággággaw initolitoli ra yù pilay tapè makilimù sù ira nga mattatallung sù kapilliá.

³ Pakasingan nayù pilay kári Eduru ká Kuan, nakilimù nira gapay. ⁴ Á inni-innad di Eduru, á kinagi ra kuna, “Innam kami,” kud da. ⁵ Á sinángngák na ira, ta iniddagán na yù iyawá da kuna. ⁶ Ngam kinagi ni Eduru kuna, “Awán kami ta kuártu, ngam aijan yù awayyá mi nga mangabbák nikaw megapu sù pakáwayyá ni Apu Kesu Kiristu nga taga Nasaret. Gumikkáng ka laguk, tapè mallakák ka.” ⁷ Á sinangngalán ni Eduru yù limá na nga jiwánán, tapè pagikkangan na. Á dagarágá nga nassikan yù takki na. ⁸ Á níkáddagá na lâ gimikkáng. Á nepulù nira nga simillung sù mangilin nga kapilliá, nga nallakalakák nga nakkassakassú, ána naddáyaw ká Namarò.

⁹ Á ngámin nga tatolay, nasingad da yù tolay nga nallakalakák ána naddáyaw ká Namarò. ¹⁰ Á natákkilalád da ta aggina yù ngaw nagitubang nga minákkilimù sù puertá nga Kakástán. Á nepallà yù kapállà da sù nesimmu kuna. ¹¹ Á ta pakikering nayù ngaw pilay paga kári Eduru ká Kuan ta balkon nayù kapilliá nga mangngágan ta balkon ni Patul Solomon,* minay yù ira ngámin nga tatolay nga makkarakarérá nga magarimummung nira ta balkon, ta nerallà yù kapállà da.

Yù Pangilayalayá ni Eduru sù Mangilin nga Kapilliá

¹² Á pakasingan ni Eduru ta napállà yù ira tatolay, kinagi na nira, “Sikayu nga kábuluk ku nga ginaká ni Israel, ngattá, ta napállà kayu gapu ta makalakák yù ngaw pilay? Ngattá, ta dúlangán naw kami? Kagian naw panò ta sikami yù nammapiá ána namalakák sawe tolay, megapu sù ámmagaddátu mi onu piá mi? ¹³ Ari gemma sikami yù mappagaddátu, nu ari galá si Namarò nga Yápu di Abrakam kári Isak ká Akup, ána ngámin nga naggaká nittam. Á pinalakák ni Namarò yawe tolay, tapè meparáyaw si Apu Kesu nga Aná na. Ngam sikayu, ginápù naw si Apu Kesu, á inikeká naw ta arubáng ni Gubinador Pilatto nga awán ta liwá na. Á manakí kayu kuna. Á mássiki nu inikáyá ni Pilatto nga palubbágan, ngam ari makatubáng sù ure naw. ¹⁴ Sinájjian naw yù kuruk nga napiá nga mangilin, nga awán ta liwá na, á kinagi naw ká Pilatto ta palubbágan na yù namapátay. ¹⁵ Á pinapáte naw yù manotolay. Ngam pinaginnanole ni Namarò, á sikami yù massistigu ta kuruk yian, ta nasingam mi. ¹⁶ Á yawe tolay, inikatalà na si Apu Kesu. Á megapu sù pakáwayyá ni Apu Kesu, nammapiángin ána nasikanin. Aggina yù ngaw pilay nga masingan naw ána

* 3:11 Si Patul Solomon yù ngaw nammaguray sù ira Kudio, nga siminubbá sù yáma na, nga si Patul Dabid.

matákkilán naw. Á megapu ta pangikatalà na kâ Apu Kesu nga Yápu mi, napammapiángin ta arubáng naw.”

¹⁷ “Wáwwagi,” kun na paga ni Eduru sù ira tatolay, “ta pamapáte naw kâ Apu Kesu, ammu ta arán naw kánámmuán ta aggina yù MakKíristu nga jinok ni Namarò saw. Á yù ira kátannangán naw, arád da gapay ammu. ¹⁸ Ngam si Namarò, inibilin na sù ngaw ira ábbilinán na yù jigâ nga umay sù MakKíristu nga doban na ta umay saw. Á yáyù nga mapatuppál laguk yù kinagi nayù ira ábbilinán na sù kepátá ni Apu Kesu ta kurù. ¹⁹ Mabbabáwi kayu laguk, á kurugan naw si Namarò áнна likuránán naw yù liwiliwâ naw. Á pakomán na kayu ni Namarò sù liwiliwâ naw, ²⁰ áнна pabannáyán na yù nonò naw. Á doban na má sangaw sawe dabbuno si Apu Kesu, nga sinullà na ta mammaguray nittam. ²¹ Ngam maggián lábbi ta arubáng ni Namarò ta lángi ta áddè ta dattál nayù ággaw nga sinullà ni Namarò nga panguli na ta dabbuno. Yáyù inibilin na ngaw ni Namarò sù ira ngaw ábbilinán na sù ira olu nga ággaw.”

²² Á kinagi na paga ni Eduru, “Ajjan yù kinagi na ngaw ni Moyses, nga yù ngaw ábbilinán ni Namarò, nga kun na, ‘Doban na sangaw ni Apu Namarò yù ábbilinán na, nga kagittá tam nga Kudío, ta kunnay sù paddok na nikán.

Á tángngagan naw ngámin yù kagian na nikayu.

²³ Á ngámin yù ira tatolay nga ari manguruk, ari iren mesipá sù ira tatole ni Namarò, nu ari galá ta mesinná ira kâ Namarò ta áddè ta áddè.”†

²⁴ Yáyù kinagi na ngaw ni Moyses. Á di Samuel áнна yù ira ngaw ábbilinán ni Namarò nga naporían nga siminubbâ kuna, kinagi ra yù meyannung sù karannian nga ággaw. ²⁵ Á sittam ngámin nga Kudío yù mesipá sù initarátu na ngaw ni Namarò sù ira ngaw naggaká nittam, gapu ta áná da ittam nga naporían. Ta yawe yù initarátu ni Namarò kâ Kákay Abrakam, nga kun na, ‘Mammapiá yù ággián nayù ira ngámin nga tatolay ta dabbuno, megapu sù tádday nga ginakám.’ ²⁶ Yáyù kinagi ni Namarò kâ Kákay Abrakam. Á yáyù gapu na nga sittam nga Kudío yù olu nga naddobán na kâ Apu Kesu nga Aná na, tapè pammapián na yù ággiát tam, áнна ituddu na nittam ta likuránát tam yù narákè nga akka-akkuát tam, áнна palurotat tam yù ipakuá na nittam,” kun ni Eduru.

4

Yù Pangikeká nayù ira Kátannangán na Kudío kári Eduru kâ Kuan

¹ Á pagubobuk di Eduru kâ Kuan paga sù ira magaru nga tatolay, nappángè nira yù ira pári na Kudío áнна yù kapitán nayù ira nga magguárdiá sù mangilin nga kapilliá, áнна yù ira Sadusio. ² Á napporay ira, gapu ta pangituddu ri Eduru áнна yù ira kábulun na sù ira tatolay. Ta inituddu ri Eduru ta naginnanolayin si Apu Kesu, á yáyù nga pakánámmuád da ta kuruk nga maginnanolay gapay noka yù ira nga námmatay. ³ Á ginápù da laguk di Eduru kâ Kuan. Á gapu ta gabinggin, pinukù da ira áddè ta pannawák. ⁴ Ngam napakáru yù ira nga manguruk, gapu ta paggingin, pinukù ra sù bilin ni Namarò nga kinagi ri Eduru nira. Á mággè límáribu yù ira láláki nga manguruk.

⁵ Á ta pannawák, naggagammung ta Jerusalem yù ira Kudío nga mammaguray áнна yù ira giriámán, áнна yù ira mesturu nga mangituddu ta tunung da gapay. ⁶ Ajjan gapay tán di Annas nga kotunán na pári, kári Kayapas, áнна si Kuan, si Alekanduru, áнна ngámin ira nga kanakanáyun nayù kotunán na pári. ⁷ Paggagammung da, inipágál da di Eduru ta meyarubáng nira, tapè bestigád da ira. Á iniyabbù da nira, “Sisaw yù paggapuán nayù pakáwayyá naw? Asinni naddok nikayu ta kingnguá naw?” kud da kári Eduru.

⁸ Á yù Mangilin nga Ikararuá, inipakánámmu na kâ Eduru yù itabbák na, á kinagi ni Eduru laguk nira, “Sikayu nga mammaguray nikami, áнна sikayu nga karakalám mi, ⁹ nu bestigán naw kami megapu sù napiá nga kingnguá mi sù pilay kagabi áнна yù nipammapiá mi kuna, ¹⁰ á mánnámmuán naw laguk, áнна yù ira ngámin nga kagittá tam nga ginaká ni Israel, ta nammapiángin yù tolay nga manáddak sawe arubáng naw megapu sù pakáwayyá áнна ámmagaddátu ni Apu Kesu Kiristu nga taga Nasaret. Aggina yù inipátá naw ta kurù, ngam pinaginnanole ni Namarò. ¹¹ Aggina yù meyárik ta batu nga inubobuk nayù ngaw ábbilinán ni Namarò sù dán nga netúrâ, nga batu nga nanakitán naw. Á sikayu yù meyárik sù ira minábbalay. Á yù iniwallián naw, aggina yù piníli ni Namarò, nga nabbáli ta panáddagán nayù bale na, nga keyarigán nayù ira ngámin nga mangikatalà kuna.* ¹² Á ta ngámin nga

† 3:23 Deuteronomio 18:15, 18-19 * 4:11 Salmo 118:22

dabbuno, awán ta mangiyígù ta tatolay, nu ari galâ si Apu Kesu Kiristu. Awán ta tanakuán nga mangiyígù nittam.”

¹³ Á ta pakaginná nayù ira mammaguray sù inittabbák di Eduru, napállá ira, gapu ta pobare di Eduru nga ari naggigiámmu, ngam ari ira nappasirán nga nagubobuk nira. Á yáyù nga kánnámmuád da ta kábulun na ira ngaw ni Apu Kesu. ¹⁴ Á awán ta ipaliwá da kári Eduru kâ Kuan, ta nepanáddak gapay nira yù tolay nga pilay ngaw, nga nammapiángin. ¹⁵ Á pinalawád da ira laguk nayù ira mamestigá nira, tapè makkaká-ubobuk ira. ¹⁶ Á kinagi ra, “Anni yù akkuát tam sù ira tolay? Ta nappasingan yù pinagaddátu ra sù ira ngámin nga tatolay nga maggián ta Jerusalem, á awán ta awayyá tam gemma nga makkagi ta ari kuruk. ¹⁷ Ngam ananássing tam ira laguk, tapè ari ira má mangituddu ta meyanung kâ Kesu, ána ari massamá paga yù dámak nga meyanung kuna sù ira tatolay.”

¹⁸ Á kabalid da nakkaká-ubobuk, pinatallung da di Eduru, á inipugik da yù pangilayalayá da ána pangituddu ra ta meyanung kâ Apu Kesu. ¹⁹ Ngam simibbák nira di Eduru kâ Kuan, á kinagi ra, “Nononopan naw nu anni yù napiá ta ánninganán ni Namarò, nu kurugam mi yù kagian naw ánnè sù kagian ni Namarò. ²⁰ Ta awán ta awayyá mi nga mattukkâ nga makkagi sù nasingam mi ána naginná mi nga kingnguá ni Apu Kesu ána inittuddu na,” kud da.

²¹ Á yù ira mammaguray, inananássing da má di Eduru. Á pinalubbáng da ira laguk, ta arád da nálek yù awayyá ra nga mamággáng nira, gapu ta naddayaráyaw yù ira ngámin nga tatolay kâ Namarò, megapu sù nesimmu sù ngaw pilay. ²² Á matturù ta appátapulu ngin yù dagun nayù tolay nga nammapiángin megapu sù pakáwayyá ri Eduru nga naggapu sù ámmagaddátu ni Apu Kesu.

Yù Pakimállà nayù ira Manguruk kâ Apu

²³ Á ta kapalubbáng di Eduru kâ Kuan, minay ira ta gián nayù ira kákkopud da, á kinagi ra nira yù ngámin nga kinagi nayù ira kátannangán nga pári ána yù ira giriámán. ²⁴ Á ta pakaginná nayù ira kákkopud da ta inananássing da ira, nattatádday ira nga nakimállà kâ Namarò, á kinagi ra:

“Apu Namarò, sikaw yù mammaguray ána sikaw yù namarò ta lángi ána dabbuno, bebay, ána ngámin yù maggián nira. ²⁵ Á si Patul Dabid, nga yù ngaw naggaká nikami nga masserbi nikaw, kinagi na yù bilim mu nga nipakagi nayù Mangilin nga Ikararuá kuna. Á aijan nga netúrâ yù kinagi na ngaw, nga kunniaw:

‘Yù ira nga ari Kudio nga mammaguray ta dabbuno, ngattá, ta mapporay ira kâ Namarò?

Á yù ira Kudio, ngattá, ta potuád da si Namarò!

²⁶ Mattatádday yù ira patul ána yù ira ngámin nga mammaguray ta dabbuno, tapè igagánga ra yù pakikontará ra kári Namarò ána yù MakKiristu nga sinullà na ta mammaguray.’†

²⁷ “Apu Namarò, napalurokin kunangane yù kinagi na ngaw ni Patul Dabid, ta nepag-gammung ngaw gemma sawe ili na Jerusalem yù ira kagittá mi nga ginaká ni Israel ána yù ira ngámin nga ari Kudio gapay, kári Patul Erodo kâ Gubinador Pilatto. Á nattatádday ira tapè igagánga ra nu kunnasi yù ámmapáte ra sù mangilin nga Aná mu nga masserbi nikaw. ²⁸ Á kingnguá ra yù ngámin nga dán nga sinalákkuruk mu ngaw, megapu sù pakáwayyám ána urem. ²⁹ Apu, naginnám yù pangananássing da nikami. Á patagatam mu bi yù nonò mi ngámin nga masserbi nikaw, tapè ari kami maganássing nga mangilayalayá sù bilim mu nga meyanung kâ Apu Kesu. ³⁰ Pammapiám mu yù ira máttaki ána ipasingam mu yù pagaddatuam mu nga makapállá, megapu sù pakáwayyá ni Apu Kesu, nga mangilin nga Aná mu nga masserbi nikaw.”

³¹ Á kabalid da nakimállà, nagguyù yù balay nga naggagammungád da. Á minay yù Mangilin nga Ikararuá sù ira ngámin. Á ari ira maganássing nga mangilayalayá sù bilin ni Namarò.

Yù Pakkaká-abbák nayù ira Manguruk

³² Á yù ira ngámin nga manguruk, nattatádday ira ta nonò da ána ayá da. Á awán nira ta nakikki, nga makkagi ta kukuá na lápay yù ngámin nga kukuá na, ngam pinattatádde ra yù ngámin nga kukuá ra, tapè makkakásipá ira. ³³ Á yù ira minánggilayalayá, naláppá ira nga ari nattukkâ nga makkagi ta naginnanolayin si Apu Kesu, nga kuruk nga matolay mángin. Á nepallá yù pangikállà ni Namarò sù ira ngámin nga manguruk. ³⁴ Á awán nira ta magáwák, gapu ta yù ira nga aijan kuá na nga dabbun ána balay, iniláku ra nga katággitádday, ³⁵ á

† 4:26 Salmo 2:1-2

inipaggiwâ da yù nallakuád da sù ira minángxilayaláyâ, tapè aggira mangisinek ta kuártu sù ira magáwák ta meyanung ta awágad da.

³⁶ Á ajjan si Kusè, nga ginaká ni Libi nga taga Sipro, nga iningágan nayù ira minángxilayaláyâ ta Bernabe. Á yù kebalinán na “Bernabe” yù minánnabarang. ³⁷ Á iniláku ni Kusè yù dabbun na, á inipaggiwâ na yù pagá na sù ira minángxilayaláyâ.

5

Di Ananiâ kâ Sapira nga Magatáwa

¹ Á naggián gapay tán di Ananiâ kâ Sapira nga atáwa na. Á iniláku ra gapay yù dabbud da. ² Á nagittá yù nonò da ta pakappiád da yù káruán nga nallakuád da, á inituluk ni Ananiâ yù káruán nga inipe na ta arubáng nayù ira minángxilayaláyâ. Ngam inilimák na yù pinakappiád da. ³ Á kinagi ni Eduru, “Ananiâ, ngattá, ta initulú mu yù nonò mu kâ Satanas? Ngattá, ta passiriám mu yù Mangilin nga Ikararuá? Ta kinagim ta iniyawá mu ngámin yù nallakuám mu ta dabbun, nga arám mu inipaggiwâ, ngam initágum yù káruán. ⁴ Á nu arám mu iláku, kukuám gemma lá. Á pallákum, maguray ka lággapay sù nallakuám mu. Ngattá, ta ninononò mu yù massiri? Ari gemma tolay yù passiriám mu, nu ari gabba galá si Namarò.”

⁵ Á pakaginná ni Ananiâ karannian, nikáddagá lá natombá nga natay. Á yù ira ngámin nga nakarámak sù nesimmu kuna, nepallá yù assing da. ⁶ Á yù ira bábbagitolay, gimikkáng ira, á ed da binungun yù natay. Á nipáno ra, á ed da initanam.

⁷ Á manganánuán, pappasá na tallu nga oras, limibbè gapay si Sapira, ngam arán na ammu ta natayin yù atáwa na. ⁸ Á kinagi ni Eduru kuna, “Kagiam mu bi níkan nu iniyawá naw ngámin nga nallakuán naw ta dabbun naw.” Á kinagi nayù babay, “Wan, ngámin.” ⁹ Á kinagi ni Eduru kuna, “Ngattá ta nagittá yù nonò naw kâ atáwam nga mamaraparubá nga mangilogò sù Ikararuá ni Apu Namarò? Ginnám mu! Manolingin yù ira nga nangitanam sù atáwam, á ed da ka gapay apan,” kun na. ¹⁰ Á dagarágá nga natombá yù babay ta arubáng ni Eduru nga natay. Á tallung nayù ira bábbagitolay, naratang da yù pate na, á inipáno ra gapay, á initanam da ta taging na atáwa na. ¹¹ Á ngámin ira nga manguruk kâ Apu Kesu ána ngámin ira nga nakarámak sù nesimmu, nepallá yù assing da.

Pamagaddátu nayù ira Minángxilayaláyâ sù Aru nga Makapállá

¹² Á yù ira minángxilayaláyâ, pinagaddátu ra yù aru nga makapállá sù ira tatolay ta Jerusalem. Á yù ira ngámin nga manguruk kâ Apu, sigidá nga naggagammung ira, ta kunnay sù kustombare ra, sù mangilin nga kapillíá, sù balkon ni Patul Solomon. ¹³ Á ngámin yù ira ari manguruk, nasingad da ta napiá nga tatolay yù ira manguruk kâ Apu ána nakimorayád da ira, ngam naganássing ira nga metádday sù ira manguruk. ¹⁴ Á nalannalannapán paga yù ira manguruk ta magaru nga lálláki ána bábbay nga manguruk kâ Apu Kesu.

¹⁵ Á gapu ta pamagaddátu nayù ira minángxilayaláyâ, iniyánge nayù ira tatolay yù ira máttaki ta kalsáda, nga pinagiddá ra ta katri ra ána dapad da, tapè malirumán ira sù alinu ni Eduru ta pattalebák na nira. ¹⁶ Á yù ira magaru nga naggapu ta ngámin nga barrabárriu na Jerusalem, iniyánge ra yù ira máttaki ána yù ira nagunagán na anitu. Á nammapiá ira ngámin.

Yù Karigirigá nayù ira Minángxilayaláyâ

¹⁷ Á yù kotunán na pári ána yù ira ngámin nga kábulun na nga Sadiusio, nalussaw ira sù ira minángxilayaláyâ. Á nerallá yù passil da nira. ¹⁸ Á ginápù da ira, á pinukù da ira ta karsel. ¹⁹ Ngam ta tanggá na gabi, minay yù daroban ni Namarò, á binukatán na yù puertá nayù karsel, á inilawán na yù ira minángxilayaláyâ. Á kinagi na nira, ²⁰ “Sangaw nu pannawák, umay kayu ta mangilin nga kapillíá, á ilayaláyâ naw sù ira ngámin nga tatolay yù meyanung sù awayyá ra nga mesipá sù áttole ni Namarò nga awán ta áddè na,” kun na nira. ²¹ Á pakaginná ri Eduru sù kinagi nayù daroban ni Namarò, kinuruk da. Á ta pannawák, minay ira sù mangilin nga kapillíá nga mangituddu sù ira tatolay.

Á manganánuán, naggagammung yù kotunán na pári ána yù ira kábulun na sù mangilin nga kapillíá, á inipágál da laguk yù ira karakalán na Kudio. Á jinok da yù ira magguárdiá ta ed da apan yù ira minángxilayaláyâ nga pinukù da ta karsel, tapè iyánge ra ira nga meyarubáng nira. ²² Ngam labbè nayù ira magguárdiá ta karsel, awán ira tán. Á nanoli ira sù ira minámmaguray, á kinagi ra nira, ²³ “Labbè mi ta karsel, netúsi ta napiá yù puertá na, á naggián paga yù ira magguárdiá ta puertá, ngam pabbuká mi, awán ta tolay ta unak.”

²⁴ Á yù kapitán nayù ira magguárdiá ta mangilin nga kapilliá ána yù ira kátannangán na pári, pakaginná ra ta awán yù ira nepukù ta karsel, nakalalang ira ána nononopad da nu anni yù nesimmu sù ira minángngilayalayá. ²⁵ Á minay laguk yù tádday nga tolay, á kinagi na nira, “Yù ira tatolay nga pinukù naw, nasingak ku ira gangù ta kapilliá nga mangituddu sù ira tatolay.” ²⁶ Á minay laguk di kapitán ána yù ira magguárdiá, á iná da yù ira minángngilayalayá, á inilabbè da ira ta ámmanunnután, ngam arád da ira pinuersá, gapu ta ikássing da yù ira tatolay nga tudduád di Eduru, marakè payangad da ira ta batu.

²⁷ Á pangiyánge ra nira, iniyarubáng da ira sù ira minámmanunnù. Á binestigá na ira nayù kotunán na pári. ²⁸ Á kinagi na, “Sinaddánám mi kayu ta napiá ta ari kayu bulubugá mangituddu ta meyanngung sù tolay nga tuttulan naw, ngam pinassamá naw yù ituddu na ta ngámin nga tatolay ta Jerusalem! Á ngattá, ta ipaliwá naw paga nikami yù pate na!” kun nayù kotunán nga pári.

²⁹ Ngam simibbák di Eduru ána yù ira kábulun na, á kinagi ra, “Máwák nga kurugam mi yù taddán ni Apu Namarò ánnè sù taddán na tolay. ³⁰ Á si Namarò, nga pakiyápuán nayù ira naggaká nittam, pinaginnanole na si Apu Kesu nga pinapáte naw, nga inipepátà naw ta kurù. ³¹ Á iná ni Namarò ta lángi, á pinagitubang na ta jiwánan na, tapè aggina yù mammaguray ána mangiyígù ta tatolay. Á yáyù nga aijan yù awayyá tam nga ginaká ni Israel nga mabbabáwi ta liwiliwá tam, tapè pakomán ni Namarò ittam. ³² Á sikami yù makkagi ta kuruk ngámin danniw. Á yù Mangilin nga lkararuá, nga iniyawá ni Namarò nikami ána yù ira ngámin nga manguruk kuna, aggina gapay yù mangipakánnámmu ta kukurugán.”

Yù Panabarang ni Gamaliel sù ira Kábulun na nga Minámmaguray

³³ Á pakaginná nayù ira minámmaguray sù kinagi di Eduru, napporay ira, á gustu ra nga papatáyan yù ira minángngilayalayá. ³⁴ Ngam aijan tán yù tádday nga Parisio nga mangngágan ta Gamaliel, nga mangituddu ta tunung na Kudio, á aggina yù pakimorayán na ngámin nga tatolay. Á gimikkáng si Gamaliel, á pinalawán na lábbi ta manganánnuán yù ira minángngilayalayá.

³⁵ Á kabalid da namalawán nira, kinagi ni Gamaliel sù ira kábulun na nga minámmaguray, “Wáwwagi, nga ginaká ni Israel, magimuguk ittam, á nononopat tam ta napiá yù akkuát tam karanniaw nga tatolay. ³⁶ Ta manonò ku yù ngaw Teras, nga nappeddaráyaw, á mággè appátatagù yù ira siminuttul kuna. Ngam napapátay si Teras, á newarawará ngámin yù ira nga siminuttul kuna, á awán ta nabbalinád da. ³⁷ Á siminubbá yù ngaw Kudas nga taga Galilia, nga jimittál sù pangilistá nayù ira mammaguray sù ira ngámin nga tatolay ta áppatulán. Á aru gapay yù ira tatolay nga pinatuttul na ta baggi na. Ngam natay gapay si Kudas, á newarawará gapay yù ira siminuttul kuna.

³⁸ “Á yáyù nga kagiak nu nikayu, wáwwagi, ta paguráyát tam lábbi yù ira minángngilayalayá. Arát tam ira akkuán, tanu tolay yù paggapuán nayù ituddu ra, á mattukká sangaw, á yáyù áddè na. ³⁹ Ngam nu si Namarò yù paggapuán na, ari ittam makatubáng. Paguráyát tam ira laguk, marakè matákál tam sangaw ta si Namarò galá yù pakikontarát tam,” kun ni Gamaliel nira. Á gininná ra yù kinagi na.

⁴⁰ Á kabalid na nanabarang ni Gamaliel sù ira kábulun na, inipágál da yù ira minángngilayalayá. Á nipabaddù da ira, mássiki nu awán ta liwá da. Á inipugik da má nira yù pangituddu ra ta meyanngung ká Apu Kesu. Á pinalubbáng da ira. ⁴¹ Á nánaw laguk yù ira minángngilayalayá ta ámmanunnután. Á nagayáyá ira gapu ta ammu ra ta inikatalá ni Namarò nira yù pangituddu ra sù bilin na ána yù pangiyangngá da ta panigirigá nayù ira tatolay nira megapu sù panguruk da ká Apu Kesu. ⁴² Á kággággaw, minay ira sù mangilin nga kapilliá ána ta gibbalayán nayù ira tatolay, tapè ituddu ra ána ilayalayá da ta si Apu Kesu yù MakKiristu nga sinullá ni Namarò ta mammaguray ta dabbuno.

6

Panullá da ta Pitu nga Lálláki nga Mangabbák

¹ Á ta kággággaw, nalannapán yù ira manguruk ká Apu Kesu. Á yù ira Kudio nga naggapu ta arayyu, nga Gareko yù ággubobuk da, netádday ira sù ira Kudio nga taga Jerusalem, nga magubobuk ta Kebru. Á ta pangisinek nayù ira minángngilayalayá ta máwák nayù ira tatolay, naddagaragim yù ira Kudio nga Gareko yù ággubobuk da, gapu ta nakúrang yù neyawá sù ira kábulud da nga bábbay nga bálu.

² Á pakarámak nayù ira mapulu duá nga minángxilayalayâ, pinaggagammung da yù ira manguruk, á kinagi ra nira, “Arám mi nakuan iginnâ yù pangilayalayâ mi ta bilin ni Namarò, tapè matángxák mi lá yù pangisinek mi ta pakkatole naw. ³ Wáwwagi, mappíli kayu laguk ta pitu nikayu nga láláki nga pangikatalakán, nga tumulù sù Mangilin nga Ikararuá ána napiá yù nonò da, tapè aggira yù mangisinek ta máwák na tolay. ⁴ Ngam sikami, tángxagagam mi galá yù ipakimállá mi kâ Apu ána yù pangilayalayâ mi sù bilin ni Namarò,” kud da.

⁵ Á nagayáyá yù ira magari nga manguruk megapu sù kinagi ra. Á danniaw ira yù piníli ra: si Esteban, nga mapasigaggâ yù ángxuruk na kâ Apu Kesu ána tumulù sù Mangilin nga Ikararuá. Á si Pilippi, si Porokoro, si Nikanor, si Timon, si Parmenas, á si Nikolas nga taga Antokia nga nakKudiongin. ⁶ Á iniyarubáng da ira sù ira mapulu duá nga minángxilayalayâ, tapè ipakimállá da ira kâ Namarò. Á ta pakimállá nayù ira minángxilayalayâ, inipotud da yù limá ra ta ulu nayù ira katággítádday nga napíli, nga panákkilalán ta aggira yù ira natullá nga manaron ána mangisinek ta máwák na tolay.

⁷ Á yáyù nga nassamá yù bilin ni Namarò. Á nalannapán ta aru yù ira manguruk ta ili na Jerusalem. Á nanguruk gapay kâ Apu Kesu yù aru nga pári ira nga Kudio.

Yù Paggápu da kâ Esteban

⁸ Á si Esteban, aru yù ira pinagaddátu na nga makapállá ta arubáng nayù ira tatolay ta Jerusalem megapu sù allá ni Namarò kuna, ta iniyawâ ni Namarò kuna yù ámmagaddátu na. ⁹ Ngam aijan gapay ta Jerusalem yù ira Kudio nga makkakábulun ta ággagammungán nga mangngágan ta Kapillíá nayù ira Napalubbáng, nga taga Sirene ána taga Aleksandria. Á aijan gapay yù ira nga taga Silisia ána taga Asia. Á nattatádday ira nga minay nakikontará kâ Esteban, ána naríri ira ta ubobuk na. ¹⁰ Ngam arád da náppù, gapu ta napiá yù itabbák ni Esteban megapu sù pangabbák nayù Mangilin nga Ikararuá kuna. ¹¹ Á yáyù nga inagálád da yù ira láláki nga sináddanád da ta kuártu, tapè massiri ira ta meyanung kâ Esteban. Á kinagi nayù ira massiri, “Naginná mi yù pakkagi ni Esteban ta narákè nga meyanung ta yù ngaw Moyses ána si Namarò,” kud da.

¹² Á yù ira massirisiri, pinappatapátu ra yù ira káruán nga tatolay, ána yù ira giriámán na Kudio, ána yù ira mesturu nga mangituddu ta tunung ni Moyses. Á inikáddagâ da lá ginápù si Esteban, á iniyángo ra sù ira minámmannunù. ¹³ Á minay yù ira nga sináddanád da ta kuártu, á nanáddak ira ta arubáng nayù ira minámmannunù, tapè massistígu ira. Ngam massiri ira, á kinagi ra, “Yawe tolay, arán na tukkatan yù narákè nga kagian na nga meyanung sawe mangilin nga kapillíá ána yù tunung ni Moyses. ¹⁴ Naginná mi yù kinagi na, nga umay sangaw si Kesu nga taga Nasaret, á darálan na yawe kapillíá, á patalián na yù kustombare tam nga inituddu ni Moyses sù ira naggaká nittam,” kud da. ¹⁵ Á yù ira minámmaguray nga nagitubang ta ámmannunútán, pakaginná ra sù kinagi nayù ira massiri, inimámmatád da si Esteban, á nasingad da yù mammang na nga maddalingárang ta kun na mammang nayù daroban ni Namarò nga naggapu ta lángi.

7

Yù Initabbák ni Esteban sù ira Massiri nga Nangikeká kuna

¹ Á yù kotunán na pári, pakaginná na ta pangikeká ra kâ Esteban, iniyabbú na kâ Esteban, “Kuruk panò yù ipangikeká ra nikaw?” ² Á simibbák ni Esteban, á kinagi na nira, “Wáwwagi ána giriámán, nononopan naw bì yù kingnguá ni Namarò megapu nittam nga Kudio. Ta gári, piníli ni Namarò si Kákay Abrakam, nga yù ngaw naggaká nittam. Á paggián ni Abrakam paga ta Mesopotamia, nga ari paga minay nakipaggián ta Karan, nappasingan si Namarò kuna nga maddalingárang. ³ Á kinagi ni Namarò kuna, ‘Panawám mu yù ira kakanáyum mu ána yù lugár nga paggianám mu, á umay ka sù gián nga ipasingak ku nikaw sangaw.’” ⁴ Á nánaw laguk di Kákay Abrakam ta paggianád da sù ira kagittá ra nga taga Kaldia, á minay ira paggián ta dabbun na Karan.

“Á keggá ri Kákay Abrakam paga ta Karan, natay si ammò na. Á iniyángo na ira laguk ni Namarò sawe dabbun nga paggianát tam. ⁵ Á arán na iniyawâ kâ Abrakam yawe dabbun, mássiki nu baddi lá. Ngam initabbák ni Namarò ta iyawâ na yù dabbun noka kári Abrakam ána yù ira ginaká na. Á ta pangitabbá ni Namarò kuna, awán paga ta aná ni Kákay Abrakam. ⁶ Á kinagi ni Namarò gapay kuna, ‘Yù ira ginakám, umay ira noka makipaggián ta tanakuán nga dabbun. Á yù ira pakipaggianád da, aripanad da ira ána jigirigátad da

* 7:3 Genesis 12:1

ira ta appátatù nga ragun. ⁷ Ngam nu napasángin yù paggiád da túrin, panunnuták ku yù ira mangaripan nira. Á megapu sù panigirigá ku sù ira mangaripan, palubbángak ku yù ira ginakám, á ipánò ira tapé umay ira makimoray níkan sawe dabbun, kun ni Namarò ká Kákay Abrakam.”

⁸ Á kinagi ni Esteban paga, “Á pangitabbá ni Namarò kári Kákay Abrakam ána yù ira ginaká na, inipakugí ni Namarò yù ira ánâ da nga lálláki ta panaddamád da ta pattarátu na nira. Á yáyù nga kinugi ni Abrakam si Isak nga anâ na sù mekawalu nga ággo nayù abbing, gapu ta yáyù kinagi ni Namarò kuna. Á kunnian gapay yù kingnguá ni Isak, ta kinugi na si Akup nga anâ na. Á kunnian gapay yù kingnguá ni Akup, ta kinugi na gapay yù ira mapulu duá nga ánâ na nga lálláki nga naggaká nittam.

⁹ “Á yù ira ánâ ni Kákay Akup nga naggaká nittam, napassil ira ká Kusè nga uriád da. Á iniláku ra si Kusè sù ira mangaripan kuna ta arayyu nga lugár na Egipto. Ngam nepulú si Namarò ká Kusè. ¹⁰ Á inabbágán ni Namarò, á yáyù nga napiá lâ yù pabbalinán na ngámin nga jigá ni Kusè. Á iniyawá ni Namarò kuna yù napiá nga nonò na ána inipakámmu na kuna yù mappili ta napiá. Á ta keyarubáng ni Kusè ká Paro nga patul ta Egipto, nagayáyâ si Paro kuna, á sinullà na ta gubinador, ána pine na ta mammaguray ta ngámin nga appatulán na, ána inipataron na gapay kuna yù ngámin ira kábbale na ta palásiu na.

¹¹ “Á pammagure na ngaw ni Kusè ta Egipto, jimittál yù bisin ta ngámin nga lugár na Egipto ána yù lugár na Kenan. Á narigirigá ngámin yù ira tatolay. Á di Kákay Akup ána yù ira ánâ na nga naggaká nittam, awán ta málek da nga kanad da. ¹² Ngam ta pakarámak ni Kákay Akup ta egga kanan ta Egipto, jinok na yù ira ánâ na ta umay ira mangá ta kanad da. Yáyù lâ paga yù olu nga ánge ra ta Egipto.

¹³ “Á ta mekaruá nga ánge nayù ira wáwwagi ni Kusè ta Egipto, inipakánnámmu ni Kusè yù baggi na nira. Á inipakánnámmu na gapay ká Paro yù ira kanakanáyun na. ¹⁴ Á inipágál ni Kusè di Kákay Akup nga ammò na ána ngámin nga kanakanáyun na ta umay ira ta Egipto. Pitupulu límá nga tatolay yù ira ngámin. ¹⁵ Á yáyù nga minay di Akup ta Egipto, á naggián ira ta Egipto ta áddè ta pate ra. Ta Egipto yù natayád di Kákay Akup ána yù ira ngámin nga ánâ na nga naggaká nittam. ¹⁶ Ngam nelabbè yù baggi ra ta Sekem nga naggianád da ngaw di Kákay Akup, á netanam ira ta Sekem sù ángngitanamán nga ginátáng na ngaw ni Kákay Abrakam sù ira ánâ ni Amor.

¹⁷ “Á mággè nga jimittál yù ággaw nga sinullà ni Namarò nga pamapáno na nira ta Egipto, tapé ipetoli na ira sawe lugár tam ta kunnay sù initabbá na ngaw ká Abrakam. Á gapu ta nabayák iren nga naggián túrin ta lugár na Egipto, minaru yù ira tatolay. ¹⁸ Á napatalián yù patul ta Egipto ta tanakuán nga patul, nga arán na ammu yù napiá nga kingnguá nayù ngaw Kusè. ¹⁹ Á arán na inikállá yù ngaw ira naggaká nittam. Inilogò na ira. Á pinuersá na ira ta tájjiád da yù ira ánâ da, tapé matay ira.

²⁰ “Á tán nga ággaw ngaw yù keyaná ni Moyses. Á napiá nga abbing, á ayatán si Namarò kuna. Á inituttú di innò na ána sinaronád da ta tallu nga bulán sù bale ra. ²¹ Á nu awámin ta awayyá ra nga mangituttú, napuersá ira nga nangipay ta lawán. Á nálek nayù babay nga anâ nayù patul, á jimmá na, nga pinataganatán na ta kun na anâ na.

²² “Á naggiámmu si Moyses ta ngámin nga ituddu nayù ira Egipto, á napiá ána makáwayyá yù ággubu-ubobuk na ána napiá ngámin yù akkuán na. ²³ Á nu appátapulu yù dagun ni Moyses, nanonò na ta en na tullúnán yù ira kuruk nga wáwwagi na nga ginaká ni Israel. ²⁴ Á naratang na yù tádday nga jigirigátan nayù Egipto. Á en na iniyigù yù kagittá na, á pinapáte na yù Egipto. ²⁵ Ta kagian ni Moyses ta kánnámmuán nayù ira kanakanáyun na ta aggina yù jinok ni Namarò ta mamalubbáng nira sù ira mangaripan nira. Ngam arád da nánnámmuán.

²⁶ “Á sù tádday ággaw, naratang na yù duá nga ginaká ni Israel nga maddamá, á gimamá na ira. ‘Wáwwagi,’ kun ni Moyses nira, ‘anni ipaddamá naw, ta mawwagi kayu gemma?’ kun na. ²⁷ Á yù tolay nga iddá na lâ nakiramá, inirubbá na si Moyses, á kinagi na, ‘Asinni panò naddok níkaw ta mammaguray ána mamanunnù níkami?’ ²⁸ Ipárik mà sù Egipto nga pinapátém kagabi?’ kun na. ²⁹ Á pakaginná ni Moyses sù kinagi na, naganássing, ta ammu na ta neparámak yù pamapáte na sù Egipto. Á nattálaw, á minay nakipaggián ta dabbun na Midian. Paggián na tán, nangatáwa. Á tán nga lugár yù neyanakán nayù ira duá nga ánâ na nga lálláki.

³⁰ “Á naggián si Moyses ta Midian ta nabayák. Á pappasá na appátapulu ta dagun, ta panaron na ta ayám ta kalállammatán nga aranni ta puddul na Saynay, nappasingan si

Namarò kuna, ta limittuák yù daroban na ta api sù alinná nga káyu nga maggatang nga ari makán na api. ³¹ Á napállá si Moyses ta pakasingan na sù káyu nga naggatang, á jimikki kuna, tapè imámmatán na ta napiá. Á naginná na yù ngáral ni Apu Namarò nga naggapu ta api, á kinagi ni Apu, ³² ‘Sikán si Namarò, nga Yápu nayù ira naggaká nikaw, nga Yápu di Abrakam kári Isak kâ Akup.’ Á pakaginná ni Moyses, namippippik nga ari makeyangngá nga maningan. ³³ Á kinagi ni Apu kuna, ‘Iriám mu yù sapátu mu, ta mangilin yù dabbun nga nanáddagám mu.’ ³⁴ Á kabalín ni Moyses nangari ta sapátu na, á kinagi ni Apu kuna, ‘Masingak ku gemma yù karigirigá nayù ira tatolè túrin ta Egipto, á maginná yù paggaráyad da. Á yáyù nga minulugakin, tapè iyígù ku ira. Ará! Umay ken laguk, ta dobat taka ta umay ka túrin ta Egipto,’ kun ni Namarò kuna.

³⁵ “Wáwwagi,” kun ni Esteban paga, “ta keggá ra ngaw nayù ira naggaká nittam ta Egipto, nanakitá da si Moyses. Ta kinagi ra ngaw kuna, ‘Asinni panò naddok nikaw ta mammaguray ána mamanunnú nikami?’ Á si Moyses, aggina yù jinok ni Namarò nga mangiyígù ána mammaguray nira, á inabbágán ni Namarò megapu sù daroban na nga nasingan ni Moyses sù káyu nga naggatang. ³⁶ Á si Moyses yù nangituluk sù ira naggaká nittam ta páno ra ta Egipto, á aru yù pinagaddátu na nga makapállá ta keggá ra paga ta Egipto, ána pallakák da nga umay ta dammáng nayù bebay nga mangngágan ta Ujjojin, ána keggá ra gapay ta kalállammatán ta appátapulu nga dagun.

³⁷ “Á si Moyses yù nakkagi sù ira ngaw ginaká ni Israel, nga kun na, ‘Si Namarò, doban na noka nikayu yù ábbilínán na ta kunnay ta paddok na níkan, nga naggapu sù ira ginaká naw,’ kun na. ³⁸ Á paggagammung nayù ira naggaká nittam ta kalállammatán, si Moyses yù kobobuk nayù daroban ni Namarò ta puddul na Saynay. Á si Moyses yù neddán sù bilin ni Namarò nga netúrâ, nga paggapuá nayù ákkatole na tolay ta áddè ta áddè, tapè aggina yù mangiyawâ nittam. ³⁹ Ngam yù ngaw ira naggaká nittam, nanakí ira nga manguruk kâ Moyses, á inipuerá ra, ta ikáyâ da manoli ta Egipto.

⁴⁰ “Á nakiubobuk yù ira tatolay kâ Aron, nga wagí ni Moyses ána yù olu nga pári na Kudío, á kinagi ra kuna, ‘Mappadday ka laguk sù ira didios tam nga mangipulú nittam, tapè tuttulát tam ira, ta arát tam ammu yù nesimmu kâ Moyses nga nangituluk nittam ta páno tam ta Egipto,’ kud da. ⁴¹ Á pidde ra laguk yù sináddios nga kun na kígaw nga báka, nga kinagi ra ta yápu ra, á pinárti ra yù ira ayám da nga iniyátáng da kuna. Á nabbúyá ira gapu ta pagayáyâ da sù pidde ra.

⁴² “Á yáyù nga napporay si Namarò nira, á nilikuránán na ira. Á pinaguráyán na ira, tapè maguru-uray ira lá nga makimoray sù ira bituan ta lángi. Á kingnguá ra ta kunnay ta netúrâ sù libru nayù ira ábbilínán ni Namarò, nga kunnaw: ‘Sikayu nga ginaká ni Israel, ngattá, ta ari sikán yù nangiyátángán naw sù ira ayám naw, ta pangiyátáng naw ta kalállammatán ta appátapulu ta dagun?’

⁴³ Ari sikán yù nakimorayán naw, nu ari galá yù ira sináddios! Inakká naw nga inipulupulú yù paggianán nayù sináddios nga mangngágan ta Molok ána yù sináddios nga pidde naw ta kun na bituan, nga mangngágan ta Repan.

Aggira yù ira sináddios nga pidde naw nga pakimorayán naw, á namalittúkkak kayu nira! Á yáyù liwâ naw, nga gapu na nga papanawat takayu ta dabbun naw, á mánaw kayu nga umay túrin ta abbák na dabbun na Babilonia, á marigirigá kayu tán.’†

⁴⁴ “Wáwwagi,” kun ni Esteban, “ta keggá nayù ira ngaw naggaká nittam ta kalállammatán, egga nira yù balay nga ákkimorayád da kâ Namarò, ta naggián si Namarò nira. Á pidde ra ta bale na yù gámi ána tabbí na ayám, ta kunnay sù inipasingan ni Namarò kâ Moyses.

⁴⁵ Á bittáng da yù balay ni Namarò sù ira ginaká ra. Á ta pate ni Moyses, si Josiuwa yù táli na. Á inipulú da yù bale ni Namarò nira ta áddè ngaw tallung di Josiuwa sawe dabbun nga inittabbá ni Namarò nittam. Á naratang da yù ira olu nga naggián saw, ngam pinapáno na nira ni Namarò, á iniyawá na yù dabbud da sù ira ngaw naggaká nittam. Á naggián lá paga yù bale ni Namarò sù ira naggaká nittam ta áddè ta pammagure na ngaw ni Patul Dabid.

⁴⁶ “Á ta keggá na ngaw ni Patul Dabid, ayatán si Namarò kuna. Á inikomá ni Patul Dabid kâ Namarò ta ipapadde na kuna yù bale na, nga pakimorayán nayù ginaká ni Akup sù Yápu ra. ⁴⁷ Ngam arán na inanugú. Á si Patul Solomon, nga aná ni Patul Dabid, aggina yù namadday ta bale ni Namarò.

⁴⁸ “Ngam si Apu Namarò, ari gemma maggián ta balay nga pidde na tolay. Ta netúrâ yù ubobuk ni Apu Namarò, nga kinagi nayù ábbilínán na, nga kunnaw:

† 7:43 Amos 5:25-27

49 “Yù lángi, kunnay lâ ta pagitubangák ku. Á yù dabbuno, kunnay lâ ta pangipotunák ku ta takki.

Egga panò yù paddayan naw nga paggianák ku? Awán!
Egga panò yù paddayan naw nga pagibannagák ku? Awán!

50 Ta sikán galá yù nappadday ta lángi ána dabbuno, ána ngámin nga egga nira,[†] kun ni Namarò.”

51 Á kinagi na laguk ni Esteban sù ira minámmanunnù ána yù ira tatolay, “Sikayu, anningillá yù kataggá na ulu naw! Naráké yù nonò naw ána kitul kayu, á arán naw tángngagan yù bilin ni Namarò. Naggigittá kayu sù ira ngaw naggaká nittam, ta makikontará kayu gapay sù Mangilin nga Ikararuá. 52 Egga panò yù tádday sù ira ngaw ábbilinán ni Namarò nga arád da jinigirigá? Awán! Pinapáte ra yù ira ngámin ngaw nga nangilayalayá ta umay ta dabbuno yù napiá nga Masserbi kê Apu Namarò, nga MakKiristu. Á labbè na, sináttájjíán naw ána pinapáte naw. 53 Á sikayu yù iniddán nayù ira daroban ni Namarò ta tunung na. Ngam ari kayu manguruk!” Yáyù áddè nayù kinagi ni Esteban.

Yù Pate ni Esteban

54 Á pakaginná nayù ira minámmanunnù sù kinagi ni Esteban, napporay ira, á nangngarangaringngi ira megapu sù nepallá nga pore ra. 55 Ngam si Esteban, ajjan nga nepulú kuna yù Mangilin nga Ikararuá, nga mangabbák kuna. Á sinánguk ni Esteban yù lángi, á nasingan na yù dalingárang ni Namarò ána si Apu Kesu nga makáwayyá nga manáddak ta jiwánan ni Namarò. 56 Á kinagi ni Esteban, “Innan nawè! Nabukatán yù lángi, á masingak ku yù Kaká na Ngámin na Tatolay nga manáddak ta jiwánan ni Apu Namarò,” kun na.

57 Á pakaginná nayù ira tatolay sù kinagi ni Esteban, lippá da laguk yù talingá ra, ána nagagay ira ta pore ra kê Esteban. Á gikarakarerán ira nga minay naggápù kuna. 58 Á pinalawád da ta ili, á pinayapayáng da ta batu. Á yù ira nga namayáng kuna, iniriád da yù barawási ra nga inipatarod da sù bagitolay nga mangngágan ta Saulo.

59 Á pamayáng da kê Esteban, nakimállà si Esteban kê Apu, á kinagi na, “Apu Kesu, paddulotam mà,” kun na. 60 Á namalittúkak, ána iniyássikan na yù ngáral na, á kinagi na, “Apu, arám mu lâ ibiláng nga liwâ da yawe akkuád da níkan,” kun na. Á yáyù lâ áddè na kinagi na, á natayin.

8

Yù Pawwarawarâ nayù ira Manguruk

1 Á si Saulo, inanugù na yù pamapáte ra kê Esteban, ta aggina yù manangngal ta barawási nayù ira namayáng kuna. Á sù ángo na pamapáte ra kê Esteban, yáyù pamegapu ra manigirigá sù ira ngámin nga manguruk kê Apu Kesu nga naggián ta Jerusalem. Á nawwarawarâ yù ira manguruk ta purubinsia na Judiya ána Samaria. Ngam yù ira mapulu duá nga minángngilayalayá nga sinudduán ni Apu Kesu, naggián ira ta Jerusalem.

2 Á ajjan yù ira tatolay nga napasiggaggá yù ángnguruk da kê Apu, á pakarámak da ta pate ni Esteban, kinulukuletád da, á iná da yù baggi na, á ed da initanam. 3 Ngam si Saulo, jinigirigá na ira ngámin nga manguruk kê Apu Kesu. Simillung ta katággitádday nga bale ra, á inipagápù na yù ira nga lálláki ána bábbay, á inipabáluk na ira.

Yù Pangilayalayâ da sù Bilin ni Namarò ta Samaria

4 Á yù ira manguruk nga nawwarawarâ ta arayyu nga lugár, minay ira nga nangilayalayá sù bilin nga meyanung kê Apu Kesu. 5 Si Pilippi yù tádday. Á páno ni Pilippi ta Jerusalem, minay ta ili sù purubinsia na Samaria, á inilayalayá na nira si Apu Kesu Kiristu. 6 Á ngámin yù ira tatolay, sinángngák da ta napiá yù kinagi ni Pilippi ána yù nasingad da nga pinagaddátu na. 7 Á aru yù ira anitu nga pinapáno ni Pilippi, nga nakkalli ta nasikan ta páno ra sù ira nagunagád da. Á aru gapay ira nga tatolay nga natay baggi ra ána yù ira pilay gapay nga pinammapiá ni Pilippi. 8 Á yáyù nga magayáyá yù ira ngámin nga tatolay ta ili.

9 Á naggián gapay ta ili yù láláki nga mangngágan ta Simon, nga minágganánitu nga mamappállá sù ira tatolay ta Samaria sù angnga-angnguá na nga májik. Mappeddaráyaw, á kinagi na nira ta aggina yù makáwayyá. 10 Á ngámin ira nga maríku ána pobare, sinángngák da si Simon ta napiá. Á kud da, “Ajjan támma kuna yù pakapangnguá ni Namarò nga mamagaddátu,” kud da. 11 Á sinángngák da ta napiá, gapu ta nabayágin nga minássalamangká ta arubáng da, á napállá ira. 12 Ngam ta panguruk da sù napiá nga dámak

nga kinagi ni Pilippi nga meyanung sù pammagure ni Namarò ána yù pakáwayá ni Apu Kesu Kiristu, nakirigù ira laguk, aggira nga láláki ána bábbay. ¹³ Á mássiki si Simon, nanguruk gapay ána nakirigù. Á nepulupulú ká Pilippi. Á napállá si Simon, nga nepallá yù kapállá na ta pakasingan na ta aru nga pinagaddátu ni Pilippi.

¹⁴ Á yù ira minángngilayalayá nga naggián ta Jerusalem, pakarámak da ta manguruk yù ira tatolay ta Samaria ta bilin ni Namarò, jinok da di Eduru ká Kuan ta umay nira. ¹⁵ Á tappi di Eduru ta Samaria, nakimállá ira ká Namarò ta ipepulú na sù ira bagu nga manguruk yù Mangilin nga Ikararuá. ¹⁶ Ta arán ni Namarò paga jinok yù Mangilin nga Ikararuá ta umay nira, ngam narigù ira lá nga netádday ká Apu Kesu. ¹⁷ Á di Eduru, sinámmi da ira, á jimittál nga naggián nira yù Mangilin nga Ikararuá.

¹⁸ Á nasingan ni Simon ta minay naggián sù ira manguruk yù Mangilin nga Ikararuá ta panámmi di Eduru nira. Á en na laguk iniyalawá ká Eduru yù kuártu, ¹⁹ ta kinagi na kuna, “Iddám mà gapay ta pakáwayá nga kunnay sù pakáwayyám, tapè umay yù Mangilin nga Ikararuá nga maggián sù ira ngámin nga támmitak ku gapay,” kun na. ²⁰ Á kinagi ni Eduru kuna, “Mokum ka ána yù kuártum, nu kagam mu ta magátang yù iyawá na lá ni Namarò ta ikáyá na nga pangiyawatán! ²¹ Ari ka meballay karanniawe nga akkuám mi, gapu ta ari pareku nga napiá yù nonò mu ta ánnanganán ni Apu Namarò. ²² Ibabáwim laguk yù naráké nga nonò mu, á makimállá ka ká Apu ta abernu pakomán na ka ta naráké nga nononotam mu. ²³ Matákál ku ta nepallá yù passil mu, ána ari ka paga napalubbáng ta passerbim ta naráké nga karagátam mu,” kun ni Eduru kuna. ²⁴ Á simibbák si Simon, á kinagi na, “Ipakimállá mà bi ká Apu ta ari bulubugá mesimmu nikán yù kinagim.”

²⁵ Á kabalid di Eduru nangilayalayá sù bilin ni Namarò tán, nánaw ira, ta manoli ira ta Jerusalem. Á ta ánge ra, inilayalayá da yù napiá nga dámak nga meyanung ká Apu Kesu ta aru nga babálay nga sinalebarád da ta purubinsia na Samaria.

Di Pilippi ána yù Tolay nga taga Etiopia

²⁶ Á aijan yù daroban ni Apu Namarò nga limittuák, á kinagi na ká Pilippi, “Umay ka ta abagátán, sù dалан nga naggapu ta Jerusalem nga mappángè túrin ta Gasa.” Á yù dалан nga kinagi na, talebarán na yù namagá nga gián ta kalállammátán. ²⁷ Á naggagannuá si Pilippi, á nánaw. Á pakáddé na sù dалан, naratang na yù tolay nga nattakay ta kalesá nga naggapu ta Jerusalem. Aggina yù makáwayá nga laláki nga taga Etiopia, nga minángngikárgu nga masserbi ká Kandase nga rená nga mammaguray ta áppatulán na Etiopia. Á yù tolay yù manoran ta ngámin nga kuártu ána kukuá nayù rená. Á minay ta Jerusalem, tapè makimoray ká Namarò. ²⁸ Á ta kabalín na nakimoray, nánaw ta Jerusalem, á manolingin ta Etiopia. Á pattake na ta kalesá na, bibbiran na yù libru nga iníturá na ngaw ni Isaya, nga yù ngaw ábbilinán ni Namarò.

²⁹ Á pakaratang ni Pilippi sù kalesá, kinagi nayù Mangilin nga Ikararuá kuna, “Dukki ka táne kalesá ta mepulú ka kuna.” ³⁰ Á sinimmá ni Pilippi yù kalesá, á mináranni kuna. Á naginná na laguk yù tolay nga mabbibbik sù libru ni Isaya nga yù ngaw ábbilinán ni Namarò. Á iniyabbù ni Pilippi kuna, “Kánnámmuám mu yù bibbiram mu?” ³¹ Á simibbák yù tolay, á kinagi na ká Pilippi, “Kunnasi laguk pakánnámmù, ta awán gemma ta tolay nga mangituddu nikán?” Á inapà na si Pilippi ta mepattakay kuna. Á nappittá si Pilippi nga nepaggitubang kuna.

³² Á yawe yù bilin nga binibbik nayù laláki sù libru:

“Aggina yù meyárik ta karneru nga iyánge ra ta áppártián.

Á magimammá nga kunnay ta kígaw na karneru nu usitád da yù duddù na, ta ari bulubugá makkítuk.

³³ Nepasiránán ta arubáng nayù ira tatolay, á ari kustu yù pamestigá ra kuna, ngam iddá da lá pinapátay nga awán ta liwá na.

Á awán ta makkagi ta meyanung sù ira ginaká na,

ta nári ngin yù inángà na sù dabbuno.”*

³⁴ Kabalín na nabbibbik, iniyabbù nayù tolay ká Pilippi, “Asinni yù ubobugan ni Isaya sawe túrá na? Kagian na panò yù meyanung ta baggi na, onu kagian na yù meyanung ta tanakuán?” ³⁵ Á yáyù nga inigapu ni Pilippi nga ibukalán na yù binibbik na nga kinagi ni Isaya, á inipakánnámmu na yù napiá nga dámak nga meyanung ká Apu Kesu.

* 8:33 Isaya 53:7-8

³⁶ Á ta pallakák da ta dалан, nakáddè ira ta danum. “Innam mè yù danum!” kun nayù tolay ká Pilippi. “Awayyá nakuan nga marigù kunangane?” kun na. ³⁷ “Wan,” kun ni Pilippi kuna. “Máýâ nu kuruk ka nga manguruk ká Apu Kesu,” kun na. “Wan, mangurugá,” kun nayù tolay ká Pilippi. “Kurugak ku ta Aná ni Namarò si Apu Kesu Kiristu.” ³⁸ Á pinaginnà na laguk yù kalesá na, á gimitták ira, á minay ira sù danum. Á jinigù ni Pilippi.

³⁹ Á god da nga naggapu sù danum, inakká nayù Ikararuá ni Apu si Pilippi. Á yù tolay, arán na má nasingan. Á nattakay yù tolay nga nánaw nga nappángè ta gián na, nga magayáyá megapu sù panguruk na ká Apu Kesu. ⁴⁰ Á si Pilippi, inikáddagá na lâ jimittál ta ili na Asoto. Á nánaw, nga nappángè ta ili na Sesaria. Á inilayalayá na yù napiá nga dámak nga meyanung ká Apu Kesu ta ngámin nga ili nga sinalebarán na ta áddè ta pakáddè na ta Sesaria.

9

Pabbáli ni Saulo ta Manguruk ká Apu Kesu

¹ Á si Saulo, narákè yù nonò na sù ira nga manguruk ká Apu Kesu, á inupù na yù ánnanássing na taapatáyan na ira. Á yáyù nga minay sù kotunán na pári, ² á kiniddo na yù túrà na nga iyángo na sù ira Kudío ta kapillíá ra ta ili na Damasku, tapè mepakánnammu nira yù pakáwayyá na nga maggápù sù ira nga tumuttul ká Apu Kesu, nga láláláki ána bábbay, á iyángo na ira ta ábbaluran ta Jerusalem.

³ Á di Saulo ána yù ira kábulun na, pakálá da sù túrà, nánaw ira laguk nga minay nga mappángè ta Damasku. Á pakárami ra ta ili, ikáddagá lâ naddalingárang yù giád da megapu sù nawák nga naggapu ta lánzi. ⁴ Á dagarágá natombá si Saulo, á naginná na yù ngárál nga nakkagi, nga kun na, “Saulo, Saulo, ngattá, ta jigirigátam má?” ⁵ Á kinagi ni Saulo, “Asinni ka, Apu?” Á kinagi na, “Sikán si Kesu nga jigirigátam mu. ⁶ Ngam gumikkáng ka, á umay ka ta ili, ta makagi nikaw yù akkuám mu,” kun na ká Saulo.

⁷ Á yù ira kábulun ni Saulo, nakalalang ira, ta naginná ra yù ngárál, ngam awán ta tolay nga nasingad da. ⁸ Á gimikkáng si Saulo, á naggimmúlák, ngam awán bulubugá ta masingan na. Á kinering da laguk nga iniyángo ra ta ili na Damasku. ⁹ Á ari nakasingan ta tallu nga ággaw si Saulo, ána ari bulubugá kiminán ána mininum.

¹⁰ Á naggián ta Damasku yù napiá nga tolay nga manguruk ká Apu Kesu, nga mangngágan ta Ananiá. Á nappasingan si Apu nga nagubobuk kuna, á kinagi na, “Ananiá,” kun na. “Wan, Apu, ajjaná saw,” kun ni Ananiá kuna. ¹¹ Á kinagi ni Apu kuna, “Gumikkáng ka, ta umay ka ta kalsáda nga mangngágan ta Matunung. Á umay ka ta bale ni Juda, á kagiam mu nira ta em mu tullúnán yù tolay nga mangngágan ta Saulo nga taga Tarsu. Ajjanin tán nga makimállá nikán. ¹² Á natagená ni Saulo ta kunay ta nappasingan kuna yù tolay nga mangngágan ta Ananiá, nga umay nga manámmi kuna, tapè makasingan má,” kun ni Apu ká Ananiá.

¹³ Á maganássing si Ananiá ká Saulo. Á simibbák si Ananiá ká Apu, á kinagi na, “Aro! Apu, aru yù ira nga mangiparámak nikán ta meyanung ká Saulo ána yù kingngikingnguá na nga narákè sù ira tatolem túrin ta Jerusalem. ¹⁴ Á yù ira kotunán na pári túrin ta Jerusalem, iniddád da ta pakáwayyá na ta umay saw maggápù ta ngámin ira nga mangikatalá nikaw,” kun na. ¹⁵ Ngam kinagi ni Apu kuna, “Ará! E ken, ta sinullá ku si Saulo ta umay mangipakánnammu nikán sù ira makkakerumá nga tatolay nga ari Kudío, nga ábbunan naw ta Kentil*, ána yù ira patul da, ána yù ira ginaká ni Israel gapay. ¹⁶ Á ipasingak ku gapay kuna yù ngámin nga jigá da, ána iyattam na megapu ta panguruk na nikán,” kun ni Apu.

¹⁷ Á nánaw laguk si Ananiá nga minay ta bale ni Juda. Tallung na ta balay, jimikki ká Saulo, á sinámmi na, á kinagi na, “Saulo nga wagí, si Apu Kesu yù naddok nikán ta umayá saw. Ággina yù nappasingan nikaw sù dалан nga nilakák mu sù ángem saw. Á jinok nangá ta umayá nikaw, tapè makasingan ka má, ána umay nikaw yù Mangilin nga Ikararuá.” ¹⁸ Á dagarágá nári yù kun na sissi ta matá ni Saulo, á nakasingan mángin. Á gimikkáng, á nakirigù laguk. ¹⁹ Á minay kiminán, á nanoli yù sikan na.

Yù Pangilayalayá ni Saulo ta Damasku

Á nakipaggián bì si Saulo sù ira nga manguruk ta ili na Damasku. ²⁰ Á dagarágá minay sù ira ággagammungán na Kudío, tapè mangilayalayá sù meyanung ká Apu Kesu. “Si Apu Kesu yù kuruk nga Aná ni Namarò,” kun na. ²¹ Á ngámin ira nga nakaginná kuna, napállá ira.

* 9:15 Yù ira Kentil yù ngámin makkakerumá nga tatolay nga ari Kudío.

Á nakkaká-ubobuk ira, nga kud da, “Asinni yaw, nu ari yù tolay nga nanigirigâ ngaw sù ira nga maggián ta Jerusalem, nga manguruk kâ Apu Kesu? Á anni panò yù gapu na nga minay saw, nu ari lâ ta gaputan na yù ira nga manguruk, á baluran na ira ána iyánga na ira sù ira kátannangán na pári na Kudío túrin ta Jerusalem,” kud da. ²² Ngam pinasikan ni Namarò yù nonò ni Saulo ána yù pakáwayyá na nga mangilayalayâ. Á inilayalayâ ni Saulo si Apu Kesu, nga MakKiristu nga kinagi nayù ira ngaw ábbilinán ni Namarò nga umay ta dabbuno nga mammaguray ána mangiyigù ta tolay, tapè mapakomá ni Namarò ira. Á pinalalang ni Saulo yù ira Kudío nga maggián ta Damasku, megapu sù pakáwayyá nayù pangituddu na, ta awán ta itabbák da kuna.

²³ Á kabalin na aru nga ággaw nga paggián ni Saulo ta Damasku, á yù ira Kudío nga ari manguruk, inigagánga ra si Saulo nga papatáyan. ²⁴ Ngam narámak ni Saulo yù pangigagánga ra kuna. Á simmisimurád da yù áttallungán ta ili ta ággaw ána gabi, tapè papatáyad da si Saulo nu parubán na mattálaw. ²⁵ Ngam yù ira kákkopun ni Saulo nga manguruk kâ Apu Kesu, inipittá da si Saulo ta unak na kuribù, á nipagukák da ta ábbák na alitù na ili ta tádday nga gabi, tapè mallammang nga mánaw.

Yù Ánge ni Saulo ta Jerusalem

²⁶ Á minay si Saulo ta Jerusalem, á mepattatádday nakuan sù ira manguruk kâ Apu Kesu, ngam maganássing ira kuna, ta arád da kinuruk ta aggina gapay yù siminuttul kâ Apu Kesu. ²⁷ Ngam si Bernabe, inabbágán na si Saulo, ta en na inituluk sù ira minángngilayalayâ. Á inistoriá ni Bernabe nira yù nesimmu kâ Saulo ta dалан sù ánge na ta Damasku, nga nasingan na si Apu Kesu nga nagubobuk kuna. Á kinagi na gapay ta ari naganássing si Saulo nga mangilayalayâ sù bilin ni Apu Kesu Kiristu túrin ta Damasku.

²⁸ Á yù ira tatolay nga manguruk nga naggián ta Jerusalem, pakaginná ra sù kinagi ni Bernabe, inalawá da si Saulo, á nepulupulù nira. ²⁹ Á inilayalayâ na si Apu Kesu Kiristu ta Jerusalem gapay. Á nakiubobuk gapay nga nepappeperang sù ira Kudío nga Gareko yù ággubobuk da. Á yáyù nga gustu ra papatáyan. ³⁰ Á yù ira nga mawwawági megapu ta ángnguruk da kâ Apu Kesu, pakarámak da sù pangigagánga ra kâ Saulo, inituluk da laguk ta ili na Sesaria ta aggik na bebay. Á pinapáno ra ta umay ta ili na Tarsu.

³¹ Á nakemammá laguk yù ira nga mawwawági ta ángnguruk da kâ Apu Kesu, nga naggián sù purubinsia ira na Judiya ána Galilia ána Samaria, ta awánin ta nakikontará nira. Á nakimorayád da si Apu Kesu nga Yápu ra. Á gapu ta pangabbák nayù Mangilin nga Ikararuá nira, nepasigaggá yù ángnguruk da kâ Apu ána nalannapán ira ta aru nga manguruk.

Yù Ánge ni Eduru ta Lidda ána Joppa

³² Á nappassapassiár si Eduru nga mangituddu sù ngámin ira nga manguruk ta aru nga ili. Á simippi sù ira nga manguruk kâ Apu nga maggián ta Lidda. ³³ Á naratang na tán yù tolay nga mangngágan ta Aneyà. Á nagiddá ta dapan na ta walu ragunin nga mataki gapu ta kun na natay yù baggi na. ³⁴ Á kinagi ni Eduru kuna, “Aneyà, pammapián na ka ni Apu Kesu Kiristu. Gumikkáng ka, á lukutam mu yù dapam mu.” Á dagarágâ gimikkáng si Aneyà. ³⁵ Á ngámin nga tatolay nga naggián ta Lidda ána Siaron, nisingad da si Aneyà nga nammapiángin, á linikurád da yù dán nga sinuttulád da, á nanguruk ira gapay kâ Apu.

³⁶ Á túrin ta Joppa naggián yù babay nga manguruk kâ Apu, nga mangngágan ta Tabita. Á iningágad da ta Dorka ta ággubobuk na Gareko, á “Uttá” yù kebalinán na. Á napiá nga babay si Dorka, nga mangikállá sù ira pobare, ta sigidá inabbágán na ira. ³⁷ Á keggá ni Eduru ta ili na Lidda, iddá na lâ nataki si Dorka, á natay. Á panigù da kuna, iniyunè da ta utun, á pineddá ra ta lágum. ³⁸ Á aranni ta ili na Joppa yù ili na Lidda. Á pakarámak nayù ira manguruk nga naggián ta Joppa ta aijan si Eduru ta Lidda, jinok da yù duá nga lálláki nga minay nagágál kâ Eduru. Á kinagi ra kâ Eduru, “Ari ka bi mattaláttán nga umay nikami,” kud da.

³⁹ Á pakaginná ni Eduru sù kinagi ra, naggagannuá nga nepulù nira nga minay ta Joppa. Á labbé da ta Joppa, inituluk da si Eduru ta lágum ta utun, nga nameddád da sù natay. Á yù ira bábbay nga nabálu, gikulukuletán ira nga nagugúru kâ Eduru, tapè ipasingad da kuna yù ira gámi nga pidde na ngaw ni Dorka. ⁴⁰ Ngam pinalawán na ira ngámin ni Eduru, á namalittúkak, á nakimállá kâ Apu. Kabalin na nakimállá, nallipay sù natay. “Tabita, gumikkáng ka,” kun ni Eduru sù natay. Á naggimmúlák yù matá na. Á pakasingan na kâ Eduru, giminikkáng. ⁴¹ Á singngalán ni Eduru yù limá na ta ábbágán na, á nanáddak. Á inagálán ni Eduru yù ira nga manguruk ána yù ira kábulud da nga bábbay ira nga nabálu,

á inipataron na nira nga natolayin. ⁴² Á narámak nayù tangelián na Joppa. Pakaginná ra, aru ira nanguruk kâ Apu Kesu. ⁴³ Á si Eduru, nakipaggián nira ta Joppa ta nabayák sù bale ni Simon nga minámmalapà ta tabbi na ayám.

10

Di Eduru kâ Kornelio

¹ Á naggián ta Sesaria yù tolay nga ari Kudio nga mangngágan ta Kornelio. Aggina yù kapitán ta magatù nga suddálu nga taga Roma nga abbúnad da ta Kampo na Italia. ² Á mássiki nu ari ira Kudio, makimoray kâ Namarò di Kornelio ána yù ira kábbale na. Á minángngikállà si Kornelio nga minállimù sù ira pobare nga Kudio. Á sigídá nga nakimállà si Kornelio kâ Namarò.

³ Á ta pannarek na bilák ta púgák, nasingan ni Kornelio yù daroban ni Namarò nga limittuák nga minay kuna. Á kinagi na, “Kornelio.” ⁴ Á nakaddák si Kornelio, á jinúlangán na yù daroban, ta nepallá yù assing na. Á kinagi ni Kornelio laguk, “Anni yù kagiam mu níkan, Apu?” Á kinagi nayù daroban ni Namarò kuna, “Nonotan na ka ni Namarò ána yù pakimállà mu kuna ána yù pallimù mu sù ira pobare. ⁵ Á dobam mu laguk ta ili na Joppa yù umay magágál sù tolay tán nga mangngágan ta Simon nga abbúnad da gapay ta Eduru. ⁶ Makipaggián kâ Simon nga minámmalapà ta tabbi na ayám. Ajjan yù bale na ta aggik na bebay,” kun nayù daroban kâ Kornelio.

⁷ Á páno nayù daroban ni Namarò, inagálán ni Kornelio yù duá nga lálláki nga aripan na ána tádday nga suddálu nga masserbi kuna, nga makimoray gapay kâ Namarò. ⁸ Á kinagi na nira ni Kornelio yù meyannung sù daroban nga nappasingan kuna ána ngámin yù kinagi na kuna. Á jinok na ira ta Joppa.

⁹ Á sù tádday ággaw, nallakák ira ta dалан nga mináranni ta ili ta tangngá na ággaw. Á ajjan si Eduru ta balay. Á minunè si Eduru ta atà nga sináttatapán, tapè maguroray nga makimállà kâ Apu. ¹⁰ Á manganánuán, nabisin si Eduru, á gustu na nakuan kumán, ngam ari ira paga nakalutu. Pagiddak na ta pakkákád da, ajjan yù inipasingan ni Namarò kuna nga kunnay ta nattatagenà, ngam ari gemma nakkaturuk. ¹¹ Á nasingan na nga kun na nabukatán yù lángi, ána yù kun na dakal nga ulà nga magayáyun, nga kun na natangngalán yù appá nga tükù na, nga mináranni kuna. ¹² Á ta unak na ulà ajjan yù ira makkakerumá nga ayám nga mallakák ána makkáray ána makkakerumá nga iráw ána mammánù gapay. ¹³ Á naginná ni Eduru yù ngáral nga nakkagi kuna, nga kun na, “Eduru, gumikkáng ka á pártiam mu, á kanam mu,” kun na. ¹⁴ Á kinagi ni Eduru, “Molangà, Apu. Arák ku bulubugá kinán yù kanniawam mi nga Kudio, nga ipugik nayù tunung mi,” kun na. ¹⁵ Á kinagi na laguk nayù ngáral, “Arám mu kanniawan yù pinakarenuán ni Namarò,” kun na. ¹⁶ Á namillu yù kunnaiw nga nesimmu kâ Eduru. Á kapamillu na, netoli yù ulà ta lángi.

¹⁷ Á nakalalang si Eduru, á ninononò na nu anni yù kebalinán nayù nasingan na. Panononò na paga, á yù ira tallu nga lálláki nga jinok ni Kornelio, nálek da yù bale ni Simon, á simippi ira ta puertá nayù alitù na. ¹⁸ Á nakkatol ira ta iyabbù da, nga kud da, “Egga saw yù tolay nga mangngágan ta Simon nga abbúnad da gapay ta Eduru?” kud da.

¹⁹ Á ajjan si Eduru paga ta utun, nga mannononò paga ta nasingan na. Á kinagi nayù Mangilin nga Ikararua kuna, “Ginnám mu, ta ajjanin yù ira tallu nga tatolay, nga magalek nikaw. ²⁰ Gumikkáng ka, ta ámmuluk ka. Ari ka mabbábáng nga umay nira, mássiki ari ira Kudio, ta síkán gemma yù naddok nira,” kun na kâ Eduru.

²¹ Á minuluk si Eduru laguk, á kinagi na nira, “Sikán yù tolay nga aleran naw. Anni yù iniyánge naw níkan?” ²² Á kinagi ra, “Jinok na kami ni Kapitán Kornelio. Aggina yù kapitán na magatù nga suddálu, ána napiá nga tolay nga makimoray kâ Namarò. Á aggina gapay yù pakimorayán nayù ira ngámin nga ikáttolem nga Kudio. Á ajjan yù daroban ni Namarò nga nakkagi kuna ta ipágál na ka ta umay ka ta bale na, tapè ginnán na yù kagiam mu kuna,” kud da kâ Eduru. ²³ Á pinaddulò ni Eduru ira, á inálluik na ira. Á nagammá ira tán.

Á ta pannawák, nánaw yù ira tatolay nga naggapu kâ Kornelio, á nepulù nira si Eduru. Á nepappupulù gapay nira yù ira káruán nga taga Joppa nga mawwagi ta ángnguruk da kâ Apu Kesu. ²⁴ Á ta tádday ággaw nakáddè ira ta Sesaria. Á ajjan di Kornelio, nga nagiddak nira ta bale na. Á naggagammung gapay ta bale na yù ira kanakanáyun na ána yù ira kákkopun na, ta inapà na ira, tapè magiddak ira gapay sù labbè ni Eduru.

²⁵ Á tappi di Eduru ta bale ni Kornelio, minay si Kornelio jiminápun nira, á namalittúkak ta arubáng ni Eduru nga makimoray kuna. ²⁶ Ngam pinagikkáng ni Eduru, á kinagi na kuna, “Gumikkáng ka, ta tolayâ lâ nga kunnay nikaw gemma,” kun na kê Kornelio. ²⁷ Á nakkakâ-ubobuk ira. Á tallung da ta lágum na balay, nasingan ni Eduru ta aru yù ira tatolay nga naggagammung tán.

²⁸ Á kinagi ni Eduru laguk nira, “Ammu naw ta mepugik nikami nga Kudio yù makikábulun ta tolay nga ari Kudio, ána ari kami makatallung ta bale na tolay nga ari Kudio. Ngam si Namarò, inipakánnámmu na níkan ta arák kin bulubugá panakitán yù tolay, mássiki nu tanakuán yù katole na ána ari napakarenuán ta kunnay ta kustombare mi nga Kudio. ²⁹ Á yáyù nga aringâ nabbábáng nga minay saw ta pangipágál naw níkan. Á iyabbú ku laguk nu anni yù gapu na nga inipagágál nawà?” kun ni Eduru nira.

³⁰ Á kinagi ni Kornelio kuna, “Tallu nga ággawin yù napasá ta kunnawe nga pannarek na bilák ta púgák, á naggiánâ ta balé nga makimállâ kê Namarò nga kunnay ta kustombare naw. Á limittuák ta arubáng ku yù tolay nga naddalingárang yù barawási na. ³¹ Á kinagi na níkan, ‘Kornelio, naginnâ ni Namarò yù pakimállâ mu kuna, á kemámmatán na gapay yù pallimù mu sù ira pobare. ³² Dobam mu laguk ta ili na Joppa yù umay magágál sù tolay nga mangngágan ta Simon, nga abbúnad da gapay ta Eduru. Makipaggián kê Simon nga minámmalapa ta tabbi na ayám. Ajjan ta bale na ta aggik na bebay,’ kun na níkan. ³³ Á yáyù nga daretiu laguk inipágál taka, á napiá ta minay ken. Á yáyù nga ajjan kami ngámin saw ta ánninganán ni Apu Namarò, tapé ginnám mi ngámin yù ipakagi na nikaw,” kun ni Kornelio kuna.

Yù Pangituddu ni Eduru sù ira nga ari Kudio

³⁴ Á namegapu si Eduru nga nagubobuk, á kinagi na, “Natákál kin ta kurugán nga awán ta paddurúmán ni Namarò nga tatolay. ³⁵ Ta alawatan ni Namarò yù ira ngámin nga makimoray kuna ána napiá yù akka-akkuád da, maguray lâ yù katole ra. ³⁶ Á ammu naw gemma ta sikami nga ginakâ ni Israel yù nabbilinán ni Namarò sù napiá nga dámak nga meyanung kê Apu Kesu Kiristu. Aggina yù Yápu tam ngámin nga Kudio ána ari Kudio, gapu ta aggina yù Namakkápiá ta tolay kê Namarò.

³⁷ “Á narámak naw yù nesimmu ta ngámin tangapáddabbunán na Judiya, nga namegapu ta purubinsia na Galilia ta kabalín na pangilayalayâ na ngaw ni Kuan nga Minánnigù. ³⁸ Sinullâ ni Namarò si Apu Kesu nga taga Nasaret, á inipepulù ni Namarò kuna yù Mangilin nga Ikararuá na. Á iniyawâ na gapay kuna yù pakáwayyâ na ána yù ámmagaddátu na. Á napiá ngámin yù kingngikingnguá ni Apu Kesu. Minay ta ngámin nga lugár, á pinammpiá na ngámin yù ira nga máttakì ána pinalubbáng na yù ira nga jinigirigâ ni Satanas ána yù ira nga tarepoyungan, gapu ta nepulupulù si Namarò kuna.

³⁹ “Á sikami nga sinudduán na, kagiam mi ngámin yù nasingam mi nga kingnguá ni Apu Kesu ta ngámin nga babálay nayù ira Kudio sù purubinsia na Judiya ána yù ili na Jerusalem. Á ginápù da laguk, á pinapáte ra ta kurù. ⁴⁰ Ngam pinaginnanolay ni Namarò sù mekatallu nga ággaw áddè ta pate na. Á nappasingan nikami. ⁴¹ Ari nappasingan sù ngámin nga tatolay nu ari galâ sikami nga dán nga pinlí ni Namarò ta mangipakánnámmu ta kuruk ngámin yù nasingam mi nga kingnguá na ána yù nesimmu kuna.

“Á kabalín ni Apu Kesu naginnanolay, sikami yù nepakkákán kuna ána nepaginun kuna. ⁴² Á jinok na kami ta umay kami mangilayalayâ sù napiá nga dámak ta ngámin nga tatolay, ána ipakánnámmu mi gapay ta aggina yù sinullâ ni Namarò nga mamanunnù ta ngámin nga tatolay nga námmatay ána matolay paga ta pagáddekan nga ággaw. ⁴³ Aggina yù ubobugan nayù ngaw ira ábbilinán ni Namarò sù dán nga neturâ ira. Á kinagi ra ta mapakomâ yù liwiliwâ nayù ira ngámin nga manguruk kê Apu Kesu, megapu sù pakáwayyâ ni Apu Kesu ána yù kingnguá na,” kun ni Eduru kári Kornelio.

Yù Pangalawâ nayù ira nga ari Kudio sù Mangilin nga Ikararuá ni Namarò

⁴⁴ Á pagubobuk ni Eduru paga kári Kornelio, minay yù Mangilin nga Ikararuá sù ira ngámin nga nakaginnâ ta ubobuk ni Eduru. ⁴⁵ Á yù ira Kudio nga manguruk nga naggapu ta Joppa, nga nepappupulù kê Eduru, napállâ ira ta pakasingad da ta iniddán na gapay ni Namarò yù ira nga ari Kudio sù Mangilin nga Ikararuá. ⁴⁶ Nánnámmuád da yaw gapu ta naginnâ ra yù pagubu-ubobuk di Kornelio ta tanakuán nga ággubobuk nga arád da ammu, ána maddayaráyaw ira kê Namarò.

Á kinagi na laguk ni Eduru sù ira Kudio nga nepappupulù kuna, ⁴⁷ “Danniaw ira nga tatolay, inalawâ da gapay yù Mangilin nga Ikararuá ta kunnay nittam nga Kudio. Egga

panò yù mangipugik ta pakirigù da gapay sù danum?” kun ni Eduru. ⁴⁸ Á yáyù nga jinok ni Eduru ira ta marigù ira, tapè ipasingad da yù pakíyápu ra kâ Apu Kesu Kiristu. Á di Kornelio, inapà da si Eduru ta maggián lábbi nira.

11

Yù Pangiparámak ni Eduru sù ira Minángngilayalayâ ta Jerusalem

¹ Á yù ira minángngilayalayâ áнна yù ira manguruk nga naggián ta Judiya, narámak da ta nangalawâ gapay yù ira nga ari Kudio sù bilin ni Namarò. ² Á nanoli si Eduru ta Jerusalem. Á aijan tán yù ira káruán nga Kudio nga nakkagi ta máwák nga manuppál yù ira ari Kudio sù ngámin nga tunung ni Moyses. Á nakkakápereperang ira kâ Eduru ta ubobuk. ³ Á kinagi ra, “Ngattá, ta minay ka nepakikiruk áнна nepakkákán sù ira nga ari Kudio?”

⁴ Á yáyù nga inigapu ni Eduru nga inibukalán yù ngámin nga nesimmu kuna. ⁵ Kinagi na nira, “Sù ngaw paggiák ku ta ili na Joppa, nakimállakâ kâ Apu. Á ta pakimállà ku, aijan yù nappingan nikán. Nasingak ku yù nagaya-ayáyun nga kun na dakal nga ulà nga naggapu ta lángi, á kun na natangnalán yù appà nga tükù na. Á minay nikán. ⁶ Á iningak ku ta napiá, á nasingak ku ta aijan ta unak na yù ngámin ira nga ayám nga masippà áнна simaron, áнна iráw áнна mammánù gapay.

⁷ “Á paningak ku sù egga ta ulà, naginnâ yù ngárál nga nagubobuk nikán, á kinagi na, ‘Eduru, gumikkáng ka. Pártiam mu, á kanam mu,’ kun na nikán. ⁸ Ngam simibbágá, á kinagi, ‘Ari, Apu! Arák ku bulubugá kinán yù jikkù nga kanniawam mi, ta yáyù kustombare mi nga Kudio,’ kuk ku. ⁹ Á yù ngárál nga naggapu ta lángi, pidduá na nagubobuk, ‘Arám mu panakitán yù pinakarenuán ni Namarò,’ kun nayù ngárál. ¹⁰ Á namillu nga nesimmu nikán, á nálá ngámin ta lángi.

¹¹ “Á kálá nayù ulà ta lángi, negiddán nga simippi ta balay nga paggianák ku yù ira tallu nga tolay nga naggapu ta Sesaria. ¹² Á kinagi na nikán nayù Mangilin nga Ikararuá ta aringá mabbábáng nga umay nira, mássiki nu ari ira Kudio. Á annam gapay yù ira nepulù nikán nga wáwwagi nga Kudio nga taga Joppa.

“Á tappi mi ta Sesaria, naddulò kami ta bale nayù tolay nga naddok sù ira tallu. ¹³ Á kinagi na nikami ta nasingan na yù daroban ni Namarò nga limittuák ta bale na. Á kinagi nayù daroban kuna, ‘Dobam mu ta ili na Joppa yù umay magágál kâ Simon nga abbúnad da gapay ta Eduru. ¹⁴ Aggina yù mangipakánnámmu nikayu sù bilin ni Namarò, tapè meiyigù kayu ngámin áнна yù ira kábbalem,’ kun nayù daroban kuna.

¹⁵ “Á pagubobuk ku paga nira, minay nira yù Mangilin nga Ikararuá ta kunnay sù ánge na nittam pamegapu tam mangikatalá. ¹⁶ Á nanonò ku yù ngaw kinagi ni Apu Kesu, nga kun na, ‘Si Kuan ngaw, jinigù na kayu ta panákkilalán ta panguruk naw kâ Apu Namarò. Á danum yù inipanigù na nikayu. Ngam dumá yù ipanigù ni Namarò nikayu, ta umay sangaw nikayu yù Mangilin nga Ikararuá,’ kun ni Apu Kesu. ¹⁷ Á mássiki nu ari ira Kudio, iniddán ni Namarò ira sù Mangilin nga Ikararuá nga kunnay ta pangiyawâ na nittam nga Kudio gapay, ta pamegapu tam mangikatalá kâ Apu Kesu Kiristu. Á asinningà panò nga maggammá kâ Namarò!” kun ni Eduru.

¹⁸ Á pakaginná nayù ira Kudio karannian, ari iren mapporay kâ Eduru, á awán ta itabbák da kuna. Ngam naddayaráyaw ira galá kâ Namarò, á kinagi ra, “Kuruk lállaguk ta iniyawâ ni Namarò gapay sù ira nga ari Kudio yù awayyá ra nga mabbábáwi ta liwiliwâ da, tapè mepattolay ira gapay kâ Namarò sù pammagurayán na ta áddè ta áddè,” kud da.

Yù ira Manguruk nga Aijan ta Ili na Antokia

¹⁹ Á ta pamapáte ra kâ Esteban nayù ira Kudio nga ari manguruk, jinigirigá da yù ira manguruk, á nattálaw ira nga nawwarawará. Á nakáddè yù ira káruán ta arayyu, áddè ta áppatulán na Pinisia áнна yù pugu na Sipro, áнна yù ili na Antokia. Á inilayalayâ da yù bilin ni Namarò, ngam awán ta nangilayalayatád da, nu ari lá yù ira kagittá ra nga Kudio. ²⁰ Á aijan yù ira manguruk kâ Apu Kesu nga taga Sipro áнна taga Sirene, á minay ira gapay ta ili na Antokia, nga mangilayalayâ sù napiá nga dámak nga meyanung kâ Apu Kesu. Á yù ira nga ari Kudio gapay yù nangilayalayatád da. ²¹ Á makáwayyá yù pangilayalayâ da megapu sù ánggabbák nayù Yápu tam nira. Á yáyù nga aru yù ira nga nanguruk nga naggián ta ili na Antokia, á nabbábáwi ira, á inikatalá da si Apu Kesu.

²² Á yù ira nga manguruk nga naggián ta Jerusalem, narámak da ta aru yù ira nga manguruk kâ Apu Kesu ta Antokia. Pakarámak da, jinok da si Bernabe ta Antokia. ²³ Á labbè

ni Bernabe ta Antokia, nasingan na yù aru nga napiá nga kingguá ni Namarò megapu ta allà na sù ira tatolay, á yáyù nga nagayáyâ si Bernabe. Á sinabarangan na ira ta ipasigaggâ da yù ángnguruk da kâ Apu, maguray lâ yù mesimmu nira. ²⁴ Napiá nga tolay si Bernabe, nga tumulù sù Mangilin nga Ikararuá, á napasigaggâ yù ángnguruk na. Á yáyù nga aru yù ira nga naggián ta Antokia nga netádday kâ Apu Kesu megapu sù pangituddu ni Bernabe.

²⁵ Á minay laguk si Bernabe ta ili na Tarsu, ta aleran na si Saulo. ²⁶ Á pakálek na kuna, iniyángo na ta Antokia. Á nepaggagammung ira sù ira nga manguruk ta tangaragun, á aru yù ira nga sinuddúad. Á daniaw ira nga manguruk kâ Apu Kesu nga naggián ta Antokia, aggira yù napolu nga abbúnan nayù ira tatolay ta Kiristiánu.

²⁷ Á keggâ ri Bernabe kâ Saulo ta ili na Antokia, minay gapay tán yù ira ábbilínan ni Namarò nga naggapu ta ili na Jerusalem. ²⁸ Á yù tádday nga mangngágan ta Agabo, nanáddak ta arubáng nayù ira nga naggagammung, á kinagi na nira yù inipakánnámmu nayù Ikararuá ni Namarò, nga duttál yù bisin ta ngámin nga dabbuno. Á jimittál yù bisin sù pammaguray ni Patul Kalodio ta Roma, nga kunnay ta kinagi ni Agabo. ²⁹ Á yáyù nga ninonò nayù ira nga manguruk ta mangitubbuk ira nga katággitádday ta abbák na nga meyannung ta awayyá na sù ira wáwwagi ra ta ángnguruk da kâ Apu nga maggián ta purubinsia na Judiya. ³⁰ Á jinok da laguk di Bernabe kâ Saulo ta umay mangituluk ta inilimù da sù ira giriámán nayù ira manguruk ta Jerusalem.

12

Yù Karigirigâ nayù ira Manguruk

¹ Á tán nga ággaw, jinigirigâ ni Patul Erodo yù ira nga manguruk kâ Apu Kesu. ² Á inipaputul na si Ime, nga kaká ni Kuan. ³ Á pakasingan na ta magayáyâ yù ira Kudio megapu sù pamapáte na kâ Ime, inipagápù na gapay si Eduru. Á nesimmu yù paggápù da kâ Eduru ta keggâ nayù piestá nga pakkákán nayù ira Kudio ta pán nga awán ta állapparán na.

⁴ Á pappagápù ni Patul Erodo kâ Eduru, inipabáluk na. Á nipatangngal na ta appákapurù nga suddálu, nga taggiappâ ira, tapè mattutubbâ ira nga magguárdiá kuna. Ta inigagángo ni Patul Erodo nga panunután ána ipapapátay si Eduru ta arubáng nayù ira tatolay ta kabalin na piestá. ⁵ Á napukù laguk si Eduru. Ngam yù ira nga mangikatalá kâ Apu Kesu, inipasikkál da yù ákkimi-imállà da kâ Namarò megapu kâ Eduru.

Yù Pangipáno nayù Daroban ni Namarò kâ Eduru sù Ábbaluran

⁶ Á ta gabi nga lage na pamestigá ni Patul kâ Eduru, nakkaturuk si Eduru nga natangngán nayù duá nga suddálu. Á nabáluk si Eduru ta duá nga káwák, ána aijan gapay ta puertá na ábbaluran yù ira suddálu nga magguárdiá. ⁷ Á inikáddagâ lâ limittuák yù daroban ni Namarò sù unak na ábbaluran, á nanawagán yù lágum. Á jimikí yù daroban kâ Eduru, á sippâ na yù bikà ni Eduru ta lukagan na. “Arâ, gumikkáng ka,” kun na kâ Eduru. Á dagarágâ nári yù káwák ta limá na. ⁸ Á kinagi nayù daroban kuna, “Isillong mu yù barawásim ána sapatù mu.” Á kinuruk ni Eduru. Á kinagi nayù daroban kuna, “Ipagulolà mu yù ulà mu, á tuttulam mà.” ⁹ Á nánaw ira laguk, á sinuttul ni Eduru yù daroban ni Namarò.

Á arán na ammu ni Eduru nu kuruk nga mesimmu kuna yù akka-akkuán nayù daroban, ta kagian na ta mattatagená lâ. ¹⁰ Á sinalebarád da yù olu nga magguárdiá ána yù mekaruá, á nakáddè ira sù dakal nga puertá nga balayáng, nga áttallungan nga mappángge ta ili. Á inikáddagâ na lâ nabbuká yù puertá nga awán ta tolay nga namuká kuna. Á nallawán ira, á nallakák ira ta tádday nga kalsáda. Á ikáddagâ limimmà yù daroban ni Namarò, á nabattáng lâ si Eduru nga maguroray sù kalsáda. ¹¹ Á nakemmunaw laguk si Eduru, á ninonò na, nga kun na, “Nánnámmuák kuin ta iniyigù nangá ni Apu Namarò, ta jinok na yù daroban na ta umay mangilillí nikán sù panangngal ni Patul Erodo níkan, tapè ari mesimmu níkan yù iddi-iddagán nayù ira Kudio,” kun na.

¹² Á pakánnámmu ni Eduru ta kuruk nga napalubbágingin, minay laguk ta bale ni Maria nga yená ni Kuan nga magapulídu ta Markus. Á aru yù ira manguruk nga naggagammung tán, nga makimi-imállà kâ Namarò megapu kuna.

¹³ Á pakáddè ni Eduru ta balkon na balay ta aggik na kalsáda, nattottò ta puertá. Á minay si Roda, nga abbing nga babay nga masserbi, ta en na innan nu asinni yù umay nga mattottò. ¹⁴ Á nakkatol si Eduru, ána natákkilalán ni Roda yù ngárál na, á ayatán si Roda. Á

gapu ta nepallá yù pagayáyá nayù abbing, inilingun na yù akkuán na. Arán na binukatán yù puertá, ngam nakkarerá nga minay ta lágum, á kinagi na nira ta aijan si Eduru sù puertá.

¹⁵ Á yù ira nga naggagammung ta balay, kinagi ra kâ Roda, “Maguyung ka!” Ngam initagá ni Roda ta kuruk yù kinagi na. Á kinagi ra, “Aijan támma yù daroban ni Namarò nga manaron kuna.” ¹⁶ Ngam naggián lâ si Eduru nga mattottò ta puertá. Á ed da laguk binukatán. Á pakasingad da kâ Eduru, napállâ ira. ¹⁷ Á inítáyák ni Eduru yù limá na tapè pagimammattan na ira. Á kinagi na nira yù pangipáno ni Namarò kuna sù karsel. Á kinagi na, “Kagian naw gapay kári Ime ána yù ira káruán nga kábulut tam nga mangikatalá kâ Apu.” Á nánaw laguk nga minay ta tanakuán nga lugár.

¹⁸ Á ta pannawák, napakapakúyu yù ira suddálu nga magguárdiá, ta maburung ira, gapu ta awán si Eduru ta karsel. ¹⁹ Á pakarámak ni Patul Erodo ta awán si Eduru, jinok na laguk yù ira suddálu na, ta umay ira magalek kuna. Ngam arád da nálek. Á yáyù nga inipágál nayù patul yù ira magguárdiá, á binestigá na ira, á inipapapáte na ira. Á ta kabalín na, nánaw laguk si Patul Erodo ta Judiya nga minay ta Sesaria, á naggián lâ túrin.

Yù Pate ni Patul Erodo

²⁰ Á kitaporay si Patul Erodo sù ira tatolay nga taga Tiro ána taga Sidon, á narigá yù ággiád da, ta yù áppatulán ni Erodo yù paggapuán na kanad da. Á yáyù nga nattatádday yù ira nga taga Tiro ána taga Sidon, ta umay ira makipiá sù patul. Á minay ira ta olu nga nakikopun kâ Balastu nga minángngikárgu ta ngámin ta palásiu nayù patul, ta abbágán na ira, tapè makkapiá ira sù patul. ²¹ Á sù ággaw nga natullá, nabbisti si Patul Erodo sù kapiánán nga sinnun na, nga bistí na mammaguray, á nagitubang sù mepotun nga ággitubangán na. Á inilayalayá na yù bilin na sù ira magari nga tatolay nga naggagammung tán. ²² Kabalín na nagubobuk ni Patul Erodo, nagagga-aggay yù ira tatolay, á kinagi ra, “Ari tolai yù magubobuk, nu ari galá dios!” kud da. ²³ Á dagarágá nga minay yù daroban ni Apu Namarò, á jinigirigá na si Patul Erodo, gapu ta arán na gimná yù paddáyo nayù ira tatolay kuna, ána arán na jináyaw si Apu Namarò. Á sinuggi yù baggi ni Patul Erodo, á natay.

²⁴ Á nassamá yù bilin ni Namarò sù ira tatolay, á minaru yù ira nga manguruk. ²⁵ Á kabalid di Bernabe kâ Saulo namalurò sù ipakuá ni Namarò nira ta Jerusalem, nánaw ira nga nanoli ta ili na Antokia. Á nepulù nira si Kuan nga magapulídu ta Markus.

13

Yù Panullá da kári Saulo kâ Bernabe ta Mangilayalayá

¹ Á egga sù ira nga manguruk ta Antokia yù ira nga minángngilayalayá sù bilin ni Namarò ána yù ira gapay nga mangituddu ta kebalínán na. Aggira si Bernabe, si Simon nga magapulídu ta Ngisi, si Lusio nga taga Sirene, si Manen nga nesipá ngaw kâ Patul Erodo ta kabajji na sù bale ni ammò na, ána si Saulo. ² Á ta tádday ággaw, naggagammung yù ira nga manguruk, nga nakimoray kâ Apu Namarò, ána ari ira kiminán, tapè tángngagad da yù pakimállá da kâ Apu. Á ta pakimállá da, kinagi nayù Mangilin nga Ikararuá nira, “Tullatan naw di Bernabe kâ Saulo, ta aijan yù ipakuá nira,” kun na. ³ Á ta kabalid da nga ari kiminán ána nakimállá, sinámmi da yù ira duá nga sinullá da, á jinok da ira ta umay ira manuppál sù ipakuá nayù Mangilin nga Ikararuá nira.

⁴ Á gapu ta paddok nayù Mangilin nga Ikararuá nira, nánaw laguk di Saulo kâ Bernabe nga minay ta ili na Selusia ta aggik na bebay. Á páno ra tán, nabbiray ira nga minay ta pugu na Sipro. ⁵ Á pakáddé da ta Salami, nga dakal nga ili ta pugu na Sipro, ed da inilayalayá yù bilin ni Namarò ta ngámin nga kapillíá na Kudio. Á nepulù nira si Kuan Markus nga mangabbák nira.

Yù Nesimmu kâ Elimas nga Maganámitu

⁶ Á nappassapassiár di Saulo ta ngámin nga ili ána babálay ta pugu, ta áddé ta Papo. Á pakáddé da ta Papo, naratang da yù tolai nga Kudio nga maganámitu, nga áppé ábbilinán nga ari kuruk yù kagian na. Si Baresus yù ngágan na. ⁷ Á kopun ni Baresus si Sergio Polus nga gubinador sù pugu. Á maláppa nga mammaguray yù gubinador, á inipágál na di Bernabe kâ Saulo ta ikáyá na gapay ginnán yù bilin ni Namarò. ⁸ Ngam si Baresus, nga mangngágan gapay ta Elimas, nga salamangkeru yù kebalínán nayù ngágan na sù ággubobuk na Gareko, á kinontará na di Bernabe kâ Saulo, ta ikáyá na gammán yù panguruk nayù gubinador sù bilin ni Namarò.

⁹ Á si Saulo, nga mangngáan gapay ta Pablo, natagenà na yù pakáwayyá nayù Mangilin nga Ikararuá nga mepulù kuna, á inni-innan na ta napiá si Elimas. ¹⁰ Á kinagi ni Pablo kuna, “Sikaw, anà na ka ni Satanas, ta malussaw ka sù ngámin nga napiá. Massirisiri ka nga mangilogò. Ngattá, ta ari ka magammagammá nga mamakkillu sù ubobuk ni Namarò! ¹¹ Ginnám mu á! Pággangan naka ni Apu Namarò, á mabbuling ka, á arám mu masingan yù nawák na bilák ta aru nga ággaw,” kun ni Pablo kuna. Á dagarágá natagenà nayù salamangkeru yù kun na kallà nga angá nga nelappá sù matá na, á ari makasingan. Á nakkarakaràrà nga magala-alek ta mangering kuna. ¹² Á pakasingan nayù gubinador sù nesimmu ká Elimas, nanguruk ká Apu Kesu, ta napállá sù bilin ni Namarò nga inituddu ni Pablo.

Yù Pangilayalayá ni Pablo ta Purubinsia na Pisidia

¹³ Á nánaw di Pablo ta Papo, á nabbiray ira nga minay ta ili na Perga sù purubinsia na Pampilia. Á pakáddè da ta Perga, nánawán na ira ni Kuan Markus, nga nanoli ta Jerusalem. ¹⁴ Ngam nattalebák di Pablo ta Perga, á minay ira ta tanakuán nga Antokia sù purubinsia na Pisidia. Á ta Sabadu nga ággibannák, minay ira ta kapilliá na Kudío, á nepagitubang ira sù ira tatolay nga naggagammung tán. ¹⁵ Á kabalin nayù tolay nga nabbibik sù tunung ni Moyses ána yù netúrâ nga inituddu nayù ira káruán nga ábbilinán ni Namarò, á jinok nayù ira giriámán yù tolay nga umay kári Pablo, á kinagi na, “Wáwwagi, nu egga yù itabarang naw sù ira tatolay, á kagian naw,” kun na.

¹⁶ Á nanáddak laguk si Pablo, á initáyák na yù limá na, tapè tángngagad da. Á kinagi na, “Wáwwagi, nga ginaká ni Israel ána sikayu ngámin gapay nga ari Kudío nga makimoray ká Apu Namarò, ginnán naw yù kagiak ku nikayu. ¹⁷ Si Namarò nga Yápu tam nga ginaká ni Israel yù nappili sù ira naggaká nikami. Á gári ta pakipaggiád da ta dabbun na Egipto, pinagaru na ira. Á nu nabayák ira ta lugár na Egipto, pinapáno na ira megapu sù pamagaddátu na. ¹⁸ Á inattamán ni Namarò ira, mássiki nu pinotuád da ána ari ira nanguruk kuna ta paggiád da ta kalállammatán ta appátapulu ta dagun. ¹⁹ Á inabbágán ni Namarò ira, tapè appúdad yù ira tatolay nga ari Kudío ta pitu nga áppatulán sù lugár na Kenan, á iniyawá ni Namarò yù dabbun sù ira tatole na ta kukuá ra. ²⁰ Á appátagatù ta limápulu ta dagun yù nappasá ta áddè ta labbè da ta lugár na Egipto ta áddè ta pangiyawá ni Namarò nira sù dabbun na Kenan.

“Á pamegapu ra nga maggián ta Kenan, sinullá ni Namarò yù ira minámmannunù nga mattutubbá nga mammaguray nira, ta áddè ta dattál ni Samuel, nga ábbilinán ni Namarò. ²¹ Á keggá ni Samuel, kiniddo nayù ira tatolay ká Namarò yù tullatan na ta patul da. Á sinullá ni Namarò si Saulo nga anà ni Ki, nga ginaká ni Benjamin. Á nammaguray si Saulo nira ta appátapulu ta dagun. ²² Á inirián na laguk ni Namarò ta patul si Saulo, á sinullá na si Dabid ta patul da. Á kinagi ni Namarò yù meyanngung ká Dabid, nga kun na, ‘Nálek ku yù napiá nga tolay nga iddukak ku, si Dabid nga anà ni Jesse nga manguruk nikán. Ággina yù ikatalá ku ta manuppál ta ngámin nga uré,’ kun na.

²³ “Á sinullá ni Namarò yù tádday nga naggapu sù ira ginaká ni Patul Dabid ta mangiyígù nittam ngámin nga ginaká ni Israel. Ággina si Apu Kesu nga inittabbá na ngaw ni Namarò sù ngaw ira naggaká nittam ta umay mangiyígù nittam. ²⁴ Á lage na dattál ni Apu Kesu nga mangituddu, si Kuan nga Minánngù yù nangilayalayá. Á inilayalayá na sù ira ngámin nga ginaká ni Israel ta mabbabáwi ira ta liwiliwá da ána makirigù ira. ²⁵ Á nu mággè mabalin ni Kuan yù pangilayalayá na, kinagi na sù ira tatolay, ‘Sikán panò yù mangiyígù nga iddi-iddagán naw? Ari gemma sikán, nu ari galá yù umay sangaw. Ta aijan yù umayin nga maporián nga tumubbá nikán, nga makáwayyá ánnè nikán. Á awán kárik piá na, á yáyù nga aringá mepángngá nga mangubbák ta kaddang na sapátu na,’ kun ni Kuan.

²⁶ “Wáwwagi,” kun ni Pablo, “sikayu nga ginaká ni Kákay Abrakam, ána sikayu gapay nga ari Kudío nga makimoray ká Namarò, iniddán ni Namarò sittam ngámin ta bilin na nga meyanngung ta keyígù tam megapu sù ketapil ni Apu Kesu. ²⁷ Á yù ira tatolay nga maggián ta Jerusalem ána yù ira nga kátannangád da, arád da natákkilalán ta si Apu Kesu yù mangiyígù nira, gapu ta arád da nánámumuán yù kebalinán nayù initúrâ nayù ngaw ira ábbilinán ni Namarò, mássiki nu binibik da ta kapilliá ra ta káda Sabadu. Ngam sinuppál da yù dán nga netúrâ ta pamagikáru ra ká Apu Kesu. ²⁸ Ta mássiki nu ari mepángngá yù pamagikáru ra kuna, gapu ta awán ta liwá na, ngam iddá da lá kinagi ká Pilatto ta papatáyan na ta kurú.

²⁹ “Á kabalid da nanuppál ta ngámin nga dán nga netúrâ nga meyanngung kuna, iniyutták da ta kurú, á initanam da. Á kuehá yù nameddá da. ³⁰ Ngam pinaginnanole ni Namarò.

31 Á ta aru nga ággaw, name-aru nga nappasingan sù ira nga kapulupulù na ngaw sù ánge ra ta Jerusalem nga naggapu ta Galilia. Á aggira yù mangipakánnámmu nittam nga ginaká ni Israel ta naginnanolayin si Apu Kesu.

32 “Á sikami, minay kami saw, tapè ilayalayâ mi nikayu yù napiá nga dámak, nga yù ngaw inittabbá ni Namarò sù ira ngaw naggaká nittam. 33 Á pinalurò ni Namarò yù inittabbá na nira megapu nittam nga ginaká ra, ta pinaginnanole na si Apu Kesu ta keggá tam. Yáyù kebalinán nayù mekaruá nga kansion. Netùrà ta kansion yù kinagi ni Namarò, nga kunniaw:

‘Sikaw yù Anâ ku. Á ta ággawo, ipakánnámmù sù ira tatolay ta sikán yù Yámam.’*

34 Á kinagi ni Namarò gapay yù meyanung ta pamaginnanole na kâ Apu Kesu ta pate na, nga aringin bulubugá matamatay. Yáyù nga kinagi na,

‘Sikán yù mekatalá, á palurotak ku yù kunnay sù inittabbá kâ Dabid megapu nikaw,† kun ni Namarò.

35 Á netùrà gapay sù tádday nga kansion yù inittabbá ni Namarò kuna:

‘Apu, arám mu anugutan yù kalabbak na ta tanam nayù baggi nayù mangilin nga masserbi nikaw,‡ kun na.

36 “Wáwwagi,” kun ni Pablo nira, “ta pammagure na ngaw ni Patul Dabid sù ira tatolay, sinuppál na yù ure ni Namarò. Á ta pate na, initanam da sù katanamán nayù ira naggaká kuna. Á nallabbak gemma yù baggi na ta tanam. 37 Ngam si Apu Kesu yù pinaginnanole ni Namarò, á ari nallabbak yù baggi na ta tanam.

38 “Wáwwagi,” kun ni Pablo, “yawe yù ipakánnámmù nikayu. Gapu ta metapil si Apu Kesu megapu nittam, aijan yù awayyá tam nga makipakomá kâ Namarò ta liwiliwá tam, ta si Apu Kesu yù nagikáru ta liwá tam. 39 Á mássiki nu tuppálat tam yù tunung ni Moyses, ari itam mapalubbáng ta passerbi tam sù narákè nga negagángay nittam. Ngam sittam ngámin nga mangikatalá kâ Apu Kesu, mapalubbáng ittam megapu sù pakáwayyá nayù Yápu tam. 40 Magimuguk kayu laguk, tapè ari mesimmu nikayu yù kinagi ni Namarò, nga inipalappá nayù ira ngaw ábbilinán na. Kinagi na:

41 ‘Sikayu nga ari manguruk, nga manguyaw sù bilik ku, magimuguk kayu!

Ta keggá naw nga matolay paga, mapaluro yù akkuák ku.

Á mapállá kayu, á matay kayu nga mesinná nikán,

gapu ta arán naw kurugan yù akkuák ku, mássiki nu aijan yù mangibukalán nikayu ta napiá.’”§

Yáyù áddè na pangilayalayâ ni Pablo nira.

42 Á ta pano ri Pablo kâ Bernabe ta paggagammungád da, á inapà da ira nayù ira tatolay ta manoli ira ta tádday Sabadu nga mangibukalán má ta meyanung sù kinagi ra. 43 Á ta kapapáno nayù ira tatolay ta kapillia, aru ira nga Kudio ána yù ira nga nakKudiongin ta meyanung sù panguruk da, nappupúlù ira kári Pablo kâ Bernabe. Á di Pablo, sinabarangád da ira ta ipasigaggá da yù ángngikatalá da sù pangikállá ni Namarò nira.

Yù Páno ri Pablo ta Antokia

44 Á ta tádday Sabadu, mággè tangelián yù naggagammung, nga Kudio ána kitáru nga ari Kudio, tapè maginná ira sù bilin ni Namarò. 45 Ngam ta pakasingan nayù ira Kudio ta nepaggagammung nira yù ira magaru nga ari Kudio, tapè maginná ra yù ituddu ni Pablo, á napassil yù ira Kudio. Á naríri ira sù kinagi ni Pablo ána nakkakagiád da si Pablo. 46 Ngam ari maganássing di Pablo kâ Bernabe nga tubbák nira, nga kud da, “Máwák nga sikayu nga ginaká ni Israel yù mapolu nga makaginná sù bilin ni Namarò. Ngam gapu ta manakí kayu sù bilin na, yáyù nga mepasingan ta ari kayu mesipá sù áttole ni Namarò nga mannanáyun. Á gapu ta linikuránán naw yù bilin ni Namarò, á likuránám mi sikayu, á umay kami laguk nga mangilayalayá sù ira makkakerumá nga ari Kudio. 47 Ta yáyù inittaddán ni Apu Namarò nikami. Kinagi na,

‘Sikayu yù meyárik ta nawák, nga mamannawák ta nonò nayù ira makkakerumá nga ari Kudio.

Á dobat takayu ta umay kayu mangilayalayá sù ira ngámin nga tatolay ta tangapáddabbunán, tapè ipakánnámmu naw nira ta sikán yù makáwayyá nga mangiyígù nira.’”*

* 13:33 Salmo 2:7 † 13:34 Isaya 55:3 ‡ 13:35 Salmo 16:10 § 13:41 Habakuk 1:5 * 13:47 Isaya 49:6

⁴⁸ Á pakaginná nayù ira ari Kudio sù bilin ni Namarò, nagayáyà ira, á jináyo ra si Namarò megapu sù bilin na nga kinagi ni Pablo. Á yù ira ngámin nga piníli ni Namarò ta mesipá kuna ána meddán ta áttole na nga awán ta áddè na, nanguruk ira. ⁴⁹ Á yáyù nga nassamá yù bilin ni Apu Namarò ta ngámin nga lugár. ⁵⁰ Ngam yù ira Kudio nga ari nanguruk, pinappatapátu ra yù ira makáwayyá nga lálláki nga mammaguray ta ili, ána yù ira maríku nga bábbay nga siminuttul sù kustombare na Kudio, tapè jigirigátad da di Pablo ká Bernabe, á pinapáno ra ira tán nga lugár. ⁵¹ Ngam di Pablo ká Bernabe, iniwákká da yù káppù sù takki ra, nga panákkilalán ta arád da má ilayalayá yù bilin ni Namarò sù ira tatolay nga naggián tán, gapu ta manáki ira nga nanguruk. Á nánaw di Pablo laguk nga minay ta ili na Ikonium. ⁵² Ngam yù ira nanguruk nga naggián ta Antokia, nagayáyà ira lâ, ána nepulù nira yù Mangilin nga Ikararuá nga mangabbák nira.

14

Yù Pangilayalayá di Pablo sù Ili na Ikonium

¹ Á labbè di Pablo ká Bernabe ta ili na Ikonium, minay ira nangilayalayá gapay ta kapilliá nayù ira Kudio, nga kunnay sù kingnguá ra ta Antokia. Á aru yù ira nga nanguruk megapu ta pangilayalayá da, nga Kudio ána ari Kudio gapay. ² Ngam yù ira Kudio nga ari nanguruk, pinappatapátu ra yù ira káruán nga ari Kudio, tapè narákè yù nonò da gapay sù ira nanguruk.

³ Á naggián di Pablo ká Bernabe ta Ikonium ta nabayák, á ari ira naganássing nga mangilayalayá ta meyannung ká Apu Kesu. Á si Apu yù mangipakánnámmu ta kuruk yù inittuddu ri Pablo nga meyannung sù allá na, gapu ta inipakuá ni Apu nira yù aru nga makapállá nga pinagaddátu ra megapu sù pakáwayyá na nga iniyawá na nira. ⁴ Ngam yù ira tatolay ta Ikonium, nesinná ira ta nonò da. Á yù ira káruán, sinuttul da yù ira Kudio nga ari nanguruk. Ngam yù ira káruán, kinuruk da di Pablo nga minánggilayalayá.

⁵ Á nattatádday laguk yù ira ari nanguruk, nga Kudio ána ari Kudio, ána yù ira nga kátannangá da, á inigagángo ra nga jigirigátan di Pablo ká Bernabe, á payangad da ira nakuan ta batu, tapè matay ira. ⁶ Ngam pakánnámmu ri Pablo ta inigagángo ra ira, nattálaw ira laguk, nga minay ta lugár na Likonia. Á nappassapassiár ira gapay sù ira ili na Listara ána Derbi, ána sù ira káruán na ili nga aranni. ⁷ Á inilayalayá da yù napiá nga dámak nga meyannung ká Apu Kesu sù ira ngámin nga ili.

Yù Nesimmu kári Pablo ta Listara

⁸ Á ta ili na Listara, aijan yù tolay nga pilay, nga ari bulubugá nakalakák áddè ta keyaná na. ⁹ Á gininniginná na yù pangilayalayá ni Pablo. Á natagenà ni Pablo ta aijan yù ángngikatalà nayù pilay ká Apu Kesu ána yù pakáwayyá ni Apu nga mamammapiá kuna. Á inni-innan ni Pablo ta napiá, ¹⁰ ána iniyássikan na yù ngárál na, á kinagi na, “Gumikkáng ka!” kun na. Á dagarágá nga giminnikkáng yù tolay, á nallakalakák.

¹¹ Á pakasingan nayù ira magaru nga tatolay sù kingnguá ni Pablo, pine ra nga nagagga-aggay ta paddáyo ra nira. Á sù ággubobuk da nga Likonia, kinagi ra, “Aggira didios nga kun na tolay, á gimitták ira nga minay nittam!” kud da. Ngam di Pablo ká Bernabe, arád da garè kánnámmuán yù kinagi ra, ta arád da ammu yù ággubobuk da. ¹² Á yù ira tatolay, abbúnad da di Pablo ta ngágan nayù ira didios da. Si Bernabe, abbúnad da ta Sus. Á gapu ta si Pablo yù magubobuk, abbúnad da ta Ermis.

¹³ Á aijan yù iglesia ni Sus, nga dios nayù ira taga Listara, sù lawán na ili. Á yù pári ni Sus, iniyángo na ta áttallungán na ili yù ira toru nga naddusáriu ta lappáw. Ta ikáyá nayù ira pári ána yù ira magaru nga tatolay nga mappárti sù ira toru, tapè iyátáng da ira, nga pakimore ra kári Pablo. ¹⁴ Ngam di Pablo ká Bernabe, pakánnámmu ra ta ikáyá da nakuan iyátáng nayù ira pári ta toru megapu nira, pinisil da laguk yù barawási ra, gapu ta kabagal da ána daddam da sù akka-akkuán nayù ira tatolay, á nakkarakarerá ira nga nagagga-aggay sù tangngá nayù ira magaru nga tatolay.

¹⁵ Á kinagi ri Pablo sù ira magaru nga tatolay, “Ngattá, ta mangiyátáng kayu ta toru megapu níkami? Tolay kami gemma nga kunnay níkayu! Minay kami saw ta kágiam mi níkayu yù napiá nga dámak, tapè likuránán naw yù ira didios naw nga awán ta inángá da, á nanguruk kayu sù Dios nga matolay nga sigga-inángá. Ággina si Namarò, nga nappadday ta lángi ána dabbuno, bebay, ána ngámin nga naggián nira. ¹⁶ Á gári, inanugù ni Namarò sù ira makkakerumá nga ari Kudio yù maguray lá nga ikáyá da nga akkuán. ¹⁷ Ngam ta áddè ngaw, egga yù awayyá tam nga makánnámmu ta meyannung ká Namarò, megapu sù napiá nga akka-akkuán na. Ta káda ragun iyawá na yù urán, tapè mabbungubungá ta napiá yù

nemulá. Á aggina yù mangiyawâ nittam ta kanan, tapè mepagayâyâ ittam,” kud di Pablo sù ira tatolay. ¹⁸ Á mássiki nu kunnian yù kinagi ri Pablo nira, mággè ari ira nagammá, ta gustu ra nakuan mangiyátang ta toru nira.

¹⁹ Á manganánnuán, limibbè ta Listara yù ira Kudio nga ari manguruk nga taga Antokia sù purubinsia na Pisidia, ána taga Ikonium. Á initotobù da di Pablo sù ira tatolay ta Listara. Á pinayapayáng da si Pablo, á ginuggud da nga iniyángay ta lawán na ili, ta kagiad da ta natayin. ²⁰ Ngam yù ira manguruk kâ Apu Kesu, nagarimummungád da si Pablo, á giminiikkáng laguk, á nanoli ta ili. Á sù tádday ággaw, nánaw di Pablo kâ Bernabe, á minay ira ta ili na Derbi.

Panoli ri Pablo ta Antokia sù Purubinsia na Siria

²¹ Á labbè di Pablo ta ili na Derbi, inilayalayâ da gapay tán yù napiá nga dámak. Á aru yù ira tatolay nga pinatuttul da kâ Apu Kesu. Á kabalid da nangilayalayâ ta Derbi, nánaw ira, á nanoli ira ta ili na Listara ána Ikonium, ána Antokia sù purubinsia na Pisidia. ²² Á sinabarangád di Pablo yù ira manguruk ta pataggatad da yù nonò da, tapè mepasigaggâ yù ángngikatalâ da, maguray lá yù mesimmu nira nga jigâ. Á kinagi di Pablo nira, “Máwák nga attamát tam yù aru nga jigâ nga makkakerumá, pángè tam mesipâ sù pammagurayán ni Namarò,” kud da.

²³ Á ta katággitádday nga ili nga inangayád di Pablo, sinullâ da yù ira karakalán nga ammu ra manabarang, tapè manaron ira sù ira kábulud da ta paggagammungád da. Á ari di Pablo bi kiminán, tapè tángngagad da yù pakimállâ da kâ Apu megapu sù ira manaron. Á inikatalâ da ira kâ Apu Kesu, nga Yápu ra nga pangikatalatád da.

²⁴ Á nattalebák di Pablo ta purubinsia na Pisidia ána Pampilia, á nakáddè ira ta ili na Perga. ²⁵ Á inilayalayâ da yù bilin ni Apu Kesu ta Perga. Á kabalid da nangilayalayâ ta ili na Perga, nánaw ira, á minay ira ta ili na Attalia. ²⁶ Á páno ra ta Attalia, nattakay ira ta biray nga nanoli ta ili na Antokia sù purubinsia na Siria. Yù ili na Antokia yù naggapuád da, nga paggianán nayù ira naddok nira. Yù ira manguruk nga maggián ta Antokia, nakimállâ ira kâ Namarò ta ikállâ na di Pablo ána abbágán na ira sù anga-angayád da. Á yáyù nga nanoli ira, gapu ta nabalid den yù inipakuá ni Namarò nira.

²⁷ Á tappi di Pablo ta Antokia, pinaggagammung da laguk yù ira manguruk, á kinagi ra nira yù inipakuá ni Namarò nira, ána yù ngámin nga pinalurò ni Namarò megapu sù ángngabbák na nira. Á kinagi ra gapay ta iniyawâ na gapay ni Namarò sù ira ari Kudio yù awayyá ra nga magginná sù bilin na, á aru nira gapay yù nanguruk kâ Apu Kesu. ²⁸ Á nakipaggián di Pablo kâ Bernabe ta nabayák sù ira manguruk kâ Apu Kesu nga naggián ta Antokia.

15

Yù Pakkaká-ubobuk nayù ira Manguruk ta Paggagammung da ta Jerusalem

¹ Á aijan yù ira tatolay nga naggapu ta Judiya, nga minay ta Antokia, nga mangituddu sù ira ari Kudio nga mangikatalâ kâ Apu Kesu. Á pangituddu ra, kinagi ra, “Nu ari kayu mappakugi ta kunnay sù kustombare mi nga Kudio nga inituddu na ngaw ni Moyses, á ari kayu meyígù,” kud da. ² Á di Pablo kâ Bernabe, naríri ira sù ira mangituddu, á nerallâ yù pakkakátabbák da. Á yáyù nga ninonò nayù ira manguruk nga taga Antokia ta dobad da di Pablo kâ Bernabe ána yù ira káruán nga kábulud da ta umay ira ta Jerusalem, tapè iyabbù da sù ira olu nga minángngilayalayâ ána yù ira giriámán yù meyanung sù ituddu nayù ira taga Judiya. ³ Á gapu ta jinok da ira nayù ira manguruk nga taga Antokia, nánaw di Pablo, ta umay ira ta Jerusalem. Á sinalebarád da yù purubinsia na Pinisia ána Samaria. Á inisinisinek da nga iniparámak ta mangurugin gapay kâ Apu Kesu yù ira ari Kudio. Á ngámin ira nga mawwawági ta ángnguruk da kâ Apu, nagayâyâ ira ta pakaginná ra.

⁴ Á pakáddè di Pablo ta Jerusalem, nagayâyâ nga namaddulò nira yù ira nga manguruk ána yù ira olu nga minángngilayalayâ ána yù ira giriámán. Á kinagi ri Pablo nira gapay yù ngámin nga inipakuá ni Namarò nira. ⁵ Ngam aijan gapay tán yù ira Parisio nga manguruk gapay kâ Apu Kesu, á gimikkáng ira, á kinagi ra, “Kagiat tam sù ira manguruk nga ari Kudio ta máwák nga mappakugi ira, á ituddu tam nira ta tuppálad da yù kustombare tam nga inituddu na ngaw ni Moyses,” kud da.

⁶ Á yáyù nga naggagammung yù ira olu nga minángngilayalayâ ána yù ira giriámán, tapè makkaká-ubobuk ira ta meyanung sù kinagi nayù ira Parisio. ⁷ Á nakkakápereperang ira ta nabayák.

Á gimikkáng laguk si Eduru. Á kinagi na nira, “Wáwwagi, ammu naw ta gári, sikán yù piníli ni Namarò ta umay mangilayalayá sù ira nga ari Kudio, tapè makaginná ira gapay sù napiá nga dámak nga meyanung kâ Apu Kesu ána manguruk ira. ⁸ Á si Namarò, nga makánámmu sù nonò na tolay, inipasingan na yù pangalawá na sù ira ari Kudio nga mangikatalà kuna, ta jinok na ta umay nira gapay yù Mangilin nga Ikararuá, ta kunnay sù ánge na nittam nga Kudio nga mangikatalà kuna. ⁹ Á arán na ira inirumá nittam, ta pinakomá na ira gapay ta liwiliwá da nga kunnay sù pamakomá na nittam, megapu sù pangikatalà tam kuna. ¹⁰ Á ngattá laguk, ta tálliwánán naw yù ure ni Namarò? Ta inawalá ni Namarò yù ira ari Kudio, ngam kagian naw nira ta máwák da manuppál sù tunung tam. Ngam sittam nga Kudio ána yù ira ngaw naggaká nittam gapay, ari ittam nakatuppál sù tunung. ¹¹ Ngam ammu tam gemma ta meyiú ittam megapu galá sù allá ána ángngiddù ni Apu Kesu nittam, ta kunnay gapay sù ira ari Kudio,” kun ni Eduru nira.

¹² Á pakaginná nayù ira tatolay sù kinagi ni Eduru, nagimammá ira. Á gininná ra yù pattubbá di Pablo kâ Bernabe nga magubu-ubobuk sù ngámin nga makapállá nga pinagaddátu ra nga inipakuá ni Namarò nira sù ánge ra pangilayalayá sù ira ari Kudio.

¹³ Á kabalid da nagubobuk, gimikkáng si Ime, á kinagi na, “Wáwwagi, ginnán naw yù ka-giakku. ¹⁴ Si Simon Eduru, kinagi na nittamin yù meyanung sù olu nga pangipakánámmu ni Namarò sù ángngiddù na sù ira ari Kudio, tapè egga nira gapay yù ira tatole na. ¹⁵ Á negittá yù kinagi ni Eduru sù iníturá nayù ngaw ira ábbilínán ni Namarò, nga kunniaw:

¹⁶ ‘Sikán si Apu, á duttál yù ággaw nga panoli ta dabbuno.

Á ipoli ku yù pammagurayán ni Dabid, megapu sù ira ginaká na.

Patáddagak ku yù bale ni Dabid nga narabbá.

¹⁷ Á yáyù nga makiyápu laguk níkan yù ira ngámin makkakerumá nga tatolay nga ari Kudio, nga agálák ku gapay ta tumuttul ira níkan.

¹⁸ Yáyù inipakánámmu sù ngaw gári nga nabayágin. Sikán si Namarò nga nakkagi.*

¹⁹ “Á yáyù nga napiá ta uré, nu arát tam jigirigátan yù ira ari Kudio nga manguruk kâ Apu Kesu. Arát tam ituddu nira yù ngámin nga kustombare tam nga Kudio, nga arát tam gapay matuppál ta áddè ngaw. ²⁰ Ngam yawe lá ituddu tam sù ira ari Kudio, nga wáwwagi tam megapu sù ángnguruk tam. Iturá tam lá ta arád da kanan yù neyátáng ta sináddios ána ari ira makiruruk sù arád da atáwa, á arád da kanan yù ayám nga ari naparága, á arád da gapay kanan yù dága na. ²¹ Á yáyù lá ituddu tam nira, tapè ari maburung yù ira kábulud da nga Kudio. Ta sittam nga Kudio, ammu tam yawe ira tunung ni Moyses, gapu ta bibbirat tam sù ngámin nga kapillíá tam ta káda Sabadu ta áddè gári olu nga ággaw. Ngam ari meyanung sù ira ari Kudio yù ira káruán nga kustombare tam,” kun ni Ime nira.

Yù Túrâ nayù ira Karakalán nga Kudio nga taga Jerusalem sù ira Ari Kudio

²² Á pakaginná nayù ira manguruk sù kinagi ni Ime, napiá gapay ta ure ra. Á yù ira minánggilayalayá ána ngámin nga káruán nga manguruk ána yù ira giriámán, ikáyá da pilian yù ira lálláki nira ta mepulú ira kári Pablo kâ Bernabe nga umay ta Antokia. Á sinullá da yù duá nga pakimorayán, si Kudas nga mangngágan gapay ta Barsabas ána si Silas. ²³ Á iníturá da yù bilid da sù ira bagu nga manguruk nga maggián ta Antokia, á inittubbuk da kári Pablo kâ Bernabe. Yawe yù kinagi ra ta pattúrâ da nira:

“Sikami nga olu nga minánggilayalayá ána yù ira giriámán, nga wáwwagi naw sù ángnguruk tam kâ Apu Kesu, sikami yù mattúrâ níkayu ngámin nga wáwwagi mi nga ari Kudio, nga maggián ta Antokia ána Siria ána Silisia. Á kunnasi kayu? Á parè bi ta napiá yù gawagawáyán naw.

²⁴ “Á narámak mi ta mabbábáng kayu megapu sù kinagi nayù ira nga naggapu sawe giám mi nga Jerusalem. Ngam arám mi gemma ira jinok. ²⁵ Á yáyù nga naggagammung kami, á nattatádday yù nonò mi ta piliam mi yù ira tatolay nga dobam mi nga mepulú sù ira wáwwagi tam nga iddukat tam, di Pablo kâ Bernabe, nga umay ta gián naw. ²⁶ Aggira yù tolay nga pinaguráyád da yù baggi ra ána inánga da, tapè masserbi ira kâ Apu Kesu Kiristu nga Yápu tam. ²⁷ Á yáyù nga jinok mi laguk di Kudas kâ Silas, nga mepulú kári Pablo, tapè ibukalád da gapay yù megittá sù iturá mi níkayu.

²⁸ “Á inipakánámmu nayù Mangilin nga Ikararuá níkami ta napiá galá nu arám mi kagian ta tuppálan naw yù ngámin nga kustombare mi nga Kudio, ngam yù iturá mi lá sawe, tapè ari kayu marigirigá. ²⁹ Á yawe ira tunung lá yù kagiam mi níkayu, ta arán naw kanan yù neyátáng ta sináddios. Arán naw kanan yù dága. Arán naw kanan yù ayám nga ari naparága. Á ari kayu makiruruk sù arán naw atáwa. Á nu kurugan naw yù ira appá

* 15:18 Amos 9:11-12

nga tunung, á napiá. Yáyù áddè na itúrâ mi nikayu, sikami nga maggián ta Jerusalem nga mangikatalá kâ Apu Kesu.”

³⁰ Á kabalid da nattúrâ, iniyawâ da kári Pablo ána yù ira tallu nga kábulun na yù túrâ da, á pinapáno ra ira. Á minay di Pablo laguk ta Antokia. Á labbè da tán, pinaggammung da yù ira ngámin nga manguruk, á iniyawâ da nira yù túrâ. ³¹ Á pabbibbik da sù túrâ, nagayáyâ ira megapu sù initarang da nira, á mináláppaw yù nonò da. ³² Á di Kudas kâ Silas, nga ábbilíná ni Namarò gapay, sinabatarangá da ira ta nabayák, tapè mepasigaggâ yù ángnguruk da kâ Apu Kesu.

³³ Á nakipaggián lábbi di Kudas ta Antokia sù ira manguruk. Á kabalid da naggián nira, pinapáno ra ira nayù ira manguruk, tapè manoli ira sù ira nga naddok nira túrin ta Jerusalem. Á kinagi ra, “Mepulù nikayu si Apu Namarò nga mangabbák nikayu.” ³⁴ Ngam naggián lá si Silas paga ta Antokia. ³⁵ Á nabattáng paga di Pablo kâ Bernabe ta Antokia, nga mangituddu ána mangilayalayâ ta meyanung kâ Apu Kesu, ána aru yù ira kábulud da gapay nga mangituddu ána mangilayalayâ.

Yù Pakkátue ri Pablo kâ Bernabe

³⁶ Á kabalid da nangituddu tán nga lugár, kinagi ni Pablo kâ Bernabe, “Et ta tullúnán yù ira manguruk kâ Apu ta ngámin nga ili nga nangilayalayátát ta ngaw, tapè ammu ta nu kunnasi ira.” ³⁷ Á ikáyâ ni Bernabe ta mepulù si Kuan, nga mangngágan gapay ta Markus. ³⁸ Ngam molang si Pablo, ta kinagi na ta ari mepángngà nu mepulù nira, gapu ta nánaw nira ngaw ta Pampilia, nga ari nepangabbák nira ta tarabáku ra. ³⁹ Á nerallà yù pakkakátabbák da, á nakkátuay ira. Á iná ni Bernabe si Markus ta kabbulun na, á nabbiray ira nga minay ta Sipro.

⁴⁰ Á si Pablo, piníli na si Silas ta mepulù kuna. Á yù ira nga manguruk kâ Apu, inipakimállà da kâ Namarò ta taronán na di Pablo. Á kabalid da nakimállà, pinapáno ra ira. ⁴¹ Á nánaw laguk di Pablo nga minay naddagâ ta ngámin nga ili sù purubinsia na Siria ána Silisia, nga mangilayalayâ ána manabarang sù ira nga mangikatalá kâ Apu Kesu ta ngámin nga ággagammungá da, tapè mepasigaggâ yù ángnguruk da.

16

Yù Kepulù ni Timotio kári Pablo kâ Silas

¹ Á nakáddè di Pablo ta ili na Derbi ána Listara. Á naggián ta Listara yù tolay nga manguruk nga mangngágan ta Timotio. Á Kudio yù yená ni Timotio, nga manguruk gapay, ngam Gareko yù yáma na nga taga Garesia. ² Á yù ira manguruk nga naggián ta Listara ána Ikonium, napiá yù kinagi ra nga meyanung kâ Timotio. ³ Á si Pablo, ikáyâ na apan si Timotio ta kabbulun na. Ngam yù ira Kudio nga naggián ta ngámin nga gián nga angayád da, ammu ra ta Gareko yù ammò ni Timotio. Á yáyù nga nipakugi ni Pablo si Timotio, tapè alawatad da gapay nayù ira Kudio.

⁴ Á nánaw di Pablo laguk, nga naddagaragâ ta aru nga ili. Á ta káda ili, inipakánámmu ra yù kinagi nayù ira olu nga minánggilayalayâ ána yù ira giriámán nga naggián ta Jerusalem, tapè tuppálad da gapay. ⁵ Á nepasigaggâ yù ángnguruk nayù ira manguruk ta ngámin nga ili, á ta kággággaw, nalannapán ira ta tatolay nga manguruk.

Yù Nappingan kâ Pablo ta Keggá na ta Tarowas

⁶ Á nattlebák di Pablo laguk ta purubinsia na Parigia ána Galasia, gapu ta arán na ira inanugù nayù Mangilin nga Ikararuá yù pangilayalayâ da ta bilin ni Namarò sù lugár na Asia. ⁷ Á pakáddè da ta purubinsia na Mísia, umay ira nakuan ta purubinsia na Bisinia, ngam arán na ira inanugù nayù Ikararuá ni Apu Kesu. ⁸ Á naddaretu ira nga nattlebák sù purubinsia na Mísia, á minay ira ta ili na Tarowas ta aggik na bebay.

⁹ Á tán nga gabi, inipasingan ni Namarò kâ Pablo yù tolay nga taga Masidonia nga limittuák, nga nanáddak nga makimállà kuna. Á kinagi na, “Ikállà kami bì. Umay kayu saw giám mi nga Masidonia, á ábbágán naw kami,” kun na. ¹⁰ Á pakasingan ni Pablo sù inipasingan ni Namarò kuna, á sikami kári Pablo, dagarágâ nga naggagannuá kami. Á síkán si Lukas nga nattúrâ, á síkán gapay yù kabbulun ni Pablo. Á inalek mi yù nattakayám mi nga biray nga umay ta Masidonia, ta natákál mi ta jinok na kami ni Namarò, tapè mangilayalayâ kami sù napiá nga dámak tán nga lugár.

Yù Panguruk na kâ Apu ni Lidia nga taga Pilippay

¹¹ Á nabbiray kami laguk nga nánaw ta Tarowas, á minay kami daretiu ta pugu na Samotrasia. Á sù tádday ággaw, nakáddè kami ta Niapulís. ¹² Gatták mi ta biray ta Niapulís, nappatalay kami nga minay ta Pilíppay, nga karakalán na ili sù purubinsia na Masidonia. Nesipá yù ili na Pilíppay sù pammagurayán na Roma, á aru yù ira taga Roma nga naggián sù ili. Á natturù ta tangaliguán yù paggiám mi ta Pilíppay. ¹³ Á ta ággaw na Sabadu, nga ággibannák da, minay kami ta lawán na ili ta aggik na danum, ta nanonò mi ta aijan támma tán yù ákkimállatán na Kudío. Á nagitubang kami nga makiubobuk sù ira bábbay nga naggagammung tán.

¹⁴ Á aijan sù ira nga nagginná ta ubobuk mi yù babay nga taga Tiyatira nga mangngágan ta Lidia, nga minálláku ta gagámi nga ujjojjin. Á ari Kudío si Lidia, ngam nakimoray gapay ká Apu Namarò. Á pakaginná na sù kinagi mi, pinannawák ni Apu yù nonò na, tapè tángngagan na yù kinagi ni Pablo. ¹⁵ Á narigù laguk di Lidia ána yù ira kábbale na. Kabalid da narigù, inapà na kami ni Lidia ta bale ra, nga kun na, “Nu kagian naw ta kukurugán nga mangurugá ká Apu, umay kayu bi maggián ta bale mi.” Á kinagumán na kami iná, á naggián kami nira.

Yù Kebáluk di Pablo ta Pilíppay

¹⁶ Á tádday nga ággaw, ta pallakák mi nga umay ta ákkimállatán, jiminápun nikami yù magingánay, nga aripan nga minállabbún, nga nagunagán na anitu, á yù anitu yù paggapuán nayù pakalabbún na. Á yù ira yápu na, aru yù ganánsiá ra nga nálá da megapu sù pallabbalabbún na. ¹⁷ Á siminututl yù babay nikami, nga nakkatakátol, nga kun na, “Danniaw ira yù masserbi ká Namarò nga Kotunán. Á ilayalayá da nikayu yù pakiyigù naw ká Namarò,” kun na. ¹⁸ Á kággággaw, kunniaw yù kingnguá na áddè ta arán na kalurá ni Pablo, á nallipay kuna, á kinagi na sù anitu na, “Yawe yù kagiak ku nikaw ta pannakabaggi ni Apu Kesu Kiristu, ta mánaw ka sù babay.” Á dagarágá nánaw yù anitu kuna.

¹⁹ Á pakasingan nayù ira yápu nayù babay ta awánin ta paganánsiád da, napporay ira. Á ginápù da di Pablo ká Silas, á ginuggud da ira nga iniyarubáng sù ira minámmanunnù ta giád da ta dápun. ²⁰ Á kinagi ra sù ira minámmanunnù, “Danniaw ira nga tolay, Kudío ira, á buruburionád da yù katangeliát tam. ²¹ Ituddu ra yù kustombare ra nga mekontará sù tunung tam nga taga Roma. Arát tam tuttulán gemma yù ituddu ra,” kud da.

²² Á nattatádday yù ira magari nga tatolay nga mangnguá kári Pablo. Á yù ira minámmanunnù, pinisipisil da yù barawási ri Pablo tapè iriád da. Á jinok da yù mamalù nira. ²³ Á kabalid da nira namalalpalù, pinukù da ira ta ábbaluran, á sinaddánád da yù magguárdiá, ta guárdián na ira ta napiá. ²⁴ Á pakaginná nayù magguárdiá sù kinagi ra, pinukù na ira sù lágum nga nattangngán nayù ábbaluran. Á siniri na yù takki ra ta duá nga káyu nga netúsi.

Yù Pabbáli nayù Magguárdia ta Manguruk ká Apu Kesu

²⁵ Á ta tangngá na gabi, aijan di Pablo ká Silas ta ábbaluran, nga nakimállá ká Apu Namarò, ána nakkansakansion ira ta paddáyo ra kuna. Á yù ira káruán nga tatolay nga nabáluk, gininná ra. ²⁶ Á ikáddagá lâ nallunik ta nasikan, á naguyuguyu yù ábbaluran. Á dagarágá nabukatán yù ngámin nga puertá, ána nári yù ngámin nga ánnangngal sù ira tatolay nga napukù. ²⁷ Á kalukák nayù magguárdiá, nasingan na yù ngámin nga puertá na ábbaluran nga nabukatán, á kagian na ta nattálawin yù ira guárdián na. Á yáyù nga inásù na yù bayuneté na ta papatáyan na nakuan yù baggi na. Ta nu nattálaw iren, á jigirigátad da laguk nayù ira naddok kuna ána papatáyad da. ²⁸ Ngam nakkatol ta nasikan si Pablo sù magguárdiá, á kinagi na kuna, “Arám mu akkuán yù baggim! Aijan kami ngámin saw nga guárdiám mu.”

²⁹ Á inagálán na laguk nayù magguárdiá yù mamagatang ta tulu. Á pakálá na ta tulu, nakkarerá nga minay ta lágum, á namalittúkak ta arubáng di Pablo ká Silas nga namippippik ta assing na. ³⁰ Á iniyánge na ira laguk ta lawán, á iniyabbù na nira, nga kun na, “Mesturu, anni yù máwák nga akkuák ku, tapè meyguká nga mesipá ká Namarò?” ³¹ Á kinagi ri Pablo, “Mangikatalá ka ká Apu Kesu, á mesipá kayu ká Namarò sù pammagurayán na, sikayu ngámin sù ira kábbalem.”

³² Á kinagi di Pablo laguk yù bilin ni Apu sù ira ngámin nga kábbale nayù magguárdiá. ³³ Á tán nga gabi, iniyánge nayù magguárdiá ira ta lawán, tapè baggawán na yù bigibigák da. Á kabalín na namaggaw nira, dagarágá nakirigù yù magguárdiá ána yù ira kábbale na. ³⁴ Á iniyánge na di Pablo ká Silas ta bale na, á pinakán na ira. Á nagayáyá ira ngámin nga makkakábbalay gapu ta pangikatalá da ká Namarò.

³⁵ Á ta pannawák, jinok nayù ira minámmanunnù yù ira pulis, ta ed da kagian sù magguárdiá ta palubbángan na yù ira tatolay. ³⁶ Á yù magguárdiá, en na kinagi kári Pablo. “Yù ira minámmanunnù, jinok da yù ira pulis nga minay nakkagi nikán ta palubbángat takayu. Á mánaw kayu laguk.” ³⁷ Ngam kinagi ni Pablo sù ira pulis, “Kagabi, iddá da kami lâ inipapalù ta arubáng na tangelián, nga awán ta liwá mi. Á mássiki nu tolay kami nga taga Roma gapay nga kunnay nira, inipapukù da kami, nga arád da paga binestigá. Mekontará gemma sù tunung na Roma yù kingguá ra nikami. Inipasiránád da kami ta arubáng na tolay, á kagiad da panò ta ilímak da yù liwá da, á ilammang da kami nga palubbángan? Molang kami mánaw nu ari aggira yù umay nikami mamalubbáng.” ³⁸ Á nanoli yù ira pulis, á kinagi ra sù ira minámmanunnù yù kinagi ni Pablo. Á pakaginná ra ta egga kári Pablo yù papel da nga pakasinganán ta mesipà ira gapay sù pakáwayyá na Roma, á naganásing ira. ³⁹ Á yáyù nga minay ira ta ábbaluran nga nakipakomá kári Pablo, á iniyángo ra ira ta lawán. Á nakimállà ira kári Pablo ta mánaw ira lâ sù ili. ⁴⁰ Á nánaw laguk di Pablo ta ábbaluran nga minay daretu ta bale ri Lidia. Á sinabarangád da yù ira nga naggagammung ta bale ra, nga mawwawági sù ángngikatalà da kâ Apu Kesu, tapè mepasigaggá yù ángnguruk da. Á kabalid di Pablo nanabarang, nánaw ira laguk.

17

Yù Keggá ri Pablo ta Tessalonika

¹ Páno ri Pablo ta Pilippay, nattalebák ira ta ili na Ampipolis ána ili na Apolonia, á limibbè ira ta ili na Tessalonika. Á egga tán yù kapilliá na Kudio. ² Á naggián ira ta tallu ligguán, á káda Sabadu minay si Pablo ta kapilliá, nga kunnay ta kustombare na, á nakiubobuk sù ira tatolay ta meyannung sù dán nga netúrâ nga ubobuk ni Namarò. ³ Á pabbibbik na sù ubobuk ni Namarò, inibukalán na nira ta máwák nga matay yù Mangiyígù, á maginnanolay. Á kinagi na nira, “Si Apu Kesu nga ilayalayâ ku nikayu, aggina yù Mangiyígù nga iddagán naw, nga ubobugan nayù dán nga netúrâ nga mangngágan ta Kiristu.” ⁴ Á nanguruk yù ira káruán na Kudio, á nepappupúlù ira kári Pablo kâ Silas, nga kunnay gapay sù ira aru nga Gareko nga taga Garesia, nga makimoray kâ Namarò, ána aru nga bábbay nga maríku.

⁵ Ngam yù ira kátannágan na Kudio nga ari nanguruk, napassil ira kári Pablo. Á inagálád da yù ira tatolay nga naráké, á jinok da ira ta ammungad da yù magaru nga tatolay. Á pinappatapátu ra yù ira tangelián. Á ed da sillung yù bale ni Jeson, nga paggianád di Pablo kâ Silas, tapè iyarubáng da ira nakuan sù ira magaru nga tatolay. ⁶ Ngam arád da ira nálek. Á yáyù nga ginápù da di Jeson ána yù ira kábulun na nga mawwawági ta ángnguruk da kâ Apu, á ginuggud da ira nga iniyarubáng sù ira mammaguray ta ili, tapè ikeká ra ira. Á nagagga-aggay ira, nga kud da sù ira mammaguray, “Ajjan yù ira tatolay nga mamuruburion ána mamappatapátu ta tangapáddabbunán, á limibbè iren saw ili tam. ⁷ Si Jeson yù nangilágum nira. Á aggira ngámin, potuád da si Patul Sisar, ta kagiad da ta ajjan tanakuán nga patul nga mangngágan ta Kesu,” kud da.

⁸ Á pakaginná nayù ira tatolay ána yù ira mammaguray ta ili sù kinagi ra, naburung ira. ⁹ Á pinapiánsá ra di Jeson ána yù ira kábulun na, á pinalubbáng da ira laguk.

Yù Keggá ri Pablo ta Beria

¹⁰ Á yù ira mawwawági ta ángnguruk da kâ Apu, dagarágâ nga inilammang da nga pinapánaw di Pablo kâ Silas tán nga gabi, ta umay ira ta Beria. Á tappi da tán, minay ira ta kapilliá na Kudio. ¹¹ Á napiá yù ira Kudio nga naggián ta Beria ánnè sù ira Kudio ta Tessalonika. Á nagayáyâ ira nga magginná sù bilin ni Namarò. Á kággággaw binibbik da yù dán nga netúrâ nga bilin ni Namarò, nga inigittá ra sù kinagi ni Pablo, tapè ammu ra nu kuruk yù ituddu na. ¹² Á yáyù nga aru yù ira Kudio nga nangikatalà kâ Apu Kesu. Á aru gapay yù ira nangikatalà nga Gareko nga maríku nga bábbay ána lálláki.

¹³ Á pakarámak nayù ira Kudio nga naggián ta Tessalonika ta ajjan si Pablo ta Beria nga mangilayalayâ ta bilin ni Namarò, minay ira gapay ta Beria, nga mamuruburion ána mamappatapátu sù ira magaru nga tatolay tán. ¹⁴ Ngam pakasingan nayù ira manguruk ta limibbè yù ira mamuruburion, dagarágâ pinapáno ra si Pablo ta umay ta bebay. Ngam naggián lábbi ta Beria di Silas kâ Timotio. ¹⁵ Á yù ira nga namapánaw kâ Pablo, inituluk da ta ili na Atenas. Á ta páno ra nga manoli ta Beria, inibilin ni Pablo nira yù kagian na kári Silas kâ Timotio, ta mabi ira nga dumáddán kuna.

Yù Pangilayalayâ ni Pablo ta Pagiddak na ta Atenas

¹⁶ Á ta pagiddak ni Pablo kári Silas ta Atenas, nabagal yù nonò na, ta nasingan na ta ili yù kitáru nga sináttoy nga didios da. ¹⁷ Á yáyù nga minay si Pablo ta kapilliá na Kudio nga nakiubu-ubobuk sù ira Kudio ána yù ira ari Kudio nga naggagammung tán. Á kággággaw minay gapay ta dápun nga nakiubobuk sù ira tatolay nga aijan tán. ¹⁸ Á aijan yù ira sinudduán ni Epikurio ána yù ira nga sinudduán ni Estoyku nga nakaginná sù kinagi ni Pablo. Á kinagi ra, “Anni panò yù kagian na yawe kitobobuk nga tolay?” kud da. Ngam yù ira káruán, kinagi ra, “Ilayalayá na támma yù tanakuán nga dios nga arát tam ammu.” Yáyù kinagi ra gapu ta inilayalayá ni Pablo si Apu Kesu ána yù meyanung ta paginnanole nayù námmatay.

¹⁹ Á iná da laguk si Pablo, á iniyángo ra ta arubáng nayù ira kátannangád da sù ággagammungád da ta utun na puddul nga mangngágan ta Ariappagu. Á kinagi ra ká Pablo, “Ipakánnámmum bì nikami yù meyanung sù ituddum. ²⁰ Ta mapállá kami, gapu ta kapágginná mi lá paga, á ikáyá mi kánnámmuán yù kebalinán na,” kud da. ²¹ Á yù ira ngámin nga tatolay nga taga Atenas ána ngámin yù ira tanakuán nga makipaggián tán, awán ta dumá nga sinarabáku ra, nu ari galá yù pakaginná ra sù bagu nga dámak, nga inubu-ubobuk da ta tangatangággaw.

²² Á yáyù nga nanáddak si Pablo ta arubáng nayù ira kátannangán nga naggagammung ta Ariappagu, á kinagi na nira, “Sikayu nga taga Atenas, nasingak ku ta tángngagan naw yù aru nga didios naw nga ákkimorayán naw. ²³ Á ta pappassapassiár ku ta ili naw, nasingak ku ta kitáru yù ira ákkimorayán naw. Á nesimmuák ku yù tádday nga ákkimorayán naw nga aijan nga netúrâ kuna nga kunníaw, ‘Ta Dios nga arát tam ammu.’ Á yane pakimorayán naw nga arán naw ammu, aggina laguk yù ilayalayá ku nikayu kunangane.

²⁴ “Yawe Dios nga ilayalayá ku nikayu, aggina yù Yápu na ngámin, yù Mammaguray ta lángi ána ngámin nga egga nira. Aggina yù Yápu na ngámin, yù Mammaguray ta lángi ána dabbuno. Á yáyù nga ari maggián ta balay nga pidde na tolay. ²⁵ Á awán bulubugá ta awayyá na tatolay nga mangabbák kuna, ta aggina yù mangiyawá nittam ta áttole tam, inángá tam, ána ngámin yù awágat tam.

²⁶ “Á pidde ni Namarò yù ira ngámin nga tatolay nga makkakerumá katole ra, negapu sù táttádday nga tolay nga olu nga pinarò na. Á sinullá ni Namarò yù ággaw nga keggá ra ána yù áddè na dabbun nayù ira páppatulád da nga katággitádday. ²⁷ Yáyù kingguá ni Namarò, tapè egga sù ira ngámin nga tatolay yù awayyá ra nga mannononò sù namarò nira, ána ammu ra sangaw si Apu Namarò, nu inni-innad da ta napiá yù pinarò na megapu nira ána nonotad da ta napiá yù pangikállá na nira. Ngam ari gemma arayyu si Namarò nittam, nu ari galá aranni nittam nga katággitádday.

²⁸ “Á aijan yù ngaw tádday nikayu nga minángngitúrâ, á kinagi na, ‘Si Apu Namarò yù paggapuán na inángá tam ána ágguyu tam ána nonò tam ána ikararuá tam.’ Á kinagi na gapay, ‘Áná na ittam gemma ni Apu Namarò,’ kun na. ²⁹ Á gapu ta áná ni Namarò ittam, arát tam nakuan kagian ta aggina yù kun na buláwán onu pinaláta, batu, onu yù ira sináttoy nga pidde na tolay.

³⁰ “Á sù ngaw, arán na pinagikáru ni Namarò yù ira tatolay, gapu ta arád da paga ammu bulubugá yù meyanung kuna. Ngam kunangane kagian ni Namarò sù ira ngámin nga tatolay ta máwák nga mabbabáwi ira sù narákè nga akka-akkuád da. ³¹ Ta sinullá ni Namarò yù ággaw nga pamanunnù na ta ngámin nga makkakerumá nga tatolay ta dabbuno. Á sinullá na yù mamanunnù nga matunung yù ámmannunnù na. Á inipakánnámmu ni Namarò sù ira ngámin nga tatolay yù sinullá na nga mamanunnù, ta pinaginnanole ni Namarò, nga naggapu ta gián nayù ira námmatay.”

³² Á pakaginná ra sù kinagi ni Pablo nga meyanung ta paginnanole nayù ira námmatay, inuyo nayù ira káruán si Pablo. Ngam kinagi nayù ira káruán kuna, “Ikáyá mi maginná má sangaw yù kagam mu nga meyanung karanniaw,” kud da.

³³ Á nánaw laguk si Pablo nira. ³⁴ Á páno na, nepappapulú kuna yù ira káruán nga tatolay, gapu ta nanguruk ira. Si Dionisio yù tádday nga manguruk, nga kabbulun nayù ira kátannangán ta Ariappagu, ána yù tádday nga babay nga mangngágan ta Damaris. Á aijan yù ira káruán paga nga nangikatalá ká Apu Kesu, nga netádday ká Pablo.

18

Yù Pangilayalayá ni Pablo ta Korinto

¹ Kabalin na yaw, nánaw si Pablo ta Atenas, á minay ta Korinto. ² Á nesimmuán na tán di Akila ká Persila, nga magatáwa. Kudio ira nga taga Pontu ngaw, á nakipaggián ira lá

gangu ta áppatulán na Italia. Á gapu ta pinapáno ni Patul Kalodio yù ira ngámin nga Kudio ta Roma, nga karakalán na ili ta Italia, nagali di Akila, á limibbè ira ta Korinto. Á en ni Pablo ira sinullúnán. ³ Á gapu ta naggittá yù ággalerád da kâ Pablo, nga mináppadday ta tarapál, á nakipaggián si Pablo ta bale ra, nga mepattarabáku nira.

⁴ Á káda Sabadu minay si Pablo sù kapilliá na Kudio nga makiubobuk sù ira Kudio ána yù ira Gareko gapay, tapè dudduáran na ira ta manguruk ira kâ Apu Kesu. ⁵ Á labbè di Silas kâ Timotio ta Korinto, nga naggapu ta Masidonia, yáyù nga awayyá ni Pablo nga tángngagan yù pangilayalayá na sù ira Kudio. Á inilayalayá na nira si Apu Kesu nga Kiristu nga Mangiyigù nga inítabbá na ngaw ni Namarò nga umay mammaguray. ⁶ Ngam kinontará ra si Pablo nayù ira Kudio ána nakkakagiád da. Á iniwákkâ na laguk ni Pablo yù barawási na, ta panákkilalán ta kabalín na nangilayalayá sù ira Kudio. Á kinagi na nira, “Liwá naw lággapay, nu ari kayu meiyigù. Arák ku liwá, ta sinabarangát takayu gemma. Á ek ku lállaguk ilayalayá sù ira ari Kudio.”

⁷ Á nánaw si Pablo laguk nga minay ta bale ni Tisio Justo, nga tolay nga ari Kudio nga makimoray kâ Namarò. Netaging ta kapilliá na Kudio yù bale na. ⁸ Á si Kirispo, nga kátannangád da ta kapilliá na Kudio, nanguruk gapay kâ Apu Kesu. Á nanguruk gapay yù ira ngámin nga kábbale na. Á aru gapay yù ira tatolay nga naggián ta Korinto nga nakaginná sù kinagi ni Pablo, á nanguruk ira, á nakirigù ira.

⁹ Á ta tádday gabi, aijan yù nappasingan kâ Pablo. Á naginná ni Pablo si Apu Kesu nga magubobuk kuna, á kinagi ni Apu, “Ari ka mattukkâ nga mangilayalayá sù meyanung nikán, á ari ka maganássing sù ira tatolay. ¹⁰ Awán ta tolay nga umay mangguá nikaw, ta sikán yù mepulú nikaw. Á kitáru paga yù ira tatolay sawe ili nga manguruk ána mesipá nikán,” kun ni Apu kuna. ¹¹ Á yáyù nga naggián tán si Pablo ta tangaragun ta gadduá, nga mangituddu sù bilín ni Namarò sù ira tatolay.

¹² Á paggián na lâ paga ni Pablo ta Korinto, á naggubinador si Gallio ta purubinsia na Akeya. Á nattatádday yù ira Kudio nga ari manguruk, á ginápù da si Pablo. Á iniyarubáng da kâ Gubinador Gallio, tapè ikeká ra kuna. ¹³ Á kinagi ra, “Yawe tolay, kagumánan na yù ira tatolay ta tanakuán nga ákkimore ra kâ Namarò nga mekontará sù tunung mi!” kud da.

¹⁴ Á lage ni Pablo nakuan magubobuk, nga tubbák sù kagiád da, kinagi ni Gallio sù ira Kudio, “Nu egga nakuan yù liwá na, onu narákè yù kingguá na, á máwák nakuan ta anúsát takayu nga Kudio ána ginnák ku nakuan yù kagian naw. ¹⁵ Ngam gapu ta maddagaragim kayu galá ta meyanung ta ubobuk ána ngágan na tolay ána yù tunung naw lápay, sikayu lággapay yù mamanunnù. Manakiká mamanunnù karanniw.” ¹⁶ Á pinaturiák na ira sù ámmanunnután. ¹⁷ Á ginápù da laguk nayù ira tatolay si Sostenes, nga kapatás ta kapilliá na Kudio, á kingguá ra sù námuaák nayù ámmanunnután. Ngam si Gubinador Gallio, pinagurayán na ira. Arán na ira sinángngák.

Panoli ni Pablo ta Antokia sù Purubinsia na Siria

¹⁸ Pappasá na yaw, naggián paga si Pablo ta nabayák ta Korinto sù ira mawwawági ta ángnguruk da kâ Apu. Á páno na, nepulú kuna di Akila kâ Persila. Á minay ira ta Kenkareya ta aggik na bebay. Labbè da tán, nakiúsi si Pablo ta sinniál na ta sinuppál nen yù ngaw inítabbá na kâ Namarò, ta yáyù kustombare ra. Á nabbiray ira laguk nga minay ta purubinsia na Siria. ¹⁹ Á jiminung ira ta ili na Epeso. Yáyù nabattángád di Akila. Ngam naddagá lâ si Pablo ta kapilliá, tapè makiubobuk sù ira Kudio. ²⁰ Á inapá da ta maggián nira ta mabayák, ngam kinagi ni Pablo ta máwák na lábbi mánaw. ²¹ Á ta paggagannuá na, kinagi na nira, “Nu ure ni Namarò, á manolingá nikayu noka.” Á nabbiray laguk si Pablo nga nánaw ta Epeso.

²² Á jiminung yù biray ta Sesaria. Á gatták ni Pablo, gimimon ta Jerusalem tapè tullúnán na yù ira mangikatalá kâ Apu Kesu nga naggián tán. Á páno na ta Jerusalem, minay laguk ta ili na Antokia sù purubinsia na Siria. ²³ Á naggián ta Antokia nga nangabbák nira. Á páno na ta Antokia, minay naddagaragá ta ngámin nga ili sù ira purubinsia na Galasia ána Parigía. Á sinabarangán na yù ira ngámin nga manguruk kâ Apu Kesu ta ipasigaggá da yù ángnguruk da.

Yù Pangituddu ni Apolo ta Korinto ána Epeso

²⁴ Á paggián ni Pablo ta Galasia ána Parigía, aijan yù Kudio nga taga Alekandria nga mangngágan ta Apolo nga limibbè ta Epeso. Á napiá yù ángngituddu ni Apolo, ta natudduán sù ngámin nga dán nga netúrâ nga ubobuk ni Namarò. ²⁵ Á natudduán gapay ta meyanung

sù panguruk tam kâ Apu Kesu. Á yáyù nga kuruk yù inittuddu na gapay ta meyanung kâ Apu Kesu, á naláppà nga mangittuddu. Ngam yaw lâ paga nga ammu na yù pakirigù na tolay nga inittuddu na ngaw ni Kuan nga Minánngù.

²⁶ Á minay si Apolo nangittuddu sù kapillíá na Kudío nga ari naganássing. Á di Akila kâ Persila, naginná ra yù kinagi ni Apolo ta kapillíá, á inapà da ta bale ra, á inibukalád da ta napiá yù pakiyigù nayù ira tatolay kâ Namarò megapu sù pangikatalá da kâ Apu Kesu.

²⁷ Á inikáyá ni Apolo ta dumáki nga umay ta purubinsia na Akeya. Á yù ira kábulun na ta Epeso, jinudduák da ta umay, á iníturá da laguk sù ira nga manguruk kâ Apu Kesu nga maggián ta Akeya, ta alawatad da si Apolo. Á labbè ni Apolo ta Akeya, inabbágán na ta napiá yù ira tatolay nga mangikatalá kâ Apu Kesu, megapu sù pangikallá ni Namarò nira. ²⁸ Á nábbágán ira megapu sù pangappù ni Apolo sù ira Kudío nga ari nanguruk, ta pakkakátabbatabák da ta arubáng nayù ira magaru nga tatolay. Á inibukalán ni Apolo yù dán nga netúrâ nga ubobuk ni Namarò, á kunnian inipakkuruk na sù ira Kudío ta si Apu Kesu yù MakKiristu nga mangiyigù nga ubobugan nayù ira ngaw ábbilinán.

19

Si Pablo ta Epeso

¹ Á keggá ni Apolo paga ta Korinto, minay si Pablo ta ili na Epeso, nga nallakák ta puddupuddul sù tangngá nayù purubinsia. Á ta Epeso, narángnganán na yù ira manguruk kâ Namarò. ² Á iniyabbù ni Pablo nira, “Á ammu naw nu minay nikayu yù Mangilin nga Ikararuá ta kapángnguruk naw?” Á kinagi ra kuna, “Ari. Arám mi bulubugá naginná yù meyanung sù Mangilin nga Ikararuá.” ³ Á kinagi ni Pablo nira, “Anni laguk yù kebalinán nayù karigù naw?” Á kinagi ra, “Á kunnay sù ánnigù ni Kuan ngaw.” ⁴ Á kinagi ni Pablo, “Jinigù ni Kuan yù ira tatolay nga nababáwi ta liwiliwá da, á inittuddu na gapay nira ta kurugad da yù umay nga maporián kuna. Aggina si Apu Kesu,” kun na.

⁵ Á pakaginná ra ta meyanung kâ Apu Kesu, nanguruk ira ána nakirigù ira má, nga metádday kâ Apu Kesu. ⁶ Á sinámmi ni Pablo ira, á minay nira yù Mangilin nga Ikararuá, á iddá da nangiyubobuk ta tanakuán ira nga ággubobuk nga arád da ammu, ána iniyubobuk da yù inipalappá ni Namarò nira. ⁷ Á mapulu duá yù ira ngámin nga narigù.

⁸ Á naggián si Pablo ta Epeso ta tallu bulán nga mangilayalayá ta kapillíá na Kudío. Á ari naganássing nga makiubobuk nira ta meyanung sù pammagure ni Namarò ta dabbuno, tapè manguruk ira gapay kâ Apu Kesu. ⁹ Ngam nataggá yù nonò nayù ira káruán, á ari ira nanguruk. Á nagubobuk ira ta narákè ta meyanung kâ Apu Kesu ta arubáng nayù ira tangapaggammungán. Á yáyù nga inipáno ni Pablo yù ira manguruk, á minay ira naggagammung ta iskuelá ni Tirano. Á kággággaw, nangittuddu si Pablo sù ubobuk ni Namarò sù iskuelá. ¹⁰ Á kunniaw yù pangittuddu ni Pablo tán nga iskuelá ta duá ragun. Á yù ira ngámin nga tatolay nga Kudío ána yù ira ari Kudío nga naggián ta purubinsia na Asia, naginná ra yù bilin ni Apu Kesu.

Yù ira Pitu nga Minágganánitu nga Áná ni Eskeba

¹¹ Á aru yù makapállá nga pinagaddátu ni Pablo megapu sù pakáwayyá ni Namarò. ¹² Á yáyù nga mássiki nu mesiggek lâ yù panniu onu appi ta baggi ni Pablo, nga metuluk sù ira máttaki, á nammapiá ira, ána nánawán na ira nayù ira anitu.

¹³ Á aijan yù ira Kudío nga minágganánitu nga mappassapassiár, tapè parubád da pammapián yù ira nagunagán. Á kinagi ra, “Papanáwam ni sikayu nga anitu megapu sù ngágan ni Apu Kesu nga ilayalayá ni Pablo.” ¹⁴ Á aijan yù pitu nga lálláki, nga áná ni Eskeba nga kátannagán nga pári na Kudío, nga kunnian yù kingnguá ra. ¹⁵ Á pagubobuk da sù anitu, simibbák yù anitu, á kinagi na nira, “Ammù gemma si Kesu, á ammu gapay si Pablo. Ngam sikayu, asinni kayu laguk?” ¹⁶ Á yù tolay nga nagunagan nayù anitu, ikáddagá na lá kingnguá na yù ira pitu nga minágganánitu, á pinisil na yù barawási ra ána pinatulú na ira ngámin. Á nattálaw ira nga nagilongán ána nabigibigarán.

¹⁷ Á neparámak yù nesimmu ta ngámin nga tatolay nga naggián ta Epeso, nga Kudío ira ána yù ira ari Kudío. Á naganássing ira ána nerallá yù kapállá da. Á jináyo ra si Apu Kesu ta ngámin nga lugár. ¹⁸ Á yáyù nga aru gapay yù ira nangikatalá kâ Apu Kesu nga nababáwi ta liwiliwá da, á ed da pinalappá yù narákè nga kingngikingnguá ra. ¹⁹ Á aru gapay yù ira nga minágganánitu ngaw, nga inammung da yù ngámin nga libru ra nga meyanung ta salamangká ra, á sinuggi ra ngámin ta arubáng nayù ira ngámin na tatolay. Á biniláng da yù

pagá nayù libru ra nga sinuggi ra, á singkuéntá nga ribu nga pirá yù pagá na. ²⁰ Á yáyù nga nepasingan ta makáwayyá yù bilin ni Apu Namarò, á nassamá yù bilin nga meyanung ká Apu Kesu, á nalannapán ta aru yù ira manguruk.

Yù ira Magaru nga Mapporay ta Ili na Epeso

²¹ Kabalin na yaw, ninonò ni Pablo ta maddagá ta Masidonia ána Akeya, ta lage na umay ta Jerusalem. Á kinagi na gapay, “Sangaw nu mánawà ta Jerusalem, umayá laguk ta ili na Roma,” kun na. ²² Á pinapolu na yù ira duá nga mangabbák kuna, di Timotio ká Erasto, ta umay ira ta Masidonia. Ngam nabattáng si Pablo lá paga ta Epeso, sù purubinsia na Asia.

²³ Á paggián ni Pablo paga ta Epeso, aru yù ira tatolay nga naggugúru nga napporay, ta molang ira sù metuddu nga tuttulan nayù ira tatolay nga mangikatalà ká Apu Kesu. Á kunniaw yù kesimmu na. ²⁴ Ajjan ta Epeso yù laláki nga mangngágan ta Dimitrio. Aggina yù minábbattál ta pinaláta nga paddayan na ta baddi nga sinákkapilliá ira nga meyarik ta dakal nga kapilliá nga áddasalád da ká Artemi, nga dios da nga babay. Á pinatarabáku ni Dimitrio yù aru ira nga minábbattál ta pinaláta, á aru yù ganánsiá ra megapu sù tarabáku ra.

²⁵ Á pinaggagammung ni Dimitrio yù ira pappatarabakuan na ána yù ira nga negittá ta pagalerád da, á kinagi na nira, “Sikayu nga kábuluk ku, ammu tam ta napiá yù ággiát tam megapu sawe pagalerát tam, ta maríku ittam. ²⁶ Á nasingan naw ána naginná naw yù akkuán nayù tolay nga mangngágan ta Pablo, ta ituddu na ta ari kuruk nga dios yù pidde na tolay. Á aru yù ira tatolay nga manguruk sù pangilayalayá na. Aru yù ira nga kinagumán na sawe Epeso ána sù tangapurubinsia na Asia. ²⁷ Á yáyù gapu na ikaburung tam, marakè iluddè nayù ira tatolay yù ággalerát tam, á nepatalugáring ta awán sangaw ta serbi nayù dakal nga kapilliá nga pakimallátan na tolay sù kotunán nga dios tam nga babay, si Artemi, ána arád da sangaw paddayawán si Artemi, nga pakimorayán na ngámin na tatolay ta Asia ána tangapáddabbunán,” kun ni Dimitrio nira.

²⁸ Á pakaginná ra sù kinagi ni Dimitrio, nappatapátu ira. Á nakkatakátol ira, nga kud da, “Kotunán si Artemi nga dios ta Epeso!” kud da. ²⁹ Á mabagal yù ira tangelián. Á ginápù da di Aristarko ká Gayo nga taga Masidonia, nga nepulú ká Pablo sù ánge na ta Epeso. Á gikarakarerán ira nga ginuggun di Aristarko nga iniyánge ra ta dakal nga ábbýád da.

³⁰ Á pakarámak ni Pablo ta ginápù da di Aristarko, umay nakuan makiarubáng sù ira magaru, ngam arád da inanugú nayù ira manguruk ká Apu. ³¹ Á yù ira kákkopun ni Pablo nga makáwayyá ta purubinsia, inibilid da ká Pablo yù ikomá ra nga ari lá mappasingan ta ággagammungán, marakè akkuád da.

³² Á yù ira magaru, nakkatakátol ira, nga naddurúma yù kakágiad da nga ikatakátol da. Á nakalalang yù ira tangapaggammungán, ta arád da ammu nayù ira káruán yù ipaggammung da. ³³ Á yù ira Kudio, pinarubáng da si Alekanduru, tapè aggina yù magubobuk sù ira magaru nga tatolay. Á yáyù nga inítáyák na yù limá na, ta pagimammatan na ira, tapè ibukalán na nakuan nira yù nesimmu. ³⁴ Ngam natákkilalád da ta Kudio si Alekanduru, á kagiad da ta aggina yù papporayád da. Á nakkatakátol ira ta duá nga oras, nga kud da, “Kotunán si Artemi nga dios ta Epeso!” kud da.

³⁵ Á pappasá na duá nga oras nga pakkatakátol da, egga tán yù iskiribiente sù munisipiu ra, á nanáddak ta arubáng nayù magaru, á pinagimammá na ira. Á kinagi na nira, “Sikayu nga tangeliák ku ta Epeso, egga panò yù tolay nga arán na ammu ta ajjan saw nittam ta Epeso yù dakal nga áddasalán ta Artemi nga kotunán, ána yù mangilin nga batu nga napanná nga naggapu ta lángi? ³⁶ Á gapu ta awán gemma ta makariri sù masingat tam ána ammu tam ngámin, napiá laguk nu magimammá ittam, nga ari magapa-apurá nga mangnguá. ³⁷ Ta yawe ira tatolay nga iniyánge naw saw, awán ira ta liwá. Ari ira nakkabukán sù áddasalát tam onu yù dios tam nga babay.

³⁸ “Á di Dimitrio ána yù ira kábulun na nga minábbattál, nu egga yù ikeká ra nira, á mangikeká ira laguk sù ira minámmanunnú sù ámmanunnután nayù gubinador. Umay ira ngámin makkakákeká. ³⁹ Á nu egga paga yù ikáyá naw, ubobugat tam laguk sangaw sù paggagammung nayù ira kátannangát tam, tapè makkakáppiá ittam lággapay. ⁴⁰ Ta maburungá, marakè papporayán na ittam nayù gubinador megapu sù pattannatannuk tam ta ággawo, ta awán ittam ta itabbák kuna.” ⁴¹ Á kabalin nayù iskiribiente nga nanabarang sù ira magaru, pinapáno na ira.

20

Yù Ánge ni Pablo ta Masidonia ána Garesia

¹ Á pappasá nayù pattannatannuk nayù ira tatolay ta Epeso, inipámmung ni Pablo yù ira manguruk kâ Apu Kesu. Á kabalín na nanabarang nira, nánaw nira, á minay ta purubinsia na Masidonia. ² Á naddagaragâ ta ngámin nga ili, nga manabarang sù ira manguruk. Á pakáddè na ta purubinsia na Garesia, ³ naggián ta tallu bulán. Á kabalín na ngaggián nira, naggagannuâ, ta umay nakuan mallúgán ta biray nga umay ta purubinsia na Siria. Ngam narámak na ta igagánge nayù ira Kudío. Á nabbabáwi laguk, á ninonò na ta manoli nga mattalebák ta Masidonia.

⁴ Á síkán si Lukás nga kabbulun ni Pablo. Á aijan gapay níkami si Sopatro nga anâ ni Pirro nga taga Beria, ána di Aristarko kâ Segundo nga taga Tessalonika, si Gayo nga taga Derbi, ána si Timotio, á di Tikiko kâ Taropimo gapay nga taga Asia. ⁵ Danniaw ira nga kábulum mi, nánaw ira nga napolu ánnè níkami, á iniddagád da kami ta ili na Tarowas. ⁶ Á ta kabalín na piestá nga pakkákám mi ta pán nga awán ta állapparán na, nánaw kami gapay ta Pilippay. ⁷ Á nattakay kami ta biray. Á pabbire mi ta límá nga ággaw, jiminung kami ta Tarowas nga dumáddán nira, á ngaggián kami ta tangaliguán.

Yù Kapannâ ni Yutiko

⁷ Á ta púgák na Liggú, naggagammung kami ta pakimore mi kâ Namarò ána pakkákám mi ta pán nga giddigiddúá mi, nga panaddamám mi ta pate ni Apu Kesu. Á nagubu-ubobuk si Pablo sù ira tatolay ta nabayák, áddè ta tangngá na gabi, gapu ta mánaw sangaw nu kapannawagán na. ⁸ Á aru yù ira isingan sù paggagammungám mi ta utun. ⁹ Á aijan yù bagitolay nga mangngágan ta Yutiko nga nagitubang ta bintá. Á gapu ta nabayák si Pablo nga magubobuk, nattummâ si Yutiko. Á pakkaturuk na ta napiá, napannâ ta dabbun nga naggapu ta mekatallu nga daták ta utun, nga naggagammungám mi. Á ed da inakkâ nga natayin. ¹⁰ Ngam minuluk si Pablo, á inappungulán na nga pinagikkáng yù bagitolay. Á kinagi ni Pablo nira, “Ari kayu mabagabagal, ta matolayin.” ¹¹ Á minunè ira ta utun. Á giddigiddúá ni Pablo yù pán, á nepakkákán kami. Á kabalim mi nakkákán, nakiubobuk si Pablo nira ta áddè ta pannawák. Á nánawán na ira laguk. ¹² Á yù bagitolay, inilabbè da nga matolayin ta bale ra, á nagayáyá ira.

 Ánge ni Pablo ta Mileto

¹³ Páno mi ta Tarowas, nabbiray kami nga minay ta Asson. Ngam nappatalay si Pablo, ta pinapolu na kami, á kinagi na níkami ta dagatam mi sangaw ta ili na Asson. ¹⁴ Pakaratang na níkami ta Asson, inítake mi ta biray, á minay kami ta pugu na Mitilene. ¹⁵ Á pabbire mi paga nga naggapu ta Mitilene, nattalebák kami ta pugu na Kiyos ta tádday ággaw. Á sù mekaruá nga ággaw naddagâ kami ta pugu na Samos. Á sù mekatallu nga ággaw jiminung kami ta ili na Mileto. ¹⁶ Ta sinalebarám mi yù ili na Epeso, gapu ta manaki si Pablo maddagâ tán, marakè mabayák kami ta Asia, ta apurádu si Pablo nga makáddè ta Jerusalem pángè na ággaw nayù piestá na Kudío nga mangngágan ta Pentekosto.

Pagubu-ubobuk ni Pablo sù ira Karakalán nga taga Epeso

¹⁷ Á dung mi ta ili na Mileto, jinok ni Pablo yù umay ta Epeso, tapè agálán na yù ira karakalán nayù ira tangapaggammungán ta umay ira ta gián na. ¹⁸ Á labbè da ta Mileto, kinagi ni Pablo nira, “Síkayu nga taga Epeso, ammu naw yù kustombarè níkayu ta kággággaw sù paggiák ku níkayu áddè ngaw sù labbè ku ta purubinsia na Asia. ¹⁹ Tumulukà nga masserbi kâ Apu, á aringá nallálâ ta passerbi kuna. Á inattamáku lá yù jigá ku, mássiki nu nepallá yù daddam ku megapu sù ira Kudío nga mangigagángay níkán. ²⁰ Awán bulubugá ta inilímak ku ta pangituddù níkayu sù bilin nga mamammapiá níkayu, ta sigidángá nga nangituddu níkayu ta paggagammungán naw ána sù ira gibbalayán naw. ²¹ Á kinagi sù ira kagittá nga Kudío ána sù ira nga ari Kudío gapay ta mabbabáwi ira ta liwiliwá da, á makipakomá ira kâ Namarò ána manguruk ira kâ Apu Kesu Kiristu.

²² “Á kunangane umayakin ta Jerusalem, ta doban nangá nayù Ikararuá ni Namarò. Á arák ku ammu yù mesimmuák ku sangaw túrin. ²³ Ngam ta ngámin nga ili nga paddagaták ku, ipakánnámmu nayù Mangilin nga Ikararuá níkán yù jigá nga naparán nga attamáku ku sangaw ána yù kapukù ku sangaw túrin ta Jerusalem. ²⁴ Ngam maguray lá yù mesimmu níkán nga jigá, mássiki nu matayá, ikáyá ku lá ta palurotak ku yù ipakuá ni Apu níkán. Ta awán ta serbi nayù inángá ku nu arák ku palurotan ngámin nga ipakuá ni Apu Kesu níkán,

nga pangilayalayâ ku sù napiá nga dámak nga meyannung sù ayâ ni Apu ána allâ na ta tatolay.

²⁵ “Á pappassapassiár ku ta gigián naw, inilayalayâ ku nikayu yù meyannung sù pamagure ni Namarò nga awán ta áddè na. Á kunangane, mánawakin, á ammu ta arán nawà masingan mángin, ta aringakin manoli saw. ²⁶ Á yáyù nga kagiak ku laguk nikayu kunangane nu egga nikayu yù tolay nga umay ta impiernu, á ure na lággapay. Arán nangà paliwatan, ²⁷ ta aringà nallálâ ta pangilayalayâ ku nikayu ta ngámin nga sinalákkuruk ni Namarò. ²⁸ Magimuguk kayu laguk, á taronán naw gapay yù ira manguruk. Sikayu yù meyárik ta mináppárak nga sinullâ nayù Mangilin nga Ikararuá ta manaron sù ira manguruk, nga meyárik ta karneru nga kukuá nayù Yápu tam. Tabarangán naw ira ta napiá ána ábbágán naw ira. Ta aggira yù tatole ni Apu Namarò, nga ginátang na sù dága nayù kukurugán nga Anâ na.

²⁹ “Á ammu gapay ta sangaw nu nánawát takayin, umay ta ággagammungán naw yù ira nga mangituddu nikayu ta siri. Meyárik ira ta simaron nga ayám nga mangnguá ta ayám nga masippâ. Á ilogò da yù ira káruán nga kábulun naw, tapè meyawáwán ira, ta awán ta allâ da nikayu. ³⁰ Á duttál yù ággaw nga ajjan yù ira mangituddu nga maggapu galâ nikayu nga manguruk, á massirisiri ira, tapè melogò yù ira tatolay nga tumuttul nira. ³¹ Á yáyù nga kagiak ku nikayu ta magimuguk kayu laguk, tapè arád da kayu ilogò. Nononopan naw yù itabarang ku nikayu ta paggiák ku nikayu ta tallu ragun, ta aringà nallálâ nga nanabarang nikayu nga katággittáday ta ággaw ána gabi, á aru yù pakkulukulé ku, gapu ta nerallâ yù allâ ku nikayu.

³² Á ipatarot takayu laguk kâ Apu Namarò. Nononopan naw yù bilin na nga meyannung sù allâ na sù ira manguruk kuna, tapè mepasigaggâ yù ángnguruk naw ána mesipâ kayu sù ira tatole na, á iyawâ na gapay nikayu yù pinarán na megapu sù ira mapasigaggâ nga mangikatalâ kuna. ³³ Á ammu naw ta awán bulubugá ta pissil ku nikayu nga kuártu naw, onu buláwán naw, onu gagámi naw. ³⁴ Ammu naw ta síkán lápay yù nattarabáku nga nagalek ta áttole mi sù ira kábuluk ku. ³⁵ Nattarabákungâ, tapè ipasingak ku nikayu yù párigán naw. Ta napiá nu maláppâ kayu nga mattarabáku gapay, tapè egga yù awayyá naw nga mangabbák sù ira makapi. Nononopan naw yù kinagi ni Apu Kesu, nga kun na, ‘Nepallâ yù pagayáyâ nayù mangiyawâ sù ira magáwák ánnè ta pagayáyâ nayù tolay nga mangalawâ.’ ”

³⁶ Á kabalín ni Pablo nga nagubobuk sù ira karakalán nayù ira taga Epeso, namalittúkak ira ngámin, á nakimállâ ira kâ Apu. ³⁷ Á inappungulád da laguk si Pablo ána inummatád da, á kinulukuletád da. ³⁸ Ta nakalò yù daddam da, nepatalugáring sù kinagi na nga arád da mángin masingan. Á ed da laguk nilúgán ta biray.

21

Ánge ni Pablo ta Jerusalem

¹ Páno mi nira, nallúgán kami laguk ta biray, á minay kami daretiu ta pugu na Kos. Á sù mekaruá nga ággaw minay kami ta pugu na Roda. Páno mi ta Roda, nakáddè kami ta ili na Patara. ² Á dung mi ta Patara, nálek mi yù tádday nga biray nga umay ta Pinisia, á yáyù nattakayám mi nga nánaw ta Patara. ³ Á pakáranni mi ta pugu na Sipro, sinalebarám mi, á nánawám mi yù pugu ta jimigi mi, á nabbiray kami daretiu ta purubinsia na Siria. Á jimingung kami ta ili na Tiro, nga pangigattágad da ta kárga na biray.

⁴ Labbè mi ta Tiro, nálek mi yù ira manguruk kâ Apu Kesu, á naggián kami nira ta tangaliguán. Á kinagi ra kâ Pablo ta ari umay ta Jerusalem, gapu ta pinalappâ nayù Mangilin nga Ikararuá nira yù mesimmu sangaw kuna nga jigâ túrin. ⁵ Á jimittál yù ággaw nga páno mi nira. Á yù ira maggagáttáwa nga manguruk ána yù ira ánâ da, binulud da kami áddè ta lawán na ili. Á namalittúkak kami ngámin ta karagátán, á nakimállâ kami kâ Apu. ⁶ Á kabalim mi nakimállâ, kinagi mi nira, “Panawám mi kayu laguk.” Á “Wan,” kud da. Á nabbiray kami nga nánaw, á nanoli ira gapay ta bale ra.

⁷ Á pabbiray mi nga naggapu ta Tiro, nakáddè kami ta ili na Tolemes. Á keggá mi ta Tolemes, em mi laguk sinullúnán yù ira nga mawwawági sù ángnguruk mi kâ Apu Kesu, á naggián kami nira ta táttangággaw. ⁸ Á sù tádday ággaw, nánaw kami nira, á minay kami ta ili na Sesaria. Á naddaretiu kami ta bale ni Pilippi. Si Pilippi yù minángngilayalayâ nga nebiláng sù ira pitu nga sinullâ da ngaw ta Jerusalem ta mangabbák sù ira mapulu duá. Á naggián kami kuna.

⁹ Á aijan yù appâ nga ânâ ni Pilippi nga bábbay nga mámmagingánay. Á minámmalappâ ira ngámin, á inubobuk da yù pinalappâ ni Namarò nira. ¹⁰ Á paggiám mi paga nira, minay yù láláki nga mangngágan ta Agabo, nga minámmalappâ gapay ta ubobuk ni Namarò, nga naggapu ta purubinsia na Judiya. ¹¹ Á minay si Agabo nikami, á inâ na yù barakâ ni Pablo, nga inigálù na ta takki na lápay ána limá na. Á kinagi na, “Yawe yù kagian nayù Mangilin nga Ikararuá, nga kunniaw sangaw yù pangigálù nayù ira Kudio sù makábbarakâ túrin ta Jerusalem, á ikeká ra sù ira ari Kudio, tapè ikarsel da,” kun na.

¹² Á pakaginná mi sù kinagi ni Agabo, sikami ána yù ira manguruk, inikomá mi kâ Pablo ta ari umay ta Jerusalem. ¹³ Á simibbák laguk si Pablo, á kinagi na, “Ngattá, ta kuletán nawà? Ta pappanatan nawà nga paddaddamán. Ta napanákin nga mebáluk, á umayà ta Jerusalem, mássiki nu papatáyad dangà megapu sù ángnguruk ku kâ Apu Kesu.” ¹⁴ Á gapu ta arám mi nakagumán ta ari umay, nattukkâ kami, á kinagi mi laguk, “Mapaluré galá yù ikáyâ ni Apu Namarò.”

¹⁵ Á kabalín na paggiám mi kári Pilippi, naggagannuá kami, á nánaw kami nga umay gumon ta Jerusalem. ¹⁶ Á nepulù nikami yù ira káruán nga manguruk nga taga Sesaria, á niyánge ra kami ta bale ni Mason, nga tolay nga taga Sipro nga manguruk kâ Apu ta nabayágin. Á yù bale ni Mason yù naggianám mi.

Pattullun ni Pablo kári Ime

¹⁷ Á pakáddè mi ta Jerusalem, nagayáyâ yù ira manguruk nga naggián ta Jerusalem megapu sù labbè mi. ¹⁸ Á sù tádday ággaw, nepulù si Pablo nikami, á em mi tullúnán di Ime. Á aijan tán gapay yù ira karakalán nayù ira manguruk kâ Apu. ¹⁹ Á kinagi ni Pablo nira, “Á kunnasi kayu, wáwwagi?” ²⁰ Á inistoriá na nira yù ngámin nga inipakuá ni Namarò kuna megapu sù pangilayalayâ na ta bilin ni Apu sù ira ari Kudio.

²⁰ Á pakaginná ra sù ngámin nga kinagi ni Pablo, naddayaráyaw ira kâ Namarò. Á kinagi ra laguk kâ Pablo, “Wagi, narámak mungin ta aijan jinibu nga Kudio sawe Jerusalem nga mangurugin kâ Apu Kesu. Á maláppâ ira ngámin nga manuppál ta napiá yù tunung ni Moyses. ²¹ Á narámak da ta ituddum kanu sù ira Kudio nga nakipaggián sù lugár nayù ira ari Kudio ta likuránád da yù ituddu ni Moyses. Á ituddum kanu gapay ta arád den ipakugi yù ira ânâ da, ána ari iren tumuttul sù kustombare tam nga Kudio. ²² Á mapporay ira támma sangaw nu marámak da ta limibbè ka saw. Anni laguk yù akkuát tam, tapè mánnámmuád da ta ari kuruk yù narámak da nga meyanung sù ituddum?

²³ “Á kunniaw laguk yù ipakuá mi nikaw, á napiá nu kurugam mu yù kagiam mi, tapè arád da ka paliwatan megapu sù kustombare tam. Aijan nikami yù appâ nga láláki nga Kudio, nga nakitarátu kâ Namarò, á balínad da kunangan yù initabbá ra kuna. ²⁴ Mepulù ka nira laguk nga umay sù mangilin nga kapilliá, tapè tuppálan naw yù kustombare tam nga mamakarenu ta baggi naw. Á sikaw yù mappagá sù iyátáng da, tapè mappakálbu ira ta panákkilalán ta sinuppál den yù initabbá ra. Á yáyù nga mánnámmuán nayù ira tatolay ta awán ta kukurugán sù narámak da nga meyanung nikaw, nu ari galá ta tuttulam mu gapay yù tunung ni Moyses.

²⁵ “Á ta meyanung sù ipakuá mi sù ira ari Kudio nga manguruk kâ Apu Kesu, initúra mi nira, á arám mi nira kinagi ta tuttulad da yù kustombare tam nga Kudio. Ngam yawe lâ yù kinagi mi sù túrá mi ngaw nira, ta arád da kanan yù neyátáng ta sináddios, á arád da kanan yù dága ána yù ayám nga ari napanága, á ari ira makiruruk sù arád da atáwa. Yáyù lá kinagi mi sù ira ari Kudio,” kud di Ime kâ Pablo.

²⁶ Á sù tádday ággaw, binulun na laguk ni Pablo yù ira appâ nga tolay, á pinaluré da yù kustombare ra nga meyanung ta pitu nga ággaw nga pamakarenu ra nga Kudio. Á minay laguk si Pablo sù mangilin nga kapilliá, tapè ipakánnámmu na sù pári yù ággaw nga kabalín nayù pamakarenu ra ána yù pangiyawá da sù meyátáng megapu nira nga katággitádday.

Paggápù da kâ Pablo

²⁷ Á naddaggun nga nappasá yù pitu nga ággo nayù pamakarenu ra, á yù ira Kudio nga taga Asia, nasingad da si Pablo sù mangilin nga kapilliá. Á initotobù da si Pablo sù ira magari nga tatolay, á ginápù da si Pablo. ²⁸ Á nakkatakátol ira nga kud da, “Sikayu nga kagittá mi nga ginaká ni Israel, en naw kami ábbágán! Aijan saw yù tolay nga mangituddu sù mekontará nittam ána yù mekontará sù tunung ni Moyses, á ituddu na gapay yù mekontará sù mangilin nga kapilliá. Á yaw paga yù liwâ na, ta pinatallung na saw yù ira ari Kudio, á yáyù nga jinapingán na yù mangilin nga kapilliá!” ²⁹ Yáyù kinagi ra gapu ta

nasingad da di Pablo ta ili nga mappulupulú kâ Taropimo nga taga Epeso. Á kagiad da ta pinatallung ni Pablo si Taropimo ta kapilliá gapay, ngam ari ga.

³⁰ Á nappatapátu yù ira tangelián nga naggugúru ta kapilliá. Á ginápù da si Pablo, á ginuggud da nga iniyángay ta lawán na kapilliá. Á dagarágâ inilitù da yù puertá na. ³¹ Á papatáyád da nakuan si Pablo, ngam nakarámak yù kátannangán nga kapitán na suddálu nga taga Roma ta maggugúru yù ira tangelián na Jerusalem, nga mamapátay. ³² Á inagálán na yù ira aru nga suddálu ána yù ira kapitád da, á nakarerá ira nga minay sù ira magaru.

Á pakasingan nayù ira tatolay sù kátannangán nga kapitán ána yù ira suddálu ána yù ira kapitád da, nattukkâ ira nga manultù kâ Pablo. ³³ Á jimikkì yù kátannangán nga kapitán kâ Pablo, á ginápù na. Á inipegálù na ta duá nga káwák. Á iniyabbù na laguk sù ira tatolay yù ngágan na ána anni yù liwá na. ³⁴ Ngam nakkakerumá yù inikatakátol da. Á gapu ta kitatannuk ira, arán na kánnámmuán yù ipamaliwá da kuna. Á yáyù nga jinok na yù ira suddálu ta iyángo ra si Pablo sù kámpu ra. ³⁵ Á pakáddè da ta áddán na paggianád da, kinátu nayù ira suddálu si Pablo, tapè ililli da sù pore nayù ira magaru, ³⁶ gapu ta sinuttal da ira nayù ira magaru nga maggugúru paga ána makkatakátol, nga kud da, “Papatáyat tamin!”

³⁷ Á paddaggud da pangitallung kâ Pablo ta paggianád da, kinagi ni Pablo sù kátannangán nga kapitán, “Anugutam mà bi, ta aijan yù kagiak ku nakuan nikaw.” Á nakaddák yù kapitán, gapu ta Gareko yù ággubobuk ni Pablo ta pagubobuk na kuna. Á kinagi nayù kapitán kâ Pablo, “Ammu yù ággubobuk na Gareko?” ³⁸ Ari sikaw laguk yù laláki nga taga Egipto? Ta kagiak ku ta sikaw yù namappatapátu ána nangituluk ta appátaribu nga tulisán nga nagármas túrin ta kalállamátán!” kun nayù kapitán. ³⁹ Á kinagi ni Pablo kuna, “Ari sikán, ta Kudiongá nga taga Tarsu, nga dakal nga ili sù purubinsia na Silisia. Á ikomá bi nikaw ta anugutam mà nga makiubobuk sù ira tatolay.” ⁴⁰ Á inanugù nayù kapitán. Á nanáddak si Pablo laguk ta áddán, á inítáyák na yù limá na, tapè magimammá yù ira tatolay. Á pagimammá da, nagubobuk si Pablo ta Kebru, nga ággubobuk na Kudio.

22

Yù Panabbák ni Pablo sù ira Kudio

¹ “Sikayu nga giriámán ána wáwwagi,” kun ni Pablo sù ira magaru nga Kudio, “ginnán naw bi yù itabbák ku nikayu.” ² Á pakaginná ra sù ággubobuk da nga Kebru, nagimammá ira, tapè ginnád da ta napiá. Á kinagi ni Pablo, ³ “Sikán, Kudiongá. Á yù ili na Tarsu yù neyanaták ku sù purubinsia na Silisia. Á yawe ili na Jerusalem yù naddakalák ku. Á naggiámmungá saw, á si Gamaliel yù nangituddu níkán. Inituddu na ta napiá yù ngámin nga tunung nayù ira ngaw naggaká nittam. Á maláppakâ nga manuppál sù ipakuá ni Namarò níkán, nga kunnay nikayu saw kunangane.

⁴ “Á jinigirigá ku yù ira manguruk kâ Kesu, áddè ta pate nayù ira káruán. Á ginápù ku yù ira káruán, nga láláki ána bábbay, á inipebáluk ku ira. ⁵ Á yù kotunán na pári ána yù ira giriámán, aijan yù awayyá ra nga massístigu ta kuruk yù kagiak ku, ta aggira gemma yù nangiyawá níkán ta túrá da sù ira wáwwagi tam nga Kudio túrin ta Damasku. Á yáyù iniyángè túrin, ta ek ku gaputan ána ipabáluk yù ira manguruk kâ Kesu, nga ilabbè ku sangaw saw Jerusalem, tapè maparigá ira.

⁶ “Á pappángè ku ta Damasku, mináraningá ta ili ta tangngá na ággaw. Á inikáddagâ lâ nanawagáná megapu sù nawák nga naddalingárang nga naggapu ta lángi. ⁷ Á napalakagá, á naginná yù ngarál nga magubobuk níkán, nga kun na, ‘Saulo, Saulo, ngattá ta iddá mà lâ jigirigátan?’ ⁸ Á simibbágá, á kuk ku, ‘Asinni ka, Apu?’ Á kinagi na níkán, ‘Sikán si Kesu nga taga Nasaret nga iddá mu lâ jigirigátan.’ ⁹ Á yù ira kábuluk ku, nasingad da yù nawák nga maddalingárang, ngam arád da naginná yù magubobuk níkán. ¹⁰ Á iniyabbù ku kuna, ‘Apu, anni yù ipakuám níkán?’ Á kinagi ni Apu níkán, ‘Gumikkáng ka, á umay ka ta Damasku, ta mepakánnámmu nikaw tán yù ngámin nga ipakuá nikaw.’ ¹¹ Á gapu ta nabbulingá megapu sù paddalingárang nayù nawák, kinering dangá nayù ira kábuluk ku, á iniyángo rangá ta Damasku.

¹² “Á naggián ta Damasku yù tolay nga mangngágan ta Ananiá, nga tumuttul sù ngámin nga tunung tam nga Kudio. Á aggina yù pakimorayán nayù ira ngámin nga Kudio nga maggián ta Damasku. ¹³ Á minay si Ananiá nga jimikkì níkán, á kinagi na níkán, ‘Saulo nga wagi, makasingan ka mángin.’ Á dagarágâ nakasinganakin, á nasingak ku si Ananiá. ¹⁴ Á kinagi na níkán, ‘Si Namarò nga pakimorayán nayù ira naggaká nittam, sinullá na

ka, tapè sikaw yù pangipakánnámmuán na sù ipakuá na. Á yáyù nga sinalákkuruk na ta sikaw yù makasingan sù Katunungán nga masserbi kuna, ána sikaw yù makaginná sù ubobuk na. ¹⁵ Ta sikaw yù doban na ta mangipakánnámmu sù ngámin nga nasingham mu ána naginnám ta ngámin nga tatolay. ¹⁶ Á anni laguk yù iddagám mu? Arà! Gumikkáng ka, á makimállà ka kâ Apu Kesu nga Yápum, tapè pakomán na ka sù liwiliwá mu, á mapparigú ka, nga panákkilalán ta pangikatalá mu kâ Apu, kun ni Ananiá nikán.

¹⁷ “Á labbé ku ta Jerusalem, minayá nakimállà sù mangilin nga kapilliá. Á pakimállà ku sù kapilliá, ¹⁸ nappasingan nikán si Apu, á kinagi na nikán, ‘Arà! Alistuám mu mánaw sawe Jerusalem, maraké akkuád da ka nayù ira Kudío, ta arád da kurugan yù kagiam mu nira nga meyanung nikán,’ kun na nikán. ¹⁹ ‘Apu,’ kuk ku kuna, ‘kurugad dangá támma, ta ammu ra ta minayá ta ngámin nga kapilliá, á ginapagápù ku yù ira nga manguruk nikaw, á inibáluk ku ira ána pinalapalù ku ira. ²⁰ Á sù pamapáte ra kâ Esteban megapu sù pangilayalayá na ta meyanung nikaw, nanáddagá nga naggíraw sù pate na, ta inanugú ku yù kingnguá ra ána sinaronák ku yù barawási nayù ira nga namapátay kuna,’ kuk ku kâ Apu. ²¹ Ngam kinagi ni Apu nikán, ‘Mánaw ken laguk, ta dobat taka kunangane ta umay ka mangilayalayá sù bilik ku sù ira ari Kudío ta arayyu nga lugár,’ kun na.”

²² Á yù ira magaru nga Kudío, nagginná ira sù kinagi ni Pablo. Ngam ta pakaginná ra ta ánge na sù ira ari Kudío, naporray ira, á pine ra nagagga-aggay, nga kud da, “Papatáyat tam laguk, ta awán ta kepángngatán na nga matolay.” ²³ Á iniwawwák da yù barawási ra ána nagagga-aggay ira. Á iniwári da yù káppù na dалан ta utun, gapu ta kataki na nonò da.

Yù Keyarubáng ni Pablo sù Kapitán na Suddálu nga taga Roma

²⁴ Á yù kátannangán nga kapitán na suddálu, pakasingan na sù pore nayù ira Kudío, pinatallung na si Pablo ta pagganád da. Á jinok na yù ira suddálu ta paligatad da si Pablo, tapè palappátan na nira yù liwá na nga ipappore nayù ira tatolay. ²⁵ Ngam ta pangigakká da kâ Pablo, lage ra kuna mamaligá, nagubobuk si Pablo sù gadde nayù kapitán nga nanáddak ta aranni kuna, á kinagi na, “Awayyá naw panò mappaligá sù tolay nga taga Roma nga ari paga nabestigán?” ²⁶ Á pakaginná nayù kapitán ta taga Roma si Pablo, en na kinagi sù kátannangán nga kapitád da, “Anni laguk yù akkuát tam, ta taga Roma yawe tolay.” ²⁷ Á minay laguk yù kátannangán, á iniyabbù na kâ Pablo, “Kuruk nga taga Roma ka?” “Wan, kuruk,” kun ni Pablo. ²⁸ Á kinagi nayù kátannangán, “Aru yù ginástu ta papel nga permá, tapè mebilángá sù ira taga Roma.” Á simibbák si Pablo, á kinagi na, “Ngam sikán, yáyù nakeyanaták ku.” ²⁹ Á yù ira suddálu nga mággè mamaligá kuna, pakaginná ra ta kuruk nga taga Roma si Pablo, dagarágá nga nánawád da. Á naburung gapay yù kátannangán nga kapitán, ta pakánnámmu na ta taga Roma si Pablo, ta yù kapitán gemma yù naddok sù ira suddálu nga nangigakká kuna.

Si Pablo ta Arubáng nayù ira Minámmannù

³⁰ Á gapu ta kuruk nga ikáyá nayù kátannangán nga kapitán paga nga kánnámmuán yù ipangikeká nayù ira Kudío kâ Pablo, á sù tádday ággaw pinaggagammung na yù ira kátannangán nga pári nga Kudío ána yù ira ngámin nga giriámán nga minámmannù. Á pinalawán na si Pablo, nga iniyarubáng na nira.

23

¹ Pakiarubáng ni Pablo sù ira Kudío nga minámmannù, inimámmatán na ira ta napiá, á kinagi na, “Wáwwagi, ammu ni Namarò ta napiá yù nonò ku áddè kunangane, ta awán bulubugá ta naraké nga kingnguá,” kun ni Pablo sù ira minámmannù. ² Ngam si Ananiá nga kotunán na pári, pakaginná na sù kinagi ni Pablo, inipalappák na sù ira nanaging kuna. ³ Á kinagi ni Pablo kuna, “Kunnian gapay ipalappák na ka ni Namarò sangaw, sikaw nga agippipiá. Mamanunnù ka nikán ta meyanung sù tunung ni Namarò nakuan, ngam nakaliwatám mu galá yù tunung ta inipalappák mà,” kun ni Pablo kuna. ⁴ Á yù ira nga nanaging kâ Pablo, kinagi ra kuna, “Ngattá, ta pakkakagiám mu yù kotunán na pári?” ⁵ Á kinagi ni Pablo nira, “Wáwwagi, arák ku ammu ta aggina yù kotunán na pári! Á nu ammu nakuan, arák ku nakuan sibbák, ta aijan yù netúrâ sù libru ni Namarò nga kunniaw, ‘Ari kayu magubobuk ta naraké nga meyanung sù mammaguray nikayu.’”*

⁶ Á inikáddagá na lâ natákál si Pablo ta dumá yù sinuttul nayù ira káruán nga minámmannù, ta aijan yù ira Sadiusio, á Parisio yù ira káruán. Á inikátol na yù kinagi na nira, “Wáwwagi! Sikán, á Parisiongá, ána Parisio gapay yù ira darakal ku. Á yáyù nga

* 23:5 Exodo 22:28

mangurugá gapay ta paginnanolayan ni Namarò yù ira námmatay. Á yáyù ipangikeká ra níkan ta arubáng naw.”

⁷ Á pakkagi ni Pablo ta aggina lápay yù Parisio, dagarágâ nga nakkakátabbák yù ira Parisio ána yù ira Sadusio, gapu ta massisinná ira ta nonò. ⁸ Ta yù ira Sadusio, kagiad da ta ari maginnanolay yù ira námmatay. Á kagiad da gapay ta awán ta ari masingan nga daroban ni Namarò onu tanakuán nga ari masingan, ána awán ta ikararuá na tolay. Ngam yù ira Parisio, ammu ra ngámin dannian. ⁹ Á yáyù nga makkakápereperang ira ta ubobuk, ta kagumánad da nakuan yù ira káruán. Á kitatannuk ira ngámin nga magubu-ubobuk. Á gimikkáng laguk yù ira káruán nga mesturu, nga Parisio yù tuttulad da, á kinagi ra, “Arám mi nálek yù liwá nayù tolay. Ajjan támma yù ari masingan nga nagubobuk kuna.” ¹⁰ Á nappaná yù paddaráma ra, á naburungin yù kapitán nayù ira suddálu, maraké pissipissángan nayù ira tatolay si Pablo. Á jinok na laguk yù ira suddálu ta ed da gubatan si Pablo, ta ililli da nga iyángay ta kámpu ra.

¹¹ Á ta gabi, nappingan si Apu Kesu kâ Pablo. Á kinagi na kuna, “Ari ka maganássing. Patagatam mu yù nonò mu, ta umay ka sangaw mangilayalayâ ta meyannung níkan sù ili na Roma, ta kunnay ta pangilayalayâ mu sawe ili na Jerusalem.”

Pangigagánge nayù ira Kudio kâ Pablo

¹² Á ta pannawák, naggagammung yù ira Kudio nga nangigagángay nu kunnasi yù ámmápáte ra kâ Pablo. Á nappagássingán ira ta ari ira kumán onu ámminum áddè ta arád da paga napapátay si Pablo. ¹³ Á matturù ta appátapulu yù ira nattatarátu. ¹⁴ Á minay ira sù ira kátannangán nga pári nayù ira Kudio ána sù ira giriámán. Á kinagi ra, “Napasigaggá yù pagássingám mi ta ari kami kumán nu arám mi paga napapátay si Pablo. ¹⁵ Á sikayu ána yù ira minámmannunù, sestemán naw laguk nga ipeyángay si Pablo kâ kapitán sawe ámmanunnután, ta kunnay ta bestigán naw paga. Ngam maggián kami ta aggik na dалан nga napanán nga mattanak kuna nga mamapátay,” kud da nira.

¹⁶ Á aijan yù kánakan ni Pablo, nga aná na wagi na nga babay, á narámak na ta tanabád da sangaw si Pablo ta dалан. Á minay laguk kâ Pablo sù kámpu ra, ta iránuk na kuna. ¹⁷ Á inagálán ni Pablo yù tádday nga kapitán, á kinagi na kuna, “Iyángem bì yawe bagitolay sù gián nayù kapitám mu, ta aijan yù iránuk na kuna.” ¹⁸ Á iniyánge na laguk sù kátannangán na, á kinagi na kuna, “Si Pablo nga nebáluk, ipeyánge na níkan yawe bagitolay níkaw, ta aijan kanu yù kagian na níkaw.”

¹⁹ Á kinering nayù kapitán yù bagitolay, á nallilli ira ta baddi. Á iniyabbù na kuna, “Anni yù iránuk mu níkan?” ²⁰ Á kinagi nayù bagitolay sù kapitán, “Yù ira Kudio, nattatádday yù nonò da nga ipeyánge ra níkaw si Pablo sangaw nu ummá ta umay túrin ta ámmanunnutád da, á kagiad da níkaw ta ikáyâ da bestigán paga ta napiá. ²¹ Ngam arám mu ira kurugan, ta aijan matturù ta appátapulu ira nga magiddak nga mattanak kuna ta dалан. Nappagássingán ira ta ari ira kumán onu ámminum áddè ta arád da paga napapátay si Pablo. ²² Á napanán iren nga mattanak. Á iddagád da lâ yù kagam mu.” ²² Á kinagi nayù kapitán sù bagitolay, “Arám mu kakágian ta inipakánnámmum níkan.” Á pinapáno na laguk yù bagitolay.

Ketuluk ni Pablo kâ Gubinator Pelik ta Sesaria

²³ Á ta kapapáno nayù bagitolay, inagálán nayù kátannangán nga kapitán yù duá nga kapitán, á kinagi na nira, “Paránan naw yù duá gatù nga suddálu ána pitupulu nga makkabáyu ána duá gatù nga nagármas ta duppil. Á mánaw kayu sangaw nu gabi nu alas nuebi nga mangiyángay kâ Pablo ta ili na Sesaria. ²⁴ Á pakkabáyuan naw gapay si Pablo. Á taronán naw ta napiá, tapé awán ta mesimmu kuna áddè ta ilabbè naw túrin kâ Gubinator Pelik,” kun nayù kátannangán nga kapitán.

²⁵ Á iníturá nayù kátannangán nga kapitán gapay yù iránuk na kâ Gubinator, nga inittubbuk na sù ira suddálu. Yawe iturá na. ²⁶ “Sikán nga matturá si Kalodio Lisias. Á iturá ku níkaw, Gubinator Pelik, nga Maráyaw nga Gubinator. Á kunnasi kayu laguk? ²⁷ Á yawe tolay nga dobak ku níkaw, aggina yù ginápù nayù ira Kudio sangù, á papatáyad da nakuan. Á pakánnammù ta taga Roma yù tolay, jimittálà nga mepulù sù ira suddálu, á iniyígù ku tapé ari matay.

²⁸ Á ikáyâ ku nga mánnámmuán yù pangikeká ra kuna. Á yáyù nga iniyángè laguk sù ámmanunnután nayù ira Kudio. ²⁹ Á nánámmuák ku galá ta awán ta liwá na, á ari mepángngà nu mapapátay onu mebáluk. Yá ipappore ra galá kuna yù meyannung sù tunung da. ³⁰ Á pakaginná ta aijan yù ira mangigagángay kuna nga mattanak nga mamapátay kuna,

dagarágá nga inipeyángè nikaw. Á kinagi gapay sù ira mamaliwâ ta umay ira mangikeká ta arubáng mu.” Yáyù áddè nayù túrà nayù kapitán sù Gubinador.

³¹ Á yù ira suddálu, kinuruk da yù inittaddán nayù kapitán, á inituluk da si Pablo ta ili na Antipatris tán nga gabi. ³² Á ta pannawák, á yù ira suddálu nga nappatalay, nattoli ira ta kámpu ra ta Jerusalem, á nabattáng yù ira suddálu nga makkabáyu, ta aggira yù mangituluk kâ Pablo sù Gubinador.

³³ Á labbè da ta Sesaria, iniyawâ da sù Gubinador yù túrà nayù kapitán ána iniyawâ da gapay kuna si Pablo. ³⁴ Á pabbibbik nayù Gubinador sù túrà, iniyabbù na kâ Pablo nu anni yù purubinsia na. Á “Silisia,” kun ni Pablo. ³⁵ Á kinagi na laguk kâ Pablo, “Bestigát taka sangaw nu lubbè yù ira mangikeká nikaw.” Á inipaguárdiá na si Pablo sù palásiu nayù ngaw Patul Erodo.

24

Pangikeká nayù ira Kudio kâ Pablo

¹ Á paggián ni Pablo ta Sesaria ta límá nga ággaw, á limibbè di Ananiâ nga kotunán na pári ána yù ira káruán nga giriámán, ána yù abugádu nga mangngágan ta Tertulo. Á minay ira sù Gubinador, ta ikeká ra si Pablo. ² Á inipeyarubáng da laguk kâ gubinador si Pablo, á si Tertulo nga abugádu yù magubobuk.

Á namegapu si Tertulo nga mangiránuk sù ipangikeká ra kâ Pablo. Á kinagi ni Tertulo, “Maráyaw nga Apu Gubinador Pelik, magimammâ kami nga maggián sawe purubinsia megapu sù napiá nga pammagurem nikami. Á aru yù ira tunung nga inulim ta napiá megapu nikami, tapè mampapiá yù ágga-ággiam mi. ³ Á sikami ngámin, tákkilálám mi ta napiá yù ángngabbák mu nikami ta ngámin nga lugár, á nepallá yù pabbalabálá mi nikaw ta kággággaw.

⁴ “Á arám mi ikáyâ ta mataláttán ka, á ikomá lá nikaw ta pasensían kami bì, tapè ginnám mu yù pangikeká mi sawe tolay. ⁵ Ta ammu mi ta aggina yù mamappatapatu sù ira Kudio ta ngámin nga lugár, tapè maddaráma ira. Á aggina yù maddok sù ira tatolay nga tumuttul sù inittuddu nayù tolay nga taga Nasaret. ⁶ Á dapingan na nakuan yù mangilin nga kapillíá, ta akkuán na nakuan yù ari mepángngá. Ngam ginápù mi, á gapu ta nalliwâ sù kustombare mi, panunnutám mi nakuan ta kunnay sù ittuddu nayù tunung mi. ⁷ Ngam minay si Kapitán Lisias, á ginubâ na nikami. ⁸ Á sinaddánán na kami ta umay kami mangikeká ta arubáng mu. Á nu bestigám mu lápay, mánnámmuám mu lággapay yù ngámin nga liwâ na nga ipangikeká mi kuna,” kun nayù abugádu sù Gubinador. ⁹ Á yù ira ngámin nga Kudio nga kábulun nayù abugádu, nakiuwan ira ta kuruk ngámin yù kinagi na.

Yù Panabbák ni Pablo ta Arubáng ni Gubinador Pelik

¹⁰ Á pinayápayán na laguk nayù Gubinador si Pablo ta magubobuk nga tubbák nira. Á kinagi ni Pablo, “Apu Gubinador, ammù ta sikaw yù mamananunú sawe purubinsia mi nga Kudio ta nabayágin nga dagun, á yáyù nga magayáyákà nga tubbák sù pangikeká ra níkan ta arubáng mu. ¹¹ Á nu damágam mu nira, ari gemma natturú ta mapulu duá nga ággaw ngaw yù ángè ta Jerusalem, tapè makimorayá kâ Namarò ta mangilin nga kapillíá. ¹² Á arád dangá gemma naratang nga makiriri sù ira tatolay, á arák ku ira gapay pappatapatuan ta ili onu sù mangilin nga kapillíá onu sù ira ngámin nga káruán nga ággagammungád da. ¹³ Á awán gapay ta mepasingad da, tapè pasikkálám mu nu kuruk yù ipangikeká ra níkan.

¹⁴ “Ngam yaw lá ipalappá ku nikaw, ta kuruk nga makimorayá kâ Namarò nga pakimorayan nayù ira naggaká nikami. Á kurugak ku yù inittuddu ni Apu Kesu, nga kagiad da ta ari kuruk. Á kurugak ku gapay yù ngámin nga tunung ni Moyses ána yù initúrá nayù ngaw ira ábbilinán ni Namarò. ¹⁵ Á ajjan yù iddanamák ku nga kunnay sù iddanamád da gapay nayù ira mangikeká níkan, nga paginnanolayan ni Namarò yù ira ngámin nga námmatay, mássiki yù ira napiá ána yù ira narákè gapay. ¹⁶ Á yáyù nga magimugugá, tapè napiá lá yù akkuák ku megapu sù ira tatolay, á aringá mappasirán ta arubáng ni Namarò ána yù ira tatolay.

¹⁷ “Á nabayágin nga aringá minay ta Jerusalem. Á yáyù nga minayá, tapè ituluk ku yù ilimù mi sù ira ikáttole mi nga pobare ána mangiyátángá kâ Namarò. ¹⁸ Á keggá sù mangilin nga kapillíá, narángnganád dangá nga napakarenuánin, ta namalurokakin sù kustombare mi. Á awán ta magari nga tatolay nga namulupulú níkan, á awán ta pinappatapatú.

¹⁹ “Ngam aijan tán yù ira Kudio nga taga Asia, á nu egga nakuan yù liwâ ku nga ikáyâ da nga ipangikeká níkán, aggira nakuan yù minay ta arubáng mu. Ngam awán nira nga minay saw ta mangikeká níkán. ²⁰ Á yáyù nga ipobobuk mu sù ira minay, ta ammu ra gapay ta awán ta nálek da nga liwâ ku ta keyarubáng ku sù ira minámmannùnù ta Jerusalem. ²¹ Ta yawe lâ ipangikeká ra níkán, yù inikátol ku ta arubáng da ta pamestigá ra níkán. Ta inikátol ku nga kinagi nira, ‘Mangurugá gapay ta paginnanolayan ni Namarò yù ira námmatay.’ ” Yáyù áddè nayù inittabbák ni Pablo kâ Gubinador Pelik.

²² Ngam aru yù nánámmuán ni Gubinador Pelik nga meyanung sù inittuddu ni Apu Kesu Kiristu, á yáyù nga inipappáná na yù ira mangikeká. Á kinagi na nira, “Sangaw nu lubbè si Kapitán Lisias, balinak ku yù pamestigá kâ Pablo.” Á pinapáno na ira. ²³ Á kinagi na laguk sù kapitán ta ipaguárdiá na si Pablo, ngam kunnay lâ ta álliuk, nga arán na pukutan. Á kinagi na gapay ta arán na ipugik yù ira kákkopun na nga umay mangituluk sù awágan na.

Yù Keyarubáng ni Pablo kâri Pelik kâ Durusila

²⁴ Á ari nabayák, á minay si Gubinador Pelik nga nepulù kâ Durusila nga atáwa na. Á Kudio si Durusila. Á inipágál da si Pablo, tapè ginnád da yù kagian na nga meyanung sù ángnguruk na kâ Apu Kesu Kiristu. ²⁵ Á nagubobuk si Pablo gapay ta meyanung sù napiá nga ipakuá ni Namarò ta tolay ána yù máwák na tolay nga gaggarán yù baggi na, nga ari tumulù sù karagá na nga narákè, á kinagi na gapay yù meyanung sù ággaw nga duttál sangaw nga pamanunnù ni Namarò ta ngámin nga tatolay. Á pakaginná ni Pelik, naganássing ána naburung, á kinagi na kâ Pablo, “Kustungin. Awayyám nga mánaw laguk. Agálát taka má sangaw nu matángngák ku.” ²⁶ Ta ikáyâ ni Pelik gapay nu iddán na nakuan ni Pablo ta kuártu, á yáyù nga sigidá inipágál na si Pablo ta makiubobuk kuna.

²⁷ Á ta pappasá na duá ragun, napatalián si Pelik nga gubinador, á si Porsio Pesto yù táli na. Á gapu ta inikáyâ ni Pelik nga pagayáyan yù ira Kudio, yáyù nga inibattáng na si Pablo sù ábbaluran.

25

Yù Keyarubáng ni Pablo kâ Gubinador Pesto

¹ Á jimittál laguk si Pesto ta Sesaria, nga maggubinador ta purubinsia na. Á pappasá na tallu nga ággaw, minay si Pesto ta Jerusalem. ² Á keggá na ta Jerusalem, minay kuna yù ira kátannangán nga pári ána yù ira makáwayyá nga Kudio, ta ikeká ra si Pablo. ³ Á inikomá ra kâ Pesto ta ipeyalí na si Pablo ta Jerusalem. Yáyù lâ kinagi ra kâ Pesto, nga sessistemá ra lâ, ta igagánge ra nga tanabán nga papatáyan si Pablo ta dалан. ⁴ Ngam simibbák si Pesto, á kinagi na nira, “Aijan si Pablo nga napukù ta Sesaria, á manolingá sangaw tû. ⁵ Mepulù kayu laguk níkán, sikayu nga makáwayyá, ta túrin lâ yù pangikekán naw kuna nu egga yù liwâ na,” kun nayù gubinador nira.

⁶ Á naggián nira paga si Gubinador Pesto ta Jerusalem ta matturù nga tangaliguán, á nanoli ta Sesaria. Á sù tádday ággaw, nagitubang ta ámmannunnután, á inipeyánge na si Pablo ta arubáng na. ⁷ Á labbè ni Pablo ta ámmannunnután, niletungán nayù ira Kudio nga taga Jerusalem, nga mangikeká kuna ta aru nga narákè, ngam awán ta ipasingad da kâ gubinador, tapè ammu na nu kuruk yù kinagi ra kuna.

⁸ Á simibbák laguk si Pablo, á kinagi na, “Awán bulubugá ta liwâ ku sù tunung mi nga Kudio onu sù mangilin nga kapilliá onu kâ Patul Sisar ta Roma.” ⁹ Ngam si Pesto, gustu na mamagayáya sù ira Kudio, tapè makikopun ira kuna, á yáyù nga iniyabbù na kâ Pablo, “Ikáyâ mu panò nga umay ta Jerusalem, tapè panunnutát taka tán ta meyanung sù ipangikeká ra nikaw?”

¹⁰ Á simibbák laguk si Pablo, á kinagi na sù gubinador, “Aijanà gemma sawe arubáng mu. Á yawe lâ yù ámmannunnután ni Patul Sisar, á sikaw gemma yù sinullà na nga mamanunnù. Awán ta liwâ ku sù ira Kudio, á yáyù gemma ammun ta napiá. ¹¹ Á nu egga nakuan yù liwâ ku, nga awayyám nga ipamapáte níkán, itulù ku nakuan yù baggi nikaw. Ngam ari gemma kuruk yù pangikeká ra níkán, á yáyù nga awán ta tolay nga makáwayyá nga mangiyawâ níkán nira. Á ikáyâ ku laguk ta umayá makipanunnù kâ Patul Sisar,” kun ni Pablo kâ Gubinador Pesto. ¹² Á kabalín ni Pesto nakiubobuk sù ira kábulun na nga mamanunnù, kinagi na kâ Pablo, “Kinagim ta makipanunnù na kâ Patul Sisar, á ággina laguk yù mamanunnù nikaw. Ipeyánge taka sù gián na.”

Yù Keyarubáng ni Pablo kâri Patul Agripa kâ Bernis

¹³ Á pappasá na tangaligguán támma onu matturù ta baddi, limibbè ta Sesaria di Patul Agripa kâ Bernis, ta ed da tullúnán si Gubinator Pesto ta kabagu na nga naggubinator. ¹⁴ Á gapu ta naggián ira ta nabayák, kinagi ni Pesto sù patul yù meyanung kâ Pablo, nga kun na, “Ajjan saw yù tolay nga inibattáng ni Pelik nga inibáluk na. ¹⁵ Á ta keggâ ta Jerusalem, kinagi nayù ira kátannangán nga pári nga Kudío ána yù ira giriámán yù meyanung kuna, á gustu ra ta pagikaruak ku ta patay. ¹⁶ Ngam kinagi nira, ‘Ari yù kustombare mi nga taga Roma nga mamanunnù ta tolay nu ari bi olu makiarubáng sù ira mangikeká kuna, tapè tabbagan na yù pangikeká ra kuna,’ kuk ku nira.

¹⁷ “Á sù ánge ra saw, arák ku inipappáná yù pamanunnù ku kuna. Sù tádday ággaw, nagitubangá sù ámmanunnután, á inipágál ku yù tolay ta meyarubáng nikán. ¹⁸ Á panáddak nayù ira mangikeká kuna ta arubáng ku, kagiak ku ta ikeká ra támma megapu ta narákè nga kingnguá na. Ngam awán ta kinagi ra nga kuruk nga liwâ na. ¹⁹ Yá lá ipappore ra kuna ta nakkakápereperang ira ta meyanung ta ángnguruk da sù kustombare ra nga Kudío ána yù meyanung sù ngaw tolay nga natay nga mangngágan ta Kesu, nga kinagi ni Pablo ta naginnanolayin.

²⁰ “Á gapu ta arák ku ammu mamestigá sù meyanung ta kustombare ra, iniyabbù ku kâ Pablo nu gustu na umay ta Jerusalem, tapè yáyù pamanunnuták ku kuna. ²¹ Ngam molang si Pablo, ta gustu na maggián lá saw nga maguárdián, tapè si Patul Sisar yù mamanunnù kuna. Á yáyù ipaguárdiá áddè ta arák ku ipeyángay kâ Patul Sisar,” kun ni Gubinator Pesto kâ Patul Agripa. ²² Á kinagi ni Patul Agripa kâ Pesto, “Ikáyá ku gapay nakuan tángngagan yù kagian nayù tolay.” Á kinagi ni Pesto sù patul, “Á ginnám mu sangaw nu ummá,” kun na.

²³ Á ta tádday ággaw, nabbisti di Patul Agripa kâ Bernis, á nammártiá ira nga minay ta ámmanunnután nga nappupúlú sù ira kapitán na suddálu ána yù ira maríku nga makáwayyá ta ili. Á ta paddok ni Gubinator Pesto, iniyánge ra si Pablo ta arubáng da. ²⁴ Á kinagi ni Gubinator Pesto, “Patul Agripa ána sikayu ngámin nga kábulun na saw, innan naw yù tolay ta napiá. Ngámin yù ira Kudío nga ajjan ta Jerusalem ána yù ira nga maggián sawe ili tam gapay, ikeká ra, ána ikatakátol da nga kagian ta ipapapátè, ta ari kanu mepángngá nga matolay. ²⁵ Ngam pamestigá kuna, awán ta liwâ na nga nálek ku nga ipapapátè kuna. Á gapu ta umay makípanunnù kâ Patul Sisar, yáyù nga ipeyángè sangaw kâ Patul Sisar.

²⁶ “Ngam arák ku ammu yù iránuk ku nga itúrâ sù yápù nga meyanung sù tolay. Á yáyù gapu na nga iyarubáng ku nikayu, talugáring nikaw, Patul Agripa, tapè bestigám mu gapay, á kagiam nu nikán yù ipamaliwâ da kuna, nga itúrâ ku kâ Patul Sisar ta Roma. ²⁷ Ta ari mepángngá ta urè nu ipeyángè yù nebáluk kâ Patul Sisar, nu arák ku gapay kagian yù liwâ na nga pangikeká ra kuna,” kun ni Gubinator Pesto.

26

Panabbák ni Pablo sù Pangikeká ra ta Arubáng ni Patul Agripa

¹ Á pamegapu ni Patul Agripa mabbestigá kâ Pablo, kinagi nayù patul kuna, “Anugutat taka nga tubbák megapu sù baggim ta pangikeká ra nikaw.” Á initáyák na laguk ni Pablo yù limá na, á kinagi na, ² “Patul Agripa, magayáyákà ta ággawo, ta sikaw yù manángngák sù itabbák ku tayù pangikeká ra nikán nayù ira ikáttole ta nga Kudío. ³ Nepatalugáring ta sikaw yù makánnámmu ta ngámin nga kustombare tam nga Kudío ána yù ngámin nga aririri tam. Á pasensiam mà bi, á ginnám mu yù kagiak ku nikaw.

⁴ “Yù ira ngámin nga Kudío, ammu ra ta napiá yù nonò ku ána yù kustombarè ta áddè ngaw sù kabaddi ku, ta naggiánà nira sù paggiák ku ta Tarsu ána ta Jerusalem. ⁵ Ammu rangá ta nabayágin, á nu gustu ra nakuan massistígu, kagiad da nikaw ta Parisiongá nga maláppa nga manguruk ta ngámin nga tunung tam ána kustombare tam nga Kudío. ⁶ Á kunangane manáddagá ta arubáng mu nga mabestigán megapu sù iddanamáku, nga palurotan na sangaw ni Namarò yù initabbá na sù ira ngaw naggaká nitta, ta paginnanolayan na yù ira námmatay. ⁷ Á nepatalugáring sù ira ikáttole ta nga ginaká nayù ira mapulu duá nga áná ni Kákay Israel, pakimorayád da si Namarò ta kággággaw ána káda gabi megapu sù iddanamad da gapay, nga mesipá ira sù napiá nga initabbá ni Namarò. Á Patul Agripa, yaw nga iddanamát tam nga Kudío yù ipangikeká ra nikán! Á yù ira ikáttole ta nga Kudío yù mangikeká nikán! ⁸ Sikayu nga ajjan saw, ngattá, ta ajjan yù ira káruán nikayu nga mabbábáng ta pakáwayyá ni Namarò nga mamaginnanolay sù ira námmatay?

⁹ “Á mássiki sikán, sù ngaw, kinagi ta napiá nu jigirigítak ku yù ira manguruk kâ Apu Kesu nga taga Nasaret. ¹⁰ Á yáyù kingngikingnguá ngaw ta Jerusalem. Á yù ira kátannangán nga pári, jinok dangá ta umayá mappagápù sù ira manguruk kâ Apu Kesu, á aru yù ira pinukú

ku sù ábbalurán. Á pamagikáru nayù mamanunnù nira, sikán gapay yù táddy nga nakkagi ta pagikaruan na ira ta patay. ¹¹ Á name-arungà nga nanigirigá nira ta ngámin nga kapilliá ra, tapè kagumának ku ira nakuan ta mabbabáwi ira sù ángnguruk da. Á nerallà yù pátu na nonò ku nira, áddè ta arák ku ira gapay jinigirigá ta makkakerumá nga ili nayù ira ari Kudio ta arayyu nga lugár.

¹² “Á yáyù gapu na nga minayá ta ili na Damasku, ta jinok dangà nayù ira kátannangán nga pári, á iniyawá da níkan yù pakáwayyâ nga umay mappagápù sù ira manguruk. ¹³ Á Apu Patul, pallakák ku ta dалан ta tanggá na ággaw, inikáddagá lá yù nawák nga nasingak ku nga naggapu ta lángi nga naddalingárang ánnè sù bilák, á nanawagán kami ngámin sù ira kábuluk ku. ¹⁴ Á ikáddagá nga napalakak kami ngámin ta dabbun, á naginnâ yù ngárál nga nagubobuk ta Kebru nga ággubobuk tam nga Kudio. Á kinagi na, ‘Saulo, Saulo, ngattá ta iddá mà jìgirigátan? Ta sikaw gemma galá yù majjigá,’ kun na níkan.

¹⁵ Á kinagi laguk kuna, ‘Asinni ka, Apu?’ Á kinagi ni Apu, ‘Sikán si Kesu nga jìgirigátam mu. ¹⁶ Ngam gumikkáng ka, ta mappasinganà nikaw kunangane, gapu ta sikaw yù tullatak ku ta masserbi níkan. Sikaw yù mangipakánnámmu sù masingam mu kunangawe nga meyanung níkan áнна yù ipasingak ku paga níkaw. ¹⁷ Á dobat taka sù ira ikáttolem nga Kudio áнна yù ira ari Kudio, á sikán yù mangiyúgú níkaw nu aijan yù ira mangguá níkaw. ¹⁸ Umay ka laguk nga kunnay ta mamuká ta matá ra, tapè manawagán yù nonò da, á likuránád da yù narákè nga ággangguá ra. Á mapalubbáng ira sù panangngal ni Satanas nira, tapè si Namarò galá yù tuttulad da. Á yáyù nga pakomán na ira laguk ni Namarò sù liwiliwá da, á mesipá ira sù ira mangilin nga tatole ni Namarò, megapu sù ángngikalalá da níkan.’ Yáyù kinagi ni Apu Kesu níkan.

¹⁹ “Apu Patul Agripa, yáyù nga kinuruk ku yù inipasingan ni Apu Kesu níkan, nga naggapu ta lángi. ²⁰ Á minayá ta olu nga nangilayalayá ta Damasku, á ta Jerusalem, áнна yù ira ngámin nga ili ta purubinsia na Judiya. Á nangilayalayákà sù ira ari Kudio gapay. Á inilayalayá ku nira ta máwák nga likuránád da yù narákè nga kustombare ra, á tuttulad da si Namarò áнна tuppálad da yù napiá nga ipakuá ni Apu nira, tapè mepasingan ta kuruk nga tatole ni Namarò ira. ²¹ Yáyù initudù nira, á yáyù nga ginápù dangá nayù ira ikáttole ta nga Kudio sù pangilayalayá ku sù mangilin nga kapilliá, á gustu rangá nakuan papatáyan.

²² “Ngam si Namarò yù mangabbák níkan áddè kunangane, á yáyù nga manáddagá saw nga mangilayalayá sù ira tatolay nga makáwayyá áнна sù ira pobare. Á awán ta tanakuán nga kagiak ku, nu ari lá yù inipalappá da ngaw di Moyses áнна yù ira ngaw ábbilinán ni Namarò. Á yù kinagi ra ngaw nga mapaluré, yáyù napalurokin. ²³ Ta máwák nga napapátay si Apu Kesu. Á aggina yù olu nga naginnanolay, tapè ilayalayá na yù pangiyúgú na sù ira ikáttole ta nga Kudio áнна sù ira ari Kudio.”

²⁴ Á lage na kabalin ni Pablo nanabbák ta arubáng nayù patul, á inikatol ni Pesto nga gubinator, á kinagi na, “Pablo, maguyung ka, ta nepasá yù ginigiámmum!” kun na. ²⁵ Ngam kinagi ni Pablo, “Aringá maguyung, maráyaw nga Gubinator Pesto. Ngam kagiak ku lá yù kukurugán. ²⁶ Á ammu nayù patul yù meyanung ta ngámin nga kinagi. Yáyù nga aringá mappasirán nga makkagi daretiu kuna, ta kánnámmuán na ngámin danniaw nga kinagi. Awán támma ta arán na nemámmatán nga nakuá, ta ari nelímak,” kun ni Pablo ká gubinator.

²⁷ Á kinagi na laguk ni Pablo sù patul, “Patul Agripa, ari ka panò manguruk sù kinagi nayù ira ngaw ábbilinán ni Namarò? Ngam ammu ta kurugam mu gemma.” ²⁸ Á kinagi ni Agripa ká Pablo, “Kagiam mu panò ta malogonà nga apatam mu ta manguruk ká Kesu?” ²⁹ Á kinagi ni Pablo, “Mássiki nu marigá onu malogon, ngam yá lá ipakimállà ku ká Namarò, ta ari lá sikaw nu ari galá sikayu ngámin gapay nga makaginná sù ubobuk ku kunangane yù megittá níkan nakuan sù ángnguruk ku ká Apu Kesu, ngam ari kayu lá mepárik níkan sù kebáluk ku,” kun ni Pablo nira.

³⁰ Á di patul kári gubinator kári Bernis áнна yù ira ngámin nga nagitubang tán, gimikkáng ira. ³¹ Á nánaw ira laguk nga minay ta lawán. Á nakkaká-ubobuk ira, á kinagi ra, “Awán ta liwá na yane tolai nga ipate na onu kebáluk na.” ³² Á kinagi ni Patul Agripa ká Gubinator Pesto, “Mapalubbáng yù tolai nakuan, nu arán na nakuan kinagi ta umay makipanunnù ká Patul Sisar,” kun na.

27

Yù Pabbire di Pablo nga Umay ta Roma

¹ Á pamapáno ra níkami ta mabbiray kami nga umay ká Patul Sisar ta Roma sù purubinsia na Italia, á nipatangngal da di Pablo áнна yù ira káruán nga nabáluk ká Kapitán

Kulio, nga kapitán na Tangagatu nga Suddálu ni Patul Sisar Agosto. ² Á nappittá kami laguk sù biray nga naggapu ta Adramitu nga umay sù ira ili ta aggik na bebay sù purubinsia na Asia. Á nepulù nikami si Aristarko nga taga Tessalonika, nga ili sù purubinsia na Masidonia. ³ Á sù tádday ággaw, jiminung kami ta Sidon. Á inikállà ni Kulio si Pablo, á inanugù na nga umay melággum sù ira kákkopun na ta ili.

⁴ Á páno mi ta Sidon, jinápun na kami nayù paddák. Á nabbiray kami laguk ta aranni ta aggik na pugu na Sipro, tapè melibang kami ta pugu. ⁵ Á sinalebarám mi yù ira lugár na Silisia ána Pampilia, á jiminung kami ta dappá na Mira sù purubinsia na Lisia. ⁶ Á dung mi ta Mira, nálek nayù kapitán yù biray nga taga Aleksandria, nga mappángè ta Italia, á pinappittá na kami.

⁷ Á páno mi ta Mira nga mappángè ta Italia, naganna-annánà kami lâ nga nabbiray, á narigirigá kami nga nakáddè ta ili na Ngido. Á gapu ta jinápun na kami nayù masikan nga paddák, natupak kami, á sinalebarám mi laguk yù tuppák na pugu na Kareta nga mangngágan ta Salmone, á nallibang kami ta pugu na Kareta. ⁸ Á nabbiray kami nga nattalebák aranni ta aggik na dabbun, á narigirigá kami nga nakáddè ta dappá nga mangngágan ta Napiá nga Áddúngán, nga aranni ta ili na Laseya.

⁹ Á gapu ta paganna-annánà mi, nabayák kamingin nga nabbiray ta Laseya, á jimittálin yù ammián, nga ikákássing nayù ira minábbiray. Á yáyù nga sinabarangán ni Pablo yù ira minábbiray, ¹⁰ á kinagi na nira, “Kopuk ku, nu mánaw ittam sangaw, marigirigá ittam ta bebay. Maggián ittam labbi saw, marakè kengá lâ yù kárgá tam ána yù biray, á marakè malaggabán ittam nga matay gapay.” ¹¹ Ngam si Kapitán Kulio, arán na kinuruk yù kinagi ni Pablo. Kinuruk na lâ yù kinagi nayù mamilotu ána yù kinagi nayù makákkua sù biray. ¹² Á aru yù ira kábulum mi nga gustu ra gapay mánaw, ta kagiad da ta nonò da ta jikkù yù naddúngám ni nu ammián. Á yáyù nga gustu ra gapay mánaw nga mappángè ta pugu na Kareta, á parè bì nakuan ta makáddè kami ta áddúngán na Penik, nga nalibangán ta ammiánán. Ta kinagi ra, “Penik nakuan yù pakipaggianát tam ta áddè ta paddagun,” kud da.

Yù Baggiu ta Bebay

¹³ Á manganánnuán, aijan yù napiá nga paddák nga naggapu ta abagátán, á kagiad da ta makatunù kami ta Penik. Á inakká da laguk yù tagebbatu na biray, á nánaw kami, á nabbiray kami ta aranni ta aggik na pugu na Kareta. ¹⁴ Ngam inikáddagá lâ nabbaggiu, nga naggapu ta ammiánán. ¹⁵ Á gapu ta ari kami nakatubáng sù paddák, napaturiák kami, á pinaguráyám mi lâ. ¹⁶ Á nallibang kami ta ábbák nayù pugu na Kalodi. Á yù baddi nga barangay nga ginuggun na biray, narigá nga inigom mi sù biray, tapè pakappiám mi.

¹⁷ Kabalim mi namakáppi sù barangay, binabbak da yù biray ta lubik. Á naburung ira, marakè meráddá yù biray sù kábabawán ta Sirte. Á yáyù nga nilukù da laguk yù dakal nga layyák, á pinaturiak na paddák yù biray.

¹⁸ Á gapu ta nasikan yù baggiu, á nallelembá ána nepáttapáttu yù biray. Á ta tádday ággaw, inilappák da yù kárgá na biray ta danum. ¹⁹ Á ta mekatallu nga ággaw, inilappák da lággapay ta danum yù lubik da ána yù káruán nga aruátad da ta pattarabáku ra ta biray. ²⁰ Á aru yù ággaw nga nappasá nga arám mi bulubugá nasingan yù bilák onu bituan. Á nabbaggiu ta nasikan nga ari bulubugá naginná, á arám mi iddanamán ta matolay kami.

²¹ Á ta nabayágin, ari kami bulubugá kiminán. Á yáyù nga gimikkáng si Pablo, á kinagi na laguk, “Kákkopun, nu kinuruk naw nakuan yù kinagi nga ari ittam bì nakuan mánaw ta Kareta, awán nakuan ta nararál ána náwáwán. ²² Ngam ari kayu lâ maburung, ta kunangane tabarangát takayu ta pataggatan naw lâ yù nonò naw, ta awán ta matay nittam, ngam kengá lâ yù biray. ²³ Yáyù ammu, gapu ta inipakánnámmu ni Namarò níkán. Ta si Namarò yù makákkua níkán ána pakimorayák ku, á jinok na níkán ta gabingò yù daroban na nga nappasingan níkán. ²⁴ Á kinagi na níkán, ‘Pablo, ari ka maganássing, ta máwák nga umay ka meyarubáng ká Patul Sisar ta Roma. Á inikállà naka ni Namarò, ta inanugù na nikaw yù ipakimállà mu kuna nga meyanung sù ira kábulum mu, á yáyù nga awán gapay ta matay nira,’ kun nayù daroban ni Namarò níkán. ²⁵ Á yáyù ari kayu lâ mabburung, kákkopuk ku, ta ikatalá ku si Namarò ta palurotan na yù ngámin nga kinagi nayù daroban níkán. ²⁶ Ngam máwák nga meráddá ittam sangaw ta pugu,” kun ni Pablo nira.

²⁷ Á nabbaggiu ngin ta duá liguán, á pinaturiak na kami na paddák sù bebay nga mangngágan ta Adria. Á ta tangngá na gabi, natákál nayù ira mattarabáku ta biray ta aranni kamingin ta dabbun. ²⁸ Á sinúkuk da yù danum, á duápulu nga appá yù kálaram na. Á

pallakák mi paga ta baddi, sinúkuk da má, á mapulu límá lâ nga appá yù kálaram na.* 29 Á naburung ira marakè meráddá kami ta dútung. Á yáyù nga inigatták da sù danum yù appá nga tagebbatu ta ulin na biray, á nakimállá ira kâ Namarò ta iddagá da yù ággaw.

30 Á gapu ta ikaburung nayù ira mattarabáku ta biray, ikáyá da nakuan panawán yù biray, tapè mattálaw ira. Á sinestemád da kami. Áppè ira minay nangigatták ta tagebbatu sù parowá na biray, ngam iyutták da nakuan yù baddi nga barangay ta danum, tapè pattakáyá da nga mattálaw. 31 Ngam natákál ni Pablo yù nonò da, á kinagi na kâ Kapitán Kulio ána yù ira suddálu, “Dannian ira nga mattarabáku ta biray, nu mattálaw ira ána panawád da yù biray, awán nittam bulubugá ta meyiǵù.” 32 Á gittá da laguk nayù ira suddálu yù kaddang nayù baddi nga barangay, á neburuk.

33 Á ta alippánnawák, inikomá ni Pablo nira ta kumán ira bi. Kinagi na nira, “Duá ligguánin nga maburuburung kayu ána awán bulubugá ta kinán naw. 34 Á yáyù nga duddúarat takayu ta kumán kayu bi, tapè massikan kayu sangaw, ta awán bulubugá nittam ta manganni,” kun ni Pablo nira.

35 Á kabalín ni Pablo nanabarang nira, iná na laguk yù tangabullung nga pán, á naddasal ta pabbalabála na kâ Namarò ta arubáng da ngámin. Á gidduá na yù pán, á kinán na. 36 Á pakasingad da sù pakkákán na, minálláppaw yù nonò da, á kiminán iren gapay. 37 Á duá gatú ta pitupulu ta annam sikami ngámin ta biray. 38 Á kabalid da kiminán, inittabbá da yù kárgá ra nga tirigu ta danum, tapè umálláppaw yù biray.

Katáttáttá nayù Biray

39 Á ta pannawák, neripá da yù dabbun ngam arád da natákkilalán. Á nasingad da ta aggik yù napiá nga karagátán. Á ikáyá da nga iráddá yù biray sù karagátán, nu awayyá na. 40 Á gittá da laguk yù kaddang nayù ira tagebbatu, á inibattáng da ira ta danum. Á inubbarád da yù lubik nga gálù nayù ulin, ána inullák da yù layyák sù parowá, tapè mepayák kami nga mappángè ta karagátán. 41 Ngam neráddá yù parowá na biray ta kábabawán nga nalepuanán ta nálaram nga danum. Á awán ta awayyá ra nga mangiyali sù parowá. Á napalalalangán yù pangulin na biray, á natáttáttá.

42 Á inigagánge nayù ira suddálu ta papatáyan nakuan yù ngámin ira tatolay nga guárdiád da, marakè makanunnuk ira nga mattálaw. 43 Ngam gimná na ira ni Kapitán Kulio, gapu ta ikáyá na nga iyíǵù si Pablo, tapè ari matay. Á sinaddánán na yù ira makanunnuk ta aggira yù mapolu nga makkassú ta danum ána mappángè ta dabbun. 44 Á pinattagippáto na laguk yù ira káruán ta tábalá ána táttá na biray. Á yáyù nga nakáddè kami ngámin ta karagátán.

28

Yù Keráddá di Pablo ta Pugu na Malta

1 Á gom mi ta kannak, yáyù pakánnámmu mi ta Malta yù ngágan nayù pugu nga nalabbetám mi. 2 Á yù ira tatolay nga naggián tán, nepallá yù allá da nikami, á minay ira nakikopun nikami. Á nappagaddul ira ta paggirinuám mi, gapu ta magurán ána malummin.

3 Á si Pablo, en na gapay jinammá yù tangababbak nga káyu nga iruppáng na sù api. Á pangiruppáng na sù káyu, nallowán yù maritá nga iráw megapu sù pátu na api, á kinagá na yù límá na nga arán na ibbatán. 4 Á yù ira tatolay nga naggián tán, pakasingad da sù maritá nga iráw nga nabbesin ta límá ni Pablo, kinagi ra sù ira kábulud da, “Kuruk nga minámpátay yù tolay, ta mássiki nakagon nga naggapu ta bebay nga nelilli ta pate na, ngam aringin meyanugù nga matolay, ta matunung yù Dios nga mamagikáru kuna,” kud da. 5 Ngam iniwássì ni Pablo yù iráw nga nabbesin sù límá na, á napanná sù api. Á awán bulubugá ta nesimmu kâ Pablo. 6 Á yù ira tatolay, iddi-iddagá da yù pabbagá na límá na sangaw onu ikáddagá na lâ mapalakak nga matay. Á pagiddak da ta nabayák, á awán bulubugá ta nesimmu kuna. Á nanguli laguk yù nonò nayù ira tatolay, á kinagi ra ta aggina yù tádday nga dios.

7 Á naddepuák yù gián nga nalabbetám mi sù dabbun ni Publio nga mammaguray ta Malta. Á si Publio, inikállá na kami, á tallu nga ággaw inilágum na kami. 8 Á narángnganám mi yù yáma ni Publio nga nagiddá nga makkulikuk ána makkursu. Á si Pablo, en na iningan. Á nakimállá si Pablo kâ Namarò megapu kuna. Á sinangngalán na yù lakalákay, á

* 27:28 Á tallupulu annam nga metro yù duápulu nga appá, ána duápulu pitu nga metro yù mapulu límá nga appá.

pinammapiá na. ⁹ Á yù ira káruán nga tatolay, narámak da, á minay ngámin yù ira máttaki ká Pablo, á pinammapiá na ira ngámin gapay. ¹⁰ Á aru yù makkakerumá nga iniyawá da nikami. Á ta paggagannuá mi nga mánaw, iniyawá da yù ngámin nga bálun nga awágam mi, nga inipittá da sù biray.

Páno ri Pablo ta Malta nga Umay ta Roma

¹¹ Á tallu bulánin yù paggián mi ta Malta, ta awán ta awayyá mi nga mabbiray gapu ta ammián. Á aijan gapay yù biray nga mangngágan ta Jiping, nga naggapu ta Alekandria nga magiddak ta napiá nga ággaw. Á yáyù nattakayám mi ta páno mi ta Malta. ¹² Labbè mi ta ili na Sirakusa, naggián kami ta tallu ággaw. ¹³ Á páno mi ta Sirakusa, á nabbiray kami nga nakáddè ta ili na Regium. Á tádday ággaw, nepabulun nikami yù paddák nga naggapu ta abagátán. Á ta mekaruá nga ággaw, limibbè kami ta ili na Putioli. Á gimitták kami laguk sù biray. ¹⁴ Á narángnganám mi ta Putioli yù ira mawwawági ta ángnguruk mi ká Apu Kesu, á inapà da kami ta makipaggián kami lábbi nira, á naggián kami ta pitu nga ággaw. Á ta páno mi ta Putioli, nappatalay kami nga minay ta ili na Roma.

¹⁵ Á yù ira mawwawági ta ángnguruk mi ká Apu Kesu nga naggián ta Roma, pakarámak da ta labbè mi, ed da kami jinápun ta arayyu, ta Dápun na Appio. Á yù ira káruán, jinápud da kami ta Tallu nga Kantína. Pakasingan ni Pablo nira, nabbalabálá ká Namarò, á nagayáyá.

Keggá ni Pablo ta Roma

¹⁶ Labbè mi ta Roma, á ari nabáluk si Pablo, ta anugutad da ta maggián lá sù sippitán na nga balay nga aranni ta ábbalurán, ngam guárdián nayù tádday nga suddálu.

¹⁷ Á ta pappasá na mekatallu nga ággaw, inipágál ni Pablo yù ira Kudio nga makáwayyá sù ili na Roma. Paggagammung da sù gián na, kinagi na nira, “Wáwwagi, mássiki awánà ta liwá sù kustombare nayù ira naggaká nittam onu sù ira ikáttole tam nga Kudio ta Jerusalem, ngam ginápù dangà nga iniyawá da sù limá nayù ira taga Roma. ¹⁸ Á binestigá rangà, á gustu rangà nakuan palubbáangan, ta awánà gemma ta liwá nga ipamapáte ra níkan. ¹⁹ Ngam yù ira ikáttole tam nga Kudio, manaki ira. Á yáyù nga nakagumánà nga umay makipanunnù ká Patul Sisar. Ngam sikán, awánà ta ipamaliwá nga pangikekà nakuan sù ira ikáttole.

²⁰ “Á yáyù laguk nga inammung takayu saw, tapè makiubobugá nikayu. Ta gustù ipakánnámmu nikayu yù kuruk nga ikebáluk ku, nga megapu sù ángnguruk ku sù iddanamát tam nga ginaká ni Israel,” kun ni Pablo nira. ²¹ Á kinagi ra ká Pablo, “Awán ta limibbè saw nga túrà nga meyanung nikaw nga naggapu ta purubinsia na Judiya. Á mássiki yù ira tatolay nga naggapu túrin, awán bulubugá ta iniránuk da nga narákè nga meyanung nikaw. ²² Ngam gustu mi ginnán yù kagiam mu nga naggapu ta nonò mu, ta ammu mi ta aru yù ira makikontará sù ira manguruk ká Kesu,” kun nayù ira Kudio ká Pablo.

²³ Á sinullà da laguk yù ággaw nga pakatángngák da ká Pablo. Á dattál nayù ággaw, minay ira ta bale ni Pablo, á napakáru ira. Á si Pablo, nagammíá nga nagubobuk nira áddè ta nagabiyán paga. Á kinagi na nira yù meyanung sù pammagure ni Namarò ta dabbuno. Á pinarubán na ira kagumánan, tapè manguruk ira gapay ká Apu Kesu, megapu sù pangibukalán na sù tunung ni Moyses ána yù iníturá nayù ngaw ira ábbilinán ni Namarò. ²⁴ Á yù ira káruán, nanguruk ira. Ngam yù ira káruán, ari ira nanguruk.

²⁵ Á gapu ta ari ira metádday ta nonò da nga meyanung sù kinagi ni Pablo, nariríri ira. Á lage ra nánaw, kinagi na laguk ni Pablo nira, “Napiá yù kinagi nayù Mangilin nga Ikararuá ni Namarò ta paddok na ká Isaya, nga yù ngaw ábbilinán na, ta umay makkagi sù bilin na sù ira ngaw naggaká nittam. Kinagi na ká Isaya,

²⁶ “E ka sù ira tatolay nga Kudio, á kagiam mu nira,

“Mássiki nu ginniginnán naw, ngam arán naw bulubugá kánnámmuán.

Mássiki nu inni-innan naw, ngam arán naw bulubugá matákkilán.”

²⁷ Yáyù kagiam mu nira, gapu ta nataggá yù nonò da.

Sinulatád da yù talingá ra. Á nakkimmá yù matá ra,

marakè matákkilalád dangà, á kánnámmuád da yù kagiak ku ána alawatad da ta nonò da.

Ta nu mabbabáwi ira nakuan ta liwiliwá da ána umay ira makipakomá níkan,

á iriák ku laguk yù liwiliwá da ána pakomák ku ira.’

Yáyù kinagi ni Namarò ká Isaya.*

* 28:27 Isaya 6:9-10

²⁸ “Mánnámmuán naw laguk yaw. Binilin na laguk ni Namarò yù ira ari Kudio ta meyanung sù pangiyìgù na ta tolay, tapè mesipà ira sù pammagure na. Á aggira, magginná ira.” ²⁹ Kabalin ni Pablo nga nagubobuk, nánaw yù ira Kudio. Á ta páno ra, nakkakátabbatabák ira.

³⁰ Á naggián si Pablo ta Roma ta duá ragun ta bale na nga labbetán na. Á pinaddulò na ngámin yù ira minay kuna. ³¹ Á inilayalayâ na nira yù meyanung sù pammagure ni Namarò ta dabbuno ána inittuddu na nira yù meyanung kê Apu Kesu Kiristu. Á ari mappasirán nga mangituddu, á awán ta nakikontará kuna. Áddè na yù.

Yù Túrâ ni Pablo sù ira Manguruk nga taga Roma

Yù Meyannung sù Túrâ

Dakal yù ili na Roma, nga paggianán nayù kátannangán nga mammaguray nga abbúnad da ta Sisar sù ággubobuk da. Á aru yù ira purubinsia gapay ta pammagurayán nayù Sisar. Á pattúrâ ni Pablo sawe túrá, ari paga minay ta ili na Roma, ngam ammu na yù ngágan na aru nga tatolay nga manguruk kâ Apu Kesu nga naggián sù ili. Á yáyù nga inítúrâ na yawe nga pakiammu na nira.

Á ipanonò ni Pablo sù ira nga mabbibik sawe yù ággián nayù ira ngámin nga tatolay megapu ta liwiliwâ da. Ta nu ari ittam mabbabáwi sù narákè nga ággangnuá tam, á pagikaruan na ittam sangaw ni Namarò. Á ibukalán na yù pakáwayyá ni Namarò nga mangiyígù ta tolay, maguray lá yù katatole ra, nga Kudio onu ari Kudio, tapè ari ittam mapagikáru. Ta netapil si Apu Kesu Kiristu megapu nira. Á naginnanolay, ána abbágán na yù ira nga mangikatalà kuna, tapè palurotad da yù napiá nga ipakuá ni Namarò nira.

Yù Mayán nayù Túrâ

Yù Meyannung kâ Pablo ána yù Bilin na (1:1-17)

Awán ta Ari Nakaliwâ (1:18–3:20)

Yù Ámmakomá ni Namarò ta Tolay (3:21–4:25)

Yù Bagu nga Áttole nayù ira nga Mangikatalà kâ Apu Kesu Kiristu (5:1–8:39)

Yù Ággián nayù ira Kudio (9:1–11:36)

Yù Ipakuá ni Namarò sù ira Tatole na (12:1–15:13)

Yù Pangilayalayá ni Pablo sù ira Ari Kudio (15:14-21)

Yù Panalákkuruk ni Pablo nga Umay ta Roma (15:22-33)

Yù Pangiyabbú ni Pablo nu Kunnasi yù ira Kákkopun na (16:1-27)

¹ Sikán si Pablo nga mattúrâ nikayu. Masserbingá kâ Apu Kesu Kiristu, gapu ta inagálán nangà ni Namarò, nga sinullá na ta umay mangilayalayá sù bilin na. ² Yawe bilin ni Namarò yù meyanung sù inittabbá na ngaw nga nabayágin, nga inipetúrâ na sù ira ngaw ábbilinán na. ³ Yawe yù napiá nga dámak nga meyanung sù Aná ni Namarò. Á ta meyanung sù katatole nayù Aná na, neyaná sù ginaká ni Patul Dabid. ⁴ Ngam nepasingan ta aggina yù Aná ni Namarò nga makáwayyá, megapu sù Mangilin nga Ikararuá nga namaginnanolay kuna. Aggina si Apu Kesu Kiristu, nga Yápu tam.

⁵ Á sinullá nangà ni Namarò megapu sù allá na níkan, á jinok nangà, ta umayá mangilayalayá sù bilin na nga meyanung kâ Apu Kesu Kiristu sù ira ngámin nga makkakerumá nga tatolay, tapè manguruk ira ána mangikatalà ira kâ Apu Kesu. ⁶ Á sikayu gapay, inagálán na kayu gapay ni Namarò ta mangikatalà kâ Apu Kesu, tapè mesipá kayu gapay sù ira tatole na.

⁷ Á yáyù nga mattúrâkâ nikayu nga maggián ta ili na Roma, sikayu ngámin nga iddukan ni Namarò, nga inagálán na ta mabbalin ta tatole na. Á ipakimállá takayu, ta ikákkállá da kayu di Namarò nga Yáma tam ána si Apu Kesu Kiristu nga Yápu tam, tapè mepagimammá kayu ána napiá yù ággián naw.

Yù Pakimállá ni Pablo, nga Pabbalabála na kâ Namarò

⁸ Á yawe bì yù mapolu nga kagiak ku. Makimállaká kâ Namarò, ta pannakabaggi ni Apu Kesu Kiristu, ána dayáwak ku si Namarò megapu nikayu ngámin, ta aringá makabalabála kuna megapu sù napiá nga ángnguruk naw, nga neparámak ta ngámin nga lugár. ⁹ Á si Namarò yù makasistígu megapu níkan, ta kuruk yù kagiak ku, ta ammu na ta maláppaká nga mangilayalayá sù bilin na, nga napiá nga dámak nga meyanung sù Aná na. Á ammu na ta sigidá nga ipakimállá takayu kuna. ¹⁰ Á ta ngámin nga pakimállá ku kuna, kiddawak ku kuna ta iyawá na níkan yù awayyá nga umay mattúllun nikayu. ¹¹ Ta karagatát takayu nga matullúnán, tapè ipakánammù nikayu yù napiá nga ángngabbák nayù Ikararuá ni Namarò nikayu, tapè mapasigaggá yù ángngikatalà naw. ¹² Á kuk ku nakuan ta makkakátabarang ittam, megapu sù ángngikatalà tam kâ Apu Kesu.

¹³ Wáwwagi, yawe yù ikáyá ku nga ipakánammù nikayu. Initalákkuruk ku ta nabayágin nga umay mattúllun nikayu, ngam aijan garè yù kegaggarák ku. Ta ikáyá ku nakuan nga mangituddu sù bilin ni Namarò nikayu, tapè mapasigaggá yù ángnguruk naw, ána manguruk gapay yù ira káruán nga ari paga nanguruk, ta kunnay sù nesimmu ngaw gapay sù ira káruán nga ari Kudio ta ngámin nga lugár nga nappassapassiárák ku. ¹⁴ Á makaliwáká

nu arák ku tudduán yù ira ngámin nga makkakerumá nga tatolay, yù ira nga maggíán ta dakal nga ili onu yù ira nga maggíán ta kakayyuán, áнна yù ira naggigiámmu onu yù ira ari naggigiámmu. ¹⁵ Á yáyù nga mapattúkà nga umay ta Roma gapay, tapè mangilayalayákà sù napiá nga dámak níkayu nga maggíán tán.

Yù Pakáwayyá nayù Ubobuk ni Namarò

¹⁶ Á aringá mappasírán nga mangituddu sù napiá nga dámak nga meyanung ká Apu Kesu Kiristu, ta makáwayyá si Namarò nga mangiyígù sù ira ngámin nga tatolay nga mangikatalà kuna, tapè ari ira mokum. Á yù ira Kudio yù napolu nga nakaginná. Á kunangane aijan yù awayyá ra gapay nayù ira ari Kudio nga magginná áнна makiyígù kuna. ¹⁷ Á yù kebalinán nayù napiá nga dámak yù ámmakapíá ni Namarò sù ira tatolay, nga megapu galá sù pangikatalà da ká Apu Kesu Kiristu. Á yù ira lá nga mangikatalà ká Apu yù meddán sù katunung na, áнна alawatan ni Namarò ira. Yáyù inipetúrà ni Namarò nga kun na, “Yù ira tatolay nga ibiláng ni Namarò ta matunung megapu sù pangikatalà da, aggira yù mepattolay nga mesipà kuna ta áddè ta áddè.”*

¹⁸ Maggíán si Namarò ta lángì, á mapporay megapu sù narákè nga akkuán nayù ira tatolay. Á inipakánnámmu na ta ukuman na sangaw yù ira nga mangnguá ta narákè áнна yù ira nga manaki kuna, gapu ta yá lá tángngagad da yù akkuád da nga narákè, á yáyù nga megaggak yù pakáwayyá nayù kuruk nga bilin na nga nepakánnámmu nira. ¹⁹ Ta kánnámmuád da yù ngámin nga mepakánnámmu nga meyanung ká Namarò, ta si Namarò galá yù mangipakánnámmu nira megapu sù ngámin nga pinarò na. ²⁰ Á áddè ngaw ta kaparò nayù dabbuno, inipakánnámmu ni Namarò yù ari masingan nga meyanung kuna, megapu sù pinarò na. Inipakánnámmu na ta aggina yù mepángngà nga pakiyápuán na tolay. Á inipakánnámmu na gapay ta aggina yù mannanáyun nga makáwayyá ta ngámin ta áddè ta áddè. Á kuruk nga ammu ra dannian, ta mepasingan megapu sù ngámin nga pinarò ni Namarò. Á yáyù nga ari ira makatabbák kuna nga makkagi ta arád da ammu, sangaw nu ukuman na ira, gapu ta aijan yù awayyá ra nga makánnámmu megapu sù masingad da nga pinarò na.

²¹ Á mássiki nu ammu nayù ira tatolay ta aijan si Namarò, ngam arád da nakimorayán. Á ammu ra yù ángngikállà ni Namarò nira, ngam arád da jináyaw. Arád da piníli yù napiá. Á nonopad da lá yù awán ta serbi na. Á nakkallà yù nonò da. ²² Kagiad da ta masírik ira, ngam pinotuád da si Namarò, á nabbalin ira ta ulapá. ²³ Á inipuerá ra lá si Namarò nga ari matay, nga egga ta áddè ta áddè, nga awán ta namarò kuna. Á pakimorayád da lállaguk yù gustu ra, nga pidde ra nga sináttolay, sinámmammántù, siná-ayám, áнна siná-iráv.

²⁴ Á yáyù nga pinaguráyán ni Namarò yù ira tatolay, tapè tuttulad da laguk yù gustu ra nga narákè, nga ari mepángngà ta baggi ra. Á makapasírán yù kingnguá ra. ²⁵ Á sinájiíád da si Namarò, á kinuruk da yù ari kuruk. Á nakimorayád da áнна nasserbiád yù makkakerumá nga ayám nga pinarò ni Namarò. Ngam arád da pakimorayán yù Namarò nira. Si Namarò lá yù kepángngatán nga paddayawán na tolay ta áddè ta áddè. Á mapalurò! Ammán!

²⁶ Á gapu ta pakimore nayù ira tatolay ta makkakerumá nga naparò, pinaguráyán ni Namarò ira, tapè tumuttul ira sù narákè nga makapasírán, nga gustu na baggi ra. Yù ira bábbay, pinataliád da yù gagángay nga pakiatáwa ra ta láláki, á makállirák nga ari mepángngà yù kingnguá ra sù ira kábulud da nga bábbay. ²⁷ Á yù ira lálláki gapay, pinataliád da yù gagángay nga keruruk da ta babay nga atáwa ra, á nakiruruk yù ira lálláki sù kelugád da nga lálláki. Á kingnguá ra yù ari mepángngà sù kábulud da nga lálláki. Á yáyù gapu na nga mabbalin ira ta matakí áнна maguyung, ta yáyù laguk yù bálà nayù liwá da.

²⁸ Á gapu ta arád da bulubugá sinángngák si Namarò, yáyù nga pinaguráyán ni Namarò ira, tapè nonopad da lá yù narákè áнна akkuád da lá ngámin yù ninonò da. ²⁹ Á kingnguá ra ngámin yù ari matunung áнна makkakerumá nga narákè. Mamassil ira. Malussaw ira. Mangabubu ira. Mamapátay ira. Maddaráma ira. Mangilogò ira. Á ayatán ira nga manigirigá ta kábulud da. Á mabbebbek ira. ³⁰ Mallillibá ira. Malussaw ira ká Namarò. Mappeddaráyaw ira áнна mappalaláki ira. Alerad da yù lannà nayù akkuád da nga narákè. Á potuád da yù darakal da. ³¹ Ulapá ira nga awán ta pasirád da. Massirisiri ira. Ari ira mekatalà. Awán ta ayá da áнна ángngiddù da sù ira darakal da áнна wáwwagi ra. Á awán ta allá da sù ira kábulud da. ³² Kinagi ni Namarò yù mepángngà sù ngámin ira nga mangnguá ta kunnian, ta matay ira nga umay maggíán ta impiernu ta áddè ta áddè. Á mássiki nu ammu

* 1:17 Habakuk 2:4

ra yù kinagi na, ngam akkuád da lâ dannian. Á ari lâ aggira yù mangngué, ta dudduárad da gapay yù ira káruán nga mangngué ta kunnian.

2

Matunung yù Pamanunnù ni Namarò

¹ Á gapu ta naggigittá ittam nga malliwá, arát tam nakuan panunnután yù ira kábulut tam. Á maguray nu asinni nikayu, nu panunnután naw yù kabbulun naw, panunnután naw gapay yù baggi naw, gapu ta aijan gapay yù liwá naw nga negittá ta liwá na. Á yáyù nga awán ta itabbák naw ká Namarò sangaw nu pagikaruan na kayu. ² Á ammu tam gemma ta pagikaruan ni Namarò yù ira ngámin nga mangngué ta kunnian nga narákè, á matunung yù pamanunnù ni Namarò, áнна mepángngá yù ámmagikáru na.

³ Á sikayu nga mamanunnù sù ira kábulun naw, nu akkuán naw gapay yù kunnay ta akkuán nayù ira panunnután naw, á melillitán naw panò yù pamagikáru ni Namarò? Ari gemma, ta pagikaruan ni Namarò yù ira ngámin nga mangngué ta narákè. ⁴ Á ngattá, ta paguráyán naw yù pangikállà ni Namarò nikayu? Ta arán naw paga nilikurán yù akkuán naw nga narákè. Arán naw panò ammu ta attamán na kayu lâ nga arán na lábbi pagikaruan, gapu ta nepallá yù allá na nikayu? Á iddagán na lábbi yù pabbabáwi naw, nu matagená naw nakuan yù pangikállà na nikayu.

⁵ Ngam sikayu, pinataggá naw yù nonò naw, á arán naw tángngagan yù pangikállà ni Namarò nikayu. Á yáyù nga sigidá nga lannapán naw yù liwá naw, á yáyù nga mappaná yù pore ni Namarò nikayu sù ággaw nga pangukum na. ⁶ Á sangaw nu duttál yù ággaw nga piníli ni Namarò ta pangukum na, bestigán na ittam, á iyawá na nittam nga katággítáddy yù bálà na nga mepángngá sù kingngué na.

⁷ Á iyawá ni Namarò yù inángá nga awán ta áddè na sù ira tatolay nga ari malurá nga mangngué ta napiá nga ipakuá na nira. Aggira yù magattam, gapu ta iddanamá da ta malá da yù ikáyá da nga kepotud da nga mepaggián ká Namarò ta áddè ta áddè, nga mesipá sù karáyo na. ⁸ Ngam yù ira tatolay nga motun yù nonò da, mekaná ira sù pore ni Namarò. Ta gapu ta arád da kurugan yù kuruk nga napiá nga inipakánnámmu ni Namarò nira, áнна akka-akkuád da lâ yù narákè, á yáyù nga ukuman na ira. ⁹ Á yù ira ngámin nga tatolay nga mangngué ta narákè, marigirigá ira, áнна magaráyan ira sù takí da, nepatalugáring sù ira Kudío, áнна yù ira ari Kudío gapay. ¹⁰ Ngam yù ira nga mangngué ta napiá, ipotun ni Namarò ira, á mesipá ira sù karáyo na, á pagimammatan na ira ngámin, ta iyawá na nira yù napiá nga ággiád da kuna, nepatalugáring sù ira Kudío, áнна yù ira ari Kudío gapay. ¹¹ Ta arán ni Namarò paddurúmán yù ira tatolay.

¹² Á yù ira nga ari Kudío, mássiki nu ari ira meddán ta tunung ni Namarò, ammu ra yù napiá nga akkuád da nakuan, á yáyù nga ukuman ni Namarò ira gapu ta arád da akkuán yù napiá nga ammu ra. Á yù ira Kudío nga iniddán ni Namarò ta tunung, mapanunnután ira gapu ta arád da kurugan yù tunung nga netuddu nira. ¹³ Ta arán na gemma ibiláng ni Namarò ta matunung yù ira tatolay nga maginná ra lâ yù tunung na ngam arád da palurotan. Ngam yù ira tatolay nga mamaluro sù tunung ni Namarò, aggira yù ibiláng na ta matunung. ¹⁴ Á yù ira ari Kudío, mássiki nu ari ira natudduán sù tunung ni Namarò, negagángay nira yù mappíli sù napiá nga tuppálad da, nga negittá sù taddán nga neturá sù tunung ni Namarò. Á yù napiá nga ammu ra, yáyù tunung da. ¹⁵ Á nu tuppálad da yù napiá nga ammu ra, ayatán ira sù kingngué ra. Ngam nu arád da tuppálan yù napiá nga ammu ra, mappasírán ira gapu ta ammu ra ta narákè yù kingngué ra. Á yáyù nga ipasingad da ta ammu ra ta nonò da yù napiá nga ituddu ni Namarò, mássiki nu ari ira yù iniddán na sù tunung na nga neturá. ¹⁶ Á sangaw nu duttál yù ággaw, nga piníli ni Namarò nga pangukum na, meyarubáng yù ira tatolay ká Apu Kesu Kiristu nga mamanunnù, á bestigán na ira. Á pamanunnù na nira, mepalappá yù liwiliwá da nga inílmak da ngaw. Yáyù ituddu nayù bilin ni Namarò nga ilayalayá ku.

Yù Ággián nayù ira Kudío Megapu sù Tunung ni Namarò

¹⁷ Á sikayu nga kábuluk ku nga Kudío, ngattá ta arán naw palurotan yù ipakuá ni Namarò nittam? Mappeddaráyaw kayu gapu ta Kudío kayu, á ipappalálaki naw yù maláddá nga ággián naw ká Namarò, gapu ta iniddán na kayu sù tunung na. ¹⁸ Ammu naw yù ure ni Namarò nga akkuán naw nakuan, á ammu naw mappíli sù napiá, gapu ta natudduán kayu sù tunung na. ¹⁹ Á kagian naw ta kuruk nga mesturu kayu, nga mamannawák ta nonò nayù ira ari natudduán. Kagian naw ta sikayu yù mangituddu ta napiá nga dálan sù ira nga meyárik ta buling, áнна kunnay kayu ta tulu nga mamannawák sù ira mallakalakák ta

kallà. ²⁰ Á kagian naw ta makáwayyá kayu nga maggammá sù ira ulapá ána mattuddu sù ira ábbing. Ta sikayu yù makámmu sù ngámin nga kuruk, gapu ta egga nikayu yù tunung ni Namarò nga iníturá ni Moyses.

²¹ Á sikayu nga makkagi ta ammu naw mangituddu sù ira kábulun naw, ngattá, ta arán naw tudduán yù baggi naw? Á sikayu nga manaddán sù ira kábulun naw ta ari ira makkokò, ngattá ta makkokò kayu? ²² Á sikayu nga makkagi sù ira kábulun naw ta ari ira makiruruk sù arád da atáwa, ngattá ta makiruruk kayu sù arán naw atáwa? Sikayu nga mangiluddè sù ira sináttolay nga pakimorayán nayù ira ari Kudío, ngattá ta tullung kayu nga makkokò sù giád da? ²³ Sikayu nga Kudío nga mappalaláki gapu ta iniddán na kayu ni Namarò sù tunung na, ngattá, ta arán naw kurugan yù tunung na? Á ta kunnian, ipasapisirán naw si Namarò sù ira ari Kudío! ²⁴ Á yáyù kebalinán nayù netúrâ sù bilin ni Namarò, nga kun na, “Sikayu nga Kudío yù mangipisirán kâ Namarò, megapu sù narákè nga akka-akkuán naw. Ta yáyù gapu na nga iluddè da si Namarò nayù ira ari Kudío, ána pakkakagiád da yù ngágan na.”*

Tatolay ni Namarò yù ira Manguruk kuna

²⁵ Kinagi na ngaw ni Namarò sù ira Kudío ta kugitad da yù ira lálláki ta sinniál da ta piníli ni Namarò ira. Á sikayu nga kábuluk ku nga Kudío, nu kurugan naw yù tunung ni Namarò, á kuruk nga sinniál yù kakugi naw ta tatole na kayu ni Namarò. Ngam awán ta serbi nayù kakugi naw, nu arán naw kurugan yù tunung ni Namarò. ²⁶ Á yù ira ari Kudío, nu kurugad da yù taddán ni Namarò sù tunung na, á mássiki nu ari ira nakugi, isipà ni Namarò ira sù ira tatole na, ána ibiláng na ira ta kun na nakugi ta ánninganán na.

²⁷ Á sikayu nga Kudío, mássiki nu nakugi kayu ána aijan nikayu yù netúrâ nga tunung ni Namarò, ngam arán naw palurotan yù napiá nga ituddu na. Á yáyù nga mappasirán kayu ána mapagikáru kayu laguk, megapu sù ira ari Kudío nga mamalurò sù napiá, mássiki nu ari ira meddán ta tunung. ²⁸ Ta ari kuruk nga Kudío ta ánninganán ni Namarò yù tolay nga Kudío yù baggi na, nga tumuttul sù kustombare na Kudío. Á ari kuruk nga sinniál ta tolay ni Namarò yù nekuá lá ta baggi na. ²⁹ Ngam kuruk nga tatole ni Namarò yù ira nga manguruk kuna. Á ari yù nekuá ta baggi ra, ngam yù nekuá ta nonò da yù kuruk nga sinniál ta tatole ni Namarò ira. Á yù Ikararuá ni Namarò, iniyawá na nira yù napiá nga nonò da. Á mássiki nu awán ta tolay nga mangiráyaw nira, ngam si Namarò yù mangiráyaw nira.

3

Palurotan ni Namarò yù Ngámin nga Initabbá na

¹ Á gapu ta arán na paddurúmán ni Namarò yù ira tatolay, egga panò yù pakkapiánán na Kudío megapu sù kakugi na? Egga panò yù pangappútám mi nga Kudío ánnè sù ira ari Kudío? ² Á aru gemma yù pakkapiánám mi nga Kudío! Ta olu, sikami nga Kudío yù nangikatalakán ni Namarò sù ubobuk na nga inipetúrâ na.

³ Á ammu naw ta aijan yù ira Kudío nga ari manguruk sù bilin ni Namarò nga inikatalà na nira. Á mássiki nu kuruk nga ari ira mekatalà, arán naw nakuan kagian ta ari gapay mekatalà si Namarò ána ari mamalurò sù initabbá na. ⁴ Ari massiri si Namarò, ta kuruk ngámin yù kagian na, mássiki nu massirisiri yù ira ngámin nga tatolay. Yáyù kebalinán nayù dán nga netúrâ nga kunniaw:
“Apu, kuruk ngámin yù ubobuk mu.

Á mepasingan ta matunung ka, Apu, megapu sù ubobuk mu.*

Á mássiki nu aijan yù tolay nga iddá na ka lá ikeká,
ngam mangappù ka, ta mepasingan ta awán ta liwâ mu.”

⁵ Á aijan garè yù ira nga makkagi ta mepasingan ta napiá ána matunung si Namarò, megapu sù narákè nga akkuát tam. Á kagiad da ta ari napiá si Namarò nu pagikaruan na ittam megapu sù liwâ tam, gapu ta kunnay ta abbágát tam megapu sù narákè nga akkuát tam, gapu ta mepasingan ta matunung si Namarò megapu sù pakkillu tam. Kunnian yù liwâ na tolay ta nonò na. ⁶ Ari gemma kuruk yù kagiad da. Ta nu arán na nakuan pagikaruan ni Namarò yù ira malliwá, á kunnasi nakuan laguk yù ámmannùnù na ta ngámin nga tatolay ta dabbuno?

⁷ Á ta ángngarigán nu kuruk nakuan ta meparáyaw si Namarò nga mepasingan ta kuruk ngámin yù kinagi na, megapu ta passirisiri tam, á ngattá laguk ta pagikaruan na ittam ta liwâ tam? ⁸ Nu kuruk nakuan ta meparáyaw si Namarò megapu ta siri tam, á kagiak

* 2:24 Ezekiel 36:21-22 * 3:4 Salmo 51:4

ku nakuan, “Arà! Mangngúa ittam laguk ta naràkè, tapè meparáyaw si Namarò,” kuk ku nakuan. Á aijan garè yù ira mabbèbek nikán, nga makkagi ta yáyù kanu yù kinagi, kud da, ngam ari gemma kuruk yù kagiad da. Á mepángngà nga matunung yù pamagikáru ni Namarò nira.

Awán ta Tolay nga Ari Malliwá

⁹ Á sikami nga Kudio, napiá panò yù ággiám mi ta áninganán ni Namarò ánnè sù ira ari Kudio? Ari gemma! Á yáyù gemma yù kinagikin, ta makaliwá ittam ngámin, nga Kudio áнна ari Kudio. ¹⁰ Yáyù kebalinán nayù inipetúrá na ngaw ni Namarò nga kunniaw:

“Awán bulubugá ta tolay nga matunung, mássiki lâ tádday.

¹¹ Awán ta tolay nga makánámmu sù nonò ni Namarò, áнна awán ta tolay nga magalek ká Namarò, tapè makiyápu kuna.

¹² Nekáttuay yù ira ngámin nga tatolay ká Namarò, á mappupúlu ira nga mangngúa ta naràkè.

Awán bulubugá ta tolay nga mangngúa ta napiá, mássiki lâ tádday.”†

¹³ “Á kun na buyù nayù nalabbak ta tanam nga nabukatán yù simù da, gapu ta jikkù yù ubobugad da.

Á massiri ira, tapè ilogò da yù ira kábulud da.”‡

“Á kunnay ta jitá na iráw yù ángngiparákè da ta kábulud da.”§

¹⁴ “Ari ira maganásing nga mangigagek sù ira kábulud da gapu ta lusso ra.”*

¹⁵ “Dán nga naparán ira gapay nga mamapátay.

¹⁶ Á ta ngámin nga pallakarád da, aijan yù ira darálad da áнна yù ira jigirigátad da.

¹⁷ Arád da garè ammu yù paggapuán nayù napiá nga ággimammà.”†

¹⁸ “Á awán ta assing da ká Namarò.”‡

Yáyù inipetúrá ni Namarò.

¹⁹ Á sittam nga Kudio yù nangiyawatán ni Namarò sù tunung na, á ammu tam gemma ta netúrá yù ngámin nga tunung na, tapè kánnámmuát tam yù ngámin nga ipatuppál na nittam.

Á mássiki nu egga nittam yù tunung, arát tam kurugan. Á yáyù nga awán bulubugá ta tolay nga makatabbák ká Namarò sangaw nu bestigán na yù ira ngámin nga tatolay ta dabbuno.

²⁰ Ta awán bulubugá ta tolay nga matunung ta áninganán ni Namarò megapu ta panuppál na sù tunung. Yá lâ serbi nayù tunung ni Namarò yù pangituddu na sù napiá nga akkuát tam nakuan, tapè kánnámmuát tam ta makaliwá ittam.

Mebiláng yù Tolay ta Matunung megapu sù Pangikatalà na ká Apu Kesu Kiristu

²¹ Á kunangane, inipakánámmu ni Namarò yù ámmakomá na ta tatolay, tapè ibiláng na ira ta matunung sù áninganán na áнна alawatan na ira ta tatole na. Á ari gemma megapu sù panuppál tam sù tunung. Yáyù inipakánámmu ni Namarò sù libru nga inipetúrá na ngaw kári Moyses áнна yù ira ngaw ábbilinán na. ²² Pakomán ni Namarò yù liwá na tolay, á ibiláng na ta matunung yù tolay megapu galá ta pangikatalà na ká Apu Kesu Kiristu. Á yáyù akkuán ni Namarò megapu sù ira ngámin nga mangikatalà ká Apu Kesu, ta awán ta irumá na, mássiki nu Kudio ira onu ari ira Kudio. ²³ Ta nalliwá ittam ngámin nga tatolay, á nakúráng yù napiá nga akkuát tam, nga pangiráyaw na nittam nakuan ni Namarò. ²⁴ Ngam gapu ta pangikállà ni Namarò nittam, minay si Apu Kesu Kiristu, á inikáru na yù liwá tam, nga arát tam matalián, tapè pakomán ni Namarò ittam nga mangikatalà ká Apu Kesu áнна ibiláng na ittam ta matunung.

²⁵ Jinok ni Namarò si Apu Kesu Kiristu ta metapil nga meyátáng, nga magikáru ta liwá tam megapu sù kebubbù na dága na ta pate na ta kurù. Á yáyù nga pakomán ni Namarò ittam ta liwá tam nu ikatalà tam si Apu Kesu. Á mepasingan yù katunung ni Namarò, gapu ta pinagikáru na si Apu Kesu megapu sù liwá tam nga tatolay, áнна pinakomá na ittam gapu ta pamagikáru na ká Apu Kesu. Á lage na pate ni Apu Kesu, arán na ngaw pinagikáru ni Namarò yù ira ngaw tatolay ta liwá da, ngam inattamán na ira, áнна pinakomá na yù naràkè nga kingngúa ra. ²⁶ Á arán na pinaguráyán ni Namarò yù liwá nayù ira ngaw tatolay, ta jinok na si Apu Kesu, nga nagikáru ta ngámin nga liwá da. Yáyù nga mepasingan ta matunung si Namarò, á yáyù gapay ipakkuruk na nittam ta pakomán na áнна ibiláng na ta matunung yù ira ngámin nga tatolay nga mangikatalà ká Apu Kesu. ²⁷ Á gapu ta kunnian yù ággiát tam, egga panò yù awayyá tam nga mangipappeddaráyaw sù napiá nga akkuát tam?

† 3:12 Salmo 14:1-3; 53:1-3 ‡ 3:13 Salmo 5:9 § 3:13 Salmo 140:3 * 3:14 Salmo 10:7 † 3:17 Isaya 59:7-8

‡ 3:18 Salmo 36:1

Awán! Ta mássiki nu napiá lâ yù akkuát tam, arát tam mapagán yù liwâ tam. Á pakomán na ittam ni Namarò ána ibiláng na ittam ta matunung megapu galá sù pangikatalà tam kâ Apu Kesu Kiristu.

²⁸ Yaw yù kagiak ku, ta ibiláng ni Namarò ta matunung yù tolay megapu galá sù ángngikatalà na kâ Apu Kesu, nga ari megapu sù panuppál na sù tunung. ²⁹ Á ta ángngarigán nu alawatan ni Namarò nakuan yù tolay megapu ta panuppál na sù tunung na, á yù ira Kudio lâ nakuan yù alawatan na ta tatole na, ta aggira lâ iniddán na sù tunung na. Ngam ari gemma kunnian, ta alawatan ni Namarò gapay yù ira ari Kudio ta tatole na, ³⁰ gapu ta tádday lâ si Namarò. Á arán na irumá yù Kudio ána ari Kudio, ta ibiláng na ta matunung yù ira ngámin nga makkakerumá nga tatolay, megapu ta pangikatalà da kâ Apu Kesu Kiristu.

³¹ Á gapu ta pangikatalà tam kâ Apu Kesu, anni panò laguk yù passerbián nayù tunung ni Namarò? Masserbi gemma ta mangipakánnámmu nittam sù napiá, tapè tákkilalát tam yù liwâ tam, ána tuppálat tam ta napiá yù ituddu nayù tunung, megapu sù pangikatalà tam kâ Apu Kesu.

4

Yù Meyannung sù Pangikatalà ni Abrakam kâ Namarò

¹ Á anni laguk yù kagiat tam nga meyanung kâ Kákay Abrakam, nga naggaká nikami nga Kudio? ² Á ta ángngarigán nu inibiláng na nakuan ni Namarò ta matunung si Abrakam megapu sù napiá nga kingnguá na, á aijan nakuan yù awayyá ni Abrakam nga mangipappeddaráyaw sù katunung na ta arubáng ni Namarò. Ngam awán gemma ta awayyá na, gapu ta ari gemma yù piá ni Abrakam yù gapu na nga inibiláng ni Namarò ta matunung. ³ Anni yù kagian nayù inipetúrá na ngaw ni Namarò nga meyanung sù katunung ni Abrakam? Kinagi na, “Inikatalà ni Abrakam si Namarò, á inibiláng ni Namarò ta matunung megapu sù pangikatalà na kuna.”*

⁴ Á ta ángngarigán nu aijan yù tolay nga matáddanán megapu sù tarabáku na, á ari gemma mebiláng ta nelimú kuna yù táddán na, nu ari galá nga táli nayù bannák na. ⁵ Ngam ari yù akka-akkuán na tolay yù gapu na alawatan ni Namarò, nu ari galá yù pangikatalà na kâ Namarò, nga minámmakomá sù ira makaliwâ nga tumulú kuna. Ta awán ta bannák na baggi na nga táli nayù allà ni Namarò kuna. Ngam pakomán ni Namarò ána ibiláng na ta matunung megapu galá sù pangikatalà na kuna.

⁶ Yáyù gapay yù kebalinán nayù kinagi na ngaw ni Patul Dabid, ta kinagi na ta magayáyá yù tolay nga pinakomá ni Namarò ta liwâ na, á ari negapu ta kingnguá na, ngam megapu galá ta allà ni Namarò kuna. Netúrá yù kinagi ni Patul Dabid, nga kun na,

⁷ “Magayáyá yù ira tatolay nga pinakomá ni Namarò ta liwâ da, aggira ngámin nga náttamán ni Namarò yù naráké nga kingnguá ra.

⁸ Magayáyá yù ira tatolay nga arán ni Namarò nonopan yù liwiliwâ da.”†

⁹ Á yù ira nga kinagi ni Patul Dabid ta magayáyá megapu ta pamakomá ni Namarò nira, asinni ira? Ari lâ yù ira Kudio nga nakugi, ta mesipá gapay yù ira ari Kudio, mássiki nu ari ira nakugi. Ta binibbik tam yaw nga inipetúrá ni Namarò, ta inibiláng na ta matunung si Abrakam megapu sù pangikatalà na kuna. ¹⁰ Á ari napolu yù kakugi ni Abrakam pángè na pangibiláng ni Namarò kuna ta matunung. Yá ipanguruk tam ta mesipá gapay yù ira ari Kudio sù pamakomá ni Namarò, gapu ta ari paga nakugi si Kákay Abrakam ta kebiláng na ta matunung.‡

¹¹ Inikatalà ni Abrakam si Namarò, á yáyù nga inibiláng ni Namarò ta matunung, lage na nakugi. Á nakugi laguk si Abrakam ta panákkilalán ta napakomángin, nga nebiláng ta matunung ta ánninganán ni Namarò megapu sù pangikatalà na kuna. Á yáyù nga nabbalin si Abrakam ta kunnay ta naggaká sù ira ngámin nga mangikatalà kâ Namarò, mássiki yù ira ari Kudio, nga ari nakugi, gapu ta ibiláng ni Namarò ira gapay ta matunung megapu ta pangikatalà da kuna. ¹² Á naggaká gapay si Kákay Abrakam sù ira Kudio nga mangikatalà kâ Namarò. Á ari yù kakugi da yù kegapuánán nayù kesipá da kâ Abrakam, nu ari galá yù pangikatalà da kâ Namarò ta kunnay sù ángngikatalà ni Abrakam kuna ngaw pángè na nakugi.

Málawâ tam yù Initabbá ni Namarò megapu sù Pangikatalà tam kuna

¹³ Á initabbá ni Namarò kári Abrakam ána yù ira ginaká na ta aggira yù makákkúá ta ngámin nga dabbuno, á mammaguray ira sù ira tatolay nga maggián kuna. Á yawe nga

* 4:3 Genesis 15:6 † 4:8 Salmo 32:1-2 ‡ 4:10 Mapulu appá yù dagun nga napasá ta pangikatalà ni Abrakam ta palurotan ni Namarò sù initabbá na, ta áddè ta kakugi na.

initabbá ni Namarò nira, ari gemma negapu ta panuppál ni Abrakam sù tunung na, ta arán na paga iniyawá ni Namarò yù tunung.[§] Ngam initabbá na nira gapu ta inibiláng na ta matunung si Abrakam megapu galá sù pangikatalà na kuna. ¹⁴ Á ta ángngarigán, nu yù ira tatolay lá nga iniddán ni Namarò sù tunung na yù mangalawá nakuan sù initabbá na, awán nakuan ta serbi nayù ángngikatalà tam kuna. Á awán gapay nakuan ta serbi nayù initabbá na, ta awán nakuan ta iddán na, gapu ta awán garè ta tolay nga makatuppál sù tunung na, mássiki nu parubán na ta napiá. ¹⁵ Á mekanakaná ittam ngámin nga tatolay sù pore ni Namarò megapu sù tunung na nga pakaliwatát tam. Á ta ángngarigán nu arán na nakuan iniyawá yù tunung, awán gapay nakuan ta ikáru tam gapu ta awán nakuan ta pakaliwatát tam.

¹⁶ Á yáyù nga málâ tam yù initabbá ni Namarò megapu galá sù pangikatalà tam kuna, tapè maláddá yù initabbá na sù ira ngámin nga mangikatalà kuna megapu galá sù allá na nittam. Á yáyù nga ari lá yù ira Kudio nga tumuttul sù tunung yù mesipá sù ira initabbá ni Namarò, ngam mesipá gapay yù ira mangikatalà nga ari Kudio, nga negittá yù ángngikatalà da sù ángngikatalà ni Abrakam. Á si Kákay Abrakam yù kunnay ta naggaká nittam ngámin nga mangikatalà kâ Namarò nga kunnay kuna. ¹⁷ Yáyù nga inipetúrâ na ngaw ni Namarò yù kinagi na kâ Abrakam, nga kun na,

“Sinullà taka, tapè sikaw yù maggaká sù aru ira nga makkakerumá nga tatolay.”*

Yáyù initabbá ni Namarò kâ Abrakam megapu sù pangikatalà ni Abrakam kâ Namarò. Á si Namarò yù makáwayyá nga manotolay sù ira námmatay ána magubobuk lá sù ikáyâ na nga parotan, á maparò.

¹⁸ Á sù pangitabbá ni Namarò kári Abrakam, lakalákay ána bakabáká iren, nga awán ta aná da. Ngam iniddanamán na lá ni Abrakam yù paganá da, gapu ta kinuruk na yù kinagi ni Namarò kuna, nga kunnay ta káru nayù ira bituan yù biláng nayù ira ginaká na noka.† ¹⁹ Á mássiki nu ammu na ta mabi yù pate na támma, gapu ta mággè magatù yù dagun na, ngam ari nabbábáng nga magiddak sù initabbá ni Namarò kuna. Á mássiki nu ammu na ta bakabáká si Sara nga atáwa na, nga ari bulubugá naganá, á ari nakkapi yù ángngikatalà ni Abrakam. ²⁰ Ari bulubugá mabbábáng si Abrakam ta meyanung sù initabbá ni Namarò kuna, ngam napasigaggá yù ángngikatalà na kuna, á jináyo na si Namarò pángè na nangalawá sù initabbá na.

²¹ Á napasigaggá yù pangikatalà ni Abrakam sù pakáwayyá ni Namarò nga mamalurò sù initabbá na. ²² Á yáyù nga inipetúrâ ni Namarò ta inibiláng na ta matunung si Abrakam, megapu sù pangikatalà na kuna. ²³ Á netúrâ yù ubobuk nga “inibiláng na ta matunung,” nga ari lá megapu kâ Abrakam. ²⁴ Nu ari gapay megapu nittam, tapè ammu tam ta ibiláng na gapay ta matunung ittam ngámin nga mangikatalà kâ Namarò nga namaginnanolay kâ Apu Kesu Kiristu, nga Yápu tam. ²⁵ Ta nebáyuk nga netapil si Apu Kesu megapu sù liwiliwá tam, á pinaginnanole ni Namarò, tapè mapakomá ittam ána ibiláng ni Namarò ta matunung ittam.

5

Si Apu Kesu yù Namakkápiá nittam kâ Namarò

¹ Á gapu ta pangikatalà tam kâ Apu Kesu, pinakomá na ittamin ni Namarò ána inibiláng na ittam ta matunung. Á yáyù nga napiángin yù ággiát tam kâ Namarò megapu sù kingnguá ni Apu Kesu Kiristu nga Yápu tam. ² Á gapu ta pangikatalà tam kâ Apu Kesu, mesipá ittamin sù pangikallá ni Namarò. Á yáyù nga magayáyâ ittam, ta iddanamát tam ta mesipá ittam kâ Namarò ána meparáyaw ittam kuna ta lángi. ³ Á ari lá yian yù ipagayáyâ tam, ta magayáyâ ittam gapay megapu sù jigá tam, gapu ta ammu tam sangaw magattam, nga napiá nga pabbalinán nayù pajjigá tam. ⁴ Á nu magattam ittam, abbágán na ittam ni Namarò, tapè mabbáli ta napiá yù nonò tam. Á yáyù nga iddanamát tam yù napiá nga initabbá ni Namarò nittam. ⁵ Á maguray lá yù mesimmu nittam, ari ittam bulubugá mepasiránán, ta ammu tam ta kukurugán nga alawatat tam yù ngámin nga iddanamát tam, nga initabbá ni Namarò nittam. Á matagená tam yù iddú ni Namarò nittam megapu sù Mangilin nga Ikararúá na nga iniyawá na nittam.

⁶ Á sù ngaw, nakaliwá ittam ngámin, á awán paga ta mangabbák nittam, tapè palurotat tam nakuan yù ikáyâ ni Namarò. Ngam ikállá ni Namarò ittam, á dattál nayù ággaw nga

§ 4:13 Naggián ngaw nga nabayágin si Kákay Abrakam, lage na keyaná ni Moyses, nga yù ngaw iniddán ni Namarò ta tunung na. * 4:17 Genesis 17:5 † 4:18 Genesis 15:5-6

sinullà na, netapil si Apu Kesu Kiristu megapu nittam nga minálliwâ. ⁷ Á marigâ gemma nu mabbaluntáriu nga matay yù tolay, nga metapil megapu sù tádday nga tolay nga matunung. Á egga mápugák yù tolay nga mabbaluntáriu nga matay megapu sù tádday nga tolay nga kuruk nga napiá. ⁸ Ngam yá pangipasinganán ni Namarò sù iddù na nittam, ta mássiki nu nakaliwâ ittam paga, inítapil ni Apu Kesu Kiristu yù baggi na megapu nittam.

⁹ Á yáyù nga napakomá ittamin, nga nebiláng ta matunung megapu sù dága ni Apu Kesu nga nepappagá megapu sù liwiliwâ tam. Á ari lâ yian, nu ari gapay ta iyigù na ittam, tapè ari ittam mekanakaná sù pore ni Namarò sangaw nu ukuman na yù ira manaki kuna. ¹⁰ Kinontará tam ngaw si Namarò, ngam kunangane, arát tamin ikalussaw, gapu ta pinakomá na ittam ta liwâ tam ána pinakkápiá na ittamin kuna, megapu sù pate nayù Anâ na. Á gapu ta nakkápiá ittamin kuna, kuruk nga meyigù ittam gapay, gapu ta naginnanolayin si Apu Kesu nga matotolay ta áddè ta áddè nga mangabbák nittam. ¹¹ Á ari lâ yian, ta magayáyá ittam gapay gapu ta napiá ngin yù ággiát tam kâ Namarò. Á dayáwat tam si Namarò megapu kâ Apu Kesu Kiristu nga Yápu tam, ta aggina yù namakkápiá nittam kâ Namarò.

Yù Kingnguá ni Adan ána yù Kingnguá ni Apu Kesu

¹² Á anni má panò ta makaliwâ ittam? Sù ngaw keggá nayù ira olu nga tatolay ta dabbuno, nalliwâ si Adan, nga olu nga tolay, á yáyù pamegapu na palliwâ nayù ira tatolay ta dabbuno, megapu sù táttádday nga tolay. Á natay si Adan megapu sù liwâ na. Yáyù pamegapu na pate nayù ira tatolay ta dabbuno, gapu ta nakaliwâ ittam ngámin. ¹³ Á nalliwâ gemma yù ira ngámin nga tatolay áddè ngaw lage na pangalawá ni Moyses sù tunung ni Namarò, ngam ari netúrâ yù liwâ da, gapu ta arán na paga iniyawâ ni Namarò yù tunung na nira. ¹⁴ Á mepasingan ta nalliwâ yù ira tatolay, gapu ta natay ira ngámin áddè sù keggá ni Adan ta áddè sù keggá ni Moyses, mássiki nu nerumá yù liwâ da sù liwâ ni Adan. Ta nalliwâ si Adan ta pamotu na sù daretu nga taddán ni Namarò kuna.

Á si Adan yù keyarigán ni Apu Kesu Kiristu, ngam aijan yù áddumá ra. Ta kinagi ni Namarò kâ Adan yù kurugan na nakuan, ngam pinotuán na. Á yáyù nga jinok ni Namarò si Apu Kesu Kiristu, nga minay ta dabbuno nga siminubbá kâ Adan. Á kinuruk ni Apu Kesu yù ngámin nga kinagi ni Apu Namarò kuna. ¹⁵ Á kuruk nga naddumá yù kingnguá ni Adan ána yù kingnguá ni Apu Kesu! Ta nalliwâ yù olu nga tolay, á yáyù pamegapu nayù palliwâ ána pate na tolay ta dabbuno. Ngam jinok ni Namarò yù tádday, nga si Apu Kesu Kiristu. Á pinalurò ni Apu Kesu yù inipakuá ni Namarò kuna. Á yáyù nga pinaturù ni Namarò yù allà na nittam, megapu sù kingnguá ni Apu Kesu. Á aru yù ira tatolay nga málá da yù arád da mapagán, nga pamakomá ni Namarò nira, tapè mesipà ira kâ Namarò.

¹⁶ Á nerumá yù pabbalinán nayù kingnguá ni Adan sù pabbalinán nayù kingnguá ni Apu Kesu. Ta napagikáru yù ira ngámin nga tatolay megapu sù liwâ nayù tádday, nga si Adan. Ngam megapu sù pangikállà ni Namarò nira, iniyawâ na yù táttádday nga Anâ na, tapè aru yù ira tatolay nga mapakomá ta aru nga liwiliwâ da, ána mebiláng ira ta matunung. ¹⁷ Á megapu sù liwâ nayù tádday nga tolay, nga si Adan, matay yù ira ngámin nga tatolay. Ngam megapu sù nerallà nga allà ni Namarò, aru yù ira nga mangalawá sù allà na ána yù iyawâ na nira, nga katunung da megapu kâ Apu Kesu, á matotolay ira nga mepammaguray kâ Apu Kesu Kiristu ta áddè ta áddè.

¹⁸ Á yá pabbalinán nayù liwâ nayù tádday nga tolay, ta mapagikáru yù ira ngámin nga tatolay. Ngam megapu sù napiá nga kingnguá nayù tádday, nga si Apu Kesu Kiristu, á mapakomá ittamin, ána mesipà ittam nga mepattolay kâ Namarò. ¹⁹ Á aru yù nalliwâ megapu sù palliwâ nayù olu nga tolay. Ngam megapu sù panguruk nayù tádday, aru yù ira nga mapatunung. ²⁰ Iniyawâ ni Namarò yù tunung na, tapè tákkilalát tam yù liwiliwâ tam nga aru. Á mássiki nu aru yù liwâ tam, patturutan na gapay ni Namarò yù allà na nittam. ²¹ Á natay yù ira ngámin nga tatolay gapu ta kinuruk da yù pakkaragá da nga malliwâ, nga kunnay ta mammaguray nira. Ngam sittam nga makiyápu kâ Apu Kesu Kiristu, kurugat tamin si Namarò nga mangikállà nittam. Á yáyù nga mammaguray ngin si Namarò nittam, á ibiláng na ittam ta matunung megapu sù pangikatalá tam kâ Apu Kesu Kiristu, ána mesipà ittam nga mepattolay kuna ta áddè ta áddè.

6

Yù Meyannung ta Bagu nga Áttole tam

¹ Á gapu ta allà ni Namarò nittam, anni laguk nakuan yù kagiat tam? Máyâ panò ta uputat tam nakuan nga malliwâ, tapè patturuturutan ni Namarò yù pangikállà na nga sigidá na pakomán ittam? Ari gemma! ² Arát tam gemma uputan yù malliwâ! Ta nu kuruk nga ikatalà tam si Apu Kesu, á kunnay ta nesipà ittam gapay kuna ta pate na ta kurù. Á aringin malliwâ yù tolay nga natayin!

³ Arán naw panò ammu yù kebalinán nayù karigù tam? Sittam nga narigù megapu sù ángngikatalà tam kâ Apu Kesu Kiristu, nepattatádday ittam kuna. Á yáyù nga kunnay ta nepappatay ittam gapay kuna.* ⁴ Á kunnay ta nepattatádday ittam gapay kuna sù ketanam na. Á kunnay sù pamaginnanole na kuna ni Namarò nga Yáma na, megapu sù ámmagaddátu na nga makapállà, á mepárik ittam gapay kuna sù áttole na, tapè uputat tam gapay nga akkuán yù napiá nga mepángngà sù bagu nga áttole tam.

⁵ Á gapu ta nepattatádday ittam kâ Apu Kesu, nga nepappatay kuna sù pate na, á yáyù nga mepárik ittam gapay kuna sangaw nu maginnanolay ittam nga kunnay sù paginnanole na. ⁶ Ta ammu tam ta aijan yù dán nga nonò tam nga kunnay ta nebáyuk gapay sù pate ni Apu Kesu ta kurù, tapè máringin yù dán nga nonò tam, nga nakkaragâ ta malliwâ, á ari ittam kunnay ta makiaripan sù mamalliwâ nittam. ⁷ Ta nu natay yù tolay, napalubbágin, á awánin ta awayyá nayù mamalliwâ nga mangaripan kuna.

⁸ Á nu nebiláng ta nepappatay ittamin kâ Apu Kesu Kiristu sù pate na, ammu tam ta mepattotolay ittam gapay kuna. ⁹ Ta ammu tam gemma ta naginnanolayin si Apu Kesu Kiristu, á aringin bulubugá matay. ¹⁰ Á mittán lâ nga natay ta pagikáru na ta liwâ tam ngámin, á yáyù áddè na. ¹¹ Á matolayin, tapè palurotan na ngámin yù ikáyâ ni Namarò nga Yáma na. ¹² Á ta kunnian, ibiláng naw yù baggi naw ta kunnay ta natay kayin nga aringin malliwâ. Á kunnay ta nepaginnanolay kayin, nga bagu yù áttole naw megapu sù kepattatádde naw kâ Apu Kesu Kiristu, tapè akkuán naw gapay yù napiá nga ikáyâ ni Namarò.

¹² Á arán naw laguk itulù yù baggi naw sù narákè nga karagátan naw, tapè arán naw tuppálan yù narákè nga negagángay ta baggi naw. Ta matay gemma yù baggi naw. ¹³ Arán naw laguk iyusá yù baggi naw ta mangnguá ta narákè. Ngam itulù naw yù nonò naw ána ngámin nga baggi naw kâ Namarò, tapè palurotan naw yù napiá nga ipakuá ni Namarò nikayu, ta yáyù mepángngà sù ira nga kunnay ta natayin nga aringin makkaragâ ta narákè, ána kunnay gapay ta nepaginnanolay iren nga mesipà sù pammagurayán ni Namarò. ¹⁴ Ta nelilli kayin sù pammagure nayù mamalliwâ, á yáyù nga ari kayin mapagikáru megapu sù tunung. Ta si Namarò yù mammaguray nikayu, á pinakomá na kayin ta liwiliwâ naw megapu sù allà na.

Napalubbágin ittam, tapè Makiaripan ittam kâ Namarò

¹⁵ Anni laguk yù kagiat tam? Egga panò yù awayyá tam nga akkuán yù narákè nga karagátan tam, gapu ta meiyigù ittam megapu sù allà ni Namarò, tapè ari ittam mapagikáru megapu ta pakaliwâ tam sù tunung? Aringin gemma! ¹⁶ Á ta ángngarigán, nu makiaripan kayu sù tolay, á ammu naw gemma ta aripan na kayu, á yáyù nga kurugan naw yù kagian na. Á kunnian gapay nikayu, ta nu itulù naw yù nonò naw ta narákè nga karagátan naw, á kunnay ta aripan na kayu nayù narákè. Á yá pabbalinán nayù pakiaripan naw ta narákè, ta matay kayu nga mesinná kâ Namarò ta áddè ta áddè. Ngam nu manguruk kayu kâ Namarò, aggina yù Yápu naw, á mesipà kayu kuna, gapu ta ibiláng na kayu ta matunung.

¹⁷ Sù ngaw, kunnay ta aripan na kayu nayù narákè. Ngam kunangane, aringin. Á yáyù nga dayáwak ku si Namarò, ta pinatattam nawin ta nonò naw ána kurugan naw yù napiá nga initudù nikayu. ¹⁸ Á pinalubbágin na kayu ni Namarò sù narákè, tapè makiaripan kayu kâ Apu Kesu, ána akka-akkuán naw lâ yù napiá ána matunung. ¹⁹ Á iyángngarigák ku yù meyanung ta aripan ána yù yápu na, tapè kánnámmuán naw. Á sù ngaw, initulù naw yù baggi naw ta narákè ána sinuppál naw yù narákè nga ninonò naw. Ngam kunangane, itulù naw yù baggi naw kâ Apu Kesu Kiristu, á tuppálan naw yù napiá nga mepángngà kuna, tapè mabbalin ta pareku nga napiá yù nonò naw nga kun na nonò nayù Yápu naw.

²⁰ Sù ngaw pakiaripan naw ta narákè nga nonò naw, ari kayu nesipà sù pammagure ni Namarò ána arán naw kingnguá yù napiá ána matunung nga ipakuá na nakuan nikayu. ²¹ Ngam anni laguk yù malá naw nga balabálà naw sù narákè nga kingngikingnguá naw? Yaw lá pabbalinán na yù kepasirán naw ána pate naw nga mesinná kâ Namarò. ²² Ngam kunangane, pinalubbágin na kayin ni Namarò sù narákè nga nangaripan ngaw nikayu, á pinabbalin na kayin ni Namarò ta aripan na, nga masserbi kuna. Á yá pabbalinán nayù

* 6:3 1 Korinto 12:13; Galasia 3:27

pakiaripan naw kâ Namarò yù napiá nga nonò naw, nga iyawâ na nikayu, tapè tuppálan naw yù napiá nga ipakuá na nikayu, ána mesipà kayu nga mepattolay kuna ta áddè ta áddè. ²³ Ta yù ira tatolay nga makiaripan ta narákè nga pakkaragâ da, mattáddanán ira ta pate ra nga mesinná kâ Namarò ta áddè ta áddè, megapu sù palliwâ da. Ngam ikállà na ittam ni Namarò, á ilimù na nittam yù bagu nga áttolè tam, tapè mesipà ittam kuna nga mepattolay ta áddè ta áddè megapu ta kepattatádde tam kâ Apu Kesu Kiristu nga Yápu tam.

7

Napalubbáng ittam sù Pakáwayyá nayù Tunung

¹ Wáwwagi, kánnámmuán naw yawe nga kagiak ku, sikayu nga makánnámmu sù tunung. Megagarán yù tolay ta keggá na lâ nga matolay, megapu sù ira taddán nga netúrâ sù tunung. ² Á ta ángngarigán nu aijan yù babay nga nakiatáwa, á ta meyanung sù taddán nayù tunung, maggián lâ yù babay sù atáwa na ta keggá na lâ nayù laláki nga matolay paga, á mattádday ira lâ nga magatáwa. Ngam nu natayin yù laláki, á náringin yù pakáwayyá nayù tunung nga meyanung sù olu nga atáwa na, gapu ta natayin, á awayyá nayù babay nga nakiatáwa ta tanakuán. ³ Á ta meyanung sù tunung, nu matolay paga yù olu nga atáwa na, á nu umay yù babay nga nakiatáwa ta tanakuán, ingágad da ta makikarallow. Ngam nu natay yù olu nga atáwa na, á nu nakiatáwa yù babay ta tanakuán, ari makikarallow. ⁴ Á kunnian gapay yù keyarigát tam, sittam nga mangikatalá kâ Apu Kesu. Gapu ta ketádde tam kâ Apu Kesu Kiristu, á kunnay ta nepappatay ittam gapay kuna ta pate na, á napalubbáng ittam sù pakáwayyá nayù tunung. Á yáyù nga metádday ittam sù tanakuán, nga si Apu Kesu Kiristu nga naginnanolay, tapè akkuát tam yù napiá nga ipakuá na nittam, ána meparáyaw si Namarò.

⁵ Á sù ngaw panguruk tam paga sù dán nga nonò tam, narámak tam yù ira taddán ni Namarò nga netúrâ sù tunung, á nangakkakalò yù pakkaragâ tam ta narákè, megapu sù inipanonò nayù tunung nittam. Á yáyù nga nappaná yù narákè nga kingguá tam. Á yá pabbalinán nayù liwiliwâ tam yù pate tam, nga mesinná kâ Namarò ta áddè ta áddè. ⁶ Ngam kunangane, aringín yù tunung yù mammaguray nittam, gapu ta kunnay ta natay ittamin, nga napalubbáng sù pakáwayyá na. Á si Namarò laguk yù passerbiát tam, nga ari megapu sù pakáwayyá nayù tunung nga dán nga netúrâ, nu ari galá megapu sù pakáwayyá nayù bagu nga áttolè tam nga naggapu sù Ikararuá ni Namarò.

Yù Meyanung sù Tunung ána Liwâ

⁷ Á kagiak tam panò ta narákè yù tunung, gapu ta nappaná yù palliwâ tam ta pakánnámmu tam sù tunung? Ari gemma! Nu awán nakuan ta tunung, arák ku ammu ta narákè yù ággangguá. A ta ángngarigán, nu arán na kagian nayù tunung nga kunniaiw, “Ari kayu mamassil,” á arák ku nakuan ammu ta nalliawáku nu passilak ku yù kukuá nayù kabbuluk ku. ⁸ Á gapu ta síkán yù minálliwâ, yáyù nga nangakkakalò yù pakkaragâ ku sù ngámin nga mepugik níkán, megapu sù kinagi nayù tunung, nga aringá nakuan mamassil. Ngam nu awán nakuan ta tunung, awán gapay ta pakaliwaták ku.

⁹ Á sù ngaw aringá paga natudduán sù tunung, kinagi ta napiá yù ággiak ku, ta arák ku ammu yù liwâ ku. Ngam pakánnámmu sù taddán ni Namarò nga tunung, á natákkilalák ku yù liwâ ku, á nappaná laguk yù palliwâ ku. ¹⁰ Á iniyawâ ni Namarò yù tunung tapè mepattolay ittam kuna ta áddè ta áddè megapu sù panuppál tam sù tunung. Ngam mapagikárungá nga matay nga mesinná kâ Namarò, gapu ta arák ku matuppál yù tunung. ¹¹ Ta pakánnámmu sù taddán nga netúrâ sù tunung, inilogò nangá nayù dán nga nonò ku megapu sù narákè nga pakkaragâ ku. Á yáyù nga nakaliwaták ku laguk yù tunung, á kunnay ta pinapáte nangá nayù liwâ ku, gapu ta mapagikáru yù ira minálliwâ, nga matay nga umay ta impiernu. ¹² Á yáyù nga kuruk nga napiá ána mangilin yù ira ngámin nga taddán ni Namarò nga netúrâ sù tunung.

¹³ Á makagi tam panò ta yù napiá nga tunung yù paggapuán nayù pate tam? Ari gemma! Ngam yù liwâ tam galá yù paggapuán nayù pamagikáru ni Namarò nittam, ta pakaliwatát tam yù tunung. Á yáyù nga mepasingan ta kuruk nga narákè yù palliwâ tam megapu sù napiá nga tunung.

Arát tam Matuppál yù Tunung

¹⁴ Ammu tam ta kuruk nga napiá yù tunung, nga naggapu kâ Namarò. Ngam síkán, tolayá lâ nga minálliwâ, á arák ku matuppál yù tunung, gapu ta kunnay ta aripan nangá nayù mamalliwâ. ¹⁵ Á arák ku kánnámmuán yù akkuák ku, ta arák ku garè akkuán yù napiá nga ikáyâ ku nga akkuán, ngam iddá ku lâ akkuán yù narákè nga arák ku ikáyâ. ¹⁶ Á mássiki nu

arák ku akkuán yù ituddu nayù tunung, tákkilalák ku ta kuruk nga napiá yù tunung, gapu ta mappasiráná megapu sù naráké nga akkuák ku. ¹⁷ Á aringin sikán yù paggapuán nayù naráké nga akkuák ku, nu ari galá negapu sù naráké nga pakkaragá nayù dán nga nonò ku, nga manudduák nikán.

¹⁸ Á ammù gemma ta awán ta napiá nga nakeyanaták ku. Awán bulubugá ta napiá sù dán nga nonò ku. Mássiki nu talákkurugak ku nga akkuán yù napiá, ngam arák ku makuá. ¹⁹ Arák ku akkuán yù napiá nga ikáyá ku. Ngam yù naráké nga arák ku ikáyá, yáyù akkuák ku. ²⁰ Á nu akkuák ku yù naráké nga arák ku ikáyá, aringin sikán yù maká-uray, nu ari galá yù naráké nga manudduák nikán, tapè malliwáká.

²¹ Á kunniaw laguk yù ággiák ku. Mássiki nu ikáyá ku nga akkuán yù napiá megapu sù tunung, ngam megagará megapu sù naráké nga karagatán nayù dán nga nonò ku. ²² Ayatán yù nonò ku áнна baggi nga manuppál sù ngámin nga napiá nga tunung ni Namarò. ²³ Ngam ammù ta aijan yù tanakuán nga ággangnguá nayù baggi, nga mangontará sù napiá nga tunung ta nonò ku. Á yáyù nga kunnay ta aripan nangá nayù naráké nga ággangnguá, ta malliwáká megapu sù naráké nga ággangnguá. ²⁴ Kábbingá lâ! Asinni panò yù makáwayyá nga mangiyígù nikán? Asinni yù mamalubbáng nikán sù baggi nga mangngamangnguá ta naráké áнна matay nga mapagikáru ta áddè ta áddè? ²⁵ Dayáwak ku si Namarò, ta aijanin yù mangiyígù nittam, nga si Apu Kesu Kiristu nga Yápu tam.

Á kunniawe laguk yù ággiák ku. Talákkurugak ku nga tuppálan yù napiá nga tunung nga ikáyá ku, gapu ta si Namarò yù passerbiák ku. Ngam aijan yù dán ta nonò ku nga manudduák nikán ta tuppálak ku yù naráké nga karagatán na.

8

Yù Bagu nga Áttole tam nga Naggapu sù Ikararuá ni Namarò

¹ Á sittam nga nepattatádday kâ Apu Kesu Kiristu, kunniaw laguk yù ággiát tam. Awánin bulubugá ta ipekáru ni Namarò nittam. ² Á gapu ta nepattatádday ittamin kâ Apu Kesu Kiristu, pinalubbáng na ittam nayù Ikararuá ni Namarò sù pakáwayyá nayù naráké sù dán nga nonò tam, á iniyawá na nittam yù bagu nga áttóle tam, tapè ari ittam mapagikáru nga mesinná kâ Namarò. ³ Ari ittam meyígù megapu sù tunung, ta megaggak ittam nga ari makatuppál sù tunung, gapu ta naráké yù karagatán nayù baggi tam. Ngam pinalurò ni Namarò yù pangiyígù na nittam, nga ari mapalurò megapu sù tunung. Ta jinok ni Namarò yù Aná na ta umay meyaná ta tolay, tapè egga yù baggi na nga negittá ta baggi tam, ngam awán ta liwá na. Á pinagikáru ni Namarò yù baggi nayù Aná na megapu sù liwiliwá tam ngámin nga tatolay. ⁴ Yáyù pinalurò ni Namarò, tapè mapalurò tam yù napiá nga taddán nga neturá sù tunung. Á yáyù nga arát tamin kurugan yù naráké nga karagatán nayù baggi tam, ngam tumulù ittam sù Mangilin nga Ikararuá ni Namarò, tapè mapalurò tam yù napiá nga ipakuá na nittam megapu sù ángngabbák na.

⁵ Yù ira tatolay nga tumulù sù pakkaragá nayù baggi ra, nonopad da lâ yù naráké nga karagatán nayù dán nga nonò da. Ngam nu tumulù ittam sù Mangilin nga Ikararuá ni Namarò, ipittá tam laguk ta nonò tam yù napiá nga ituddu na. ⁶ Ta nu tumulù yù tolay sù naráké nga pakkaragá nayù baggi na, impiernu lâ yù labbetán na. Ngam nu tumulù ittam sù Ikararuá ni Namarò, magimammá yù nonò tam, á mepattolay ittam nga mesipá kâ Namarò ta áddè ta áddè. ⁷ Á nu nonopat tam yù naráké nga pakkaragá nayù baggi tam, makikontará ittam kâ Namarò, gapu ta arát tam kurugan yù tunung na. Á arát tam gemma matuppál yù tunung na, gapu ta megaggak ittam megapu sù naráké nga karagatán nayù dán nga nonò tam. ⁸ Á nu tumulù ittam sù naráké nga pakkaragá nayù baggi tam, arát tam mapagayáyá si Namarò.

⁹ Ngam sikayu nga paggianán nayù Ikararuá ni Namarò, arán nawin kurugan yù naráké nga pakkaragá nayù baggi naw. Ngam kurugan naw yù ipakánnámmu na nikayu nayù Mangilin nga Ikararuá ni Namarò, gapu ta kuruk nga maggiánin nikayu. Á yù tolay nga arán na paggianán nayù Ikararuá ni Apu Kesu Kiristu, ari yù tole na. ¹⁰ Ngam maggián si Apu Kesu Kiristu nikayu, á mássiki nu máwák nga matay yù baggi naw megapu sù liwá naw, á mepattolay kayu sù Ikararuá ni Namarò, gapu ta pinakomá na kayu ni Namarò ta liwá naw, áнна inibiláng na kayu ta matunung. ¹¹ Á pinaginnole ni Namarò si Apu Kesu Kiristu. Á nu kuruk nga maggián yù Mangilin nga Ikararuá ni Namarò nikayu, paginnanolan na gapay sangaw ni Namarò yù baggi naw megapu sù Ikararuá na nga maggián nikayu.

¹² Á wáwwagi, yáyù nga aijan yù máwák tam nga palurotan, ngam arát tam palurotan yù naráké nga karagatán nayù baggi tam. ¹³ Á nu kurugan naw yù naráké nga pakkaragá

naw, mokum kayu nga mesinná kâ Namarò ta áddè ta áddè. Ngam nu tumulú kayu sù Ikararuá ni Namarò, ána arán naw akkuán yù narákè nga karagátan nayù baggi naw, mepattolay kayu nga mesipà kâ Namarò ta áddè ta áddè. ¹⁴ Ta sittam ngámin nga tumulú sù Ikararuá ni Namarò, ánâ na ittam ni Namarò. ¹⁵ Á gapu ta ánâ na ittamin ni Namarò, ari ittamin maganássing nga kunnay ta ikássing na aripan sù yápu na. Ta iniyawâ ni Namarò nittam yù Ikararuá na, á yáyù nga aijanin yù awayyá tam nga magubobuk kuna, nga kut tam, “Ammò, nga Yáma tam!” ¹⁶ Á yù Ikararuá ni Namarò nga maggián nittam yù mangipakánnámmu nittam ta ánâ na ittam ni Namarò. ¹⁷ Á gapu ta pinataganátan na ittam ni Namarò, ipakánnámmu na gapay nittam nayù Ikararuá na ta mesipà ittam sù ngámin nga inittabbá ni Namarò, nga iyawâ na kâ Apu Kesu Kiristu. Ta máwák nga iyangngâ tam yù balle tam nga jigâ, nga kunnay sù pangiyangngâ ni Apu Kesu Kiristu, tapè mesipà ittam gapay kuna sù kepotun na ána keparáyo na.*

Yù Napiá nga Iddanamán nayù ira Mangikatalà kâ Apu Kesu

¹⁸ Nonopat tam yaw, ta mássiki nu narámmà yù jigirigâ tam ta keggá tam sawe dabbuno, á kunnay ta awán lâ yù jigâ tam nu nonopat tam yù pagayáyâ tam megapu sù ngámin nga napiá ána nakástá nga mepalappâ nittam sangaw nu iparáyaw ni Namarò ittam. ¹⁹ Á ari lâ sittam nu ari gapay yù ira ngámin nga naparò ta dabbuno yù mapattú nga magiddi-iddak sù pangipalappâ ni Namarò sù ira ánâ na. ²⁰ Sù ngaw nga nabayágin, inigagek ni Namarò yù ira tatolay ána pinatalián na yù ággiád da megapu sù liwâ da, á nekanakanâ yù ngámin nga dabbuno ána ngámin nga naparò sù pangigagek na nira, nga ari megapu ta ure ra, ngam megapu galá sù ure ni Namarò. Á yáyù nga arán na ira pinabbalin paga ta kun na ikáyâ na, ta mallabbak lâ mallabbak yù ngámin nga pinarò na. Ngam aijan gapay yù iddanamád da. ²¹ Ta palubbáangan na ira galá sangaw ni Namarò sù pangigagek na sù ngámin nga naparò, tapè mesipà yù ngámin nga pinarò ni Namarò sù pangiyigù na sù ira ánâ na ána yù pamalubbáang na nira, á awánin ta matay ána marúnú.

²² Á ammu tam yù ággián nayù ngámin nga naparò ta áddè ngaw sù keggá ni Adan ta áddè kunangan, nga kunnay ta babay nga magaráyan nga magiddak ta paganâ na. ²³ Á ari lâ yù dabbuno ána yù mayán na yù marigirigâ nga magiddi-iddak, ngam sittam gapay nga iniddán nen ni Namarò sù Ikararuá na, nga olu nga inittabbá na nittam. Ta kunnay ta magaráyan ittam nga mapattú nga magiddi-iddak sù pangipalappâ ni Namarò nittam nga pinataganátan na, ána yù panguli na sangaw sù baggi tam ta bagu nga ari mataki ána ari matay. ²⁴ Á áddè ngaw sù pamegapu tam panguruk kâ Apu Kesu Kiristu ta áddè kunangan, iddanamát tam yù paginnanole tam. Á mássiki nu neyigù ittamin, arát tam paga nálâ yù iddanamát tam, ta nu nálâ tam nakuan, arát tamin iddanamán. ²⁵ Ngam gapu ta iddanamát tam yù arát tam paga nálâ, ari ittam laguk malurâ nga magiddak ta áddè ta arát tam pakálawâ kuna.

Ipakimállà na ittam nayù Ikararuá ni Namarò

²⁶ Á mábbágán ittam megapu sù pagiddanáma tam. Á aijan yù pakkapiyát tam, á arát tam garè ammu yù kapiánán nga ipakimállà tam, nga mepángngâ sù ira ánâ ni Namarò. Ngam yù Mangilin nga Ikararuá ni Namarò gapay yù mangabbák nittam, á ipakimállà na ittam megapu sù panalasiá na nga ari makagi. ²⁷ Á si Namarò, nga makánnámmu sù ngámin nga egga ta nonò tam, kánnámmuán na gapay yù egga ta nonò nayù Mangilin nga Ikararuá, gapu ta ipakimállà na ittam ána kiddawan na lâ yù ikáyâ ni Namarò nga meyanung nittam.

²⁸ Á sittam nga mangiddù kâ Namarò, maguray lâ yù mesimmu nittam nga napiá onu marigâ, á ammu tam ta napiá yù pabbalinán na, gapu ta yáyù talákkurugan ni Namarò ta meyanung sù ira ngámin nga inagálán na ta mangikatalà ána manguruk kuna. ²⁹ Á ta áddè ngaw, dán nga ammu ni Namarò yù ira nga manguruk kuna. Á danniaw ira gapay, sinalákkuruk ni Namarò ta pabbalinan na ira ta kagittá nayù Anâ na nga táttáday, tapè aggina yù kaká nayù ira aru nga pabbalinan na ta mawwawági. ³⁰ Á danniaw ira nga sinalákkuruk ni Namarò ta pabbalinan na ta ánâ na, inagálán na ira gapay, tapè mangikatalà ira sù Anâ na. Á yù ira nágalán na, pinakomá na ira gapay sù liwiliwâ da, ána inibiláng na ira ta matunung. Á danniaw ira nga inibiláng na ta matunung, iráyo na ira gapay, ána isipà na ira sù dalingárang na.

Yù Pangiddù ni Namarò nittam Megapu kâ Apu Kesu Kiristu

³¹ Á gapu ta pakánnámmu tam sù napiá nga akkuán ni Namarò megapu nittam, anni laguk yù kagiat tam nga meyanung sù ággiát tam? Egga panò yù manganni nittam? Awán

* 8:17 2 Korinto 1:5; 1 Eduru 4:13

bulubugá! Ta si Namarò yù mangabbák nittam. ³² Sù ngaw, ari nabbábáng si Namarò nga mangiyawá sù Aná na nga táttádday, tapè metapil megapu nittam ngámin. Á gapu ta kunnian yù allà na nittam, á arán na panò laguk iyawá nittam yù ngámin nga máwák tam nga arát tam matalián? Dán nga naparán nga mangiyawá nittam!

³³ Á gapu ta sinullà ni Namarò ittam ta tatole na, egga panò yù makáwayyá nga mangikeká nittam? Awán! Ta si Namarò gemma yù mamakomá nittam, tapè ibiláng na ta matunung ta ánninganán na. ³⁴ Egga panò yù mamanunnù nga mamagikáru nittam? Awán bulubugá! Ta si Apu Kesu Kiristu yù mamanunnù nga sinullà ni Namarò. Á si Apu Kesu Kiristu yù natay nga nagikáru ta liwá tam, nga naginnanolayin nga nepotun sù gián nayù maráyaw ta jiwánan ni Namarò. Á aggina yù makimállà ká Namarò megapu nittam.

³⁵ Á anni laguk panò yù makáwayyá nga mangari sù iddù ni Apu Kesu Kiristu nittam? Awán! Mássiki nu marigirigá ittam onu mabagabagal ittam, nu egga yù manigirigá nittam megapu sù panguruk tam ká Apu Kesu, nu mabisin ittam onu awán ittam ta gámi, nu egga yù mangnguá nittam, nu egga yù mamapátay nittam, á maguray lá yù mesimmu nittam, ari ittam mesinná ká Apu Kesu Kiristu nga mangiddù nittam. ³⁶ Á kunnian yù inipetúrâ ni Namarò, nga kinagi nayù ira tatole na nga meyanung sù jigâ da, nga kud da, “Apu, tangatangággaw ta kággággaw, iddagám mi yù pamapáte ra nikami megapu ta ángnguruk mi nikaw.

Á aijan kami ta ánninganán nayù ira tatolay nga kunnay ta karneru nga partiad da sangaw.”†

³⁷ Á mássiki nu malannapán yù jigâ tam, awán ta makatubáng nittam, ta appútat tam ngámin megapu ká Apu Kesu Kiristu nga mangiddù nittam. ³⁸ Á ammù ta kuruk nga ari ittam bulubugá mesinná ká Namarò nga mangiddù nittam. Á mássiki nu matolay ittam onu matay ittam, iddukan na ittam paga. Á awán ta makári sù iddù na nittam, mássiki nu yù ira makáwayyá ta dabbuno, onu yù ira makáwayyá ta lángi, nga daroban ni Namarò nga ari masingan, onu di Satanas ána yù ira daroban na nga anitu. Á awán bulubugá ta umay nittam kunangane onu umay nittam noka, nga makári sù pangiddù ni Namarò nittam. ³⁹ Á mássiki yù ira ngámin nga makapangnguá nga aijan ta lángi ána ta dabbuno, ána ngámin nga naparò, awán nira ta makáwayyá nga mangari sù iddù ni Namarò nittam, nga megapu ká Apu Kesu Kiristu nga Yápu tam.

9

Yù Pappili ni Namarò sù ira Ginaká ni Abrakam

¹ Á aijan yù ikáyá ku nga kagian nikayu, á kuruk yù kagiak ku, ta netáddayá ká Apu Kesu Kiristu, ána maggián níkan yù Mangilin nga Ikararuá ni Namarò, nga mangipakánnámmu ta nonò ku ta kuruk yù kagiak ku. Aringà massiri, ta pakkagi nikayu ² ta kuruk nga nepallá yù daddam ku, á kunnay ta mabagal yù putù nga ari mabannáyán, ³ megapu sù ira kagittá nga Kudio. Á nu egga nakuan yù awayyá, parè bi ta síkan nakuan yù táli ra, nga mokum ána mesinná ká Apu Kesu Kiristu ta áddè ta áddè, megapu sù liwá da, tapè meyigù ira nakuan. ⁴ Ta aggira yù ginaká ni Israel, nga piníli ni Namarò ána pinataganatán na ira. Á aggira yù nappalappátán ni Namarò sù dalingárang na, nga panákkilalád da ta aijan si Namarò nira. Á aijan yù ira tarátu ni Namarò nira, nepatalugáring ta iniyawá na nira yù tunung na. Á inituddu ni Namarò nira yù áddáyo ra kuna ána ákkimállà da kuna. Á aru yù napiá nga initabbá na nira. ⁵ Á yù ira ngaw naggaká nira, aggira yù ira ngaw giriámán nga neparámak: di Abrakam, kári Isak, ána si Akup nga ingágan ni Namarò ta Israel. Á ta meyanung sù katatole na, ginaká ra gapay si Apu Kesu Kiristu, nga mammaguray ta ngámin nga makkakerumá nga tatolay. Parè bi laguk ta meparáyaw si Namarò ta áddè ta áddè. Á mapaluré! Ammán.

⁶ Á mássiki nu aijan yù ira Kudio nga manaki nga manguruk ká Apu Kesu, arát tam makagi ta awán ta serbi nayù initabbá ni Namarò nira. Ta ari yù ira ngámin nga ginaká ni Israel yù mesipá sù ira tatole ni Namarò. ⁷ Á ari yù ira ngámin nga ginaká ni Abrakam yù mebiláng ta kuruk nga ginaká na nga mesipá sù pangitabbá ni Namarò kuna. Ta kinagi ni Namarò ká Abrakam, “Yù ira lá nga ginaká ni Isak yù mebiláng ta ginakám nga initabbá nikaw.”* ⁸ Á yá kebalinán nayù kagian na, ta ari mebiláng ta ginaká ni Abrakam yù ira ngámin nga ginaká na, nu ari galá yù ira ginaká na nga neyaná megapu sù pangitabbá ni Namarò ká Abrakam.

† 8:36 Salmo 44:22 * 9:7 Genesis 21:12

⁹ Á sù ngaw lage na keyanâ ni Isak, yawe yù initabbá ni Namarò kâ Abrakam nga meyanung kâ Isak, nga kun na, “Sangaw nu mapasá yù tangaragun, á mattolingá, á maganá si Sara ta anâ mu nga láláki,”† kun ni Namarò. ¹⁰ Á kunnian gapay yù nesimmu ta paganâ ni Rabeka sù ira jiping nga láláki, di Eso kâ Akup, nga ánâ ni Isak. ¹¹ Ta lage ra neyanâ, awán paga ta kingnguá ra nga napiá onu narákè, á inipakánnámmu ni Namarò ta aggina lápay yù manalákkuruk ta meyanung sù ira agálán na, nga ari megapu sù kingnguá ra. ¹² Á ta kabussi ni Rabeka, nga ari paga naganâ, kinagi ni Namarò kuna: “Yù kaká nga anâ mu, passerbián na yù urián na,”‡ kun na. ¹³ Yáyù gapay yù kebalinán nayù inipetúrá na ngaw ni Namarò nga kunniaw: “Piníli si Akup nga iddukak ku, ngam nanakiták ku si Eso.”§

Si Namarò yù Mangikállà ána Matunung

¹⁴ Á gapu ta kunnian yù kinagi ni Namarò, kagiat tam panò ta ari matunung si Namarò gapu ta pilian na yù tádday ánnè sù tádday? Ari gemma. ¹⁵ Makáwayyá si Namarò nga mammaguray. Á kinagi na ngaw kâ Moyses: “Sikán lâ yù maguray sù ira kábbiak ku. Á piliak ku yù ira ikállà ku.”* ¹⁶ Á yáyù nga ammu tam ta ari napili yù tolay megapu sù ikáyá na, á ari megapu sù akkuán na. Ngam pilian ni Namarò yù ira tatole na megapu galá sù allá na.

¹⁷ Á nonopat tam yù neturá nga kinagi na ngaw ni Namarò kâ Paro, nga patul na Egipto. Kinagi na, “Sinullá taka, ta sikaw yù patul nga mammaguray, tapè sikaw yù pangipasinganák ku sù ámmagaddátù, ána meparámak yù ngágak ku sù ira tatolay ta ngámin nga dabbuno.”† ¹⁸ Á yáyù nga mepakánnámmu ta si Namarò lápay yù maká-uray nga mappili sù ira ikállà na. Á aggina gapay yù maká-uray sù ira ikáyá na nga paguráyán ta áddè ta kataggá nayù nonò da.

¹⁹ Á gapu ta awán ta áddè nayù pakáwayyá ni Namarò, aijan támma nikayu yù makkagi nikán, nga kun na, “Anni má laguk ta paliwatan ni Namarò ittam? Egga panò mássiki tádday nga tolay nga makatubáng ta ure na? Awán!” ²⁰ Ngam yawe itabbák ku. Egga panò yù tolay nga makáwayyá nga tubbák kâ Namarò! Tolley ittam lâ gemma! Á ta ángngarigán, yù bánga nga pidde na tolay, egga panò yù awayyá na nga tabbatabbagan yù namadday kuna? Awayyá na panò nga kagian, “Ngattá laguk ta pidde mà ta kunniaw nga ággiák ku?” Ari gemma! ²¹ Á ta ángngarigán, yù maddamili. Aijan gemma yù awayyá na nga mappili sù ággián nayù paddayan na. Á paddayan na yù tádday nga nakástá nga angáng nga mapayyán ta binaráyáng ta bodá, ána yù tádday nga bánga nga baddi nga maguray lá yù mepay kuna ta kággággaw.

²² Á yáyù keyarigán ni Namarò gapay, ta aggina lápay yù maká-uray sù akkuán na. Á inikáyá na nga ipasingan yù pore na sù ira minálliwá, ána ipakánnámmu na nira yù pakáwayyá na nga mangukum sù ira ngámin nga narákè. Ngam inattamán na lâ ta nabayák yù ira minálliwá, nga dán nga napanán nga mokum nakuan. ²³ Á yá ipangiyattam na nira, tapè ipakánnámmu na sù ira ngámin nga tatolay yù pangikállà na sù ira mangikatalá kuna, nga pinarán nen ta mangalawá sù pangisipátán na nira. ²⁴ Á ari lâ sittam nga Kudio yù inagálán na nga ikákkállà na, nu ari gapay yù ira ari Kudio.

²⁵ Á kinagi na ngaw ni Namarò yù meyanung ta pangisipá na gapay nikayu nga ari Kudio, ta inipetúrá na ngaw kâ Kuseya nga kunniaw: “Yù ira arák ku ngaw tatolay, aggira sangaw yù tatolè.

Á yù ira arák ku ngaw iniddù, aggira yù abbúnak ku ta tatolè nga iddukak ku.

²⁶ Á yù ira ngaw tatolay nga nakkagiák ku ta, ‘Ari sikayu yù tatolè,’

á makagi sangaw ta giád da ta aggira yù ánâ ni Namarò nga matotolay.”‡

²⁷ Á aijan gapay yù initúrá ni Isaya nga inilayalayá na nga meyanung sù ira ginaká ni Israel, nga kunniaw:

“Mássiki nu magaru yù ira ginaká ni Israel,

áddè ta ari ira mabiláng nga kunny ta dágá ta aggik na bebay,

á baddi lá yù ira mabuná nga meygù.

²⁸ Ta sangaw, á ikáddagá na lâ ukuman ni Namarò yù ira tatolay ta dabbuno,

á mabi lá yù pamalurò na sù kinagi na.”§

Yáyù inilayalayá na ngaw ni Isaya. ²⁹ Á yawe gapay yù kinagi na ngaw ni Isaya:

† 9:9 Genesis 18:10, 14. ‡ 9:12 Genesis 25:23 § 9:13 Malakia 1:2-3 * 9:15 Exodo 33:19 † 9:17 Bibbiram mu yù ngámin nga istoriá na ta Exodo 9:13-16. ‡ 9:26 Oseas (Kuseya) 1:10; 2:23 § 9:28 Isaya 10:22-23

“Si Namarò yù Yápu tam,
 nga mammaguray ána mamanunnù ta ngámin.
 Á nu arán na ittam ikállà nga Kudio,
 á awán nakuan ta baddi nga mabuná sù ira ginaká tam
 megapu sù pamággáng na nira.
 Á mepárik ittam nakuan sù ira ngaw tatolay ta ili na Sodoma ána Gomorra,
 nga pinággáng na ngaw, nga awán bulubugá ta nabuná.”*

Manakì paga kâ Apu Kesu yù ira Ginaká ni Israel

³⁰ Anni laguk yù kebalinán nayù kinagi? Á yù ira ari Kudio, mássiki nu arád da aleran yù katunung da, ta arád da ninonò nu kunnasi yù pakipiá ra kâ Namarò, á nakkápiá ira galá kâ Namarò megapu sù ure na, ta inibiláng na ira ta matunung megapu sù pangikatalá da kâ Apu Kesu Kiristu. ³¹ Á yù ira Kudio nga nagala-alek sù katunung da ta ánninganán ni Namarò megapu sù pamalurò da ta tunung, á arád da mapalurò yù tunung. ³² Á anni má panò? Gapu ta arád da ikatalá si Apu Kesu Kiristu, nga nanuppál sù tunung megapu nira, tapè mesipà ira nakuan sù katunung na. Ta kagiad da ta matunung ira megapu ta panuppál da sù tunung, ngam arád da gemma matuppál sù tunung, ána panakitád da si Apu Kesu Kiristu. Á yáyù nga meyárik si Apu Kesu ta batu, nga kesiddúkalád da. ³³ Yáyù kebalinán nayù inipetúrá na ngaw ni Namarò nga kunniaw:

“Tángngagan naw yaw. Tán nga lugár nga mangngágan ta Sion,†
 yáyù pangipayyák ku sù kun na batu nga ánnáddagán nayù balay, tapè mesiddúkal ira nga mapalakak.

Ngam yù ira mangikatalá kuna, ari ira mepasiránán.”‡

10

Táttáddy lâ yù Pakiyígután na Tolay

¹ Wáwwagi, nepallà yù pakkaragá ku ta meyígù nakuan yù ira kagittá nga Kudio, á yáyù nga sigidá nga ipakimállà ku kâ Namarò. ² Á sistuiguák ku ta kuruk nga maláppà ira nga manuppál sù kagiad da nga ikáyá ni Namarò, ngam arád da garè kánnámmuán yù kuruk nga ikáyá na nga meyanung sù pakiyápu ra kuna. ³ Arád da kánnámmuán yù pamakomá ni Namarò ta tatolay, tapè mebiláng ira ta matunung sù ánninganán na. Á yáyù nga parubád da lápay nga tunungan yù nonò da ána yù akka-akkuád da megapu ta panuppál da sù tunung. Á panakitád da yù pamammapiá ni Namarò nira, tapè matunung ira ta ánninganán na. ⁴ Á yaw yù pamammapiá ni Namarò ta ngámin nga tatolay, ta minay si Apu Kesu Kiristu ta dabbuno, á aggina yù mamalurò sù tunung ni Namarò nga arád da mapalurò, tapè matunung ta ánninganán ni Namarò yù ira ngámin nga mangikatalá kâ Apu Kesu.

Awán ta Tolay nga Panakitán ni Namarò

⁵ Sù ngaw, initúrá ni Moyses yù meyanung sù ira tatolay nga mebiláng ta matunung megapu ta pamalurò da sù tunung ni Namarò. Kinagi ni Moyses, “Nu palurotan na ngámin, ána awán ta talákayan na, á matolay megapu ta pamalurò na sù tunung.”*

⁶ Ngam aijan gapay yù inipetúrá ni Namarò nga meyanung sù ámmanunung na ta tatolay megapu galá sù ángngikatalá da kâ Apu Kesu Kiristu, nga kun na, “Arán naw kagian ta máwák yù umay ta lángi, tapè iyutták na saw yù MakKiristu nga Mangiyígù.” Ta jinok nen gemma saw ni Namarò si Apu Kesu. ⁷ Á kagian na gapay, “Arán naw kagian ta máwák yù umay ta unak na dabbun sù gián na námmatay, tapè iyunè na yù MakKiristu.” Ta Matolay si Apu Kesu, gapu ta pinaginnole ni Namarò. ⁸ Ngam yawe yù netúrá, nga kun na, “Aijan nikayu yù bilin ni Namarò nga meyanung sù ángngiyígù na ta tatolay. Á aijan yù awayyá naw nga nononopan ána ubu-ubobugan yù bilin na.”† Á yawe bilin na yù ilayalayá mi.

⁹ Á nu kagian naw sù ira kábulun naw ta si Apu Kesu galá yù Yápu naw, ána kuruk nga manguruk kayu ta matolay si Apu Kesu Kiristu gapu ta pinaginnole ni Namarò, á meyígù kayu, nga mesipà kâ Namarò ta áddè ta áddè. ¹⁰ Ta íbiláng ni Namarò ta matunung yù tolay megapu sù pangikatalá na kâ Apu Kesu Kiristu. Á meyígù megapu sù pakkagi na sù pangikatalá na kâ Apu Kesu ta arubáng nayù kábulun na.

* 9:29 Isaya 1:9 † 9:33 Sion yù puddul nga gián na ili na Jerusalem, nga paggianán nayù palásiu nayù ngaw Patul Dabid, nga paggianán nayù gubermente nayù ira Israel ána yù sinniál nayù keparáyo ra ána yù karáyo ni Namarò.

‡ 9:33 Isaya 8:14; 28:16; 1 Eduru 2:6-8 * 10:5 Libitiko 18:5; Galasia 3:12 † 10:8 Deuteronomio 30:12-14

¹¹ Á aijan gapay yù inipetúrâ na ngaw ni Namarò nga kun na, “Awán bulubugá ta mepasiránán sù ira nga mangikatalà kâ Apu.” ¹² Á ari merumá yù ira Kudio sù ira nga ari Kudio, ta táttádday lâ yù Yápu ra, á ikákkállà na yù ira ngámin nga makimállà kuna. ¹³ Á netúrâ gapay yaw: “Ngámin yù ira nga makimállà kâ Apu ta iyígù na ira, á iyígù na ira.”†

¹⁴ Á egga panò yù awayyá nayù ira tatolay nga makimállà kâ Apu ta iyígù na ira, nu arád da ikatalà? Awán gemma. Á egga panò yù awayyá ra nga mangikatalà kuna, nu arád da paga narámak yù meyannung kuna? Awán! Á kunnasi laguk yù pakaginná ra sù meyannung kuna, nu awán ta umay nga mangilayalayâ? ¹⁵ Á egga panò yù umay mangilayalayâ sù napiá nga dámak nu arán na jinok ni Namarò? Ngam aijan yù ira nga jinok ni Namarò, á magayáyâ yù ira tatolay nga magginná sù ilayalayâ da. Aijan yù meyannung nira nga inipetúrâ na ngaw ni Namarò nga kunnaw: “Magayáyâ ittam megapu sù labbè nayù ira nga umay mangilayalayâ sù napiá nga dámak.”§ ¹⁶ Á aru yù ira nakaginná sù bilin ni Namarò, ngam baddi lâ yù ira manguruk kuna. A si Isaya nga yù ngaw ábbilinán ni Namarò, kunnian yù iniyabbù na ngaw kâ Namarò, “Apu, egga panò yù manguruk sù inilayalayâ mi?”*

¹⁷ Á mássiki nu baddi yù ira nga manguruk, á máwák nga makaginná yù ira tatolay sù napiá nga dámak nga melayalayâ nga meyannung kâ Apu Kesu Kiristu, lage ra mangikatalà kuna. ¹⁸ Á aijan yù iyabbù ku laguk. Á yù ira Kudio, arád da panò naginná yù bilin ni Namarò? Narámak da gemma! Ta aijan yù inipetúrâ ni Namarò nga kun na, “Narámak da yù bilin ni Namarò

ta ngámin nga lugár.

Nelayalayâ yù ubobuk na,

nga nassamá ta ngámin makkakerumá nga tatolay ta dabbuno.”†

¹⁹ Á yawe iyabbù ku laguk. Yù ira Kudio, arád da panò kánnámmuán ta ari lâ aggira yù mesipá kâ Namarò, nu ari gapay yù ira ngámin nga makkakerumá nga ari Kudio? Nánnámmuá da gemma. Ta si Moyses yù napolu nga nangipakánnámmu nira, ta kinagi na yù kinagi ni Namarò, nga kun na, “Alawatak ku yù ira tatolay nga ari Kudio,

tapè mangabubu kayu nira.

Á mapporay kayu

megapu ta pangikállà ku sù ira tanakuán nga tatolay nga ari natudduán.”‡

²⁰ Á si Isaya, nga yù ngaw ábbilinán, ari naganássing ta pakkagi na sù kinagi ni Namarò sù ira Kudio nga meyannung sù ira ari Kudio. Kinagi na, “Nálerád dangà nayù ira ari nagalek níkán.

Á nappasinganá sù ira nga ari nangiyabbù ta meyannung níkán.”

²¹ Ngam ta meyannung sù ira Kudio, kinagi ni Namarò,

“Nabayágakin nga magágál nira,

ta umay ira nakuan nga mangikatalà níkán,

ngam nataggâ yù nonò da, á potuád dangà paga.”§

11

Yù Allà ni Namarò sù ira Kudio

¹ Á yawe iyabbù ku laguk. Gapu ta manaki yù ira Kudio nga manguruk kâ Namarò, á kagian naw panò ta sináttájjíán ni Namarò ira nga sinullà na ta tatole na? Ari gemma! Aijan paga yù ira baddi nga nabuná nga tatole na. Á síkán lápay yù tádday nga kukurugán nga Kudio, nga ginaká ni Israel. Si Abrakam yù naggaká níkán, á ginaká nangá ni Benjamin, nga urián nga aná ni Israel, nga apù ni Abrakam. ² Arán na gemma sináttájjíán ni Namarò yù ira Kudio nga pinúli na ngaw ta tatole na. Nonopan naw bì yù ngaw inipetúrâ ni Namarò nga meyannung kâ Elias. Ta pakimállà ni Elias kâ Namarò, iniránuk na yù ira kingnguá nayù ira ginaká ni Israel. ³ Kinagi ni Elias kâ Apu Namarò, “Apu, pinapáte ra yù ira ábbilinám mu! Á iniwarawará da yù batu nayù ira pattuggiád da ta iyátáng da níkaw! Á síkán lâ yù nabuná nga manguruk níkaw! Á igagánga rangá papatáyan gapay!” kun na. ⁴ Á anni yù initabbák ni Namarò kâ Elias? Kinagi na, “Aijan lâ paga pituribu nga tatolè nga nabuná, nga ari makimoray sù Baal, nga sináddios nga pidde nayù ira pakipaggianá da.”*

† 10:13 Joel 2:32 § 10:15 Isaya 52:7 * 10:16 Isaya 53:1 † 10:18 Salmò 19:4 ‡ 10:19 Deuteronomio 32:21

§ 10:21 Isaya 65:1-2 * 11:4 Bibbíram mu 1 Ar-ari 19:14, 18 (1 Patul ira)

⁵ Á kunnay ta ajjan ngaw yù ira nabuná, á kunangane ajjan paga yù ira nga baddi nga nabuná nga Kudio, nga piníli ni Namarò ta tatole na gapu ta ikáyá na ira nga ikállà. ⁶ Á yá lá ipappíli ni Namarò nira yù allà na nira, nga ari megapu sù napiá nga akka-akkuád da. Nu yù napiá nga akka-akkuád da yù ipappíli na nakuan ni Namarò nira, á aringin nakuan laguk megapu sù allà na.

⁷ Á kunnasi laguk yù ággián nayù ira ginaká ni Israel? Mássiki nu ala-alerad da yù katunung da megapu ta panuppál da sù ira taddán ni Namarò nga netúrâ sù tunung na, tapè alawatan na ira ni Namarò ta tatole na, á arád da nálek. Yù ira lá nga baddi nga mangikatalà kâ Apu, aggira yù piníli ni Namarò nga mebiláng ta matunung. Ngam yù ira káruán, nataggá yù ulu ra. ⁸ Yáyù kebalinán nayù inipetúrâ ni Namarò nga kun na, “Pinataggá ni Namarò yù nonò da áddè kunangan.

Á egga matá ra,

ngam arád da matákkilalán yù maggapu kâ Namarò.

Á egga talingá ra,

ngam arád da kánnámmuán yù kebalinán nayù bilin na.”†

⁹ Á kinagi na ngaw gapay ni Patul Dabid yù meyanung nira, nga kun na,

“Parè bì ta mapagikáru ira,

gapu ta náttamád da yù pakimore ra kâ Apu ta pappiestá ra ána yù ira káruán nga ipagayáyá da.

Parè bì ta kunnay ta mapalakak ira,

tapè bálatan ni Namarò ira ta liwiliwá da.

¹⁰ Parè bì ta makkallà yù nonò da,

tapè arád da kánnámmuán yù kuruk nga naggapu kâ Namarò.

Parè bì ta maparigá ira ta áddè ta áddè,

nga kunnay ta makkabbuk megapu sù narámma nga kátuan na.”‡

Yáyù kinagi na ngaw ni Patul Dabid.

Yù Keyígù nayù ira Makkakerumá nga Ari Kudio

¹¹ Anni panò yù pabbalinán nayù kataggá na nonò nayù ira Kudio? Kagiát tam panò ta táttájián ni Namarò ira ta áddè ta áddè? Ari gemma. Ngam megapu sù liwá nayù ira Kudio, pinaguráyán na ira lábbi, á inagálán na yù ira ari Kudio ta umay ira makiyígù kuna, tapè mangabubu yù ira Kudio, ána manoli ira nga manguruk kuna. ¹² Á nu napiá yù ángngabbák ni Namarò sù ira makkakerumá nga ari Kudio megapu sù liwá nayù ira Kudio, á pappanganá sangaw nu manoli yù ira Kudio nga mesipá kâ Namarò, ta patturutan ni Namarò yù napiá nga iyawá na sù ira ngámin nga ari Kudio.

¹³ Á sikayu nga ari Kudio, yawe yù kagiak ku nikayu, ta binilin nangá ni Namarò ta umayá nikayu mangilayalayá. Á yáyù nga magayáyáká nga mangilayalayá sù napiá nga dámak nga meyanung kâ Apu Kesu Kiristu. ¹⁴ Á nu maláppaká nga mangilayalayá nikayu, parè bì ta mangabubu yù ira ikáttole nga Kudio, ána ajjan nira nakuan yù ira meyígù. ¹⁵ Ta gapu ta panáji ni Namarò sù ira Kudio megapu sù panakí da kuna, iniyawá na laguk ni Namarò sù ira ngámin nga ari Kudio yù awayyá ra nga makiyígù kuna. Á nu nakkápiá yù ira ari Kudio kâ Namarò megapu sù panáji ni Namarò sù ira Kudio, á más napiá sangaw nu alawatan ni Namarò yù ira Kudio, nga kunnay ta paginnanolayan na ira sù ira námmatay!

¹⁶ Á kunnaw yù keyarigán nayù ira Kudio. Ajjan yù kustombare ra, nu mappadday ira ta pán, á isinná ra yù baddi nga iyátáng da kâ Namarò. Á nu mangilin yù nesinná nga kuá ni Namarò, á kuá na gapay nga mangilin yù paggapuán na. Á meyárik ira gapay ta káyu na olibo nga nemulá. Nu kuá ni Namarò yù gamù na, kuá na gapay yù ira pangapangá na. ¹⁷ Ngam sippáng ni Namarò yù káruán na pangapangá na, á inítuppang na yù pangapangá na olibo nga simaron sù naggianán nayù ira inirián na. Á sikayu nga ari Kudio yù kun na simaron nga pangapangá na, nga táli nayù ira Kudio nga sippáng ni Namarò, tapè mesipá kayu sù napiá nga áttole ra. ¹⁸ Ari kayu laguk mattagapiá megapu sù kesipá naw, á arán naw iluddé yù ira Kudio. Nonopan naw yaw, ta sikayu yù kun na simaron nga pangapangá nga netuppang lá sù káyu, ngam aggira yù kun na gamù na, nga paggapuán nayù áttole naw.

¹⁹ Á ajjan támma nikayu nga ari Kudio yù makkagi ta, “Sikami nga ari Kudio yù iddukan ni Namarò! Ta sippáng na yù ira Kudio, nga kuruk nga pangapangá nayù káyu, tapè ituppang na kami!” ²⁰ Wan, kuruk yian! Sippáng na yù ira Kudio gapu ta awán ta pangikatalá da kâ Apu. Á napasigaggá yù napiá nga ággián naw kâ Namarò megapu galá sù pangikatalá naw kâ Apu. Ari kayu laguk mappeddaráyaw, ngam maganássing kayu ána makimoray

† 11:8 Deuteronomio 29:4; Isaya 29:10 ‡ 11:10 Salmo 69:22-23

kayu kâ Namarò megapu sù allà na nikayu. ²¹ Ta nu sippáng ni Namarò yù ira nga kun na negagángay nga pangapangá, megapu sù pamotu ra kuna, á magimuguk kayu laguk. Arán naw ira párigán nga mamotu kâ Namarò, marakè matappáng kayu gapay nga mepárik nira.

²² Kemámmatán naw laguk yù allà ni Namarò ána yù katunung na. Matunung nga mamággáng sù ira Kudío nga manaki kuna. Ngam ikákkállà na sikayu nga mangupù nga magiddanáma sù allà na. Ipasigaggá naw laguk yù ánggikatalà naw kuna, tapè ari kayu gapay matappáng. ²³ Á yù ira Kudío nga namotu kâ Namarò, nu mabbabáwi ira ta pamotu ra ána ikatalà da si Apu Kesu, alawatan ni Namarò ira gapay, á kunnay ira ta pangapangá nga itoli na sù nangarián na nira, gapu ta makáwayyá si Namarò nga mangitoli nira. ²⁴ Á sikayu nga ari Kudío yù kunnay ta pangapangá na simaron nga olibo, nga natappáng, tapè metuppang ira sù káyu nga nemulá ta garden, nga ari gagángay nga naketuppangá da. Á gapu ta isipá na kayu ni Namarò, á nepatalugáring sù ira Kudío, nga kunnay ta gagángay nga pangapangá na olibo nga nemulá ta garden, ta malogon sangaw gemma yù ketuppang da sù káyu nga nakatappángá da.

Yù Allà ni Namarò sù ira Kudío ána yù ira Ari Kudío

²⁵ Wáwwagi, aijan yù ibukalák ku nikayu, nga ari paga napalappá, marakè mattagapiá kapu ta manaki ira nga mangikatalà kâ Apu Kesu Kiristu. Á yáyu nga aijan yù awayyá naw nira ari Kudío nga mangikatalà kâ Apu Kesu. Á sangaw nu kustungin yù biláng nayù ira ari Kudío nga mangikatalà kâ Apu, mári laguk yù kataggá nayù nonò nayù ira Kudío, á mabbabáwi ira gapay, ána mangikatalà ira kâ Apu. ²⁶ Á yáyu nga meiyù yù ira ngámin nga taga Israel. Yáyu kebalinán nayù inipetúrâ na ngaw ni Namarò nga kun na, “Umay yù Mangiyígù nga maggapu ta ili na Sion.

Á irián na yù narakè nga akka-akkuán nayù ira Kudío nga ginaká ni Akup.

²⁷ Á yáyu nga palurotak ku sangaw yù ngaw tarátù nira, sangaw nu pakomák ku yù liwiliwá da.”[§]

²⁸ Á kunangane, ta meyannung sù napiá nga dámak, ikalusso nayù ira Kudío si Namarò, gapu ta manaki ira nga mangikatalà kâ Apu Kesu Kiristu. Á yáyu nga aijan yù awayyá naw nga makiyígù, sikayu nga ari Kudío, megapu sù panaki da. Ngam aggira yù napolu nga pinili ni Namarò, á yáyu nga iddukan na ira lá paga megapu sù pangitabbá na ngaw sù ira tatole na nga naggaká nira. ²⁹ Ta arán na ibabáwi ni Namarò yù ira sinullà na nga ikákkállà na.

³⁰ Á sikayu nga ari Kudío, arán naw ngaw kinuruk si Namarò. Ngam kunangane, inikállà na kayin ána pinakomá na kayu ta liwiliwá naw, megapu sù panaki nayù ira Kudío kuna. ³¹ Á kunnian gapay sù ira Kudío, ta kunangane arád da gapay kurugan si Namarò, á inikállà ni Namarò nikayu nga ari Kudío, tapè ikállà na gapay sangaw yù ira Kudío, á pakomán na ira gapay, megapu sù pangikállà na nikayu nga ari Kudío. ³² Á ipakánnámmu na sù ira ngámin nga tatolay nga Kudío ána ari Kudío yù liwiliwá da. Á kunnay ta pinukù na ira ngámin megapu sù liwá da, tapè ikállà na ira ngámin ána pakomán na ira.

Mepángngà nga Meparáyaw si Namarò

³³ Makapállà yù allà ni Namarò nittam! Monak yù ammu na, ána awán ta kárik piá nayù sirik na. Awán ta tolay nga makánnámmu sù nonotan na. Á awán ta makebukalán sù akka-akkuán na. ³⁴ Aijan yù netúrâ sù dán nga libru ni Namarò, nga kun na, “Egga panò yù tolay nga makánnámmu sù nonò ni Namarò? Egga panò yù manabarang kuna?”

³⁵ “Egga panò yù mangiyawá kâ Namarò, tapè ikáru ni Namarò kuna?”*

³⁶ Si Namarò, pinarò na yù ngámin nga egga, nga masingan ána ari masingan. Maggián yù ngámin nga pinarò na megapu sù pakáwayyá na. Á yawe ikeggá na ngámin, tapè meparáyaw si Namarò megapu nira. Dayáwat tam si Namarò ta áddè ta áddè. Mapalurò! Ammán.

12

Yù Mepángngà nga Ásserbi tam kâ Namarò

¹ Á gapu ta pangikállà ni Namarò nittam nga mangikatalà kuna, á dudduárat takayu, wáwwagi, ta itulù naw kâ Namarò yù baggi naw, nga kunnay ta iyátang naw yù matolay nga mangilin, tapè ayatán si Namarò megapu sù napiá nga akkuán naw, ta yáyu mepángngà

nga pakimore naw kuna. ² Á arán naw párigán yù ággangnuá nayù ira tatolay saw dabbuno, nga ari manguruk kâ Namarò, tapè ari kayu mepaggittà nira. Anugutan naw yù panguli ni Namarò ta nonò naw, tapè napiá yù ággangnuá naw, ána kánammuan naw yù napiá nga ipakuá ni Namarò nikayu. Ta napiá ána matunung yù ure ni Namarò, á magayáyá si Namarò sù ira nga tumulù ána mamalurò sù ikáyá na.

³ Á gapu ta pangikállà ni Namarò níkan, binilin nangá, á yáyù nga tabaragát takayu ngámin ta arán naw kagian ta napiá kayu ánnè sù ira kábulun naw. Ngam máwák naw nga katággítádday nga nonopan yù iniyawá ni Namarò nga pakáwayyá na lápay nga meyanung sù ángngikatalà na. ⁴ Á ta ángngarigán, tádday lá yù baggi na tolay. Ngam aijan yù aru nga makkakerumá nga mesipá sù baggi na, nga limá na, takki na, ulu na, talingá na, simù na, ngámin, á makkakerumá gemma yù keyusá ra. ⁵ Á kunnay gapay nittam nga manguruk. Aru ittam nga makkakerumá, ngam nepattatádday ittam kâ Apu Kesu Kiristu, nga kun na limá na, takki na, simù na, sittam ngámin nga makkaká-abbák sù baggi na nga táttádday.

⁶ Á gapu ta allà ni Namarò nittam, inisinek na nittam yù makkakerumá nga pakáwayyá tam nga mepángngá nittam nga katággítádday. Akkuát tam laguk ta napiá yù ipakuá ni Namarò nittam. Ta ángngarigán, nu iniyawá ni Namarò nikayu yù pakáwayyá naw nga mangilayalayá sù ipalappá ni Namarò nikayu, á malláppa kayu laguk nga mangilayalayá sù bilin na, nga kunnay ta meyanung sù ángngikatalà naw. ⁷ Á nu iniyawá ni Namarò nikayu yù awayyá naw nga mangabbák sù ira wáwwagi tam nga manguruk, á abbágán naw ira laguk ta napiá. Á nu iniyawá ni Namarò nikayu yù pakáwayyá naw nga mangituddu sù bilin na, á ituddu naw laguk sù ira kábulun naw. ⁸ Á nu iniyawá ni Namarò nikayu yù pakáwayyá naw nga manabarang ána mamannay, á tabaragán naw ána bannáyán naw laguk yù ira kábulun naw. Nu iniyawá ni Namarò nikayu yù pakáwayyá naw nga mangisipá, á ari kayu laguk makkikki. Á sikayu nga pine ni Namarò ta mammaguray sù ira kábulun naw, ipe naw yù urá naw nga mappili sù napiá megapu nira. Sikayu nga iniddán ni Namarò ta awayyá naw nga mangikállà sù ira marigirigá ána sù ira máttaki, magayáyá kayu laguk nga mamaláppaw sù nonò nayù ira abbágán naw.

⁹ Ari kayu áppè nga makkaká-áyá, ngam kukurugán nga iddi-iddukan naw yù ira kábulun naw. Likuránán naw yù narákè, á tángngagan naw yù napiá. ¹⁰ Makkaká-áyá kayu, nga kunnay ta mepángngá sù ira mawwawági nga ánâ nayù táttádday nga Yáma. Á magayáyá kayu nga makimoray sù ira kábulun naw nga manguruk. ¹¹ Ari kayu malurá nga mangnguá sù napiá, ána ari kayu matalakák. Malláppa kayu laguk, á ipe naw yù urá naw nga mamalurò sù ipakuá ni Namarò nikayu. ¹² Magayáyá kayu laguk megapu sù ággiddanáma naw kâ Namarò. Á nu marigirigá kayu, attamán naw lá, ána ipakimi-imállà naw kâ Namarò yù ngámin nga meyanung nikayu, tapè mepasigaggá yù ángngikatalà naw kuna. ¹³ Ilimù naw yù ángngabbák naw sù ira magáwák, nga wáwwagi naw ta ángnguruk naw. Á ilágum naw yù ira ngámin nga umay makiálluik nikayu.

¹⁴ Á nu egga yù ira manigirigá nikayu, ipakimállà naw ira kâ Namarò ta ikállà na ira. Arán naw ira igagek. Arán naw kagian kâ Namarò ta bálatan na ta jigá yù akkuád da nikayu. ¹⁵ Nu aijan yù ira magayáyá, mepagayáyá kayu gapay nira. Á nu egga yù ira maraddam, mepaddaddam kayu gapay nira. ¹⁶ Arán naw irumá yù ira kábulun naw. Makkaká-iddù kayu. Ari kayu mappegung, ngam makikopun kayu sù ira pobare gapay. Á ari kayu mattagapiá.

¹⁷ Á nu aijan yù mangnguá ta narákè nikayu, arán naw bálatan ta narákè. Yá lá akkuán naw yù napiá ta ánninganán nayù ira ngámin nga tatolay. ¹⁸ Ari kayu makitabbatabbák sù ira kábulun naw, ngam tumulù kayu, tapè magimammá kayu. Á áddè ta awayyá naw, parubán naw makikopun ta ngámin nga tatolay, tapè napiá yù ággián naw ngámin.

¹⁹ Wáwwagi nga iddukak ku, arán naw bulubugá íbálá yù akkuád da nikayu nga narákè, ta si Namarò yù mabbálá. Inipetúrâ na ngaw ni Namarò yù kinagi na, nga kun na, “Sikán lá yù mabbálá.

Á bálatak ku yù ira mangnguá ta narákè, megapu sù kingnguá ra,”* kun ni Apu Namarò.

²⁰ Á netúrâ galá yù kinagi ni Namarò nga akkuán naw, nga kun na,

“Nu mabisin yù ira malussaw nikayu, pakanan naw ira.

Nu mapangál ira, penuman naw ira.

Ta nu kunnian yù akkuán naw, mappasírán ira megapu sù napiá nga kingnguá naw nira.”†

* 12:19 Deuteronomio 32:35 † 12:20 Proberbio 25:21-22

²¹ Arán naw párigán yù ira mangngúá ta narákè. Ta nu akkuán naw gapay yù narákè, máppu kayu nga mepárik nira. Ngam akkuán naw galá yù napiá, tapè appútan naw yù narákè megapu sù napiá nga akkuán naw.

13

Tumulù ittam sù ira Mammaguray

¹ Sittam ngámin nga tatolay, tumulù ittam sù ira mammaguray nittam, ta awán ta mammaguray nga arán na sinullá ni Namarò. Á si Namarò yù mangiyawá nira ta pakáwayá ra nga mammaguray nittam. ² Á nu kontarán nayù ira tatolay yù ira mammaguray, kontarád da gapay si Namarò nga nanullá nira. Á mapagikáru yù ira ngámin nga makikontará sù ira sinullá ni Namarò nga mammaguray. ³ Ngam arát tam ikássing yù ira makáwayá sù gubermente, tapè abbágád da yù ira nga mangngúá ta narákè yù maganássing sù ira mammaguray. Á nu ikáyá naw ta awán ta ikássing naw sù ira mammaguray, akkuán naw lá yù napiá, á magayáyá ira nikayu. ⁴ Ta sinullá ni Namarò yù ira makáwayá sù gubermente, tapè abbágád da yù ira nga mangngúá ta napiá.

Ngam nu akkuán naw yù narákè, maganássing kayu laguk nira, ta kuruk nga makáwayá ira nga mamagikáru, gapu ta masserbi ira ká Namarò, á ipapággáng ni Namarò nira yù ira nga mangngúá ta narákè. ⁵ Á yáyù nga tumulù ittam laguk sù ira mammaguray nittam, tapè ari ittam mekaná sù pore ni Namarò megapu sù pamággáng da nittam. Á ari lá yian, ngam tumulù ittam nira gapay, gapu ta ammu tam ta yáyù ipakuá ni Namarò nittam, tapè aláppaw yù nonò tam.

⁶ Á yáyù gapay yù gapu na nga mappagá ittam ta amilliár ána ngámin nga buwì nga ipapagá ra nittam. Ta si Namarò nga nanullá nira yù passerbiád da, ta pattuki ra ta buwì. ⁷ Pagát tam laguk yù ipapagá ra nittam, yù buwì sù ira mammaguray, ána yù amilliár sù ira minátuki. Á makimoray ittam sù ira pakimorayán, ána dayáwat tam yù ira maráyaw.

Makkaká-iddù ittam

⁸ Nu aijan yù gatù tam, pagát tam ngámin. Ngam arát tam mapagán yù allà ni Namarò nittam. Á yáyù nga makkaká-iddù ittam. Yù tolay nga mangiddù sù kábulun na, palurotan na ngámin nga tunung nga inittaddán ni Namarò ká Moyses. ⁹ Yawe yù taddán na, nga kun na, “Ari kayu meruruk sù arán naw atáwa. Ari kayu mamapátay. Ari kayu makkokò. Á ari kayu mamassil sù kukuá na kábulun naw.”* Á mapalurò yù ira ngámin nga inittaddán ni Namarò, nu palurotat tam yawe nga kinagi na, “Iddukan naw yù ira kábulun naw ta kunnay sù ángngiddù naw sù baggi naw.”† ¹⁰ Ta nu iddukan nayù tolay yù ira kábulun na, awán ta narákè nga akkuán na nira. Á yáyù nga mapalurò tam yù ngámin nga tunung nga inittaddán ni Namarò nu iddukat tam yù ira kábulut tam.

¹¹ Á ammu naw ta máwák tam magimuguk sù akka-akkuát tam, ta aringin mabayák yù dattál nayù ággaw nga sinullá ni Namarò, nga keyígù tam. Áddè ngaw sù pamegapu tam nga manguruk, magiddi-iddak ittam sù pangiyígù na nittam, á umaranni lá umaranni ta kággággaw. Ari ittam laguk maggián nga kunnay ta mattummá! Mallukák ittam, nga malláppa nga mangngúá sù ipakuá ni Apu nittam. ¹² Yù ággián nayù dabbuno yù kun na gabi megapu ta liwiliwá nayù ira tatolay. Ngam mappasá yù kallá, á maddaggunin yù ággaw, nga dattál nayù pammagure ni Apu Kesu ta dabbuno. Likuránát tam laguk yù narákè, á palurotat tam yù napiá nga ipakuá ni Apu Kesu nittam, nga mepánggá sù ira tatole na nga manawagánin yù nonò da, nga naparán nga mangipuerá ta narákè. ¹³ Akkuát tam laguk yù napiá nga kunnay ta akkuán na tolay ta gián nga manawák. Arát tam akkuán yù kepasiránát tam. Ari ittam magililellaw, onu mangarallaw. Ari ittam maddaráma, onu mangabubu. ¹⁴ Nonopat tam lá si Apu Kesu Kiristu nga mepulupulù nittam, ta kesipátát tam yù nonò na ána yù napiá nga ággangngúá na. Á akkuát tam laguk yù napiá nga ipakuá na nittam. Á imugurát tam yù baggi tam, tapè arát tam akkuán yù narákè nga karagátán nayù dán nga nonò tam.‡

14

Arát tam Panunnután yù ira Wáwwagi tam nga Manguruk

1 Korinto 8:1-13; 10:23-33

¹ Wáwwagi, ta paggagammung naw, alawatan naw yù ira wáwwagi naw ta ángngikatalá naw ká Apu Kesu, mássiki nu makapi yù ángnguruk da, á arán naw ira peperangan ta ubobuk

* 13:9 Exodo 20:13-15, 17; Deuteronomio 5:17-19, 21 † 13:9 Libitiko 19:18 ‡ 13:14 Bibbiram mu Galasia 3:27

nga meyanung sù ángnguruk da nga nerumá ta ángnguruk naw. ² Ta aijan yù ira tatolay nga awán ta kanniawad da nga kanan, á aijan yù ira káruán nga makapi yù ángnguruk da, nga arád da kanan yù kárne, ngam yù atang lâ yù ikád da. ³ Á yù tolay nga kumán ta ngámin, arán na nakuan iluddè yù tolay nga ari kumán ta kárne. Á yù tolay nga kumán lâ ta atang, arán na gapay nakuan panunnután yù tádday nga kumán ta ngámin, gapu ta inalawâ ni Namarò gemma ta tole na. ⁴ Á gapu ta Yápu tam ngámin si Namarò, ari ittam laguk makkakápanunnù, ta awán ta pakáwayyá tam nga mamanunnù sù aripan na tanakuán. Ta yù yápu na lápay yù makáwayyá nga makkagi nu napiá yù akkuán nayù aripan na. Á napiá gemma yù akka-akkuán nayù aripan na, gapu ta makáwayyá yù yápu na nga mangabbák kuna.

⁵ Á aijan yù ira kábulut tam nga manguruk ká Apu, nga sinullá da yù tádday ággaw nga ngilnad da, nga paddáyo ra ká Apu. Á aijan gapay yù ira maddáyaw ká Apu, nga ari mangirumá ta ággaw. Á ari kayu nakuan mabbábáng nga katággítádday ta meyanung sù ággaw nga ngilinan na. ⁶ Nu ngilinan na tolay yù tádday nga ággaw, yáyù ákkimore na ká Apu. Á yù tolay nga kumán ta ngámin, yáyù ákkimore na ká Apu, gapu ta mabbalabálá ká Namarò megapu sù kanan na. Á yù tolay nga makkanniw ta kanan, yáyù ákkimore na ká Apu, gapu ta mabbalabálá gapay ká Namarò.

⁷ Á sittam nga manguruk, maguray lâ nu matolay ittam onu matay ittam, arát tam akkuán yù lâ ikáyá tam, nu ari galá yù ikáyá nayù Yápu tam. ⁸ Ta nu matolay ittam, kukuá na ittam ni Apu Kesu Kiristu, á akkuát tam yù napiá nga ipakuá na nittam, tapè meparáyaw yù Yápu tam. Á nu matay ittam, kukuá na ittam lâ, á mesipá ittam kuna. Á ta kunnian, mássiki nu matolay ittam onu matay ittam, kukuá na ittam ni Apu Kesu Kiristu nga Yápu tam. ⁹ Á yáyù gapu na nga natay si Apu Kesu Kiristu, á naginnanolay, tapè aggina yù Yápu tam, nu matolay ittam lâ paga onu natay ittamin.

¹⁰ Arát tam laguk panunnután yù ira kábulut tam ta meyanung sù kanad da. Á arát tam ira iluddè megapu sù arád da kanan. Ta sittam ngámin, umay ittam makiarubáng ká Namarò, á aggina lâ yù mamanunnù. ¹¹ Ta aijan yù inipetúrâ ni Namarò, nga kun na, “Sikán si Apu Namarò nga matolay ta áddè ta áddè,

á kukurugán nga mapaluro sangaw yaw nga kagiak ku.
Mamalittúkak yù ira ngámin nga tatolay ta arubáng ku,
á maddáyaw ira nikán.”*

¹² Á yáyù nga máwák tam ngámin sangaw nga kagian ká Namarò yù ngámin nga kingnguá tam ta paggiát tam ta dabbuno.

Arát tam Panunnután yù ira Kábulut tam

¹³ Ari ittamin laguk makkakápanunnù. Á yawe laguk italákkuruk tam, ta arát tam akkuán yù kagian nayù ira kábulut tam ta liwá, marakè mekáttauay ira ta panguruk da ká Namarò, nu párigád da ittam ána akkuád da gapay yù kagiad da ta liwá. ¹⁴ Á sikán, gapu ta pangikatalá ku ká Apu Kesu Kiristu, ammu ta awán bulubugá ta kanan nga máwák ku kanniawan. Ngam ta ángngarigán nu aijan yù kanan nga ibiláng nayù tolay ta makanniw, á napiá laguk nu arán na kanan, ta kuruk nga malliwá nu kanan na yù ibiláng na ta maraping.

¹⁵ Á nu aijan yù wagi tam ta ángngikatalá tam ká Apu Kesu, nga maburung gapu ta kinát tam yù kanniawan na, á arát tamin laguk inipasingan yù ángngiddù tam kuna. Á yáyù nga ari ittam laguk kumán sù kanniawan na, marakè mararál yù ángngikatalá na ká Namarò, megapu sù kanat tam. Ta aggina gapay yù tádday nga naketapilán ni Apu Kesu Kiristu. ¹⁶ Á mássiki nu ibiláng tam ta napiá yù akkuát tam, nu ibiláng nayù kabbulut tam ta narakè, arát tam laguk akkuán, tapè arán na kagian ta malliwá ittamin.

¹⁷ Ta sittam nga mangikatalá ká Apu Kesu, mesipá ittam sù pammagure ni Apu Namarò. Á yù pammagure na nittam, ari meyanung sù kanat tam ána inumat tam. Ngam yawe yù pabbalinán nayù pammagure ni Namarò nittam, yù napiá ána matunung nga akka-akkuát tam, yù ággimammá nayù nonò tam, ána yù pagayáyá tam megapu sù Mangilin nga Ikararuá ni Namarò. ¹⁸ Á nu kunnian yù ásserbi tam ká Apu Kesu Kiristu, magayáyá si Namarò nittam, á meráyaw ittam gapay sù ira kábulut tam.

¹⁹ Á yáyù nga tutttutlat tam laguk yù napiá nga mabbalin ta magimammá nga nonò tam, tapè makkaká-abbák ittam, ána mapasigaggá yù ángngikatalá tam ká Apu. ²⁰ Á arát tam laguk kanan yù kanniawan nayù wagi tam, tapè ari mararál yù ángngikatalá na ká Namarò, megapu sù kanat tam. Kuruk nga awán ta kanan nga makanniw, ngam pakaliwatát tam yù ira kábulut tam nu mabbábáng ira ta panguruk da megapu sù kanat tam. ²¹ Á yáyù nga

* 14:11 Isaya 45:23; Pilippay 2:10-11

más napiá galâ nu arát tam kanan yù kárne áнна ari ittam mappissán, á awán bulubugá ta akkuát tam nga paggapuán nayù palliwá nayù ira wáwwagi tam nga mangikatalâ kâ Apu Kesu.

²² Á maguray lâ yù ure naw nga meyanung sù ikán naw onu inuman naw, ngam arán naw ubobugan sù ira kábulun naw, tapè sikayu lâ kâ Namarò yù makánnammu sù akkuán naw. A magayáyâ yù tolay nga ari mabbábáng ta meyanung sù akkuán na. ²³ Ngam yù tolay nga mabbábáng sù kanan na, ikáru na kâ Namarò nu kanan na, gapu ta pakaliwatán na yù ángnguruk na, nu arán na kurugan yù ammu na nga napiá nga meyanung ta kanan na. Á makaliwá ittam laguk nu akkuát tam yù ari negapu sù ángngikatalâ tam kâ Namarò.

15

Akkuát tam lâ yù Napiá, nga Pakkapiánán nayù ira Kábulut tam Galasia 6:1-5

¹ Sittam nga napasigaggâ yù ángngikatalâ na kâ Apu Kesu, arát tam ipapílì yù ure tam áнна yù ikáyâ tam, ngam anugutat tam gapay yù ure nayù ira wáwwagi tam nga makapi yù ángnguruk da. Arát tam ira paguráyán, ngam paguráyát tam lâ yù ikáyâ tam. ² Akkuát tam lâ yù napiá nga ikáyâ nayù ira kábulut tam, tapè mábbágán ira áнна mepasigaggâ yù ángngikatalâ da. ³ Ta kunnian gapay yù kingnguá ni Apu Kesu Kiristu. Pinaguráyán na yù inikáyâ na, á inattamán na yù pallillibâ da kuna, nga kunnay sù neturá sù dán nga libru, nga kun na, “Apu Namarò, nekuá níkan yù pakkakagi ra nikaw.”* ⁴ Á ngámin nga neturá ngaw, inipeturá ni Namarò, tapè mattudduán ittam. Á megapu sù neturá nga netuddu nittam, mapatattam yù nonò tam áнна mabannáyán, tapè mapasigaggâ yù ággiddanáma tam kâ Apu Namarò.

⁵ Si Namarò, nga mangabbák nittam áнна mamannay nittam, á parè bì ta abbágán na kayu, tapè magimammâ kayu, áнна mattatádday yù nonò naw nga kunnay ta nonò ni Apu Kesu Kiristu, megapu sù ángngikatalâ naw kuna. ⁶ Á ta kunnian, mattatádday kayu nga maddáyaw kâ Namarò, nga Yáma ni Apu Kesu Kiristu nga Yápu tam.

Mesipà gapay yù ira Makkakerumá nga Tatolay nga ari Kudio

⁷ Á gapu ta kepattatádde tam kâ Apu Kesu, makkaká-alawâ kayu laguk, nga kunnay ta pangalawâ ni Apu Kesu nikayu, tapè meparáyaw si Namarò. ⁸ Ta kagiak ku nikayu ta yá gapu na nga minay si Apu Kesu Kiristu nga masserbi nikami nga Kudio, tapè ipasingan na ta kuruk nga mekatalâ si Apu Namarò, á palurotan na yù ngámin nga initabbá na sù ira ngaw naggaká nikami nga Kudio. ⁹ Á yawe gapay yù gapu na nga minay si Apu Kesu Kiristu, tapè maddáyaw gapay yù ira ari Kudio kâ Namarò, megapu sù pangikállâ na nira, nga kunnay sù inipeturá na ngaw ni Namarò, nga kun na, “Dayáwat taka, Apu, ta arubáng nayù ira makkakerumá nga ari Kudio, á ikansion ku yù paddáyò nikaw.”†

¹⁰ Á aijan gapay yù neturá, nga kun na, “Sikayu nga makkakerumá nga ari Kudio, mepagayáyâ kayu sù ira tatolay nga sinullâ ni Namarò ta tatole na.”‡

¹¹ Á aijan paga nga neturá, “Sikayu ngámin nga ari Kudio, maddáyaw kayu kâ Apu Namarò.

Sikayu ngámin nga makkakerumá nga tatolay, dayáwan naw si Apu.”§

¹² Á initúrâ na ngaw ni Isaya, nga kun na, “Aijan yù umay nga meyanâ sangaw, nga ginaká ni Jesse, nga yáma ni Patul Dabid.

Aggina yù umay mammaguray sù ira makkakerumá nga tatolay nga ari Kudio.

Aggina yù iddanamád da ta mangiyígù nira.”*

¹³ Si Namarò yù paggapuán nayù ággiddanáma tam. Á ipakimállâ ku kuna, ta parè bì ta pagayáwatan na kayu áнна pagimammatan na kayu, megapu ta ángngikatalâ naw kâ Apu Kesu, tapè kuruk nga magayáyâ kayu, áнна mapasigaggâ yù pagiddanáma naw megapu sù pangngapangnguá nayù Mangilin nga Ikararuá ni Namarò.

Yù Pangilayalayâ ni Pablo sù ira Ari Kudio

¹⁴ Wáwwagi, ammukin ta napiá yù nonò naw, áнна kánnámmuán naw yù ngámin nga meyanung ta ángngikatalâ tam kâ Apu Kesu Kiristu. Á yáyù nga makáwayyá kayu nga

* 15:3 Salmo 69:9 † 15:9 Salmo 18:49 ‡ 15:10 Deuteronomio 32:43 § 15:11 Salmo 117:1 * 15:12 Isaya 11:10

makkakátatababarang. ¹⁵ Á aringà mabbábáng nga mattúrâ nikayu, tapè ipanonò ku nikayu yù ammu nawin áddè ngaw. Á mappelokà nga mangitúrâ, megapu sù pakáwayyâ nga iniyawâ ni Namarò nikán megapu ta pangikállà na nikán. ¹⁶ Ta sinullà nangà ni Namarò nga mangilayalayâ sù ira makkakerumá nga tatolay nga ari Kudio, tapè passerbiák ku si Apu Kesu Kiristu, nga kunnay sù pári nga masserbi sù lágum nayù mangilin nga kapillíá. Á inilayalayâ ku nira yù napiá nga dâmak nga naggapu kâ Namarò, tapè mangikatalà ira gapay kâ Apu Kesu. Á alawatan ni Namarò ira ta tatole na, nga kun na mepángngâ nga meyátáng kuna, megapu sù pamakarenu na nira nayù Mangilin nga Ikararuá nga maggián nira.

¹⁷ Á gapu ta ketáddè kâ Apu Kesu Kiristu, aringà mappasirán nga mangipakánammu sù akkuák ku ta passerbi kâ Namarò. ¹⁸ Á awát ta ubobugak ku, nu ari galá yù pinalurò ni Apu Kesu megapu sù pangilayalayâ ku ána ággangnuâ, tapè manguruk gapay kâ Namarò yù ira makkakerumá nga tatolay nga ari Kudio. ¹⁹ Ta inipakuá na gapay nikán yù makapállà nga pamagaddátu na, nga pinalurò na megapu sù pakáwayyâ nayù Mangilin nga Ikararuá nga mangabbák nikán. Á ilayalayâ ku yù napiá nga dâmak nga meyannung kâ Apu Kesu Kiristu ta ngámin nga lugár, nga inigapù ta ili na Jerusalem ta áddè ta Ilirikum. ²⁰ Á ta áddè ngaw, italákkuruk ku ta yù ira tatolay nga pangilayalayáták ku sù bilin ni Namarò yù ira lá nga ari paga nakaginná ta meyannung kâ Apu Kesu Kiristu, tapè arák ku tudduán yù ira nga sinudduán nayù tanakuán nga tolay. ²¹ Á yáyù kingnguâ nga kunnay ta inipetúrâ na ngaw ni Namarò, nga kun na, “Yù ira nga ari bulubugá nakarâmak ta meyannung kuna, masingad da sangaw nu manganánnuán.

Á yù ira ari bulubugá nakaginná sù meyannung kuna, maginná ra sangaw, á kánámmuád da.”†

Panalákkuruk ni Pablo nga Umay ta Roma

²² Á yáyù nga aringà paga nakángay tán nga lugár naw, gapu ta negaggagà megapu sù pangilayalayâ ku sawe ira lugár. ²³ Á gapu ta nabalinin yù tarabákù saw, ninonò ku ta et takayu tullúnán, ta yáyù karagaták ku ta nabayák. ²⁴ Á sangaw nu umayâ túrin ta Espania, ikáyâ ku ta maddagákà ta gián naw, tapè mepagayáyákà lábbi nikayu. Á ikáyâ ku nga mappábbák nikayu, sangaw nu panawát takayu nga umayin ta Espania.

²⁵ Ngam kunangane, umayâ bi mattúllun sù ira wáwwagi tam nga maggián ta Jerusalem, ta ek ku ituluk yù kuártu nga nelimù nira. ²⁶ Ta yù ira ari Kudio nga mangikatalà kâ Apu, nga maggammung ta Masidonia ána Akeya, sinalákkuruk da nga mangabbák sù ira pobare nga Kudio nga taga Jerusalem nga mangikatalà kâ Apu. ²⁷ Á magayáyâ ira nga mangisipâ ta kukuá ra sù ira Kudio. Á mepángngâ gemma ta iyawâ da yù kukuá ra, nga ángngabbák da nira, nga kunnay ta pappagá ra ta gatù da sù ira Kudio nga manguruk. Ta aggira nga ari Kudio, mesipâ ira gapay sù ira Kudio, á yáyù nga kesipatád da gapay yù pangikállà ni Namarò ána yù inittabbá na sù ira tatole na. ²⁸ Á sangaw nu kabalik ku mangituluk sù ábbák da nga nelimù sù ira manguruk nga Kudio nga taga Jerusalem, á mánawâ laguk nga umay ta Espania, á maddagákà bi ta gián naw, ta et takayu tullúnán. ²⁹ Á ammu ta pagayáyan na ittam ni Apu Kesu Kiristu sangaw nu mappasinganâ nikayu, megapu sù bilin na nga ilayalayâ ku.

³⁰ Wáwwagi, gapu ta makkakâ-iddù ittam megapu sù Ikararuá ni Namarò, á ta panakabaggi ni Apu Kesu Kiristu, ikomâ nikayu ta mattatádday kayu nga mepakimi-imállà bi kâ Namarò megapu nikán. ³¹ Á yaw ipakimállà naw, ta taronán nangà ni Namarò ána ilillì nangà, tapè arád dangà akkuán nayù ira nga ari manguruk nga maggián ta purubinsia na Judiya. Á ipakimállà naw gapay yù ira wáwwagi tam nga maggián ta Jerusalem, tapè magayáyâ ira nga mangalawâ sù ábbák nayù ira kábuluk ku, nga ituluk ku nira. ³² Á ipakimállà naw gapay ta anugutan na gapay ni Namarò yù ángè ta gián naw, tapè mepagayáyákà nikayu ána magibannágâ. ³³ Á yawe ipakimállà ku, ta parè bi ta egga nikayu si Namarò, nga paggapuán nayù imammâ na nonò tam. Ammán.

16

Iyabbù ni Pablo nu Kunnasi yù ira Kákkopun na

¹ Wáwwagi, aijan yù babay nga umay ta gián naw, nga ikáyâ ku ipakámmu nikayu. Aggina si Pibi, nga wagi tam nga mangabbák sù ira wáwwagi tam nga maggammung ta

† 15:21 Isaya 52:15

Kenkareya. ² Á labbè ni Pibi ta gián naw, alawatan naw nga kunnay ta mepángngà nittam nga tatole ni Namarò, megapu sù ángngikatalà na kâ Apu Kesu Kiristu. Á abbágán naw ta napiá, ána iyawá naw kuna yù máwák na, gapu ta napiá gapay yù ággasigurá na ta aru nga tatolay, nepatalugáring nikán, ta napiá gapay yù ángngabbák na nikán.

³ Á manonò ku yù ira kopuk ku nga magatáwa, di Akila kâ Persila, á iyabbû ku nu kunnasi ira, ta aggira gapay yù kábuluk ku nga masserbi kâ Apu Kesu. ⁴ Á nággè ira natay ngaw ta pangiyígù da nikán sù nággeka natay. Á yáyù nga ari lâ sikán yù mabbalabálà nira, nu ari gapay yù ira manguruk kâ Apu nga ari Kudio nga maggagammung ta lugár da. ⁵ Á manonò ku gapay yù ira wáwwagi tam nga maggagammung ta bale ri Akila nga makimoray kâ Namarò, nu kunnasi ira.

Á manonò ku si Epaneto nga iddukak ku. Kagian naw gapay kuna yù pangiyabbû ku ta meyanung kuna. Aggina yù napolu nga manguruk kâ Apu Kesu Kiristu ta purubinsia na Asia.

⁶ Á iyabbû ku gapay nu kunnasi si Maria, nga kitaláppà nga mangabbák nikayu.

⁷ Á kagian naw gapay kári Andaroniko kâ Jun ta manonò ku ira, nu kunnasi ira. Aggira yù kagittá nga Kudio, nga kábuluk ku ngaw nga nebáluk. Á kábulud da gapay nayù ira minángngilayalayâ nga pakimorayán, á napolu ira nga nanguruk kâ Apu Kesu Kiristu ánnè nikán.

⁸ Á manonò ku gapay si Ampilato nga kopuk ku nga iddukak ku megapu sù ketádday mi kâ Apu Kesu.

⁹ Á iyabbû ku gapay yù meyanung kâ Urbano, nga kabbulut tam nga masserbi kâ Apu Kesu, ána si Estako gapay nga iddukak ku.

¹⁰ Á kagian naw gapay kâ Apeli yù pakanonò ku kuna. Mássiki nu narigirigá si Apeli, á nepasingan ta napasigaggá yù ángnguruk na kâ Apu Kesu Kiristu, á ayatán si Apu kuna.

Á kunnasi gapay yù ira nga maggián ta bale ri Aristobulu? Kagian naw bi nira yù pangiyabbû ku ta meyanung nira.

¹¹ Á kunnasi gapay si Erodio, nga kagittá nga Kudio? Ána yù ira wáwwagi tam ta ángnguruk tam kâ Apu nga maggián ta bale ri Narsiso, kagian naw gapay nira ta iniyabbû ku nu kunnasi ira.

¹² Á manonò ku gapay yù ira bábbay, di Taripina kâ Tariposa, nga masserbi ta napiá kâ Apu Kesu. Kagian naw bi nira. Á si Persida gapay, nga iddukat tam ngámin, nga napiá yù ásserbi na kâ Apu, kagian naw gapay kuna yù pakanonò ku kuna.

¹³ Á manonò ku gapay di Rupo nga sinullà ni Apu Kesu nga masserbi kuna, ána yù yená na, nga kun na yená gapay.

¹⁴ Á manonò ku gapay yù ira lállakalákay, di Asingkarito kári Palegon, si Ermas, si Patrobo, si Ermis, ána yù ira káruán nga manguruk nga mepulupulù nira.

¹⁵ Á manonò ku gapay di Pilologo kâ Kulia nga atáwa na, di Nerio kâ wagi na nga babay, ána di Olimpo ána yù ira ngámin nga manguruk nga mepulupulù nira.

¹⁶ Á sikayu gapay nga maggagammung tán, makkaká-iddù kayu ta kunnay ta mepángngà sù ira mawwawági nga manguruk kâ Apu. Á yù ira ngámin nga wáwwagi naw megapu sù panguruk da kâ Apu, nga maggagammung ta makkakerumá nga lugár nga nappassapas-siárak ku, ipetúrá da nikán yù pakanonò da ána yù ayá da nikayu gapay.

Yù Maporián nga Itabarang ni Pablo sù ira taga Roma

¹⁷ Wáwwagi, yawe ikomá nikayu, ta mappalán kayu sù ira mamuruburion ána masinná nga umay nikayu mangituddu ta tanakuán nga bilin nga mekontará sù kuruk nga bilin ni Namarò nga netuddu nikayu. Lillitán naw ira. ¹⁸ Ari si Apu Kesu Kiristu yù passerbiád da, nu ari galá yù karagatád da lápay. Á ilogò da yù ira awán ta áppalán, megapu sù marenu nga ubobuk da nga nakástá.

¹⁹ Á magayáyáká gapu ta neparámak sù ira ngámin nga tatolay yù napiá nga ángnguruk naw kâ Apu. Á yawe paga karagaták ku megapu nikayu, ta kánámmuán naw yù ngámin nga meyanung sù napiá nga netuddu nikayu, ngam awán nakuan ta ammu naw nga meyanung ta narákè. ²⁰ Á ari mabayák, á si Namarò nga mamagimammá nittam, appútan na si Satanas, nga máppù nga kunnay ta iguppè tam. Á yawe ipakimállà ku megapu nikayu, ta ikákkállà na kayu ni Apu Kesu Kiristu.

²¹ Si Timotio, nga kabbuluk ku nga masserbi kâ Apu, ipetúrá na gapay nikán yù pakanonò na nikayu. Á di Lusio kári Jeson kâ Sosipatro gapay, nga kagittá nga Kudio, manonò da kayu gapay.

²² Á sikán si Tersio nga nangitúrá sawe nga inipetúrá ni Pablo níkán. Manonò takayu gapay nga wáwwagì megapu sù ángngikatalà tam kê Apu Kesu Kiristu.

²³ Á si Gayo, nga mangálluik níkán, manonò na kayu gapay. Yawe bale na yù paggagam-mungán nayù ira manguruk. Á si Erasto, nga kusarero sawe ili, ána si Kuarto, nga wagi tam gapay, manonò da kayu gapay. ²⁴ Á ipakimállà ku ta parè bi ta ikákkállà na kayu ngámin ni Apu Kesu Kiristu, tapè magimammà kayu. Ammán.

Yù Paddáyo ni Pablo ta Pakimállà na kê Apu

²⁵ Dayáwat tam si Namarò, ta aggina lâ yù makáwayyá nga mangabbák níkayu, tapè mapasigaggà yù ángngikatalà naw, megapu sù napiá nga dámak nga ilayalayâ ku nga meyanung kê Apu Kesu Kiristu. Á áddè ngaw nga nabayágin, ari paga mepakánnámmu yù bilin na nga meyanung sù ángngiyígù na ta tatolay. ²⁶ Ngam kunangane, nepalappákin. Ta si Namarò, nga maggián ta áddè ta áddè, inipetúrá na yù bilin na sù ira ngaw ábbilinán na. Á jinok na yù ira umay nga mangipakánnámmu ta bilin na ta ngámin nga makkakerumá nga tatolay, tapè manguruk ira, ána mangikatalà ira kuna. ²⁷ Dayarayáwat tam si Namarò! Aggina lâ yù táttáday nga masírik nga makánnámmu ta ngámin. Meparáyaw ta áddè ta áddè, megapu kê Apu Kesu Kiristu! Ammán. Áddè na yù.

Yù Napolu nga Túrâ ni Pablo sù ira Manguruk nga taga Korinto

Yù Meyannung sù Túrâ

Yù ili na Korinto yù karakalán nayù ira ili sù purubinsia na Akeya, nga lugár nga mangngágan ta Garesia kunangan, á Gareko yù ággubobuk da. Á gapu ta aggik na bebay yù gián nayù ili, aru yù ira barangay nga maddung tán, nga naggapu ta arayyu, ta umay yù ira tatolay nga malláku ta magannagannuk.

Á aru gapay yù ira makkakerumá nga tatolay nga maggián sù ili. Á neparámak yù ili, gapu ta aijan tán yù makkakerumá nga narákè. Á sù ngaw pattúrâ ni Pablo sù ira taga Korinto, aru yù ira makkakerumá nga sináddios da, á narákè gapay yù ággangngué nayù ira tatolay ta pakimore ra sù ira sináddios.

Á aru gapay yù ira Kudio nga naggián ta ili na Korinto, nga aijan gapay yù ággagammungád da, gapu ta si Namarò yù pakimorayád da. Á nakipaggián ngaw nira si Pablo. Keggá ni Pablo tán, mináppaday ta tarapál nga tabbi na ayám ána nakannak nga gámi, ta yáyù ággalerán na. Á minay nepaggagammung sù ira Kudio, tapè ituddu na nira yù meyannung kâ Apu Kesu (Kingnúá 18:3). Á aru gapay yù ira Gareko nga mepaggagammung nira, ána yù ira káruán nga ari Kudio, nga mangikatalá kâ Apu.

Á páno ni Pablo ta Korinto, nagaru yù ira nga mangikatalá kâ Apu Kesu. Ngam sù pakkakápererang da ta ubobuk, iníturâ da laguk yù iyabbù da kâ Pablo nga meyannung sù panguruk da nga inítuddu ni Pablo nira. Á inítubbuk da kuna ta Epeso. Yawe túrá yù itabbák ni Pablo sù túrá da.

Yù Mayán nayù Túrâ

Yù Pamegapu nayù Túrâ (1:1-9)

Ikomá ni Pablo sù ira Manguruk ta Pattatáddayad da yù Nonò da (1:10–4:21)

Yù Meyannung sù Ággasigurá nayù ira Makkábbalay (5:1–7:40)

Yù Meyannung sù Kanan nga Meyátang ta Sináddios (8:1-13)

Yù Mepángngá nga Akkuán nayù Minángngilayalayá (9:1-27)

Mepugik nittam yù Makimoray ta Sináddios (10:1–11:1)

Yù Meyannung sù ira Bábbay nga Mangikatalá kâ Apu (11:2-16)

Yù Panaddamát tam ta Pate ni Apu Kesu nga Ingágad da ta Pamúgák ni Apu (11:17-34)

Yù Makkakerumá nga Pakáwayyá tam nga Naggapu sù Mangilin nga Ikararuá (12:1-31)

Makkaká-iddù ittam (13:1-13)

Yù Duá nga Pakáwayyá na Tolay nga Iyawá ni Namarò (14:1-25)

Yù Ákkimore tam kâ Namarò ta Paggagammung tam (14:26-40)

Yù Paginnanolay ni Apu Kesu Kiristu ána yù Iddanamát tam nga Paginnanole tam (15:1-58)

Yù Pangabbák naw sù ira Wáwwagi tam nga Magáwák (16:1-4)

Yù Panalákkuruk ni Pablo nga Manúllun sù ira taga Korinto (16:5-12)

Yù Naporián nga Pangitabarang ni Pablo (16:13-24)

¹ Sikán si Pablo nga sinullá ni Namarò, ta umayá mangilayalayá sù meyannung kâ Apu Kesu Kiristu. Á si Sostenes yù kabbuluk ku, nga wagi tam megapu sù pangikatalá tam kâ Apu Kesu. ² Á nakapattúrâ kami nikayu nga taga Korinto,* nga maggagammung tán nga makimoray kâ Namarò, sikayu nga taggitádday nga napakarenuánin yù nonò na megapu sù kepatatádde na kâ Apu Kesu. Ta inagálán na kayu ni Namarò, tapè pabbalinal na kayu ta mangilin nga tatole na, nga makimoray kuna ta pannakabaggi ni Apu Kesu Kiristu, nga kunnay sù pakimore mi gapay ána yù ira nga aijan ta ngámin nga lugár nga makiyápu kâ Apu Kesu Kiristu nga Yápu tam. ³ Á parè bì ta napiá yù gawagawáyán naw ána yù ággián naw, tapè magimammá yù nonò naw megapu sù pangikállá di Namarò nga Yáma tam kâ Apu Kesu Kiristu nga Yápu tam.

Yù Paddáyo ni Pablo

⁴ Á dayarayáwak ku si Namarò, ta aringá makabalabálá kuna, gapu ta pangikállá na ána pangiddù na nikayu, ta mesipá kayu kâ Apu Kesu Kiristu megapu sù pangikatalá naw kuna.

⁵ Á gapu ta ángngabbák ni Apu Kesu nikayu, napammapiá yù ngámin nga meyannung sù

* 1:2 Bibbiram mu yù meyannung sù pangilayalayá ni Pablo sù ili na Korinto: Kingnúá 18:1-17.

ákkiyápu naw kuna, á kánnámmuán naw ta napiá yù kuruk nga bilin na, ána makáwayyá kayu nga mangibukalán sù kebalinán na. ⁶ Ta nepatattà ta napiá ta nonò naw yù bilin ni Namarò nga meyanung kâ Apu Kesu, á napasigaggà yù ángnguruk naw kuna. ⁷ Á yáyu nga awán ta kúràng nayù iniyawá ni Namarò nikayu, nga pakáwayyá naw nga mamalurò sù ipakuá na nikayu, ta pagiddi-iddak naw ta pattoli ni Apu Kesu Kiristu, nga Yápu tam. ⁸ Á uputan ni Namarò nga ábbágán sikayu ta áddè ta pagáddékan na ággaw, tapè napasigaggà yù pangikatalà naw kuna ána awán ta pakaliwatán naw sangaw nu duttál yù ággaw nga pattoli ni Apu Kesu Kiristu, nga mamanunnù ta ngámin nga tatolay. ⁹ Á mapalurò yian gemma, ta mekatalà si Namarò, á aggina yù nagágál nikayu, ta mepattatáday kayu sù Aná na, si Apu Kesu Kiristu nga Yápu tam.

Nassisinná yù ira Mangikatalà nga taga Korinto

¹⁰ Á wáwwagè, yawe ikomá nikayu megapu sù pakáwayyá nga naggapu kâ Apu Kesu Kiristu nga Yápu tam. Pattatáddayan naw yù nonò naw, tapè ari kayu massisinná. ¹¹ Yáyu itabarang ku nikayu, gapu ta aijan yù ira kábbale di Kulowe nga nangiránuk níkan ta aijan nikayu yù ira naddaráma. ¹² Ta aijan yù ira nga kunniaw yù kagiad da, “Si Pablo yù tuttulam mi,” kud da. Á yù ira káruán, “Sikami yù tumuttuttl kâ Apolo,”[†] kud da. Onu kagian nayù ira káruán, “Tuttulam mi si Eduru,” kud da. Á aijan yù ira nga kagiad da, “Si Apu Kesu Kiristu yù tuttulam mi,” kud da.

¹³ Aro! Mesinná panò si Apu Kesu Kiristu! Ari gemma! Á sikán panò yù natay ta kurù nga netapil megapu nikayu! Onu narigù kayu panò megapu ta kesipátán naw yù ngágan ni Pablo? Ari gemma, nu ari galá megapu ta kesipátán naw yù ngágan ni Apu Kesu Kiristu.

¹⁴ Á magayáyákà ta allá ni Namarò ta baddi lâ nikayu yù jinigù ku. Aggira lâ di Kirispo kâ Gayo,[‡] ¹⁵ marakè kagian naw ta sikán yù tuttulam naw, nu sikán nakuan yù nanigù nikayu. ¹⁶ Á manonokin ta jinigù ku gapay yù ira kábbale ri Estepano.[§] Ngam aggira lâ manonò ku nga jinigù ku. Awán ta tanakuán nga manonò ku. ¹⁷ Ta jinok nangà ni Apu Kesu Kiristu, nga ari ta manigù ta tatolay, nu ari galá ta mangilayalayákà sù napiá nga dámak nga meyanung kuna. Á ta pangilayalayá ku, arák ku iniyusá yù monak nga ubobuk ána yù pakáwayyá nayù sírik nayù ággubobuk ku, marakè maginná naw lâ yù ubobuk ku, ngam arán naw kánnámmuán yù pakáwayyá nayù pate ni Apu Kesu ta kurù.

Aijan kâ Apu Kesu Kiristu yù Pakáwayyá ni Namarò ána yù Sírik na

¹⁸ Á yawe bilin ni Namarò yù meyanung sù pagikáru ni Apu Kesu Kiristu ta liwiliwá na tatolay sù pate na ta kurù. Á yù ira tatolay nga ari manguruk, nga mekaná noka sù pangukum ni Namarò, á kagiad da ta awán ta serbi nayù bilin ni Namarò. Ngam sittam nga makiyigù kâ Apu Kesu, ammu tam yù pakáwayyá nayù bilin ni Namarò, ta yáyu nga makiyigù ittam kuna, gapu ta naginná tam yù bilin na. ¹⁹ Á aijan yù dán nga netúrâ, nga inipetúrâ na ngaw ni Namarò, nga kun na, “Darálak ku yù sírik nayù ira tatolay nga makkagi ta masírik ira ána naggigiámmu ira, nga ari manguruk níkan.

Á gammák ku yù pakáwayyá nayù ira tatolay nga makkagi ta makánnámmu ira, tapè ari mapalurò yù akka-akkuád da, á mabbábáng ira nga mapállá.”*

²⁰ Á anni laguk yù ággigián nayù ira tatolay nga masírik, ána yù ira naggigiámmu sù tunung ni Moyses, ána yù ira masírik nga mamereperang ta ubobuk? Yù ira tatolay nga ari manguruk kâ Namarò, mássiki nu aru yù ammu ra, ipasingan ni Namarò ta awán ta serbi nayù ngámin nga ammu ra, á kunnay ta molapá ira, gapu ta arád da kurugan si Namarò.

²¹ Á megapu sù sírik ni Namarò, yáyu nga sinalákkuruk na ta arád da mánnámmuán nayù ira tatolay yù Namarò nira megapu sù kagiad da nga sírik da, nu ari galá ta iyigù na yù ira nga mangikatalà kuna, megapu sù bilin na nga ilayalayá mi, nga ibiláng nayù ira ari manguruk ta awán ta serbi na. ²² Á yù ira Kudío, ari ira manguruk kâ Namarò, nu arád da masingan yù pamagaddátu na. Á yù ira Gareko, alerad da yù ibiláng da ta masírik. ²³ Ngam sikami, ilayalayá mi si Apu Kesu Kiristu nga natay ta kurù, nga nagikáru ta liwiliwá na tatolay. Á yù ira Kudío, manaki ira nga magginná, gapu ta iluddè da yù natay ta kurù. Á yù ira ari Kudío, kagiad da ta awán ta serbi nayù kingnúá ni Apu Kesu, ána kagiad da ta molapá yù ira mangikatalà kuna. ²⁴ Ngam sittam nga manguruk sù pagágál ni Namarò ta umay ittam makiyigù kuna, mássiki nu Kudío onu ari Kudío, ammu tam ta makáwayyá si Apu Kesu Kiristu nga mangiyigù ta tatolay, megapu sù pakáwayyá ni Namarò ána sírik na.

[†] 1:12 Asinni si Apolo? Kingnúá 18:24-28 [‡] 1:14 Asinni di Kirispo kâ Gayo? Kingnúá 18:8; Kingnúá 19:29; Roma 16:23 [§] 1:16 Asinni si Estepano? 1 Korinto 16:15 * 1:19 Isaya 29:14

²⁵ Á yù pinalurò ni Namarò, nga kagian nayù ira ari manguruk ta awán ta serbi na, yáyù masírik ánnè ta ngámin nga sírik da. Á yù kagiad da ta kapi ni Namarò, yáyù masikan áнна makáwayyá ánnè ta ngámin nga pakáwayyá na tatolay áнна sikad da. Ta kagian nayù ira ari manguruk ta awán ta serbi nayù pate ni Apu Kesu, ngam sinalákkuruk ni Namarò ta yáyù gapu na nga pakomán na yù ira nakaliwá. Á kagiad da ta makapi si Namarò gapu ta arán na inililli si Apu Kesu sù pate na ta kurú, ngam sinalákkuruk ni Namarò ta yáyù gapu na nga iyigù na yù ira tatolay, tapè ari ira sangaw mekanakaná ta pangukum na.

²⁶ Á wáwwagì, nonopan naw yù ággigian naw lage naw manguruk sù pagágál ni Namarò nikayu. Baddi lá nikayu yù inibiláng nayù ira ari manguruk ta masírik, onu makáwayyá, onu kátannangan. Ngam piníli na kayu ni Namarò, tapè sikayu yù manguruk kuna. ²⁷ Ta piníli ni Namarò yù ira tatolay nga kun na awán ta ammu ra ta ánninganán nayù ira ari manguruk, tapè mepasiránán yù ira nga makkagi ta masírik ira. Á piníli ni Namarò yù ira tatolay nga makapi, tapè mepasiránán yù ira makáwayyá. ²⁸ Á yù ira nga meluddè, nga uyoyungán nayù ira ari manguruk áнна kagiad da ta awán ta serbi ra, aggira yù piníli ni Namarò, tapè ipakánnámmu na ta kuruk nga awán ta serbi nayù ibiláng na tatolay ta importá ta dabbuno.

²⁹ Á yù ira ari mebiláng ta importá ta dabbuno, aggira yù piníli ni Namarò, tapè awán ta tolay nga aijan yù awayyá na nga mappeddaráyaw ta arubáng ni Namarò. ³⁰ Ta si Namarò yù manotolay nittam, á pinattátádde na ittam ká Apu Kesu Kiristu, tapè mesipá ittam sù sírik na áнна piá na. Á megapu ká Apu Kesu Kiristu, nga nagikáru ta liwá tam, pakomán ni Namarò ittam, tapè ari ittam mekanakaná sù pamagikáru na. Á pakarenuán na yù nonò tam, áнна pabbalanan na ittam ta tatole na. ³¹ Á yáyù nga aijan yù dán nga netúrâ nga kunniawe, “Nu aijan yù iparáyaw na tolay, á ari yù baggi na, nu ari galá si Apu Kesu Kiristu nga Yápu na, áнна yù kingnguá ni Apu megapu kuna.”†

2

Yù Napiá nga Dámak nga Meyannung sù Ketapil ni Apu Kesu Megapu nittam

¹ Á síkán, wáwwagì, labbè ku sù gián naw nga umay mangilayalayá sù bilin ni Namarò, arák ku iniyubobuk yù monak onu masírik nga ubobuk nayù ira naggiámmu. ² Á ta paggiák ku nikayu, initalákkuruk ku ta yá lá ilayalayá ku si Apu Kesu Kiristu, nga natay ta kurú, nga netapil megapu nittam. ³ Á nakapingá áнна namippippigá nga naganássing. ⁴ Á ta pangilayalayá ku, arák ku iniyubobuk yù monak áнна masírik, ta arát takayu kinagumán megapu sù ággubobuk ku. Ngam kinuruk naw yù bilik ku megapu galá sù pakáwayyá nayù Mangilin nga Ikararuá ni Namarò. ⁵ Á yáyù nga ikatalá naw si Apu Kesu Kiristu, ari megapu sù sírik na tolay, nu ari galá megapu sù pakáwayyá ni Namarò.

Yù Sírik ni Namarò

⁶ Á ta pangituddu mi sù ira nga napasigaggá yù ángngikatalá da ká Apu Kesu, masírik áнна monak yù ubobugam mi, ngam dumá sù kagiad da ta masírik nayù ira kátannangan nga mammaguray ta dabbuno, áнна yù ira káruán nga tatolay nga ari manguruk ká Apu. Ta mappasá sangaw yù ibiláng da ta masírik áнна yù pakáwayyá ra. ⁷ Ngam yù sírik nga ubobugam mi yù sírik ni Namarò nga inilimak na ngaw ta tatolay. Ta sù ngaw lage na namarò ta dabbuno, sinalákkuruk ni Namarò yù akkuán na, tapè mesipá ittam sù pammagure na ta lángì. ⁸ Á awán ta mammaguray ta dabbuno nga nánnámmuán na yù sinalákkuruk ni Namarò. Ta nu nánnámmuád da nakuan, arád da nakuan pinapátay ta kurú si Apu Kesu, nga kotunán nga mammaguray.

⁹ Á yù ipakánnámmu mi, yáyù inipetúrâ na ngaw ni Namarò sù dán nga libru, nga kun na, “Makapállá yù talákkurugan ni Namarò nga akka-akkuán na megapu sù ira nga mangiddù kuna,

nga arád da paga bulubugá nasingan onu naginná, áнна arád da paga manonò!”*

¹⁰ Ngam dannian yù inipalappá ni Namarò nittam, megapu sù Ikararuá na. Ta yù Ikararuá ni Namarò, ammu na ngámin, mássiki yù monak nga nonopan ni Namarò. ¹¹ Á ta ángngarigán, asinni panò yù makánnámmu sù aijan ta nonò na tolay, nu ari galá yù tolay lápay? Á kunnian gapay ká Namarò, ta awán ta makánnámmu sù meyannung ká Namarò, nu ari galá si Namarò áнна yù Ikararuá na. ¹² Ngam sittam nga mangikatalá ká Namarò, dumá yù nonò tam ta nonò nayù ira tatolay ta dabbuno nga ari manguruk ká Apu, gapu ta iniyawá ni Namarò nittam yù Ikararuá na nga maggián nittam, tapè matákkilalát tam yù ngámin nga naggapu ká Namarò nga iyawá na nittam.

¹³ Á ta pangilayalayá mi karannian, arám mi iyubobuk yù masírik nga ubobuk nga naggapu ta nonò na tolay ta dabbuno, ngam iyubobuk mi lá yù ipakámmuú na yù Ikararuá ni Namarò nikami. Á megapu sù ángngabbák na nikami, ibukalám mi yù kuruk nga meyannung ká Namarò sù ira tatolay nga aijan nira yù Mangilin nga Ikararuá. ¹⁴ Ngam yù ira tatolay nga ari manguruk, nga awán nira yù Ikararuá ni Namarò, arád da alawatan yù netuddu nga naggapu sù Ikararuá ni Namarò, gapu ta kagiad da ta awán ta serbi na. Á arád da máwayyá nga kánnámmuán, gapu ta awán nira yù Ikararuá ni Namarò nga mangabbák, tapè kánnámmuád da nakuan. ¹⁵ Ngam yù tolay nga manguruk, nga aijan kuna yù Ikararuá ni Namarò, ammu na yù mappíli sù napiá, á panakitán na gapay yù ari napiá. Ngam yù ira tatolay nga ari manguruk ká Namarò, arád da kánnámmuán yù ággangngúá nayù tolay nga manguruk ká Apu. ¹⁶ Á aijan yù netúrú sù dán nga libru, nga kun na, “Egga panò yù makánnámmu sù nonò ni Apu Namarò?

Egga panò yù makáwayyá nga manabarang kuna?”†

Awán gemma. Ngam sittam nga mangikatalà ká Apu Kesu Kiristu, kánnámmuát tam yù naggapu ta nonò na, megapu sù Ikararuá na nga maggián nittam.

3

Yù ira Tatolay nga Masserbi ká Namarò

¹ Ngam sikayu, wáwwagi, ta keggá ngaw ta gián naw nga mangituddu nikayu, arák ku inittuddu yù monak nga kunnay sù ituddù sù ira tatolay nga tumulú sù Ikararuá ni Namarò. Ngam ággibajji lá yù ángngituddù nikayu, nga kunnay sù pangituddù ta tolay nga tuttulan na lá paga yù karagátan na baggi na. ² Á kunnay kayu paga ta abbing nga massusu, ta arán naw kánnámmuán yù monak nga ituddù nakuan nikayu. Á yáyù nga ággibajji lábbi yù ángngituddù nikayu. Á mássiki nu kunangane, arán naw paga mánnámmuán! ³ Ta akkuán naw paga yù akka-akkuán nayù ira ari manguruk ká Apu. Mangabubu kayu ána maddaráma kayu, á yáyù nga mepasingan ta kun na kayu ta tolay ta dabbuno nga akkuán na yù karagátan nayù baggi na, nga ari manguruk ká Apu. ⁴ Ta aijan nikayu yù ira makkagi ta tuttulad da si Pablo ána yù ira makkagi ta si Apolo yù tuttulad da, á yáyù nga mepasingan ta akkuán naw lá paga yù akka-akkuán nayù ira tatolay ta dabbuno nga ari manguruk ká Apu.

⁵ Á anni laguk yù kingnúá ni Apolo? Á anni laguk yù pinalurò ku? Masserbi kami ká Namarò, nga mangilayalayá sù bilin na, tapè ikatalà naw si Apu Kesu. Á sinuppál mi lá yù inipakuá ni Namarò nikami nga katággítádday. ⁶ Á meyárik kami sù ira nga pattarabakuan nayù makáddabbun, ta sikán yù kun na doban na nga umay mammulá ta bukal, á si Apolo yù kun na doban na nga umay massikkuk ta danum. Ngam si Namarò yù mamarakal sù inimulá mi.

⁷ Á yáyù nga ari makáwayyá yù mammulá onu yù massikkuk, ta si Namarò galá yù mamarakal sù nemulá. ⁸ Á arán na irumá ni Namarò yù mammulá ána yù massikkuk, ta iyawá na nira nga katággítádday yù bálà na nga mepángngá ta pattarabáku na. ⁹ Á sikami ká Apolo, makkabbulun kami nga makká-abbák nga mangituddu nikayu, ta yáyù passerbi mi ká Namarò. Á meyárik kayu ta ákkomanán ni Namarò.

¹⁰ Á meyárik kayu gapay ta balay nga paddayan ni Namarò. ¹⁰ Á megapu sù allà ni Namarò níkan, iniyawá na níkan yù pakáwayyá nga mangabbák kuna ta pappadde na sù bale na. Á kunnayá ta makáwayyá nga mabbalay, nga mangabbák ká Apu. Á kunnayá ta nangipay ta panáddagán nayù balay, ta sikán yù napolu nga mangilayalayá sù bilin ni Namarò nikayu. Á aijan gapay yù ira nga kun na mamalin ta balay. Á sittam nga katággítádday, imugurán na laguk ta napiá yù áppadde na. ¹¹ Ta awán ta tanakuán nga meyárik ta panáddagán nayù balay nga ipapadde ni Namarò, nu ari galá si Apu Kesu Kiristu, nga kun na kallang nga nepatáddagin. Ta aggina lá yù pangikatalakát tam.

¹² Á ta ángngarigán, yù ira mamalin ta balay, makkakerumá yù ilannà da sù balay. Á kunnian sù ira mangituddu, ta makkakerumá yù ituddu ra. Á yù ira nga napiá yù ituddu na, kunnay ta ilannà da ta balay yù buláwán, ána pinaláta, ána nanginá nga batu. Ngam nu ari napiá yù ituddu ra, á kunnay ta ilannà da ta balay yù kayu nga támá, ána mimì, ána don na niuk. ¹³ Á sangaw nu duttál yù ággaw nga pamanunnù ni Apu Kesu ta tatolay, mepalappá yù sinarabáku tam nga katággítádday, nu napiá. Ta pasikkálan ni Apu yù kingnúá tam, nga kunnay ta ipe na sù api, á maggián lá yù napiá nga inipakuá ni Namarò nittam, ngam kengá lá nga kunnay ta matuggi yù akkuát tam nga naráké onu yù awán ta serbi na. ¹⁴ Á nu maggián yù sinarabáku tam, nga kun na balay nga pidde tam nga ari

† 2:16 Isaya 40:13-14

* 3:2 Kebrú 5:12-13

matuggi, á napiá yù bálá tam nga iyawá ni Namarò nittam nga katággitádday. ¹⁵ Ngam yù tolay nga ari napiá yù ituddu na, á kunnay ta matuggi yù sinarabáku na, á kengá lá. Ta awán ta bálá na. Ngam meyiǵù yù baggi na lá, nga kun na tolay nga nelilli sù katuggi nayù bale na, nga awánin ta kukuá na.

¹⁶ Á arán naw panò ammu ta sittam ngámin nga mangikatalà ká Apu Kesu yù kun na mangilin nga bale ni Namarò? Ammu naw gemma! Ta maggián nittam si Namarò, gapu ta aijan nittam yù Ikararuá na.† ¹⁷ Á nu aijan yù tolay nga manarál sù mangilin nga bale ni Namarò, á aggina gapay yù darálan ni Namarò. Á sikayu lápay nga mangikatalà kuna yù mangilin nga bale ni Namarò.

¹⁸ Arán naw laguk ilogò yù baggi naw! Ta nu aijan yù tolay nikayu nga kagian na ta masirik ta ánninganán nayù ira tatolay ta dabbuno nga ari manguruk ká Apu, á napiá nakuan nu mabbáli ta kun na molapá, nga awán ta ammu na ta ánninganád da, tapè mepakámmu kuna yù kukurugán nga sírik nga naggapu ká Namarò. ¹⁹ Ta yù sírik nayù ira tatolay ta dabbuno, yáyù ibiláng ni Namarò ta awán ta serbi na. Á aijan yù neturá sù dán nga libru nga bilin ni Namarò nga kun na, “Yù ira tatolay ta dabbuno nga monak yù sírik da, á yá lá pabbalinád da yù kunnay ira ta nasikuatán, ta yù sírik da yù gapu na kelogò da lápay, megapu sù ure ni Namarò.”‡

²⁰ Á aijan gapay yù neturá sù bilin ni Apu nga kunnaw: “Ammu ni Namarò ta awán ta serbi nayù nonopan nayù ira tatolay ta dabbuno nga kagiad da ta masirik.”§ ²¹ Á arán naw laguk ipappeddaráyaw yù ira tatolay nga mangituddu nikayu, ta si Namarò yù maddok nira ta umay ira masserbi nikayu. Ta iniyawá na nikayu ni Namarò yù ngámin nga pammakapián naw. ²² Á jinok nangá ni Namarò, áнна jinok na gapay di Apolo ká Eduro, ta umay kami masserbi nikayu. Á talákkurugan ni Namarò ta mabbáli ta pakkapiánát tam yù ngámin nga aijan ta dabbuno, yù ngámin nga mesimmu kunangan áнна yù mesimmu noka, áнна yù áttole tam áнна yù pate tam. Ngámin dannian yù naggapu ká Namarò, tapè pabbalinan na ta pakkapiánát tam, ²³ gapu ta sittam nga mangikatalà yù kukuá ni Apu Kesu Kiristu. Á si Apu Kesu Kiristu yù kukuá ni Namarò.

4

Yù ira Sinullà ni Namarò nga Minángngilayalayá ká Apu Kesu

¹ Á kunnaw laguk yù pangibiláng naw nikami kári Apolo, ta masserbi kami ká Namarò. Ta inikatalà na nikami ni Namarò yù pangilayalayá mi sù bilin na nga meyanung ká Apu Kesu, nga inilímak na ngaw ta tatolay. ² Á yáyù nga tuppálam mi ta napiá yù ngámin nga ipakuá ni Namarò nikami, ta máwák na tolay nga ipasingan ta aggina yù mekatalà nga masserbi sù yápu na. ³ Á maguray lá yù kagian naw nga meyanung sù áttarabákù, á paguráyák ku lá, ta ari sikayu onu tanakuán nga tolay yù mamanunnù níkan, nu ari galá yù Yápù. Á mássiki síkan, arák ku awayyá nga panunnután yù baggi. ⁴ Á awán ta ammu nga liwá ku, ngam arák ku gapay ammu nu kuruk. Si Apu Kesu Kiristu nga Yápù, aggina galá yù mamanunnù níkan. ⁵ Á yáyù nga arát tam laguk panunnután yù ira kábulut tam lage na ággo na. Ta sangaw nu duttál yù ággo na, manoli laguk si Apu Kesu, nga umay mamanunnù nittam ngámin nga tatolay. Á ipalappá na sangaw yù ngámin nga kingngi-kingnuá tam nga inilímak tam, áнна yù aijan ta nonò tam nga arát tam kinagi. Á nu napiá yù kingnuá tam, á si Namarò yù maddáyaw ta katággitádday nittam ta meyanung sù kingnuá na.*

⁶ Á wáwwagi, sikami ká Apolo yù keyarigán nayù inibukalák ku, tapè gigiámmuan naw yù kebalinán nayù neturá sù bilin ni Namarò, áнна kurugan naw lá yù neturá. Ta ari máyá nu mappeddaráyaw kayu áнна paddurúmán naw yù ira tatolay nga sinullà ni Namarò ta mangituddu nikayu. Arát tam laguk pilian yù tádday nga pakimorayát tam ánnè sù tádday. ⁷ Ngattá, ta kagian naw ta aijan yù napiá nga pakáwayyá naw ánnè sù ira kábulun naw? Á egga panò yù pakáwayyá naw nga arán na galá iniyawá ni Namarò nikayu? Si Namarò gemma yù nangiyawá nikayu! Ngattá, ta mappeddaráyaw kayu, nga kunnay ta yù baggi naw lápay yù paggapuán nayù pakáwayyá naw?

⁸ Aro, sikayu nga taga Korinto! Kagian naw ta kunnay ta maríku kayu! Kagian naw ta ammu naw ngámin áнна awán ta kiddawan naw nakuan ká Namarò, nga iyawá na nakuan nikayu. Á kagian naw ta makáwayyá kayin, nga kun na patul nga mepammaguray ká Namarò sù páppatulán na, ngam sikami nga sinullà na nga minángngilayalayá, ari paga. Á napiá nakuan nu kuruk nga patul kayu, tapè mepammaguray kami gapay nakuan nikayu.

† 3:16 1 Korinto 6:19; 2 Korinto 6:16 ‡ 3:19 Job 5:13 § 3:20 Salmò 94:11 * 4:5 Roma 2:16

⁹ Á yáyù kagiak ku gapu ta urè, á sikami nga sinullà ni Namarò nga minángngilayalayâ yù pinagukák na ànnè ta ngámin, nga kunnay ta tatolay ira nga pagikaruan na kues, nga matay ta arubáng na aru nga tatolay. Á yù ira tatolay ta dabbuno ámma yù ira daroban ni Namarò gapay, gírawad da kami. ¹⁰ Á yù ira tatolay ta dabbuno nga ari mangikatalà kâ Apu, kagiad da ta molapá kami megapu sù panguruk mi kâ Apu Kesu Kiristu. Ngam sikayu, kagiad da ta masirik kayu, megapu sù pangikatalà naw kâ Apu! Á kagiad da ta makapi kami ámma ibiláng da kami ta tatolay nga awán ta pakáwayyá ra. Ngam kagiad da ta makáwayyá kayu ámma masikan kayu! Á yáyù nga pakimorayád da kayu. Ngam sikami, uyoyungád da kami. ¹¹ Á ta áddè kunangan, mabisin kami ámma mapangál, ámma napsipisil yù barawási mi. Á jigirigátad da kami, ámma awán ta paggianám mi. ¹² Á bannagam mi yù baggi mi nga mattarabáku, tapè aijan yù pakkatole mi. † Á nu igagek da kami, ipakimállà mi lâ ira kâ Apu ta ikállà na ira lâ. Á nu jigirigátad da kami, attamám mi lâ. ¹³ Á nu lillibatad da kami, apiánám mi ira lâ. Á ta áddè kunangan, ibiláng da kami ta tatolay nga kagukábán nga awán bulubugá ta serbi na, ámma ipeyárik da kami ta kun na basurá nga metabbá.

¹⁴ Á ari yaw ipattúrâ ku nikayu, tapè megasiránán kayu nakuan, nu ari galâ ta tabarangát takayu, tapè kánnámmuán naw yù napiá nga tuppálan naw nakuan, ta sikayu yù kun na ánâ ku nga iddukak ku. ¹⁵ Ta mássiki nu aru yù ira nga mangituddu nikayu ta meyanung sù panguruk naw kâ Apu Kesu Kiristu, á sikán lâ yù kun na yáma naw, ta sikán yù napolu nga mangilayalayâ sù bilin ni Namarò nikayu. Á gapu ta pangilayalayâ ku nikayu, inikatalà naw si Apu Kesu. ¹⁶ Á yáyù nga ikomâ nikayu, sikán nga kun na yáma naw, ta párigán naw yù ággangnguá. ¹⁷ Á yáyù nga dobak ku tán nikayu si Timotio. Aggina yù iddukak ku, nga kun na anâ ku nga mekatalà megapu sù pangikatalà na kâ Apu. Á ipanonò na nikayu yù napiá nga ipakuá ni Apu sù ira nga tumuttul kuna, nga naggittá sù napiá nga ituddù gapay sù ira ngámin nga mangikatalà kâ Apu ta ngámin nga ngayák ku.

¹⁸ Á aijan garè nikayu yù ira mappeddaráyaw, ta kagiad da ta aringà umay mattúllun nikayu. ¹⁹ Ngam mabikâ nga umay nikayu, sangaw nu ure ni Apu Namarò, á masingak ku yù ira mappeddaráyaw, á ammù sangaw nu kuruk nga aijan yù pakáwayyá ra. ²⁰ Ta mepakánnámmu nu kuruk nga mesipá yù tolay sù pammagure ni Namarò, ari lâ megapu sù pagubobuk na, nu ari galá megapu sù napiá nga akka-akkuán na, nga pangipasinganán na sù pakáwayyá ni Namarò. ²¹ Á anni laguk panò yù ikáyâ naw nga akkuák ku sangaw nu umayá nikayu? Ta nu ari kayu mabbabáwi ámma pallikuránán naw yù narákè nga akkuán naw, á et takayu sangaw pággangan. Ngam nu tukkatan naw yù narákè nga akkuán naw, á sangaw nu umayá, ipasingak ku lâ yù ángngiddù ku nikayu ámma yù ángnganna-annè nikayu.

5

Yù Meyannung sù Tádday nga Liwâ da

¹ Á neránuk garè ta aijan yù tolay nga mepaggagammung nikayu ta ákkimorayán naw, nga kitarákè yù akka-akkuán na. Á mássiki yù ira ari manguruk kâ Apu, arád da akkuán yù kunnian. Ta aijan kanu yù kabbulun naw nga inatáwa na yù atáwa nayù yáma na, nga massiúmán kuna. ² Á sikayu, ngattá ta mappeddaráyaw kayu lâ paga! Ngattá ta arán naw gammán yù tolay? Ari kayu nakuan mappeddaráyaw, nu ari galâ ta maraddam kayu nakuan! Papanáwan naw laguk sù paggagammungán naw yù tolay nga kunnian yù akkuán na!

³ Á sikán, mássiki nu awáná tán nikayu, á kun na aijanâ nikayu megapu sù pakanonò ku nikayu ámma yù pangitubbuk ku sù túrá ku nikayu. Á megapu ta pakáwayyá nga naggapu kâ Apu Kesu, kagiak ku nikayu yù pamagikáru sù tolay nga nalliwâ. ⁴ Á pakalabbè nayù túrá ku ta gián naw, maggagammung kayu laguk, ta mepulù nikayu si Apu Kesu Kiristu, ámma kunnay ta aijanakin lápay ta gián naw. ⁵ Á megapu sù pakáwayyá ni Apu Kesu, itulù naw yane tolay sù pakáwayyá ni Satanas, tapè jigirigátan na yù baggi na, abernu mabbabáwi sangaw nu majjigá, ámma meyigù yù ikararuá na sangaw nu dutfál yù ággaw nga panoli ni Apu Kesu, nga umay mamanunnù ta tatolay.

⁶ Á ari gemma napiá yù pappeddaráyo naw. Arán naw panò ammu yù nakagi, nga “Mássiki nu babáddi yù áppalappák nga nekiruk ta pán, á luppák ngámin.” Á yù kebalinán na yù passamá nayù narákè, á mekanakanâ kayu ngámin sangaw sù narákè nga akkuád da. ⁷ Irián naw laguk yù ngaw ággangnguá naw nga narákè, tapè pareku nga napiá yù akka-akkuán naw. Ta kuruk nga napakarenuán kayin, megapu sù pangikatalà naw kâ Apu Kesu Kiristu. Ta netapil si Apu Kesu, nga nepárik sù kigaw na karneru nga neyátáng ngaw, nga

† 4:12 Kingnuá 18:3

kunnay ta iniyátang nayù ira ngaw Kudio ta panaddamád da sù pattalebák nayù daroban ni Namarò nira, sù ánge na namapátay sù kaká nga aná nayù ira Egipto. ⁸ Á ta papparád da ngaw sù pappiestá ra, pidde ra yù pán nga awán ta nekiruk kuna nga áppalappák na. Á sittam, á kunnian iriát tam laguk yù naráké nga akka-akkuát tam, tapè ari massamá yù naráké nga kun na áppalappák ta pán. Á tuppálat tam yù ngámin nga napiá nga ipakuá ni Apu nittam, tapè mepagayáyá si Apu nittam, megapu sù napasigaggá nga pangikatalá tam ána yù panguruk tam kuna.

⁹ Á pattúrâ ku ngaw sù tanakuán nga túrá ku nikayu, sinaddánát takayu ta ari kayu mepappupúlù sù ira mangarallaw. ¹⁰ Ngam arák ku kagian ta ari kayu mepabbulun sù ira mangarallaw nga ari manguruk kâ Apu, onu yù ira mukkuk, yù ira makkokò, ána yù ira makimoray ta sináddios. Ta ari máwayyá nga mesinná ittam sù ira tatolay ta dabbuno nga ari manguruk kâ Apu, gapu ta awán ta tanakuán nga paggianát tam nu ari lâ sawe dabbuno. ¹¹ Ngam inítúrâ ku nikayu ta ari kayu mepappupúlù sù tolay nga makkagi ta wagi tam megapu ta panguruk na, nga naráké lâ yù akkuán na, nga mangarallaw, onu mukkuk onu makimoray ta sináddios, onu mabbekbek onu magillellaw onu makkokò. Ari kayu laguk mepappupúlù sù tolay nga makkagi ta wagi tam, nga mangguá karannian nga naráké. Á ari kayu mepallállang kuna.

¹² Á yù ira nga ari manguruk kâ Apu Kesu, ari ira gemma yù panunnutát tam, nu ari galá yù ira kábulut tam nga manguruk kâ Apu. ¹³ Ta si Namarò galá yù mamanunnù sù ira ari mangikatalá kuna. Á sikayu, papanáwan naw laguk sù paggagammungán naw yù tolay nga mangguá ta naráké, ta yáyù taddán ni Namarò nga netúrâ.

6

Yù Meyannung sù Pangikeká tam sù ira Kábulut tam

¹ Á nu aijan nikayu yù mamaliwá sù kabbulun na nga mangikatalá kâ Apu, á ngatá, ta ikeká na ta arubáng na kues nga ari mangikatalá kâ Apu? Ipapanunnù naw galá nakuan sù ira kábulun naw nga tatole ni Namarò. ² Arán naw panò ammu ta sangaw nu pagáddékán na ággaw, á sittam nga tatole ni Namarò yù mamanunnù? Á panunnutát tam yù ira ngámin nga tatolay nga ari manguruk kuna. Á gapu ta yáyù ipakuá ni Namarò nittam, arát tam panò máwayyá nga panunnután yù ira kábulut tam nga mangikatalá kâ Apu, nu aijan yù baddi nga áddumá ra ta nonò da? ³ Á arán naw panò ammu gapay ta sittam nga manguruk kâ Apu yù mamanunnù sangaw sù ira daroban ni Namarò ta lángi? Á pappanganá lâ sù meyanung ta ággiát tam sawe dabbuno! ⁴ Á nu aijan nikayu yù mangikeká ta kabbulun na, á ngatá, ta en naw ipapanunnù sù ira tatolay nga ari mebiláng sù ira kábulun naw nga mangikatalá kâ Apu? ⁵ Aro! Mappasirán kayu nakuan megapu sù akka-akkuán naw! Awán panò ta tádday nikayu nga masirik, nga ammu na yù mamanunnù ána yù mamakkakápiá sù ira kábulut tam nga manguruk? ⁶ Ngam sikayu, makkakákeká kayu ta arubáng nayù kues nga ari mangikatalá kâ Apu, sikayu nga mawwawági megapu sù pangikatalá naw!

⁷ Á liwá nawin gapay yù pakkakákeká naw. Más napiá nu attamán naw nakuan yù naráké nga akkuán na nikayu nayù kabbulun naw. Á mássiki nu suitikan na kayu, paguráyán naw lâ nakuan. ⁸ Ngam sikayu galá yù mangilogò ána yù massuíti! Á yù ira kábulun naw nga mangikatalá kâ Apu yù ilogò naw ána yù suitikan naw! ⁹ Arán naw panò ammu ta ari mesipá sù pammagure ni Namarò yù ira tatolay nga mangupù nga mangguá ta naráké? Ari kayu laguk makilogò sù ira makkagi ta ari kuruk. Ta yù ira tatolay nga meruruk sù arán na atáwa, onu yù ira makimoray ta sináddios, onu yù ira mangarallaw ána makikarallaw, yù ira mangguá ta naráké sù kagittá na nga laláki onu babay, ari ira mesipá sù pammagure ni Namarò. ¹⁰ Á kunnian gapay sù ira mattukkam, onu yù ira mukkuk, onu yù ira magillellaw, onu yù ira mamaraparáké, onu yù ira makkokò, ari ira mesipá sù pammagure ni Namarò. ¹¹ Á yù ira káruán nikayu, kunnian ngaw yù kingguá ra. Ngam kunangane, napakomá kayin, á napakarenuán kayin, nga mangilin megapu sù pinalurò ni Apu Kesu Kiristu ána megapu sù pakáwayyá nayù Ikararuá ni Namarò. Á pinabbalin na kayin ni Namarò ta ána na, nga ibiláng na ta matunung.

*Akkuát tam lâ yù Napiá, tapè Meparáyaw si Namarò
Roma 14:13-23; 1 Korinto 8:7-13; 10:23-33*

¹² Á naginná naw yù nakagi, nga kud da, “Maguray lâ yù ikáyâ tam nga akkuán, yáyù awayyá tam nga akkuán, nu arát tam liwatan yù tunung.” Wan. Ngam kagiak ku nikayu ta ari mabbalin ta kapiánát tam yù ngámin nga ikáyâ tam nga akkuán. Á yáyù nga mássiki nu ari mepugik nikán yù ikáyâ ku, á gaggarak ku galá yù baggi, maraké aripanan nangá

nayù pakkaragá ku. ¹³ Á naginná naw gapay yù nakagi, nga kud da, “Napadday yù kanan, tapè kanat tam, á napadday gapay yù gutù tam, tapè aijan yù paggianán na kanat tam.” Wan. Ngam kagiak ku nikayu ta sinullá ni Namarò yù pagáddekán nayù serbi nayù gutù tam ána kanat tam, á awán ira sangaw. Á yá ipappadde ni Namarò ta baggi tam, nga ari ta mangarallow, nu ari galá tapè dayawat tam si Apu Kesu Kiristu, ána palurotat tam yù ipakuá na nittam. Ta si Apu Kesu Kiristu galá yù máwák tam, nga mammaguray nittam. ¹⁴ Á pinaginnanole ni Namarò si Apu Kesu Kiristu, á paginnanolayan na ittam gapay sangaw, megapu sù pakáwayyá na nga mamagaddátu.

¹⁵ Á arán naw panò ammu ta sittam nga mangikatalá ká Apu Kesu Kiristu, nepattatáddy ittamin ká Apu, nga kunnay ta sittam yù baggi na? Á gapu ta kunnian yù ággiát tam, arát tam laguk awayyá nga umay metáddy sù narákè nga babay. ¹⁶ Arán naw panò ammu ta nu umay yù tolay meruruk sù makikarallow, á kunnay ta táddy lá yù baggi ra? Ta yawe inipetúrá ni Namarò, “Yù ira duá, kunnay ira ta táddy lá.”* ¹⁷ Ngam sittam nga mangikatalá ká Apu Kesu, netáddy yù nonò tam ta nonò na, megapu sù Mangilin nga Ikararuá na nga maggián nittam.

¹⁸ Ari kayu laguk mangarallow. Arayyuán naw yù mangapà nikayu ta mangarallow. Ta narákè yù liwá nayù tolay nga mangarallow, ánnè sù ira ngámin nga liwá na tolay, gapu ta pakaliwatán na lápay yù baggi na. ¹⁹ Arán naw panò ammu ta kun na bale nayù Mangilin nga Ikararuá yù baggi tam, ta jinok ni Namarò yù Ikararuá na nga maggián ta baggi nayù ira nga mangikatalá kuna. Á yáyù nga arát tam kukuá yù baggi tam, ta si Namarò yù makákuá ta baggi tam.† ²⁰ Nonopat tam laguk yù inipappagá ni Apu Kesu ta pagikáru na ta liwá tam, tapè tatole na ittam. Á iyusá tam laguk yù baggi tam nga manuppál sù napiá, tapè meparáyaw si Namarò megapu nittam.

7

Yù Meyannung sù ira Magatáwa

Mattiu 5:31-32; 19:3-9; Markus 10:2-12; Lukas 16:18

¹ Á ta meyannung sù iniyabbù naw ta pattúrá naw ngaw nikán, á yawe yù itabbák ku nikayu. Napiá nu ari mangatáwa yù tolay. ² Ngam gapu ta malogon yù tolay nga mápá ta malliwá, á napiá nu aijan sù katággítáddy yù atáwa na lápay. ³ Á yù ira magatáwa, napiá nu makká-upu-upu ira nga manuppál sù pagatáwa ra, ta jikkú nu manaki yù táddy nga meruruk sù atáwa na. ⁴ Ta ari yù babay yù mammaguray sù baggi na, nu ari lá yù atáwa na yù mammaguray kuna. Á kunnian gapay sù laláki, ari mammaguray sù baggi na, nu ari lá yù atáwa na yù mammaguray kuna. ⁵ Arán naw laguk panakitán yù ikáyá nayù atáwa naw. Ngam nu nattatáddy yù nonò naw nga ari kayu lábbi madduruk ta pígiá nga ággaw, tapè tángngagan naw yù pakimállá naw ká Apu, á napiá yian. Á ta pappasá nayù ira ággaw nga pakimállá naw, á madduruk kayu má laguk, marakè kagumánan na kayu ni Satanas, gapu ta arán naw magagarán yù karagatán naw.

⁶ Á kinagi nikayu ta máyá nu magatáwa kayu, ngam arák ku inittaddán. ⁷ Á ta urè, más napiá nu meparík yù tolay nikán nga ari mangatáwa. Ngam ammu ta iniyawá ni Namarò nittam nga katággítáddy yù pakáwayyá na nga makkakerumá.

⁸ Á sikayu nga ari paga nagatáwa ána sikayu nga nabálu, yawe yù kagiak ku nikayu. Napiá nu maggián kayu lá nga kunnay nikán nga ari mangatáwa. ⁹ Ngam nu arán naw magagarán yù pakkaragá nayù baggi naw, á mangatáwa kayu laguk, ta más napiá nu magatáwa kayu, ánnè sù pannononò naw sù karagatán na baggi naw.

¹⁰ Á yawe yù kagiak ku sù ira magatáwa, nga ari lá yù taddák ku, nu ari galá yù taddán ni Apu Kesu, nga ari nakuan mesinná yù babay sù atáwa na. ¹¹ Ngam ta ángngarigán nu panawán nayù babay yù atáwa na, ari laguk makiatáwa ta tanakuán, nu ari galá ta makikipiá sù ngaw atáwa na, ána mattoli kuna. Á yù laláki, arán na nakuan igúngay yù atáwa na.

¹² Á sikayu nga káruán, yawe yù kagiak ku nikayu, nga urè lápay, gapu ta awán ta kinagi ni Apu Kesu nga meyannung karanniaw. Á ta ángngarigán, nu aijan yù laláki nga mangikatalá ká Apu Kesu, ngam aijan yù atáwa na nga ari mangikatalá ká Apu. Á mássiki nu ari manguruk yù babay, nu ikáyá na maggián sù atáwa na nga manguruk, á arán na nakuan igúngay na laláki yù atáwa na. ¹³ Á kunnian gapay nu aijan yù babay nga mangikatalá ká Apu Kesu, ngam ari mangikatalá ká Apu yù atáwa na. Nu ikáyá nayù laláki nga maggián sù atáwa na nga manguruk, á arán na laguk igúngay. ¹⁴ Ta yù laláki nga ari manguruk, á

* 6:16 Genesis 2:24 † 6:19 1 Korinto 3:16; 2 Korinto 6:16

ibiláng ni Namarò ta kunnay ta tole na gapay, megapu sù kepattádde na sù atáwa na nga mangikatalà kâ Apu. Á kunnian gapay sù babay nga ari manguruk, nga netádday sù atáwa na nga mangikatalà kâ Apu Kesu. Ta nu ari kuruk yian, á mebiláng yù ira ánà da ta kunnay sù ira ánà nayù ira nga ari manguruk. Ngam mangilin ira gemma, nga mesipà sù ira tatole ni Namarò.

¹⁵ Ngam ta ángngarigán nu aijan yù tádday nga ari manguruk kâ Apu, nga ikáyâ na igúngay yù atáwa na nga mangikatalà kâ Apu, á massinná ira laguk, tapè ari ira maddamá. Á mapalubbágin yù tádday nga mangikatalà kâ Apu, gapu ta ikáyâ ni Namarò ta magimammà ira. ¹⁶ Á sikaw nga babay nga mangikatalà kâ Apu, napiá nu maggián ka sù atáwam, abernu mabbabáwi sangaw megapu sù napiá nga ipasingam mu, á mangikatalà gapay kâ Apu, tapè meyígù. Á sikaw nga laláki nga mangikatalà kâ Apu, napiá gapay nu maggián ka sù atáwam, abernu mabbabáwi sangaw megapu sù napiá nga ággangnguám kuna, á mangikatalà gapay kâ Apu, tapè meyígù.

Arát tam Patalián yù Ággiát tam

¹⁷ Á yawe yù taddák ku sù ira ngámin nga mangikatalà kâ Apu, nga maggagammung ta makkakerumá nga lugár da. Maguray lâ yù ággiát tam áнна yù pakáwayyá tam ta pagágál ni Namarò nittam ta mangikatalà kuna, yáyù arát tam patalián nu arát tam galá uputan. ¹⁸ Á ta ángngarigán, nu nakugi yù tolay lage na nangikatalà kâ Apu Kesu, á arán na laguk irián yù kakugi na. Á nu ari nakugi yù tolay ta pagágál na kuna ni Apu, á maggián lállaguk nga ari nakugi. ¹⁹ Ta mássiki nu nakugi yù tolay onu ari nakugi, awán ta kuentá na. Ta yá lâ importá yù panuppál tam sù itaddán ni Namarò nittam. ²⁰ Á yáyù nga maggián ittam laguk sù ággiát tam ta pamegapu tam mangikatalà kâ Apu.

²¹ Á ta ángngarigán nu aripan ka ngaw, uputam mu laguk yù pakiaripam mu. Ngam nu aijan yù awayyám nga mapalubbáng sù pakiaripanám mu, á napiá gemma. Alawatam mu laguk yù kapalubbáng mu. ²² Ta arán na paddurúmán ni Namarò yù tolay nga aripan áнна yù tolay nga makáwayyá, nga ari makiaripan. Á ta ánninganán ni Apu Namarò, tole na nga napalubbágin yù aripan nga mangikatalà kâ Apu Kesu Kiristu. Á yù tolay nga makáwayyá, nga ari makiaripan ta tolay, nabbáli laguk ta aripan ni Apu Kesu, gapu ta pakiyápu na kâ Apu Kesu. ²³ Á tatole na kayu ni Apu Namarò, nga nanginá, gapu ta inipappagá na yù inángà nayù táttádday nga Aná na, si Apu Kesu Kiristu, tapè palubbárgan na kayu. Ari kayu laguk makiaripan sù ira tatolay nga mangituddu sù ure ra lápay, ta aijanin yù Yápu naw, si Namarò. ²⁴ Á yáyù, wáwwagi, maggián kayu laguk nga katággítádday sù ággián na ta pamegapu na tumuttul kâ Namarò, áнна uputan naw gapay yù pakiyápu naw kâ Namarò.

Yù Meyannung sù ira ari paga Nangatáwa áнна yù ira Nabálu

²⁵ Á ta meyannung sù ira nga ari bulubugá nangatáwa, awán ta ammù nga kinagi ni Apu Kesu nga meyannung sù ággiád da. Ngam yawe yù kagiak ku ta urè lápay, á sikán yù mekatalà, megapu sù pangikállà ni Apu nikán. ²⁶ Á gapu ta mappanà nga majjigá ittam, á napiá ta urè nu maggián ittam sù dán nga ággiát tam. ²⁷ Á ta ángngarigán, sikayu nga aijan yù atáwa na, á ari kayu laguk massinná. Á sikayu nga awán ta atáwa na, arán naw laguk karagátan nga mangatáwa. ²⁸ Ngam nu magatáwa kayu, á ari gemma liwá. Ngam ta urè, más napiá nu ari kayu mangatáwa, tapè arán naw maparubán yù jigá nga umay ta ngámin nga naggagáttáwa.

²⁹ Á yawe ipanonò ku nikayu, wáwwagi. Mabi ittamin nga maggián sawe dabbuno, nga aijan yù awayyá tam nga masserbi kâ Apu. Á yáyù, sikayu nga aijan atáwa na, tángngagan naw yù ipakuá ni Apu nikayu, ta kunnay sù panángngák nayù tolay nga awán ta atáwa na. ³⁰ Á kunnian gapay sù ira maraddam, onu magayáyâ, onu yù tolay nga gumátang áнна yù tolay nga awán ta kukuá na. Arát tam laguk tángngagan yù karaddam tam áнна pagayáyâ tam, á arát tam ikaburung yù egga nittam onu yù awán, tapè matángngák tam yù passerbi tam kâ Apu. ³¹ Á napiá nu aláppaw yù panangngal tam sù egga nittam ta dabbuno. Ta awán ta áddumá na, nu málá tam yù aru sawe dabbuno onu yù baddi lâ yù málá tam, ta mabikin mappasá yù ággián nayù dabbuno.

³² Á ikáyâ ku ta awán ta ikaburung naw. Á yù tolay nga awán ta atáwa na, tángngagan na yù ipakuá ni Apu kuna, tapè magayáyâ si Apu megapu sù akkuán na. ³³ Ngam yù tolay nga aijan yù atáwa na, tángngagan na yù ággiád da kâ atáwa na, tapè magayáyâ yù atáwa na. ³⁴ Á yáyù nga ari magimammà yù nonò na, ta tángngagan na galá yù áttole ra ta dabbuno, ngam ikáyâ na nga tángngagan nakuan gapay yù ipakuá ni Apu kuna. Á yù babay nga awán ta atáwa na, tángngagan na lâ yù ipakuá ni Apu kuna, tapè magayáyâ si Apu megapu

kuna. Ngam yù babay nga aijan yù atáwa na, tángngagan na lá yù ikáyâ nayù atáwa na, nu kunnasi gapay yù pamagayáyâ na kuna. ³⁵ Á kinagi yawe nikayu, gapu ta ikáyâ takayu abbágán. Arát takayu gagarán, nu ikáyâ naw mangatáwa. Ngam ikáyâ ku ta napasigaggâ yù ángngiddù naw kâ Apu, ána tángngagan naw ta napiá yù ipakuá ni Apu nikayu, nga awán ta pakatalátanán na.

³⁶ Á ta ángngarigán nu aijan yù ira nattarátu, á kagian nayù láláki ta arán na magaggarán yù karagatán na baggi na, á nepatalugáring ta napanánin yù babay nga makiatáwa, á magatáwa ira laguk, ta arát da gemma liwâ nu magatáwa ira. ³⁷ Ngam nu nattatádday yù nonò da, ána napasigaggâ yù ure ra nga ari ira magatáwa, á nu máwayyá nayù láláki nga igaggak yù karagatán na baggi na, á napiá gapay nu ari ira magatáwa. ³⁸ Á yáyù nga napiá nu mangatáwa yù láláki sù magingánay nga katarátu na. Ngam más napiá nu ari mangatáwa.

³⁹ Á yù babay nga mangikatalâ kâ Apu, arán na awayyá nga makiatáwa ta tanakuán, nu matolay lá paga yù atáwa na. Ngam nu natayin yù atáwa na, awayyá nen nga makiatáwa nu ikáyâ na. Ngam yá lá pakiatawán na yù láláki nga mangikatalâ gapay kâ Apu. ⁴⁰ Ngam ta urè, más magayáyâ yù nabálu nu arán nen pidduán makiatáwa. Á ari lá negapu ta nonò ku tamma yù kagiak ku, nu ari gapay negapu sù ure nayù Mangilin nga Ikararuá.

8

*Yù Meyannung sù Kanan nga Meyátang ta Sináddios
Roma 14:13-23; 1 Korinto 6:12-20*

¹ Á yawe yù itabbák ku sù iniyabbù naw nga meyannung sù meyátang ta sináddios, nu aijan yù awayyá tam nga kanan. Á kuruk yù kinagi naw gemma, nga sittam ngámin nga mangikatalâ kâ Apu, ammu tam ta awán ta pakáwayyá nayù ira sináddios. Ngam yawe yù kagiak ku. Aijan yù ira kábulut tam nga manguruk, nga mabbábáng paga ta meyannung sù ira sináddios. Á ari ira mábbágán megapu sù ammu tam, nu mappeddaráyaw ittam ána motun yù nonò tam. Ngam nu kuruk nga iddukat tam ira, á mábbágán ira, ána mapasigaggâ yù pangiddù da kâ Apu. ² Á nu mappeddaráyaw yù tolay gapu ta kagian na ta aru yù ammu na, arán na paga ammu yù kuruk nga mepángngâ sù ira mangikatalâ kâ Apu. ³ Ngam yù tolay nga kuruk nga mangiddù kâ Namarò, aggina yù ammu ni Namarò ána ibiláng na ta tole na.

⁴ Á ta meyannung sù awayyá tam nga kumán sù neyátang ta sináddios, á kunnay sù kinagi, ammu tam ta kuruk nga ari matolay yù ira sináddios nga pangiyátangád da. Á ammu tam ta awán ta tanakuán nga pakiyápuát tam, nu ari lá yù táttádday nga Yápu tam nga matolay. ⁵ Á mássiki nu aru yù ira nga kagian na tatolay ta dios da ta lángi ána dabbuno, ána aru yù ira pidde ra nga pakiyápuád da, ⁶ ngam sittam, táttádday lá yù pakimorayát tam, nga si Namarò nga Yáma tam. Aggina yù paggapuán na ngámin nga aijan ta dabbuno ána lángi. Á iniyawâ na nittam yù áttole tam, tapè palurotat tam yù ipakuá na nittam. Á táttádday lá yù pakiyápuát tam, nga si Apu Kesu Kiristu. Aggina yù namarò ta ngámin, ta inipaparò ni Namarò yù ngámin kuna. Á matolay ittam megapu kuna.

⁷ Ngam yù ira káruán nga kábulut tam nga mangikatalâ kâ Apu, arát da paga kánnammuán ta awán ta pakáwayyá nayù ira sináddios. Á lage ra nanguruk kâ Apu, napenám ira nga makimoray ta sináddios nga kunnay ta matolay ira. Á yáyù, nu kumán ira ta neyátang ta sináddios, á maburung ira, gapu ta kagiad da ta makaliwâ iren. ⁸ Ngam ari gemma yù kanat tam yù gapu na nga ikállá na nittam ni Namarò. Á maguray lá yù kanat tam, á arát tam liwâ nu arát tam kanan, ána arát tam kapiánán nu kanat tam.

⁹ Magimuguk kayu laguk, sikayu nga makáwayyá nga kumán megapu sù ángngikatalâ naw, maraké malliwâ yù kabbulun naw nga makapi paga yù ángngikatalâ na kâ Apu, megapu sù pakkákán naw ta neyátang. ¹⁰ Ta nu masingán na kayu nga mepallállang sù bale nayù ira sináddios, á mappelò nga umay gapay tán nga kumán ta neyátang, mássiki nu kagian na ta liwâ na. ¹¹ Á megapu sù ammu naw, á makaliwâ laguk yù kabbulun naw nga makapi paga yù ángngikatalâ na kâ Apu, nga tolay nga naketapilán na gapay ni Apu Kesu Kiristu. ¹² Á nu nakaliwatán naw yù kabbulun naw nga makapi paga yù ángngikatalâ na, nakaliwatán naw gapay si Apu Kesu Kiristu. ¹³ Á yáyù nu aijan yù wagi nga makaliwâ nakuan megapu sù pakkákák ku ta neyátang, á arák ku laguk bulubugá kanan yù neyátang, tapè awát ta tolay nga makaliwâ kâ Apu megapu níkan.

9

Yù Mepángngà nga Akkuán nayù Minángngilayalayâ

2 Korinto 11:7-12; 1 Tessalonika 2:7-9

¹ Á yawe ipanonò ku sù ira mamaliwâ nikán. Awán ta tolay nga mangaripan nikán. Á sikán gapay yù nabbilinán ni Apu Kesu, nga mangilayalayâ. Á nasingak ku gemma si Apu Kesu nga Yápu tam, ta nappasingan nikán. Á gapu ta pangikatalà naw kâ Apu Kesu, sikayu yù nabbalinán nayù ipatarabáku nayù Yápù nikán. ² Á mássiki nu aijan yù ira makkagi ta arán nangà sinullà ni Apu nga minángngilayalayâ, ngam sikayu nga taga Korinto yù pamakurugán ta nabbilinán nangà ni Apu Kesu, gapu ta inikatalà naw si Apu Kesu megapu sù pangilayalayâ ku.

³ Á nu aijan yù ira nga mangiyabbù nikán ta meyanung sù pakáwayyâ mi kâ Bernabe, kunnaw yù itabbák ku nira. ⁴ Ari panò mepángngà nu sikayu nakuan yù pangápám mi ta máwák mi nga kanan ána inumam mi? Ngam arám mi apan. ⁵ Á ari panò mepángngà nakuan nu mangatáwa kami sù babay nga mangikatalà kâ Apu, nga mepulù nakuan nikami sù ngámin nga angayám mi nga mangituddu, ta kunnay sù ira káruán nga minángngilayalayâ, ána si Eduru, ána yù ira wáwwagi ni Apu Kesu? ⁶ Á matunung panò ta sikami lá kâ Bernabe yù mangallu ta pakkatole mi? Ngam táddanán naw yù ira káruán nga minángngilayalayâ. ⁷ Á ta ángngarigán, egga panò yù suddálu nga umay makigerrá, nga aggina lápay yù mamalluák sù pakkatole na? Awán. Á egga panò yù mammulá nga arán na kanan yù bungá nayù inimulá na? Kanan na gemma! Á yù manaron ta ayám, yáyù gemma gapay yù paggapuán nayù pakkatole na.

⁸ Á negagángay gemma sù ira mattarabáku, ta apad da yù pakkatole ra sù ira patarabakuád da. Á ari lá negapu ta nonò na tolay yane nga kinagi nikayu, nu ari gapay negittá sù tunung ni Namarò nga bibbirat tam. ⁹ Yawe yù inipetúrá ni Namarò kâ Moyses: “Arán naw bussalán yù simù na báka nga magaggi ta ammay, tapè awayyá na lá kumán.”* Á ta panaddán ni Namarò kuna, yù báka panò yù ninonò na? ¹⁰ Ari gemma, nu ari galá sittam nga tatolay yù kebalinán nayù kinagi ni Namarò, tapè magayáyá ittam nga mattarabáku, gapu ta aijan yù iddanamát tam nga málá tam yù balle tam, maguray lá yù tarabáku tam, nu magarádu onu maggaták.

¹¹ Á sikami, meyarik kami ta mammulá, ta inilayalayâ mi yù bilin ni Namarò nikayu, nga kunnay ta inimulá mi ta nonò naw yù napiá nga pammakapián naw. Á ari panò mepángngà nu málá mi yù pakkatole mi nga maggapu nikayu? ¹² Á nu aijan yù awayyá nayù ira káruán nga mangituddu nga mangá sù balle ra nga maggapu nikayu, á nepatalugáring laguk nikami. Ngam sikami, awán bulubugá ta nálá mi nikayu. Á mássiki nu marigá yù ággiám mi, inattamám mi lá. Á mattarabáku kami ta tanakuán nga pagalerám mi ta pakkatole mi, tapè ari megaggak yù passamá nayù napiá nga dámak nga meyanung kâ Apu Kesu Kiristu.

¹³ Á ammu naw támma ta yù ira tatolay nga mattarabáku sù mangilin nga bale ni Namarò tuke ta Jerusalem, á meyawá nira yù kanad da. Á yù ira pári nga mangiyátáng ta ayám kâ Namarò, apad da gapay yù balle ra sù neyátáng, nga kanad da. ¹⁴ Á kunnian gapay sù ira nga mangilayalayâ sù napiá nga dámak, ta inittaddán ni Apu Kesu ta meddán ira ta pakkatole ra, nga maggapu sù ira tudduád da.

¹⁵ Ngam sikán, mássiki nu aijan yù awayyâ nga apan yù máwák ku sù ira tudduák ku, ngam aringá nakitáddán. Á pattúrâ ku nikayu kunungan, ari yian yù ipattúrâ ku. Ta más napiá ta uré nu matayá lápay ta bisik ku, ánnè ta kári nayù ipagayáyá ku ána ipappeddaráyò ta arák ku apan yù pakkatole nikayu. ¹⁶ Á awán ta awayyâ gemma nga ipappeddaráyaw yù pangilayalayâ ku sù napiá nga dámak, gapu ta yáyù ipakuá ni Namarò nikán, nga máwák nga palurotak ku. Á kábbingá lá nu arák ku nakuan tuppálan. ¹⁷ Á nu megapu sù uré lápay yù pangilayalayâ ku sù napiá nga dámak, á apak ku nakuan laguk yù táddák ku. Ngam si Namarò yù nanullà nikán, á yáyù nga tuppálak ku yù tarabáku nga inikatalà na nikán. ¹⁸ Á anni laguk yù bálá ku, nu ari galá yù pagayáyá ku gapu ta aringá nakitáddán nikayu ta pangilayalayâ ku sù napiá nga dámak, mássiki nu awayyâ nakuan nga apan yù táddák ku nikayu.

¹⁹ Á gapu ta awán ta tolay nga manáddán nikán, awán laguk ta mangaripan nikán. Ngam mabbaluntáriungá nga makiaripan ta ngámin nga tatolay, tapè aru yù ira mapatuttul ku kâ Apu Kesu Kiristu. ²⁰ Á nu maggiáná sù ira Kudio, tuttulak ku laguk yù kustombare ra, tapè

* 9:9 Deuteronomio 25:4

aru yù ira mapatuttul ku kâ Apu Kesu Kiristu. Á mássiki nu arák kin mapagikáru megapu sù tunung ni Moyses, á tuttulak ku galá, tapè málá ku yù awayyá nga mangituddu sù ira nga tumuttul sù tunung. ²¹ Á kunnian gapay nu maggiánà sù ira tatolay nga ari Kudio, á tuttulak ku galá yù kustombare ra. Á gapu ta arád da tuttulan yù tunung ni Moyses, á arák ku gapay tuttulan, ngam arák ku gemma liwatan yù tunung ni Namarò, gapu ta tuttulak ku yù taddán ni Apu Kesu Kiristu. Á keggâ nira, kunnayâ gapay ta ari Kudio, tapè ginnád da gapay yù ituddù nga meyanung kâ Apu Kesu Kiristu, á nna ikatalá da gapay. ²² Á nu maggiánà sù ira nga ari paga mapasigaggâ yù ángngikatalá da kâ Apu Kesu Kiristu, á arák ku akkuán yù kagiad da nga liwâ, mássiki nu ammù ta ari kuruk nga liwâ, tapè mapasigaggâ yù ángngikatalá da megapu sù pangituddù nira. Á kunnian gapay yù akkuák ku ta paggiák ku sù ira ngámin nga makkakerumá nga tatolay. Tuttulak ku gapay yù napiá nga ággangnguá ra, tapè aijan yù ira mapatuttul ku, nu magginná ira sù ituddù nga meyanung kâ Apu Kesu. ²³ Á yá ipangnguá karannian, ta ikáyá ku ta meparámak yù pangiyígù ni Apu Kesu Kiristu sù ira tatolay, tapè aru yù ira nga mangikatalá nga mesipà kuna. Á ikáyá ku gapay ta mesipaká sù pammakapián nayù ira ngámin nga manguruk sù napiá nga dámak.

Párigát tam yù Panalákkuruk nayù ira nga Mappariká

²⁴ Á ammu naw gemma ta nu aijan yù ira nga mappariká, á tádday lâ yù mangappù nira, nga meddán ta bálá na. Á yáyù nga aggira ngámin nga katággítádday, ipe na yù urá na nga makkarerá, tapè aggina yù mangappù. Á sittam nga kunnay nira, ipe tam laguk yù urá tam nga mamalurò sù ipakuá ni Apu nittam, tapè málá tam yù bálá tam. ²⁵ Á yù ira tatolay nga mappariká sangaw, paguráyád da yù karagátá da, ta passikanad da yù baggi ra, tapè dán nga naporán ira nga makkarerá. Á yù tádday nga mangappù, yá bálá na yù kuroná na nga lappáw, nga mabi lâ malelay. Á yáyù keyarigát tam, sittam nga mangikatalá kâ Apu Kesu Kiristu. Ngam yù bálá tam nga meyawá nittam yù áttol tam nga awán ta áddè na. ²⁶ Á sikán, arák ku akkuán yù awán ta serbi na, ngam kunnayâ ta makipariká nga daretiu yù pakkarerá na nga ari mekáttuay. Á ta pangilayalayá ku, kunnayâ ta manultù, nga arán na sultukan yù paddák, nu ari galá ta daretiu nga nakanná yù sultukan na. Ta makanná yù ubobuk ku sù ira pangilayalayátá ku sù bilin ni Apu. ²⁷ Á tudduák ku yù baggi, tapè arák ku akkuán yù narákè. Á palurotak ku yù ngámin nga ipakuá ni Apu níkán, marakè aringá nakuan meddán ta bálá ku, mássiki nu sikán yù nangilayalayá sù napiá nga dámak sù ira tatolay.

10

Mepugik nittam yù Makimoray ta Sináddios

¹ Á wáwwagì, ipasigaggâ tam laguk yù panguruk tam kâ Namarò, tapè arán na patukkatan yù ángngabbák na nittam. Ta ipanonò ku nikayu yù nesimmu ngaw sù ira ngaw Kudio nga naggaká nittam, ta panuttul da kâ Moyses. Sinaronán ni Namarò ira ngámin, á nalipparán ira ngámin sù kunam nga nepulù nira, ta pangabbák na nira sù pallakák da ta kalállammatán. Á nappatalay ira ngámin sù namagá nga dabbun ta tangngá nayù bebay nga mangngágan ta Ujjojjin, ta paddáki da ngaw nga umay ta dammáng. ² Á megapu ta panuttul da kâ Moyses, á kunnay ta narigù ira sù kunam nga nepulù nira á nna yù bebay, ta paddáki da ngámin ta bebay. Á yáyù panákkilalan ta aggira yù patuttul ni Moyses.* ³ Á nesipá ira ngámin gapay sù manna, nga kanan nga iniyawá ni Namarò nira, ⁴ á nna nesipá ira ngámin gapay sù danum nga inipenum ni Namarò nira. Mininum ira ngámin ta danum nga pinallowán ni Namarò sù batu. Á yù batu yù keyarigán ni Apu Kesu Kiristu, ta nepulupulù si Apu Kesu nira. ⁵ Á mássiki nu kunnian yù ángngiddù ni Namarò nira ngámin, ari nagayáyá si Namarò sù ira káruán, gapu ta ari ira nanguruk. Á yáyù nga aru yù ira námmatay ta kalállammatán.

⁶ Á dannian nga nesimmu nira ngaw yù inipetúrá ni Namarò, tapè magimuguk ittam laguk á nna arát tam karagátan yù narákè nga kunnay sù kingnguá ra. ⁷ Ta yù ira káruán, nakimoray ira ta sináddios, nga pidde ra. Ammu tam yaw, gapu ta bibbirat tam yù dán nga netúrá nga kunnian, “Nepalállang ira á nna mininum ira sù neyátang ta sináddios da. Á kabalid da kiminán, gimikkáng ira nga nattatála, á nna maguray lá yù kingngikingnguá ra nga narákè.”† Arán naw laguk pakimorayán yù ira sináddios. ⁸ Á arát tam akkuán yù narákè nga kunnay sù kingnguá ra. Ta duápulu ta tallu nga ribu yù natay nira ta tangággaw

* 10:2 Exodo 14:1-31 † 10:7 Exodo 32:6

lâ, negapu sù pangarallo ra. ⁹ Á arát tam parubán yù pagattam ni Apu nittam, ta kunnay sù kingnguá nayù ira káruán. Ta aru nira yù námmatay negapu sù pakkagá nayù ira iráw nga marítá. ¹⁰ Á ari ittam maddagaragim ta meyanngay sù ure ni Namarò, ta kunnay sù kingnguá nayù ira káruán, ta yáyù nga pinapáte na ira nayù namapátay nga jinok ni Namarò.

¹¹ Á nesimmu ngámin danniwaw sù ira ngaw naggaká nittam, tapè mepasingan yù pamággáng ni Namarò sù ira nga mangnguá ta kunnay sù kingnguá ra. Á netúrâ, tapè bibbirat tam ána magimuguk ittam nga ari mamárik nira, ta maddaggunin duttál yù pagáddekán na ággaw, nga pamanunnù ni Namarò sù ira ngámin nga tatolay. ¹² Á yáyù nu ájjan yù tolay nga kagian na ta ari tumulù sù mangapà kuna nga mangnguá ta narákè, megapu sù napasigaggá nga ángngikatalà na, á magimuguk laguk, marakè mekanakaná sangaw sù ira mangnguá ta narákè, á akkuán na gapay. ¹³ Ta awán ta tanakuán nga palliwatán naw, nu ari galá yù negagángay nga palliwá nayù ira ngámin nga tatolay. Ngam mekatalà si Namarò nga mangabbák nikayu, á arán na anugutan yù mangapà nikayu ta malliwá, nu arán na kayu gapay abbágán, tapè makáwayyá kayu nga ari tumulù kuna. Á nu ájjan yù mangapà nittam ta malliwá, ipanonò ni Namarò nittam yù awayyá tam nga melilli, tapè ari ittam makitulù kuna.

¹⁴ Á yáyù, kákkopuk ku nga iddukak ku, ari ittam laguk umay nga mesipà sù ira nga makimoray ta sináddios. ¹⁵ Ámmu naw mannonò, á yáyù nga kagiak ku nikayu ta nonopan naw laguk nu kuruk yù kagiak ku nikayu. ¹⁶ Nu maggagammung ittam ta panaddamát tam sù pate ni Apu Kesu Kiristu, mabbalabálà ittam ká Namarò megapu sù inumat tam, á ámminum ittam, nga pangipasinganát tam sù kesipà tam ká Apu Kesu, megapu sù dága na nga nebubbù megapu nittam. Á kunnay gapay sù pán nga nagaddagadduá, ta pakkákát tam kuna, ipasingat tam yù kesipà tam ká Apu Kesu, megapu sù baggi na nga netapil megapu nittam. ¹⁷ Á mássiki nu aru ittam, meyárik ittam ta tádday lâ nga baggi, nga mesipà sù baggi ni Apu Kesu Kiristu, gapu ta tangabullung lâ yù pán nga pabbaballáyát tam nga keyarigán nayù baggi na. †

¹⁸ Á ta ángngarigán, nonopan naw yù kustombare nayù ira ginaká ni Lákay Israel. Yù ira nga kiminán sù neyátáng ká Namarò, netádday ira nga nakimoray ká Namarò. Á kunnian gapay sù ira tatolay nga kumán sù neyátáng ta sináddios, metádday ira gapay nga makimoray sù sináddios nga nangiyátangád da. ¹⁹ Á anni laguk yù kebalinán nayù kinagi? Kagiak ku panò ta matolay yù ira sináddios, onu egga panò yù pabbalinán nayù pangiyátáng na tolay nira? Ari ira gemma matolay, á awán gemma ta serbi nayù meyátáng nira! ²⁰ Ngam yù meyátáng ta sináddios, iyátáng da ta dimoniú ána anitu nga masserbi ká Satanas, á arák ku ikáyá ta metádday kayu sù ira anitu ána dimoniú. ²¹ Á nu metádday kayu nga kumán ána ámminum sù panaddamán ta pate ni Apu Kesu Kiristu, arán na awayyá nga metádday kayu gapay nga kumán ána ámminum sù meyátáng ta anitu ána dimoniú! Ta nu kanan naw ána inuman naw yù meyátáng ta anitu ána dimoniú, á kunnay ta makimoray kayu nira. ²² Á nu makimoray ittam nakuan ta tanakuán, á mangabubu ána mapporay si Namarò nittam. Makáwayyá ittam panò ánnè kuna? Ari gemma, á arát tam awayyá nga mallilli sù pamággáng na nittam.

Akkuát tam lâ yù Napiá tapè Meparáyaw si Namarò

²³ Á ájjan yù ira makkagi, nga kud da, “Nu arát tam pakaliwatán yù tunung, máwayyá tam nga akkuán yù ngámin nga ikáyá tam.” Wan, kuruk yian. Ngam kagiak ku nikayu ta arát tam mábbágán yù ira kábulut tam megapu sù ngámin nga ikáyá tam nga akkuán. Ta nu masingad da yù akkuát tam nga kagiad da ta liwá tam, mabbábáng ira sù ángngikatalà da ká Apu. ²⁴ Arát tam laguk nonopan ta olu yù pakkapiánát tam, nu ari galá yù pakkapiánán nayù ira kábulut tam nga mangikatalà ká Apu.

²⁵ Á nu ikáyá naw gatárgan yù kárne nga iláku ra ta dápun, á gatárgan naw laguk. Ngam arán naw iyabbù yù paggapuán nayù kárne, marakè mámmámmuán naw ta naggapu sù iniyátáng da, á mabbábáng kayu laguk nga kumán kuna. Ta ari kayu malliwá gemma nu kanan naw, megapu sù pangikatalà naw ká Namarò. ²⁶ Ta ájjan yù netúrâ ta libru ni Namarò nga kun na, “Si Namarò yù makákkua ta dabbuno ána ngámin nga mayán na.” §

²⁷ Á ta ángngarigán nu ájjan yù tolay nga ari mangikatalà ká Apu Kesu Kiristu, á apatan na kayu ta bale na ta umay kayu kumán, á nu ikáyá naw nga umay, á umay kayu laguk. Á kanan naw lâ yù iyawá na nikayu. Ngam arán naw iyabbù nu naggapu sù neyátáng, tapè ari

kayu mabbábáang nga kumán kuna. ²⁸ Á ta ángngarigán nu aijan tán yù tolay nga makkagi ta neyátáng yù kárne, á ari kayu laguk kumán kuna, tapè ari maburung yù tolay nga makkagi nikayu. Ta yáyù kinagi na nikayu, gapu ta kagian na ta liwâ naw nu kumán kayu. ²⁹ Á nu masingan na ta kumán kayu sù naggapu ta neyátáng, arák ku kagian ta sikayu yù maburung sù pakkákán naw, ngam aggina galá yù mabagal ta nonò na, gapu ta kagian na ta malliwâ kayu.

Á aijan tamma nikayu yù tolay nga ari magayáyâ sù kinagi, á iyabbù na nakuan, “Ngattá, ta ari ittam kumán áнна lonát tam yù awayyá tam, megapu sù pabbábáang nayù ira kábulut tam? ³⁰ Á nu mabbalabála ittam kâ Namarò megapu sù kanat tam, á ngattá laguk, ta kagian nayù ira kábulut tam ta malliwâ ittam gapu ta pakkákát tam kuna, nepatalugáring ta nabbalabála ittam gemma kâ Namarò megapu kuna?” ³¹ Á yawe yù itabbák ku, nga gapu na nga arát tam laguk kanan yù kinagi ra nga neyátáng ta sináddios, tapè meparáyaw si Namarò megapu sù ngámin nga akkuát tam, mássiki nu kumán ittam onu ámminum ittam.

³² Arát tam laguk akkuán yù kagiad da nga liwâ, mássiki nu Kudío ira onu ari Kudío, mássiki nu kábulut tam ira nga mangikatalà kâ Namarò. ³³ Á sikayu, párigán naw yù napiá nga ággangnguâ. Ta akkuák ku lâ yù ipagayáyâ nayù ira ngámin nga tatolay. Á arák ku olu nga nonopan yù pakkapiánák ku, nu ari galá yù pakkapiánán nayù ira ngámin nga tatolay, tapè maginná ra yù napiá nga dámak, áнна makiyigù ira gapay kâ Apu Kesu, tapè ari ira mekanakaná sù pamagikáru ni Namarò.

11

¹ Á wáwwagi, ipe naw laguk yù urá naw nga mamárik sù napiá nga ággangnguâ, nga kunnay gapay ta pamárik ku sù napiá nga ággangnguâ ni Apu Kesu Kiristu.

Yù Meyannung sù ira Bábbay nga Mangikatalà kâ Apu

² Á dayáwat takayu, gapu ta arán naw náttamán yù inittuddù ngaw nikayu, áнна palurotan naw paga yù ngámin nga napiá nga kustombare tam nga inittuddù nikayu ta meyannung sù paggagammung tam. ³ Ngam yawe paga yù ikáyâ ku nga mánnámmuán naw. Si Apu Kesu Kiristu yù mammaguray sù laláki. Á yù laláki yù mammaguray sù atáwa na, áнна si Namarò yù mammaguray kâ Apu Kesu Kiristu. ⁴ Á yáyù nu aijan yù laláki nga nattaddung, nga umay nga makimállá kâ Namarò ta paggagammungán naw, onu mangilayalayá sù bilin na, á napiá nu irián na yù taddung na, tapè arán na ipasiránán si Apu Kesu, nga mammaguray kuna.

⁵ Á yù babay nga makimállá kâ Namarò, onu mangipakánnámmu sù bilin na, napiá nu aijan yù panniu na ta ulu na. Ta nu ari nappanniu, ipasiránán na yù atáwa na nga mammaguray kuna. Á nu awán ta panniu na, á kunnay sù babay nga nári ngámin yù duddù na. ⁶ Á nu manaki yù babay nga mamanniu ta ulu na, irián na nakuan laguk yù duddù na. Ngam mappasirán gemma nu nári yù duddù na, á yáyù nga panniuwán na laguk yù ulu na nu umay ta paggagammungán.

⁷ Ngam yù laláki, ari mattaddung nu umay ta paggagammungán. Ta pinarò ni Namarò yù laláki ta kágappá na, nga kepasinganán nayù pakáwayyá ni Namarò áнна yù karáyo na. Ngam yù babay yù kepasinganán nayù karáyo nayù laláki. ⁸ Á nonopan naw yaw. Sù ngaw, ta pamarò ni Namarò ta tolay, ari yù laláki yù naggapu ta baggi na babay, nu ari galá yù babay yù naggapu sù baggi nayù laláki, ta sinúttu ni Namarò yù tággáng nayù laláki nga pidde na ta babay. ⁹ Á ari naparò yù laláki megapu sù babay, nu ari galá ta pinarò ni Namarò yù babay megapu sù laláki, tapè ari maguroray. ¹⁰ Á yáyù nga máwák nga mappanniu yù babay, tapè matákkilalán nayù ira daroban ni Namarò ta tumulù yù babay sù atáwa na.

¹¹ Á mássiki nu mammaguray yù laláki sù atáwa na, á máwák na gapay yù ángngabbák nayù babay, áнна máwák nayù babay gapay yù ángngabbák nayù laláki, ta makkátungtungán ira, áнна naggittá ira nga nesipá kâ Apu Kesu Kiristu megapu sù pangikatalà da kuna. ¹² Ta pidde ni Namarò yù olu nga babay nga naggapu ta baggi nayù laláki, ngam meyanákin ngámin yù ira káruán nga lálláki sù ira bábbay. Á pinarò ni Namarò yù ngámin nga aijan.

¹³ Á sikayu laguk yù maguray nu mepángngá ta umay ta paggagammungán naw yù babay nga náringin yù ngámin nga duddù na, nga ari nappanniu, nga makimállá kâ Namarò. ¹⁴ Ngam yù laláki, á negagángay panò nu pakápadduan na yù duddù na? Ari gemma! Ta mappasirán gemma yù laláki nu mepárik ta babay. ¹⁵ Ngam yù babay, yá ipakkástá na áнна keparáyo na yù apaddu nga duddù na, nga iniyawá ni Namarò kuna, nga lippak na ulu na. ¹⁶ Á nu aijan yù tolay nga dumá yù ure na ta meyannung karannian, á nu ikáyâ na makiperang ta ubobuk, á yawe laguk yù itabbák ku kuna, ta yáyù yù kustombare mí áнна

yù kustombare nayù ira káruán nga mangikatalà kâ Namarò ta ngámin nga lugár, nu umay kami maggagammung nga makimoray kâ Namarò.

Yù Panaddamát tam ta Pate ni Apu Kesu nga Ingágad da ta Pamúgák ni Apu Mattiu 26:26-29; Markus 14:22-25; Lukas 22:14-20

¹⁷ Á aijan paga yù itaddák ku nikayu, ta arát takayu iráyaw megapu sù akkuán naw nga meyanung karanniw. Ta nu maggagammung kayu nga makimoray kâ Namarò, á ari mabbalin ta pammakapián naw, nu ari galá mappaná yù paddáké naw. ¹⁸ Ta narámak ku ta ari nattatádday yù nonò naw, á makkakápeperang kayu ta ubobuk, ána massisinná kayu ta paggagammungán naw. Á kuruk támma yù káruán nga kagiad da. ¹⁹ Ta negagángay nittam gemma nga makkakápeperang ta ubobuk nu dumá yù nonò tam. Ngam aijan támma gapay yù napiá nga serbi nayù pakkakáperang naw, ta mepalappá yù ira nga kuruk nga napiá yù nonò da.

²⁰ Á nu maggagammung kayu nga kuman ta panaddamán naw sù pate ni Apu Kesu Kiristu, á kunnay ta ari si Apu Kesu yù nonopan naw. ²¹ Ta aijan garé yù ira káruán nga mapolu nga kumán sù bálud da, á arád da iballáyán yù ira kábulud da. Á yáyù nga aijan nikayu yù ira mabisin, ána aijan yù ira mellaw. ²² Aro! Awán panò ta bale naw nga pakkákánán naw ána pappissanán naw? Aijan gemma! Á ngattá laguk, ta ari kayu makimoray sù ira kábulun naw nga mangikatalà kâ Apu? Ngattá, ta ipasiránán naw yù ira kábulun naw nga pobare? Anni laguk panò yù kagiak ku nakuan nikayu ta meyanung sù akka-akkuán naw? Arát takayu gemma iráyaw!

²³ Á inittuddukin gemma nikayu yawe nga inipakánnámmu ni Apu Kesu níkán. Ta pamúgák di Apu Kesu sù gabi nga panájji ra kuna, iná ni Apu Kesu yù pán. ²⁴ Á ta kabalín na nabbalabála kâ Namarò, giddigiddúa na yù pán, nga imisinek na sù ira sinuudduán na, tapé kanad da. Á kinagi na nira, “Yawe yù baggi nga metapil megapu nikayu. Á kunnawe yù akkuán naw ta panaddamán naw níkán,” kun na. ²⁵ Á kunnian gapay, ta kabalid da kiminán, iná ni Apu Kesu yù inumad da, á kinagi na nira, “Yawe yù panákkilalán naw sù bagu nga tarátu ni Namarò nikayu, ta mapaluro sangaw yù bagu nga tarátu, megapu sù dága nga magagi ta paté. Inuman naw laguk ta panaddamán naw níkán,” kun na. ²⁶ Á yáyù ta paggagammung tam nga kumán ta pán ána ámminum sù panaddamát tam ta ketapil ni Apu Kesu Kiristu, nga kunnay sù kinagi na, á ipakánnámmu tam yù pate ni Apu, ádde ta panoli na.

²⁷ Á nu aijan yù tolay nga metádday nittam nga kumán ána ámminum sù panaddamát tam kâ Apu Kesu, ngam arán na nonopan yù ketapil ni Apu megapu kuna, á makaliwá megapu sù pakkákán na sù panaddamát tam kâ Apu, gapu ta arán na pakimorayán yù baggi ni Apu Kesu ána yù dága na. ²⁸ Pasikkálat tam laguk yù nonò tam, nu napiá yù ákkimore tam kâ Apu Kesu, lage tam kumán ána ámminum sù panaddamát tam kuna. ²⁹ Ta yù tolay nga kumán ána ámminum, nga arán na nonopan yù kebalinán nayù ketapil ni Apu Kesu megapu kuna, á pággangan ni Namarò, megapu sù kataggá nayù nonò na. ³⁰ Á yáyù gapu na nga aru nikayu yù ira máttaki ána makapi, á aijan gapay yù ira nga natayin. ³¹ Ngam nu pasikkálat tam ta olu yù nonò tam lápay, á arán na ittamin pasikkálan ni Namarò. ³² Á nu naráké yù akkuát tam, tudduán ni Namarò ittam nga mangikatalà kuna ána pággangan na ittam kunangane, tapé ari ittam sangaw mekanakaná sù pamagikáru na sù ira tatolay nga ari manguruk kuna, nga metabbá sangaw ta impiernu.

³³ Á yáyù, wáwwagi, nu maggagammung kayu, iddagán naw laguk yù labbè nayù ira káruán na kábulun naw lage naw kumán ta panaddamán naw sù pate ni Apu Kesu Kiristu. ³⁴ Á nu aijan yù mabisin, á kumán bi ta bale na lage na umay mepaggagammung nikayu, tapé arán na kayu pággangan ni Namarò. Á sangaw nu umayá nikayu, kagiak ku yù káruán nga itaddák ku nikayu.

12

Yù Makkakerumá nga Pakáwayyá tam nga Naggapu sù Mangilin nga Ikararuá Roma 12:6-8; Epeso 4:1-16

¹ Á wáwwagi, ibukalák ku laguk nikayu yù meyanung sù pakáwayyá naw nga iyawá nayù Mangilin nga Ikararuá ni Namarò nittam nga katággitádday nga tatole na, gapu ta ikáyá ku nga kánnámmuán naw ta napiá. ² Á ammu naw ta lage naw nangikatalà kâ Apu Kesu, nelogò kayu megapu sù ira dimoniú ána yù ira anitu, á nakimoray kayu sù ira sináddios, mássiki nu ari ira makobobuk ána awán ta pakáwayyá ra. ³ Á yáyù nga ipakánnámmu nikayu ta nu kuruk nga tumulú yù tolay sù pammagure nayù Ikararuá ni Namarò, arán na bulubugá

igagek si Apu Kesu. Á awán ta tolay nga makkagi ta si Apu Kesu yù Yápu na, nu ari lâ megapu sù pakáwayyá nayù Mangilin nga Ikararuá ni Namarò.

⁴ Á aijan yù makkakerumá nga pakáwayyá tam nga naggapu kâ Namarò. Ngam tádday lâ yù Ikararuá ni Namarò nga mangiyawâ nittam ta pakáwayyá tam. ⁵ Á aijan yù makkakerumá nga tarabáku tam, nga ángngabbák tam sù ira kábulut tam, ngam tádday lâ si Apu Kesu Kiristu nga Yápu tam nga pattarabakuát tam. ⁶ Á aijan yù makkakerumá nga pakapangnuá tam nga mamaluro sù ipakuá ni Namarò nittam. Ngam tádday lâ yù mangipakuá nittam, nga si Namarò. Á aggina galá yù mangabbák nittam, tapé mapaluro tam yù ngámin nga ipakuá na nittam.

⁷ Á sittam nga katággítádday nga mangikatalá kâ Namarò yù neddán sù pakáwayyá tam nga naggapu sù Ikararuá ni Namarò, á yáyù nga mepasingan ta aijan nittam yù Mangilin nga Ikararuá ni Namarò. Á yá inipangiyawâ na sù pakáwayyá tam, tapé abbágat tam yù ira kábulut tam. ⁸ Ta iyawâ nayù Ikararuá ni Namarò yù sírik na sù tádday nga tolay, tapé ilayalayá na yù bilin ni Namarò. Á iyawâ na gapay sù tádday yù pakáwayyá na nga makánámmu ána mangituddu sù kebalinán nayù bilin na. Á makkakerumá yù pakáwayyá nga meyawâ sù ira tatolay, ngam yù Ikararuá ni Namarò, aggina galá yù mangiyawâ. ⁹ Á iyawâ na gapay sù tádday yù napasigaggá nga pangikatalá na kâ Namarò. Á iyawâ na sù tádday yù pakáwayyá na nga mamammapiá sù ira máttaki. ¹⁰ Á iyawâ nayù Mangilin nga Ikararuá sù tádday yù pakáwayyá na nga mamagaddátu. Á iyawâ na sù tádday yù pakáwayyá na nga makkagi sù ipakánámmu ni Namarò kuna, ána iyawâ na gapay sù tádday yù pakáwayyá na nga manákkilála sù paggapuán nayù kagian nayù ábbilinán, nu naggapu sù Ikararuá ni Namarò, onu tanakuán yù paggapuán na. Á iyawâ na sù tádday yù pakáwayyá na nga magubobuk ta tanakuán nga ággubobuk nga arán na ginigiámmu, ána iyawâ na gapay sù tádday yù pakáwayyá na nga makkagi sù kebalinán nayù kagian na. ¹¹ Á yù Mangilin nga Ikararuá ni Namarò, aggina lâ yù paggapuán nayù ngámin danniaw nga pakáwayyá na tolay, á aggina galá yù mammaguray sù pakáwayyá tam nga iyawâ na nittam nga katággítádday.

Sittam nga Nepattatádday kâ Apu Kesu yù Kunnay ta Baggi na

¹² Á sittam nga mangikatalá kâ Apu Kesu, meyarík ittam ta baggi na, nga aijan yù takki na, limá na, matá na, talingá na, ána káruán na nga aijan ta baggi na, nga naddurúmá yù pakáwayyá ra. Á yù baggi ni Apu Kesu Kiristu yù keyarigát tam, gapu ta mepattatádday ittam gapay, ána naddurúmá yù pakáwayyá tam nga katággítádday. ¹³ Á mássiki nu Kudio ittam onu ari Kudio, ána mássiki nu mammaguray ittam onu makiaripan ittam, á narigù ittam ngámin nga nesipá kâ Apu Kesu, megapu sù Mangilin nga Ikararuá. Á maggián nittam ngámin yù Mangilin nga Ikararuá, nga táttádday nga kesipátat tam, nga meyarík ta mamenum nittam, gapu ta aggina yù paggapuán nayù áttole tam nga mananáyun.

¹⁴ Á ari lâ tádday yù egga ta baggi na tolay, nu ari yù aru nga makkakerumá, nga takki na, limá na, matá na, ána yù káruán na, nga netádday ta baggi na. ¹⁵ Á ta ángngarigán nu magubobuk nakuan yù takki na tolay, á nu kagian na nakuan ta ari nesipá ta baggi na tolay gapu ta ari yù limá na, á ari gemma kuruk gapu ta kuruk nga nesipá gemma sù baggi na. ¹⁶ Á nu kagian nayù talingá na nakuan ta ari nesipá sù baggi na gapu ta ari yù matá na, ngam nesipá lâ paga gemma sù baggi na. ¹⁷ Á nu matá na lâ yù tangabaggi na nakuan, á kunnasi laguk yù pakaginná na? Á nu talingá na lâ nakuan yù tangabaggi na, á kunnasi laguk yù pakáguk na? ¹⁸ Ngam ari kunnian gemma, ta pine na galá ni Namarò yù makkakerumá nga aijan ta baggi na tolay, nga kunnay ta inikáyá na. ¹⁹ Á nu pidde na lâ nakuan ni Namarò yù matá ta tangabaggi, á ari gemma yù baggi na tolay. ²⁰ Ngam ari kunnian, ta aru yù pidde na nga makkakerumá nga pinattatádde na sù tádday nga baggi na tolay.

²¹ Á gapu ta kunnian yù ággián nayù baggi tam, arán na awayyá nayù matá tam nga makkagi sù limá tam, “Arát taka awágan!” Á arán na awayyá nayù ulu tam nga kagian, “Awán ta serbi nayù takki tam.” ²² Ta kuruk nga máwák tam ngámin yù baggi tam, mássiki nu baddi nga makapi. ²³ Á yù káruán nga aijan ta baggi tam, pakástát tam ira. Á yù káruán, barawasiát tam ta napiá, tapé ari ira masingan, maraké mappasirán ittam megapu nira. ²⁴ Ngam aijan yù káruán nga nakástá ta baggi tam, nga arát tam awágan nga pakástán onu barawasián.

Á pidde ni Namarò yù ággián nayù baggi tam, tapé napiá yù áserbi nayù ngámin nga aijan ta baggi tam, nepatalugáring sù káruán nga baggi tam nga arát tam nonopan. Á yáyù

nga mawák tam yù ngámin nga aijan ta baggi tam. ²⁵ Á pidde ni Namarò yù baggi tam ta kunnaiw, tapè makkaká-ásigurá yù ngámin nga aijan ta baggi tam. ²⁶ Á ta ángngarigán, nu aijan yù mataki ta baggi tam, á matagená nayù ngámin nga baggi tam yù taki na. Á nu aijan yù meráyaw ta baggi tam, á ayatán laguk yù ngámin nga aijan ta baggi tam sù keráyo na.

²⁷ Á yawe nga kinagi yù keyarigát tam ngámin nga mangikatalá ká Apu Kesu Kiristu, ta kunnay ittam ta baggi na, megapu ta kesipá tam nga katággitádday kuna. Á makkakerumá yù pakáwayyá tam nga kunnay ta aijan ta baggi na. ²⁸ Ta makkakerumá yù tarabáku tam nga ipakuá ni Namarò nittam nga mangikatalá kuna, nga mesipá sù baggi na. Ta sinullá na ta olu yù ira nga minángngilayalayá nga sinudduán ni Apu Kesu. Á yù mekaruá nga sinullá na yù ira ábbilinán na. Á mekatallu yù ira mangituddu sù bilin na. Á aijan gapay yù ira mamagaddátu, ána yù ira mamammapiá sù ira máttaki, ána yù ira mangabbák, ána yù ira lállakalákay nga manabarang, ána yù ira magubobuk ta ággubobuk nga arád da mánnámmuán. ²⁹ Á anni laguk yù kagian naw? Sittam ngámin panò yù minángngilayalayá? Onu sittam ngámin panò yù ábbilinán na, nga mangipakánnámmu sù ipalappá ni Namarò? Á makáwayyá panò ittam ngámin nga mangituddu sù bilin na? Á sittam ngámin panò yù mamagaddátu? Ari gemma kunnian! ³⁰ Á egga panò nittam ngámin yù awayyá tam nga mamammapiá sù ira máttaki? Awán. Á makáwayyá ittam ngámin panò nga magubu-ubobuk ta ággubobuk nga arát tam paga kánnámmuán? Onu makáwayyá panò ittam ngámin nga mangibukalán ta kebalinán na? Ari gemma. ³¹ Karagatát tam laguk yù ira kapiánán nga pakáwayyá tam, nga iyawá ni Namarò nittam.

Á aijan paga yù ituddù nikayu nga kapiánán nayù pakáwayyá tam ánnè sù ngámin karannian. Makkaká-iddù ittam.

13

Makkaká-iddù ittam!

- ¹ Nu makáwayyángà nga magubobuk sù ira ngámin nga makkakerumá nga ággubobuk na tolay ána yù ággubobuk nayù ira daroban ni Namarò gapay, á nu awán ta ángngiddù ku sù ira kábuluk ku, á kunnayá laguk ta kekkeng nga matannuk onu gássá nga jikkù yù ággallu na.
- ² Á mássiki nu makáwayyángà nga mangibukalán sù bilin ni Namarò nga ipalappá na níkan, ána mássiki nu kánnámmuák ku yù ngámin nga monak nga nelimak nga talákkurugan na, á mássiki nu masikan yù ángngikatalá ku, tapè máwayyá nga pagalitan yù ira puddul, á awán galá ta serbi nayù akkuák ku nu awán ta ángngiddù ku sù ira kábuluk ku.
- ³ Á mássiki nu isinek ku ngámin yù kukuá sù ira pobare ána ipatuggi yù baggi, megapu sù pangikatalá ku ká Apu, awán ta pakkapiánák ku nu arák ku iddukan yù ira kábuluk ku,
- ⁴ Nu mangiddù ittam sù ira kábulut tam, attamát tam gapay yù akkuád da, ána ikállá tam ira. Á ari ittam bulubugá mangabubu nira, Á ari ittam mappeddaráyaw, ána ari motun yù nonò tam.
- ⁵ Á nu mangiddù ittam sù ira kábulut tam, arát tam ira uyoyungán. Á ari ittam mangukkuk, ána arát tam ipapíli yù ure tam lápay. Á ari ittam malogon nga mapporay. Á arát tam ipatattam ta nonò tam yù liwiliwá nayù ira kábulut tam, ána arát tam ibálá yù liwá da nittam.
- ⁶ Á nu mangiddù ittam sù ira kábulut tam, arát tam ipagayáyá yù akkuán nayù ira nga mangnguá ta narákè, nu ari galá ta magayáyá ittam megapu sù napiá nga akkuád da.
- ⁷ Á nu mangiddù ittam sù ira kábulut tam, ari ittam malurá nga mangabbák nira. Maguray lá yù mesimmu, arát tam ira táttájián.

Á ipasigaggà tam lâ yù pangikatalà tam kâ Apu
 ána yù pagiddanáma tam kâ Apu nga mangabbák nittam.

Á mássiki nu marigirigâ ittam,
 onu narákè yù akkuán na tatolay nittam,
 attamát tam lâ yù ngámin nga mesimmu nittam.

⁸ Á awán ta áddè nayù pakkaká-iddù tam
 ána yù pangiddù tam kâ Namarò.

Ngam mappasá sangaw yù pangilayalayâ nayù ira ábbilinán ni Namarò,
 ána yù pagubobuk nayù ira tatolay ta tanakuán nga ággubobuk nga ari paga
 nánámmuán.

Á mappasá gapay sangaw yù ngámin nga ammu tam.

⁹ Ta baddi yù ammu tam kunangan, á arát tam kánámmuán yù ngámin.

Á nakúráng paga yù inipalappá ni Namarò nittam.

¹⁰ Ngam sangaw nu mapalurokin yù ngámin nga ure ni Namarò
 ána mesipà ittamin kâ Apu Kesu Kiristu,

á mappasá laguk yù ammu tam nga baddi,
 ta mepalappá nittam yù ngámin nga nabalinin.

¹¹ Á ta ángngarigán, sù ngaw kabajji ku,

á kunnay ta abbing lâ yù ággubobuk ku, ána yù ánonò ku, ána yù pangibiláng ku ta
 nonò ku gapay.

Á pattaggâ ku, nilikurák kin yù ággangguá na abbing.

¹² Á kunangane ta keggá tam ta dabbuno,
 arát tam kánámmuán ta napiá yù ituddu ni Namarò nittam nga meyanung kuna,
 gapu ta kunnay ta alinu nga masingan ta ispeku nga ari malitáv.

Ngam sangaw nu meyarubáng ittam kâ Namarò ta lángi,
 á kánámmuát tam laguk ta napiá, nga kunnay sù pakánámmu na nittam.

¹³ Á danniawe nga tallu yù pakkapiánát tam, nga maggián ta áddè ta áddè:
 yù pangikatalà tam kâ Namarò,

yù pagiddanáma tam kâ Namarò,
 ána yù pangiddù tam kári Namarò ána yù ira kábulut tam.

Ngam yù kapiánán nayù ira tallu

yù pangiddù tam kári Namarò ána yù ira kábulut tam.

14

Yù Duá nga Pakáwayyá tam nga Iyawâ ni Namarò

¹ Gapu ta pangiddù ni Namarò nikayu ána yù pangiddù naw kuna, ipe naw laguk
 yù urà naw nga mangiddù sù ira kábulun naw. Á karagatán naw yù ira káruán nga
 pakáwayyá naw nga naggapu sù Mangilin nga Ikararuá, nepatalugáring sù pakáwayyá
 naw nga mangipakánámmu sù bilin ni Namarò. ² Yù tolay nga magubobuk ta ággubobuk
 nga arád da kánámmuán nayù ira kábulun na, á si Apu Namarò galá yù kobobuk na, ta
 aggina lâ yù makánámmu, gapu ta awán ta tolay nga makánámmu sù kagian na. Ta
 ipeyubobuk na galá nayù Ikararuá ni Namarò kuna yù monak, nga nelímak ta tolay yù
 kebalinán na. ³ Ngam nu mangipakánámmu yù tolay sù bilin ni Namarò, makiubobuk sù
 ira kábulun na, tapè abbágán na ira. Á tabarangán na ira, tapè mabannáyán yù nonò da
 ána mapasigaggâ yù pangikatalà da kâ Apu. ⁴ Á yù tolay nga magubobuk sù ággubobuk
 nga arád da kánámmuán nayù ira kábulun na, á yù lâ baggi na yù abbágán na, gapu ta
 awán ta makánámmu sù ággubobuk na. Ngam yù mangipakánámmu sù bilin ni Namarò, á
 tabarangán na yù ira ngámin nga mepaggagammung kuna, nga mangikatalà kâ Apu Kesu
 Kiristu.

⁵ Á parè bì nakuan ta iyawâ ni Namarò nikayu ngámin yù pakáwayyá naw nga
 magubobuk ta ággubobuk nga ari paga nánámmuán. Á ta urè, más napiá galá nu
 magubobuk kayu ngámin ta ággubobuk naw, nga mangipakánámmu sù bilin ni Na-
 marò, tapè mánnámmuán nayù ira ngámin nga tatolay yù kagian naw. Ngam napiá
 lâ nu magubobuk yù tolay sù ipeyubobuk nayù Mangilin nga Ikararuá nga ari paga
 nánámmuán, nu aijan gapay yù tolay nga iniddán nayù Mangilin nga Ikararuá sù
 pakáwayyá na nga mangibukalán sù kebalinán nayù kagian na, tapè ibukalán na sangaw
 yù kebalinán na. Á mábbágán laguk yù ira ngámin nga mangikatalà nga maggagammung
 tán.

⁶ Á iyabbù ku laguk nikayu, wáwwagi, nu umayà nikayu nga magubobuk ta ággubobuk nga arán naw kánnámmuán, á egga panò yù pammakapián naw megapu níkan? Awán gemma. Ngam nu magubobugá galá sù ággubobuk naw nga kánnámmuán naw, áнна ubobugak ku nikayu yù inipalappà ni Namarò níkan, onu kagiak ku nikayu yù ammu nga meyanung ká Namarò, onu kagiak ku nikayu yù bilin ni Namarò, áнна ituddù nikayu yù kebalinán na, á mábbágán kayu laguk. ⁷ Á ta ángngarigán, mássiki nu awán ta inànga nayù paláwatá onu árpá, kunnay ta makobobuk ira nu mappaláwatá yù tolay, onu magárpá. Ngam nu ari napiá yù pattoká na, matákkilalát tam panò yù pattoká na? Ari gemma. ⁸ Á kunnian gapay, nu aijan yù suddálu nga magamariung nga magágál sù ira kábulun na, ta umay ira mangabbák kuna nga makigerrá, á nu ari malitáw yù pagamariung na, á ammu ra panò nayù ira kábulun na ta mapparán ira? Ari gemma. ⁹ Á kunnian gapay nikayu, nu magubobuk kayu ta ággubobuk nga ari paga nánnámmuán, á kunnay laguk ta paddák galá yù kobobuk naw, ta awán ta tolay nga makánnámmu sù kagian naw.

¹⁰ Kuruk gemma ta aru yù ira makkakerumá nga ággubobuk ta dabbuno, ngam aijan yù kebalinád da ngámin. ¹¹ Á nu arák ku ammu yù ággubobuk nayù tolay nga makiubobuk níkan, á tanakuán yù katatole na. Á tanakuáná gapay, nga ari yù kagittá na. ¹² Á gapu ta karagátán naw ta iyawá na nikayu nayù Ikararuá ni Namarò yù pakáwayyá naw, á talákkurugan naw laguk nga manuppál sù pakáwayyá naw nga mangabbák sù ira wáwwagi naw, tapè mapasigaggá yù pangikatalá da ká Apu Kesu.

¹³ Á yáyù nu aijan yù tolay nga iddán nayù Ikararuá ni Namarò sù pakáwayyá na nga magubobuk ta ággubobuk nga ari paga nánnámmuán, á ipakimállá na laguk ta alawatan na gapay yù pakáwayyá na nga mangibukalán sù kebalinán nayù kagian na. ¹⁴ Á ta ángngarigán, nu makimállaká ká Namarò ta ággubobuk nga arák ku kánnámmuán, nga ipeyubobuk na níkan nayù Ikararuá ni Namarò, á awán galá ta pabbalinán na ta nonò ku, gapu ta arák ku kánnámmuán yù kebalinán na. ¹⁵ Á anni laguk panò yù napiá nga akkuák ku ta pakimállá ku ká Namarò? Kunniaw laguk yù akkuák ku. Tángngagak ku yù pagubobuk ku ta ággubobuk nga arák ku kánnámmuán, megapu sù putù, á sangaw tángngagak ku gapay yù ipakimállá ku megapu sù nonò ku, tapè kánnámmuák ku yù kagiak ku ká Namarò. Á ta paddáyò ká Namarò, makkansioná sù ággubobuk nga arák ku kánnámmuán, megapu sù putù, áнна ikansior ku gapay sangaw yù megapu sù nonò ku nga kánnámmuák ku.

¹⁶ Á ta ángngarigán, nu iyubobuk naw yù ággubobuk nga ari paga nánnámmuán, áнна aijan yù ira álliuk nga mepaggammung nikayu, á kunnasi laguk ta mesipá yù ira álliuk sù paddáyò naw ká Apu? Awán ta awayyá ra nga makkagi ta “Ammán,” gapu ta arád da kánnámmuán yù kagian naw. ¹⁷ Á mássiki nu napiá yù áddáyò naw ká Namarò, ari mábbágán yù ira kábulun naw, gapu ta arád da kánnámmuán. ¹⁸ Dayáwak ku si Namarò, gapu ta makáwayyángá nga magubobuk ta ággubobuk nga ari paga nánnámmuán, ánnè nikayu ngámin. ¹⁹ Ngam nu mepaggammungá sù ira mangikatalá ká Apu, napiá galá nu iyubobuk ku yù ággubobuk tam, tapè kánnámmuád da gapay, mássiki nu baddi lá yù kagiak ku nira, ánnè ta aru yù kagiak ku nga iyubobuk ku ta ággubobuk nga arád da kánnámmuán.

²⁰ Á wáwwagi, arán naw nakuan karagátán yù lá pakobobuk naw ta ággubobuk nga ari paga nánnámmuán. Ta nu yáyù lá karagátán naw, á kunnay ta ánonò na abbing yù nonò naw. Á ta meyanung sù narákè, napiá nu kunnay ta nonò na assítay yù nonò naw, nga arán na paga ammu mangnguá ta narákè. Ngam ta meyanung sù ira makkakerumá nga pakáwayyá nga iyawá nayù Ikararuá ni Namarò, á nononan naw laguk yù kunnay ta ánonò na tolay nga natagátánin, nga ammu na mappíli sù napiá.

²¹ Á yawe yù netúrâ nga kinagi ni Namarò:
 “Dobak ku yù ira tatolay nga naggapu ta tanakuán nga lugár, nga tanakuán yù ággubobuk da,
 ta ed da kagian yù bilik ku sù ira tatolay nga manaki manguruk.

Á mássiki nu kunnian, ari ira magginná sù kagiak ku nira.”

Yáyù kinagi ni Namarò. ²² Á yáyù nga ammu tam ta ari megapu sù ira manguruk, nu ari galá megapu sù ira nga ari manguruk yù pangiyawá ni Namarò ta pakáwayyá na tolay nga magubobuk ta tanakuán nga ággubobuk nga ari paga nánnámmuán, tapè tákkilalán nayù ira ari manguruk yù pakáwayyá ni Namarò nga mamanunnù nira. Ngam ari megapu sù ira ari manguruk, nu ari galá megapu sù ira tatole ni Namarò yù pangiyawá na nira sù pakáwayyá ra nga mangipakánnámmu sù bilin na, tapè kánnámmuád da yù pakáwayyá ni Namarò nga mangiyigù nira. ²³ Á sikayu ngámin nga mangikatalá ká Apu, nu maggammung kayu nga magubu-ubobuk ta ággubobuk nga ari paga nánnámmuán, á nu tullung gapay yù ira nga ari mattudduán onu yù ira ari manguruk, á arád da panò kagian ta maguyung kayu ngámin?

Wan gemma, ta arád da kánnámmuán yù kagian naw! ²⁴ Ngam nu mangipakánnámmu sù bilin ni Namarò nga ipalappà na nikayu, á nu tullung yù tolay nga ari paga mangikatalà kâ Apu, onu yù tolay nga ari mattudduán, á ta pakaginá na sù kagian naw, tákkilán na yù liwiliwá na áнна ammu na ta mepángngà yù pamagikáru ni Namarò kuna. ²⁵ Á ipalappà na laguk yù ngámin nga liwiliwá na, mássiki yù nelimak ta nonò na, á mamalittúkak nga mabbabáwi ta liwiliwá na, áнна maddáyaw kâ Namarò. Á kagian na, “Kuruk nga aijan si Namarò nikayu!” kun na.

Yù Ákkimore tam kâ Namarò ta Paggagammung tam

²⁶ Á wáwwagi, anni laguk yù napiá nga akkuán naw ta paggagammung naw nga makimoray kâ Namarò? Napiá nu aijan nikayu yù ira makkansion nga maddáyaw kâ Namarò, á aijan gapay yù ira nga mattutubbá nga mangituddu sù bilin ni Namarò, áнна yù mangipakánnámmu sù inipalappà ni Namarò kuna, áнна yù magubobuk ta ággubobuk nga ari paga nánnámmuán, áнна yù makkagi gapay sù kebalinán nayù kinagi na. Ta napiá nu mábbágán kayu ngámin nga naggagammung, megapu sù ngámin nga akkuán naw, tapè mepasigaggá yù ángngikatalà naw kâ Apu. ²⁷ Á nu aijan yù ira nga magubobuk ta ággubobuk nga ari paga nánnámmuán, á napiá nu duá onu tallu lá yù mattutubbá nga magubobuk, á máwák gapay yù tádday nga mangibukalán sù kebalinán nayù kagiad da. ²⁸ Ngam nu awán ta makáwayyá nga mangibukalán sù kebalinán nayù ubobuk da, á magimammá ira laguk ta paggagammungán, ta makiubobuk ira lá kâ Namarò áнна ta baggi ra.

²⁹ Á yù ira ábbilinán ni Namarò ta paggagammung naw, á napiá nu anugutan naw ta mattutubbá nga magubobuk yù duá onu tallu lá, nga mangipakánnámmu sù inipalappà ni Namarò nira. Á yù ira káruán nikayu, ginnán naw ta napiá, tapè makkakápasikkál kayu ta meyanung sù kinagi ra, nu kuruk nga naggapu sù Ikararuá ni Namarò. ³⁰ Á nu magubobuk yù napolu, á aijan yù ipalappà ni Namarò sù tádday, á magimammá laguk yù napolu. ³¹ Ta nu mattutubbá ittam, aijan yù awayyá tam ngámin nga magubobuk, tapè matudduán ittam ngámin áнна matabarangan ittam ngámin. ³² Á yù ábbilinán ni Namarò, aggina gemma yù maguray sù baggi na, nu magubobuk onu magimammá. ³³ Á si Namarò, arán na ikáyá nu makusukusu yù paggagammung tam. Ta ikáyá na galá yù napiá nga pakkaká-ásigurá tam.

Á yáyù nga aijan gapay yù kustombare tam ngámin nga mangikatalà kâ Namarò, ta ngámin nga paggagammungát tam, ³⁴ ta magimammá yù ira bábbay. Ari ira meyanugù nga makipiripirang ta ubobuk, gapu ta máwák nga tumulù ira sù ira lálláki nga kunnay ta neturá sù tunung ni Moyses. ³⁵ Á nu aijan yù arád da kánnámmuán nayù ira bábbay, á iddagád da lábbi yù labbè da ta bale ra, á iyabbù da laguk yù kebalinán na sù atáwa ra. Ta jikkù nu magubobuk yù ira bábbay ta paggagammung tam.

³⁶ Á ngattá laguk ta manaki kayu manguruk karannian nga kinagi nikayu? Sikayu nga taga Korinto panò yù paggapuán nayù bilin ni Namarò? Onu kagian naw ta sikayu lá yù pagádekán nayù bilin na? Ari gemma. ³⁷ Á yù tolay nga makkagi ta aggina yù ábbilinán ni Namarò, onu kagian na ta aijan yù pakáwayyá na nga iniyawá nayù Ikararuá ni Namarò kuna, á tákkilán na laguk ta kuruk nga taddán ni Namarò yù ngámin nga iníturá ku saw. ³⁸ Á nu aijan yù tolay nga manaki nga manángngák sawe nga taddán gapay ni Namarò, á arán naw laguk tángngagan yù kagian na.

³⁹ Á yáyù, wáwwagi, nga ipe naw yù urá naw laguk nga mangipakánnámmu sù bilin ni Namarò nga inipalappà na. Ngam arán naw ipugik yù ira nga magubobuk ta ággubobuk nga ari paga nánnámmuán. ⁴⁰ Á napiá lá nu mattutubbá kayu ta ngámin nga akkuán naw ta paggagammung naw.

15

Yù Paginnanole ni Apu Kesu Kiristu

¹ Á wáwwagi, ipanonò ku nikayu yù napiá nga dámak nga inilayalayá ku ngaw nikayu. Á kinuruk naw, á gapu ta panguruk naw, napasigaggá yù pangikatalà naw kâ Apu Kesu.

² Á meyiğù kayu nga mesipà kâ Namarò megapu sù napiá nga dámak, nu uputan naw yù panguruk naw sù netuddu nikayu. Ngam nu appè manguruk kayu, awán ta pammakapián naw.

³ Á nepakánnámmu nikán yù bilin nga inilayalayá ku ngaw nikayu, nga kuruk nga bilin nga máwák naw tángngagan, nga kunnaw:
Netapil si Apu Kesu Kiristu, nga natay megapu sù liwiliwá tam, tapè mapakomá ittam ta liwá tam,

nga kunnay sù inipetúrâ na ngaw ni Namarò sù dán nga libru.

4 Á netanam si Apu Kesu Kiristu,

á pinaginnanole ni Namarò sù mekatallu nga ággaw,
nga kunnay sù netúrâ sù dán nga libru.

5 Á kabalin ni Apu Kesu naginnanolay, nappasingan kâ Eduru.

Á nappasingan gapay sù ira mapulu duá nga sinullâ na ngaw nga umay mangilayalayâ.

6 Á pappasâ na yaw, nappasingan gapay sù ira mawwawági ta ángnguruk da kuna, nga naggagammung nga natturù ta límá gatù.

Á aru yù matolay paga nira, ngam natayin yù ira káruán.

7 Á nappasingan gapay kâ Ime.

Á kabalin na yaw, nappasingan gapay sù ira ngámin nga sinullâ na nga minángngilayalayâ.

8 Á síkán yù naporíán nga nappasinganán ni Apu Kesu ta kabalin na naginnanolay, ta ikáddagâ lâ nappasingan níkán, mássiki nu kunnayâ ta neyanâ lage na ággo na. 9 Á síkán yù kagukábán sù ira ngámin nga minángngilayalayâ nga sinullâ ni Apu Kesu. Á ta urè, aringâ mepángngâ nga mebiláng sù ira minángngilayalayâ, gapu ta jinigirigâ ku ngaw yù ira mangikatalâ kâ Apu. 10 Ngam sinullâ nangâ ni Namarò nga minángngilayalayâ sù bilin na, megapu sù pangikállâ na níkán ána pangiddù na níkán. Á napiá yù pabbalinán nayù pangikállâ na níkán, ta nilikurák kin yù liwâ ku ána nangulingin yù ággangnguâ, tapè masserbingâ kuna. Á nasikan yù áttarabákù ánnè sù ira ngámin nga káruán nga minángngilayalayâ, nga ari negapu sù pakáwayyâ, nu ari galâ negapu kâ Namarò nga mangabbák níkán. 11 Á maguray lâ nu síkán yù mangilayalayâ onu yù ira káruán nga sinullâ ni Apu, á naggigittâ yù ilayalayâ mi, nga napiá nga dâmak nga kinuruk naw.

Yù Paginnanole nayù ira nga Mangikatalâ kâ Apu

12 Á pangilayalayâ mi ngaw nikayu, inipakánnámmu mi ta naginnanolayin si Apu Kesu Kiristu. Á ngattâ, ta aijan nikayu yù ira makkagi ta ari maginnanolay yù námmatay? 13 Ta nu kuruk nakuan ta arán na paginnanolayan ni Namarò yù námmatay, á kuruk nakuan gapay ta ari naginnanolay si Apu Kesu Kiristu. 14 Á nu ari nakuan naginnanolay si Apu Kesu Kiristu, á awán laguk ta serbi nayù pangilayalayâ mi, á awán gapay ta serbi nayù pangikatalâ naw kâ Apu. 15 Á mepasingan nakuan ta nassiri kami ta meyanung kâ Namarò, gapu ta kinagi mi ta pinaginnanole na si Apu Kesu, nga arán na ga pinaginnanolay, nu kuruk nakuan nga ari maginnanolay yù ira námmatay.

16 Ta nu arán na nakuan paginnanolayan ni Namarò yù ira námmatay, á ari laguk nakuan napaginnanolay si Apu Kesu Kiristu. 17 Á nu arán na nakuan pinaginnanole si Apu Kesu Kiristu, á awán laguk nakuan ta serbi nayù pangikatalâ naw kuna, á magikáru kayu paga nakuan ta liwiliwâ naw, gapu ta arán na kayu paga mapakomá ni Namarò. 18 Á yù ira ngaw nangikatalâ kâ Apu Kesu Kiristu, nga natayin, nagawáwán ira nakuan, ta arán na ira pinakomá, á aijan ira nakuan ta impiernu. 19 Á nu iddanamát tam lâ yù pammakapiát tam sawe dabbuno, ána awán nakuan ta iddanamát tam nga maginnanolay nga mesipâ kâ Apu Kesu Kiristu, á kábbi ittam nakuan laguk, ánnè sù ira ari manguruk.

20 Ngam kukurugán nga kuruk nga pinaginnanole ni Namarò si Apu Kesu Kiristu! Á aggina yù napolu nga naginnanolay, tapè ammu tam ta kuruk nga maginnanolay gapay sangaw yù ira tatole ni Namarò nga námmatay. 21 Ta matay yù ira ngámin nga tatolay megapu sù palliwâ na ngaw nayù tádday nga tolay, nga si Kákay Adan. Á kunnian gapay, duttál yù ággaw nga paginnanole na tatolay, megapu sù paginnanole nayù tádday, nga si Apu Kesu Kiristu. 22 Matay yù ira ngámin nga tatolay nga ginaká ni Kákay Adan. Á kunnian gapay, yù ira ngámin nga mepattatádday kâ Apu Kesu Kiristu megapu sù pangikatalâ da kuna, matolay ira gapu ta paginnanolayan ni Namarò ira.

23 Á si Apu Kesu Kiristu yù napolu nga naginnanolay nga aringin matay. Á sittam ngámin nga tatole na yù maporián nga maginnanolay gapay sangaw nu manoli si Apu Kesu ta dabbuno. 24 Á duttál laguk yù pagáddekán na ággaw, á appútan ni Apu Kesu yù ira ngámin nga makikontará kuna, nga mammaguray ána makáwayyâ nga mammagaddátu, mássiki nu tolay ira onu di Satanas ána yù ira kábulun na nga dimoniú ána anitu. Á pangappù ni Apu Kesu nira, itoli na laguk yù ngámin nga pammagurayán na sù Yáma na, nga si Ammò Namarò.

25 Ta sinalákkuruk na ngaw ni Namarò ta máwák nga mammaguray si Apu Kesu áddè ta pangappù na sù ira ngámin nga makikontará kuna. 26 Á kabalin na appútan yù maporián

nga makikontará kuna, á irián na yù paggapuán na pate na tolay, á aringin matay yù ira tatolay.

²⁷ Á bibbirat tam yù inipetúrâ ni Namarò nga kun na, “Á si Namarò, pinatulù na sù pammagure nayù Anâ na yù ngámin nga egga.” Á ammu tam gemma ta ari mesipà si Namarò sù ngámin nga metulù kâ Apu Kesu Kiristu, gapu ta si Namarò yù mamatulù sù ngámin.* ²⁸ Á sangaw nu napatulù yù ngámin sù Anâ ni Namarò, á tumulù gapay yù Anâ ni Namarò sù Yáma na nga nangiyawâ kuna sù ngámin, tapè si Namarò galá yù kotunán nga mammaguray sù ngámin.

²⁹ Á ta meyanung sù kagian naw, nu kuruk nga ari nakuan maginnanolay yù ira námmatay, á anni má laguk ta aijan yù ira marigù ta pannakabaggi nayù ira námmatay nga ari narigù? Anni panò yù kagiad da nga serbi nayù pakirigù da, nu ari maginnanolay yù ira námmatay? ³⁰ Á nu ari nakuan maginnanolay yù ira námmatay, anni má panò ta umay kami mangilayalayâ sù bilin ni Namarò, nepatalugáring ta ammu mi ta aijan yù ira nga ikayâ da mamapátay nikami ta kággággaw? ³¹ Á wáwwagi, kuruk yù kagiak ku nikayu, nga magisassengâ matay ta kággággaw, megapu sù pangilayalayâ ku. Á kunnian, kuruk gapay ta ayatánâ megapu sù pangikatalâ naw kâ Apu Kesu Kiristu.

³² Á yù ira nakikontará níkan ta keggâ ta ili na Epeso, kun na simaron nga ayám ira nga mangnungá níkan. Á iyabbù ku laguk, anni panò yù iddanamá ku nga bálâ ku ta pagattam ku sù panigirigâ da níkan, nu aringâ nakuan magiddanáma ta paginnanolè? Á nu kuruk nakuan nga ari maginnanolay yù ira námmatay, á mappabbúyâ ittam laguk, nga kunnay ta kagian nayù ira káruán, nga kud da, “Kumán ittam lâ kumán ána mappissán ittam, ta matay ittam sangaw.”† ³³ Aro! Arán naw ilogò yù baggi naw! Ari gemma kuruk yù kagiad da. Yawe yù kuruk nga nakagi, “Nu mepulù ittam sù ira narákè, mekanâ ittam sangaw sù narákè nga akka-akkuád da,” kun na. ³⁴ Pasikkálan naw laguk yù nonopan naw. Pallikuránán naw yù narákè nga ággangnungá naw, á ari kayu laguk malliwâ má. Ta aijan garè nikayu yù ira nga arád da paga ammu si Namarò. Á mappasirán kayu nakuan ta máwák ku nga kagian nikayu.

Yù Baggi tam nga Molingin sangaw ta Paginnanole tam

³⁵ Á ta meyanung sù paginnanole nayù ira námmatay, aijan támma yù tolay nga ikayâ na nga mangiyabbù, nga kun na, “Á kunnasi yù paginnanole nayù ira námmatay? Á anni panò yù ággián nayù baggi ra nu maginnanolay ira?” ³⁶ Aro! Sikaw nga mangiyabbù, ari panò nataggâ yù nonò mu? Aru yù keyarigán nayù baggi tam nga maginnanolay. Ta ángngarigán, nonopan naw yù bini nga imulá naw. Máwák nga memulá bi, nga kunnay ta natay nga netanam, lage na mattubbu ta bagu nga baggi na. ³⁷ Á mássiki nu aggi onu tanakuán yù bini nga imulá naw, á ta pattubbu na, dumá ngin yù baggi na, ta aringin yù bukal nga inimulá naw. ³⁸ Ta iyawâ ni Namarò yù bagu nga baggi na, nga mepángngâ sù ira katággitádday nga bini.

³⁹ Á yù ira ngámin nga egga nga matolay, makkakerumâ gapay yù baggi ra. Ta naddumá yù pattak na tolay ta pattak na ayám. Á tanakuán gapay yù pattak na mammánù ta pattak na sirá. ⁴⁰ Á makkakerumâ gapay yù ággián nayù baggi ra nga egga ta lángi ána yù ira nga makkakerumâ yù baggi ra nga aijan ta dabbuno. Á nerumá yù kakástá nayù baggi nayù ira nga aijan ta lángi sù baggi nayù ira nga aijan ta dabbuno. ⁴¹ Ta tanakuán yù dalingárang nayù bilák sù dalingárang nayù bulán. Á mássiki yù ira bituan, makkakerumâ yù dalingárang da nga katággitádday.

⁴² Á kunnian yù keyarigán nayù ággián nayù ira baggi na tolay ta paginnanole nayù ira námmatay. Ta nu matay ittam, á metanam ittam, á marúnù yù baggi tam. Ngam sangaw nu paginnanolayan ni Namarò ittam, á ari ittamin bulubugâ matay nga marúnù, nu ari galá nga matolay yù baggi tam ta áddè ta áddè. ⁴³ Á makálikak garè yù natay nga netanam, nga awán ta pakáwayyâ na. Ngam sangaw nu maginnanolay, makástá ána makáwayyâ. ⁴⁴ Á saw dabbuno yù kepángngatán nayù ira baggi tam nga matay. Ngam sangaw nu paginnanolayan ni Namarò yù ira baggi tam, moli iren, nga mepángngâ nga maggián ta lángi. Á ammu tam ta aijan yù ira baggi tam nga mepángngâ nga maggián ta dabbuno. Á gapu ta aijan yù baggi tam nga mepángngâ nga maggián ta dabbuno, ammu tam ta aijan gapay yù ira baggi tam nga mepángngâ nga mepaggián kâ Namarò ta lángi.

⁴⁵ Á mabibbik tam yù inipetúrâ ni Namarò sù dán nga libru na, nga kun na, “Si Kákay Adan yù olu nga tolay nga pinarò ni Namarò, á iniyawâ ni Namarò kuna yù ináng na,

* 15:27 Salmo 8:6 † 15:32 Isaya 22:13

tapè matolay.”† Á si Apu Kesu Kiristu yù sinullà ni Namarò, nga táli nayù ngaw Adan. Aggina yù sigga-inànga nga manotolay, á iyawâ na nittam yù inànga nga mannanáyun nga awán ta áddè na, tapè mesipà ittam kuna ta lángi. 46 Á mepasingan nittam ta ari ta lángi yù kepángngatán nayù tolay nga napolu, nu ari galâ ta dabbuno. Á yù naporián, aggina si Apu Kesu, nga mepángngà ta lángi. Kunnian yù keyarigát tam, ta arát tam nakeyanatán yù baggi tam nga mepángngà ta lángi. Ngam ta paginnanole tam, yù baggi tam nga maporián yù mepángngà ta lángi. 47 Á pidde ni Namarò si Kákay Adan, nga napolu nga tolay, nga naggapu ta káppu na dabbun. Á si Apu Kesu yù maporián, nga naggapu ta lángi. 48 Á gapu ta ginakâ na ittam ngámin ni Kákay Adan, á yáyù nga aijan yù baggi tam nga kunnay ta baggi na nga naggapu ta káppu na dabbun. Á sittam ngámin nga nepattatádday kâ Apu Kesu Kiristu megapu sù pangikatalâ tam kuna, meyawâ nittam yù baggi tam nga kunnay ta baggi na nga mepángngà ta lángi, sangaw nu mesipà ittam gapay kuna ta lángi.

49 Á gapu ta negittá yù baggi tam sù baggi ni Kákay Adan, nga olu nga tolay nga naggapu ta káppu na dabbun, á kunnian gapay, mepaggittá yù baggi tam sangaw sù baggi ni Apu Kesu Kiristu, nga naggapu ta lángi. 50 Á yawe yù kagiak ku nikayu, wáwwagi. Yù baggi na tolay nga matay, ari mesipà sù pammagurayán ni Namarò ta lángi. Ta matay garè yù baggi tam, nga marúnù sawe dabbuno, gapu ta awán ta awayyá na nga mannanáyun nga matolay.

Si Apu Kesu yù Manotolay nga Mangappù ta Patay

51 Á ginnán naw yawe, ta aijan yù kagiak ku nikayu nga inilimák na ngaw ni Namarò, ngam inipakánnámmu na nikán. Sittam nga mangikatalâ kâ Apu Kesu, ari ittam ngámin matay, ngam ikáddagâ lâ moli ngámin yù baggi tam. 52 Á alistu yù kesimmu na, nga kun na pakkimâ na matá, sangaw nu doban ni Namarò yù magamariung sù pagáddékán na ággaw. Á ta pagamariung na, á yù ira námmatay nga netádday kâ Apu Kesu Kiristu, ikáddagâ lâ ira maginnanolay nga aringin bulubugá matay. Á sittam nga matolay paga, nga netádday kâ Apu, á ikáddagâ moli yù baggi tam nga aringin bulubugá matay. 53 Ta yawe baggi tam nga matay, máwák nga moli, tapè ari ittam bulubugá matay, ngam matolay ittam ta áddè ta áddè. Á yù maddán nga marúnù, máwák nga moli, tapè mannanáyun nga ari maddán.

54 Á sangaw nu molingin yù baggi tam, ari ittamin bulubugá matay, ána sangaw nu molingin yù maddán nga marúnù, á napiá ittamin nga mannanáyun, á yáyù sangaw yù katuppál nayù dán nga netúrâ, nga kun na,

“Awánin ta námmatay, ta pinaginnanole ni Namarò ira.”*

55 “Máppu ittam panò megapu sù pate tam?”

Ari gemma, ta arán na ittam ni Namarò ukuman.

Ari ittam maganássing nga matay,

ta ari ittamin mapagikáru.”†

56 Ta maganássing yù ira tatolay nga matay gapu ta ammu ra ta mapagikáru ira megapu sù liwâ da. Á máwák nga mapagikáru ira gapu ta nakaliwatád da yù tunung ni Namarò. 57 Á dayáwat tam laguk si Namarò. Ta megapu sù kingguá ni Apu Kesu Kiristu, nga mangiyigù nittam, ari ittam maganássing nga matay, gapu ta náringin yù ngámin nga liwiliwâ tam megapu sù pagikáru ni Apu Kesu.

58 Á wáwwagi nga iddukak ku, yáyù nga ipasigaggâ tam laguk yù ángngikatalâ tam kâ Apu Kesu, tapè ari ittam mekáttauay kâ Apu. Á uputat tam nga tuppálan yù ngámin nga ipakuá na nittam, ta ammu tam ta aijan yù pammakapiát tam megapu sù ngámin nga pattarabáku tam nga masserbi kuna.

16

Yù Pangabbák tam sù ira Wáwwagi tam nga Magáwák

1 Á ta meyannung sù pangunnuk naw ta kuártu nga ángngabbák naw sù ira tatolay ni Namarò nga marigrigá, á tuppálan naw yù kunnay sù kinagi gapay sù ira wáwwagi tam nga taga Galasia ta meyannung sù ángngabbák da nira. 2 Á ta káda Liggu, isinnâ naw yù iyawâ naw nga naggapu ta ganánsiá naw nga katággitádday, yù lâ áddè na meyawâ naw, mássiki nu aru onu baddi. Á unnuran naw yù kuártu, tapè dán nga napanán yù ángngabbák naw nira sangaw nu lubbekâ ta gián naw ta Korinto. 3 Á labbè ku sangaw, dobak ku yù ira pinili naw nga ikatalâ naw nga mangituluk sù iyawâ naw, tapè ituluk da ta ili na Jerusalem. Á ipetuluk ku gapay nira yù túrá ku nga mangipakánnámmu sù ira labbetád da ta naggapu ira

† 15:45 Genesis 2:7 § 15:52 1 Tessalonika 4:15-17 * 15:54 Isaya 25:8 † 15:55 Oseas (Kuseya) 13:14

nittam, tapè alawatad da ira. ⁴Á nu kagiak ku ta napiá ta urè nu umayà gapay ta Jerusalem, á mepulù ira laguk nikán.

*Yù Panalákkuruk ni Pablo nga Manúllun sù ira taga Korinto
2 Korinto 1:15-24*

⁵Á talákkurugak ku ta umayà sangaw ta gián naw, ta et takayu tullúnán. Á pattalebák ku ta Masidonia, maddagákà bi támma tán nga mangituddu ta paggagammungád da. ⁶Á sangaw nu umayà ta gián naw, maggiánà nikayu ta mabayák támma, mássiki áddè ta pappasá nayù ammián, tapè sikayu yù mangabbák nikán, ta paggagannuâ ku sangaw nu duttál yù ággaw nga pánò nikayu nga umay ta tanakuán nga lugár. ⁷Ta arák ku ikáyá ta mabi lâ yù paddagá ku ta gián naw, nu ari galâ ta mabayágá ta baddi, nu anugutan ni Namarò. ⁸Á yáyù nga ipáppánnâ bi yù pánò saw ili na Epeso, áddè ta pappasá nayù piestá na Pentekosto, ⁹gapu ta aru yù awayyá nga mangituddu sù bilin ni Namarò, mássiki nu aru yù ira makikontará nikán.

¹⁰Á sangaw nu umay si Timotio sù gián naw, allíúgan naw ta napiá, ta aggina yù kunnay nikán nga masserbi kâ Apu Kesu. ¹¹Á yáyù nga makimoray kayu kuna ta napiá. Arán naw iluddè, ngam abbágán naw sangaw nu maggagannuâ, tapè makatoli saw giák ku, ta iddagák ku, ána yù ira kábulun na.

¹²Á si Apolo, nga wagi tam, kinagi kuna ta mepulù nakuan sù ira wáwwagi tam nga umay mattúllun nikayu, ngam awán ta awayyá na kunangan. Á sangaw lâ nu matángngák na, en na kayu laguk tullúnán.

Yù Naporíán nga Pangitabarang ni Pablo

¹³Á sikayu, mappalán kayu laguk, tapè ari kayu melogò. Á ipasigaggà naw yù pangikatalà naw kâ Apu. Á ari kayu maganássing, á ipe naw yù urà naw nga malláppà laguk nga manuppál sù ngámin nga ipakuá ni Namarò nikayu. ¹⁴Á ta ngámin nga akkuán naw, ipasingan naw yù pakkaká-iddù naw.

¹⁵Á wáwwagi, ammu naw di Estepano ána yù ira kábbale na, ta aggira yù olu nga nangikatalà kâ Apu ta lugár na Akeya. Á áddè ngaw ta kapángnguruk da ta áddè kunangan, inupù da yù ángngabbák da ta napiá sù ira kábulud da nga mangikatalà kâ Apu. ¹⁶Á yáyù nga ikomá nikayu ta tumulù kayu nira ána yù ira ngámin nga kunnay nira nga masserbi kâ Namarò, á tángngagan naw yù itabarang da ána yù itaddád da nikayu.

¹⁷Á ayatánà sù labbè di Estepano kári Fortunato kâ Akeko, ta maraddamà gapu ta awán ta awayyá naw nga umay, á aggira yù táli naw nga mangabbák nikán. ¹⁸Á nabannáyád da yù nonò ku ta kunnay ta pamanne ra gapay ngaw sù nonò naw. Á napiá nu tángngagat tam ira laguk, ána yù ira ngámin nga masserbi ta napiá nga kunnay nira.

¹⁹Á yù ira ngámin nga mangikatalà kâ Apu nga taga Asia, kagiad da ta parè bi ta napiá yù ággián naw, á iyabbù da nu kunnasi kayu ngámin. Á kunnian gapay yù kagiad di Akila kâ Persila nga atáwa na, ána ngámin ira nga maggagammung ta bale ra. ²⁰Á yù ira ngámin nga wáwwagi tam, iyabbù da gapay nu kunnasi kayu. Á ta paggagammung naw, makkakámoray kayu, tapè mepasingan yù pakkaká-iddù naw.

²¹Á inipetúrâ ku yawe ngámin ta áddè saw. Á sikán lápay yù mattúrâ sù ngágak ku. Pablo.

²²Á nu aijan nikayu yù áppè pípiá nga awán ta ayá na kâ Apu Kesu Kiristu, nga Yápu tam, á mokum laguk, nga mapagikáru ta áddè ta áddè. Á Apu, umay ka bi umay!*

²³Á parè bi ta mepulù nikayu si Apu Kesu nga mangikállâ ána mangiddù nikayu. ²⁴Á awán ta áddè nayù ángngiddù ku gapay nikayu ngámin nga mangikatalà kâ Apu Kesu Kiristu. Á yawe yù áddè nen. Ammán!

* 16:22 “Maranatha,” kud da ta ággubobuk na Gareko, á yù kebalinán na, “Apu, umay ka bi umay!”

Yù Mekaruá nga Túrâ ni Pablo sù ira Manguruk nga taga Korinto

Yù Meyannung sù Túrâ

Pattúrâ ni Pablo sawe mekaruá nga túrá na sù ira tatolay nga naggián ta Korinto nga mangikatalá kâ Apu, á tangaragun yù nappaságingin áddé ngaw pattúrâ na sù olu nga túrá na nira. Á naburung si Pablo, marakè ari ira magayáyâ megapu sù inítúrâ na nga paggammá na nira. Á yáyù nga jinok ni Pablo si Titò, ta en na ira tullúnán, nu tuttulad da yù taddán na nga meyannung sù pamakomá ra áнна pamanne ra sù ira kábulud da.

Á keggá ni Pablo ta Masidonia, limibbè si Titò nga naggapu ta Korinto. Á napiá yù iniránuk ni Titò ta meyannung sù ira manguruk nga taga Korinto, ta kinuruk da yù kinagi ni Pablo nira, áнна magayáyâ ira. Ngam aijan ta Korinto yù ira nga massiri, nga nakkagi ta ari kuruk nga minánngilayalayá si Pablo, ta arán na sinullá ni Apu Kesu Kiristu.

Á pakarámak ni Pablo ta meyannung sù ira mallillibá kuna ta Korinto, inítúrâ na laguk má yù mekaruá nga túrá na sù ira taga Korinto, tapé kurugad da yù kagian na saw nga meyannung ta panullá ni Apu Kesu Kiristu kuna. Á kagian na gapay yù ngámin nga inattamán na nga jigá, tapé ipakánnámmu na si Apu Namarò áнна yù bagu nga tarátu na. Á aru paga yù ituddu ni Pablo nga meyannung sù pamakkápiá ni Namarò ta tatolay kuna.

Yù Mayán nayù Túrâ

Yù Paddáyo ni Pablo kâ Namarò (1:1-11)

Ibukalán ni Pablo yù Pabbabáwi na nga Umay ta Korinto (1:12–2:4)

Yù Pamakomá tam áнна yù Pamanne tam sù ira Napággáng (2:5-17)

Yù Meyannung sù Bagu nga Tarátu ni Namarò (3:1-18)

Si Namarò yù Paggapuán nayù Pakáwayyá tam nga Masserbi kuna (4:1-12)

Moli yù Baggi tam ta Paginnanole tam nga Mesipá kâ Namarò ta Lángi (4:13–5:10)

Makikopun ittam kâ Namarò megapu sù Ketapil ni Apu Kesu (5:11–6:13)

Ari Mepappárik yù ira Manguruk sù ira ari Manguruk (6:14–7:1)

Yù Pagayáyâ ni Pablo megapu sù ira taga Korinto (7:2-16)

Mangabbák ittam sù ira Kábulut tam nga Magáwák (8:1–9:15)

Yù Itabbák ni Pablo sù ira Mamaliwá kuna (10:1-18)

Yù Meyannung sù ira Áppè Minánngilayalayá (11:1-15)

Yù Meyannung sù Pagattam ni Pablo (11:16-33)

Yù Inipasingan ni Namarò áнна Inipalappá na kâ Pablo (12:1-10)

Yù Naporián nga Itabarang ni Pablo sù ira taga Korinto (12:11–13:14)

¹ Sikán si Pablo, nga sinullá ni Namarò ta mangilayalayá sù bilin na nga meyannung kâ Apu Kesu Kiristu. Á si Timotio yù kabbuluk ku, nga wagi tam nga mangikatalá kâ Apu Kesu. Á mattúrâ kami nikayu nga taga Korinto, áнна yù ira ngámin nga tatole ni Namarò ta purubinsia na Akeya. ² Á parè bì ta napiá yù gawagawáyan naw áнна yù ággián naw, áнна magimammá gapay yù nonò naw, megapu sù pangikállá da nikayu di Namarò nga Yáma tam kâ Apu Kesu Kiristu nga Yápu tam.

Yù Paddáyo ni Pablo kâ Namarò

³ Dayawat tam si Namarò, nga Yáma nayù Yápu tam, si Apu Kesu Kiristu. Ta mangikállá si Namarò, áнна dán nga naparán nga mamannay nittam ngámin nga makiyáma kuna. ⁴ Á nu marigirigá ittam, bannáyán na ittam, maguray lá yù jigá tam, tapé ammu tam gapay yù mamannay sù ira kábulut tam nga marigirigá ta makkakerumá nga jigá, nga kunnay sù ámmanne ni Namarò nittam. ⁵ Á megapu sù ketádde tam kâ Apu Kesu Kiristu, á kunnay kuna, attamát tam lá yù jigá nga umay nittam. Á yáyù nga mabannáyán ittam gapay nga kunnay kuna, megapu sù ámmanne ni Namarò nittam.

⁶ Á sikami, attamám mi yù jigá nga umay nikami megapu sù pangilayalayá mi sù napiá nga dámak, tapé pabbalinán na yù pakkapiánán naw, á meyigù kayu megapu ta pagginná naw sù bilin ni Namarò. Á gapu ta mabannáyán kami megapu sù ánggabbák ni Namarò nikami, ábbágán na kayu gapay, á mabannáyán kayu, áнна meyattam naw gapay yù jigá nga kunnay sù attamám mi. ⁷ Á yáyù nga awán ta ikaburung mi nikayu, ta mássiki nu marigirigá kayu nga kunnay nikami, á ammu mi ta ábbágán na kayu ni Namarò gapay, tapé mabannáyán kayu nga kunnay nikami.

⁸ Á wáwwagi, arám mi ilímak nikayu yù nesimmu nikami sù paggiám mi túrin ta purubinsia na Asia, ta nappaná yù jigá mi áddè ta arám mi kapállà, nga kunnay ta náringin yù iddanáma mi nga matolay. ⁹ Ta kagiam mi ta matay kami ngin tán. Ngam nesimmu lâ nikami, tapè ari yù baggi mi yù ikatalà mi, nu ari galá si Namarò, nga mamaginnanolay sù ira námmatay. ¹⁰ Ta mássiki nu nagissassay kami natay, á iniyígù na kami ni Namarò. Á iyígù na kami má gapay. Á iddanamám mi ta uputan na kami nga abbágán, á melilli kami má sù pate mi. ¹¹ Á sikayu, máwák nga abbágán naw kami gapay, megapu sù aru nga ipakimállà naw ká Namarò megapu nikami, tapè ikállà na kami ni Namarò ána abbágán na kami. Á yáyù nga aru gapay yù ira maddáyaw ká Namarò, megapu sù pangikállà na nikami ta pakaginná na sù ipakimállà naw.

Ibukalán ni Pablo yù Pabbabáwi na nga Umay ta Korinto

¹² Á magayáyáká, gapu ta napiá lâ yù nonò ku ána yù kustombarè sù ira ngámin nga tatolay ta dabbuno, á nepatalugáring nikayu nga wáwwagi. Á aringá áppè pípiá, ngam matunung yù ngámin nga akkuák ku ána yù ngámin nga kagiak ku nikayu, nga ari naggapu sù sirik na tolay, nu ari galá sù pangikállà ni Namarò níkan. ¹³ Á itúrâ ku lâ nikayu yù awayyá naw nga bibbiran ána kánnámmuán naw. Á mássiki nu arán naw paga nánnámmuán, á iddanamák ku ta mánnámmuán naw sangaw ngámin, ¹⁴ tapè magayáyâ kayu megapu níkami, ána magayáyâ kami gapay megapu nikayu, sangaw nu pagáddekán na ággaw, nu mattoli si Apu Kesu Kiristu nga mamanunnù ta ngámin nga tatolay.

¹⁵ Á gapu ta mappeloká megapu sù pagayáyâ naw nga mamaddulò níkan, á sinalákkuruk ku ngaw ta pidduát takayu nga tullúnán, tapè mamidduá gapay yù pammakapián naw megapu níkan. ¹⁶ Ta ninonò ku ta maddagákâ nakuan ta gián naw nu umayâ ta Masidonia, á maddagákâ má nikayu sangaw nu manolingâ nga maggapu ta Masidonia, tapè abbágán nawâ nakuan sù paggagannuá ku nga umay ta Judiya.

¹⁷ Á aijan támma nikayu yù makkagi ta nu kuruk nga ikáyâ ku nga umay mattúllun nikayu, á anni má laguk ta arák ku palurotan? Onu kagiad na támma ta malogonâ mabbabáwi. Ngam arán naw kagian ta aringá mekatalà nga kun na tolay nga ari makimoray ká Apu. ¹⁸ Ta kuruk gapay nga mekatalà yù ngámin nga kagiam mi, ta kunnay ta mekatalà si Namarò. Á ari kami mabbábáng, nga makiuwan ta arubáng naw ána mangari ta likuk naw.

¹⁹ Á ari gemma mabbábáng si Apu Kesu Kiristu nga Anâ ni Namarò nga inilayalayâ mi nikayu, sikami kári Silas ká Timotio. Ta kuruk ngámin yù kinagi ni Apu Kesu, á pinalurò ni Apu Kesu yù ngámin nga inipakuá nayù Yáma na kuna. ²⁰ Á mapalurò yù ngámin nga initabbâ ni Namarò megapu kuna. Á yáyù gapu na nga ikatalà tam si Namarò megapu ká Apu Kesu, á kagiát tam ta “Ammán!” gapay ta ngámin nga initabbâ ni Namarò nittam, tapè meparáyaw si Namarò. ²¹ Á si Namarò yù mangipasigaggâ sù kepatatádde tam ká Apu Kesu, á sinullâ na ittam ta tatole na nga masserbi kuna. ²² Á iniyawâ na nittam yù Ikararuá na, nga aijan nittam, nga panákkilalát tam ta tatole ni Namarò ittam. Á yù Ikararuá ni Namarò yù ipamakuruk na nittam ta iyawâ na nittam gapay sangaw yù ngámin nga initabbâ na.

²³ Á si Namarò yù massístigu ta kuruk yù kagiak ku nikayu. Á yawe laguk yù gapu na nga aringá minay nattuállun nikayu, gapu ta iniddagák ku lâ yù pabbabáwi naw ta liwâ naw, marakè maraddam kayu sangaw nu gammát takayu. ²⁴ Á ari sikami yù mammaguray nikayu, nu ari galá si Namarò, á napiá yù ángnguruk naw kuna. Ngam sikami, abbágám mi sikayu lâ, tapè magayáyâ kayu megapu sù napasigaggâ nga pangikatalà naw.

2

¹ Á yáyù laguk nga sinalákkuruk ku ta aringá bì umay mattúllun nikayu, nu máwák nga gammát takayu má, marakè sikán laguk yù paggapuan nayù pasirán naw ána daddam naw. ² Ta nu maraddam kayu ta pamanunnù ku nikayu, á asinni laguk yù mamagayáyâ níkan, nu ari galá yù ira nga pinaraddam ku! ³ Á yáyù nga nattuárákâ ngaw nikayu, tapè aringá nakuan maparaddam megapu nikayu, nu marángnganát takayu paga nakuan nga mangnguá ta narákè. Ta sikayu yù mamagayáyâ níkan nu umayâ sangaw ta gián naw. Á ammù gemma ta nu ayatánâ nakuan, á mepagayáyâ kayu ngámin gapay megapu sù pagayáyâ ku. ⁴ Á sù ngaw pattúrâ ku nikayu, á naraddamâ kuruk ána nabagabagalâ nga nakkulukulè, megapu sù narákè nga kingnguá naw. Ngam yá lâ ipattúrâ ku, ari ta paraddamat takayu, nu ari galá ta ipakánnámmù yù nepallâ nga ángngiddù ku nikayu.

Yù Pamakomá tam ána yù Pamanne tam sù ira Napággáng

⁵ Á ta meyanung sù tolay nga ajjan nikayu nga nalliwâ, á ari lâ sikán yù pakaliwatán na, nu ari gapay sikayu. Á arák ku kagian ta sikayu ngámin yù pakaliwatán na, ngam yù ira káruán nikayu, ta arák ku ikáyâ nga patturutan yù kagiak ku nga meyanung sù liwâ na. ⁶ Á arungin nikayu yù namággáng kuna. Á kustungin yù pamággáng naw kuna. ⁷ Á nu napággáng yù tolay nga nakaliwâ, á máwák tam laguk pakomán. Pakomán naw laguk, á bannáyán naw yù nonò na, marakè mapállâ yù tolay, megapu sù daddam na ána pasirán na. ⁸ Ta yáyù nga ikomâ nikayu ta ikállâ naw, ána ipasingan naw yù ángngiddù naw kuna.

⁹ Á ajjan paga yù inipattúrâ ku nikayu, ta parubát takayu, tapè mánnámmuák ku nu manguruk kayu sù ngámin nga taddák ku nikayu. ¹⁰ Á nu ajjan yù ira kábulun naw nga pinakomâ naw, á pakomák ku ira gapay. Ta nu ajjan yù tolay nga máwák ku nga pakomán, á pinakomâ laguk ta paningan ni Apu Kesu Kiristu, tapè mábbágán kayu. ¹¹ Á yáyù nga pakomát tam yù ira kábulut tam, tapè ari ittam melogò kâ Satanas, ta ammu tam gemma yù ikáyâ ni Satanas nga akkuán nittam.

Yù Pangipakánnámmu di Pablo ta Meyanung kâ Apu Kesu

¹² Á pánò ta Epeso, minayâ ta ili na Tarowas. Á nálek ku tán yù aru nga awayyâ nga mangilayalayâ sù napiá nga dámak nga meyanung kâ Apu Kesu. Á yáyù nga nánámmuák ku ta ábbágán nangâ ni Apu. ¹³ Ngam ari magimammâ yù nonò ku, gapu ta arák ku nálerán tán si Titò nga wagi tam. Á yáyù nga nánawák ku bì yù ili na Tarowas, á minayâ ta purubinsia na Masidonia.

¹⁴ Á dayáwat tam laguk si Namarò, gapu ta aggina yù mangappù sù narákè. Á sittam nga mepattatádday kâ Apu Kesu, tatole na ittam. Á aggina yù mangituluk nittam sù angayát tam, ána ábbágán na ittam, tapè ipakánnámmu tam yù bilin na nga meyanung kâ Apu Kesu ta ngámin nga lugár, nga kunnay ta passamá nayù aguk na bábbanguk nga naggapu nittam. ¹⁵ Á magayáyâ si Namarò megapu nittam, gapu ta ipakánnámmu tam si Apu Kesu sù ira ngámin nga tatolay, tapè meiyígù ira. Á aggira lâ yù maguray, nu manguruk ira onu ari ira manguruk. ¹⁶ Á magayáyâ yù ira maginná sù bilin ni Apu, ta yáyù pakáwayyâ ra nga makisipâ sù áttole ni Namarò nga awán ta áddè na, megapu sù panguruk da. Ngam yù ira nga ari manguruk, molang da ginnán, gapu ta yáyù panákkilalád da ta nakaliwâ ira nga metabbâ ta impiernu ta áddè ta áddè.

Á egga panò yù tolay nga makáwayyâ nga mamalurò ta kunniaw nga ikalángam mi? ¹⁷ Awán bulubugá ta makáwayyâ, nu ari lâ megapu sù pakáwayyâ ni Namarò. Á ari kami nagittá sù ira áppè pipiá, nga mangituddu sù bilin ni Namarò tapè málâ da yù táddád da. Ngam sikami, kuruk nga napiá yù nonò mi, á ta ánninganán ni Namarò, ilayalayâ mi yù bilin ni Namarò nga meyanung kâ Apu Kesu Kiristu, megapu galá sù pakáwayyâ ni Namarò nga nanullâ nikami.

3

Yù Meyanung sù Bagu nga Tarátu ni Namarò

¹ Á anni yù nonotan naw ta meyanung sù kagiak ku, nga ari kami nagittá sù ira áppè pipiá? Kagian naw panò ta mappeddaráyaw kami? Máwák mi panò nga ipasingan nikayu yù túrá nayù ira nakituddu nikami, nga ipamakuruk mi nikayu ta kuruk nga minángngilayalayâ kami? Á nu mánaw kami nga umay ta tanakuán nga lugár, máwák mi panò nga ipetúrâ nikayu yù ipasingam mi sù ira tatolay tán? Ta ajjan yù ira nga kunniaw yù akkuád da, ngam awán ta máwák mi nga akkuán. ² Ta sikayu yù kun na túrá nga ipasingam mi, nga massistígu ta kuruk yù kagian mi, gapu ta napiá yù panguruk naw megapu sù pangituddu mi. Á ngámin nga tatolay, masingad da yù napiá nga ággangguá naw, á matákkilalád da ta napiá yù panguruk naw, á yáyù nga kánnámmuád da ta kuruk nga sinullâ na kami ni Namarò ta mangilayalayâ. ³ Á gapu ta panguruk naw, kunniaw yù keyarigán naw. Sikayu yù kun na túrá ni Apu Kesu Kiristu, nga inipetubbuk na nikami. Á ari kayu yù kuruk nga túrá nga tintá ána papel, nu ari galá sikayu yù kunnay ta túrá nayù Ikararuá ni Namarò nga manotolay. Á ari yù dappik nga batu yù nangitúratán na, nga kunnay sù ngaw iniyawâ na kâ Kákay Moyses, nu ari galá yù nonò naw yù kunnay ta nangitúratán na.

⁴ Á yá galá yù gapu na nga ajjan yù awayyâ mi nga makkagi ta kuruk nga napiá yù pangilayalayâ mi, gapu ta si Namarò yù ikatalâ mi, nga mangabbák nikami megapu sù kepattatádde mi kâ Apu Kesu Kiristu. ⁵ Á awán ta awayyâ mi nga makkagi ta sikami lápay yù makáwayyâ nga mamalurò sù akka-akkuám mi. Ta ammu mi ta si Namarò galá yù paggapuán nayù pakáwayyâ mi. ⁶ Ta sinullâ na kami ni Namarò ta masserbi kuna,

tapè ipakánnámmu mi yù bagu nga tarátu na. Á ari negittá yù bagu nga tarátu na sù tunung ni Kákay Moyses ngaw, ta iniyawá ni Namarò yù Ikararuá na nga mangabbák ta tatolay, megapu sù bagu nga tarátu na. Á yá pabbalinán nayù tunung ni Kákay Moyses yù pamagikáru ni Namarò ta tatolay, gapu ta awán ta makatuppál kuna. Ngam megapu sù bagu nga tarátu na, tolayan nayù Ikararuá ni Namarò yù ira tatole na ta bagu nga áttole ra, tapè mesipá ira kâ Namarò ta áddè ta áddè.

Maráyaw yù Bagu nga Tarátu

⁷ Á sù ngaw ketúrâ nayù tunung ni Namarò sù duá nga batu, nepalappâ yù dalingárang ni Namarò ána yù karáyo na. Á pakálawâ ni Kákay Moyses sù tunung, mássiki nu nabbalin ta pamagikáru ni Namarò ta tatolay, á naddalingárang yù mammang ni Kákay Moyses. Á yù ira taga Israel, arád da narúlangán yù mammang na, gapu ta nakatulang yù dalingárang na, mássiki nu nassisínù nga nári. ⁸ Á gapu ta kunnian yù kepalappâ nayù dalingárang ni Namarò ána yù karáyo na ta pangiyawá na sù tunung na nga paggapuán nayù pate tam, á más makapállâ paga yù kepalappâ nayù dalingárang ni Namarò ána yù karáyo na megapu sù bagu nga tarátu na nga meyawá nittam megapu sù Ikararuá na. ⁹ Ta maráyaw gemma yù tunung ni Namarò, mássiki nu nabbalin sù pamagikáru ni Namarò ta tatolay. Á más maráyaw yù bagu nga tarátu nga meyawá ta tatolay megapu sù Ikararuá ni Namarò, ta mapakomá ira ta liwiliwá da ána mebiláng ira ta matunung ta ánninganán ni Namarò. ¹⁰ Á kunnay ta aringin masingan yù piá nayù tunung ni Namarò, megapu sù kapiánán nayù bagu nga tarátu ni Namarò. ¹¹ Á nu maráyaw yù tunung ni Namarò, nga nabi lá yù passerbi na, á nepatalugáring sù bagu nga tarátu na, nga maráyaw nga awán ta áddè nayù passerbi na.

¹² Á sikami, gapu ta ajjan yù iddanamám mi megapu sù mannanáyun nga tarátu ni Namarò, yáyù nga mappelò kami nga mangipakánnámmu sù meyanung kâ Apu Kesu. ¹³ Á awán ta ilímak mi. Ari kami yù kunnay kâ Kákay Moyses ngaw, nga sinákkabán na yù mammang na, tapè arád da masingan nayù ira taga Israel yù kasisínù nayù lammâ nayù dalingárang na. ¹⁴ Ngam yù ira ngaw taga Israel nga kábulun ni Kákay Moyses, nataggâ yù nonò da. Á áddè ngaw ta áddè ta ággawo, nu bibbirad da yù dán nga tarátu ni Namarò nga iniyawá na kâ Kákay Moyses, á kunnay ta natákkabán yù nonò da, ta arád da paga mánnámmuán yù kuruk nga kebalinán na. Á mári lá yù tákkak nayù nonò da na ikatalá da si Apu Kesu Kiristu, ta aggina yù mangabbák nira tapè mánnámmuád da laguk yù kuruk.

¹⁵ Á ta áddè kunangan, nu bibbiran nayù ira taga Israel yù iníturâ ni Moyses, á kunnay ta natákkabán lá paga yù nonò da. ¹⁶ Ngam nu mabbabáwi yù tolay ta liwiliwá na ána ikatalá na yù Yápu tam, mári laguk yù tákkak nayù nonò na, á mánnámmuán na. ¹⁷ Á yù Yápu tam, aggina yù Mangilin nga Ikararuá. Á gapu ta ajjan yù Mangilin nga Ikararuá nittam, á kunnay ta pinalubbáng na ittamin. Á ari ittamin yù kunnay ta napukù nga magiddak sù pamagikáru ni Namarò, ána abbágán na ittam, tapè makáwayyá ittam nga manaki nga malliwá, ána makáwayyá ittam gapay nga manuppál sù ipakuá ni Apu Namarò nittam. ¹⁸ Á sittam ngámin nga mangikatalá kâ Apu Kesu Kiristu, kunnay ta náringin yù tákkak na nonò tam, gapu ta mánnámmuát tamin yù bilin na. Á sittam yù kepasinganán nayù piá nayù Yápu tam ána yù pakáwayyá na. Á pakanonò tam kâ Apu Kesu Kiristu ána pabbibbik tam sù bilin na, ulian na ittam ta taggabaji, tapè igittá na ittam kuna. Á si Apu Kesu yù Mangilin nga Ikararuá nga mamalurò karannian.

4

Si Namarò yù Paggapuán nayù Pakáwayyá tam nga Masserbi kuna

¹ Á gapu ta ammu mi ta jinok na kami ni Namarò nga mangilayalayâ sù napiá nga dámak, megapu sù pangikállâ na nikami, á yáyù nga ari kami maganássing onu mabbábáng, mássiki nu marigirigâ kami. ² Á arám mi akkuán yù narákè nga kepasiránán na tatolay, nga ikáyá da ilímak. Ari kami mangilogò. Ari kami massiri. Á arám mi ulian yù bilin ni Namarò, ngam kagiam mi galá yù kuruk nga bilin na, nga ibukalám mi tapè mánnámmuán naw. Á yáyù nga máwayyá nayù ira ngámin nga tatolay nga manákkilála ta awán ta narákè ta nonò mi, gapu ta napiá lá ngámin yù akkuám mi ta ánninganán ni Namarò. ³ Á nu ajjan yù ira nga ari makánnámmu sù ilayalayâ mi, á kunnay ta natákkabán yù nonò da, gapu ta panaki da sù bilin ni Namarò, á mapagikáru ira ta impiernu ta áddè ta áddè. ⁴ Ta si Satanas yù mammaguray nga pakiyápuán nayù ira tatolay ta dabbuno nga ari manguruk kâ Apu Kesu,

á lipparán ni Satanás yù nonò da, tapè ari mapannawák, áнна arád da mánnámmuán yù napiá nga dámak nga meyanung sù karáyò ni Apu Kesu Kiristu, nga kagittá ni Namarò.

⁵ Á yù ilayalayá mi, ari yù baggi mi, nu ari galá si Apu Kesu Kiristu nga Yápu tam. Á sikami nga mangilayalayá, kunnay kami ta aripan naw, megapu sù pangayá mi ká Apu Kesu. ⁶ Á si Namarò, kapámmarò na ta dabbuno, nagubobuk, á pinannawák na yù jibbà. Á pannawagan na gapay yù nonò tam, tapè kánnámmuát tam yù pakáwayyá na áнна karáyò na, nga mepakánnámmu megapu ká Apu Kesu Kiristu.

⁷ Á sikami yù pangikatalakán ni Namarò nga mangilayalayá sù bilin na, mássiki nu tolay kami lá nga nakapi áнна nagukák, nga kunnay ta bánga, nga napadday ta lupè, tapè mepasingan ta ari naggapu sù baggi mi lápay yù pakáwayyá mi nga mamaluro sù ipakuá ni Namarò nikami, nu ari galá naggapu ká Namarò nga makáwayyá áнна makamangnguá ta ngámin. ⁸ Á mame-arú kami nga marigirigá, ngam iddanamám mi lá paga yù pappasá nayù jigá mi, megapu sù ángngabbák ni Namarò nikami. Á mássiki nu arám mi ammu yù akkuám mi, á ari kami bulubugá mapállá. ⁹ Jigirigátad da kami nayù ira malussaw nikami. Ngam si Namarò, arán na kami táttájjíán. Á mássiki nu akkuád da kami áddè ta magisassay kami matay, á ililli na kami ni Namarò sù pate mi. ¹⁰ Á ta kággággaw aijan yù ira nga mangigagángay nikami, nga kunnay ta naparubán ni Apu Kesu ta keggá na ta dabbuno. Ngam matolay kami paga, áнна napiá yù ággangnguá mi megapu sù ángngabbák ni Apu Kesu, tapè mepasingan ta matolay paga gapay si Apu Kesu. ¹¹ Á ta paggiám mi lá paga ta dabbuno, á ta kággággaw attamám mi lá yù pággè mi matay gapu ta panguruk mi ká Apu, tapè sikami yù pakasinganán nayù pakáwayyá nayù áttòle ni Apu Kesu, mássiki nu tolay kami lá nga awán ta pakáwayyá mi, nga matay galá sangaw. ¹² Á yáyù nga sigidá kami magisassay matay megapu sù pangilayalayá mi sù napiá nga dámak. Ngam napiá yù pabbalinán nayù pagattam mi ta jigá, ta mepattolay kayu ká Namarò ta áddè ta áddè megapu sù pangilayalayá mi.

Moli yù Baggi tam ta Bagu ta Paginnanole tam

¹³ Á aijan yù neturá, nga kun na, “Kurugak ku yù kinagi ni Namarò, á yáyù nga kagiak ku gapay sù ira kábuluk ku.”* Á gapu ta negittá yù pangikatalà mi sù pangikatalà nayù ngaw nangitúrà karannian, á mássiki nu marigirigá kami, uputam mi lá nga kagian yù napiá nga dámak nga meyanung ká Apu Kesu. ¹⁴ Ta ammu mi ta pinaginnanole ni Namarò si Apu Kesu. Á yáyù nga ammu mi ta paginnanolayan na kami gapay nga mepattatádday kuna, áнна sikayu ngámin gapay nga mangikatalà ká Apu Kesu, tapè apan na ittam ta gián na. ¹⁵ Ta attamám mi yù ngámin nga jigá nga umay nikami megapu sù ángngabbák mi nikayu, tapè malannapán kayu ta aru nga tatolay nga mamarubá sù pangikállá ni Namarò. Á ta kunnian, magari yù ira nga maddáyaw ká Namarò, tapè kuruk nga meparáyaw.

Awán ta Áddè nayù Kesipá tam ká Namarò ta Lángi

¹⁶ Á gapu ta iddanamát tam dannian, ari ittam mapállá, maguray lá yù jigá nga umay nittam. Ta mássiki nu maddán áнна makkapi yù baggi tam, á ta kággággaw mapasigaggá yù pangikatalà tam ká Apu. ¹⁷ Á ibiláng tam ta aláppaw yù jigá tam, nga mabi nga mappasá galá, gapu ta yá pabbalinán na yù aru nga napiá nga kesipátát tam ká Namarò, nga awán ta kárik piá na áнна awán ta áddè na. ¹⁸ Á yáyù nga arát tam karagátán yù makkakerumá nga nakástá nga masingat tam sawe dabbuno, nu ari galá yù arát tam paga masingan nga kesipátát tam nga aijan ká Namarò ta lángi. Ta mabi nga mappasá yù masingat tam, ngam maggián nga awán ta áddè nayù arát tam paga masingan.

5

Yù Paggianát tam ta Gián ni Namarò

¹ Á yáyù nga ari ittam laguk malurá nga masserbi ká Namarò, ta nu matay ittam, áнна marúnù yù baggi tam nga kunnay ta amingán nga paggianát tam sawe dabbuno, á ammu tam ta málá tam yù bagu nga paggianát tam ta lángi. Ta paddayan ni Namarò yù bagu nga baggi tam nga aringin matay, nu ari galá mepattolay kuna ta lángi ta áddè ta áddè. ² Á keggá tam paga sawe dabbuno, manalasisá ittam nga maraddam gapu sù pakkaragá tam ta ikáddagá lá moli yù baggi tam ta bagu, nga mepángngá ta lángi. ³ Ta nu aijan yù bagu nga paggianán nayù ikararúá tam, á ari ittam laguk kun na magilongán nu matay ittam.

⁴ Á keggá tam nga matolay sawe dabbuno, marigirigá ittam, ta aru yù ikaburung tam áнна yù ikaraddam tam. Ngam arák ku kagian ta ikáyá tam yù mabi matay, nu ari galá

* 4:13 Salmo 116:10

ta ikáyâ tam ta moli yù baggi tam nga matay, tapè mabbáli ta bagu nga baggi tam nga ari bulubugá matay. ⁵ Á si Namarò yù namarán nittam, tapè moli yù baggi tam ta bagu nga mepaggián kuna ta áddè ta áddè. Á iniyawâ na nittam yù Ikararuá na ta maggián nittam, nga pamakuruk na ta tuppálan na sangaw yù ngámin nga inittabbá na ngaw nittam.

⁶ Á gapu ta aijan nittam yù Ikararuá ni Namarò, ari ittam maburung, ta ammu tam ta napiá sangaw yù paggianát tam ta lángi. Á keggá tam paga nga matolay sawe dabbuno, ammu tam ta arayyu ittam paga sù gián ni Apu Kesu ta lángi. ⁷ Á keggá tam saw dabbuno, attamát tam yù mesimmu nittam ána palurotat tam yù ipakuá ni Apu Kesu nittam, gapu ta napasigaggá yù pangikatalà tam kê Apu, mássiki nu arát tam paga masingan. ⁸ Á yáyù nga magayáyâ ittam ána mapataggá yù nonò tam. Á mássiki nu arát tam ikáyâ nga matay, á nonopat tam ta más napiá nu matay ittam ána panawát tam yù baggi tam, tapè mepaggián ittam kê Apu ta lángi.

⁹ Á yáyù nga ipe tam laguk yù urá tam nga manuppál sù ipakuá ni Apu Kesu nittam, tapè ayatán nittam, mássiki nu maggián ittam paga sawe dabbuno, onu mepaggián ittamin kuna ta lángi. ¹⁰ Ta sittam ngámin nga katággítádday, máwák nga meyarubáng kê Apu Kesu Kiristu, tapè panunntán na. Á alawatat tam nga katággítádday yù mepángngá nga bálâ na ta meyanung sù kingnguá na nga napiá onu narákè, sù keggá na paga sawe dabbuno.

Makikopun ittam kê Namarò megapu sù Ketapil ni Apu Kesu

¹¹ Á gapu ta ammu mi makimoray kê Apu Kesu, nga mamanunnù nittam, á yáyù nga kagumánam mi nga patuttulan yù ira tatolay kê Apu Kesu. Á si Namarò, ammu na ta napiá lâ yù nonò mi. Á sikayu, napiá nu ammu naw gapay ta mekatalà kami. ¹² Á arám mi iráyaw yù baggi mi mángin, ta pakkagi mi ta mekatalà kami. Ta kagiam mi lâ yù kuruk, tapè ammu naw yù itabbák naw sù ira mappeddaráyaw, nga iráyo ra lâ yù ággiád da ána yù pakáwayyá ra, ngam ari yù ággangnguá ra nga kemámmatán ni Namarò.

¹³ Á nu aijan yù makkagi ta maguyung kami gapu ta pangilayalayâ mi, á paguráyám mi lâ, ta ilayalayâ mi si Namarò, tapè meparáyaw. Á nu aijan gapay yù ira nga makkagi ta napiá lâ yù ánonò mi, á kuruk gapay, ta sikayu yù ipangilayalayâ mi, tapè napiá yù pabbalinán naw. ¹⁴ Á maguray lâ yù kagiad da, á mattarabáku kami galá megapu sù ángngiddù ni Apu Kesu Kiristu ta tatolay. Á ammu mi ta aggina yù natay, nga netapil megapu nittam ngámin. Ta si Apu Kesu yù tali tam nga natay, á sittam nga netádday kuna, kunnay ta námmatay ittam ngámin, gapu ta si Apu yù nagikáru ta liwiliwâ tam ngámin. ¹⁵ Á yawe yù gapu na nga natay si Apu Kesu megapu nittam, tapè sittam nga matolay paga, arát tam akkuán yù ikáyâ tam, nu ari galá yù ikáyâ na. Ta natay si Apu nga netapil megapu nittam, á naginnanolay megapu nittam.

¹⁶ Yáyù nga arám mingin laguk kagian ta napiá yù tolay megapu sù masingam mi nga ággián na onu pakáwayyá na, nga kunnay sù ánonò nayù ira nga ari manguruk kê Apu. Á kunnian yù ánonò mi ngaw kê Apu Kesu Kiristu sù ngaw lage mi nangikatalà. Ngam kungane napataliánin yù ánonò mi nga meyanung kuna. ¹⁷ Á yù tolay nga netádday kê Apu Kesu Kiristu, á kunnay ta bagu nga naporò. Nappasá ngin yù dán nga ánonò na ána yù narákè nga ággangnguá na, á molingin ta bagu yù nonò na ána yù ngámin nga meyanung kuna. ¹⁸ Á ngámin dannian pinalurò ni Namarò. Ta megapu sù ketapil ni Apu Kesu Kiristu, pinakkápiá ni Namarò ittam kuna. Á inikatalà na nittam yù pakáwayyá tam nga mangipakánnámmu sù ira tatolay ta aijan yù awayyá ra nga makipakomá kuna, tapè makkápiá ira. ¹⁹ Á yáyù nga ilayalayâ mi ta aijan yù awayyá nayù ira tatolay nga makipakomá kê Namarò, megapu sù ketapil ni Apu Kesu Kiristu. Á pakomán ni Namarò yù liwiliwâ da, á arán na iren pagikaruan, ta arán nen ibiláng yù liwâ da. Á inikatalà ni Namarò nikami yù pakáwayyá mi nga mangipakánnámmu sù bilin na nga meyanung sù pamakkápiá na ta tatolay kuna. ²⁰ Á yáyù nga sikami yù kunnay ta pannakasimù ni Apu Kesu Kiristu. Á pagubobuk mi, á kunnay ta si Namarò galá yù magágál nikayu, ta tángngagan naw yù bilin na nga ipakánnámmu mi nikayu. Á yáyù nga ikomá mi nikayu megapu kê Apu Kesu, ta umay kayu makipakomá kê Namarò, tapè makkápiá kayu kuna. ²¹ Awán bulubugá ta liwâ ni Apu Kesu. Ngam gapu ta pangikállâ ni Namarò nittam, inipekárú na kê Apu Kesu yù liwiliwâ tam, tapè aijan yù awayyá tam nga mesipá sù piá ni Namarò megapu sù ketádde tam kê Apu Kesu Kiristu.

6

¹ Á gapu ta mepattarabáku kami kâ Namarò, á yáyù nga ikomá mi nikayu ta palurotan naw laguk yù ipakuá ni Namarò nikayu, marakè awán sangaw ta serbi nayù allà ni Namarò ána yù iddù na nikayu, nu malurá kayu nga manguruk kuna. ² Ta mappasá sangaw yù ággaw nga pangikállà na ta tatolay. Ginnán naw yù kinagi ni Namarò, nga kun na, “Ajjan yù ággaw nga sinullà ku nga pangikállà ku nikayu, tapè ginnák ku yù ipakimállà naw nikán.

Á dattál nayù ággaw nga pangiyígù ku nikayu, abbágát takayu.”*

Tángngagan naw laguk, gapu ta kunangane yù pangikállà ni Namarò ta tatolay! Ta ginnán na kunangane yù ipakimállà tam, á kunangane ajjan yù awayyá tam nga makiyígù kuna, ta alawatan na yù ira nga makiyígù kuna ta ággawo.

Yù Pangiyattam ni Pablo sù Makkakerumá nga jigâ

³ Á gapu ta masserbi kami kâ Namarò, magimuguk kami ta arám mi akkuán yù ipamaliwá da nakuan nayù ira tatolay nikami, tapè awán ta ipanaki da sù ituddu mi. ⁴ Á ta ngámin nga akkuám mi, ipasingam mi ta kuruk nga masserbi kami kâ Namarò, megapu sù pagattam mi ta aru nga makkakerumá nga jigâ nga mesimmu nikami. ⁵ Ta attamám mi yù pamalpalu da nikami, ána yù pamukù da nikami. Á attamám mi nu pagguguruád da kami nga jigirigátan. Á attamám mi gapay yù bannák mi nga nepallà megapu sù tarabáku mi. Á name-arú nga nagattam kami sù patturá mi, ána kabisim mi. ⁶ Á mepasingan ta si Namarò yù paggapuán nayù pakáwayyá mi, gapu ta napiá yù nonò mi ána ággangguá mi, ána gapu ta ammu mi si Namarò ána kánammúam mi ta napiá yù bilin na. Á ari kami malogon nga mapporay, ngam mappasensia kami, nga mangikállà sù ira wáwwagi tam. Á yáyù nga mepasingan ta ajjan nikami yù Mangilin nga Ikararúá, nga mangabbák nikami. Á kuruk nga napiá yù ángngiddù mi sù ira wáwwagi tam. ⁷ Á ilayalayá mi yù kuruk nga bilin ni Namarò ána mepulù nikami yù pakáwayyá na. Á yù napiá nga ággangguá mi, yáyù meyárik ta ármás mi, ta nu masingan nayù ira tatolay yù napiá nga akka-akkuám mi, awánin ta awayyá ra nga makikontará nikami. ⁸ Ta uputam mi lá nga akkuán yù napiá, maguray lá yù akkuád da nikami, nu pakimorayád da kami onu ipasiránád da kami, nu paráketad da kami onu iráyo ra kami. Á kagiad da ta áppè pípiá kami ána massiri, ngam ari kuruk, ta kagiam mi lá yù kuruk. ⁹ Á arád da kami kemámmatán, ána paguráyád da yù ituddu mi, mássiki nu neparámak kami ta ngámin nga lugár. Á magisassay kami matay, ngam masingan naw ta matolay kami lá paga. Ta mássiki nu jigirigátad da kami, ari kami matay. ¹⁰ Á mássiki nu mapakaraddam kami, á magayáyá kami paga. Á pobare kami, ngam aru yù ira nga mesipà sù kuruk nga napiá nga kariku ni Namarò, megapu sù pangituddu mi nira. Á yáyù nga mássiki nu awán ta kukuá mi ta dabbuno, á kuá mi ngámin, ta mesipà kami kâ Namarò.

¹¹ Á sikayu nga kákkopum mi nga taga Korinto, awán ta inilímak mi nikayu, ta kinagi mi yù ngámin nga nonò mi, á nepallà yù ayà mi ána yù ángngiddù mi nikayu. ¹² Ari nakúráng yù pangiddù mi nikayu. Ngam sikayu, nakúráng garè yù pangiddù naw nikami. ¹³ Á kunnay kayu ta áná ku, á yáyù nga kunnian yù pakiubobuk ku nikayu. Ikomá nikayu laguk, ta iddiiddukan naw kami gapay ta kunnay sù pangiddù mi nikayu.

Ari Mepappárik yù ira Manguruk sù ira ari Manguruk

¹⁴ Á ari kayu mangatáwa onu mepattádday sù ira tatolay nga ari tumuttul kâ Apu Kesu, ta ari metádday yù napiá sù narákè. Meyárik ta nawák ána kallà, nga ari metádday. ¹⁵ Á kunnay kâ Apu Kesu, nga ari negittá yù nonò na sù nonò ni Satanas. Á kunnian gapay, ari negittá yù nonò nayù manguruk kâ Apu sù nonò nayù ari manguruk. ¹⁶ Á mepángngá panò nu ajjan yù sináddios sù mangilin nga bale ni Namarò? Ari gemma! Á yáyù nga ari ittam mepulù sù ira nga mangnguá ta narákè. Ta sittam nga manguruk kâ Namarò yù mangilin nga bale na, gapu ta maggián nittam si Namarò nga matotolay nga pakimorayát tam. Á yawe yù kinagi ni Namarò:

“Makipaggiánà sù ira atolè, ta aggira yù paggianák ku.

Ta sikán si Namarò nga pakimorayád da,

á aggira gapay yù atolè nga pammagurayák ku.”†

¹⁷ Á yáyù nga kinagi ni Apu gapay sù ira tatole na,

“Panawán naw yù ira nga mangnguá ta narákè,
tapè mesinná kayu, nga ari mepárik nira.

* 6:2 Isaya 49:8 † 6:16 Libitiko 26:12

Arán naw dakkitan yù narákè, gapu ta napakarenuán kayin.”†

18 “Á paddulotat takayu laguk.

Á yáma nawà laguk ána áná takayu.

Yáyù kagian nayù Kotunán,

nga si Apu Namarò nga makáwayyá nga mammaguray ta ngámin.”§

7

¹ Wáwwagi nga iddukak ku, gapu ta ngámin dannian yù inittabbá ni Namarò nittam, iriát tam laguk yù ngámin nga narákè nga ággangnuá tam, ána ngámin yù egga ta nonò tam nga narákè, á pakimorayát tam galá si Namarò ána uputat tam nga akkuán yù napiá nga ipakuá na nittam, nga mepángngà nittam nga mangilin nga áná na.

Yù Pagayáyá ni Pablo megapu sù ira taga Korinto

² Á sikayu nga wáwwagi mi, alawatan naw kami laguk ta putu naw gapay, ta awán bulubugá ta nakaliwatám mi nikayu. Awán ta ággangnuá mi nga narákè nga inittuddu mi nikayu. Ari kami maddarogá, á arám mi kayu bulubugá inilogò. ³ Á arát takayu paliwatan ta pakkagi karannian, ta kinagi ngaw nikayu yù ayá mi nikayu. Á napasigaggá yù ayá mi nikayu, maguray lá yù mesimmu nittam, nu matolay ittam onu matay. ⁴ Á mappeloká nikayu, ta sikayu yù kuruk nga pangikatalakák ku. Á sikayu yù ipeddaráyò. Á mabannáyán yù nonò mi ána awán ta áddè nayù pagayáyá mi nikayu, maguray lá yù jigá mi nga attamá mi.

⁵ Á sù labbè mi ta Masidonia, awán ta awayyá mi nga magibannák, ta narigirigá kami megapu sù ira nakiramá nikami, ána naburung kami gapay megapu sù ira áppè pípiá, marakè ilogò da sangaw yù ira sinudduák ku. ⁶ Ngam si Namarò yù minámmasikan ána minángngabbák sù ira mapállá, á pinataggá na yù nonò mi megapu sù labbè ni Titò sù giám mi. ⁷ Á nabannáyán yù nonò mi, ari lá negapu sù labbè ni Titò, nu ari gapay negapu sù pagistoriá na sù pagayáyá na megapu nikayu. Á kinagi na gapay ta nepallà yù pakkaragá naw nga makasingan nikami. Á kinagi na ta naraddam kayu megapu sù nesimmu, gapu ta ammu naw ta maraddamá gapay. Á kinagi na yù pagayáyá na gapu ta kaparán naw nga manuppál sù itaddák ku nikayu. Á yáyù nga nepallà yù pagayáyá ku gapay kunangan.

⁸ Á mássiki nu napakaraddam kayu ngaw megapu sù napolu nga túrá ku nikayu, arák ku ibabáwi yù ipattúrá ku. Ngam naraddamá gapay ngaw, ta ammu gemma ta napakaraddam kayu megapu sù túrá ku, mássiki nu nabi lá yù karaddam naw. ⁹ Ngam magayáyáká kunangane, nga ari megapu sù karaddam naw, nu ari galá megapu sù pabbabáwi naw sù kingnguá naw nga narákè ána yù pakipakomá naw ká Apu. Á kunnian, pinabbalin ni Namarò ta pakkapiánán naw yù karaddam naw, á ari kayu laguk náttakitán megapu sù túrá mi. ¹⁰ Ta nu maraddam yù tolay gapu ta liwiliwá na ká Namarò, á mabbabáwi laguk, ána makiyígù ká Namarò, á pakomán na laguk ni Namarò ána iyígù na. Á yáyù nga arán na tolay ibabáwi yù daddam na, ta yá pabbalinán na yù kesipá na ká Namarò ta áddè ta áddè. Ngam nerumá yù daddam nayù tolay nga ari manguruk ká Namarò. Ta ikaraddam na lá yù jigá na, ngam arán na ibabáwi yù liwá na, á yá pabbalinán na yù pate na ána kesinná na ká Namarò ta áddè ta áddè.

¹¹ Wáwwagi, imámmatán naw laguk yù napiá nga pabbalinán nayù karaddam naw nga naggapu sù allá ni Namarò nikayu! Ta naláppá kayin nga manuppál sù ipakuá ni Namarò nikayu, ána naporán kayu nga mangipasingan ta kuruk nga napiá yù nonò naw. Ta napporay kayu, ta kuruk nga arán naw ikáyá yù narákè nga kingnguá nayù tolay, á nerallà yù burung naw ána assing naw marakè massamá nikayu yù narákè. Á kuruk nga karagatán naw yù panoli nga mattúllun nikayu, tapè mepagayáyáká nikayu. Á napattù kayu nga namággáng sù tolay nga nalliawá. Á yáyù nga inipasingan naw ta awán ta liwá naw nga meyanngung karannian nga kingnguá na, ta gimamá naw yù tolay nga nalliawá. ¹² Á pattúrá ku ngaw nikayu, yá ipattúrá ku ari lá megapu sù tolay nga nakaliwá, ána ari lá tapè mabannáyán yù tolay nga nakaliwatán na. Ngam yá ipattúrá ku yù pakkapiánán naw galá, tapè mepakámmamu nikayu ta kuruk nga napiá yù ángngiddù naw nikami ta ánninganán ni Namarò. ¹³ Á yáyù nga nabannáyánin yù nonò mi ána magayáyá kami.

Á nepallà paga yù pagayáyá mi ta pakasingam mi ta ayatán gapay si Titò ta labbè na nikami nga naggapu nikayu, gapu ta inirián naw yù burung na, ta inipasingan naw kuna yù napiá nga nonò naw. ¹⁴ Á ta lage ni Titò minay nikayu, kinagi kuna yù ngámin nga napiá

nga akka-akkuán naw. Á aringà nepasirán megapu sù pangiráyò nikayu, gapu ta labbè ni Titò nga mattùllun nikayu, nasingan na ta kuruk yù kinagi kuna nga meyannung sù napiá nga nonò naw, nga kunnay ta kuruk gapay yù ngámin nga kinagi mi ngaw nikayu. ¹⁵ Á nepallà yù ayá ni Titò nikayu ta pakanonò na sù pamaddulò naw kuna áнна yù pakimore naw kuna áнна yù kaláppà naw nga mamaluro sù ngámin nga taddán na nikayu. ¹⁶ Á yáyù nga ayatánà gapay, gapu ta ammu ta kuruk nga mekatalà takayu nga manuppál sù napiá.

8

Magayáyâ ittam nga Mangabbák sù ira Magáwák

¹ Á wáwwagi mi, ikáyâ mi ipakánámmu nikayu yù napiá nga kingnguá nayù ira taga Masidonia nga mangikatalà kâ Apu Kesu, megapu sù pangikállà ni Namarò nira. ² Ta mássiki nu narigirigá ira áнна nerallà yù kapobare ra, á ayatán ira megapu kâ Namarò. Á yáyù nga maláppà ira nga mangiyawâ ta ángngabbák da sù ira kábulud da nga magáwák. ³ Á arád da lâ iniyawâ yù buná ra, nu ari gapay ta linnapád da yù iyawâ da nga naggapu galá sù máwák da. Á arám mi ira kinagumán, ngam iniyawâ da lápay negapu sù ure ra. ⁴ Á inikomá ra nikami ta mesipà ira gapay nga mangiyawâ sù ira wáwwagi tam nga magáwák túrin ta purubinsia na Judiya. ⁵ Á naturù yù kingnguá ra ánnè sù iddanamám mi. Ta lage ra nangiyawâ sù kukuá ra, inikatalà da yù baggi ra kâ Namarò. Á tumulù ira áнна inikatalà da nikami gapay yù baggi ra, gapu ta yáyù gapay yù inikáyâ ni Namarò nga akkuád da.

⁶ Á gapu ta si Titò yù mangabbák nikayu ta pamegapu naw nga mamarán sù iyawâ naw, á yáyù nga jinok mi má ta umay sù gián naw, ta en na uputan yù inigapu naw, tapè mapaluro yù pangikállà naw. ⁷ Á napiá yù ámmaluro naw ta ngámin nga akka-akkuán naw ánnè sù ira ngámin nga káruán nga tatolay. Napisigaggá yù pangikatalà naw kâ Apu Kesu, áнна ammu naw mangilayalayâ sù napiá nga dámak nga meyannung kuna. Á nánánmuán naw ta napiá yù kuruk nga bilin ni Namarò. Á maláppà kayu, nga dán nga naparán nga manuppál sù ngámin nga napiá nga ipakuá ni Apu Kesu nikayu, áнна nepallà yù ángngiddù naw nikami. Á yáyù nga ikáyâ ku ta magayáyâ kayu laguk nga mangiyawâ ta aru nga awán nakuan ta kúráng na sù ira wáwwagi tam nga magáwák.

⁸ Á arát takayu puersán nga mangiyawâ. Ngam ipakánámmù nikayu yù pangikállà nayù ira káruán nga tatolay sù ira pobare, tapè párigán naw ira, á mepasingan gapay yù napiá nga ángngiddù naw sù ira kábulun naw. ⁹ Á ammu naw yù pangikállà ni Apu Kesu Kiristu áнна yù pangiddù na nittam. Ta mássiki nu aggina yù kotunán, nga makákkua ta ngámin nga aijan, ngam nánawán na ngámin dannian, á minay sawe dabbuno nga nabbáli ta tolay nga pobare, megapu sù pangiddù na nittam, tapè iyawâ na nittam yù awayyá tam nga mabbáli ta maríku, nga mesipà kuna sù gián na ta lángì.

¹⁰ Á yawe laguk yù urè, ta napiá nu palurotan naw yù pinegapuán naw. Ta sikayu yù nattalákkuruk nga mangabbák sù ira pobare. Á sù ngaw dagun nga nappasá, namegapu kayu nga mamarán sù iyawâ naw. ¹¹ Á nagayáyâ kayu gemma sù ngaw panalákkuruk naw. Uputan naw laguk yù pinegapuanán naw, ta iyawâ naw yù meyannung ta awayyá naw nga mangiyawâ, tapè ayatán kayu gapay megapu sù pamaluro naw. Á isipà naw ira sù aijan nikayu. ¹² Ta magayáyâ si Namarò megapu sù iyawâ naw, nga meyannung ta awayyá naw nga meyawâ, nu magayáyâ kayu nga mangiyawâ, ta arán na gemma iddagán yù arán naw awayyá nga meyawâ.

¹³ Á arák ku kagian ta iyawâ naw yù ángngabbák naw sù ira kábulun naw áddè ta maríku ira áнна marigirigá kayu. ¹⁴ Ngam gapu ta aijan yù aru nga kukuá naw, yáyù nga kagiak ku ta napiá nu ábbágán naw yù ira magáwák. Ta nu sikayu yù magáwák noka, á aggira gapay sangaw yù mangabbák nikayu. Á ta kunnian, mattutubbâ kayu laguk nga makkaká-abbák, tapè sikayu ngámin nga katággitádday, egga kuna yù mepángngá nga balle na. ¹⁵ Á kunnian yù kebalinán nayù dán nga netúrá, nga kun na, “Yù tolay nga nangá ta aru, awán ta turú na. Á yù tolay nga nangá ta baddi, awán ta kúráng na.”*

Umay Mattùllun si Titò nikayu nga taga Korinto

¹⁶ Á dayáwam mi si Namarò, ta inipeddù na sikayu gapay kâ Titò, nga kunnay sù ángngiddù mi nikayu. ¹⁷ Á yáyù nga dán nga naparán si Titò, lage mi inikomá kuna, nga umay mattùllun nikayu, ta yáyù ga nga talákkurugan na nga akkuán.

* 8:15 Exodo 16:18

¹⁸ Á ipebulum mi gapay kâ Titò yù wagi tam nga neparámak sù ira ngámin nga kábulut tam nga mangikatalà kâ Apu, megapu sù pakáwayyá na nga mangilayalayá sù napiá nga dámak. ¹⁹ Á ari lâ yian, ta aggina gapay yù sinullá nayù ira manguruk nga maggagammung sù ira káruán nga giád da, ta aggina yù ipepulù da nikami nu umay kami mangituluk sù ilimù da nga itubbuk da sù ira pobare nga magáwák túrin ta ili na Jerusalem, tapè meparáyaw si Namarò áнна mepasingan gapay yù pagayáyá tam nga mangabbák nira. ²⁰ Á napiá nu mepulù nikami, tapè awán ta mamaliwá nikami megapu sù ángngisinek mi sù aru nga kuártu nga inikatalà naw nikami. ²¹ Ta ikáyá mi ta mepasingan ta kuruk nga napiá áнна matunung yù ngámin nga akkuám mi, ari lâ ta ánninganán ni Namarò nu ari gapay ta arubáng nayù ira tatolay.

²² Á ipepulù mi gapay kári Titò yù tádday paga nga wagi tam, nga name-arú nga napanubám mi, áнна nasingam mi yù kaláppá na nga mamaluro sù makkakerumá nga passerbi na kâ Apu. Á nappaná yù pakkaragá na nga umay ta gián naw, nepatalugáring ta nepallá yù pangikatalà na nikayu. ²³ Á si Titò, aggina yù kabbuluk ku sù tarabákù nga masserbi nikayu. Á yù ira duá nga mepulù kâ Titò, aggira yù ira pannakabaggi nayù ira manguruk, nga maggagammung sù ira káruán nga lugár da, áнна meparáyaw si Apu Kesu Kiristu megapu sù akkuád da. ²⁴ Ipasingan naw laguk yù ángngiddù naw nira ngámin, tapè matákkilalán nayù ira wáwwagi tam sù ira káruán nga lugár da ta napiá gapay yù ángngiddù naw, áнна kuruk gapay yù iniparámak mi nira nga meyanung nikayu.

9

Yù Meyannung sù Pangilimù nayù ira taga Korinto

¹ Á ammù gemma ta arák ku máwák nga iturá yù meyanung sù pangilimù naw sù ira wáwwagi tam nga manguruk nga taga Judiya. ² Ta yáyù nga ikáyá naw nga akkuán. Á iniráyò takayu sù ira taga Masidonia, ta kinagi nira, “Yù ira wáwwagi tam nga taga Akeya, tangaragunin ira nga napanán nga mangabbák.” Á pakarámak da sù kapattù naw nga mangabbák, aru nira gapay yù mapattù nga mangiyawá sù ángngabbák da gapay. ³ Á yáyù nga dobak ku laguk di Titò áнна yù ira duá nga wáwwagi tam nga kinagi nikayu, nga mangabbák nikayu, tapè dán nga napanán yù ilimù naw, á mepasingan ta kuruk gapay yù iniráyò nga meyanung sù kapattù naw nga mangiyawá.

⁴ Á sangaw nu umayá ta gián naw, nu aijan yù ira taga Masidonia nga mepulù níkan, á mepasiranán kami nakuan nu ari paga nonnuk yù ilimù naw, gapu ta kinagi mi nira ta napanánin. Á ari lâ sikami yù mepasiranán, nu ari gapay sikayu. ⁵ Á yáyù nga ninonò ku ta napiá nu papoluak ku yù ira tallu nga wáwwagi tam nga umay ta gián naw, nga mangabbák nikayu nga mamarán sù initabbá naw. Ta nu dán nga nonnuk lage mi lubbè, á mepasingan laguk ta kuruk nga mangiyawá kayu, nga ari megapu ta nakagumán kayu, ngam megapu galá sù ayá naw. ⁶ Á ipanonò ku nikayu yaw nga nakagi.

“Yù tolay nga baddi lâ yù bini nga imulá na, baddi lággapay yù gataban na.

Ngam yù tolay nga aru yù bini nga imulá na, aru gapay yù gataban na.”

⁷ Á sittam nga mangiyawá nga katággitádday, nonopan na laguk nu pígiá yù ikáyá na nga iyawá, tapè iyawá na megapu sù ayá na galá, nga ari gapu ta napuersá. Ta iddukan ni Namarò yù ira tatolay nga magayáyá nga mangiyawá. ⁸ Á makáwayyá gemma si Namarò nga mangiyawá ta ngámin nga máwák tam áнна matturù paga yù iyawá na, tapè aijan yù awayyá tam gapay nga mangisipá sù ira kábulut tam nga marigirigá. ⁹ Á yawe yù inipeturá ni Namarò nga meyanung sù tolay nga makállá.

“Á isinek na yù iyawá na,

ta abbágán na yù ira marigirigá.

Á awán ta áddè nayù napiá nga akkuán na, nga pangikállá na.”*

¹⁰ Á si Namarò yù mangiyawá ta bini sù tolay nga mammulá, áнна iyawá na gapay yù kanan na. Á iyawá na nittam gapay yù ngámin nga máwák tam, tapè unaru yù napiá nga pabbalinán nayù pangikállá tam, nga massamá sù ira kábulut tam nga marigirigá. ¹¹ Ta aru yù iyawá ni Namarò nittam, tapè aru gapay yù iyawá tam sù ira magáwák. Á sangaw nu ituluk mi yù ilimù naw nira, mepallá yù paddáyo ra kâ Namarò.

¹² Á kuruk nga napiá yù pabbalinán nayù pangiyawá naw sù ira wáwwagi tam nga magáwák, nga ari lâ ta mábbágán ira, nu ari gapay ta aru yù ira tatolay nga maddáyaw kâ Namarò megapu sù pangikállá naw. ¹³ Á yáyù nga aru yù ira tatolay nga mangiráyaw kâ Namarò megapu ta panguruk naw sù napiá nga dámak nga meyanung kâ Apu Kesu

* 9:9 Salmo 112:9

Kiristu, ána megapu gapay sù aru nga iniyawá naw nira ána yù ira ngámin nga káruán gapay. ¹⁴ Á ipakimi-imállà da kayu ána mepallà yù ayà da nikayu, gapu ta matákkilalád da ta nepallà yù pangikállà naw nira megapu sù allà ána ángngiddù ní Namarò nikayu. ¹⁵ Dayáwat tam laguk si Namarò megapu ká Apu Kesu Kiristu, nga Aná na nga iniyawá na nittam, nga rigálu na nga awán ta kárik piá na.

10

Yù Itabbák ni Pablo sù ira Mamaliwá kuna

¹ Á aijan nikayu yù ira nga makkagi ta tumulukà ta arubáng naw, ngam mapporayà nu aijanà ta arayyu. Á yáyù nga ikomá nikayu ta tángngagan naw lábbi yù kagiak ku, ta párigák ku yù katulù ní Apu Kesu Kiristu ána yù pagattam na ta pangituddu na sù ira tatolay. ² Á yáyù nga ikomá nikayu, ta tunungan naw yù akka-akkuán naw, tapè arák ku mawák nga mapporay sangaw nu umayà ta gián naw. Ta aringà maganássing nga makiarubáng nga maggammá sù ira mallillibá níkan, nga makkagi ta párigák ku yù ággangngúa nayù ira mokkuk nga ari manguruk ká Apu. ³ Á kuruk nga maggianá lá ta dabbuno, ngam arák ku párigán yù ággangngúa nayù ira tatolay ta dabbuno nga ari manguruk ká Namarò. Á ari yù baggi yù ikatalà ku ta pakikontará ta ngámin nga naráké nga mekontará ká Namarò. ⁴ Ngam ikatalà ku galá yù pakáwayyá ní Namarò ána yù ámmagaddátu na. Ta napanán si Namarò nga mangabbák sù ira mangikatalà kuna. Á yáyù nga appútam mi yù ngámin nga mekontará sù kuruk nga bilin ní Namarò, megapu sù pakáwayyá na nga neyawá níkami. ⁵ Á ta pangituddu mi, tabbagam mi yù ngámin nga kagian nayù ira tatolay nga ipanaki da sù bilin ní Namarò, ána appútam mi yù ira mappeddaráyaw. Á iriámi ní ngámin yù kegaggarán na nonò da, ána gammám mi yù notun nga ánonò da, tapè mánnámmuád da yù kuruk nga bilin ní Namarò, á mabbabáwi ira, nga manguruk gapay ká Apu Kesu Kiristu. ⁶ Á sikayu, kurugan naw laguk yù taddán ní Apu Kesu nga inipakánnámmù nikayu, tapè mepasingan ta kuruk nga manguruk kayu. Á nu aijan yù ira nga ari paga tumuttul sù taddán ní Apu, á napanán nga mamággáng nira.

⁷ Á kagian naw ta ammu naw yù tolay megapu sù masingan naw, ngam ari kuruk, ta ari masingan yù nonò na. Pasikkálan naw laguk yù nonò naw, á nu kagian naw ta sikayu yù tatole ní Apu Kesu Kiristu, á nonopan naw gapay ta sikami yù kunnay nikayu nga tatole na, nga sinullà na ta masserbi kuna. ⁸ Á mássiki nu pinatturù ku ta baddi yù kinagi nga meyanung ta pakáwayyá mi, á aringà mappasirán, ta kuruk nga iniyawá na níkami ní Apu yù pakáwayyá mi nga mangituddu sù bilin ní Namarò, nga ari ta gammám mi yù pangikatalà naw, nu ari galá ta abbágám mi kayu, tapè mapasigaggá yù pangikatalà naw. ⁹ Á yáyù nga initúrà ku nikayu, tapè arán naw kagian ta yá lá ipatturá ku tapè ananássing takayu. ¹⁰ Ta aijan garè níkayu yù ira nga makkagi ta “Kun na mengal si Pablo nu mattúrà, ta masirik yù itabbák na ána makáwayyá yù túrà na. Ngam nu makiarubáng nittam, á awán ta tattam na ána awán ta serbi nayù kagian na,” kud da. ¹¹ Á yù ira nga makkagi karannian, kánnámmuád da laguk ta tuppálak ku yù ngámin nga itúrà ku, sangaw nu umayà sù gián naw.

¹² Á sikami, arám mi ikáyá nga igittá yù baggi mi sù ira tatolay nga mangipeddaráyaw ta baggi ra lápay. Á igittá ra yù akka-akkuád da sù ággangngúa nayù ira kagittá ra, á kagiad da ta napiá ira ánnè sù ira kábulud da. Ngam arád da nonopan yù kuruk nga napiá nga kagian ní Namarò, á yáyù nga awán ta kánnámmuád da. ¹³ Ngam sikami, kagiam mi lá yù meyanung sù pattarabáku mi nga inipakuá ní Namarò níkami. Á arám mi patturutan yù kagiam mi, ta kagiam mi lá yù pangituddu mi nikayu, ta yáyù inipakuá ní Namarò níkami. ¹⁴ Á arám mi iturù yù kagiam mi, ta mepasingan ta pinalurò mi yù ipakuá ní Namarò níkami megapu sù panguruk naw. Ta sikami yù napolu nga minay nikayu nga mangilayalayá sù napiá nga dámak nga meyanung ká Apu Kesu Kiristu. Á arám mi sinippil yù pakáwayyá mi nga mangituddu nikayu.

¹⁵ Á arám mi iráyaw yù baggi mi ta meyanung sù tarabáku na tanakuán nga tolay, nga kunnay ta sikami yù namalurò kuna. Ngam iddanamám mi ta mapasigaggá yù pangikatalà naw ká Apu, tapè umaru laguk yù awayyá mi nga mangituddu sù ira káruán ta gián naw. ¹⁶ Á kabalin nayù pangilayalayá mi sù napiá nga dámak nga meyanung ká Apu Kesu ta gián naw, mánav kami sangaw, nga umay mangilayalayá ta tanakuán nga lugár gapay, nga awán paga ta mangituddu nira, tapè ari kami meparáyaw megapu sù kingngúa na tádday nga tolay, nga inipakuá ní Namarò kuna. ¹⁷ Á aijan yù netúrà, nga kun na, “Nu aijan yù tolay nga mappeddaráyaw, á awán laguk ta tanakuán nga ipeddaráyo na nu ari galá si Apu.”*

* 10:17 Jeremia 9:24; 1 Korinto 1:31

¹⁸ Ta mepasingan ta napiá yù tolay, ari megapu sù pangipeddaráyo na ta baggi na, nu ari galá megapu sù pangiráyo ni Namarò kuna.

11

Yù Meyannung sù ira Áppè Minángngilayalayâ

¹ Á parè bì ta attamán naw nga ginnán yawe nga kagiak ku nikayu, mássiki nu magubobugá nga kun na tolay nga awán ta nonò na. ² Ta iddukat takayu, nga kun na ána ku, á maburungá megapu nikayu, marakè mekattuay kayu sù panguruk naw kâ Apu Kesu. Á mangilin yù pangabubù nikayu nga kunnay ta pangabubu ni Namarò, gapu ta initarátu takayu kâ Apu Kesu Kiristu. Sikayu yù meyárik sù magingánay nga metarátu sù pakiatawán na. Á yáyù nga ikáyâ ku ta pareku nga napiá yù nonò naw. ³ Á yá ikaburung ku ta melogò kayu, á kurugan naw sangaw yù ari kuruk ána lonán naw yù ángngiddù naw kâ Apu Kesu Kiristu, nga kunnay kâ Abbò Eba ngaw, nga nelogò megapu sù passirisiri nayù iráw, nga si Satanas. ⁴ Ta ayatán kayin nga mamaddulò sù tolay nga umay nikayu mangilayalayâ sù tanakuán, nga ari si Apu Kesu Kiristu nga inilayalayâ mi nikayu. Ngattá, ta ginnán naw lâ yù ituddu na, mássiki nu ituddu na yù pangalawâ naw sù tanakuán, nga ari yù Mangilin nga Ikararuá nga naggapu kâ Namarò. Á ngattá, ta ginnán naw, mássiki nu tanakuán yù ilayalayâ na, nga ari negittá sù napiá nga dâmak, nga inituddu mi nikayu. Á yáyù nga maburungá nikayu, ta malogon kayu nga melogò garè.

⁵ Á ta urè, aringá nagukák ánnè sù ira minángngituddu nga minay nikayu, nga makkagi ta aggira yù kátannangán nga minángngilayalayâ. ⁶ Á mássiki nu aringá tamma malaláki nga magubobuk, ngam ari makúrang yù ammu nga meyannung sù kuruk nga bilin ni Namarò, á yáyù inipakánnámmù nikayu, megapu sù ngámin nga inipasingak ku ána kinagi nikayu.

⁷ Á áddè ngaw keggá ta gián naw nga mangituddu sù bilin ni Namarò, aringá bulubugá nakitáddán nikayu, ta tanakuán yù pangápák ku ta pakkatolè. Á liwâ ku panò, nga kunnay ta pinagukák ku yù baggi gapu ta pangilayalayâ ku nga arán naw pagán? ⁸ Á pangituddù nikayu, kunnay ta kinokoták ku yù ira mangikatalá kâ Apu Kesu nga maggían ta tanakuán nga lugár da, gapu ta aggira yù mangiyawá nikán ta máwák ku, á ta arák ku ira nasserbián, nu ari galá sikayu. ⁹ Á mássiki nu nagáwágá ta keggá nikayu, arát takayu bulubugá nakkiddawán. Ta limibbè yù ira wáwwagi tam nga taga Masidonia, á aggira yù nangiyawá nikán ta ngámin nga awágak ku. Awán ta kiniddò nikayu, á arák ku bulubugá kiddawan nikayu, tapè ari kayu majjigá megapu nikán. ¹⁰ Á kuruk yù ipakánnámmu ni Apu Kesu Kiristu nikán, aggina nga mepulupulú nikán. Á yáyù nga kuruk gapay yù kagiak ku nikayu. Awán ta tolay sù purubinsia na Akeya nga makagammá sawe ipeddaráyo. Ta aringá bulubugá mangá sù pakkatolè nikayu.

¹¹ Á parè bì ta arán naw kagian ta arát takayu iddukan, gapu ta arák ku apan yù pakkatolè nikayu. Ta ammu na gemma ni Namarò ta kukurugán nga iddi-iddukat takayu! ¹² Á uputak ku yù akka-akkuák ku, tapè awán ta awayyá nayù ira áppè minángngilayalayâ nga makkagi ta negittá yù akka-akkuád da sù ággangguá mi. Ta ari gemma kuruk, gapu ta táddanán naw ira. Ngam sikami, arán naw kami táddanán.

¹³ Á danniaw ira nga mangituddu nikayu, mangilogò ira nga massirisiri ta meyannung sù tarabáku ra. Áppè minángngilayalayâ ira, nga mattá-ábbilinán, á ari kuruk yù kagiad da nga sinullá na ira ni Apu Kesu Kiristu. ¹⁴ Á ari ittam mapállá sù pangilogò da. Ta mássiki si Satanas, luttuák nga maddalingaráng nga kun na daroban ni Namarò. ¹⁵ Á yáyù nga ari makapállá nu mappasingan yù ira áppè pípiá nga masserbi kâ Satanas nga kunnay sù ira daroban nga masserbi kâ Namarò. Á pagikaruan ni Namarò yù ira áppè pípiá ta meyannung sù kingguá ra sangaw nu pagáddékán na ággaw.

Yù Meyannung sù Pagattam ni Pablo

¹⁶ Á pidduák ku má nga ikomá nikayu ta arán naw kagian ta maguyungá, megapu sù kagiak ku. Ngam mássiki nu kagian naw ta ulapángá, á parè bì ta attamán naw nga ginnán yù ipeddaráyo. ¹⁷ Á yù kagiak ku kunangan, arán na inipakuá nikán ni Apu Kesu Kiristu yù pagubobuk ku karanniaw, nu ari galá ta kun nangá na ulapá nga magubobuk. ¹⁸ Á gapu ta aru yù ira nga mappeddaráyaw ta meyannung ta akkuád da ta dabbuno, á ipeddaráyo gapay laguk yù baggi ta baddi. ¹⁹ Ta ari panò kuruk nga aru yù ammu naw, gapu ta magayáyâ kayu nga magattam sù ira nga kun na ulapá yù pagubobuk da? ²⁰ Á mássiki nu aripanad da kayu, ána darogatat da kayu, á ngattá, ta attamán naw lá! Á ilogò da kayu, ána iluddè da kayu, ána lappágad da kayu! Ngattá laguk ta attamán naw yù narákè nga

akkuád da! ²¹ Á kuruk yù kagiak ku nikayu, nga ari kunnian yù akkuám mi nikayu, ta mappasírán kami nga mangngúá karannian nga naráké nikayu.

Ngam nu aijan yù awayyá ra nga mappeddaráyaw, maguray lá yù ipeddaráyo ra, á aijan gapay yù awayyá nga makkagi, mássiki nu kun nangà na ulapá nga magubobuk. ²² Á ipeddaráyo ra yù baggi ra, ta Kudio ira nga mangngágan ta Kebru. Á Kebrungà gapay gemma. Á nu iráyo ra ta aggira yù ginaká ni Kákay Israel, á ginaká nangà gapay ni Kákay Israel. Á aggira yù ginaká nayù ngaw Kákay Abrakam, á síkán gapay gemma yù ginaká ni Kákay Abrakam. ²³ Á kagiad da ta masserbi ira ká Apu Kesu Kiristu. Á mássiki nu kunnayá ta maguyung ta pagubobuk ku karanniawe, á appútak ku ira ngámin, ta aru yù tarabákù ta passerbi ká Apu Kesu Kiristu ánnè nira. Á más napiá yù passerbi ká Apu ánnè nira, áнна aru yù iniyattam ku. Ta name-arungà nga nagattam sù kebáluk ku megapu sù pattarabákù ká Apu. Á nameppígíangà nga nagattam ta pamalalpalù da áнна pamaligà da níkan. Á name-arungà nga nagisassay natay.

²⁴ Á namellímá yù pamaligà da níkan nayù ira kagittá nga Kudio, ta taggitalupulu ta siám. ²⁵ Á namillu gapay nga pinalalpalù dangà. Á sù tádday nga ili, pinayáng dangà ta batu. Á namillu yù pattakè ta biray, nga nabbaggiu ta bebay, á natáttá yù nattakayák ku. Á tangággaw áнна tangagabingà nga nappátaw. ²⁶ Á sigídangà nga magala-ali nga mangilayalayá, á aru yù jigá nga nesimmu níkan ta pallakalakák ku. Naparubák ku gapay yù kalítu na dabbun, yù pangngúá ra níkan nayù ira tulisán, yù akka-akkuán nayù ira kagittá nga Kudio níkan áнна yù akka-akkuád da níkan gapay nayù ira ari Kudio. Á jinigirigá dangà sù ira ili, áнна ta kalállammatán. Á ta pattakè ta biray, narigirigáká má ta paggiám mi ta tangngá na bebay. Áнна jinigirigá dangà gapay nayù ira áppè manguruk.

²⁷ Á aringá nalurá sù pattarabákù, mássiki nu sigídangà mabannák, tapè aijan yù ipangá ku ta ipakkatolè, á nepatalugáring ta aijan yù awayyá nga mangilayalayá sù napiá nga dámak. Á name-arungà nga natturá ta tangagabi. Á inattamák ku lá nu nabisinà onu napangalá, gapu ta name-aru nga awánà ta kanan. Á inattamák ku lá nu malumminà, nga awán ta gámi ku áнна pallirumák ku. ²⁸ Á ari lá dannian yù attamák ku nu ari gapay ta sigídangà maburung nga mannononò nu kunnasi yù ángngabbák ku sù ira mangikatalá ká Apu nga maggagammung ta ngámin nga lugár, nga iddi-iddukak ku. ²⁹ Á egga panò yù tolay nga makapi yù pangikatalá na ká Apu, á arák ku nakuan matagená yù kakapi na? Ta nepallá yù daddam ku nu aijan yù nekáttuay sù panguruk na ká Apu áнна makaliwá.

³⁰ Á manakiká nakuan nga mangipeddaráyaw, ngam gapu ta nakagumánà, á yáyù nga mangipeddaráyawá, ngam ari megapu sù pakáwayyá, nu ari galá megapu sù pakkapiyák ku, tapè mepakánnámmu yù pakáwayyá ni Apu Kesu Kiristu, nga paggapuán nayù pakáwayyá. ³¹ Á si Namarò, nga Yáma ni Apu Kesu Kiristu nga Yápu tam, ammu na ta kuruk yù ngámin nga kagiak ku. Á aggina yù meparáyaw ta áddè ta áddè. ³² Á yawe nga nesimmu níkan sù paggiák ku ngaw paga ta ili na Damasku yù pangipasinganán nayù pakkapiyák ku. Ta yù gubinador nga sinullá ni Patul Aretas, jinok na yù ira suddálu na nga magguárdiá sù áttallungán nayù ili, tapè gaputad dangà, nu mánawá. ³³ Ngam aijan yù ira nangabbák níkan, á iná da yù mallakay nga basket, á nappittaká kuna. Á inayáyud dangà ta lawán sù bintá nayù atannáng nga jijjing nga batu, nga alítu na ili, á inipagukák dangà. Á yáyù nga nakatammangà sù gubinador.

12

Yù Inipasingan ni Namarò áнна Inipalappá na ká Pablo

¹ Á mássiki nu ammu ta awán ta serbi nayù pappeddaráyò, á gapu ta kagumánan nawá, yáyù nga kagiak ku laguk yù inipasingan ni Apu Kesu áнна inipalappá na níkan. ² Nappasángin yù mapulu ta appá nga dagun áddè ngaw kesimmu na níkan. Á neyángayá ngaw ta lángi ta gián ni Namarò, á arák ku ammu nu neyángay yù ikararuá, onu naggiánà paga ta baggi ta keyángè tán. Si Namarò lá yù makánnámmu. ³ Yá lá ammu, ta neyángayá ta lángi ta paggianán ni Namarò, ngam si Namarò lá yù makánnámmu nu aijanà ta baggi ta keyángè ta gián na.

⁴ Á keggá ta gián ni Namarò ta lángi, naginná yù aru nga makapállá nga ari mepalappá ta ággubobuk na tolay, áнна ari meyanugù gapay nga ubobugan na tolay. ⁵ Á nu ikáyá ku mappeddaráyaw, á ipeddaráyò nakuan yù ángè ta lángi áнна yù naginná. Ngam ipeddaráyò galá yù ira pakkapiyák ku. ⁶ Á mássiki nu ikáyá ku nakuan mappeddaráyaw, á aringá gemma maguyung, ta kuruk nga nesimmu yù ngámin nga kagiak ku. Ngam aringá mappeddaráyaw,

maraké matturù yù paddáyo nayù ira tatolay nikán. Á napiá ta urè nu kemámmatád dangà megapu galá sù masingad da nga akka-akkuák ku, ámma yù maginná ra nga pangituddù nira.

⁷ Á gapu ta aru yù ira makapállà nga inipasingan ni Namarò ámma inipalappà na nikán, á yáyù nga inanugù na ta majjigákà, megapu sù akkuán na nikán nayù daroban ni Satanas, tapè ari motun yù nonò ku, ámma aringà matturù nga mappeddaráyaw. ⁸ Á namillungà nga nakimállà kà Apu Kesu ta irián na yù pajjigà ku. ⁹ Ngam kinagi na nikán, “Máwák mu lá ta abbágát taka megapu sù ángngikállà ku nikaw, tapè meyattam mu yù ngámin nga jigà nga umay nikaw. Á mepasingan ta napiá yù pakáwayyâ nu nakapi ka,” kun na nikán. Á yáyù nga magayáyákà nga mappeddaráyaw megapu sù pakapíyák ku, tanu nakapingà, aijan yù pakáwayyâ ni Apu Kesu Kiristu nga mangabbák nikán. ¹⁰ Á yáyù nga magayáyákà, maguray lá yù mesimmu nikán, nu makapingà, onu pakkakagiád dangà, onu marigirigákà, onu akkuád dangà megapu sù pangilayalayá ku kà Apu Kesu Kiristu, onu matakikà. Ta nu makapingà, pasikanan nangà ni Apu Kesu Kiristu, á yáyù nga mepasingan ta kuruk nga masikanà megapu sù pangabbák na nikán.

Yù Kaburung ni Pablo sù ira taga Korinto

¹¹ Á kunnayà ta ulapà gapu ta pappeddaráyò, ta kinagumán nawà. Ngam sikayu nakuan yù makimoray nikán, nga makkagi ta kuruk nga meyanung nikán. Á yù ira áppè minángngilayalayá, ari ira gemma makáwayyâ ánnè nikán, mássiki nu awán ta pakáwayyâ. ¹² Á keggà ta gián naw, inattamák ku yù ngámin nga jigà nga minay nikán, tapè palurotak ku yù ipakua ní Namarò nikán. Á nasingan naw yù ngámin nga makapállà nga pinagaddátu ni Namarò megapu nikán, nga panákkilalán ta sikan yù kuruk nga minángngilayalayá nga sinullà na. ¹³ Á anni panò yù liwá ku nikayu? Ta arát takayu gemma inirumá sù ira ngámin káruán nga wáwwagi tam nga mangikatalà kà Apu, nga maggagammung ta tanakuán nga lugár. Ngam yá lá nangirumák ku nikayu yù arák ku pakitáddán nikayu. Á nu liwá ku yian, á pakomán nawà bi laguk!

¹⁴ Á naporánà nga umay nikayu mattúllun, á yawe yù mekatallu nga ángè pattúllun nikayu. Á nu umayà sangaw nikayu, aringà makkiddaw nikayu, tapè ari kayu marigirigà megapu nikán. Ta ari yù kukuá naw yù alerak ku, nu ari galá sikayu nga mangikatalà ámma mangiddù kà Apu Kesu. Ta sikayu yù kun na ána ku. Á ari nakuan yù ira ábbing yù mamarán nga mangiyawà ta máwák nayù ira darakal da, nu ari galá yù ira mappataganà yù mangiyawà ta máwák nayù ira ána da. ¹⁵ Á yáyù nga magayáyákà nga mangiyusá ta ngámin nga aijan nikán ámma yù baggi gapay, mássiki nu metapilá megapu nikayu, tapè mábbágát takayu, á mapasigaggà yù pangikatalà naw. Á nu mappanà yù ángngiddù ku nikayu, malurá kayu panò nga mangiddù nikán?

¹⁶ Á ammu naw ta kuruk nga aringà nikayu nakitáddán, ngam aijan galá nikayu yù ira makkagi ta inilogò takayu ámma jinarogà takayu. ¹⁷ Á yù ira jinok ku nikayu, jinarogà da kayu panò? Ari gemma! Ammu naw ta awán ta inà da nikayu, ámma arád da kayu inilogò. ¹⁸ Á jinok ku si Titò ta umay mattúllun nikayu, nga nepulù sù tádday nga wagi tam. Á jinarogà da kayu panò? Ari gemma! Ta matunung yù ngámin nga kingnguá di Titò ámma napiá yù nonò da. Á keggà mi ta gián naw, negittá yù nonò mi ámma ággangnguá mi ta nonò da ámma ággangnguá ra.

¹⁹ Á kagian naw támma ta iyígù ku yù baggi megapu sù kinagi. Ngam ubobugak ku lá ta arubáng ni Namarò yù ipeyubobuk ni Apu Kesu Kiristu nikán, tapè mábbágát takayu, sikayu nga iddukak ku, tapè mapasigaggà yù pangikatalà naw kà Apu. ²⁰ Á maburungà, maraké aringà magayáyâ sangaw nu umayà sù gián naw, gapu ta marángnganát takayu nga mangnguá sù arák ku ikáyâ. Á nu kunnian yù akkuán naw sangaw nu lubbekà, á ari kayu gapay magayáyâ nu masingan nawà, gapu ta mapuersángà nga mangammá nikayu. Ta yá ikaburung ku nu maratang ku yù ira maddaráma, onu yù ira mangabubu ámma mamassil, onu yù ira makkakáporay, onu yù ira magukkuk, onu yù ira mallillibâ, yù ira mabbebbek, onu yù ira mappeddaráyaw, onu yù ira makusukusu. ²¹ Á maburungà, maraké mepasiránà kà Namarò sangaw nu umayà ta gián naw, megapu sù narákè nga akka-akkuán naw. Á maraddamà laguk, nga mappanà yù daddam ku megapu sù ira nakaliwâ ngaw, nga ari paga nababáwi sù narákè nga ággangnguá ra, nga pangarallo ra ámma yù panuppál da ta pakkaragà nayù baggi ra nga narákè.

13

Yù Naporíán nga Taddán ni Pablo sù ira taga Korinto

¹ Á mekatallu yù ángè ta gián naw sangaw nu et takayu tullúnán. Á nu aijan yù mangikeká ta kabbulun na sangaw, á ammu naw yù taddán ni Namarò nga netúrâ, ta máwák yù duá onu tallu nga tolay gapay nga massistígu ta kuruk yù kagian nayù mangikeká.* ² Á sù ngaw mekaruá nga pattúlluk ku nikayu, sinaddánák ku yù ira nakaliwâ ngaw ána sikayu ngámin. Á kunangane pidduák ku má nga kagian pángè ku umay. Nu arád da paga nilikuranán yù narákè nga akka-akkuád da, á sangaw nu lubbekà sù gián naw, pággangak ku ira. ³ Á gapu ta ikáyâ naw yù panákkilalán naw ta kuruk nga si Apu Kesu Kiristu yù nanullà níkán, á yá ipamakuruk ku nikayu ta pággangat takayu sangaw megapu sù pakáwayyâ ni Apu Kesu Kiristu. Ta ari makapi si Apu, nu ari galâ makáwayyâ nga manuddu nikayu. ⁴ Á mássiki nu kunnay ta nakapi si Apu Kesu sù pangipátâ da kuna ta kurú, á matolay galâ megapu sù pakáwayyâ ni Namarò. Á sikami nga minángngilayalayâ nga sinullà na, makapi kami gapay nga kunnay kâ Apu Kesu, megapu sù ketádde mi kuna. Ngam umay kami sangaw ta gián naw, á nu máwák nga pággangam mi kayu nakuan, á masingan naw kami nga makáwayyâ gapay, gapu ta mesipâ kami sù áttolè ni Apu Kesu Kiristu megapu sù pakáwayyâ ni Namarò.

⁵ Á pasikkálan naw laguk yù nonò naw ána akka-akkuán naw, nu kuruk nga mangikatalâ kayu kâ Apu Kesu. Á arán naw panò ammu ta aijan nikayu si Apu Kesu Kiristu? Kuruk nga aijan nikayu, nu ari kayu áppè mangikatalâ. ⁶ Á yá iddanamáku, ta gapu ta mepasingan ta kuruk nga mangikatalâ kayu kâ Apu Kesu, á kánnámmuán naw gapay laguk ta aijan si Apu Kesu gapay nikami ána kuruk nga sinullà na kami ni Namarò nga mangilayalayâ kuna. ⁷ Á yawe ipakimállâ mi kâ Namarò, ta mepasingan sangaw nga nattukkákin yù narákè nga akkuán naw, tapè awán ta máwák mi nga mamággáng nikayu. Ta yawe yù kuruk nga ikáyâ mi, ari ta mepasingan yù pakáwayyâ mi, nu ari galâ ta akkuán naw yù napiá, mássiki nu ari mepasingan yù pakáwayyâ mi nga mamággáng nikayu. ⁸ Á nu akkuán naw lâ yù napiá, arám mi máwayyâ nga ipasingan yù pakáwayyâ mi nga mamággáng nikayu. Ta ari kami makikontará nikayu nu kurugan naw yù kuruk nga napiá, ta abbágám mi yù ira nga manguruk sù kuruk nga bilin ni Namarò.

⁹ Á yáyù nga magayáyâ kami, nu awán ta máwák mi nga mamággáng nikayu, mássiki nu mebiláng kami ta makapi. Ta ayatán kami galâ nu napiá lâ yù ángnguruk naw kâ Apu Kesu. Á yawe yù kuruk nga ikáyâ mi ána ipakimállâ mi kâ Apu, ta mangáppípiá kayu. ¹⁰ Á iníturâ ku yawe nikayu pángè ku umay, tapè arák ku máwák nga ipasingan yù pakáwayyâ nga mamággáng nikayu, sangaw nu lubbekà sù gián naw. Ta iniyawâ na níkán ni Namarò yù pakáwayyâ, ari ta darálat takayu nu ari galâ tapè mábbágát takayu, tapè mapasigaggâ yù pangikatalâ naw kuna.

¹¹ Á wáwwagi, yawe paga laguk yù kagiak ku nikayu ta kabalin na yaw túrá ku. Ipe naw yù urâ naw nga manuppál sù ngámin nga ipakuá ni Namarò nikayu. Á tángngagan naw yù taddák ku nikayu ána pattatáddayan naw yù nonò naw, tapè ari kayu maddaráma. Magayáyâ kayu laguk nga mepagimammâ. Á maggián laguk nikayu si Namarò, nga minángngiddù ána mamagimammâ nikayu. ¹² Á nu maggagammung kayu, ipasingan naw yù pakimore naw ána yù ángngiddù naw sù ira kábulun naw, gapu ta mawwawági kayu kâ Apu Kesu Kiristu. ¹³ Á yù ira ngámin nga kábuluk ku saw, kagiad da ta manonò da kayu, á parè bì ta napiá yù ággián naw. ¹⁴ Á yawe ipakimállâ ku kâ Namarò megapu nikayu, ta sigídâ naw matagenâ yù pangikállâ ni Apu Kesu Kiristu ána yù pangabbák na nikayu, á parè bì ta makkaká-iddù kayu megapu sù ángngiddù ni Namarò nikayu, ána napiá yù ákkiwagi naw megapu sù Mangilin nga Ikararuá nga aijan nikayu.

* 13:1 Deuteronomio 19:15

Yù Túrâ ni Pablo sù ira Manguruk nga taga Galasia

Yù Meyannung sawe Túrâ

Pangilayalayâ ni Pablo sù napiá nga dámak sù ira ari Kudio, aru yù ira nga nanguruk. Á aijan yù ira Kudio nga minay mangituddu nira ta máwák da tuppálan yù tunung ni Moyses, tapè mesipà ira sù ira tatole ni Namarò. Á yáyù nga iníturâ ni Pablo sù ira tatolay ta purubinsia na Galasia, tapè panolian na ira ta panguruk da sù napiá nga dámak. Á yawe yù kebalinán nayù napiá nga dámak, ta sittam ngámin, mássiki nu Kudio onu ari Kudio, meyígù ittam galá megapu sù pangikatalâ tam kê Apu Kesu Kiristu, nga netapil megapu nittam.

Á si Namarò yù nanullâ kê Pablo ta umay mangilayalayâ sù ira ari Kudio. Á yù ira olu nga minángxilayalayâ nga naggián ta Jerusalem, magayáyâ ira megapu sù pangilayalayâ ni Pablo ta gián nayù ira ari Kudio. Á yáyù ipanonò ni Pablo sù ira taga Galasia, tapè ammu ra ta aijan yù pakáwayyâ na, ána tángxagad da yù kagian na, marakè mekátuay ira sù napiá nga dámak.

Yù Mayán nayù Túrâ

Táttáddy lâ yù Napiá nga Dámak (1:1-10)

Yù Panullâ ni Namarò kê Pablo (1:11-24)

Yù Pakáwayyâ ni Pablo ána yù ira Káruán nga Minángxilayalayâ (2:1-21)

Mesipâ ittam kê Namarò megapu galá sù Pangikatalâ tam kê Apu Kesu Kiristu (3:1-14)

Yù Initabbâ ni Namarò kê Abrakam ána yù Tunung na (3:15-29)

Pataganatán na ittam ni Namarò (4:1-7)

Maburung si Pablo sù ira taga Galasia (4:8-20)

Yù Keyarigán nayù ira Duá nga Tarátu ni Namarò (4:21-31)

Napalubbáng ittam, tapè Makkakâ-iddù ittam (5:1-6:10)

Yù Kabalin nayù Túrâ (6:11-18)

¹ Sikán si Pablo, nga minángxilayalayâ. Á ari gemma tolay yù naggapuán nayù pakáwayyâ nga mangilayalayâ kê Apu Kesu. Ngam yù ira nga nanullâ níkan di Apu Kesu Kiristu ána si Namarò nga Yáma na nga namaginannolay kuna. ² Á sikami ána yù ira ngámin saw níkan nga mangikatalâ kê Apu Kesu, mattúrâ kami níkayu nga wáwwagi mi nga maggagammung ta ngámin nga ili sù purubinsia na Galasia. ³ Á parè bi ta napiá lâ yù ággigián naw ána gawagawáyán naw, ána magimammâ kayu, megapu ta pangikállâ da níkayu di Namarò nga Yáma tam kê Apu Kesu Kiristu nga Yápu tam. ⁴ Ta inítapil ni Apu Kesu Kiristu yù baggi na megapu nittam, tapè ikáru na yù liwiliwâ tam, ána iyígù na ittam, ta yáyù ure ni Namarò nga Yáma tam. Á gapu ta pagikáru ni Apu Kesu ta liwiliwâ tam, á pinakomá ni Namarò ittam, á kunnay ittam ta napalubbángin, tapè likuránát tamin yù ngaw narakè nga ággangnuá tam nga negagángay ta tolay ta dabbuno. ⁵ Dayáwat tam laguk si Namarò, nga meparáyaw ta áddè ta áddè nga awán ta áddè na. Á mapalurò yaw. Ammán.

Táttáddy lâ yù Napiá nga Dámak

⁶ Mapállákâ sù akka-akkuán naw, ta nabì kayu lâ paga nga nanguruk, á ngattá, ta likuránán nawin si Namarò, nga nagágál níkayu megapu sù allâ ni Apu Kesu Kiristu? Á tángxagan nawin yù tanakuán nga ituddu ra, nga kagiad da ta napiá nga dámak, ngam ari gemma. ⁷ Ta awán gemma ta tanakuán nga napiá nga dámak, nu ari lâ yù kuruk nga inituddu mingin níkayu. Ngam aijan garè yù ira umay mamuruburion níkayu, á ikáyâ da nga patalián yù napiá nga dámak nga inituddu mi nga meyannung kê Apu Kesu Kiristu. ⁸ Ngam ari gemma mapatalián, á nu aijan yù mangilayalayâ ta tanakuán nga ari negittá sù inilayalayâ mi níkayu, á mokum yian. Mássiki nu sikami nakuan onu yù daroban nga naggapu ta lángi yù mangilayalayâ ta tanakuán, á ukuman ni Namarò. ⁹ Á yawe nga kinagi mi ngaw níkayu, pidduák ku má nga kagian, ta mássiki nu asinni yù tolay nga mangilayalayâ ta tanakuán, nga nerumá sù napiá nga dámak nga kinuruk naw ngaw megapu sù pangilayalayâ mi, á megagek yù tolay, ta pagikaruan ni Namarò ta impiernu.

¹⁰ Á gapu ta kunnian yù pakkagi níkayu, awayyâ naw panò nga makkagi ta alerak ku yù paddáyo nayù ira tatolay níkan? Ari! Ari gemma yù ira tatolay yù ikáyâ ku nga pagayáyan megapu sù pangilayalayâ ku, nu ari galá si Namarò. Á nu alerak ku nakuan yù paddáyo nayù ira tatolay, aringakin laguk nakuan masserbi kê Apu Kesu Kiristu.

Yù Panullâ ni Namarò kê Pablo

¹¹ Á wáwwagì, yaw ipakánnámmù nikayu, ta ari naggapu sù nonò na tolay yù napiá nga dámak nga ilayalayá ku. ¹² Á ari tolay yù nakagigiámmuák ku sù napiá nga dámak, ta awán gemma ta nangituddu níkán, nu ari galá ta si Apu Kesu Kiristu yù nangipalappá níkán.

¹³ Á narámak naw gemma yù ngaw kustombarè ta panuttul ku sù rilision na Kudio, ta jinigirigá ku yù ira manguruk ká Apu Kesu, á nerallá yù panigirigá ku nira. Á inigagángè ngámin ira nga talamánan. ¹⁴ Á síkán yù kátannangán nayù ira kábuluk ku nga Kudio nga naggigiámmu sù rilisiod da, ta pinatuppál ku yù ngámin nga kustombare na Kudio nga inituddu nayù ira naggaká níkami.

¹⁵ Á gapu ta nepallá yù allá ni Namarò níkán, sinullá nangà sù ngaw aringá paga neyaná, á inagálán nangà, tapè masserbingá kuna. ¹⁶ Á yáyù nga pinalappá ni Namarò níkán si Apu Kesu nga Aná na, tapè ek ku ilayalayá sù ira makkakerumá nga ari Kudio. Á awán ta tolay nga nakitudduák ku. ¹⁷ Á mássiki yù ira napolu nga sinullá ni Namarò nga mangilayalayá, aringá nakituddu nira. Aringá minay ta giád da ta Jerusalem, ngam naddaretiungá nga nánaw nga minay nakipaggián ta Arabia. Á pánò ta Arabia, nattolingá ta Damasku.

¹⁸ Á pappasá na talluragun, gimiononá ta Jerusalem, ta minayá nakiammu ká Eduru. Á duá liguán lá yù paggiák ku kuna. ¹⁹ Ngam arák ku nasingan yù ira káruán nga mapulu duá nga minánggilayalayá, ngam si Ime lá, nga urián ni Apu Kesu. ²⁰ Á kuruk yawe ngámin itúrâ ku nikayu, á si Namarò yù massistígu ta aringá massiri.

²¹ Á ta pánò ta Jerusalem, minayá ta lugár na Siria ána Silisia. ²² Á yù ira káruán nga manguruk ká Apu Kesu nga maggián ta ili na Jerusalem ána yù ira manguruk nga maggián ta purubinsia na Judiya, arád dangà paga nasingan. ²³ Á narámak da lá yù meyannung níkán, nga kud da, “Yane tolay nga nanigirigá ngaw sù ira mangikatalá ká Apu Kesu, á kunangane, nabbabáwi ngin, á ilayalayá na gapay ta máwák nayù ira tatolay nga mangikatalá ká Apu Kesu.” ²⁴ Á pakarámak da karannian, jináyo ra si Namarò megapu sù pabbabáwi ána yù pangikatalá ku ká Apu Kesu.

2

Yù Pakiubobuk di Pablo sù ira Minánggilayalayá

¹ Á mapulu ta appá nga dagun yù napasá pángè ku má minay ta Jerusalem. Á sikami ká Bernabe yù minay, á inipulù mi si Titò. ² Á yá iniyángè, gapu ta inipalappá ni Namarò níkán ta máwák ku nga umay, tapè ibukalák ku sù ira kátannangán yù bilin na nga inilayalayá ku sù ira ari Kudio. Á yù ira kátannangán lá yù nakiubobugák ku, tapè pattatáddayam mi yù nonò mi ta meyannung sù ituddù, marakè awán ta serbi nayù tarabákù, nu arád da nakuan ikáyâ. ³ Á iniyangugù da yù ngámin nga ituddù, mássiki yù ituddù nga ari máwák nga tuppálan nayù ira ari Kudio yù tunung mi nga Kudio. Ta Gareko gemma si Titò nga kabbuluk ku, ngam arád da pinuersá ta mappakugi. ⁴ Ngam yù ira áppè makiwagi, minay ira nakipaggammung níkami tán, tapè sisímád da kami. Á kagumánad da kami nakuan, ta kugitad da nakuan si Titò, ta ipatuttul da nittam nakuan yù tunung na Kudio, tapè megaggak ittam nakuan nga kunnay ta aripan, mássiki nu kuruk nga napalubbáng ittamín megapu sù pangikatalá tam ká Apu Kesu Kiristu. ⁵ Á arám mi gemma bulubugá initulù nira, mássiki nu baddi lá, tapè ari malannapán ta siri yù kuruk nga napiá nga dámak nga meyannung ká Apu Kesu, nga ilayalayá ku nikayu nga ari Kudio.

⁶ Á yù ira nakiubobugák ku ta Jerusalem, neparámak ira ta kátannangán, ngam arák ku ira inirumá, ta arán na ira gemma irumá ni Namarò. Á awán ta kinagi ra nga liwá ku ána arád da linnapán yù ituddù. ⁷ Ta nánnámmuád da ta sinullá nangà ni Namarò nga umay mangilayalayá sù napiá nga dámak nga meyannung ká Apu Kesu sù ira ari Kudio, ta kunnay ta panullá na gapay ká Eduru nga mangilayalayá sù napiá nga dámak sù ira Kudio. Á yáyù nga inanugù da yù ngámin nga bilik ku. ⁸ Á si Namarò yù mangabbák ká Eduru sù pangilayalayá na sù ira Kudio, ána aggina lá yù mangabbák níkán gapay sù pangilayalayá ku sù ira ari Kudio.

⁹ Á di Ime kári Eduru ká Kuan, nga kátannangád da, pakánnámmu ra ta si Namarò yù nanullá níkán, inalímánu ra kami ká Bernabe, gapu ta magayáyá ira ta mattatádday kami nga mattarabáku ká Namarò. Á nattatádday yù nonò da ána yù nonò mi, ta sikami ká Bernabe yù umay mangilayalayá sù ira ari Kudio ána aggira yù umay mangilayalayá sù ira Kudio. ¹⁰ Á yá lá inipanonò da níkami yù ángngabbák mi sù ira pobare nga manguruk ká Apu, nga maggián ta Jerusalem, á ayatáná ta yáyù gemma gapay yù ikákáyá ku nga akkuán.

Yù Paggamá ni Pablo ká Eduru

¹¹ Á paggiám mi ta ili na Antokia, minay gapay si Eduru ta Antokia, á aijan yù kingnguá na nga ari napiá. Á yáyù gimamá ta arubáng nayù ira tatolay. ¹² Á kunniaw yù kesimmu na. Ta kalalabbè ni Eduru ta Antokia, á napiá là yù kingnguá na, ta minay nakilálláng sù ira ari Kudio, nga wáwwagi tam megapu sù panguruk tam kê Apu Kesu. Ngam labbè nayù ira Kudio nga jinok ni Ime, nga naggapu ta Jerusalem, á pinatalián ni Eduru yù kustombare na, á aringin napiá yù kingnguá na, ta aringin nakilálláng sù ira manguruk nga ari Kudio, gapu ta assing na sù ira Kudio nga taga Jerusalem, nga tumuttul sù kustombare na Kudio. Ta mepugik nga mepalálláng yù ira Kudio sù ira tatolay nga ari nakugi. Á kagiad da garè ta máwák nga mappakugi yù ira nga ari Kudio, nu ikáyá da makitádday nira. ¹³ Á yù ira káruán nga Kudio nga maggián ta Antokia, nga manguruk kê Apu, pakasingad da sù kingnguá ni Eduru, mássiki nu ammu ra ta ari napiá, ngam pinárigád da gapay yù kingnguá na nga áppè pípiá, ta nattukkâ ira gapay nga nakilálláng sù ira ari Kudio. Á mássiki si Bernabe nga kapulú ku, á nekanâ nira gapay, ámma aringin nakilálláng sù ira ari Kudio. ¹⁴ Á pakasingak ku ta mekátuuay ira sù kuruk nga bilin ni Namarò nga inipalappá na nittam nga meyanung sù kepattatádde tam, á nakiubobugá kê Eduru ta arubáng nayù ira ngámin nga manguruk. Á kinagi kuna, “Eduru, mássiki nu kuruk nga Kudio ka, ngam nilikuránám min gemma yù kustombare na Kudio, tapè mepattatádday ka gapay sù ira wáwwagi tam nga ari Kudio nga manguruk kê Apu. Á ngattá laguk, ta ipatuttul mu nira yù kustombare tam nga Kudio nga nilikuránát tam?” kuk ku kê Eduru.

Meyígù ittam nga Mesipà kê Namarò megapu galá sù Pangikatalà tam kê Apu Kesu Kiristu

¹⁵ Á sikami, Kudio kami gemma, nga nakeyanatám mi yù kustombare mi nga Kudio. Á yáyù nga nerumá yù ággiám mi sù ággián nayù ira ari Kudio. Á ibiláng mi ta nakaliwá yù ira ari Kudio, gapu ta arád da ammu yù tunung mi ámma yù kustombare mi nga Kudio. ¹⁶ Ngam ammu mi gapay ta mapakomá yù ira ngámin nga tatolay ámma mebiláng ira ta matunung ta arubáng ni Namarò megapu galá sù pangikatalà da kê Apu Kesu Kiristu. Á awán bulubugá ta tolay nga matunung megapu ta panuppál na sù tunung, ta awán gemma ta makatuppál sù tunung. Á yáyù nga sikami nga Kudio, ikatalà mingin gapay si Apu Kesu Kiristu, tapè pakomán na kami ni Namarò ámma ibiláng na kami ta matunung ta arubáng na, megapu sù pangikatalà mi kê Apu Kesu, ta awán bulubugá ta tolay nga mebiláng nga matunung ta arubáng ni Namarò megapu ta panuppál na sù tunung.

¹⁷ Á sikami nga Kudio, gapu ta iddanamám mingin gapay ta mapakomá kami ámma mebiláng kami ta matunung ta arubáng ni Namarò megapu sù kesipá mi kê Apu Kesu Kiristu, á arám mingin laguk ikatalà yù panuppál mi sù tunung na Kudio, gapu ta sinákkilalám mingin ta kuruk nga nakaliwá kami gapay ta kunnay nikayu nga ari Kudio, nga ari tumuttul sù tunung. Á mássiki nu nakaliwá ittam ngámin, awayyá tam panò nga kagian ta si Apu Kesu Kiristu yù negapuánán nayù liwá tam? Ari gemma! ¹⁸ Ngam nu toliak ku nakuan yù tunung na Kudio nga nilikuránák kin ámma ipatuttul ku nikayu gapay nakuan, á mepasingan ta malliwákâ. ¹⁹ Ta pamarubâ nga manuppál sù tunung, nánámmuák ku ta nakaliwaták ku yù tunung, á kunnayá ta natayin megapu sù tunung, gapu ta mapagikáru nga matay yù ira nakaliwá kuna.

Á yáyù nga arák kin tuttulan yù tunung, nu ari galá si Namarò yù passerbiák ku, nga manotolay nikán megapu galá sù allà na. ²⁰ Ta nebayuk si Apu Kesu ta kurù megapu nikán, á inikáru na yù ngámin nga liwiliwá ku megapu sù pate na, tapè arán nangá pagikaruan ni Namarò. Á gapu ta pangikatalà ku kê Apu Kesu Kiristu, netáddayá kuna. Á yáyù nga aringin sikán yù maguray sù akkuák ku, nu ari galá si Apu Kesu Kiristu, nga mepaggián nikán. Á ta katolè paga ta utun na dabbun, ikatalà ku yù Aná ni Namarò, ámma itulú ku yù urè kuna, tapè palurotak ku yù ure na. Ta aggina yù mangiddù nikán, á initalip na yù baggi na megapu nikán. ²¹ Á arák ku panakitán yù allà ni Namarò. Ta nu awayyá tam nakuan nga manuppál sù tunung, tapè ibiláng na ittam ni Namarò ta matunung ta arubáng na, á awán laguk nakuan ta serbi nayù pate ni Apu Kesu.

3

Mesipà ittam kê Namarò megapu galá sù Pangikatalà tam kê Apu Kesu Kiristu

¹ Bay e! Sikayu, nga taga Galasia! Ngattá, ta kunnay ta magulapá kayu? Ngattá, ta makilogò kayu sù ira mamatuttul nikayu sù tunung na Kudio. Arán naw panò nánámmuán yù inittuddù nikayu, nga natay si Apu Kesu Kiristu ta kurù, tapè mári yù liwá tam ngámin? ² Tabbaran naw bì laguk yawe iyabbù ku nikayu. Kunnasi yù pangalawá naw sù Mangilin

nga Ikararuá ni Namarò? Iniyawâ na panò ni Namarò nikayu megapu ta panuppál naw sù tunung na Kudio? Ari! Ammu naw ta ari gemma kunnian, ta iniyawâ na nikayu ni Namarò yù Mangilin nga Ikararuá na gapu ta gininná naw yù bilin na, ána ikatalà nawin si Apu Kesu Kiristu. ³ Napakáwanán kayu panò ta nonò! Napiá gemma yù pamegapu naw nga manguruk kâ Apu, ta inikatalà naw yù Mangilin nga Ikararuá ta mangabbák nikayu. Ngattá laguk, ta kagian naw ta makáwayyá kayu lápay nga manuppál sù tunung na Kudio?

⁴ Á yù ngámin nga nesimmu nikayu ána yù naparubán naw megapu sù pangikatalà naw kâ Apu, náttamán nawin panò, ta kunnay ta awán ta serbi na? Arák ku kurugan! ⁵ Á kunnasi panò yù ángngabbák ni Namarò nikayu? Arán naw panò ammu? Abbágán na kayu megapu sù Mangilin nga Ikararuá na nga iniyawâ na nikayu megapu sù panguruk naw sù napiá nga dámak nga meyanngung kâ Apu Kesu Kiristu. Á aru yù pinagaddátu na ta arubáng naw, nga ari gemma megapu ta panuppál naw sù tunung na Kudio, nu ari galá megapu sù pangikatalà naw kâ Apu Kesu Kiristu.

⁶ Á ta ángngarigán, nonotan naw si Lákay Abrakam nga yù ngaw naggaká nikami nga Kudio. Ta aijan yù netúrâ nga meyanngung kuna, nga kun na, “Inikatalà ni Abrakam si Namarò, á yáyù nga inibiláng ni Namarò ta matunung si Abrakam megapu sù pangikatalà na kuna.”* ⁷ Á yáyù gapu na nga kánammuat tam laguk ta yù ira ngámin nga tatolay nga mangikatalà kâ Namarò, aggira yù ira ibiláng ni Namarò ta ánâ ni Abrakam, nga mesipâ gapay sù initabbá na kâ Abrakam. ⁸ Á netúrâ sù dán nga libru yù napiá nga dámak nga inipalappâ na ngaw ni Namarò kâ Abrakam, ta mássiki yù ira tatolay nga ari Kudio, nu ikatalà da si Namarò, ibiláng na ira ta napiá ána matunung megapu sù pangikatalà da. Ta kunnian yù kinagi na ngaw ni Namarò kâ Abrakam, gári nga nabayágin. Kinagi na, “Ikákkállá ku yù ira ngámin nga makkakerumá nga tatolay ta dabbuno megapu nikaw.”† ⁹ Á yáyù nga ikákkállá ni Namarò sittam ngámin nga mangikatalà kâ Apu Kesu, ta kunnay sù ángngikállá na kâ Abrakam megapu sù pangikatalà ni Abrakam kuna.

¹⁰ Ngam mapagikáru yù ira ngámin nga kagiad da ta ibiláng na ira ni Namarò ta matunung megapu ta panuppál da sù tunung na Kudio. Ta pagikaruan ni Namarò ira, gapu ta awán ta tolay nga makatuppál ta ngámin nga tunung. Á aijan yù dán nga netúrâ nga kun na, “Pagikaruan ni Namarò yù ira ngámin nga ari manuppál sù ngámin nga tunung nga netúrâ.”‡ Á yù impiernu yù labbetád da. ¹¹ Á yáyù nga kánammuat tam laguk ta awán ta tolay nga mebiláng ni Namarò ta matunung ána alawatan na megapu ta panutull na sù tunung. Ta bibbirat tam yawe: “Yù ira tatolay nga mangikatalà kâ Namarò, aggira yù ibiláng ni Namarò ta matunung, megapu sù pangikatalà da. Á mesipâ ira kâ Namarò, nga matolay ta áddè ta áddè.”§ ¹² Ngam awán bulubugá ta netúrâ sù tunung nga meyanngung ta pangikatalà tam kâ Apu. Á bibbirat tam gapay, “Yù tolay nga makopù nga manuppál sù ngámin nga tunung, aggina yù matolay ta áddè ta áddè.”*

¹³ Á gapu ta awán ta tolay nga makatuppál sù ngámin nga tunung, á sittam ngámin nakuan yù pagikaruan ni Namarò megapu sù liwiliwá tam. Ngam si Apu Kesu Kiristu yù táli tam nga nagikáru ta liwá tam ta pate na ta kurù, tapè iyígù na ittam nga mangikatalà kuna, ána melilli ittam sù pangigagek ni Namarò nittam. Ta aijan yù netúrâ, nga kun na, “Negagek yù tolay nga pinapáte ra, nga inibáyuk da ta káyù, ta yáyù panákkilalán ta pangigagek ni Namarò kuna.”† ¹⁴ Á natay si Apu Kesu Kiristu, nga nabbaluntáriu nga netapil megapu nittam, tapè mesipâ kayu gapay nga ari Kudio sù pangikállá ni Namarò kâ Abrakam. Á gapu ta pate ni Apu Kesu, sittam ngámin nga Kudio ána ari Kudio yù mangalawá sù initabbá ni Namarò, nga Mangilin nga Ikararuá na, megapu sù pangikatalà tam kâ Apu Kesu Kiristu.

Yù Initabbá ni Namarò kâ Abrakam ána yù Tunung na

¹⁵ Á ta ángngarigán, wáwwagi, nu aijan yù duá nga tolay nga mattarátu, á mappermá ira, tapè maládda yù pattaratuád da, á awán ta makáwayyá nga mangari onu manguli kuna. ¹⁶ Á ta pattarátu di Namarò kâ Abrakam, kinagi ni Namarò yù itabbá na. Ngam ari yù ira ngámin nga ginaká ni Abrakam yù katarátu ni Namarò, nu ari galá yù táttádday nga gaká na, nga si Apu Kesu Kiristu. ¹⁷ Á yawe yù kebalinán nayù pagángngarigák ku. Pangitabbá ni Namarò kâ Abrakam, nappasá yù appátatú ta tallupulu nga dagun lage na inipetúrâ ni Namarò kâ Moyses yù tunung na Kudio. Ngam yù nappasaggá nga tarátu ni Namarò kâ Abrakam, ari gemma mári megapu sù tunung na nga naporían. Ta ari paga neyaná yù

* 3:6 Genesis 15:6 † 3:8 Genesis 12:3; 18:18 ‡ 3:10 Deuteronomio 27:26 § 3:11 Habakuk 2:4 * 3:12 Libitiko 18:5 † 3:13 Deuteronomio 21:23

tádday nga gaka ni Abrakam nga inittabbá ni Namarò kuna. ¹⁸ Á ta ángngarigán nu iyawá na nittam nakuan ni Namarò yù áttole tam nga awán ta áddè na megapu ta panuppál tam sù tunung, á awán nakuan laguk ta serbi nayù pangitabbá na. Ngam mesipà si Abrakam kâ Namarò megapu sù pangitabbá na.

¹⁹ Á anni laguk yù serbi nayù tunung? Iniyawá ni Namarò yù tunung, tapè mánnámmuán nayù ira tatolay yù ngámin nga pakaliwatád da. Á naggián lâ yù tunung ta áddè ta labbè ni Apu Kesu, nga ginaká ni Abrakam nga katabbá ni Namarò. Á mepasingan ta makáwayyá yù pangitabbá ni Namarò ánnè sù tunung, gapu ta jinok ni Namarò yù ira daroban na ta ed da iyawá kâ Moyses yù tunung, á si Moyses yù nangipakánnámmu sù ira tatolay. ²⁰ Ngam ta pangitabbá ni Namarò kâ Abrakam, awán ta jinok ni Namarò nga pannakasiimù na, ta si Namarò lápay yù nakkagi kâ Abrakam.

²¹ Á kagiat tam panò ta patalián ni Namarò yù inittabbá na megapu sù tunung na? Ari gemma! Ta nu matuppál tam nakuan yù tunung, tapè tolayan na ittam ni Namarò, á matunung ittam nakuan laguk megapu sù panuppál tam sù tunung. ²² Ngam aijan yù netúrâ nga bilin ni Namarò, ta awán bulubugá ta tolay nga ari nalliawá, gapu ta nakaliwá yù ira ngámin nga tatolay ta dabbuno. Á yáyù nga máwák tam mangikatalá kâ Apu Kesu Kiristu, tapè iyawá na nittam ni Namarò yù inittabbá na, nga kepattole tam kuna, megapu galá sù pangikatalá tam kâ Apu Kesu.

²³ Á sù ngaw lage na jimittál si Apu Kesu Kiristu nga pangikatalakán na tatolay, á kunnay ittam ta nebáluk nga napukù megapu sù tunung, ta áddè ta kepalappâ nayù pangikatalakát tam nga mangiyígù nittam. ²⁴ Á yù tunung yù kunnay ta manaron nittam áddè ta labbè ni Apu Kesu Kiristu. Á sù labbè ni Apu Kesu, aijanin yù awayyá tam nga mangikatalá kuna, tapè mapakomá ittam áнна mebiláng ittam ta matunung megapu sù pangikatalá tam kuna.

²⁵ Á gapu ta pangikatalá tam kâ Apu Kesu, awánin ta máwák nga mattudduán ittam megapu sù tunung. ²⁶ Ta ánnà na ittamin ni Namarò megapu sù pangikatalá tam kâ Apu Kesu Kiristu. ²⁷ Á gapu ta narigù ittam, netádday ittam kâ Apu Kesu Kiristu, á yáyù nga kesipátát tam gapay yù nonò na áнна yù napiá nga ággangguá na. ²⁸ Á ari ittamin nerumá, mássiki nu Kudio onu ari Kudio, mássiki nu aripan áнна yù yápu na, yù mattarabáku áнна yù pattarabakuán na, mássiki nu laláki onu babay. Awán ta paddurúmán ni Namarò, gapu ta nepattátádday ittam ngámin kâ Apu Kesu Kiristu megapu sù pangikatalá tam kuna. ²⁹ Á gapu ta tatole na ittam ni Apu Kesu Kiristu, mebiláng ittam ta ginaká ni Abrakam, áнна mesipá ittam gapay sù ngámin nga napiá nga inittabbá ni Namarò ngaw kâ Abrakam.

4

Pataganatán na ittam ni Namarò

¹ Á ta ángngarigán nu aijan yù tolay nga maríku, á natay, á mabattáng laguk yù kukuá na sù aná na. Á mássiki nu kukuá nayù abbing yù ngámin nga kukuá nayù ngaw yáma na, ari nerumá yù ággián nayù abbing sù ággián na aripan nayù yáma na, áddè ta paddakal na. ² Ta abbing lá paga, áнна aijan yù ira tatolay nga sinullá nayù yáma na nga manaron kuna áнна makkárgu ta kukuá na, áddè ta dagun nga sinullá nayù yáma na. ³ Á kunnian gapay yù keyarigát tam, gapu ta kunnay ittam ta abbing lage tam nangikatalá kâ Apu Kesu, á kinuruk tam yù ngámin nga makkakerumá nga kustombare nayù ira naggaká nittam áнна yù ituddu nayù ira tatolay ta dabbuno nga meyanung sù ira anitu nga mangaripan nira. ⁴ Á dattál nayù ággaw nga sinullá ni Namarò, jinok na yù Aná na, nga minay ta dabbuno nga neyaná ta babay. Á Kudio yù nakeyanatán na. Á natuppál na yù ngámin nga tunung ni Moyses, ⁵ tapè palubbáangan na ittam nga ari makatuppál sù tunung. Á gapu ta panuppál ni Apu Kesu sù tunung, yáyù awayyá ni Namarò nga pataganatán ittam nga mangikatalá kâ Apu Kesu.

⁶ Á gapu ta ánnà na ittamin ni Namarò, jinok ni Namarò yù Mangilin nga Ikararuá nga aijan kâ Aná na, ta maggián gapay nittam, tapè máwayyá tam nga makiyáma kâ Namarò, á “Ammò, Ammò,” kut tam nu makimállà ittam kuna. ⁷ Á yáyù nga ari ittamin kun na aripan nu ari galá yù ira ánnà ni Namarò. Á gapu ta ánnà ni Namarò ittamin, kesipátát tam gapay yù ngámin nga iniparán na sù aná na.

Maburung si Pablo sù ira taga Galasia

⁸ Á sù ngaw arán naw paga ammu si Namarò, siminuttul kayu sù ira sináddios nga ari makáwayyá, á kunnay kayu ta nakiaripan nira. ⁹ Ngam kunangane, ammu nawin si Namarò, á kuk ku galá nakuan ta ammu na kayu ni Namarò. Á ngattá, ta ikáyá naw nga

tolian yù ngaw kustumbare naw nga meyanung sù passerbi naw sù ira anitu? Ammu nawin gemma ta awán ta serbi na! Ikáyá naw panò ta makiaripan kayu mángin nira? ¹⁰ Á ngattá, ta tolian naw nga ngilinan yù ággaw, yù bulán, ána yù dagun? ¹¹ Nu kunnian yù akkuán naw, maburungá nikayu, marakè kengá lá yù bannák ku nga mangituddu nikayu.

¹² Wáwwagi nga mangikatalá ká Apu Kesu, yá ikomá nikayu, ta párigán nawà, ta mássiki nu Kudiongá, aringakin makiaripan sù tunung na Kudio. Ta gapu ta pangikatalá ku ká Apu Kesu, nepaggittángá nikayu nga ari Kudio nga mangikatalá kuna. Á awán bulubugá ta liwá naw nikán, ta napiá yù ángngiddù naw nikán ta áddè ngaw paggiák ku nikayu. ¹³ Á ammu naw ta nepaggiáná nikayu ngaw gapu ta natakiaká, á yáyù olu nga pangilayalayá ku nikayu sù napiá nga dámak. ¹⁴ Á mássiki nu naburung kayu ngaw megapu sù taki ku, arán nawá níkállirák, ána arán nawá nilikuránán. Ngam pinaddulò nawá ta kunnay ta daroban ni Namarò nga naggapu ta lángi, á ináliliuk nawá ta kunnay ta pangállilik naw nakuan ká Apu Kesu Kiristu, nu aggina yù umay nikayu. ¹⁵ Ta ayatán kayu ngaw ta paggiák ku nikayu, á ammù tanu awayyá naw nakuan, linakki naw nakuan yù matá naw, nga iniyawá naw nakuan nikán, megapu sù ayá naw ána allà naw nikán, tapè masingak ku ta napiá. Á anni laguk yù nesimmu nikayu kunangane, ta napataliánin yù nonò naw nikán? ¹⁶ Malussaw kayu nikán panò gapu sù kagiak ku nikayu nga kuruk? Parè bì nakuan ta ari.

¹⁷ Á yù ira mamatuttul nikayu sù tunung, námmi yù ággubobuk da nikayu, ngam ari yù kapiánán naw yù nonopad da. Ta yá lá ikáyá da, nu likuránán naw yù inittuddù nikayu, tapè aggira lá yù tángngagan naw. ¹⁸ Á mássiki nu ajjaná onu awáná nikayu, napiá gemma nu tángngagan naw yù ira mangituddu nikayu, nu kuruk nga napiá yù ituddu ra. ¹⁹ Sikayu nga kun na áná ku, mabagalá nikayu ta kunnay ta babay nga marigirigá nga mappasikál, áddè ta masingak ku yù kapasigaggá nayù ángngikatalá naw ká Apu Kesu Kiristu, tapè mepaggittá yù nonò naw ta nonò na. ²⁰ Á parè bì ta ajjanakin nakuan sù gián naw, tapè makiubobugá nikayu, ta arayungá garè, á mabbábángá nu anni yù kagiak ku nakuan nikayu, tapè mábbágán kayu.

Yù Keyarigán nayù ira Duá nga Tarátu ni Namarò

²¹ Á yawe bì yù iyabbù ku nikayu, sikayu nga manuppál nakuan sù itaddán nayù tunung na Kudio nga iníturá ni Moyses. Ngattá, ta arán naw ginnán yù ngámin nga netúrú? Arán naw panò ammu yù kagian na? ²² Ta bibbirat tam yù netúrú, nga ajjan ngaw yù duá nga lálláki nga áná ni Abrakam. Á yù tádday yù aná nayù aripan na. Á yù tádday yù aná nayù atáwa na nga arán na aripan. ²³ Á negagángay lápay yù pabbussi nayù babay nga aripan ni Abrakam. Ngam yù atáwa na nga arán na aripan, ari nakuan nabbussi, nu ari galá megapu sù pangitabbá ni Namarò ká Abrakam, gapu ta lakalákay ána bakabáká iren ta paganá nayù atáwa na.

²⁴ Á yù ira duá nga bábbay yù keyarigán nayù duá nga tarátu ni Namarò. Á si Agar yù tádday, nga aripan ni Abrakam nga taga Puddul na Saynay. Aggina yù keyarigán nayù tarátu ni Namarò nga netúrú sù tunung nga iniyawá na kári Moyses ána yù ira Kudio ta keggá ra ta Puddul na Saynay. Á yù ira ngámin nga tatolay nga tumuttul sù tunung na Kudio, meyárik ira ta ginaká ni Agar. Á gapu ta aripan si Agar, á yáyù nga kunnay ira gapay ta aripan. ²⁵ Á yá kebalinán ni Agar yù Puddul na Saynay nga ajjan ta dabbun na Arabia, ána yù ili na Jerusalem gapay. Á yù ira Kudio nga maggián ta Jerusalem, kunnay ira ta aripan gapu ta passerbiád da yù itaddán nayù tunung. ²⁶ Ngam sittam, gapu ta ikatalá tam si Apu Kesu megapu sù bagu nga tarátu ni Namarò, á kunnay ittam ta napalubbángin. Á yáyù nga mesipá ittam sù bagu nga ili na Jerusalem nga ajjan kunangan ta lángi. Á gapu ta arát tamin passerbián yù tunung, meyárik ittam sù ira ginaká ni Sara nga atáwa ni Abrakam nga arán na aripan. ²⁷ Á ajjan yù netúrú sù bilin ni Namarò nga kunniaw:

“Sikaw nga babay nga nabbalá, magayáyá ka, mássiki nu ari ka bulubugá naganá!

Magagga-aggay ka ta ayá mu, mássiki nu ari ka nappasikál.

Ta aru yù ira ginaká nayù babay nga nánawán nayù atáwa na,

ánnè sù babay nga ajjan yù atáwa na.”*

²⁸ Á wáwwagi nga manguruk ká Namarò, sittam yù áná ni Namarò megapu sù inittabbá na. Á si Isak yù keyarigát tam, nga neyaná ni Sara megapu galá ta pangitabbá ni Namarò ká Abrakam. ²⁹ Á si Ismael, nga yù ngaw abbing nga negagángay yù keyaná na lápay ká Abrakam, jinigirigá na yù aná ni Sara nga neyaná megapu sù pakáwayyá nayù Ikararuá ni Namarò. Á kunnay nira ngaw, kunnian gapay nittam kunangan, ta yù ira nga tumuttul sù

* 4:27 Isaya 54:1

tunung na Kudio, jigirigátad da sittam ngámin nga mesipà kâ Namarò megapu sù Ikararuá na. ³⁰ Ngam anni yù netúrâ nga kinagi ni Namarò kâ Abrakam? Á kinagi na, “Papanáwam mu yù ira masiná nga aripam mu, ta ari mesipà yù anâ nayù aripam mu sù iyawá mu sù anâ nayù atáwam nga arám mu aripam,”† kun ni Namarò. ³¹ Á wáwwagi nga mangikatalà kâ Apu Kesu, yáyù nga ari yù anâ nayù aripam ni Abrakam yù keyarigát tam, nu ari galá yù anâ nayù babay nga atáwa ni Abrakam nga arán na aripam.

5

Si Apu Kesu Kiristu yù Mamalubbáng nittam tapè Makkaká-iddù ittam

¹ Á gapu ta pangikatalà tam kâ Apu Kesu Kiristu, pinalubbáng na ittamin, tapè ari ittam makiaripan sù ira nga mamuersá nittam ta tuppálat tam yù itaddán nayù tunung ni Moyses. Ipasigaggá naw laguk yù ángngikatalà naw kâ Apu Kesu, á ari kayu makiaripan nira.

² Á tángngagan naw ta napiá yù kagiak ku, ta sikán si Pablo nga makkagi nikayu. Nu mappakugi kayu nakuan gapu ta kagian naw ta alawatan na kayu ni Namarò megapu sù panuppál naw sù tunung, á awánin laguk bulubugá ta serbi nayù kingnguá ni Apu Kesu Kiristu megapu nikayu. ³ Á kuruk yù itotoli nga kagian nikayu. Yù tolay nga mappakugi, máwák na paga nga tuppálan gapay yù ngámin nga káruán nga netúrâ nga tunung na Kudio. ⁴ Á sikayu nga makkagi ta ibiláng na kayu ni Namarò ta matunung, gapu ta panuppál naw sù tunung, á nilikuránán nawin si Apu Kesu Kiristu, á nalipparán kayin nga nesinná sù iddù ni Namarò ána allá na.

⁵ Ngam sittam, gapu ta pangikatalà tam kâ Apu Kesu Kiristu, iddamamát tam yù pamakomá ni Namarò nittam ána yù pangibiláng na nittam ta matunung, megapu sù pakáwayyá nayù Ikararuá na nga mangabbák nittam. ⁶ Á gapu ta kepattátáde tam kâ Apu Kesu Kiristu, arán na ittam ni Namarò paddurúmán, mássiki nu nakugi onu ari nakugi. Á yá lá ikáyá ni Namarò, ta ikatalà tam si Apu Kesu Kiristu, ána ipasingat tam yù panguruk tam kuna megapu sù pakkaká-iddù tam.

⁷ Á sù ngaw, napiá gemma yù ángnguruk naw kâ Apu Kesu. Asinni panò yù ira mangigaggak nikayu, ta arán nawin kurugan yù kuruk nga netuddu nikayu? ⁸ Ari gemma si Namarò yù mangigaggak nikayu, ta aggina yù magágál nikayu ta mangikatalà kayu kâ Apu Kesu Kiristu. ⁹ Mappalán kayu laguk sù ira mangituddu ta tanakuán, ta massamá yù ituddu ra nga ari kuruk. Á aijan yù bunnakè nga keyarigán na: “Mássiki nu baddi lá yù áppalappák na, nga nekiruk sù arená, ngam luppák ta napiá yù pán,” kun na. ¹⁰ Ngam aringá mabbábáng nikayu, ta ammù ta ari kayu mekátuay sù inituddù nikayu, gapu ta kepattátáde tam megapu sù pangikatalà tam kâ Apu Kesu. Á yù mamuruburion nikayu megapu sù ituddu na nga ari kuruk, pagikaruan ni Namarò sangaw, maguray lá yù ággián na.

¹¹ Á wáwwagi, aijan garè yù ira magistoriá ta ari dumá yù ituddu ra ána yù ituddù. Ta kagiad da ta ituddù paga kanu ta máwák nga makugi yù tolay, tapè ibiláng ni Namarò ta matunung. Á ari gemma kuruk! Ta nu kuruk nakuan, arád dangà nakuan jigirigátan nayù ira Kudio, mássiki nu ilalayá ku gapay yù pate ni Apu Kesu ta kurú. Ngam yáyù gemma yù gapu na nga mapporay ira nikan ána jigirigátad dangà, gapu ta pangituddù ta arád da máwák nga tuttulan yù tunung ni Moyses. ¹² Á yù ira tatolay nga mamakolang nikayu, paguráyán naw lá nu akkuád da ta baggi ra yù ipapíli da, mássiki nu kapunad da lápay yù baggi ra!

¹³ Á wáwwagi, yáyù nga inagálán na kayu ni Namarò, tapè mapalubbáng kayu. Á yáyù nga ari kayin megaggak megapu sù ira nga mangituddu sù tunung na Kudio. Ngam arán naw laguk kagian ta aijan yù awayyá naw nga manuppál ta narákè nga karagátan naw. Ta yawe ipamalubbáng ni Namarò nittam, tapè makkaká-abbák ittam megapu ta pakkaká-iddù tam. ¹⁴ Á matuppál yù ngámin nga tunung na Kudio, nu tuppálat tam yawe tádday nga taddán ni Apu, nga kun na, “Iddukan naw yù ira kábulun naw ta kunnay ta ángngiddù naw ta baggi naw.”* ¹⁵ Ngam nu makkakáperang kayu ta ubobuk ána maddaráma kayu, á magimuguk kayu laguk, maraké mararál yù ákkiwagi naw.

Mekontará yù Karagátan nayù Baggi tam sù Karagátan nayù Mangilin nga Ikararuá

¹⁶ Á yawe laguk itabarang ku nikayu, ta tumulù kayu sù Mangilin nga Ikararuá, á tuppálan naw yù napiá nga ipakuá na nikayu, tapè arán naw akkuán yù narákè nga karagátan nayù baggi naw. ¹⁷ Ta mekontará yù karagátan nayù baggi tam sù napiá nga ipakuá na nittam nayù Mangilin nga Ikararuá. Á yáyù nga kunnay ta maggerrá yù

† 4:30 Genesis 21:10 * 5:14 Libitiko 19:18

Mangilin nga Ikararuá ána yù karagátan nayù baggi tam, marakè akkuát tam yù maguray lá nga ikáyâ tam nga akkuán. ¹⁸ Ngam nu yù Mangilin nga Ikararuá yù sinulutát tam, napalubbáng ittam laguk sù pakáwayyá nayù ira taddán nayù tunung na Kudio.

¹⁹ Á ammu tam gemma yù narákè: yù karagátan na baggi tam, yù mangarallow ána yù makikarallow, yù narákè nga nonotan na tolay ána yù narákè nga akkuán na nu arán na igaggak yù baggi na, ²⁰ yù makimoray ta sináddios, ána yù maganánu, yù managánná ána yù massalamangkeru, á yù malussaw ána yù maddaráma, yù mangabubu ána yù mapporay, yù mangukkuk, yù makipeperang ta ubobuk, ána yù mamassisinná ta tatolay. ²¹ Á yù mamassil, yù magillellaw, yù ira mattatádday nga mappipissán, nga mappaná yù narákè nga nonò da, á aru paga yù narákè nga akkuán na tolay. Á yáyù nga itotoli nga kagian yù kinagikin nikayu, ta yù ira tatolay nga mangupù nga mangnuá karannian nga narákè, ari ira mesipá kâ Namarò sù pammagurayán na.

²² Á yawe yù akka-akkuán nayù tolay nga tumulù sù pammagure nayù Ikararuá ni Namarò ta nonò na: Iddukan na yù ira kábulun na. Á magayáyâ lá ána magimammá yù nonò na. Á attamán na lá yù ira kábulun na. Á ikákkállâ na ira, ána napiá lá yù akkuán na nira. Á aggina yù pangikatalakán. ²³ Á tumulù ána ammu na mangigaggak ta baggi na. Á awán gemma ta taddán sù tunung nga mangipugik sù akkuán na nga kunnian. ²⁴ Á sittam ngámin nga netádday kâ Apu Kesu Kiristu, ibiláng tam ta kunnay ta nepátâ yù narákè nga karagátat tam ta kurú ni Apu Kesu ta pate na, tapè arát tam akkuán yù narákè nga karagátat tam. ²⁵ Á gapu ta iniyawâ na nittam ni Namarò yù bagu nga áttol tam megapu sù Ikararuá na, á tumulù ittam laguk sù pammagure nayù Ikararuá na, tapè matunung ána napiá yù akkuát tam. ²⁶ Á ari ittam laguk mappeddaráyaw, ána arát tamin paraparamán yù ira kábulut tam. Á ari ittamin makkakápassil.

6

Makkaká-abbák ittam

¹ Á wáwwagi, nu aijan yù kabbulut tam nga manguruk, nga melogò ána malliwâ, á sittam laguk nga tumulù sù Mangilin nga Ikararuá yù umay makiubobuk kuna, tapè gammát tam ána ituddu tam kuna yù napiá nga ángnguruk na. Á ta pakiubobuk tam kuna, ikákkállâ tam, á alúnay yù ággubobuk tam kuna. Á magimuguk ittam, marakè mesimmuát tam gapay yù pakaliwatát tam. ² Á makkaká-abbák ittam, mássiki nu anni yù jigâ tam, tapè mapatuppál tam yù taddán ni Apu Kesu Kiristu, ta kinagi na ta makkaká-iddù ittam.

³ Á nu aijan yù tolay nga mappeddaráyaw, nga kagian na ta aggina yù kapiánán ánnè sù ira kábulun na, á ari gemma kuruk yù kagian na, á yáyù nga ilogò na galá yù baggi na. ⁴ Magimuguk ittam laguk nga katággitádday sù akkuán na, nu napiá onu ari. Ta magayáyâ ittam nu napiá yù akkuát tam. Ngam arát tam laguk ipagayáyâ yù kapiánán nga akkuát tam ánnè sù akkuán nayù ira kábulut tam. ⁵ Ta sittam nga taggitádday, aijan yù pakáwayyá na nga inikatalâ ni Namarò kuna, á liwâ na lápay nu arán na tuppálan.

⁶ Á yù ira tatolay nga matudduán sù bilin ni Namarò, iballe ra laguk yù ngámin nga napiá nga kukuá ra sù tolay nga mangituddu nira, tapè ari makúrang yù awágan nayù mangituddu.

⁷ Á ari gemma melogò si Namarò, á arát tam laguk ilogò yù baggi tam. Ta maguray lá yù imulá na tolay, yáyù lággapay yù apan na, nga bálâ nayù bannák na. ⁸ Á kunnian yù keyarigát tam. Ta nu tuppálat tam yù narákè nga karagátat tam, yá lá bálâ tam ta matay ittam nga umay ta impiernu, nga nesinná kâ Namarò ta áddè ta áddè. Ngam nu tumulù ittam sù Mangilin nga Ikararuá ána tuppálat tam yù ipakuá na, á yá bálâ tam yù kepattol tam kâ Namarò ta lángi ta áddè ta áddè.

⁹ Á arát tam laguk ikalurâ nga akkuán yù napiá nga ipakuá ni Namarò nittam. Ta nu arát tam tukkatan yù napiá nga akkuát tam, á sù ággaw nga sinullá ni Namarò, alawatat tam yù bálâ tam, nga iyawâ ni Namarò nittam. ¹⁰ Á yáyù nga uputat tam laguk nga abbágán yù ira ngámin nga kábulut tam, ta keggá tam ta utun na dabbuno, talugáring sù ira wáwwagi tam nga mangikatalâ kâ Namarò.

Yù Kabalin nayù Túrâ

¹¹ Á masingan naw yù káddakal nayù túrá ku ta pattúrâ ku lápay sawe kagiak ku nikayu.

¹² Á yù ira tatolay nga mangagumán nakuan nikayu ta makugi kayu, yáyù lá akkuád da gapu ta ikáyâ da yù paddáyo nayù ira kábulut da nga Kudio, ána maganásing ira, marakè jigirigátad da ira nu ilayalayâ da yù pamakomá ni Namarò ta tolay megapu sù pate ni Apu

Kesu Kiristu ta kurù. ¹³ Á mássiki nu nakugi ira, arád da gemma tuppálan yù ngámin nga tunung, ngam ikáyâ da ta makugi kayu nakuan, tapè ipappeddaráyo ra yù panguruk naw nira.

¹⁴ Ngam sikán, awán ta dumá nga ipappeddaráyò, nu ari galá yù pate ni Apu Kesu Kiristu nga Yápu tam, nga netapil ta kurù megapu nittam. Á gapu ta pate ni Apu Kesu ta kurù, aringâ mekanakanâ sù ikalakalángán nayù ira tatolay ta dabbuno nga makikontará kâ Namarò, ta inikikkítulák ku lâ yù pangapà da nikán. ¹⁵ Á maguray lâ nu nakugi yù tolay onu ari, awán ta serbi na. Ngam máwák yù panguli ni Namarò sù ira tatolay nga mangikatalà kuna, tapè kunnay ira ta bagu nga naparò. ¹⁶ Á ikákkállà ni Namarò yù ira ngámin nga manguruk sù inituddù saw, á pagimammatan na ira tapè napiá yù ággiád da, ta aggira yù kuruk nga tatole ni Namarò, nga Kudío ána ari Kudío gapay.

¹⁷ Á mamegapu kunangane, awán nakuan ta tolay nga mamagabagal nikán. Ta aru yù pilâ ta baggi megapu sù pangilayalayâ ku kâ Apu Kesu Kiristu, nga pangipasinganán ta masserbingâ kuna.

¹⁸ Á yá ipakimállà ku megapu nikayu, wáwwagì, ta ikákkállà na kayu ni Apu Kesu Kiristu. Ammán.

Yù Túrâ ni Pablo sù ira Manguruk nga taga Epeso

Yù Meyannung sù Túrâ

Ajjan yù ili na Epeso ta aggik na bebay sù purubinsia na Asia Minor. Á sù ngaw pattúrâ ni Pablo, yù ili na Epeso yù mekâppâ nga karakalán na ili sù pammagurayán nayù Sisar nga naggián ta Roma. Á neparámak ngaw yù ili na Epeso megapu sù aru nga tatolay nga mariku nga naggián ta ili, á aru gapay yù makkakerumá nga ipagayâyâ da, nepatalugáring ta ajjan yù sináttolay nga babay nga pakimorayád da nga mangngágan ta Artemi.

Naggián si Pablo ta Epeso ta tallu nga ragun, nga mangilayalayâ ána mangituddu sù napiá nga dámak nga meyannung kê Apu Kesu Kiristu (Kingguá 19:1-41). Á aru yù ira tatolay nga nangikatalâ kê Apu megapu sù pangilayalayâ ni Pablo. Á pappasá na tallu ragun, nánaw si Pablo nga minay ta tanakuán nga lugár. Á ta pattúrâ na sawe túrá na, ajjan nga nebalúk si Pablo sù ili na Roma.

Á sawe túrá, ipakánámmu ni Pablo yù aru nga meyannung kê Apu Kesu Kiristu, nga mangiyigù nittam (1:3, 7-8, 20-21). Á ibukalán ni Pablo yù kebalinán nayù kepattatádde tam kê Apu Kesu Kiristu (2:3-6). Á ipakánámmu na gapay yù ketádde nayù ira Kudio ána yù ira nga ari Kudio (2:14). Á sittam ngámin nga mangikatalâ kê Apu Kesu, yù meyárik ta bale ni Namarò, nga paggianán nayù Mangilin nga Ikararuá na (2:22). Á ipanonò na nittam yù kepattatádde tam kê Apu Kesu, megapu sù kesipá tam sù táttádday nga Mangilin nga Ikararuá. Á táttádday lâ si Namarò nga Yáma tam, ána táttádday yù Yápu tam. Táttádday lâ yù ikatalâ tam, ána táttádday yù kebalinán nayù karigù tam, megapu sù ketapil ni Apu Kesu (4:3-6).

Yù Mayán nayù Túrâ

Yù Pamegapu nayù Túrâ (1:1-2)

Yù Allà ni Namarò sù ira Mangikatalâ, megapu sù Ketádde ra kê Apu Kesu Kiristu (1:3-14)

Yù Ipakimállâ ni Pablo (1:15-23)

Mepattolay ittam kê Apu Kesu Kiristu (2:1-22)

Si Pablo yù Mangilayalayâ nga Minay sù ira ari Kudio (3:1-13)

Yù Ipakimállâ ni Pablo nga Meyannung sù Ángngiddù ni Apu Kesu Kiristu nittam (3:14-21)

Yù Ketádde tam kê Apu Kesu ána yù Bagu nga Áttole tam (4:1-6:9)

Yù Pakigerrá ni Satanas nittam (6:10-13)

Yù Meyárik ta Barawási na Mengal ána yù Ármas na (6:14-20)

Yù Kabalin nayù Túrâ (6:21-24)

¹ Sikán si Pablo, nga sinullâ ni Namarò ta umay mangilayalayâ kê Apu Kesu Kiristu. Á makapattúrâkà laguk nikayu nga tatole ni Namarò nga taga Epeso, sikayu nga napasigaggâ yù ángngikatalâ na kê Apu Kesu. ² Á parè bì ta ikákkállâ da kayu di Namarò nga Yáma tam kê Apu Kesu Kiristu nga Yápu tam, tapè mepagimammâ kayu, ána napiá yù ággigián naw ána gawagawáyán naw.

Yù Allà ni Namarò sù ira Mangikatalâ, megapu sù Ketádde ra kê Apu Kesu Kiristu

³ Meparáyaw si Namarò, nga Yáma ni Apu Kesu Kiristu nga Yápu tam, ta pinattádde na ittam kê Apu Kesu Kiristu megapu sù pakáwayyâ nayù Mangilin nga Ikararuá. Á yáyù nga passipatán na ittam ni Namarò sù ngámin nga mannanáyun nga kapiánán nga ángngabbák na ána alluárán na nga maggapu ta lángi. ⁴ Ta mássiki sù lage na pamarò ni Namarò ta dabbuno, piníli na ittam tapè mepaggián ittam kuna, megapu sù ketádde tam kê Apu Kesu Kiristu. Á pabbalinan na ittam ta tatole na, nga pareku nga napiá, nga awán ta pakaliwatát tam ta ánnanganán na, megapu sù ángngiddù na nittam. ⁵ Á sù ngaw nga nabayák, ninonò ni Namarò yù pamataganâ na nittam. Á yáyù nga jinok na yù aná na ta dabbuno, nga si Apu Kesu Kiristu, ta umay magikáru ta liwiliwá tam. Yáyù sinalákkuruk ni Namarò, tapè pabbalinan na ittam ta ánâ na, megapu sù kingguá ni Apu Kesu.

⁶ Dayáwat tam si Namarò megapu sù allâ na nittam nga makapállâ. Ta inisipâ na ittam sù Anâ na nga iddukan na. ⁷ Aggina si Apu Kesu Kiristu, á pinalubbáng na ittamin megapu sù ketapil na megapu nittam. Á yù dága na yù inipappagá na megapu sù liwiliwá tam. Á yáyù nga pakomán ni Namarò ittam. Kukurugán nga makapállâ yù pangikállâ ni Namarò nittam, nga nakalò nga awán ta meyárik kuna.*

* 1:7 Kolosi 1:14

⁸ Á gapu ta kunnian yù pangikállà ni Namarò nittam, nepallà yù ángngabbák na nittam, ta napiá yù sírik na, áнна aggina yù makánnámmu ta ngámin. ⁹ Á yáyù nga inipakánnámmu na nittam yù inilimak na ngaw, nga talákkurugan na nga ipakuá ká Apu Kesu Kiristu. ¹⁰ Á yawe yù talákkurugan na, ta sangaw nu duttálin yù pagáddekán na ággaw, á pattatáddayan na ká Apu Kesu Kiristu yù ngámin nga pinarò na nga aijan ta lángi áнна dabbuno, tapè si Apu Kesu yù mammaguray ta ngámin.

¹¹ Á gapu ta palurotan ni Namarò yù ngámin nga talákkurugan na, piníli na kami nga Kudío, ta pabbalínan na kami ta tatole na, megapu sù ketádde mi ká Apu Kesu, ¹² tapè sikami nga Kudío yù mapolu nga magiddanáma ká Apu Kesu Kiristu. Á yáyù nga sikami yù pangipasinganán ni Namarò sù allà na nga makapállà, tapè meparáyaw si Namarò megapu nikami.

¹³ Á sikayu nga ari Kudío, pinabbalin na kayu gapay ni Namarò ta tatole na, megapu ká Apu Kesu Kiristu. Ta gapu ta pakaginná naw sù kuruk nga bilin na, nga napiá nga dámak nga meyanung sù ángngiyígù na nittam, á kinuruk naw áнна inikatalà naw gapay si Apu Kesu Kiristu. Á gapu ta pangikatalà naw ká Apu Kesu, jinok ni Namarò ta umay maggián gapay nikayu yù Mangílin nga Ikararuá na, nga inítabbá na, nga ámmárká na sù ira tatole na. ¹⁴ Á megapu sù Mangílin nga Ikararuá nga aijan nittam, yáyù pakánnámmuát tam ta málawá tam paga sangaw yù ngámin nga inítabbá ni Namarò nga iyawá na sù ira tatole na, sangaw nu paddulotan na ittam sù gián nga pinarón na megapu nittam. Dayáwat tam laguk si Namarò megapu sù allà na nittam nga makapállà.

Yù Ipakimállà ni Pablo

¹⁵ Á sigidángà nga makimállà áнна maddáyaw ká Namarò megapu nikayu, gapu ta narámak ku yù ángngikatalà naw ká Apu Kesu Kiristu áнна yù ángngiddù naw sù ira ngámin nga kábulun naw nga tatole ni Namarò. ¹⁶ Á aringà malurá nga maddáyaw ká Namarò megapu nikayu. Á ta ngámin nga pakimállà ku, ipanonò takayu kuna. ¹⁷ Ta si Namarò yù maráyaw nga Yáma tam, nga pakimorayán ni Apu Kesu Kiristu nga Yápu tam. Á yá ikomá ká Namarò, ta passírigan na kayu megapu sù Ikararuá na, áнна ipakánnámmu na nikayu yù ngámin nga meyanung kuna áнна yù ipakuá na nikayu, tapè napiá yù pakiyáma naw kuna. ¹⁸ Á ipakimállà ku gapay ta pannawagan na yù nonò naw, tapè kánnámmuán naw yù pabbalínán nayù pagágál na nittam, nga iddanamát tam, á tapè kánnámmuán naw gapay yù makapállà nga kapiánán nga pangisipatán na sù ira tatole na. ¹⁹ Á yawe gapay ikomá, ta mánnámmuán naw lápay yù pakáwayyá ni Namarò nga aijan nga mangabbák nittam nga mangikatalà kuna, ta awán ta pagáddekán nayù pakáwayyá na, nga ámmagaddátu na nga makapállà, ²⁰ nga mepasingan sù pamaginnanole na ká Apu Kesu Kiristu áнна yù pamagitubang na kuna ta jiwánán na. Á yù jiwánán ni Namarò yù ággigitubangan nayù kotunán nga maráyaw ta lángi. ²¹ Á si Apu Kesu yù kotunán nga makáwayyá nga awán ta kagittá na. Á aggina yù mammaguray sù ira ngámin nga makáwayyá áнна mamagaddátu, nga masingan áнна ari masingan. Á mammaguray si Apu Kesu ta dabbuno áнна lángi kunangan ta ádde ta ádde. ²² Ta pinatulú ni Namarò yù ngámin nga aijan, á sinullà na si Apu Kesu Kiristu nga mammaguray ta ngámin. Si Apu Kesu yù yápu tam, nga sinullà ni Namarò nga mammaguray nittam nga mangikatalà kuna. ²³ Á sittam nga mangikatalà kuna, kunnay ittam ta baggi na, gapu ta netádday ittam kuna. Á ipakánnámmu na nittam yù nonò na áнна yù ipakuá na nittam, tapè mapaluro yù ure na megapu nittam. Á aggina yù egga nga maggián nga manaron ta ngámin, tapè maggián yù ngámin megapu kuna.†

2

Mepattolay ittam ká Apu Kesu Kiristu

¹ Á sù ngaw lage naw nanguruk ká Namarò, kunnay kayu ta natayin nga nesinná kuna megapu ta liwiliwá naw áнна yù pamotu naw ká Namarò. ² Ta narákè garè yù kustombare naw ngaw, nga kunnay ta ággangnuá nayù ira tatolay nga ari nanguruk ká Namarò. Á si Satanas yù sinuttul naw ngaw. Aggina yù narákè nga patul nga ari masingan, nga mammaguray sù ira narákè nga ari masingan. Á aggina gapay yù maddok sù ira tatolay nga ari nanguruk ká Namarò. ³ Á mássiki sittam ngámin garè, naggigittá ittam ngaw sù ira ari nanguruk ká Namarò, ta kingnguá tam ngaw yù karagatát tam nga narákè. Á sinuttul tam yù narákè nga gustu na baggi tam áнна nonò tam. Á yáyù nga naggigittá ittam sù ira ngámin nga tatolay ngaw nga magiddi-iddak ta pamagikáru ni Namarò.

† 1:23 Kolosi 1:17-18

⁴ Ngam si Namarò, nepallà yù allà na. Á mássiki nu mepángngà yù pamagikáru ni Namarò nittam, ikállà na ittam áнна iddukan na ittam, megapu sù makapállà nga ángngiddù na nga awán ta áddè na. ⁵ Á mássiki nu kunnay ittam ta natayin, nga nesinná ká Namarò megapu ta liwiliwá tam, inisipà na ittam ká Apu Kesu Kíristu sù pamaginnanole na, tapè mepattolay ittam kuna. Ta iniyígù na ittamin megapu galà sù allà na nittam.* ⁶ Á inítádde na ittam ni Namarò ká Apu Kesu Kíristu, tapè paginnanolayan na ittam gapay áнна ipotun na ittam nga mepagitubang nga mepammaguray ká Apu Kesu ta lángì. ⁷ Á yáyù kingnguá ni Namarò, tapè sittam yù pangipasinganán na ta pangikállà na, ta ngámin nga ággaw nga maporián ta áddè ta áddè, megapu sù kingnguá ni Apu Kesu Kíristu.

⁸ Á gapu ta pangikállà na nittam ni Namarò, iniyígù na ittamin, megapu sù pangikatalà tam ká Apu Kesu, nga rigálu ni Namarò nittam. ⁹ Á yá ipangiyígù na nittam megapu galà sù allà na, nga ari gemma megapu sù akka-akkuát tam, marakè mappeddaráyaw ittam. ¹⁰ Á si Namarò yù manguli sù nonò tam, megapu sù pangikatalà tam ká Apu Kesu Kíristu, tapè palurotat tam yù napiá nga sinalákkuruk na ngaw nga ipakuá na nittam.

Nakkápiá ittam nga Kudio áнна yù ira ari Kudio

¹¹ Á sikayu nga ari Kudio, nonopan naw yù ngaw ággián naw, ta arán na kayu ngaw tatole ni Namarò. Á yù ira Kudio, nga nakugì ta kunnay ta kustombare ra, iniluddè da kayu, gapu ta ari kayu nakugì nga nesipà nira nga tatole ni Namarò. Ngam sinniálád da lá yù baggi ra, nga awát ta serbi na, ta arád da garè likuránán yù narakè nga akkuád da. ¹² Á sikayu nga ari Kudio, nesinná kayu ngaw ká Apu Kesu Kíristu, nga ari nakiyápu kuna. Á gapu ta ari kayu nebiláng nikami nga Kudio, nga ginaká ni Lákay Israel, á ari kayu nesipà sù tarátu ni Namarò áнна yù initabbá na sù ira tatole na. Á sinuttul naw ngaw yù ággangnguá nayù ira tatolay ta dabbuno, á arán naw ngaw iniddanamán yù pangikállà ni Namarò nikayu, gapu ta arán naw ngaw paga ammu si Namarò. ¹³ Á mássiki nu ari kayu nakiyápu ngaw ká Namarò áнна ari kayu ngaw nesipà nikami nga Kudio, napataliánin yù ággián naw kunangane, ta nepattatádday kayin ká Apu Kesu Kíristu áнна nesipà kayin nikami gapay, megapu sù dága ni Apu Kesu nga inipappagá na ta liwiliwá tam ngámin.

¹⁴ Á si Apu Kesu yù namakkápiá nittam ngámin, sittam nga Kudio áнна sikayu nga ari Kudio, á inirián na yù pakkakálusso tam, á pinattatádde na ittam, nga nepagimammá megapu kuna. ¹⁵ Á inirián ni Apu Kesu yù pakáwayyá nayù tunung na Kudio áнна yù ira itaddán na áнна kustombare na, megapu ta pate na ta kurù, tapè pakomán na kami nga Kudio ta kunnay sù ámmakomá na gapay nikayu nga ari Kudio, megapu sù pangikatalà tam ká Apu Kesu. Á yáyù nga sittam nga duá nga naddumá nga tatolay ngaw, pinabalin na ittam ta táttádday, nga kunnay ta bagu nga tatolay nga netádday kuna. Á yáyù nga nakkápiá ittamin. ¹⁶ Á pinatukká ni Apu Kesu yù pakkakálusso tam. Á gapu ta netádday ittam ká Apu Kesu, á pinakkápiá na ittam ká Namarò, tapè alawatan ni Namarò ittam, nga Kudio áнна ari Kudio, megapu sù pate ni Apu Kesu ta kurù.

¹⁷ Á yáyù iniyánge ni Apu Kesu Kíristu ta dabbuno, ta minay nangilayalayá sù awayyá tam nga mepakkápiá ká Namarò. Á sittam ngámin yù pangilayalayátan na, sikayu nga ari Kudio nga arayyu ngaw ká Namarò, áнна sikami nga Kudio gapay nga aranni kuna. ¹⁸ Á gapu ta pamakkápiá ni Apu Kesu nittam ká Namarò, aijan yù awayyá tam ngámin nga Kudio áнна ari Kudio nga makiammò ká Namarò nga Yáma tam, gapu ta kesipatát tam ngámin yù Ikararuá ni Namarò nga mangabbák nittam.

¹⁹ Á gapu ta pakkápiá naw ká Namarò, sikayu nga ari Kudio, á ari kayu yù kunnay sù ira tatolay nga naggapu ta arayyu, nga tanakuán yù katatole ra. Ta mesipà kayu gapay sù ira ngámin nga mangikatalà ká Namarò, á máttatáma ittamin ngámin ká Namarò. ²⁰ Á meyárik ittam ta bale ni Namarò nga paddayan na. Á yù ira ngaw ábbilinán ni Namarò áнна yù ira olu nga minángngilayalayá nga sinudduán ni Apu Kesu, aggira yù kun na kallang nayù bale ni Namarò nga pinatáddak na. Á si Apu Kesu Kíristu yù meyárik sù batu nga panáddagán nayù balay. ²¹ Á pattatáddayan ni Apu Kesu yù ira ngámin nga mangikatalà kuna, nga kunnay ta melanná sù balay nga paddayan na, nga pamabalin na ta mangilin nga bale ni Namarò nga nakástá nga mepángngà nga paggianán na. ²² Á sikayu gapay, gapu ta nepattatádday kayin ká Apu Kesu, nesipà kayin gapay sù ira káruán nga nelanná sù balay nga mepángngà nga paggianán nayù Mangilin nga Ikararuá ni Namarò.

* 2:5 Kolosi 2:13-14

3

Si Pablo yù Mangilayalayâ nga Minay sù ira ari Kudio

¹ Á yáyù gapu na sikayu nga ari Kudio yù ipakimállà ku. Á ajjanà nga napukù ta ábbalurán, megapu ta pangilayalayâ ku nikayu nga ari Kudio ta meyannung kâ Apu Kesu Kiristu. ² Á narámak naw támma ta si Namarò yù nanullà nikán, á inikatalà na nikán yù pakáwayyâ nga mangipakánnámmu sù pangikállà na nikayu nga ari Kudio, tapè mesipà kayu gapay kâ Namarò. ³ Ta inipalappâ ni Namarò nikán yù nelímak ngaw nga meyannung sù talákkurugan na, á initúrákin sawe yù baddi nga meyannung kuna.

⁴ Á ta pabbibbik naw sù initúrâ ku, mánnámmuán naw gapay yù inipalappâ ni Namarò nikán nga meyannung kâ Apu Kesu Kiristu. ⁵ Arán na ngaw inipakánnámmu ni Namarò sù ira ngaw naggaká nittam. Ngam kunangane ta keggá tam, minay yù Mangilin nga Ikararuá na nga mangipalappâ sù ira minángxngilayalayâ nga sinullà ni Namarò áнна yù ira ábbilínán na. ⁶ Á yawe yù ipalappâ na kunangan, ta gapu ta pangikatalà naw kâ Apu Kesu Kiristu ta pakaginná naw sù napiá nga dámak, á ari lá sikami nga Kudio yù alawatan ni Namarò, nu ari gapay sikayu nga ari Kudio. Á itádde na ittam kâ Apu Kesu Kiristu, tapè sittam ngámin yù kunnay ta baggi na, áнна naggigittá ittam gapay nga mesipà sù ngámin nga napiá nga initabbá ni Namarò.*

⁷ Á gapu ta pangikállà ni Namarò nikán, iniyawá na nikán yù pakáwayyâ nga masserbi kuna, tapè umayá mangilayalayâ sù napiá nga dámak megapu sù pakáwayyâ na áнна ángxngabbák na nikán. ⁸ Á kunniaw yù pangikállà na nikán, ta mássiki nu sikán yù kagukárán ta ngámin nga tatole ni Namarò, á iniyawá na nikán yù pakáwayyâ, tapè ilayalayâ ku nikayu nga ari Kudio yù nepallà nga ángxngikállà na nittam, áнна yù ángxngiddù na nittam, áнна yù alluárán na nittam nga awán ta kárik piá na, megapu kâ Apu Kesu Kiristu. ⁹ Á si Namarò nga namarò ta ngámin, aggina yù naddok nikán, ta ek ku ipakánnámmu sù ira ngámin nga tatolay yù egga ta nonò na, nga inilímak na ádde ngaw, nga talákkurugan na nga akkuán. ¹⁰ Á sittam nga nepattatádday kâ Apu Kesu Kiristu megapu sù pangikatalà tam kuna, sittam yù pangipasinganán ni Namarò sù ngámin nga pinalurò na, megapu sù pangikállà na. Á yù ira makáwayyâ nga ari masingan nga aijan ta lángi nga mammaguray sù ira daroban, pakasingad da sù ngámin nga pinalurò ni Namarò megapu nittam nga mangikatalà kuna, á kánnámmuád da ta aijan kâ Namarò yù monak nga makkakerumá nga sírik na nga makapállà, nepatalugáring ta masingad da ta nepattatádday ittam, nga Kudio áнна ari Kudio, megapu sù pangikatalà tam kâ Namarò. ¹¹ Ta yáyù ninonò ni Namarò, nga talákkurugan na ádde ngaw lage na namarò ta dabbuno, á pinalurò nen yù ngámin nga ure na megapu kâ Apu Kesu Kiristu nga Yápu tam.

¹² Á gapu ta netádday ittam kâ Apu Kesu Kiristu, mappelò ittam nga makimállà kâ Namarò, ta ammu tam ta ginnán na yù ipakimállà tam kuna megapu sù pangikatalà tam kâ Apu Kesu. ¹³ Á yáyù nga kagiak ku nikayu ta ari kayu mapállà nga maraddam, mássiki nu ajjanà nga marigirigá ta ábbalurán, megapu sù pangabbák ku nikayu. Patattaman naw laguk yù nonò naw, ta ammu naw ta mabbalin ta kapiánán naw áнна yù karáyo naw yù ngámin nga jigâ nga attamák ku megapu nikayu.

Yù Ipakimállà ni Pablo nga Meyannung sù Ángxngiddù ni Apu Kesu Kiristu nittam

¹⁴ Á mamalittúkagâ nga maddáyaw kâ Namarò nga Yáma tam ta pakanonò ku sù pinalurò na megapu sù pangikállà na nittam. ¹⁵ Ta aggina yù paggapuán nayù áwwawági nayù ira ngámin nga máttatáma nga aijan ta lángi áнна dabbuno. ¹⁶ Á yawe ipakimállà ku kâ Namarò, ta pasikanan na kayu nga katággitádday, megapu sù pakáwayyâ na nga makapállà, tapè mapasigaggâ yù ángxngikatalà naw kâ Apu Kesu megapu sù ángxngabbák nayù Mangilin nga Ikararuá na nga maggián nikayu nga katággitádday.

¹⁷ Á yawe gapay ipakimállà ku, ta itulù naw yù nonò naw kâ Apu Kesu Kiristu, tapè mepulù si Apu Kesu nikayu, nga mammaguray ta nonò naw, megapu sù pangikatalà naw kuna. Á parè bì gapay ta mapasigaggâ yù ángxngiddù naw kâ Apu, áнна mapasigaggâ gapay yù ángxngiddù naw sù ira kábulun naw, ¹⁸ tapè maparubán naw áнна kánnámmuán naw gapay yù makapállà nga ángxngiddù ni Apu Kesu Kiristu nittam ngámin nga tatole ni Namarò, nga napasigaggâ nga awán ta ádde na. ¹⁹ Á parè bì ta kánnámmuán naw yù ángxngiddù ni Apu Kesu Kiristu nittam, mássiki nu arát tam awáyyâ nga kánnámmuán yù ngámin nga pagáddekán na, á parè bì ta matagenà naw yù ángxngiddù na nittam ta kággággaw ta ádde ta kesipà tam sangaw kâ Namarò.

* 3:6 Kolosi 1:26-27

²⁰ Dayawat tam si Namarò, ta aggina yù makáwayyá nga mamalurò ta aru ánnè sù ngámin nga manonò tam áнна ipakimállà tam kuna, megapu sù makapállà nga pakáwayyá nayù Mangilin nga Ikararuá na nga makipaggián nittam nga mangabbák. ²¹ Á dayawat tam si Namarò gapu ta pinattatádde na ittam megapu sù pangikatalà tam kâ Apu Kesu Kiristu, á dayawat tam si Namarò gapay megapu kâ Apu Kesu. Meparáyaw si Namarò ta áddè ta áddè! Ammán.

4

Nepattatádday yù Nonò nayù ira nga Mangikatalà kâ Apu Kesu

¹ Á yawe laguk yù itabarang ku nikayu, sikán nga nabáluk megapu sù panguruk ku kâ Apu Kesu. Napiá nu akkuát tam yù napiá, nga kunnay ta mepángngà sù ira tatolay nga inagálán ni Namarò ta tatole na. ² Á tumulutulù ittam áнна makkaká-allà ittam. Á ari ittam mapporay, ngam makkakápasensíá ittam áнна makkakápakomá ittam megapu sù pakkaká-iddù tam. ³ Á ipe tam yù urà tam nga ari ittam malurá nga manuppál sù áwwawági tam, gapu ta netádday ittam megapu sù Mangilin nga Ikararuá, tapè mepagimammá ittam.

⁴ Á sittam nga netádday kâ Apu Kesu Kiristu, yá keyarigát tam yù baggi na nga táttádday lá. Á táttádday lággapay yù Ikararuá ni Namarò nga aijan nittam. Á inagálán na ittam gapay sù táttádday lá nga iddanamát tam, nga kesipà tam kâ Namarò, ta yáyù inipagágál na nittam. ⁵ Á táttádday lá yù Yápu tam nga si Apu Kesu Kiristu, gapu ta aggina lá yù ikatalà tam nga táttádday. Á mamittán lá yù karigù tam, á táttádday lá yù gapu na, tapè mepasingan yù panguruk tam kâ Apu Kesu. ⁶ Á táttádday lá si Namarò, nga Yáma tam ngámin nayù ira tatole na. Aggina yù kotunán nga mammaguray ta ngámin, nga manotolay ta ngámin, áнна mepaggián nittam nga mamalurò sù ngámin nga ure na megapu nittam.

Makkakerumá yù Pakáwayyá tam

⁷ Á inisinek na nittam ni Apu Kesu Kiristu yù makkakerumá nga pakáwayyá tam, nga iniyawá na nittam nga katággítádday nga mepángngà kuna, nga meyanung ta ikáyá na. ⁸ Á yáyù gemma yù kebalinán nayù kinagi na ngaw ni Namarò nga meyanung kâ Apu Kesu. Aijan nga netúrâ nga kunnaw: “Panoli na ta kotunán nga gián ta lángi, aru yù ira náppù nga ginápù na áнна inipulù na tapè masserbi ira kuna, á inisinek na sù ira tatole na nga katággítádday ta dabbuno yù napiá nga makkakerumá nga pakáwayyá na.”*

⁹ Á asinni panò yù kagian na nga nattoli ta kotunán nga gián ta lángi, nu ari si Apu Kesu Kiristu nga napolu nga naggapu ta lángi, nga minuluk ta konagán nga gián ta dabbuno? ¹⁰ Á aggina nga minuluk ta konagán nga gián ta dabbuno, aggina gapay yù nattoli ta kotunán nga gián ta lángi, tapè palurotan na yù pakáwayyá na nga manaron ta ngámin, ta aggina yù kotunán nga makáwayyá nga mammaguray ta ngámin nga egga.

¹¹ Á danniw yù inisinek ni Apu Kesu sù ira tatole na, nga makkakerumá nga pakáwayyá ra, ta sinullà na yù ira olu nga sinudduán na, nga iniddán na ta pakáwayyá ra nga mangipakánnámmu kuna. Á sinullà na yù ira ábbilinán na nga mangipakánnámmu sù nelímak nga ipalappá ni Namarò nira. Á sinullà na yù ira nga umay mappassapassiár ta arayyu nga lugár nga mangilayalayá sù napiá nga dámak, tapè patuttulad da yù ira tatolay kâ Apu Kesu. Á sinullà na yù ira natagatán nga iniddán na ta pakáwayyá ra nga manaron áнна manabarang sù ira tatole na, áнна sinullà na gapay yù ira mangituddu sù bilin na. ¹² Á yá ipangiyawá na sù pakáwayyá tam, tapè maparán ittam ngámin nga makkaká-abbák. Á ta kunnian, makkakátabarang ittam, áнна mapasigaggá yù ángngikatalà tam kâ Apu Kesu Kiristu, sittam nga meyarík ta baggi na. ¹³ Á mepattatádday ittam laguk megapu ta pangikatalà tam, áнна malannapán yù pakánnámmu tam nga meyanung sù Aná ni Namarò. Á tulluá ittam ta áddè ta pareku nga napiá yù nonò tam áнна ággangnuá tam, nga kunnay ta ággangnuá ni Apu Kesu Kiristu.

¹⁴ Á nu napasigaggá yù ángngikatalà tam kâ Apu, ari ittamin yù kunnay ta abbing, nga mattá-iki-ikáyá nga malogon nga tumuttul ta makkakerumá nga ituddu nayù ira tatolay nga minángngilogò. Ta aijan garè yù ira áppè masírik, nga umay mangituddu, á ilogò da yù ira tudduá da megapu ta passirisiri ra. ¹⁵ Ngam sittam, gapu ta pakkaká-iddù tam, ubobugat tam yù kuruk nga bilin ni Apu, tapè tulluá ittam ta áddè ta paggigittá tam yù nonò tam áнна yù kustombare tam ta nonò ni Apu Kesu Kiristu áнна yù kustombare na. Ta

* 4:8 Salmo 68:18

meyárik si Apu Kesu ta ulu tam, nga mammaguray nittam. ¹⁶ Á sittam nga makiyápu kuna, yá keyarigát tam yù baggi na, nga napiá yù áttutuppang nayù ira tuláng na ána yù ira ugá na. Á nu akkuán nayù ira tuláng ána ugá yù ipakuá nayù yápu ra, tulluá laguk yù baggi na nga massikan. Á kunnian yù ággiát tam. Nu makkaká-iddù ittam ána makkaká-abbák ittam, á mapasiggagá yù ángngikatalà tam.

Napiá yù Nonò nayù ira Mangikatalà ána yù Akkuád da

¹⁷ Á yawe laguk yù kagiak ku nikayu, nga ipakagi ni Apu Kesu níkan. Máwák nga arán nawin tuttulan yù kustombare nayù ira nga ari manguruk kâ Apu, ta awán ta serbi nayù nonotad da ána yù akkuád da. ¹⁸ Á kunnay ta kallá yù nonò da. Á ari ira mesipá sù bagu nga áttolay nga iyawá ni Namarò sù ira mangikatalà kuna, gapu ta nataggá yù ulu ra, ána arád da kánnámmuán yù ure ni Namarò. ¹⁹ Awán ta áppasirád da, ána itulú da yù baggi ra ta naráké nga karagatád da. Á ari ira makáppak nga mangnguá ta makkakerumá nga naráké nga karagatád da.

²⁰ Ngam sikayu nga manguruk, ari kunnian yù ginigiámmu naw ta meyanung kâ Apu Kesu Kiristu! ²¹ Ta naginná nawin yù meyanung kâ Apu Kesu, ána netuddu nikayu yù kuruk nga bilin na, nga kurugan naw. ²² Likurán naw laguk yù naráké nga karagatán na baggi naw ána yù ngaw ággangnguá naw nga naráké, maraké melogò kayu megapu ta naráké nga karagatán naw, ána mabbáli kayu ta naráké. ²³ Á tumulú kayu sù Mangilin nga Ikararuá, tapè molí yù nonò naw, megapu sù ángngabbák nayù Ikararuá ni Namarò nikayu, ²⁴ ána molí gapay yù ággangnguá naw ána yù ikáyá naw, tapè mabbáli kayu ta tatolay nga pinarò ni Namarò ta kágappá na, á mepasingan ta matunung kayu, ána kuruk nga napiá yù nonò naw, nga kunnay kâ Apu Namarò, nga awán ta naráké kuna.

²⁵ Á sittam nga mawwawági megapu sù ángnguruk tam, yáyu nga tukkatat tam laguk yù passirisiri tam sù ira kábulut tam, á kagiát tam lá yù kuruk, gapu ta nattatádday ittam, nga kun na baggi ni Apu Kesu. ²⁶ Á nu mapporay ittam, palannáwat tam yù nonò tam, tapè arát tam akkuán yù naráké. Ari ittam maggián ta tangatangággaw nga mapporay, ²⁷ tapè awán ta awayyá ni Satanas nga kuriruan yù nonò tam.

²⁸ Á nu aijan nikayu yù tolay nga minákkokò, á tukkatan na yù pakkokò na, á malláppá laguk nga mattarabáku ta napiá, tapè aijan yù meyawá na sù ira magáwák. ²⁹ Á ari ittam magubobuk sù naráké, ngam ubobugat tam lá yù napiá nga mepángngá, tapè abbágát tam yù ira makaginná sù kagiát tam. ³⁰ Á arát tam paddaddaman yù nonò nayù Mangilin nga Ikararuá ni Namarò. Ta gapu ta maggián yù Ikararuá ni Namarò nittam nga katággitádday nga mangikatalà kâ Apu, aggina yù panákkilalán ta sittam yù tatole ni Namarò. Á gapu ta keggá na nittam, ammu tam ta kuruk nga palubbáangan ni Namarò ittam, tapè mesipá ittam sù ira tatole na sangaw nu manoli si Apu Kesu ta dabbuno.

³¹ Anugutan naw laguk yù pangabbák nayù Mangilin nga Ikararuá, tapè mári yù nakujjá nga nonò naw. Ari kayu mapporay, á ari kayu maddaráma. Arán naw pakkakagián yù ira kábulun naw, á arán naw ira lillibatan. Á irián naw yù ngámin nga naráké nga nonò naw, nepatalugáring yù lusso naw. ³² Á makkaká-iddù ittam laguk ána makkaká-allá ittam. Á makkakápakomá ittam gapay, nga kunnay ta pamakomá ni Namarò nittam, megapu kâ Apu Kesu Kiristu.

5

Yù Akkuán nayù ira Tatolay nga Nanawagán yù Nonò da

¹ Á gapu ta áná na ittam ni Namarò nga iddukan na, á párigát tam laguk si Namarò nga Yáma tam. ² Á makkaká-iddù ittam, gapu ta iddukan na ittam ni Apu Kesu Kiristu. Á kunniawe yù ángngiddù na nittam. Initapil na yù baggi na megapu nittam. Á kunnay ta nabanguk nga neyátáng kâ Namarò yù ketapil na.

³ Á gapu ta tatole ni Namarò ittam, arát tam akkuán yù naráké nga karagatán na baggi tam onu mangarallow onu magukkuk, ána ari mepángngá nu aijan nikayu yù magubobuk ta kunnian nga naráké, ta ari mepángngá sù ira tatole ni Namarò. ⁴ Á ari gemma mepángngá nu naráké yù ággubobuk tam, onu ubobugat tam yù awán ta serbi na, onu ilapalapak tam yù naráké. Ari kunnian laguk yù ággubobuk tam, ngam magubobuk ittam sù áddáyo tam kâ Namarò, ta ari ittam makabalabála kuna megapu sù pangikállá na nittam. ⁵ Á ammu naw gemma ta ari mesipá sù pammagure ni Apu Kesu Kiristu ána yù pammagure ni Namarò yù ira tatolay nga mangnguá ta naráké, ána yù ira minánggarallow, ána yù ira nokkuk gapay. Ta arád da si Namarò pakimorayán, nu ari galá nga pakimorayád da lá yù baggi ra ána yù karagatád da nga ukukuran, á kunnay ira sù ira makimoray ta sináddios.

⁶ Á sikayu, ari kayu laguk makilogò sù ira tatolay nga makkagi ta ari kuruk nga narákè yù ira nga kunnian yù akka-akkuád da, ta dán nga napanán yù pore ni Namarò sù ira ngámin nga mamotu kuna ána mangngúá ta narákè, á ukuman na ira sangaw. ⁷ Ari kayu laguk makikábulun sù ira tatolay nga mangngúá ta narákè nga kunnian.

Si Apu yù Mamannawák ta Nonò tam

⁸ Á sikayu, sù ngaw, kunnay ta kallà yù nonò naw. Ngam kunangane, manawagánin yù nonò naw megapu sù pangikatalà naw ká Apu Kesu Kiristu. Akkuán naw laguk yù napiá nga mepángngà sù ira áná ni Namarò nga mesipá sù nawák na. ⁹ Ta yù tolay nga nanawagánin yù nonò na, sigídá nga makkagi ta kuruk, ána matunung ána napiá gapay yù ággangngúá na. ¹⁰ Á gapu ta manawagánin yù nonò naw, talákkurugan naw laguk nga akkuán yù ammu naw nga ipagayáyá ni Namarò.

¹¹ Á ari kayu mepulupulù sù ira tatolay nga kun na kallà yù nonò da, gapu ta awán ta serbi nayù akkuád da. Ngam ipasingan naw yù napiá nga akkuán naw, tapè mepasingan ta narákè yù akka-akkuád da. ¹² Ta mappasirán kayu mássiki nu ubobugan naw lâ yù narákè nga akkuád da nga ilímak da, pappanganá nu akkuán naw nakuan. ¹³ Ngam nu masingad da yù napiá nga akkuán naw, á matákkilalád da yù narákè nga akka-akkuád da, á manawagánin yù nonò da gapay sangaw. ¹⁴ Ta nu mánnámmuád da sangaw yù pakáwayyá ni Apu Kesu nga mamannawák ta nonò na tolay, ána tumulù ira kuna, á pannawagan na gapay yù nonò da.

Á aijan yù netúrâ nga kunniaiw:

“Sikaw nga kunnay ta nakkaturuk, mallukák ka laguk.

Gumikkáng ka, nga maggapu sù ira námmatay.

Ta pannawagan ni Apu Kesu Kiristu yù nonò mu.”

¹⁵ Magimuguk ittam laguk, ta arát tam párigán yù akkuán nayù tolay nga ulapá. Akkuát tam lâ yù napiá nga kunnay sù akka-akkuán nayù tolay nga masírik, nga nonotan na yù pabbalinán nayù akkuán na. ¹⁶ Á arát tam lonán yù awayyá tam nga manuppál sù napiá nga ipagayáyá ni Namarò, nepatalugáring kunangane, ta aru garè yù ira mangngúá ta narákè.

¹⁷ Á yáyù nga arát tam laguk párigán yù ággangngúá nayù ulapá, ngam kánnámmuát tam yù ure ni Apu, tapè tángngagat tam yù ipakuá na nittam. ¹⁸ Á ari ittam laguk magillellaw. Ta ari gemma mábbágán yù tolay megapu ta pappissán na, nu ari galâ ta darálan na yù baggi na. Ngam tumulù ittam sù Mangilin nga Ikararuá ni Namarò, tapè aggina yù mammaguray nittam.

¹⁹ Á gapu ta pammagure nayù Mangilin nga Ikararuá ta nonò tam, nu makkaká-ubobuk ittam, ubobugat tam yù pagayáyá tam ká Apu. Á ikansiot tam yù Salmo nga Kansion ni Patul Dabid ána yù kansion nga meyanung ta allá ni Apu nittam ána yù ángngiddù na. Á ipe tam yù urà tam nga maddáyaw kuna. ²⁰ Á gapu ta pangikatalà tam ká Apu Kesu Kiristu nga Yápu tam, dayáwat tam si Namarò nga Yáma tam, ta awán ta awayyá tam nga mabbalabálá kuna. Dayáwat tam laguk ta kággággaw megapu sù ngámin nga mesimmu nittam, mássiki yù jigá tam.

Yù Meyanung sù ira Magatáwa

²¹ Á makkakátulù ittam, megapu sù pakimore tam ká Apu Kesu Kiristu. ²² Á sikayu nga bábbay nga aijan yù atáwa na, tumulù kayu sù atáwa naw, nga kunnay gapay ta áttulù naw ká Apu. ²³ Ta yù laláki yù mammaguray sù atáwa na, nga kunnay ta mammaguray si Apu Kesu sù ira ngámin nga mangikatalá kuna. Ta sittam ngámin nga netádday ká Apu yù kun na baggi na, á aggina lápay yù mangiyigù nittam. ²⁴ Á yù ira bábbay, tumulù ira laguk sù atáwa ra ta ngámin nga meyanung nira, nga kunnay nittam ngámin nga mangikatalà, nga tumulù gapay ká Apu Kesu Kiristu.

²⁵ Á sikayu nga láláki, iddukan naw yù ira atáwa naw ta kunnay sù ángngiddù ni Apu Kesu Kiristu nittam ngámin nga netádday kuna. Á kunniaiw yù ángngiddù na nittam, ta initapil na yù baggi na megapu nittam, ²⁶ tapè tatole ni Namarò ittam. Á napakomá ngin yù liwá tam. Á pinakarenuán na yù nonò tam, megapu ta panguruk tam sù bilin na, ána megapu sù pakirigù tam ta danum, nga pangipasinganát tam ta panguruk tam kuna. ²⁷ Á yá ipamakarenu na nittam ni Apu Kesu, tapè alawatan na ittam, nga nakástá ta ánnanganán na, nga kunnay ta pangalawá nayù nobiu sù atawán na, tapè pareku nga napiá ittam nga awán bulubugá ta ipamaliwá na nittam, sangaw nu en na ittam apan nga ilabbè na ta gián na.

²⁸ Á sikayu nga láláki, yáyù nga iddukan naw yù ira atáwa naw ta kunnay ta ángngiddù naw ta baggi naw. Ta yù laláki nga mangiddù ta atáwa na, iddukan na gapay yù baggi na. ²⁹ Á awán gemma ta tolay nga lonán na yù baggi na, ngam pakanan na ána iddukan na ta

napiá. Á kunnian gapay yù ángngiddù ni Apu Kesu Kiristu nittam nga mangikatalà kuna, ³⁰ ta netádday ittam nga kun na baggi na.

³¹ Á aijan yù dán nga netúrâ nga bilin ni Namarò, nga kunniaw: “Nu mangatáwa yù tolay, yáyù gapu na nga panawán na yù ira darakal na, tapè umay metádday sù atáwa na. Á yù ira magatáwa, kun na tátádday yù baggi ra.”* ³² Á monak yù kagian na nga nelímak yù kebalinán na. Ngam ta urè, ubobugan na yù meyanung kâ Apu Kesu Kiristu ána sittam nga netádday kuna megapu sù pangikatalà tam. ³³ Á yawe gapay yù kebalinán na. Sikayu nga láláki nga egga yù atáwa na, iddi-iddukan na yù atáwa na, nga kunnay ta ángngiddù na ta baggi na. Á sikayu nga bábbay nga egga yù atáwa na, pakimorayán na yù atáwa na.

6

Meyannung sù ira Ábbing ána yù ira Darakal da

¹ Á sikayu nga ábbing, kurugan naw yù kagian nayù ira darakal naw, gapu ta kunnian yù panguruk naw gapay kâ Apu Kesu nga Yápu tam, ta yáyù ipakuá ni Namarò nikayu. ² Á aijan yù taddán ni Namarò, nga olu nga taddán na nga egga nga mepulù kuna yù napiá nga pabbalinán na nga initabbá ni Namarò sù ira nga manguruk. Ta kinagi ni Namarò, “Pakimorayán naw yù ira darakal naw, ³ tapè napiá yù ággián naw ána matolay kayu ta nabayák ta utun na dabbun.”*

⁴ Á sikayu nga aijan ánâ na, arán na ira papporayán ta mabayák, marakè mapappore na ira. Ngam tudduán naw ira ána tabarangán naw ira ta meyanung sù napiá nga ipakuá ni Apu Kesu nittam.

Meyannung sù ira Aripán ána yù ira Yápu ra

⁵ Á sikayu nga aripán, pakimorayán naw yù ira yápu naw, á ipe naw yù urà naw nga manuppál sù ipakuá ra nikayu, tapè napiá yù ásserbi naw nira, nga kunnay ta si Apu Kesu Kiristu yù passerbián naw. ⁶ Á akkuán naw yù ngámin nga ipakuá nayù pattarabakuán naw, mássiki nu arán na kayu masingan, gapu ta mebiláng kayu ta aripán ni Apu Kesu Kiristu. Yáyù nga máwák laguk nga ipe naw yù urà naw nga manuppál sù ngámin nga ipakuá nayù tolay nikayu, ta yáyù urè na gapay ni Namarò. ⁷ Malláppa kayu laguk nga masserbi sù ira paggianán naw, nga kunnay ta ari tolay yù passerbián naw nu ari galá si Apu Kesu. ⁸ Á ammu tam gemma ta bálatan ni Apu Kesu yù tolay nga mangnuá ta napiá, mássiki nu aripán onu ari aripán.

⁹ Á sikayu laguk nga aijan yù aripán na, á kunnay sù kinagi sù ira masserbi nikayu, kunnian gapay yù pakimore naw nira. Arán naw ira ananássingan, ta yù kuruk nga Yápu naw, nga aijan ta lángi, aggina galá yù Yápu ra gapay, á awán gemma ta paddurumán na nga tolay.

Yù Pakigerrá ni Satanas nittam

¹⁰ Á yawe yù maporián nga kagiak ku nikayu. Gapu ta nepattatádday ittam kâ Apu Kesu Kiristu, ikatalà tam laguk ta mangabbák nittam, tapè mapasigaggá yù ángnguruk tam kuna. Ta aggina yù kasikanán nga makáwayyá, á pasikanan na ittam, megapu sù sikan na ána pakáwayyá na. ¹¹ Á gapu ta kunnay ta makigerrá di Satanas nittam, á pinarán ni Namarò yù ángngabbák na nittam, nga kun na ármás ána kalátak na mengal, nga iniyawá na nittam. Ikatalà tam laguk si Namarò ána iyusá tam yù kun na ármás nga iniyawá na nittam, tapè arán ni Satanas ittam appútan, ána ari ittam melogò, nu parubán na ittam ni Satanas nga sestemán. ¹² Ta ari tolay yù makigerrá nittam, nu ari galá di Satanas ána yù ira narákè nga anitu ána dimoniú nga daroban na, ána yù ira káruán nga narákè nga makapangnuá nga ari masingan, nga aijan ta lángi. Aggira yù mammanuray sawe dabbuno sù ira tatolay nga kun na nakallá yù nonò na. ¹³ Á yáyù nga alawatat tam laguk ngámin yù iniyawá ni Namarò, nga kun na ármás na mengal ána yù barawási na nga balayáng, tapè dán nga naporán ittam, mássiki nu pappanatan ni Satanas yù narákè nga akkuán na nittam. Á nu mabalinin, á manáddak ittam lâ paga nga ari náppu.

Yù Meyárik ta Barawási na Mengal ána yù Ármás na

¹⁴ Maggián ittam laguk nga dán nga naporán, tapè makáwayyá ittam nga manáddak nga ari máppu, nga kun na mengal nga umay makigerrá. Manáddak ittam laguk, á ari ittam massiri, ngam kagiat tam lâ yù kuruk, nga kun na barakà nga naláddá ta awà tam. Á yù matunung nga nonò tam ána yù napiá nga akka-akkuát tam yù kun na barawási nga balayáng, nga

* 5:31 Genesis 2:24 * 6:3 Deuteronomio 5:16

nelippak ta gáko tam. ¹⁵ Á kunnay ta nassapátu ittam, nu dán nga naparán ittam nga umay mangipakánnámmu sù bilin ni Namarò nga meyanung ta pamakkápiá na sù ira tatolay kuna, megapu sù kingnguá ni Apu Kesu. ¹⁶ Á tangngalát tam yù melippak nittam nga kun na kalátak, nga yù napasigaggà nga ángngikatalà tam kâ Apu, tapè arán na ittam ni Satanas makanná ta pamuruburion na nittam. Ta gapu ta pangikatalà tam, á kunnay ta máddà tam yù ipána na nittam ni Satanas nga naggatang. ¹⁷ Á alawatat tam yù ángngiyígù ni Namarò nittam nga kun na balayáng nga taddung tam, tapè arán na ittam máwayá ni Satanas nga pabbáangan. Á kurugat tam yù bilin ni Namarò, nga ipanonò nayù Mangilin nga Ikararuá nittam, nga kun na nataram nga bayuneté nga duá yù ngarak na.

¹⁸ Á sigidá ittam laguk makimállà kâ Namarò, maguray lâ yù mesimmu nittam, ta abbágán na ittam ta meyanung ta ngámin nga máwák tam ána akkuát tam. Ta abbágán na ittam nayù Mangilin nga Ikararuá ta pakimállà tam, á ipakánnámmu na nittam yù ure ni Namarò, tapè mepángngá yù ipakimállà tam. Á sittam laguk yù kunnay ta matturá, nga ari malurá nga makimállà, tapè tángngagat tam yù ipakimállà tam megapu sù ira ngámin nga kábulut tam nga tatole ni Namarò.

¹⁹ Á sikayu, ipakimállà nawà gapay, ta abbágán nangà ni Namarò ána ipakánnámmu na nikán nu kunnasi yù ággubobuk ku, tapè aringà maganássing, ngam mappelokà nga mangipakánnámmu sù monak nga bilin na nga nelímak ta nabayák, nga napiá nga dámak nga meyanung sù pakkápiá tam kâ Namarò megapu kâ Apu Kesu Kiristu. ²⁰ Ta jinok nangà ni Apu, nga pannakabaggi na, nga mangilayalayá sù bilin na. Á yáyù nga pinukù dangà sawe ábbaluran, megapu sù pangilayalayá ku. Á ipakimállà nawà laguk, tapè mappelokà nga mangilayalayá sù bilin ni Namarò, nga kunnay ta ipakuá na nikán.

Yù Kabalin nayù Túrâ

²¹ Á gapu ta ammu ta ikáyâ naw marámak yù ággiák ku ána ngámin nga nesimmu nikán, á yáyù nga umay si Tikiko nikayu, nga wagi tam nga iddukat tam, megapu sù pangikatalà na kâ Apu Kesu. Aggina yù pangikatalakán nga masserbi kâ Namarò, nga mangabbák nikán ta ngámin nga ipatarabáku ni Namarò nikán. Á ipakánnámmu na sangaw nikayu yù ngámin nga meyanung nikán. ²² Á yáyù nga dobak ku ta umay ta gián naw, tapè marámak naw yù ngámin nga meyanung nikami saw ána mabannáyán ána mapattattam yù nonò naw.

²³ Á sikayu nga wáwwagi megapu sù ángnguruk tam, parè bì ta abbágád da kayu di Ammò Namarò kâ Apu Kesu Kiristu, tapè napasigaggà yù ángngikatalà naw. Á parè bì ta pagimammatad da yù nonò naw, tapè napiá yù ággián naw, ána makkaká-iddù kayu. ²⁴ Á parè bì ta ikákkállà na kayu ni Namarò, sikayu ngámin nga mangiddù kâ Apu Kesu Kiristu nga Yápu tam ta áddè ta áddè.

Yù Túrâ ni Pablo sù ira Manguruk nga Taga Pilippay

Yù Meyannung sawe Túrâ

Yù ili na Pilippay yù olu nga labbetán ni Pablo sù ánge na pangilayalayâ ta purubinsia na Masidonia. Á aru yù ira tatolay tán nga nanguruk sù bilin ni Namarò. Aggira yù olu nga naggagammung ta káda Ligu, tapè makimoray ira kâ Namarò.

Á aijan si Pablo nga nebáluk ta pangitúrâ na sawe. Á keggá na ta karsel, arán na ammu nu mapalubbáng sangaw, onu mapapátay. Á aijan yù ira mangilayalayâ nga mappeggung ána makikontará kâ Pablo gapu ta mangabubu ira kuna. Á aijan gapay yù ira nga mangituddu, nga ituddu ra lâ yù naggapu ta nonò da ánnè sù kuruk nga bilin ni Namarò. Á pattúrâ ni Pablo, pinappalán na yù ira taga Pilippay, marakè melogò ira megapu nira (3:2-11).

Á mássiki nu aijan si Pablo ta karsel, ari maraddam nu ari galâ magayáyâ, ta aijan yù napiá nga iddanamán na megapu sù pangikatalà na kâ Apu Kesu. Á sinabarangán na yù ira tatolay ta magayáyâ ira gapay megapu sù pangikatalà da, ta yáyù ipakuá ni Namarò nittam (4:4-7).

Yù Mayán na yawe Túrâ

Yù Paddios ni Pablo ána yù Ipakimállà na (1:1-11)

Yù Ággián nayù ira nga Mangikatalà kâ Apu Kesu (1:12-30)

Párigát tam yù Nonò ni Apu Kesu (2:1-18)

Yù Meyannung kári Timotio kâ Epruđito (2:19-30)

Mangikatalà ittam kâ Apu Kesu (3:1-4:9)

Yù Pabbalabálà ni Pablo sù ira Mangabbák kuna (4:10-23)

Yù Paddios ni Pablo sù ira Túratán na

¹ Aijan kami, di Pablo kâ Timotio, nga masserbi kâ Apu Kesu Kiristu. Á mattúrâ kami nikayu nga taga Pilippay, sikayu ngámin nga tatole ni Namarò nga mesipà kâ Apu Kesu Kiristu, ána yù ira kátannangán naw ána yù ira natullà nga mangabbák. ² Á parè bi ta ikákkállà da kayu di Namarò nga Yáma tam ána si Apu Kesu Kiristu nga Yápu tam, tapè napiá yù ággián naw ána gawagawáyán naw.

Yù Pakimállà ni Pablo

³ Á ta ngámin nga pakanonò ku nikayu, mepallà yù paddáyò kâ Namarò megapu nikayu. ⁴ Á ta ngámin nga pakimállà ku megapu nikayu, magayáyákà nga maddáyaw kâ Namarò, ⁵ gapu ta napiá yù ángngabbák naw níkan ta pangilayalayâ ku sù napiá nga dámak nga meyannung kâ Apu Kesu Kiristu. Ta inabbágán nawà ta áddè ngaw pamegapu naw nga manguruk, ta áddè kunangan. ⁶ Á si Namarò yù mangipakuá nikayu ta napiá nga akkuán na, á ammù gemma ta uputan ni Namarò yù napiá nga tarabáku na nga pinegapuanán na ta nonò naw áddè ta kapalurò na sangaw nu duttál yù ággo na pattoli ni Apu Kesu Kiristu ta dabbuno.

⁷ Á gapu ta nepallà yù ayá ku nikayu, mepángngà ta nonopat takayu. Ta sikayu ngámin yù mesipà níkan sù ipatarabáku ni Namarò níkan, nga pangilayalayâ ku ta kuruk nga meyannung kâ Apu Kesu áddè ngaw aringà paga nebáluk, á abbágán nawà paga kunangane gapay sù kebáluk ku. ⁸ Á si Namarò yù makasistígu ta kuruk yù kagiak ku, ta nerallà yù daddam ku gapu ta ikáyá takayu masingan, ta iddi-iddukat takayu ta kunnay sù ángngiddù ni Apu Kesu Kiristu nittam.

⁹ Á yawe ipakimállà ku kâ Namarò, ta mapasigaggà yù pakkaká-iddù naw ána malan- napán yù kánnámmuán naw nga kuruk nga meyannung kâ Namarò, tapè matákkilalán naw ána pilian naw lâ yù napiá. ¹⁰ Á nu matákkilalán naw yù napiá, á makáwayyá kayu nga mappili sù kapiánán, á pareku nga napiá laguk yù nonò naw, á awán ta pakaliwatán naw. Á nu kunnian yù akkuán naw, dán nga napanán kayu laguk sù ággaw nga pattoli ni Apu Kesu Kiristu, nga awán ta liwá naw. ¹¹ Á parè lâ ta mapalurò naw yù ngámin nga napiá nga ipakuá ni Apu Kesu Kiristu nikayu, megapu sù ángngabbák na nikayu, tapè maddáyaw yù ira tatolay kâ Namarò megapu sù napiá nga akkuán naw.

Yù Ággián nayù ira nga Mangikatalà kâ Apu Kesu

¹² Á wáwwagi, ikáyá ku nga ipakánnámmu nikayu ta napiá lâ yù pabbalinán nayù ngámin nga nesimmu níkan, mássiki yù jigá ku ána kebáluk ku saw, gapu ta nassamasamá yù napiá nga dámak nga meyannung kâ Apu Kesu. ¹³ Á yù ira ngámin nga suddálu nga magguárdiá

sù bale nayù gubinador ána yù ira káruán nga tatolay gapay, ammu ren yù gapu na nga ipangibáluk da níkan, nga megapu lá sù panguruk ku ká Apu Kesu Kiristu. ¹⁴ Á yáyù nga mapasigaggà yù pangikatalà da ká Apu Kesu nayù ira káruán nga wáwwagi tam, gapu ta masingad da yù pagattam ku ta jigà sawe ábbaluran, á matattam iren gapay nga ari maganássing nga mangilayalayà sù bilin ni Namarò.

¹⁵ Á kuruk garè ta aijan gapay yù ira káruán nga mangilayalayà sù meyanung ká Apu Kesu Kiristu, nga ari megapu sù napiá nga nonò da, nu ari galá megapu sù pangabubu ra ána passil da níkan. Ngam aijan yù ira káruán nga mangilayalayà, nga napiá lá yù nonò da, ta kuruk nga ikáyá da nga ipakánámmu sù ira tatolay yù napiá nga dámak. ¹⁶ Á ilayalayà da si Apu Kesu Kiristu megapu sù ángngiddù da ká Apu ána ángngiddù da níkan, ta ammu ra ta sinullà nangà ni Namarò nga pine na saw, tapè síkán yù manabbák sù ira marririri sù bilin na. ¹⁷ Ngam yù ira káruán, áppè pípiá ira nga mangilayalayà ta meyanung ká Apu Kesu, tapè meparámak ira ána tumuttul yù ira tatolay nira. Á ikáyá da nakuan nga malannapán yù jigà ku sawe ábbaluran megapu sù akkuád da. ¹⁸ Ngam síkán, attamáku lá. Ta magayáyáká galá, gapu ta melayalayà si Apu Kesu Kiristu, mássiki nu anni yù egga ta nonò nayù ira mangilayalayà, nu napiá ira, onu áppè pípiá ira.

¹⁹ Á magayáyáká lállaguk, mássiki nu marigirigáká, gapu ta ammu ta napiá lá yù pabbalinán nayù ngámin nga mesimmu níkan, megapu sù ipakimállà naw ká Namarò ána yù ángngabbák nayù Ikararuá ni Apu Kesu Kiristu níkan. ²⁰ Á yawe yù kuruk nga ikáyá ku ána iddanamáku ku, ta awán bulubugá ta akkuák ku nga kepasiránák ku ta ánnanganán ni Namarò. Á parè bì ta matattamá nga kunnay ta kustombarè ngaw ta áddè kunangan, tapè meparáyaw si Apu Kesu Kiristu megapu níkan, mássiki nu matolayá onu matayà.

²¹ Á nu matolayá, dayáwak ku si Apu Kesu Kiristu ána palurotak ku yù napiá nga ipakuá na níkan. Á nu matayá, más napiá yù ággiák ku, ta apan nangà ta gián na. ²² Á nu síkán nakuan yù mappíli, arák ku ammu yù píliak ku, nu matayá onu matolayá paga. Ta nu matolayá, uputak ku paga yù tarabákù tapè magaru yù ira nga manguruk ká Apu. ²³ Á mabbábángá nga mappíli, ta arák ku ammu yù píliak ku. Ta nu síkán lá, karagaták ku yù pánò nga umay mepaggián ká Apu Kesu Kiristu, ta yáyù kapiánán nga ággiák ku. ²⁴ Ngam nu nonopat takayu, ammù ta máwák naw nga maggiáná lá paga níkayu, tapè ábbágát takayu. ²⁵ Á yáyù nga ammù ta aringá paga matay, gapu ta máwák nga maggiáná níkayu nga mangabbák, tapè mangáppípiá yù ángnguruk naw ána mappaná yù pagayáyá naw megapu sù pangikatalà naw ká Apu Kesu. ²⁶ Á sangaw nu manolingá níkayu, yáyù nga mepallà laguk yù pagayáyá naw, ána maddáyaw kayu ká Apu Kesu Kiristu.

²⁷ Á maguray lá yù mesimmu, yawe yù máwák naw nga talákkurugan. Uputan naw nga akkuán yù kunnay ta mepángngà nittam nga manguruk sù napiá nga dámak nga meyanung ká Apu Kesu Kiristu. Á mássiki nu aringá makatoli ta gián naw, á marámak ku laguk sangaw ta nattatádday yù nonò naw, ána mapasigaggà yù ángnguruk naw ká Apu Kesu, á makkaká-abbák kayu nga mangipakánámmu sù napiá nga dámak, tapè aru yù ira makaginná nga manguruk gapay sù bilin ni Namarò. ²⁸ Á arán naw laguk ikássing yù ira mangontará níkayu. Ta nu ari kayu maganássing, á yáyù nga matákkilalád da ta pagikaruan na ira ni Namarò sangaw. Á tákkilalád da gapay ta síkayu yù iyígù ni Namarò nga mesipá kuna ta áddè ta áddè. ²⁹ Ta nepallá yù allá ni Namarò níkayu, á iniyawá na níkayu yù awayyá naw nga masserbi kuna, nga ari lá megapu sù panguruk naw ká Apu Kesu Kiristu, nu ari gapay ta magattam kayu ta jigà megapu sù pangikatalà naw kuna. ³⁰ Á nepaggittá kayu níkan, nga magattam ta jigà nga kunnay sù jigà ku ngaw, nga nasingan naw nga inattamáku ku ta keggá níkayu. Á narámak nawin yù jigà nga attamáku ku kunangane ta keggá sawe ábbaluran.

2

Párigát tam yù Nonò ni Apu Kesu nga Tumulù ána Mangikatalà

¹ Á gapu ta kepatatádde tam ká Apu Kesu Kiristu, aggina yù manabarang nittam. Á mabannáyán yù nonò tam megapu ta ángngiddù na nittam. Á napasigaggà yù áwwawági tam ána yù pakkaká-allá tam megapu sù kepulupulù nayù Mangilin nga Ikararuá nittam. ² Á yáyù nga pattatáddayan naw laguk yù nonò naw ána ure naw, á makkaká-iddù kayu. Á nu kunnian yù ággián naw, á nerallá yù pagayáyá ku megapu níkayu. ³ Á arán naw akkuán yù narákè nga naggapu sù pangabubu naw onu pappeddaráyo naw. Ta napiá lá nu makkakátulù ittam, á ibiláng tam ta napiá yù ira kábulut tam ánnè ta baggi tam. ⁴ Á sittam

nga katággítádday, ari lâ yù kapiánán na yù nonotan na, nu ari gapay yù kapiánán nayù ira kábulun na.

⁵ Á párigát tam laguk yù nonò ni Apu Kesu Kiristu.

⁶ Ta si Apu Kesu Kiristu, aggina galá si Namarò, ngam kunnay ta arán na tangngalán yù ággián na.

⁷ Ta nánawán na ngámin yù kukuá na áнна yù ággián na, á neyaná ta tolay, á naparubán na yù ággián na tolay, nga nebiláng ta aripan.

⁸ Á keggá ni Apu Kesu Kiristu ta dabbuno, nga kun na tolay yù ággián na, initulú na yù baggi na sù ure ni Namarò,

á pinalurò na yù ngámin nga inipakuá ni Namarò kuna, mássiki yù pate na nga nepátà ta kurú.

⁹ Á yáyù nga inipotun ni Namarò si Apu Kesu,

á iningágan na ta Kotunán nga Makáwayyá ánnè sù ira ngámin nga egga pakáwayyá na,

¹⁰ tapè mamalittúkak ira ta arubáng na áнна maddayaráyaw ira kuna,

aggira ngámin nga pinarò na nga aijan ta lángi áнна dabbuno áнна yù ira námmatay nga aijan ta unak na dabbuno.

¹¹ Á makkagi ira, nga kud da,

“Si Apu Kesu Kiristu yù Yápu tam ngámin.”

Á yáyù nga meparáyaw gapay si Namarò nga Yáma tam.

Si Namarò yù Mangabbák nittam ta Panguruk tam kuna

¹² Wáwwagi nga iddukak ku, gapu ta kunnian yù panguruk ni Apu Kesu Kiristu ká Namarò, á máwák tam gapay nga manguruk sù Yápu tam. Á sù keggá ngaw ta gián naw, kuruk nga napiá yù ángnguruk naw ta ngámin nga bilin ni Namarò nga inituddù nikayu. Á pappanganá ta káwák ku ta gián naw kunangan, talákkurugan naw laguk nga tuppálan yù ángnguruk naw. Á pakimorayán naw si Namarò, áнна uputan naw nga palurotan yù ngámin nga ipakuá na nikayu, tapè mánnámmuán naw yù ángngiyígú na áнна ángngisipá na nikayu. ¹³ Ta si Namarò yù mepulupulú nittam, á aggina yù mangabbák nittam, áнна iyawá na nittam yù pakáwayyá tam nga makkaragá áнна mamalurò ta ngámin nga ikáyá na.

¹⁴ Á yáyù nga akkuát tam laguk yù ngámin nga ipakuá ni Namarò nittam, nga ari matakí yù nonò tam nga maddagaragin, áнна ari ittam manabbák kuna, ¹⁵ tapè awán ta pakaliwatát tam, á pareku nga napiá lá yù nonò tam. Ta mássiki nu mepaggián ittam sù ira nga mangnguá ta narákè áнна yù ira nga narákè yù nonò da, arát tam párigán yù narákè nga akkuát da, gapu ta áná na ittam ni Namarò, nga meyárik ta isingan nga mamannawák sù ira tatolay ta dabbuno. ¹⁶ Ta ipakánnámmu tam sù ira tatolay yù bilin ni Namarò, nga meyannung ta kesipá tam sù áttole na nga awán ta ádde na. Á sikayu, nu uputan naw yù ángnguruk naw ká Namarò, á sangaw nu duttál yù pamanunnù ni Apu Kesu Kiristu, magayáyáká gapu ta ammu ta napiá yù pabbalinán nayù bannák ku nga mangipakánnámmu nikayu sù bilin ni Namarò.

¹⁷ Á yù panguruk naw ká Namarò, yáyù meyárik ta pakimore nayù ira ngaw pári ta pangiyátáng da ta ayám ká Namarò. Á magayáyáká, mássiki nu matayá sangaw áнна mebubbù yù dágà nga kun na melanná sù meyátáng* nga panguruk naw, ta mepagayáyáká laguk nikayu. ¹⁸ Á sikayu, magayáyá kayu gapay nakuan nga mepagayáyá nikán.

Doban ni Pablo di Timotio ká Epaprudito

¹⁹ Á aijan yù iddanamák ku, nu yáyù ure ni Apu Kesu, ta dobak ku sangaw si Timotio, tapè en na kayu tullúnán. Ta ikáyá ku nga marámak nu kunnasi kayu, tapè mapálappawán yù nonò ku. ²⁰ Á awán ta kabbuluk ku nga kuruk nga mapattú nga mangabbák nikayu nu ari lá si Timotio. ²¹ Á yù ira ngámin nga káruán, yáyù lá alerad da yù meyannung lá ta baggi ra, nga ari yù meyannung ká Apu Kesu Kiristu. ²² Ngam si Timotio, á ammu nawin gemma ta napiá yù nonò na, gapu ta kunnay kami ta matáma nga nangipakánnámmu sù napiá nga dámak. ²³ Á yáyù nga ikáyá ku nga doban ta umay ta gián naw, sangaw nu mánnámmuák ku yù mesimmu nikán saw. ²⁴ Á ikatalá ku ká Apu ta sikán gapay sangaw yù umay ta gián naw.

²⁵ Á ninonò ku ta máwák ku galá nga palabbetan nikayu kunangane si Epaprudito nga wagi tam. Á napiá ta nabbilinán naw, á jinok naw saw giák ku ta mangabbák nikán ta ngámin nga awágak ku. Á aggina gapay yù kabbuluk ku nga mattarabáku sù ipakuá ni Apu nikán. ²⁶ Ngam palabbetak ku lábbi nikayu, ta maraddam nikayu áнна maburung, gapu

* **2:17** Sù ngaw pangiyátáng nayù ira Kudío ta ayám ká Apu Namarò, nelanná sù ira káruán nga neyátáng yù danum áнна binaráyang nga inibubbù da ta utun na.

ta narámak naw yù katakì na. ²⁷ Á kuruk nga nataki nga nagisassay natay. Á inikállà na kami ni Namarò, ta pinammapià na, marakè mappanà nakuan yù daddam ku. ²⁸ Á yáyù nga karagatak ku nga panolian ta gián naw, tapè magayáyà kayu nga makasingan kuna. Á sikán, mapálappawán gapay yù nonò ku. ²⁹ Magayáyà kayu laguk nga mamaddulò kuna, ta aggina yù wagi tam megapu sù ángngikatalà tam kâ Apu. Á pakimorayán naw yù ira ngámin nga tatolay nga kunnay kâ Epaprudito, nga napiá yù nonò da áнна ággangguá ra. ³⁰ Á ari mabbábáng si Epaprudito nga mangabbák nikán, gapu ta awán garè ta awayyá naw nga umay mangabbák nikán. Á kuruk nga nagisassay natay megapu ta pamalurò na sù inipakuá ni Apu Kesu Kiristu kuna ta pangabbák na nikán.

3

Mangikatalà ittam kâ Apu Kesu tapè Mesipà ittam kâ Namarò

¹ Á wáwwagi, kagiak ku paga nikayu ta magayáyà kayu gapu ta nepattatáday kayu kâ Apu Kesu. Á aringá malurá nga mangitotoli sù iníturá ku ngaw nikayu, tapè dán nga napanaràn kayu. ² Mappalán kayu laguk, marakè melogò kayu sù ira massirisiri, ta kagumánad da kayu nakuan nga makkugi nga kunnay ta kustombare na Kudio, ta kagiad da ta sinniál nayù ira tatole ni Namarò. Arán naw ira kurukurugan. ³ Ta ari yù kakugi na tolay yù kuruk nga sinniál ta tole ni Namarò, nu ari galá yù keggá nayù Ikararuá ni Namarò kuna. Á kuruk nga tatole na ittam ni Namarò nga makimoray kuna megapu sù ángngabbák nayù Ikararuá na, sittam nga magayáyà megapu sù ketádde tam kâ Apu Kesu Kiristu. Ta si Apu Kesu lá yù ikatalà tam, nga paggapuán nayù kesipà tam kâ Namarò, nga ari megapu sù kakugi nayù baggi na tolay onu yù akkuán na.

⁴ Á ta ángngarigán nu egga yù awayyá na tolay nga ikatalà yù ággián na áнна kingnguá na, á ajjan laguk yù awayyá nakuan. Awán ta tolay nga makawayyá nakuan nga makkagi ta alawatan ni Namarò megapu sù ággián na áнна kingnguá na, nu ari galá sikán. Á nepatalugáring nikán, ta napiá yù ággiák ku ánnè sù ira ngámin nga mappeggung. ⁵ Kebrungá gemma, ta Kebru* yù ira darakal ku, nga ginaká ni Kákay Benjamin nga aná ni Kákay Israel. Á nakugikakin sù mekawalu nga ággò ádde ta keyaná ku. Á ta meyanung sù tunung ni Moyses, pinalurò ku ngámin, ta nepattatáday sù ira Parisio, nga napiá yù ánnuppál da sù inituddu ni Moyses.

⁶ Á gapu ta naláppaká nga manuppál sù rilision na Kudio, á jinigirigá ku yù ira manguruk kâ Apu Kesu, gapu ta arád da tuttulan yù kustombare mi nga Kudio. Á sinuppál ku yù ngámin nga taddán nayù tunung ni Moyses, á awán ta kábuluk ku nga Kudio nga mamaliwá nikán. ⁷ Ngam kunangane, gapu ta pangikatalà ku kâ Apu Kesu Kiristu, ibiláng kin ta awán ta serbi nayù ira kustombare nayù rilision na Kudio nga sinuppál ku ngaw, nga kinagi ngaw ta kapiánák ku. ⁸ Ta awán ta kárik piá ni Apu Kesu Kiristu nga Yápu! Á yù kustombare nga sinuppál ku ngaw, ibiláng kin ta kunnay ta basúra nga netabbà, á nilikuránák kin, tapè kánnámmuák ku yù ngámin nga meyanung kâ Apu Kesu Kiristu nga Yápu. Á pinaguráyák ku ngámin yù pinalurò ku ngaw, tapè makiyápungá kâ Apu Kesu Kiristu, áнна mepattatáday kuna. ⁹ Á gapu ta netáday kâ Apu Kesu, ibiláng ni Namarò ta kuruk nga napiángá áнна matunungá, nga ari megapu ta panuppál ku sù tunung ni Moyses, nu ari galá megapu ta pangikatalà ku kâ Apu Kesu Kiristu. Ta si Namarò yù kuruk nga napiá áнна matunung, á pabbalinan na ittam ta napiá áнна matunung megapu ta pangikatalà tam kâ Apu Kesu Kiristu. ¹⁰ Á yá lá karagatak ku, ta mánnámmuák ku si Apu Kesu Kiristu, áнна maparubák ku yù pakáwayyá na nga mepasingan ta paginnanole na. Á karagatak ku ta attamá ku yù jigá ku nga kunnay ta pagattam na ta jigá, tapè tumuluká kâ Namarò nga kunnay kuna, mássiki nu matayá gapay nakuan ta kunnay ta pate na. ¹¹ Á yáyù ikáyá ku, tapè paginnanolayan nangá ni Namarò sangaw gapay, á mesipaká kuna ta ádde ta ádde.

Yù Napiá nga Nonò nga Párigát tam

¹² Á arák ku gemma kagian ta kánnámmuák ku ngámin yù meyanung kâ Apu Kesu, á arák ku kagian ta awán ta pakaliwaták ku. Ngam malláppaká nga mamalurò sù ipakuá ni Apu Kesu nikán, ta yáyù nga inipagágál ni Apu Kesu Kiristu nikán, tapè kukuá nangá. ¹³ Á wáwwagi, ammù gemma ta arák ku paga pinalurò ngámin yù ipakuá na nikán. Ngam arák

* 3:5 Kebru di Kákay Israel áнна yù ira mapulu duá nga áná na nga lálláki, áнна yù ira ngámin nga ginaká ra. Á mangngágan ira gapay ta Kudio megapu kâ Juda, nga aná ni Israel. Á si Juda yù naggaká kâ Patul Dabid, á pappasá na aru nga dagun, si Apu Kesu Kiristu gapay yù ginaká ni Juda.

kin nonotan yù napaságingin, ta ipè lá yù urà ku nga mamalurò ta ngámin nga ipakuá na lá paga níkan. ¹⁴ Á uputak ku nga balinan yù ngámin nga ituddu na, tapè málá ku yù bálá ku nga iyawá ni Namarò níkan, megapu sù pangikatalá ku ká Apu Kesu Kiristu. Ta yáyù gemma yù inipagágál ni Namarò níkan. Á yawe yù bálá ku, ta mepattolayà nga mesipà ká Apu Kesu Kiristu ta lángi ta áddè ta áddè. ¹⁵ Á wáwwagi, napiá nu kunnian yù nonotat tam ngámin, sittam nga similluá yù ángnguruk na. Á nu aijan nikayu yù tolay nga tanakuán yù ánonò na, á si Namarò yù mangipakánnámmu sù kuruk kuna. ¹⁶ Á yawe laguk yù akkuát tam. Ari ittam malurá nga tumuttuttul sù kuruk nga netuddu nittam.

¹⁷ Á wáwwagi, uputan naw kami nga párigán ána yù ira nga masingan naw nga napiá yù ággangnuá ra nga kunnay ta inipasingam mi ngaw nikayu. ¹⁸ Ta initololi nga kinagi nikayu ta mappalán kayu, ta aru garè yù ira tatolay nga makkagi ta tatole ni Apu Kesu ira, ngam ipasingad da ta malussaw ira ká Apu Kesu Kiristu ána iluddè da yù pate na ta kurú, megapu sù narákè nga ággangnuá ra. Á makakulekà ta pakanonò ku nira. ¹⁹ Ta yù pangukum ni Namarò yù pappángetád da, gapu ta pakiyápuád da yù karagátan nayù baggi ra. Á yù narákè nga ipappasirád da nakuan, yáyù ipappeddaráyo ra. Á tángngagad da lá yù aijan ta dabbuno.

²⁰ Ngam sittam nga mangikatalá ká Apu Kesu Kiristu, aijan yù paggianát tam ta lángi ta gián ni Namarò. Á iddi-ddagát tam si Apu Kesu, nga Yápu tam nga maggapu ta lángi nga umay mangiyígù nittam. ²¹ Á panoli na ta dabbuno, ulian na yù ira baggi tam nga makapi ána matay, tapè kunnay ira sù baggi na nga maddalingárang ána ari matay. Á palurotan na yaw megapu sù makapállá nga pakáwayyá na nga mamatulú ta ngámin nga aijan, ána mammaguray nira.

4

Yù Panabarang ni Pablo sù ira Manguruk ká Apu Kesu

¹ Á wáwwagi, gapu ta aijan yù iddanamát tam ká Apu Kesu, ari ittam laguk mabbábang, tapè mapasigaggá yù ángnguruk tam kuna. Á sikayu yù iddukak ku, á nepallá yù daddam ku ta pakkaragá ku nga masingan takayu. Ta sikayu yù ipagayáyá ku megapu sù pangikatalá naw ká Apu Kesu, á kunnay kayu ta bálá ku megapu sù bannák na baggi ta pangituddù nikayu.

² Á sikayu, Eyodia ká Sintiki, ikomá nikayu bì ta makkápiá kayu ána pattatáddayan naw yù nonò naw, gapu ta mawwagi kayu gemma megapu sù ángnguruk naw ká Apu. ³ Á sikaw gapay nga kuruk nga kopuk ku, abbágám mu bì yù ira duá nga bábbay, tapè makkápiá ira. Nepattarabáku ira kári Kiliminte ána yù ira káruán nga kábuluk ku nga nangabbák níkan ta pangipakánnámmu mi sù napiá nga dámak nga meyannung ká Apu Kesu. Á nelistá yù ngágad da sù libru ni Namarò, nga naketúratán nayù ira ngámin nga iniddán na ta mannanáyun nga inángá nga awán ta áddè na.

⁴ Á magayáyá kayu laguk megapu ta kepattatádde naw ká Apu, sikayu nga manguruk ká Apu. Á yáyù pidduák ku má nga kagian nikayu ta magayáyá kayu. ⁵ Á napiá nu masippá kayu nga mangikállá ta ngámin nga tatolay, gapu ta manoli sangaw yù Yápu tam. ⁶ Á awán bulubugá ta ikaburung naw nakuan, mássiki nu anni yù mesimmu. Ipakimállá naw ká Namarò yù ngámin nga meyannung nikayu ána yù máwák naw. Á kagian naw gapay ká Namarò yù pagayáyá naw ta ángngabbák na nikayu, ta yáyù ábbalabálá naw kuna. ⁷ Á pagimammatan ni Namarò yù nonò naw megapu ta kepattatádde naw ká Apu Kesu Kiristu, mássiki nu ari mánnámmuán yù ámmagimammá na, tapè mabannáyán yù nonò naw, ána ari kayu maburung, maguray lá yù mesimmu.

⁸ Á wáwwagi, yawe yù maporián nga itabarang ku nikayu. Nonopan naw lá yù napiá ána maráyaw, nga kuruk ána matunung, nga mekállá, nga naggapu ta napiá nga nonò. Á nonopan naw ána ipatattam naw laguk ta nonò naw ngámin danniw nga kapiánán, nga mepángngá nittam nga tatole ni Namarò. ⁹ Á ngámin yù ginigiámmu naw níkan, nga inituddù nikayu, ána yù naginná naw nga initáddák ku, ána nasingan naw nga kingnguá, yáyù laguk uputan naw nga párigán. Á mepulupulú nikayu laguk si Namarò, nga mamagimammá nittam.

Yù Pabbalabála ni Pablo sù ira Mangabbák kuna

¹⁰ Á nepallá yù pagayáyá ku, á dayáwak ku si Namarò, megapu sù initubbuk naw níkan. Ta mássiki nu nabayák nga arán nawá inabbágán, á kunangane inipasingan naw mángin yù pangikállá naw níkan. Á ammù ta arán nawá náttamán, ngam iniddagán naw lá yù awayyá

naw nga mangabbák nikán. ¹¹ Á arák ku kagian ta aijan yù máwák ku. Ta mapenáma nga mangikatalá ká Apu, maguray lá yù ággiák ku. ¹² Á naparubák ku yù ággián na pobare, ána naparubák ku gapay yù ággián na maríku. Á maguray lá yù ággiák ku, napenáma lá sù ngámin, mássiki nu mabattugá onu mabisinà, mássiki nu aru yù kukuá onu nakúràng. ¹³ Á aijan yù awayyá nga mamalurò sù ngámin nga ipakuá ni Namarò nikán, gapu ta mepulù nikán si Apu Kesu Kiristu nga mangabbák ána mamassikan nikán.

¹⁴ Á kuruk nga napiá yù pangikállá naw nikán, ta inabbágán nawà ta pajjigá ku. ¹⁵ Á sikayu nga taga Pilippay, ammu naw gemma ta sikayu yù olu nga sinudduák ku sù pamegapù nga mangipakánammu sù napiá nga dámak sù purubinsia naw nga Masidonia.* Á nakkaká-abbák ittam, ta sikayu lá yù nangiyawâ nikán sù máwák ku ta pánò ta Masidonia. ¹⁶ Á paggiák ku paga ta ili na Tessalonika, sikayu lá yù nangabbák nikán, ta sinubbutubburán nawà ta máwák ku. ¹⁷ Á magayáyákà gemma ta pakálawâ ku sù initubbuk naw. Ngam yù kuruk nga ipagayáyâ ku yù bálá naw nga iyawâ ni Namarò nikayu megapu sù pangikállá naw nikán.

¹⁸ Á kustu ngin yù aijan nikán, nga makatò ta ngámin nga máwák ku ána masobará, gapu ta inalawâ kin yù initubbuk naw nga iniyánge ni Epaprudito nikán. Á kunnay ta bábbanguk nga iniyátáng naw ká Namarò yù keyarigán nayù iniyawâ naw nikán, á yáyù nga magayáyâ gapay si Namarò. ¹⁹ Á si Namarò, nga makákkuá ta ngámin nga napiá ána nakástá, aggina yù mangiyawâ nikayu sù ngámin nga máwák naw megapu sù kepattátáde naw ká Apu Kesu Kiristu. ²⁰ Á meparáyaw si Namarò nga Yáma tam ta áddè ta áddè. Ammán!

Yù Maporián nga Kinagi ni Pablo

²¹ Á sikami ngámin sù ira kábuluk ku, nonotam mi sikayu ngámin nga wáwwagi mi nga nepattátáday ká Apu Kesu Kiristu. ²² Á yù ira ngámin nga manguruk nga aijan saw ili na Roma, nepatalugáring sù ira nga masserbi sù palásiu ni Patul Sisar, nonopad da kayu gapay, nu kunnasi kayu. ²³ Á parè bí ta iddi-iddukan na kayu ngámin ni Apu Kesu Kiristu nga Yápu tam. Áddè nen. Ammán.

* 4:15 Kingguá 16:12-40. Ubobugan ni Pablo yù olu nga ánge na ta Masidonia.

Yù Túrâ ni Pablo sù ira Manguruk nga taga Kolosi

Yù Meyannung sawe Túrâ

Dakal yù ili na Kolosi, nga aijan sù purubinsia na Asia Minor. Á arayyu yù ili sù ili na Epeso, nga maddaggun duá gatù ta límápu lu nga kilometro yù kárayyu na. Ari nakáddè si Pablo ta ili na Kolosi. Ngam narámak ni Pablo yù napasigaggà nga ángngikatalà nayù ira tatolay nga naggián ta Kolosi, ta naginná ra yù bilin ni Namarò megapu sù pangilayalayá ni Epapro. Aggina yù taga Kolosi, nga kabbulun ni Pablo ta keggá na ta ábbaluran, ta pattúrâ na sawe (1:7; 4:12-13; Pilemon 23).

Á yù ira káruán nga naggián ta Kolosi, nga mangikatalà ká Apu Kesu, ari ira Kudio (1:27), ána makkakerumá yù kustombare ra ána yù nonò da nga meyanung sù pakimore ra ká Namarò. Kagiad da ta máwák da makimoray sù ira daroban ni Namarò nga ari masingan. Á yáyù nga iníturâ ni Pablo yawe, tapè ipakánnámmu na nira si Apu Kesu Kiristu, nga mammaguray ta ngámin, tapè aggina lá yù pakimorayád da. Á iníturâ ni Pablo yù kansion nga meyanung ká Apu Kesu (1:15-20).

Yù Mayán nayù Túrâ

Yù Pamegapu nayù Túrâ (1:1-2)

Yù Pabbalabálà di Pablo sù Pakimállà da ká Namarò (1:3-8)

Yù Mepángngà nga Akkuán nayù ira Mangikatalà ká Apu (1:9-14)

Si Apu Kesu Kiristu yù Kotunán (1:15-23)

Yù Passerbi ni Pablo sù ira Mangikatalà ká Apu Kesu (1:24-2:5)

Si Apu Kesu yù Paggapuán nayù Pakáwayyá tam (2:6-19)

Yù Kebalinán nayù Bagu nga Áttole tam nga Naggapu ká Apu Kesu (2:20-4:6)

Pangiyabbù ni Pablo nu Kunnasi yù ira Kákkopun na (4:7-18)

¹ Sikán si Pablo, nga minángngilayalayá nga jinok ni Apu Kesu Kiristu megapu sù ure ni Namarò. Á si Timotio nga wagi tam yù mepulù nikán. ² Á mattúrâ kami nikayu nga tatole ni Namarò nga taga Kolosi, nga wáwwagi mi nga napasigaggà yù ángngikatalà da ká Apu Kesu.

Á yawe ipakimállà mi, ta napiá lá yù ággián naw ána yù gawagawáyán naw megapu sù allà na nikayu ni Namarò nga Yáma tam.

Yù Pabbalabálà di Pablo sù Pakimállà da ká Namarò

³ Á ta ngámin nga pakimállà mi megapu nikayu, sigídá kami mabbalabálà ká Namarò, nga Yáma ni Apu Kesu Kiristu, nga Yápu tam, ⁴ gapu ta narámak mi ta napasigaggà yù ángngikatalà naw ká Apu Kesu Kiristu ána napiá yù ángngiddù naw sù ira ngámin nga kábulut tam nga manguruk ká Namarò. ⁵ Á napasigaggà yù ángnguruk naw megapu sù iddanamán naw, nga pinarán ni Namarò ta lángi megapu nikayu. Ta yáyù iddanamán naw áddè ngaw pakaginná naw sù kuruk nga bilin ni Namarò, nga napiá nga dámak nga meyanung ká Apu Kesu.

⁶ Á napiá yù pabbalinán nayù napiá nga dámak, ta massamá ta tangapáddabbunán, á magaru yù ira manguruk ká Apu Kesu. Á noli yù nonò da ta napiá nga nonò, ána ikákállà da yù ira kábulud da. Á sikayu, kunnian gapay nikayu, ta napiá gapay yù akka-akkuán naw áddè sù pamegapu naw nga makaginná sù bilin ni Namarò ána nánnámmuán naw ána natagená naw yù allà na ána ángngabbák na. ⁷ Ta si Epapro gemma yù nangipakánnámmu nikayu, nga kabbulum ni nga iddukam mi. Aggina yù pangikatalakán ni Apu Kesu Kiristu, nga masserbi kuna, á jinok mi ngaw nga pannakabaggi mi nga umay mangituddu nikayu. ⁸ Á iniparámak na nikami yù pakkaká-iddù naw nga naggapu galá sù Mangilin nga Ikararuá.

⁹ Á áddè ngaw pakarámak mi sù ángnguruk naw, ari kami malurá nga makimállà ká Namarò megapu nikayu. Á yawe ipakimállà mi, ta ipakánnámmu na nikayu nayù Ikararuá ni Namarò yù meyanung ká Namarò ána yù sirik na, tapè kánnámmuán naw yù napiá nga ipakuá na nikayu ána yù ngámin nga ure na. ¹⁰ Á kunnian, mapalurò naw yù ngámin nga mepángngà sù ira nga mangikatalà ká Apu Kesu, ána magayáyá si Apu megapu nikayu. Á napiá laguk yù ngámin nga akka-akkuán naw ána mangáppípiá yù ákkiyápu naw ká Namarò. ¹¹ Á yawe gapay ipakimállà mi, ta pasikanan na kayu ni Namarò megapu sù pakáwayyá na, ána ábbágán na kayu megapu sù ámmagaddátu na nga makapállà, tapè meyattam naw yù ngámin, maguray lá yù mesimmu nikayu, á mapasigaggà yù ángngikatalà naw kuna, ána magayáyá kayu gapay.

¹² Á parè bì ta maddáyaw kayu laguk kâ Namarò nga Yáma tam, megapu sù panullà na nikayu ta tatole na, tapè kesipatán naw gapay yù iniparán ni Namarò sù pammagurayán na nga iyawâ na nittam nga tatole na, sittam nga nanawagán yù nonò na. ¹³ Ta inililli na ittamin ni Namarò sù pammagure ni Satanas nga mammaguray sù ira nga kun na kallà yù nonò da. Á iniyánga ni Namarò ittam kâ Apu Kesu Kiristu, nga Anâ na nga iddukan na, tapè aggina yù mammaguray nittam. ¹⁴ Á megapu sù pagikáru ni Apu Kesu Kiristu ta liwiliwâ tam, ari ittamin mapagikáru, ta napalubbáng ittamin, gapu ta pinakomá na ittam ni Namarò.

Si Apu Kesu Kiristu yù Kotunán

¹⁵ Si Apu Kesu Kiristu yù kagittá ána kágappà ni Namarò, nga paninganát tam kâ Namarò nga ari masingan.

Á si Apu Kesu yù Anâ ni Namarò, nga Kaká tam ngámin, nga kapiánán na ngámin.

¹⁶ Á pinarò ni Apu Kesu yù ngámin nga naparò, yù ngámin nga aijan ta lángi ána dabbuno, yù ngámin nga masingan

ána yù ngámin nga ari masingan.

Pinarò na yù ira daroban ni Namarò

ána yù ira makkakerumá nga mamagaddátu ána makáwayyá ta lángi ána dabbuno.

Á ngámin danniw ira, pinarò na ira ni Apu Kesu Kiristu.

Á naparò ira ngámin, tapè si Apu Kesu Kiristu yù passerbiád da.

¹⁷ Dán nga aijanin si Apu Kesu Kiristu nga Kotunán, gári sù ngaw awán paga ta naparò.

Á si Apu Kesu yù manangngal ta ngámin, tapè maggián lâ yù ngámin nga ari mewarawarâ.

¹⁸ Á aggina yù mammaguray nittam, nga meyárik ta ulu tam, ta sittam nga mangikatalà kuna yù meyárik ta baggi na.

Á aggina yù paggapuán nayù bagu nga áttole tam, ta aggina yù napolu nga naginnanolay nga ari ngin matay.

Á aggina yù kotunán ta ngámin, nga mammaguray ta ngámin.

¹⁹ Á ayatán si Namarò, nga maggián sù baggi nayù Anâ na. Kuruk nga naggittá ira nga matáma.

²⁰ Á ayatán si Namarò gapay, ta si Apu Kesu yù mamakkápiá nittam ngámin kâ Namarò, megapu sù ketapil na ta kurù, ána yù keyátáng nayù dága na, nga mangari sù liwiliwâ tam ngámin.

Yáyù gapu na nga aijan yù awayyá tam ngámin nga makipakomá kâ Namarò, tapè mapattoli ittam kuna,

ána makkápiá yù ngámin nga pinarò na ta dabbuno ána lángi.

²¹ Á sikayu gapay, sù ngaw, kunnay ta ikalusso naw si Namarò, megapu sù narákè nga nonò naw ána yù narákè nga ágganguá naw. ²² Ngam kunangane, nakkápiá kayin kâ Namarò, megapu sù ketapil nayù baggi nayù Anâ na ta kurù, nga pagikáru na ta liwiliwâ naw, tapè alawatan na kayu ni Namarò ta arubáng na sangaw, nga napiá nga tatole na nga mangilin, nga ari mappasirán gapu ta náringin yù liwiliwâ naw, ána awán bulubugá ta ipapaliwâ na nikayu. ²³ Ngam máwák nga uputat tam yù panguruk tam sù napiá nga dámak, tapè mapasigaggá yù ángngikatalà tam kâ Apu Kesu. Ari ittam laguk mekátuay nga mapatuttul ta tanakuán nga ari kuruk. Ta awán ta tanakuán nga iddanamát tam, nu ari lâ yù napiá nga dámak, nga naginná naw gapay, nga nelayalayâ ta ngámin nga tatolay ta dabbuno. Á sikán gapay yù masserbi kâ Apu, nga mangilayalayâ sù bilin na.

Yù Passerbi ni Pablo sù ira Mangikatalà kâ Apu Kesu

²⁴ Á magayáyakà nga magattam ta jigâ ku ta kebáluk ku kunangane, gapu ta pangilayalayâ ku nikayu nga ari Kudio, tapè mapasigaggá yù ángngikatalà naw. Á uputak ku nga attamán yù jigâ ku, tapè palurotak ku yù ngámin nga kinagi ni Apu Kesu Kiristu nga meyannung sù pagattam ku ta jigâ megapu sù ira ngámin nga mangikatalà kuna, nga meyárik ta baggi na. ²⁵ Ta sinullà nangá ni Namarò ta umayá manaron sù ira ngámin nga manguruk kuna, nepatalugáring nikayu nga ari Kudio, tapè ipakánammù nikayu yù

ngámin nga bilin na. ²⁶ Á áddè ngaw gári, inilímak ni Namarò sù ira ngámin nga tatolay yù bilin na. Á kunangane inipalappá na yù bilin na sù ira tatole na, aggira ngámin nga mangikatalà kuna. ²⁷ Ta ikáyá ni Namarò nga ipakánnámmu sù ira tatole na yù inilímak na ngaw, nga kuruk nga makapállá. Á sikayu gapay nga ari Kudío yù pangipakánnámmuán na. Á yawe yù makapállá nga ipakánnámmu na, ta maggián si Apu Kesu Kiristu níkayu nga mangikatalà kuna. Á aggina yù paggapuán nayù iddanamán naw, nga kesipà naw ká Namarò ta lángi ta áddè ta áddè.

²⁸ Á sikami nga mangilayalayá, ilayalayá mi lá si Apu Kesu Kiristu. Á ituddu mi sù ira ngámin nga tatolay yù ngámin nga ammu mi nga meyanung ká Apu Kesu Kiristu, tapè manguruk ira ána pareku nga napiá ira ta ánninganán ni Namarò, nga napasigaggá yù ángngikatalà da ána ángnguruk da ká Apu Kesu. ²⁹ Á yáyù ipamannák ku ta baggi, tapè palurotak ku yù ipakuá ni Namarò níkán. Á ábbágán nangà ni Apu Kesu Kiristu, tapè mopù ku yù pangilayalayá ku kuna, megapu galá ta pakáwayyá na.

2

Yù Burung ni Pablo Marakè Melogò yù ira taga Kolosi

¹ Á ikáyá ku nga ipakánnámmu yù burung ku níkayu nga taga Kolosi ána yù ira gapay nga taga Lodisia ána yù ira káruán nga kunnay níkayu nga ari paga nakasingan níkán. Á mappaná yù ákkimállá ku ká Namarò megapu níkayu ngámin. ² Ta ipakimállá ku ká Apu ta mabannáyán yù nonò naw, á kuruk nga magayáyá kayu nga mattatádday ta kunnay sù ira mawwawági, megapu sù pakkaká-iddù naw. Á kunnian, ari kayu mabbábáng, gapu ta kánnámmuán naw ta napiá yù ngámin nga arán na ngaw inipalappá ni Namarò nga meyanung ká Apu Kesu Kiristu. ³ Á si Apu Kesu Kiristu lá yù makáwayyá nga mangipakánnámmu sù napiá nga sírik ni Namarò ána yù kebalinán nayù bilin na. ⁴ Á kinagi yawe níkayu, tapè ari kayu melogò sù ira umay mangagumán níkayu megapu sù mámmi nga ubobuk da. ⁵ Á mássiki nu awánà níkayu, ngam kun na aijanà níkayu, ta nononopat takayu. Á ayatánà megapu sù napiá nga áwwawági naw ána yù napasigaggá nga ángngikatalà naw ká Apu Kesu Kiristu.

Si Apu Kesu yù Paggapuán nayù Pakáwayyá tam

⁶ Á gapu ta pakíyápuát tam si Apu Kesu Kiristu, nga mangiyígù nittam, á máwák tam laguk nga tumulú ána mangikatalà kuna, ta aggina yù mangabbák nittam, tapè matuppál tam yù ipakuá na nittam ta kággággaw. ⁷ Á yù ángnguruk tam ká Apu, kunnay nakuan ta káyu nga nakapaggamù ta napiá, ta natudduán ittam sù kuruk nga bilin na. Tángngagat tam laguk yù netuddu nittam, tapè tulluá ittam nga mangáppipiá, nga napasigaggá yù ángngikatalà tam kuna. Á merallá gapay laguk yù ábbabalálá tam ká Namarò, megapu sù allá na nittam.

⁸ Mappalán kayu laguk, tapè awán ta mangilogò níkayu. Ta aijan garè yù ira umay mangituddu níkayu, á ilogò da kayu nakuan megapu sù monak nga ággubobuk da. Ngam awán ta serbi na, ta ituddu ra lá yù dán nga kustombare nayù ira ngaw naggaká nira, ána yù naggapu galá sù nonò da nga meyanung sù rilisiod da. Á ari gemma kuruk yù ituddu ra, ta naggapu sù ira narákè nga ari masingan, nga ari naggapu ká Apu Kesu Kiristu.

Si Apu Kesu yù Kun na Ulu tam

⁹ Á si Apu Kesu, mássiki nu nabbalí ta tolay, egga kuna yù ngámin nga nonò ni Namarò ána yù pakáwayyá na, ta megaggián si Namarò ta baggi ni Apu Kesu Kiristu. ¹⁰ Á yáyù nga si Apu Kesu Kiristu yù kotunán nga makáwayyá, nga mammaguray sù ira ngámin nga káruán nga mammaguray ána makáwayyá, nga masingan ána ari masingan. Á sittam nga manguruk ká Apu Kesu, awán ta tanakuán nga máwák tam, gapu ta netádday ittam ká Apu ána mesipá ittam kuna.

¹¹ Á áddè ngaw gári, nakugi yù ira Kudío, nga panákkilalán ta aggira yù tatole ni Namarò. Ngam kunangane, mepasingan ta sittam nga netádday ká Apu Kesu Kiristu yù tatole ni Namarò, nga ari megapu sù akkuán na tolay ta baggi na, nu ari galá gapu ta inirián na nittam ni Apu Kesu Kiristu yù liwiliwá tam ána yù narákè nga nonopat tam ána karagátat tam, megapu sù ketádde tam kuna. ¹² Á ta karigù tam, á kunnay ittam ta natay, nga nepappetanam ká Apu Kesu ta pate na. Á got tam nga maggapu ta danum, kunnay ta nepaginnanolay ittam ká Apu Kesu, á bagu yù áttole tam megapu ta pangikatalà tam sù pakáwayyá ni Namarò, si Namarò nga namaginnanolay ká Apu Kesu. ¹³ Á sikayu nga ari Kudío, kunnay ta natay kayu ngaw, gapu ta nalliwá kayu ána awán bulubugá ta ammu naw nga meyanung sù napiá nga inittabbá ni Namarò. Ngam kunangane, á kunnay ta

nepaginnanolay kayu kâ Apu Kesu Kiristu, megapu sù pangikatalà naw kuna. Á inisipà na kayu ni Namarò sù áttole ni Apu Kesu Kiristu, áнна pinakomá na kayu ta ngámin nga liwiliwá naw. ¹⁴ Á lage na pate ni Apu Kesu, á mepángngà ta pagikaruan na ittam nakuan ni Namarò, gapu ta nakaliwatát tam yù tunung na nga inipetúrâ na kâ Moyses. Ngam arán na ittam pagikaruan ni Namarò, gapu ta inirián na yù pakáwayyá nayù tunung, nga kunnay ta inipátâ na ira ta kurù, sù ketapil ni Apu Kesu Kiristu megapu nittam. Ta nagikáru si Apu Kesu ta liwiliwá tam megapu sù pate na ta kurù. ¹⁵ Á ta pate na, nangappù si Apu Kesu Kiristu kári Satanas áнна yù ira narákè nga kábulun na nga anitu áнна yù ira áppè mamagaddátu nga ari masingan, á inirián ni Apu Kesu yù pakáwayyá ra. Á ta paginnanole ni Apu Kesu, nepasingan yù pangappù na nira ta ánninganán na ngámin nga ajjan.

¹⁶ Á sikayu nga kopuk ku nga mangikatalà kâ Apu Kesu Kiristu, arán naw laguk kurugan yù kagian nayù ira nga mamatuttul nikayu sù kustombare ra. Ta kagumánad da kayu nakuan ta kanniawan naw gapay yù kanniawad da nga kanan áнна inuman. Á kagiad da ta máwák naw nga ngilinan yù piestá ra áнна yù kustombare ra nga meyanung sù lattuák na bulán áнна yù meyanung sù ággaw nga ággibannák da. ¹⁷ Á ngámin danniw nga kustombare nga netuddu ngaw, kunnay ira ta alinu, nga keyarigán nayù iddagád da nga umay. Á minayin si Apu Kesu Kiristu, nga namalurò ta ngámin. ¹⁸ Á yáyù ari kayu laguk manguruk sù ira áppè pípiá. Ta kagumánad da kayu nakuan ta mappagukák kayu áнна makimoray kayu sù ira daroban ni Namarò. Á kagiad da ta aggira lápáy yù makánámmu, gapu ta ajjan kanu yù nappasingan nira. Ngam arán naw ira kurugan, ta mappeddaráyaw ira, á ari kuruk yù ituddu ra, nga naggapu galá sù motun nga nonò da. ¹⁹ Arán naw ira tuttulan, ta arád da gemma tuttulan si Apu Kesu, nga tuttulat tam. Ta si Apu Kesu yù mammaguray nittam, nga meyarík ta ulu tam, á meyarík ittam ta baggi na. Á gapu ta netádday ittam kuna, napiá yù ákkiwagi tam, áнна makkaká-iddù ittam, tapè mangáppípiá ittam nga tulluá megapu sù ure ni Namarò.

Yù Kebalinán nayù Bagu nga Áttole tam nga Naggapu kâ Apu Kesu

²⁰ Á sittam nga manguruk kâ Apu Kesu Kiristu, kunnay ittam ta nepulù kuna ta ánge na sù pate na ta kurù. Á yáyù nga arát tamin kurugan yù dán nga kustombare nayù ira tatolay nga meyanung sù rilisiod da. Á sikayu, ngattá laguk ta uputan naw paga nga kurugan yù kagian nayù ira tatolay nga ari manguruk kâ Apu? Anni má ta makitulù kayu nira? ²¹ Á kunnaw yù kagiad da. “Arán naw siggeran! Arán naw kanan! Arán naw tangngalán!” kud da. ²² Á ngámin dannian nga kanniawad da, pidde ni Namarò ira, tapè iyusá tam áнна kanat tam áddè ta kapúnu ra. Ngattá laguk ta tángngagan naw yù ituddu ra nga kanniawad da, nga naggapu galá ta nonò na tolay? ²³ Á yù ira nga mangituddu karanniaw, meparámak ira nga kunnay ta nasírik, gapu ta malláppá ira nga manuppá ta meyanung sù rilisiod da. Á kunnay ta tumulù ira ta ánninganán nayù ira tatolay, áнна jigirigátad da yù baggi ra. Ngam awán ta serbi nayù ngámin nga akkuád da, gapu ta ari megaggak yù narákè nga nonopad da áнна karagatád da.

3

Yù Bagu nga Áttole tam nga Naggapu kâ Apu

¹ Á gapu ta naginnanolayin si Apu Kesu Kiristu, á sittam nga mangikatalà kuna, kunnay ittam ta nepaginnanolay kuna, ta iniyawâ na nittam yù bagu nga áttole tam nga awán ta áddè na. Á yáyù nga ipe tam yù urá tam nga palurotan yù napiá nga ikáyâ ni Apu Kesu Kiristu. Ta ajjanin si Apu Kesu nga mammaguray ta lángi, nga nagitubang sù jiwánan ni Namarò, nga pagitubangán nayù kotunán nga maráyaw. ² Arát tam laguk nonopad yù ajjan ta dabbuno, nu ari galá yù ngámin nga ajjan kâ Apu ta lángi, ta dannian yù mannanáyun. ³ Á sittam nga mangikatalà kâ Apu, kunnay ittam ta natayin, á arát tamin karagátan yù ajjan ta dabbuno. Ta ajjanin yù bagu nga áttole tam nga arát tam paga masingan, nga napakappián kâ Apu Kesu Kiristu nga nepagitubang kâ Namarò ta lángi. ⁴ Á si Apu Kesu Kiristu yù paggapuán nayù bagu nga áttole tam. Á sangaw nu umay nga mappasingan, mepappasingan ittam gapay kuna nga mesipà sù áddalingáráng na.

⁵ Á wáwwagi nga mangikatalà kâ Apu Kesu, yáyù nga máwák nga ipuerá naw laguk yù jikkù nga ágganguá na tolay ta dabbuno. Á arán naw laguk párigán yù meruruk sù arán na atáwa. Á ipuerá naw ngámin yù meyanung ta narákè nga karagátan naw. Á ari kayu magukkuk, gapu ta kunnay sù tolay nga makimoray ta sináddios yù magukkuk, nga pakimorayán na lâ yù kukuá na áнна karagátan na nga kukuá. ⁶ Á sangaw nu

duttál yù pangukum ni Namarò, pagikaruan na yù ira mamotu kuna megapu karannian nga naràkè nga ággangnguá ra. ⁷ Á kunnian gapay ngaw yù ággangnguá naw sù ngaw kepattatádde naw sù ira ari manguruk kâ Apu. ⁸ Ngam aringin mepángngà nga tolian naw yù ngaw ággangnguá naw, gapu ta netádday kayin kâ Apu Kesu. Likuránán naw laguk yù ngámin dannian nga naràkè nga akka-akkuán naw. Ari kayu makkakálussaw. Ari kayu makkakáporay onu mangigagángay. Ari kayu makkakálibá. Á arán naw pagubu-ubogán ta naràkè yù ira kábulun naw. ⁹ Á ari kayu massirisiri sù ira kábulun naw, gapu ta arán nawin tánggagan yù dán nga nonò naw áнна yù ngaw ággangnguá naw nga naràkè.

¹⁰ Á aijanin yù bagu nga nonò tam nga pidde ni Namarò, nga sigídá na nga ulu-ulian, nga pabbalinan na ta pareku nga napiá ádde ta nepaggittá sù nonò na, tapè kuruk nga kánnámmuán tam si Apu. ¹¹ Á gapu ta sittam ngámin nga mangikatalá kâ Apu Kesu yù iniddán ni Namarò ta bagu nga nonò tam, á arán na ittam irumá. Ta alawatan ni Namarò ittam ngámin nga netádday kâ Apu Kesu, mássiki yù Kudio áнна yù ari Kudio, yù nakugi onu ari, yù naggigiámmu áнна yù ari naggigiámmu, yù pobare nga aripan áнна yù maddok kuna. Á si Apu Kesu Kiristu yù kotunán, á maggián nittam áнна mepulupulú nittam ngámin nga manguruk kuna.

¹² Á sittam yù piníli ni Namarò, nga pabbalinan na ta mangilin nga tatole na nga masserbi kuna, á iddi-iddukan na ittam. Akkuát tam laguk yù napiá nga mepángngà ta bagu nga nonò tam nga naggapu kuna. Ikákkállá tam yù ira kábulut tam, á abbágát tam ira. Á ari ittam mappeddaráyaw, ngam tumulú ittam áнна attamát tam lá yù akkuán nayù ira kábulut tam. ¹³ Á makkakápasensia ittam, á nu aijan yù malliwá nittam, pakomát tam laguk. Ta pinakomá na ittam ni Apu, á yáyù nga máwák tam gapay nga makkakápakomá. ¹⁴ Á yawe yù más napiá nga ággangnguá tam ánnè sù ira ngámin, ta makkaká-iddù ittam, nepatalugáring ta mapasigaggá yù ákkiwagi tam megapu sù pakkaká-iddù tam. ¹⁵ Ta metádday ittam kâ Apu Kesu Kiristu, nga meyárik ta baggi na. Á si Apu Kesu Kiristu yù mammaguray ta nonò tam, ta yáyù ipagágál ni Namarò nittam, tapè magimammá ittam áнна napiá yù ággigiát tam, megapu sù pammagure na. Á sigídá tam laguk dayáwan si Apu, ta ari ittam makabalabálá kuna megapu sù ángngiddù na nittam.

¹⁶ Á gapu ta netádday ittam kâ Apu Kesu Kiristu, patattamat tam ta nonò tam yù bilin na, áнна gígiammuat tam yù napiá nga sírik na, tapè makkakátuddu ittam ta napiá áнна makkakátabarang ittam gapay. Á makkansion ittam laguk kâ Apu. Makkansion ittam sù kansion nga mangngágan ta Salmo, nga iníturá na ngaw ni Patul Dabid, nga áddáyo na kâ Apu. Á kansionat tam gapay yù ipanonò nayù Mangilin nga Ikararúá nittam, nga áddáyo tam áнна ábbalabálá tam kâ Apu megapu sù ángngikállá na nittam. ¹⁷ Á ipakimálá tam kâ Namarò ta abbágán na ittam ta ngámin nga akkuát tam áнна pagubobuk tam, tapè napiá áнна mepángngà sù Yápu tam yù ngámin nga ubobugat tam áнна yù akka-akkuát tam. Ta sittam yù pannakabaggi ni Apu Kesu, nga mábbunán ta ngágan na. Á dayáwat tam laguk si Ammò Namarò megapu kâ Apu Kesu.

Yù Itaddán ni Pablo sù ira Makkakábbalay

¹⁸ Á sikayu nga bábbay nga aijan atáwa na, tumulú kayu laguk sù ira áttáwa naw, ta yáyù mepángngà nga akkuán nayù ira bábbay nga manguruk kâ Apu.

¹⁹ Á sikayu nga kábuluk ku nga lálláki nga egga atáwa na, iddi-iddukan naw yù atáwa naw, á arán naw ira jigirigátan.

²⁰ Á sikayu nga ábbing, arán naw potuán yù ira darakal naw, ngam tuppálan naw yù ngámin nga kagiad da, ta yáyù ipagayáyá ni Apu Namarò.

²¹ Á sikayu nga darakal da, arán naw talamánan yù ira áná naw, marakè mapakaraddam naw ira.

²² Á sikayu nga makiaripan, tuppálan naw yù ngámin nga ipakuá nayù ira yápu naw. Á nu aijan yù makasingan nikayu, ari kayu áppè lálláppà, ngam tuppálan naw yù ipakuá ra nikayu megapu sù napiá nga nonò naw, áнна megapu sù pakimore naw kâ Apu Kesu. ²³ Á maguray lá nga tarabáku naw, ipe naw yù urá naw nga manuppál ta napiá, nga kunnay ta si Apu Namarò galá yù passerbián naw, nga ari lá yù tolay nga maddok nikayu. ²⁴ Ta si Apu Kesu Kiristu yù kuruk nga Yápu naw nga passerbián naw. Á ammu naw ta si Apu Kesu yù mabbála nikayu sù napiá nga akkuán naw, á iyawá na nikayu yù pinarán ni Namarò nga inítabbá na sù ira tatole na. ²⁵ Á yù ira nga mangupú sù naràkè nga akka-akkuád da, alawatad da yù bálá nayù naràkè nga kingnguá ra sangaw nu panunnután ni Namarò yù ira tatolay. Ta awán ta tolay nga paddurúmán na.

4

¹ Á sikayu gapay nga aijan aripan na, iddukan naw yù ira masserbi nikayu ána iyawâ naw nira yù bálâ nayù ásserbi ra, ta ammu naw ta aijan gapay yù Yápu naw ta lángi nga passerbián naw, á iyawâ na gapay sangaw nikayu yù bálâ nayù ásserbi naw.

Yù Káruán nga Itabarang ni Pablo

² Á sikayu ngámin nga manguruk kâ Apu, uputan naw laguk nga tángngagan yù pakimi-imállâ naw. Á nonopan naw yù ikomá naw kâ Apu Namarò, ána dayáwan naw si Apu megapu sù ngámin nga ángngikállâ na nittam. ³ Á ipakimállâ naw kami gapay, á ikomá naw kâ Namarò ta iyawâ na nikami yù awayyá mi nga umay mangipakánnámmu sù bilin na nga nelímak ngaw ta nabayák, nga meyanung kâ Apu Kesu Kiristu. Yáyù gemma yù gapu na nga nebálugâ saw, megapu ta pangilayalayâ ku sù meyanung kuna. ⁴ Á ipakimállâ nawâ laguk, ta abbágán nangâ ni Namarò, tapè malitáw yù pangilayalayâ ku sù bilin na, ána kánnámmuán nayù ira tatolay yù ituddù nira.

⁵ Á máwák naw gapay nga ipasingan yù napiá nga ággangguá naw sù ira nga ari paga mangikatalâ kâ Apu Kesu. Á nu aijan yù awayyá naw, abbágán naw ira ána ipakánnámmu naw nira yù bilin ni Namarò nga meyanung kâ Apu Kesu. ⁶ Á ta pakiubobuk naw nira, ari kayu mappeddaráyaw, ngam napiá lâ yù ággubobuk naw, tapè ayatán yù ira tatolay nga makaginnâ sù kagian naw nira, á manguruk ira gapay ána mangikatalâ ira kâ Apu. Á nonopan naw ta napiá yù itabbák naw sù ira ngámin nga mangiyabbù nikayu.

Yù Pangiyabbù ni Pablo nu Kunnasi yù ira Kákkopon na

⁷ Si Tikiko yù wagi tam nga iddukat tam, ána kabbuluk ku gapay nga pangikatalakán nga masserbi kâ Apu, á napiá yù ángngabbák na nikán. Á iparámak na sangaw nikayu yù ngámin nga nesimmu nikán saw. ⁸ Ta yáyù nga dobak ku ta umay ta gián naw, tapè kánnámmuán naw yù ngámin nga meyanung nikami, ána mabannáyán yù nonò naw. ⁹ Á si Onesimo nga kabbulun naw nga taga Kolosi yù pangikatalakán nga wagi tam nga iddukat tam. Á aggina yù mepulù kâ Tikiko nga umay ta gián naw. Á aggira duá yù mangiparámak nikayu sù ngámin nga nesimmu nikán.

¹⁰ Á aijan si Aristarko nga kabbuluk ku nga nebáluk. Á ikáyâ na nga iyabbù nu kunnasi kayu. Á si Markus gapay, nga kapittán ni Bernabe, iyabbù na nu kunnasi kayu. Á kinagi ngaw nikayu yù meyanung kâ Markus. Á nu lubbè sangaw ta gián naw, á paddulotan naw. ¹¹ Á si Kesu, nga abbúnad da gapay ta Justo, iyabbù na gapay nu kunnasi kayu. Á aggira lâ nga tallu yù kábuluk ku nga Kudio nga mepattarabáku nikán, nga mangiparámak sù bilin ni Namarò nga meyanung sù pammagure na, á mabannáyán yù nonò ku megapu nira.

¹² Á si Epapro nga katangelián naw yù mangiyabbù gapay ta meyanung nikayu. Aggina gapay yù masserbi kâ Apu Kesu Kiristu, á ari malurâ nga makimi-imállâ kâ Namarò megapu nikayu. Á yawe ipakimállâ na, ta tulluâ yù nonò naw, ána mapasigaggâ yù ángngikatalâ naw kâ Apu, tapè kánnámmuán naw ána palurotan naw yù ngámin nga ipakuá ni Namarò nikayu. ¹³ Á sistiguák ku ta kukurugán nga maláppâ nga mamalurò sù ipakuá ni Apu kuna, megapu nikayu ána yù ira wáwwagi tam ta ili na Lodisia ána ili na Kirapulís.

¹⁴ Á di Lukas, nga doktor nga iddukat tam, kâ Demas gapay, iyabbù da nu kunnasi kayu.

¹⁵ Á wáwwagi, kagian naw gapay sù ira wáwwagi tam ta Lodisia ta iyabbù ku nu kunnasi ira. Á iyabbù ku gapay nu kunnasi di Nimpa ána yù ira káruán nga mangikatalâ kâ Apu Kesu nga maggagammung ta bale ni Nimpa.

¹⁶ Á sangaw nu mabalin naw bibbiran yawe túrá ku, á itubbuk naw ta Lodisia, tapè bibbirad da gapay nayù ira mangikatalâ kâ Apu nga maggagammung tán. Á kagian naw nira ta itubbuk da bi nikayu yù túrá ku nira, tapè bibbiran naw gapay.

¹⁷ Á kagian naw bi kâ Arkipo yù kinagi kuna, nga tángngagan na ána palurotan na yù ipatarabáku ni Apu kuna.

¹⁸ Á sikán si Pablo nga nangitúrâ ta ngágak ku sawe pakáddekán nayù túrá. Á ipanonò ku nikayu ta aijanâ paga ta ábbalurán, tapè ari kayu mattukkâ nga makimállâ megapu nikán. Á yawe ipakimállâ ku megapu nikayu, ta ikákkállâ na kayu ni Apu.

Yù Olu nga Túrâ ni Pablo sù ira Manguruk nga taga Tessalonika

Yù Meyannung sawe Túrâ ni Pablo

Gári, netádday yù purubinsia na Masidonia sù ngaw páppatulán na Roma. Á Tessalonika yù karakalán na ili sù purubinsia na Masidonia, nga paggianán nayù ira mammaguray ta purubinsia. Á aranni ta ili na Pilippay yù ili na Tessalonika.

Á páno ri Pablo kári Silas kâ Timotio ta Pilippay, nga mappassiár nga mangilayalayâ sù bilin ni Namarò, naddagâ ira ta Tessalonika, tapè mangilayalayâ ira sù ira tatolay tán. Á aru yù ira nga ari Kudio nga nanguruk sù bilin ni Namarò megapu sù pangilayalayâ di Pablo.

Á ari nabayák di Pablo nga mangilayalayâ lage na jimittál yù ira ikáttole ra nga Kudio nga mapassil sù ari Kudio nga manguruk, á pinappatapátu ra yù ira ngámin nga tatolay tán nga ari manguruk, tapè jigirigátad da di Pablo. Á yáyù nga nánaw laguk di Pablo nga minay ta Korinto. Á manganánuán, jinok ni Pablo si Timotio ta umay mattúllun sù ira manguruk nga maggián ta Tessalonika.

Á panoli ni Timotio ta gián ni Pablo ta Korinto, kinagi na yù ngámin nga meyanung sù ira manguruk nga maggián ta Tessalonika, nga jigâ da ána yù napasigaggâ nga ángngikatalâ da kâ Apu Kesu, ána yù ngámin nga akka-akkuád da ta pagiddak da sù pattoli ni Apu Kesu. Á yáyù nga iníturâ ni Pablo yù itabarang na nira nga taga Tessalonika.

Yù Mayán nayù Túrâ

Yù Pangayâ ni Pablo megapu sù ira Manguruk nga taga Tessalonika (1:1–3:13)

Yù Napiá nga Ággangnuá tam nga Ipagayáyâ ni Namarò (4:1-12)

Yù Mesimmu sù ira Manguruk nga Námmatay (4:13-18)

Magiddak ittam ta Pattoli ni Apu Kesu (5:1-11)

Yù Maporián nga Itabarang ni Pablo (5:12-28)

Yù Pangayâ ni Pablo megapu sù ira Manguruk nga taga Tessalonika

¹ Sikami nga mattúrâ di Pablo kári Silas kâ Timotio. Á túratám mi sikayu nga maggián ta ili na Tessalonika, nga wáwwagi mi megapu ta ángnguruk tam kári Namarò nga Yáma tam kâ Apu Kesu Kiristu nga Yápu tam. Á parè bì ta ikállâ na kayu ni Apu tapè magimammâ kayu, ána napiá yù ággián naw.

² Á sigídâ mi kayu ipakimállâ kâ Namarò, ána maddáyaw kami kuna megapu nikayu ta ngámin nga pakimállâ mi. ³ Á paddáyo mi kâ Namarò nga Yáma tam, ipanonò mi kuna yù ngámin nga napiá nga akkuán naw megapu sù ángnguruk naw kâ Apu Kesu, ána yù kaláppâ naw nga mangabbák sù ira kábulun naw megapu sù ayâ naw kâ Namarò. Á ipanonò mi gapay kuna yù pagattam naw ta jigâ megapu sù napasigaggâ nga ággiddanáma naw kâ Apu Kesu Kiristu nga Yápu tam.

Yù Pangikatalâ nayù ira taga Tessalonika

⁴ Wáwwagi mi, nga iddukan ni Namarò, ammu mi ta kuruk nga sikayu yù piníli na, gapu ta nanguruk kayin. ⁵ Ta ari yù ubobuk na tolai yù naginná naw, nu ari galá yù kuruk nga napiá nga dámak, nga inilayalayâ mi nikayu megapu sù pakáwayyá nayù Mangilin nga Ikararuá. Á ari kami mabbábáng ta pangilayalayâ mi nikayu, ta ammu mi ta makáwayyá yù ubobuk ni Namarò. Á sikayu, ammu naw yù napiá nga nonò mi nga inipasingam mi ta pakipaggiám mi nikayu, ána yù napiá nga ángngabbák mi nikayu. ⁶ Á panguruk naw sù bilin, pinárigán naw kami ána pinárigán naw si Apu Kesu nga Yápu tam, mássiki nu narigirigâ kayu megapu sù panguruk naw. Á pinagayáyâ na kayu nayù Mangilin nga Ikararuá megapu sù bilin nga inalawâ naw.

⁷ Á yáyù nga sikayu yù párigán nayù ira ngámin nga manguruk nga maggián ta purubinsia naw nga Masidonia ána purubinsia na Akeya. ⁸ Ta melayalayâ yù napiá nga bilin ni Apu Namarò ta ngámin nga lugár na Masidonia ána Akeya megapu nikayu. Á ari lâ tán nga lugár, nu ari gapay ta nassamá ta ngámin nga lugár yù dámak nga meyanung sù ángngikatalâ naw kâ Namarò. Á yáyù nga awán laguk ta máwák mi nga makkagi. ⁹ Á ta ngámin nga angayám mi, ubobugan nayù ira tatolay yù napiá nga pangáliuk naw nikami ta ánge mi nikayu. Á iparámak da gapay yù pabbabáwi naw sù pakimore naw ta sináddios, tapè si Namarò lâ yù passerbián naw, nga kuruk nga táttádday nga sigga-inángâ ta áddè ta áddè.

¹⁰ Á ubobugad da gapay ta iddi-iddagán naw yù pattoli nayù Aná ni Namarò nga maggapu ta lángi. Aggina si Apu Kesu nga pinaginnanole ni Namarò, á iyigù na ittam sangaw, tapè ari ittam mekanakanâ sù pangukum ni Namarò.

2

Yù Pangituddu ni Pablo ta Tessalonika

¹ Wáwwagi, ammu naw ta aijan yù napiá nga nabbalinán nayù paggiám mi ngaw nikayu, ta inabbágám mi sikayu. ² Á narámak naw gemma yù karigirigá mi ta paggiám mi ta ili na Pilippay, nga pangnuá ra nikami áнна pakkakagi ra nikami tán. Ngam pinatattam na kami ni Namarò, tapè melayalayá mi nikayu yù bilin na, mássiki nu nepallà yù pangontará ra nikami ta gián naw. ³ Á kuruk yù ituddu mi ta pangapà mi nikayu ta mangikatalà kayu gapay kâ Apu Kesu, á awán ta narákè nga nonò mi. Á arám mi kayu inilogò ta meyanung sù kuruk. ⁴ Ngam ilayalayá mi lâ yù ipelayalayá na nikami ni Namarò, ta sinullà na kami nga ikatalà na ta mangilayalayá sù napiá nga dámak. Á awán bulubugá ta pataliám mi, ta ari yù ira tatolay nga pagayáyatam mi, nu ari galá si Namarò nga makánnámmu sù egga ta nonò mi.

⁵ Á pangilayalayá mi, ammu naw ta matunung yù ággubobuk mi. Ari áppè pípiá yù ággubobuk mi áнна awán ta narákè nga nonò mi. Á ari kami mangukkuk, áнна awán ta inilímak mi nikayu. Ngam ammu ni Namarò ta kuruk ngámin yù kinagi mi nikayu. ⁶ Á arám mi aleran yù ira tatolay nga maddáyaw nikami, mássiki nu sikayu onu tanakuán. ⁷ Á mássiki nu aijan yù awayyá mi nakuan nga alawatan yù paddáyo naw nikami megapu sù pakáwayyá mi nga mangilayalayá nga naggapu kâ Apu Kesu Kiristu, á arám mi inipotun yù baggi mi ánnè nikayu. Ngam ta keggá mi nikayu, inipasingam mi galá yù ángngiddù mi nikayu, nga kunnay ta ánnaron na babay ta ánnà na. ⁸ Á gapu ta ángngiddù mi nikayu, ari lâ yù napiá nga dámak nga naggapu kâ Namarò yù ikáyá mi nga kesipátán naw, ngam yù baggi mi gapay, nga dán nga naparán nga mabbaluntáriu nga metapil megapu nikayu.

⁹ Wáwwagi, nonopan naw yù ángngiddù mi nikayu. Ta keggá mi nikayu, natarabáku kami áнна inattámám mi yù bannák mi ta ággaw áнна gabi, tapè arám mi máwák nga makkiddaw nikayu, marakè malannapán yù jigá naw megapu nikami ta pangilayalayá mi nikayu sù bilin ni Namarò. ¹⁰ Á sikayu yù makasistígu ta kuruk nga napiá yù kustombare mi, áнна ammu ni Namarò gapay. Á matunung yù ngámin nga kingnuá mi nikayu nga mangikatalà kâ Apu Kesu, á awán ta ikáru mi nikayu, nga awayyá naw nakuan nga mamaliwá nikami. ¹¹ Á keggá mi ta gián naw, ammu naw gapay ta kunnay kami ta napiá nga yáma sù ira ánnà na, ta sinudduám mi kayu, áнна sinabarangám mi kayu nga katággítádday. ¹² Á jinudduák mi nikayu ta palurotan naw lâ yù napiá nga ipakuá ni Namarò nikayu, tapè meparáyaw si Namarò megapu sù napiá nga akka-akkuán naw. Ta si Namarò yù nagágál nikayu, ta mesipá kayu sù pammagure na áнна paddalingárang nayù karáyo na.

¹³ Á sigidá kami gapay mabbalabálá kâ Namarò megapu nikayu, gapu ta inalawá naw yù bilin ni Namarò ta pakaginná naw sù pangilayalayá mi. Á natákkilalán naw ta kuruk nga ubobuk ni Namarò, nga ari yù ubobuk na tolay. Á kinuruk nawin yù kuruk nga ubobuk ni Namarò, nga makáwayyá nga mangabbák nikayu nga manguruk, tapè mabbáli ta napiá yù nonò naw áнна ággangnuá naw. ¹⁴ Á wáwwagi, mepárik kayin sù ira manguruk kâ Namarò ta purubinsia na Judiya, nga wáwwagi tam nga mangikatalà kâ Apu Kesu Kiristu. Ta inattámán naw gapay yù panigirigá nayù ira ikáttole naw ta gián naw, nga kunnay sù pagattam nayù ira taga Judiya ta panigirigá nayù ira ikáttole ra nga Kudio ta giád da.

¹⁵ Á yù ira Kudio, aggira yù namapátay kâ Apu Kesu. Á yù ira ngaw naggaká nira yù namapátay sù ira ngaw ábbilinán ni Namarò. Á yù ira Kudio kunangane, jigirigátad da kami nga minángngilayalayá, á pinapáno ra kami nga ikáttole ra ta giád da. Á ari gemma magayáyá si Namarò sù akka-akkuád da, ta kontarád da yù ira ngámin nga tatolay. ¹⁶ Ta molang da nu makiyigù yù ira ari Kudio kâ Namarò. Á yáyù nga jigirigátad da kami nga mangilayalayá sù ira ari Kudio. Á kunnian, lannalannapád da yù liwá da nga ikáru ra. Á mapporayin si Namarò nira, á pagikaruan na ira sangaw ta impiernu ta áddè ta áddè.

Yù Pakkaragá ni Pablo nga Mattúllun sù ira taga Tessalonika

¹⁷ Á sikami, wáwwagi, mássiki nu ari paga nabayák yù káwám mi nikayu, á maraddam kami nikayu, á sigidá lâ manonò mi sikayu. Á mapattù kami nga umay mattúllun nikayu. ¹⁸ Á sikán, umayá lâ umay nakuan, ngam aijan garè yù kegaggarák ku nga naggapu kâ Satanas. ¹⁹ Á yawe yù ipakkaragá mi nga umay nikayu, ta sangaw nu duttál si Apu Kesu

Kiristu ta dabbuno, á sikayu yù ipagayáyâ mi, ána sikayu yù gapu na nga iddanamám mi ta ari kami mepasiránán sangaw ta arubáng nayù Yápu tam, gapu ta mapasigaggâ yù panguruk naw. ²⁰ Á yáyù nga ayatán kami laguk, ta sikayu yù ipagayáyâ mi ána mepallâ yù paddáyo mi kâ Apu megapu nikayu.

3

Paddok ni Pablo kâ Timotio ta Mattúllun sù ira taga Tessalonika

¹ Á gapu ta arám mi ngin meyattam yù daddam mi nikayu, ta arám mi ammu nu kunnasi kayu, á sikami duá kâ Silas, ninonò mi ta mabattáng kami lâ ta Atenas, ² tapè dobam mi ta gián naw si Timotio, nga wagi tam nga masserbi kâ Namarò, nga mangilayalayâ gapay sù napiá nga dámak nga meyannung kâ Apu Kesu Kiristu. Á yáyù nga jinok mi laguk si Timotio, nga umay manabarang nikayu, tapè mepasigaggâ yù ángngikatalâ naw kâ Apu, ³ ána arán naw likuránán yù napiá nga panguruk naw megapu sù panigirigâ da nikayu nayù ira ari manguruk. Ta ammu naw gemma ta máwák nga attamát tam yù jigâ nga umay nittam. ⁴ Á paggiám mi paga nikayu, kinagi mi nikayu ta umay yù jigâ nga máwák nga attamát tam. Á masingan naw ta nesimmu ngin yù kunnian nga kinagi mi ngaw nikayu. ⁵ Á pakarámak ku sù karigirigâ naw, arák ku meyattam yù burung ku nikayu. Á yáyù nga jinok ku si Timotio, ta en na kayu tullúnán, tapè ammu sangaw nu kunnasi yù ángnguruk naw. Ta maburungâ, marakè melogò kayu, á likuránán naw yù napiá nga ángnguruk naw, megapu ta pamarubá na nikayu ni Satanas. Á nu kunnian, kengá lâ nakuan yù bannák mi nga mangituddu nikayu.

Yù Istorián ni Timotio kâ Pablo

⁶ Á kunangane, limibbekin si Timotio nga naggapu sù gián naw, á napiá yù iniparámak na nga meyannung nikayu. Kinagi na ta napasigaggâ yù ángngikatalâ naw kâ Apu Kesu ána napiá yù pakkakâ-iddù naw. Á kinagi na gapay ta sigidá manononò naw kami, ána karagatán naw kami masingan gapay nga kunnay sù pakkaragâ mi nga makasingan nikayu.

⁷ Á wáwwagi, mássiki nu nepallâ yù burung mi nikayu ána aru yù inattamám mi nga jigâ, á mabannáyán kami gapu ta pakarámak mi ta napiá lâ yù panguruk naw. ⁸ Á napálappawánin yù nonò mi gapu ta ammu mi ngin ta napasigaggâ yù ángngikatalâ naw kâ Apu Kesu. ⁹ Á ari kami makabalabálâ kâ Namarò sù nepallâ nga pagayáyâ mi ta arubáng na megapu nikayu. ¹⁰ Á sigidá kami makimi-imállâ ta ággaw ána gabi, ta makkakásingan ittam, ána aijan yù awayyá mi nga mangabbák nikayu, tapè mapasigaggâ paga yù ángnguruk naw.

¹¹ Á parè bi ta anugutad da kami di Namarò nga Yáma tam ána si Apu Kesu Kiristu, tapè makatúllun kami nikayu sangaw. ¹² Á parè bì gapay ta pappanatan ni Namarò yù pakkakâ-iddù naw ána yù pangiddù naw gapay sù ira ngámin nga tatolay, nga kunnay ta ángngiddù mi nikayu. ¹³ Á ta kunnian, parè bi ta pasikanan ni Apu Namarò yù nonò naw, tapè talákkurugan naw nga palurotan yù napiá nga ipakuá na nikayu, ána pareku nga napiá yù nonò naw, nga awán ta nakaliwatán naw ta arubáng ni Namarò nga Yáma tam, sangaw nu mattoli si Apu Kesu nga mepulú kuna yù ira ngámin nga tatole na.

4

Yù Napiá nga Ággangngué tam nga Ipagayáyâ ni Namarò

¹ Á aijan lâ paga yù kagiam mi bì nikayu, wáwwagi. Gapu ta nattudduák kayin ta napiá nga akka-akkuát tam nga ipagayáyâ ni Namarò nittam, kunnian gapay yù ággangngué nawin. Á ikomá mi nikayu ta uputan naw yù napiá nga akkuán naw megapu sù pakáwayyá ni Apu Kesu. Á yáyù nga tabarangám mi sikayu, tapè mangáppipiá kayu. ² Á nonopan naw laguk yù taddám mi nikayu megapu sù pakáwayyá mi nga iniyawâ na kami ni Apu Kesu. ³ Á yawe yù ure ni Namarò, ta palurotan naw yù ipakuá na nikayu, tapè mangilin kayu ána ari kayu mekanâ ta liwâ. Ari kayu meruruk sù arán naw atáwa.

⁴ Á sikayu nga lálláki, máwák naw nga napiá yù pangatáwa naw, ána pakimorayán naw yù atáwa naw, tapè magayáyâ si Namarò nikayu. ⁵ Arán naw laguk akkuán yù gustu na baggi naw nga mamabay ta kunnay sù ira ari manguruk kâ Namarò. ⁶ Arán naw durugan yù atáwa nayù kabbulun naw. Arán naw akkuán yaw nga narákè sù ira kábulun naw nga manguruk kâ Apu Kesu. Nonopan naw yù kinagi mi ngaw nikayu, ta si Apu Namarò yù mangibálâ karannian nga narákè nga akkuán na tolay. ⁷ Ta ari danniaw nga narákè yù ipakuá ni Namarò nittam. Ngam agálán na ittam ta akka-akkuát tam yù napiá, nga

mepángxà nittam nga mangilin nga tatole na. ⁸ Á nu panakitán naw dannian nga ituddu mi, ari lá sikami yù potuán naw, nu ari galá si Namarò, nga mangiyawá sù Mangilin nga Ikararuá na nikayu.

⁹ Á ta meyanung sù pangiddù naw sù ira wáwwagi naw megapu sù pangikatalà naw ká Apu, á awán ta máwák mi nga iturá nikayu, ta sinudduán na kayu ni Namarò ta pakkaká-iddù naw. ¹⁰ Á kuruk nga iddukan naw yù ira ngámin nga wáwwagi naw nga manguruk ká Apu sù tangapurubinsia na Masidonia. Á tabarangám mi kayu laguk, wáwwagi, ta uputan naw yù pakkaká-iddù naw, tapè mangáppípiá kayu. ¹¹ Ari kayu makkakáburuburion. Ipe naw yù urà naw nga mepagimammá sù ira kábulun naw. Á sikayu nga taggitáday, tángngagan na lápay yù meyanung kuna. Á maláppà kayu nga mattarabáku, tapè malá naw yù ngámin nga máwák naw, ta kunnay sù pangitabarang mi ngaw nikayu. ¹² Maláppà kayu laguk nga mattarabáku, tapè awán ta máwák nga kiddawan naw sù ira nga ari manguruk ká Apu, á pakimorayád da kayu gapay.

Yù Mesimmu sù ira Manguruk nga Námmatay

¹³ Á wáwwagi, ikáyá mi nga ipakánnámnu nikayu yù meyanung sù ira ngaw manguruk nga námmatay, tapè ari kayu maraddam ta kunnay sù karaddam nayù ira ari manguruk, nga awán ta iddanamá da. ¹⁴ Ta gapu ta manguruk ittam ta natayin si Apu Kesu ána naginnanolayin, yáyù nga ammu tam ta paginnanolayan na sangaw ni Namarò yù ira námmatay nga mangikatalá ká Apu Kesu lage na pate ra. Á ipepulú na ira ni Namarò ká Apu Kesu ta pattoli na sangaw ta dabbuno. ¹⁵ Á yawe nga kagiam mi nikayu yù kinagi ni Apu Kesu nikami, ta sittam nga matolay paga ta pattoli na, ari ittam yù mapolu nga umay manápun kuna ta lángi, nu ari galá yù ira námmatay.

¹⁶ Á ta kunnawe yù kesimmu na, ta mappagukák si Apu Kesu nga maggapu ta lángi nga magágál sù ira manguruk kuna. Á makkatol gapay yù kátannangán nga daroban, ána magamariung gapay yù pagamariungan ni Namarò. Á yù ira námmatay nga nangikatalá ká Apu Kesu Kiristu lage ra natay, aggira yù mapolu nga maginnanolay. ¹⁷ Á sittam nga manguruk nga matolay paga, ikáddagá na ittam apan ni Namarò nga ipotun na ta kunam nga mepappupúlú nira, tapè dapunat tam si Apu ta lángi. Á yáyù nga mepattolay ittam nga mepulupulú kuna ta áddè ta áddè. ¹⁸ Á yáyù nga makkaká-ubobuk kayu ta meyanung sawe ira ubobuk, tapè mabannáyán yù nonò naw.

5

Magiddak ittam ta Pattoli ni Apu Kesu

¹ Á wáwwagi, arám mi ngin máwák nga iturá nikayu yù meyanung ta ággaw ána oras nayù pattoli ni Apu Kesu sangaw nu umay mamanunnú ta tatolay. ² Ta ammu naw gemma ta ikáddagá lá duítál yù ággo na, nga kunnay sù dattál nayù makkokò ta gabi nga arát tam ammu. ³ Á dattál nayù ággaw sangaw, á yù ira tatolay nga ari manguruk, kagiad da lá sù ira kábulud da, “Napiá ngin yù ággiát tam. Ari ittam maburung, ta awán bulubugá ta ikássing tam,” kud da. Ngam ta pakkagi ra karanniaw, ikáddagá lá yù kokum da nga kunnay ta pappasikál na babay nga maddaggun maganá, á awán bulubugá ta makatálaw.

⁴ Ngam sikayu, wáwwagi, ari kayu yù kun na tolay nga maggián ta kallá, á ari kayu makaddák ta dattál nayù ággaw nga pangukum ni Namarò, nga ikáddagá lá umay ta kun na makkokò. ⁵ Ta kunnay kayin ta maggián ta nawák, ta dán nga naporán kayin megapu sù panguruk naw ká Apu. Á sittam ngámin nga manguruk, ari ittam kunnay ta maggián ta kallá, nga kunnay sù ira nga ari manguruk. ⁶ Ari ittam laguk matalakák nga kunnay sù ággangnuá nayù ira ari manguruk. Kunnay ira ta makkaturuk, ngam máwák nga kunnay ittam ta makemmunaw nga magiddak. Magimuguk ittam laguk ána uputat tam yù napiá nga akkuát tam. ⁷ Ta ari ittam kunnay sù ira nga arád da ammu si Apu Namarò, nga kun na kallá yù nonò da. Kunnay ira ta makkaturuk, nga awán ta papparád da ta labbé ni Apu. Á narákè lá yù akkuád da nga kunnay ta minámissán nga magilellaw.

⁸ Ngam dumá ittam nga manguruk ká Apu, ta manawagánin yù nonò tam. Imugurát tam laguk yù akkuát tam, tapè palurotat tam lá yù napiá. Á uputat tam yù ángngikatalá tam ká Apu Kesu ána ángngiddù tam sù ira kábulut tam, nga meyarík ta balayáng nga barawási na suddálu, nga nelippak ta gáko na, tapè ari matáppù yù kunnay ta pinána ni Satanas. Á yù ággiddanáma tam sù pangiyígù ni Apu nittam, yáyù meyarík ta balayáng nga taddung na suddálu nga nelippak ta ulu tam, tapè ari ittam melogò nga tumulú sù mamalliawá nittam. ⁹ Ta arán na ittam sinullá ni Namarò ta ukuman na. Ngam agálán ni Namarò ittam, tapè ipeyígù na ittam ká Apu Kesu Kiristu. ¹⁰ Ta si Apu Kesu Kiristu yù netapil nga natay

megapu nittam, tapè mepattolay ittam nga mepaggián kuna, mássiki nu matolay ittam paga onu natay ittamin ta pattoli na. ¹¹ Á yáyù nga uputan naw laguk yù akka-akkuán nawin nga pakkakátabarang naw ána pakkaká-abbák naw, tapè mabannáyán yù nonò naw ána mapasigaggà yù ángngikatalà naw.

Yù Maporián nga Itabarang ni Pablo

¹² Wáwwagi, nga mangikatalà kâ Apu Kesu, yaw gapay ikomá mi nikayu, ta ikákkállà naw yù ira nga maláppà nga mangabbák ána mangituddu nikayu ta meyannung sù panuttul naw kâ Apu. Ta aggira yù sinullà ni Apu ta manaron ána manabarang nikayu. ¹³ Pakimorayán naw ira ána iddi-iddukan naw ira ta napiá, gapu ta napiá yù ángngabbák da nikayu. Á pattatáddayan naw yù nonò naw, tapè ari kayu maddaráma, á magimammà kayu.

¹⁴ Á itabarang mi nikayu gapay, wáwwagi, ta duddúaran naw yù ira matalakák, tapè mattarabáku ira ta napiá. Á yù ira maburung, ipanonò naw nira yù ángngabbák ni Apu nira, tapè mabannáyán yù nonò da. Á abbágán naw yù ira nga makapi yù ángnguruk da, tapè ari ira melogò nga makitulù sù mamalliaw nira. Attamán naw ira ngámin. Á ari kayu malurá nga mangabbák nira. ¹⁵ Magimuguk kayu ta arán naw bálatan ta narákè yù mangnguá ta narákè nikayu. Ngam apurán naw lá nga akkuán yù napiá sù ira kábulun naw nga mangikatalà kâ Apu ána yù ira ngámin nga tatolay.

¹⁶ Á magaya-ayáyá kayu laguk, maguray lá yù mesimmu. ¹⁷ Ána makimi-imállà kayu gapay kâ Namarò. ¹⁸ Á maguray lá nga mesimmu nikayu, maddáyaw kayu lá kâ Namarò, ta yáyù ure ni Namarò nga akkuán naw, gapu ta mepattatádday kayin kâ Apu Kesu Kiristu.

¹⁹ Arán naw laguk panakitán yù pangituddu nayù Mangilin nga Ikararúá nikayu. ²⁰ Á arán naw iluddè yù ipeyubobuk ni Namarò sù ábbilinán na. ²¹ Ngam pasikkálan naw lá yù ngámin nga kagiad da, nu kukurugán nga naggapu kâ Namarò, onu ari. Á tángngagan naw lá yù napiá. ²² Á arayyuán naw yù ngámin makkakerumá nga narákè.

²³ Si Namarò yù mamagimammà nittam, á parè bi ta pakarenuán na yù nonò naw, tapè napiá nga tatole na kayu nga mangilin. Á parè bi ta taronán na yù nonò naw, ána yù ikararúá naw, ána yù baggi naw, tapè napiá yù ággián naw, ána napiá lá yù akka-akkuán naw, á awán ta pakaliwatán naw sangaw nu manoli si Apu Kesu Kiristu ta dabbuno. ²⁴ Ta mekatalà si Namarò. Á aggina yù magágál nittam ta umay ittam manguruk kuna. Á yáyù nga aggina yù mamaluro sù ngámin nga napiá nga meyannung nittam.

²⁵ Á wáwwagi nga mangikatalà kâ Namarò, makimállà kayu gapay kâ Apu megapu nikami. ²⁶ Á kagian naw sù ira ngámin nga wáwwagi tam nga maggián tán yù ayá mi nira. ²⁷ Á yawe yù itabarang ku nikayu megapu sù pakáwayyá nga iniyawá ni Apu Kesu níkan, ta bibbiran naw yawe túrá mi sù ngámin ira nga wáwwagi tam. ²⁸ Á parè bi ta sigidá matagená naw yù pangikállà na nikayu ni Apu Kesu Kiristu.

Addè na yù.

Yù Mekaruá nga Túrâ ni Pablo sù ira Manguruk nga taga Tessalonika

Yù Meyannung sawe Túrâ ni Pablo

Pattúrâ ni Pablo sù ira manguruk nga taga Tessalonika, kinagi na yù pagayáyâ na nira megapu sù napasigaggâ nga pangikatalâ da kê Apu Kesu. Á inipakánnámmu na nira yù kuruk nga kegapuánán nayù jigâ da nga makkakerumá, nga ari gapu ta pore ni Apu Namarò nira, nu ari galâ tapè mepasingan yù napasigaggâ nga ángngikatalâ da kê Namarò, mássiki nu marigirigâ ira (1:5-6).

Á kinagi ni Pablo nira gapay ta mappalán ira sù ira káruán nga umay nira nga mangituddu, ta ari kuruk yù kagiad da nga ajjan kanu nira yù túrâ ni Pablo nga makkagi ta nanolingin si Apu Kesu. Awán bulubugá ta kagiad da nga kuruk. Á ibukalán ni Pablo nira yù kuruk nga meyanung sù panoli ni Apu Kesu sangaw nu ággo na nga sinullâ na lâ ni Namarò.

Yù Mayán nayù Túrâ

Yù Paddios ni Pablo ána Pakimállâ na (1:1-2)

Yù Matunung nga Pamanunnù ni Apu Kesu ta Panoli na (1:3-12)

Yù Panoli na sangaw ni Apu Kesu Kiristu ta Dabbuno (2:1-12)

Yù Ángngiddù ni Namarò nittam (2:13-17)

Makimállâ ittam ána Mattarabáku ittam (3:1-15)

Yù Naporián nga Pakimállâ ni Pablo (3:16-18)

¹ Sikami di Pablo kári Silas kê Timotio. Á túratám mi sikayu nga tatole ni Namarò nga maggagammung ta ili na Tessalonika, sikayu nga wáwwagi mi megapu sù ángnguruk tam kári Namarò nga Yáma tam kê Apu Kesu Kiristu. ² Á ipakimállâ mi kári Namarò kê Apu Kesu Kiristu, ta ikákkállâ da kayu ána pagimammadat da kayu, tapè napiá yù ággián naw.

Yù Matunung nga Pamanunnù ni Apu Kesu ta Panoli na

³ Á wáwwagi mi, máwák nga sigidá kami maddáyaw kê Namarò megapu nikayu, nga kunnay ta mepángngâ, gapu ta mangáppipiá yù ángngikatalâ naw kê Namarò ána yù pakkaká-iddù naw. ⁴ Á sikami lággapay, yáyù nga iráyo mi sikayu ta ngámin nga angayám mi sù ira ággagammungán nayù ira manguruk, á kagiam mi nira ta napasigaggâ yù ángngikatalâ naw, mássiki nu aru yù makkakerumá nga jigâ nga attamán naw ána yù panigirigâ da nikayu nayù ira ari manguruk, megapu sù ángnguruk naw kê Apu.

⁵ Á yáyù nga mepasingan ta matunung yù ámmannunnù ni Namarò, gapu ta attamán naw yù jigâ nga umay nikayu, tapè mepakánnámmu yù bilin ni Namarò nga meyanung sù pammagure na, á ibiláng na kayu ni Namarò ta tatole na nga mepángngâ nga mesipâ sù pammagure na. ⁶ Á mepasingan ta matunung gapay yù ámmagikáru ni Namarò, ta ibiláng na ta mepángngâ nga bálatan na ta jigâ yù ira nga manigirigâ nikayu. ⁷ Á sikayu nga marigirigâ, patukkatan ni Namarò yù ngámin nga jigâ naw, ána yù jigâ mi gapay, tapè mepagibannák ittam sangaw nu mattoli si Apu Kesu.

Ta ikáddagâ lâ umay si Apu Kesu nga maggapu ta lángi, ána mepulupulú kuna yù ira makáwayyá nga daroban na. ⁸ Á mappasingan ira nga mepulú ta gumággággáng nga api. Á pagikaruan ni Apu Kesu yù ira ngámin nga manaki nga makiyápu kê Namarò ána yù ira nga ari manguruk sù napiá nga dámak nga meyanung kê Apu Kesu nga Yápu tam. ⁹ Á yawe yù pamagikáru ni Apu Kesu nira, ta mannanáyun ira nga maparigâ, á mannanáyun yù kesinná ra kê Namarò, á arád da bulubugá masingan yù dalingárang nayù makapállâ nga pakáwayyá na. ¹⁰ Á mesimmu ngámin danniauw sangaw nu manoli si Apu Kesu, tapè meparáyaw megapu sù ira ngámin nga tatole na. Á mapállâ yù ira ngámin nga mangikatalâ, ta pakasingad da kuna. Á sikayu gapay, mesipâ kayu sù ira tatole na, gapu ta kinuruk naw yù kinagi mi nikayu nga meyanung kuna.

¹¹ Á yáyù nga sigidá kami makimállâ kê Namarò megapu nikayu, tapè pabbalanan na kayu ta mepángngâ nga mepattatádday kuna, ta yáyù gapu na nga inagálán na kayu. Á ipakimállâ mi gapay ta abbágán na kayu ni Namarò megapu sù pakáwayyá na, tapè mapalurò naw yù ngámin nga napiá nga ikáyâ naw nga akkuán megapu sù ángngikatalâ naw kê Apu Kesu. ¹² Á yáyù nga meparáyaw si Apu Kesu nga Yápu tam megapu nikayu. Á

meparáyaw kayu gapay, gapu ta tatole na kayu. Á mapaluro ngámin danniaw megapu sù allà ni Namarò nittam ána yù allà ni Apu Kesu Kiristu nittam.

2

Yù Panoli na sangaw ni Apu Kesu Kiristu ta Dabbuno

¹ Á aijan yù kagiam mi nikayu, wáwwagi, ta meyannung sù panoli na sangaw ni Apu Kesu Kiristu ána yù pangammung na nittam ta gián na. ² Ari kayu maburung, ána ari kayu maburuburionán, nu marámak naw ta jimittálin yù ággo ni Apu Kesu ána nanolingin. Ari kayu manguruk sù kagiad da. Ta nu kagiad da ta aijan yù ábbilinán ni Namarò nga nakkagi nira, á massiri ira lâ. Á nu kagiad da ta sikán yù nakkagi nira, onu kagiad da ta yáyù iníturâ ku, ari gemma kuruk yù kagiad da. ³ Á mappalán kayu laguk tapè awán ta mangilogò nikayu, maguray lâ yù kagiad da. Ta mapolu bi nga aru yù ira tatolay nga mamotu kâ Namarò, lage nayù panoli ni Apu Kesu. Á mepalappâ laguk yù narákè nga tolay nga mangontará kâ Namarò. Á potuán na yù bilin ni Namarò, ngam yù impiernu yù natullà nga labbetán na. ⁴ A yane tolay, kontarán na ána potuán na yù ngámin nga ingágad da ta dios ána yù ngámin nga pakimorayád da. Á ipotun na yù baggi na ánnè kâ Namarò, á umay magitubang sù mangilin nga kapilliá ni Namarò, nga makkagi ta aggina yù Namarò. ⁵ Arán naw panò manonò ta yáyù gemma yù kinagi ngaw nikayu ta keggâ paga nikayu?

⁶ Á ta meyannung ta dattál nayù tolay nga narákè nga mangontará kâ Namarò, ammu nawin gemma ta aijan yù kegaggarán na. Ngam mepalappâ sangaw nu ággo na nga sinullà ni Namarò. ⁷ Á mássiki nu ari paga mappasingan, aijanin ta dabbuno yù pakáwayyá na nga arát tam kánámmuán, nga mangilogò sù ira tatolay. Ngam megaggak ána ari mepalappâ yù narákè nga tolay, áddè ta kelilli nayù mangigaggak kuna. ⁸ Á sangaw nu nelillikin yù mangigaggak, mepalappâ laguk yù narákè nga tolay nga mangontará kâ Namarò. Ngam umay sangaw si Apu Kesu, á isù na, á matay yù narákè nga tolay nga mangontará, á mararál megapu sù dalingárang ni Apu Kesu ta pappasingan na.

⁹ Á sangaw nu dattál yù narákè nga mangontará, aijan kuna yù pakáwayyá ni Satanas, á áppè mamagaddát si Satanas ta aru nga makkakerumá nga makapállà nga akkuán na tapè ilogò na yù ira tatolay. ¹⁰ Á aru yù ira tatolay nga melogò, á magawáwán ira, nga impiernu yù labbetád da, gapu ta manaki ira nga magginná sù kuruk nga bilin ni Namarò, tapè meiyù ira nakuan. ¹¹ Á gapu ta panaki da, táttájián ni Namarò ira, tapè melogò ira megapu sù pangilogò ni Satanas, á kurugad da yù siri na. ¹² Á yáyù nga pagikaruan ni Namarò yù ira ngámin nga ari manguruk, gapu ta arád da kurugan yù kuruk, ngam ipagayáyá da lâ yù pangguá ra ta narákè.

Yù Ángngiddù ni Namarò nittam

¹³ Ngam sikayu, wáwwagi mi, nga iddukan nayù Yápu tam, mepángngà ta sigidá kami maddáyaw kâ Namarò megapu nikayu, gapu ta sikayu yù pinili ni Namarò lage na pinarò yù dabbuno, tapè meiyù kayu, megapu ta pamakarenu nayù Mangilin nga Ikararuá ta nonò naw ána yù panguruk naw sù kuruk nga bilin na. ¹⁴ Á yáyù ipagágál ni Namarò nikayu, tapè mesipá kayu nga meparáyaw kâ Apu Kesu Kiristu, megapu sù pangilayalayá mi sù napiá nga dámak.

¹⁵ Wáwwagi mi nga mangikatalá kâ Apu, ipasigaggá naw laguk yù ángnguruk naw kuna. Á tángngagan naw yù ngámin nga napiá nga kustombare nga inittuddu mi nikayu ta keggâ mi nikayu ána yù iníturâ mi gapay. ¹⁶ Á parè bi ta ikákkállà na ittam di Apu Kesu Kiristu nga Yápu tam ána si Namarò nga Yáma tam, nga mangiddù nittam. Mannanáyun yù pamanne ni Namarò nittam ána yù pangikállà na nittam, ta iyawá na nittam yù napiá nga iddanamát tam. ¹⁷ Á yáyù nga ipakimállà mi sikayu kári Yápu tam ána si Namarò nga Yáma tam, ta parè bi ta pabbannáyád da yù nonò naw, ána ábbágád da kayu, tapè napiá lâ yù ngámin nga akkuán naw ána yù kagian naw.

3

Makimállà ittam ána Mattarabáku ittam

¹ Á wáwwagi mi, ipakimállà naw kami gapay kâ Namarò, ta ábbágán na kami ta pangilayalayá mi, tapè massamá yù bilin ni Apu sù ira ngámin nga tatolay, á manguruk ira ána makimoray ira gapay nga kunnay nikayu. ² Á yawe gapay ipakimállà naw, ta melilli kami sù ira narákè nga tatolay nga mangguá nikami nakuan, ta aijan garè yù ira nga manaki nga manguruk sù ubobuk ni Namarò. ³ Ngam mekatalá si Apu Kesu nga manaron nittam. Á taronán na kayu ána pasikanaan na kayu, tapè arán na kayu appútan ni Satanas.

⁴ Á gapu ta pangikatalà mi kê Apu Kesu, ammu mi ta mekatalà kayu gapay nga manuppál sù ngámin nga kinagi mi nikayu, ámma ari kayu malurá nga mangupù sù taddám mi nikayu. ⁵ Á sigidá mi ipakimállà gapay ta ipakánnámmu ni Apu Kesu nikayu yù pangiddù ni Namarò nikayu, ámma abbágán na kayu, tapè makkaká-iddù kayu gapay. Á parè bì ta ipanonò ni Apu Kesu Kiristu nikayu gapay yù ággattam na ta jigâ na, tapè mábbágán kayu gapay nga magattam ta jigâ naw nga kunnay sù pagattam na.

Yù Kagian ni Pablo nga Meyannung sù ira Mattalakák

⁶ Á wáwwagi mi, taddánám mi kayu laguk megapu sù pakáwayyá mi nga naggapu kê Apu Kesu Kiristu ta ari kayu mepulupulù sù ira kábulun naw nga mattalakák, nga ari manguruk sù inituddu mi nikayu. ⁷ Ta ammu naw yù napiá nga ágganguá mi nga inipasingam mi, tapè párigán naw kami. Ta ari kami gemma nattalakák ta keggá mi nikayu. ⁸ Ari kami bulubugá nakkiddaw ta kanam mi nikayu. Á awán ta inâ mi nga arám mi pinagán, ámma natarabáku kami ta ággaw ámma gabi, tapè ari malannapán yù jigâ naw megapu nikami.

⁹ Á mepángngà gemma nga abbágán naw kami nakuan, gapu ta pangituddu mi nikayu, ngam awán bulubugá ta kiniddo mi nikayu, tapè ipasingam mi nikayu yù napiá nga párigán naw. ¹⁰ Á keggá mi nikayu, yawe yù itaddám mi nikayu, “Nu aijan yù tolai nga manaki nga mattarabáku, arán naw pakanan.”

¹¹ Á narámak mi ta aijan garè nikayu yù ira nga magi-itubang lâ, nga ari bulubugá mattarabáku, ngam panunntád da lâ yù akkuán nayù ira kábulud da. ¹² Á danniaw ira nga tatolay laguk yù tabarangám mi megapu sù pakáwayyá mi nga naggapu kê Apu Kesu Kiristu, á taddánám mi ira ta magimammà ira nga mattaratarabáku, tapè egga nira lápay yù ipangá da ta máwák da.

¹³ Á wáwwagi mi, ari kayu bulubugá malurá nga mangnungá sù napiá. ¹⁴ Á nu aijan yù ira kábulun naw nga manaki nga manguruk sù kinagi mi sawe túrà mi, tákkilalán naw ira, á ari kayu mepulupulù nira, tapè mepasiránán ira. ¹⁵ Arán naw ira ibiláng ta ikalusso naw, ngam tabarangán naw ira lâ ta kunnay ta wagi naw.

Yù Naporían nga Ipakimállà ni Pablo

¹⁶ Si Apu Kesu yù paggapuán nayù napiá nga nonò nga magimammà. Á parè bì ta pagimammatan na yù nonò naw. Á maguray lâ yù mesimmu nikayu, parè bì ta sigidá nga mepulupulù yù Yápu tam nikayu ta ngámin nga angayán naw.

¹⁷ Á sikán lápay yù mattúrâ sawe ngágak ku, nga panákkilalán ta ngámin nga itúrâ ku. Á kunniaw yù áttúrâ ku: Pablo. ¹⁸ Á yawe ipakimállà ku, ta ikákkállà na kayu ngámin ni Apu Kesu Kiristu nga Yápu tam.

Yù Olu nga Túrâ ni Pablo kê Timotio

Yù Meyannung sawe Túrâ ni Pablo

Si Timotio yù bagitolay nga narángnganán ni Pablo ta pangilayalayâ na ta purubinsia na Asia Minor. Á Kudio yù yená ni Timotio, ngam Gareko yù yáma na. Á inibiláng ni Pablo ta kunnay ta aná na si Timotio, gapu ta si Pablo yù nangituddu kuna sù panguruk na kê Apu Kesu.

Á gapu ta kuruk nga mangikatalâ si Timotio kê Apu Kesu Kiristu, inapâ ni Pablo ta mepulú kuna nga mangabbák, á minay ira ta ili na Epeso nga mangilayalayâ sù napiá nga dâmak nga meyannung kê Apu Kesu. Á ta páno ni Pablo ta Epeso nga umay ta purubinsia na Masidonia, bittáng na si Timotio ta Epeso ta manaron sù ira manguruk nga naggagammung tán. Á pinappalán ni Pablo si Timotio ta meyannung sù ira mangituddu nga ari kuruk yù ituddu ra, á sinabarángan na ta gammán na ira.

Yù Mayán na yawe Túrâ

Yù Pamegapu nayù Túrâ (1:1-2)

Yù Ituddu ni Pablo kê Timotio nga Meyannung sù Pangituddu na (1:3-11)

Yù Pabbalabálâ ni Pablo kê Namarò megapu sù Allâ na (1:12-20)

Yù Meyannung ta Pakimállâ tam kê Namarò (2:1-15)

Yù ira Manaron sù ira Maggagammung nga Makimoray kê Apu (3:1-16)

Yù Meyannung sù ira nga Mangituddu ta Siri (4:1-16)

Yù Ákkiwagi tam sù ira Kábulut tam nga Manguruk (5:1-16)

Yù Meyannung sù ira Karakalán nga Mammaguray sù ira Manguruk (5:17-6:2)

Mappalán ittam sù ira Mangituddu ta Ari Kuruk (6:3-10)

Yù Panabarang ni Pablo kê Timotio (6:11-21)

¹ Sikán si Pablo nga mattúrâ sawe. Sikán yù minángngilayalayâ sù napiá nga dâmak nga meyannung kê Apu Kesu Kiristu, gapu ta sinullâ dangâ di Namarò kê Apu Kesu. Si Namarò yù mangiyigù nittam, á si Apu Kesu Kiristu yù iddanamát tam nga mattoli. ² Á mattúrâkâ nikaw, Timotio, nga aná ku. Ta mebiláng ken ta kuruk nga aná ku gapu ta sikán yù manabarang nikaw ta meyannung sù ángngikatalâ mu kê Apu Kesu. Á ipakimállâ taka kâri Namarò nga Yáma tam kê Apu Kesu Kiristu nga Yápu tam, ta iddi-iddukad da ka. Á parè bi ta ikákkállâ da ka gapay ána pagimammata da ka, tapè napiá yù ággiám mu.

Yù Ituddu ni Pablo kê Timotio nga Meyannung sù Pangituddu na

³ Á pidduák ku nga kagian yù kinagì nikaw ta páno nga umay ta Masidonia, ta mabattáng ka bì ta Epeso, tapè gammám mu yù ira tatolay nga mangituddu sù tanakuán nga ari negittá sù kuruk nga inituddu. ⁴ Á kagam mu nira ta arád da tángngagan yù bídâ ra nga meyannung sù ira ngaw mengal nga naggaká nira, ána yù pangilistá ra ta ngágan nayù ira ngaw naggaká nira, ta ari ira mábbágán nga tumuttú kê Namarò megapu karannian. Ta nu tángngagad da lâ yù bídâ ra ána pangilistá ra sù ira naggaká nira, yá lâ pabbalinán na ta makkakápereperang ira ta ubobuk ána maddarâma ira. Ngam mábbágán ira galâ ta mapalurò sù ipakuá ni Namarò nira megapu sù ángngikatalâ da kê Apu Kesu. ⁵ Á yawe yù napiá nga pabbalinán nayù ipetuddu mi nikaw, ta makkakâ-iddú ira. Á mapalurò yù pakkakâ-iddú da nu ari ira mábbábáng sù ángngikatalâ da kê Apu, ána aláppaw yù nonó da, gapu ta awán ta liwâ da nga nononopad da.

⁶ Á aijan garè yù ira tatolay nga manángngák ta bídâ nga meyannung sù ira naggaká nira ána yù pangilistá ra ta ngágad da, á nallikuránâden den yù napiá nga metuddu nira, á tángngagad da lâ yù pappereperang da ta ubobuk, nga awán ta serbi na. ⁷ Á gapu ta ikáyâ da ta meparáyaw ira sù ira kábulud da, á yáyù nga ikáyâ da mangituddu sù tunung nga inipetúrâ ni Namarò kê Moyses. Ngam arád da garè kánámmuán yù ubobugad da ána ituddu ra. Á mássiki nu arád da ammu yù kebalinán nayù tunung, ikáyâ da kagumánan yù ira tatolay.

⁸ Á ammu tam gemma ta napiá yù tunung ni Namarò nga inipetúrâ na kê Moyses, nu iyusá tam ta kunnay sù ikáyâ ni Namarò, tapè matákkilalát tam yù liwâ tam kê Namarò nu kánámmuát tam yù tunung na. ⁹ Á kánámmuát tam ta iniyawâ ni Namarò yù tunung, nga ari megapu ta paggammá ni Namarò sù ira napiá nga tatolay, nu ari galâ gapu ta gammán na yù ira nga ari tumulú sù tunung, ána yù ira mamotu nga ari maganássing kê Namarò, nga ipagayáyâ da lâ yù palliwâ da, yù ira tatolay nga narákè yù nonó da, yù ira makkakagi

kári Namarò, yù ira mangibanabanù, yù ira mamapátay sù darakal da áнна yù ira ngámin nga mamapátay. ¹⁰ Á gammán na gapay yù ira meruruk sù arád da atáwa áнна yù ira ngámin nga mangarallow, yù ira makkokò ta tolay nga iláku ra, yù ira massiri áнна yù ira nga ari kuruk yù kagiad da ta passistígu ra, áнна yù ira ngámin nga mangnguá ta mekontará sù napiá nga metuddu nira. ¹¹ Á yawe napiá nga metuddu yù napiá nga dámak nga ilayalayá ku, nga inikatalà na níkan ni Namarò, si Namarò nga maddalingárang nga maráyaw.

Yù Pabbalabálà ni Pablo ká Namarò megapu sù Allà na

¹² Á mabbalabálakà ká Apu Kesu Kiristu nga Yápu tam, gapu ta inikatalà nangà, á sinullà nangà ta masserbi kuna. Á pasikanan nangà, tapè palurotak ku yù ngámin nga ipakuá na níkan. ¹³ Ta inagálán nangà, mássiki nu síkán garè yù ngaw nakkakagi ká Apu Kesu, áнна jinigirigá ku yù ira manguruk kuna, nga ibiláng na ta kunnay ta baggi na. Á inikállà nangà ni Apu Kesu, gapu ta arák ku kánnámmuán yù kingnguá kuna, áнна aringá paga nanguruk kuna. ¹⁴ Á mássiki nu kuruk nga narákè yù liwá ku, ngam nepallà yù allà ni Apu Namarò níkan. Á inagálán nangà ta mangikatalà ká Apu Kesu, tapè mábbágánà nga mangiddù sù ira kábuluk ku, ta kunnay sù ángngiddù ni Apu Kesu nittam.

¹⁵ Á kuruk nga mekatalà yawe nga nakagi, ta “Minay si Apu Kesu Kiristu sawe dabbuno tapè iyígù na yù ira malliwá.” Á napiá nu manguruk yù ira ngámin nga tatolay kuna. Á síkán garè yù karáketán nayù ira ngámin nga malliwá. ¹⁶ Á yáyù gapu na nga inikállà nangà ni Namarò, síkán nga karáketán nga nalliwá, tapè ipasingan ni Apu Kesu Kiristu yù pagádekán nayù ángngikállà na sù ngámin nga tatolay nga umay paga nga manguruk kuna. Á yáyù gapu na nga pinakomá nangà, tapè ipakánnámmu na sù ngámin nga tatolay yù ámmakomá na nira gapay, nu ikatalà da, tapè málá da gapay yù áttole ra nga awán ta áddè na. ¹⁷ Dayáwat tam si Namarò nga Patul nga mammaguray ta ngámin ta áddè ta áddè. Awán ta kagitá na. Ari matay áнна ari masingan. Á aggina lá yù pakimorayát tam ta áddè ta áddè. Ammán!

¹⁸ Á Timotio nga aná ku, yawe yù ipakuá nikaw nga kunnay sù kinagi ra ngaw nayù ira ábbilinán ni Namarò, nga inipalappá ni Namarò nga meyannung ta panullà na níkaw, ta manuppál ka sù ipatarabáku na. Patagatam mu laguk yù nonò mu ta kunnay sù napiá nga suddálu, tapè ari ka mappasírán nga maggammá sù ira tatolay nga mangituddu sù ari kuruk. ¹⁹ Á tangngalám mu ta napiá yù ángngikatalà mu ká Apu Kesu, nga kun na ármás nayù napiá nga suddálu. Á ilillil mu yù baggim sù ira malliwá, tapè ari ka mekanakaná sù narákè, áнна marenu nga aláppaw yù nonò mu. Ajjan garè yù ira tatolay nga pinaguráyád da yù napiá nga ammu ra, gapu ta ikayá da yù narákè. Á ta kunnian, jinarál da yù ángnguruk da ká Apu. ²⁰ Di Imenio ká Alekanduru yù duá nga nekátuay sù napiá nga ángnguruk da. Á initulù ku ira ta pakáwayyá ni Satanas, tapè mapággáng ira sangaw, á patukkatad da yù pakkakagi ra ká Namarò.

2

Yù Meyannung ta Pakimállà tam ká Namarò

¹ Á yawe yù mapolu nga kagiak ku, ta máwák nga ipakimállà tam ká Namarò yù ira ngámin nga tatolay, ta ábbágán na ira, áнна iyawá na nira yù awágad da. Á dayáwat tam si Namarò ta pabbalabálà tam kuna megapu sù ira kábulut tam áнна yù ángngabbák na nira.

² Á ipakimállà tam gapay yù ira ngámin nga patul áнна yù ira ngámin nga makáwayyá nga mammaguray nittam, tapè napiá yù ággimammá tam sù giát tam, áнна napiá yù ákkiwagi tam sù ira kábulut tam ta paggagammung tam nga makimoray ká Apu Namarò. ³ Ta napiá nu ipakimállà tam ta kunnian, ta magayáyá nittam si Namarò, nga mangiyígù nittam. ⁴ Á yawe yù karagatán ni Namarò, ta meygù nakuan yù ira ngámin nga tatolay áнна kánnámmuád da yù kuruk nga bilin na.

⁵ Tádday lá si Namarò, á tádday lá yù tolay nga mamakkápiá sù ira tatolay ká Namarò. Aggina si Apu Kesu Kiristu, nga nabbáli ta tolay.

⁶ Á initulù ni Apu Kesu yù baggi na, nga metapíl megapu sù ira ngámin nga tatolay, tapè meygù ira ngámin, nga ari mekanakaná sangaw ta pangukum ni Namarò, áнна mapakomá ira ta liwiliwá da.

Á natay yù Aná ni Namarò ta kurù, sù ággaw nga sinullà ni Namarò.

Yáyù pangipakánnámmu ni Namarò ta karagatán na
ta meyiǵù yù ira ngámin nga tatolay ta dabbuno,
tapè mesipà ira kuna ta lángì.

⁷ Á yáyù gapu na nga sinullà nangà ni Namarò ta mangilayalayà sù kuruk nga bilin na, tapè
tudduák ku yù ira ngámin nga ari Kudio sù meyannung ta pangikatalà da ká Apu Kesu. Á
arák ku siri, ta kuruk yaw nga kagiak ku.

⁸ Á yawe laguk yù karagatak ku ta meyannung sù ira manguruk nga maggagammung
nga makimoray ká Namarò ta ngámin nga lugár da. Máwák nga makimállà yù ira lálláki ká
Namarò, nga napiá lâ yù nonò da, áнна ari ira mapporay, áнна ari ira maddaráma.

⁹ Á yù ira bábbay, máwák nga ari merallà yù ámmarawási ra. Ta napiá lâ nu mabbarawási
ira ta mepángngà nira, nga ari aru yù ámmakástá ra ta baggi ra áнна duddù da, nga buláwán
onu perlás, onu barawási nga nanginà. ¹⁰ Ta yù napiá nga akkuád da, nga pangabbák da sù
ira kábulud da, yáyù mepángngà nga ámmakástá nayù ira bábbay nga manguruk ká Namarò.
¹¹ Á ta paggagammung tam nga makituddu sù bilin ni Namarò, máwák nga tumulù yù ira
bábbay áнна magimammà ira, tapè tángngagad da ta napiá yù metuddu nira.

¹² Á sikán, arák ku anugutan ta babay yù mangituddu onu makáwayyá sù ira lálláki.
Máwák nga magimammà nga magginnà lâ yù ira bábbay. ¹³ Á yáyù urè, gapu ta napolu nga
pinarò ni Namarò yù láláki, nga si Lákay Adan. Á ta kabalín na namarò ká Adan, pinarò
na yù babay, nga si Abbò Eba. ¹⁴ Uliotturu, ari gemma si Adan yù nelogò nu ari galà si
Eba. Á yáyù nga napolu si Eba nga nalliaw. ¹⁵ Á yá pabbalinán nayù liwà da yù karigirigà
nayù ira bábbay ta paganà da. Ngam ábbágán na ira ni Apu Namarò, tapè meyiǵù ira, nu
mapasigaggá yù ángngikatalà da ká Apu Kesu, á iddi-iddukad da yù ira kábulud da, áнна
marenu yù nonò da, áнна napiá yù ággangguá ra.

3

Yù ira Manaron sù ira Maggagammung nga Makimoray ká Apu

¹ Kukurugán yawe nga nakagi ta meyannung sù ira maggagammung nga makimoray, ta
napiá nu ikáyà na tolay ta aggina yù natullà ta makáwayyá nga manaron sù ira kábulun na
nga manguruk, ta yáyù napiá nga maráyaw nga ipatarabáku ra kuna. ² Á yáyù nga máwák
nga napiá yù ággangguá nayù tolay nga pilian naw ta manaron sù ira manguruk. Máwák
nga awán bulubugá ta akkuán na nga kepasiránán na. Á tádday lâ yù atáwa na. Á aggina
gapay yù tolay nga pakimorayán nayù ira kábulun na, megapu sù napiá nga akkuán na.
Á máwák nga ammu na mangigaggak ta nonò na áнна baggi na. Máwák nga ammu na
mamaddulò sù ira álliuk. Á máwák nga ammu na mangituddu sù bilin ni Namarò. ³ Á pilian
naw lâ yù ari magililellaw, nga ari minákkiramá, ngam minángngikállà áнна masippá, áнна
ari mukkuk.

⁴ Á máwák nga tullatan naw lâ ta manaron yù tolay nga ammu na mangammung ta
napiá sù atáwa na áнна yù ira ánà na, áнна tudduán na yù ira ánà na, tapè tumulù ira áнна
makimoray ira kuna. ⁵ Ta makáwayyá panò nga manaron yù tolay sù ira kábulun na nga
manguruk ká Namarò, nu arán na ammu nga mammaguray sù ira ánà na? Ari gemma!

⁶ Á ari máyà nu tullatan naw yù ira bagu nga manguruk ta manaron, maraké motun yù
nonò da, áнна mappeddaráyaw ira, á mekanà ira sù pamagikáru ni Namarò ká Satanas. ⁷ Á
máwák nga matákkilalán nayù ira ari manguruk ta napiá nga tatolay yù ira manaron, tapè
ari ira mepasiránán, áнна arán na ira melogò ni Satanas.

Yù Meyannung sù ira Mangabbák sù Manaron

⁸ Á yù ira tatolay nga mangabbák, nga mepasserbi sù ira manaron, máwák gapay nga
talákkurugad da yù napiá nga akkuád da, áнна ari ira massiri. Á ari ira magililellaw, áнна ari
ira mukkuk. ⁹ Máwák nga napasigaggá yù ángngikatalà da sù bilin ni Namarò nga pinalappà
na nittam nga meyannung ká Apu Kesu, áнна awán nakuan ta nakaliwatád da, tapè marenu
yù nonò da. ¹⁰ Á lage naw ira tullatan, mapolu bì nga pasikkálan naw ira, nu kuruk nga
napiá yù ángnguruk da áнна ággangguá ra. Á nu mepasingan ta napiá ira, nga awán ta
ipappaliwá naw nira, á máyà ta tullatan naw ira ta mepasserbi sù tolay nga manaron, nga
mangabbák sù ira kábulun naw nga magáwák.

¹¹ Á yù ira bábbay gapay nga atáwa nayù ira mangabbák, máwák nga napiá ira gapay nga
pakimorayán. Máwák nga ari ira mabbek áнна ari ira magililellaw, á matunung áнна
mekatalà ira ta ngámin nga mepakuá nira.

¹² Á yù ira lálláki nga tullatan naw ta mangabbák, máwák nga tádday lâ yù atáwa ra. Á
máwák nga taronád da ta napiá yù ira ánà da áнна yù ira ngámin nga maggián ta bale ra.

¹³ Ta yù ira mangabbák nga maláppa nga masserbi ta napiá, malá da yù napiá nga ággiád da, ta aggira yù pakimorayán nayù kábulud da, ána mappelò ira nga makkagi sù pangikatalà da kâ Apu Kesu Kiristu.

Yù Nelímak nga Pinalappâ ni Namarò

¹⁴ Á Timotio, ikâyâ ku ta et taka sangaw nakuan tullúnán. Ngam mattúrákà sawe itabarang ku nikaw, ¹⁵ ta mássiki nu egga yù kegaggarák ku sangaw, á ammun yù mepángngà nga akkuát tam, sittam ngámin nga kukuá ni Namarò nga mesipà kuna. Ta si Namarò yù matotolay ta áddè ta áddè, á sittam nga manguruk kâ Namarò yù mekatalà ta mangipakámmu sù kuruk nga bilin na, megapu sù napasigaggà nga panguruk tam. ¹⁶ Á ammu tam ta kukurugán nga makapállá yù metuddu nga meyanung ta pangikatalà tam kâ Apu Kesu, nga nelímak ngaw áddè ta pangipalappâ ni Namarò:

Naggapu si Apu Kesu Kiristu ta lángi, á minay ta dabbuno nga nabbáli ta tolay, nga mepasingan ta kuruk nga Aná ni Namarò nga awán ta liwá na, gapu ta naginnanolay megapu sù pakáwayyá nayù Mangilin nga Ikararuá.

Á yù ira daroban ni Namarò, nasingad da si Apu Kesu.

A melayalayâ si Apu Kesu sù ira ngámin nga makkakerumá nga tatolay ta dabbuno.

Á ta ngámin nga pápatulán ta dabbuno, aijan yù ira tatolay nga mangikatalà kuna.

Á inâ ni Namarò ta lángi, nga meparáyaw.

4

Yù Meyannung sù ira nga Mangituddu ta Siri

¹ Á daretíu yù kagian nayù Mangilin nga Ikararuá, nga aijan yù ira tatolay nga pal-likuránád da yù ángnguruk da kâ Apu Kesu sangaw nu aranni ngin yù pagáddekán na ággaw, á tángngagad da yù ituddu nayù ira maganánu, nga mangilogò nira. Á kurugad da yù ituddu nayù ira anitu. ² Á yù ira tatolay nga mangituddu sù ituddu nayù ira anitu nga ari kuruk, ápa-áppè pípiá ira. Á mapenám ira nga massirisiri, á yáyu nga aringin maburung yù nonò da, á arád da mánnámmuán yù napiá nga ikâyâ ni Namarò. ³ Á kagiad da ta mepugik yù mangatáwa. Á kagiad da gapay ta aijan yù kanan nga makanniaw, ngam ari kuruk yù kagiad da. Ta pinarò ni Namarò yù ngámin nga kanan. Á sittam nga mangikatalà kâ Namarò, nga makámmu sù kuruk, máyá nga kanat tam yù ngámin, nu mabbalabálá ittam kâ Namarò megapu sù kanat tam.

⁴ Á napiá yù ngámin nga makkakerumá nga kanan nga pinarò ni Namarò. Á arát tam nakuan ipuerá, ngam kumán ittam, ána mabbalabálá ittam kâ Namarò megapu sù kanat tam. ⁵ Ta mehiláng ta mepángngà yù kanat tam megapu sù ubobuk ni Namarò ána yù pabbalabálá tam kuna.

Yù Meyannung sù Napiá nga Tolay nga Masserbi kâ Namarò

⁶ Á nu yawe nga kinagi nikaw yù ituddum sù ira wáwwagi tam nga manguruk, á napiá ka nga masserbi kâ Apu Kesu Kiristu. Á mepasingan ta matudduán ken ta napiá, ána mapasigaggà yù ángngikatalà mu, megapu sù napiá nga metuddu nga kurugam mu. ⁷ Arám mu tángngagan yù pabbídá ra, ta siri ra lá nga awán ta serbi ra kâ Namarò. Ngam tángngagam mu yù ipakuá ni Namarò nikaw. ⁸ Á nonopam mu yù nakagi, nga kun na, “Napiá nu pepenamat tam yù baggi tam ta narámmà nga tarabáku, tapè massikan yù baggi tam ta baddi.

Ngam más napiá nu pasikanat tam yù nonò tam nga manuppál sù ipakuá ni Namarò nittam,

ta yá pabbalinán na yù napiá nga áttole tam sawe dabbuno kunangane, ána yù napiá gapay nga áttole tam ta lángi ta áddè ta áddè.”

⁹ Á mekatalà yane nga nakagi, á napiá nakuan nu kurugan nayù ira ngámin nga tatolay.

¹⁰ Á yáyu nga magattam ittam nga ari malurá nga mamannák ta baggi tam nga mangipakámmu sù napiá nga dákam, gapu ta napasigaggà yù ággiddanáma tam kâ Namarò nga matotolay, nga mangiyígù sù ira ngámin nga makkakerumá nga tatolay, nepatalugáring sù ira galá nga mangikatalà kuna.

¹¹ Á yawe laguk yù ipakuá nikaw, ta ituddum sù ira ngámin nga tatolay yù ngámin nga kinagi nikaw, á tabarangám mu ira ta kurugad da ta napiá yù ngámin nga ituddum. ¹² Á magimuguk ka sù akkuám mu, tapè ari ka mappasirán nga manabarang nira, mássiki nu nábbing ka paga. Ipasingam mu nira yù napiá nga ággangnguám, tapè párigád da yù napiá

nga ággubobuk mu, yù napiá nga akka-akkuám mu, yù ángngiddù mu nira, yù napasigaggà nga ángngikatalà mu kâ Namarò, ána yù napiá nga nonò mu.

¹³ Á ta paggagammung naw nga makimoray kâ Namarò, bibbiram mu yù bilin ni Namarò nira, á ilayalayâ mu ána ituddum nira yù kebalinán na. Á tabarangám mu ira gapay, tapè akkuád da yù napiá nga ituddum nira. Yáyù akkuám mu áddè ta labbè ku ta giám mu. ¹⁴ Arám mu káttamán yù pakáwayyám nga iniyawâ ni Namarò nikaw ta panullá da nikaw nayù ira ábbilinán ni Namarò, ána pakkagi ra sù inipobobuk nayù Mangilin nga Ikararuá nira, ána pangipotud da ta limá ra nikaw nayù ira karakalán nga manguruk. ¹⁵ Tángngagam mu laguk yawe ngámin nga ipakuá nikaw, tapè masingan nayù ira ngámin nga tatolay yù pangáppípiá nayù ángnguruk mu. ¹⁶ Imugurám mu yù baggi, á ari ka malurá nga mangituddu sù kuruk nga bilin ni Apu. Uputam mu yù napiá nga ággangnuám ána yù napiá nga pangituddum. Ta nu kunnian yù akkuám mu, meyiǵù ka nga mepaggián kâ Namarò ta áddè ta áddè. Á ari lâ sikaw yù meyiǵù, nu ari gapay ta mesipá yù ira ngámin nga magginná sù ituddum.

5

Yù Ákkiwagi tam sù ira Kábulut tam nga Manguruk

¹ Á ta ángngarigán nu aijan yù lakalákay nga malliwâ, á arám mu paporayán, ngam tabarangám mu lâ ta kun na yámam. Á yù ira nga nábbing ánnè nikaw, tabarangám mu ira ta kun na kuruk nga uriám mu. ² Á yù ira bábbakabákà, ibiláng mu ira ta kun na yenám. Á yù ira bábbay, ibiláng mu ira ta mánáng mu onu uriám mu, á imugurám mu yù nonò mu nira, á tabarangám mu ira gapay ta kun na kuruk nga wáwwagim.

³ Á Timotio, napiá nu sikayu ngámin nga mangikatalà kâ Apu Kesu yù mangabbák sù ira kuruk nga bálu nga bábbay, nga awán bulubugá ta mangabbák nira. ⁴ Á nu aijan yù bálu nga aijan yù áná na onu ápù na, tudduám mu yù ira ápù na ána áná na, tapè aggira yù mangabbák kuna, tapè bálata da gapay yù ánnaron na ngaw nira, ta mepángngà yaw ta ánnanganá ni Namarò. ⁵ Á yù kukurugán nga bálu nga awán bulubugá ta mangabbák kuna, si Namarò lâ yù iddanamán na, á uputan na yù pakimi-imállà na ta ággaw ána gabi. ⁶ Ngam nu aijan yù bálu nga nonopan na lâ yù ipagayáyâ na, á mássiki nu matolay paga yù baggi na, ngam kunnay ta natayin.

⁷ Á itaddám mu yawe nga kinagi sù ira ngámin nga manguruk, tapè napiá yù akkuád da. ⁸ Ta mássiki yù ira ari manguruk kâ Apu, ammu ra mangabbák sù ira kábbale ra. Á yù tolay nga manguruk kâ Apu, nu arán na iddukan yù ira kanakanáyun na, nepatalugáring sù ira áná na, á nallikuranán nen yù ángnguruk na, á narákè ánnè sù ira ari manguruk.

⁹ Á ta meyanung sù ira bálu nga abbágán naw, ilitá naw lâ yù bálu nga annamapulu onu matturù yù dagun na, nga namittán lâ yù pakiatáwa na. ¹⁰ Á máwák gapay nga napiá yù ággangnuá na. Á ta ángngarigán, máwák nga napiá yù panuddu na ngaw sù ira áná na, ána napiá yù pamaddulò na sù ira álluk nga umay kuna, ána ammu na mangikállà sù ira pobare ána yù ira marigirigá, ána dán nga napanán nga mangnuá ta maguray lâ nga napiá, tapè mábbágán yù ira kábulun na.

¹¹ Á yù ira bálu nga nábbing paga, arán naw ira ilitá. Ta mássiki nu itabbá ra yù passerbi ra kâ Apu Kesu Kiristu, á ibabáwi ra galá sangaw yù pangitabbá ra kâ Apu, nu gustu ra makiatáwa. ¹² Á nu kunnian, mapanunnután ira, gapu ta arád da palurotan yù napolu nga initabbá ra. ¹³ Otturu, mattalakák ira gapay, á mappassapassiár ira ta bale nayù karúbá ra, á mabbebbek ira, ána ikiruk da yù baggi ra sù ari meyanung nira. Á ubu-ubobugad da yù ari mepángngà.

¹⁴ Á yáyù nga itabarang ku laguk sù ira bálu nga nábbing paga ta pidduád da makiatáwa, tapè maganá ira paga. Á taronád da yù ira áná da ta napiá, tapè awán nittam ta ipappaliwá nayù malussaw nittam. ¹⁵ Ta aijan garè yù ira bálu nga nallikuranád da yù panguruk da kâ Namarò, á si Satanas yù tuttulad da.

¹⁶ Á itotoli nga kagian yù meyanung sù ira bálu. Nu aijan yù tolay nga manguruk kâ Namarò, nga egga yù ira kanakanáyun na nga bálu nga bábbay, á yane tolay laguk yù mangabbák nira, tapè aijan yù awayyá nayù ira káruán nga manguruk nga mangabbák sù ira káruán nga bálu nga awán bulubugá ta kanakanáyud da nga mangabbák nira nakuan.

Yù Meyanung sù ira Karakalán nga Mammaguray sù ira Manguruk

¹⁷ Á ta meyanung sù ira karakalán, nga napiá yù ámmagure ra sù ira kábulud da nga manguruk, á mepángngà ta pakimorayád da ira nayù ira tudduád da, ána patturutad da ta napiá gapay yù táddád da, nepatalugáring sù ira maláppa nga mangilayalayá ána

mangituddu sù ubobuk ni Namarò. ¹⁸Táddanán naw ira laguk ta napiá, ta yáyù kebalinán nayù dán nga netúrâ nga ubobuk ni Namarò nga kunniaw: “Arán naw babbaran yù simù nayù báka nga magaggi, tapè kumán nu gustu na.” Á aijan gapay yù netúrâ nga kunniaw: “Mepángngâ ta matáddanán yù mattarabáku.”

¹⁹ Á ta ángngarigán nu aijan yù tolay nga mangikeká sù tádday nga karakalán nga mammaguray sù ira manguruk, arán naw kurugan yù kagian nayù tolay nga mamaliwâ kuna nu awán ta duá onu tallu nga massistígu ta kuruk yù ipappaliwâ na. ²⁰ Á nu kuruk nga mangguá ta narákè nga arán na ibabáwi, á iyarubáng mu sù ira ngámin nga manguruk, á panunnutám mu, tapè masingan nayù ira ngámin, ána maganásing ira, á arád da sangaw párigán.

²¹ Á nonopam mu ta aijan di Namarò kári Apu Kesu Kiristu ána yù ira sinullà ni Namarò nga daroban na nga maning nittam. Á ta ánninganád da, yawe yù ipakuá nikaw, ta palurotam mu yù ngámin nga itabarang ku nikaw, á arám mu irumá yù ira tatolay. ²² Á panullà mu sù ira masserbi kâ Apu, arám mu tullatan yù tolay nga arám mu ammu. Arám mu iddá nga ipotunán sù limám, tapè meddán ta pakáwayyá na nga masserbi kâ Apu, lagem bì mapolu nga innan yù ággangguá nayù tolay, nu kuruk nga napiá nga tolay nga mepángngâ ta masserbi kâ Apu. Ta nu malliwá sangaw yù tolay nga sinullà mu, mappalán ka laguk, marakè mekanakaná ka gapay sangaw sù pakaliwatán na. Imugurám mu yù baggim, tapè marenu yù nonò mu megapu sù napasigaggâ nga pangikatalà mu.

²³ Á ari lâ danum yù inumam mu, Timotio, ngam ámminum ka gapay ta baddi nga binaráyáng, tapè moru yù takì nayù gutù mu ána yù ira káruán nga takì mu, ta makkarataki ka garè.

²⁴ Á ta meyannung ta panullà mu sù ira nga masserbi kâ Apu ána yù ira kábulud da, nonopam mu ta aijan yù ira tatolay nga awán ta awayyá ra nga mangilímak sù liwâ da, ta masingan nayù ira tatolay yù kingnguá ra, á ammu tam ta mapanunnután ira nga mapagikáru noka. Ngam aijan yù ira káruán, nga ari lábbi mepakánnammu yù pakaliwatád da, ngam mepalappâ lággapay noka. ²⁵ Á kunnay gapay sù ira tatolay nga napiá yù akkuád da, ta masingat tam yù napiá nga akkuád da. Á mássiki nu arát tam masingan, ari melímak, ta mepalappâ gapay sangaw yù napiá nga kingnguá ra.

6

Yù Meyannung ta Kustombare nayù ira Aripán

¹ Á yawe yù itabarang ku nikayu nga aripán nga manguruk kâ Apu. Pakimorayán naw yù tolay nga passerbián naw, á tuppálan naw ta napiá yù ngámin nga ipakuá na nikayu, tapè awán ta makkakagi kâ Namarò ána awán ta mangiluddè sù ituddu tam nga meyannung kâ Apu Kesu megapu sù masingad da nga akka-akkuán nayù ira manguruk kâ Apu. ² Á sikayu nga makiaripán sù tolay nga manguruk, arán naw nakuan iluddè yù yápu naw, nu ari galá ta maláppâ kayu nga manuppál sù kagian na. Ta mawwawági kayu ána yù yápu naw megapu sù pangikatalá naw kâ Apu. Á máwák nga napiá laguk yù ásserbi naw sù tolay nga mangaripán nikayu, gapu ta aggina gapay yù tole ni Namarò nga iddukan na.

Mappalán ittam sù ira Mangituddu ta Ari Kuruk

Á yawe nga iníturâ ku nikaw, máwák nga ituddum danniw laguk sù ira maggagam-mung. Á tabarangám mu ira, tapè kurugad da ta napiá yù ngámin nga kinagì. ³ Á yù tolay nga mangituddu ta tanakuán, nga ari negittá sù napiá nga ituddu tam nga meyannung sù ángnguruk tam, potuán na yù mekatalá nga ubobuk ni Apu Kesu Kiristu nga Yápu tam. ⁴ Á mappeddaráyaw yane tolay, ngam awán ta kánnámmuán na. Yá lâ egga ta nonò na yù mamereperang ta ubobuk. Á yá lâ pabbalinán nayù pamereperang da ta ubobuk yù pakkaká-abubu ra, ána maddaráma ira, ána makkakálililbâ ira, ána mappaná yù narákè nga nonò da sù ira kábulud da. ⁵ Á yáyù nga sigidá ira nga maddaráma ta ubobuk, á maddákekin yù nonò da, ána awánin ta awayyá ra nga makánnámmu sù kuruk nga bilin ni Namarò. Ta kagiad da garè ta málâ da yù aru nga kukuá ra ána mabbáli ira ta maríku megapu ta panuttul da kâ Apu Kesu.

Meyárik yù Ággiát tam ta Maríku

⁶ Á sittam nga kuruk nga tumuttuttul kâ Namarò, kuruk nga aijan yù málâ tam, nga ari yù kukuá tam, nu ari galá yù napiá nga nonò tam nga magimammâ. Á kunnay ittam ta maríku nu magayáyâ ittam ána bilángat tam ta kustungin yù egga nittam, mássiki nu baddi. ⁷ Ta awán gemma ta iniyánga tam sawe dabbuno ta keyaná tam, á awán bulubugá ta mepulù

tam ta páno tam sawe dabbuno sangaw nu matay ittam. ⁸ Á nu aijan yù kanat tam áнна gámi tam, magayáyá ittam laguk, ta kustungin ta baggi tam.

⁹ Yù ira tatolay nga makkaragá nga marríku, malogon ira garè nga metuluk ta pakali-watád da. Á melogò ira ká Satanas, ta karagatád da yù aru nga narákè nga awán ta serbi na, nga manarál ta baggi ra, á yá lá pabbalinád da yù kararál nayù áttole ra saw, á labbetád da lá yù impiernu, nga paggianád da ta áddè ta áddè. ¹⁰ Ta yù pamassil da ta kuártu yù paggapuán nayù ngámin nga narákè nga akkuád da. Á aijan garè yù ira tatolay nga nallikuránád da yù ángnguruk da megapu sù pakkaragá da nga mangukkuk ta kuártu. Á yáyù nga mabagabagal ira áнна nepallá yù daddam da, nga pabbalinán nayù kokkuk da.

Yù Panabarang ni Pablo ká Timotio

¹¹ Ngam sikaw yù masserbi ká Namarò. Arayyuam mu yù ira ngámin nga jikkù áнна narákè yù akka-akkuád da. Á akkuám mu lâ yù napiá áнна matunung, áнна yù ngámin nga ipakuá ni Namarò nikaw. Ipasigaggá mu yù ángngikatalá mu ká Apu Kesu, á iddi-iddukam mu si Namarò áнна yù ira kábulum mu. Ari ka malurá nga manaron nira. Á attamám mu yù maguray lá nga makuá nikaw, áнна ipasingam mu ta masippá ka sù ira kábulum mu. ¹² Á mássiki nu marigirigá ka, palurotam mu yù ángnguruk mu ká Namarò, tapè ari ka máppu sù jigá áнна narákè, áнна málá mu yù iniyawá ni Namarò nikaw nga áttolem nga awán ta áddè na. Ta yáyù gapu na nga inagálán na ka ni Namarò, tapè mepattolay ka kuna. Á kinagim yù pangikatalá mu ká Apu Kesu ta arubáng na aru nga tatolay.

¹³ Á aijan yù itabarang ku nikaw laguk ta ánninganán di Namarò nga manotolay ta ngámin nga matolay áнна si Apu Kesu Kiristu nga nassistigu ngaw ta kuruk nga meyanung ká Namarò, ta keyarubáng na ká Gubinador Pontius Pilatto. ¹⁴ Á yawe yù ipakuá nikaw, ta tángngagam mu ta napiá áнна tuppálam mu yù ngámin nga itaddán ni Namarò, tapè awán ta tolay nga mamaliwá nikaw sangaw nu mattoli saw si Apu Kesu Kiristu nga Yápu tam.

¹⁵ Á sangaw nu duttál yù ággaw nga sinullá ni Namarò, panolian na si Apu Kesu Kiristu saw dabbuno. Táltádday lá si Namarò, nga maráyaw nga mammaguray. Ággina yù Patul nayù ira ngámin nga patul, áнна yù Yápu nayù ira ngámin nga yápu.

¹⁶ Si Namarò lá yù ari matay.

Á maggián sù gián nayù nawák, nga awán ta tolay nga makarakki kuna. Awán bulubugá ta tolay nga makasingan kuna, ta ari masingan. Meparáyaw si Namarò, nga makáwayyá nga mammaguray ta ngámin, nga awán ta áddè nayù pakáwayyá na! Mapaluro! Ammán!

Yù Akkuád da nakuan nayù ira Maríku

¹⁷ Á ta meyanung sù ira tatolay nga maríku, tabarangám mu ira ta ari ira mapped-daráyaw megapu sù kukuá ra ta dabbuno. Á taddánám mu ira gapay ta arád da ikatalá yù napiá nga ággiád da megapu sù aru nga kukuá ra, nga malogon nga meyawáwán sangaw. Ngam iddanamád da lá nakuan si Namarò, ta ággina yù mangiyawá nittam sù ngámin nga napiá nga máwák tam, tapè magayáyá ittam. ¹⁸ Á ituddum bi nira ta akkuád da yù ngámin nga napiá nga awayyá ra, tapè mebiláng ira ta maríku lá megapu sù napiá nga akka-akkuád da. Ari ira nakuan makkikki, nu ari galá dán nga napanán ira nga mangiyawá sù ira magáwák, á patturutad da nakuan yù iyawá da nira. ¹⁹ Á ta kunnian, mapakappián yù kuruk nga napiá nga ággiád da ta arubáng ni Namarò ta lángi, nga maláddá nga iddanamád da, nga ari metabbá. Á málá da gapay yù kukurugán nga áttole ra, nga kepattole ra ká Namarò nga awán ta áddè na.

²⁰ Á sikaw, Timotio, magimuguk ka, á tángngagam mu yù pakáwayyám nga inikatalá ni Namarò nikaw, á ituddum ta napiá yù meyanung ká Apu Kesu Kiristu. Á ari ka mepulú sù ira mamereperang ta ubobuk, ta ubobugad da lá yù ábbúnad da ta masírik. Ngam ari gemma masírik, ta awán ta serbi na. ²¹ Aijan garè yù ira nga makkagi ta kánnámmuád da yù kagiad da nga masírik, á gapu ta tuttulad da yù neparámak ta masírik, yáyù nga nagawáwán iren, ta nekátuay ira ta panguruk da sù kuruk nga meyanung ká Apu Kesu.

Á yawe ipakimállá ku, ta parè bi ta ikákkállá na kayu ngámin ni Namarò.

Áddè na yù.

Yù Mekaruá nga Túrá ni Pablo kâ Timotio

Yù Meyannung sawe Túrá ni Pablo

Pattúrá na ngaw ni Pablo, aijan nga nabayák nga nebáluk ta karsel sù ili na Roma, túrin ta lugár na Italia. Á naggián si Timotio ta ili na Epeso, nga mangituddu sù ira manguruk. Á ammu ni Pablo ta matay sangaw támma gapu ta pangilayalayá na kâ Apu Kesu Kiristu.

Á sinabarangán ni Pablo kâ Timotio ta umárayyu sù ira bábbagitolay nga narákè yù ággangngúá ra. Á ipanonò ni Pablo gapay kâ Timotio yù pappalán na sù ira mamereperang ta ubobuk ta meyannung sù panguruk da kâ Apu Kesu. Á kinagi na kuna ta mássiki nu marigirigá, attamán na lá, áнна talákkurugan na nga tuppálan yù pangilayalayá na, tapè mapasigaggá yù ángngikatalá na kâ Apu.

Yù Mayán na yawe Túrá

Yù Pamegapu nayù Túrá (1:1-2)

Yù Pabbalabála ni Pablo kâ Namarò megapu kâ Timotio (1:3-7)

Yù Meyannung sù Allà ni Namarò nittam (1:8-18)

Máwák nga Attamát tam yù Jigá nu Masserbi ittam kâ Apu Kesu Kiristu (2:1-13)

Taddánán ni Pablo si Timotio ta ari Mepappeperang ta Ubobuk (2:14-26)

Yù Ággangngúá nayù ira Tatolay ta Panguriánán nga Ággaw (3:1-9)

Mábbágán ittam megapu ta Pabbibbik tam sù Libro ni Namarò (3:10-17)

Yù Maporían nga Itabarang ni Pablo (4:1-22)

¹ Sikán si Pablo nga mattúrá sawe. Sinullá nangà ni Apu Kesu Kiristu megapu sù ure ni Namarò. Á jinok nangà ni Apu Kesu ta umayá mangilayalayá ta meyannung kuna áнна yù áttolè na nga awán ta áddè na, nga inittabbá ni Namarò ta iyawá na sù ira ngámin nga mangikatalá áнна mepattatádday kâ Apu Kesu. ² Á itúrá ku nikaw, Timotio, ta sikaw yù kunnay ta kuruk nga aná ku nga iddukak ku megapu sù ángnguruk mu kári Namarò nga Yáma tam kâ Apu Kesu Kiristu nga Yápu tam. Á yawe ipakimállá ku megapu nikaw, ta iddi-iddukad da ka, áнна ikállá da ka, á iyawá da nikaw yù napiá nga ággiám mu áнна yù napiá nga gawagawáyám mu, tapè magimammá yù nonò mu.

Yù Pabbalabála ni Pablo kâ Namarò megapu kâ Timotio

³ Á pakanonò ku nikaw, Timotio, nerallá yù pabbalabála ku kâ Namarò megapu nikaw. Ta si Namarò yù passerbiák ku, nga passerbiád da gapay nayù ira naggaká níkán, á aringá mappasirán kâ Namarò, gapu ta napiá lá yù ásserbi kuna. Á ta ngámin nga pakimállá ku kuna ta ággaw áнна gabi, sikaw yù ipakimállá ku. ⁴ Á maraddamá nikaw, ta manonò ku yù pakkulukulé mu sù pánò. Á merallá yù pakkaragá ku nga makasingan nikaw, tapè magayáyákà.

⁵ Á dayáwak ku si Namarò ta pakanonò ku sù napiá nga ángngikatalá mu kâ Apu Kesu, nga negittá sù napiá nga ángngikatalá nayù abbò mu, si Loyda, áнна yù innò mu, si Yunis, nga nangituddu nikaw. ⁶ Á yáyù nga ipanonò ku nikaw yù pakáwayyám nga iniyawá ni Namarò nikaw, ta panámmi ku nikaw áнна pakimállá ku kâ Namarò megapu nikaw. Malláppà ka laguk, á uputam mu nga tuppálan yù pakáwayyám nga mangilayalayá, nga iniyawá ni Namarò nikaw. ⁷ Ta iniyawá na nittam ni Namarò yù Mangilin nga Ikararuá na. Á arán na gemma ittam ananássingan nayù Mangilin nga Ikararuá, ngam pataggatan na yù nonò tam, tapè mappelò ittam nga mamalurò sù ipakuá na nittam. Á ábbágán na ittam gapay nayù Ikararuá ni Namarò, tapè iddukak tam yù ira kábulut tam, áнна gaggarát tam yù nonò tam áнна baggi tam.

Yù Meyannung sù Allà ni Namarò nittam

⁸ Ari ka laguk mappasirán nga makkagi sù ira tatolay ta meyannung kâ Apu Kesu Kiristu nga Yápu tam, mássiki nu uyoyungád da ka. Á ari ka mappasirán megapu sù kebáluk ku, ta nebálugá gemma megapu sù ángnguruk ku kâ Apu Kesu. Á mássiki nu mepajjigirigá ka níkán, ituddum lá yù bilin ni Namarò, áнна attamám mu yù ballem nga jigá, megapu sù pangabbák ni Namarò.

⁹ Ta iniyígù ni Namarò ittam, á inagálán na ittam ta likuránát tam yù palliwá tam, tapè tatolè na ittam nga masserbi kuna áнна napiá lá yù akkuát tam.

Á nesipá ittam kâ Namarò, nga ari megapu sù akkuát tam, nu ari galá megapu sù ure na nga mangikállá nittam.

Ta lage na namarò ta dabbuno, sinalákkuruk ni Namarò ta ikákkállà na ittam, áнна pakomán na ittam megapu sù kingnguá ni Apu Kesu Kiristu.

¹⁰ Á jimittálin si Apu Kesu Kiristu, nga pangipasinganán ni Namarò sù allà na nittam. Ággina yù netapil megapu nittam, tapè iyígù na ittam.

Á yáyù nga aringin máwák nga magikáru ittam ta liwâ tam megapu ta pate tam, gapu ta ággina yù nagikáru, nga nangappù nga naginnanolayin.

Á inipakánnámmu na ta iyawâ na yù áttole na nga awán ta áddè na

sù ira ngámin nga mangikatalà kuna megapu sù panguruk da sù napiá nga dámak nga inipalappà na.

¹¹ Á sinullà nangà ni Namarò ta mangilayalayá sù napiá nga dámak, á inikatalà na nikán yù pangituddù ta ngámin nga meyanung sù ángnguruk tam. ¹² Á yáyù nga marigirigákà ta ábbalurán, megapu sù pangilayalayá ku sù napiá nga dámak. Ngam aringá mappasirán, ta ammù yù Yápù nga ikatalà ku. Á ammù gapay ta ággina yù mekatalà, nga makáwayyá nga manaron nikán áнна yù ngámin nga inikatalà na nikán ta áddè ta panoli na ta pagáddekan na ággaw.

¹³ Á sikaw, tángngagam mu yù kukurugán nga ubobuk ni Namarò nga inituddù nikaw, á yáyù ituddum gapay sù ira kábulum mu. Ari ka malurá nga mangikatalà kâ Apu Kesu Kiristu nga mangabbák nikaw, tapè mapasigaggà yù ángnguruk mu kuna áнна yù ángngiddù mu sù ira kábulum mu. ¹⁴ Á ipatattam mu ta nonò mu yù kuruk nga bilin ni Namarò nga inikatalà na nikaw. Á yù Mangilin nga Ikararuá ni Namarò yù mangabbák nikaw, ta ággina yù maggián nittam nga katággitádday.

¹⁵ Á narámak mu tamma ngin ta sinájiád dangà nayù ngámin ira nga manguruk nga taga Asia, mássiki di Pigilo kâ Ermogines. ¹⁶ Ngam di Onesiporo áнна yù ira nga maggián ta bale na, ipakimállà ku ira kâ Namarò, tapè ikállà na ira, gapu ta binannabannáyán nangà ni Onesiporo, áнна ari nappasirán megapu sù kebáluk ku. ¹⁷ Á labbè na sawe ili na Roma, inala-alek nangà áddè ta pakálek na nikán. ¹⁸ Á sikaw gapay, ammum gemma yù napiá nga ángngabbák na ngaw nikán ta paggiák ku paga ta Epeso. Á parè bi kâ Apu ta ikállà na si Onesiporo sangaw nu umay si Apu saw nga mamanunnù ta tatolay ta pagáddekan na ággaw.

2

Máwák nga Attamát tam yù jigá nu Masserbi ittam kâ Apu Kesu Kiristu

¹ Á sikaw, Timotio, nga aná ku, ipasigaggà mu yù ángngikatalà mu kâ Apu Kesu, ta ággina yù mangikállà nga mangabbák sù ira ngámin nga mangikatalà áнна metádday kuna. ² Á yù naginnám nga inilayalayá ku ta arubáng na aru nga tatolay, yáyù gapay ituddum sù ira tatolay nga pangikatalatán, tapè makáwayyá ira gapay nga mangituddu sù ira káruán nga tatolay. ³ Á nu marigirigá ka, attamám mu lâ ta kun na pagattam na napiá nga suddálu. Ta meyárik ittam ta napiá nga suddálu, á si Apu Kesu Kiristu yù kapitát tam. ⁴ Á arán na tángngagan na suddálu yù tanakuán nga tarabáku, nu ari lâ yù ipakuá nayù kapitán na, tapè magayáyá yù kapitán na megapu sù akkuán na.

⁵ Á yù tádday nga keyarigát tam yù ira makipariká, nga magginná ta napiá sù tunung nayù ira maddok nira, gapu ta arád da awayyá nga mangappù nu arád da kurugan ta napiá yù tunung nga meyanung ta pakipariká ra. ⁶ Á yù tádday paga nga keyarigát tam yù maláppà nga minákkomán. Á mepángngà ta ággina yù mapolu nga mangá ta balle na, gapu ta kaláppà na nga mattarabáku. ⁷ Á nonopam mu ngámin yawe nga kinagi nikaw, tapè ipakánnámmu ni Apu nikaw yù ngámin nga kebalinán na.

⁸ Á nonopam mu gapay si Apu Kesu Kiristu áнна yù napiá nga dámak nga meyanung kuna. Ággina yù ginaká ni Patul Dabid, á ággina yù naginnanolayin. Yane yù napiá nga dámak nga ilayalayá ku. ⁹ Á gapu ta pangilayalayá ku sawe bilin ni Namarò, attamák ku yù jigá ku, nepatalugáring ta maggiánà lâ paga nga nebáluk, nga kunnay ta tulisán. Á mássiki nu nebálugá, megapu sù pangilayalayá ku, á massamá yù ubobuk ni Namarò. ¹⁰ Á yáyù nga attamák ku ngámin, tapè ipakánnámmu si Apu Kesu Kiristu sù ngámin ira nga piníli ni Namarò, tapè manguruk ira gapay, á mepatattádday ira kâ Apu Kesu, áнна meyígù ira nga mesipà nga mepattolay kuna ta áddè ta áddè. ¹¹ Kuruk yawe bilin nga netuddu nittam:

“Nu ibiláng ni Namarò ta nepappatay ittam kâ Apu Kesu,

á gapu ta paginnanole na, maginnanolay ittam gapay,

áнна mesipà ittam nga mepattolay kuna.

¹² Á nu arát tam malurá nga magattam

ta jigá nga duttál nittam kunangan,
 áнна ipasigaggà tam lâ yù ángnguruk tam kâ Apu Kesu,
 á mepamaguray ittam kuna ta pammagure na sangaw ta dabbuno.
 Ngam nu táttájjíát tam,
 á táttájjíán na ittam gapay.

¹³ Á mássiki nu ari ittam mekatalà,
 ngam mekatalà si Apu Kesu nga mamalurò sù ngámin nga kagian na,
 ta ari manguli yù nonò na.”

Taddánán ni Pablo si Timotio ta ari Mappereperang ta Ubobuk

¹⁴ Ipanonò mu sù ira manguruk dannian nga kinagi. Á ta ánninganán ni Namarò, tabarangám mu ira ta ari ira makkakápereperang ta ubobuk nga meyanung ta makkakerumá nga kagian nayù ira tatolay. Ta awán ta napiá nga pabbalinán nayù ubobugad da. Á yù ira tatolay nga makaginná ta pereperang da, mabbábáng ira nga mekátuay ta pangikatalà da kâ Apu. ¹⁵ Á malláppà ka laguk nga mangilayalayá sù kukurugán nga ubobuk ni Namarò, tapè awán ta ipasiráam mu, áнна magayáyá si Namarò gapu ta napiá áнна matunung yù ángngitudum sù kuruk nga bilin na.

¹⁶ Á mallillili ka sù ira magubobuk sù awán ta serbi na. Ta narákè yù pabbalinán nayù ubobugad da, á mappaná yù narákè nga akkuán nayù ira tatolay nga makaginná sù kagiad da. ¹⁷ Á massamá yù ubobuk da sù ira tatolay, ta kunnay sù passamá na lutu ta baggi na tolay áddè ta pate na. Ajjan garè yù duá nga mangituddu karannian, di Imenio kâ Pileto. ¹⁸ Á talamánad da yù ángnguruk nayù ira káruán nga tatolay, gapu ta arád da ituddu yù kuruk nga bilin ni Namarò. Ta kagiad da garè ta nappasá ngin yù paginnanole nayù ira námmatay, nga ari gemma kuruk. Á ajjan garè yù ira nga nanguruk nga mabbábángin sù ángnguruk da kâ Apu Kesu megapu sù pangituddu ra.

¹⁹ Ngam sittam nga napasigaggà yù ángnguruk na, ari ittam mabbábáng, ta maggián nga mannanáyun yù ubobuk ni Namarò, nga kunnay ta maláddá nga batu, nga panáddagan nayù ángnguruk tam. Á ajjan yù kinagi na nga netúrá nga kunniaiw:
 “Ammu ni Apu yù ira nga kukurugán nga tatole na.”

Á kinagi na gapay,

“Á yù ira ngámin nga makimállà kâ Apu Namarò,

nga makkagi ta aggina yù pakiyápuád da,
 máwák nga pallikuránad da laguk yù narákè nga ággangnguá ra.”

²⁰ Á ta ángngarigán nu ajjan yù mariku nga maggián ta dakal nga balay, á aru yù aruátan na, nga buláwán, pinaláta, áнна káyu áнна dabbun. Á iyaruá na yù napadday ta buláwán áнна pinaláta nu ajjan yù álliuk na nga kamotunán. Ngam yù napadday ta káyu áнна dabbun, maguray lâ yù pangiyaruá na nira. ²¹ Á dannian yù keyarigát tam, sittam nga manguruk. Ta nu tukkatat tam yù ággangnguá tam nga narákè, mangáppipiá ittam, nga mepárik sù aruátan nga buláwán. Á dán nga napanán ittam nga mepángngà ta pangiyaruá nayù Yápu tam ta ngámin nga napiá nga ipakuá na nittam.

²² Ari ka laguk dukki sù ira bábbagitolay nga mangapà nikaw ta mangnguá ka ta narákè nga karagatád da nga akkuán. Á akkuám mu lâ yù napiá nga ikáyá ni Apu. Ipasigaggà mu yù ángngikatalà mu kâ Apu, á iddi-iddukam mu yù ira kábulum mu. Á máwák nga masippà ka nga mepagimammá sù ira ngámin nga kuruk nga manguruk kâ Apu. ²³ Á ari ka mepappeperang ta ubobuk sù ira nga awán ta serbi nayù ubobugad da. Ta ammmum gemma ta maddaráma ira sangaw, ta yáyù lâ pabbalinán nayù pakkakápereperang da ta ubobuk.

²⁴ Ta sittam nga masserbi kâ Apu, máwák nga ari ittam maddaráma áнна ari ittam mepappeperang ta ubobuk, ngam mangikállà ittam sù ira ngámin nga tatolay. Á gigiámmuat tam yù ubobuk ni Namarò ta napiá, tapè dán nga napanán ittam nga mangituddu sù ira tatolay, áнна napiá yù ángngituddu tam. Á attamát tam lâ yù mesimmmu nittam. ²⁵ Á pangituddu tam, arát tam papporayán yù ira tatolay nga mattutubbák. Ngam masippà ittam áнна napiá lâ yù ággubobuk tam nira, abernu iddán na ira ni Namarò ta awayyá ra nga mabbabáwi ta liwá da, tapè kánnámmuád da yù kuruk nga bilin ni Namarò. ²⁶ Á pakámmamu ra sù kuruk nga bilin ni Namarò, makemmunaw ira, á tákkilalád da ta nelogò ira kâ Satanas nga namuersá nira. Á ábbágán na ira laguk ni Namarò, tapè mattálaw ira kâ Satanas, á alawatan ni Namarò ira.

3

Yù Ággangnguá nayù ira Tatolay ta Panguriánán nga Ággaw

¹ Á máwák nga kánnámmuám mu yaw, ta sangaw nu maddaggunin yù pagáddekán na ággaw, aru yù jigirigá nayù ira tatolay ta dabbuno. ² Ta yù ira tatolay nga ari manguruk, ayatad da lâ yù baggi ra áнна yù pirá da. Mappeddung ira áнна mappeddaráyaw ira. Á pakkakagiád da yù ira kábulud da. Potuád da yù ira darakal da. Ari ira mabbalabálà sù ira mangikállà nira. Á ari ira makimoray ká Namarò. ³ Awán ira ta ayá. Ari ira mamakomá. Mallillibá ira sù ira kábulud da. Ari ira magammá, ta ari ira natudduán. Á kitaporay ira áнна malussaw ira ta ngámin nga napiá. ⁴ Ari ira mekatalá. Daliborok ira, nga arád da garè nonopan yù pabbalinán nayù akka-akkuád da. Á motun yù nonò da, ta kagiad da ta aggira lâ yù makánnámmu. Á alerad da lâ yù ipagayáyá da, ngam awán ta ayá da ká Namarò. ⁵ Á mepaggammung ira sù ira manguruk, ngam awán ta kebalinán nayù pakikultu ra gapu ta arád da likuránán yù narákè nga ággangnguá ra. Ari ka dukkurukki karannian nga tatolay.

⁶ Á aijan yù ira lálláki nga umay makikopun ta tatolay, tapè makatallung ira ta bale ra, á kagumánad da yù ira bábbay. Á ilímak da yù nonò da, tapè ilogò da yù ira bábbay nga mattá-iki-ikáyá megapu sù liwiliwá da, nga ari magammá nga magalek ta karagatád da. ⁷ Á maguray lâ yù umay mangituddu nira, á ginnád da lâ ginnán, ngam arád da bulubugá kánnámmuán yù kuruk. ⁸ Á yù ira lálláki nga mangilogò nira, kunnay ira kári Jannes ká Jambares, nga yù ngaw ira makikontará ká Lákay Moyses. Á kunnay nira, ituddu ra gapay yù ari kuruk, á narákè yù nonò da, áнна áppè pípiá ira, nga ari kuruk nga mangikatalá ká Apu Kesu. ⁹ Ngam arád da mabalin yù akkuád da, ta tákkilalán nayù ira ngámin nga tatolay yù kolapá ra, sangaw nu mepalappá yù liwá da nga kunnay sù nesimmu ngaw kári Jannes ká Jambares.

Mábbágán ittam megapu ta Pabbibik tam sù Libru ni Namarò

¹⁰ Ngam sikaw, Timotio, ammun yù ituddù áнна yù ággangnguá. Á ammun yù ikáyá ku nga palurotan, áнна yù ángngikatalá ku ká Namarò. Á nasingam mu ta attamák ku lâ yù akkuán nayù ira tatolay níkán, áнна yù ángngiddù ku nira, ta aringá bulubugá malurá nga mangituddu nira. ¹¹ Á ammun gapay yù panigirigá da níkán megapu sù pangilayalayá ku, á inattamák ku lâ yù kingnguá ra níkán ta ili na Antokia, áнна yù ili na Ikonium, áнна yù ili na Listara. Jinigirigá dangá sù ira ili, ngam iniyigù nangá ni Namarò. ¹² Á ari lâ sikán yù marigirigá, ta marigirigá gapay yù ngámin ira nga mepattatádday ká Apu Kesu Kiristu, nga makkaragá nga tumuttul kuna. ¹³ Ngam yù ira tatolay nga narákè, áнна yù ira mangilogò, mappaná lâ mappaná ira nga mangnguá ta narákè, ta ilogò da yù ira kábulud da, á aggira lápay, melogò ira.

¹⁴ Ngam sikaw, ari ka malurá nga manguruk sù ginigiámmun, nga ammun ta kuruk nga pangikatalakám mu, ta ammun yù ira nangituddu níkaw. ¹⁵ Ta natudduán ken sù netúrá nga bilin ni Namarò ádde ngaw sù kabaddi mu. Á yù bilin ni Namarò yù gapu na nga kánnámmuám mu yù ángngiddù ni Namarò, áнна yù awayyám nga makiyigù kuna. Á yáyù nga inalawá mu yù mannanáyun nga áttolem nga iniyawá ni Namarò níkaw megapu sù pangikatalá mu ká Apu Kesu Kiristu. ¹⁶ Á ngámin yù netúrá nga bilin ni Namarò, inipetúrá ni Namarò sù ira ábbilinán na, tapè mábbágán ittam nu bibbirat tam áнна nu ginnát tam. Á megapu sù ubobuk ni Namarò, kánnámmuát tam yù meyanung kuna áнна yù ikáyá na nga akkuát tam, áнна magammá ittam sù akkuát tam nga narákè, áнна matabarangán ittam sù napiá nga ipakuá ni Namarò nittam. ¹⁷ Á sittam nga tatole ni Namarò, nu kuruk nga manguruk ittam sù ubobuk na, á napanán ittam nga masserbi kuna, nga mamaluro sù ngámin nga napiá nga ipakuá na nittam.

4

Yù Maporián nga Itabarang ni Pablo

¹ Á sangaw nu manoli si Apu Kesu ta dabbuno nga mammaguray, aggina yù mamanunnù sù ira tatolay nga matolay paga ta dabbuno áнна yù ira námmatay. Á yáyù nga tabarangát taka laguk ta ánninganán ni Namarò áнна ánninganán ni Apu Kesu Kiristu. ² ta mangilayalayá ka sù ubobuk ni Namarò! Maggián ka lâ nga napanán nga mangilayalayá, mássiki nu arád da ikáyá nayù ira tatolay, áнна mássiki nu marigirigá ka. Gammám mu yù ira tatolay nga minálliwá, á tudduám mu ira ta máwák nga mabbabáwi ira áнна likuránád da yù palliwá da. Á tabarangám mu ira, tapè mapasigaggá yù ángngikatalá da ká Apu Kesu. Á attamám mu yù ira tudduám mu, á ari ka malurá nga mangituddu nira. ³ Ta duttál yù ággaw, nga molang nayù ira tatolay nga ginnán yù kuruk nga meyanung ká Apu. Ta mattá-iki-ikáyá ira, á apatad da lâ yù ira ikáyá da, aggira nga mangituddu ta gustu ra nga ginnán. ⁴ Á paguráyád

da yù kuruk nga bilin ni Namarò, tapè ginniginnád da yù makkakerumá nga ubobugan nayù ira tatolay, nga awán ta serbi na. ⁵ Ngam sikaw, Timotio, gaggaram mu lâ yù nonò mu, á attamám mu lâ yù jigá mu nga mesimmu nikaw. Mangilayalayá ka sù napiá nga dámak nga meyannung ká Apu Kesu, á palurotam mu yù ngámin nga napiá nga ipakuá ni Namarò nikaw.

⁶ Á síkán, duttál sangaw yù ággaw nga pánò ta dabbuno. Ta maddaggunakin matay, á melabbeká sangaw ká Namarò, gapu ta aggina yù Yápù nga pakimorayák ku. ⁷ Napiá yù kingnguá, á pinatuppál kin yù ngámin nga inipakuá ni Namarò níkán. Á mássiki nu marigirigáká ta pangilayalayá ku, napasigaggá yù ángngikatalá ku ká Apu Kesu Kiristu, ána arák ku bulubugá inuli yù kuruk nga bilin ni Namarò. ⁸ Á yáyù nga iddi-iddagák ku yù meyawá níkán nga piá ána katunung ku, nga meyarík ta maráyaw nga kuroná nga napakappiánin ta lángì, nga iyawá na níkán ni Apu Kesu Kiristu sangaw nu ággaw nga panoli na. Ta si Apu Kesu yù mamanunnù nga matunung. Á ari lá síkán yù pangiyawatán na, nu ari gapay yù ira ngámin nga magayáyá nga magiddak ta panoli na.

⁹ Á Timotio, umay ka lâ umay saw giák ku! ¹⁰ Ta sinájjián nangá ni Demas, á gustu na lá nga ala-aleran yù ipagayáyá nayù ira tatolay ta dabbuno. Á yáyù nga nánawan nangá, nga minay ta Tessalonika. Á si Karesenti, minay ta Galasia. Á minay si Titò ta Dalmasia. ¹¹ Si Lukas lá yù kabbuluk ku saw.

Á si Markus, dagatam mu bì ta ipulù mu nga umay saw, ta dakal yù ángngabbák na níkán. ¹² Á si Tikiko, jinok ku ta Epeso.

¹³ Á sangaw nu umay ka saw, dagatam mu yù ulá ku nga inibattáng ku ta gián ni Karpo ta Tarowas, ána yù ira libru gapay, nepatalugáring sù ira túrá, á arám mu ira káttamán.

¹⁴ Á si Alekanduru nga minábbattál ta baronsi, kitarákè yù kingnguá na nga pangontará na níkán. Ngam si Namarò yù mamanunnù, á iyawá na kuna yù balá nayù kingnguá na níkán. ¹⁵ Mappalán ka lápay ká Alekanduru, ta masikan yù pangontará na sù bilin ni Namarò nga ilayalayá tam.

¹⁶ Á sù ngaw olu nga pamestigá ra níkán ta ili na Roma ta arubáng nayù kues, awán bulubugá ta mangabbák níkán, nga massistígu nakuan sù kinagi. Ngámin nga kábuluk ku, sinájjiád dangá. Ngam makimállaká ká Namarò ta arán na ipekáru nira yù panáji ra níkán, ngam pakomán na ira lá. ¹⁷ Á mássiki nu awán nira ta mangabbák níkán, si Apu Kesu yù mangabbák níkán, á inabbágán nangá ta keyarubáng ku sù ira mangikeká nga mangigagángay níkán. Á pinatattam ni Apu Kesu yù nonò ku ána pinasikan na yù baggi nga mangilayalayá sù napiá nga dámak nga meyannung kuna, tapè makaginná yù ira ngámin nga makkakerumá nga tatolay nga ari Kudío. Á iniyígù nangá, tapè arád dangá ipamakán sù ira simaron nga ayám nga layon. ¹⁸ Á sigidá nga iyígù nangá ni Apu Kesu, nga Yápù, maguray lá yù narákè nga mesimmu níkán. Á apan nangá ta mesipá kuna ta lángì sù pammagurayán na. Parè bì ta meparáyaw si Namarò ta áddè ta áddè. Ammán!

¹⁹ Á manonò ku di Persila ká Akila, á iyabbù ku nu kunnasi ira. Á kunnasi gapay di Onesiporo ána yù ira nga maggián ta bale na. ²⁰ Á si Erasto, naggián ta Korinto. Á bittáng ku si Taropimo ta Mileto gapu ta mataki. ²¹ Á sikaw, umay ka lâ umay saw giák ku lage na ammián. Á di Ebulo kári Pudento, ká Lino, ána si Kalodia gapay, iyabbù da nu kunnasi ka. Á kunnian gapay sù ira ngámin nga wáwwagi tam ta ángnguruk tam ká Apu Kesu, iyabbù da gapay nu kunnasi ka.

²² Á parè bì ta mepulupulù nikaw si Apu Kesu Kiristu, ána ikákkállá na sikayu ngámin. Áddè na yù.

Yù Túrâ ni Pablo kê Titò

Yù Meyannung sawe Túrâ

Si Titò yù ari Kudio nga nabbáli ta mangikatalà kê Apu Kesu megapu sù pangilayalayá ni Pablo. Á nepulupulú laguk kê Pablo, ta inabbágán na ta pangilayalayá na ána pangituddu na. Á bittáng ni Pablo ta Kareta nga mangabbák sù ira mangikatalà kê Apu nga naggagammung tán.

Á bibbirat tam yù meyannung sù ángngabbák ni Titò kê Pablo sù mekaruá nga túrá ni Pablo sù ira manguruk nga taga Korinto ána yù túrá na sù ira nga taga Galasia (2 Korinto 2:13; 7:6, 13; 8:6, 16, 23; 12:18; ána Galasia 2:3).

Á sawe túrá, ipanonò ni Pablo kê Titò yù napiá nga ággangnguá nga kepángngatán nayù ira manaron sù ira kábulud da nga mangikatalà kê Namarò. Á kagian ni Pablo kê Titò yù ángngituddu na sù ira lállakalákay, ána yù ira bábbakabák gapay, tapè aggira yù mangituddu sù ira bábbay nga nataggatán ána yù ira mámmagingánay. Á kagian ni Pablo gapay yù ángngituddu ni Titò sù ira bábbagitolay, ána yù ira aripan. Á ipanonò na kê Titò yù awayyá tam ngámin nga mamalurò sù napiá nga ikáyá ni Namarò, megapu sù ángngabbák nayù Mangilin nga Ikararuá.

Á ipanonò ni Pablo gapay kê Titò yù paggapuán nayù napiá nga dámak, ána yù kebalinán nayù iddanamát tam (3:4-7).

Yù Mayán na yawe Túrâ

Yù Pamegapu nayù Túrâ ána yù Pakimállà ni Pablo (1:1-4)

Yù Ággangnguá nga Mepángngà sù ira Natullà nga Manaron sù ira Mangikatalà (1:5-16)

Yù Metuddu sù ira Manguruk kê Apu Kesu (2:1-15)

Yù Napiá nga Ággangnguá nayù ira Tatole ni Namarò (3:1-11)

Yù Maporián nga Itabarang ni Pablo kári Titò (3:12-15)

Yù Pamegapu nayù Túrâ ána yù Pakimállà ni Pablo

¹ Sikán si Pablo nga mattúrâ nikaw, Titò. Sikán yù aripan ni Namarò, nga minángngilayalayá nga sinullà ni Apu Kesu Kiristu ta mangilayalayá kuna sù ira tatolay nga piníli ni Namarò, tapè mepasigaggá yù ángngikatalà da ána malannalannapán yù ammu ra nga meyannung sù kuruk nga bilin ni Namarò. ² Á ipakánnammù nira yù iddanamát tam, nga mannanáyun nga inángà nga awán ta áddè na, nga iyawá ni Namarò sù ira tatole na megapu sù Aná na. Ta yáyù initabbá na ngaw ni Namarò lage na namarò ta dabbuno. Á si Namarò ari bulubugá massiri. ³ Á ta dattál nayù ággaw nga sinullà ni Namarò, inipalappá na yù bilin na nga meyannung sù inángà na nga awán ta áddè na, nga iyawá na nittam. Á ilayalayá ku yù bilin na nga inikatalà na níkan, gapu ta jinok nangà ni Namarò, si Namarò nga mangiyígù nittam.

⁴ Á yawe yù itúrâ ku nikaw, Titò, ta sikaw yù ibiláng ku ta kun na kuruk nga aná ku, megapu sù ángngikatalà ta kê Apu Kesu. Á damágat taka, nu kunnasi ka, ta sigidá nga ipakimállà taka kári Namarò nga Yáma tam kê Apu Kesu Kiristu nga mangiyígù nittam, ta ikállà da ka ána iyawá da nikaw yù napiá nga ággiám mu ána yù napiá nga gawagawáyám mu.

Yù Ággangnguá nga Mepángngà sù ira Natullà nga Manaron sù ira Mangikatalà

⁵ Á yawe yù gapu na nga bittáng taka ta Kareta, Titò, tapè balinam mu yù arák ku nakuá nga tarabáku. Á sikaw bì yù manullà sù ira karakalán nga manaron sù ira manguruk nga aijan ta katággitádday nga ili. Tullatam mu yù ira natudduán sù ubobuk ni Namarò. Á nu piliám mu ira, nonopam mu yù ngámin nga initabarang ku nikaw nga meyannung sù kepángngatád da. ⁶ Piliám mu lá yù napiá nga tolay nga pakimorayán na ngámin, tapè awán ta ipamaliwá da kuna. Táttádday lá yù atáwa na. Á yù ira áná na, máwák gapay nga mangikatalà ira kê Apu, ána kurugad da yù ira darakal da. Á nu narákè yù ággangnguá ra ána potuád da yù ira darakal da, á arám mu tullatan yù yáma ra ta manaron sù ira manguruk.

⁷ Á yù tolay nga manaron sù ira manguruk, yáyù ásserbi na kê Namarò. Á máwák nga aggina yù tolay nga napiá lá yù meparámak nga meyannung kuna, nga awán bulubugá ta ipamaliwá da kuna. Máwák nga ari mappeddaráyaw, ána ari malogon nga mapporay. Máwák nga ari magillellaw, ána ari makiramá, ána ari maddarogá. ⁸ Ngam kunnaiw

galà yù ággangnuá na. Máwák nga aggina yù magayáyâ nga mangálliuuk, á napiá lâ yù nonò na áнна mangikállà sù ira kábulun na. Máwák nga aggina yù tolay nga matunung, nga mamalurò ta ngámin nga ipakuá ni Namarò kuna, áнна gaggarán na yù nonò na áнна yù baggi na. ⁹ Á máwák nga kurugan na ta napiá yù kuruk nga bilin ni Namarò nga netuddu kuna, tapè makáwayyá gapay nga manabarang sù ira kábulun na ta meyanung sù kuruk nga bilin ni Namarò. Á ta kunnian, egga yù awayyá na nga tabbagan yù ira makikontará sù kuruk nga ituddu na.

¹⁰ Ajjan garè yù ira tatolay nga mamotu sù ira mangituddu nira, á arád da kurugan yù kuruk nga bilin nga metuddu nira, nepatalugáring sù ira kábulun naw nga Kudio nga mangikatalà ká Apu Kesu, nga manuppál lâ paga ta kustombare na Kudio nga inituddu ni Moyses. Á ubu-ubobugad da yù awán ta passerbián na, á ilogò da yù ira kábulud da, megapu sù kagiad da. ¹¹ Máwák nga mapatukká ira sù ubu-ubobugad da, nga mamakkakáttuay sù napakáru nga pamiliá. Ta ituddu ra yù ari kuruk, nga arád da nakuan ituddu. Á yá lâ ipangituddu ra ta gustu ra matáddanán. ¹² Á mássiki yù ngaw tádday nira nga taga Kareta, nga minállabbun nga neparámak, kinagi na yaw:

“Minássirisiri yù ira ngámin nga taga Kareta, á narákè ira nga kun na ayám nga mangnuá ta tolay.

Á narullák ira, nga matalakák nga mattarabáku,” kun na.

¹³ Kuruk yù kinagi na. Á yáyù nga gammám mu ira laguk, tapè mapasigaggà yù ángngikatalà da. ¹⁴ Á gammám mu ira, tapè arád da tángngagan yù bídá nayù ira Kudio, nga ari kuruk, nga naggapu galá ta nonò da. Gammám mu ira tapè arád da ginnán yù taddán nayù ira tatolay nga manakí sù kuruk nga bilin ni Namarò.

¹⁵ Yù tolay nga napiá yù nonò na áнна mangilin, napiá ta ánninganán na yù ngámin nga naporò, áнна awán ta narákè kuna. Ngam yù ira tatolay nga narákè, nga ari mangikatalà ká Apu Kesu, awán ta ammu ra nga napiá, ta arád da ammu mappíli sù napiá, á jikkù yù ngámin nga meyanung nira, mássiki yù nonò da áнна ággangnuá ra. ¹⁶ Kagiad da ta si Namarò yù pakiyápuad da, ngam ari kuruk, ta mepasingan ta arád da kurugan yù bilin na, megapu sù narákè nga akka-akkuád da. Potuád da si Namarò, á gapu ta narákè yù nonò da, awán ta awayyá ra nga mangnuá ta bulubugá nga napiá.

2

Yù Metuddu sù ira Manguruk ká Apu Kesu

¹ Ngam sikaw, Titò, ituddum lâ yù kuruk nga bilin ni Namarò. ² Á yù ira lállakalákay, tabarangám mu ira ta gaggarád da yù nonò da áнна baggi ra, tapè mepakimorayán ira áнна mepasingan ta napasigaggà yù ángngikatalà da ká Apu Kesu. Tabarangám mu ira ta ari ira magillellaw, ngam iddi-iddukad da yù ira kábulud da áнна attamád da yù ngámin nga mesimmu nira.

³ Á yù ira bábbakabákà, kunnian gapay nira. Tabarangám mu ira, tapè napiá yù ággangnuá ra, ta kun na mepángngà sù ira tatole ni Namarò. Ari ira nakuan mabbebbek. Ari ira gapay nakuan magillellaw. Ta aggira yù mangituddu sù napiá nga ággangnuá ra sù ira kábulud da nga bábbay nga nataggatán. ⁴ Á máwák nga ituddu ra nira gapay yù napiá nga ángngiddù da ta atáwa ra áнна yù ira áná da. ⁵ Á tabarangád da ira gapay ta gaggarád da yù nonò da áнна baggi ra, á tuttulad da yù napiá nga nonò. Á máwák gapay nga malláppà ira nga magimemalay, nga minángngikállà. Á tumulù ira sù atáwa ra. Ta nu napiá yù akka-akkuán nayù ira mangikatalà ká Apu, awán ta awayyá nayù ira káruán nga tatolay nga makkakagi sù bilin ni Namarò.

⁶ Á kunnian gapay sù ira nataggatán nga lálláki áнна yù ira bábbagitolay, tabarangám mu ira ta gaggarád da yù nonò da áнна baggi ra. ⁷ Á sikaw, Titò, ipasingam mu nira ta sikaw yù napiá nga párigád da, nga tolay nga napiá yù nonò na áнна ággangnuá na. Á tángngagam mu yù pangituddum, áнна ituddum lâ yù kuruk nga bilin ni Namarò. ⁸ Ipasingam mu nira ta tolay ka nga napiá yù ággubobuk mu, áнна mekatalà yù kagiam mu, nga awán ta liwá na, tapè mappasirán yù ira tatolay nga makikontará nikaw, áнна awán ta ipamalíwá da.

⁹ Á yù ira makiaripan, tabarangám mu ira ta tumulù ira sù ira passerbiád da. Palurotad da laguk yù ngámin nga ipakuá ra nira, tapè magayáyâ yù ira yápu ra. Á arád da ira potuán. ¹⁰ Á arád da kokotan yù mekatalà nira nayù yápu ra, ngam ipasingad da galá yù napiá nga ásserbi ra nira, tapè mepakánnammu ta kuruk nga mekatalà ira. Á yù ira ngámin nga tatolay nga makasingan sù napiá nga ággangnuá ra, tákkilalád da lállaguk ta napiá áнна maráyaw yù metuddu nga meyanung ká Namarò nga mangiyígù nittam.

Yù Pangikállà ni Namarò nittam ána yù Bagu nga Áttole tam

¹¹ Mepalappâ yù pangikállà ni Namarò sù ira ngámin nga makkakerumá nga tatolay, ta iniyawâ na nira yù mangiyígù nira. ¹² Á megapu ta allà ni Namarò, ituddu na nittam yù pangipuerá tam sù arán na ikáyâ, tapè magaggarát tam yù nonò tam ána baggi tam, ána arát tam akkuán yù negagángay nga narákè nga akka-akkuán nayù ira tatolay nga ari manguruk. Á yáyù nga akkuát tam laguk yù napiá ána palurotat tam yù ipakuá ni Namarò nittam ta keggá tam sawe dabbuno. ¹³ Á ta pagiddi-iddak tam, iddanamát tam yù pappasingan nayù Yápu tam nga maddalingárang, nga mangiyígù nittam. Aggina si Apu Kesu Kiristu, nga kotunán nga mammaguray. ¹⁴ Aggina yù nabbaluntáriu nga nangitapil ta baggi na, nga inipappagá na megapu nittam, nga pangari na sù liwiliwâ tam, tapè pabbalinan na ittam ta tatole na nga mangilin, nga maláppâ nga mamaluro sù napiá nga ipakuá na nittam.

¹⁵ Á ituddum laguk nira dannian nga initúra ku, ta ajjan yù pakáwayyám nga mangituddu nira. Á tabarangám mu ira, ána gammám mu ira sù narákè nga akkuád da, tapè pakimorayád da ka nayù ira ngámin nga tatolay.

3

Yù Napiá nga Ággangnuá nayù ira Tatole ni Namarò

¹ Á ipanonò mu yawe gapay sù ira manguruk. Máwák nga tumulù ira sù ira mammaguray ána yù ira makáwayyá ta gubermemente, á kurugad da yù tunung da. Á máwák nga dán nga naparán ira nga mangabbák nira nu ajjan yù napiá nga ipakuá ra nira. ² Kagam mu nira ta ari ira mallilibâ. Ari ira maddaráma, ngam mepasingan ta masippâ ira nga minángngikállà ta ngámin nga tatolay.

³ Ta mássiki sittam ngámin, arát tam ngaw kánammuan yù ikáyâ ni Namarò, á ari ittam nanguruk. Pinotuát tam si Namarò, á nelogò ittam nga nepakkakátuay kâ Namarò. Á kunnay ittam ta makiaripan sù narákè nga karagátan na baggi tam, ta narákè ána jikkù yù ággangnuá tam ngaw ána yù ipagayáyâ tam. Nangabubu ittam, ána namassil ittam sù ira kábulut tam. Á nakkakáporay ittam gapay, ána nakkakálussaw ittam.

⁴ Ngam nakikanakaná nittam si Namarò, á jinok na si Apu Kesu ta dabbuno, tapè ipakánammu na nittam yù pangayâ ni Namarò ána pangikállà na nittam. Á iniyígù na ittam nga mangikatalà kuna.

⁵ Á yá ipangiyígù na nittam, ari megapu sù napiá nga kingnuá tam, nu ari galá megapu sù pangikállà na nittam.

Á pinakarenuán na ittam nayù Mangilin nga Ikararuá, tapè mári yù liwiliwâ tam.

Á iniyawâ na nittam yù bagu nga nonò tam, tapè makáwayyá ittam nga mamaluro sù napiá nga ipakuá na nittam.

⁶ Ta iniyawâ na nittam ni Namarò yù Mangilin nga Ikararuá na, megapu kâ Apu Kesu Kiristu, nga mangiyígù nittam.

⁷ Á yáyù nga mebiláng ittam ta matunung megapu sù allà na.

Á pinataganátan na ittam ta áná na, á mesipâ ittam kuna, ána iniyawâ na nittam yù áttole tam, nga awán ta áddè na, nga iddanamát tam.

⁸ Kuruk nga mekatalà yù kinagi.

Á yáyù nga karagátak ku ta dannian yù ituddum ta napiá sù ira nga manguruk kâ Namarò, tapè ipe ra yù urà da nga manángngák sù napiá nga akka-akkuád da. Ta mangáppípiá yù ira ngámin nga tatolay megapu sawe napiá nga metuddu. ⁹ Ari ka laguk mepappupúlù sù ira makipappereperang ta ubobuk, ta awán ta serbi nayù pamereperang da ta meyanung sù ngáan nayù ira ngaw naggaká nira. Á ari ka dukkurukki sù ira makiramá nga makipappereperang ta ubobuk nga meyanung sù tunung ni Moyses, ta awán ta tolay nga mábbágán megapu sù ituddu ra. ¹⁰ Á nu ajjan yù tolay nga mamuruburion sù ira mangikatalà kâ Apu Kesu, á gammám mu. Á nu arán na ginnán yù kagam mu, á pidduám mu nga gammán. Á nu arán na paga ginnán, á paguráyám mu laguk. Ari ka kuna dukkurukkikin. ¹¹ Ta amum gemma ta narákè yù nonò na, ta mepasingan megapu sù akka-akkuán na nga ammu na ta narákè.

¹² Á talákkurugak ku nga doban sangaw si Artemas onu si Tikiko ta umay ta giám mu. Á tappi na sangaw, alistuám mu nga umay manápun níkan ta Nikapulís, ta yá urè ta maggiánà bí tán ta áddè ta pappasá na ammián. ¹³ Á ta áddè ta awayyám, abbágám mu di Senu nga abugádu ána yù kabbulun na, si Apolo, tapè aijan ngámin yù awágad da ta paggagannuá da ta mánaw nga umay mangituddu. ¹⁴ Á ituddum gapay sù ira kábulut tam yù napiá nga akkuád da. Máwák nga malláppà ira nga mattarabáku, tapè málá da yù awágad da, ána aijan yù awayyá ra gapay nga mangabbák sù ira kuruk nga magáwák. Á nu kunnian yù akkuád da, napiá laguk yù pabbalinán nayù kaláppà da.

¹⁵ Yù ira ngámin nga kábuluk ku saw, iyabbù da nu kunnasi kayu. Kagiam mu gapay yù pangiyabbù mí sù ira mangayá níkami megapu sù pangikatalà tam kâ Apu. Á parè bí ta ikákkállà ní Namarò sikayu ngámin.

Yù Túrâ ni Pablo kê Pilemon

Yù Meyannung sù Túrâ

Si Pilemon yù maríku nga tolay, nga makákkua ta aripan nga mangngágan ta Onesimo. Á yù ili na Kolosi támma yù gián nayù bale ni Pilemon, nga paggagammungán nayù ira mangukatalà kê Apu, ta mabibbik tam yù meyannung kê Onesimo sù túrâ ni Pablo sù ira manguruk nga taga Kolosi (Kolosi 4:9). Á nattálaw garè si Onesimo.

Á nattúrâ si Pablo sawe ta keggá na ta ili na Roma, nga nebalúk ta karsel. Á inítúrâ na yù ikomâ na kê Pilemon nga meyannung kê Onesimo, nga aripan na nga nattálaw. Ta nesimmuán ni Onesimo si Pablo ta Roma, á inipakánnámmu ni Pablo kuna yù napiá nga dámak, nga bilin ni Namarò. Á pakaginná ni Onesimo, nanguruk ána nangikatalà kê Apu Kesu, á napasigaggá yù ángngikatalà na. Á yáyù nga inabbágán ni Onesimo si Pablo ta keggá ni Pablo ta ábbalurán, ána nakikopun kê Pablo ta napiá. Á kánnámmuát tam ta kuruk nga napiá gapay yù ákkopun di Pablo kê Pilemon, megapu sù ággián nayù túrâ na.

Yù Mayán nayù Túrâ

Yù Pamegapu nayù Túrâ (1-3)

Yù Ángngiddù ni Pilemon ána Ángngikatalà na (4-7)

Yù Ikómâ ni Pablo kê Pilemon nga Meyannung kê Onesimo (8-22)

Ipakimállâ ni Pablo yù ira Kákkopun na (23-25)

¹ Sikán si Pablo, nga nebalúk megapu sù ángnguruk ku kê Apu Kesu Kiristu. Á aijan saw gapay si Timotio, nga wagi tam megapu ta ángnguruk tam, nga maggián sawe ili nga mangabbák níkan. Á mattúrâ kami nikayu, Pilemon, nga kábulum mi nga iddukam mi, nga mattarabáku ta napiá nga mangabbák níkami ta pattarabáku mi. ² Á mattúrâ kami gapay kári Apia, nga babay nga kun na wagi mi, kê Arkipo, nga kabbulum mi nga masserbi kê Apu ta kun na napiá nga suddálu, ána yù ira ngámin nga manguruk gapay, nga maggagammung ta bale naw. ³ Á yaw ipakimállâ ku, ta ikákkállâ da kayu di Namarò nga Yáma tam kê Apu Kesu Kiristu, ána pagimammata da kayu, tapè napiá yù ággián naw ána gawagawáyán naw.

Yù Ángngiddù ni Pilemon ána Ángngikatalà na

⁴ Á pakimállâ ku kê Namarò, sigidángâ mabbalabála kuna megapu níkaw, Pilemon. ⁵ Á yaw ipabbalabála ku, gapu ta narámak ku yù ángngiddù mu sù ira kábulum mu nga manguruk ána yù ángngikatalà mu kê Apu Kesu Kiristu. ⁶ Á ipakimállâ ku ta parè bì ta kánnámmuán nayù ira kábulum mu yù ngámin nga napiá nga pabbalinán nayù ángngikatalà tam kê Apu Kesu, megapu sù napiá nga pakkakátabarang naw ta meyannung sù panguruk naw. ⁷ Á kopuk ku, magayáyákâ ána mabannáyán yù nonò ku megapu sù ángngiddù mu, gapu ta mabannáyán gapay yù nonò nayù ira ngámin nga kábulut tam nga manguruk megapu sù ángngiddù mu.

Yù Ikómâ ni Pablo kê Pilemon nga Meyannung kê Onesimo

⁸ Á gapu ta nasingak ku yù ángngiddù mu, kopun, aijan yù ikomâ níkaw. Á aijan nakuan yù awayyâ nga mappelò nga manaddán níkaw, megapu sù pakáwayyâ nga naggapu kê Apu Kesu Kiristu. ⁹ Ngam gapu ta pakkaká-iddù ta, á arát taka puersán. Á yáyù nga ikomâ lá níkaw, ta ikállâ mà bì, ta sikán si Pablo nga lakaláyayin, nga nebalúk megapu sù ángnguruk ku kê Apu Kesu Kiristu. ¹⁰ Á yá ikomâ níkaw, ta ikákkállâ mu si Onesimo, nga ibiláng ku ta aná ku, gapu ta mangurugin kê Apu Kesu megapu ta pangituddù kuna, ta kebalúk ku sawe karsel. ¹¹ Á ammú gemma ta awán garè ta ángngabbák na ngaw níkaw. Ngam kunangane, aggina yù mangabbák nga kunnay ta kebalinán nayù ngágan na, si Onesimo, ta sitta nga duá yù ábbágán na, á napiágingin yù ángngabbák na nitta.

¹² Á yáyù nga palabbetak ku laguk si Onesimo ta giám mu kunangane, á ipepulù ku yù ayâ ku kuna, ta maraddamâ ta páno na. ¹³ Á ikáyâ ku nakuan ta maggián si Onesimo níkan, ta keggá nga nebalúk paga sawe karsel megapu ta pangilayalayá ku sù napiá nga dámak, tapè aggina nakuan yù mangabbák níkan ta pannakabaggim. ¹⁴ Ngam arát taka puersán nga mangiyawâ sù aripam mu ta mangabbák níkan, nu arám mu anugutan. Ta ikáyâ ku ta mabbaluntáriu ka lápay nga mangikállâ megapu sù urem.

¹⁵ Á yawe mápugák yù ure ni Namarò kê Onesimo, ta nesinná bì níkaw, nga nelabbè ta giák ku, tapè mapággáng ána manguruk kê Apu. Á patoliak ku laguk níkaw, tapè alawatam

mu sangaw nga maggián galâ nikaw ta áddè ta áddè. ¹⁶ Á pangalawâ mu kuna, aringin nakuan nga kunnay ta aripam mu, nu ari galâ ta kunnay ta kopum mu nga iddukam mu. Ta aggina yù kopuk ku nga iddukak ku. Iddukam mu laguk ta kunnay ta kopum mu, ána wagim gapay megapu sù ángngikatalà naw kâ Apu.

¹⁷ Á nu ibiláng mà ta kopum mu, megapu sù ángngikatalà ta kâ Apu Kesu, á paddulotam mu laguk si Onesimo ta kunnay ta pamaddulò mu níkán. ¹⁸ Á nu ajjan yù liwâ na nikaw, onu gatù na, ipekárum lâ níkán. ¹⁹ Á síkán si Pablo, nga mattúrâ saw lápay, á síkán yù mappagá ta gatù ni Onesimo. Á arák ku nakuan ipanonò nikaw yù gatù mu níkán, megapu sù keyígù mu, ána yù pangalawâ mu sù bagu nga áttolem nga awán ta áddè na, ta kesipá mu kâ Apu Kesu, megapu sù pangituddù níkaw. ²⁰ Kopun, parè bì ta ikállà mà, megapu sù ángngikatalà ta kâ Apu, ána bannáyám mu yù nonò ku, megapu sù kepattatádde ta kâ Apu Kesu Kiristu.

²¹ Á mappelokà nga mattúrâ níkaw, ta ikatalà taka, ána ammu ta palurotam mu yù ikomâ níkaw, nga malannapán paga megapu sù allà mu níkán. ²² Á ajjan paga yù kiddawak ku níkaw, ta paránam mu bì yù paggianák ku gapay ta bale naw. Ta iddanamák ku yù pangikállà ni Namarò, nga pangiyawâ na níkayu sù ipakimállà naw kuna, tapè mapalubbángà sangaw nga melabbè níkayu.

Ipakimállà ni Pablo yù ira Kákkopun na

²³ Á si Eapro yù kabbuluk ku nga nebáluk sawe karsel gapay megapu sù ángnguruk na kâ Apu Kesu Kiristu. Á iyabbû na gapay nu kunnasi kayu. ²⁴ Á di Markus, kári Aristarko, ána si Demas, á si Lukas gapay yù ira kábuluk ku nga masserbi kâ Namarò, á iyabbû da gapay nu kunnasi kayu.

²⁵ Á yawe ipakimállà ku, ta maggián lâ níkayu si Apu Kesu Kiristu nga mangabbák níkayu megapu sù allà na.

Yù Túrâ sù ira Kebru

Yù Meyannung sawe Túrâ

Yù ira tatolay nga Kudio, mangngágan ira gapay ta Kebru, á Kebru yù ngágan nayù ággubobuk da gapay. Á si Akup yù naggaká nira, nga ingágan ni Namarò ta Israel. Á mewarawarâ yù ira ginaká ni Israel ta tangapáddabbuno. Ngam kunangane, manoli ira ta dabbun nga iniyawâ na ngaw ni Namarò nira, nga mangngágan ta Israel.

Aru yù ira makkakerumá nga rilision ta dabbuno, á aru yù ira tatolay nga Kudio ána ari Kudio nga nangiyabbù sù ira napolu nga manguruk kâ Apu Kesu Kiristu ta meyanung sù pallikuk da ta dán nga rilisiod da ána panuttul da kâ Apu Kesu. Á iniyabbù da, nga kud da, “Anni panò yù kapiánán nayù ángnguruk nayù ira tatolay kâ Apu Kesu Kiristu ánnè ta rilision nga makkakerumá?” Á yawe yù túrà nayù manabbák karannian nga iniyabbù da, nepatalugáring sù pangiyabbù da nga kud da, “Anni yù kebalinán nayù kinagi ra, nga si Apu Kesu yù kátannangán nga pári tam?” Bibbiran naw Kebru 4:14-16.

Yù Mayán na yawe Túrâ

Si Apu Kesu yù Mangipakánnámmu sù Bilin ni Namarò (1:1-4)

Makáwayyá si Apu Kesu ánnè sù ira Daroban ni Namarò (1:5-14)

Yù Napiá nga Ángngiyígù ni Namarò nittam (2:1-18)

Makáwayyá si Apu Kesu ánnè kári Moyses kâ Josiuwa (3:1-4:13)

Si Apu Kesu yù Pári tam nga Mamakkápiá nittam kâ Namarò (4:14-7:28)

Yù Kapiánán nga Tarátu ni Namarò megapu kâ Apu Kesu (8:1-9:22)

Namittán lâ yù Ketapil ni Apu Kesu nga Keyátáng na megapu nittam (9:23-10:39)

Yù ira Tatolay nga Neparámak megapu sù Ángngikatalà da (11:1-40)

Yù Mepángngá nga Ángngikatalà tam kâ Ammò Namarò (12:1-13:19)

Yù Ipakimállà nayù Mattúrâ (13:20-25)

Si Apu Kesu yù Mangipakánnámmu sù Bilin ni Namarò

¹ Sù ngaw napolu nga ággaw, name-arú yù pangipakánnámmu ni Namarò sù bilin na sù ira ngaw Kebru nga naggaká nittam nga Kudio. Á aru yù makkakerumá nga ángngipakánnámmu ni Namarò sù bilin na, megapu sù ángngituddu nayù ira ngaw ábbilinán na. ² Ngam ta ággawo sù keggá tam, sinullà ni Namarò yù Anâ na ta mangipakánnámmu sù bilin na. Ta inipaparò ni Namarò sù Anâ na yù ngámin nga egga, á aggina yù sinullà ni Namarò nga isipà na ta ngámin. ³ Á yù Anâ ni Namarò yù pakasinganát tam sù dalingárang ni Namarò, ta naggittá yù pakáwayyá ra, yù nonò da, ána yù akkuád da. Á mammaguray sù ngámin nga pinarò na megapu sù pakáwayyá nayù ubobuk na, nga ámmagaddátu na. Á ta kabalin na nagikáru na liwiliwá tam, tapè mapakomá ittam, á nattoli sù gián na ta lángi, á nagitubangin sù jiwánán nayù Kotunán, tapè mepammaguray kuna. ⁴ Ta pinabbalin ni Namarò ta kapiánán yù Anâ na ánnè sù ira daroban na. Á ammu tam ta makáwayyá ánnè nira, gapu ta aggina lâ yù kagian ni Namarò nga Anâ na.

Makáwayyá Yù Anâ ni Namarò ánnè sù ira Daroban na

⁵ Á awán sù ira daroban ni Namarò yù nakkagián na, nu ari lâ yù Anâ na yù nakkagián na ta kunniaw, “Sikaw yù Anâ ku,

á ta ággawo ipakánnámmukin ta sikán yù Yámam,”* kun na.

Á aijan paga yù kinagi ni Namarò ta meyanung sù Anâ na, nga arán na gemma bulubugá kinagi ta meyanung sù ira daroban na, nga kunniaw,

“Sikán yù Yáma na,

á aggina yù Anâ ku,”† kun na.

⁶ Á ta pamapáno ni Namarò sù Anâ na nga makáwayyá,‡ á jinok na ta umay ta dabbuno. Á kinagi na,

“Ngámin nga darobak ku, mamalittúkak ira nga maddáyaw kuna,” kun na.

⁷ Á ta meyanung sù ira daroban ni Namarò, kinagi na,

“Masserbi níkan yù ira darobak ku,

nga pabbalinak ku ira ta kunnay ta paddák ána api nga maggatang,

* 1:5 Salmo 2:7; Kingnguá 13:33 † 1:5 2 Samuel 7:14 ‡ 1:6 Makáwayyá si Apu Kesu nga kunnay sù kaká nga anâ na tolay, nga manaron ta ngámin nga kukuá nayù yáma na.

nga makáwayyá nga mamalurò sù ipakuá nira,”[§] kun na.

⁸ Ngam yawe yù kinagi ni Namarò sù Aná na,
“Sikaw yù Apu Namarò,
nga mammaguray ta áddè ta áddè nga awán ta áddè na.

Á napiá yù pammagurem sù ira tatolem,
ánna matunung yù pamanunnù mu sù ira ngámin.

⁹ Á ikáyá mu lâ yù napiá ánna matunung nga akkuán nayù ira tatolay,
ngam arám mu ikáyá yù narákè nga akkuád da.

Á yáyù nga sinullà taka, sikán nga Yápum nga pakimorayám mu,
tapè sikaw yù kotunán nga mammaguray,
nga magayáyá ánna maráyaw ánnè sù ira kábulum mu.”*

¹⁰ Á yawe gapay kinagi ni Namarò sù Aná na,
“Sikaw, Apu, yù namarò ta dabbuno ta pamegapu na ngámin,
ánna pinarò mu gapay yù lángi ánna ngámin nga egga kuna.

¹¹ Á lummà noka yù lángi ánna yù dabbuno.
Ngam sikaw, maggián ka lâ ta áddè ta áddè, nga ari manguli.
Maddán yù dabbuno ánna lángi nga kun na gámi.

¹² Á lukutam mu ira nga kunnay ta gámi, ta mapatalián ira.
Ngam sikaw, ari ka maddán, á ari ka mapatalián,
ta maggián ka lâ nga ari manguli ta áddè ta áddè,

ta awán ta áddè nayù dagum mu,”[†] kun ni Namarò sù Aná na.

¹³ Ngam awán bulubugá ta daroban ni Namarò nga nakkagián na sù kunniaw nga kinagi
na kê Aná na. Ta kinagi ni Namarò sù Aná na,
“E ka bì magitubang ta jiwánák ku,

sù ággitubangán nayù kotunán nga maráyaw,
áddè ta appútak ku yù ira malussaw nikaw,”[‡] kun na.

¹⁴ Á yù ira daroban ni Namarò, asinni ira panò nu ari galá yù ira ari masingan nga
masserbi kê Namarò. Á doban na ira ta umay mangabbák nittam ngámin nga meyiù, nga
mesipá kê Namarò ta áddè ta áddè.

2

Yù Napiá nga Ángngiyìgù ni Namarò nittam

¹ Á gapu ta yù Aná ni Namarò yù mangipakánnámmu sù bilin ni Namarò, á yáyù nga
máwák tam nga tángngagan ta napiá yù ipakánnámmu na nittam, marakè mekátuay ittam
sù kuruk nga bilin na. ² Á sù ngaw gári, inipeyubobuk ni Namarò sù ira daroban na yù
taddán na sù ira tatolay.* Á yù ira tatolay nga ari nanguruk, pinagikáru ni Namarò ira
megapu ta liwá da, gapu ta arád da kinuruk yù kinagi nayù ira daroban na. ³ Á sittam laguk,
nu lonát tam yù bilin ni Namarò nga meyannung sù Aná na nga mangiyìgù ta tatolay, á
egga panò yù tanakuán nga pakiyìgutát tam? Awán! Ta si Apu Kesu Kiristu yù napolu nga
mangipakánnámmu ta meyannung sù pangiyìgù na ta tatolay, á ngámin ira nga nagginná
kuna, aggira yù mangipakánnámmu nittam ta kuruk yù bilin na. ⁴ Á si Namarò gapay,
inipakánnámmu na lápau ta kuruk yù kinagi ra, megapu sù inipakuá na nira nga aru nga
makapállà nga pinagaddátu ra. Á ta meyannung sù ure ni Namarò, inisinek na nira yù
makkakerumá nga pakáwayyá ra nga naggapu sù Mangilin nga Ikararuá na, tapè ipasingan
na ta kuruk yù bilin na nga kinagi ra.

Yù Magágál nittam ta Umay Makiyìgù

⁵ Á ta meyannung sù bagu nga dabbun nga ubobugak ku nga duttál noka, ari gemma yù
ira daroban ni Namarò yù sinullà na nga mammaguray sù bagu nga dabbun. ⁶ Ngam yù
ira tatole ni Namarò yù sinullà na ta mammaguray, nga kunnay ta netùrà sù dán nga libru
nga kunniaw:

“Á sikaw, Apu Namarò, yù Kotunán.

Á anni má panò ta manonò kami, nga tolay kami lâ?

Ta ikállà kami ánna arák kami káttamán.

⁷ Á pinarò kami, nga nagukák lábbi yù pakáwayyá mi ánnè sù pakáwayyá nayù ira darobam
mu,

§ 1:7 Salmo 104:4 * 1:9 Salmo 45:6-7 † 1:12 Salmo 102:25-27 ‡ 1:13 Salmo 110:1; Kingngúá 2:34 * 2:2
Kingngúá 7:38; Galasia 3:19

ngam ipotuk kami sangaw nga meparáyaw, nga mesipà sù pammagurayám mu.

⁸ Á patulutam mu nikami yù ngámin nga pinarò mu,
tapè mammaguray kami ta ngámin.”†

Á gapu ta kunnian yù netúrâ, á ammu tam ta ipammagure ni Namarò sù ira ngámin nga tatole na yù ngámin nga pinarò na, á kánnámmuát tam ta awán ta arát tam pammagurayán. Ngam arát tam paga masingan ta sittam nga tatolay yù mammaguray ta ngámin nga naparò, gapu ta ari paga jimittál yù ággo na. ⁹ Ngam yawe ammu tam nga jimittálin, ta si Apu Kesu yù namalurò karannian nga netúrâ. Ta aggina yù nabíbi lâ nga napagukák ánnè sù ira daroban ni Namarò, tapè metapil nga matay ta kurù megapu nittam ngámin nga tatolay, gapu ta inikállà ni Namarò ittam. Á gapu ta ketapil ni Apu Kesu megapu nittam, yáyù nga aggina yù inipotun ni Namarò, nga maddalingárang nga mammaguray nga meparáyaw!

¹⁰ Ta si Namarò gemma yù namarò ámma manangngal ta ngámin, á meparáyaw megapu ta ngámin nga pinarò na. Á napiá ámma mepángngà gemma ta jinok ni Namarò si Apu Kesu ta umay meyanâ ta tolay ámma mangiyangngà ta jigá, tapè aggina yù makáwayyá nga mangiyigù ta aru nga tatolay. Ta yáyù gemma yù ure ni Namarò, tapè pabbalinan na ta áná na yù aru nga tatolay, tapè mesipà ira sù Anâ na, nga meparáyaw. ¹¹ Á si Apu Kesu yù namakarenu nittam nga mangikatalà kuna, tapè mangilin ittam, á táttádday lâ yù Yáma tam kâ Apu Kesu. Á yáyù nga ari mappasirán si Apu Kesu nga makkagi ta sittam yù wáwwagi na. ¹² Á ammu tam ta kuruk nga wáwwagi na ittam gapu ta aijan yù netúrâ nga kinagi na kâ Yáma na, nga kunniaiw,

“Ammò, ipakánnámmu taka sù ira wáwwagi.

Á mepaggagammungà nira, nga makkansion nga maddáyaw nikaw,”‡ kun na.

¹³ Á netúrâ gapay yù kinagi ni Apu Kesu,

“Ikatalà ku si Apu Namarò,” kun na.

Á kinagi na paga,

“Aijanâ saw ámma yù ira wáwwagi nga áná ni Namarò nga inikatalà na nikán,” kun na.

¹⁴ Á sittam nga gagian ni Apu Kesu ta áná ni Namarò, tolay ittam lâ nga egga baggi tam nga matay. Á yáyù nga nabbáli ta tolay gapay si Apu Kesu, nga kunnay nittam, á netapil nga natay ta kurù megapu nittam, tapè máppù sí Satanas, nga aringín makáwayyá nga mangituluk sù ira tatolay ta pate ra nga awán ta áddè na. ¹⁵ Á inirián ni Apu Kesu yù assing tam ta pate tam megapu sù kingguá na. Á pinalubbáng na ittam, nga kunnay ta nebáluk ngaw megapu sù assing tam ta pate tam. ¹⁶ Ta ari gemma yù ira daroban ni Namarò yù abbágán ni Apu Kesu, nu ari galá sittam nga tatole na, nga mebiláng ta ginaká ni Abrakam. ¹⁷ Á gapu ta sittam nga tatolay yù ikáyâ na nga abbágán, á máwák laguk nga nepaggittá nittam nga wáwwagi na nga marigirigá. Á yáyù nga nabbalin ta kátannangán nga pári nga mangikállà ámma pangikatalakán nga masserbi kâ Namarò megapu nittam, nga nangitapil sù baggi na ta pagikáru na ta liwiliwá tam, tapè mapakomá ittamin. ¹⁸ Á gapu ta inattamán ni Apu Kesu yù pamarubá ni Satanas kuna, á yáyù nga makáwayyá nga mangabbák nittam nu parubán na ittam ni Satanas, tapè ari ittam makiappù kâ Satanas.

3

Makáwayyá si Apu Kesu ánnè kâ Moyses

¹ Wáwwagi nga mangikatalà kâ Apu Kesu, mangilin kayu nga mesipà gapay sù pangapà ni Namarò sù ira nga pabbalinan na ta tatole na. Á nonotan naw laguk si Apu Kesu. Aggina yù jinok ni Namarò ta umay ta dabbuno, tapè ipakánnámmu na si Namarò nittam. Á aggina yù sinullà ni Namarò nga kátannangán nga pári, nga ikatalà tam ta mamakkápiá nittam kâ Namarò. ² Á pinalurò ni Apu Kesu yù ngámin nga inipakuá nayù nanullà kuna, ta kunnay sù ngaw Kákay Moyses nga nangikatalakán ta passerbi na sù ira tatole ni Namarò. Ta si Kákay Moyses yù sinullà na ngaw ni Namarò nga nanaron sù ira tatole na, nga nebiláng ta pamiliá na. Á pinalurò ni Kákay Moyses gapay yù ngámin nga inipakuá ni Namarò kuna. ³ Á maráyaw si Kákay Moyses, ngam más maráyaw si Apu Kesu ánnè kuna, nga kunnay ta maráyaw yù nabbalay ánnè sù balay nga pidde na. ⁴ Á ta meyannung ta ngámin nga katággitádday nga balay, ammu tam ta aijan yù tolay nga nabbalay kuna. Á si Namarò galá yù namarò ta ngámin nga egga.

⁵ Á nangikatalakán si Moyses, nga napiá yù passerbi na kâ Namarò, ta pinalurò na yù ngámin nga inipakuá ni Namarò kuna, megapu sù panaron na sù ira kábulun na nga

† 2:8 Salmo 8:4-6 ‡ 2:12 Salmo 22:22

nebiláng nga pamiliá ni Namarò. Á inipakánnámmu na nira yù meyannung sù ipalappá ni Namarò noka. ⁶ Ngam si Apu Kesu Kiristu yù Anâ ni Namarò nga pangikatalakán na nga mammaguray sù ira tatole na nga mebiláng ta ánâ na. Á sittam yù ira ánâ na, nu napasigaggá yù ángngikatalà tam kâ Apu Kesu ána magayáyá ittam megapu sù pagiddanáma tam ta mesipá ittam kâ Namarò.

Pappalánan na ittam ni Namarò

⁷ Á gapu ta tatole na ittam ni Namarò nu napasigaggá yù ángngikatalà tam, nonopat tam laguk yù inipetúrâ nayù Mangilin nga Ikararuá. Ta kinagi na,

“Á nu ággawo yù pakaginná naw sù bilin ni Namarò,

⁸ arán naw laguk ikikkítulán yù ipakánnámmu na nikayu.

Arán naw potuán si Namarò nga kunnay sù ira ngaw naggaká nikayu,
nga namotu kâ Namarò sù keggá ra ta kalállammatán.”

⁹ Á kinagi ni Namarò,

“Mássiki nu nasingad da yù pinagaddátu ta appátapulu nga dagun sù keggá ra ta kalállammatán,

á pinotuád dangà áddè ta arák ku ira kinalurâ megapu sù akka-akkuád da.*

¹⁰ Á yáyù nga napporayá ngaw nira, á kinagi,

‘Manaki yawe ira tatolay nga tumututtul níkan, á ari ira matudduán.’

¹¹ Á gapu ta papporè nira, yáyù nga sinistíguák ku ta kuruk yù kinagi nira:

‘Arát takayu bulubugá patallungan sù pamagibannagák ku nakuan nikayu,’[†] kun ni Namarò.

¹² Á wáwwagi ta ángnguruk tam, magimuguk kayu laguk nga katággítádday, ta pasikkálan na yù nonò na, marakè aijan yù narakè nga nonò na, nga manaki nga manguruk ána mekátuay kâ Namarò nga matotolay. ¹³ Á makkakátabarang kayu laguk ta kággággaw nga kagian naw ta “ággawo,” nga keggá na paga nayù awayyá naw nga manguruk, tapè mapasigaggá yù ángngikatalà naw, á awán nikayu yù melogó, nga mataggá yù ulu na megapu sù liwiliwá na. ¹⁴ Ta mesipá ittam kâ Apu Kesu Kiristu nu mapasigaggá yù ángngikatalà tam kuna ta áddè ta áddè, nga kunnay sù kapámmegapu tam nga mangikatalà kuna. ¹⁵ Á yáyù kebalinán nayù dán nga netúrâ nga kunnaiw,

“Á nu ággawo yù pakaginná naw sù bilin ni Namarò,

arán naw ikikkítulán yù ipakánnámmu na nikayu.

Arán naw potuán si Namarò nga kunnay sù ira ngaw naggaká nikayu,
nga namotu kâ Namarò sù keggá ra ta kalállammatán.”

¹⁶ Á asinni panò yù ira ngaw nga namotu kâ Namarò, mássiki nu naginná ra yù bilin na? Ari panò yù ira galá nga inipáno na ngaw ni Kákay Moyses ta Egipto? Aggira gemma!

¹⁷ Aggira yù napporayán ni Namarò ta appátapulu nga dagun megapu sù liwiliwá da, á natay ira ta kalállammatán. ¹⁸ Á asinni yù ira nga nakkagián ni Namarò ta arán na ira bulubugá patallungan sù napiá nga lugár nga iyawá na nakuan nira, nga pagibannagád da, nu ari galá yù ira namotu kuna? ¹⁹ Á yáyù nga kánnámmuát tam laguk ta arán na ira inisipá ni Namarò sù napiá nga lugár nga pinarán na nga pagibannagád da nakuan, gapu ta ari ira nanguruk kuna.

4

Yù Pamagibannagán ni Namarò sù ira Tatole na

¹ Á kunangan iyalawá ni Namarò nittam yù awayyá tam nga mesipá sù initabbá na ngaw, nga dán nga naporán nga pamagibannagán na ta tatolay. Magimuguk ittam laguk, tapè arát tam párigán yù ngaw ira nga ari nanguruk, marakè arán na ittam gapay patallungan sù pamagibannagán na nittam. Á yáyù nga tángngagat tam laguk yù napiá nga dámak, tapè mesipá ittam sù initabbá na. ² Ta nelayalayákin nittam gapay yù napiá nga dámak, nga kunnay sù nelayalayá ngaw nira, ngam awán ta nammakapiád da sù bilin ni Apu, gapu ta arád da kinuruk. ³ Á yáyù nga arán na ira pinatallung ni Namarò sù pamagibannagán na nira. Ngam sittam nga manguruk yù isipá ni Namarò sù pamagibannagán na nga pinarán na megapu nittam. Ta kinagi na ngaw ni Namarò, nga kun na,

“Á gapu ta papporè nira, yáyù nga sinistíguák ku ta kuruk yù kinagi nira:

‘Arát takayu bulubugá patallungan sù pamagibannagák ku sù ira tatolè.’ ”

* 3:9 Bibbiram yù meyannung sù kingnguá ra, Exodo 17:1-7, Numero 14:1-13 † 3:11 Salmò 95:7-11

Á kunnian yù kinagi ni Namarò, mássiki nu dán nga naparán yù pamagibannagán na sù ira tatole na áddè ngaw kapáparò na ta dabbuno. ⁴ Á aijan yù dán nga netúrâ nga kunniaw: “Á nagibannák si Namarò sù mekapitu nga ággaw, gapu ta nabalinin yù ngámin nga pinarò na.”*

⁵ Á mássiki nu dán nga naparán yù pamagibannagán ni Namarò ta tatolay, á kinagi na yù kunniaw,

“Arát takayu bulubugá patallungan sù pamagibannagák ku sù ira tatolè,” kun na.

⁶ Á yáyù nga ammu tam ta naparán lâ paga kunangan yù pamagibannagán ni Namarò sù ira nga manguruk, gapu ta yù ira ngaw nga nakaginná sù napiá nga dámak, arán na ira pinatallung ni Namarò sù pamagibannagán na nira, gapu ta pinotuád da. ⁷ Á yáyù nga sinullá ni Namarò yù tanakuán nga ággaw, nga iningágan na ta “ággawo,” kun na kâ Patul Dabid, nga awayyá nayù ira tatolay nga mesipá sù ira tatolay nga pagibannagan na. Á ammu tam yaw, ta aru yù dagun nga napasá áddè ngaw pangitarátu na kári Kákay Moyses ta áddè ta keggá ni Patul Dabid, á inipetúrâ ni Namarò kâ Patul Dabid yù kinagi na, nga kunniaw,

“Á nu ággawo yù pakaginná naw sù bilin ni Namarò,

arán naw ikikkítulán yù ipakánnámmu na nikayu,” kun ni Namarò.

⁸ Á gapu ta natay ta kalállammátán yù ira ngaw taga Israel nga ari nanguruk kâ Namarò, á si Josiuwa yù táli ni Moyses, nga nangiyángay sù ira ginaká ra ta lugár na Kaynan. Á nu Kaynan nakuan yù lugár nga inubobuk ni Namarò, á arán na nakuan sinullá yù tanakuán nga ággaw nga pangisipá na ta tatolay sù pamagibannagán na. Ngam ari lâ Kaynan yù pamagibannagán ni Namarò nga inubobuk na. ⁹ Á yáyù nga iddanamát tam lâ paga yù pamagibannák ni Namarò nittam nga tatole na, nga kunnay sù ngaw pagibannák na ta kabalin na namarò ta dabbuno, ta pinatukká na yù pattarabáku na sù mekapitu nga ággaw.

¹⁰ Á dattál nayù ággaw nga pamagibannák ni Namarò nittam, á sittam ngámin nga mesipá kuna, mattukká ittam nga mattarabáku gapay ta kunnay kâ Namarò ta kabalin na namarò.

¹¹ Á gapu ta iyalawá ni Namarò yù pamagibannagán na nittam, nga kunnay ta pangiyalawá na ngaw nira, ngam arád da nálá, á yáyù nga ipe tam laguk yù urá tam nga mangupù ta panguruk tam sù ubobuk ni Namarò, tapè ari ittam mepárik sù ira ngaw nga ari nakatallung sù pamagibannagán ni Namarò gapu ta pamotu ra kuna. ¹² Ta manotolay nga makáwayyá yù ubobuk ni Namarò, nga meyarík ta bayuneté nga kataramán, nga duá yù ngárak na. Ta makatáppù yù bayuneté ta baggi na tolay. Á kunnian gapay yù keyarigán nayù ubobuk ni Namarò, ta tappútan nayù bilin ni Namarò yù nonò tam ána yù ure tam, á mepalappá yù ngámin nga nonopat tam nga karagatát tam ána talákkurugat tam, nu napiá onu narákè. ¹³ Á awán bulubugá ta pinarò ni Namarò nga makatuttù kuna, á awán ta melímak kuna, ta malappá yù ngámin nga pinarò na, á ammu na ngámin yù nonopat tam ána masingan na yù ngámin nga akkuát tam. Á aggina sangaw yù pakkagiát tam sù ngámin nga kingnguá tam.

Si Apu Kesu yù Pári tam nga Mamakkápiá nittam kâ Namarò

¹⁴ Á si Apu Kesu Kiristu nga Anâ ni Namarò yù kátannagán nga pári nga mamakkápiá nittam kâ Namarò. Á minayin ta lángi ta gián ni Namarò. Á yáyù nga ipasigaggá tam laguk yù ángngikatalá tam kâ Apu Kesu ána uputat tam nga ipakánnámmu sù ira kábulut tam. ¹⁵ Ta yawe kátannagán nga pári yù pannakabaggi tam ta arubáng ni Namarò. Á ammu na ittam ikállá, gapu ta naparubán na yù ággiát tam nga tatolay. Á ammu na gemma yù pakkapiyát tam. Ta iniparubá ni Satanas yù ngámin nga makkakerumá nga pamalliwá na nakuan kâ Apu Kesu, nga kunnay ta pamarubá na nittam. Ngam si Apu Kesu, ari bulubugá nalliawá.

¹⁶ Á gapu ta aijanin si Apu Kesu ta gián ni Namarò nga mamakkápiá nittam kâ Namarò, á mappelò ittam laguk nga makimállá kâ Namarò, tapè ikákkállá na ittam ána abbágán na ittam ta meyannung ta ngámin nga máwák tam ána jigá tam.

5

¹ Á ngámin nga kátannagán nga pári na Kudío nga sinullá ni Namarò, natullá ira tapè alawatad da yù iyawá nayù ira tatolay nga ayám, nga iyátáng da ta pannakabaggi nayù ira kábulut da ta arubáng ni Namarò, tapè pakomán ni Namarò ira ta liwiliwá da. ² Á gapu ta tolay lá yù pári, nga aijan gapay yù pakkapiyán na, á yáyù nga ammu na mangikállá sù ira kábulun na nga tatolay nga nakaliwá kâ Namarò, ta arád da ammu ngámin yù pakaliwatád

* 4:4 Genesis 2:2

da. ³ Á gapu ta makaliwâ gapay yù pári, máwák na mangiyátáng gapay kâ Namarò megapu sù baggi na, pángè na mangiyátáng megapu sù ira kábulun na nga tatolay.

⁴ Á ta meyanung sù kátannangán nga pári, awán gemma ta tolay nga massippil sù pakáwayyá na ána karáyo na. Ngam si Namarò galá yù manullà ta tolay ta kátannangán nga pári, nga kunnay sù panullà na ngaw kâ Aron. ⁵ Á kunnian gapay kâ Apu Kesu Kiristu. Arán na sinippil yù pakáwayyá ána karáyo nayù kátannangán nga pári. Si Namarò yù nanullà kuna ta kátannangán nga pári. Á kinagi ni Namarò kuna, “Sikaw yù Aná ku,

á ta ággawo ipakánammukin ta sikán yù Yámam,”* kun na.

⁶ Á aijan neturá paga yù kinagi ni Namarò sù Aná na,

“Á sikaw yù pári ta áddè ta áddè,

nga kunnay sù kapári nayù ngaw Patul Melkisidek nga ari bulubugá mapatalián.”†

⁷ Á keggá ni Apu Kesu ta dabbuno, nakimállà kâ Namarò, á nagaráyan ána nakkulé, ta mássiki nu matay, si Namarò yù makáwayyá nga mangiyígù kuna. Á gapu ta pakimoray ni Apu Kesu kâ Namarò, á yáyù nga gininná ni Namarò yù ipakimállà na. ⁸ Á mássiki nu Aná ni Namarò si Apu Kesu, ginigiámmu na yù kebalinán nayù panguruk na kâ Namarò megapu sù pangiyattam na ta jigá. ⁹ Á gapu ta pinalurò ni Apu Kesu yù ngámin nga inipakuá ni Namarò kuna, ána awán bulubugá ta liwá na, nabbalin ta pareku nga mangiyígù sù ira ngámin nga tatolay nga manguruk kuna, tapè mesipá ira sù áttolè na nga mannanáyun. ¹⁰ Á napalurò yian gapu ta sinullà ni Namarò ta kotunán nga pári, nga kunnay sù ngaw Patul Melkisidek.

Arát tam Likuránán yù Ángngikatalà tam kâ Apu

¹¹ Á aru paga yù ikáyá ku nga ipakánammukin nikayu nga meyanung sù paggittád di Melkisidek kâ Apu Kesu, ngam marigá nga mebukalán nikayu, ta nabbalin kayin nga kunnay ta kitul. ¹² Á napiá nakuan nu sikayu ngin yù mangituddu sù ira kábulun naw, ta nabayák kayin nga manguruk. Ngam máwák naw má nga mebukalán nikayu yù napopolu ngaw nga netuddu nikayu, nga ubobuk ni Namarò. Á yáyù nga kunnay kayu ta abbing nga massusu lá paga, nga ari paga makakán. ¹³ Á yù ira nga kunnay ta massusu lá paga, arád da ammu mappili sù napiá ána arád da kánammuan yù kebalinán nayù bilin ni Namarò. ¹⁴ Ngam yù tolay nga meyárik sù makakán, tulluá megapu sù panguruk na, á kánammuan na yù monak nga metuddu kuna, gapu ta ipe na yù urá na nga mappili sù napiá ána mangipuerá sù narákè.

6

Yù Talluá nayù ira Manguruk kâ Namarò

¹ Á gapu ta naggigiámmu ittamin sù olu nga netuddu nga meyanung sù panguruk tam kâ Apu Kesu Kiristu, gigiámmuat tam laguk yù ngámin nga meyanung sù pakáwayyá na, tapè tulluá yù nonò tam. Arát tam laguk itotoli nga gigiámmuan yù ammu tamin nga netuddu nga meyanung ta pabbabáwi tam ána pangikatalà tam kâ Apu, ána yù máwák tam nga tukkatan yù akka-akkuát tam nga awán ta serbi na. ² Á nánnammuat tamin yù netuddu nga meyanung ta pakirigù tam, nga panákkilalán ta napakarenuánin yù nonò tam. Á ammu tamin yù netuddu nga meyanung ta pangipotun na tolay ta limá na sù ulu nayù tolay nga sinullà ni Namarò, tapè ipakimállà na kâ Namarò ta abbágán na ta passerbi na kuna. Á ammu tamin yù netuddu nga meyanung sù pamaginnanole ni Namarò sù ira námmatay noka, ána yù pamanunnù na sù ira tatolay ána pamagikáru na sù ira mamotu kuna ta áddè ta áddè. ³ Á yáyù nga gigiámmuat tam laguk yù ngámin nga bilin ni Namarò, nu anugutan ni Namarò, tapè tulluá yù ángguruk tam ta kunnay ta ure na.

⁴ Á yù ira tatolay nga nakaparubá sù allà ni Namarò nira, nu likuránád da yù ángngikatalà da kuna, ari ira bulubugá mapabbabáwi nga mapatoli kuna. Ta naparubád den yù ángngikállà ni Namarò nira ta pakaginá ra sù napiá nga dákak, á nesipá ira gapay sù ángngabbák nayù Mangilin nga Ikararuá na. ⁵ Á naparubád da gapay yù piá nayù bilin ni Namarò ána yù ámmagaddátu na nga kunnay ta ipasingan na gapay noka nu duttál yù pagáddekan nga ággaw ána yù bagu nga ággaw. ⁶ Á gapu ta pinarubád da ngámin dannian ána ammu ra yù pakáwayyá ni Apu Namarò, á nu likuránád da yù ángngikatalà da kâ Apu Kesu, á ari iren mapabbabáwi ta liwá da, á ari iren mapatoli ta pangikatalà da kuna, gapu

* 5:5 Salmo 2:7; Keburu 1:5 † 5:6 Salmo 110:4

ta inipasiránád da yù Aná ni Namarò ána inipeluddè da ta arubáng nayù ira tatolay. Á ta kunnian, kunnay ta pidduád da nga ipátá ta kurù yù Aná ni Namarò.

⁷ Á ta ángngarigán, nu aijan yù napiá nga ákkomanán nga moranán, á mattubbu yù nemulá kuna ána mabbungá ta napiá megapu sù allà ni Namarò kuna, á magayáyá yù makáddabbun megapu sù málá na. Á kunnian yù keyarigán nayù tolay nga napasigaggá yù ángngikatalà na kâ Namarò, á bálatan na gapay ni Namarò ta napiá. ⁸ Á ta ángngarigán, nu málá na lâ nayù makáddabbun yù makkakerumá nga sí, á tuggian na sangaw. Á kunnian gapay sù ira tatolay nga arád da akkuán yù ikáyá ni Namarò, ta meyarík ira ta kasisítán, á yá lâ palabbetád da yù impiernu, sangaw nu ukuman ni Namarò ira.

⁹ Á wáwwagi nga iddukak ku, inubobuk ku yù pangukum ni Namarò sù ira nga mangngúá ta narákè. Ngam ta meyannung nikayu, ammu gemma ta awán bulubugá ta mesimmu nikayu nga kunnay ta katuggi nayù kasisítán, gapu ta ikatalà nawin si Apu Kesu ta mangiyígú nikayu, á palurotan naw yù napiá nga ipakuá ni Namarò nikayu megapu sù panguruk naw kuna. ¹⁰ Ta pareku nga matunung si Namarò, á kemámmatán na yù napiá nga akkuán naw. Á ammu na yù ayá naw kuna, ta ipasingan naw paga megapu sù ángngiddù naw sù ira kábulun naw nga manguruk kâ Apu. ¹¹ Á karagatám mi ta talákkurugan naw nga uputan yù napiá nga akkuán naw áddè ta pattoli ni Apu Kesu, tapè mapalurò yù ngámin nga iddanamát tam. ¹² Ari kayu laguk malurá sù ángnguruk naw kâ Apu. Párigán naw galá yù ira nga napasigaggá yù ángngikatalà da. Ta sittam nga napasigaggá yù ángngikatalà na yù iddán ni Namarò sù initabbá na.

Kuruk nga Mapalurò yù Initabbá ni Namarò

¹³ Á makáwayyá si Namarò nga mamalurò sù initabbá na. Á aijan yù initabbá na kâ Kákay Abrakam sù ngaw nga nabayágin. Á gapu ta awán ta tanakuán nga makáwayyá ánnè kâ Namarò, nga massistigu sù kinagi na, á yáyù nga sinistígúan na galá ni Namarò lápay ta kuruk yù kinagi na kâ Kákay Abrakam. ¹⁴ Á kinagi na, “Á yawe yù itabbá nikaw. Pagayáyatata taka megapu sù aru nga iyawá ku nikaw nga pammakapiám mu, á pagarauak ku noka yù ira ginakám,”* kun ni Namarò kuna. ¹⁵ Á gapu ta nagattam nga nagiddak si Kákay Abrakam, nga napasigaggá yù pangikatalà na kâ Namarò, á nálá ni Abrakam yù initabbá ni Namarò kuna.

¹⁶ Á aijan yù kustombare na tolay nga abbúnan na yù ngágan ni Apu ta pamakuruk na sù kagian na. Á kagian na, “Si Apu Namarò yù makasistigu ta kuruk yù kagiak ku,” kun na. Á ta kunnian, patukkatan na yù pakkaká-ubobuk da. ¹⁷ Á gapu ta inikáyá ni Namarò nga ipakánnámmu ta kukurugán nga arán na bulubugá patalián yù sinalákkuruk na, á sinuttul na yù kustombare na tolay nga mamakuruk sù initabbá na, ta nassistígu si Namarò sù ngaw ira nga nangitabbán na. ¹⁸ Á yáyù nga aijan yù duá nga pangurugát tam nga ari bulubugá moli, yù pangitabbá ni Namarò ána yù passistígu na, ta ari bulubugá massiri si Namarò. Á sittam nga nakiyígú kuna, dudduáran na ittam ta ari ittam mabbábáng, ngam mapasigaggá ittam laguk nga magiddanáma sù pinarán na megapu nittam. ¹⁹ Á gapu ta napasigaggá yù ággiddanáma tam ta kesipá tam kâ Namarò, napaláddá yù ággiát tam kuna. Ta si Apu Kesu yù pangikatalakát tam, nga minayin ta lángi sù mangilin nga gián ni Namarò. ²⁰ Aggina yù minay ta lángi nga napolu ánnè nittam. Ta aggina yù kotunán nga pári nga pannakabaggi tam, nga mamakápiá nittam kâ Namarò. Á kunnay ta kapári ni Patul Melkisidek yù kapári ni Apu Kesu, nga ari bulubugá mapatalián ta áddè ta áddè.

7

Si Patul Melkisidek, nga Pári

¹ Á yù ngaw Patul Melkisidek yù patul nga nammaguray ta ili na Salem, nga pári gapay nga pannakabaggi nayù ira tatolay ta arubáng ni Namarò nga Kotunán na ngámin. Á panoli ni Kákay Abrakam ta gián na ta kabalin na nangappù ta appá nga patul nga malussaw kuna, á en na jinápun ni Patul Melkisidek. Á namindision kâ Kákay Abrakam, ta inipakimállá na yù pangikállá ni Namarò kuna. ² Á iniyawá na laguk ni Kákay Abrakam kâ Patul Melkisidek yù mekamapulu sù ngámin nga iná na. Á yù kebalinán nayù ngágan ni Patul Melkisidek yù patul nga matunung, á matunung yù ngámin nga kingngúá na. Á yù páppatulán na yù dabbun na Salem. Á yù kebalinán na Salem yù lugár nga pagimammátán. Á yáyù nga

* **6:14** Genesis 22:15-17. Ta olu nga pangitabbá ni Namarò kâ Abrakam (Genesis 12:1-4), napasá 25 nga dagun lage na keyaná ni Isak (Genesis 21:2-5). Á napasá má 60 nga dagun lage na keyaná nayù ira ápu na, di Eso kâ Akup (Genesis 25:21-26).

neparámak si Patul Melkasidek ta napiá nga patul nga matunung ána mamagimammá.*
 3 Á awán ta nakagi nga meyanung sù ira darakal ni Patul Melkasidek. Awán ta netúrâ nga meyanung sù ira naggaká kuna onu yù ira ginaká na. Á ari bulubugá nánnámmuán yù meyanung sù keyaná na ána pate na. Á yáyù nga maggián si Patul Melkasidek nga kunnay sù Anâ ni Namarò, nga pári ta áddè ta áddè.

4 Nonopat tam laguk yù pakáwayyá ni Patul Melkasidek! Ta si Kákay Abrakam gapay, mássiki nu káke tam ngámin nga Kudío, iniyawá na kâ Patul Melkasidek yù mekamapulu sù ngámin nga inâ na sù ira nakigerrán na. 5 Á yù ira ginaká ni Kákay Abrakam, aijan yù dán nga netúrâ nga tunung nga netuddu nira, ta iyawá da yù mekamapulu sù ngámin nga pakkatole ra. Á yù ira páppári nga ginaká ni Libi yù pangiyawatád da, mássiki nu kakanáyud da ira. 6 Á si Patul Melkasidek, mássiki nu ari gemma ginaká ni Libi, aggina yù pangiyawatán ni Kákay Abrakam sù mekamapulu sù kukuá na. Á si Patul Melkasidek yù namindision, nga nakkiddaw kâ Namarò ta ikákkállá na si Kákay Abrakam, mássiki nu aggina yù nangitabbán ni Namarò. 7 Á ammu tam gemma ta makáwayyá yù mamindision ánnè sù bindisionán na.

8 Á ta meyanung sù ira páppári, nga ginaká nayù ngaw Libi, aggira yù mangalawá sù mekamapulu sù ira kakanáyud da nga Kudío. Á tatolay ira lâ nga matay, nga mapatalián sangaw. Ngam aijan yù netúrâ nga meyanung kâ Patul Melkasidek, ta aggina yù pári nga matotolay ta áddè ta áddè. 9 Á yù ira ngaw páppári nga ginaká ni Libi, inalawá da yù mekamapulu sù ira tatolay. Ngam máyâ ta kagiat tam gapay ta kunnay ta nappagá si Libi sù mekamapulu kâ Patul Melkasidek megapu kâ Kákay Abrakam. 10 Ta apù na ta siku ni Kákay Abrakam si Libi, nga ari paga neyanâ ta panápun nayù káke na kâ Patul Melkasidek. Á kunnay ta aijan si Libi paga ta baggi ni Kákay Abrakam ta pappagá ni Abrakam sù mekamapulu kâ Patul Melkasidek. Á yáyù nga mesipá si Libi sù kingnguá nayù káke na.

Yù Pári nga Kunnay kâ Patul Melkasidek

11 Á sù ngaw nga nabayák, inipetúrâ ni Namarò kâ Kákay Moyses yù tunung na Kudío. Á sinullá ni Namarò yù ira ginaká ni Libi, tapè aggira yù pári. Á si Aron yù olu nga ginaká ni Libi nga pári. Á nonopat tam yaw. Gapu ta ari kukurugán nga mapakkápiá yù ira tatolay kâ Namarò megapu sù kapári nayù ira ngaw ginaká ni Libi, á máwák nga duttál yù tanakuán nga pári, nga kunnay kâ Patul Melkasidek yù kapári na. Á yáyù nga sinalián na ira ni Namarò. 12 Á gapu ta sinalián ni Namarò yù ira páppári nga ginaká ni Libi, máwák gapay nga talián na yù tunung. 13 Á si Apu Kesu yù ubobugak ku, nga táli nayù ira páppári nga ginaká ni Libi. Á awán bulubugá ta pári ngaw nga naggapu sù ira naggaká kâ Apu Kesu, ta tanakuán gemma yù naggaká kuna. 14 Ta ammu tam ta ginaká ni Juda yù Yápu tam. Á si Kákay Moyses, awán bulubugá ta kinagi na nga meyanung ta pári nga naggapu sù ira ginaká ni Juda.

15 Á mepasingan ta pinatalián ni Namarò yù ira páppári nga ginaká ni Libi ána yù dán nga tarátu na gapay nga meyanung sù katunung na tolay, nepatalugáring ta panullá ni Namarò sù tanakuán nga pári nga mannanáyun, nga kunnay kâ Patul Melkasidek yù kapári na. 16 Á ta katullá ni Apu Kesu ta pári, ari negapu sù tunung na Kudío nga meyanung sù ira naggaká kuna, nu ari galá negapu sù pakáwayyá na, ta aggina yù matotolay ta áddè ta áddè. 17 Á aijan yù inipetúrâ ni Namarò nga meyanung kuna nga kunnaiw:
 “Sikaw yù pári ta áddè ta áddè,

nga kunnay sù kapári ni Patul Melkasidek nga ari bulubugá mapatalián.”

18 Á gapu ta awán ta tolay nga makatuppál sù tunung ni Moyses, á awán laguk ta tolay nga meiyù megapu kuna, á awán ta serbi na.† Á yáyù nga kánnámmuát tam laguk ta sinalián ni Namarò yù tunung ni Moyses, 19 gapu ta awán bulubugá ta tolay nga mabbalin ta pareku nga matunung megapu sù panguruk na sù tunung. Ngam aijan laguk yù kapiánán nga ággiát tam, ta más napiá yù iddanamát tam megapu kâ Apu Kesu, ána mapelò itamin kâ Namarò.

20 Á mánnámmuát tam ta más napiá yù kapári ni Apu Kesu, gapu ta panullá ni Namarò kâ Apu Kesu, á inittabbá na kuna ta kukurugán nga mannanáyun yù kapári na. Ngam sù panullá na sù ira páppári nga ginaká ni Libi, awán ta inittabbá na. 21 Á yawe yù inittabbá ni Namarò ta panullá na kâ Apu Kesu, nga kunnay sù dán nga netúrâ nga kunnaiw,
 “Sikán si Apu Namarò, á arák ku bulubugá ibabáwi yù talákkurugak ku. Á sistíguák ku ta kuruk yù kagiak ku,

* 7:2 Genesis 14:18-20 † 7:18 Roma 8:3

‘Sikaw yù pári ta áddè ta áddè.’ ”

²² Á yáyù nga ammu tam ta si Apu Kesu yù namaláddá nga namalurò sù más napiá nga tarátu ni Namarò megapu nittam.

²³ Á aijan paga yù tádday nga kapiánán nayù kapári ni Apu Kesu. Ta mássiki nu aru yù ira ngaw páppári, ngam arád da awayyá nga mopù yù kapári ra, gapu ta matay ira nga mapatalián. ²⁴ Ngam pári si Apu Kesu ta áddè ta áddè, nga ari bulubugá mapatalián, gapu ta aringín bulubugá matay. ²⁵ Á yáyù nga si Apu Kesu yù makáwayyá nga mangiyígù sù ira ngámin nga tumulú nga makipakomá ká Namarò megapu kuna. Ta sigga-inángá si Apu Kesu, nga pári nga matotolay ta áddè ta áddè, nga makimi-imállá ká Namarò megapu sù ira ngámin nga mangikatalá kuna.

²⁶ Á si Apu Kesu yù máwák tam nga pári, nga pannakabaggi tam ta arubáng ni Namarò, gapu ta aggina yù mangilin, nga pareku nga matunung, nga awán bulubugá ta liwá na. Á yáyù nga kukurugán nga nerumá nittam, ta makaliwá ittam, ngam pareku nga napiá lá yù nonò na. Á inipotun ni Namarò si Apu Kesu, tapè aggina yù Kotunán nga meparáyaw ta lángi. ²⁷ Á nerumá gapay sù ira ngaw páppári, ta arán na máwák nga mangiyátáng ta kágággaw. Á yù ira ngaw páppári, máwák da ngaw nga mangiyátáng megapu sù liwá da, lage ra nangiyátáng gapay megapu sù liwá nayù ira tatolay. Ngam si Apu Kesu, gapu ta awán bulubugá ta liwá na, á mittán lá yù pangiyátáng na megapu nittam, tapè mári yù liwá tam nga tatolay. Á arán na máwák nga pidduán yù pangiyátáng na, ta yù baggi na yù iniyátáng na megapu nittam, sù ketapil na ta kurù. ²⁸ Á yù ira ginaká ni Libi nga natullá ta pári megapu sù tunung nayù ngaw Moyses, á tolay ira lá nga nakapi ána nakaliwá. Ngam megapu sù pangitabbá ni Namarò, sinullá na yù Aná na nga naporíán sù tunung ta nabayák, nga namalurò ta ngámin nga ure nayù Yáma na, á nabbalin ta pári nga kapiánán, nga maggián ta áddè ta áddè.

8

Yù Kapiánán nga Tarátu ni Namarò megapu ká Apu Kesu

¹ Á yawe yù kebalinán nayù kinagi, nga aijanin yù kotunán nga pári, nga pannakabaggi tam ká Namarò, nga nepagitubangin ta jiwánán ni Namarò ta lángi, nga mepammaguray ká Namarò nga makáwayyá. ² Á aggina yù pári nga masserbi ká Namarò sù mangilin nga gián na ta lángi, nga kuruk nga bale ni Namarò. Ta yù ngaw bale na nga pakimorayán nayù ira tatolay ká Namarò ta dabbuno, pidde ra lá nayù ira tatolay, nga keyarigán nayù bale ni Namarò ta lángi. Ngam si Namarò nga Yápu tam yù nappadday sù bale na ta lángi.

³ Á yù ira kátannangan nga pári ta dabbuno, natullá ira tapè iyátáng da ká Namarò yù ayám nga iyawá nayù ira kábulud da. Á kunnian gapay ká Apu Kesu, nga kotunán nga pári tam, ta aijan ngaw yù máwák na nga iyátáng. ⁴ Á nu aijan si Apu Kesu paga nakuan ta dabbuno, ari gemma pári, ta aijan yù ira ginaká ni Libi nga natullá ta pári, nga mangiyátáng nakuan ká Namarò sù ayám nga iyawá nayù ira tatolay, ta meyanung sù tunung ni Moyses. ⁵ Á yù bale ni Namarò nga pidde ni Moyses ta kalállammatán, kunnay lá ta alinu nayù egga ta lángi nga inipasingan ni Namarò kuna. Á ta pappadde ni Moyses, kinagi ni Namarò kuna, “Imugurám mu yù áppaddem, tapè pareku nga megittá yù paddayam mu sù inipasingak ku ngin nikaw ta keggám sù puddul,”* kun na. ⁶ Ngam aijanin si Apu Kesu Kiristu sù bale ni Namarò ta lángi, nga mamakkápiá ta tatolay ká Namarò. Á más napiá yù kapári ni Apu Kesu ánnè sù kapári nayù ira Kudio ta dabbuno, ána más napiá gapay yù bagu nga tarátu ni Namarò ánnè sù dán nga tarátu na, megapu sù kapiánán nga initabbá ni Namarò.

⁷ Á ta ánggarigán, nu napalurò nakuan yù ure ni Namarò megapu sù napolu nga tarátu na, á arán na nakuan pinarán yù mekaruá. ⁸ Ngam arán na inikáyá ni Namarò yù kingngikíngnguá nayù ira ngaw tatolay nga siminuttul sù napolu nga tarátu na. Á yáyù nga kinagi ni Namarò,

“Sikán si Namarò, á yawe yù kagiak ku.

Duttál yù tanakuán nga ággaw, á palurotak ku yù bagu nga tarátu sù ira tatolè nga ginaká ni Israel ána yù ira ginaká ni Juda.

⁹ Á ari megittá yù bagu nga tarátu sù ngaw tarátù, nga kinagi sù ira ngaw naggaká nira, ta pangipánò nira ta páppatulán na Egipto.

Ta yù ira ngaw naggaká nira, arád da garè sinuppál yù tarátù nira, á yáyù nga pinaguráyák ku ira,” kun ni Apu Namarò.

¹⁰ “Ngam yawe yù bagu nga tarátù sù ira ginaká ni Israel.

* 8:5 Exodo 25:40

Duttál sangaw yù ággaw, á ipatattam ku ta nonò da yù tunung ku, tapè arád da káttamán. Á síkán laguk yù pakiyápuád da, á aggira gapay yù tatolè.

11 Á ta kesimmu na sangaw, ari iren laguk makkakátuddu.

Awán ta tolay nga makkagi ta kabbulun na, ‘Máwák nga ammu si Apu,’ gapu ta aggira ngámin, ammu rangá, mássiki yù kagukábán áddè sù karakalán.

12 Á ikákkállá ku ira ána pakomák ku yù liwiliwá da.

Á arák kin nonopan yù ngaw kingnguá ra nga narákè.”†

13 Á ta pakkagi ni Namarò ta meyanung sù bagu nga tarátu na, inibiláng na ta napasángin yù ásserbi nayù napolu. Á máringin sangaw yù dánin, nga awán ta passerbián na.

9

Yù Pakimore nayù ira Tatolay ká Namarò ta Keggá nayù Olu nga Tarátu

1 Á sù olu nga tarátu ni Namarò sù ira tatolay, kinagi ni Namarò nira yù taddán na nga meyanung sù pakimore ra kuna. Á inipapadde na gapay nira yù bale na, nga paggagammungád da ta pakimore ra kuna. 2 Á yù tabbi na ayám yù pidde ra ta bale ni Namarò, nga duá yù lágum na. Á yù lágum nga pattallungád da, mangngágan ta Mangilin nga Gián. Á aijan ta lágum yù ánnáddagán na isingan nga pitu yù pangá na, ána yù lamesá nga pangipayyád da ta mangilin nga pán nga iyátáng da ká Namarò.

3 Á yù mekaruá nga lágum, nalipparán ta kortíná nga nakannak, á mangngágan ta yù Kangilinán nga Gián. 4 Á aijan ta Kangilinán nga Gián yù napadday ta buláwán nga ánnuggiád da ta bábbanguk nga meyátáng. Á aijan gapay yù kakon, nga neparakká ta lawán na ána anak na yù buláwán. Á yù mayán nayù kakon yù duá nga dappik nga batu nga aijan netúrá nira yù taddán ni Namarò nga meyanung sù tarátu na. Á aijan gapay sù kakon yù tagukuk ni Aron nga naddon ána yù angáng nga buláwán nga napayyán ta manna, nga kanan nga naggapu ta lángi nga iniyawá na ngaw ni Namarò sù ira tatolay ta keggá ra ta kalállammatán. 5 Á aijan ta utun nayù kallak na kakon yù duá nga sináttolay, nga buláwán, nga nappayá. Aggira yù keyarigán nayù ira maráyaw nga daroban ni Namarò nga mangngágan ta kerubim, nga mepulù ká Namarò, nga panákkilalán ta keggá na tán ni Apu Namarò. Á yù ira sináttolay, napagarubáng ira, á nassonná yù payá da ta utun nayù kallak na kakon nga buláwán, nga pangiyátangán nayù pári ta dága na ayám ta arubáng ni Namarò, tapè pakomán na yù liwiliwá nayù ira tatolay. Á yáyù áddè nayù kagiak ku nga meyanung sù keyarigán na, ta arák ku mebukalán saw yù ngámin nga meyanung karannian.

6 Á ta kabalín nayù ira páppári nga nangiparán ngámin karanniaw, tullung ira ta kággággaw sù olu nga lágum, tapè tuppálad da yù kapári ra. 7 Ngam yù mekaruá nga lágum yù Kangilinán, á yù kátannangán nga pári lá yù makatallung tán, á mittán lá ta tangaragun yù tallung na. Á tallung na, máwák na nga ipulù yù dága na ayám nga iyátáng na ká Namarò megapu sù liwiliwá na ána megapu sù liwiliwá nayù ira tatolay gapay. 8 Á gapu ta ari makatallung yù ira káruán nga pári sù Kangilinán nga Gián, á yáyù nga ipakánnámmu nayù Mangilin nga Ikararuá ta ari paga jimittál yù ággaw nga pakatallung nayù ira tatolay sù Kangilinán nga Gián ni Namarò, gapu ta aijan lá paga yù olu nga pattallungád da, nga lágum nga Mangilin. 9 Á danniaw yù keyarigán nayù ággiát tam, ta mepasingan ta mássiki nu pígiá yù iyawá nayù ira tatolay nga ayám nga meyátáng ká Namarò, ari mári yù liwiliwá da, gapu ta ari mapatunung yù nonò da. 10 Ta yù tunung nga tuppálad da yù meyanung galá ta kanad da ána inumad da ána áppakarenu ra ta baggi ra. Á naggián lá dannian nga tunung nga meyanung sù egga nga masingan, áddè ta dattál nayù bagu nga tarátu.

Yù Dága ni Apu Kesu Kiristu

11 Á jimittálin si Apu Kesu Kiristu, nga kotunán nga pári, á pinalurò na yù ngámin nga meyanung sù bagu nga tarátu ni Namarò. Ta simillung sù kukurugán nga bale ni Namarò, nga arán na pidde na tolay, nga ari saw yù gián na nu ari galá nga aijan ta lángi. 12 Á namittán lá yù tallung ni Apu Kesu sù kuruk nga Kangilinán nga Gián, nga gián ni Namarò ta lángi. Á ari yù dága na kajjing ána báka yù iniyátáng na, nu ari galá yù dága na lápay, nga iniyawá na sù pagikáru na ta liwiliwá tam. Á nári ngin yù liwiliwá tam ta áddè ta áddè megapu sù dága na.

† 8:12 Jeremia 31:31-34

¹³ Á ta meyanung sù olu nga tarátu ni Namarò, nu támmitan nayù ira tatolay yù baggi na tolay onu ayám nga natay, onu tanakuán nga makálirák yù támmitad da, á mebiláng ira ta narapingán, nga ari mepángngá nga makimoray kâ Namarò. Ngam nu iwári na nira nayù pári yù dága na kajjing ána toro ána yù abu na kígaw na báka nga neyátáng, á megapu sù dága na ayám, mebiláng yù ira tatolay ta napakarenuán nga mepángngá nga makimoray kâ Namarò. ¹⁴ Á pappanganá sù dága ni Apu Kesu Kiristu, ta mapakarenuán yù nonò nayù ira tatolay megapu sù dága ni Apu, gapu ta awán bulubugá ta liwá na. Á inítapil na yù baggi na lápay, nga kunnay ta neyátáng kâ Namarò, megapu sù ángngabbák nayù Mangilin nga Ikararuá. Á yáyù nga arát tamin uputan yù kunnay ta iniyátáng da ngaw nayù ira pári, nga ari gemma makári sù liwá na tatolay, gapu ta napakarenuán ittamin ána napatunung yù nonò tam, megapu galá sù dága ni Apu. Á ajanin yù awayyá tam nga masserbi kâ Namarò nga sigga-inángá nga matotolay ta áddè ta áddè.

¹⁵ Á megapu sù pakáwayyá nayù dága ni Apu Kesu Kiristu, aggina yù makáwayyá nga mamaluro sù bagu nga tarátu ni Namarò, tapè mesipà kâ Namarò yù ira tatolay nga agálán na, ána málá da yù mannanáyun nga inítabbá na nira. Ta natay si Apu Kesu, nga nagikáru ta liwiliwá tam, tapè meyiǵù ittam ána arán na ittam pagikaruan ni Namarò megapu sù olu nga tarátu nga pakaliwatát tam.

¹⁶ Á ta ángngarigán, aijan yù tolay nga umay sù abugádu, á ipetúrâ na kuna yù tarátu na, ta nu matayin, á meyawá yù kukuá na sù anâ na. Ngam máwák nga matay yù tolay lage na meyawá yù kukuá na sù anâ na. ¹⁷ Á ari gemma mapatuppál yù tarátu na, nu matolay paga yù tolay. ¹⁸ Á mássiki yù olu nga tarátu ni Namarò, ari mapaluro nu awán ta ayám nga napárti tapè meyátáng yù dága na. ¹⁹ Á yáyù nga kunniaiw yù kingnguá na ngaw ni Kákay Moyses. Binibbik na sù ira tatolay yù ngámin nga taddán ni Namarò nga netúrâ sù tunung na. Á kabalin na nabbibbik, inâ na yù dága na kígaw na báka ána kajjing, nga inikiruk na ta danum. Á inâ na yù pangá na káyu nga kisop nga nababbarán ta dudù na karneru nga nakulorán ta ujojjin, nga iniyusá na ta pangiwári na ta dága sù ira tatolay ána yù libru gapay nga netúratán nayù tunung ni Namarò. ²⁰ Á ta pangiwári ni Moyses sù dága, kinagi na nira, “Yawe dága yù sinniál ta mapaluro yù tarátu ni Namarò nu kurugat tam yù taddán na,”* kun na. ²¹ Á kunnian gapay iniwári na yù dága sù balay nga ákkimorayád da kâ Namarò, ána yù ira ngámin nga aruátan na nga iniyusá ra ta pakimore ra. ²² Á ta meyanung sù tunung ni Namarò, mággè ngámin mapakarenuán megapu ta dága. Á nu awán ta dága nga neyátáng, ari mapakomá yù liwiliwá nayù ira tatolay.

Namittán lâ yù Ketapil ni Apu Kesu nga Keyátáng na megapu nittam

²³ Á yù bale ni Namarò nga aijan ta dabbuno ána yù aruátan na, danniaiw yù meyarík sù kukurugán nga aijan ta lángi. Á máwák nayù ngaw pári nga mangiyátáng ta dága na ayám, tapè mapakarenuán ána mangilin danniaiw nga iyusá nayù ira tatolay ta pakimore ra. Ngam más napiá yù gián ni Namarò ta lángi ána yù aruátan na, á yáyù nga más napiá gapay yù neyátáng sù gián na ta lángi. ²⁴ Á pangiyátáng ni Apu Kesu Kiristu, arán na sillungán yù pidde na tolay, nga meyarík sù aijan ta lángi. Ngam sillungán na galá yù kukurugán nga gián ni Namarò ta lángi. Á maggiánin ta lángi nga makimi-imállâ kâ Namarò megapu nittam. ²⁵ Á yù kátannangan nga pári nga Kudio, tullung sù Kangilinán nga Gián ta kádaragun nga mangipulú ta dága na ayám nga iyátáng na. Ngam si Apu Kesu, ari name-arú yù pangiyátáng na ta baggi na. ²⁶ Ta nu name-arú nakuan yù pangiyátáng ni Apu Kesu, á ari nopù nakuan yù pagattam na ta pate na áddè ngaw sù kaparò na dabbuno ta áddè kunangan. Ngam namittán lâ yù keyaná ni Apu Kesu ta tolay ta pamegapu nayù maporián nga ággaw, á namittán lâ yù pangitapil na sù baggi na, nga neyátáng megapu nittam, tapè pakarenuán na ittam ána mári yù liwiliwá tam. ²⁷ Á sittam ngámin nga tatolay, máwák nga mamittán ittam nga matay sangaw. Á sangaw nu duttál yù ággaw nga pamanunnú ni Namarò sù ira tatolay, á panunnután na ittam laguk. ²⁸ Á kunnian gapay kâ Apu Kesu Kiristu, nga namittán lâ nga natay, mássiki awán ta liwá na, ta netapil yù baggi na megapu nittam, ta pagikáru na ta liwiliwá tam ngámin nga tatolay. Á duttál má sangaw ta dabbuno si Apu Kesu, nga aringin matay nga magikáru ta liwá tam, nu ari galá umay nga mangiyǵù nittam nga magiddi-iddak kuna, tapè mepaggián ittam kuna ta áddè ta áddè.

10

Yù Pamakkápiá ni Apu Kesu nittam kâ Namarò

* 9:20 Exodo 24:8

¹ Á yù ngámin nga kustumbare na pári nga Kudío nga meyanung sù tunung nga inipetúrâ na ngaw ni Namarò kâ Moyses, danniwâ yù keyarigán nayù kukurugán nga kapári ni Apu Kesu Kiristu. Á yù iniyátáng na pári nga Kudío yù keyarigán nayù baggi ni Apu Kesu nga neyátáng megapu nittam. Á yáyù nga mássiki nu mangiyátáng yù pári ta kádaragun, ari bulubugá mapatunung yù nonò nayù ira tatolay megapu sù pangiyátáng na. ² Á ta ángngarigán, nu aijan nakuan yù ira makimoray nga kukurugán nakuan nga náringin yù liwiliwâ da áña napakarenuán yù nonò da, á ari iren nakuan mappasirán, á ammu ra ta arád da máwák nga uputan yù pangiyátáng da ta kádaragun. ³ Ngam ari mári yù liwiliwâ da megapu sù iniyátáng da. Yá lâ serbi na ta ipanonò na sù ira tatolay ta kádaragun ta aijan paga yù liwiliwâ da. ⁴ Ta ari bulubugá mári yù liwâ na tolay megapu sù dága na toro áña kajjing.

⁵ Á yáyù nga kinagi ni Apu Kesu Kiristu sù Yáma na, sù ngaw lage na páno ta lángi nga umay ta dabbuno, nga kun na,

“Arám mu gemma ikáyâ yù dága na ayám nga meyawâ nga meyátáng nikaw, á yáyù nga iniparánám mà ta baggi.

⁶ Ta ari ka magayáyâ sù meyátáng nga baggi na ayám nga matuggi áña yù ayám nga meyátáng megapu sù liwiliwâ na tatolay.

⁷ Á yáyù nga kagiak ku nikaw ta aijanâ saw, Apu Namarò, tapè palurotak ku yù ipakuám nikán,

nga kunnay ta netúrâ sù bilim mu nga meyanung nikán.”*

⁸ Á pakkagi ni Apu Kesu karannian, yá napolu nga kinagi na, ta arán na ikáyâ ni Namarò yù makkakerumá nga meyawâ áña meyátáng kuna, á ari magayáyâ sù meyátáng nga matuggi áña yù ayám nga meyátáng megapu ta liwâ nayù ira tatolay, mássiki nu dannian yù iyátáng nayù ira tatolay tapè tuppálad da yù metuddu megapu sù tunung. ⁹ Á kabalin na nakkagi karannian, kinagi na laguk kâ Namarò, “Aijanâ saw, tapè palurotak ku yù ipakuám nikán,” kun na. Á yáyù kinagi na, gapu ta patalián ni Namarò yù pangiyátáng nayù ira tatolay ta ayám, á yù keyátáng ni Apu Kesu yù táli na. ¹⁰ Á gapu ta pinalurò ni Apu Kesu Kiristu yù ngámin nga ure ni Namarò, á yáyù nga napakarenuán ittamin ta liwiliwâ tam, megapu sù pangiyátáng ni Apu Kesu sù baggi na, nga mittán lâ ta áddè ta áddè.

¹¹ Á yù ira páppári nga Kudío, palurotak da yù pakimore ra kâ Namarò ta kággággaw, á mame-aru yù pangiyátáng da, ngam ari bulubugá makári ta liwâ. ¹² Ngam si Apu Kesu Kiristu, iniyátáng na yù baggi na, nga namittán lâ, nga mangari ta liwiliwâ tam ngámin ta áddè ta áddè. Á kabalin na nangiyátáng, nagitubang ta jiwánán ni Namarò ta lángi, nga ággitubangan nayù kotunán nga maráyaw. ¹³ Á maggián ta lángi nga magiddak áddè ta arán na ipeguppè ni Namarò kuna yù ira malussaw kuna. ¹⁴ Ta megapu sù mittán lâ nga pangiyátáng ni Apu Kesu, náringin yù liwiliwâ nayù ira ngámin nga mangikatalâ kuna áña pinakarenuán na yù nonò da, á pinabbalin na ira ta napiá áña mangilin nga tatole na ta áddè ta áddè.

¹⁵ Á ipakánnámmu nayù Mangilin nga Ikararuá ta kuruk yian, ta inipetúrâ na ngaw yù kinagi ni Namarò nga kunnaw:

¹⁶ “Yawe yù tarátù sù ira toloé sangaw nu duttál yù ággo na.

Ipatattam ku ta putu ra yù tunung ku.

Ipatalattâ ku ta nonò da yù itaddák ku, tapè arád da káttamán,” kun na.

¹⁷ Á kinagi na gapay,

“Á arák kin bulubugá nonopan yù liwiliwâ da áña yù narákè nga kingnguá ra.”

¹⁸ Ta napakomángin yù ira ngámin nga liwiliwâ da, á yáyù nga awánin ta máwák da nga meyátáng megapu ta liwiliwâ da.

Si Apu Kesu yù Kátannánnan nga Pári nga Masserbi kâ Namarò megapu nittam

¹⁹ Á wáwwagi nga mangikatalâ kâ Apu Kesu, aijan yù awayyá tam nga mappèlò nga makimállâ áña makimoray kâ Namarò, nga kunnay ta makatallung sù kukurugán nga Kangilínán nga Glán na, megapu sù dága ni Apu Kesu, nga neyátáng tapè mári yù liwiliwâ tam. ²⁰ Á yáyù pinalurò ni Apu Kesu ta pangitapil na sù baggi na áña paginnanole na, á kunnay ta binukatán na yù bagu nga áttallungát tam ta glán ni Namarò megapu sù pangiyátáng na sù baggi na. Á yù keyarigán nayù baggi ni Apu Kesu yù kortiná nga nelippak

* 10:7 Salmo 40:6-8

sù ira tatolay sù Kangilinán nga Gián ta bale ni Namarò, nga napsil sù pate ni Apu Kesu.† Á gapu ta matolayin, simillung sù gián ni Namarò megapu nittam.

21 Á ajanin si Apu Kesu nga kotunán nga pári nga namakkápiá nittam kê Namarò, nga mammaguray nittam nga tatole na. 22 Á yáyù nga mappèlò ittam laguk nga makimoray kê Namarò, á ari ittam mabbábáng. Á ipasigaggá tam yù ángngikatalà tam kê Namarò, ta mapálappawánin yù nonò tam, gapu ta napakomá ngin yù liwiliwá tam megapu sù dága ni Apu Kesu. Á napakarenuán ittamin nga kun na narigù ta nalitáw nga danum.

23 Á ipasigaggá tam yù pagiddanáma tam sù kesipá tam kê Namarò ta áddè ta áddè. Ta mekatalá si Namarò ta mamalurò sù inittabbá na nittam. 24 Á makkakárudduák ittam nga makkaká-iddù áнна malláppá ittam nga mamalurò sù napiá nga ipakuá ni Namarò nittam.

25 Á arát tam tukkatan yù paggagammung tam nga makimoray kê Namarò, nga kunnay sù akkuán nayù ira káruán, nu ari galá makkakápanonò ittam sù napiá nga ággangguá tam, tapè mepasigaggá yù ángnguruk tam, nepatalugáring ta ammu tam ta mabikin nga duttál yù ággaw nga pattoli ni Apu Kesu.

26 Á ta ángngarigán nu aijan yù tolay nga nánámmuán na yù kuruk nga meyannung kê Apu Kesu, ngam talákkurugan na galá nga akkuán yù narákè, á awánin laguk ta tanakuán nga meyátáng nga makári nakuan ta liwá na. 27 Ngam yá lâ iddanamán na yù makánnanássing nga pangukum ni Namarò, á labbetán nayù tolay yù ornu, nga katuggián nayù ira nga malussaw kê Apu. 28 Á ta meyannung sù tunung ni Namarò nga inipetúrá na kê Moyses, nu aijan yù tolay nga nalliwá, áнна aijan yù duá onu tallu nga nassistigu ta kuruk nga nalliwá, á papatáyad da, nga awán ta mangikállà kuna.‡ 29 Á nu kunnian yù pamagikáru ra sù tolay nga ari nanguruk sù tunung ni Moyses, á pappanganá lâ sangaw sù pamagikáru ni Namarò sù tolay nga mangiluddè kê Apu Kesu, nga Aná ni Namarò! Ta negapu ta pangiluddè na kê Apu Kesu, pakkakagián na yù Mangilin nga Ikararuá ni Namarò nga mangikállà nittam, áнна ibiláng na ta awán ta serbi nayù dága ni Apu Kesu, nga neyátáng sù pate na tapè mapaluro yù bagu nga tarátu ni Namarò, áнна mapakarenuán ittam. Á merallá gemma yù pamagikáru ni Namarò kuna. 30 Ta ammu tam si Namarò, áнна ammu tam ta palurotan na yawe nga kinagi na: “Sikán yù mabbála sù ira nga mangunguá ta narákè. Á iyawá ku nira yù mepángngá nga bálà nayù liwiliwá da,” kun na. Á aijan gapay yù dán nga netúrá nga kunniaw, “Si Apu Namarò yù mamanunnù sù ira tatole na.”§ 31 Á si Namarò yù matotolay ta áddè ta áddè, á makánnanássing yù pamagikáru na sù ira makaliwá.

32 Á nonotan naw laguk yù ággián naw ngaw ta kapámmegapu naw nga manguruk kê Apu, nga nanawagánin yù nonò naw. Á mássiki nu jinigirigá da kayu nayù ira nga ari nanguruk, inattamán naw ngámin, áнна napasigaggá yù ángngikatalá naw kê Apu. 33 Á nu káruán, nakkakagiád da kayu nayù ira ari nanguruk, áнна kingngikingngúá ra kayu ta arubáng na aru nga tatolay. Á nu káruán, jinigirigá da gapay yù ira kábulun naw, á nabbaluntáriu kayu nga nekanakaná nira negapu sù pangikállà naw nira. 34 Ta inikállà naw yù ira nga nebáluk megapu sù panguruk da kê Apu. Á mássiki nu ginubá nayù ira malussaw yù kukuá naw, á pinaguráyán naw, ta nagayáyá kayu paga, gapu ta ammu naw ta aijan yù kuruk nga napiá nga kukuá naw nga maggián ta lángi ta áddè ta áddè, nga ari bulubugá magubá.

35 Á gapu ta kunnian yù pagattam naw, arán nawin laguk pallikuránán yù pangikatalá naw kê Apu, ta aru nga nakástá yù iyawá ni Apu nga bálà nayù ira nga napasigaggá yù ángngikatalá da kuna. 36 Á máwák nga mapasigaggá yù ángngikatalá tam áнна magattam ittam lâ nu marigirigá ittam, tapè palurotat tam yù ipakuá ni Namarò nittam, áнна málá tam yù napiá nga inittabbá na. 37 Ta aijan yù netúrá nga kunniaw sù bilin ni Namarò: “Á ari mabayák, á umay sangaw yù iddagán naw nga umay,

á arán na ipáppánná yù ánge na.*

38 Á yù ira tatolay nga ibiláng ku ta matunung megapu sù napasigaggá nga ángngikatalá da nikán,

tolayak ku ira ta áddè ta áddè.†

Ngam nu pallikuránád da yù pangikatalá da nikán megapu sù jigá da, aringá magayáyá nira,” kun ni Apu.

39 Ngam sittam, wáwwagi, ari ittam negittá sù ira tatolay nga pallikuránád da yù pangikatalá da kê Namarò, nga ukuman ni Namarò sangaw. Ta napasigaggá yù ángngikatalá tam kê Namarò, á yáyù nga meyigù ittam, nga mesipá kuna.

† 10:20 Markus 15:38 ‡ 10:28 Deuteronomio 17:2-7 § 10:30 Deuteronomio 32:35-36 * 10:37 Meyannung sù panoli ni Apu Kesu: Kingngúá 1:9-11; Nepalappá 22:16-17 † 10:38 Habakuk 2:4; Roma 1:17; Galasia 3:11

11

Yù ira Tatolay nga Neparámak megapu sù Ángngikatalà da

¹ Á anni laguk yù kebalínán nayù pangikatalà tam kâ Namarò? Nu ikatalà tam si Namarò, ammu tam ta maláwà tam yù ngámin nga napiá nga initabbá ni Namarò nga iddanamát tam, ána ammu tam ta kukurugán nga aijanin ngámin yù kinagi ni Namarò, mássiki dannian nga arát tam paga nasingan. ² Á yù ira ngaw o-olu nga tatolay, jináyò ni Namarò ira gapu ta pangikatalà da kuna. ³ Á sittam gapay, gapu ta pangikatalà tam kâ Namarò, kánámamuát tam ta pinarò na yù ngámin nga masingat tam megapu galá sù pagubobuk na. Á yáyù nga ammu tam ta pinarò na yù ngámin nga masingat tam nga naggapu sù arát tam masingan.

⁴ Á si Abel, nga yù ngaw mekaruá nga aná ni Adan, inikatalà na gapay si Namarò. Á megapu sù pangikatalà na, iniyátang na kâ Namarò yù napiá ánnè sù iniyátang ni Kain, nga kaká na. Á gapu ta pangikatalà ni Abel kâ Namarò, inibiláng ni Namarò ta matunung si Abel. Á yáyù nga inalawá ni Namarò yù iniyátang ni Abel kuna. Á mássiki nu nabayágin nga natay si Abel, aijan kunangane lá paga yù napiá nga ituddu na nittam megapu sù ángngikatalà na kâ Namarò.*

⁵ Á si Enok gapay yù ngaw mangikatalà kâ Namarò, á ari natay si Enok, gapu ta iná ni Namarò ta lángi ta keggá na paga nga matolay. Á mássiki nu inalek nayù ira kábulun na ta dabbuno, arád da nálek, ta nepulú kâ Namarò ta lángi. Á lage na kálá ni Enok ta lángi, neparámak ta ayatán si Namarò kuna.† ⁶ Á ari gemma magayáyá si Namarò sù tolay nga ari mangikatalà kuna. Á nu ikáyá na tolay nga makimállá kâ Namarò, á máwák na nga manguruk ta aijan si Namarò nga makaginná sù pakimállá na, ána máwák na gapay nga manguruk ta bálatan ni Namarò ta napiá yù ira nga magalek kuna.

⁷ Á si Noe gapay ngaw, inikatalà na si Namarò. Á pinappalán ni Namarò si Noe, marakè mekaná sù ira narákè nga tatolay nga ari nanguruk kâ Apu. Á kinagi ni Namarò kâ Noe ta duttá yù kalítu na dabbuno nga arád da paga bulubugá nasingan, á kinuruk ni Noe yù kinagi na. Á pidde na yù dakal nga barangay nga egga aru nga lágum na nga kun na balay nga luttá. Á ta kalítu na dabbuno, nalaggabán yù ira narákè nga tatolay, ngam neyígú di Noe ána yù atáwa na, ána yù ira tallu nga áná na nga lálláki ána yù ira atáwa ra. Walu ira ngámin. Á megapu sù pangikatalà ni Noe kâ Namarò, inipasingan na ta matunung yù pamagikáru ni Namarò sù ira tatolay nga ari nanguruk kuna. Á mesipà gapay si Noe sù ira nga ikákkállá ni Namarò ána ibiláng na ta matunung megapu sù pangikatalà da.‡

⁸ Á si Kákay Abrakam gapay ngaw, gapu ta pangikatalà na kâ Namarò, á kinuruk na yù kinagi ni Namarò nga nánaw sù gián na nga umay ta tanakuán nga lugár nga iyawá ni Namarò noka sù ira ginaká na. Á yáyù nga nánaw di Kákay Abrakam sù giád da, mássiki nu arád da ammu yù angayád da. ⁹ Á gapu ta pangikatalà da, limibbè ira ta lugár nga kinagi ni Namarò, á nakipaggián ira tán nga kun na álliuk, nga nagala-ali gapu ta awán ta dabbud da. Á pidde ra ta bale ra yù tabbí na ayám. Á kunnúu gapay sù ira ginaká ni Kákay Abrakam, di Isak, nga aná na, kári Akup, nga apù na, ta kun na álliuk ira gapay nga nagala-ali nga nakipaggián tán sù bale ra nga napadday ta tabbí na ayám, gapu ta nesipà ira gapay sù napiá nga initabbá ni Namarò kâ Kákay Abrakam. ¹⁰ Á inattamán na lâ ni Kákay Abrakam yù pakipaggián na tán, mássiki nu awán ta nálá na nga dabbun, gapu ta iniddanamán na yù mannanáyun nga paggianán na noka, nga ili nga sinalákkuruk ni Namarò, nga pidde na, nga maggián ta áddè ta áddè.§

¹¹ Á si Abbò Sara, nga atáwa ni Kákay Abrakam, inikatalà na gapay si Namarò. Á yáyù nga naganá si Abbò Sara, mássiki nu bakabákakin ta paganá na, gapu ta si Namarò yù pangikatalakán na, nga mamaluro sù initabbá na.* ¹² Á yáyù nga kitáru yù ira ginaká di Kákay Abrakam, mássiki nu kuruk nga lakalákay ána bakabákà iren lage ra paganá. Á minaru yù ira ginaká ra, nga ari mabiláng ta kunnay sù bituan ta lángi ána dagá ta aggik na beyay, megapu sù pangikatalà da kâ Apu Namarò.†

¹³ Á ngámin danniw nga tatolay, natay ira ngaw nga nabayák, nga ari paga nangalawá sù napiá nga initabbá ni Namarò nira, ngam napasigaggá yù ángngikatalà da. Ta nánámamuád da ta palurotan ni Namarò yù initabbá na sangaw nu ággo na, mássiki nu mabayák paga yù pamaluro na. Á yáyù nga nagayáyá ira, á ari ira nappasirán nga nakkagi ta ari

* 11:4 Genesis 4 † 11:5 Genesis 5:21-24 ‡ 11:7 Genesis 6:8-8:22 § 11:10 Genesis 12:1-4 * 11:11 Genesis 21:1-2 † 11:12 Genesis 22:17

yawe dabbuno yù kuruk nga paggianád da, ngam nakipaggián ira lâ nga kun na álliuk nga nappassapassiár lâ ta dabbuno. ¹⁴ Á yù ira tatolay nga magubobuk ta kunnian, ipakánnámmu ra ta aijan yù iddanamáda da nga kuruk nga paggianád da nga labbetád da sangaw ta lángi. ¹⁵ Á di Kákay Abrakam, ta ángngarigán nu manonó da yù lugár nga nánawád da, á aijan yù awayyá ra nakuan nga mattoli. Ngam ari ira naraddam sù ili nga naggapuád da. ¹⁶ Ta yá lâ kinaragatád da ta mesipà ira kâ Namarò sù kapiánán nga paggianád da ta lángi. Á gapu ta pangikatalà da, yáyù nga ari mappasirán si Namarò nga meparámak ta Yápu ra, á pinarán na yù ili nga aijan ta lángi ta paggianád da.

¹⁷ Á ari nabbábáng si Kákay Abrakam nga mangikatalà kâ Namarò ta pamarubá ni Namarò kuna. Ta inittabbá ni Namarò kâ Kákay Abrakam ta umaru yù ginaká na. Á gapu ta ikáyâ ni Namarò nga masingan nu napasigaggá yù ángngikatalà ni Abrakam kuna, yáyù nga inipeyátáng ni Namarò kuna si Isak nga aná na. Á napanán si Kákay Abrakam nga mangiyátáng, ¹⁸ mássiki nu kinagi ni Namarò ta si Isak yù paggapuán nayù aru nga ginaká na. ¹⁹ Ta inikatalà ni Kákay Abrakam ta paginnanolayan ni Namarò si Isak nu matay nakuan. Á yáyù nga neyárik si Isak ta kunnay ta pinaginnanole ni Namarò, ta natay nakuan, nu arán na inigaggak ni Namarò si Kákay Abrakam. †

²⁰ Á si Isak, inikatalà na gapay si Namarò. Á megapu sù pangikatalà na, á lage na natay, kinagi na sù ira aná na, di Akup kâ Eso, yù pangikállà ni Namarò nira ána yù napiá nga inittabbá ni Namarò nira nga málá da noka. §

²¹ Á si Akup, napiá gapay yù ángngikatalà na kâ Namarò. Á minay di Akup nakipaggián ta páppatulán na Egipto. Á megapu ta pangikatalà ni Akup kâ Namarò, á lage na natay, kinagi na sù ira duá nga apu na nga aná ni Kusé yù pangikállà ni Namarò ána yù napiá nga inittabbá na nira nga málá da noka. Á sinangngalán na yù tagukuk na, á nakkummak nga naddáyaw kâ Namarò.*

²² Á si Kusé, gapu ta pangikatalà na kâ Namarò, á lage na natay, kinagi na ta duttál noka yù páno ra ta Egipto nayù ira ginaká ni Akup, nga mangngágan gapay ta Israel. Á yáyù nga sinaddánán na ira ta ipáno ra yù tuláng na noka nu manaw ira, tapé itanam da ta dabbun nga toliad da. †

²³ Á yù ira darakal ni Moyses, nga ginaká ni Israel, inikatalà da gapay si Namarò. Á yáyù nga ari ira maganássing nga makikontará sù naráké nga itaddán nayù patul na Egipto. Ta kinagi nayù patul sù ira manaron ta maganá ta papatáyad da yù ira ngámin nga aná nayù ira Israel nga lálláki. Ngam ta keyaná ni Moyses, inittuttù nayù ira darakal na ta tallu nga bulán, ta ammu ra ta napiá nga abbing. †

²⁴ Á si Namarò yù pangikatalakán ni Moyses gapay. Á talluá ni Moyses, nánawán na yù napiá nga ággián na sù bale nayù parinsesa, nga aná nayù patul na Egipto, nga namarakal kuna. Ta arán na inikáyâ ni Moyses ta nebiláng ta aná nayù parinsesa, ²⁵ gapu ta nanakí nga nekaná sù ira nga tángngagad da lâ yù naráké nga ipagayáyâ da, nga mabi lâ nga maddán. Á piníli ni Moyses yù kapiánán, nga kesipà na sù ira tatole ni Namarò, nga kagittá na nga ginaká ni Israel, mássiki nu narigirigá ira. § ²⁶ Ta iniddanamán ni Moyses yù MakKiristu nga sinullá ni Namarò nga umay mammaguray noka. Á yáyù nga inibiláng ni Moyses ta más napiá nu attamán na galá yù panigirigá nayù ira Egipto kuna, ánné ta ketádde na nakuan sù ira mariku nga Egipto, gapu ta iniddagán na yù napiá nga bálá na nga iyawá na noka ni Namarò kuna.

²⁷ Á gapu ta pangikatalà ni Moyses kâ Namarò, inipáno na yù ira Kudio sù lugár nayù ira Egipto, mássiki nu manakí yù patul ta páno ra. Á ari naganássing sù patul, gapu ta napasigaggá yù ángngikatalà na, nga kunnay ta masingan na yù ari masingan, nga si Namarò nga nepulupulú nira. ²⁸ Á megapu sù pangikatalà ni Moyses kâ Namarò, kinuruk na yù kinagi ni Namarò, á pinapparán na yù ira ginaká ni Israel ta páno ra ta páppatulán na Egipto. Á kinagi na nira ta pártiad da yù kígaw, á ileruk da yù dága na ta utun na puertá na bale ra, tapé masingan nayù daroban ni Namarò, á arán na papatáyan yù aná da nga ginaká ni Israel, ta ánge na nga papatáyan yù ira kaká nga lálláki nga aná nayù ira Egipto. Á dattál nayù daroban, nasingan na yù dága ta utun na puertá na bale ra, á sinalebarán na, á awán ta napapáte na nga aná nayù ira ginaká ni Israel.*

† 11:19 Genesis 22:1-19 § 11:20 Genesis 27:27-30 * 11:21 Genesis 48:8-22 † 11:22 Genesis 50:24-25 † 11:23 Exodo 1:7-2:2 § 11:25 Meyannung kâ Moyses, Exodo 2-14 * 11:28 Yáyù yù pamegapu nayù Piestá nayù Pattalebák na Daroban ni Namarò nga Mamapátay.

²⁹ Á yù ira ginaká ni Israel, inikatalà da gapay si Namarò. Á megapu ta pangikatalà da, pinassinná ni Namarò yù danum na bebay nga mangngágan ta Ujjojin, tapè aijan yù pappatalayád da nga namagá ta paddáki da nga umay ta dammáng. Á yù ira Egipto, nga nakkabáyu ána nakkalesá, nga nanimmá nira, nalaggabán ira ngámin ta paddáki da gapay nakuan, ta pinatoli nen ni Namarò yù danum ta negagángay nga gián na.†

³⁰ Á gapu ta pangikatalà nayù ira ginaká ni Israel kâ Namarò, kinuruk da yù kinagi ni Namarò nira, á nallakalakák ira nga nilelepuanán yù atannáng nga nakannak nga jijjing nayù ili na Jeriku ta kággággaw ta áddè ta mekapitu nga ággaw. Á megapu ta pangikatalà da, niparabbá ni Namarò yù jijjing na ili, nga napadday ta darakal nga batu, tapè makatallung ira.‡ ³¹ Á si Rakap, aggina yù ngaw nakikarallow nga naggián ta ili na Jeriku. Ngam inikatalà na si Namarò, á pinaddulò na yù ira duá nga ginaká ni Israel nga jinok ni Josiuwa ta umay massísim. Á dattál na ággaw nga pangappù nayù ira ginaká ni Israel ta ili na Jeriku, neyígu di Rakap, nga ari nekaná sù pate nayù ira ngámin katangeliád da, nga ari nanguruk kâ Namarò.§

³² Á aru lâ paga yù arák ku garè matángngák nga istorián nga meyannung sù pangikatalà da kâ Namarò nayù ngaw ira káruán, nga kunnay kári Gidion,* si Barak,† si Samson,‡ si Jepti,§ á si Patul Dabid,* si Samuel,† ána yù ira ngaw gapay nga ábbilinán ni Namarò. ³³ Aru yù pinalurò da megapu sù pangikatalà da kâ Namarò. Aijan yù ira ngaw nakigerrá ána nangappù sù ira tanakuán nga páppatulán nga darakal. Aijan yù ira ngaw nammaguray, nga natunung yù ámmagure ra sù páppatulád da. Aijan yù ira ngaw nakálawá sù napiá nga inittabbá ni Namarò nira. Aijan yù ira ngaw nangappù sù ira layon, nga makánnanássing nga ayám, tapè arád da ira akkuán.‡ ³⁴ Á aijan gapay yù ngaw ira nga nepay ta ornu, ngam ari ira natuggi, gapu ta inikatalà da si Namarò.§ Á aijan yù ira ngaw nattálaw sù ira nga mamapátay nakuan nira. Aijan yù ira ngaw nakapi, nga pinassikan ni Namarò megapu sù pangikatalà da kuna. Á aijan yù ira nagattam nga ari naganássing sù ira nga nakigerrá nira. Á megapu sù pangikatalà da kâ Namarò, pinatulú da nga pinátálaw yù aru nga suddálu nga nalussaw nira, nga naggapu ta tanakuán nga páppatulán. ³⁵ Á aijan yù ira bábbay nga nálawá da yù ira iddukad da nga napaginnanolay, megapu sù napasigaggá nga pangikatalà da kâ Namarò.

Ngam aijan gapay ngaw yù ira káruán, nga nebaluk nga narigirigá áddè ta pate ra, megapu sù pangikatalà da kâ Namarò. Á inattamá da lâ, ta pinli ra yù pate ra ánnè ta kapalubbáng da nakuan nu pallikuránád da yù ángngikatalà da, gapu ta iniddanamád da yù kapiánán nga áttolè ra, sangaw nu paginnanolayan ni Namarò ira tapè mesipá ira kuna. ³⁶ Á aijan gapay yù ira nga neluddè nga nakkakagián ána yù ira nga napalalpaligá ána yù ira nga negálú ta káwák nga nekarsel, megapu sù pangikatalà da kâ Namarò. ³⁷ Á aijan yù ira nga napayapayang ta batu ta áddè ta pate ra, megapu ta pangikatalà da kâ Namarò. Á aijan yù ira nangikatalà kâ Apu nga nagaggal nga nesinná yù baggi ra. Á aijan yù ira nga nabigibigarán nga natay ta bayunetá. Á aijan yù ira nga awán ta gámi da, nga nabbarawási ta tabbi na karneru ána kajjing. Pobare ira nga awán bulubugá ta kukuá ra, á narigirigá ira ána neluddè ira. ³⁸ Á napatálaw ira nga napuersá nga nagala-ali nga nallakalakák ta kalállamattán ána puddul ta kun na simaron nga ayám. Á naggián ira ta kuebá ána abbú na dabbun. Á ari mepángngá yawe dabbuno nga paggianád da, ta napiá ira ánnè ta ngámin nga aijan ta dabbuno!

³⁹ Á danniaw ira ngámin ngaw nga nangikatalà kâ Namarò, ayatán si Namarò nira, á iniráyo na ira megapu sù ángngikatalà da kuna. Ngam arád da paga nálawá yù inittabbá ni Namarò nira, ⁴⁰ gapu ta ninonò ni Namarò yù kapiánán nga akkuán na. Ta arán na ikáyá ta aggira lâ yù pangiyawatán na nakuan sù inittabbá na, nu ari galá ta mesipá ittam gapay nira sangaw nu pabbalinan ni Namarò ta pareku nga napiá ána matunung yù ira ngámin nga mangikatalà kuna.

12

Yù Mepángngà nga Ángngikatalà tam kâ Ammò Namarò

† 11:29 Exodo 14:13-31 ‡ 11:30 Josiuwa 6:1-25 § 11:31 Ime 2:25 * 11:32 Uk-ukom 6:11-8:32 † 11:32 Uk-ukom 4:6-16 ‡ 11:32 Uk-ukom 16:23-31 § 11:32 Uk-ukom 11:32-33 * 11:32 1 Samuel 16:10-13; 17:31-51; yù libru nga 2 Samuel † 11:32 1 Samuel 7:9-17 ‡ 11:33 Daniel 6:1-23 § 11:34 Daniel 3:8-30

¹ Á gapu ta aru yù kinagi nikayu ta meyanung sù ira ngaw mangikatalà kâ Namarò, nga massistigu ta kuruk nga mekatalà si Namarò nga mamaluro sù inittabbá na, á párigát tam laguk yù ángngikatalà da. Ipuerá tam yù ngámin nga mangigaggak nittam nakuan ta panguruk tam kâ Namarò, á pallikuranát tam yù narákè nga ággangnuá tam, tapè uputat tam nga palurotan yù ngámin nga ipakuá ni Namarò nittam. ² Á nonopat tam si Apu Kesu, ta aggina yù pangikatalakát tam nga mangiyigù nittam, gapu ta aggina yù namaluro sù ngámin nga inipakuá ni Namarò kuna nga meyanung ta bagu nga tarátu na. Ta inattamán na lâ ni Apu Kesu yù pangipátá da kuna ta kurú ána pinaguráyán na yù pangipasirád da kuna, gapu ta yá lâ ninonò na yù pagayáyá na sangaw nu natuppál nen yù ngámin nga inipakuá ni Namarò kuna. Á nagitubangin ta jivanán ni Namarò ta lángi, nga ággitubangán nayù kotunán nga mammaguray.

³ Nonopat tam laguk yù pagattam ni Apu Kesu sù ngámin nga kingnguá nayù ira narákè nga malussaw kuna, tapè mapasigaggá yù ángngikatalà tam, ána ari ittam malurá nga mamaluro sù napiá nga ipakuá ni Namarò nittam. ⁴ Ta mássiki nu marigirigá kayu gapay, awán paga ta natay megapu sù panaki na nga mangnuá ta narákè. ⁵ Á arát tam laguk máttamán yù kinagi ni Namarò nittam ta pangabbún na nittam ta áná na. Ta panabarang na nittam, kinagi na nittam nga katággitádday:

“Áná ku, nu máwák nga tudduát takayu, tángngagan nawá,
á ari kayu mapállá nu gammát takayu.

⁶ Ta tudduák ku yù ira ngámin nga iddukak ku, ána pággangak ku ira,
gapu ta aggira ibiláng ku ta áná ku,”* kun ni Apu.

⁷ Á nu aijan yù jigá nga umay nittam, attamát tam lâ, ta tudduán na ittam ni Namarò nga áná na. Á egga panò yù aná nga arán na tudduán nayù yáma na? ⁸ Á nu arán na kayu nakuan tudduán ni Namarò, nga kunnay ta panuddu na sù ira ngámin nga áná na, á ari kayu laguk yù kukurugán nga áná na. ⁹ Á yù ira yáma tam ta dabbuno, tudduád da ittam, á pakimorayát tam ira megapu sù panuddu ra nittam. Á nepatalugáring kâ Namarò nga Yáma tam ta lángi! Tumulù ittam laguk kuna, tapè isipá na ittam sù áttole na ta áddé ta áddé.

¹⁰ Á yù ira yáma tam ta dabbuno, nabí lâ yù panuddu ra nittam ta kabajji tam, nga meyanung lággapay sù ure ra. Ngam si Namarò, nonopan na yù kapiánát tam, á yáyù nga tudduán na ittam, tapè mesipá ittam sù kangilin na. ¹¹ Á nu pággangan na ittam nayù yáma tam, ari ittam gemma magayáyá megapu sù jigá tam. Ngam nu attamát tam lâ yù panuddu ra nittam, á napiá yù pabbalinán na. Ta nu natudduán ittamín, á napiá ána matunung yù akkuát tam, á magimammá yù nonò tam ána napiá yù áwwawági tam sù ira kábulut tam.

¹² Ari ittam mapállá nga mamippipik megapu sù jigá tam. Makkakárudduák ittam laguk ta ipakimállá tam kâ Namarò, ána ipe tam yù urá tam nga mamaluro sù napiá nga ipakuá ni Namarò nittam. ¹³ Tuttulat tam yù napiá ána matunung, tapè ipasingat tam yù napiá nga párigán nayù ira kábulut tam. Ta nu kunnian yù akkuát tam, ari mabbábang yù ira kábulut tam, ána ari ira mekátuay ta pangikatalà da kâ Apu, nu ari galá ta mepasigaggá yù ángngikatalà da.

Magimuguk ittam nga ari Mekátuay sù Panguruk tam kâ Apu

¹⁴ Á sikayu laguk, ipe naw yù urá naw nga ari makíramá sù ira kábulun naw, tapè napiá yù áwwawági naw. Á maláppá kayu nga mangnuá lâ ta napiá ána matunung, tapè mepasingan ta kuruk nga metádday kayu gapay kâ Apu Kesu, ána mebiláng kayu ta mangilin. Ta mangilin gemma si Namarò, á arát tam masingan, nu ari ittam gapay mangilin megapu sù ketádde tam kâ Apu Kesu. ¹⁵ Á magimuguk kayu, maraké aijan nikayu yù mangiluddé sù pangikállá ni Namarò kuna. Ta nu aijan yù tolay nga namegapu nga tumuttuttul kâ Apu, nga malurá sangaw, á kunnay ta mapetán yù nonò na, á buruburionán na yù ira kábulun na, á aru sangaw yù mekanakaná sù narákè nga akka-akkuán na. ¹⁶ Á magimuguk kayu gapay, tapè awán ta tádday nikayu nga meruruk sù arán na atáwa, ána awán ta tolay nga mangiluddé sù mebiláng ta mangilin, nga kunnay sù kingnguá na ngaw ni Eso. Ta nilonán ni Eso yù awayyá na nga mangalawá ta pabbindision nayù yáma na ta pangikállá ni Namarò kuna, gapu ta iniláku ni Eso kâ Akup nga wagi na yù pakáwayyá na nga kaká. Á inipappagá na lâ ni Akup yù tangatariaiw nga kanan!† ¹⁷ Á ammu tam gemma ta nabbabáwi si Eso ta palláku na ta pakáwayyá na nga kaká, ta ikáyá na gemma mappabbindision kâ yáma na nakuan, ngam arán na awayyá, mássiki nu nakkulè, ta arán na gemma mapatoli yù kingnguá na.

* 12:6 Proberbio 3:11-12 † 12:16 Genesis 25:27-34

¹⁸ Arát tam laguk kalurâ yù pangikatalâ tam kê Namarò, ta napiá yù bagu nga tarátu na nittam ánnè sù ngaw tarátu na sù ira ngaw Kudio nga naggaká nittam. Ta arán na nittam ipasingan yù kunnay ta inipasingan na ngaw sù ira ngaw nakimoray kuna ta garek na puddul, nga api nga gumággággáng, ánnà yù makánnanássing nga kallá ánnà yù kunam ánnà yù baggiu. ¹⁹ Á naginná ra yù amariung nga nasikan ánnà yù ngárál nga nagubobuk nira. Á pakaginná ra sù ubobuk na, nerallá yù assing da, á inipakimállá da ta arán na ira kobobuk. ²⁰ Ta arád da matuppál yù taddán na nira. Á gapu ta mangilin yù gián ni Namarò, kinagi na nira, “Ari kayu dukki sawe puddul, ta nu ajjan yù makeguppè kuna, mássiki ayám naw, á payangan naw ta batu ta áddè ta pate na.”[†] ²¹ Á gapu ta makánnanássing yù nasingad da ánnà naginná ra, á kinagi ni Moyses, “Mamippippigá ta assing ku,” kun na.

²² Ngam sittam, nu umay ittam makimoray kê Namarò, dumá yù ággiát tam. Ta kunnay ta ajjan ittam ta lángi nga dukki ta kuruk nga puddul na Sion, ánnà yù bagu nga ili na Jerusalem nga ajjan ta lángi, nga kuruk nga paggianán ni Namarò nga sigga-inángà nga matolay ta áddè ta áddè. Á jiniribu yù ira daroban ni Namarò nga ari mabiláng nga naggagammung tán nga magayáyâ. ²³ Á nesipá ittamin gapay sù paggagammung nayù ira ngámin nga mangikatalâ kê Namarò, ta netádday ittam sù ira ngámin nga napakarenuánin ngaw, nga inibiláng ni Namarò ta tatole na nga matunung ánnà pareku nga napiá. Á inibiláng ni Namarò ittam ngámin ta ánnà na, á nelistángin yù ngágat tam ta lángi. Á si Namarò yù keyarubangát tam, ta aggina yù mamanunnù ta ngámin nga tatolay. ²⁴ Á nesipá ittam kê Apu Kesu, nga mamakkápiá nittam kê Namarò, megapu sù bagu nga tarátu na nga pinalurò na. Á nesipá ittam sù napiá nga pabbalinán nayù dága ni Apu Kesu nga neyátáng megapu nittam, nga napiá ánnè sù pabbalinán nayù dága ni Abel. Ta napakarenuán ittamin, á náringin yù liwiliwá tam, ánnà ikállá na ittam ni Namarò, megapu sù dága ni Apu Kesu. Ngam yá lá pabbalinán nayù dága ni Abel ta inibálá ni Namarò yù pate na sù namapátay kuna. §

²⁵ Magimuguk ittam laguk, ta tángngagat tam ta napiá yù bilin ni Namarò nittam. Ta pinagikáru ni Namarò yù ira ngaw tatolay nga ari nanguruk sù bilin na nga inipakagi na ngaw kê Moyses. Á nepatalugáring nittam, ta merallá yù pamagikáru na nittam nu arát tam kurugan yù inipakagi na sù Aná na nga naggapu ta lángi. ²⁶ Á sù ngaw pagubobuk ni Namarò kê Moyses ta puddul, á nagguyu yù dabbun megapu sù ngárál na. Á ajjan paga yù initabbá na, ta kinagi na, “Pidduák ku paga sangaw nga pagguyuguyuan yù dabbuno, á ari lá yù dabbuno, nu ari gapay yù egga ta lángi.”* kun na. ²⁷ Á yá kebalinán nayù kinagi na, nga pidduán na paga pagguyuguyuan yù dabbuno, ta irián na yù dán nga pinarò na nga masingat tam, tapè maggián lá yù ari mári nga ari maddán ta áddè ta áddè.

²⁸ Dayáwat tam laguk si Namarò, gapu ta mesipá ittam kuna nga mepammaguray sù pammagurayán na, nga ari mári nga ari maddán ta áddè ta áddè. Á mapállá ittam nga tumulú ánnà makimoray kê Namarò, ánnà palurotat tam yù ngámin nga ipakuá na nittam, tapè magayáyâ si Namarò megapu nittam. ²⁹ Ta mangilin si Namarò, nga makáwayyá nga mamagikáru nga kunnay ta ornu nga manuggi ta ngámin.

13

Yù Passerbi tam kê Namarò

¹ Á wáwwagi, uputat tam yù pakkaká-iddù tam, ta mawwawági ittam ngámin nga mangikatalâ kê Apu, megapu sù kepattatádde tam kuna. ² Á magimuguk ittam ta arát tam lonán yù pangilágum tam ta álliuk nga umay nittam. Paddulotat tam ira laguk, ta ajjan yù ira namadduló ta álliuk nga arád da ammu ta daroban na ira ni Namarò. ³ Á arát tam máttamán yù ira kábulut tam nga mangikatalâ kê Apu nga nebáluk. Ipakimállá tam ira ánnà ábbágát tam ira gapay ta kunnay ta ikáyâ tam nu sittam nakuan yù nebáluk gapay. Á yù ira marigirigá, ikállá tam ira nga kunnay ta sittam gapay yù marigirigá ta kunnay nira.

⁴ Á ta meyanung sù kustombare tam nga mangatáwa, ngilinat tam yù napiá nga pangatáwa tam. Tuppálat tam laguk yù ngámin nga meyanung ta pangatáwa tam, ánnà ari ittam meruruk sù arát tam atáwa. Ta si Namarò yù mamanunnù, á pagikaruan na yù ira meruruk ta tanakuán nga ari atáwa na ánnà yù ira mangarallaw.

⁵ Á magimuguk ittam ta arát tam karagátan yù kuártu ánnà arát tam ukkugan yù kuártu, ánnà yù kegatángán na. Magayáyâ ittam lá sù egga nittam, ta kinagi ni Namarò nittam, “Arát

† 12:20 Exodo 19:13 § 12:24 Genesis 4:8-11 * 12:26 Haggeo 2:6

takayu bulubugá panawán. Á arát takayu bulubugá táttájjíán,*⁶ kun na. ⁶ Á yáyù nga ari ittam mabbábáng, sittam nga katággítádday, nga makkagi ta kunniaw:

“Si Apu yù mangabbák níkán. Á yáyù nga aringá maganássing ta tatolay, maguray lá yù akkuáda da níkán.”†

⁷ Á nonopan naw yù ira ngaw nangituddu níkayu, nga nangipakánnámmu níkayu sù bilin ni Namarò. Á nonopan naw yù ngámin nga napiá nga pinalurò da, á párigán naw laguk yù ángngikatalà da ká Apu. ⁸ Ari bulubugá manguli si Apu Kesu Kiristu. Aggina galá yù egga ngaw, ta áddè kunangane, ta áddè ta áddè. ⁹ Á ari kayu laguk makilogò sù ira nga mangituddu ta tanakuán, tapè ari kayu mekáttauay sù panguruk naw ká Apu Kesu. Á ta ángngarigán, aijan yù ira mangituddu ta manganniaw ta kanan. Ngam awán ta pakkapiánán na tolay megapu sù pangannio na ta kanan. Á mapasigaggá yù ángngikatalà tam ká Namarò megapu galá sù pangiddù na áнна pangikállà na nittam.

¹⁰ Á sittam nga mangikatalà ká Apu Kesu Kiristu, aijan yù neyátáng megapu nittam, tapè mapakomá yù liwiliwá tam. Ngam ari mesipá yù ira páppári nga Kudio nga masserbi sù mangilin nga bale ni Namarò ta Jerusalem, ta arád da kurugan yù kuruk nga meyanung ká Apu Kesu. ¹¹ Á pangiyátáng nayù ira kátannangán nga pári megapu sù liwiliwá da, iyánga na yù dága na ayám sù Kangilinán nga Gián sù bale ni Namarò. Ngam yù baggi nayù ira ayám nga napárti, iyánga ra ta lawán na ili, tapè tuggiad da ta lawán na ili sù gián nga ari mangilin. ¹² Á kunnian gapay yù pangiyangngá ni Apu Kesu, ta natay ta lawán na ili sù gián nga ari mangilin, tapè pakarenuán na yù ira tatolay ta liwiliwá da áнна pabbalinan na ira ta mangilin nga tatole na, megapu sù dága na lápay. ¹³ Á yáyù nga pallikuranát tam laguk yù kustombare na Kudio, á ikatalà tam galá si Apu Kesu, nga neyátáng megapu nittam, tapè kunnay ta metádday ittam sù Yápu tam ta lawán na ili, nga mesipá sù keluddè na áнна karigirigá na. ¹⁴ Ta awán ta mannanáyun nga paggianát tam sawe dabbuno. Ngam iddagát tam yù dattál nayù mannanáyun nga ili nga paggianát tam ká Namarò nga awán ta áddè na.

¹⁵ Á gapu ta pangikatalà tam ká Apu Kesu, aringin yù dága na ayám nga napárti yù iyawá tam ká Namarò, nu ari galá yù paddáyo tam kuna megapu ká Apu Kesu. Á megapu sù paddáyo tam kuna, ipakánnámmu tam sù ira kábulut tam ta si Apu Kesu yù Yápu tam. Yáyù passerbi tam ká Namarò, nga kunnay sù ira mangiyátáng. ¹⁶ Á ari ittam malurá nga mangabbák sù ira kábulut tam, áнна makkakásipá ittam, ta yáyù gapay yù ásserbi tam ká Namarò nga meyárik ta neyátáng kuna nga ipagayáyâ na.

¹⁷ Á wáwwagi, tumulù kayu laguk sù ira nga mangituddu níkayu, nga mangikatalà ká Namarò, á kurugan naw yù ituddu ra. Ta taronád da kayu ta napiá, tapè ari kayu mekáttauay sù pangikatalà naw ká Apu. Á si Namarò yù maddok nira, á bisítán na ira sangaw nu kunnasi yù passerbi ra. Á nu napiá yù panguruk naw sù ituddu ra, á magayáyâ ira. Ngam nu arán naw kurugan yù ituddu ra, á maraddam ira megapu níkayu, á awán laguk ta pakkapiánán naw megapu nira.

¹⁸ Á sikami, wáwwagi, yù ipakimi-imállà naw ká Namarò. Aláppaw yù nonò mi, ta awán ta ammu mi nga pakaliwatám mi, á ikáyâ mi ta akka-akkuám mi lá yù napiá áнна matunung. ¹⁹ Á dudduárat takayu ta ipakimállà nawà, nepatalugáring ta mabíkà nga makatoli níkayu.

Yù Ipakimállà nayù Tolay nga Mattúrá

²⁰ Á italà takayu ká Namarò, nga mamagimammá ta nonò tam. Ta pinaginnanole ni Namarò si Apu Kesu, nga mangngágan ta Mináppárak nga Makáwayyá, gapu ta ipataron na kuna sittam nga mangikatalà kuna, nga kun na karneru na. Á napalurò yù mannanáyun nga tarátu ni Namarò nittam, megapu sù dága ni Apu Kesu. ²¹ Á parè lá ta ábbágán na kayu ni Namarò ta ngámin nga akkuán naw, megapu ká Apu Kesu Kiristu, tapè maláppá kayu nga mangguá ta ngámin nga ipagayáyâ na, áнна palurotan naw yù ngámin nga ipakuá na níkayu. Á meparáyaw laguk si Apu Kesu Kiristu ta áddè ta áddè.

Yù Kabalin na yawe Túrá

²² Á wáwwagi, ababbá lá yawe túrá ku, á ikomâ bì níkayu, ta tángngagan naw ta napiá yawe itabarang ku níkayu. ²³ Á magayáyákà nga mangiparámak níkayu ta napalubbáging si Timotio, nga wagi tam. Á nu maratang nangà lage na pánb, á mappulù kami sangaw nu umayá mattúllun níkayu. ²⁴ Á kagian naw bì sù ira ngámin nga mangituddu níkayu ta manonò mi ira, áнна yù ira ngámin nga kábulun naw, nga tatole ni Namarò. Á iyabbù mi lá nu kunnasi ira ngámin. Á yù ira kákkopot tam nga taga Italia, kagiad da gapay níkayu ta

* 13:5 Deuteronomio 31:6 † 13:6 Salmo 118:6

manonò da kayu, á damágad da kayu gapay nu kunnasi kayu. ²⁵ Á parè lâ ta ikákkállà ni Namarò sikayu ngámin ta áddè ta áddè. Mapalurò. Ammán!

Yù Túrâ ni Ime

Yù Meyannung sawe Túrâ ni Ime

Yù ira ngámin nga tatole ni Namarò yù túratán ni Ime, á nepatalugáring sù ira ngaw Kudio nga mewarawarâ sù ngámin nga purubinsia sù páppatulán na Roma. Á ibukalán ni Ime yù ipakuá ni Namarò nittam nga tatole na, tapè mepasingan yù pangikatalà tam kuna, áнна matákkilálán nayù ira tatolay nga ari manguruk ta kuruk nga tatole ni Namarò ittam. Ta nu egga yù pangikatalà tam kâ Apu, pabbalinán na ta napiá nga akka-akkuát tam áнна napiá nga panguruk tam kâ Namarò.

Á si Ime yù mangngágan gapay ta Yakup sù ággubobuk na Gareko, áнна mangngágan ta Santiago sù ággubobuk na Iloko. Á ta ággubobuk na Ingles, mangngágan ta James, á ta Atta, Ime yù ngágan na.

Yù Mayán nayù Túrâ

Yù Meyannung sù ira Mangikatalà áнна yù ira Mabbábáng (1:1-18)

Yù Pakaginná tam áнна Panguruk tam sù Bilin ni Namarò (1:19-27)

Arát tam laguk Paddurúmán yù ira Tatolay (2:1-13)

Mepasingan yù Ángngikatalà tam megapu sù Akkuát tam (2:14-26)

Yù Pakáwayyá nayù Pagubobuk tam (3:1-18)

Yù ira Mangikatalà kâ Namarò áнна yù ira Ari Manguruk (4:1-5:6)

Magattam ittam áнна Makimállá ittam kâ Namarò (5:7-20)

¹ Sikán si Ime nga masserbi kári Namarò kâ Apu Kesu Kiristu nga Yápu tam. Á mattúrákà nikayu ngámin nga ginaká nayù ira mapulu duá nga ánná ni Israel, sikayu nga mangikatalà kâ Apu Kesu, nga mewarawarâ ta ngámin nga makkakerumá nga lugár ta dabbuno.

Yù Meyannung sù ira Mangikatalà áнна yù ira Mabbábáng

² Wáwwagi, mássiki nu mesimmuán naw sangaw yù makkakerumá nga jigâ, magayáyá kayu. ³ Ta ammu naw nu aijan yù jigâ nga attamán naw, á maparubán kayu, tapè mepasi-gaggá yù ángngikatalà naw kâ Namarò.* ⁴ Á máwák naw nga attamán yù makkakerumá nga jigâ, megapu sù mapasigaggá nga ángngikatalà naw, tapè tulluá kayu, nga napiá lá yù ággangnuá naw, á awán ta pabbábáng naw.

⁵ Á nu egga nikayu yù tolay nga arán na ammu yù akkuán na ta meyannung sù ággián na, á makimállá laguk kâ Namarò, tapè ipakánnámmu ni Namarò yù napiá nga ipakuá na kuna. Ta minángngikállá si Namarò, á arán na ittam gammán, nu ari galá nga abbágán na ittam ngámin nga makkiddaw kuna. ⁶ Ngam ta pakimállá naw kâ Namarò, ikatalà naw ta mangabbák nikayu. Ari kayu mabbábáng, ta yù tolay nga mabbábáng, meyárik ta palung na bebay nga mepayák ta paddák. ⁷ Á yù tolay nga kunnian nga mabbábáng, arán na nakuan kagian ta iddán ni Namarò. ⁸ Ta mattá-iki-ikáyá áнна mabbábáng ta ngámin nga akkuán na, á yáyù nga ari mekatalà, á awán ta iyawá ni Namarò kuna.

Yù Meyannung sù ira Pobare áнна yù ira Maríku

⁹ Á sikayu nga pobare nga mangikatalà kâ Apu Kesu Kiristu, magayáyá kayu laguk, ta si Namarò yù mangalawá nikayu, tapè mesipà kayu kuna, mássiki nu iluddè da kayu nayù ira tatolay. ¹⁰ Á sikayu nga maríku nga mangikatalà kâ Apu Kesu Kiristu, magayáyá kayu laguk nu mapatulú na kayu ni Namarò. Ta meyárik yù maríku ta lappáw ta kakáddapán nga mabi lá malelay. ¹¹ Ta nu mabbilák, á mabilagán yù lappáw, á mabi lá malelay, á kengá lággapay yù kakástá na. Á kunnian gapay sù maríku. Mappukkawák nga mamagaru ta kukuá na, á mabi lá matay áнна panawán na ngámin.

Yù Meyannung sù Paggapuán na Jigâ áнна Narákè

¹² Á nu attamát tam yù jigâ nga umay nittam, á pagayáyatan na ittam ni Namarò. Ta nu arát tam likuránán yù pangikatalà tam kâ Namarò nu marigirigá ittam, á iyawá na nittam yù bálà tam nga inángá nga awán ta áddè na, ta yáyù initabbá ni Namarò sù ira nga mangiddù kuna.

¹³ Á mássiki nu marigirigá ittam ta jigâ áнна narákè, arát tam awayyá nga kagian ta si Namarò yù paggapuán nayù jigâ tam, onu si Namarò yù mangituddu nittam ta narákè. Awán bulubugá ta mangituddu ta narákè kâ Namarò, á arán na gapay ni Namarò ituddu yù narákè. ¹⁴ Ngam marigirigá ittam nga taggitádday megapu sù narákè nga pakkaragá

* 1:3 Roma 5:3-4; 1 Eduru 1:6-9

na baggi na nga naggapu sù narákè nga nonò na. ¹⁵ Á nu nononopat tam yù narákè nga karagatát tam, tulluá yù narákè ta nonò tam, á yáyù nga akkuát tam laguk sangaw. Á nu uputan na tolay nga tuttulan yù narákè nga karagatán na, á matay sangaw ána metabbá ta impiernu.

¹⁶ Wáwwagi nga iddukak ku, ari kayu melogò! Ari si Namarò yù paggapuán na narákè nga karagatát tam. ¹⁷ Si Namarò yù paggapuán na ngámin nga napiá ána matuning. Á aggina yù mangiyawá nittam ta ngámin nga napiá ána nakástá. Pidde na yù ngámin nga maddalingárang ta lángi megapu nittam, yù bilák, yù bulán, ána yù bituan. Á manguli yù nawák da. Ngam si Namarò, ari manguli. Arán na ulian yù ángngiddù na ána allà na nittam. ¹⁸ Á gapu ta panalákkuruk na, pinabbalin na ittam ta tatole na megapu ta panguruk tam sù kuruk nga bilin na nga inipakánámmu na nittam, tapè sittam yù kapiánán ta ngámin nga pinarò na.

Yù Pakaginná tam ána Panguruk tam sù Bilin ni Namarò

¹⁹ Wáwwagi nga iddukak ku, nononotat tam yawe. Sittam nga taggitáday, mapiá nakuan nu dán nga napanán nga magginná, ngam ari nakuan alistu nga tubbák ána ari malogon nga mapporay. ²⁰ Ta yù tolay nga mapporay, arán na matuppál yù napiá ána matuning nga ipakuá na nakuan ni Namarò kuna. ²¹ Likuránán naw laguk ngámin nga jikkù ána narákè nga ággangnuá naw. Á tumulù kayu ána alawatan naw yù bilin ni Namarò, tapè meyígù kayu.

²² Á tuppálan naw laguk yù bilin ni Namarò! Ta nu arán naw palurotan yù bilin na nga naginná naw, á ilogò naw laguk yù baggi naw. ²³ Yù tolay nga ginnán na lâ yù ubobuk ni Namarò, ngam arán na kurugan, meyarik ta tolay nga magispeku, nga masingan na yù mammang na nga narapingán. ²⁴ Á pallikuk na ta ispeku, máttámán na sangaw yù nasingan na. Á kunnian yù keyarigán nayù tolay nga ari manuppál sù gininná na nga ubobuk ni Namarò. ²⁵ Tángngagan naw laguk yù bilin ni Namarò nga makáwayyá nga mamalubbáng nikayu, á tuppálan naw yù kagian na. Ta ikállà na kayu ni Namarò ána abbágán na kayu ta ngámin nga akka-akkuán naw, nu palurotan naw yù naginná naw nga bilin na.

²⁶ Yù tolay nga makkagi ta makimoray kâ Namarò, ngam arán na tukkatan yù pagubobuk na ta narákè, á ilogò na lâ yù baggi na. Á awán ta serbi nayù pakimore na kâ Namarò. ²⁷ Ta si Namarò yù Yáma tam nu kuruk nga makimoray ittam kuna. Á danniaw ira lâ yù ibiláng na ta kuruk nga tatole na nga kuruk nga makimoray kuna. Á manuppál ira sù napiá nga ipakuá na nira. Abbágád da yù ira ábbing nga ulilá ána yù ira bábbay nga nabálu nga marigirigá, ána arád da párigán yù narákè nga ággangnuá nayù ira tatolay sawe dabbuno.

2

Arát tam laguk Paddurúmán yù ira Tatolay

¹ Wáwwagi, nu kuruk nga mangikatalà kayu kâ Apu Kesu Kiristu nga Yápu tam nga Kotunán, arán naw laguk paddurúmán yù ira tatolay. ² Á ta ángngarigán, umay yù tolay nga maríku nga makipagammung nikayu, nga massákkaláng ta buláwán ána nabbisti ta nanginá nga gámi, á aijan gapay yù umay nga pobare nga nabbarawási ta napisipisil. ³ Á nu ángngarigán ta tángngagan naw lâ yù maríku, á kagian naw kuna, “E ka bì magitubang sawe kapiánán nga ággitubangám mi.” Á kagian naw sù pobare, “Manáddak ka tán,” onu “Magitubang ka ta daták ta likuk mi.” ⁴ Á nu kunnian yù akkuán naw, narákè kayu, ta paddurúmán naw yù ira tatolay. Á meyarik kayu ta kues nga narákè yù nonò na. ⁵ Wáwwagi nga iddukak ku, ginnán naw yù kagiak ku nikayu. Yù ira pobare ta dabbuno, aggira yù piníli ni Namarò tapè aggira yù mangikatalà kuna, ána napasigaggá yù ángngikatalà da. Á pabbalanan na ira ta tatole na, tapè mesipà ira sù pammagure na, ta yáyù inittabbá na nga bálà da nga iyawá na sù ira ngámin nga mangiddù kuna.

⁶ Ngam sikayu, ipasiránán naw yù ira pobare. Á asinni panò yù ira manigirigá nikayu nu ari galá yù ira maríku? Asinni yù ira mangikeká nikayu ta kues nu ari yù ira maríku? ⁷ Á asinni panò yù ira makkagi ta narákè ta meyannung sù maráyaw nga ngágan ni Apu Kesu Kiristu nga Yápu tam? Aggira nga maríku!

⁸ Á kuruk nga napiá yù akkuán naw nu tuppálan naw yù kapiánán nga tunung ni Namarò nga neturá, nga kun na,

“Iddukan naw yù ira ikáttole naw ta kunnay ta ángngiddù naw ta baggi naw.”*

* 2:8 Libitiko 19:18

⁹ Ngam nu paddurúmán naw yù ira tatolay gapu ta mariku yù tádday ána pobare yù tádday, á mapagikáru kayu gapu ta nakaliwatán naw yù tunung ni Namarò. ¹⁰ Ta mássiki nu tuppálan naw yù ngámin ira nga itaddán ni Namarò nga netúrâ sù tunung na, ngam tádday lâ yù arán naw natuppál, á nakaliwatán naw yù tunung ni Namarò. ¹¹ Ta si Namarò yù nakkagi sù itaddán na, nga kun na, “Ari kayu makikarallaw.” Á aggina galá yù nakkagi gapay, nga kun na, “Ari kayu mamapátay.”† Á nu ari kayu makikarallaw, ngam mamapátay kayu, á nalliwá kayin, ta nakaliwatán naw yù tunung ni Namarò.

¹² Á yáyù nga máwák tam laguk nga ubobugan ána akkuán yù napiá nga kunnay sù akkuán nayù ira tatole ni Namarò, nga mapanunnután megapu sù kapiánán nga tunung nga mamalubbáng nittam, tapè mesipá itam sù allá ni Namarò. ¹³ Ta sangaw nu panunnután ni Namarò yù ira tatolay, arán na ikállá yù tolay nga ari mangikállá sù ira ikáttole na. Ngam yù tolay nga mangikállá, aggina yù ikállá ni Namarò. Á yáyù nga ikákkállá naw laguk yù ira kábulun naw, tapè ikállá na kayu ni Namarò sangaw nu ággo nga pamanunnù na. Ta minángngikállá si Namarò, mássiki nu mamanunnù.‡

Mepasingan yù Ángngikatalà tam megapu sù Akkuát tam

¹⁴ Wáwwagi, nu aijan yù tolay nga makkagi ta manguruk kâ Apu Kesu, ngam narákè yù akkuán na, á awán ta serbi nayù ángnguruk na. Meyígù panò megapu sù kunnian nga ángnguruk na? Ari gemma. Ta ari kuruk nga manguruk nu awán ta napiá nga akkuán na tapè mepasingan yù ángnguruk na. ¹⁵ Á ta ángngarigán nu egga yù ira wáwwagi tam ta ángnguruk tam kâ Apu Kesu nga awán ta kanad da ána gámi da, ¹⁶ á kagiat tam nira, “Parè bí ta napiá yù ággján naw ána málek naw sangaw yù kanan naw ána gámi naw.” Á nu kunnian yù kagiat tam nira, ngam arát tam ira abbágán ána arát tam iyawá nira yù máwák da, á awán bulubugá ta serbi nayù ángngikatalà tam. ¹⁷ Á yáyù, nu aijan yù tolay nga makkagi ta ikatalà na si Apu Kesu, ngam arán na akkuán yù napiá nga ipakuá ni Namarò kuna, á awán laguk ta serbi nayù ángngikatalà na.

¹⁸ Á ta ángngarigán, aijan yù tolay nga makkagi, nga kun na, “Paguráyat tam, ta makkakerumá yù ánnuttul tam kâ Apu. Ta aijan yù ira makkagi ta meyígù ira megapu ta pangikatalà da lá kâ Apu Kesu, mássiki nu awán ta napiá nga akkuád da. Á aijan gapay yù ira makkagi ta meyígù ira megapu sù napiá nga akkuád da.” Á yawe laguk yù kagiak ku. Á kunnasi yù pangipasingat tam ta pangikatalà tam kâ Apu, nu awán ta napiá nga akkuát tam? Á yáyù nga akkuák ku laguk yù napiá, tapè mepasingan yù pangikatalà ku kâ Apu.

¹⁹ Á sikayu, kurugan naw gemma ta táttádday lâ si Namarò nga Yápu tam. Á napiá gemma ta manguruk kayu sù kuruk nga meyanung kâ Namarò. Á yù ira anitu, kurugad da gapay si Namarò, á mamippippik ira ta assing da kuna, ta ari ira meyígù. ²⁰ Á sikayu nga kunnay ta awán ta nonò na, arán naw panò kánnámmuán ta awán ta serbi na pangikatalà ta tolay kâ Namarò nu arán na gapay akkuán yù napiá nga ikáyâ ni Namarò?

²¹ Nononopan naw yù ngaw Kákay Abrakam. Ammu naw gemma ta inibiláng ni Namarò ta matunung si Kákay Abrakam megapu sù kingnguá na. Minay di Kákay Abrakam nga nakimoray kâ Namarò ta utun na puddul, tapè palurotan na yù kinagi ni Namarò. Á bináluk na si Isak nga aná na, á pineddá na ta utun nayù ángngiyátangán, tapè meyátang. §

²² Á yáyù pangipasinganát tam ta metádday yù pangikatalà ni Kákay Abrakam kâ Namarò sù panguruk na sù kinagi ni Namarò kuna. Ta yù pabbalinán nayù pangikatalà ni Kákay Abrakam kâ Namarò yù pamaluro na sù kinagi ni Namarò kuna. ²³ Á kunnian, napaluro yù dán nga netúrâ nga ubobuk ni Namarò nga kunnian: “Si Kákay Abrakam, kinuruk na yù kinagi ni Namarò kuna. Á gapu ta pangikatalà na kuna, inibiláng ni Namarò ta napiá ána matunung si Abrakam.”* Á yáyù nga narámak nayù ira tatolay ta si Abrakam yù kopun ni Namarò. ²⁴ Á kunnian, wáwwagi, kánnámmuát tam ta ibiláng ni Namarò ta napiá ána matunung ittam, nga ari megapu sù pakkagi tam sù pangikatalà tam kuna, nu ari galá megapu sù napiá nga akkuát tam, nga kepasinganán nayù pangikatalà tam kuna.

²⁵ Á kunnian gapay sù ngaw Bákò Rakab nga minákkikarallaw. Inibiláng ni Namarò ta matunung si Rakab gapu ta inipasingan na yù pangikatalà na kâ Namarò megapu sù kingnguá na. Ta pinadduló na yù ira duá nga ginaká ni Israel, nga suddálu nga minay massísim ta ili na, á inilammang na ira nga pinapánaw, á inituddu na nira yù tanakuán nga dálan, tapè melilli ira sù ira maggápù nira nakuan. ²⁶ Á ta ángngarigán, nu mesinná

† 2:11 Exodo 20:13-14 ‡ 2:13 Meyannung ta allá ni Namarò nga mepulú ta pamanunnù na, Genesis 4:8-16 § 2:21 Genesis 22:1-19 * 2:23 Genesis 15:6; Roma 4:3

yù ikararuá na tolay ta baggi na nga aringin maginàngà, á natayin. Á kunnay gapay sù pangikatalà tam kâ Apu Kesu. Nu arát tam akkuán yù napiá nga ipakuá ni Namarò nittam, á kunnay ta natayin yù pangikatalà tam, gapu ta awán ta palurotan na.

3

Yù Pakáwayyá nayù Pagubobuk tam

¹ Wáwwagì, ari nakuan aru nikayu yù mabbalin ta mesturu nga mangituddu ta ubobuk ni Namarò, ta ammu naw ta mepallà yù ámmagikáru ni Namarò, nepatalugáring nikami nga mesturu ánnè sù ira tudduám mi, nu arám mi tuppálan yù napiá nga ituddu mi.

² Á sittam ngámin, negagángay ta makaliwá ittam. Á nu aijan yù tolay nga ammu na imugurán yù pagubobuk na, aggina yù similluá nga awán ta pakaliwatán na, ámma ammu na mangigaggak ta baggi na.

³ Á megaggak yù baggi tam megapu ta pangigaggak tam ta jilá tam. Ta ángngarigán, ipe tam yù búsal ta simù na kabáyu tapè kurugan na ittam, á awayyá tam laguk igaggak yù baggi na. ⁴ Á yù biray yù tádday nga keyarigán na. Mássiki nu mallakay yù biray ámma masikan yù paddák nga mangipayák kuna, ngam baddi yù ulin na nga ángngigaggak nayù mamilotu sù biray ámma ipanunung na sù lakalakaran na. ⁵ Á kunnian gapay sù jilá na tolay, mássiki nu baddi, ngam kunnay ta mappeddaráyaw nga makáwayyá megapu ta pagubobuk na. Ta makáwayyá yù tolay nga mamaluro ta aru nga napiá onu narákè megapu ta pagubobuk na. Á yáyù nga meyárik yù jilá tam ta baddi nga ulin nga makáwayyá nga mangigaggak ta dakal nga biray.

Á ta ángngarigán, nonopan naw yù api nga baddi, á pígiá lâ tuggian na yù dakal nga kakayyuán! ⁶ Á kunnay ta api yù jilá tam, gapu ta mappanà yù narákè nga maggapu ta pagubobuk na. Á massamá yù karákè na ta nonò tam ámma baggi tam, á darálan na yù ággiát tam. Á si Satanas yù paggapuán nayù narákè nga pagubobuk tam.

⁷ Makáwayyá yù tolay nga mamasippá ta ngámin nga makkakerumá nga simaron nga ayám, mammánù, yù ira nga makkarakáray, ámma yù ira nga maggián ta bebay, á aijanin yù pinasippá na. ⁸ Ngam awán bulubugá ta tolay nga matudduán na yù jilá na, tapè napiá lâ nakuan yù ubobugan na. Ari megaggak, nga dán nga naparán nga magubobuk ta narákè nga meyárik ta jitá nga akáppatay.

⁹ Á megapu sù jilá tam, iyubobuk tam yù paddáyo tam kâ Ammò Namarò nga Yápu tam, ámma iyubobuk tam gapay yù pangigagek tam ta ikáttole tam nga pinarò ni Namarò ta kágappá na! ¹⁰ Táltádday lâ yù jilá tam, nga paggapuán nayù paddáyo tam kâ Namarò ámma yù pangigagek tam sù ira kábulut tam! Wáwwagì, ari máyá! Arát tam nakuan akkuán yù kunnian! ¹¹ Á ta ángngarigán, mallatuá panò ta námmi nga danum ámma matábbál gapay yù táttádday nga panagabán? Ari gemma. ¹² Á mabbungá panò ta niuk yù káyu nga bayábà? Ari gemma. Onu egga panò yù lánù nga mabbungá ta bayábà? Awán! Á awán gapay ta manágak ta bebay. Á ta kunnian gapay, ari mepángngà nittam nga manguruk kâ Namarò yù magubobuk ta narákè.

Yù Napiá nga Sírik ni Namarò nga Ipakánnámmu na

¹³ Nu egga nikayu yù masírik ámma kuruk nga makánnámmu, tumulù laguk, á ipasingan na yù napiá nga nonò na megapu sù napiá nga akka-akkuán na ámma napiá nga ággangnguá na.

¹⁴ Ngam nu mangabubu kayu ámma mapassil, ari kayu laguk mappeddaráyaw nga makkagi ta masírik kayu, ámma ari kayu massiri, nga mangilímak ta kuruk. ¹⁵ Ta nu narákè yù sírik naw, ari gemma maggapu kâ Namarò, nu ari galá yù sírik nga gagángay ta nonò na tolay sawe dabbuno, nga maggapu kâ Satanas. ¹⁶ Á nu aijan yù ira nga mangabubu ámma mapassil, buruburionad da ngámin yù ira tatolay ámma akkuád da ngámin nga makkakerumá nga narákè.

¹⁷ Ngam yù tolay nga kuruk nga masírik, nga egga kuna yù napiá nga sírik nga naggapu kâ Namarò, á arán na nonopan yù narákè. Á magimammà yù nonò na, á aggina yù magattam nga masippá ámma tumulù. Á mangikállà sù ira ikáttole na, ámma abbágán na ira. Ari mabbábáng ámma ari mangirumá ta tolay, á ari ággippípiá. ¹⁸ Á yù ira mamakkápiá sù ira kábulud da, meyárik ira ta mammulá ta napiá nga bukal, ámma málá na sangaw yù napiá nga bungá ra. Ta nu pakkapiád da yù ira kábulud da, mammapiá yù ággiád da, á napiá ámma matunung yù ngámin nga akkuád da.

4

Yù ira Mangikatalà kâ Namarò ána yù ira Ari Manguruk

¹ Á ngattá, ta makkakákontará kayu? Anni panò yù kegapuánán nayù paddaráma naw, nu ari galá megapu sù passil naw ána narákè nga pakkaragá naw nga nonopan naw. ² Ajjan yù ikâyá naw nga apan, ngam arán naw málá, á yáyù nga maguray lá yù akkuán naw, tapè málá naw, mássiki nu mamapátay kayu! Mapassil kayu! Ngam ari kayu makálá ta passilan naw, á yáyù gapu na nga maddaráma kayu. Ngam arán naw málá yù máwák naw, gapu ta arán naw kiddawan kâ Apu Namarò. ³ Á mássiki nu makimállá kayu kâ Namarò, arán na iyawá nikayu yù ipakimállá naw, gapu ta kiddawan naw galá megapu sù narákè nga pakkaragá nayù baggi naw.

⁴ Tatolay nga ari mekatalá! Arán naw panò ammu tanu karagátán naw yù ajjan sawe dabbuno, á kontarán naw si Namarò? Ta yù tolay nga makkaragá ta narákè nga ajjan sawe dabbuno, aggina yù ikalusso ni Namarò. ⁵ Á arán naw laguk kagian ta awán ta kebalinán nayù dán nga netúrá nga ubobuk ni Namarò. Kinagi na, “Maggián yù Mangilin nga Ikararuá ni Namarò sù ira tatolay na, á nakalò yù pakkaragá na ta iddukat tam galá si Apu Namarò.”

⁶ Á nepallá yù pangikállá ni Namarò nittam, á uputan na ittam nga abbágán, tapè mepasigaggá ána matunung yù ángngikatalá tam kuna. Ta ajjan yù dán nga netúrá nga ubobuk ni Namarò, nga kunniaw:

“Kontarán ni Namarò yù ira ngámin nga mappeddaráyaw, ngam ikállá na yù ira ngámin nga tumulù.”*

⁷ Tumulù kayu laguk kâ Namarò. Á kontarán naw si Satanas nga patul nayù ira anitu. Tanu kontarán naw si Satanas, panawán na kayu. ⁸ Á dukki kayu kâ Namarò. Tanu dukki kayu kuna, dukki gapay nikayu. Á sikayu nga malliwá, mabbábáwi kayu laguk, á likuránán naw yù liwiliwá naw. Á sikayu nga mabbábáng sù panguruk naw kâ Namarò, ipasigaggá naw yù ángnguruk naw kuna. ⁹ Á parè bì ta makalò yù daddam naw megapu sù liwiliwá naw, á makkulè kayu laguk. Ari kayu nakuan maggagalá, ta mepángngá ta maraddam kayu. Ari kayu laguk magayáyá nga mabbúyá, ngam maraddam kayu nga mappasirán. ¹⁰ Nu tumulù kayu kâ Apu Namarò, ipotun na kayu nga meparáyaw.

Ari ittam Makkakápanunnù, ta si Apu Namarò yù Mamanunnù

¹¹ Wáwwagi nga mangiddù kâ Apu, ari kayu makkakáliilibá. Yù tolay nga lillibatan na yù kabbulun na, á kunnay ta sippilan na yù pakáwayyá nayù mamanunnù. Á nu panunnután na yù ira kábulun na, kunnay ta lillibatan na gapay yù napiá nga tunung ni Namarò nga ipamanunnù na nittam. Á nu mamanunnù kayu sù tunung, arán nawin gemma kurugan yù itaddán na, á arán nawin kurugan si Namarò. ¹² Si Apu Namarò lá yù paggapuán nayù tunung, á aggina lá yù makáwayyá nga mamanunnù nittam. Á awán ta tanakuán nu ari lá aggina yù makáwayyá nga mangiyigù ta tolay nga iyánga na ta lángl, onu mamagikáru ta tolay ta impiernu. Á yáyù nga awán ta pakáwayyá tam nga tatolay nga mamanunnù sù ira ikáttole tam.

Ari ittam nakuan Mappeddaráyaw

¹³ Ginnán naw laguk yawe kagiak ku nikayu, sikayu nga makkagi ta kunniaw: “Sangaw nu ummá, onu sangaw nu tádday ággaw, umay kami ta tanakuán nga ili. Á maggián kami ta tangaragun, á makkompará kami, tapè aru sangaw yù ganánsiá mi.” ¹⁴ Ngam arán naw nakuan kagian ta kunnian. Arát tam ammu yù mesimmu nittam sangaw nu ummá! Ta mabibi ittam ta dabbuno, nga kun na angá nga duttál, á manganánuán, lummakin. ¹⁵ Yawe lá yù mepángngá nga kagiat tam nakuan, “Nu ure ni Namarò, á matolay ittam, á kunniawe yù akkuát tam.” ¹⁶ Ngam sikayu, ngattá, ta mappeddaráyaw kayu? Ngattá, ta ipappeddaráyo naw yù akka-akkuán naw, ta narákè ngámin yù pappeddaráyo na tolay. ¹⁷ Á nonopan naw yaw. Makaliwá yù tolay nu arán na akkuán yù napiá nga ammu na nga akkuán na nakuan.

5

Sikayu nga Maríku, Imugurán naw yù Akkuán naw

¹ Á sikayu nga maríku, ginnán naw laguk yù kagiak ku nikayu. Makkulukulè kayu nakuan ána makkalli kayu megapu sù jigá nga umay sangaw nikayu! ² Ta marúnù ngámin nga kukuá naw nga makkakerumá, ána mabobbotán yù ngámin nga gámi naw, nga kanan

* 4:6 Proberbio 3:34

na ulak ána kimi. ³ Á masináyan yù pirâ naw nga buláwán ána pinaláta, gapu ta binuttul naw nga arán naw iniyusá ta mangabbák. Á yù kukuá naw nga masináyan, yáyù massistígu ta karáké naw. Yù binuttul naw nga kukuá naw yù kun na api nga kán lá kán ta baggi naw, ta inukkuk naw yù kukuá naw sù ira maporián nga ággaw nga pamanunnù ni Apu Namarò.

⁴ Ginnán naw, sikayu nga egga yù ákkomanán na! Jinarogâ naw yù ira patarabakuan naw ta ákkomanán naw. Á nakaliwatán naw yù ira nakigaták nikayu, ta arán naw ira sináddanán. Á si Namarò nga Kotunán, naginná na yù kinagi ra ta meyanung sù akka-akkuán naw. ⁵ Á sikayu nga maríku, nonopan naw lá yù nagingá nga aruátan naw ta dabbuno ána yù ipabbúyá naw. Kunnay kayu ta báka nga matabá, nga arán na ammu ta pártiad da sangaw. Ta kagian naw ta awán ta awágan naw, á arán naw manonò yù pamanunnù ni Apu Namarò. ⁶ Á iddá naw lá jinigirigá yù ira matunung nga tatolay nga ari nakaliwâ nikayu, á pinapáte naw ira, mássiki nu siminulù ira nikayu.

Máwák nga Magattam ittam

⁷ Á sikayu nga wáwwagi nga manguruk kâ Apu, magattam kayu lábbi nga magiddak ta labbè ni Apu ta dabbuno. Nonopan naw yù minákkomán. Magattam lá nga magiddak ta kagaták na amme na. Ta iddagán na bi yù mapolu nga urán ána yù maporián áddè ta kalutu na. ⁸ Á sikayu, magattam kayu gapay nga magiddak lábbi. Ipasigaggá naw yù ángnguruk naw kâ Apu Kesu. Ta mabíkin, á duttál ta dabbuno. ⁹ Ari kayu makkakápalíwâ, wáwwagi, tapè arán na kayu panunnután ni Apu. Ta ajanin yù umay mamanunnù, á mabi lá nga tullung, ta kun na tolay nga tullung ta puertá nga nabukatán.

¹⁰ Wáwwagi, nonopan naw yù ira ngaw ábbilinán ni Namarò nga jinok na ta mangi-pakánammu sù bilin na, tapè párigán naw ira. Ta inattamád da yù aru nga makkakerumá nga jigá ána pinalurò da yù inipakuá ni Namarò nira. ¹¹ Á ibiláng tam ta magayáyá nga iddukan ni Namarò yù ngaw ira tatolay nga napasigaggá yù ángngikatalá da kâ Namarò, nga nagattam ta aru nga jigá, tapè palurotad da yù inipakuá ni Namarò nira. Narámak naw si Job, nga nagattam ta aru nga jigá, á ammu naw ta napiá lá yù ure ni Apu Namarò ta meyanung kuna, ta pinamapiá ni Apu yù ággián ni Job. Ta minángngikállá si Namarò ána nepallá yù allá na sù ira tatole na.

¹² Wáwwagi, yawe yù kagiak ku nga importá nga arán naw máttamán. Ari kayu bulubugá mappagássingán, mássiki ta lángi onu dabbuno onu tanakuán nga pagássingán naw. Napiá lá nu kagian naw, “Wan,” nga awán ta pagássingán na, ta yáyù lá ikáyá ni Namarò. Á napiá gapay nu kagian naw lá, “Ari,” nga awán ta pagássingán na, tapè arán na kayu panunnután ni Namarò.

Máwák nga Makimállá ittam kâ Apu Namarò

¹³ Á nu egga nikayu yù tolay nga marigirigá, makimállá lá kâ Namarò. Á nu egga nikayu yù magayáyá, á ikansion na yù paddáyo na kâ Namarò. ¹⁴ Nu egga nikayu yù matakí, ipágál na yù ira karakalán nayù ira manguruk, tapè ipakimállá da kâ Namarò ána denuád da ta pannakabaggi ni Apu Kesu. ¹⁵ Á ta pakimállá naw, nu kuruk nga ikatalá naw si Namarò, á pammapián na yù matakí. Á nu egga gapay yù pakaliwatán na, á pakomán na.

¹⁶ Á nu nakaliwâ kayu, makkakápalappâ kayu ta liwâ naw, á ipakimállá naw yù ira kábulun naw, tapè mammapiá kayu. Ta nepallá yù pakáwayyá nayù pakimállá na tolay nga napiá ána matunung. ¹⁷ Kunnay kâ Elias nga ábbilinán na ngaw ni Namarò. Toley gemma lá si Elias nga kagittá tam. Á nakimállá kâ Namarò ta ari bì magurán, á ari nagurán ta tallu ragun ta gadduá megapu sù pakimállá na. ¹⁸ Á nakimállá si Elias má ta iyawâ ni Namarò yù urán, á nagurán ána nattuubu ána nabbungá yù inimulá nayù ira tatolay.

¹⁹ Wáwwagi, nu egga nikayu yù tolay nga nekátuay ta pangikatalá na kâ Namarò ána minárayu sù kuruk nga bilin na, á máwák nga umay laguk yù táddyay nikayu nga manabarang kuna, tapè mattoli nga manguruk kâ Apu. ²⁰ Á nonopan naw yawe. Nu ajan yù tolay nga nalliawâ, nga ipetoli naw ta panguruk na kâ Apu Namarò, á mássiki nu kítáru yù liwiliwâ na, á mapakomá, á melilli yù ikararuá na sù pamagikáru ni Namarò. Áddè na yù.

* 5:17 Meyannung sù pakimállá ni Elias, 1 dagiti Ar-ari (1 Patul) 17:1; 18:1-2, 42-45

Yù Napolu nga Túrâ ni Eduru

Yù Meyannung sawe Túrâ ni Eduru

Yawe yù napolu nga túrâ ni Eduru sù ira mangikatalà kâ Apu Kesu, nga narigirigâ megapu sù ángnguruk da kâ Apu. Á ipanonò na nira yù pagattam ni Apu Kesu sù ketapil na megapu nira, tapè attamád da gapay yù jigâ da nga kunnay kuna. Ta negagángay ta jigirigátan nayù ira ari manguruk yù ira manguruk kâ Apu Kesu. Á sittam nga manguruk, nu attamát tam lâ yù balle tam nga jigâ nga kunnay sù pagattam ni Apu Kesu, á aijan yù napiá nga iddanamát tam, nga kesipâ tam kâ Apu ta lángi.

Yù Mayán nayù Túrâ

Yù Paddios ni Eduru ána yù Ipakimállà na (1:1-2)

Yù Napiá nga Iddanamán nayù ira Manguruk kâ Apu (1:3-12)

Nágalán ittam tapè Palurotat tam lâ yù Napiá (1:13-25)

Yù Talluá nayù ira Bagu nga Manguruk kâ Apu (2:1-8)

Yù Meyannung sù Ággangguá nayù ira Tatole ni Namarò (2:9-25)

Yù Panabarang ni Eduru sù ira Magatáwa (3:1-7)

Magattam ittam ta Jigâ Mássiki nu Akkuát tam yù Napiá (3:8-4:19)

Yù Initaddán ni Eduru sù ira Karakalán (5:1-14)

¹ Sikán si Eduru, nga minángngilayalayâ nga jinok ni Apu Kesu Kiristu ta umay mangi-pakánámmu sù bilin na. Á mattúrákâ ní kayu nga manguruk kâ Namarò, sikayu nga nabbakkuí, nga nawwarawará, nga minay nakipaggián sù ira tatolay sù ira purubinsia na Pontu ána Galasia, Kappadosia, Asia ána Bisinia. ² Si Namarò nga Yáma tam, ninonò na kayu áddè ngaw lage naw neyanâ, á sinullà na kayu, tapè sikayu yù manguruk kâ Apu Kesu Kiristu ána mapakomá kayu ta liwiliwá naw, megapu sù dága ni Apu Kesu nga nallowán sù ketapil na ta kurù. Á iniyawâ ni Namarò ní kayu yù Mangilin nga Ikararuá na ta mangabbák ní kayu, tapè mapakarenuán yù nonò naw, á mabbalin kayu ta napiá ána mangilin nga tatole na.

Á yawe ipakimállà ku kâ Namarò, ta uputan na kayu nga ikákkállà, tapè napiá lâ yù ággigián naw ána yù gawagawáyán naw.

Yù Napiá nga Iddanamán nayù ira Manguruk kâ Apu

³ Dayáwat tam si Namarò, nga Yápu ána Yáma ni Apu Kesu Kiristu nga Yápu tam. Ta gapu ta nepallà yù allà na nittam, iniyawâ na nittam yù bagu nga áttole tam megapu sù paginnanole ni Apu Kesu Kiristu. Á yáyù nga iddanamát tam yù pamaginnanole ni Namarò nittam ána kesipâ tam sù áttole na ta áddè ta áddè. ⁴ Á iddanamát tam gapay yù iyawâ ni Namarò sangaw sù ira tatole na, nga pinakappián na ta lángi, nga ari marúnú onu maddán, ána ari mapatalián. ⁵ Á gapu ta pangikatalà tam kâ Apu Kesu, taronán ni Namarò ittam megapu sù pakáwayyá na, áddè ta iyígù na ittam sangaw nu pagáddekán na ággaw.

⁶ Á gapu ta iddanamát tam yù pangisipâ ni Namarò nittam, magayáyâ ittam laguk, mássiki nu marigirigâ ittam lábbi kunangane. ⁷ Á nu maparubát tam yù jigâ, attamát tam lâ, tapè mepasingan ta napasigaggâ yù ángngikatalà tam kâ Apu Kesu. Á ta ángngarigán, aijan yù buláwán, nga ari gemma mannanáyun, ngam mararál sangaw. Á lunágad da ta api, tapè mapakarenuán ána mepasingan yù kapiánán na. Á kunnian, nu maparubát tam yù jigâ, mepasingan ta kuruk nga napasigaggâ yù ángngikatalà tam kâ Apu. Ta más napiá gemma ánnè ta buláwán yù ángngikatalà tam kâ Apu. Á ta pattoli ni Apu Kesu Kiristu nga mammaguray ta dabbuno, mepotun nga mesipâ ittam sù dalingárang na, ána meparáyaw ittam megapu sù ángngikatalà tam kuna.

⁸ Á wáwwagi, mássiki nu arán naw paga nasingan si Apu Kesu, ngam iddukan naw. Á sittam ngámin nga manguruk kuna, mássiki nu arát tam masingan kunangane, á ikatalà tam. Á yáyù nga ayatán ittam, á nepallà yù pagayáyâ tam nga awán ta keyarigán na, ⁹ gapu ta meyígù ittam nga mesipâ kâ Namarò ta lángi ta áddè ta áddè, megapu sù ángngikatalà tam kâ Apu Kesu.

¹⁰ Á yù ira ngaw ábbilinán ni Namarò, mássiki nu inipakagi ni Namarò nira yù pangikállà na ána pangiyígù na nittam, á arád da nánámmuán. Á kitaláppâ ira nga mannonò nu kunnasi yù ángngiyígù ni Namarò nittam, tapè mesipâ ittam sù mannanáyun nga áttole na. ¹¹ Á aijan nira yù Mangilin nga Ikararuá ni Namarò, á inipakánámmu na ngaw nira ta umay yù Mangiyígù noka, nga marigirigâ ána matay, á ta kabalin na mangiyangngá,

á mepotun nga meparáyaw. Á ninononò da nu asinni yù ubobugad da nga umay, ána sangaw nu nni yù kapalurò na. ¹² Á inipakánnámmu ni Namarò nira ta ari mapalurò ta keggá ra yù inipakagi na nira, ngam ta keggá nayù ira tatolay nga tumubbâ nira noka, nga sittam kunangane. Á napalurokin, ta minayin nikayu yù ira mangilayalayâ sù napiá nga dámak megapu sù pakáwayyá nayù Mangilin nga Ikararuá nga naggapu ta lángi. Á yù ira daroban ni Namarò ta lángi, karagatád da gapay gigiámmuan nu kunnasi yù ángngiyígu ni Namarò nittam.

Nágalan ittam tapè Palurotat tam lâ yù Napiá

¹³ Á gapu ta pangikállà ni Namarò nittam, imugurát tam laguk yù nonopat tam, á paránat tam laguk yù nonò tam, tapè dán nga naparán ittam nga manuppál sù napiá nga ipakuá ni Namarò nittam. Á iddanamát tam lâ yù allà ni Namarò nga umay nittam ta pattoli na sangaw ni Apu Kesu Kiristu. ¹⁴ Á sikayu gapay, gapu ta ánâ na kayin ni Namarò, tuppálan naw laguk yù kagian na, tapè ánâ na kayu nga manguruk. Arán nawin akkuán yù kinaragatán naw ngaw olu, lage naw nánnámmuán yù kuruk nga bilin ni Namarò. ¹⁵ Mangilin si Namarò, ána matunung ána napiá lâ yù nonò na. Á gapu ta aggina yù nagágál nittam, tuppálat tam laguk yù ipakuá na nittam, tapè napiá gapay yù ngámin nga akka-akkuát tam, á mangilin ána matunung ittam gapay nga kunnay ká Yápu tam. ¹⁶ Ta aijan yù neturá nga kinagi ni Namarò, nga kun na, “Tunungan naw yù nonò naw ta kunnay sù napiá nga nonò ku, ána ari kayu malliwâ, tapè mangilin kayu nga kunnay nikán. Ta sikán yù mangilin nga matunung ána napiá lâ yù nonò ku, á awánâ ta liwâ.”*

¹⁷ Á gapu ta abbúnat tam si Namarò ta “Ammò” sù pakimállà tam kuna, á pakimorayat tam laguk ta keggá tam sawe dabbuno. Ta matunung nga mamanunnù si Namarò. Á ta pamanunnù na sù ira ngámin nga tatolay, arán na ira irumá, ngam bálatan na ittam ngámin nga katággítáday ta meyanung sù akkuán na. ¹⁸ Ta ammu tam yù inipappagá ni Apu Namarò ta pamalubbáng na nittam, tapè arát tamin tuttulan yù kustombare nga inittuddu nayù ira ngaw naggaká nittam, nga awán ta serbi na. Á ari gemma marúnù yù inipappagá na nga kunnay ta buláwán onu pinaláta. ¹⁹ Ta mannanáyun yù pinalurò na, gapu ta inipappagá na yù dága ni Apu Kesu Kiristu nga netapil ta pate na ta kurù megapu nittam. Aggina yù meyarik ta karneru nga napiá ána marenu nga awán ta jikkú ta baggi na, nga meyatáng ká Namarò. ²⁰ Á lage na pararò ni Namarò ta dabbuno, sinalákkuruk na ta doban na si Apu Kesu Kiristu, nga awán ta liwâ na, ta umay magikáru ta liwâ tam ngámin nga tatolay. Ngam kunangan lâ yù kepalappâ na ta panguriánán nga ággaw, tapè mábbágán ittam. ²¹ Á gapu ta ketapil ni Apu Kesu megapu nittam, ikatalà tam si Namarò. Á pinaginnanole ni Namarò si Apu Kesu ána inipotun na ta lángi nga meparáyaw. Á yáyù nga napasigaggá yù ángngikatalà tam ká Namarò ána yù ággiddanáma tam ta paginnanolayan na ittam ána ipotun na ittam gapay.

²² Á gapu ta napakarenuánin yù nonò tam, megapu sù ángnguruk tam sù bilin ni Namarò, á ari ittam áppè aya-ayâ, ta makáwayyá ittam nga mangayá sù ira kábulut tam nga manguruk. Á yáyù makkaká-iddù kayu laguk megapu sù napiá nga nonò naw. ²³ Ta kunnay kayin ta noli nga neyanâ. Á yù bagu nga áttole naw, ari negittá sù napolu nga keyaná naw ta tolay nga matay. Ta kunnay ta noli nga neyanâ yù tolay, nga neddán sù áttole ni Namarò, nga ari bulubugá matay. Á iniyawâ na nikayu yù bagu nga áttole naw megapu sù bilin na nga kinuruk naw, nga mannanáyun nga ari mapatalián. ²⁴ Á yáyù kebalinán nayù inipeturá na ngaw ni Namarò, nga kun na, “Kun na kaddà yù ira tatolay.

Á kun na lappo na kaddà yù keparáyo ra.

Ta mabi ira lâ matay,

ta kun na kaddà nga malelay

ána yù lappo na nga mapannâ.

²⁵ Ngam mannanáyun yù ubobuk ni Namarò,

nga ari mapatalián ta áddè ta áddè.”†

Á yane ubobuk ni Namarò yù napiá nga dámak nga nelayalayâ nikayu.

2

Yù Talluá nayù ira Bagu nga Manguruk ká Apu

* 1:16 Libitiko 11:44-45; 19:2 † 1:25 Isaya 40:6-8

¹ Á gapu ta manguruk kayin sù bilin ni Namarò, á ari kayin laguk mangngúá ta narákè. Á ari kayu áppè pípiá. Ari kayu massiri onu mangilogò. Ari kayu mappassil onu mallillibá. ² Á gapu ta iniyawâ na nikayu ni Namarò yù bagu nga áttole naw, á kunnay ta assítay nga kapángngiyaná nga makkaragá nga massusu, karagatán naw laguk nga bibbiran ána ginnán yù bilin ni Namarò, tapè tulluá yù ángnguruk naw ká Namarò ána ipasigaggá naw yù ángngikatalà naw kuna ta áddè ta keyígù naw. ³ Ta naparubán nawin gapay yù ángngikállà ni Apu Kesu nittam.

Yù Keyarigán nayù Batu nga Nanáddagán na Balay

⁴ Á dukki ittam laguk ká Apu Kesu, gapu ta aggina yù sigga-inànga nga manotolay nittam. Á yá keyarigán na yù batu nga inipuerá nayù ira tatolay, ngam kun na batu nga kapiánán nga iddukan ni Namarò, nga piníli na nga panáddagán na sù bale na nga paddayan na. ⁵ Á pangikatalà tam ká Apu Kesu, mepattatádday ittam gapay kuna nga kunnay sù ira batu nga paddayan ni Namarò ta bale na. Ta sittam ngámin nga manguruk kuna yù meyárik ta bale na. Á pabbalin na ittam gapay ta mangilin nga páppári nga masserbi kuna. Á yáyù nga makimoray ána maddáyaw ittam ká Namarò. Á alawatan ni Namarò yù pakimore tam kuna ána yù paddáyo tam kuna, nga kunnay ta pangiyátáng tam kuna, megapu sù kepattatádde tam ká Apu Kesu Kiristu.* ⁶ Á aijan yù inipetúrâ na ngaw ni Namarò nga kunniawe:

“Aijan yù piníli, nga ipè sù giák ku ta Sion,
nga kunnay sù batu nga kapiánán nga iddukak ku,
nga pamatáddagák ku sù balé.

Á yù ngámin nga tatolay nga mangikatalà kuna,
ari ira bulubugá mepasiránán.”†

⁷ Á yáyù nga si Apu Kesu Kiristu yù kuruk nga ibiláng naw ta kapiánán nga máwák naw, sikayu nga mangikatalà kuna. Ngam yù ira nga manaki kuna, mepasiránán ira sangaw, ta aijan yù netúrâ gapay nga sinalákkuruk na ngaw ni Namarò nga mesimmu nira, nga kunniawe:

“Yù batu nga nanakitád da,

Aggina yù nabbalinin ta panáddagán nayù balay.”‡

⁸ Á netúrâ gapay yù kunniaw:

“Yane yù batu nga kesiddúkalán nayù ira tatolay,
tapè mapalakak ira.”§

Á kunnay ta mesiddúkal ira gapu ta arád da kinuruk yù bilin ni Namarò. Á yáyù nga sinalákkuruk ni Namarò ta mabbalin ira ta kunnay ta mesiddúkal nga mapalakak.

Yù Meyannung sù Ággangngúá nayù ira Tatole ni Namarò

⁹ Ngam sittam nga manguruk sù bilin ni Namarò, piníli na ittam nga sinullá na ta páppári na ittam nga masserbi kuna. Inagálán na ittam ta manguruk ittam kuna, á pinabbalin na ittam ta mangilin nga tatole na, tapè ililli na ittam sù kallá, ána ituluk na ittam sù nawák na nga makapállá. Á yáyù nga doban na ittam ta mangiparámak sù kapiánán na. ¹⁰ Á sù ngaw, arán na ittam tatole ni Namarò, á arát tam ammu yù allá na. Ngam kunangane, tatole na ittam, á ikákkállà na ittam.

¹¹ Wáwwagi nga iddukak ku, makipaggiát ittam ta mabi lâ sawe dabbuno, ta ari saw yù paggianát tam, nu ari galá yù aijan ta lángi nga pinarán ni Namarò megapu nittam. Á yáyù nga tabarangát takayu, ta arayyuán naw yù narákè nga karagatán na tatolay sawe dabbuno, nga mangontará ta nonò tam nga manguruk. ¹² Á uputat tam laguk nga akkuán lâ yù napiá, tapè ipasingat tam yù napiá tam sù ira nga ari manguruk ká Apu. Á mássiki nu lillibatad da ittam, á mabbabáwi ira sangaw, gapu ta masingad da yù napiá nga akka-akkuát tam. Á sangaw nu umay si Apu, á maddáyaw ira gapay kuna.

Tumulú ittam sù ira Mammaguray

¹³ Á tumulú ittam laguk sù ira makáwayyá ta gubermente, tapè meparáyaw si Apu Kesu. Á kurugat tam yù tunung nga kagiad da, nepatalugáring sù tunung nayù kátannangán nga mammaguray. ¹⁴ Á kurugat tam gapay yù gubinador, gapu ta aggina yù doban nayù kátannangán nga mammaguray ta umay mamággáng sù ira mangngúá ta narákè ána maddáyaw sù ira mangngúá ta napiá. ¹⁵ Ta yawe yù ure ni Namarò, ta akka-akkuán naw

* 2:5 Ta meyannung sù meyátáng ká Namarò, bibbiram mu Roma 12:1; Kebru 13:15 † 2:6 Isaya 28:16; Roma 9:33

‡ 2:7 Salmo 118:22; Lukas 20:17 § 2:8 Isaya 8:14; Roma 9:33

yù napiá nga ipakuá na nikayu, á pagimammatan naw yù ira nga magubobuk sù arád da ammu, nga awán ta kebalinán na, megapu sù napiá nga palurotan naw nga masingad da.

¹⁶ Á ari kayin laguk makiaripan ta narákè, gapu ta napalubbáng kayin, á tatole na kayu ni Namarò nga masserbi kuna. Á maguray lâ yù akkuán naw, á arán naw akkuán yù narákè, ngam tuppálan naw lâ yù napiá nga ipakuá ni Namarò nikayu, tapè mepasingan ta kuruk nga si Namarò lâ yù passerbián naw. ¹⁷ Makimoray kayu laguk ta ngámin nga tatolay. Iddukan naw yù ira wáwwagi tam ta ángnguruk tam ká Apu. Makiyápu kayu ká Namarò. Á makimoray kayu sù makáwayyá nga mammaguray.

Magattam ittam ta Jigâ nga kunnay ta Pagattam ni Apu Kesu

¹⁸ Á yawe yù kagiak ku nikayu nga aripan, ta napiá nu tumulù kayu sù ira passerbián naw, á pakimorayán naw ira, nga ari lâ yù ira masippà nga mangikállà, nu ari gapay yù ira mapporay. ¹⁹ Á napiá nu awán ta liwâ naw, ngam sigídá nga attamán naw lâ yù panigirigá da nikayu nayù ira passerbián naw, gapu ta nononopan naw si Apu Namarò, ta yáyù nga ayatán si Apu Namarò nikayu. ²⁰ Á ta ángngarigán nu malliwâ kayu, á mássiki nu attamán naw lâ yù panigirigá nayù yápu naw nikayu megapu sù liwâ naw, á yáyù mepángngà megapu sù liwâ naw, á ari kayu gemma meparáyaw. Ngam nu akkuán naw lâ yù napiá, á attamán naw lâ nu iddá da kayu lâ nga jigirigátan nayù ira passerbián naw, á magayáyá si Namarò laguk megapu nikayu.

²¹ Á yáyù nga inipagágál ni Namarò nittam, ta attamát tam lâ yù jigá nga umay nittam, nga kunnay ta pagattam ni Apu Kesu Kiristu, ta inattamán na yù panigirigá da kuna sù ketapíl na megapu nittam, tapè párigát tam yù napiá nga nonò na nga inittuddu na.

²² Awán bulubugá ta nakaliwatán ni Apu Kesu Kiristu.

Á ari bulubugá nassiri.*

²³ Á sù panguyu-uyo ra kuna, arán na ira sibbák.

Á sù panigirigá da kuna, arán na ira napporayán.

Ta inikatalà na lâ si Namarò nga mamanunnù, nga matunung yù ámmanunnù na.

²⁴ Á nabbaluntáriu si Apu Kesu nga nagikáru ta ngámin nga liwâ tam sù pate na ta kurù, tapè arát tamin akkuán yù narákè, ngam akkuát tam lâ yù napiá.

Á gapu ta kabigák na, napakomá ittam,

ánna napammapiá yù ággiát tam ká Namarò.

²⁵ Sù ngaw, kunnay ittam ta karneru nga magawa-awáwán.

Ngam nabbabáwi ittamin, á nattoli ittam nga tumuttuttul ká Apu nga minápparák nga manaron nittam ánna mangiyigù nittam.

3

Yù Panabarang ni Eduru sù ira Magatáwa

¹ Á yawe gapay yù kagiak ku nikayu nga bábbay nga egga yù atáwa na. Tumulù kayu nga katágítádday sù atáwa na. Á nu ari paga nanguruk yù áttáwa naw sù bilin ni Namarò, á manguruk ira sangaw megapu sù napiá nga akkuán naw. Arán naw máwák nga tabaragán ira, ² gapu ta masingad da yù napiá nga akka-akkuán naw ánna yù pakimore naw ká Namarò. ³ Á arán naw lâ nonopan yù ámmakástá naw ta baggi naw ánna duddù naw, ánna pabbisti naw ta nanginá nga gámi, ánna paddusáriu naw ánna passákkaláng naw ta buláwán. ⁴ Ngam yù kuruk nga pappakástá naw yù napiá nga nonò naw, nga mepasingan sù napiá nga ágganguá naw. Ta yù kakástá naw nga mannanáyun yù ángngikállà naw ánna tulù naw, nga kuruk nga napiá ta ánninganán ni Namarò.

⁵ Á ta kunnian gapay yù pappakástá nayù ngaw ira napiá nga bábbay nga nagiddanáma ká Apu, ta napiá yù nonò da ánna yù ágganguá ra. Á siminulù ira gapay sù áttáwa ra. ⁶ Á yù tádday si Sara ngaw, nga atáwa nayù ngaw Kákay Abrakam. Nakiyápu si Sara sù atáwa na, á gininná na yù kinagi na kuna. Á sikayu, mesipá kayu sù ira ginaká ni Sara, nu napiá lâ yù akkuán naw, á awán laguk bulubugá ta ikássing naw.

⁷ Á kunnian gapay nikayu nga lálláki nga egga atáwa na. Maggián kayu sù áttáwa naw, á ikákkállà naw ira, ta makapi ira ánnè nikayu. Á iddi-iddukan naw ira, ta naggigittá kayu nga iniddán ni Namarò ta áttole naw nga awán ta áddè na, megapu sù allà na nikayu. Ikákkállà naw laguk yù ira áttáwa naw, tapè ginnán ni Apu Namarò yù ipakimállà naw.

Magattam ittam ta Jigâ Mássiki nu Akkuát tam yù Napiá

* 2:22 Isaya 53:9

⁸ Á yawe yù maporián nga kagiak ku nikayu. Mattatádday kayu laguk ta nonò naw. Á makkaká-ayá kayu nga kunnay ta mawwawági, áнна mepaddaddam kayu sù ira maraddam. Á makkaká-allá áнна makkakátulù kayu. ⁹ Arán naw bálatan ta narákè yù mangguá nikayu ta narákè. Arán naw papporayán yù mapporay, ngam ipakimállà naw ira, tapè ikállà ni Apu ira. Ta yáyù inipagágál ni Namarò nittam, ta ikállà tam yù ira kábulut tam, tapè ikállà na ittam gapay ni Namarò. ¹⁰ Á yáyù gapay yù kinagi ni Namarò nittam, nga inipetúrâ na ngaw:

“Nu ikáyâ naw ta magayáyâ kayu,
áнна napiá yù ággián naw,
patukkatan naw laguk yù narákè nga pagubobuk naw,
áнна ari kayu massiri.

¹¹ Pallikuránán naw yù narákè,
á akkuán naw lá yù napiá.

Uputan naw yù pakkakápiá naw sù ira kábulun naw,
tapè mepagimammâ kayu.

¹² Ta taronán ni Namarò yù ira napiá nga tolay,
á ginnán na yù ipakimállà da kuna.

Ngam makikontará si Namarò sù ira nga mangguá ta narákè.*”

Akkuát tam lá yù Napiá, Mássiki nu Jigirigátad da ittam

¹³ Á nu maláppâ kayu, áнна napiá lá yù akka-akkuán naw, egga panò yù tolay nga manganni nikayu? Awán! ¹⁴ Á ta ángngarigán, nu aijan yù mangguá nikayu gapu ta napiá lá yù akkuán naw, á paguráyán naw lá. Ari kayu laguk maganássing nira, á ari kayu mabburung, gapu ta pagayáyatan na kayu ni Namarò. ¹⁵ Á makimoray kayu kâ Apu Kesu Kiristu áнна pakiyápuán naw. Á nonopan naw yù kingguá ni Apu megapu nikayu, tapè dán nga napanán kayu nga tubbák sù ira ari manguruk nu iyabbú da nikayu yù meyanung sù iddanamán naw kâ Apu. ¹⁶ Á pakimorayán naw ira lâ, á alúnay lâ yù ákkittabbák naw nira. Arán naw laguk akkuán yù ipappasirán naw, ta nu aijan yù ira mallillibâ nikayu megapu sù ángnguruk naw kâ Apu Kesu, aggira yù mepasiránán sangaw megapu sù napiá nga akkuán naw. ¹⁷ Á más napiá nu attamát tam yù jigâ nga umay nittam megapu lá sù napiá nga akkuát tam, nu yáyù ure ni Namarò, ánnè ta pagattam tam ta jigâ megapu ta pangguá tam ta narákè.

¹⁸ Ta nonopan naw si Apu Kesu Kiristu, nga awán bulubugá ta liwâ na,
ngam inattamán na yù pate na ta kurù.

Á mittán lá nga natay megapu nittam ngámin nga tatolay.

Á yáyù nga aringin bulubugá matay.

Ta kustu nen yù pagikáru na ta liwiliwâ tam,
tapè pakkápián na ittam kâ Namarò.

Aggina yù kuruk nga napiá áнна matunung,
nga netapil megapu nittam ngámin nga nakaliwâ.

Á yù baggi na lá yù natay,
ngam matolay paga yù ikararuá na.

¹⁹ Á minay yù ikararuá na sù gián nayù ira ikararuá nayù ira námmatay nga nebaluk, ta en na inilayalayâ yù bilin ni Namarò nira. ²⁰ Á yù ira námmatay, aggira yù ngaw ira nga ari nanguruk kâ Namarò ta keggá ri Lákay Noe. Á si Namarò, nabayák nga nagattam nga nagiddak sù ira tatolay, abernu manguruk ira. Á kabalín di Noe nga nappadday ta dakal nga barangay, baddi lá yù ira nanguruk, nga neyígù nga ari natay ta danum. Walu ira lá nga nanguruk, nga simillung sù barangay, nga limittá ta utun na danum ta kalítù na dabbuno.

²¹ Á kunnay ta keyígù da, nga nelilli ta dakal nga danum, kunnian gapay yù keyarigán nayù keyígù tam. Ta makirigù ittam, nga panákkilalán ta keyígù tam. Á yù kebalinán na ari yù kapakarenu nayù baggi tam, ngam yù pangipasingat tam ta pabbabáwi tam ta liwiliwâ tam áнна yù kelilli tam sù pamagikáru ni Namarò. Á yáyù nga pinakomá na ittamin megapu sù paginnanole ni Apu Kesu Kiristu, á awán ta ipappasirát tam ta arubáng ni Namarò. ²² Á nattoli si Apu Kesu ta lángì, nga nagitubang ta pagitubangán nayù maráyaw nga mammaguray nga aijan ta jiwánán ni Namarò. Á tumulù kuna yù ira ngámin nga daroban na áнна yù ira ngámin nga makáwayyá.

* 3:12 Salmo 34:12-16

4

Ipasigaggà tam yù Pangikatalà tam kâ Apu Kesu Kiristu

¹ Á gapu ta inattamán ni Apu Kesu yù panigirigá da kuna ta keggá na ta dabbuno, á yáyù nga paránat tam yù nonò tam ta kunnay ta nonò na, tapè dán nga naparán ittam gapay nga magattam ta jigá nga umay nittam. Ta yù tolay nga magattam ta jigá, mepasingan ta panakitán na yù narákè áнна pinatukká na yù palliwá na. ² Á ari ittam laguk akkuán yù narákè nga karagatán na baggi tam, nga negagángay ta tolay ta dabbuno. Ngam akkuát tam galá yù ipakuá ni Namarò nittam ta keggá tam paga nga matolay. ³ Kustu nen! Arán naw akkuán má yù narákè nga kunnay ta kingnguá naw ngaw lage naw nanguruk. Nakáppak kayin nga mangnguá ta kunnay ta kingngi-kingnguá naw ngaw sù ari kayu paga nanguruk kâ Apu. Ta kingnguá naw yù narákè nga kinaragatán naw, áнна arán naw garè inigaggak yù baggi naw áнна nonò naw. Á nagillellaw kayu, áнна pinatturù naw yù narákè nga kingnguá naw áнна pappabúyá naw. Á nakimorayán naw ngaw yù ira sináddios, mássiki nu pinappalán na kayu ni Namarò ta arán naw ira pakimorayán. ⁴ Á kunangane, nánawán nawin yù ngámin nga narákè nga kustombare naw, á mapállá sangaw yù ira kábulun naw, gapu ta ari kayu mepulupulù nira nga mamatturururù sù akkuád da. Á yáyù nga uyu-uyawad da kayu. ⁵ Ngam paguráyán naw lá, ta meyarubáng ira sangaw kâ Namarò nga mamestigá nira, á máwák nga tabbagad da, ta aggina yù naparán nga mamanunnù nittam ngámin nga matolay paga, áнна yù ira námmatay. ⁶ Ta yáyù gapu na nga nelayalayá ngaw yù napiá nga dámak nga meyanung kâ Apu sù ira námmatay, nga natayin yù baggi ra nga napanunnután nga kunnay sù pamanunnù ni Namarò ta ngámin nga tatolay ta meyanung sù kingnguá ra. Á nu manguruk ira, mepattolay ira kâ Namarò megapu sù Ikararuá na.

Yù Ipakuá ni Namarò nittam Lage na Pattoli ni Apu

⁷ Duttálin yù pagáddékán na ággaw. Á yáyù nga máwák tam nga imugurán yù nonò tam áнна yù akkuát tam, tapè aijan yù awayyá tam nga makimállá kâ Apu. ⁸ Á yù olu nga akkuát tam laguk, makkaká-iddi-iddù ittam. Ta nu napasigaggá yù pakkaká-iddù tam, á pakomát tam laguk yù ira kábulut tam ta aru nga pakaliwatád da. ⁹ Á napiá nu magayáyâ ittam nga mamaddulò sù ira nga umay ta bale tam, nga ari mabbábáng nga mangilágum nira.

¹⁰ Á sittam nga katággítádday yù iniddán ni Namarò ta pakáwayyá na. Á yáyù nga máwák tam nga iyusá yù pakáwayyá tam ta pangabbák tam sù ira kábulut tam, nga kunnay ta mekatalá nga masserbi kâ Namarò. ¹¹ Á ta ángngarigán, nu aijan nikayu yù tolay nga iniddán ni Namarò ta pakáwayyá na nga mangilayalayá, á máwák na laguk ilayalayá ta napiá yù bilin ni Namarò. Onu yù tolay nga iniddán ni Namarò sù pakáwayyá na nga mangabbák, á iyusá na laguk yù sikan na baggi na nga neyawá kuna ta pangabbák na sù ira kábulun na. Á maguray lá yù ipakuá ni Namarò nittam, akkuát tam lá ta napiá, tapè meparáyaw si Namarò megapu kâ Apu Kesu Kiristu, nga maddalingáráng nga kotunán nga mammaguray ta áddè ta áddè. Ammán.

Yù Pagattam tam ta Jigá megapu ta Pangikatalà tam kâ Apu Kesu

¹² Wáwwagi nga iddukak ku, ari kayu mapállá sù jigá nga umay nikayu. Ta negagángay ta marigirigá ittam ngámin nga manguruk kâ Apu. Á máwák nga maparubán tam yù jigá, tapè mepasingan ta napasigaggá yù ángnguruk tam kâ Namarò. ¹³ Ngam magayáyâ kayu nu attamán naw yù jigá nga umay nikayu, gapu ta kunnay ta mesipá kayin kâ Apu Kesu Kiristu sù pagattam na ta jigá, tapè mepagayáyâ kayu gapay kuna, sangaw nu manoli, nga mangipalappá sù paddalingáráng na áнна karáyo na.

¹⁴ Á nu iluddè da kayu áнна uyu-uyawad da kayu megapu ta ángnguruk naw kâ Apu Kesu Kiristu, magayáyâ kayu, ta yáyù panákkilalán ta aijan nikayu yù Mangilin nga Ikararuá ni Namarò nga kotunán. ¹⁵ Á nu attamán naw yù jigá, ari nakuan megapu ta pangnguá naw ta narákè, nga kunnay ta mamapátay, makkokò, onu mabbebbek. ¹⁶ Ngam nu marigirigá ittam megapu sù panguruk tam kâ Apu Kesu Kiristu, ari ittam mepasiránán. Dayáwat tam galá si Namarò gapu ta tatole na ittam.

¹⁷ Á duttálin yù pamanunnù ni Namarò, nga mamegapu nittam nga tatole na nga manguruk kuna. Á nu sittam nga manguruk kuna yù mapolu nga panunnután na, anni panò yù mesimmu sù ira nga manaki nga manguruk sù napiá nga bilin na? Nerallá sangaw yù pamagikáru ni Namarò nira. ¹⁸ Á kunnian yù kebalinán nayù netúrá sù bilin ni Namarò, nga kun na,

“Á nu marigirigá yù ira napiá nga tatolay nga tumulù kâ Namarò, gapu ta pattuddu na nira, tapè meyigù ira,

á anni laguk yù mesimmu sù ira nga manaki kuna áнна yù ira ari makimoray kuna?"*

¹⁹ Á yáyù nga sittam ngámin nga marigirigá megapu sù ure ni Namarò, á magattam ittam laguk nga ari mapállà. Á uputat tam yù napiá nga akkuat tam, áнна ikatalà tam yù baggi tam kâ Apu nga namarò nittam, ta aggina yù mekatalà.

5

Yù Initaddán ni Eduru sù ira Karakalán

¹ Á aijan gapay yù kagiak ku nikayu nga karakalán. Ta sikán gapay yù kagittá naw nga karakalán, nga manaron sù ira káruán nga wáwwagi tam nga manguruk, nga kunnay ta mináppárak ta karneru. Á nasingak ku yù pangiyangngá ni Apu Kesu Kiristu. Á sikán gapay yù tádday nga mesipà kâ Apu Kesu sangaw nu mepalappá nga maddalingárang nga maráyaw. ² Á yawe yù itabarang ku nikayu. Taronán naw laguk yù ira tatolay nga inikatalà ni Namarò nikayu, nga kunnay ta karneru na. Á napiá nu magayáya kayu nga manaron nira, nga ari napuersá, nga ari gapay megapu ta pakkaragá naw ta ganánsiá naw. Ngam malláppa kayu nga manaron nira megapu galá sù ayá naw nga masserbi kâ Namarò.

³ Á sittam nga karakalán, ari ittam nakuan kitarok, ngam ipasingan tam sù ira taronát tam yù napiá nga nonò tam áнна ággangnuá tam, tapè mapiá nu párigád da ittam. ⁴ Á nu mássiki sittam ngámin, makkakátulù ittam, gapu ta aijan yù netúrâ sù bilin ni Namarò, nga kun na, “Kontarán ni Namarò yù ira mappeddaráyaw. Ngam ikákkállà na yù ira tumulù.”*

⁵ Á aijan gapay yù kagiak ku nikayu nga urián. Tumulù kayu sù ira karakalán naw. Á mássiki sittam ngámin, makkakátulù ittam, gapu ta aijan yù netúrâ sù bilin ni Namarò, nga kun na,

“Kontarán ni Namarò yù ira mappeddaráyaw.

Ngam ikákkállà na yù ira tumulù.”*

⁶ Á sittam ngámin, tumulù ittam laguk kâ Namarò, tapè mepotun ittam sangaw nu duttál yù ággaw nga pinili na. ⁷ Á ikatalà tam kâ Namarò yù ngámin nga ikaburung tam, ta aggina yù manaron nittam.

⁸ Á mappalán kayu, ta aijan si Satanas, nga ari magimammà nga magala-alek ta awayyá na nga mangnuá nittam, nga kunnay sù mabisin nga layon nga magalugù ta gabbuátan na nga kanan na. ⁹ Á ari kayu laguk tumulù kâ Satanas, ngam ipasigaggà naw yù ángngikatalà naw kâ Namarò. Ta ammu tam ta negittá yù jigá tam sù jigá nga attamán nayù ira káruán nga wáwwagi tam nga maggián sù ira makkakerumá nga lugár. ¹⁰ Á mabi lá yù pangiyangngá tam ta jigá. Á pappasá na, pammapián ni Namarò yù ággiát tam. Ta si Namarò yù minángngikállà, á inagálán na ittam ta mepattatádday ittam kâ Apu Kesu Kiristu, tapè mesipà ittam gapay kâ Namarò, nga meparáyaw ta áddè ta áddè. Á yáyù nga ábbágán na ittam áнна passikanan na ittam, tapè mapasigaggà yù ángnguruk tam kuna. ¹¹ Mammaguray si Namarò ta áddè ta áddè! Á mapalurò ngámin! Ammán.

¹² Á si Silas yù nangabbák nikán ta pattúrâ ku sawe ababbá nga túrà ku nikayu. Aggina yù wagi tam nga mekatalà. Á nattúráká nikayu, tapè tabarangát takayu, ta ipasigaggà naw yù ángngikatalà naw kâ Namarò, ta kuruk yawe nga kinagi nikayu nga meyannung sù allá áнна ángngabbák ni Namarò nittam. ¹³ Á yù ira wáwwagi naw sawe Babilonia,[†] nga pinili na gapay ni Namarò, manonò da kayu áнна iyabbù da nu kunnasi kayu gapay. Á kunnian gapay yù kagian ni Markus, nga aná ku. ¹⁴ Á makkaká-iddù kayu laguk. Á parè bì ta pagimammatan ni Namarò sikayu ngámin nga mepattatádday kâ Apu Kesu Kiristu, tapè napiá yù ággián naw. Yáyù lá yù áddè nayù kagiak ku.

* 4:18 Proberbio 11:31 * 5:5 Proberbio 3:34 † 5:13 Yù nelímak nga kebalínán na Babilonia támma yù ili na Roma.

Yù Mekaruá nga Túrâ ni Eduru

Yù Meyannung sawe Mekaruá nga Túrâ ni Eduru

Yawe yù mekaruá nga túrâ ni Eduru sù ira ngámin nga manguruk kâ Apu Kesu, á kagian na nira ta mappalán ira sù ira mattá-ábbilinán áнна yù ira áppè pípiá nga umay mangituddu ta tanakuán nga ari yù kuruk nga bilin ni Namarò, tapè ari ira melogò nga mangnguá ta narákè.

Á kagian na gapay yù itabbák da sù ira nga makkagi ta ari manoli si Apu Kesu, ta kukurugán nga manoli sangaw nu duttál yù ággaw nga sinullá ni Namarò, ngam ipappáná ni Namarò lá nga iddagán yù pabbabáwi ra ta liwá da nayù ira maporián nga umay mangikatalá kuna, tapè mesipá ira gapay kuna.

Yù Mayán nayù Túrâ

Yù Paddios ni Eduru áнна yù Pakimállá na (1:1-2)

Yù Ipakuá ni Namarò sù ira Manguruk kuna (1:3-15)

Yù Karáyo ni Apu Kesu Kiristu (1:16-21)

Yù Pamagikáru ni Namarò sù ira Mangituddu ta Siri (2:1-22)

Kuruk nga Manoli sangaw si Apu Kesu Kiristu (3:1-18)

¹ Sikán si Eduru, nga aripan ni Apu Kesu Kiristu, nga sinullá na ta umay mangilayalayá sù bilin na. Á mattúraká ní kayu nga mangikatalá kâ Apu Kesu Kiristu, nga Yápu tam nga mangiyígù nittam, sikayu ngámin nga neddán ta ángngikatalá na nga negittá sù ángngikatalá mi, megapu sù katunung nayù Yápu tam. ² Á parè bì ta ikákkállá na kayu ni Namarò, áнна pagimammatan na yù nonò naw, tapè napiá yù ággigian naw áнна gawagawáyán naw, megapu sù pakánnámmu naw kári Namarò kâ Apu Kesu Kiristu nga Yápu tam.

Yù Ipakuá ni Namarò sù ira Manguruk kuna

³ Á megapu sù pakáwayyá ni Namarò, iniyawá na nittam yù ngámin nga máwák tam, tapè makáwayyá ittam mamalurò sù ngámin nga napiá nga ipakuá na nittam. Á ábbágán na ittam gapu ta ikatalá tam si Apu Kesu Kiristu nga Yápu tam, nga magágál nittam ta manguruk kuna, tapè mesipá ittam sù karáyo na áнна yù kapiánán na. ⁴ Á yáyù nga iniyawá na nittam ni Namarò yù napiá nga inittabbá na nittam, tapè mepaggittá yù nonò tam sù napiá nga nonò na, áнна ari ittam laguk makagumán nga mangnguá ta narákè nga kunnay ta akkuán nayù ira nga ari manguruk megapu sù narákè nga karagatád da.

⁵ Á gapu ta makáwayyá si Namarò nga mangabbák nittam, malláppá ittam laguk nga mamalurò sù napiá nga ipakuá ni Namarò nittam, tapè mepasingan yù ángngikatalá tam kuna megapu sù napiá nga akka-akkuát tam. Á malláppá ittam nga magginná sù bilin ni Namarò, tapè malannapán yù kánnámmuát tam áнна ammu tam gapay yù mappili sù napiá.

⁶ Á yawe gapay yù akkuát tam. Gaggarat tam yù nonò tam, tapè arát tam nononotan yù narákè nga karagatán na baggi tam. Ta nu itulù tam yù nonò tam kâ Namarò, mapasigaggá yù ángngikatalá tam kâ Apu Kesu, á mangáppípiá laguk yù ákkiyápu tam kuna. ⁷ Á nu napiá yù ákkiyápu tam kâ Apu, aijan yù awayyá tam gapay nga makkaká-ayá áнна makkaká-iddù, sittam nga mawwawági megapu sù panguruk tam, á iddukat tam gapay yù ira ngámin nga ari paga manguruk. ⁸ Á nu uputat tam yù kunnian nga napiá nga nonò tam áнна ággangguá tam, á mepasingan ta napiá yù pabbalinán nayù ásserbi tam kâ Apu Kesu Kiristu, megapu sù pakánnámmu tam áнна pakiyápu tam kuna. ⁹ Ngam yù tolay nga ari mangupù sù napiá nga kunnian, kunnay ta buling, ta arán na kánnámmuán yù napiá nga ituddu ni Apu, áнна náttamán na yù pamakomá ni Namarò sù liwá na.

¹⁰ Á yáyù, kákkopuk ku, malláppá ittam laguk nga mamalurò sù ngámin nga napiá, tapè mepasingan ta kuruk nga piníli ni Namarò ittam, áнна inagálán na ittam ta mabbáli ittam ta tatole na. Ta nu uputat tam yù napiá nga ipakuá na nittam, ari ittam mekaná sù ira nga mangnguá ta narákè, áнна arát tam bulubugá melingun yù ákkiyápu tam kâ Apu Kesu. ¹¹ Á ta kunnian, ari ittam mepasiránán, ta ayatán si Namarò nga mamaddulò nittam sangaw sù mannanáyun nga pammagurayán ni Apu Kesu Kiristu nga Yápu tam nga mangiyígù nittam.

¹² Á yáyù nga talákkurugak ku nga sigidá nga ipanonò ní kayu ngámin dannian nga kinagi ní kayu, mássiki nu ammu nawin gemma, áнна napasigaggá yù ángnguruk naw sù napiá nga kánnámmuán naw. ¹³ Á napiá ta urè nu uputak ku nga ipanonò ní kayu dannian ta keggá nga matolay paga ta utun na dabbun. ¹⁴ Ta ammù ta mabikakin matay, ta yáyù inipakánnámmu

ni Apu Kesu Kiristu nikán. ¹⁵ Á yáyù nga mattúràkà kunangan, á sangaw nu awánakin, aijan yù awayyá naw nga manonò yù ngámin nga inittuddù nga meyanung sù panguruk tam.

Yù Karáyo ni Apu Kesu Kiristu

¹⁶ Á sikami nga kapulupulù na ngaw ni Apu Kesu Kiristu, inipakánnámmu mi nikayu yù pakáwayyá na áнна yù panoli na sangaw ta dabbuno. Á yù inipakánnámmu mi, ari gemma bídá nga nonotam mi. Ngam kuruk nga nasingam mi lápay yù dalingárang na. ¹⁷ Ta aijan kami ngaw nga nepulù ká Apu Kesu ta keggá na ta utun na puddul, ta pangipalappá nayù Yáma na ta karáyo na áнна dalingárang na. Á nagubobuk yù ngárál ni Namarò nga naggapu ta lángi, á kinagi na, “Yawe yù Aná ku, nga iddukak ku, á ayatána kuna,” kun na. ¹⁸ Á naginná mi yù kinagi nayù ngárál nga naggapu ta lángi, ta aijan kami nga nepulù kuna sù utun nayù mangilin nga puddul.*

¹⁹ Á gapu ta pakasingam mi sù dalingárang na áнна pakaginná mi sù ngárál ni Ammò Namarò, á yáyù nga napasigaggá yù ángnguruk mi ta kuruk yù bilin ni Namarò nga inipetúrà na sù ira ngaw ábbilinán na. Sù ngaw nga nabayák lage na minay si Apu Kesu nga neyaná, á kinagi ra yù ánge na nga mammaguray. Á napiá nu tángngagan naw laguk yù bilin ni Namarò, tapè manawagán yù nonò naw. Ta yù bilin na yù kunnay ta isingan nga maggatang sù nakallà nga gián ta áddè ta alippánnawák. Á sangaw nu umay si Apu Kesu, aggina yù mamannawák ta nonò naw, nga kunnay ta yù darámmagan nga luttuák ta alippánnawák. ²⁰ Á yawe laguk yù mapolu nga kánnámmuán naw. Awán ta tolay nga makánnámmu sù kebalinán nayù bilin ni Namarò nga iniyubobuk nayù ira ábbilinán na, nu awán ta ángngabbák ni Namarò kuna. ²¹ Á awán bulubugá ta tolay nga makalabbun sù ari paga nesimmu. Á awán ta ábbilinán nga ninonò na lápay yù bilin na. Ngam yù Mangilin nga Ikararuá ni Namarò, inipakánnámmu na sù ira ábbilinán ni Namarò yù bilin na nga iniyubobuk da.

2

Yù Pamagikáru ni Namarò sù ira Mangituddu ta Siri

¹ Á sù ngaw nga nabayák, jimittál gapay yù ira áppè ábbilinán nga arán na jinok ni Namarò. Á kunnian gapay sangaw, duttál nikayu yù ira tatolay nga makkagi ta aggira yù ábbilinán ni Namarò, ngam ari kuruk, ta massirisiri ira. Á ittuddu ra yù ari kuruk, tapè dalárad da yù ángnguruk naw ká Apu. Á panakitád da si Apu Kesu Kiristu nga Yápu ra nga nagikáru ta liwá da. Ngam ikáddagá lâ sangaw yù pamagikáru ni Namarò nira. ² Á aru yù ira kábulun naw nga manguruk sù ira massiri, áнна párigád da yù narákè nga ággangguá ra. Á gapu ta masingan nayù ira káruán nga tatolay ta narákè yù akkuán nayù ira kábulun naw nga makkagi ta si Apu yù tuttulad da, á iluddè nayù ira káruán yù bilin nga meyanung ká Apu, ta kagiad da garè ta yáyù gapu nayù narákè nga ággangguá ra. ³ Á gapu ta mukkuk ira ta kuártu, aru yù siri nga ittuddu ra, tapè ilogò da kayu áнна pagganánsiád da kayu. Ngam dán nga naparán yù pamagikáru ni Namarò nira, ta ammu na ngámin yù akka-akkuád da, á pagikaruan na ira sangaw nu duttál yù pamanunnù na nira.

⁴ Á ammu tam ta kuruk nga mapaluro yù pamagikáru ni Namarò sù ira nga mangnguá ta narákè, ta mássiki yù ira ngaw daroban ni Namarò ta lángi nga nalliwiá, arán na ira inikállà, ta inipetabbà na ira sù nálarum nga abbù ta gián na impiernu, á napukù ira tán, sù nakallà nga gián, nga magiddak sù pangukum na nira.

⁵ Á kunnian gapay sù ira ngaw tatolay nga namotu ká Namarò ta keggá ra ngaw di Lákay Noe, ta arán na ira inikállà ni Namarò gapay. Ta jinok ni Namarò yù urán, á nagurán ta appátapulu nga ággaw, á nalitù yù ngámin nga dabbuno, á natay yù ira ngámin nga minállíwá. Ngam si Noe, lage na kalitù na dabbuno, aggina yù nangilayalayá sù kuruk nga bilin ni Apu Namarò. Á si Noe lâ áнна yù ira pitu nga kábulun na yù iniyigù ni Namarò.

⁶ Á arán na inikállà ni Namarò yù ngaw ira darakal nga ili na Sodoma áнна Gomorra. Sinuggi ni Namarò yù ira ili ta pamagikáru na sù ira ngaw tatolay nga naggián tán. Á natábbunán ira ta abu, tapè ipasingan ni Namarò yù ámmagikáru na sù ira mamotu kuna, nga mangigagángay nga mangnguá ta narákè. ⁷ Ngam si Lot, nga nakipaggián sù ira taga Sodoma áнна taga Gomorra, inililli ni Namarò ta pamagikáru na sù ira kelián na, gapu ta napiá nga tolay si Lot, nga nalurá sù narákè nga kingnguá nayù ira kelián na, áнна yù pamotu ra ká Namarò áнна yù jikkù nga ággangguá ra. ⁸ Ta napiá nga tolay si Lot,

* 1:18 Ta meyanung sù kesimmu na, bibbiram mu Mattiu 17:1-9; Markus 9:2-10; Lukas 9:28-36

á ta pakipaggián na sù ira taga Sodoma ána taga Gomorra, á nabagabagal ta kággággaw megapu sù nasingan na ána naginná na nga narákè nga kingnguá nayù ira kelián na.

⁹ Á gapu ta pangiyìgù ni Namarò kári Noe ána yù pangiyìgù na gapay ngaw kári Lot, á mepasingan ta makáwayyá si Namarò nga mangabbák, á iyìgù na yù ira tatolay nga manguruk kuna nu marigrigá ira. Á mepasingan gapay ta makáwayyá si Namarò nga mamukù ána mamagikáru sù ira narákè, áddè ta duttál yù pangukum na nira. ¹⁰ Á nepatalugáring sù ira nga ari bulubugá nga makáppak ta narákè, ána yù ira nga mangiluddè sù makáwayyá nga mammaguray nira, á mappaná yù pamagikáru ni Namarò nira.

Á yù ira áppè ábbilinán nga mangituddu ta ari kuruk, mappeggung ira ána ari ira maganássing, á pakkakagiád da yù ira makáwayyá nga maddalingárang nga maggián ta lángi. ¹¹ Ngam yù ira daroban ni Namarò, mássiki nu masikan ána makáwayyá ira ánnè sù ira áppè ábbilinán nga makkakagi nira, á arád da ira pakkakagián ta arubáng ni Namarò.

¹² Á yawe ira mattá-ábbilinán nga mangituddu sù ari kuruk, akkuád da lá yù narákè nga negagángay nira, ána uyu-uyawad da yù arád da kánnámmuán. Meyárik ira ta simaron nga ayám nga awán ta nonò na, nga masikuatán sangaw. Á mapapátay ira gapay nga kunnay ta simaron nga ayám. ¹³ Á iyangná da laguk yù bálá nayù narákè nga kingnguá ra.

Danniaw ira nga mangilogò, ipagayáyá da yù narákè nga akkuád da nga arád da kakáppak, mássiki nu ággaw. Á nu umay ira mepaggagammung nikayu nga mepakkákán, mepasiránán kayu megapu sù narákè nga akkuád da ána ibuyubuyá ra. ¹⁴ Á awán ta nonotad da nu ari lá yù ira bábbay nga masingad da, nga karagatád da ira karallawan, ta ari ira bulubugá makáppak. Á makikopun ira sù ira nga makapi yù ángnguruk da, tapè makagumán ira nga mepulù nira nga mekanakaná nga mangnguá ta narákè. Á kitakikki ira nga kitokkuk. Ngam dán nga naparán yù pamagikáru ni Namarò nira!

¹⁵ Á mássiki nu ammu ra ngaw yù kuruk nga bilin ni Namarò, á nekátuay ira sù napiá nga netuddu nira, á nagawáwan ira. Pinárigád da yù kingnguá nayù ngaw ábbilinán ni Namarò, nga si Balam nga aná ni Biyor. Kinaragatán ni Balam yù kuártu nga iyawá na patul kuna nu akkuán na yù narákè. ¹⁶ Ngam jinok ni Namarò yù umay maggammá ká Balam. Ta yù ayám na nga dongki nga nakkabayuán na, aggina yù naggammá kuna. Nagubobuk yù dongki ta ngarál na tolay, á gimmá na si Balam sù kaloku na.

¹⁷ Á yù ira áppè ábbilinán, meyárik ira ta wek nga nábbatán, ta awán ta napiá nga naggapu nira. Á mattá-iki-ikáyá ira gapay, nga kunnay ta angá nga ipayapayák na paddák. Á dán nga naparán yù paggianád da nga pinarán ni Namarò sù kakallatán nga gián. ¹⁸ Á kitabángák ira nga mappeddaráyaw, ngam ubobugad da lá yù awán ta serbi na. Á megapu sù negagángay nga karagatád da, yáyù nga kagumánad da ta mepulù nira yù ira bagu nga manguruk nga mággè ari melilli sù narákè nga akkuád da, tapè toliad da yù nilikuránad da. ¹⁹ Ta itabbá ra nira ta arád da máwák nga manuppál sù tunung, ngam aijan yù awayyá ra nga akkuán yù maguray lá nga ikáyá da, gapu ta kunnay ta mapalubbáng ira. Ngam yù ira nga mangituddu ta kunnian, aggira yù kunnay ta aripan, gapu ta pakiaripanád da yù narákè nga karagatád da nga makapatulù nira, á awán ta awayyá ra nga mappili sù napiá.

²⁰ Á yù tolay nga mangikatalá ká Apu Kesu Kiristu nga mangiyìgù nittam, nallikuránán nen yù narákè nga ággangnguá na. Á ta ángngarigán, nu tolian na galá sangaw yù narákè nga ággangnguá na, á nappaná laguk yù narákè nga akkuán na ánnè sù napolu nga ággián na lage na nangikatalá, gapu ta kánnámmuán na yù napiá, ngam sinoli na yù narákè. ²¹ Á más napiá nakuan nu arán na narámak yù napiá nga ituddu ni Apu Kesu Kiristu, ánnè ta pallikuránán na yù mangilin nga taddán ni Namarò nga nepakámmámmu kuna. ²² Á yù tolay nga kunnian yù akkuán na, aggina yù keyarigán nayù kuruk nga dán nga nakagi, nga kunnay na, “Yù itu nga magutá, tolian na nga kanan yù iniyutá na.

Á kunnay gapay sù bábi nga narigù, nga mattoli nga umay mallúráng ta lupè.”*

3

Kuruk nga Manoli sangaw si Apu Kesu Kiristu

¹ Kákkopuk ku, nga iddukak ku, yawe yù mekaruá nga túrá ku nikayu. Á kunnay sù napolu nga iníturá ku, ipanonò ku nikayu mángin yù meyanung sù napiá nga ammu nawin, tapè nonotan naw lá yù napiá. ² Á ikáyá ku ta arán naw káttamán yù kinagi ra ngaw nayù ira ábbilinán ni Namarò. Á nonotan naw gapay yù taddán nayù Yápu tam nga

* 2:22 Proberbio 26:11

mangiyígù nittam, nga inipakánnámmu ra nikayu nayù ira olu nga minángngilayalayâ nga sinullâ na.

³ Á yawe yù mapolu nga máwák naw nga kánnámmuán. Nu maddaggunin yù panguriánán na ággaw, duttál yù ira tatolay nga tumuttul ta narákè nga karagatán na baggi ra. Á uyu-uyawad da sikayu nga manguruk kâ Apu. ⁴ Á arád da kurugan yù initabbá ni Namarò nga panoli ni Apu Kesu. Á panguyo ra nikayu, á kud da, “Iso gián ni Kesu Kiristu? Arán na panò ngaw initabbá ta manoli sangaw? Ngam ari paga nappasingan! Á natayin yù ira ngaw naggaká nittam, ngam ari napatalián yù ággigian na dabbuno ta áddè ngaw ta kaparò na ta áddè kunangane!” kud da. ⁵ Á yáyù kagiad da gapu ta panakitád da yù pakáwayyá ni Namarò, á arád da nonotan yù pinalurò na ngaw ni Namarò megapu lâ sù pagubobuk na. Ta gári, lage na o-olu nga ággaw, nagubobuk si Namarò, á pinarò na yù lángi. Á pidde na yù dabbuno megapu sù danum, ta pinalattuák na yù dabbun nga naggapu ta danum megapu sù pagubobuk na. ⁶ Á pamanunnù na ngaw ni Namarò sù ira ngaw tatolay, nagubobuk má, á inipalítù na yù danum ta dabbuno. Á natay yù ira ngaw tatolay sù kalítù na dabbuno.

⁷ Á megapu sù panaddán ni Namarò, aijan paga yù lángi áнна yù dabbuno, nga maggián nga magiddak áddè ta katuggi ra sangaw. Ta kinagi ni Namarò ta matuggi yù lángi áнна yù dabbuno sangaw nu duttál yù pamanunnù na áнна pangukum na sù ira tatolay nga ari makimoray kuna.

⁸ Á sikayu nga kákkopuk ku nga iddukak ku, arán naw káttamán yawe nga ipanonò ku nikayu. Tangággaw yù kunnay ta maribu nga dagun ta panagenà ni Namarò, áнна maribu nga dagun yù kunnay ta tangággaw. ⁹ Á aijan yù ira manguyaw, nga kagiad da ta pinaguráyán ni Apu Kesu yù initabbá na, gapu ta nabayágin, á ari paga nanoli. Ngam ari gemma kuruk nga nabayák si Apu nga mamaluro sù initabbá na. Ngam ipappánná na, gapu ta arán na ikáyâ ta magikáru yù mássiki tádday ta impiernu, gapu ta ikáyâ na lá ta mabbabáwi yù ira ngámin nga tatolay ta liwiliwá da, tapè meyígù ira.

¹⁰ Ngam kuruk nga manoli si Apu Kesu. Á ikáddagâ lâ yù panoli na, nga kunnay ta dattál nayù makkokò. Á lummá yù lángi sù api, nga megiddán ta kitasikan nga gurù. Á malunák sù api áнна lummá yù ngámin nga aijan ta lángi. Á megiddán gapay yù katuggi nayù dabbuno áнна ngámin nga egga kuna.

¹¹ Á gapu ta kunnian yù pagáddekán na ággaw áнна yù lummá na ngámin nga masingat tam, á anni laguk yù akkuát tam nakuan? Máwák nga pakimorayát tam si Apu Namarò, áнна akkuát tam lâ yù napiá nga ipakuá na nittam. ¹² Á magiddak ittam nga mapattù nga makkaragâ sù ággaw nga panoli ni Apu. Á malláppá ittam nga mamaluro ta ngámin nga ipakuá na nittam, tapè mabi lá nga manoli. Ta sangaw nu duttál yù ággaw nga panoli na, maggatang yù lángi áнна malunák, á matuggi ta api yù ngámin. ¹³ Ngam arát tam ikássing yù ággaw nga panoli na, ta iddanamát tam yù initabbá ni Namarò nittam, nga bagu nga lángi áнна bagu nga dabbun nga kespapatát tam. Á matunung áнна mapiá yù ngámin nga maggián tán, ta awán bulubugá ta jikkù onu narákè tán.

¹⁴ Á kákkopuk ku, nga iddukak ku, gapu ta magiddak ittam sù panoli nayù Yápu tam, á malláppá kayu laguk nga mangnguá lâ sù napiá, marakè mepasiránán kayu ta arubáng na sangaw nu lubbè, nu maratang na kayu nga malliwá. Akkuán naw laguk yù napiá, tapè mapiá yù ággián naw áнна magimammá yù nonò naw. ¹⁵ Á nonotan naw yaw, ta ipappánná na bi ni Apu yù ánge na, gapu ta ikáyâ na nu aijan paga yù awayyá nayù ira tatolay nga mabbabáwi ta liwiliwá da, tapè meyígù ira. Á si Pablo, nga wagi tam nga iddukak tam, kunnian gapay yù kinagi na sù túrá na nikayu, ta yáyù yù kuruk nga inipakánnámmu ni Namarò gapay kuna. ¹⁶ Á sù ira ngámin nga túrá ni Pablo, kinagi na yù meyannung sù panoli ni Apu. Á marigá nga mánnámmuán yù káruán nga kinagi ni Pablo. Á yù ira tatolay nga ari makánnámmu sù kuruk nga bilin ni Namarò, nga mabbábáng sù ángguruk da, pataliád da garè yù kuruk nga kebalinán nayù ituddu ni Pablo, nga kunnay ta panáli ra gapay sù ira káruán nga inipetúrá ni Namarò. Á mekanakaná ira sù pamagikáru ni Namarò megapu sù akkuád da.

¹⁷ Á sikayu nga kákkopuk ku nga iddukak ku, ammu nawin ta aijan yù ira mangituddu, nga ari kuruk yù ituddu ra. Á mappalán kayu laguk nira. Ari kayu metádday nira, marakè mekátuay kayu sù napiá nga ángguruk naw, á mabbábáng kayu ta meyannung sù ággián naw kâ Namarò. ¹⁸ Uputan naw lâ yù ákkiyápu naw kâ Apu Kesu Kiristu nga Yápu tam nga Mangiyígù nittam, tapè malannapán yù kánnámmuán naw nga meyannung sù pangikállá na nikayu. Dayáwat tam si Apu Kesu kunangan, á parè bi ta meparáyaw ta áddè ta áddè! Ammán!

Yù Olu nga Túrâ ni Kuan

Yù Meyannung sù Túrâ

Yù nattúrâ sawe si Kuan, nga tádday sù ira mapulu duá nga sinudduán ni Apu Kesu. Á lakalákayin ta pattúrâ na sù ira tallu nga túrá na. Á inittubbuk na yawe túrá na sù ira iddukan na nga mangikatalà kâ Namarò ta ngámin nga giád da. Á kinagi na nira ta magimuguk ira, maraké mesinná ira kâ Namarò, nu kurugad da yù kagian nayù ira mangituddu, nga ari kuruk yù ituddu ra.

Ta aijan ngaw yù ira mappassapassiár nga mangituddu ta tanakuán nga ari kuruk, nga kunnay nga aijan ta ággawo. Á kinagi ra ta naraké yù ngámin nga aijan ta dabbuno. Á kinagi ra gapay ta ari kuruk nga tolay si Apu Kesu Kiristu, ána ari kuruk nga Anâ ni Namarò. Á kinagi ra ta arád da máwák nga mabbabáwi ta liwiliwá da ána ari máwák nga makkaká-iddù ira, ta aijan yù awayyá nayù ira tatolay nga katággittádday nga maguray lá yù akkuán na.

Á yáyù gapu na nga initúrâ ni Kuan, tapè ipakánámmu na yù kuruk, tapè awán ta tolay nga melogò. Á inibukalán na ta kuruk nga Anâ ni Namarò si Apu Kesu nga naggapu ta lángi, nga nabbáli ta tolay nga minay ta dabbuno. Á kinagi na gapay nittam ngámin nga tatolay nga mangiddù kâ Apu Namarò ta máwák tam nga akkuán yù napiá nga ipakuá ni Namarò nittam, nepatalugáring sù pakkaká-iddù tam.

Yù Mayán nayù Túrâ

Yù Bilin nga Meyannung sù Manotolay (1:1-4)

Si Namarò yù Mamannawák ta Nonò tam (1:5-10)

Si Apu Kesu Kiristu yù Makkakápiá nittam kâ Namarò (2:1-6)

Yù Bagu nga Taddán ni Apu Kesu (2:7-11)

Yù Ággián nayù ira Mangikatalà kâ Apu Kesu (2:12-17)

Mappalán ittam sù Mangontará kâ Apu Kesu Kiristu (2:18-29)

Ánâ na ittam ni Namarò nga Mangikatalà kâ Apu Kesu (3:1-10)

Yawe yù Itaddán ni Apu Kesu: Makkaká-iddù kayu (3:11-18)

Mappelò kâ Namarò yù ira Pinabbalin na ta Ánâ na (3:19-24)

Yù Ari Masingan nga Makikontará kâ Namarò (4:1-6)

Sigga-iddù si Namarò (4:7-21)

Appútat tam yù Ngámin nga Mangontará kâ Namarò (5:1-5)

Yù Pangurugát tam ta Anâ ni Namarò si Apu Kesu Kiristu (5:6-12)

Yù Mannanáyun nga Áttole tam nga Mangikatalà kâ Apu Kesu (5:13-21)

Yù Bilin nga Meyannung sù Manotolay

¹ Itúrâ ku nikayu yù meyannung kâ Apu Kesu Kiristu, nga manotolay nga mangngágan ta Ubobuk ni Namarò.

Ággina yù pannakasimù ni Namarò nga mangipakánámmu sù bilin na, nga paggapuán nayù mannanáyun nga áttole tam.

Egga nga mannanáyun áddè ngaw gári

sù awán paga bulubugá ta naparò.

Á ipakánámmu mi nikayu gapu ta nasingam mi

ánna naginná mi yù kinagi na ta keggá na ta dabbuno.

Á yù matá mi lápay yù áningam mi kuna,

ánna yù limá mi lápay yù ánnangal mi kuna.

² Nappasingan nikami yù manotolay, nga nabbáli ta tolay. Á yáyù nga ilayalayá mi, ána sistiguám mi ta kuruk nga ággina yù paggapuán nayù mannanáyun nga áttole tam. Naggián ngaw nga nepulupulú kâ Ammò Namarò, áddè ngaw lage na pamegapu na ngámin.

³ Á kagian mi nikayu yù nasingam mi ána naginná mi, tapè mesipá kayu nikami sù pakikopum mi kári Ammò Namarò nga Yáma tam ána si Apu Kesu Kiristu nga Anâ na. ⁴ Á yáyù gapay yù ipattúrâ ku nikayu, tapè magayáyá ittam.

Si Namarò yù Mamannawák ta Nonò tam

⁵ Á yawe yù bilin nga naginná mi nga meyannung kâ Apu Namarò, nga inipakánámmu ni Apu Kesu nikami, á ilayalayá mi nikayu. Si Namarò yù kun na nawák nga maddalingáring, nga awán bulubugá ta kallá kuna, gapu ta awán bulubugá ta liwá na onu naraké kuna. ⁶ Á nu kagiat tam ta napiá yù ákkiyápu tam kâ Namarò, ngam naraké galá yù akka-akkuát tam,

massirisiri ittam, áнна kunnay ittam ta naggián ta kallà, gapu ta arát tam akkuán yù napiá nga ituddu ni Namarò. ⁷Ngam nu tumulù ittam kâ Namarò, áнна akka-akkuát tam yù napiá nga ituddu na, á mesipà ittam kuna, áнна napiá gapay yù ákkopot tam sù ira kábulut tam nga manguruk. Á mapakarenuán ittam, áнна mári yù liwiliwâ tam, megapu sù dága ni Apu Kesu Kiristu, nga Anâ ni Namarò.

⁸ Á nu kagiat tam ta awán ta liwâ tam, ilogò tam galâ yù baggi tam, áнна arát tam pinatattam ta nonò tam yù kuruk nga bilin ni Namarò. ⁹ Á nu kagiat tam kâ Namarò yù liwiliwâ tam, áнна likuránát tam yù narákè nga akkuát tam, á pakomán na ittam, áнна pakarenuán na yù nonò tam. Ta matunung si Namarò, áнна palurotan na yù ngámin nga inittabbá na sù ira mangikatalà kuna. ¹⁰ Á kinagi ni Namarò ta awán ta tolay nga ari malliwâ. Á nu kagiat tam ta awán bulubugá ta liwâ tam, á kunnay ta kagiat tam ta massiri si Namarò, á arát tam kinuruk yù bilin na.

2

Si Apu Kesu Kiristu yù Mamakkápiá nittam kâ Namarò

¹ Sikayu nga kun na ánâ ku, itúrâ ku yawe nikayu, gapu ta ikâyâ ku ta ari kayu malliwâ. Á nu aijan yù malliwâ, ipanonò ku ta aijan yù mamakkápiá nittam kâ Ammò Namarò. Aggina si Apu Kesu Kiristu, nga napiá áнна matunung. ² Awán bulubugá ta liwâ na, á inítapil na yù baggi na, nga neyátáng kâ Namarò megapu sù liwiliwâ tam, tapè pakomán na ittam ni Namarò. Á yá ipagikáru na, nga ari lâ megapu ta liwiliwâ tam, nu ari galâ megapu sù liwiliwâ nayù ira ngámin nga tatolay ta tangapáddabbunán.

³ Á kunnaiw yù panákkilalán ta kuruk nga ammu tam si Namarò, nu palurotat tam yù taddán na. ⁴ Á yù tolay nga makkagi ta ammu na si Namarò, nu arán na kurugan yù taddán ni Namarò, á massiri galâ yane tolay, áнна arán na pinatattam ta nonò na yù kuruk nga bilin ni Namarò. ⁵ Ngam sittam nga manguruk sù bilin ni Namarò, mepasingan ta kukurugán nga iddukat tam, áнна yáyù nga ammu tam ta kuruk nga nepattatáday ittam nga mesipà kâ Namarò. ⁶ Á yù tolay nga makkagi ta kuruk nga napiá yù ákkiyáma na kâ Namarò, á máwák nga ipasingan na yù napiá nga ágganguá na nga kunnay sù napiá nga ágganguá ni Apu Kesu Kiristu ta keggá na ta dabbuno.

Yù Bagu nga Taddán ni Apu Kesu

⁷ Kákkopuk ku nga iddukak ku, ari bagu yawe taddán ni Namarò nga itúrâ ku nikayu, ta dán nga ammu naw áddè ngaw kapámmegapu naw nga mangikatalà kâ Apu Kesu. Ta naginná naw ngaw yù taddán na nittam, nga máwák ta makkaká-iddù ittam. ⁸ Á mássiki nu dán nga kinagi ni Namarò nittam yawe taddán, á kunnay ta bagu, gapu ta ipakánnámmu na nittam ni Apu Kesu Kiristu yù kuruk nga kebalinán na. Á sù ngaw lage tam mangikatalà kâ Apu Kesu Kiristu, á kunnay ta naggián ittam ta kallà. Ngam kunangane, nanawagánin yù nonò tam megapu sù pangikatalà tam kuna.

⁹ Á yù tolay nga makkagi ta mesipà kâ Namarò gapu ta panguruk na sù bilin na, nu ikalusso na paga yù kabbulun na nga mangikatalà kâ Apu Kesu, á ari kuruk yù kagian na, ta ari paga nanawagán yù nonò na, ngam kunnay ta maggián paga ta kallà. ¹⁰ Ngam yù tolay nga mangiddù sù ira kábulun na, aggina yù meyarík ta tolay nga maggián ta nawák, nga kunnay ta mallakalakák ta nawák, gapu ta kurugan na yù kuruk nga ipakánnámmu ni Namarò kuna. Á awán ta narákè nga akkuán na nga meyarík ta kesiddúkalán nayù ira kábulun na, nga paggapuán nayù palliwâ da. ¹¹ Ngam yù tolay nga ikalusso na yù kabbulun na, narákè yù akkuán na áнна arán na ammu yù napiá. Á meyarík ta tolay nga maggián nga mallakalakák ta kallà, nga arán na ammu yù angayán na, gapu ta ari makasingan.

Yù Ággián nayù ira Mangikatalà kâ Apu Kesu

¹² Sikayu nga ánâ ku, makapattúrákâ nikayu gapu ta napakomá kayin ta liwiliwâ naw megapu kâ Apu Kesu Kiristu, nga netapil megapu nittam.

¹³ Á sikayu nga giriámán, makapattúrákâ nikayu gapu ta ammu nawin si Apu Kesu, nga aijan ngaw gári sù awán paga bulubugá ta naparò. Á sikayu nga bábbagitolay, makapattúrákâ nikayu gapu ta náppù nawin si Satanas, ta ammu naw manakì sù pamuruburion na nikayu.

¹⁴ Á sikayu nga anâ ku, yawe itúrâ ku nikayu, gapu ta makiyáma kayin kâ Ammò Namarò.

Á sikayu nga giriámán, yawe itúrâ ku nikayu,
gapu ta ammu nawin si Apu Kesu,

nga aijan naw gári sù awán paga bulubugá ta naparò.

Á sikayu nga bábbagitolay ána yù ira nataggatán, yawe yù itúrâ ku nikayu,
gapu ta napasigaggá yù ángngikatalà naw kâ Apu Kesu,
ta pinatattam nawin ta nonò naw yù bilin ni Namarò.

Á gapu ta nonopan naw yù bilin ni Namarò,

yáyù nga inappù nawin si Satanas,

ta arán naw kinuruk yù ituddu na nga narákè.

¹⁵ Arán naw laguk karagatán nga akkuán yù mekontará kâ Namarò, ána arán naw ukukuran yù magannagannuk nga aijan ta dabbuno nga meyanung sù ira ari manguruk kâ Namarò. Yù tolay nga makkaragá karannian nga meyanung ta tatolay ta dabbuno, awán ta ángngiddù na kâ Ammò Namarò. ¹⁶ Ngámin dannian nga negagángay ta tatolay ta dabbuno, nga karagatád da, ána yù masingad da nga ukkurad da, ána yù ipappeddaráyo ra, ngámin dannian ari gemma naggapu kâ Ammò Namarò, nu ari galá naggapu sù narákè nga aijan ta dabbuno. ¹⁷ Á mappasá sangaw yù ngámin nga aijan ta dabbuno ána yù ngámin nga karagatán nayù ira tatolay nga masingad da ta dabbuno. Ngam yù ira nga mamalurò sù ipakuá ni Namarò nira, mesipá ira nga mepattolay kâ Namarò ta lángi ta áddè ta áddè.

Mappalán ittam sù Mangontará kâ Apu Kesu Kiristu

¹⁸ Sikayu nga kun na ánâ ku, duttálin sangaw yù pagáddekán na ággaw, nga panoli ni Apu Kesu Kiristu. Á naginná naw ta umay yù mangontará nga massipil nakuan kâ Apu Kesu Kiristu. Á kunangane, aru ngin yù ira jimittál nga nangontará kâ Apu Kesu, á yáyù ammu tam ta duttálin yù pagáddekán nga ággaw ána maddaggunin nga umay si Apu Kesu. ¹⁹ Á yù ira tatolay nga nangontará kâ Apu Kesu, nakipaggamung ira ngaw nittam, ngam nánawád da ittam, gapu ta ari kuruk nga nepattatádday yù nonò da ta nonò tam. Á nu kuruk nakuan nga nanguruk ira kâ Apu ta kunnay nittam, á naggián ira nittam nakuan. Ngam nánawád da ittam. Á yáyù nga mepasingan ta ari ira mesipá nittam nga mangikatalà kâ Apu.

²⁰ Ngam sikayu, ari kayu negittá nira, ta napakarenuánin yù nonò naw, megapu sù Mangilin nga Ikararuá ni Namarò, nga iniyawá ni Apu Kesu nikayu, ána kánnámmuán naw yù ngámin nga bilin ni Namarò, gapu ta yù Mangilin nga Ikararuá yù mangipakánnámmu nikayu. ²¹ Á yawe ipattúrâ ku nikayu, ari gapu ta arán naw ammu yù kuruk, nu ari galá gapu ta ammu nawin yù kuruk ána ammu naw gapay ta awán ta siri nga naggapu sù kuruk.

²² Á massirisiri yù ira tatolay nga makkagi ta ari si Apu Kesu Kiristu yù mangiyígù nga sinullá ni Namarò ta mammaguray! Aggira yù mangontará kâ Apu Kesu Kiristu, ta panakitád da di Ammò Namarò ána yù Anâ na. ²³ Ta nu panakitán na tolay yù Anâ ni Namarò, panakitán na gapay yù Yáma na. Ngam yù tolay nga mangipakánnámmu ta panguruk na ána pangikatalà na kâ Apu Kesu nga Anâ ni Namarò, á aijan gapay kuna si Ammò Namarò nga Yáma ni Apu Kesu, nga kapulupulù na.

²⁴ Tángngagan naw laguk ta napiá yù ngámin nga meyanung kâ Apu Kesu nga naginná naw áddè ngaw kapángguruk naw, tapè mepatattam ta nonò naw. Ta nu nepatattam ta nonò naw yù bilin ni Namarò nga naginná naw áddè ngaw, á mannanáyun yù napiá nga ákkiyápu naw sù Anâ ni Namarò ána yù Yáma na ta áddè ta áddè. ²⁵ Á yawe yù inittabbá ni Apu Kesu Kiristu nittam, ta iyawá na nittam yù mannanáyun nga áttole tam, tapè mesipá ittam nga mepattolay kuna ta áddè ta áddè.

²⁶ Á itúrâ ku nikayu yù meyanung sù ira tatolay nga ari kuruk yù ituddu ra, tapè mappalán kayu nira, ta parubád da kayu nga ilogò. ²⁷ Ngam maggiánin nikayu yù Mangilin nga Ikararuá nga jinok ni Apu Kesu nikayu, á inipakánnámmu na nikayu yù kuruk nga bilin ni Namarò nga meyanung sù Anâ na. Á yáyù nga arán naw awágan yù mangituddu nikayu, ta yù Mangilin nga Ikararuá yù mangituddu nikayu. Á inittuddu nen yù meyanung ta ngámin nga máwák naw nga mánnámmuán. Á yù ngámin nga ituddu na, ari siri, nu ari galá kuruk. Uputan naw laguk yù pakiyápu naw kâ Apu Kesu Kiristu, ta yáyù inittuddu nayù Mangilin nga Ikararuá nikayu.

²⁸ Á sikayu nga kun na ánâ ku nga metádday kâ Apu Kesu, uputat tam laguk yù pakiyápu tam kuna, tapè mappelò ittam nga ari mappasirán ta arubáng na, sangaw nu manoli ta dabbuno. ²⁹ Á gapu ta ammu tam ta kuruk nga napiá ána matunung si Apu Kesu, yáyù

nga ammu tam gapay ta yù ira ngámin nga matunung, nga napiá lá yù akka-akkuád da, á kuruk nga ánâ ni Namarò ira.

3

Ánâ na ittam ni Namarò nga Mangikatalà kâ Apu Kesu Kiristu

¹ Nonopat tam yù ángngiddù ni Ammò Namarò nittam, ta pinabbalin na ittam ta ánâ na. Á kuruk nga ánâ na ittamin, nga mangikatalà kâ Apu Kesu Kiristu. Ngam yù ira tatolay nga ari manguruk kâ Apu Kesu Kiristu, arád da gapay kánnámmuán yù nonò tam, gapu ta arád da ammu si Ammò Namarò. ² Á kákkopuk ku nga iddukak ku, ánâ na ittamin ni Namarò, á arán na paga inipasingan yù pabbalinát tam sangaw. Ngam yawe ammu tam, ta sangaw nu manoli saw si Apu Kesu, nga mappasingan nittam, á mepaggittá ittam kuna, ta masingat tam yù kuruk nga ággján na. ³ Á nu kunnian yù iddanamát tam, nallikuránát tam yù narákè nga ággangguá tam, á nonopat tam ánna akka-akkuát tam yù napiá lá, gapu ta pareku nga napiá si Apu Kesu Kiristu.

⁴ Ngámin ira nga ari napiá yù nonò na ánna akkuán na, malliwá ira sù tunung ni Namarò. Á yáyù nga minálliwá ira gapu ta potuád da yù taddán ni Namarò. ⁵ Á ammu tam ta minay saw dabbuno si Apu Kesu, nga netapil nga nagikáru ta liwiliwá tam, tapè mapakomá ittam. Ngam si Apu Kesu, awán bulubugá ta liwá na. ⁶ Á yù tolay nga napasigaggá yù ángnguruk na kâ Apu Kesu, á ari malliwá. Ngam yù tolay nga uputan na yù palliwá na, arán na paga ammu si Apu Kesu Kiristu, ánna arán na gapay kánnámmuán yù bilin nga meyanung kuna.

⁷ Sikayu nga kun na ánâ ku, ari kayu makilogò, marakè mekátuay kayu ta panguruk naw sù kuruk. Ta yù tolay nga napiá lá yù akka-akkuán na, aggina yù napiá ánna matunung nga kunnay kâ Apu Kesu. ⁸ Á yù tolay nga ari napiá yù ággangguá na, aggina yù nakitulù kâ Satanas, ta párigán na si Satanas, nga narákè yù ággangguá na áddè ngaw kapámmegapu na ággaw. Á yáyù gapu na nga minay saw ta dabbuno yù Anâ ni Namarò, tapè irián na ngámin yù pakáwayyá ni Satanas ánna yù ikalángan na. ⁹ Á yù ira tatolay nga kuruk nga ánâ ni Namarò, arád den uputan yù palliwá da, gapu ta aijan nira yù napiá nga nonò nga naggapu kâ Namarò. Á gapu ta pinabbalin na ira ni Namarò ta ánâ na, arád den uputan yù palliwá da. ¹⁰ Á kunnaw yù panákkilalát tam sù ira tatolay nga mebiláng ta ánâ ni Namarò ánna yù ira nga mebiláng ta ánâ ni Satanas. Ta ari gemma anâ ni Namarò yù tolay nga ari matunung yù akka-akkuán na ánna arán na iddukan yù ira ikáttole na.

Yawe yù Itaddán ni Apu Kesu: Makkaká-iddù Kayu

¹¹ Á yawe yù bilin ni Apu Kesu nga naginná naw áddè ngaw kapángngikatalà naw kuna, ta makkaká-iddù ittam. ¹² Arát tam laguk párigán yù ngaw Kain, nga nakitulù kâ Satanas, á pinapáte na yù wagi na nga urián. Ta gapu ta narákè yù ággangguá ni Kain, yáyù nga ikalusso na yù urián na, gapu ta napiá yù ággangguá nayù urián na.* ¹³ Kákkopuk ku, ari kayu laguk mapállá, nu ikalusso ra kayu gapay nayù ira ari manguruk kâ Namarò.

¹⁴ Á sittam nga mangikatalà kâ Apu Kesu, ammu tam ta melilli ittam sù pamagikáru ni Namarò, á ari ittam mesinná kâ Namarò nga metabbà ta impiernu, nu ari galá ta mesipá ittamin sù áttòle ni Namarò. Á kánnámmuát tam ta kuruk nga mesipá ittam sù áttòle na, gapu ta iddi-iddukat tam yù ira kábulut tam. Ngam yù tolay nga ari mangiddù ta kábulun na, ari mesipá sù áttòle ni Namarò nga mannanáyun, ngam kunnay ta natayin, nga mesinná kuna ta áddè ta áddè. ¹⁵ Á yù tolay nga malussaw ta kabbulun na, ibiláng ni Namarò ta negittá ta namapátay. Á ammu tam ta ari mesipá yù mamapátay sù áttòle ni Namarò nga mannanáyun.

¹⁶ Á kánnámmuát tam yù kebalinán nayù ángngiddù ni Apu Kesu, megapu sù pate na ta kurú megapu nittam. Ta mássiki nu awán ta liwá na, initalip na yù baggi na, á nagikáru ta liwiliwá tam, tapè ari sittam yù mapagikáru. Á yáyù nga máwák nga iddi-iddukat tam gapay yù ira kábulut tam nga mangikatalà kâ Apu, mássiki nu metapil ittam gapay nakuan ta pangabbák tam nira. ¹⁷ Á nu aijan yù tolay nga egga kuna yù ngámin nga máwák na, á masingan na yù kabbulun na nga magáwák, ngam arán na kábbian ánna awán ta iyawá na kuna, á awán laguk ta ángngiddù na sù kabbulun na. Á egga panò yù ángngiddù na kâ Namarò? Awán! ¹⁸ Á sikayu nga kun na ánâ ku, iddukat tam laguk yù ira kábulut tam, á arát tam lá kagian nira yù ángngiddù tam, nu arát tam gapay ipasingan ta kuruk nga iddukat tam ira megapu sù napiá nga akka-akkuát tam nga ángngabbák tam nira.

Mappelò kâ Namarò yù ira Pinabbalin na ta Ánâ na

* 3:12 Meyannung kári Kain kâ Abel, Genesis 4:1-8

¹⁹ Á gapu ta kunnian laguk yù pakkaká-iddù tam, ammu tam ta kuruk nga ánâ ni Namarò ittam. Á yáyù nga magimammà yù nonò tam, áнна ari ittam mappasirán ta pakimállà tam kâ Namarò. ²⁰ Á mássiki nu mappasirán ittam nakuan kâ Namarò, megapu ta liwâ tam, á ammu ni Namarò yù ngámin. Ammu na yù liwâ tam lage tam kagian kuna, áнна makáwayyá nga mamakomá nittam. Á awán ta pagádekán nayù ángngiddù na nittam. ²¹ Kákkopuk ku nga iddukak ku, nu ari mabbábáng yù nonò tam ta meyanung sù pakiyápu tam kâ Namarò áнна yù allà na nittam, á mappelò ittam laguk nga makimállà kuna. ²² Á iyawâ na nittam yù ipakimállà tam, gapu ta kurugat tam yù taddán na áнна akkuát tam yù ipagayáya na.

²³ Á yawe yù taddán ni Namarò nittam, ta ikatalà tam si Apu Kesu Kiristu nga Anâ na, áнна makkaká-iddù ittam ta kunnay sù initaddán ni Apu Kesu nittam. ²⁴ Á yù ira nga manguruk sù taddán ni Namarò, mepattolay ira kuna, áнна maggián si Namarò nira. Á ammu tam ta kuruk nga maggián si Namarò nittam, gapu ta aijan nittam yù Mangilin nga Ikararuá ni Namarò nga pinapaggián na nittam.

4

Yù Ari Masingan nga Mangontará kâ Namarò

¹ Kákkopuk ku nga iddukak ku, ari kayu laguk manguruk sù ira ngámin nga makkagi ta maddok nira yù Ikararuá ni Namarò, nga paggapuán nayù ituddu ra. Ngam ginnán naw nu kuruk yù ituddu ra. Ta aru garè yù ira áppè ábbilinán nga jimittálin ta ngámin nga lugár, nga tanakuán yù paggapuán nayù ituddu ra. ² Á kunniaw yù ánnákkilalát tam sù ira tatolay nga egga nira yù Mangilin nga Ikararuá. Yù ira mangituddu nga makkagi ta kuruk nga si Apu Kesu Kiristu yù sinullá ni Namarò nga mammaguray, áнна kuruk nga minay ta dabbuno nga naggapu ta lángi, nga neyanâ ta tolay áнна kuruk nga tolay yù baggi na, á aggira yù masserbi kâ Namarò nga egga nira yù Mangilin nga Ikararuá. ³ Ngam yù ira makkagi ta ari kuruk nga tolay si Apu Kesu Kiristu, áнна ari naggapu kâ Namarò, á ammu tam ta magginná ira ta tanakuán nga ari yù Mangilin nga Ikararuá ni Namarò, gapu ta kagiad da yù naggapu sù mangontará kâ Apu Kesu Kiristu. Á narámak naw ta duttál ta dabbuno yù mangontará kâ Apu. Á kunangane, jimittálin ta dabbuno, á aru yù ira tatolay nga makitulú kuna.

⁴ Á sikayu, nga kun na ánâ ku, sikayu yù ánâ ni Namarò. Á yáyù nga inappù nawin yù ira áppè ábbilinán, gapu ta makáwayyá yù Mangilin nga Ikararuá nga maggián nikayu, ánnè sù ari masingan, nga aijan nga maddok sù ira nga ari manguruk kâ Namarò. ⁵ Á yù ira áppè ábbilinán, naggittá yù nonò da ta narákè nga nonò nayù ira tatolay nga ari manguruk kâ Namarò. Á yáyù nga ituddu ra yù meyanung ta dabbuno. Á yù ira tatolay nga ari manguruk kâ Namarò, tángngagad da yù ituddu nayù ira áppè ábbilinán. ⁶ Ngam sittam nga netádday kâ Namarò, ituddu tam yù kuruk nga bilin ni Namarò, á yù ira tatolay nga ammu ra si Namarò, ginniginnád da yù ituddu tam. Ngam yù ira tatolay nga ari manguruk kâ Namarò, arád da ginnán yù ituddu tam. Á kunnian nga tákkilalát tam yù paggapuán nayù ituddu na tolay, nu naggapu sù Mangilin nga Ikararuá ni Namarò, onu naggapu galá sù ari masingan nga minássiri.

Sigga-iddù si Namarò

⁷ Kákkopuk ku nga iddukak ku, makkaká-iddù ittam laguk. Ta si Namarò yù paggapuán nayù pakáwayyá tam nga makkaká-iddù, á yù tolay nga mangiddù sù ira kábulun na, aggina yù anâ ni Namarò áнна ammu na si Namarò. ⁸ Á yù tolay nga ari mangiddù sù ira kábulun na, arán na ammu si Namarò. Ta sigga-iddù si Namarò. ⁹ Á inipasingan ni Namarò yù ángngiddù na nittam, gapu ta jinok na ta dabbuno si Apu Kesu Kiristu, nga Anâ na nga táttádday, nga metapil megapu nittam, tapè mesipá ittam nga mepattolay kâ Namarò ta áddè ta áddè megapu kuna. ¹⁰ Á yáyù pangipasinganán nayù kuruk nga ángngiddù ni Namarò nittam, ta mássiki nu arát tam ngaw paga iniddù si Namarò lage tam nanguruk kuna, á sigga-iddù si Namarò nittam, á jinok na yù Anâ na, nga nagikáru ta liwâ tam ngámin, tapè mapakomá ittam megapu kuna.

¹¹ Kákkopuk ku nga iddukak ku, gapu ta kunnian yù ángngiddù ni Namarò nittam, á máwák laguk nga makkaká-iddù ittam. ¹² Á awán gemma ta tolay nga nakasingan kâ Namarò. Á mássiki nu arát tam masingan, nu makkaká-iddù ittam, á kuruk nga maggián si Namarò ta nonò tam, á mapasigaggá yù pakkaká-iddù tam megapu kuna.

¹³ Á ammu tam ta kuruk nga netádday ittam kâ Namarò áнна maggián si Namarò nittam, gapu ta aijan nittam yù Mangilin nga Ikararuá ni Namarò nga pinapaggián na nittam. ¹⁴ Á sikami, nasingham mi yù Anâ ni Namarò, á yáyù nga sistiguám mi ta jinok ni Namarò yù Anâ na ta umay mangiyigù sù ira ngámin nga tatolay ta dabbuno, tapè ikatalà da, á ari ira

metabbà ta impiernu. ¹⁵ Á yù tolay nga massistígu ta si Apu Kesu yù Anâ ni Namarò, aggina yù mepattolay kâ Namarò, áнна maggián gapay si Namarò kuna.

¹⁶ Á ammu tamin áнна ikatalà tamin yù pangiddù ni Namarò nittam. Ta sigga-iddù si Namarò. Á yù tolay nga napasigaggà yù ángngiddù na kâ Namarò áнна sù ira kábulun na, maggián lâ kâ Namarò áнна maggián gapay si Namarò kuna. ¹⁷ Á nu kuruk nga iddukat tam si Namarò áнна yù ira kábulut tam, ari ittam mappasirán onu maganássing sangaw nu duttál yù pangukum ni Namarò ta tatolay, gapu ta aijan yù ángngiddù tam ta keggá tam paga ta dabbuno nga kunnay ta ángngiddù ni Apu Kesu. ¹⁸ Á nu kuruk nga iddukat tam si Namarò áнна ikatalà tam yù ángngiddù na nittam, ari ittam maganássing kuna. Ta mári yù assing tam megapu sù ángngiddù na nittam. Á nu maganássing yù tolay kâ Namarò, mepasingan ta arán na paga iddukan, á ikássing na laguk yù iddagán na sangaw nga pamagikáru ni Namarò kuna.

¹⁹ Á makáwayyá ittam nga mangiddù, gapu ta napolu si Namarò nga mangiddù nittam. ²⁰ Á yù tolay nga makkagi ta aggina yù mangiddù kâ Namarò, ngam ikalusso na yù ikáttole na, á aggina yù minássiri. Ta gapu ta awán ta ángngiddù na sù ikáttole na nga masingan na, á awán gemma laguk ta ángngiddù na kâ Namarò nga arán na masingan. ²¹ Á yawe yù itaddán ni Namarò nittam, ta yù tolay nga mangiddù kâ Namarò, máwák na gapay nga iddukan yù ira ikáttole na.

5

Appútat tam yù Ngámin nga Mangontará kâ Namarò

¹ Yù ngamin ira nga tatolay nga manguruk ta kuruk nga Anâ ni Namarò si Apu Kesu Kiristu, nga sinullà ni Namarò ta mammaguray, aggira yù ánâ ni Namarò. Á ngámin ira nga mangiddù kâ Ammò Namarò, á iddukad da gapay yù ira ánâ na. Á yáyù nga makkaká-iddù ittam, ta mawwawági ittamin nga pinabbalin ni Namarò ta ánâ na. ² Á ammu tam ta iddukat tam yù ira ikáttole tam nga ánâ ni Namarò, nu iddukat tam si Namarò áнна kurugat tam yù taddán na. ³ Ta yáyù pangipasinganát tam sù ángngiddù tam kâ Namarò, nu kurugat tam yù taddán na, nga ari marigá nga mapalurò.

⁴ Á sittam nga pinabbalin ni Namarò ta ánâ na, arán na ittam mapatulù nayù narákè, gapu ta máwayyá tam nga appútan yù ngámin nga aijan ta dabbuno nga mangontará kâ Namarò. Á kunnasi laguk panò yù pangappù tam, nu ari galá megapu sù pangikatalà tam kâ Apu Kesu Kiristu nga mangabbák nittam! ⁵ Á awán ta mangappù sù narákè nga aijan ta dabbuno nga mangontará kâ Namarò, nu ari galá yù tolay nga manguruk ta si Apu Kesu yù Anâ ni Namarò.

Yù Pangurugát tam ta Anâ ni Namarò si Apu Kesu Kiristu

⁶ Á kuruk nga tolay si Apu Kesu Kiristu, áнна kuruk nga Anâ ni Namarò gapay nga naggapu ta lángi. Á ammu tam ta kuruk yian, ta nepasingan megapu sù panigù ni Kuan kuna ta danum na Jordan. Á kurugat tam nga ari lâ megapu sù karigù na ta danum na Jordan, nu ari gapay megapu sù paddága na ta pate na ta kurù.* Á yù Mangilin nga Ikararuá ni Namarò gapay yù manistígu ta si Apu Kesu yù Anâ ni Namarò, á kuruk gemma yù ngámin nga ipakánnámmu nayù Mangilin nga Ikararuá. ⁷ Á yáyù nga aijan yù ira tallu nga pangurugát tam, ⁸ yù Mangilin nga Ikararuá, áнна yù karigù ni Apu Kesu ta danum na Jordan, áнна yù paddága na ta pate na ta kurù. Á naggittá yù ipakánnámmu ra, nga kuruk nga Anâ ni Namarò si Apu Kesu Kiristu.

⁹ Á kurugat tam gemma yù kagian nayù ira tatolay ta passistígu ra, á nepatalugáring sù kagian ni Namarò. Á sinistíguán ni Namarò ta si Apu Kesu yù Anâ na. ¹⁰ Á yù ira nga mangikatalà sù Anâ ni Namarò, matagenà da ta nonò da yù passistígu nayù Mangilin nga Ikararuá ta kukurugán nga Anâ ni Namarò si Apu Kesu. Ngam yù ira nga ari manguruk sù kinagi ni Namarò nga meyanung sù Anâ na, á kunnay ta kagiad da ta massiri si Namarò, gapu ta arád da kurugan yù kagian ni Namarò nga meyanung sù Anâ na. ¹¹ Á sinistíguán ni Namarò ta iniyawá na nittam yù mannanáyun nga áttole tam nga awán ta áddè na, á si Apu Kesu Kiristu nga Anâ ni Namarò yù paggapuán nayù mannanayun nga áttole tam. ¹² Á yáyù nga yù ira nga aijan nira yù Anâ ni Namarò megapu sù pangikatalà da kuna, aggira yù ira mepattolay kâ Namarò ta áddè ta áddè. Ngam yù ira nga ari mangikatalà sù Anâ ni Namarò, awán nira si Apu, á arád da málá yù mannanáyun nga áttole ra.

Yù Mannanáyun nga Áttole tam nga Mangikatalà kâ Apu Kesu

* 5:6 Kuan 1:31-34; 19:34

¹³ Á sikayu nga mangikatalà sù Anâ ni Namarò, yawe yù itúrâ ku nikayu, tapè ammu naw ta neddán kayin sù mannanáyun nga áttòle naw, á mepattolay kayu kâ Namarò ta áddè ta áddè. ¹⁴ Á gapu ta pangikatalà tam kâ Apu Kesu, mappelò ittam nga makimállà kâ Namarò. Á ammu tam ta ginnán na, nu tumulù ittam kuna áнна ipakimállà tam lá yù napiá nga ikáyâ na.

¹⁵ Á nu ammu tam ta ginnán ni Namarò yù ipakimállà tam, ammu tam gapay ta málá tam yù kiniddo tam kuna. ¹⁶ Á ta ángngarigán, nu masingat tam yù kabbulut tam nga malliwâ, nga ari yù tádday nga liwâ nga pabbalinán na yù pate nayù malliwâ áнна yù kesinná na kâ Namarò, á ipakimállà tam laguk kâ Namarò ta pakomán na áнна iyawâ na kuna yù mannanáyun nga áttòle na. Ngam ajjan yù tádday nga liwâ nga ari mapakomá gapu ta mekanakanâ sù pangukum ni Namarò yù malliwâ ta kunnian. Á arák ku kagian ta ipakimállà tam yù tolay nga kunnian yù liwâ na. ¹⁷ Á ngámin nga narákè nga akka-akkuán na tolay yù pakaliwatán na kâ Namarò. Ngam mapakomá yù káruán nga liwâ, nga ari yù tádday nga liwâ nga gapu na nga mekanakanâ sù pangukum ni Namarò áнна mesinná kuna yù nalliwâ ta kunnian.

¹⁸ Á ammu tam ta ari mangupù nga malliwâ yù ira tatolay nga pinabbalin ni Namarò ta ánâ na, gapu ta si Apu Kesu nga Anâ ni Namarò yù manaron nira. Á yáyù nga ari ira makagumán nga malliwâ, á awán ta awayyá ni Satanas nga manganni nira.

¹⁹ Á ammu tam ta ánâ na ittam ni Namarò nga mangikatalà kâ Apu Kesu. Ngam yù ira ngámin nga ari mangikatalà kâ Apu Kesu, á si Satanas yù mammaguray nira.

²⁰ Á ammu tam gapay ta nabbáli ta tolay yù Anâ ni Namarò nga minay ta dabbuno, á inipakánnámmu na nittam yù kuruk, tapè ammu tam si Namarò, nga kuruk nga mepángngà nga pakimorayát tam. Á nepattatádday ittamin kâ Namarò, gapu ta nepattatádday ittam kâ Apu Kesu nga Anâ na. Aggina yù kuruk nga manotolay, nga paggapuán nayù mannanáyun nga áttòle tam.

²¹ Á sikayu nga kun na ánâ ku, arán naw laguk tángngagan yù tanakuán nga ari mepángngà nga pakimorayán.

Yù Mekaruá nga Túrá ni Kuan

Yù Meyannung sù Túrá

Yawe yù mekaruá nga túrá ni Kuan sù ira iddukan na nga masíná nga piníli ni Namarò. Á yù ira tatolay nga kuruk nga pattúratán na támma yù ira tangapaggammungán nga mangikatalà kâ Apu Kesu. Á tabarangán na ira ni Kuan ta makkaká-iddù ira áнна arád da kurugan yù kagian nayù ira mangituddu nga ari kuruk yù ituddu ra.

Yù Mayán nayù Túrá

Yù Pamegapu nayù Túrá 1-3

Yù Taddán ni Namarò nga Ari Bulubugá Mári 4-6

Mappalán ittam sù ira Minángngilogó 7-11

Yù Iddanamán ni Kuan nga Mattúllun nira 12-13

¹ Ajjawá nga lakalákay nga minánmaron sù ira mangikatalà kâ Apu Kesu. Á makapattúrákà nikayu nga kuruk nga iddukak ku, yù babay nga piníli ni Namarò, áнна yù ira ánâ na. Á ari lá síkán yù mangiddù nikayu, nu ari gapay yù ira ngámin nga makánámmu sù kuruk nga meyannung kâ Apu Kesu.

² Á makkaká-iddù ittam, gapu ta kánámmuát tam yù kuruk nga bilin ni Namarò nga meyannung kâ Apu Kesu, nga napasigaggá ta nonò tam ta áddè ta áddè. ³ Á parè bì ta ikákkállá da ittam di Ammò Namarò áнна si Apu Kesu Kiristu nga Anâ na, á ábbágád da ittam, tapè magimammá yù nonò tam megapu ta panguruk tam sù kuruk nga bilin na áнна yù pakkaká-iddù tam.

Yù Taddán ni Namarò nga Ari Bulubugá Mári

⁴ Á magayáyákà ta pakarámak ku ta aijan yù ira ánâ mu nga napasigaggá yù panguruk da sù taddán ni Ammò Namarò nga Yáma tam, nga kunnay ta inibilin na nittam. ⁵ Á kopuk ku, ari gemma bagu yù bilin ni Namarò nga itúrá ku nikayu, ta dán nga ammu tam áddè ngaw sù pamegapu tam nga mangikatalà kuna. Á yáyù nga ikomá laguk nikayu, ta makkaká-iddù kayu.* ⁶ Á yawe laguk yù akka-akkuát tam, tapè ipasingat tam yù pangiddù tam sù ira kábulut tam áнна yù pangiddù tam kâ Namarò. Máwák nga kurugat tam yù inittaddán ni Namarò nittam. Á áddè ngaw kapámmegapu naw nga mangikatalà kuna, naginná naw yù inittaddán na, ta makkaká-iddù ittam.

Mappalán ittam sù ira Minángngilogó

⁷ Á manguruk ittam laguk sù taddán ni Namarò nittam, ta aru garè yù ira mappassapas-siár ta dabbuno, nga minángngilogó, nga mangituddu ta ari kuruk. Massirisiri ira, ta kagiad da ta ari kuruk nga nabbáli ta tolay si Apu Kesu Kiristu sù ánge na ta dabbuno. Á ngámin ira nga mangituddu ta kunnian, minángngilogó ira nga makitulù sù nonò nayù mangontará kâ Apu Kesu Kiristu. ⁸ Magimuguk kayu laguk, maraké lonán naw yù kapiánán naw, nga pabbalinán nayù tarabáku tam nga mangipakánámmu sù bilin ni Namarò nikayu. Ta napiá galá nu málá naw yù ngámin nga bálá naw nga ikáyá ni Namarò nga iyawá nikayu.

⁹ Á yù tolay nga mangituddu ta tanakuán nga ari yù inittuddu ni Apu Kesu Kiristu, arán na ammu si Namarò. Ngam yù tolay nga napasigaggá yù pangikatalà na sù ituddu ni Apu Kesu Kiristu, maggián nga nepulupulù kuna si Ammò Namarò áнна yù Anâ na. ¹⁰ Á nu aijan yù tolay nga umay nikayu, nga tanakuán yù ituddu na, nga ari negittá sù bilin ni Apu Kesu, á arán naw paddulotan ta bale naw. Ari kayu gapay maddios kuna. Arán naw iyabbù kuna nu kunnasi. ¹¹ Tanu maddios kayu kuna onu iyabbù naw nu kunnasi yù ággián na, onu paddulotan naw ta bale naw, á mekanakaná kayu sù naráké nga akka-akkuán na.

Yù Iddanamán ni Kuan nga Mattúllun nira

¹² Á aru paga yù kagiak ku nikayu nakuan, ngam arák kin itúrá kunangane, ta iddagák ku yù awayá nga umay sù gián naw. Ta et takayu tullúnán, tapè makkakásingan ittam nga makkaká-ubobuk, áнна kukurugán nga magayáyá ittam gapu ta pakkakásingat tam mángin. ¹³ Á yù ira ánâ nayù wagim nga piníli ni Namarò, ipetúrá da níkán yù iyabbù da gapay nu kunnasi kayu, ta ikomá ra gapay kâ Apu ta parè bì ta napiá yù ággián naw. Yáyù áddè nayù kagiak ku.

* 1:5 Kuan 13:34; 15:12, 17

Yù Mekatallu nga Túrâ ni Kuan

Yù Meyannung sù Túrâ

Á yawe yù mekatallu nga túrâ ni Kuan. Á nattúratán na si Gayo nga kopun na nga minánaron gapay sù tangapaggammungán nga mangikatalà.

Iráyo ni Kuan yù napiá nga ángngabbák ni Gayo sù ira minángngilayalayâ nga umay ta arayyu nga lugár nga mangituddu sù bilin ni Namarò. Á pappalánan na di Gayo ta meyannung sù ira tatolay nga mangituddu ta ari negittá sù bilin ni Namarò.

Yù Mayán nayù Túrâ

Yù Pamegapu nayù Túrâ 1-4

Napiá nu Makkaká-abbák ittam 5-8

Yù Narákè nga Kingnguá ni Diotripis 9-10

Yù Napiá nga Ággangnguá ni Dimitrio 11-12

Ikáyâ ni Kuan ta Makkásingan ira 13-15

¹ Ajjawá nga lakalákay nga minánaron sù ira mangikatalá kâ Apu Kesu. Á makapattúrákâ níkaw, Gayo, nga kopuk ku nga kuruk nga iddukak ku.

² Kopuk ku nga iddukak ku, ipakimállâ ku kâ Namarò ta parè bì ta iyawâ na níkaw yù napiá nga gawagawáyám mu ána yù ággiám mu, nga kunnay ta napiá nga nonò mu. Ta ammu ta kuruk nga napiá ána napasigaggâ yù pangikatalá mu kâ Apu. ³ Á magayáyákâ ta pakarámak ku sù napiá nga akka-akkuám mu. Ta limibbè saw giák ku yù ira wáwwagi tam nga naggapu ta gián naw, á kinagi ra níkan ta uputam mu yù napiá nga akka-akkuám mu, ána napasigaggâ yù panguruk mu sù inituddu ni Namarò nittam. ⁴ Á awán ta kapiánán nga ipagayáyâ ku, nu ari lá yù pakarámak ku ta napasigaggâ yù panguruk nayù ira ána ku sù kuruk nga bilin ni Namarò.

Napiá nu Makkaká-abbák ittam

⁵ Kopuk ku nga iddukak ku, napiá yù pangabbák mu sù ira wáwwagi tam nga umay mappassiár ta gián naw, mássiki nu álliuk ira nga arám mu ngaw ammu lage ra limibbè. ⁶ Á keggá ra saw giám mi, kinagi ra sù ira manguruk kâ Apu nga maggagammung saw yù napiá nga ángngiddù mu nira. Á napiá laguk nu uputam mu nga abbágán yù ira umay nga kunnay nira nga mangituddu ta meyannung kâ Apu. Á iyawâ mu nira yù máwák da ta páno ra sù gián naw, tapè umay ira mangituddu sù ira tatolay ta káruán nga lugár. Ta yáyù gemma mepángngâ nga ángngabbák tam sù ira nga masserbi kâ Namarò. ⁷ Ta nánawád da yù giád da, tapè umay ira mangipakánnámmu ta meyannung kâ Apu Kesu Kiristu, á arád da apan yù awágad da sù ira nga ari manguruk kâ Apu. ⁸ Á yáyù nga sittam nga mangikatalá kâ Apu Kesu yù mangabbák nira, tapè mesipá ittam sù pattarabáku ra nga masserbi kâ Apu.

Yù Narákè nga Kingnguá ni Diotripis

⁹ Á aijan yù initúrá ku ngaw sù ira manguruk kâ Apu nga maggián ta gián naw. Ngam si Diotripis, ikáyâ na ta aggina lá yù kátannangád da, á manaki nga manguruk sù kinagi nira. Á pinotuán nangâ, ána arán na sinángngák yù túrâ ku. ¹⁰ Á sangaw nu umayâ ta gián naw, ipalappâ ku yù narákè nga akka-akkuán na, nga pallilibâ na níkan ána yù passirisiri na. Ari makáppak sù narákè nga akkuán na, ta lannapán na paga. Arán na paddulotan yù ira wáwwagi tam nga álliuk nga umay ta gián naw, ána ipugik na yù pangálluik nayù ira nga ikáyâ da nga mangálluik nira nakuan. Á nu potuád da yù kagian na ána allíúgad da ira, á papanáwan na ira sù paggagammungád da.

Yù Napiá nga Ággangnguá ni Dimitrio

¹¹ Kopuk ku nga iddukak ku, arám mu párigán yù tolay nga mangnguá ta narákè, nu ari galá yù tolay nga napiá yù ággangnguá na. Ta yù ira tatolay nga napiá yù ággangnguá ra, aggira yù ána ni Namarò. Ngam yù tolay nga narákè yù ággangnguá na, arán na ammu si Namarò. ¹² Ta ángngarigán, aijan si Dimitrio. Aru yù ira tatolay nga makkagi ta napiá lá yù nonò na, nga mepasingan megapu sù napiá nga ángnguruk na sù bilin ni Apu, ána yù ngámin nga napiá nga akka-akkuán na. Á síkán gapay, kunnian yù passistígú ta meyannung kuna, ta aggina yù pangikatalakán, á ammu naw ta kuruk yù kagiak ku.

¹³ Á aru lá paga yù itúrá ku nakuan níkaw, ngam arák ku itúrá kunangane. ¹⁴ Ta ari mabayák támma, á makkásingan itta, tapè makká-ubobuk itta ta napiá.

¹⁵ Á parè bì ta magimammà yù nonò mu ána napiá yù ággiám mu. Ngámin nga kákkopum mu saw giák ku, ikáyâ da nga mepanonò ira nikaw, á iyabbû da nu kunnasi ka. Á sikaw, ipanonò mà bì gapay sù ira kákkoput ta nga katággítádday ta giám mu.

Yù Túrâ ni Jud

Yù Meyannung sù Túrâ

Si Jud yù urián ni Ime. Á si Ime yù minánnaron sù ira taga Jerusalem nga mangikatalà kâ Apu Kesu, á aijan gapay yù itúrâ ni Ime.

Á yawe túrâ ni Jud, initubbuk na sù ira mangikatalà kâ Apu nga newarawarâ nga nakipaggián ta aru nga makkakerumá nga lugár. Á pappalánan na ira ta meyannung sù ira mangituddu nga ari kuruk yù ituddu ra, ána narákè yù ággangguá ra. Ngam sinullá ni Namarò yù ággaw nga pangukum na nira. Á kagian ni Jud sù ira manguruk kâ Apu ta upatad da yù panguruk da sù kuruk nga bilin ni Namarò, ta yáyù ipagayáyâ ni Namarò.

Yù Mayán nayù Túrâ

Yù Pamegapu nayù Túrâ (1-2)

Pappalánan na ira sù ira nga Mangituddu ta ari Kuruk (3-4)

Yù Ággangguá nayù ira Narákè ána yù Pamagikáru ni Apu nira (5-18)

Yù Meyannung sù Napiá nga Ipakuá ni Namarò sù ira Tatole na (20-23)

Yù Pamindision ni Jud ána Paddáyo na kâ Apu (24-25)

¹ Sikán si Jud, nga aripan ni Apu Kesu Kiristu, nga urián ni Ime. Á mattúrâkâ nikayu nga nagginná sù pagágál ni Apu Namarò ta mangikatalà kayu kâ Apu Kesu, sikayu nga iddukan ni Namarò nga Yáma tam, nga taronán ni Apu Kesu Kiristu. ² Á parè bì nakuan ta tagenatan naw yù ángngikállá ni Namarò nikayu ána yù ángngiddù na nikayu ta kággággaw, tapè mangáppípiá yù ággián naw ána yù pakkaká-iddù naw.

Pappalánan na ira sù ira nga Mangituddu ta ari Kuruk

³ Wáwwagi nga iddukak ku, apurák ku nga mattúrâ nikayu ta meyannung sù ángngiyígu ni Namarò nittam. Ngam aijan yù tanakuán nga máwák nga itúrâ ku nikayu kunangan, ta máwák nga tabarangát takayu galá ta pasikkálan naw yù ángnguruk naw sù bilin ni Namarò nga inikatalá na nittam nga tatole na, tapè ari malannapán yù netuddu ána ari mapatalián.

⁴ Ta aijan garè yù ira ari makimoray kâ Apu, nga minay nga nepattatádday nikayu. Á inilímak da nikayu yù nonò da. Ngam pinataliád da yù kuruk nga bilin ni Namarò nga meyannung sù ámmakomá na ta tatolay, á ituddu ra yù ari kuruk. Kagiad da ta paguráyán ni Namarò yù akkuát tam, gapu ta napakomá ittamin, mássiki nu akka-akkuát tam yù narákè nga karagatán na baggi tam. Á panakitád da si Apu Kesu Kiristu, nga Yápu tam nga táttádday. Ngam si Namarò, inipetúrâ na ngaw nga nabayágin yù ámmagikáru na nira sangaw nu duttál yù ággo na.

Yù Ággangguá nayù ira Narákè ána yù Pamagikáru ni Apu nira

⁵ Á mássiki nu ammu nawin yawe nga kagiak ku, ikáyâ ku nga ipanonò nikayu yù pamagikáru ni Namarò sù ira manaki nga manguruk. Nonopan naw yù ira ngaw Kudio nga aripan nayù ira Egipto. Iniyígu ni Namarò ira, ána inililli na ira sù ira nga mangaripan nira, á pinapáno na ira ta lugár na Egipto. Á kabalin ni Namarò nangiyígu nira, ari ira nanguruk, á pinotuád da si Namarò. Á yáyù nga pinagikáru na laguk ni Namarò yù ira ngámin nga ari nanguruk kuna, á natay ira ngámin. ⁶ Á yù ira daroban ni Namarò gapay, nilonád da yù pakáwayyá ra nga iniyawá ni Namarò nira, á nánawád da yù mepángngá nga paggianád da. Á yáyù nga pinukù ni Namarò ira nga nabáluk ta káwák sù nakallá nga gián, ta áddè ta dattál na sangaw nayù mangilin nga ággaw nga pamagikáru na nira. ⁷ Á mappalán itam gapay, megapu sù nesimmu sù ira ngaw taga Sodoma ána taga Gomorra ána yù ira bárru ra. Ta nepallá yù ákkikarallo ra, ána ari ira nakáppak sù kingnguá ra nga narákè nga mekontará ta baggi ra. Á yáyù nga pinagikáru na ira ni Namarò, á sinuggi na yù ira ili ra, á natay ira ngámin, tapè ipasingan ni Namarò nittam yù keyarigán nayù api nga ari máddá, nga ámmagikáru na sù ira mangnguá ta narákè.

⁸ Á yù ira tatolay nga mamotu nga mepaggammung nikayu, akka-akkuád da gapay yù kunnay sù kingnguá nayù ira ngaw tatolay nga nattatagená ta ili na Sodoma. Kurugad da yù narákè nga karagatád da ta pattatagená da, á manaki ira nga manguruk kâ Namarò. Á paddáketad da yù baggi ra, ána potuád da yù ira ngámin nga makáwayyá ánnè nira, ána pakkakagiád da gapay yù ira mangilin nga daroban ni Namarò. ⁹ Ngam si Mikel, mássiki nu aggina yù kotunán nayù ira mangilin nga daroban nga maggián ta lángi, arán na ngaw

si Satanas nakkakagián ta pamereperang na kuna ta ubobuk ta meyanung sù baggi ni Moyses. Ta kinagi na lâ ni Mikel kâ Satanas, “Si Namarò yù maggammá níkaw,” kun na.

¹⁰ Ngam danniaw ira tatolay nga mepaggagammung níkaw, uyu-uyawad da yù ngámin nga arád da kánnámuán, á akkuád da lâ yù negagángay nira ta kunnay ta ayám nga mangnguá lâ ta karagatán na baggi ra. Á yáyù íkararál da. ¹¹ Awán iren! Mappaná sangaw yù ámmagikáru ni Namarò nira, ta pinárigád da yù ággangguá nayù ngaw Kain,* nga aná ni Lákay Adan nga namotu kâ Apu. Á pinárigád da gapay yù kingnguá nayù ngaw Balam,† ta akkuád da lâ yù narákè, gapu ta ikáyá da ukkurán yù kuártu. Á potuád da si Namarò gapay ta kunnay sù ngaw Korak‡ áнна yù ira kábulun na, nga namotu kâ Moyses nga yù ngaw ábbilinán ni Namarò. Á yáyù nga pagikaruan ni Namarò ira sangaw, nga kunnay ta pamagikáru na kári Korak.

¹² Á danniaw ira, kitakikí ira nga kitokkuk, á ari ira mappasirán kâ Namarò! Ari ira mepángngá nga mepaggagammung níkaw nga mepakkákán sù panaddamán naw ta pate ni Apu Kesu. Awán ta napiá nga akkuád da, nga kunnay ta jibbà nga ipayapayák na paddák, nga awán ta urán na. Á kunnay ira gapay ta káyù nga ari nabbungá sù bulán nga pabbungá na, á yáyù nga nabaddul, nga nalelay áнна nakatáng. ¹³ Mepasingan yù narákè nga akka-akkuád da nga kunnay ta bugá na palung na bebay. Awán ta serbi nayù akkuád da. Mappassapasiár ira nga mappasingan, nga kunnay ta bituan, ngam aijan yù dán nga napanán nga labbetád da, nga nakallà nga gián nga paggianád da ta áddè ta áddè.

¹⁴ Á si Enok, nga yù ngaw mekapitu nga ginaká nga namegapu kâ Lákay Adan, á aijan yù kinagi na nga inipakánnámmu ni Namarò kuna nga meyanung karanniaw nga tatolay nga narákè. Kinagi na, “Ye! Umay sangaw si Apu, nga mepulù sù ira jinibu nga mangilin nga daroban na. ¹⁵ Á panunnután na yù ira ngámin nga tatolay. Á pagikaruan na yù ira ngámin nga namotu kuna, gapu ta ari ira makimoray kuna, áнна gapu sù narákè nga kingngikingnguá ra, áнна gapu sù narákè nga pakkakagi ra ta pangontará ra kuna.” Yáyù initúrâ na ngaw ni Enok, nga meyanung karanniaw nga narákè nga tatolay nga mepaggagammung níkaw.

¹⁶ Mináddagaragim ira nga minámmaliwâ. Akka-akkuád da yù narákè nga karagatád da. Á mappeddaráyaw ira nga nabángák yù ággubobuk da. Á áppè pípiá ira, nga mámmi yù ággubobuk da, tapè malá da yù ikáyá da lápay.

¹⁷ Ngam sikayu nga wáwwagi nga iddukak ku, nonopan naw yù kinagi nayù ira mapulu duá nga minángngilayalayá nga sinudduán ni Apu Kesu Kiristu, nga Yápu tam. ¹⁸ Ta kinagi ra, “Sangaw nu duttál yù ira kaporianán nga ággaw, á duttál gapay yù ira tatolay nga manguyaw kâ Apu Namarò áнна yù ngámin nga napiá, á akka-akkuád da yù narákè nga karagatád da,” kud da. ¹⁹ Á danniaw ira nga kinagi ra, minay iren ta gián naw, nga mamuruburion áнна mamassisinná níkaw. Á nonopad da áнна akkuád da lâ yù negagángay sù ira tatolay sawe dabbuno nga ari makimoray kâ Namarò. Á ari gemma mepulù nira yù Mangilin nga Ikararuá.

Yù Meyanung sù Napiá nga Ipakuá ni Namarò sù ira Tatolay na

²⁰ Ngam sikayu, wáwwagi, nga iddukak ku, patattaman naw ta nonò naw yù bilin ni Namarò nga metuddu níkaw, tapè mapasigaggá yù pangikatalà naw kâ Apu Kesu. Á ta pakimállà naw, ikomá naw yù ipanonò na níkaw nayù Mangilin nga Ikararuá. ²¹ Á magattam kayu nga magiddak sù panoli ni Apu Kesu Kiristu, á ipasigaggá naw yù ákkiyápu naw kuna, tapè matagená naw yù ángngiddù ni Namarò, áddè ta kesipá naw kâ Apu Kesu áнна pangiyawá na níkaw sù mannanáyun nga áttole na, megapu sù allá na.

²² Á aijan yù ira kábulun naw nga mabbábáng. Ikákkállà naw ira, á tabarangán naw ira, tapè mapasigaggá yù pangikatalà da. ²³ Á ipakánnámmu naw yù napiá nga dámak nga meyanung kâ Apu Kesu Kiristu sù ira tatolay nga mággè mapagikáru, tapè mabbabáwi ira áнна mangikatalà ira kâ Apu. Ta nu mangikatalà ira kâ Apu, meyígù ira, á kunnay ira laguk ta mággè metuppá, nga ginuru naw nga inillili sù api. Á yù ira káruán nga kitarákè yù akkuád da, ikállà naw ira gapay, ngam mappalán kayu, marakè mekanakaná kayu sù narákè nga akkuád da.

Yù Pamindision ni Jud áнна Paddáyo na kâ Apu

²⁴ Dayáwat tam si Namarò! Aggina lâ yù makáwayyá nga manaron nittam, tapè ari ittam mekanakaná sù narákè nga akka-akkuán nayù ira ari manguruk. Si Namarò lâ yù makári

* 1:11 Meyanung kâ Kain: Genesis 4:1-8; 1 Kuan 3:12. † 1:11 Meyanung kâ Balam: Numero 22-24; 31:16; 2 Eduru 2:15-16. ‡ 1:11 Meyanung kâ Korak: Numero 16:1-35.

ta liwiliwâ tam, tapè marenu ittamin. Á sangaw nu iyáŋge na ittam ta gián na, awán ta masingan na nga liwâ tam, á mepallà laguk yù pagayáyâ tam ta arubáng na. ²⁵ Meparáyaw si Namarò, nga mangiyígù nittam, megapu sù ketapil ni Apu Kesu Kiristu nga Yápu tam. Si Namarò lâ yù mepángngà nga pakimorayát tam. Aggina yù táttáday nga kotunán nga mammaguray, nga maddalingárang ána makáwayyá ta áddè ngaw gári lage na keggá na ággaw, ta áddè noka nga awán ta pagáddekán. Ammán!

Yù Nepalappâ ni Apu Kesu Kiristu kê Kuan

Yù Meyannung sawe Libru

Si Kuan yù nattúrâ sawe libru, á initúrâ na gapay yù libru nga Napiá nga Dámak, áнна yù ira tallu nga baddi nga túrá. Á aggina yù sinudduán ni Apu Kesu, nga iddukan na, nga mebiláng sù ira mapulu duá. Á pamegapu na yawe libru, ibukalán ni Kuan yù initúrâ na sawe libru nga meyannung sù nasingan na ta lángi, áнна yù bilin áнна kingnguá ni Apu Kesu Kiristu (1:1-3). Á kagian na gapay yù meyannung ta baggi na áнна yù keggá na ta Pugu na Patmus, á ipakánnámmu na laguk yù inipasingan nayù Mangilin nga Ikararuá ni Namarò kuna ta keggá na tán (1:9-11).

Á ipakánnámmu ni Kuan yù meyannung sù narákê nga aijan ta dabbuno kunangane, áнна yù jigâ nga attamán nayù ira manguruk kê Apu áнна yù pate nayù ira káruán megapu sù pangguá nayù ira narákê nira. Á ipakánnámmu na ta si Apu Kesu yù Yápu nga mammaguray ta ngámin, nga mangappù sù ngámin nga narákê nga mangontará kê Namarò, sangaw nu duttál yù ággaw nga pamanunnù ni Namarò áнна pangukum na nira. Á ipakánnámmu ni Kuan gapay yù mesimmu noka, nga napiá nga makapállá yù pabbálà ni Namarò sù ira ngámin nga tatolay nga napasigaggá yù ánggikatalà da kuna, nepatalugáring sù ira tatolay nga mekatalà nga mamaluro sù ipakuá na nira ta áddè ta pate ra (1:19).

Á pabbibbik tam sù libru, máwák nga nonopat tam ta mattutubbâ nga magistoriá si Kuan ta nasingan na nga panákkilalán ta jigâ nga mesimmu sangaw áнна yù napiá nga mesimmu paga noka ta kabalín na ággo na jigâ, tapè mabannáyán yù nonò tam.

Á sittam ngámin nga mangikatalà kê Apu Kesu, mábbágán ittam megapu sù pabbibbik tam sawe libru, pappanganâ ta kagian na yù napiá nga ággiát tam ta kesipá tam kê Namarò sangaw nu kabalín na mamagikáru sù narákê (21:3-4). Á yáyù nga mabannáyán laguk yù nonò tam áнна mapatattam ittam, ta yáyù iddanamát tam.

Yù Mayán nayù Libru

Paddios ni Kuan áнна Paddáyo na kê Apu Namarò (1:1-8)

Yù Pappasingan ni Apu Kesu Kiristu nga Naginnanolayin (1:9-20)

Yù Bilin ni Apu sù ira Tatolay ta Pitu nga Ággagammungád da (2:1-3:22)

Yù Mesimmu paga Sangaw nu Duttál yù Ággo na (4:1-22:21)

Yù Pakimore ra kê Apu ta Lángi (4:1-11)

Yù Papel nga Nalukù nga Pitu yù Neparakkà kuna áнна yù Kígaw na Karneru (5:1-14)

Yù Naggapu sù Papel nga Nalukù nga Pitu yù Neparakkà kuna (6:1-17)

Yù 144,000 nga Ginaká ni Israel nga Sinullá ni Namarò ta Tatole na (7:1-17)

Yù Mekapitu nga Neparakkà áнна yù Pitu nga Amariung (8:1-11:19)

Yù Mallakay nga Kagang áнна yù Duá nga Ayám nga Makánnanássing (12:1-13:18)

Yù Pangikállá ni Namarò sù ira Mangikatalà kuna, áнна yù Pamagikáru na sù ira Ari Manguruk kuna (14:1-15:8)

Yù 144,000 nga Tatolay nga Kábulun nayù Kígaw nga Karneru (14:1-5)

Yù Inilayalayá nayù ira Tallu nga Daroban (14:6-13)

Yù Meyárik ta Paggaták áнна Pappusik ta Dabbuno (14:14-20)

Yù ira Pitu nga Jigâ nga Maporián (15:1-8)

Yù ira Pitu nga Malukung nga Napannu ta Pore ni Namarò (16:1-21)

Yù Pangappù ni Namarò sù ira Malussaw kuna ta Dabbuno (17:1-18:24)

Yù Meyannung sù Narákê nga Babay nga Makkabáyu ta Ayám (17:1-18)

Yù Kararál nayù Ili nga Meyárik ta Ili na Babilonia (18:1-24)

Meparáyaw si Namarò ta Lángi (19:1-21)

Yù 1,000 nga Dagon nga Pammagure ni Apu Kesu Kiristu ta Dabbuno (20:1-6)

Yù Kepayáng ni Satanas ta Impiernu (20:7-10)

Yù Pamanunnù ni Namarò sù ira Námmatay (20:11-15)

Yù Bagu nga Lángi áнна yù Bagu nga Dabbun (21:1-8)

Yù Bagu nga Ili na Jerusalem (21:9-22:5)

Mattoli si Apu Kesu Kiristu sangaw (22:6-21)

¹ Netúrâ saw yù meyannung sù mesimmu sangaw nu mabi,* nga inipalappâ ni Namarò kê Apu Kesu Kiristu. Inibilin ni Namarò kê Apu Kesu, tapè ipakánnámmu na sù ira masserbi kuna. Á yáyù nga jinok na laguk ni Apu Kesu yù daroban na ta umay nga

* 1:1 2 Eduro 3:8

mangipakánnámmu níkán. ² Á síkán sí Kuan nga masserbi kuna. ² Á sinistígúák ku yù ngámin nga nasíngak ku nga meyanung sù bilin ní Namarò ána yù ngámin nga kinagi ní Apu Kesu Kiristu níkán ána yù kingnúá na. ³ Á pagayáyan ní Namarò síkayu ngámin nga mabbíbbík sawe libru nga meyanung sù mesímmu sangaw ána yù ira nga magginná ta pabbíbbík naw kuna, síkayu ngámin nga manángngák nga manguruk sù kagian na yawe túrá. Ta ari mabayák, á mesímmu ngámin nga netúrá saw.†

Paddios ní Kuan ána Paddáyo na kâ Apu Namarò

⁴ Síkán sí Kuan, á mattúrák níkayu nga tatole ní Namarò, nga makimoray kuna sù ira pitu nga ággagammungán ta purubinsia na Asia.

Parè bí ta ikállà na kayu ní Namarò

ána iyawâ na níkayu yù napiá nga nonò naw, tapè magimammà kayu.

Sí Namarò yù Egga kunangan,

nga awán ta pamegapu na ána awán ta pagáddekán na.

Á parè bí ta ikállà na kayu gapay nayù Ikararuá ní Namarò,

ána paggimammatan na kayu.

Maggián yù Ikararuá na ta arubáng nayù ággitubangán ní Namarò,

nga egga kuna yù pitu nga pakáwayyá na nga makkakerumá.

⁵ Á parè bí ta ikállà na kayu gapay ní Apu Kesu Kiristu,

á pagimammatan na kayu.

Sí Apu Kesu Kiristu yù mekatalá

nga mangipakánnámmu ta meyanung kâ Namarò.

Sí Apu Kesu Kiristu yù napolu nga naginnanolay nga naggapu sù ira námmatay.

Aggina yù Kotunán nga Patul nga mammaguray sù ira tatolay nga mammaguray ta dabbuno.

Dayáwat tam laguk sí Apu Kesu Kiristu. Aggina yù mangiddù nittam.

Á initalpil na yù baggi na megapu nittam.

Á pinalubbáng na ittam,

megapu sù dága na nga mangari sù liwiliwá tam.

⁶ Á inisipá na ittam sù pammagure na,

tapè mammaguray ittam gapay.

Á pinabbalin na ittam ta páppári,

nga masserbi kâ Namarò nga Yáma na.

Parè bí ta meparáyaw sí Apu Kesu Kiristu ta áddè ta áddè.

Aggina yù kotunán nga mammaguray ta áddè ta áddè.

Mapaluré. Ammán.

⁷ Á ginnán naw ta napiá, ta manoli sangaw sí Apu Kesu Kiristu,

nga masingan nga mappángè ta dabbuno, nga mepulú ta kunam.

Á yù ira ngámin nga tatolay, masingad da ta kunam,

másiki yù ira ngámin nga namíká kuna.

Á yù ira ngámin nga makkakerumá nga tatolay ta dabbuno, nga ari manguruk kuna,

maraddam ira nga makkulé ta assing da, gapu ta duttál yù pamagikáru na nira.

Kuruk nga mapaluré yaw. Ammán.

⁸ Á yawe yù kagian ní Apu Namarò, “Síkán yù Namarò ta ngámin nga ajjan ána yù Mamabbalin ta ngámin.† Síkán yù Egga kunangan, nga awán ta pamegapu na ána awán ta pagáddekán na, yù Makáwayyá ta ngámin,” kun na.

Yù Pappasingan ní Apu Kesu Kiristu nga Naginnanolayin

⁹ Síkán sí Kuan nga wagí naw megapu sù panguruk tam kâ Apu Kesu. Á gapu ta kepattatádde tam kâ Apu Kesu, mepagittá ittam nga mangiyangngá ta jigá. Á magattam ittam lá, gapu ta mesipá ittam gapay kâ Apu Kesu sù pammagure na. Á jinigirigá dangá nayù ira ari manguruk, á pinapáno rangá nga inipeyángay ta pugu na Patmus, gapu ta pangilayalayâ ku sù bilin ní Namarò ána yù kuruk nga meyanung kâ Apu Kesu. ¹⁰ Á tádday nga ággo na Liggú[§], á kunnay ta sinangngalán nangá nayù Ikararuá ní Namarò, á kunnayá ta mattatagená, á naginná ta likuk ku yù ngáral nga masikan, nga kunnay ta

† 1:3 Ábbágán na ittam nayù Mangilin nga Ikararuá, tapè kánnámmuát tam yù kebalinán nayù bibbirat tam: 1 Korinto 2:10-16; 1 Kuan 2:27; Nepalappâ 19:10. † 1:8 Ta ággubobuk na Gareko, “Síkán yù mangngágan ta Alpa ána Omega.”

Á Alpa yù purmero nga letra nayù abakada na Gareko, ána Omega yù kaporianán nga letra. § 1:10 Liggú yù mangngágan gapay ta Ággo ní Apu, ta yáyú ággaw nga paginnanole na.

amariung. ¹¹ Á kinagi na nikán, “Itúrâ mu ta libru yù masingam mu, á itubbuk mu laguk sù ira tatolè nga makimoray nikán sù ira pitu nga ággagammungán sù ira ili na Epeso, Esmerna, Pergamu, Tiyatira, Sardis, Piladelpia, á ta ili na Lodisia gapay,” kun na.

¹² Á pakaginnâ sù ngárál, nallipayâ, tapè innak ku yù magubobuk nikán. Á nasingak ku pitu ira nga nanáddagán na isingan, nga buláwán. ¹³ Á ta tangngá nayù ira pitu nga nanáddagán na isingan egga yù kun na tolay nga Kaká na ngámin na tatolay, * nga nanáddak nga nabbarawási ta apaddu nga nakáddè ta takki na yù kapaddu na, á nebarakà ta gáko na yù gámi nga buláwán. ¹⁴ Á kitapuraw yù duddù na nga kun na kápâ. Á yù matá na, naggatang ta kun na api. ¹⁵ Á nasiling yù takki na ta kun na baronsi nga nalunák ta api, nga napalinis ta napiá. Á kun na sarò na dakal nga bagi yù ngárál na. ¹⁶ Á sinangngalán na ta jiwánán nga limá na yù pitu nga bituan. Á aijan nga mallawán ta simù na yù kunnay sù bayunetá nga duá yù ngárak na nga nataram.† Á manawák yù mammang na nga kunnay ta paddalingárang na bilák ta tangngá na ággaw.

¹⁷ Á pakasingak ku kâ Apu, á napalakagá ta arubáng na, nga kunnay ta natay. Á kimmá nangá sù jiwánán nga limá na, á kinagi na nikán, “Ari ka maganássing, ta sikán yaw. Sikán yù maggiánin sù awán paga ta naparò, á sikán yù maggián lâ paga ta kabalin na ngámin. Sikán yù Olu ána yù Kaporianán. ¹⁸ Sikán yù sigga-inángá nga matolay. Á sù ngaw, natayâ. Ngam naginnanolayâ, ta sikán yù Egga, nga matolay ta áddè ta áddè. Sikán yù mammaguray sù ira ikararuá nga egga ta gián na námmatay, ta sikán yù manangngal ta ánnúsi nayù paggianád da ta Kades.

¹⁹ “Itúrâ mu laguk yù ngámin nga nasingam mu, ána yù ipasingak ku nikaw nga keyarigán nayù egga kunangane ána yù mesimmu paga sangaw nu duttál yù ággo na. ²⁰ Á kagiak ku laguk yù ari ngaw nepakánámmu nga meyanung sù ira pitu nga bituan nga nasingam mu gangú ta jiwánán nga limá ána yù ira pitu nga nanáddagán na isingan. Yù kebalinán nayù pitu nga bituan yù ira pitu nga manaron sù ira tatolè nga makimoray nikán ta pitu nga ággagammungád da. Á yù kebalinán nayù ira pitu nga nanáddagán na isingan, aggira yù ira tatolè nga makimoray nikán sù ira pitu nga ággagammungán.”

2

Yù Bilin ni Apu sù ira Maggagammung ta Epeso nga Nallállák yù Ayá da

¹ Á kinagi ni Apu laguk nikán, “Itúrâ mu yawe, nga iyawâ mu sù manaron sù ira tatolè nga maggagammung ta Epeso:

“Sikán yù manangngal sù ira pitu nga bituan ta jiwánán nga limá. Sikán yù mallakalakák ta tangngá nayù ira pitu nga nanáddagán na isingan nga buláwán. Á ginnán naw yù kagiak ku nikayu.

² “Ammù gemma yù akka-akkuán naw. Ammù ta malláppa kayu nga mattarabáku megapu nikán, ána napasigaggâ kayu nga magattam, mássiki nu marigirigâ kayu. Á ammù ta ipuerá naw yù ira nga mangnguá ta narákè, á pinasikkál naw yù ira nga makkagi ta aggira yù minángngilayalayâ, nga ari kuruk, á natákkilalán naw ta massirisiri ira. ³ Ammù ta napasigaggâ yù ángngikatalá naw nikán, mássiki nu marigirigâ kayu megapu sù panguruk naw nikán, á ari kayu nalurá.

⁴ “Ngam aijan yù meyanung nikayu nga arák ku ikáyá. Arán nawâ iddukan ta kunnay sù ángngiddù naw ngaw ta kapángguruk naw nikán, gapu ta arán nawin iddukan yù ira kábulun naw. ⁵ Nononopan naw laguk yù ngaw napiá nga ángngiddù naw nikán. Pallikuránán naw yù liwiliwá naw, á akkuán naw má yù kunnay sù napiá nga kingnguá naw ngaw. Nu arán naw ibabáwi yù liwiliwá naw, umayâ ta gián naw, á iriák ku yù nanáddagán na isingan naw sù gián na, á sikayu gemma yù kebalinán nayù nanáddagán na isingan nga iriák ku. ⁶ Ngam aijan yù akkuán naw nga napiá, ta ikalusso naw yù narákè nga akka-akkuán nayù ira nga metádday sù ira nga mangngágan ta Nikoletan, á ikalusso gapay yù narákè nga akka-akkuád da.

⁷ “Nu egga talingá naw, ginnán naw yù kagian nayù Ikararuá ni Namarò sù ira maggagammung nga makimoray nikán. Sikayu nga ari tumulú kâ Satanas, sikayu yù mangappù sù narákè. Á alawatat takayu, tapè mepaggián kayu nga mepagayáyâ kâ Namarò ta áddè ta áddè, á iyawâ ku nikayu yù awayyá naw nga kumán sù bungá na káyu nga ákkatole naw ta áddè ta áddè, nga egga ta nakástá nga garden ni Namarò.”

Yù Bilin ni Apu sù ira Maggagammung ta Esmerna nga Marigirigá

* 1:13 Si Apu Kesu Kiristu yù Kaká na ngámin na tatolay. Innam mu 14:14 futnot † 1:16 Kebru 4:12

⁸ Á kinagi na gapay ni Apu nikán, “Itúrâ mu yawe, nga iyawâ mu sù manaron sù ira tatolè nga maggagammung ta Esmerna:

“Sikán yù naggiánin sù awán paga ta naparò, á sikán yù maggián lâ paga sù kabalin na ngámin. Sikán yù ngaw natay, nga naginnanolayin. Á yawe yù bilik ku nikayu.

⁹ “Ammù gemma ta marigirigâ kayu ána pobare, ngam kunnay kayu ta maríku ta ánninganán ni Namarò. Ammù ta lillíbatad da kayu nayù ira nga makkagi ta Kudio ira, ngam ari ga. Ta ari ira mebiláng sù ira kuruk nga Kudio, gapu ta tumututtul ira kâ Satanas.

¹⁰ “Ngam sikayu nga manguruk nikán, ari kayu maganássing sù jigâ nga umay nikayu sangaw. Ta parubán na kayu ni Satanas, á ipekarsel na yù ira káruán nikayu. Á marigirigâ kayu ta mapulu nga ággaw. Á mássiki nu papatáyad da kayu, uputan naw yù ángnguruk naw nikán. Ta nu napasigaggâ yù ángnguruk naw nikán, iyawâ ku nikayu yù meyárik ta kuroná naw, nga inángâ naw nga awán ta áddè na.

¹¹ “Nu egga yù talingá naw, ginnán naw yù kagian nayù Ikararuá ni Namarò sù ira manguruk nga maggagammung nga makimoray nikán. Sikayu nga ari tumulù kâ Satanas, sikayu yù mangappù sù narákè, á ari kayu mekanakanâ sù pangukum ni Namarò nga mangngágan ta mekaruá nga patay.”

Yù Bilin ni Apu sù ira Maggagammung ta Pergamu nga Magginná sù Ari Kuruk

¹² Á kinagi ni Apu gapay, “Itúrâ mu yawe, nga iyawâ mu sù manaron sù ira tatolè nga maggagammung ta Pergamu:

“Sikán yù makákkuá sù bayuneté nga aijan yù duá ngárak na nga nataram. Á yawe yù bilik ku nikayu.

¹³ “Ammù gemma yù paggianán naw, ta makipaggián kayu sù ili nga paggianán nayù ira makiyápu kâ Satanas. Ngam sikayu, napasigaggâ yù ángnguruk naw nikán. Á ammù yù kingnguá nayù ira kelián naw kâ Antipas, nga yù ngaw napasigaggâ nga minángngilayalayâ sù bilik ku, ta ginápù da, á pinapáte ra. Á mássiki ta pamapáte ra kâ Antipas, arán naw nallikuranán yù panguruk naw nikán.

¹⁴ “Ngam aijan lâ paga yù meyannung nikayu nga arák ku ikáyâ. Aijan nikayu yù ira tumuttul sù inittuddu na ngaw ni Balam kâ Balak, ta inittuddu na ngaw sù ira ginaká ni Israel yù pakkákád da ta meyátáng sù ira sináddios ána yù keruruk da ta arád da atáwa, tapè malliwá ira. ¹⁵ Á aijan nikayu gapay yù ira nga tumuttul sù ittuddu nayù ira nga mangngágan ta Nikoletan. ¹⁶ Mabbabáwi kayu laguk, á pallikuranán naw yù liwá naw. Nu arán naw ibabáwi yù liwá naw, á umayâ sangaw nikayu, tapè gerrák ku yù ira nga mekanakanâ ta narákè. Á nagármasâ sù bayuneté nga mallawán ta simù ku, á yù kebalinán na yù ubobuk ni Namarò.

¹⁷ “Nu egga talingá naw, ginnán naw yù kagian nayù Ikararuá ni Namarò sù ira manguruk nga maggagammung nga makimoray nikán. Sikayu nga ari tumulù kâ Satanas, sikayu yù mangappù sù narákè. Á iyawâ ku nikayu yù kanan nga mangngágan ta manna,* nga pinakappiák ku nga nettutù lâ paga. Á iyawâ ku gapay nikayu nga katággitádday yù puraw nga batu, nga egga nga netúrá kuna yù bagu nga ngágan nayù nangalawâ kuna, nga awán ta makánámmu, nu ari galá yù nangalawâ kuna.”

Yù Bilin ni Apu sù ira Maggagammung ta Tiyatira nga Nekanâ sù ira Mangnguá ta Narákè

¹⁸ Á kinagi na gapay, “Itúrâ mu yawe nga iyawâ mu sù manaron sù ira tatolè nga maggagammung ta Tiyatira:

“Sikán yù Aná ni Namarò nga egga yù matá na nga naggatang ta kun na api, ána nassiling yù takki na ta kun na baronsi nga nalunák ta api, nga napaliniis ta napiá. Á yawe yù bilik ku nikayu.

¹⁹ “Ammù gemma yù akka-akkuán naw. Ammù yù ángngiddù naw nikán, á ammù ta napasigaggâ yù ángnguruk naw nikán. Ammù yù ángngabbák naw sù ira kábulun naw. Á ammù yù ággattam naw sù jigâ. Á mangáppípiá kayu, ta aru yù napiá nga akka-akkuán naw ánnè sù kingnguá naw ngaw. ²⁰ Ngam aijan yù akkuán naw nga arák ku ikáyâ. Anugutan naw garè yù pangituddu nayù mattá-ábbilinán, nga meyárik sù ngaw babay nga mangngágan ta Jesabel, gapu ta negittá yù ággangnguá na sù kingnguá na ngaw ni Jesabel. Massirisiri, á kagian na ta sikán yù naddok kuna, tapè ilogó na yù ira tatolay nga masserbi nikán, á kagumánan na ira ta makaliwâ ira nga mangarallaw ána kumán ta kanan nga

* 2:17 Manna yù kanan nga naggapu ta lángi nga iniyawâ ni Apu Namarò sù ira ginaká ni Israel, nga kanad da ta panaron ni Moyses nira ta kalállammatán. Si Apu Kesu yù manotolay nittam, nga meyárik ta kanat tam. Bibbiran naw Kuan 6:33, 47-48, 54.

neyátáng ta sináddios. ²¹ Á nabayágin nga iniddagák ku yù pabbabáwi na ta liwâ na, ngam móláng na ikáyâ ibabáwi yù pakikarallo na.

²² “Á yaw laguk yù akkuák ku. Pattakitak ku yù meyárik sù ngaw Jesabel. Á mesipâ gapay nga marigirigâ yù ira ngámin nga kinaruruk na, ta panigirigâ ku kuna, nu arád da ibabáwi yù akkuád da. Á magaráyan ira nga mangiyangngâ ta jigâ da. ²³ Á papatáyak ku yù ira nga kun na ánâ na, nga siminuttul sù narákè nga ituddu na. Á yù ngámin ira nga mangikatalâ níkan ta ngámin nga ággagammungád da, kánnámmuád da laguk ta síkán yù makánnámmu sù nonò na ngámin nga tatolay ána yù karagatád da. Á bálatat takayu nga taggitáddy ta mepángngâ sù kingnguá na.

²⁴ “Ngam sikayu nga káruán ta Tiyatira, arán naw inalawâ yù narákè nga ituddu nayù meyárik ta Jesabel, á arán naw ginigiámmu yù ituddu ra nga kagiad da ta monak nga naggapu kâ Satanas. Á napiá ta arán naw ira tángngagan. Awánin ta ilannâ ku sù ipakuá nikayu. ²⁵ Uputan naw lá yù napiá nga akka-akkuán naw ána yù ángnguruk naw níkan ta áddè ta labbè ku.

²⁶ “Á sikayu nga taggitáddy nga mangappù sù narákè, nga ari tumulù kâ Satanas, nga mapalurò sù napiá nga ipakuá kuna ta áddè ta pate na, á iyawâ ku nikayu yù pakáwayyâ naw nga mammaguray sù ira ngámin nga makkakerumá nga tatolay ta dabbuno. ²⁷ Á awán ta makatubáng nikayu. Á yù ira tatolay nga mangnguá ta narákè, pággangan naw ira, á mepárik ira ta bángga nga napakkâ gapu ta napalù ira ta baston naw nga balayáng. Ta síkán, inalawâ ku sù Yámâ yù pakáwayyâ nga mammaguray. Á yáyù nga isipâ takayu. ²⁸ Á iyawâ ku gapay nikayu yù darámmagan.

²⁹ “Nu egga talingá naw, ginnán naw yù kagian nayù Ikararuá ni Namarò sù ira manguruk nga maggagammung nga makimoray níkan.”

3

Yù Bilin ni Apu sù ira Maggagammung ta Sardis nga Meyárik ta Natay

¹ Á kinagi ni Apu gapay, “Itúrâ mu yawe, nga iyawâ mu sù manaron sù ira tatolè nga maggagammung ta Sardis:

“Egga níkan yù Ikararuá ni Namarò nga pitu yù pakáwayyâ na. Á síkán yù manangngal sù ira pitu nga bituan. Á yawe yù bilik ku nikayu.

“Ammù gemma yù akka-akkuán naw. Neparámak ta napiá yù panguruk naw níkan, nga kunnay ta matolay kayu, ngam ari kuruk, ta arán naw kurugan yù ituddù nikayu, á kunnay kayu ta natayin. ² Á arán naw garè matákkilalán yù kuruk nga ággián naw. Sikayu yù kunnay sù nakkaturuk. Arâ! Magimmunaw kayu laguk. Ipasigaggâ naw yù egga paga nikayu nga ángnguruk naw níkan, marakè malurâ kayu nga manguruk níkan. Ta pinasikkál ku yù akka-akkuán naw, á awán paga ta máyâ sù ánninganán ni Namarò. ³ Nonopan naw yù gininnâ naw nga inalawâ naw ngaw, á ipatattam naw laguk ta nonò naw. Á mabbabáwi kayu sù liwiliwâ naw. Nu ari kayu mallukák, tapè pallikuranán naw yù liwiliwâ naw, á lkáddagâ ku umay ta kunnay ta makkokò, ta arán naw ammu yù oras na dattál ku nikayu.

⁴ “Ngam ajjan paga yù ira baddi lá nikayu nga taga Sardis nga ari mekanakanâ sù narákè, á meyárik ira ta tolay nga ari narapingán yù gámi na. Á yáyù nga mepulupulù ira níkan, nga mabbarawási ta puraw, ta aggira yù mepángngâ nga kábuluk ku. ⁵ Yù ira ngámin nga ari tumulù kâ Satanas, mangappù ira sù narákè, á mabbarawási ira ta puraw. Á arák ku irián yù ngágad da sù libru nga naketúratán nayù ngágan nayù ira ngámin nga tatolè, aggira nga iddák ku ta inángâ nga awán ta áddè na. Á ipakánnámmù yù ngágad da kári Ammò ku nga Namarò ána yù ira daroban na, ána kagiak ku kári Ammò ta aggira yù tatolè.

⁶ “Nu egga talingá naw, ginnán naw yù kagian nayù Ikararuá ni Namarò sù ira manguruk nga maggagammung nga makimoray níkan.”

Yù Bilin ni Apu sù ira Maggagammung ta Piladelpia nga Sinullâ na ta Mangipakánnámmu kuna

⁷ Á kinagi ni Apu gapay níkan, “Itúrâ mu yawe nga iyawâ mu sù manaron sù ira tatolè nga maggagammung ta Piladelpia:

“Síkán yù mangilin. Síkán yù pangikatalakán. Á síkán yù makáwayyâ nga mammaguray ta ngámin, nga mangnguá ta maguray lá nga ikáyâ ku, á awán ta makagammá níkan. Kunnayâ ta manangngal ta ánnúsi sù pammagurayán ni Patul Dabid. Á nu bukaták ku, awán ta makelitù kuna. Á nu ilitù ku, awán gapay ta makabukâ kuna. Á yawe yù bilik ku nikayu.

⁸ “Ammù gemma yù akka-akkuán naw, ta mássiki nu baddi sikayu nga maggagammung tán, ána baddi lâ yù pakáwayyá naw, ngam kinuruk naw yù ubobuk ku, á arán naw inilímak yù ángngikatalà naw níkán. Á yáyù nga binukaták ku ta arubáng naw yù kun na puertá nga áttallungán naw, á awán ta makelítù kuna. ⁹ Ginnán naw yaw. Ajjan níkayu yù ira Kudío nga massiri, ta kagiad da ta tatole ni Namarò ira gapu ta Kudío ira. Ngam ari kuruk yù kagiad da, gapu ta tumututtul ira kâ Satanas. Á puersák ku ira ta umay ira mamalittúkak ta arubáng naw, tapè kánnámmuád da ta sikayu yù iddi-iddukak ku.

¹⁰ “Á gapu ta napasigaggâ yù ángnguruk naw sù kinagi nga meyanung ta pagattam naw ta jigâ naw, á yáyù nga iyígù takayu, tapè arán na kayu dattálan nayù jigâ nga mesimmu sangaw. Ta duttál sangaw yù dakal nga jigâ ta dabbuno, tapè maparubá yù ira ngámin nga tatolay ána mepasingan nu kunnasi yù nonò da megapu sù jigâ. ¹¹ Á umayá sangaw. Tángngagan naw laguk yù kuruk nga metuddu níkayu ána uputan naw yù napiá nga akkuán naw, tapè awán ta maggubâ sù bálà naw, nga kun na kuroná naw nga iyawâ ku sù ira katággítádday nga mangappù ta narákè.

¹² “Á ngámin ira nga mangappù ta narákè, patallungak ku ira sù bale ni Namarò ta lángi, á iyawâ ku nira yù maláddá nga paggianád da tán, á kunnay ira ta kallang na balay nga ari bulubugá meyali. Á imárkâ nira yù ngágan ni Namarò nga pakimorayák ku ána yù ngágan nayù ili ni Namarò gapay, nga bagu nga Jerusalem, nga maggapu ta lángi nga umay ta dabbuno. Á imárkâ gapay nira yù bagu nga ngágak ku.

¹³ “Nu egga talingá naw, ginnán naw yù kagian nayù Ikararuá ni Namarò sù ira manguruk nga maggagammung nga makimoray níkán.”

Yù Bilin ni Apu sù ira Maggagammung ta Lodisia nga Mattalakák

¹⁴ Á kinagi ni Apu gapay níkán, “Itúrâ mu yawe nga iyawâ mu sù manaron sù ira tatolè nga maggagammung ta Lodisia:

“Sikán yù mangngágan ta Ammán! Sikán yù pangikatalakán nga mangipakánnámmu sù kuruk nga bilin ni Namarò. Á sikán yù paggapuán na ngámin nga pinarò ni Namarò. Á yawe yù bilik ku níkayu.

¹⁵ “Ammù gemma yù akkuán naw. Mabbábáng kayu nga manguruk níkán. Ari kayin naláppâ nga tumuttul níkán. Meyárik kayu ta inuman nga ari kuruk nga malannaw, ngam ari gapay mapátu. Á nu kunnay kayu ta mapátu, á malláppâ kayu nakuan nga mangnúá sù ipakuá níkayu, á napiá nakuan yù ángnguruk naw níkán. Á nu kunnay kayu ta malannaw, arán nawâ nakuan ammu. Parè bì nakuan ta mappíli kayu nu kuruk nga manguruk kayu níkán, onu ari. ¹⁶ Á gapu ta meyárik kayu ta danum nga mejo nalubbâ, arák ku ikáyá yù kunnian, á yáyù nga kunnay ta iluták takayu! ¹⁷ Ta kagian naw ta napiá yù ággián naw, gapu ta maríku kayu nga awán ta máwák naw. Ngam arán naw garè ammu yù kuruk nga ággián naw, ta kábbi kayu nga makállállâ. Kuruk nga kunnay kayu ta kitapobare, nga bulíng, nga nagilongán!

¹⁸ “Á yáyù nga taddánát takayu, ta e kayu níkán nga mangâ ta ángnguruk naw, ta sikán yù kunnay sù paggatárgan naw ta napiá nga ángnguruk naw nga meyárik ta buláwán nga nalunák ta api, nga nalinis, tapè kuruk nga maríku kayu ta ánninganán ni Namarò níkayu. Á mangâ kayu sù meyárik ta puraw nga barawási naw, tapè ari kayu yù kun na nagilongán nga mappasirán. Á mangâ kayu sù meyárik ta uru nga ileruk naw ta matá naw, tapè makasingan kayu ta napiá.

¹⁹ “Á yù ira nga ayatak ku, gammák ku ira, á pággangak ku ira, tapè mapággáng ira, nga napiá yù nonò da. Arâ! Mabbabáwi kayu laguk. Pallikuránán naw yù liwiliwá naw, á ipasigaggâ naw yù panguruk naw níkán. ²⁰ Á tángngagan naw yù kagiak ku, ta ajjaná nga kun na tolay nga maggián ta puertá nga mattottò nga magágál. Nu ajjan yù makaginná níkán, á bukatán na laguk yù puertá, á tullungá nga mepakkákán kuna. ²¹ Yù ira nga mangappù ta narákè, iyawâ ku nira yù pakáwayyá ra nga mepagitubang níkán nga mepammaguray. Aggira yù kunnay níkán, ta sikán yù nangappù, á nepagitubangá sù Yámâ nga mepammaguray.

²² “Nu egga talingá naw, ginnán naw yù kagian nayù Ikararuá ni Namarò sù ira manguruk nga maggagammung nga makimoray níkán.”

4

Yù Pakimore ra kâ Apu ta Lángi

¹ Kabalik ku nga nattúrâ, sinánguk ku, á nasíngak ku yù puertá nga nabukatán ta lángi. Á naginná má yù ngarál nga nagubobuk gangù níkán nga kun na amariung. Á kinagi na,

“E ka bi saw, ta ipasingak ku nikaw yù mesimmu ta pappasá na yaw,” kun na nikán. ² Á pagubobuk na, dagarágá nga sinangngalán nangà nayù Ikararuá ni Namarò. Á nasingak ku ta lángi yù ággitubangán nayù mammaguray, nga egga yù nagitubang kuna. ³ Á nasiling yù nagitubang tán, nga naddalingárang ta malitáw nga kun na duá kaláse nga nanginá nga batu, nga jasper nga kun na api yù kulor na, ána karnelia nga malitáw nga kun na bilák yù kulor na. Á nelepuán sù ággitubangán na yù kun na bullun nga nasiling ta kunnay sù ássiling nayù nanginá nga batu nga malitáw, nga mangngágan ta emaral, nga berdi yù kulor na.

⁴ Á egga gapay nga nelepuán sù ággitubangán nayù mammaguray yù duápulu ta appá nga ággitubangán nayù ira mepammaguray. Á nagitubang nira yù duápulu ta appá nga lállakalákay nga nabbarawási ta puraw, nga nakuronán ta buláwán. ⁵ Á naggapu sù tangngá nayù ággitubangán nayù mammaguray yù kilá ána yù alitúgaw nga sigidá makkagakagi. Á ta arubáng nayù ággitubangán na egga yù pitu nga isingan nga naggatang. Aggira yù keyarigán nayù pitu nga pakáwayyá nayù Ikararuá ni Namarò. ⁶ Á egga gapay ta arubáng nayù ággitubangán na yù kun na bebay nga nalinák, nga napadday ta bidduru, nga malinis ána malitáw.

Á egga yù appá nga makkakerumá nga naparò nga matolay nga nelepuán sù ággitubangán nayù mammaguray. Á aru yù ira matá ra ta ngámin nga baggi ra ta arubáng da ána bará da. ⁷ Á yù tádday nga naparò nga matolay yù kun na layon, nga simaron nga ayám. Á kun na toro yù mekaruá. Á yù mammang nayù mekatallu, kun na mammang na tolay. Á yù mekáppá, kun na bukkaw nga makkayakayák. ⁸ Á yù ira appá nga makkakerumá nga naparò nga matolay, egga sù katággitádday yù annam nga payá da, nga aru gapay yù matá ra ta utun ána unak nayù payá da. Á makkansion ira sù áddáyo ra ká Namarò, nga ari mattukká ta ággaw ána gabi. Á yawe yù kansiod da:

“Mangilin! Mangilin! Mangilin si Apu Namarò,
nga makáwayyá ta ngámin.

Aggina yù naggián áddè ngaw gári,
nga maggián ta áddè kunangane,
á maggián lá paga ta áddè ta áddè.”

⁹ Á pakimore nayù ira appá nga makkakerumá nga naparò nga matolay sù Egga nga nagitubang nga mammaguray nga matolay ta áddè ta áddè, á kansionad da yù áddáyo ra kuna ána yù ábbalabála da kuna. ¹⁰ Á pakkansiod da, megiddán nga makimoray yù ira duápulu ta appá nga lállakalákay, nga mamalittúkak nga mallakak ta arubáng nayù Egga nga nagitubang nga mammaguray nga matolay ta áddè ta áddè. Á ta pakimore ra kuna, iriád da yù kuroná ra, nga ipe ra ta arubáng nayù Egga nga nagitubang nga mammaguray. Á yawe yù kagiad da ká Apu ta pakkansiod da kuna:

¹¹ “Sikaw, Apu, yù Yápu mi nga Namarò nikami!

Sikaw yù Egga nga kepángngatán nga pakimorayám mi ána paddáyawám mi,
ta sikaw yù kotunán nga makáwayyá.

Sikaw yù Namarò, á pinarò mu ngámin.

Sikaw yù maguray ta parotam mu,
á maggián ngámin yù pinarò mu megapu ta urem.”

Yáyù kansiod da.

5

Yù Papel nga Nalukù nga Pitu yù Neparakkà kuna ána Yù Kígaw na Karneru

¹ Á kabalín na yaw, nasingak ku ta lángi yù mammaguray nga nagitubang, nga sinangngalán na ta jiwanán nga limá na yù papel nga nalukù, nga nassidduá nga ábbagán nga natúratán. Á aijan yù pitu nga neparakkà kuna, tapè ari mabullarán. ² Á nasingak ku yù masikan nga daroban ni Namarò, nga makkátol ta masikan. Á inikátol na, “Asinni yù makáwayyá nga mangari ta neparakkà sù papel nga nalukù, tapè mabullarán na?” kun na. ³ Ngam awán bulubugá ta makáwayyá nga mangari sù ira neparakkà, mássiki yù ira aijan ta lángi, onu dabbuno, onu ta unak na dabbuno sù gián na námamatay, tapè masingan na nakuan yù aijan ta unak na. ⁴ Á nakkulukulekà ta daddam ku gapu ta awán ta nálek da nga makáwayyá nga mangullák sù papel nga nalukù, tapè masingan na nakuan yù aijan ta unak.

⁵ Á ta pakkulukulè ku, kinagi nayù tádday nga lakalákay nikán, “Ari ka makkulè, ta innam mu. Makáwayyá si Apu Kesu nga mangari sù ira pitu nga neparakkà, tapè mabullarán yù

papel nga nalukù, gapu ta aggina yù nangappù sù narákè. Aggina yù ginaká ni Patul Dabid nga ingáad da gapay ta Layon nga naggapu sù ira ginaká ni Juda.”

⁶ Á nasingak ku laguk yù Kígaw na karneru nga nanáddak sù tangngá ra, ta arubáng nayù ággitubangán nayù mammaguray, nga nalepuanán sù ira appâ nga makkakerumá nga naparò nga matolay áнна yù ira duápulu ta appâ nga lállakalákay. Á yù Kígaw, kunnay ta napapátay ngaw. Á pitu yù tágguk na áнна pitu yù matá na, nga keyarigán nayù Ikararuá ni Namarò nga jinok na ta ngámin nga pagáddekán na dabbuno. ⁷ Á jimikkì yù Kígaw sù nagitubang nga mammaguray, á iná na yù nalukù nga papel nga sinangngalán nayù mammaguray sù jiwánan nga limá na.

⁸ Á pangá nayù Kígaw sù papel, namalittúkak nga nallakak yù ira appâ nga makkakerumá nga naparò nga matolay áнна yù ira duápulu ta appâ nga lállakalákay, nga makimoray ta arubáng nayù Kígaw. Á yù ira lállakalákay, sinangngalád da nga katággítádday yù árpá na áнна yù malukung nga buláwan nga aijan kuna yù api nga magatátù ta nabanguk. Á yù kebalinán nayù atù yù ipakimállà nayù ira tatole ni Namarò. ⁹ Á nakkansion ira laguk ta bagu nga kansion, nga kud da,

“Sikaw, Apu, yù makáwayyá nga mangá sù nalukù nga papel.

Sikaw yù makáwayyá nga mangari sù neparakkà kuna,

gapu ta netapil ngaw yù baggim.

Á yù dágam yù nepappagá megapu sù ira tatolay nga makkakerumá yù ággubobuk da, nga maggapu ta ngámin nga lugár,

tapè kukuá ni Namarò ira.

¹⁰ Á inisipà mu ira sù pammagurem, tapè masserbi ira ká Namarò nga Yápu tam, nga kunnay sù passerbi nayù pári.

Á mammaguray ira ta dabbuno.”

Yáyù kinagi nayù ira lállakalákay áнна yù ira appâ nga naparò nga matolay sù pakkansiod da.

¹¹ Á paningak ku paga, naginná laguk yù ngárál nayù aru nga daroban ni Namarò. Jinibiribu ira nga ari mabiláng, nga nelepuán sù ággitubangán nayù mammaguray áнна yù ira appâ nga makkakerumá nga naparò nga matolay áнна yù ira lállakalákay. ¹² Á nakkansion yù ira daroban, nga iniyássikad da yù ngárál da ta pakkansiod da, nga kud da, “Yù Kígaw nga netapil yù kepángngatán nga pakimorayát tam.

Aggina yù kotunán nga mammaguray,

nga maríku nga makákuá ta ngámin.

Á makánnámmu ta ngámin, nga monak yù sírik na.

Aggina yù kasikanán nga makáwayyá!

Mepángngá ta aggina yù dayáwat tam.

Meparáyaw laguk yù Kígaw!”

¹³ Á naginná yù pakkansion nayù ira ngámin nga naparò, ngámin ira nga maggián ta lángi, ngámin nga maggián ta dabbuno áнна unak na dabbuno sù gián nayù ira námmatay, áнна ngámin nga maggián ta bebay. Á nakkansion ira ngámin, á kinagi ra,

“Meparáyaw yù nagitubang nga mammaguray, áнна yù Kígaw.

Dayáwat tam ira ta áddè ta áddè!

Aggira yù pakimorayát tam, nga maráyaw nga maddalingáráng!

Aggira yù kotunán nga makáwayyá, nga mammaguray ta áddè ta áddè!”

¹⁴ Á yù ira appâ nga makkakerumá nga naparò nga matolay, kinagi ra, “Ammán!” Á namalittúkak nga nallakak yù ira lállakalákay, nga makimoray sù Kígaw áнна yù nagitubang nga mammaguray.

6

Yù Naggapu sù Papel nga Nalukù nga Pitu yù Neparakkà kuna

¹ Á ta paningak ku, nasingak ku yù Kígaw, nga inirián na yù tádday sù ira pitu nga neparakkà sù papel nga nalukù, áнна naginná yù kinagi nayù tádday sù ira appâ nga makkakerumá nga naparò nga matolay, nga kunnay ta alittúgaw yù ngárál na. Á inikátol na nga kinagi, “Umay ka saw!” ² Á iningak ku, á inikáddagâ lâ limittuák yù puraw nga kabáyu, nga aijan yù nakkabáyu kuna nga manangngal ta butuk. Á neddán ta kuroná na, ta aggina yù makáwayyá nga mangappù. Á nánaw ta umay mangappù má sù ira mangontará kuna.

³ Á paningak ku sù Kígaw, á nasingak ku ta inirián na má yù mekaruá sù ira neparakkà, á naginnâ yù ngárál nayù mekaruá nga naparò nga matolay nga nakkatol, á kinagi na, “Umay ka saw!” ⁴ Á limittuák yù tádday nga kabáyu nga ujojjin. Á neddán yù nakkabáyu ta bayunetá nga dakal, á neyanugù ta umay mamuruburion sù ngámin ira nga tatolay ta dabbuno, tapè awán ta ággimammâ da, á makkakápatay ira.

⁵ Á paningak ku paga sù Kígaw, inirián na má yù mekatallu sù ira neparakkà, á naginnâ yù ngárál nayù mekatallu nga naparò nga matolay nga nakkatol, nga kinagi na, “Umay ka saw!” Á iningak ku, á inikáddagâ lâ limittuák yù ngisi nga kabáyu. Á nanangngal yù nakkabáyu ta ákkilo. ⁶ Á naginnâ yù magubobuk nga arák ku ammu yù kuruk nga paggapuán na, nga kunay ta naggapu sù tangngá nayù ira appâ nga makkakerumá nga naparò nga matolay, á kinagi na, “Duttál yù bisin ta dabbuno, á yáyu nga mediá nga baggâ yù táddán na tolay ta tangággaw. Onu tallu mediá nga mangi yù táddán ta tangággaw. Ngam ari manginá yù pagá na denu onu binaráyang!”

⁷ Á paningak ku sù Kígaw, inirián na má yù mekáppâ sù ira neparakkà, á naginnâ yù ngárál nayù mekáppâ nga naparò nga matolay, á kinagi na, “Umay ka saw!” ⁸ Á paningak ku, á ikáddagâ lâ limittuák yù kabáyu nga nappulupulásâ. Á si Patay yù ngágan nayù nakkabáyu kuna, á aijan yù tumuttul kuna, nga mangngágan ta Kades, nga paggianán na námmatay. Á neddán yù ira duá ta pakáwayyá ra nga mamapátay ta pakkáppâ nayù ira tatolay ta dabbuno. Á aijan nira yù appâ nga ipamapáte ra, yù gerrá, yù bisin, yù tulágan, áнна yù ira simaron nga ayám.

⁹ Á ta pangari nayù Kígaw sù mekalímá sù ira neparakkà, á nasingak ku, á aijan ta silárunng nayù ángngiyátangan yù ira ikararuá nayù ira napapátay, nga natay gapu ta panguruk da ta bilin ni Namarò áнна pangituddu ra sù kuruk nga meyanung kâ Apu Kesu Kiristu. ¹⁰ Á nakkatol ira ta masikan, á kinagi ra, “Sikaw, Apu, yù mammaguray nga makáwayyá ta ngámin. Sikaw yù mangilin nga pangikatalakán. Á kunnasi yù kabayák mu paga lagem panunnután áнна pággangan yù ira tatolay nga maggián ta dabbuno gapu ta pamapáte ra nikami?” kud da. ¹¹ Á neddán ira nga taggitádday ta puraw nga barawási na nga apaddu. Á nakagi nira ta magibannák ira lábbi paga áddè ta pate nayù ira kábulud da nga makiaripan kâ Apu, nga mapapátay gapay ta kunay nira.

¹² Á pangari nayù Kígaw sù mekánnam sù ira neparakkà, á nasingak ku, á nallunik ta masikan. Á nangngisi yù bilák ta kun na gámi nga langgústi. Á nagujjin yù bulán nga kun na kulor na dága. ¹³ Á napannâ yù ira bituan ta dabbuno nga kunay ta kapannâ na bungá na kayu nga busirá nu mabbaggiu. ¹⁴ Á limimmâ yù lángi nga kunay ta papel nga malukú. Á neyali yù ngámin nga puddul áнна pugu sù giád da.

¹⁵ Á nattálaw laguk yù ira ngámin nga tatolay, yù ira patul áнна yù ira mammaguray, yù ira kotunán na suddálu, yù ira maríku, yù ira makáwayyá, áнна yù ira ngámin nga tatolay, mássiki nu aripan onu aripan, minay ira ngámin nattuttú ta kueba áнна silisilárunng na batu ta puddupuddul. ¹⁶ Á nakkatakotol ira, á kinagi ra sù ira puddul áнна batu, “Maddabbâ kayu ta matábbunán kami, tapè arán na kami masingan nayù mammaguray nga nagitubang ta lángi, á melilli kami sù pangukum na nikami nayù Kígaw!” ¹⁷ Ta jimittálin yù makánnanássing nga ággo nayù pore ra, á ukumad da kami, á awán nikami yù makatubáng kuna!” kud da.

7

Yù 144,000 nga Ginaká ni Israel nga Sinullâ ni Namarò ta Tatole na

¹ Pappasá na, aijan laguk yù appâ nga daroban ni Namarò nga nasingak ku nga manáddak sù ira aruk na paggapuán nayù ira appâ nga paddák ta dabbuno, nga mangigaggak sù ira appâ nga paddák, tapè ari mapaddarán yù dabbuno, yù bebay, onu yù káyu. ² Á nasingak ku yù tádday nga daroban, nga lussáng ta kun na bilák nga naggapu ta álassangan na. Á sinangngalán na yù ámmárkâ nayù Namarò nga matolay. Á kinatolán na yù ira appâ nga daroban nga aijan yù neyawâ nira nga pakáwayyá ra nga mangnguá ta dabbuno áнна bebay. ³ Á kinagi na nira, “Arán naw lábbi akkuán yù dabbuno, bebay, áнна káyu, ta mapolu bi markák ku yù muká nayù ira makiaripan kâ Namarò nga Yápu tam,” kun na. ⁴ Á naginnâ yù biláng nayù ira namárkán na, á magatù ta appátapulu ta appâ nga ribu ira, nga ginaká nayù ira mapulu duá nga ánnâ ni Israel. ⁵ Namárkán yù mapulu duá ribu nga tatolay, nga ginaká nayù ira katággitádday sù ira mapulu duá nga ánnâ ni Israel:

* **6:16** Aijan yù kunniaw nga kinagi ni Apu Kesu sù túrá ni Lukas 23:29-30.

Mapulu duá nga ribu yù namarkán nga naggapu sù ira ginaká ni Juda,
 mapulu duá nga ribu nga naggapu sù ira ginaká ni Ruben,
 mapulu duá nga ribu nga naggapu sù ira ginaká ni Gad,
 6 mapulu duá nga ribu nga naggapu sù ira ginaká ni Aser,
 mapulu duá nga ribu nga naggapu sù ira ginaká ni Neptali,
 mapulu duá nga ribu nga naggapu sù ira ginaká ni Manasse,
 7 mapulu duá nga ribu nga naggapu sù ira ginaká ni Simion,
 mapulu duá nga ribu nga naggapu sù ira ginaká ni Libi,
 mapulu duá nga ribu nga naggapu sù ira ginaká ni Issakar,
 8 mapulu duá nga ribu nga naggapu sù ira ginaká ni Sabulon,
 mapulu duá nga ribu nga naggapu sù ira ginaká ni Kusè,
 áнна mapulu duá nga ribu nga naggapu sù ira ginaká ni Benjamin.

Yù Ngámin ira nga Makkakerumá nga Tatolay nga Ari Mebiláng

9 Á nasingak ku laguk yù magaru nga tatolay nga ari mabiláng. Naggapu ira ta ngámin nga lugár, nga makkakerumá yù ággubobuk da. Nanáddak ira ta arubáng nayù nagitubang nga mammaguray áнна yù Kígaw. Á nabbarawási ira ta puraw nga apaddu. Á sinangngalád da yù palákkay, ta jináyo ra yù nagitubang nga mammaguray áнна yù Kígaw. 10 Á nakkatol ira, á kinagi ra,

“Dayáwat tam si Apu Namarò nga Yápu tam nga nagitubang nga mammaguray, áнна dayáwat tam gapay yù mangngágan ta Kígaw.

Aggira lâ yù makáwayyá nga mangiyígù nittam, tapè ari ittam mapanunnután megapu sù liwiliwá tam!” kud da.

11 Á yù ira ngámin nga daroban ni Namarò, nanáddak ira gapay, á nelepuanád da yù nagitubang nga mammaguray áнна yù ira lálakalákay áнна yù ira appâ nga makkakerumá nga naparò nga matolay. Á nakimoray ira nga namalittúkak nga nallakak ta arubáng nayù nagitubang nga mammaguray. 12 Á kinagi ra,

“Ammán! Kuruk nga mapalurò ngámin.

Meparáyaw si Namarò!

Aggina yù pakimorayát tam ta áddè ta áddè.

Aggina yù kotunán nga masírik,
 nga makánnámmu ta ngámin.

Kagiat tam kuna yù pagayáyâ tam megapu sù ángngiddù na nittam,
 ta ari ittam makabalabálà kuna.

Dayáwat tam yù Namarò nittam ta áddè ta áddè.

Aggina yù mammaguray nga makáwayyá ta ngámin!

Ammán!” kud da.

13 Kabalid da nakkagi karanniaw, minay nga nepagubobuk níkan yù tádday nga lakalákay, á kinagi na níkan, “Asinni yù ira nabbarawási ta puraw? Á sisaw naggapuád da?” kun na níkan. 14 “Á ammù níkaw, Apu!” kuk ku kuna.

Á kinagi na laguk níkan,

“Aggira yù naggapu sù dakal nga jigâ.

Á binábbalád da yù barawási ra sù dága nayù Kígaw,
 á nappuraw iren.

15 Á yáyù nga maggián ira ta arubáng nayù ággitubangán ni Namarò,
 nga makimoray kuna sù mangilin nga bale na ta ággaw áнна gabi.

Á manaron si Namarò níra, ta aggina yù kapulupulú da.

16 Ari iren mabisin ta áddè ta áddè,

á ari iren mapangál.

Ari ira bulubugá mabilagán.

Á ari ira bulubugá mapatuán.

17 Á yù Kígaw nga maggián ta tangngá nayù ággitubangán nayù mammaguray,
 aggina yù meyarík ta minápparák nga manaron níra.

Á ituluk na ira sù wek nga ari bulubugá mábbatán,

tapè makenum ira sù danum nga áttole ra kâ Namarò ta áddè ta áddè.

Á punatán ni Namarò yù ngámin nga kalulluá ra,
 tapè ari iren makkulè.”

Yáyù kinagi nayù lakalákay níkan.

8

Yù Mekapitu nga Naporíán sù ira Neparakkà

¹ Á inirián na laguk nayù Kígaw yù naporíán sù ira pitu nga neparakkà sù papel nga nalukù. Pangari na kuna, nagimammà yù ira ngámin nga aijan ta lángi ta gadduá na oras.

² Á pappasá na, nasingak ku laguk yù ira pitu nga daroban ni Namarò nga nanáddak ta arubáng na, á neyawâ nira nga katággítádday yù amariung na.

³ Á minay gapay yù tádday nga daroban nga manangngal ta pála nga buláwán, nga áttuggián ta pulbus nga bábbanguk, á aijan yù mayán na nga natuggi, nga magatátù ta nabanguk. Á minay nanáddak yù daroban ta arubáng nayù ángngiyátangán nga buláwán. Á neyawâ kuna yù aru nga pulbus nga bábbanguk, nga inikiruk na sù ira ipakimállà nayù ira tatole ni Namarò, tapè meyátáng sù ángngiyátangán nga buláwán ta arubáng nayù ággitubangán. ⁴ Á nagatátù yù bábbanguk nga naggián sù pála nga sinangngalán nayù daroban nga nanáddak ta arubáng ni Namarò, á nepulù ta atù yù ipakimállà nayù ira tatole ni Namarò. ⁵ Á en na laguk nayù daroban inítággò yù pála na sù bága na api nga naggapu sù ángngiyátangán, á inipayáng na yù api ta dabbuno. Á ikáddagâ naggurugurù ta masikan nga nagalittúgaw, ána nakkilikilá, ána nallunik.

Yù ira Pitu nga Amariung

⁶ Kabalin na, mapparaparán laguk yù ira pitu nga daroban nga magamariung. ⁷ Á napolu nga nagamariung yù tádday. Pagamariung na, nagurán ta yelo nga kun na batu, nga nakirugán ta api ána dága, nga napannâ ta dabbuno. Á yáyù nga natuggi yù pakkállu na káyu ána ngámin nga kaddâ ta pakkállu nayù dabbuno. Awán ta nabuná nga kaddâ, mássiki tangapun.

⁸ Á nagamariung laguk yù mekaruá nga daroban. Á pagamariung na, aijan yù kun na mallakay nga puddul nga natuggi, nga kunnay ta nepayáng ta bebay. Á nabbalin ta dága yù pakkállu na bebay. ⁹ Á yáyù nga natay yù pakkállu nayù matolay ta bebay, á nararál yù pakkállu nayù ira barangay.

¹⁰ Á nagamariung laguk yù mekatallu nga daroban. Á ikáddagâ napannâ yù dakal nga bituan, nga naggatang ta kun na tulu, nga naggapu ta lángi. Á nappannátán na yù pakkállu na danum ána wek. ¹¹ Á mangngágan yù bituan ta Napè, á nabbalin ta napè yù pakkállu nayù danum. Á natay yù aru nga tatolay gapu ta ininum da yù danum nga napè.

¹² Á nagamariung laguk yù mekáppâ nga daroban. Pagamariung na, nakanná yù pakkállu na bilák, ána yù pakkállu na bulán, ána yù pakkállu na bituan. Á yáyù nga nári yù pakkállu nayù nawák da, á aringin nanawák yù pakkállu na ággaw ána yù pakkállu na gabi gapay.

¹³ Á pappasá na, iningak ku, á aijan yù bukkaw nga makkayakayák ta utun na lángi. Á naginnâ yù pakkatol na nga nasikan, á kinagi na, “Makállállà yù ira tatolay nga maggián ta dabbuno! Makállállà ira megapu sù mesimmu nga makánnanássing! Makállállà ira sangaw sù pagamariung nayù ira tallu nga maporián nga magamariung!” kun na.

9

Yù Mekalímá nga Magamariung nga Dattál nayù Olu nga Makánnanássing nga Jigâ

¹ Á nagamariung yù mekalímá nga daroban. Á pagamariung na, nasingak ku yù meyárik ta bituan nga napannâ ta dabbuno nga kunnay ta bituan nga naggapu ta lángi. Á neyawâ kuna yù ánnúsi nayù puertá nga áttallungán sù ábbalurán, nga ábbù nga awán ta áddè na kálaran na. ² Á binukatán na yù puertá nayù ábbù, á nagatátù nga kun na naggapu ta dakal nga ornu. Á nakkallá yù bilák ána ággaw megapu sù atù nga nallawán nga naggapu sù ábbù. ³ Á nallawán nga mepulù sù atù nga naggapu sù ábbù yù aru nga apássing. Á naddappá ira ta dabbuno. Á neyawâ nira yù pakáwayyá ra nga manigirigá sù ira tatolay, nga kunnay ta siluk na asisípi.

⁴ Ngam nataddánán yù ira apássing ta arád da bulubugá nga akkuán yù nemulá, káyu, kaddâ, onu ngámin nga mattubbu ta dabbuno. Ngam akkuád da lâ yù ira tatolay nga ari namárcán yù muká da ta sinniál ni Namarò. ⁵ Awán ta awayyá ra nga mamapáte ta tatolay, ngam makáwayyá ira nga manigirigá nira ta límá nga bulán. Á panigirigá da sù ira tatolay, maganutù yù kun na siluk da ta kunnay ta ágganutù nayù siluk na asisípi. ⁶ Á keggá nayù ira apássing ta límá nga bulán, ikáyá nayù ira tatolay nga papatáyan yù baggi ra lápay, ngam arád da awayyá.

⁷ Á yù ira apássing, ta ánninganák ku, kun na kabáyu ira nga naparán nga makigerrá. Á aijan ta ulu ra yù kun na kuroná nga buláwán. Á kun na mammang na tolay yù mammang da. ⁸ Á apaddu yù duddù da ta kun na babay, á yù ngipad da, kun na ngipan na layon, nga makánnanássing nga simaron nga ayám. ⁹ Á aijan ta gáko ra yù kun na kalátak nga balayáng. Á maggurugurù yù áppayáppâ nayù payâ da ta kun na gurù na aru nga kalesá nga guggúnan na kabáyu nga umay makigerrá. ¹⁰ Á yù ipù da, maniluk ira ta kunnay ta siluk na asisipi, ta aijan ta ipù da yù ángnga-ángxuá ra sù ira tatolay ta límá nga bulán. ¹¹ Á yù patul da yù daroban nga manangngal ta ánnúsi sù puertá nayù abbù, nga awán ta áddè na kálaran na. Á Abaddon yù ngágan na ta Kebru, nga ággubobuk nayù ira Kudio, á abbúnan nayù ira Gareko ta Appollion, á Manarál yù kebalinán nayù ngágan na.

¹² Pappasá na yaw, yáyù kabalin nayù olu nga makánnanássing nga jigâ nga mesimmu ta dabbuno. Ngam ginnán naw, ta aijan paga duá nga makánnanássing nga umay ta kabalin na yaw.

Yù Mekánnam nga Magamariung ta Dattál nayù Mekaruá nga Jigâ

¹³ Á nagamariung yù mekánnam nga daroban. Á naginnâ yù ngarál nga naggapu sù appâ nga túkù nayù ángngiyátangán nga buláwán ta arubáng ni Namarò. ¹⁴ Á nagubobuk yù ngarál, á kinagi na sù mekánnam nga daroban nga nagamariung, nga kun na, “Palubbángxam mu yù ira appâ nga daroban nga nabáluk ta aggik na dakal nga danum na Uparetis,” kun na. ¹⁵ Á en na laguk pinalubbáng sù ira appâ nga daroban, nga dán nga naparán nga magiddak sù dattál nayù dagun na, bulán na, ággo na, ána oras na nga sinullá ni Namarò ta umay ira mamapátay ta pakkállu na tatolay ta dabbuno. ¹⁶ Á naginnâ yù biláng nayù ira suddálu ra nga nakkabáyu, á mamemapuluribu nga duápuluribu ira. Kunniane yù biláng na 200,000,000.

¹⁷ Á ta ánninganák ku sù ira kabáyu ána yù ira makkabáyu nira, nalipparán yù gáko ra ta balayáng nga nakkulor ta ujojjin nga kun na kulor na api ána ngisi nga asul ta kun na kulor nayù nagingá nga batu nga mangngágan ta sapiro, ána ngilá gapay ta kun na kulor na asupri. Á kun na ulu na layon yù ulu nayù ira kabáyu. Á nallowán ta simù da yù api ána atù, ána asupri nga matuggi. ¹⁸ Á yáyù nga natay yù pakkállu na tatolay ta dabbuno, megapu sù tallu nga ipate ra nga nallowán ta simù nayù ira kabáyu, yù api ána yù atù ána yù asupri. ¹⁹ Ta aijan ta simù da ána ipù da yù ámmapáte ra ta tatolay. Á kun na iráw yù ipù da, nga egga ulu ra nga ángxuá ra sù ira tatolay.

²⁰ Á yù ira nabuná nga tatolay nga ari natay megapu sù tallu nga jigâ nga naggapu sù ira kabáyu, arád da inibabáwi yù narákè nga akka-akkuád da. Á arád da gapay nílukuránán yù pakimore ra ta anitu ána dimoniù, ána yù pakimore ra ta sináddios, nga pidde ra ta buláwán, pirá, baronsi, batu, ána káyu, nga ari makasingan, nga ari makaginná, nga ari makalakák. ²¹ Á arád da gapay inibabáwi yù pamapáte ra ána yù paganánitu ra, yù pangarallo ra ána yù pakkokò da.

10

Yù Daroban ána yù Baddi nga Papel nga Nollák

¹ Á pappasá na, iningak ku laguk, á nasingak ku má yù tanakuán nga daroban nga masikan nga umay ta dabbuno nga naggapu ta lángi. Nagulá ta kunam, á neputápù sù ulu na yù bullun. Á naddalingárang yù mammang na ta kun na bilák. Á kunnay ta kallang nga nagatang yù takki na. ² Á sinangngalán na yù baddi nga papel nga nollák.

Á pakották nayù daroban ta dabbuno, nanáddak nga pine na yù jiwánan nga takki na ta bebay ána yù jimigi nga takki na ta dabbun. ³ Á nakkatol ta nasikan, nga kunnay ta paggararang na layon. Á pakkatol na, nameppitu nga nagalittúgaw.

⁴ Á pakaginná sù alittúgaw, mattúraká nakuan sù kinagi nayù alittúgaw. Ngam naginnâ yù ngarál nga naggapu ta lángi, á kinagi na nikán, “Ílímak mu yù kinagi nayù pitu nga alittúgaw. Arám mu itúrá,” kun na nikán.

⁵ Á yù daroban nga nasingak ku nga nanáddak ta bebay ána dabbun, inítáyák na ta utun yù jiwánan nga límá na. ⁶ Á nappagássingán ta kuruk yù kagian na ta arubáng ni Namarò, si Namarò nga maggián ta áddè ta áddè, nga namarò ta lángi ána dabbuno, bebay, ána ngámin nga mayád da. Á kinagi nayù daroban, “Awánin ta kegaggarán nayù sinalákkuruk ni Namarò nga akkuán na. ⁷ Ta sangaw nu magamariung yù mekapitu nga daroban, yáyù pamaluro ni Namarò sù ngámin nga nelímak ngaw gári, nga inipakánnammu na lá ni Namarò sù ira ngaw ábbilinán na nga makiaripan kuna,” kun nayù daroban.

⁸Á nagubobuk mángin nikán yù ngárál nga naginnâ nga nagubobuk nga naggapu ta lánghi. Á kinagi na, “Arà! Em mu bì apan yù papel nga nollák nga sinangngalán nayù daroban nga nanáddak ta bebay ána dabbun.”

⁹Á kinuruk ku laguk. Jimikkiká sù daroban, á kinagi kuna ta iyawâ na nikán yù baddi nga papel nga nollák. Á kinagi na nikán, “Apam mu, á kanam mu. Á ta pakkákám mu, námmi ta kun na issi ta simù mu, ngam mabbalin ta mapè ta gutù mu,” kun na. ¹⁰Á inâ ku laguk ta limá nayù daroban yù baddi nga papel, á kinák ku. Á kuruk nga námmi ta kun na issi ta simù ku. Ngam ta kabalik ku kiminán kuna, napè yù gutù ku. ¹¹Á kinagi na laguk nikán, “Máwák nga mangilayalayâ ka paga sù inipalappâ ni Namarò nga mesimmu paga sù ira makkakerumá nga tatolay ta ngámin nga lugár da, yù ira nga makkakerumá yù ággubobuk da ána yù ira patul da.”

11

Yù ira Duá nga Massistígu ta Meyannung kâ Namarò

¹Á aijan laguk yù nangiyawâ nikán ta ággukuk nga kun na tagukuk. Á kinagi na nikán, “Arà! E ken, ta gukuran mu yù mangilin nga kapilliá ni Namarò ána yù ángngiyátangán. Á bilángam mu gapay yù ira tatolay nga makimoray kâ Namarò ta mangilin nga kapilliá na. ²Ngam arám mu gukuran yù nammuák nayù kapilliá. Paguráyám mu, ta neyawâ yù nammuák sù ira tatolay nga ari manguruk kâ Namarò, tapè maggíán ira nga maguray lá yù akkuád da sù mangilin nga ili ni Namarò ta appátapulu ta duá nga bulán. ³Á dobak ku yù ira duá nga ábbilinák ku, ta mangilayalayâ ira karannian nga bulán, nga naggittá ta maribu ta duá gatù ta annamapulu nga ággaw. Á nabbarawási ira ta langgústi, nga pangípasinganád da ta daddam da megapu sù narákè nga akkuán nayù ira tatolay nga ari mabbabáwi. Á iyawâ ku nira yù pakáwayyá ra nga mangilayalayâ sù ipalappâ ku nira,” kun na.

⁴Á yù keyarigán nayù ira duá nga ábbilinán ni Namarò yù duá nga káyu nga olibos ána yù duá nga isingan nga nanáddak ta arubáng ni Namarò nga Yápu tam nga mammaguray ta ngámin nga dabbuno. ⁵Á nu egga yù mangnuá nakuan nira, á mallawán nga naggapu ta simù da yù api, á matuggi yù ira nga manganni nira nakuan. Yáyù ipate nayù ngámin ira nga mangnuá nakuan nira. ⁶Á makáwayyá ira nga mangilitù ta lánghi, tapè ari magurán sù ngámin ira nga ággaw nga pangilayalayâ da sù bilin ni Namarò. Á awayyá ra gapay nga pabbalinal na daga yù ira danum ána jigirigátan yù ira tatolay ta makkakerumá nga tulágan ta maguray lá nga ággaw nga ikáyá da.

⁷Á ta kabalid da mangilayalayâ nayù ira duá sù bilin ni Namarò, umay yù ayám nga simaron, nga mallawán nga naggapu ta abbù nga awán ta áddè na kálaram na, á umay makigerrá nira. Á appútan na ira, á papatáyan na ira. ⁸Á maggíán lá yù baggi ra nga natay ta kalsáda sù dakal nga ili nga nepatakán na ngaw nayù Yápu ra ta kurù. Meyárik yane ili sù ira ngaw ili na Sodoma ána Egipto, nga ari kuruk nga ngágan na, ngam yù keyarigán na lá, gapu ta naggittá yù narákè nga akkuán nayù ira tatolay nga maggíán sù dakal nga ili sù kingngúá nayù ira ngaw tatolay nga naggíán ta Sodoma ána Egipto.

⁹Á tallu ta gadduá nga ággaw yù paggiád da tán nayù baggi nayù ira duá nga natay. Á yù ira ngámin nga tatolay ta ngámin nga lugár, nga makkakerumá yù ággubobuk da, girawad da yù baggi nayù ira natay, á arád da anugutan yù ketanam da. ¹⁰Á yù ira ngámin nga tatolay nga maggíán ta dabbuno, mappiestá ira nga magayáyá, á makkakálimù ira gapay gapu ta pagayáyá da megapu sù pate nayù ira duá nga ábbilinán ni Namarò nga nanigirigá nira.

¹¹Á pappasá na tallu ta gadduá nga ággaw, tullung sù baggi nayù ira duá nga natay yù inángà nga maggapu kâ Namarò, á maginnanoday ira, á gumikkáng ira. Á yù ira nga makasingan nira, mepallá yù assing da. ¹²Á yù ira duá nga naginnanoday, maginná ra yù ngárál nga nasikan nga maggapu ta lánghi, á kagian na nira, “Umay kayu bi saw ta utun!” Á ta paningan nayù ira malussaw nira, umay ira ta lánghi, nga mattakay ta kunam. ¹³Á pakáddè da ta lánghi, dagarágá mallunik tán nga ili ta nasikan, á mararál yù pakkamapulu nayù ili, á mámmatay yù pituribu nga tatolay megapu sù lunik. Á yù ira nabuná, maganássing ira, á dayáwad da si Namarò nga maggíán ta lánghi.

¹⁴Pappasá na yaw, yáyù kabalinal nayù mekaruá nga makánnanássing nga jigá nga mesimmu ta dabbuno. Á duttál ta mabi lá yù mekatallu nga makánnanássing nga mesimmu má ta dabbuno.

Yù Mekapitu nga Magamariung nga Dattal nayù Mekatallu nga Makánnanássing nga Jigá

¹⁵ Á nagamariung yù mekapitu nga daroban, á aijan yù ngárál ta lángì nga nagubobuk ta nasikan. Á kinagi na,

“Jimittálin ta dabbuno kunangan yù pammagure ri Apu Namarò nga Yápu tam
ká Apu Kesu Kiristu, nga yù Patul nga piníli ní Apu Namarò ta mammaguray ta dabbuno.

Á aggina yù mammaguray ta áddè ta áddè, nga awán ta áddè na!”

¹⁶ Á yù ira duápulu ta appâ nga lállakalákay, nga magitubang ta nakástá nga ággitubangád da ta arubáng ní Namarò, namalittúkak ira nga nallakak nga makimoray kuna. ¹⁷ Á kinagi ra,

“Apu Namarò, sikaw yù makáwayyá ta ngámin,
nga Egga nga naggián áddè ngaw, nga Egga kunangan.

Á maddáyaw kami nikaw,
ta ari kami makabalabála nikaw,
ta inipasingam mu yù pamagaddátum nga makapállá,
á pinegapuanám mín yù pammagurem ta dabbuno.

¹⁸ Á kitaporay yù ira makkakerumá nga tatolay nga ari manguruk nikaw,
ngam jimittálin yù porem nira.

Á kunangane duttálin yù pamanunnù mu sù ira námmatay.

Á duttálin yù pamalabála mu sù ira aripam mu, nga ábbilinám mu,
ánna yù ira ngámin nga tatolem nga dakal yù pakáwayyá ra,
ánna yù ira nga baddi yù pakáwayyá ra,
aggira ngámin nga makimoray nikaw.

Á duttálin yù paddarál mu sù ira ngámin nga manarál ta dabbuno.”*

Yáyù kinagi nayù ira lállakalákay.
¹⁹ Á nasingak ku laguk ta nabukatán yù mangilin nga kapillíá ní Namarò ta lángì, á nasingak ku gapay ta unak na yù kakon nga napayyán ta netúrâ nga tarátu ní Namarò sù ira tatole na. Á nakkilikilá ánna aijan yù kitasikan nga gurú, á nagala-alittúgaw ta nasikan. Á nallunik, ánna nagurán ta aru nga yelo nga narámmâ nga kun na batu.

12

Yù Babay ánna yù Mallakay nga Kagang

¹ Á kabalín na, aijan laguk yù makapállá nga limittuák ta lángì, nga keyarigán nayù bilin ní Namarò. Aijan yù babay nga nabbarawási ta bilák, nga nanáddak sù bulán. Á aijan yù kuroná ta ulu na, nga egga yù mapulu duá nga bituan kuna. ² Á mabussi yù babay, á mággè maganá, ánna nakkalli sù jigá na ta pappasikál na.*

³ Á aijan yù tádday má nga makapállá nga nepasingan ta lángì. Nasingak ku yù mallakay nga kagang, nga ujojjin yù kulor na. Á egga yù pitu nga ulu na ánna yù mapulu nga tágguk na.† Á nakkuronán gapay yù ira pitu nga ulu na ta kunnay ta patul. ⁴ Á inibaddú na yù ipù na, á nakanná na yù pakkállu nayù bituan ta lángì, á pinná na ira ta dabbuno. Á minay nanáddak ta arubáng nayù babay nga maganá, ta iddagán na yù pallawán nayù abbing, tapè kanan na. ⁵ Á naganá yù babay ta abbing nga laláki. Á nelilli yù abbing nga neyángngay ta utun ta pammagurayán ní Namarò ta lángì, ta aggina yù initabbá ní Namarò nga mammaguray ta ngámin nga makkakerumá nga tatolay, nga awán ta makatubáng kuna.‡ ⁶ Á nattálaw yù babay nga minay ta kalállammatán, ta aijan tán yù paggianán na nga pinarán ní Namarò, tapè iddukan na yù babay ta maribu ta duá gatù ta annamapulu nga ággaw.

Nagigerrá di Mikel nga Daroban ní Namarò sù Kagang ánna yù ira Daroban na

⁷ Á aijan yù ira nagigerrá ta lángì. Ta di Mikel nga makáwayyá nga daroban ní Namarò ánna yù ira kábulun na nga daroban, nagigerrá ira sù mallakay nga kagang ánna yù ira kábulun na nga narákè nga daroban. ⁸ Á náppù yù kagang ánna yù ira kábulun na nga daroban. Á napapáno ira ta lángì, ta awánin ta awayyá ra nga maggián tán. ⁹ Á nepayáng ira ta dabbuno, aggira ngámin ánna yù mallakay nga kagang. Aggina galá yù iráw nga

* **11:18** 2 Eduro 3:10 * **12:2** Yù babay nga mabussi yù keyarigád da támma nayù ira Kudio nga ginaká ní Israel, ta kinagi ní Pablo ta naggapu sí Apu Kesu Kiristu sù ira Kudio. Innam mu Roma 9:4-5. † **12:3** Daniel 7:23-28; Nepalappâ 17:7-12 ‡ **12:5** Salmo (Kansion) 2:1-12

nappasingan ngaw gâri, nga nábbún gapay ta Diáblu ána Satanas,[§] nga mangilogò ta ngâmin nga tatolay ta dabbuno.

¹⁰ Kabalin na, naginnâ yù ngâral ta lángi, nga nakkatol ta nasikan, á kinagi na, “Jimittálin yù pangiyígù ni Namarò sù ira tatole na.

Á inipasingan ni Namarò yù pakáwayyá na, ána namegapu ngin yù pammagure ni Namarò nga Yápu tam.

Á si Apu Kesu Kiristu, nga sinullâ ni Namarò, inipasingan na gapay yù pakáwayyá na nga mammaguray.

Ta náppù si Satanas, nga yù ngaw mamalalaliwâ sù ira nga kunnay ta wáwwagi tam ta dabbuno megapu sù panguruk da.

Sù ngaw, sigídâ nga mamaliwâ nira ta ággaw ána gabi ta arubáng ni Namarò nga Yápu tam.

Á pinapáno ni Namarò ta lángi.

¹¹ Á yù ira nga kunnay ta wáwwagi tam megapu ta panguruk da, nangappù ira kâ Satanas megapu sù dága nayù Kígaw nga neubbù sù ketapil na ta kurù.

Á nangappù ira gapay megapu sù bilin ni Namarò nga ipakánnámmu ra sù ira tatolay, ta napasigaggâ yù ángnguruk da kâ Apu Kesu, mássiki nu yáyù ipate ra.

¹² Á magayáyâ kayu laguk, sikayu ngâmin nga maggián ta lángi, gapu ta náppù si Satanas, á nepayáng ta dabbuno nga naggapu ta lángi.

Ngam kábbi kayu, sikayu nga maggián ta dabbuno! Makállállâ kayu, ta minay si Satanas nikayu.

Á nepallâ yù pore na gapu ta ammu na ta mabi lákin yù awayyá na nga mangngúá sù ira tatolay ta dabbuno, ta darálan ni Apu sangaw.”

Yù Panimmâ nayù Mallakay nga Kagang sù Babay

¹³ Á ta pakánnámmu nayù mallakay nga kagang ta kepayáng na ta dabbuno, á sinimmâ na yù babay nga naganâ ta abbing nga lalâki. ¹⁴ Ngam iniyawâ ni Namarò sù babay yù duâ nga dakal nga payâ nayù dakal nga bukkaw, tapè makkayák nga mattálaw nga umay sù napanán nga paggianán na ta kalállammatán. Á ta kunnian, melilli yù babay sù dán nga iráw, nga yù kagang, á si Namarò yù manaron sù babay ta keggâ na tán ta tallu ragun ta gadduâ.

¹⁵ Á yù iráw, pinalawán na ta simù na yù danum nga kunnay ta dakal nga danum nga magagi, tapè meburuk nakuan yù babay.* ¹⁶ Ngam yù dabbun yù mangabbák sù babay, ta naggakki yù dabbun, á sillan na yù danum nga naggapu ta simù nayù mallakay nga kagang.

¹⁷ Á nappaná yù pore nayù mallakay nga kagang sù babay, á minay nakigerrá sù ira ánâ na nga nabunâ, nga keyarigán nayù ira ngâmin nga manguruk sù kagian ni Namarò ána mangipakánnámmu ta meyannung kâ Apu Kesu megapu sù napiá nga pagubobuk da ána yù napiá nga ággangngúá ra. ¹⁸ Á nanáddak yù mallakay nga kagang sù karagátan ta aggik na bebay.

13

Yù Meyannung sù Ayám nga Maggapu ta Bebay

¹ Á nasingak ku laguk, á aijan yù limittuák nga naggapu sù danum na bebay nga kun na ayám nga makánnanásing. Á pitu yù ulu na ána mapulu yù tágguk na. Á nakuronán yù taggitádday nga tágguk na. Á aijan netúrâ sù katággitádday nga ulu na yù narákè nga ngágan na, nga pangibanabanù na kâ Namarò. ² Á yawe ayám nga nasingak ku yù kun na dakal nga kusá nga mangngágan ta leparado. Á yù takki na yù kun na takki na dakal nga simaron nga ayám nga mangngágan ta beyar. Á yù simù na, kun na simù na layon. Á yù mallakay nga kagang, iniyawâ na kuna yù ámmagaddátu na ána yù pammagurayán na, ána yù makapállâ nga pakáwayyá na. ³ Á yù tádday nga ulu nayù ayám, yù kun na natay ta bigák. Ngam napammapiángin yù bigák na. Á yáyù nga mapállâ yù ngâmin ira nga tatolay ta dabbuno, á siminuttul ira kuna. ⁴ Á nakimoray yù ira tatolay sù mallakay nga kagang

§ 12:9 Aggina gapay si Lusiper. Innam mu Isaya 14:12-17. * 12:15 Salmo (Kansion) 124:1-8

megapu sù makapállâ nga pakáwayyá na nga iniyawâ na sù ayám. Á nakimoray ira gapay sù ayám, ta kinagí ra, “Egga panò kagittá na? Asinni panò makatubáng kuna?” kud da.

⁵ Á inanugù ni Namarò ta mammaguray yù ayám ta appátapulu ta duá nga bulán, nga maguray lá yù akkuán na. Á neyawâ sù ayám yù awayyá na nga magubobuk, á meyanugù yù pangibanabanù na kâ Apu, á napalaláki yù ággubobuk nayù ayám. ⁶ Á inibanabanù na di Namarò ána yù ngámin nga meyanung kuna, yù ngágan ni Namarò, yù gián na ta lángi, ána yù ira ngámin nga mesipà kâ Namarò nga maggián ta lángi. ⁷ Á neyawâ sù ayám yù pakáwayyá na nga makigerrá sù ira tatole ni Namarò, á meyanugù ta appútan na ira. Á neyawâ kuna gapay yù pakáwayyá na nga mammaguray sù ira ngámin nga makkakerumá nga tatolay, nga makkakerumá yù ággubobuk da, ta ngámin nga ili ra. ⁸ Á yù ira ngámin nga maggián ta dabbuno, makimoray ira sù narákè nga ayám, yù ira lá nga ari netúrâ yù ngágad da sù libru nayù Kígaw nga netapil. Yane libru yù nangitúratán ta ngágan nayù ira ngámin nga tatole ni Namarò nga mepaggián kuna ta áddè ta áddè, ta inipetúrâ ni Namarò yù ngágad da sù ngaw lage na namarò ta dabbuno.

⁹ Nu egga yù talingá naw, ginnán naw yaw:

¹⁰ Yù tolay nga natullá ta mebáluk, á mebáluk laguk.

Á yù tolay nga natullá ta makattak ta bayuneté, á makattak laguk nga matay.

Á yáyù nga nágalán ittam nga tatole ni Namarò ta ipasigaggá tam yù ángnguruk tam ána matattam ittam, mássiki nu anni yù mesimmu nittam.

Yù Mekaruá nga Ayám nga Mallawán nga Naggapu ta Dabbun

¹¹ Á nasingak ku laguk yù tanakuán nga ayám nga nallowán nga naggapu ta unak na dabbun. Á duá yù tágguk na nga kun na tágguk na kígaw na karneru, ngam yù ággubobuk na yù kunnay sù ággubobuk na mallakay nga kagang. ¹² Á masserbi yù mekaruá nga ayám sù olu nga ayám, ta iyawâ nayù olu nga ayám sù mekaruá yù ngámin nga pakáwayyá na, gapu ta pannakabaggi nayù olu yù mekaruá. Á puersán na yù ira ngámin nga tatolay ta dabbuno ta makimoray ira sù olu nga ayám nga napammapiá yù bigák na nga inipate na.

¹³ Á aru yù makapállâ nga pagaddátuan nayù mekaruá nga ayám ta paningan nayù ira ngámin nga tatolay, nepatalugáring ta pagukában na ta dabbuno yù api nga naggapu ta lángi.

¹⁴ Á ilogò na yù ira tatolay nga maggián ta dabbuno megapu sù ira pagaddátuan na nga ipakuá nayù olu nga ayám kuna ta arubáng na. Á yù mekaruá nga ayám, ipapadde na sù ira tatolay yù siná-ayám nga kágappá nayù olu nga ayám nga nabigarán ngam matolay paga.

¹⁵ Á meyanugù sù mekaruá nga ayám yù awayyá na nga iddán ta inángá yù siná-ayám nga pidde ra ta kágappá nayù olu nga ayám, tapè makobobuk ána ipapapáte na yù ira tatolay nga ari makimoray kuna.

¹⁶ Á yù mekaruá nga ayám, puersán na nga márkán yù ira tatolay ta jiwánán nga limá ra onu yù muká da, aggira ngámin nga dakal yù pakáwayyá ra onu baddi, yù ira ngámin nga maríku onu pobare, ána yù ira aripan onu ari aripan. ¹⁷ Á awán ta awayyá na tatolay nga malláku onu gumátang nu ari ira namámkán sù ngágan nayù olu nga ayám onu yù numeru na, nga sinniál nayù ngágan na. ¹⁸ Á sikayu nga tatolay nga makánnámmu, bilángan naw laguk nakuan yù kebalínán nayù numeru nayù ayám, nga sinniál na ngágan na tolay, tapè ammu naw yù ngágan na. Á annam nga gatù ta annamapulu ta annam yù numeru na.

14

Yù Kígaw na Karneru ána yù 144,000 nga Tatolay nga Kábulun na

¹ Á kabalín na, iningak ku, á nasingak ku yù Kígaw na Karneru nga manáddak ta puddul na Sion. Á nepulú kuna yù magatù ta appátapulu ta appá ta ribu nga tatolay nga kábulun na. Á aggira, nattúratán yù muká da sù ngágan nayù Kígaw ána yù ngágan nayù Yáma na. ² Á naginná yù kagi nga naggapu ta lángi, nga kunnay ta gurú na dakal nga bagi, onu kunnay sù masikan nga alittúgaw, onu kunnay gapay sù kagi na aru nga magárpá. ³ Á nanáddak nga makkansion yù ira magatù ta appátapulu ta appá ta ribu nga tatolay ta bagu nga kansion ta arubáng nayù ággitubangán nayù mammaguray, ána yù ira appá nga naporò nga matolay nga makkakerumá, ána yù ira lálakalákay. Á awán ta makagigiámmu sù kansiod da, nu ari lá yù ira magatù ta appátapulu ta appá ta ribu nga tatolay, nga iniyígù nayù Kígaw ána inililli na nga naggapu ta dabbuno. ⁴ Á bábbagitolay ira nga ari nalliwiá kâ Apu ta meyanung ta bábbay, nga napasigaggá yù ángnguruk da kuna, á tumuttuttul ira sù Kígaw, maguray lá yù angayán na. Á aggira yù iniyígù ni Apu, nga napolu nga nesinná sù ira tatolay, nga meyawá kári Namarò ána yù Kígaw. ⁵ Á ari ira bulubugá massiri, á awán ta nakaliwatád da.

Yù Inilayalayâ nayù ira Tallu nga Daroban

⁶ Á kabalín na, nasingak ku laguk yù tádday nga daroban nga makkayák ta tangngá na lángi, á en na ilayalayâ yù napiá nga dámak nga mannanáyun, nga ari bulubugá moli áнна ari mapatalián ta áddè ta áddè. Á inilayalayâ na sù ira ngámin nga makkakerumá nga tatolay nga maggián ta makkakerumá nga lugár ta dabbuno, nga makkakerumá yù ággubobuk da. ⁷ Á iniyássikan nayù daroban yù ubobuk na, á kinagi na nira, “Dayáwan naw si Namarò! Á ipasingan naw yù pakimore naw kuna, ta jimittálin yù pamanunnù na ta tatolay. Makimoray kayu kuna, ta aggina yù Namarò ta lángi áнна dabbuno, bebay, áнна ngámin nga latuá na wek,” kun nayù daroban.

⁸ Á ta likuk nayù napolu nga daroban, nappasingan laguk yù mekaruá. Á kinagi na, “Nattalamánin yù ili na Babilonia* nga neparámak ta ngámin nga dabbuno. Ta yù ira tatolay nga naggián tán, kunnay ira ta babay nga magillellaw áнна makikarallow, gapu ta inipáyá da yù ira ngámin nga makkakerumá nga tatolay ta dabbuno, tapè kagumánad da ira ta tuttulad da gapay yù narákè nga ággangguá ra. Á yáyù nga nararálin yù dakal nga ili,” kun nayù mekaruá nga daroban.

⁹ Á páno nayù ira duá nga daroban nga napolu, jimittál nga naporíán laguk yù mekatallu nga daroban, á iniyássikan na yù ngárál na, á kinagi na, “Yawe yù mesimmu sù ira tatolay nga makimoray sù ayám áнна yù siná-ayám nga kagittá na, aggira ngámin nga namárkán ta márká nayù ayám ta muká da onu limá ra. ¹⁰ Mapuersá ira nga mapenum ta binaráyáng nga awán ta nekiruk kuna, nga keyarigán nayù pore ni Namarò. Ta majjigirigá ira ta api áнна asupri nga matuggi, ta paninganán nayù ira mangilin nga daroban ni Namarò áнна yù Kigaw.

¹¹ “Á yù ira nga makimoray sù ayám áнна yù siná-ayám nga kagittá na, nga namárkán sù márká nayù ngágan nayù ayám, á majjigirigá ira ta ággaw onu gabi. Á magatang yù api áнна magata-atátú ta áddè ta áddè, á ari ira bulubugá makebannák ta takí da sù api ta áddè ta áddè, gapu ta nakimoray ira sù ayám áнна yù siná-ayám,” kun nayù mekatallu nga daroban.

¹² Á gapu ta kunnian yù mesimmu sù ira nga ari manguruk ká Apu, á sikayu nga tatole ni Namarò, máwák nga manguruk kayu sù taddán na, áнна palurotan naw yù ipakuá na nikayu, á nepatalugáring ta attamán naw lá yù mesimmu nikayu nga jigá, áнна ipasigaggá naw yù ángngikatalà naw ká Apu Kesu.

¹³ Á kabalín na magubobuk yù mekatallu nga daroban, naginná laguk yù ngárál nga naggapu ta lángi, á kinagi na, “Itúra mu yawe. Mamegapu ngin kunangan, á yù ira tatolay nga matay nga napasigaggá yù ángngikatalà da ká Apu Kesu, pagayáyatan ni Namarò ira,” kun na. “Wan,” kun nayù Mangilin nga Ikararuá, “á kuruk nga magayáyá ira, ta makebannák iren sù tarabáku ra, á mepulupulú nira yù napiá nga kingnguá ra áнна napiá nga nonò da, ta malá da yù balá nayù napiá nga kingnguá ra!”

Yù Meyárik ta Paggaták áнна Pappusik ta Dabbuno

¹⁴ Á pakaginná sù ngárál nga naggapu ta lángi, iningak ku má laguk, á nasingak ku yù puraw nga kunam. Á nagitubang sù kunam yù kun na tolay nga Kaká na ngámin na tatolay,† nga nakuronán yù ulu na ta buláwán. Á sinangngalán na yù gápas nga nataram. ¹⁵ Á nallawán yù tádday nga daroban nga naggapu sù mangilin nga bale ni Namarò. Á iniyássikan na yù ngárál na, á nakkatol sù nagitubang ta kunam, á kinagi na, “Arakin! E ka bi maggaták, ta jimittálin yù paggaták mu ta dabbuno. Gatabam mu laguk yù ira tatolay ta dabbuno, nga kunnay ta nalutu nga kámmayán,” kun na. ¹⁶ Á yù nagitubang ta kunam, ginaták na, á nagaták yù ngámin ta dabbuno.

¹⁷ Á nasingak ku yù tádday nga daroban nga nallawán nga naggapu sù mangilin nga kapilliá ta lángi. Á sinangngalán na gapay yù nataram nga gápas. ¹⁸ Á jimittál laguk yù tádday nga daroban nga makáwayá sù api ta ánnuggián ta meyátáng, á nakkatol ta nasikan sù tádday nga daroban nga manangngal ta nataram nga gápas. Á kinagi na kuna, “Iyusám yù gápas mu, ta gatabam mu yù bungá na úbas, ta nalutu gapay yù ngámin nga úbas,” kun na. ¹⁹ Á inilayá na laguk nayù daroban yù gápas na ta dabbuno, á ginaták na yù ngámin ta dabbuno, á inipayáng na yù ngámin nga ginaták na sù dakal nga áppaggalán. Á yáyù keyarigán nayù mesimmu sù ira tatolay nga ari manguruk ká Apu, megapu sù pore ni Namarò sù ira ngámin nga mamotu kuna. ²⁰ Á napaggal yù ngámin nga ginaták na ta dakal nga abbù ta lawán na ili. Á nallawán yù dága nga naggapu ta abbù nga magagi ta áddè ta

* **14:8** Yù nelímak nga kebalinán na Babilonia támma yù ili na Roma. † **14:14** Innam mu 1:13 futnot; Mattiu 9:6; Markus 2:28; Lukas 12:40; 22:69; Kuan 6:17; 8:18

matturù ta tallu gatù nga kilometro yù kárayyu na, á áddè ta tangngak na kabáyù yù kálaram na.

15

Yù ira Pitu nga Jigâ nga Maporián

¹ Á kabalín na, nasingak ku ta lángi yù tanakuán nga makapállâ, nga keyarigán nayù mesimmu. Nasingak ku yù pitu nga daroban, á iniyánge ra yù pitu nga ánnigirigâ da sù ira tatolay ta dabbuno. Yawe ira pitu nga ánnigirigâ yù kaporianán nga jigâ nga duttál sù ira tatolay ta dabbuno, megapu sù pore ni Namarò nira. Á ta pappasá nayù ira pitu nga jigâ, yáyù kabalín nayù pangukum ni Namarò ta tatolay ta dabbuno. ² Á nasingak ku yù kun na nalínák nga bebay nga napadday ta bidduru nga nakirugán ta api. Á aijan nga nanáddak tán yù ira tatolay nga nangappù sù ayám, gapu ta ari ira nakimoray kuna, á ari ira nakimoray sù siná-ayám. Á ari ira nappamárká ta numeru, nga sinniál na ngáan na. Á sinangngalád da yù árpá ra nga iniyawá ni Namarò nira. ³ Á inikansiod da yù kansion ni Moyses, nga aripan ni Namarò, ána yù kansion nayù Kígaw, nga kunniaw:

“Apu Namarò, nga Yápu mi,

sikaw yù makáwayyá ta ngámin!

Makapállâ yù ngámin nga akkuám mu!

Sikaw yù Patul nga mammaguray ta ngámin nga makkakerumá nga áppatulán.

Á pareku nga matunung yù ngámin nga akka-akkuám mu.

⁴ Apu, awán ta ari makimoray nikaw!

Awán ta ari maddáyaw níkaw!

Ta sikaw yù mangilin nga awán ta kagittá na.

Á yù ira ngámin nga tatolay nga naggapu ta ngámin nga makkakerumá nga áppatulán, umay ira ngámin makimoray níkaw.

Ta sikaw yù makáwayyá nga mamanunnù, nga mepasingan ta matunung lá yù ámmanunnù na.”

Yáyù kansiod da.

⁵ Á kabalid da nakkansion, nasingak ku laguk ta nabukatán yù kangilinán nga lágum ta unak nayù mangilin nga bale ni Namarò ta lángi, nga paggianán nayù netúrá nga taddán ni Namarò. ⁶ Á yù ira pitu nga daroban, nga egga nira nga katággítádday yù ánnigirigâ na sù ira tatolay, nallawán ira nga naggapu sù bale ni Namarò. Nabbarawási ira ta puraw nga gámi, nga malínis ána masiling, á nabbaraká ira ta buláwán ta gáko ra. ⁷ Á yù mekáppá sù ira makkakerumá nga naparò nga matolay, en na inisinek sù ira pitu nga daroban yù pitu nga malukung nga buláwán, nga napannu ta pore ni Namarò nga matolay ta áddè ta áddè. ⁸ Á napannu yù mangilin nga bale ni Namarò ta atù, megapu sù dalingárang na ána yù kangilin na ána yù pakáwayyá na. Á awán ta makatallung sù mangilin nga bale na, áddè ta kabalín nayù pitu nga jigâ nga iniyánge nayù ira pitu nga daroban.

16

Yù ira Pitu nga Malukung nga Napannu ta Pore ni Namarò

¹ Á manganánnuán, naginnâ laguk yù ngáral nga naggapu sù mangilin nga kapilliá, nga bale ni Namarò ta lángi. Á nagubobuk ta nasikan, á kinagi na sù ira pitu nga daroban, “En nawin ibubbù ta dabbuno yù mayán nayù ira pitu nga malukung nga napannu ta pore ni Namarò,” kun na. ² Á minay yù napolu nga daroban, á inibubbù na ta dabbuno yù mayán nayù sinangngalán na nga malukung. Á yù ira tatolay nga namárkán ta sinniál nayù ayám, nga nakimoray sù siná-ayám, dagarágá ira nga nabbutubutáli ta kitabuyù nga makála-áilirák.

³ Á kabalín na, minay laguk yù mekaruá nga daroban, á inibubbù na ta bebay yù mayán nayù sinangngalán na nga malukung. Á nabbáli yù bebay ta kun na dága na natay nga tolay, á natay ngámin yù aijan ta bebay.

⁴ Á kabalín na, minay laguk yù mekatallu nga daroban, á inibubbù na sù ira danum ána latuá na wek yù mayán nayù sinangngalán na nga malukung, á nabbáli ta dága yù ngámin nga danum. ⁵ Á naginnâ yù kinagi nayù daroban nga manaron ta danum. Kinagi na, “Apu Namarò, sikaw yù mangilin nga Egga áddè ngaw gári, ta áddè kunangane.

Á matunung yawe pamanunnù mu sù ira tatolay.

⁶ Ta yù ira tatolay ta dabbuno, pinapáte ra yù ira tatolem ána yù ira ábbilínám mu.

Á yáyù nga ipenum mu nira yù dága, ta yáyù gemma yù kepángngatád da!” kun na.

⁷ Á naginná yù ngáral nga naggapu ta ánnuggián ta meyátáng, á kinagi na, “Apu Namarò, sikaw yù makáwayyá ta ngámin.

Á matunung yù ámmanunnù mu ta tolay.

Kuruk nga mepángngà yù pamagikárum ta tatolay,” kun na.

⁸ Á kabalin na magubobuk karannian, minay laguk yù mekáppá nga daroban, á inibubbù na ta bilák yù mayán nayù sinangngalán na nga malukung. Á yáyù nga neyawá sù bilák yù pakáwayyá na nga manuggi ta tatolay ta kunnay ta api. ⁹ Á natuggi yù ira ngámin nga tatolay, á inibanabanù da si Namarò nga makáwayyá sù ira jigá, megapu sù ira jigá nga jimittál nira. Ngam ari ira nabbabáwi ta liwiliwá da, á arád da jináyaw si Apu Namarò.

¹⁰ Á kabalin na, minay laguk yù mekalímá nga daroban, á inibubbù na yù mayán nayù sinangngalán na nga malukung sù pagitubangán nayù ayám nga mammaguray, á nakkallà yù pammagurayán nayù ayám. Á yù ira tatolay, nangngiritád da yù jilá ra megapu sù pangiyangngà da ta ágganutù na baggi ra. ¹¹ Á gapu ta maganánutù yù butáli ra áнна lutu ra, inibanabanù da si Namarò nga maggián ta lángi. Á ari ira nabbabáwi sù narákè nga akka-akkuád da.

¹² Á pangguá nayù ira tatolay paga ta narákè, minay laguk yù mekánnam nga daroban, á inibubbù na yù mayán nayù sinangngalán na nga malukung sù dakal nga danum na mangngágan ta Uparetis, á nábatán yù danum ádde ta namagá yù dabbun, tapè maparán nga pallakarán nayù ira mammaguray áнна yù ira suddálu ra nga maggapu túrin ta álassangán. ¹³ Á nasingak ku yù tallu nga narákè nga anitu, nga kunnay ta tukayá ta ánninganák ku. Á yù tádday nga anitu, naggapu ta simù nayù mallakay nga kagang. Á yù mekaruá nga anitu, naggapu ta simù nayù makánnanássing nga ayám. Á yù mekatallu nga anitu, naggapu ta simù nayù mattá-ábbilinán.* ¹⁴ Á yù ira tallu nga anitu, dimoniú ira nga daroban ni Satanas, á mappagaddátu ira ta makapállá. Á umay ira ta ngámin nga pápatulán ta tangapáddabbunán, á pattatáddayad da yù ira ngámin nga mammaguray ta dabbuno, tapè umay ira makigerrá ká Namarò nga Makáwayyá ta Ngámin, sù ággaw nga sinullá ni Namarò nga pamaluruò na ta ngámin nga sinalákkuruk na.

¹⁵ Nonopan naw laguk yù kinagi ni Apu Kesu Kiristu, nga kun na, “Ginnán naw yù kagiak ku! Ikáddagá ku lá umay nga kun na makkokò! Á magayáyá yù tolay nga magiddi-iddak níkan, áнна ari mepasirán sangaw nu lubbeká, gapu ta napasigaggá yù ángngikatalá na níkan. Meyárik sù napiá nga suddálu, nga matturá nga magguárdiá, nga naparán áнна nabbarawási, tapè ari makaddák nga magilongán áнна ari mepasirán ta labbè nayù kapitán na.”

¹⁶ Á yù ira tallu nga dimoniú, pinaggagammung da yù ira mammaguray áнна yù ira suddálu ra sù gián nga ingágan nayù ira Kudío ta Armageddon, ta ággubobuk na Kebru.

¹⁷ Á ta kabalin na yaw, á minay laguk yù mekapitu nga daroban, á inibubbù na sù paddák yù mayán nayù sinangngalán na nga malukung. Á naginná yù nasikan nga ngáral nga naggapu sù ággitubangán nayù mammaguray nga aijan ta mangilin nga kapilliá, nga bale ni Namarò ta lángi, á kinagi na, “Netuppálin!” kun na. ¹⁸ Á naginná yù nasikan nga naggurugurú, á nakkilikilá áнна nagalittúgaw ta nasikan, á nallunik nga nasikan. Á yane lunik yù kasikanán nga awán paga ta kagittá na ádde ngaw gári lage na kaparò na tolay ta ádde kunangane. ¹⁹ Á naggakkí yù dabbun nayù dakal nga ili na Babilonia ta tallu sinná. Á narabbá nga nararál yù ngámin ira káruán nga ili ta dabbuno. Á arán na náttamán ni Namarò yù ira tatolay ta ili na Babilonia, ta pinuersá na ira nga pinenung ta kun na binaráyáng nga mapè nga aijan ta passuelu na nga napannu, nga keyarigan nayù nerallá nga pore na nira. ²⁰ Á limimmá yù ira ngámin nga pugu áнна puddul. ²¹ Á napanná ta dabbuno nga naggapu ta lángi yù káddakalán nga yelo nga kun na batu. Á yù karámmá nayù katággítádday yù limápulu nga kilo. Á napannátán yù ira tatolay. Á yáyù nga inibanabanù da si Namarò, megapu sù kapanná nayù káddakalán nga yelo, nga nerallá nga makánnanássing.

17

Yù Meyannung sù Narákè nga Babay nga Makkabáyu ta Ayám

¹ Á kabalin na, jimikki laguk níkan yù mekapitu nga daroban nga kabbulun nayù ira annam nga manangngal ta malukung nga buláwán. Á kinagi na níkan, “Arà! Et ten, ta ipasingak ku níkaw yù ángngukum ni Namarò sù neparámak nga babay nga makikarallaw,

* **16:13** Yù mattá-ábbilinán, ággina galá yù mekaruá nga ayám nga naggapu ta dabbun, nga nebukalán ta 13:11-16.

nga magitubang nga mammaguray ta gián nayù aru nga danum.* ² Aggina yù kinarallo nayù ira ngámin nga patul ta dabbuno. Á yù ira ngámin nga tatolay gapay ta dabbuno, kunnay ira ta pinagillello na megapu sù narákè nga ipakuá na nira,” kun nayù daroban.

³ Á ta kabalin na nepagubobuk nikán, inâ nangà nayù daroban, á iniyánge nangà ta kalállammatán, megapu sù ángngabbák nayù Ikararuá ni Namarò. Á nasingak ku laguk yù babay nga makkabáyu sù ayám nga ujjojjin nga makánnanásing nga pitu yù ulu na áнна mapulu yù tágguk na. Á natúratán yù ngámin nga baggi nayù ayám ta aru nga ngágan nga pangiluddè na kâ Namarò. ⁴ Á yù babay, nabbísti ta asul áнна ujjojjin nga kunnay ta barawási na rená, á naddusáriu, nagarítu, napporselas, áнна nassákkaláng ta buláwán áнна makkakerumá nga nanginá nga batu áнна perlás. Á sinangngalán na yù passuelu nga buláwán, nga napannu sù narákè nga kingngikingngúa na nga makapasirán. ⁵ Á aijan nga netúrá ta muká na yù ngágan nga nelímak yù kebalinán na. Kunniawe yù túrá ta muká na: “Yù ili na Babilonia,

nga paggapuán na ngámin nga mangarallow
áнна ngámin nga mangngúá ta narákè
nga makála-álirák ta dabbuno.”

⁶ Á nasingak ku yù babay, nga nellaw sù dága nayù ira tatole ni Namarò áнна yù dága nayù ira nga napapátay megapu sù ángngikatalá da kâ Apu Kesu.

Á pakasingak ku sù babay, mapállákà kuna. ⁷ Á kinagi na laguk nayù daroban nikán, “Ngattá, ta mapállá ka! Kagiak ku bì nikaw yù kebalinán nayù babay áнна yù ayám nga nakkabáyuán na, nga pitu yù ulu na áнна mapulu yù tágguk na. ⁸ Yù ayám nga nasingam mu, aggina yù ayám nga aijan ngaw, ngam awánin kunangane. Á sangaw, mallawán nga maggapu sù abbú nga awán ta áddè nayù kálaran na. Ngam mokum galá nga maddaretiu ta impiernu. Á aijan ta lángi yù libru nga nangilístán ta ngágan nayù ira ngámin nga tatole ni Namarò nga mepattolay áнна mesipá kâ Namarò ta áddè ta áddè. Á netúrá sù libru yù ngágad da ta áddè ngaw gári lage na kaparò na dabbuno. Á yù ira tatolay nga ari netúrá yù ngágad da sù libru, mapállá ira ta pakasingad da sù ayám nga aijan ngaw, ngam awánin kunangan, á mappasingan má ngin.”

⁹ Á kinagi na laguk nayù daroban paga, “Yù ira tatolay nga makánnámmu, aggira lâ yù makáwayyá nga makanonò sù kebalinán nayù nasingam mu nga babay áнна yù ayám nga pagitubangán na, nga pitu yù ulu na. Á yù kebalinán nayù pitu nga ulu na yù pitu nga puddul, nga gián nayù dakal nga ili. Á aijan gapay yù tanakuán nga kebalinán na, nga pitu ira nga patul nga mammaguray. ¹⁰ Á natayin yù límá sù ira pitu nga patul. Á aijanin yù mekánnam nga mammaguray kunangane. Á ari paga jimittál yù mekapitu. Á sangaw nu duttál yù mekapitu, á mabi lâ yù pammagure na. ¹¹ Á yù ayám nga naggián ngaw, nga awánin kunangane, aggina yù ngaw tádday sù ira pitu, á sangaw nu duttál má, aggina yù mekawalu nga mammaguray, nga meyangay lâ ta kokum na ta impiernu.

¹² “Á yù ira mapulu nga tágguk nayù ayám nga nasingam mu, aggira yù keyarigán nayù mapulu nga patul nga ari paga jimittál. Á meyawá nira yù pakáwayyá ra nga mepammaguray sù ayám. Ngam ta tangoras lâ yù pammagure ra. ¹³ Á gapu ta mattatádday ira ta nonò da, itulù da yù pakáwayyá ra áнна sikad da sù makánnanásing nga ayám.† ¹⁴ Á gerrád da sangaw yù Kígaw. Ngam yù Kígaw áнна yù ira tatolay nga mepulupulù kuna, appútad da yù ira makigerrá sù Kígaw, ta aggina yù Yápu nayù ira ngámin nga yápu áнна yù Patul nayù ira ngámin nga patul. Á yù ira tatolay nga mepulupulù sù Kígaw, aggira yù mekatalá nga inagálán na, nga piníli na ta mangikatalá kuna, nga napasigaggá yù ángngikatalá da.”

¹⁵ Á kinagi na gapay nayù daroban nikán, “Yù aru nga danum nga nasingam mu sù gián nayù pagitubangán nayù makikarallow, yáyù keyarigán nayù aru nga tatolay nga maggapu ta ngámin nga ili ta dabbuno, nga makkakerumá yù ággubobuk da. ¹⁶ Á yù ira mapulu nga patul nga kebalinán nayù mapulu nga tágguk nga nasingam mu, áнна yù makánnanásing nga ayám, ikalusso ra laguk yù babay. Á apad da ngámin yù kukuá na áddè ta awán ta nabuná kuna, á natájjíán nga awán bulubugá ta barawási na. Á kunnay ta kanad da yù pattak na, ta talamánad da áнна tuggiad da. ¹⁷ Á dannian yù mesimmu, gapu ta si Namarò yù namatatádday ta nonò nayù ira patul, tapè tumulù ira sù ayám, á itulù da sù ayám yù pakáwayyá ra nga mammaguray. Á mammaguray yù ayám áddè ta kapalurò na ngámin

* 17:1 Jeremia 51:12-13 † 17:13 Innam mu 17:3 áнна 12:3

nayù kinagi ni Namarò. ¹⁸ Á yù kebalinán nayù babay nga nasingam mu yù dakal nga ili nga neparámak, nga egga yù pakáwayyá na nga mammaguray sù ira ngámin nga patul ta dabbuno.” Yáyù kinagi nayù daroban nikán.

18

Yù Kararál nayù Ili nga Meyárik ta Ili na Babilonia

¹ Kabalin na, á nasingak ku laguk yù tanakuán nga daroban nga umay nga naggapu ta lángi nga dakal yù pakáwayyá na, á nanawagán ta napiá yù ngámin tangapáddabbunán megapu sù dalingárang na. ² Á nakkatol yù daroban ta masikan, á kinagi na, “Nararálin yù dakal nga ili na Babilonia! Nararálin!

Á nabbalin ta paggianán nayù ira dimoniú ána anitu
ána yù ira ngámin nga narákè nga ari masingan.

Á maggián gapay tán yù ira ngámin nga makkakerumá nga maraping nga mammánù nga makála-áilirák.

³ Yáyù nesimmu sù dakal nga ili ána ngámin nga maggián tán,
gapu ta inikanakaná da yù ira ngámin nga tatolay ta dabbuno sù narákè nga ággangngúá ra.

Meyárik ira ta narákè nga babay nga makikarallow,
nga mamagillellaw sù ira ngámin nga kábulun na.
Ngámin nga mammaguray ta dabbuno, kunnay ta neruruk ira kuna.
Ngámin ira nga minálláku nga maggián ta makkakerumá nga lugár,
narriku ira megapu sù pakkaragá na ána kokkuk na,”
kun nayù daroban nga maddalingárang.

⁴ Á naginná laguk yù tanakuán nga ngarál nga naggapu ta lángi, á kinagi na,
“Sikayu nga tatolè, mánaw kayu tán!

Pattaláwán naw yù ili nga meyárik ta makikarallow,
tapè ari kayu mepakkikírúk sù liwiliwá nayù ira tatole nga maggián tán,
marakè mekanakaná kayu gapay sù pamagikárú nira.

⁵ Ta kitáru garè nga kunnay ta nabuttul yù liwiliwá da nga metunù ta lángi.

Á arán na gemma máttamán ni Namarò yù narákè nga kingngikingngúá ra.

⁶ Á kunnay ta panigirigá da sù ira kábulud da, kunnian yù makuá nira.

Á mappaná yù mebalá nira.

Kunnay ta inipenum da ta tatolay yù napè,
á yáyù nga mamidduá yù mepenum nira nga napè.

Mamidduá yù mebalá nira ánnè sù narákè nga kingngikingngúá ra.

⁷ Kitokkuk yù ira tatolay nga maggián sù dakal nga ili,
á inipappalaláki ra yù ngámin nga kukuá ra.

Á yáyù nga mebalá nira yù jigá ána daddam,
gapu ta motun yù nonò da, á kagiad da,

“Yù dakal nga ili mi, nakástá nga meyárik ta rená nga mammaguray,
nga ari bulubugá mabálu nga maraddam ána marigirigá.”

⁸ Á yáyù nga mesimmu nira ta tangággaw yù ngámin nga jigá.

Majjigirigá ira ta makkakerumá nga tulágan, ána maparaddam ira, ána mabisin ira,
ána matuggi gapay ta api yù dakal nga ili ra,

gapu ta makáwayyá si Apu Namarò nga mamanunnù nira.”

Yáyù kinagi nayù ngarál.

⁹ Á yù ira mammaguray ta dabbuno, nga nepattádday sù ira nga maggián sù ili nga mangngúá ta narákè, maraddam ira nga makkulé ta pakerípá da sù atù nga maggapu sù ili nga matuggi. ¹⁰ Á maggián ira ta arayyu, á irípá da yù ili, ta maganássing ira nga dukki sù ili, marakè mekanakaná ira sù jigá na. Á kagiad da,

“Bay ey! Kábbi yù dakal nga ili na Babilonia!
Nabalin ta tangoras yù kokum na,”

kun nayù ira mammaguray ta dabbuno.

¹¹ Á yù ira minálláku nga aijan ta tangapáddabbunán, maraddam ira, á makkulé ira megapu sù kararál nayù ili, gapu ta awánin ta gumátang ta lláku ra. ¹² Awánin ta gumátang ta buláwán, pinaláta, nanginá nga batu, onu perlás. Awánin ta gumátang ta nanginá nga gámi nga makkakerumá, mássiki asul onu ujjojjin, onu seda. Awánin ta gumátang ta makkakerumá nga káyu nga mabanguk onu yù pidde ra ta tong na elepánte ána makkakerumá nga nanginá nga káyu, baronsi, balayáng, onu batu nga mangngágan ta

márbal. ¹³Awán gapay ta gumátang ta kanela, onu yù makkakerumá nga rikádu, onu pulbus nga bábbanguk nga kunnay ta mirra áнна yù tuggiad da nga mabanguk. Awán ta gumátang ta binaráyang, denu, arená, onu baggá, báka onu karneru, kabáyu onu kalesá. Awánin gapay ta gumátang ta tatolay nga aripanad da.

¹⁴Á yù ira minálláku, kagiad da,
 “Awán ta awayyá naw nga gumátang sù karagátan naw nga makkakerumá nga bungá nga káyu nga naggapu ta arayyu áнна yù makkakerumá nga kanan nga aleran naw.
 Limimmá yù ngámin nga áppakástá naw nga makkakerumá nga nanginá, á ari bulubugá metoli nikayu!”

¹⁵Á yù ira minálláku, nga narríku ta palláku ra tán nga ili sù makkakerumá nga inukkuk nayù ira tatolay, maggián ira ta arayyu, nga maganássing sù jigá nayù ira tatolay. Á maraddam ira, áнна makkulé ira. ¹⁶Á iyássikad da yù ngárál da, á kagiad da,
 “Bay ey! Kábbi! Makállállá yù dakal nga ili nga neparámak!

Nakástá nga kunnay ta babay nga nabbarawási ta nanginá nga gámi, nga asul áнна ujjojjin,
 nga naddusáriu, nga nagaritù, nga nassákkaláng, nga napporselas ta buláwán áнна nanginá nga batu áнна perlás!

¹⁷Ta limimmá yù ngámin nga nakástá nga karíku na,
 á ta tangoras lá yù kabalin nayù kararál na!” kud da.

Á ngámin yù ira nga mepattaráku ta barangay áнна biray ta bebay, yù ira kapitád da, á yù ira mangabbák nira, áнна yù ira minálláku, maggián ira ta arayyu nga makerípá sù ili. ¹⁸Á maraddam ira ta pakerípá da ta atù nga maggapu sù katuggi nayù ili. Á makkatol ira, á kagiad da,

“Egga panò áddè ngaw ta áddè kunangan yù ili nga kegittán na?” kud da.

¹⁹Á payyád da ta káppù yù ulu ra. Á makkulé ira ta daddam da. Á katolad da, á kud da,
 “Bay ey! Kábbi yù dakal nga ili!

Yù ngámin nga makákkua ta dakal nga barangay áнна biray ta bebay,
 narríku ira megapu sù karíku na.

Bay ey! Ta awánin ta nabuná sù ili.

Ta tangoras lá, nabalinin yù kararál na ngámin yù karíku na!” kud da.

²⁰Á magayáyá kayu laguk, sikayu nga maggián ta lángi!
 Magayáyá kayu, sikayu ngámin nga tatole ni Namarò,
 áнна sikayu nga piníli na nga minángngilayalayá,
 áнна sikayu ngámin nga ábbilinán ni Namarò!

Ta kunnian yù pangukum ni Namarò sù ira tatolay sù dakal nga ili.

Á kunnian yù pamagikáru na nira, áнна pangibála na nira sù kingngikingnguá ra nikayu!

²¹Á kabalin na, minay laguk yù masikan nga daroban, á iná na yù dakal nga batu, nga kunnay sù mallakay nga batu nga ággilingán, á inipayáng na ta bebay. Á kinagi na,
 “Kunniaw yù kararál nayù dakal nga ili na Babilonia.
 Lummá, nga aringin bulubugá masingan!

²²Á awán ta maginná tán nga ili nga magárpá, onu yù makkansion, yù mappaláwatá, onu yù magamariung.

Á awán ta málek nga mattarábáku nga mappadday ta makkakerumá.

Á awán gapay ta kagi nayù ira mabbáyu onu maggiling.

²³Áwán bulubugá ta nawák na isingan sù gián na ili.

Awán ta tannuk nayù ira tatolay nga makibodá.

Yáyù pamagikáru ni Namarò sù ira tatolay nga maggián ta dakal nga ili na Babilonia,
 gapu ta narákè yù ággangnguá ra.

Ta yù ira minálláku nga naggián ta ili, makáwayyá ira, á karíkuán ira ta tangapáddabbunán.

Á massirisiri ira, á yáyù pangilogò da sù ira ngámin nga tatolay ta dabbuno megapu sù ássalamangká ra.

²⁴Á pagikaruan ni Namarò yù dakal nga ili na Babilonia, gapu ta tán nga ili ra yù namapatayád da

sù ira ngámin nga ábbilinán ni Namarò,

áнна yù ira tatole na,

aggira ngámin nga napapátay ta dabbuno,” kun nayù daroban.

¹ Á kabalin na, naginnâ yù kunnay ta aru nga ngárál nga makkatol ta lángi. Á kinagi ra, “Alelúyá! Maddáyaw ittam kâ Namarò! Aggina yù mangiyígù nittam. Aggina yù kotunán nga makáwayyá ta ngámin.
² Á kuruk nga mepángngà ána matunung yù ámmanunnú ni Namarò. Á pinanunnután ni Namarò yù ili nga meyárik sù babay nga neparámak, nga mamalliawá sù ira tatolay ta dabbuno megapu sù narákè nga ággangguá na.
 Á pinagikáru ni Namarò yù ili gapu ta pamapáte na sù ira masserbi kuna,” kud da.
³ Á pinidduá ra nakkatol, á kinagi ra, “Alelúyá! Maddáyaw ittam kâ Namarò! Magatátú yù dakal nga ili nga matuggi ta áddè ta áddè,” kud da.
⁴ Á namalittúkak laguk nga nallakak yù ira duápulu ta appâ nga lállakalákay ána yù ira appâ nga makkakeruná nga naparò nga matolay, á nakimoray ira kâ Namarò nga nagitubang nga mammaguray. Á kinagi ra, “Ammán! Alelúyá! Maddáyaw ittam kâ Namarò!”

Yù Meyannung sù Pabbodá nayù Kígaw

⁵ Á nakkatol yù ngárál nga naggapu sù ággitubangán nayù mammaguray, á kinagi na, “Sikayu ngámin nga makiaripan kâ Namarò, nga maríku ána pobare, nga makimoray kuna, dayáwan naw si Namarò nga Yápu tam,” kun na.
⁶ Á naginnâ laguk yù kunnay ta aru nga tatolay nga makkatol, nga kunnay ta gurú na dakal nga bagi ána yù gurú na masikan nga alittúgaw. Á kinagi ra, “Alelúyá! Maddáyaw ittam kâ Apu Namarò nga Yápu tam. Ta mammagurayin si Apu Namarò, nga kotunán nga makáwayyá ta ngámin!
⁷ Mepagayáyá ittam laguk, á mappabúyá ittam! Á dayawat tam si Namarò!
 Ta jimittálin yù ággaw nga pangá nayù Yápu tam sù ira tatole na, aggira ngámin nga mangikatalá kuna, nga meyárik ta nobiá na.
 Ta aggina yù mangngágan ta Kígaw na Karneru, á yù ággaw nga pangá na sù ira tatole na yù meyárik ta pabbodá na, tapè mesipá ira kuna.

Á yù ira mangikatalá, nga meyárik ta nobiá na, napanán iren.

⁸ Á mabbarawási ira ta kitapuraw nga gámi, nga narenu nga nasiling.”

Á yù kebalinán nayù puraw nga gámi yù napiá nga kingngikingnguá nayù ira tatole ni Namarò.

⁹ Á nepagubobuk nikán yù daroban, á kinagi na nikán, “Itúrá mu yawe. Kagiam mu, ‘Magayáyá yù ira ngámin nga nápatán ta umay ira mepallálláng sù pabbodá nayù Kígaw,’ ” kun na. Á kinagi na paga nikán, “Danniaw yù kuruk nga ubobuk ni Namarò.”

¹⁰ Á kabalin nayù daroban nepagubobuk nikán, namalittúkagá ta arubáng na, tapè makimorayá kuna nakuan. Ngam gimma nangá, á kinagi na nikán, “Arám mu akkuán yù kunnian. Arám mà pakimorayán. Si Namarò lá yù pakimorayám mu. Ta sikan gapay yù masserbi kâ Namarò, nga kunnay nikaw ána yù ira kábulum mu nga mangikatalá sù kuruk nga inipakánnámmu ni Apu Kesu. Á yù kuruk nga bilin ni Apu Kesu, yáyù inipakánnámmu nayù ira ngámin nga ábbilinán ni Namarò megapu sù pakáwayyá nayù Ikararuá na.”

Yù Meyannung sù Makkabáyu ta Puraw

¹¹ Á kabalin nayù daroban nagubobuk, nasingak ku laguk ta nabukatán yù lángi, á aijan yù puraw nga kabáyu! Á yù nakkabáyu kuna, aggina yù mangngágan ta Kukurugán nga Pangikatalakán, gapu ta matunung yù ámmanunnú na, á matunung gapay yù pakigerá na sù ira malussaw kuna. ¹² Á maggatang yù matá na ta kun na api. Á aru yù kuroná na ta ulu na. Á netúrá ta baggi na yù ngágan na nga awán ta makánnámmu sù kebalinán na, ngam aggina lá yù makánnámmu.

¹³ Á yù nakkabáyu ta puraw, nabbarawási ta gámi nga napayyán ta dága. Á nepakánnámmu ta aggina yù ingágad da ta Ubobuk ni Namarò. ¹⁴ Á nepulú kuna yù kitáru ira nga tumuttul kuna, nga naggapu ta lángi, nga nakkabáyu gapay ta puraw nga kunnay ta suddálu na. Á nabbarawási ira ta puraw nga gámi nga narenu.

¹⁵ Á aggina nga ingágad da ta Ubobuk ni Namarò, aijan kuna yù bayunetá na nga nataram, nga mallawán ta simù na, nga ákkibákál na sù ira ngámin nga makkakerumá nga tatolay ta ngámin nga lugár da ta dabbuno. Á aggina yù mangappù nira, á mammaguray nira, ta awán ta makatubáng kuna. Á kunnay ta balayáng yù baston na, nga keyarigán nayù pakáwayyá na, ta mapalurò yù ngámin nga kagian na. Á pággangan na yù ira makkakerumá nga tatolay megapu sù pore ni Namarò nga Makáwayyá ta Ngámin. Á kunnay ta mangibatatabatay nga mamaggal ta úbas sù áppaggalán na, kunnian yù keyarigán nayù ámmággáng na nira. ¹⁶ Á netúrâ sù barawási na ána alangáng na yù ngágan na nga kunniawe: “Yù Patul na ngámin nayù ira patul ána yù Yápu na ngámin nayù ira yápu.”

¹⁷ Á paningak ku má, nasingak ku laguk yù daroban nga nanáddak ta lángi sù pad-dalingárang na bilák. Á nakkatol ta nasikan, á kinagi na ta ngámin nga mammánù nga makkayakayák ta utun, “E kayu maggagammung, tapè kumán kayu sù ipamakán ni Namarò nikayu!” ¹⁸ Makkákán kayu ta pattak nayù patul, yù pattak na kapitán ána mengal, ána yù pattak na kabáyu ána yù ira nakkabáyu nira, ána yù pattak nayù ira ngámin nga tatolay, nga aripan onu ari aripan, maríku onu pobare,” kun nayù daroban.

¹⁹ Á kabalin na pakkatol nayù daroban, nasingak ku yù makánnanássing nga ayám nga naggapu ngaw ta bebay, ána yù ira patul ta dabbuno ána yù ira kitáru nga suddálu ra nga naggagammung, tapè makigerrá ira sù nakkabáyu ta puraw ána yù ira suddálu na nga nakkabáyu. ²⁰ Ngam nagápù yù makánnanássing nga ayám ána yù mattá-ábbilinán nga nepulù kuna. Ággina galá yù mattá-ábbilinán* nga nappagaddátu ta makapállá nga inipakuá nayù ayám kuna, nga pangilogò na sù ira namárkán sù márká nayù ayám ána yù ira nakimoray sù siná-ayám nga kagittá na. Á nepayáng yù ayám ána yù mattá-ábbilinán, nga matolay lá paga, sù api nga gumággáng nga asupri. Á kitaláwa nga kun na bebay yù api. ²¹ Á nappátay yù ira ngámin nga suddálu ra, megapu sù bayunetá nga mallawán ta simù nayù nakkabáyu ta puraw. Á yù ira ngámin nga mammánù, kinád da yù pattak da ta áddè ta arád da kabattuk!

20

Yù Maribu nga Dagun nga Pammagure ni Apu Kesu Kiristu ta Dabbuno

¹ Á kabalin na, á nasingak ku laguk yù tádday nga daroban nga mappagapagukák nga naggapu ta lángi. Á sinangngalán na yù dakal nga káwák ána yù ánnúsi nayù kallak nayù abbù nga awán ta áddè na kálaram na. ² Á ginápù nayù daroban yù dakal nga kagang. Ággina galá si Satanas, nga mangngágan gapay ta Diáblu, nga dán nga iráw nga nappasingan ngaw nga mangilogò. Á paggápù nayù daroban kuna, bináluk na, tapè ari mapalubbáng ta áddè ta pappasá na maribu nga dagun. ³ Á kabalin nayù daroban namáluk kuna, inipayáng na sù abbù, á kinallabán na yù abbù, á initúsi na. Á naggián lá nga nabáluk si Satanas, tapè arán nen ilogò yù ira tatolay ta ngámin nga áppatulán ta dabbuno ta áddè ta pappasá nayù maribu nga dagun. Á ta kabalin nayù maribu nga dagun, máwák nga mapalubbáng, ngam mabi lá yù paggián na ta lawán.

⁴ Á paningak ku má, nasingak ku laguk yù ira nga nagitubang ta aru nga ággitubangán nayù ira makáwayyá, á neddán ira ta pakáwayyá ra nga mamanunnù. Á nasingak ku gapay yù ikararuá nayù ira tatolay nga napapátay megapu sù panguruk da ána pangi-pakánnámmu ra sù meyanungw ká Apu Kesu ána yù ubobuk ni Namarò. Ággira yù pinutulán nayù ira malussaw ká Apu gapu ta ari ira makimoray sù ayám ána yù siná-ayám nga kagittá na. Á ari ira namárkán ta márká nayù ayám ta muká da onu limá ra. Á maginnanoley ira, tapè mepammaguray ira ká Apu Kesu Kiristu ta maribu nga dagun. ⁵ Á yù kapaginnanoley ra yù mapolu nga pamaginnanoley ni Namarò sù ira tatolay nga naggapu sù ira námmatay. Ngam yù ira káruán nga námmatay, ari ira mepaginnanoley áddè ta kabalin nayù maribu nga dagun. ⁶ Á yù ira ngámin nga mesipá sù mapolu nga pamaginnanoley ni Namarò, ággira yù tatole na nga mangilin, á mepagayáya ira ká Namarò, ta ari ira mekaná sù mekaruá nga patay nayù ira tatolay.* Á natullá ira nga mappári nga masserbi kári Namarò ká Apu Kesu Kiristu. Á mepammaguray ira ká Apu Kesu Kiristu ta dabbuno ta maribu nga dagun.

Yù Kepayáng ni Satanas ta Impiernu

* **19:20** Innam mu 13:11-16 * **20:6** Á yù kebalinán nayù mekaruá nga pate nayù ira tatolay yù kesinná ra ká Namarò ta áddè ta áddè. Innam mu 20:14.

⁷ Á pappasá nayù maribu nga dagun nga pammagure ni Apu Kesu Kiristu ta dabbuno, á mapalubbáng laguk si Satanas sù nebalurán na. ⁸ Á mallawán nga umay mangilogò sù ira tatolay ta dabbuno sù ira áppatulán nga mangngágan ta Gog ána Magog. Á paggagammungan ni Satanas yù ira tatolay, tapè umay ira makigerrá ká Namarò. Á kitáru yù ira suddálu ra nga umay makigerrá ká Namarò, nga ari mebiláng nga kunnay ta dágá ta aggik na bebay. ⁹ Á mammartiá ira nga umay, á massallabád da yù dabbun, á lepuanád da yù paggianán nayù ira tatole ni Namarò ána yù ili na nga iddukan na. Ngam mappanná yù api nga kunnay ta magurán nga maggapu ta lángi, á matuggi ira nga matay. ¹⁰ Á si Satanas nga mangilogò nira, mepayáng sù api nga gumággáng nga asupri, nga kitaláwa nga kun na bebay yù káláwa na, nga netabbatán sù ayám gapay ána yù mattá-ábbilinán, nga napolu nga nepayáng ta api. Á marigirigátán ira tán nga maggaráyán ta ággaw ána gabi ta áddè ta áddè.

Yù Pamanunnù ni Namarò sù ira Námmatay

¹¹ Á paningak ku má, nasingak ku laguk yù dakal nga puraw nga ággitubangán nayù makáwayyá. Á aijan yù nagitubang tán nga mammaguray. Á yù dabbuno ána lángi, limimmá ira nga kunnay ta nattálaw ta arubáng nayù mammaguray, á awánin ta paggianád da. ¹² Á nasingak ku yù ngámin ira nga námmatay, yù ira ngaw makáwayyá ána yù ira ngaw ari makáwayyá. Á nanáddak ira ngámin ta arubáng nayù mammaguray. Á nabukatán yù ira libru, ána yù libru gapay nga netúrátán ta ngágan nayù ira mesipá ká Namarò nga mepattolay kuna ta áddè ta áddè. Á mapanunnután yù ira námmatay ta meyanung sù kingnguá ra, ta aijan netúrá sù ira libru yù ngámin nga kingnguá ra ta keggá ra ta dabbuno. ¹³ Á yù ira nga nanáddak ta arubáng nayù mammaguray, aijan nira yù ira nga nalagabán ngaw ta bebay, ána yù ira námmatay nga naggapu ta gián nayù ira námmatay nga mangngágan ta Kades. Á napanunnután ira ngámin nga taggitádday ta meyanung sù kingnguá na. ¹⁴ Á yù ira námmatay, nga ari netúrá yù ngágad da sù libru nga netúrátán nayù ngágan nayù ira mesipá ká Namarò nga mepattolay kuna, nepayáng ira sù api nga kun na bebay yù káláwa na. Á yù kepayáng da ta api, yáyù mangágan ta mekaruá nga pate ra, ta mesinná ira ká Namarò ta áddè ta áddè. ¹⁵ Ággira yù nepayáng sù kitaláwa nga api nga ari bulubugá máddà, nga ari netúrá yù ngágad da sù libru nga netúrátán nayù ngágan nayù ira mesipá ká Namarò nga mepattolay ta áddè ta áddè.

21

Yù Bagu nga Lángi ána yù Bagu nga Dabbun

¹ Kabalin na, nasingak ku laguk yù bagu nga lángi ána yù bagu nga dabbun, ta nappasá yù napolu nga lángi ána yù napolu nga dabbun. Á awánin gapay ta bebay. ² Á nasingak ku yù mangilín nga ili ni Namarò, nga mangágan ta Bagu nga Jerusalem, nga mappagukák nga naggapu ká Namarò ta lángi. Á nakástá yù ili na nga kunnay ta nobiá nga nabbísti ta nakástá, nga napanán nga magiddak sù tappi nayù mangatáwa kuna.

³ Á naginná laguk yù nakkatol ta masikan nga naggapu ta ággitubangán nayù mammaguray, á kinagi na, “Ajjanin yù paggianán ni Namarò sù ira tatolay. Á mepaggián si Namarò nira, á aggira yù ira tatole na. Á si Namarò lápay yù mepulupulú nira. ⁴ Á punatán ni Namarò yù matá nayù ira tatolay ta kaluluá ra, ta ari ira bulubugá matay onu maraddam onu makkulé, á awán ta mataki onu marigirigá, gapu ta limimmakin yù ngaw dabbun, á nappasá ngin yù ngaw ággiád da,” kun na.

⁵ Á yù nagitubang nga mammaguray, kinagi na laguk níkan, “Innam mu! Pabbaguak ku ngámin,” kun na. Á kinagi na gapay níkan, “Itúrá mu yawe, ta kuruk yù ira ubobuk ku nga mekatálá,” kun na. ⁶ Á kinagi na paga níkan, “Netuppálin! Sikán yù mangngágan ta Alpa ána Omega, ta sikán yù namarò ta ngámin, á sikán yù mamabbalin ta ngámin.* Á iyawá ku sù ira mapangál yù danum nga arád da pagán, nga maggapu ta latuá na wek nga ipakkatole nayù ira tatolay ta áddè ta áddè. ⁷ Yáyù iyawá ku sù ira tatolay nga mangappù ta naráké megapu sù panguruk da níkan. Á sikán lá yù Yápu ra, á aggira lá yù áná ku.

⁸ “Ngam yù ira manukkalak nga manguruk níkan, nga nilikuranád da yù ángnguruk da níkan gapu ta assing da sù ira malussaw níkan, á yù ira nga ari mekatálá, á yù ira ngámin nga jikkù yù akka-akkuád da ána yù ira mamapátay, yù ira mangarallow, yù ira minágganánitu, yù ira makimoray ta sináddios, ána yù ira ngámin nga massiri, á metabbá

* 21:6 Onu, “Sikán yù pamegapuán ána yù pagáddékán na ngámin.”

ira sù api nga gumággáng nga asupri nga kitáláwa nga kun na bebay, á yáyù paggianád da ta áddè ta áddè. Yáyù kebalínán nayù mekaruá nga patay,”† kun na.

Yù Bagu nga Ili na Jerusalem

⁹ Á kabalín ni Apu nagubobuk karannian, minay laguk nga jimikki níkán yù mekapitu nga daroban, nga kabbulun nayù ira daroban nga manangngal sù ira pitu nga malukung nga napannu sù pitu nga kaporianán nga jigá. Á kinagi nayù daroban níkán, “E ka bì nga mepulù níkán, ta ipasingak ku níkaw yù nobiá nga atáwa nayù Kígaw,” kun na. Yáyù keyarigán nayù kepattádde nayù ira tatole na kuna. ¹⁰ Á kabalín na nagubobuk, á kunnay ta sinangngalán nangá nayù Mangilín nga Ikararuá, á yù daroban, iniyánge nangá laguk ta atannáng nga puddul. Á inipasingan na níkán yù mangilín nga ili ni Namarò, nga ili na Jerusalem nga mappagukák nga naggapu kâ Namarò ta lángi. ¹¹ Naddalingárang yù ili megapu sù dalingárang ni Namarò. Á nasiling gapay ta kunnay sù ássiling nayù nanginá nga batu nga jasper, nga malitáw ta kun na bidduru áнна kun na api yù kulor na. ¹² Á nálitukán yù ili ta nakannak nga jijjing nga atannáng, nga egga kuna yù mapulu duá nga puertá, nga guárdián na mapulu duá nga daroban. Á neturá sù ira puertá yù ngágan nayù ira mapulu duá nga ánná ni Israel. ¹³ Á aijan tallu nga puertá ta állassangán, á tallu gapay yù puertá ta ammiánán, á tallu gapay ta abagátán, áнна tallu gapay ta állammarán. ¹⁴ Á mapulu duá gapay yù makkakerumá nga batu nga panáddagán nayù jijjing. Á aijan nga neturá sù ira katággítádday nga batu yù ngágan nayù ira mapulu duá nga minángngilayaláyá nga sinudduán nayù Kígaw.

¹⁵ Á yù daroban nga nepagubobuk níkán, sinangngalán na yù ággukuk nga buláwán, tapè gukuran na yù ili áнна yù ira nakannak nga jijjing nga nelepuán sù ili áнна yù ira puertá na. ¹⁶ Á kunnay ta pareku nga kuadrádu yù ággián nayù ili, nga naggigittá yù ira kátannang na, yù káláwa na, áнна yù kápaddu na. Á paggukuk nayù daroban sù ili, mapulu duá nga ribu (12,000) ta ággukuk na yù káláwa na, nga mággè duáribu ta appátatagatù (2,400) nga kilometro. ‡ Á kunniù gapay yù kápaddu na áнна yù kátannáng na. ¹⁷ Á ginukuk na gapay nayù daroban yù jijjing nga nelepuán sù ili, á magatù appátapulu appá (144) nga ággukuk nayù daroban yù kátannáng na, nga mággè pitupulu duá (72) nga metro, gapu ta mággè naggittá ira nga ággukuk nayù daroban áнна yù gadduá nga metro tam nga tatolay.

¹⁸ Á yù jijjing nayù alitù, napadday ta nanginá nga batu nga jasper. Á dipuru buláwán yù ili, nga malitáw ta kun na bidduru. ¹⁹ Á yù ira mapulu duá nga panáddagán nayù jijjing, nakástá ira, nga napayyán na makkakerumá nga batu nga nanginá nga nasiling. Á yawe yù ira mapulu duá nga batu nga malitáw yù kulor da, nga panáddagán nayù jijjing. Yù olu nga panáddagán yù batu nga jasper, nga malitáw ta kun na bidduru áнна kun na api yù kulor na. Á sapiro nga asul yù mekaruá. Á kalkeroni yù mekatallu, nga makkakerumá yù kulor na. Á emaral yù mekáppá, nga malitáw nga berdi. ²⁰ Á sardonika yù mekalímá, nga puraw áнна ujojjin. Á karnelia yù mekánnam, nga ujojjin. Á kirisolito yù mekapitu, nga malitáw nga ngilá. Á berilo nga malitáw nga berdi yù mekawalu. Á yù mekasiám, topasio, nga kun na malitáw nga buláwán. Á kirisoprasio yù mekamapulu, nga kun na náta nga buláwán nga malitáw yù kulor na. Á asinto yù mekamapulu tádday, nga ngisi nga asul, á amatista yù mekamapulu duá, nga malitáw nga ujojjin nga asul.

²¹ Á yù mapulu duá nga puertá nayù alitù nga nelepuán ta ili, á tangaperlás yù ira taggítádday. Á yù kalsáda nayù ili, dipuru buláwán, nga malitáw ta kun na bidduru.

Yù Ággiát tam ta Bagu nga Ili na Jerusalem

²² Á awán ta nasingsak ku nga kapilliá sù ili, ta arád da máwák yù kapilliá, gapu ta aijan tán si Apu Namarò nga makáwayyá ta ngámin, áнна yù Kígaw, á aggira yù pakimorayán nayù ira ngámin nga tatolay táne ili. ²³ Á arád da máwák yù nawák na bilák onu bulán sù ili, gapu ta maddalingárang nga manawák yù ili megapu sù dalingárang ni Namarò áнна yù nawák nayù Kígaw. ²⁴ Á manawagán yù ira ngámin nga tatolay ta pallakák da ta dabbuno megapu sù dalingárang nayù ili. Á yù ira ngámin nga patul ta dabbuno, ituluk da yù kapiánád da sù ili. ²⁵ Ta maggián nga ne nabukatán yù ira puertá nayù ili, gapu ta ari ira melitù nu ággaw, á awán ta gabi tán. ²⁶ Á yù ngámin ira nga makkakerumá nga tatolay, ed da ituluk sù ili yù ngámin nga kukuá ra nga nakástá áнна yù kapiánán nga aijan nira. ²⁷ Ngam awán

† 21:8 Innam mu 20:6 futnot. ‡ 21:16 Ta mággè naggittá ira nga tangággukuk nayù daroban áнна límá nga kilometro, nga ággukuk tam.

bulubugá ta makatallung sù ili nu ari narenu ta ánninganán ni Apu. Ari makatallung yù ira nga makála-áilirák yù akka-akkuád da onu yù ira massiri. Ngam makatallung lâ sù ili yù ira tatolay nga netúrâ yù ngágad da sù libru nayù Kígaw, nga netúratán ta ngágan nayù ira tatolay nga mesipá sù Kígaw nga mepattolay kuna ta áddè ta áddè.

22

Yù Danum nga Kepattole tam kê Apu ta Áddè ta Áddè

¹ Á paningak ku sù ili, inipasingan na laguk nayù daroban nikán yù danum nga ipakkatole na tolay ta áddè ta áddè. Á malitáw yù danum, nga massiling ta kun na bidduru. Á magagi yù danum nga naggapu sù ággitubangád di Namarò áнна yù Kígaw. ² Á magagi yù danum sù tangngá na kalsáda nayù ili, á egga nga massiddammáng yù káyu nga mabbungá ta ipakkatole tam ta áddè ta áddè. Á mamemapulu duá yù pabbungá nayù káyu ta tangaragun, ta mapulu duá nga makkakerumá nga bungá na. Á moru yù ira ngámin nga makkakerumá nga tatolay ta dabbuno megapu sù don nayù káyu, tapè mammapiá ira.

³ Á awán bulubugá ta igagek ni Namarò sù bagu nga ili nga kunnay sù ngaw pangigagek na ta dabbuno,* ta maggián tán di Namarò áнна yù Kígaw nga nagitubang nga mammaguray. Á yù ira ngámin nga tatolay ta ili, masserbi ira kê Namarò áнна makimoray ira kuna.

⁴ Á masingad da yù mammang na, á netúrâ yù ngágan na ta muká da. ⁵ Á awán ta gabi sù ili. Arád da bulubugá máwák yù isingan onu nawák nayù bilák, gapu ta si Apu Namarò yù mamannawák nira. Á mepammaguray ira kê Namarò ta áddè ta áddè.

Manoli si Apu Kesu Kiristu sangaw

⁶ Á kabalin nayù daroban mangipasingan sù ili, kinagi na laguk nikán, “Kuruk nga mekatálá ngámin danniaw nga ubobuk ni Namarò. Ta ipepúlù ni Namarò sù ira ábbilinán na yù Ikararuá na. Á si Namarò nga mangiyawá sù Ikararuá na, aggina galá yù maddok nikán nga daroban na, ta ek ku ipasingan nikayu nga masserbi kuna yù mesimmu sangaw nu mabi.”

⁷ Á yawe yù kinagi ni Apu Kesu, “Ginnán naw laguk yù kagiak ku. Manolingá sangaw nu mabi! Mapagayá yù ira ngámin nga tatolay nga manguruk sù bilik ku nga netúrâ sawe nga meyanung sù mesimmu sangaw,” kun na.

⁸ Á sikán si Kuan, nga nakaginná áнна nakasingan sù ngámin nga inítúrâ ku saw. Á kabalik ku nakaginná áнна nakasingan, á namalittúkagá ta arubáng nayù daroban nga nangipakánnámmu nikán karannian, tapè pakimorayák ku nakuan. ⁹ Ngam gimmá nangá, á kinagi na nikán, “Arám mà pakimorayán, ta masserbingá kê Namarò gapay, nga kunnay nikayu áнна yù ira wáwwagim nga ábbilinán na áнна yù ira ngámin nga manguruk sù netúrâ sawe libru. Si Namarò lâ yù pakimorayát tam!” kun na.

¹⁰ Á kinagi na paga nayù daroban nikán, “Arám mu ilímak yù inipalappá ku nikaw nga mesimmu, nga netúrâ sawe libru, ta mabíkin yù dattál na. ¹¹ Á dattál na ággo na, á yù ira nga mangguá ta narákè, akka-akkuád da lâ paga yù narákè, áнна yù ira nga jikkù yù akkuád da, akka-akkuád da lággapay yù jikkù. Ngam yù ira mangílin nga tatole ni Namarò, nga napiá áнна matunung lâ yù akkuád da, á tuppálad da lâ paga yù ngámin nga napiá nga ipakuá ni Namarò nira.”

¹² Á kinagi ni Apu Kesu, “Ginnán naw yù kagiak ku. Manolingá sangaw nu mabi, á mepulù nikán yù íbálà ku sù ira tatolay nga katággítádday ta mepángngá sù kingnguá na.

¹³ Sikán yù mangngágan ta Alpa áнна Omega, ta sikán yù napolu áнна yù maporián. Sikán yù namarò ta ngámin, á sikán gapay yù mamabbalin ta ngámin.”†

¹⁴ Á yù ira tatolay nga napakarenuán, pagayáyan ni Namarò ira gapu ta kunnay ta binábbalád den yù gámi da, nga sinniál ta napakomángin yù liwiliwá da. Á meyawá nira yù awayá ra nga tullung ta puerta nayù ili áнна yù awayá ra nga kumán ta bungá nayù káyu nga ipakkatole ra ta áddè ta áddè. ¹⁵ Ngam yù ira narákè nga tatolay, ari ira makatallung sù ili. Ngámin yù ira maganánitu, yù ira mangarallow, yù ira mamapátay, yù ira makimoray ta sináddios, yù ira ngámin nga massiri áнна yù ira áppè pípiá, maggián ira lâ ta lawán, ta ari ira makatallung sù ili.

¹⁶ Á kinagi ni Apu Kesu Kiristu, “Sikán si Kesu! Á jinok ku yù darobak ku ta gián naw, ta en na ipakánnámmu nikayu ngámin danniaw, tapè umay kayu mangipakánnámmu sù ira ngámin nga makkakerumá nga maggagammung nga mangikatalá nikán. Sikán yù ginaká

* 22:3 Genesis 3:17-19; Roma 8:20-21 † 22:13 Innam mu 21:6 futnot.

ni Patul Dabid. Sikán yù mangngágan ta Darámmagan, nga bituan nga maddalingárang ta alippánnawák, nga keyarigák ku,” kun ni Apu Kesu.

¹⁷ Á yù Mangilin nga Ikararuá, agálán na, nga kun na, “Umay ka!” Á yù ira ngámin nga mangikatalà kâ Apu Kesu, nga meyarík sù nobiá nayù Kígaw, agálád da gapay, nga kud da, “Umay ka!” Á sikayu ngámin nga taggitádday nga magginná sù bilin na yawe libru, kagian na, “Umay ka!”

Á sikayu ngámin nga kunnay ta mapangál, umay kayu laguk mangikatalà kâ Apu Kesu! Sikayu nga makkaragá sù danum nga ipakkatole tam ta áddè ta áddè, umay kayu makiyígù kâ Apu Kesu, tapè makálá kayu ta inuman naw, nga awán ta pagá na!

¹⁸ Á sikán si Kuan. Á pappalának ku sikayu ngámin nga magginná sù inipalappâ ni Namarò níkán nga iníturâ ku sawe libru. Taddánat takayu ta arán naw lannapán yawe netúrâ, ta nu ajjan yù toláy nga lannapán na yawe libru, á lannapán na gapay ni Namarò yù jigirigá nga ikáru na kuna nga kunnay sù netúrâ sawe libru. ¹⁹ Á nu ajjan yù mangari sù ubobuk nga netúrâ sawe libru nga meyannung sù mesimmu sangaw, arán na gapay iyawâ ni Namarò kuna yù balle na sù bungá nayù káyu nga ipakkatole tam ta áddè ta áddè. Á ari mesipá sù mangilin nga ili ni Namarò nga inipakánnámmu na nittam sawe libru.

²⁰ Á si Apu Kesu yù massistígu ta kuruk yù ngámin nga netúrâ sawe libru. Á kagian na, “Á manolingá sangaw nu mabi,” kun na. “Ammán, Apu! Mabi ka lâ umay!” kut tam kuna laguk.

²¹ Á yawe yù ipakimállá ku kâ Apu Kesu, ta parè bì ta ikákkállá na kayu ngámin nga mangikatalà kuna. Mapalurò! Ammán! Áddè nen.